

# Didza' cubi rucá'ana tsahui'

Rincón Zapotec New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

Salmos.....	4
San Mateo.....	64
San Marcos.....	98
San Lucas.....	119
San Juan.....	154
Hechos.....	180
Romanos.....	212
1 Corintios.....	226
2 Corintios.....	239
Gálatas.....	247
Efesios.....	252
Filipenses.....	257
Colosenses.....	261
1 Tesalonicenses.....	265
2 Tesalonicenses.....	268
1 Timoteo.....	270
2 Timoteo.....	275
Tito.....	278
Filemón.....	280
Hebreos.....	281
Santiago.....	291
1 Pedro.....	295
2 Pedro.....	299
1 Juan.....	302
2 Juan.....	306
3 Juan.....	307
Judas.....	308
Apocalipsis.....	310

# Salmos

**1** Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxón nupa tun dul-la', en biti' runë' tsözxón le tun nupa ta'z'í quidza' Dios.  
<sup>2</sup> Le raza lãdxë'ë nãcagaca xibã nãguixjë' Xanru', en ca nãcagaca xibã na' rëla, en te dza rulaba lãdxë'ë.  
<sup>3</sup> Bönni' ni nãquië' ca tu yaga dxe' ga naca ra' nisa, le ribã sãzxöni cate' ridxín dza que, en biti' ca' rizóa gubá'ayisö. Yúgu'të le runë' ta'rúaj dxi'a.  
<sup>4</sup> Biti' raca caní quégaca nupa tuá' dö'. Nãcagaca ca bëbu zxe café ruá' le bö'.  
<sup>5</sup> Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.  
<sup>6</sup> Rapa chi'ë Xanru' Dios nõza ga ta'dé' bönni' tsahui' na', pero uniti tsaz nu ridá gapa ta'dá nupa tuá' dö'.  
**2** ¿Bizx que tu'tsatsa bönachi yugu' yödzö en tu'pá'a nítisö le ilúngaca?  
<sup>2</sup> Bönni' ta'nná bë'ë luyú ta'dá'baguë'ë Dios. Tun tuz xtídza'gaca nupa dë lu ná'agaca para ila'dá'baga' Xanru', en Nu na' nabó cazë' para inná bë'ë,  
<sup>3</sup> ta'nná: "Uzxuzxaj uquínnajru' le ta'nná bé'enë' rë'u, en chú'unaru' yugu' le tu'zenë' bach rë'u."  
<sup>4</sup> Dios na' zoë' yehua' yubá uzxidxisé'. Xanru' Dios utitaj cazë' léguequi.  
<sup>5</sup> Ní'irö lu yöl-la' rilé queë' gü'ílenë' léguequi didza', en lu yöl-la' ridzá'a queë' uzënë' bach léguequi.  
<sup>6</sup> Innë': "Nuzóa caza' bönni' nabó caza' xilatjë' ga inná bë'ë.  
 Inná bë'ë lu Gu'ía Sión, le naca gu'ía lá'ayi quia'."  
<sup>7</sup> Quíxjöi'ida' lib'íli' didza' nuzóë' tsaz Dios. Xanru' Dios gudxi cazë' neda': "Li' nacu' Zxí'ina'. Na'a dza nuzóa caza' Li'.  
<sup>8</sup> Gunábini neda', ate' guna' ga ilequi quiu' yugu' yödzö.  
 Guequi ca' quiu' idútë yödzölió.  
<sup>9</sup> Quitsju' léguequi len tu xiyaga guíë.  
 Uzxuzxju' léguequi ca run nu rilá'a tu xigã yó'öna."  
<sup>10</sup> Que lë ni na', lib'íli' na' rinná bë'ëli', guli'tséajni'i. Guli'sedi cuinli', núlöli' ruchi'a rusöröli' le raca luyú.  
<sup>11</sup> Lu yöl-la' ba'a lãdxi' queé'li' guli'gún xichinë' Xanru'. Lu yöl-la' rizxizi queé'li' buli'sí' xibé'.  
<sup>12</sup> Guli'gún bal Zxí'inë' Dios para cabí ilétenë', en para cabí udxí queé'li' la' nõza. La' ilentë yöl-la' rilé queë'.  
 ¡Bica' ba yúgu'të nupa tu'zxöni lãdxi' Lë'!

**3** Xan, chinayángacada' nupa ta'lé neda'.  
<sup>2</sup> Zián nupa ta'dá'baga' neda'.  
<sup>2</sup> Zián nupa ta'nnë quia', ta'nná: "Biti' usölë' Dios lë'."  
<sup>3</sup> Pero Li', Xan, run chí'ítica'su' neda'.  
 Nacu' yöl-la' ba quia', en Nu rutipa neda'.  
<sup>4</sup> Bë'a zidzaj didza', bulidza'-në' Xanru', ate' Lë' biyönnë' chí'a ga na' zoë' lataj lá'ayi queë'.  
<sup>5</sup> Neda' rata', en rasia', ate' rubana', tu' nazóntica'së' Xanru' Dios neda'.  
<sup>6</sup> Biti' gãdxida' gayuá' gayuá' bönachi, nupa na' nagú'ugaca neda' lë'ajlö.  
<sup>7</sup> ¡Guyasa, Xan! ¡Busölá neda', Dios quia'!  
 Budxía huë' xága'gaca nupa tu'díi neda', en buquínnajda' nupa nãcagaca xihui'.  
<sup>8</sup> Xan, rusölá cazu' bönachi quiu'.  
 Ben ga gaca dxi'a quégaca bönachi quiu'.  
 ¡Ca' gaca!  
**4** Bubí'i didza' cate' rulidza' Li', Dios. Nacu' Nu ruchi'a rusörö le raca quia'.  
 Cate' gurö'a böniga, bida cazu' Li' ga zoa', en gú-calenu' neda'.  
 Ruhuéchi' lãdxi' neda', en ruzé nagu' le rinábida' Li'.  
<sup>2</sup> Rnnë' Dios: "Lib'íli', bönachi, ¿gáca'xte ulidza dí'tajli' neda'?  
 ¿Gáca'xte caz idxi'ili' le cabí nazaca', en gü'í lãdxi'li' le cabí naca?"  
<sup>3</sup> Guli'tsöjné nabó cazë' Xanru' nu radxi Lë', ate' riyönnë' neda' cate' rulidza'-në'.  
<sup>4</sup> Guli'gadxi Lë', en bitirö gunli' dul-la'.  
 Guli'sá' lãdxi' ca naca lë ni cate' dëli' ga ráta'li', en guli'sóa dxisö.  
<sup>5</sup> Guli'cú'u lahuë' Xanru' le naca dxi'a, en buli'zxöni lãdxi' Lë'.  
<sup>6</sup> Zián nupa ta'nná: "¿Nuzxi caz gun ga gaca dxi'a queëru'?"  
 Lu yöl-la' dxi'i lãdxi' quiu' buyú netu', Xan.  
<sup>7</sup> Runu' ga rudzëjade'eröda' ca tu'dzeja nupa tu'z'í xibé xzoa' za guizxi yu, en xisi lubá uva.  
<sup>8</sup> Cate' rata', la' rásitia' lu yöl-la' riböza dxi lãdxi' quia', tu' run cazu' Li', Xan, ga riböza' dxi'a tsáhu'i'do'.  
**5** Ruzé nagu' didza' ruá'a, Xan.  
<sup>2</sup> Buyú ca rinnëda' lãdxa'a lu yöl-la' ruhu'ini quia'.  
<sup>2</sup> Dios quia', Nu rinná be'e neda', ruzé nagu' cate' rinábida' Li'  
 gácalenu' neda', na' gü'ílena' Li' didza'.  
<sup>3</sup> Yugu' zila yönnu' chí'a.  
 Zílado' idxina' lo', en cöza' didza' ubi'u.

4 Nacu' Li' Dios bití' raza ládXu'u le cabí naca, en bití' ru'u lataj ibiga' ga zu' nu ruá' dö.  
 5 Bití' ru'u lataj nupa tun ba rahui ilá'dxín lo', en bití' rilé'enu' dxí'a nupa náCagaca xihuí'.  
 6 Rusunítu' dërö nupa ta'z'í ye'e luzé'eguequi, en bití' rilé'enu' dxí'a nupa tuti bönachi, en ta'z'í yé'.  
 7 Gaca tsu'a neda' lu yu'u lidXu', tu' nadxí'ide'enu' neda'.  
 Lu yöl-la' ba'a ladxí' quia' tsu'a ga naca yudo' lá'ayi quiu', en tseaj ládxa'a Li'.  
 8 Tu' nacuá' zían nupa ta'lé neda', bulu'í neda' le naca dxí'a ré'enu' guna', Xan.  
 Busédi neda' para gaca guna' ca ré'enu' Li'.  
 9 Bití' gaca nu tseajlé' didza' tu'í nupa na' ta'lé neda'. NáCagaca xihuí' icja ládxi'do'guequi.  
 Naca ruá'agaca ca tu yeru ba nayalaj, en lu yöl-la' rizí' yé' quéguequi tu'í yulaj didza'.  
 10 Ben léguequi xigua', Dios.  
 Ben ga bití' udxín xtí'dza'guequi.  
 Gurú'una léguequi tu' túntica'sö dul-la', en tu' ta'dá'baga' xtí'dzu'u.  
 11 Ulu'dzeja nupa tu'zxöni ladxí' Li'.  
 Lu yöl-la' rudzeja quéguequi gúl-lagaca quiu' tu' rá-calenu' léguequi.  
 Tu'z'í xibó' nupa nadxí'igaca Li'.  
 12 Run cazu' Li' ga raca dxí'a quégaca nupa tun ca n- na xtí'dzu'u, Xan.  
 Lu yöl-la' dxí'í ladxí' quiu' run chí'u léguequi.  
 6 Bití' uzenu' bach neda' lu yöl-la' rilé quiu', Xan.  
 Bití' gunu' neda' xigua' lu yöl-la' ridzá'a quiu'.  
 2 Buéchi' ladxí' neda', Xan, tu' rudú ládxa'a.  
 Bun neda', Xan, tu' riguí' rizáca'a.  
 3 Rö'ö böniga idútè le naca'.  
 ¿Gáca'xte caz gaca caní, Xan?  
 4 Gudá dusöló' neda', Xan.  
 Tu' nadxí'inu' neda', busólá neda' lu yöl-la' guti.  
 5 Lu lataj chul-la cuntú nu tsöjné Li'.  
 Cuntú nu zoa ní' nu gaca cu'u Li' yöl-la' ba.  
 6 Rudú ládxa'a tu' rinnética'sö ládxa'a.  
 Yugu' dzö' ribisa le ráti'da' len nisa ribödxí quia'.  
 Rusubisa' xcúgua' len nisa ribödxí quia'.  
 7 Rö'ö gui guió'j lahua' tu' ribödxitica'sa'.  
 Bití' gaca ilé'eda' tu' nózigaca nupa tu'dí'í neda'.  
 8 Gulí'cuíta ga zoa', libí'ili', ruá'ali' dö', tu' riyönné' Xanru' ribödxá' neda'.  
 9 Ruzé' nagué' le rulidza', ráta'yua' lahué', en rubí'è didza' cate' bi rinábida' Lè'.  
 10 Ulu'tuí'í nupa tu'dí'í neda', en ila'bó' böniga.  
 Lu yöl-la' rutuí'í quéguequi ulu'biga' ga zoa'.  
 7 Ruzxöni ládxa'a Li', gácalenu' neda', Xana' Dios.  
 Busólá neda' lu ná'agaca nupa ta'bía no neda', en gúcalen neda'  
 2 para cabí soa nu cuéaj neda' ca runba' bédxi guixí', en para cabí usuniti neda' ga cuntú nu zoa gácalen neda'.  
 3 Xana' Dios, channö caní nuna':  
 Channö nabága'a xigua',  
 4 o channö bubí'a dö' que nu gúcalen neda',

o channö bí'a dö' que nu bití' bi ben quia' lu bití' rilé'e neda' dxí'a,  
 5 bé' lataj soa regu' neda' nu na' bití' rilé'e neda' dxí'a, en ucul-la neda'.  
 Bé' lataj nu na' quin neda' lu yu, en ucá'ana neda' cá'asö.  
 6 Lu yöl-la' rilé quiu' guyasa, Xan.  
 Gudá'baga' nupa na' lu yöl-la' ridzá'a quéguequi tá'ba-ga' neda'.  
 Guyasa, gúcalen neda' tu' nacu' Nu ruchi'a rusöró le raca quia'.  
 7 Ben ga ulu'dubi quiu' yúgu'tè bönachi, en gunná be'e léguequi ga ní' zu' xitsátèrö.  
 8 Ruchi'a rusöröu' quéguequi yúgu'tè bönachi, Xan.  
 Bubéaj neda' tsahuí', Xan, tsca naca le tsahuí' nuna', en tu' naca' idú tsahuí'.  
 9 Ben ga udxí que le xihuí' tun nupa tuá' dö', pero buzóa tsutsu nupa tun le naca dxí'a, tu' nacu' Li' idú tsahuí', Dios, en ruchi'a rusöröu' le ta'zá' ládxi'gaca bönachi, en le ta'guínnaj ícjague-qui.  
 10 Naca cazè' Dios Nu run chí'í neda'.  
 Rusölé' nupa náCagaca idú ladxí'.  
 11 Dios ruchi'a rusöröè' queëru' ca naca le naca tsahuí',  
 en richúgutica'sè' quégaca nupa tuá' dö'.  
 12 Channö cabí ulu'bí'í ladxí' bönachi, utuchè' gué tuchi' queé'.  
 Chinucözè' uxiti' yaga queé'.  
 13 Chinupé'è yugu' le rudí'inè' lu gudil-la, en nudxiè' lu du uxiti' yugu' yaga túchi'do' zoa guí láhuiguequi.  
 14 Buyútsöca', riguínnaj icjè' bönní' ru'è dö' le xihuí' gunè'.  
 Ruí'í ládXè'è le naca dö', en rizí' yé'è.  
 15 Nachó'önè' ga rè' tu yeru zxön ga nu ibixi, pero lè cazè' yöjbixè' lu yeru na' guchó'önè'.  
 16 Budxín la' queézè' dö' na' bí'è, en dxí'è hué' ca naca xigua' nabáguè'è.  
 17 Guía'-nè' Xanru': "Xclenu'" tu' náquiè' tsahuí', en gul-la' yöl-la' ba que Lè' Xanru', Nu nayépisètèrö.  
 8 ¿Xana' Dios,  
 bica' ba Lo' idútè yödzölió!  
 ¿Xitsátèrö ca lúzxiba nayépisu' Li'!  
 2 Tú'l-labí' bí'ido', enca' bí'í hué'énido' yöl-la' zxön quiu' sal-la' nacuá' nupa ta'dá'baga' Li'.  
 Uzóa dxíu' nupa na' bití' ta'lé'e Li' dxí'a, enca' nupa ta'dá'baga' Li'.  
 3 Cate' ruyúa' lúzxiba quiu', le nunu' len xibón na'zu', enca' beu', en yugu' böljaj bení' nuzú' xilátjaguequi,  
 4 ní'irö rnní'a: ¿Bizxi caz bönní', tu' röjné cazu' lè'?  
 ¿Bizxi caz nu naca bönáchisö, tu' ruí'í ládXu'u Li' nu na'?  
 5 Nunu' ga naquiè' bönní' ia'lati' cuidí' ca naca cazu' Li'.  
 Nuzú' queé' yöl-la' ba quiu', en yöl-la' run bal ca tu le néquini oro dxía icjè'.  
 6 Nunu' ga rinná bé'enè' yugu' le nun cazu' Li'.  
 Yúgu'tè nuzú' xini'è lè'.

7 Nuzú' xini'è yúgu'tèba' bö'cu' zxila', en yúgu'tèba' bédxi,  
 8 en lès caní nunu' ca' quégacaba' biguinnido',  
 en quégacaba' böla dzó'öba' nísado',  
 enca' quégacaba' yúgu'tèba' böa' ta'dódiba' lu nísado'.  
 9 ¡Xana' Dios,  
 bica' ba lo' idütè yödzölió!  
 9 ¡Idú ládxa'a rigú'a Li' yöl-la' ba, Xan!  
 ¡Usiyönda' bönachi ca naca yúgu'tè yöl-la' huáca nunu'!  
 2 ¡Udzéjada', en uzi'a xibó!  
 ¡Gul-la' yöl-la' ba que Lo', tu' nayépisètèru'!  
 3 ¡Ta'zxunnaj nupa ta'dá'baga' neda'!  
 ¡Ta'dzó'ö, en tu'niti lo' Li',  
 4 tu' nubéaju' tsahui' le naca dxi'a runa'!  
 ¡Rö'u ga rinná bè'u, en ruchi'a rusóró'u' queétu' ca naca le naca tsahui'!  
 5 Bulidza zí'u yugu' yödzö, en busunítu' nupa tuá' dö'.  
 Tsaz busulu' lu guichi quiu' gapa gula'zúaj láguequi.  
 6 Chigula'niti nupa gula'dá'baga' Li'.  
 Tsaz naguinnajgaca gapa gula'cuá'.  
 Busunítu' yugu' yödzö gapa na' gula'cuá',  
 ate' cuntu nu zoa röjné yugu' yödzö na'.  
 7 Zóatica'sè' Xanru' Dios.  
 Naguixjè' tsaz lataj ga rö'è rinná bè'è en ruchi'a rusóró'è' quégaca bönachi.  
 8 Uchí'a usörö'è' quégaca bönachi yödzölió lu le naca tsahui'.  
 Uchí'a usörö'è' quégaca yugu' yödzö lu le nácatè.  
 9 Gun chí'è Xanru' Dios nupa nácagaca yechí'.  
 Gácalenè' láguequi cate' nu gun láguequi zí'.  
 10 Ulu'zxöni ladxí' Li' nupa núnbè'gaca Lo'.  
 Caní gaca, Xan, tu' cabí nusán ládxa'u' nupa tu'guilaj Li'.  
 11 Gulí'gul-la yöl-la' ba queè' Xanru', zoè' ga na' nazí'i le Sión.  
 Bulí'siyón bönachi yugu' yödzö ca naca yugu' le nunè'.  
 12 Bití' ral-la ládxe'è nupa ta'guí'i ta'zaca' cate' tu'lidza Lè',  
 tu' röjné láguequi Nu na' ruzí' lèbi nu ruti bönachi.  
 13 Buéchi' ladxí' neda', Xan.  
 Buyú ca tun neda' zí' nupa tu'dí'i neda'.  
 Ruchisu' Li' neda' cate' chirequi gátia'  
 14 para gaca usiyönda' bönachi yöl-la' ba quiu' Li'.  
 Ga naca ga nu tsaza yödzö quiu' nazí'i le Sión,  
 udzéjada' tu' nusöló' neda'.  
 15 Yöjbíxigaca bönachi yugu' yödzö lu yeru gula'chó'ö-  
 na ga tsöjbíxigaca luzé'éguequi.  
 Bila'röli ní'aguequi lu yöxaj bulu'cachi' para ila'zón láguequi.  
 16 Chinunè' Xanru' Dios ga núnbè'gaca bönachi Lè' tu'  
 buchí'a busörö'è' quéguequi.  
 Lu lè na' nun nu ruá' dö' zón la' cuinsi.  
 17 Ila'yaza lataj chul-la nupa tuá' dö',  
 yúgu'tè nupa na' nal-la ládxi'gaca Dios.  
 18 Calèga tsaz ulu'gá'ana cá'asö nupa ta'yadzaj ta'yudxi,

en bití' initi tsaz yöl-la' run löza quégaca nupa nácagaca yechí'.  
 19 Guyasa, Xan.  
 Bití' gu'u lataj tsépisè nu naca bönáchisö.  
 Buchí'a busöró' quégaca bönachi yugu' yödzö.  
 20 Buxós láguequi, Xan.  
 Ben ga ulu'únbè' le nácgaca, tu' nácagacasö bönachi.  
 10 ¿Bizx que zu' zítu', Xan?  
 ¿Bizx que rucachí' lo' cate' bi raca quia?  
 2 Lu yöl-la' run ba rahui quégaca nupa tuá' dö'  
 ta'bía no nupa nácagaca yechí'.  
 Ben ga ila'zón du yalaj na' nucachí'gaca la' láguequi-sö.  
 3 Run ba zxön cuinè' bönní' ru'è dö' ca naca le xihuí' rizé ládxe'è.  
 Bönní' ruhuídí'nè' rulidza ditjè' luzé'è, en ruzóè' Dios tsölá'alö.  
 4 Lu yöl-la' run ba zxön cuinè' bönní' huía' dö' bití' ruí' ládxe'è Dios.  
 Rizá'asö ládxe'è, rnnè': Bití' ca' zoa Dios.  
 5 Ruzí'è xibé yúgu'tè le runè'.  
 Bití' ca' réquibe'enè' zoè' Dios Nu ruchi'a rusóró' quégaca bönachi.  
 Ruzóè' tsölá'alö nupa bití' ta'lé'e lè' dxi'a.  
 6 Rè' la' cuinsè': "Gatga ichíxida'.  
 Catu caz bi gaca quia'."  
 7 Didza' ru'è nácagaca le rudxía dö', enca' le rizí' yè', en le rudidza' yudxi yugu' luzé'è.  
 Ruí'tica'sè' didza' le cabí nácatè, en le naca xihuí'.  
 8 Rucachí' cuinè' yugu' lu yödzö.  
 Bagáchí'sö rútiè' nupa bití' bi nabága'gaca.  
 Ruyúlanè' nu bi gaca gun que.  
 9 Ribözè' ga na' nucachí' cuinè' ca runba' bédxi guixí'.  
 Ribözè' nu gaca sönè'.  
 Rizönè' bönní' yechí' lu du yalaj queè', en rá'ayöjè' lè' ga nagachí' queè'.  
 10 Riguinè' luyú nu na' nazönè'.  
 Zián nupa rucul-lè' len në'è nal-la.  
 11 Rè' la' cuinsè': "Nal-la ládxe'è Dios.  
 Nucachí' lahuè', en bití' ca' rilé'enè' le runa'."  
 12 ¡Guyasa, Xan!  
 ¡Gulís no'o, Dios!  
 ¡Bití' gal-la ládxa'u' nupa ta'guí'i ta'zaca'!  
 13 ¿Bizx que bönní' na' ru'è dö' nuzóè' Dios tsölá'alö?  
 Gudxè' la' cuinsè': Bití' uzí' lè' Dios neda'.  
 14 Li' bilé'e quézinu' lè ni, Xan.  
 Ruí'i ládxa'u' nu riguí'i rizáca', en nu risèbi ladxí',  
 en zóatica'su' gácalenu' láguequi.  
 Nu naca bayechí' rigú'u cuini lu no'o, Xan,  
 tu' zóatica'su' gácalenu' nu riyadza riyudxi.  
 15 Bugúa yöl-la' unná bè' quégaca nupa tuá' dö', en nácagaca xihuí'.  
 Bubí'i quéguequi ca naca xiguia' nabága'gaca.  
 16 Inná bética'sè' Xanru' Dios.  
 Nupa tu'béaj ícjaguequi Xanru' ulu'niti tsaz lu xiyú cazè'.  
 17 Ruzé' nagu', Xan, le ta'nábini Li' nupa nácagaca do' ladxí'.

Rutipu' ládxi'guequi, en ruzé nagu' chí'guequi.  
 18 Ruchi'a rusöróu' quégaca nupa nácgaca uzébi,  
 en nupa zoa nu ribía no léguequi,  
 para cabirö ulu'xösa bönachi yödzölió ni luzé'eguequi.

**11** Ruzxöni ládxa'a Xanru' gácalenë' neda'.

¿Naru' guíetso' neda'?

"Buzúnnaj lu guí'a ca runba' biguinnido"?

2 Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,  
 para ilútië' bagáchi'só nupa nácgaca dxí'a.

3 Channö ila'guínnaj yugu' le tu'zóa tsutsu le naca dxí'a,

¿bizxi caz gaca gun nu naca tsahui'?

4 ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guió'j lahuë' para uyúë' le tun bönachi.

5 Rizí' bë'ë Xanru' nu naca tsahui'.

Biti' rilé'enë' dxí'a nu ruá' dö', en nu raza ladxí'

ta'dá'baga' yúlahui'.

6 Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

7 Caní gunë' Xanru' tu' náquië' tsahui', en nadxí'inë' le naca tsahui'.

Nupa tun le nácatë ila'lé'e lahuë'.

**12** Busölá neda', Xan, tu' cabirö zoa nitú nu naca dxí'a,

en bití' gaca nu idzöli nitú nu run ca rna xtídza'a.

2 Ta'zí' ye'e yúgu'të bönachi luzé'eguequi.

Lu yöl-la' rizí' yë' quéguequi tu'ílen luzé'eguequi didza' yúlajdo'.

3 Xan, buzóa dxisö nupa na' tu'í didza' yúlajdo', en buzaga' ruí'igaca nupa tun ba zxön cúinguequi.

4 Ta'nná: "Güí'iru' didza' ca rizësö ládxi'ru', ate' cuntu nu tá'baga' rë'u.

¿Nuzxi caz inná be'e rë'u ca naca didza' ruí'iru'?"

5 Rnnë' Xanru': "Na'a guída' tu' nacuá' nupa tun zi' nupa ta'yadzaj ta'yudxi,

ate' rinné ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi."

6 Huáca uzxöni ládxi'ru' didza' ru'ë Xanru'.

Nácgaca ca guíë plata ba nequi, le nudxi'a gadxi luzuí tu lu guí lálë'e.

7 Li' caz, Xan, gun chí'u léguequi,

en usöló' léguequi lu ná'agaca nupa tuá' dö' na'a dza.

8 Gátitës nacuá' nupa tuá' dö', cate' tun zxön bönachi le ruá' dö'.

**13** ¿Gáca'xte caz gal-la ládxi'u neda', Xan?

¿Naru' tsaz gal-la ládxi'u neda'?

¿Gáca'xte caz ucache' cuinu' lahua'?

2 ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

3 Buyú neda', Xan, en bubí'i didza'.

Butipa ládxa'a para cabí gátia'.

4 Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lë'."

Bití' gaca ulu'dzeja tu' nótjada' ládxa'a neda'.

5 Neda' ruzxöni ládxa'a yöl-la' dxí'i ladxí' quiu'.

Rudzéjada' tu' rusöló' neda'.

6 Gul-la' queë' Xanru',

tu' benë' quia' le naca dxí'a.

**14** Lu icja ládxi'da'ahuë' rnnë' bönni' tu' canóz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí rilé'enë' dxí'a Dios.

Cuntu nu zoa nu run le naca dxí'a.

2 Ga zoë' Dios yehua' yubá buyúë' luyú ni ga nacuá' bönachi

para ilé'enë' channö zoa nu réajni'i, nu na' riguilaj Dios.

3 Yúgu'të' nadódigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxí'a, nitú bönachi.

4 ¿Naru' cabí ta'yéajni'i nupa tuá' dö'?

Le tun nupa na' naca tsa tagu bönachi quia' ca nu ragu yöta.

Bití' ca' tu'lidza neda', Xángaca bönachi.

5 Lu yöl-la' radxi ridzöbi quéguequi ta'xzizi tu' ta'lé'e Xanru' Dios, en zóalenë' bönachi tsahui'.

6 Tu'titaj xtídza'gaca nupa nácgaca yechí', pero nupa ni tu'zxöni ladxí' gácalenë' Xanru' léguequi.

7 Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzún-gaca xilátjaguequi,

ulu'dzeja xzí'ini xi'sóë' Jacob, bönachi Israel, en ulu'zí' xibé' Dios.

**15** ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

2 Nu na' naca idú ladxí', en run le naca tsahui', en lu icja ládxi'da'ahui ruí'í didza' le nácatë.

3 Nu na' bití' rizí' quidza' bönachi,

en bití' ruá' dö' que luzé'e,

en bití' ruzé naga nu rizí' quidza' luzé'e.

4 Nu na' bití' run bal nu ruá' dö',

pero run bal nupa tun zxön Dios,

en sal-la' bi uniti cate' chinún xtídza', bití' ca' rutsá' didza' na'.

5 Nu na' bití' rizí' icja dumí cate' runödzej dumí que tu chí'ido'sö,

en bití' rizí' dumí para si' yë' ca naca le nun nu bití' nabaga' xigua'.

Nu na' run yúgu'të le caní bití' ca' idzá' xilataj.

**16** Ben chí'i neda', Dios, tu' ruzxöni ládxa'a Li'.

2 Lu icja ládxi'da'ahua' gudxa'-në' Xanru':

"Li' nacu' Xana'.

Bití'rö bi zoa quia' le naca dxí'a, pero tuzu' Li'."

3 Riyaza ládxi'léna' nupa nácgaca queë' Dios luyú ni, en nupa nácgaca idú ladxí'.

4 Ila'yán le ila'guí'i ila'zaca' nupa ta'yéaj ladxí' yugu' dios izá'a.

Bití' ca' cu'a láhuiguequi rön ca tun bönachi na', en bití' ulidza' lágaca dios na'.

5 Náquië' Xanru' Dios Nu nabánida', en Nu ruzi'a xibé.  
 6 Li', Xan, nuzú' xilatja'.  
 Lataj na' nuzú' quia' naca le ruzi'a xibé,  
 en lachi naca lataj na' nequi quia'.  
 7 Gul-la' yöl-la' ba queë' Xanru', Nu rigú'u yöl-la' neda'  
 le naca tsahui',  
 ga ridxintë ruzéajni'inë' neda' cate' ni' rasia'.  
 8 Chinuna' ga zóatica'së' Xanru' lahua'.  
 Tu' zoë' cuita' bití' bi utsá' neda'.  
 9 Que lë ni na' budzeja ládxa'a, en buzí' xibé ládxi-  
 da'ahua',  
 ate' gun löza le naca' cate' igácha'a yeru ba,  
 10 tu' cabí ucá'anú' neda' lataj chul-la,  
 en bití' gu'u lataj uniti nu nequi quez quiu'.  
 11 Nunú' ga núnbë'a nöza ichë' neda' ga soa' ibana'.  
 Ga zu' Li' gata' quia' yöl-la' rudzeja idú,  
 ate' cuitu' Li' uzí'tica'sa' xibó'.  
**17** Ruzé nagú' neda', Xan.  
 Lu le naca tsahui' quia' rulidza' Li'.  
 Bë' ladxí' le rinávida' Li' tu' cabí ca' rizí' yë'a.  
 2 Buchí'a busóró quia'  
 tu' runu' Li' le naca tsahui'.  
 3 Núnbë'u Li' le yu'u ládxi'da'ahua'.  
 Ruyú' neda' chí'í dzó'ólö.  
 Guzxí' bë'u neda', ate' burúaja' tsahui'.  
 Bití' ca' ruá'a didza' le cabí naca idú dxí'a.  
 4 Runa' ca rinná bë' xibá quiu',  
 en bití' ca' ruá'a dö' ca tun bal-la bönachi.  
 5 Ridática'sa' la' nöza tsahui' quiu',  
 en bití' ca' ridöda' tsölá'alö.  
 6 Rulidza' Li', Dios, tu' rubí'u didza'.  
 Ruzé nagú' yugu' didza' ruá'a.  
 7 Buluí'i lahui yöl-la' dxí'i ladxí' quiu'.  
 Rusölá cazu' nupa tu'zxöni ladxí' Li'  
 lu ná'agaca nupa ta'dá'baga' léguequi.  
 8 Ben chí'í neda' ca run chí'u la' guiöj lo cazu'.  
 Bucachí' neda' cuitu' Li' ca runba' böra, rucáchí'ga-  
 caba' bórado' xzan xílabá',  
 9 para cabí bi ilún quia' nupa tuá' dö',  
 nupa na' ta'lé neda', en nagú'ugaca neda' lé'ajlö.  
 10 Bití' ca' zóalen léguequi yöl-la' ruhuéchi' ladxí',  
 ate' tu'í didza' lu yöl-la' run ba zxön cuínguequi.  
 11 Gátí'tës ga ridöda' ta'gú'u neda' lé'ajlö,  
 en té'ëni ila'guín neda' luyú.  
 12 Nácagaquië' ca yugu' bëdxi guíxi'do'.  
 Té'ëné' ulu'sunítie' neda'.  
 Nácagaquië' ca yugu' bëdxi guixí'.  
 Nucachi' cuíngaquië' para ila'zönë' neda'.  
 13 Gudá, Xan, gudá'baga' nupa ta'lé neda', en bucul-la  
 léguequi.  
 Busölá neda' lu ná'agaca nupa tuá' dö', ugonu' dxin  
 guië' tuchi' quiu'.  
 14 Lu yöl-la' huáca zxön quiu' busölá neda', Xan,  
 lu ná'agaca nupa tu'z'í xibé na'a dza,  
 nupa na' nuhuólaj nudzé'egaca yöl-la' tsahui' quiu'.  
 Nayángacabí' zxí'inigaquië',  
 ate' tu'cá'anë' lu ná'agacabí' le dë sizxöni quégaquië'.  
 15 pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

**18** ¡Nadxí'ide'eda' Li', Xan!  
 ¡Li' rutipa cazu' ládxa'a!

2 Ruzóë' Xanru' neda' tsutsu, en rapa chí'ë neda', en  
 rusölé' neda'.

Náquië' Dios quia', en Nu rutipa ládxa'a,  
 ate' ruzxöni ládxa'a Lë'.  
 Rácalenë' neda' lu gudil-la: Rusölé' neda', en rizönë'  
 neda'.

3 Rulidza'-në' Xanru' Nu ral-la' cú'uru' yöl-la' ba,  
 ate' usölé' neda' lu ná'agaca nupa tu'dí'í neda'.

4 Ia'látí'sö la' gútia',  
 ate' yöjbaga' neda' le usuniti neda', le ben ga gúdxí-  
 da'.

5 Ia'látí'sö la' yöjtsu'a lataj chul-la que yöl-la' guti,  
 tu' la' gútitia'.

6 Lu le guca quia' bulidza'-në' Xanru'.  
 Bulidza'-në' Dios quia' para gácalenë' neda'.  
 Ga na' zoë' lataj lá'ayi queë' biyönnë' chí'a.  
 Buzé nagué' le gunabi yúdxida' Lë'.

7 Ní'irö gudödi budó' zxu', en guzxizi luyú.  
 Guzxízida' xilíbigaca yugu' guí'a sibi.  
 Guzxízigaca tu' gulénë' Lë'.

8 Birúaj dzön zxínë',  
 ate' birúaj guí' ru'ë le buzegui le dë idú gásibí'ilë',  
 ate' buguela' guí' yugu' bo' yalaj.

9 Benë' ga bötaj lúzxiba, en bótajë' Lë' cazë',  
 ate' guzóa xzan ní'ë le naca chul-la.

10 Gudödë' lu bö'ös dxíë' tu le nayépisë nazí'í le  
 querubín.

Carelö gudödë' tu lu bö' budunu'.

11 Busubaga' cuinë' le naca chúl-lasö.  
 Lë na' naca böaj gasaj le riché'lë'e nisa.

12 Lu le rëpi yösa queë' lu böaj gasaj na'  
 bila'rúaj bo' yalaj, en guió'j bögui' yöla sunna.

13 Gunné guziú' que chí'ë Xanru' lúzxiba xitsá'.  
 Biyón chí'ë Dios nayépisëtë'rë',  
 lu dzön, en yugu' lu bo' yalaj, en lu guió'j bögui' yöla  
 sunna.

14 Gusól-lë'ë yugu' yaga lahui tuchi' queë', en bësílasië'  
 nupa na' tu'dí'í neda'.

Gusól-lë'ë yugu' yösa queë' yugu' le bulu'cul-la légue-  
 qui.

15 Ní'irö bilá' lahui le zoa xzan nísado',  
 ate' bilá' lahui xilibi yödzölió,  
 cate' buzenu' bach nupa bití' ta'lé'e Li' dxí'a, Xan,  
 en lu yöl-la' rilé quiu' bulidza' zí'u léguequi.

16 Bötjë' zaca' xitsá'alö, en gudélë'ë neda'.  
 Bubéajë' neda' lu nisa zili.

17 Busölé' neda' lu na' nu bití' rilé'e neda' dxí'a, en nál-  
 latërö,  
 enca' lu ná'agaca nupa tu'dí'í neda', en nál-lágacatërö  
 ca neda'.

18 Cate' ní' chizóa inítia' gula'zóa régu'ë neda',  
 pero Xanru' gúcalenë' neda'.

19 Bubéajë' neda', en buzóë' neda' tu lu lataj zxön.  
 Busölé' neda' tu' guyaza ládxe'ë neda'.

20 Bubi'ë Xanru' quia' tsca le tsahui' naca',



en benë' quia' le naca dxí'a tu' cabí nabága'a xiguia',  
 21 tu' runa' ca naca le rusédinë' Xanru' neda',  
 en bití' ca' ridá'baga'a Lë'.  
 22 Runa' ca ta'nná xibá nunë' Xanru',  
 en bití' ridá'baga'a le rinná bè' naguixjë' Lë'.  
 23 Bití' bi le naca dö' nabága'a lahuë' Lë',  
 ate' ben chí'a le inní'a para cabí gu'a dö'.  
 24 Que lë ni na' bubí'ë Xanru' quia' tsa le tsahui' naca',  
 en tu' cabí nabága'a xiguia' lahuë' Lë'.  
 25 Ruhuéchi' ládXu'u nupa tu'huechi' ladxí' luzé'egue-  
 qui,  
 en nacu' idú dxí'a len nupa nácagaca idú dxí'a.  
 26 Ruluí' cuinu' idú ladxí' len nupa nácagaca idú ladxí',  
 pero ridá'bagu'u nupa ta'dá'baga' xtídzú'u.  
 27 Rusöló' nupa ta'guí' ta'zaca',  
 pero ruzótju' nupa tun ba rahui.  
 28 Ruquéla' cazú' guí' quia', Xana' Dios,  
 en rigú'u quia' bení' cate' ridá' ga chul-la.  
 29 Lu yöl-la' huáca queë' Dios rucul-la' bönní' guizxi yu  
 rójáquië' gudil-la.  
 Tu' zóalenë' Dios quia' neda',  
 rixítí'a ribixa' lu zö'ö run chí'i léguequi.  
 30 Idú dxí'a nácagaca le runë' Dios.  
 Nurúaj tsahui' xtídzë'ë.  
 Rapa chí'ë yúgu'të nupa ta'nábini Lë' gácalenë' légue-  
 qui.  
 31 ¡Tuzë' Xanru' náquië' Dios!  
 ¡Tuzë' Dios rapa chí'ë rë'u!  
 32 Dios ni ruzalë' neda',  
 en runë' ga naca' idú ládxa'a.  
 33 Runë' ga nácagaca ní'a ca ní'agacaba' bidxina' guixí',  
 en ruzóë' neda' yugu' lu guí'a zxön.  
 34 Rusédinë' neda' para gaca tseja' gudil-la,  
 en para gaca uguna' dxin uxiti' yaga néquini guíë  
 bronce.  
 35 Lu yöl-la' rusölá quiu' run chí'u neda'.  
 Len no'ó nál-la rizönu' neda',  
 en lu yöl-la' dxí'i ladxí' quiu' nunu' ga nayépisëtëra'.  
 36 Ruchi'u nöza ga ral-la' töda',  
 en runu' ga bití' cuila'.  
 37 Guzóa régu'a nupa tu'dí'i neda', en bucul-la' légue-  
 qui.  
 Bití' buécja' ga bidxintë busunítia' léguequi.  
 38 Gudina' léguequi luyú, ate' bití' guca ulu'huóása.  
 Gula'dzó'ö zcan ní'a.  
 39 Benu' neda' nál-la para tseja' gudil-la,  
 en benu' ga bucul-la' nupa gula'dá'baga' neda'.  
 40 Benu' ga bulu'zxunnaj lahua' nupa bití' ta'lé'e neda'  
 dxí'a,  
 ate' busunítia' nupa na' bulu'dí'i neda'.  
 41 Bulu'lidza nu gácalen léguequi,  
 pero cuntú nu zoa usölá léguequi.  
 Bulu'lidza ca' Xanru', pero bití' bubí'ë didza'.  
 42 Buzxuzxja' léguequi ca bëchtö yu naché' lu bö'ös.  
 Buliba' léguequi ca ruliba' guna' la' nöza.  
 43 Busöló' neda' lu ná'agaca nupa ta'dá'baga',  
 en nunu' ga rinná bé'eda' bönachi zían yödzö.  
 Tun ca rnna xtídzá'a bönachi bití' núnbë'a zí'alö.

44 Cate' ta'yöni neda', la' tun ca rnna xtídzá'a.  
 Tadxi neda' bönachi zían yugu' yödzö izá'a.  
 45 Ta'cuidí' ladxí', en lu yöl-la' rizxizi quéguequi  
 ta'rúaj yugu' lu yödzö tsutsu quéguequi.  
 46 ¡Zoë' nabanë' Xanru'!  
 ¡Yöl-la' ba Nu na' run chí'i neda'!  
 ¡Gulí'gún zxön Dios Nu rusölá neda'!  
 47 Náquië' Dios Nu rizí' la nupa tu'dí'i neda',  
 en runë' ga tadxi bönachi guizxi yu neda'.  
 48 Rusölë' neda' lu ná'agaca nupa bití' ta'lé'e neda' dx-  
 í'a.  
 Le nácátë runë' ga rucul-la' nupa ta'dá'baga' neda',  
 en rusölë' neda' lu na' bönní' ridzá'a.  
 49 Que lë ni na' guía' Li': Xclenu' Xan, lógaca bönachi  
 zían yödzö,  
 en gul-la' yöl-la' ba que Lo' La'ayi.  
 50 Rusölá cazë' Xanru' bönní' rinná bë'ë uláz queë',  
 en nadxí'tica'së' nu na' nabó cazë',  
 nu na' naca David, en yugu' zxí'ini xi'sóë' ga idxinrö  
 dza udxí.

**19** Yugu' le nacuá' lúxiba tu'luí'i lo yöl-la' zxön queë'  
 Dios,  
 ate' yugu' le raca lu bö'ös nácagaca bë' le nunë'.  
 2 Yugu' dza tu'zéajni'i,  
 en yugu' dzö' tu'luí'i lo yöl-la' réajni'i.  
 3 Bití' zoa didza' tuí'i, en bití' riyón tu le ta'nná.  
 Bití' riyón chí'iguequi.  
 4 Le tu'zéajni'i ridxín ga naguéla'të luyú,  
 en le tu'sedi ridxín idútë yödzölió.  
 Ga na' nacuá' nuzóë' Dios xilataj gubidza,  
 5 le naca ca tu bönní' utsaga në'ë rirúajë' yu'u,  
 en naca ca' ca tu bönní' nál-la rudzéjanë' cate' zéajë'  
 carelö lu huitaj.  
 6 Ga naguela' lúxiba rilén gubidza,  
 en ridödi ga ridxintë ga ribía.  
 Bití' bi zoa le cabí rutsë'e gubidza na'.  
 7 Tsahui' naca ca rinná bë'ë Xanru', en run ga huóaca  
 ládxi'ru'.  
 Idútë li naca didza' nuzóë' Xanru', le run ga réajni'i nu  
 naca nöxaj ladxí'.  
 8 Tsahui' nácagaca xibá queë' Xanru', le tun ga rudzeja  
 ládxi'ru'.  
 Nácagaca idú dxí'a le gunná bë'ë Xanru', en ta'gú'u  
 bení' icja ládxi'do'oru'.  
 9 Dxí'ado' naca gádxiru'-në' Xanru', para sóatica'siru'.  
 Idú li naca ca ruchi'a rusöröë' Xanru' bönachi, en idú  
 tsahui'.  
 10 Nazáca'gacatëro didza' na' ca oro, enca' ca oro ba  
 nequi.  
 Nácagacatëro zxixi ca bidxina' buz, en ca le zxixi  
 queé'ba'.  
 11 Didza' na' tu'zéajni'i neda', huen dxin queë'.  
 Uzí'tëro xibé nu run ca rnna xtídzë'ë na'.  
 12 ¿Nuzxi caz gaca inóz channö richixi rinigui?  
 Busölá neda' lu dul-la' nuna' le cabí gúquibe'eda' be-  
 na'.  
 13 Ben chí'i neda' para cabí udödi cuina' lu dul-la',  
 para cabí inná be'e neda' lë na' naca dul-la'.

Ní'irö ugá'ana' tsahuí, en bití' ibága'a xiguia'.  
<sup>14</sup> Ben ga ilaca didza' ruá'a, en le rizá' ládxa'a ca raza ládxa'u Li'.  
 Nacu' Xana' ruzú' neda' tsutsu, en ruhuóá'au' neda'.  
**20** Rinábida'-nè' Xanru' uzé' naguë' lí' cate' idxín dza qui'i sacu'u.  
 Dios queë' Jacob gácalenë' lí'.  
<sup>2</sup> Rinábida'-nè' isól-lè'è le gácalen lí' le irúaj lataj lá'ayi queë'.  
 Lè na' irúaj Sión gun ga gacu' tsutsu.  
<sup>3</sup> Rinábida'-nè' tsójnenë' yúgu'tè le gulú'u queë', en sí' lu në'è le buzégui'u lahuë'.  
<sup>4</sup> Rinábida'-nè' gunnë' quiu' tsca naca le rizé ládxa'u, en gunë' ga gácatè yúgu'tè le rizá' ládxa'u.  
<sup>5</sup> Udzéjatu' cate' usölé' lí', en uchísatu' le gaca bë' rulidztu'-nè' Dios queëru'.  
 Rinábida'-nè' Xanru' gunnë' quiu' yúgu'tè le rinábinu' Lè'.  
<sup>6</sup> Na'a nözda' rusölé' Xanru' nu nabó' cazë'.  
 Riyönnë' nu na' nabóë' ga ní' zoë' yehua' yubá la'ayi queë'.  
 Isól-lè'è yöl-la' huáca idú queë' le usólá nu na'.  
<sup>7</sup> Nacuá' nupa tu'zxöni ladxí' yugu' carreta que gudil-la,  
 ate' nacuá' bönachi yúbölö tu'zxöni ladxí' yugu' böa', pero rë'u ruzxöni ladxí'ru' Lè' Xanru' Dios.  
<sup>8</sup> Ta'cuídí'nè' nupa na', en ta'dzö'è, pero rë'u ni zuíru', en zóaru' tsutsu.  
<sup>9</sup> Busólá netu', Xan, tu' nacu' Nu rinná be'e netu'.  
 Rinábitu' Li' uzé' nagu' netu' cate' ulídzatu' Li'.  
**21** Rudzéjanë' bönni' rinná bë'è tu' zóalen lè' yöl-la' huáca quiu' Li', Xan.  
 Tu' busóló' lè', yénni'tërö rudzéjanë'.  
<sup>2</sup> Bunödzu' queë' le rizé ládxe'è.  
 Biti' gudá'bagu'u le gunábinë' Li'.  
<sup>3</sup> Tu' raza ládxa'u lè' ruzú' queë' yugu' le naca dxí'a.  
 Nudxíu' icjè' tu le néquini oro idú.  
<sup>4</sup> Gunábinë' Li' gu'u queë' yöl-la' na'bán, ate' bë'u le queë'.  
 Nunu' ga sóatica'së' ibanë' yugu' dza sí' zaca.  
<sup>5</sup> Zxöntë naca yöl-la' zxön queë' tu' nusóló' lè'.  
 Nunu' lè' bal, en nunu' ga nayépisë'.  
<sup>6</sup> Zóatica'sö le naca dxí'a nuzú' queë'.  
 Runu' ga rudzéjade'enë' tu' zóalenu' lè'.  
<sup>7</sup> Caní raza queë' bönni' na' rinná bë'è tu' ruzxöni ládxe'è Xanru'.  
 Biti' bi utsá' lè' tu' ruhuéchi' ládxe'è Dios nayépisëtërë' lè'.  
<sup>8</sup> Huadeli' no'o ga nacuá' yúgu'tè nupa ta'dá'bagu' Li'.  
 Huadeli' no'o ibèla ga nacuá' nupa tu'dí' Li'.  
<sup>9</sup> Cate' idxín dza usiúdxu' léguequi gaca quéguequi ca tu guí' ruzegui bla'do'.  
 Usunítu' léguequi, Xan, lu yöl-la' rilé quiu', ate' tséguiguequi tu lu guí' zxön.  
<sup>10</sup> Ucuítu' yugu' xzí'ini xí'sóagaca nupa na' luyú ni, en ubéaju' yugu' xzí'iniguequi ládjugaca bönachi.  
<sup>11</sup> Caní gunu' tu' gulé'éniguequinë' ilu'è dö' quiu'.

Gulún xtídza'gaquië' bi ilunë', pero bití' gaca ilunë' ca rna xtídza'gaquië',  
<sup>12</sup> tu' gunu' Li' ga ulu'zxúnnajë'.  
 Ichisu' uxiti' yaga quiu', en gunu' léguequi huë'.  
<sup>13</sup> Len yöl-la' huáca quiu', Xan, uxicju' lu gudil-la.  
 Gúl-latu', en cú'utu' yöl-la' ba que yöl-la' huáca quiu'.  
**22** Dios quia', Dios quia', ¿bizx que nusán no'o neda?'  
 ¿Bizx que bití' riyönnu' le rinnëda' ládxa'a, en bití' rá-calenu' neda?'  
<sup>2</sup> Dios quia', idú dza rulidza' Li', pero bití' bi didza' rubí'u.  
 Idú yèla rulidza', en bití' ca' rasia'.  
<sup>3</sup> Lá'ayi nacu' Li'.  
 Zu' ga riyón yöl-la' ba ta'gú'u bönachi Israel Li'.  
<sup>4</sup> Bulu'zxöni ládxe'è xuz xtó'otu' Li'.  
 Bulu'zxöni ládxe'è Li', ate' busóló' légaquië'.  
<sup>5</sup> Bulu'lidzë' Li', ate' gúcalenu' légaquië'.  
 Bulu'zxöni ládxe'è Li', en bití' bulu'tuí'inë'.  
<sup>6</sup> Naca' neda' ca tuba' bëla guna', en calëga bönni'.  
 Tu'dí' bönachi neda', en tu'cá'ana neda' cá'asö.  
<sup>7</sup> Yúgu'tè nupa ta'lé'e neda' tu'titaj neda'.  
 Ta'salaj ruí'iguequi lu yöl-la' rutitaj, en tu'tá ícaguequi, ta'nná:  
<sup>8</sup> "Lè' buzxöni ládxe'è Xanru' para usölé' lè'.  
 Xanru' usölé' lè' channö tsaza ládxe'è lè'."  
<sup>9</sup> Nacu' Li' Nu guléaj neda' lé'ënu xiná'a.  
 Benu' ga ruzxöni ládxa'a Li'  
 cate' ní' gúdxá'a luchú'unu xiná'a.  
<sup>10</sup> Nagá'ana' lu no'o Li' ga gudéla'tè gulja'.  
 Ga gudéla'tè buzóanu xiná'a neda' nacu' Dios quia'.  
<sup>11</sup> Biti' su' zítu' ga ni zoa', tu' zoa gagu le gun neda' zí', ate' cúnturö nu zoa nu gácalen neda'.  
<sup>12</sup> Gula'gu'è neda' lé'ajlö ca tunba' yugu' bédxi.  
 Ca yugu' bédxi que yödzo Basán gula'bía dí'è neda'.  
<sup>13</sup> Ta'salaj ruá'agaquië' lahua' neda'  
 ca runba' bédxi guixi', ridunba', en ribódxí'aba'.  
<sup>14</sup> Nuhuóáca' ca nisa nalalaj luyú, ate' nazángaca bëch dxita quia'.  
 Nuhuóáca ládxi'da'ahua' ca bidxina' buz la lu lè'a.  
<sup>15</sup> Nacuidí' yöl-la' huáca quia' ca tu rö'ö nalá'a,  
 ate' da' lúdxá'a chichja'.  
 Nuzú' neda' lu bëchtö yu que yöl-la' guti.  
<sup>16</sup> Ta'gu'è neda' lé'ajlö ca tunba' yugu' bö'cu'.  
 Nagú'ugaquië' neda' lé'ajlö bönni' tu'è dö'.  
 Nuzóagaquië' yeru blaga na'a, en ni'a.  
<sup>17</sup> Nalá'gaca yúgu'tè dxita néquinida'.  
 Ta'né'è neda', en tu'yú yénnië' neda'.  
<sup>18</sup> Ta'guísië' xza' que queégaquië',  
 en tu'yú'è le gaca bë' lahui lari' rixóa cúdza'a.  
<sup>19</sup> Biti' gá'anu' zítu', Xan.  
 Gúcalentë neda', Li', Nu naca yöl-la' huáca quia'.  
<sup>20</sup> Busólá neda' lu guíë tuchi'.  
 Busólá yöl-la' na'bán quia' lu ruá'agacaba' bö'cu'.  
<sup>21</sup> Busólá neda' lu ruá'agacaba' bédxi guixi',  
 en lu lúzugacaba' bédxi gú'una.  
 Li' riyón quézinu' chí'a.  
<sup>22</sup> Usiyönda' yugu' böchí' luzá'a ca naca Lo'.

Gatsaj láhuilö ga na' tu'dubi bönachi lo' cu'a Li' yöl-la' ba.

<sup>23</sup> ¿Gulí'cu'ë Xanru' yöl-la' ba, libí'ili' na' rádxili'-nè'!  
¿Gulí'gun zxön Lè', yúgu'tèli' zxí'ini xí'sóè' Jacob!  
¿Gulí'gadxi Lè', yúgu'tèli' zxí'ini xí'sóè' Israel!

<sup>24</sup> Caní ral-la' gunlí' tu' cabí buca'anè' cá'asö,  
en bití' budí'inè' nupa gula'gu'í gula'zaca',  
en bití' bucachí' lahuè' para cabí ilé'enè' léguequi,  
pero cate' bulu'lidza Lè', biyönnè' léguequi.

<sup>25</sup> Cu'a Li' yöl-la' ba ga tu'dubi bönachi guizxi yu lo'.  
Lógaca nupa tadxi Li' usudxina' le guzxí' lu na'a guna' quiu'.

<sup>26</sup> Ilágugaca nupa nácgaca nöxaj ladxí', en ulu'huöla'j ulu'dzè'e.

Nupa ta'guilaj Xanru', en ta'gú'u Lè' yöl-la' ba ulu'zítí'-ca'sö xibé'.

<sup>27</sup> Bönachi idútè yödzülió tsöjnégaca Xanru', en ulu'huöaca queé'.

Bönachi yúgu'tè yödzü luyú ila'gú'u Lè' yöl-la' ba.

<sup>28</sup> Caní gaca tu' dè lu në'e Xanru' inná bè'e.

Inná bé'enè' yúgu'tè bönachi luyú.

<sup>29</sup> Yúgu'tè nupa dè lu ná'agaca luyú ni ilágugaca, en ila'gú'u Lè' yöl-la' ba.

Yúgu'tè nupa ila'niti ulu'zèchu zxíbigaca lahuè' Lè', nupa na' bití' ca' gaca ilún chí'i yöl-la' na'bán quéguequi.

<sup>30</sup> Zxí'ini xí'sóalí' ilún xichiné'.

Ila'guixjö' lè ni ca naca queé' Xanru' para ila'yöni nupa tsöjsétégaca luyú ni.

<sup>31</sup> Ilidè', en ulu'lu'ínè' lahui náquiè' Xanru' tsahuí'.

Ulu'siyönnè' ca' nupa ral-la' ilalaj ca naca yugu' le benè' Lè'.

**23** Ruyú cazè' Xanru' Dios neda' ca tu nu ruyú bö'cu' zxila'.

Bití' bi riyádzjada'.

<sup>2</sup> Runè' ga ruzí' ládxa'a ca túngacaba' bö'cu' zxila' tu'z'í' ládxi'ba' gapa dèda' le iláguba'.

Ga naca ra' nisa rizá' tsahuí' ládxi'do' riché'è neda'.

<sup>3</sup> Runè' ga ruhuóaca ládxa'a.

Riché'è neda' ga naca nöza tsahuí' tu' nadxí'inè' neda'.

<sup>4</sup> Sal-la' ridá' ga zoa bönadxi gátia', bití' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

<sup>5</sup> Ga nacua' nupa ta'zóa regu' neda', ní' rucú'u quia' le gahua'.

Rigú'u icja' le za rilá' zxixi, en ruliru' le guí'jada'.

<sup>6</sup> Le nácatè dusóalengaca neda' le naca dxí'a, en yöl-la' dxí'i ladxí' queé' yúgu'tè dza soa' ibana', ate' lu yu'u lidxè' Xanru' sóatica'sa'.

**24** Nequi queé' Xanru' Dios luyú ni, en yúgu'tè le dè lahui.

Nequi queé' yödzülió, en yúgu'tè nupa nacua' ní'.

<sup>2</sup> Naguixjè' le lahui nísado' rö'ö xzánilö, en nuzóè' xilibi luyú ga rë' znan nísado'.

<sup>3</sup> ¿Nuzxi caz bönní' dè lu në'e cuenè' gu'a lá'ayi queé' Xanru'?

¿Nuzxi caz gaca tsaza lu lataj lá'ayi queé'?

<sup>4</sup> Huáca bönní' na' naca dxí'a ca runè', en ca rizá' ládxi'è,

bönní' na' bití' runè' bal budó' guiój budó' yaga, en bití' rizí' yè'è cate' rizí' lu në'e bi gunè'.

<sup>5</sup> Gunè' Xanru' ga gaca dxí'a queé' bönní' na'.

Caní gunné' Dios, Nu rusólá lè', en náquiè' tsahuí'.

<sup>6</sup> Caní nácgaca nupa ta'dxín lahuè' Dios, nupa na' ta'biga' lahuè' Dios quégaca zxí'ini xí'sóè' Jacob.

<sup>7</sup> Gulí'salaj ga nu riyaza yödzü la'ayi.

Gulí'salaj ga nu riyaza xilatjè' Dios le nuzóè' tsaz, ate' tsáziè' Bönní' unná bè' nayépisètèrè'.

<sup>8</sup> ¿Nuzxi caz Bönní' unná bè' nayépisètèrè' na'?

Náquiè' Xanru' nál-latèrè', en nápatèrè' yöl-la' huáca, Lè', Xanru', Nu ridelí' lu gudil-la.

<sup>9</sup> Gulí'salaj ga nu riyaza yödzü la'ayi.

Gulí'salaj ga nu riyaza xilatjè' Dios le nuzóè' tsaz, ate' tsáziè' Bönní' unná bè' nayépisètèrè'.

<sup>10</sup> ¿Nuzxi caz Bönní' unná bè' nayépisètèrè' na'?

Náquiè' Xanru' Dios quéguequi ní'a në'e guizxi yu. Lè' náquiè' Bönní' unná bè' nayépisètèrè' na'.

**25** Idú ládxa'a rulidza' Li', Xan.

<sup>2</sup> Ruzxöni ládxa'a Li', Dios quia'.

Ben ga cabí utuí'ida',

en cabí ulu'dzeja nupa bití' ta'lé'e neda' dxí'a.

<sup>3</sup> Bití' ila'bó' böniga nupa tun löza Li', pero ulu'tuí' nupa ta'dá'baga' xtídz'u.

<sup>4</sup> Buluí' neda' le ré'ènu' guna', Xan, en buzéajní' neda' le raza ládxi'u Li'.

<sup>5</sup> Busedi neda' para guna' ca naca le naca idútè li quiu'.

Tu' nacu' Dios, Nu rusólá neda'

gúntica'sa' löza Li'.

<sup>6</sup> Yöjné ca naca yöl-la' dxí'i ladxí' quiu', yugu' le nacua'tica'sö.

<sup>7</sup> Buniti lo neda' ca naca dul-la' bena', en le gudá'baga'a Li' cate' ní' zoa' iz cuidí' quia'.

Lu yöl-la' ruhuéchi' ladxí' quiu', en yöl-la' dxí'i ladxí' quiu' yöjné neda', Xan.

<sup>8</sup> Náquiè' Xanru' dxí'a tsahuí', en li ladxí'.

Que lè ni na' rulu'ínè' nupa tun dul-la' le ral-la' ilún.

<sup>9</sup> Ca naca le naca tsahuí' riché'è Dios nupa nácgaca nöxaj ladxí',

en rulu'ínè' nupa nácgaca do' ladxí' le ré'èné' ilún.

<sup>10</sup> Lu yöl-la' ruhuéchi' ladxí' queé', en yöl-la' rusudxín didza' queé',

riché'è Xanru' nupa tun ca rinná bè' xibá naguixjè', en ca naca didza' rucá'ana tsahuí' nunè'.

<sup>11</sup> Tu' nacu' dxí'i ladxí', Xan,

buniti lo neda' ca naca dul-la' nuna', le naca dul-la' zxön.

<sup>12</sup> Nupa tun bal Xanru'

ulu'í' quézinè' léguequi le naca dxí'a le ral-la' ilún.

<sup>13</sup> Ulu'z'í' xibé le naca dxí'a gunné' quéguequi, ate' guequi quégacabí' zxí'ini xí'sóaguequi luyú ni.

<sup>14</sup> Xanru' zóaléntica'sè' nupa tun ca rnna xtídz'è', en ruzéajní'ínè' léguequi ca naca didza' rucá'ana tsahuí' nunè'.

15 Ruyútica'sa' guídë' Xanru' gácalenë' neda',  
tu' usölë' neda' lu na' nu ré'ëni sön neda'.  
16 Buécja quia', Xan, en buéchi' ladxí' neda',  
tu' zoa' tuza', en nacuídida'.  
17 Nayán le tu'quí' tu'saca' neda'.  
Busölá neda' lu le ruúbi ruguí' ladxí'da'ahua'.  
18 Buyú ca riguí' rizáca'a, en rudú ladxá'a.  
Buniti lo neda' ca naca yugu' dul-la' nabága'a.  
19 Buyú ca nayán nupa tun neda' zí'.  
Buyú ca tu'dí' neda'.  
20 Ben chí' neda', en busölá neda'.  
Biti' gu'u lataj utuí'da' tu' ruzxöni ladxá'a Lí'.  
21 Ben ga ilún chí' neda' le naca idú ladxí',  
en le naca li ladxí', tu' runa' löza Lí'.  
22 Buá'au' bönachi Israel,  
Dios lu yugu' le raca quéguequi.  
26 Guléaj neda' tsahuí', Xan, tu' runa' le naca dxí'a,  
en idú ladxá'a ruzxöni ladxá'a Lí'.  
2 Buyú lu icja ladxí'da'ahua', Xan, en guxzí' bë' neda'.  
Buyú le rizá' ladxá'a, en le ribequi icja',  
3 tu' riché' yöl-la' dxí' ladxí' quiu' neda',  
ate' runa' ca naca le naca idútë li quiu'.  
4 Biti' runa' tsözxón nupa ta'zí' yë',  
en bití' ridálena' nupa tu'lu'isö cuínguequi tsahuí'.  
5 Biti' raza ladxá'a udúbilena' nupa tuá' dö',  
en bití' guna' tuz didza' len nupa nácgaca xihuí'.  
6 Richisa na'a lo' Lí', Dios, cabí dxía dö' na'a,  
en idú ladxá'a ribíga'a lo bucugu quiu', Xan,  
7 para gul-la' le guía' Lí': "Xclenu"  
en usiyönda' bönachi ca nácgaca le zxön nunu'.  
8 Nadxí'da' yu'u lidxu' ga na' zu', Xan,  
enca' lataj ga na' yu'u bení' lá'ayi quiu'.  
9 Biti' usunítiu' neda' tsözxón len nupa tun dul-la',  
en bití' gútiu' neda' len nupa tuti bönachi,  
10 nupa na' ta'yaza ladxí' tuá' dö',  
en nacuatíca'sö ila'guizxaj dumí para ulu'rúaj tsahuí'.  
11 Gúntica'sa' neda' le naca dxí'a.  
Buzá' ladxí' quia', en buá'uö neda'.  
12 Nuzöë' Dios neda' ga zoa' tsutsu ladja bönachi  
guizxi yu  
nudúbigaca queë' para cu'a-në' yöl-la' ba Xanru'.  
27 Náquië' Xanru' Dios bení' quia', en Nu rusölá  
neda'.  
¿Nuzxi caz ral-la' gádxida'?  
Rapa chí'ë Xanru' Dios caz yöl-la' na'bán quia'.  
¿Nuzxi caz gaca gun ga gadxi idzóbida'?  
2 Cate' gula'dá'baga' neda' nupa tuá' dö' para iluti  
neda',  
nupa na' bití' ta'lé'e neda' dxí'a, en tu'dí' neda',  
yöjchégu'gaca, en yöjbíxigaca.  
3 Sal-la' ila'dá'baga' neda' bönachi guizxi yu,  
bití' ca' tsaza yöl-la' radxi ladxí'da'ahua'.  
Sal-la' ila'díl-lalen bönachi neda',  
naca' neda' tsutsu ladxí'.  
4 Tu le rinaba' lahuë' Xanru' Dios, lë na' gü'í' ladxí'sa',  
le naca para sóatica'sa' lidxë' Xanru' yúgu'të dza soa'  
ibana',  
para gaca uyúa' yöl-la' lachi queë' Xanru' Dios,

en para sa' ladxá'a ca naca queë' lu yu'u lá'ayi queë'.  
5 Cate' idxín dza soa bönadxi quia', ucáchë'ë Lë' neda'  
lu yu'u lidxë'.  
Ga nagachi' lu yu'u lidxë' ucáchë'ë neda'.  
Uzóë' neda' tsutsu ca tu lu guiójt'o.  
6 Gunë' ga ucul-la' nupa tu'dí' neda',  
ate' lu yöl-la' rudzeja quia' códxí'atica'sa'  
cate' bi unödza' queë' lu yu'u lidxë'.  
¿Gul-la' queë'! ¿Ön, gul-la' queë' Xanru' yöl-la' ba!  
7 Buzë' nagu', Xan, cate' ulidza' Lí'.  
Buzá' ladxí' quia', en bubí' didza' ca naca le inábida'  
Lí'.  
8 Cate' Lí' gudxu' neda': "Buguilaj neda'",  
idú ladxá'a bubí'a didza', gunnía': Uguilja' Lí', Xan.  
9 Biti' ucachí' lo' lahua' neda'.  
Biti' ta'bagu'u neda' lu yöl-la' rilé quiu'.  
Lí' nacu' Nu rácalen neda'.  
Biti' ucá'anú' neda', en bití' usán no'o neda'.  
Nacu' Dios, Nu rusölá neda'.  
10 Huáca ulu'sán ladxë'ë xuz xiná'a neda',  
pero uzí' cazë' Xanru' Dios neda'.  
11 Busedi neda' para guna' ca ré'ënu' Lí', Xan.  
Bulu'í' neda' para guna' le naca tsahuí',  
tu' nacuá' nupa ta'dá'baga' neda'.  
12 Biti' usanu' neda' lu ná'agaca nupa bití' ta'lé'e neda'  
dxí'a  
para cabí ilún quia' le té'ëni.  
Ta'dá'baga' neda' nupa ta'zí' yë',  
en nupa té'ëni iluá' dö' quia'.  
13 Guxzí' lu në'ë Xanru' Dios gunë' ga ilé'eda' le naca  
dxí'a,  
en le naca tsahuí' queë' ga nacuá' nupa nabángaca.  
La'tu' cabí réajlë'a lë ni, chibóaj ladxá'a.  
14 ¿Guli'gún lözë' Xanru'!  
¿Guli'gaca tsutsu, en bulí'tipa ladxí'li'!  
¿Ön, guli'gún lözë' Xanru'!  
28 Rulidza' Lí', Xan.  
Nacu' Guió'j le ruzóa neda' tsutsu.  
Ruzë' nagu' chí'a, tu' channö usayju' ru'u,  
gaca' ca tu bönní' razië' lataj chul-la.  
2 Ruzë' nagu' le rulidza' Lí' cate' rinábida' Lí' gácalenu'  
neda',  
cate' richisa' na'a zaca' Lataj Lá'ayi ga na' zu'.  
3 Biti' ichë'u neda' tsözxón len nupa tuá' dö',  
en tsözxón len nupa nácgaca xihuí',  
nupa na' tu'í' didza' dxí'a lahuí' lógaca dzaga yu'u  
quéguequi,  
pero yu'u ladxí'do'guequi le cabí naca tsahuí'.  
4 Bubí' quéguequi tsca naca le tun, en tsca naca dö'  
ru'ígaca.  
Bubí' quéguequi tsca naca le tun né'eguequi.  
Bubí' quéguequi tsca ral-la' gaca quéguequi.  
5 Caní gaca quéguequi tu' cabí tun bal le nunë' Xanru',  
en bití' tun bal le nun në'ë.  
Uquínnajë' léguequi, en bití' ca' uchisë' léguequi.  
6 ¿Yöl-la' ba Xanru',  
tu' riyönnë' cate' rinábida' Lë' gácalenë' neda'!

<sup>7</sup> Xanru' caz náquië' yöl-la' huáca quia', en le run chí'i neda'.

Ruzxöni ládxa'a Lë', ate' rácalenë' neda'.

Que lë ni na' ruzí' xibë' ládxi'da'ahua',

ate' gul-la' le guía' Lë': "Xclenu'."

<sup>8</sup> Naca cazë' Xanru' yöl-la' huáca quéguequi bönachi queë',

en náquië' ca' Nu run chí'i Bönni' na' bubéajë' quez queë' para inná bë'ë.

<sup>9</sup> Busölá bönachi quiu', Dios, en ben ga gaca dxi'a quéguequi nupa néquiguequi quiu'.

Ben chí'i léguequi ca run tu nu ruyú bö'cu' zxila', en guché'tica'sö léguequi.

**29** ¡Gulí'cu'ë yöl-la' ba Xanru', libí'ili', nácali' xzí'ini-gaquië' bönni' nayé'pisëgaquië'!

¡Gulí'cu'ë yöl-la' ba Xanru', en gulí'guíë': "Napu' yöl-la' huáca idú'!"

<sup>2</sup> ¡Gulí'cu'ë yöl-la' ba Xanru' le ral-la' gata' que Lë' tu' náquië' lá'ayi!

¡Gulí'gún bal Xanru', tu' naca lachi le naca lá'ayi queë'!

<sup>3</sup> Riyón chí'ë Xanru' lu nísado'.

Riyón chí'ë Xanru' nayé'pisë' ca riyón guziú' rinnë.

Riyón chí'ë Xanru' lu nísado'.

<sup>4</sup> Nál-latërö naca chí'ë Xanru'.

Nayé'pisëtërö chí'ë Xanru'.

<sup>5</sup> Chí'ë Xanru' rilá'a yugu' yaga zxön.

Ön, chí'ë Xanru' riguitsaj yugu' yaga lu guía' Líbano.

<sup>6</sup> Runë' Xanru' ga ta'xiti' guía' ca tunba' bédxido'.

Ta'xiti' guía' Líbano, en guía' Siriön ca tunba' bëdx guía'.

<sup>7</sup> Chí'ë Xanru' run ga rèpi yösa.

<sup>8</sup> Ruxizi chí'ë Xanru' la' guixi' ga dë lataj.

Ruxizi chí'ë Xanru' la' guixi' nazí'i le Cades.

<sup>9</sup> Chí'ë Xanru' run ga ta'bé'quiba' bidxina' guixi' böa' hué'ënido' qué'gacaba',

en run ga ta'guínnaj yúgu'të laga' dxí'agaca yugu' yaga.

Lu yudo' queë' tuí'i didza' yúgu'të le nacua', ta'nná: "¡Yöl-la' ba Lë'!"

<sup>10</sup> Gurö'ë gunná bë'ë Xanru' cate' guró'ö nisa lu idütë yödzölió.

Ön, rö'ë rinná bé'tica'së' Xanru'.

<sup>11</sup> Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a qué'gaca bönachi queë', en gunë' ga ila'böza dxi'a tsáhuí'do'.

**30** Guna' Lí' zxön, Xan, tu' buchisu' Lí' neda', en bití' bë'u lataj bi ilún quia' nupa bití' ta'lé'e neda' dxi'a.

<sup>2</sup> Rigu'a Lí' yöl-la' ba, Xana' Dios, tu' bulidza' Lí' gácalenu' neda', ate' bunu' neda'.

<sup>3</sup> Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí' tsu'a lataj chul-la ga dzö'ö nupa nátigaca.

<sup>4</sup> ¡Gulí'gul-la yöl-la' ba queë' Xanru', libí'ili' néquili' quez queë'!

¡Gulí'guíë': "Xclenu'" ca naca Lë' le naca lá'ayi!

<sup>5</sup> Tu chí'isö rilenë',

pero ruzá' ládxi'tica'së' queëru'.

Channö códxiru' tu yëla,

lu yöl-la' rudzeja queëru' códxí'aru' itó yu.

<sup>6</sup> Cate' guca dxi'a quia', ní'irö gunní'a:

"Gatga bi utsá' neda'."

<sup>7</sup> Tu' buzá' ládxi'u quia', Xan, buzú' neda' ga zoa' tsut-su,

en cate' bucachí' lo', gurö'a böniga.

<sup>8</sup> Bulidza' Lí', Xan,

en gúta'yua' lo'.

<sup>9</sup> ¿Bizxi xibé uzi'tso' channö gátia', en tsöjtsázia' lataj chul-la ga dzö'ö nupa nátigaca?

¿Naru' huácatsö cu'a Lí' yöl-la' ba channö huöáca' bëchtö yu?

¿Naru' huácatsö ulu'a lo le naca idú' quiu'?

<sup>10</sup> Ruzé' nagu', Xan, en ruzá' ládxi'u quia'.

Gúcalen neda', Xan.

<sup>11</sup> Buí'inida', ate' benu' ga buyá'a lu yöl-la' rudzeja quia'.

Bugú' lari' cá'asö gúcu'a', en bugacu' neda' le ruzi'a xibé.

<sup>12</sup> Bil-la bö' naca caza' yöl-la' ba quiu', en bití' soa dx-isö.

Guíëtica'sa' Lí': "Xclenu'", Xana' Dios.

Ruzxöni ládxa'a Lí', Xan.

**31** Bití' gu'u lataj utuí'ida'.

Tu' nacu' tsahuí', busölá neda'.

<sup>2</sup> Ruzé' nagu' quia', en rusöló' neda'.

Gacu' ca tu guiójtö'o ga soa' tsutsu, en ca tu ga soa' dxi'a tsáhuí'do' lu gudil-la.

<sup>3</sup> Nacu' Lí' guiójtö'o ga zoa' tsutsu, en le run chí'i neda'.

Para gaca yöl-la' ba que Lo' guché' neda', en buluí'i neda' le dxi'a guna'.

<sup>4</sup> Ubéaju' neda' lu du yalaj nucáchí'gaquië' bönni' tu'ë dö',

tu' nacu' Lí' yöl-la' nál-la quia'.

<sup>5</sup> Rigu'a lu no'ö bö' naca caza'.

Böá'au' neda', Xan, Dios idú'.

<sup>6</sup> Bití' rilé'eda' dxi'a nupa tun zxön budó' guiójt budó' yaga,

pero neda' ruzxöni ládxa'a Lí', Xan.

<sup>7</sup> Udzejada', en uzi'a xibé yöl-la' dxi'i ládxi' quiu',

tu' bilé'e quézinu' le gudí'i guzáca'a.

Nöz quézinu' yugu' le raca quia'.

<sup>8</sup> Bití' bucá'anu' neda' lu na' nu bití' rilé'e neda' dxi'a, pero nuzú' neda' tu lataj ga zoa' tsutsu.

<sup>9</sup> Buzá' ládxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxá', en rudú' ládxa'a.

<sup>10</sup> Riyechí' dza quia' tu' ruhuí'inide'eda',

en tu' rinné' ládxa'a, en riyechí' iz quia'.

Rudú' ládxa'a tu' nözi dö' nu'a,

ate' nadxita idütë le naca'.

<sup>11</sup> Tu' nözi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa núnbë'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

<sup>12</sup> Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.  
<sup>13</sup> Biyönda' didza' zí' ta'nné bönachi zían quia'  
 bagáchi'sö.  
 Gátitès zoa le run gadxi neda'.  
 Tun xtídza'gaca bi ilún quia'.  
 Ta'zá' ládxi'gaca nacxi iluti neda',  
<sup>14</sup> pero neda' ruzxöni ládxa'a Li', Xan.  
 Rnnía' nacu' Dios quia'.  
<sup>15</sup> Yú'ugaca lu no'ó yúgu'tè dza soa' ibana'.  
 Busölä neda' lu ná'agaca nupa bití' ta'lé'e neda' dxi'a,  
 en lu ná'agaca nupa ta'zóa regu' neda'.  
<sup>16</sup> Lu yöl-la' ruzá' ladxí' quiu' buyú neda', huen dxin  
 quiu'.  
 Lu yöl-la' dxi'i ladxí' quiu' busölä neda'.  
<sup>17</sup> Bití' gu'u lataj utuí'ida', Xan, tu' rulidza' Li'.  
 Ben ga ulu'tuí' nupa tuá' dö'.  
 Ben ga ila'cuá' dxisö lu yeru ba.  
<sup>18</sup> Ben ga bití' gaca bi inná nu rizí' yè',  
 nu na' rinné zí' queé' bönní' tsahui',  
 en run ba zxön cuini, en rulidza ditaj luzé'e.  
<sup>19</sup> ¡Bica' zxön yöl-la' dxi'i ladxí' quiu',  
 læ na' napu' para gácalenu' nupa tadxí' Li'!  
 Runu' caní' quégaca nupa tu'zxöni ladxí' Li'  
 lógaca nupa tun ba zxön cuiniguequi.  
<sup>20</sup> Rucáchu'u légaquié' ga na' zu' bagáchi'sö,  
 ga bití' gaca idxín nu bönní' xihui'.  
 Run chí'u légaquié' bagáchi'sö ga bití' gaca idxín  
 didza' bizxaj.  
<sup>21</sup> ¡Yöl-la' ba Xanru' Dios,  
 tu' buluí'iné' neda' ca nadxí'iné' neda' cate' ní' zoa' tu  
 yödzö  
 ga nagú'ugaquié' lé'ajlö bönní' tu'tíl-lalené' neda'!  
<sup>22</sup> Lu yöl-la' radxi ridzöbi quia' gunnía': "Ilútié' neda' lo'  
 Li', Xan",  
 pero biyönnu' le gunábida' Li', cate' ní' bulidza' Li'.  
<sup>23</sup> ¡Gulí'dxí'i-né' Xanru', libí'ili' néquili' queé'!  
 Rapa chí'è Xanru' nupa ta'yéajlè' Lè',  
 en rubí'è ca sa'yéaj queé' bönní' run ba zxön cuiné'.  
<sup>24</sup> ¡Gulí'gaca tsutsu, en bulí'tipa ládxi'li',  
 yúgu'tèli' na' runli' löza Xanru' Dios!  
**32** ¡Bica' ba bönní' na' Dios buniti lahué' lè' ca naca  
 dö' bí'è,  
 en bugú'è dul-la' queé'!  
<sup>2</sup> ¡Bica' ba bönní' na' Dios rnné' bití' nabágué'è xigua',  
 en bití' zóalen læ' yöl-la' rizí' yè'!  
<sup>3</sup> Cate' guzóa' dxisö ca naca dul-la' quia',  
 budú ládxa'a tu' gunnética'sö ládxa'a.  
<sup>4</sup> Rëla, en te dza buquí' busácu'u neda', Dios.  
 Budú ládxa'a ca raca cate' rö' bóchila.  
<sup>5</sup> Ní'irö guxóalëpa' dul-la' nabága'a lo' Li',  
 en bití' bucácha'a le xihui' bena'.  
 Gunnía': "Ixóalëpa' dö' bí'a lahué' Xana",  
 ate' buniti lo' neda' ca naca xigua' gubága'a.  
<sup>6</sup> Que læ ni na', nútítès nu nunbè' Li', Dios, ral-la'  
 ulidza Li'  
 cate' dè lataj gü'íilen Li' didza'.  
 Cate' rö' nisa bach luyú ni, bití' ca' ideli' idxín ga zoa  
 nu na'.

<sup>7</sup> Li' nacu' ga gaca ucachi' cuina' cate' zoa bönadxi  
 quia'.  
 Li' caz gun chí'u neda' para cabí bi gaca quia'.  
<sup>8</sup> Li' gunu' ga gúl-latica'sa' quiu' Li' tu' rusöló' neda'.  
 Rnné' Dios: "Neda' uzéajní'ida' lí', en uluí'ida' lí' le ral-la'  
 gunu'.  
 Usédida' lí', en uyútica'sa' lí'.  
<sup>9</sup> Bití' gacu' ca tu böa' o tu mula cabí ta'yéajní'iba'.  
 Ral-la' cu'u guié' en du rú'ugacaba' para inná bé'enu'  
 léga'caba'."  
 Channö cabí gunu' caní, bití' ca' ilunba' ca ré'ènu'.  
<sup>10</sup> Zían le tun ga tu'hu'íniguequi nupa tuá' dö',  
 pero bönní' ruzxöni ládxi'è Xanru' ilé'ené' yöl-la' dxi'i  
 ladxí' queé'.  
<sup>11</sup> Bulí'dzéjalené' Xanru', en bulí'sí' xibé', libí'ili' nácalí'  
 tsahui' lahué' Lè'.  
 Lu yöl-la' rudzeja queéli' gulí'códxi'a, libí'ili' nácalí' idú  
 dxi'a.  
**33** Lu yöl-la' rudzeja queéli' gulí'gul-la lahué' Xanru',  
 libí'ili' nácalí' tsahui' lahué' Lè'.  
 Nupa ná'cagaca tsahui' ral-la' ila'gú'u Lè' yöl-la' ba.  
<sup>2</sup> Gulí'guí'è Lè': "Xclenu'", quínnili' læ'e bihuél-la.  
 Gulí'gul-la yöl-la' ba queé', quínnili' le zè chí du que.  
<sup>3</sup> Gulí'gul-la queé' tu le rul-la cubi.  
 Gulí'quinnaj dxí'ado', en lu yöl-la' rudzeja queéli'  
 gulí'códxi'a.  
<sup>4</sup> Xtídze'è Xanru' naca idú tsahui',  
 ate' idú ládxi'è runé' yúgu'tè bi runé'.  
<sup>5</sup> Nadxí'iné' le naca dxi'a, en le naca tsahui'.  
 Nalá' lahui yöl-la' dxi'i ladxí' queé' Xanru' idúte  
 yödzölió.  
<sup>6</sup> Len didza' bé'èsè' Xanru', bené' lúzxiba,  
 en bené' yúgu'tè böljaj bení' len bö' rirúaj ru'è.  
<sup>7</sup> Rutubé' nisa rö'ö nísado' para gaca ca tu guí'a.  
 Napa chí'è nisa rö'ö zili ga na' nupé'è xilataj.  
<sup>8</sup> Yúgu'tè bönachi ral-la' ila'dxi'i Xanru'.  
 Bönachi idúte yödzölió ral-la' ila'cuá' nöxaj lahué' Lè'.  
<sup>9</sup> Bé'èsè' didza' Xanru', ate' la' gúcatè ca na' gunné'.  
<sup>10</sup> Gunná' bè'è, ate' guca tsutsu le nuné'.  
 Runé' Xanru' ga tu'huóaca cá'asö didza' túngaca bö-  
 nachi yugu' yödzö.  
 Runé' ga bití' ilaca le té'èni ilúngaca bönachi.  
<sup>11</sup> Sóatica'sö tsutsu didza' nuné' Xanru'.  
 Le rizá' ládxi'è ulu'gá'anatica'sö quéguequi xí'ini  
 xí'sóaru'.  
<sup>12</sup> Bica' bágaca bönachi yödzö na' náquié' Xanru' cazé'  
 Dios quéguequi,  
 bönachi na' nabó' cazé' Dios para ilaca quez queé'.  
<sup>13</sup> Zoa cazé' Xanru' yehua' yubá, ruyúé' ga zóaru'.  
 Rilé'ené' le tun yúgu'tè bönachi nacua' idúte yödzölió.  
<sup>14</sup> Ga na' zoa cazé' ruyúé' idú gásibi'ilö,  
 en rilé'ené' yúgu'tè nupa nacua' idúte yödzölió ni.  
<sup>15</sup> Nun cazé' Lè' ládxi'do'gaca yúgu'tèguequi.  
 Réajni'i quéziné' ca naca yúgu'tè le túngaca.  
<sup>16</sup> Bití' ca' ulé' bönní' unná' bé' nacua' queé' bönní'  
 guizxi yu röjajúé' gudil-la.  
 Bití' ulé' bönní' zoé' gudil-la tu' nál-latèrè'.  
<sup>17</sup> Bití' nazaca' gunru' löza böa' para idéli'ru' lu gudil-la,

tu' cabí gaca usölabá' nu bönni' tu' nál-latëroba'.  
 18 Buli'yú, ruyútica'së' Xanru' nupa tadxi Lë',  
 nupa na' tun löza yöl-la' dxi'i ladxí' queë',  
 19 para usölë' léguequi lu yöl-la' guti,  
 en para ugahuë' léguequi cate' tsu'u gubín.  
 20 Idú ladxí'ru' runru' löza Lë' Xanru'.  
 Rácalen cazë' rë'u, en rapa chi'ë rë'u.  
 21 Rudzeja ladxí'lenru' Lë',  
 en usxöni ladxí'ru' Lë', tu' náquië' lá'ayi.  
 22 Lu yöl-la' dxi'i ladxí' quiu' gúcalen netu', Xan,  
 tu' runtu' löza Li'.

**34** ¡Innética'sa' queë' Xanru' náquië' dxi'a!  
 ¡Cú'utica'sa' Lë' yöl-la' ba!  
 2 Bö' naca caza' gun zxön Xanru'.  
 Nupa nácacaga nöxaj ladxí' ila'yöni lë ni, en ulu'dzeja.  
 3 Gulí'güí' zxönë' Xanru' tsözxón len neda',  
 en tsözxón usiyönru' bönachi ca naca Lë' La'ayi.  
 4 Bulidza'-në' Xanru', ate' bubí'ë didza' quia',  
 en busölë' neda' lu yugu' le gúdxida'.  
 5 Nupa nácacaga queë' bila'dxín lahuë', en bulu'zí'  
 xibé'.  
 Bítirö caz ulu'tuí' nupa na'.  
 6 Bulidza'-në' Xanru', ate' biyönnë' quia' neda', bönni'  
 yechi',  
 en busölë' neda' lu yúgu'të le guca quia'.  
 7 Gubáz lá'ayi que ya'abá queë' Xanru' tapa chi'ë nupa  
 tadxi Lë',  
 en tu'sölë' léguequi lu yúgu'të le raca quéguequi.  
 8 Gulí'sí' bë'ë, ate' inózilí' náquië' Xanru' dxi'a.  
 ¡Bica' ba bönni' ruzxöni ladxë'ë Lë'!  
 9 Gulí'gadxi Xanru', libí'ili' nácali' quez queë',  
 tu' cabí bi ila'yadzaj nupa tadxi Lë'.  
 10 Ta'yadzaj ta'yúdxiba' bëdxi guixi', en ta'dunba',  
 pero nupa tu'lidza Xanru' bití' ca' ta'yadzaj le naca dx-  
 i'a.  
 11 Gulí'dá libí'ili', bí'ido', en buli'zé nágali' xtídzá'a.  
 Uzéajni'ida' libí'ili' para gádxilí'-në' Xanru'.  
 12 ¿Nuzxi caz bönni' ré'ënë' soë' ibanë',  
 en ré'ënë' soë' iz zían para uzí'ë xibé le naca dxi'a?  
 13 Ben chí'i lúdxu'u para cabí gu'u didza' xihuí',  
 en para cabí si' yé'enu' luzó'o.  
 14 Bucá'ana le cabí naca tsahuí', en ben le naca dxi'a.  
 Bë' ladxí' cözu' dxi'a tsáhui'do',  
 en ben bayudxi gunu' yugu' lë ni.  
 15 Ruyútica'së' Xanru' nupa nácacaga tsahuí',  
 en riyón quézinë' cate' tu'lidza Lë'.  
 16 Uzáguë'ë Xanru' xinózgaca nupa tuá' dö',  
 en gunë' ga cuntu nu tsöjné léguequi.  
 17 Nupa nácacaga tsahuí' tu'lidza Xanru', ate' riyönnë'  
 quéguequi,  
 en rusölë' léguequi lu yugu' le raca quéguequi.  
 18 Xanru' zóalen cazë' nupa tu'hu'ini ladxí',  
 en rusölë' nupa nácacaga nöxaj ladxí'.  
 19 Zían le riguí' rizáquë'ë bönni' tsahuí',  
 pero Xanru' rusölë' lë' lu yúgu'të lë na'.  
 20 Xanru' rapa chi'ë yúgu'të dxita yu'ë,  
 ate' bití' gatsaj nitú dxita queë'.  
 21 Le xihuí' run nu ruá' dö' gun ga gati nu na',

ate' ila'baga' xiguia' nupa bití' ta'lé'e dxi'a le naca  
 tsahuí'.

22 Xanru' caz ruhuöá'uë' bö' nácacaga caz huen dxin  
 queë',  
 ate' bití' irugu que nitú nupa na' tu'zxöni ladxí' Lë'.

### Tu le bil-lë' David

**35** Xana' Dios, gudá'baga' nupa bití' ta'lé'e neda' dx-  
 i'a.

Butíl-lalen nupa ta'díl-lalen neda'.

2 Guzxón le gun chí'i neda' lu gudil-la,  
 en gudá gácalenu' neda'.

3 Guzxón yaga tuchi' quiu' para uzagu'u xinózguequi  
 nupa ta'zóa regu' neda'.

Gudxi bö' naca caza' nacu' Li' Nu rusölá neda'.

4 Ben ga ulu'tuí', en ulu'gá'ana cá'asö nupa té'ëni iluti  
 neda'.

Ben ga ulu'huécaj, en ulu'gá'ana cá'asö nupa té'ëni  
 iluí' dö' quia'.

5 Ben ga ilaca ca bëbu zxe café zeaj lu bö'ös,  
 en ben ga ulaguë' gubáz lá'ayi que ya'abá quiu' légue-  
 qui.

6 Ben ga gaca chul-la nöza yú'ugaca, en ga cuílagaca,  
 ate' soa régu'ë gubáz lá'ayi quiu' léguequi.

7 Bulu'cáchi' du yalaj le sön neda', en bití' bi nuna'  
 quéguequi.

Gula'chó'öna yeru ga tsöjbixa', en bití' bi nuna'  
 quéguequi.

8 Ben ga idxín quéguequi tsálido'os le usuniti légue-  
 qui,

en ben ga du yalaj na' bulu'cáchi' sön la' cuínguequi  
 quez.

Ben ga ila'bixi lu yeru na' gula'chó'öna.

9 Udzeja ladxí'lëna'-në' Xanru',  
 en uzí'a xibé yöl-la' rusölá queë'.

10 Ila'nná dxita néquinida': "Xan, ¿nuzxi caz naca ca  
 nacu' Li'?

Rusöló' nu riguí' rizáca' lu na' nu nál-latëro ca le.

Rusöló' nu riguí' rizáca', en riyadzaj riyudxi lu na' bönni-  
 ni' ribanë' le nequi que."

11 Ta'dá'baguë'ë bönni' xihuí' neda', en ta'nnë' quia'.

Ta'nabi yúdxinë' neda' ca naca yugu' le cabí nözda'.

12 Tu'bí'ë quia' le naca dö' cate' runa' le naca dxi'a,  
 ate' ruhu'ínide'e ladxá'a.

13 Pero neda' gúcua' larí' cá'asö cate' guláquië' huë'.

Bena' gubasa, en busaca' zí' bö' naca caza',  
 en uláz quéguequi bulidza'-në' Dios zían luzuí'.

14 Bu'ínide'eda' tsca guca luzá'a o bí'i böchi' caza' nu  
 na' guca huë'.

Gurödxí yecha'a ca hu'ínide'eda' channö gátinu xiná'  
 caza',

15 pero cate' guchixi guníguida' neda', bulu'dzëjade'e,  
 en bulu'dubi tsözxón.

Yugu' bönni' na' bulu'cá'anë' neda' cá'asö bulu'dubë'  
 para ilunë' ga cö'a baguí'.

Yugu' bönni' na' bití' núnbë'a gulúnnatica'së' neda'.

16 Bulu'saca' zí'ë neda', en bulu'titjë' quia'.

Lu yöl-la' rilé quégaquië' neda' gulagu zxea láyi'-gaquië'.

<sup>17</sup> Xan, ¿gáca'xte caz uyú iná'su' le tunë'?

Busölá neda' lu dö' tu'ë quia'.

Busölá neda' lu ná'agaquië' bönni' na' ná'cagaquië' ca yugu' bédxi guixi'.

<sup>18</sup> Guía' Li': "Xclenu'" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

<sup>19</sup> Biti' gu'u lataj ulu'dzeja nupa ta'dá'baga' neda', en ta'zí yë',

en bití' gu'u lataj ulu'titaj quia', nupa na' tu'dí'i neda', en bití' bi nuna' quéguequi.

<sup>20</sup> Catu caz tu'í didza' le gun ga soa dxisö didza' bizx-aj.

Lu yöl-la' rizí' yë' quéguequi ta'nné quégaca nupa ta'bö' dxi'a tsahui'do' yödzölió ni.

<sup>21</sup> Bulu'salaj ru'íguequi, en gula'nné quia', gula'nná: "¡Ön, bilé'e quézitu' le nuné'!"

<sup>22</sup> ¡Bilé'e quézinu' Li' lè ni, Xan! ¡Biti' su' dxisö!

¡Biti' ucá'anú' neda', Xan!

<sup>23</sup> ¡Guyasa, Xan! ¡Busubán ládxu'u, Xan, para uchi'a usöró'u quia'!

¡Gúcalen neda', Xana' Dios!

<sup>24</sup> ¡Tu' nacu' tsahui', buchi'a busöró quia', Xana' Dios!

¡Biti' gu'u léguequi lataj ulu'dzeja ní'a que le raca quia'!

<sup>25</sup> ¡Biti' gu'u léguequi lataj ila'nná:

"Ön, bidéli'ru' le guzé ládxiru'!"

¡Biti' gu'u lataj ila'nná: "Chibucúl-laru lè'!"

<sup>26</sup> ¡Ben ga ulu'tuí'i, en ulu'gá'ana cá'asö nupa tu'dzeja cate' ruhu'ínida'!

¡Ben ga ulu'tuí'i, en ulu'gá'ana cá'asö nupa ta'dá'baga' neda'!

<sup>27</sup> ¡Ben ga ila'bódxí'a lu yöl-la' rudzeja quéguequi,

en ulu'zí' xibé nupa tu'í ládxí'gaca urúaja' tsahui'!

¡Bé' lataj ila'nnática'sö: "Nayépisëtë'rë' Xanru' Dios, tu' raza ládxë'ë gunë' ga gaca dxi'a quégaca huen dx-in queë'!"

<sup>28</sup> Ní'irö guna' ba nalí quiu', innía': "¡Nacu' tsahui'!" en cu'a Li' yöl-la' ba idú dza.

**36** Le naca xihui' ru'ílen bönni' nucá'anë' Dios lu icja ládxí'da'ahuë'.

Biti' ca' rádxi'në' Dios.

<sup>2</sup> Tu' run ba zxön cuinë'

réquinë' bití' nózinë' Dios nabáguë'ë lë' dul-la', en bití' ichúguië' Dios queë'.

<sup>3</sup> Ru'ë didza' xihui', en rizí' yë'ë.

Biti' réajni'ínë', en bití' runë' le naca dxi'a.

<sup>4</sup> Cate' ní' dë' lu le ráti'në' rizá' ládxë'ë ca naca le xihui' gunë'.

Ruí'í ládxë'ë gunë' le cabí naca dxi'a,

en bití' rusanë' runë' le naca xihui'.

<sup>5</sup> Zxöntë'rö ca yehua' yubá naca yöl-la' dxi'í ladxi' quiu', Xan,

ate' gúntica'su' ca rna xtídzu'u, tsca zoa yehua' yubá.

<sup>6</sup> Naca tsutsu le tsahui' nacu' ca ná'cagaca tsutsu yugu' gu'á zxön quiu'.

Ca ruchí'a rusöró'u naca ca naca nísado', tu' cabí gaca nu gúnbë'e le.

Run chí'í casu' bönachi, en yugu böa' guixi', Xan.

<sup>7</sup> Nazáca'tërö yöl-la' dxi'í ladxi' quiu', Dios.

Run chí'u yúgu'të bönachi ca runba' yöjede, run chí'iba' yugu' bórado' znan xílabá'.

<sup>8</sup> Tu'huölaj tu'dzë'e bönachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'í ladxi' quiu'.

<sup>9</sup> Yúgu'të le nacuá' nabánigaca Li'.

Tu' naca casu' bení' rilé'etu' bení'.

<sup>10</sup> Bidxí'tica'sö nupa núnbë'gaca Li',

en ben le naca dxi'a quégaca nupa ná'cagaca tsahui'.

<sup>11</sup> Biti' gu'u lataj bi ilún quia' nupa tun ba zxön cuínguequi,

en bití' gu'u nupa tuá' dö' lataj ulu'laga' neda'.

<sup>12</sup> Nadzö'ögaca nupa tuá' dö'.

Déguequi luyú, en bití' ca' gaca ulu'huóasa.

**37** Biti' ubi ugu'í ládxí'do'olí' tu' tu'zí'gaca xibé nupa tuá' dö'.

Biti' uzxé'elí' nupa bití' tun le naca dxi'a.

<sup>2</sup> Huadóditë quéguequi ca raca que guixi' nacuadi, en udxi quéguequi ca raca quégaca guíxi'do' narúgu-gaca.

<sup>3</sup> Bulí'zxöni ládxë'ë Xanru', en guli'gún le naca dxi'a.

Buli'gá'ana luyú queë', en guli'cóz dxi'a tsahui'do'.

<sup>4</sup> Bulí'sí' xibé' Xanru',

ate' gunnë' queé'li' le rizé ládxí'li'.

<sup>5</sup> Bulí'dödi cuinli' lu në'ë Xanru'.

Buli'zxöni ládxë'ë Lë', ate' gunë' le gácalen libí'ili'.

<sup>6</sup> Gun cazë' Lë' ga urúajli' tsahui', en gácali' ca bení', en cate' uchi'a usöróë' queé'li', gaca queé'li' ca lahui' dza.

<sup>7</sup> Guli'sóa dxisö lahuë' Xanru', en guli'cöza le gunë'.

Bití' cuéqui ícjalí' tu' nözi bönni' ruzi'ë xibé,

bönni' na' ru'ë dö'.

<sup>8</sup> Bítirö lëli', en bulí'sán yöl-la' ridzá'a.

Bití' ubi ugu'í ládxí'do'olí' tu' gun lè ni ga guá'ali' dö'.

<sup>9</sup> Dios caz uzáguë'ë xinózguequi nupa tuá' dö', pero nupa tu'zxöni ladxi' Xanru', guequi quéguequi luyú.

<sup>10</sup> Ia'látisö xidzé, en bítirö soë' bönni' na' ru'ë dö'.

Uguiljalí' xilatjé', pero bítirö soë' ní'.

<sup>11</sup> Nupa ná'cagaca nöxaj ladxi', guequi quéguequi luyú,

ate' ulu'zí' xibé yöl-la' tsahui' que.

<sup>12</sup> Tun didza' nupa tuá' dö' bi ilúngaca quégaca nupa ná'cagaca tsahui',

en lu yöl-la' rilé quéguequi tagu zxea láyi'guequi.

<sup>13</sup> Ruzxidxi cazë' Xanru' quéguequi,

tu' rilé'enë' dza udxi quéguequi.

<sup>14</sup> Nupa tuá' dö' chigula'béaj guíë tuchi' quéguequi,

en nuá'gaca uxiti' yaga quéguequi

para ulu'xicja nupa ta'zaca' zí', en ta'yadzaj ta'yudxi,

en para iluti nupa tun le naca dxi'a.

<sup>15</sup> Guíë tuchi' quéguequi ila'chiza la' ládxí'do'guequisö,

ate' ila'guítsaj uxiti' yaga quéguequi.

<sup>16</sup> Dxi'atë'rö le do' dësö queë' bönni' tsahui'



ca le zían dë queë' bönni' ru'ë dö'.  
 17 Huayúzxjagaca ná'agaca nupa tuá' dö',  
 pero Xanru' caz rácalenë' nupa náacagaca tsahui'.  
 18 Ruí'i ladxi' cazë' Xanru' nupa biti' bi xiguia' nabága'-  
 gaca,  
 ate' guéquitica'sö xiyúgaca quéguequi.  
 19 Biti' ca' ulu'tuí'i cate' idxín dza biti' gaca dxí'a,  
 en cate' tsu'u gubín, gáta'dëra le ilágugaca.  
 20 Ulu'niti tsaz nupa tuá' dö',  
 ate' nupa biti' ta'lé'e dxí'a Xanru' ilaca ca yöl-la' lachi  
 que guixi'.  
 La' tóditë quéguequi, en ilaca ca dzön le rinítitë.  
 21 Ta'nábini nu bi gunna quéguequi tu chí'sö, pero  
 biti' ca' ulu'bí'i lë na'.  
 Nu naca tsahui' ruzá ladxi' quéguequi, en runödzej  
 quéguequi.  
 22 Gaca luyú quégaca nupa run lá'ayë' Xanru',  
 pero ila'niti tsaz nupa rudxié' Lë' dö'.  
 23 Le runë' bönni' dxí'a naca le nuluí'inë' Xanru' lë',  
 ate' raza ládxë' Lë' le runë' bönni' na'.  
 24 Cate' röjtsö'ë, biti' ca' röjtsö'ë tsaz,  
 tu' röjzönë' Xanru' caz bönni' na'.  
 25 Guca' ra'bando', pero na'a nagula',  
 en catu caz bilé'eda' nusán në'ë Dios bönni' tsahui',  
 en catu caz bilé'eda' riyadzaj le ilágubi' xzí'inë'.  
 26 Yugú' dza ruzá' ládxë'ë bönni' tsahui' quéguequi  
 luzé'ë  
 en runödzjë' le ta'nábini lë' unödzjë' tu chí'sö,  
 Náacagacabi' xzí'ini xí'sóë' tu le run ga raca dxí'a  
 queéru'.  
 27 Buli'cá'ana le cabí nácatë, en guli'gún le naca dxí'a.  
 Channö caní gunli', sóali' tsaz,  
 28 tu' nadxí'inë' Xanru' nu run le naca tsahui',  
 en catu caz usán në'ë nupa néquiguequi quez queë'.  
 Gun chí'tica'së' léguequi,  
 pero usnítitë' xzí'ini xí'sóagaca nupa tuá' dö'.  
 29 Guequi luyú quégaca nupa náacagaca tsahui',  
 ate' ila'cuática'sö luyú na'.  
 30 Ru'ë bönni' tsahui' didza' le napa yöl-la' réajni',  
 ate' raca yöl-la' ruchí'a rusöró ní'a que didza' na' ru'ë.  
 31 Yu'u icja ládxí'da'ahuë' le gunná bë'ë Dios.  
 Que lë ni na' catu caz ichixi iníguinë'.  
 32 Ruyuda' nu ruá' dö' le runë' bönni' tsahui',  
 en riguilaj nacxi gaca guti lë'.  
 33 Xanru' biti' gu'ë nu na' lataj bi gun queë' bönni'  
 tsahui' na',  
 en biti' gu'ë lataj irugu queë' cate' nu uchí'a usöró  
 queë'.  
 34 Buli'zxöni ládxë'ë Xanru', en guli'gún ca ré'ënë' gun-  
 lí',  
 ate' uchisë' libí'ili' para guequi queé'li' luyú.  
 Cate' udxí' quégaca nupa tuá' dö', hualé'e quézilí' le.  
 35 Bilé'eda'-në' bönni' huía' dö'.  
 Gúquië' ca tu yaga zxön, en buzí'de'enë' xibé.  
 36 Ní'irö gudödi queë', en bítirö zoë'.  
 Yöjdilja' lë', pero biti' ca' guca udzólida' lë'.  
 37 Buli'yú ca náquië' bönni' tsahui'.  
 Cuntu nu gaca bi inné' queë',

tu' ila'cuá'abi' xzí'ini xí'sóë' bönni' zxön ladxi'.  
 38 Ulu'niti tsaz nupa tu'cá'ana le gunná bë'ë Dios.  
 Uxiúdxë' Xanru' yugu' xzí'ini xí'sóagaca nupa tuá' dö',  
 39 pero rusólá cazë' nupa náacagaca tsahui'.  
 Rutipë' ládxí'guequi cate' bi raca quéguequi.  
 40 Rácalenë' léguequi, en rusólé' léguequi.  
 Rubéajë' léguequi lu ná'agaca nupa tuá' dö', en  
 rusólé' léguequi,  
 tu' tu'zxöni ládxí'guequi Lë'.  
 38 Biti' ilenu' neda', Xan, en biti' uzenu' neda' bach.  
 Biti' gunu' neda' xiguia' lu yöl-la' rilé quiu'.  
 2 Ben zí'u neda', en budxíu' neda' huë'.  
 Nuzöjtju' neda' len no'o.  
 3 Yu'a yödzöhuë' zxön tu' rilenu' neda'.  
 Dxí'a huë' idütë le naca' tu' nözi dul-la' nabága'a.  
 4 Xiguia' nabága'a naca ca tu nísado' ga ruchicja' nisa.  
 Naca ca tu yua' zí'i nabága'a neda'.  
 5 Tu' bena' yugu' le cabí naca dxí'a,  
 dxí'a huë' le rilá' siguti, en rudzu'.  
 6 Narecji' cúdza'a, en nagá'ana' cá'asö.  
 Idú dza ruhuí'inide'eda'.  
 7 Idütë le naca' yú'uda'a xilá,  
 ate' nazxí xipéla'a.  
 8 Rudú ládxa'a, en ricuídida'.  
 Rinnëda' ládxa'a tu' ruúbi ruguí' ládxí'da'ahua'.  
 9 Nöz quézinu' Li', Xan, le rizé ládxa'a,  
 en riyönnu' le rinnética'sö ládxa'a.  
 10 Richunchu ládxí'da'ahua', en ricuidí' ládxa'a,  
 ga ridxintë richul-la guíój lahua'.  
 11 Bítirö ta'dzaga neda' yugu' luzá'a, en yugu' bócha'a,  
 tu' nözi xihuë'a,  
 ate' tu'biga' dí'a dza quia' ga zoa'.  
 12 Nupa té'ëni iluti neda' ta'bequi le ila'zón neda',  
 ate' nupa té'ëni ulu'cul-la neda' tun xtídza'guequi  
 nacxi ulu'suniti neda'.  
 Idú dza ta'bequi ícjaguequi bi ilún quia'.  
 13 Naca' ca tu bönni' nacódzuë', en bítirö riyönda'.  
 Naca' ca tu bönni' narugu lúdxë'ë, en biti' risaljë' ru'ë.  
 14 Naca' ca tu bönni' bítirö riyönnë',  
 en que lë ni na' biti' bi didza' rubi'ë.  
 15 Tuzu' Li' ruzxöni ládxa'a, Xan.  
 Ubí'i cazu' didza', Xana' Dios.  
 16 Biti' gu'u lataj ulu'dzeja ní'a que le raca quia'.  
 Biti' gu'u lataj ilún ba zxön cuínguequi tu' nagá'ana'  
 cá'asö.  
 17 Chizóa' tsöjbixa',  
 en zóalenticá'sö xihuë'a neda'.  
 18 Que lë ni na' rixóalëpa' xiguia' nabága'a,  
 en risébida' ládxa'a tu' nözi dul-la' nabága'a.  
 19 Nacuá' dxí'a, en nál-lagaca nupa téqui neda' zí'.  
 Nayánda' nupa tu'dí'i neda', en biti' bi nuna' quégue-  
 qui.  
 20 Ta'dá'baga' neda' nupa tu'bí'i le cabí naca dxí'a que  
 nu run le naca dxí'a.  
 Caní tun tu' ruí'i ládxa'a guna' le naca dxí'a.  
 21 Biti' usán no'o neda', Xan.  
 Biti' ubigu' ga zoa', Dios quia'.  
 22 Gudáchi gácalenu' neda', Xan,

tu' naca cazu' Li' Nu rusölá neda'.

**39** Gunnía': Gun chí'i cuina' ca naca le runa',  
en bití' guna' dul-la' ca naca didza' ruá'a.  
Bití' bi didza' gu'a  
cate' nacuá' nupa tuá' dö' gal-la' ga zoa'.  
<sup>2</sup> Guzóa' dxisö, en bití' bë'a didza' ga bidxintë  
bití' gunnía' le naca dxí'a, pero biyalí' xihuë'a.  
<sup>3</sup> Bubi buguí'i ládxi'da'ahua',  
en cate' guzá' ládxa'a que, guyegui gulá ládxi'-  
da'ahua'.  
Que lë ni na' gunábida'-në' Xanru', gunnía':  
<sup>4</sup> Xan, ¿gáca'xte caz soa' ibana?  
Bulu'í' neda' tsca iz soa' ibana'.  
Ben ga inözda' channö chizóa' caz gátia'.  
<sup>5</sup> Nabábasö dza nuzú' quia' soa' ibana'.  
Yugu' iz soa' ibana' bití' bi zeaj naca lo' Li'.  
Le nácatë bití' bi nácgaca yúgu'të bönachi nacuá'  
luyú ni.  
<sup>6</sup> Nácgacasö ca tu zxul-la rigú'u böaj.  
Nítisö tu'ubi tu'gu'í' ládxi'do'guequi, en tun dxin.  
Tu'tubi yöl-la' tsahui', pero bití' nözguequi nuzxi gue-  
qui que.  
<sup>7</sup> ¿Bizxi caz gaca guna' löza, Xan?  
Ruzxöni ládxa'a Li'.  
<sup>8</sup> Busölá neda' lu xiguia' nabága'a,  
en bití' gu'u lataj ulu'titaj quia' nupa nácgaca canöz.  
<sup>9</sup> Soa' dxisö, en bití' bi didza' gu'a,  
tu' ben cazu' Li' ga riguí'i rizáca'a lë ni.  
<sup>10</sup> Bítirö gunu' neda' xiguia'.  
Chizóa' gátia' tu' rusaca' zi'u neda'.  
<sup>11</sup> Runu'-në' xiguia' bönni' dul-la', en ruzenu' lë' bach.  
Ca tu'töba' béladö' que le yú'uba', rusunítiu' le ruí'i  
ládxi'ë bönni' na'.  
Bití' bi naca cazë' bönni' dul-la' na'.  
<sup>12</sup> Buzé' nugu' le rulidza' Li', Xan, en le rinábida' Li'.  
Bití' su' dxisö cate' ribödxá' lo' Li',  
en bití' gaca' ca tu bönni' zítu' lo' Li',  
en ca tu bönni' ridasë' ca guláquië' xuz xtó'otu'.  
<sup>13</sup> Benna neda' lataj idipa ládxa'a  
zí'alö ca uzá'a yödzölió ni, en bítirö soa'.  
**40** Lu yöl-la' riböza zxön ladxí' quia' gulöza' gá-  
calenë' Xanru' neda'.  
Ní'irö buzé' nague' quia', en biyönnë' le bulidza'-në'.  
<sup>2</sup> Bubéajë' neda' ca tu lu yeru ga rë', en lu guna' zili.  
Buzóë' neda' tu lu guiójtö'o, en guléquië' neda' tsutsu.  
<sup>3</sup> Busédinë' neda' tu le cubi le rul-la' le naca yöl-la' ba  
queë' Dios queëru'.  
Zián nupa ila'lé'eni lë ni, en ilún Lë' zxön,  
ate' ulu'zxöni ladxí'-në' Xanru'.  
<sup>4</sup> Bica' ba bönni' ruzxöni ládxi'ë Xanru'.  
Bití' runë' tsözxön nu run ba zxön cuini, nu na' run  
zxön yugu' dios núngaca bönachi.  
<sup>5</sup> Ziántë'rö naca le nunu' queëtu', Xana' Dios, yugu' le  
tun ga rubánitu'.  
Ziántë'rö le yu'u icja ládxi'do'o ca naca le gunu' queë-  
tu'.  
Bití' ca' gaca nu ulaba lo' Li' tsca nácgaca.  
Channö gué'enda' nu usiyönda' tsca nácgaca,

nayántë'rö tsca le gaca ulaba'.  
<sup>6</sup> Bití' ré'ënu' gútigaca'-ba' böa' guixí' lo', en calëga bi  
cu'a lo'.  
Bití' rinabu' uzégui'gaca'-ba' böa' bëdxi lo',  
en calëga tu le guna' lo' para ugúa dul-la',  
pero gusalju' naga' para yönda' le guío' neda'.  
<sup>7</sup> Que lë ni na' gunnía': Ni zoa caza' neda' quiu'.  
Lu guichi láyai quiu' nazúaj caz ca naca quia'.  
<sup>8</sup> Raza ládxa'a runa' ca ré'ënu' Li', Dios quia'.  
Nagu'a icja ládxi'da'ahua' xibá naguixju' Li'.  
<sup>9</sup> Ga tu'dubi bönachi guizxi yu quiu', Xan,  
busiyönda' léguequi nacu' tsahui'.  
Bití' ca' guzó'a' dxisö.  
Nöz quézinu' lë ni, Xan.  
<sup>10</sup> Bití' bucáchi'za' icja ládxi'da'ahua' ca ruúnu' tsahui'  
bönachi.  
Bulu'a lahui ca runu' ca rno', en ca rusöló' bönachi.  
Ga nudúbigaca bönachi quiu' bití' guzó'a' dxisö,  
pero bë'a didza' ca nacu' dxí'i ladxí', en ca ru'u didza'  
le nácatë.  
<sup>11</sup> Bití' ugú' quia' yöl-la' dxí'i ladxí' quiu', Xan.  
Yöl-la' dxí'i ladxí' quiu', en ca runu' ca rna xtídzu'u  
ilún chí'tica'sö neda'.  
<sup>12</sup> Zián le raca quia' nagú'ugaca neda' lé'ajlö, le cabí  
gaca nu ulaba.  
Nabága'a yugu' dö' bi'a, en bítirö gaca ilé'eda'.  
Nayanrö ca guitsa' icja', ate' rudú ládxa'a.  
<sup>13</sup> ¡Busölá neda', Xan!  
¡Gudáchi gácalenu' neda', Xan!  
<sup>14</sup> Ben ga ulu'tuí'i, en ila'bó' baguí'i  
nupa na' té'ëni ulu'suniti neda'.  
Ben ga ulu'huécaj, en ulu'gá'ana cá'asö  
nupa na' té'ëni gaca quia' le cabí naca dxí'a.  
<sup>15</sup> Ben ga ulu'dú ládxi'gaca tu' nabíxigaca  
nupa na' tu'titaj neda', ta'nná: "¡Buyútsöca' le raca  
queë'!"  
<sup>16</sup> Ben ga ulu'dzeja, en ulu'zí' xibó' yúgu'të nupa  
tu'guilaj Li'.  
Ben ga ila'nnática'sö nupa ta'dxí'i yöl-la' rusölá quiu',  
ila'nná: "Nayépsëtë'rë' Xanru'."  
<sup>17</sup> Nacuídí'da', en bití' bi gaca guna',  
pero ruí'i ladxí' cazu' Li' neda', Xan.  
Naca cazu' Nu rácalen neda', en Nu rusölá neda'.  
Bití' tsenu' guídu' quia', Dios quia'.  
**41** Bica' ba bönni' ruí'i ládxi'ë nupa nácgaca yechi'.  
Xanru' gácalen cazë' bönni' na' cate' bi gaca  
queë'.  
<sup>2</sup> Xanru' Dios gun chí'ë lë', en gunë' ga soë' ibanë'.  
Gunë' ca' ga uzi'ë xibé xiyú cazë'.  
Bití' usán në'ë lë' lu ná'agaca nupa bití' ta'lé'e lë' dxí'a.  
<sup>3</sup> Xanru' utipë' ládxi'ë bönni' na' cate' ré'enë'.  
Uchisë' lë' lu da'a le ráti'në', en gunë' ga soë' dxí'a.  
<sup>4</sup> Gunnía': Bena' dul-la' lo' Li', Xan.  
Buéchi' ladxí' neda', en bun neda'.  
<sup>5</sup> Nupa bití' ta'lé'e neda' dxí'a ta'nnë' quia', ta'nná:  
"¿Bátaxi gátie', en huáca gal-la ládxi'gaca bönachi lë'?"  
<sup>6</sup> Channö uduyúgaquië' neda', ta'zí' yë'ë.  
Ta'gúë' didza' ca naca le raca quia',

en cate' ta'ruájé', tu'siyönné' bönachi.  
 7 Tu'dubi nupa bití' ta'lé'e neda' dxí'a, en ta'nné' quia'.  
 Ta'zá' ládxí'gaca zían le naca dö' le ilún quia'.  
 8 Ta'nné' quia', ta'nná: "Yu'ë yödzo'hué' le guti lè'.  
 Bití'rö caz huóásé' ga na' dé' lu le dené'."  
 9 Lësca' caní bené' böchí' luzá'a ruzxöni ládxa'a-né'.  
 Bönni' gudágulené' neda' tsözxón ridá'baguë'ë neda'.  
 10 Buéchi' ladxí' neda', Xan, en bun neda',  
 ate' ubí'í caza' quégaca nupa na' bití' ta'lé'e neda' dx-  
 í'a.  
 11 Gácabe'eda' raza ládxu'u neda',  
 tu' cabí ulu'xicja neda' nupa bití' ta'lé'e neda' dxí'a.  
 12 Gácclen cazu' neda' tu' runa' le naca dxí'a.  
 Gunu' ga sóatica'sa' lo' Lí.  
 13 ¡Yöl-la' ba Xanru', Dios quégaca bönachi Israel!  
 ¡Gulí'cu'ë yöl-la' ba na'a dza, en yugu' dza sí' zaca!  
 ¡Ca' gaca!  
 ¡Ön, ca' gaca!  
**42** Ca rizé' ládxí'ba' bidxina' guixí' nisa yégudo',  
 lësca' caní rizé' ládxa'a Lí, Dios.  
 2 Ribidxi ládxa'a Lí' cazu', Dios.  
 ¿Bátaxi udxina' ga dè quia', en tsu'a le yúbölö yudo'  
 lá'ayi quiu'?  
 3 Rëla, en te dza ribödxá', en bití' bi rahua'.  
 Yugu' dza nacua' nupa ta'nábini neda', ta'nná: "¿Gazxi  
 caz zoa Dios quiu'?"  
 4 Risébi ládxa'a cate' röjnedá' ca guca zí'aló,  
 cate' guzá'léná' bönachi guizxi yu, en yöjnórua'  
 láhuilöguequi ra' yu'u queë' Dios.  
 Lu yöl-la' rudzeja queétu' bíl-latu', en guyéaj ládxí'tu'-  
 né' Xanru', en bentu' laní.  
 5 ¿Bizx que risébidá' ládxa'a, en bizx que rö'a böniga?  
 Uzxöni ládxa'a-né' Xanru' Dios, tu' huadxín dza cu'a-  
 né' yöl-la' ba le yúbölö.  
 Náquië' Nu rusölá neda', en náquië' Dios quia'.  
 6 Risébidá' ládxa'a, Dios quia'.  
 Que lè ni na' tsöjnedá' Lí' tsanni ni zoa', ridá' rizxúnna-  
 ja' ra' yegu Jordán,  
 en tsanni ni ridá' lu guí'a Hermón, en lu guí'a Mizar.  
 7 Ca tu guziú' rinné' lu nísado', en ca bö ruí'í tu budoá'  
 nísado' queë' Dios,  
 caní rinné' ladxí' bö' naca caza' lu yöl-la' risébi ladxí'.  
 8 Rinábida'-né' Xanru' huéchi' ládxé'ë neda' yugu' dza.  
 Yugu' dzö' rul-la' yöl-la' ba queë' Lë',  
 en rulidza' Dios, ruí'léná'-né' didza', Nu na' runna  
 quia' yöl-la' na'bán.  
 9 Guí'a-né' Dios, Nu ruzóa neda' tsutsu, innía': ¿Bizx  
 que nál-la ládxu'u neda'?  
 ¿Bizx que run bayúdx quí'í sáca'tica'sa' lu ná'agaca nu-  
 pa bití' ta'lé'e neda' dxí'a?  
 10 Rutsaba yúgu'tè dxita yu'a tu' tu'didza' yudxi neda'.  
 Yugu' dza ta'nábini neda', ta'nná: "¿Gazxi caz zoa Dios  
 quiu'?"  
 11 ¿Bizx que risébidá' ládxa'a, en bizx que rö'a böniga?  
 Uzxöni ládxa'a-né' Xanru' Dios,  
 tu' huadxín dza cu'a-né' yöl-la' ba le yúbölö,  
 tu' náquië' Nu rusölá neda', en náquië' Dios quia'.

**43** Guléaj neda' tsahui', Dios, en bë' didza' uláz quia'  
 lógaca bönachi tuá' dö' quia'.  
 Busölá neda' lu na' nu rizí' yé', en bití' naca tsahui'.  
 2 Lí' cazu' nacu' Dios, Nu rutipa ládxa'a. ¿Bizx que  
 nusán no'o neda'?  
 ¿Bizx que ruhuí'inida' tu' ta'bía no neda' nupa tu'dí'í  
 neda'?  
 3 Gusól-la' quia' bení' quiu', en le naca idútè li quiu'  
 para ulu'luí'í neda' nöza.  
 Ben ga ila'ché' neda' ga naca lá'ayi quiu', ga na' zoa  
 cazu' Lí'.  
 4 Tsu'a ra' bucugu queë' Dios.  
 Ibíga' lahué' Dios, Nu run ga rudzégade'eda'.  
 Gúl-lalena' bihuél-la, cu'a Lí' yöl-la' ba, Dios, nacu' Dios  
 quia'.  
 5 ¿Bizx que risébidá' ládxa'a, en bizx que rö'a böniga?  
 Uzxöni ládxa'a-né' Xanru' Dios,  
 tu' huadxín dza cu'a-né' yöl-la' ba le yúbölö,  
 tu' náquië' Nu rusölá neda', en náquië' Dios quia'.  
**44** Biyón quézitu' le, Dios.  
 Bulu'siyönné' netu' xuz xtó'otu'  
 ca naca yugu' le zxön benu' dza ní'te,  
 cate' ní' gula'cu'ë légaquië' luyú ni.  
 2 Bulaga cazu' Lí' bönachi yugu' yödzo' izá'a,  
 en bucuásu' légaquië' luyú ni.  
 Busaca' zí'u bönachi izá'a na', en gurú'unu' léguequi.  
 3 Bití' gula'dé'í'né' xuz xtó'otu' luyú ni rácasö qué-  
 gaquië',  
 en bití' bulu'sölá la' cuíngacasé',  
 pero ben cazu' Lí' lè na' len yöl-la' huáca zxön quiu',  
 en lu yöl-la' zxön que le naca cazu',  
 ate' bulú'u lahui ca nadxí'inu' légaquië'.  
 4 Naca cazu' Lí' Dios quia', en Nu rinná be'e neda'.  
 Busölá bönachi quiu', yugu' zxí'ini xí'sóé' Jacob.  
 5 Uguntu' dxin yöl-la' huáca quiu', uxícjatu' nupa  
 ta'dá'baga' netu',  
 ate' tu' zóalen cazu' netu', ucúl-latu' nupa bití' ta'lé'e  
 netu' dxí'a.  
 6 Bití' uzxöni ládxa'a uxiti' yaga quia',  
 en bití' uzxöni ládxa'a guíë tuchi' quia' para ilácalen  
 neda',  
 7 tu' rusölá cazu' Lí' netu' lu ná'agaca nupa bití' ta'lé'e  
 netu' dxí'a,  
 en ruzötju' nupa tu'dí'í netu'.  
 8 Cú'utica'stu' Lí' yöl-la' ba,  
 en guíëtica'stu' Lí: "Xclenu'."  
 9 Pero na'a nusán no'o netu', Dios, en bë'u lataj nu  
 buxicja netu'.  
 Bití'rö réajlenu' bönni' queétu' röjáquië' gudil-la.  
 10 Benu' ga buzúnna'jtú lógaca nupa ta'díl-lalen ne-  
 tu',  
 ate' gula'gúë' yugu' le nequi queétu'.  
 11 Bë'u lataj gulútië' ziantu' ca nu rúti-gacaba' bö'cu'  
 zxila'.  
 Bësilásiu' netu' ladjagaca yödzo' izá'a.  
 12 Naca tsca bë'tí'u netu', en láti'do'os guzxi'u.  
 Bití' ca' buzi'u xibé tsca guzxi'u.

<sup>13</sup> Bönachi yugu' dzaga yödzö queétu' bila'lé'e lè na' benu' queétu',  
ate' tu'cá'ana netu' cá'asö, en tu'titaj netu'.  
<sup>14</sup> Benu' ga tu'didza' yudxi bönachi yugu' yödzö netu'.  
Tu'tá ícaguequi lu yöl-la' rucá'ana netu' cá'asö.  
<sup>15</sup> Yugu' dza rutu'ida' ca raca queétu',  
en rö'a böniga lu yöl-la' rutu'í quia',  
<sup>16</sup> tu' riyönda' nupa tu'didza' yudxi neda', en tu'cá'ana neda' cá'asö,  
nupa na' bití' ta'lé'e neda' dxí'a, en tu'dí'i neda'.  
<sup>17</sup> Guca queétu' yúgu'tè lè ni sal-la' bití' nál-la ládxi'tu' Lí,  
en bití' nucá'anatu' didza' dzaga bénlenu' netu'.  
<sup>18</sup> Bití' ca' böaj ládxi'tu' ca réajlé'ètu' Lí,  
en bití' gudá'baga'tu' le bulu'ínu' netu' guntu'.  
<sup>19</sup> pero nusán na' cazu' netu' ladaj nupa nácagaca ca yugu' böa' guí'a sínía',  
en nucá'anu' netu' ga chizóa tseajtsázatu' lataj chul-la.  
<sup>20</sup> La'tu' gul-la ládxi'tu' Lí, Dios queétu',  
o la'tu' guyéaj ládxi'tu' tu dios izá'a,  
<sup>21</sup> la' gáquibe'etènu' lè ni, Dios,  
tu' nöz quézínu' le rizá' ládxi'tu'.  
<sup>22</sup> Tu' néquitu' quiu' Lí zóatica'sö nu guti netu'.  
Nactu' ca yugu' bö'cu' zxíla'do' lo nu guti légacaba'.  
<sup>23</sup> ¡Bubán, Xan! ¿Bizx que rásitso' Lí?  
¡Guyasa! ¡Bití' usán no'o netu' chadía chacanna!  
<sup>24</sup> ¿Bizx que nucachi' lo' lotu' netu'?  
¿Naru' nál-la ládxi'u' ca raca queétu', en ca riguí' rizá-ca'tu'?  
<sup>25</sup> Naguíngaquiè' netu' luyú.  
Nadínitu' lu bëchtö yu.  
<sup>26</sup> ¡Gudáchi gácalenu' netu',  
en lu yöl-la' dxí'i ladxí' quiu' busölá netu'!  
**45** Rizá' ládxa'a tu le naca dxí'a.  
Ru'a didza' que le runè' bönní' rinná bë'è.  
Naca lúdxá'a ca le ruzúajlenè' bönní' nabé'ede'enè'  
ru'è didza'.  
<sup>2</sup> Nácateru' Lí lachi ca yúgu'tè bönachi.  
Nabé'ede'enu' ru'u didza'.  
Que lè ni na' nunè' Dios gaca dxí'a quiu' chadía chacanna.  
<sup>3</sup> Bega' lè'u guíe tuchi' quiu', bönní' nayé'pisè',  
lu yöl-la' lachi quiu', en lu yöl-la' unná bë' quiu'.  
<sup>4</sup> Lu yöl-la' unná bë' quiu' idélí'nu' lu gudil-la,  
ugunu' dxin le naca idútè li, en yöl-la' nöxaj ladxí', en le naca tsahuí'.  
Yöl-la' huáca zxön quiu' gun ga ilá' lahui yugu' le zxón-tèrö.  
<sup>5</sup> Natúchi'gacada' yaga lahui tuchi' quiu'.  
Bönachi yugu' yödzö zítu' ta'dzó'ö lo', nupa na' ta'díl-lalen lí'.  
Yugu' yaga lahui tuchi' quiu' nachóza'gaca ládxi'-do'guequi.  
<sup>6</sup> ¡Chadía chacanna naguixju' ga rö'u rinná bë'u, Dios!  
¡Ca naca le naca tsahuí' rinná bé'enu' bönachi quiu'!  
<sup>7</sup> Nadxí'ínu' le naca tsahuí', en bití' rilé'enu' dxí'a le bití' nácateré.  
Que lè ni na' Dios quiu' nabó cazè' lí'.

Nachízirè' icja ládxi'do'o yöl-la' rudzeja ca le nápagaca ia'zica'rö bönachi.  
<sup>8</sup> Rilá' zxixi lari' nacu' len zí' mirra, en zí' áloe, en zí' casia.  
Tunè' bönní' huil-la ga rudzéjanu' lu yu'u lidxu' zxön.  
<sup>9</sup> Yugu' nigula zxí'inigaquiè' bönní' ta'nná bë'è nútsa'gacabi' bí'i nigula nacuá'abi' lidxu'.  
Nigula quiu' rinná bé'enu zuínu' cuitu' ibèla, en nácunu le nazí'i biquitaj oro nazaca'.  
<sup>10</sup> Bè' ladxí' neda', nigúlado'.  
Bè' ladxí' neda', en biyón xtí'dza'a.  
Gul-la ladxí' bönachi yödzö quiu', en yugu' dí'a dza quiu'.  
<sup>11</sup> Ní'irö sè ládxi'è bönní' rinná bë'è yöl-la' lachi quiu'.  
Buzóa zxibu' lahuè' tu' náquiè' xanu'.  
<sup>12</sup> Ní'irö bönachi yödzö Tiro ila'dxín lo' nuá'gaca le nazáca'da' le ilunna quiu'.  
Yugu' bönní' ta'lé'enè' yöl-la' tsahuí' ila'nábinè' lí' bi unödzju' quégaquiè'.  
<sup>13</sup> Yugu' bí'i nigula queè' bönní' rinná bë'è zóagacabi' lidxiè', en nácaterögacabi' lachi.  
Lari' nácubi' nadíalen du oro.  
<sup>14</sup> Ila'ché'è-bí' lahuè' bönní' rinná bë'è, nácubi' lari' nazáca'da'.  
Ila'dabi' yugu' bí'i nigula ra'bando' cúdzi'löbi',  
ate' ila'ché'è légacabi' lahuè' bönní' na' rinná bë'è.  
<sup>15</sup> Lu yöl-la' rudzeja, en lu yöl-la' ruzí' xibé quégacabi' ila'dxinbí',  
en ila'yázabi' yu'u lidxiè' bönní' na' rinná bë'è.  
<sup>16</sup> Ila'cuá'abi' bí'i bönní' quiu' uláz quégaquiè' xuz xto'o.  
Gunu' ga ila'nná bë'èbi' idútè yödzölió.  
<sup>17</sup> Gunu' ga tsöjnégacaticá'sö bönachi ca nacu' Lí'.  
Que lè ni na' yúgu'tè bönachi ilé lí' "Xclenu" yugu' dza sí' zaca.  
**46** ¡Náquiè' Dios Nu run chí'i rè'u, en Nu ruzóa rè'u tsutsu!  
¡Zóatica'sè' gácalenè' rè'u cate' bi raca queèru'!  
<sup>2</sup> Que lè ni na' bití' gádxiru' sal-la' izxizi idútè yödzölió,  
en ila'niti yugu' guí'a lu nísado',  
<sup>3</sup> en sal-la' chasa idxía, en tsu'u bö nísado' na',  
en ila'zxizi guí'ado' tu' nözi le raca.  
<sup>4</sup> Zoa tu yegu le run ga tu'dzeja nupa nacuá' ladzè' Dios,  
ga na' rö'ö yudo' lá'ayi ga zoè' Dios nayé'pisètèrè'.  
<sup>5</sup> Zoa cazè' Dios yödzö na', le catu caz initi.  
Cate' ní' soa itó yu gácalenè' nupa nacuá' ní'.  
<sup>6</sup> Tadxí ta'dzöbi bönachi yugu' yödzö,  
ate' ta'bó' baguí'i nupa ta'nná bë',  
tu' ru'è didza' Dios, ate' riniti luyú ni.  
<sup>7</sup> Xanru' nayé'pisètèrè' zóalen cazè' rè'u.  
Dios quégaca zxí'ini xí'sóè' Jacob rapa chí'è rè'u.  
<sup>8</sup> Gulí'dá ilé'eli' le nunè' Xanru'.  
Bulí'yú ca nusunítiè' luyú ni.  
<sup>9</sup> Ruzóa dxíè' gudil-la rácagaca idútè yödzölió.  
Riguitsjè' yugu' uxiti' yaga,  
en rusunítiè' yugu' yaga lahui tuchi' que gudil-la.  
Ruzégui'è yugu' carreta que gudil-la tu lu guí' zxön.

<sup>10</sup> Rnnë: "Guli'sóa dxisö, ate' guéquibe'eli' naca caza' Dios.

Nayépisëtëra' yugu' lu yödzo, en lu idütë yödzo'lió."

<sup>11</sup> Xanru' nayépisëtëre' zóalen cazë' rë'u.

Dios quégaca xzí'ini xí'sóé' Jacob rapa chí'è rë'u.

**47** ¡Lu yöl-la' rudzeja queé'li' guli'capa' ná'alí', bönachi yúgu'të yödzo!

¡Guli'cu'è yöl-la' ba Dios, len yugu' le rúl-lalenlí'!

<sup>2</sup> Ral-la' gunru' bal Xanru' Dios nayépisëtëre'.

Náquië' Nu rinná bë' idütë yödzo'lió.

<sup>3</sup> Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzo.

<sup>4</sup> Guró cazë' luyú ga ni nuzóé' rë'u.

Naca tu luyú lachi quégaca xzí'ini xí'sóé' Jacob, nupa na' nadxí'i quézinë'.

<sup>5</sup> Len yöl-la' ba zxön ribenë' Dios ga rō'è rinná bē'è.

Le zían le tu'cödxë' cate' ribenë' Xanru' ní'.

<sup>6</sup> ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönní' rinná bé'enë' rë'u!

¡Guli'gul-la!

<sup>7</sup> ¡Rinná bē'è Dios idütë yödzo'lió ni!

¡Idú láchxí'li' guli'gul-la yöl-la' ba queë'!

<sup>8</sup> ¡Zoa cazë' Dios lataj lá'ayi queë' ga rō'è rinná bē'è!

¡Rinná bé'enë' bönachi yúgu'të yödzo!

<sup>9</sup> Tu'dubi nupa ta'nná be'e yugu' yödzo

tsözxón len bönachi queë' Dios queë' Abraham.

<sup>10</sup> ¡Nequi queë' Dios yöl-la' zxön quégaca yúgu'të

yödzo nacua' yödzo'lió!

¡Nayépisëtëre' Lë'!

**48** Nayépisëtëre' Xanru', ate' run bayudxi cú'uru'-në'

yöl-la' ba idú láchxí'ru'

ga zoa lu yödzo queë' Dios queë'ru' le zoa lu guí'a

lá'ayi queë'.

<sup>2</sup> Lachi, en sibi naca guí'a lá'ayi na',

ate' raza láchxí'gaca bönachi idütë yödzo'lió ca naca.

Caní naca guí'a Sión le rō'ö tsölá'alö ga za' bö' ziaga.

Lu yödzo na' dë ga zoa Bönní' Unná Bë' nayépisë'.

<sup>3</sup> Rulu'è lahui Dios sóaru' tsutsu cuitë' Lë'

ga zoa lu yu'u lidxë'.

<sup>4</sup> Gula'dá'baga' nupa ta'nná bë' lu yu ni,

en gula'bíguí'è ra' yödzo lá'ayi na'.

<sup>5</sup> Cate' bila'lé'enë' yödzo na' bulu'bánninë'.

Gula'bö'è böniga, en la' bulu'zxúnnajtë'.

<sup>6</sup> Ra' yödzo na' gula'zxízië'.

Gula'zaca' zí'è ca raca queë'nu nigula chizóa uzóanu-  
bí' bí'ido'.

<sup>7</sup> Risól-lë'è Dios tu bö' budunu',

le rusuniti yugu' barco zxön que yödzo Tarsis.

<sup>8</sup> Biyönru' ca nácagaca le zxön benë' Dios,

ate' na'a rilé'e quéziru' le runë',

lu yödzo lá'ayi queë' Dios quégaca ní'a nē'è guizxi yu,

en náquië' ca' Dios queë'ru'.

Tsaz naguixjë' yödzo na'.

<sup>9</sup> Ga zoa lu yudo' quiu', Dios,

röjnetu' ca naca yöl-la' dxí'i láchxí' quiu'.

<sup>10</sup> Ca nayépisëtëro Lo', Dios,  
ca' ta'gú'u Li' yöl-la' ba bönachi idütë yödzo'lió.  
Ca naca le naca tsahui' rinná bē'u.

<sup>11</sup> Ulu'dzeja bönachi nacua' yödzo Sión.

Ulu'zí'inu xibé nigula xzí'ini xí'sóé' Judá  
tu' ruchí'a rusöróu' netu' ca naca le naca tsahui'.

<sup>12</sup> Guli'dá idú gásibí'ilö ga dë yödzo Sión,  
en bulí'laba yugu' yu'u sibi tun chí'i yödzo na'.

<sup>13</sup> Bulí'yú ca naca zō'ö run chí'i yödzo na',

en bulí'yú ca' le nuzóagaca le tsutsu,

para gaca quíxjöi'ili' xzí'ini xí'sóalí' ca náquië' Dios

zxön ni.

<sup>14</sup> Tsaz náquië' Dios queë'ru', na'a dza, en dza sí' zaca.

Ulu'ínë' rë'u nöza tödi gátiru'.

**49** Guli'yöni lë ni, libí'ili', bönachi yúgu'të yödzo.

Bulí'zé nágali', libí'ili', zóalí' idütë yödzo'lió.

<sup>2</sup> Libí'ili', nayépisëtëro'li', en libí'ili', nácalí' cá'asö.

Libí'ili', dë yöl-la' tsahui' queé'li', en libí'ili', nácalí' yechí'.

<sup>3</sup> Tsöjsá' láchxa'a ca naca le nácagaca yöl-la' réajni'i,

en gu'a didza' le nácagaca yöl-la' raca yenni'.

<sup>4</sup> Gü'i láchxa'a ca naca tu le rucudzu' didza',

en quíxjö'a ca nácagaca tsanni quinnia' lë'e bihuël-la.

<sup>5</sup> Bití' bi rádxida' cate' ridxín bi raca quia',

cate' ta'gu'è neda' lé'ajlö bönní' tuá' dö' bití' ta'lé'enë'

neda' dxí'a.

<sup>6</sup> Tu'zxöni láchxë'è bönní' na' yöl-la' tsahui' quégaquië',

en tun ba zxön cuíngaquië' ca nácagaca le dë qué-

gaquië'.

<sup>7</sup> Bití' gaca huöá'uë' la' cuinsë' nitú'è bönní' na'.

Bití' gaca bi unödzjë' queë' Dios le gun ga usólé' lë',

<sup>8</sup> tu' naca zxóntëro le huöá'u yöl-la' na'bán que nu

bönní',

ate' catu caz gaca nu bönní' quíxjë' ca naca,

<sup>9</sup> para idéli'në' sóatica'së' ibanë',

en cabí tsázië' yeru ba ga yú'ugaquië' bönní' nati.

<sup>10</sup> Rilé'enë' tatië' ca' bönní' ta'yéajni'inë',

en ta'nitië' tuz ca tati nupa bití' bi nózigaca, en nupa

bití' ta'yéajni'i,

ate' tu'cá'anë' yöl-la' tsahui' quégaquië' le ulu'zí' xibé

bönachi yúbölö.

<sup>11</sup> Téquinë' ila'cuá'tica'sö lídxigaquië' bönní' na',

ate' tsaz ila'cu'è ní',

ate' ta'gu'è lágaca xiyúgaquië' ca naca la' lágacasë'.

<sup>12</sup> Pero yöl-la' ba zxön napë' bönní' na' bití' gun ga

sóatica'së'.

Gati cazë' ca tátiba' böa' guixí'.

<sup>13</sup> Caní naca le gaca quégaquië' bönní' tu'zxöni láchxë'è

yöl-la' tsahui' quégaquië',

enca' quégaca xzí'ini xí'sóagaquië',

yugu' bí'i na' ta'yaza láchxí'gacabi' didza' gulu'è xúzga-

cabi' na'.

<sup>14</sup> Ilátië' ca tátiba' bö'cu' zxila',

ate' yöl-la' guti gaca quégaquië' ca tu nu uyú bö'cu'

zxila'.

Yugu' bönní' tsahui' ila'nná bé'enë' légaquië' cate' itó

yu zila.

Ila'niti le guta' quégaquië', ate' ila'cuá'tica'së' lataj

chul-la ga dzö'ö nupa nátigaca.

<sup>15</sup> Huöá'u cazë' Dios yöl-la' na'bán quia' lu yöl-la' guti,  
tu' iché'è neda' ga tsöjsóalena' Lë'.

16 Biti' gádxinu' cate' idéli'ně' nu bönni' yöl-la' tsahui' zxon,  
 en cate' xön yöl-la' lachi que yu'u lidxé',  
 17 tu' cabi bi u'ě cate' gátiě',  
 en biti' tséajlen lě' yöl-la' lachi que le guta' queě'.  
 18 Sal-la' cate' ni' zoě nabaně' buzí' xibé bö' naca cazě',  
 ate' gula'gú'u bönachi lě' yöl-la' ba cate' bidéli'ně' yöl-la' tsahui' na'.  
 19 Tsáziě' ga na' dzö'ě xuz xtá'ahuě',  
 en bítirö ilé'eně' bení'.  
 20 Náquiě' bönni' napě' yöl-la' zxon, pero riyádzjaně' yöl-la' réajni',  
 ca böa' guixi' tati cázaba'.  
**50** Ru'ě didza' Xanru' Dios nayépisětě'rě'.  
 Nutubě' děrö nupa nacua' yödžolió ga naguéla'tě ga rilén gubidza ga ridxintě ga ribía.  
 2 Lu yödžö Siön rigu'ě Dios bení'.  
 Napa yödžö na' yöl-la' lachi idú.  
 3 Zě'ě Dios queéru', en biti' soě' dxisö.  
 Tsöjnöru lahuě' tu guí' zxon,  
 ate' tsecja tu bö' budunu' idú gasibí'ilě'.  
 4 Ulidžě' lúzxiba xitsá', enca' luyú  
 cate' uchi'a usöröě' quegaca bönachi queě'.  
 5 Rnně' Dios: "Guli'túbi nupa néquiguequi quez quia',  
 nupa na' gulunlen neda' didza' dzaga,  
 en bulu'lalaj rön lahua' le ben tsutsu didza' dzaga na'."  
 6 Naca bě' náquiě' tsahui' Dios lúzxiba xitsá',  
 tu' uchi'a usöröě' Dios bönachi queě'.  
 7 Rnně': "Buli'zě nágali', bönachi quia', ate' gu'a didza'.  
 Buli'zě nágali', bönachi Israel, ate' uzéguia' libí'ili'  
 didza'.  
 Naca caza' Dios.  
 Ön, naca' Dios queéli'.  
 8 Biti' uzéguia' libí'ili' didza' ca naca le rúnnali' quia',  
 en calěga ca nácagacaba' böa' bėdxi ruzéguilí'-ba'  
 lahua'.  
 9 Biti' riquinda'-ba' bėdxi queéli',  
 en calěga chivo biguiú' nacua'aba' queéli',  
 10 tu' néquigacaba' quia' yúgu'těba' böa' guixi',  
 enca' böa'-bėdxi nacua'aba' lu gayuá' gayuá' guí'ado'.  
 11 Néquigacaba' ca' quia' yúgu'těba' böa' zoa xiliga-  
 caba',  
 enca' yúgu'tě le zoa nabán la' guixi'.  
 12 La'tu' riduna' biti' guía' ca' libí'ili',  
 tu' nequi quia' yödžolió, enca' yúgu'tě le nacua' ni'.  
 13 ¿Naru' gágutsa' xipéla'gacaba' bėdxi,  
 o guí'jatsa' xichóngacaba' chivo?"  
 14 Le ral-la' unódžjalí' queě' Dios naca yöl-la' rě Lě':  
 "Xclenu"  
 ate' ral-la' gunli' lahuě' Dios nayépisětě'rě' ca naca le  
 guzxí' lu ná'alí' gunli'.  
 15 Rnně' ca: "Ral-la' ulídžali' neda' cate' bi gaca queéli'.  
 Gácalen caza' libí'ili', ate' gunli' neda' bal."  
 16 Dios rě' bönni' huía' dō', rnně':  
 "¿Bizx que ru'u didza' ca nácagaca xibá naguixja?  
 ¿Bizx que ru'u didza' ca naca didza' dzaga núnlēna'  
 bönachi?"  
 17 Biti' runnu' lataj usédida' lí',

pero rucá'anu' cá'asö didza' ruá'a.

18 Cate' rilé'enu'-ně' bönni' gubán rácalenu' lě',  
 en runu' tsözxön nupa ta'guitsaj xibá que yöl-la' nut-  
 saga na'.

19 Zóatica'su' gu'u didza' xihui',  
 en ruí'tica'su' didza' biti' nácatě.

20 Zóatica'su' uzéguiu'-ně' böchi' cazu',  
 en rudidza' yudxu' böchi'-zan cazu'.

21 Caní benu', ate' biti' bi gunniá',

ate' gúquinu' naca' ca naca cazu' lí',

pero na'a uzéguia' lí' didza', en ulu'a lahui le nunu'.

22 Buli'zě nágali' didza' ni, núlöli' ruzóali' neda'  
 tsölál'alö.

Channö cabí, usunítia' libí'ili', ate' cuntu nu gaca usölá  
 libí'ili'.

23 Nu rě neda': Xclenu', runna quia' le run neda' bal,  
 ate' nu run ca rna xtídza'a, usölá caza' nu na'."

**51** Dios quia', buzá' ladxi' quia' tsca naca yöl-la' dxí'i  
 ladxi' zxon quiu',

en tsca naca le zían le ruzá' ládxi'u quia', bugúa yugu'  
 le gudá'baga'a lo' Lí'.

2 Buguíbitica'sö neda' tsca naca dō' bí'a.

Buchi'a neda' lu dul-la' nuna'.

3 Nöz quézida' le gudá'baga',

en röjnétiqi'sida' yugu' dul-la' nuna'.

4 Lo' Lí' cazu' bena' dul-la',

en lo' Lí' ca' bí'a dō'.

Naca bě' nacu' tsahui' cate' ru'u didza',

en idú dxí'a, en tsahui' nacu' cate' ruchí'a rusöróu'  
 queétu'.

5 Buyútsöca', nabága'a dō' cate' gusí lotě gulja',  
 en lu dul-la' zoa caza' cate' buzóanu xiná'a neda'.

6 Ré'enu' soa le naca idútě li icja ládxi'do'otu'.

Guchiza icja ládxi'da'ahua' yöl-la' réajni'i.

7 Buchi'a neda' len le ruchí'aninu', ate' gaca dxí'a.

Buguibi neda', ate' huóaca' zxíla'do'os.

8 Ben ga yönda' le naché' yöl-la' ruzí' xibé, en yöl-la'  
 rudzeja,

para huóaca ládxa'a lu le raca quia' tu' benu' ga  
 réquibe'eda' nabága'a dul-la'.

9 Biti' uyú' yugu' dul-la' nuna',

en busulu yúgu'tě le naca dō' nabága'a.

10 Dios quia', bun dxí'a ládxi'da'ahua',  
 en guchiza neda' tu bö' cubi le nuzú' tsutsu.

11 Biti' ucuítu' neda' ga zoa' lo' Lí',

en biti' ugú' Dios Bö' Lá'ayi quiu' Nu zóalen neda'.

12 Bunna quia' yöl-la' rudzeja que yöl-la' rusölá quiu',  
 en ben ga guna' ca rna xtídzu' idú ládxa'a.

13 Ní'irö usédida' nupa ta'guitsaj xibá quiu' ca nácaga-  
 ca le ré'enu' ilúngaca,

ate' yugu' bönni' dul-la' ulu'huécja quiu'.

14 Dios quia', benna neda' lataj cabí ibága'a xiguia'.

Naca cazu' Dios, Nu rusölá neda'.

Lu yöl-la' rudzeja quia' gul-la' ca naca cazu' tsahui'.

15 Xana' Dios, gusalaj ruá'a,

ate' usiyönda' bönachi yöl-la' ba quiu'.

16 La'tu' raza ládxi'u-ba' böa'-bėdxi gútitu'-ba' lo', la'  
 gúntea' caní.

Biti' raza ládxa'u-ba' nu böa' uzégui'tu'-ba' lo'.  
 17 Le ré'ënë' Dios le naca ca tu le cú'uru' lahuë' naca bö' naca cáziru' le nõtaj nagula ladxí'.  
 Dios quia', bití' ucá'anú' cá'asö ládxi'do'otu' le ruhu'ini ladxí', en le naca nõxaj ladxí'.  
 18 Lu yöl-la' ruzá' ladxí' quiu' ben le naca dxí'a quégaca bönachi yödzo Sión.  
 Buchisa zö'ö le run chí'i yödzo Jerusalén.  
 19 Ní'irö tsaza ládxa'u yugu' le cú'utu' lo' le naca idú dxí'a,  
 yugu' böa' guíxi'do' gútitu'-ba' lo',  
 en yugu' böa'-bëdxido' uzégui'tu'-ba' lo'.  
 Ní'irö ilútië'-ba' yugu' bëdxi biguiú'do',  
 en ila'gu'ë-ba' lu bucugu quiu'.

**52** ¿Bizx que run ba zxon cinu' ni'a que dö' ru'u, bönni' nál-la?  
 Zóatica'sö yöl-la' dxí'i ladxí' queë' Dios.  
 2 Len lúdxu'u rúnlenú' luzó'o didza' para usunítu' bönachi.  
 Naca lúdxu'u, bönni' rizí' yë', ca tu guié' tuchi'.  
 3 Nadxí'irönu' le naca dö' ca nadxí'inu' le naca dxí'a, en nadxí'irönu' le cabí' nácatë' ca nadxí'inu' le naca idútë' li.  
 4 Nadxí'inu' yúgu'të' didza' tun ditaj bönachi, lí' na', bönni' rizí' yë'ë.  
 5 Tsaz uzõtaj cazë' Dios lí'.  
 Sönë' lí', en ubéajë' lí' lu yu'u lidxu', en ucuítë' lí' ga nacú'a' nupa nabángaca.  
 6 Yugu' bönni' tsahui' ila'lé'enë' lë ni, en iládxiné' Dios. Ulu'zixdë' queë' bönni' na' rizí' yë'ë, ila'né':  
 7 "¡Bulí'yútsöca! Bönni' ni bití' gú'unnë' uzxöni ládxe'ë Dios,  
 pero buzxöni ládxe'ë yöl-la' tsahui' queë', en le zían le guzé ládxe'ë le cabí' bi nazaca."  
 8 Naca' neda' ca tu yaga olivo ya'a le rö' ra' yu'u lidxë' Dios.  
 Uzxöni ládxa'a yöl-la' dxí'i ladxí' queë' Dios yugu' iz sí' zaca.  
 9 Guíëtica'sa' Lí': "Xclenu'" tu' ben cazu' Lí' ga naca caní, ate' guna' löza Lo' le naca dxí'a lógaca nupa néquiquequi quez quiu'.

**53** Ta'zá' ládxe'ë bönni' canóz, ta'nné':  
 "Bití' ca' zoë' Dios."  
 Nácagaquië' xihui' bönni' caní, en núngaquië' le nácatë'ö xihui'.  
 Cuntu nu bönni' zoë' runë' le naca dxí'a.  
 2 Ga na' zoë' Dios yehua' yubá ruyúé' gátitës, en rilé'enë' bönachi nacú'a' idútë' yödzo'lió, para inózinë' channö zoa nu réajni'i, o channö zoë' nu bönni' ruí'i ládxe'ë Dios.  
 3 Yúgu'të' bönachi söjáquië' ga yúbölö.  
 Yúgu'të' nácagaquië' xihui'.  
 Cuntu nu zoa run le naca dxí'a, nitúë' bönni'.  
 4 ¿Naru' cabí' nápagaquië' yöl-la' réajni'i bönni' na' tu'ë dö'?

Tu'sunítu' bönachi quia' ca tu nu ragu yöta, en bití' ca' tu'lidzë' neda'.

5 Tadxí' ta'dzöbinë' bönni' caní, en bití' bi nuna' qué-gaquië'.  
 Caní raca tu' rusunítu' Dios caz nupa ta'díl-lalen libí'il-i'.  
 Gunlí' ga ulu'tuí'inë' tu' chigurú'unë' Dios légaquië'.  
 6 Raca ládxi'ru' irúaj Sión Nu usölá bönachi Israel.  
 Cate' uchisa cazë' Dios bönachi queë' nadzúngaca, ulu'dzeja zxi'ini xi'sóë' Jacob, en ulu'z'í' xibé bönachi Israel.

**54** Busölá neda', Dios, para gaca yöl-la' ba que Lo'.  
 Len yöl-la' huáca quiu' guléaj neda' tsahui'.  
 2 Ruzé' nagu' le rulidza' Lí', Dios.  
 Ruzé' nagu' didza' ruá'a.  
 3 Ta'díl-lalen bönni' zítu' neda', tu' té'ënë' bönni' zidzaj ilútië' neda'.  
 Bití' ca' tádxiné' Dios.  
 4 Bulí'yútsöca', naca cazë' Dios Nu rácalen neda'.  
 Ruzóë' tsutsu Xanru' yöl-la' na'bán quia'.  
 5 Ubi'ë quégaca nupa ta'díl-lalen neda' le usuniti léguequi.  
 Tu' runu' ca rna xtídzu'u, Dios, busuniti léguequi.  
 6 Idú ládxa'a gútia'-ba' böa'-bëdxi lo'.  
 Guía' Lí': "Xclenu'" Xan, tu' naca dxí'a Lo'.  
 7 Busölá cazu' Lí' neda' lu yugu' le guca quia', ate' rilé'eda' zeaj nanítitica'sö nupa ta'díl-lalen neda'.  
 Ruzé' nagu' le rulidza' Lí', Dios,  
 en bití' tá'bagu' le rinábida' Lí'.

**55** 2 Ruzé' nagu' neda', en rubí'u didza'.  
 Rulidza' yúdxida' Lí', en rö'a böniga  
 3 ni'a que chí'ë bönni' bití' rilé'enë' neda' dxí'a, en tu' tu'tsá' neda' nupa tuá' dö', en tu'saca' zí' neda', en lu yöl-la' rilé' quéguequi ta'bia no neda'.  
 4 Réqui zí' ládxi'da'ahua',  
 ate' yöl-la' radxi que yöl-la' guti röjtsaza ládxi'da'ahua'.  
 5 Chigula'yaza yöl-la' radxi, en yöl-la' rixzizi neda',  
 ate' nabaga' yöl-la' radxi ridzöbi neda'.  
 6 Gunnía': "Gaca ládxa'a gata' quia' xílabá' gu'dödo', para gaca töda' lu bö'ös, en idxina' tu lataj ga gaca uzí' ládxa'a.  
 7 Raca ládxa'a tseja' zítu',  
 en tsöjsó'a' la' guixi' ga dë' lataj.  
 8 Uyija' carelö tu lataj ga tsöjsó'a' tsutsu,  
 para cabí' bi gun quia' le naca ca bö' budunu'."  
 9 Busuniti légaquië', Xan, en buxí' ruá'agaquië', tu' bilé'eda' ta'dil-lë', en tu'tsatsë' lu yödzo.  
 10 Rëla, en te dza ta'dödë' nöza lu yödzo.  
 Tu'ë dö', en tunë' le xihui' idú gásibi'ilö yödzo.  
 11 Tu'sunítu' le nacú'a' ni'.  
 Tu'saca' zí'ë bönachi, en ta'z'í' yë'ë la' nöza que yödz.  
 12 Calëga bönni' bití' rilé'enë' neda' dxí'a nu rudidza' yudxi neda',  
 tu' huáca guá' ilena' le gunë',  
 en calëga bönni' rudí'inë' neda' nu ridíl-lalen neda',  
 tu' huáca ucachí' cuina' lahuë',  
 13 pero nacú' lí', tu bönni' ca neda'.  
 Nacú' böchí' luzá'a, en nacú' tuz len neda'.  
 14 Lu yöl-la' dxí'i ladxí' queéru' gúcaru' tuz.  
 Ladaj bönachi zían gudarú', en bidxinru' lidxë' Dios.

<sup>15</sup> Xana' Dios, bë' yöl-la' guti lataj idxín quégaquië' bagáchi'sö.

Ben ga tsöjtsázagaquië' nabángaquië' lataj chul-la ga nacua' nupa nátigaca, tu' yu'u le xihui' lídxigaquië', en lu yu'u ca' gapa tu'-dubë'.

<sup>16</sup> Pero neda' ulidza'-në' Dios, ate' usöla cazë' Xanru' neda'.

<sup>17</sup> Chi'i dzó'ölö, en zílado', en gatsaj dza ulidza yúdxida' Lë',

en innë' ládxa'a lahuë', ate' yön cazë' chi'a.

<sup>18</sup> Huóá'uë' yöl-la' na'bán quia' lu na' nupa ta'díl-lalen neda'

en uzóë' neda' lataj ga cöza' dxi'a tsáhui'do', tu' nayánda' nupa ta'díl-lalen neda'.

<sup>19</sup> Huayón quézinë' Dios, en ubi'ë quégaquië'.

Rö'ë rinná bé'tica'së' Lë'.

Caní gunë' Dios tu' cabí tu'sanë' ca tunë', en bití' tádxinë' Dios.

<sup>20</sup> Bönni' ru'ë dö' ribía nahuë' nu riböza dxi'a tsáhui'-do',

en rucá'anë' cá'asö didza' dzaga nunë'.

<sup>21</sup> Bë'ë didza' yúlado', pero yu'u icja ládxi'da'ahuë' yöl-la' ridzá'a.

Bë'ë didza' zxíxido',

pero didza' na' bë'ë gulaca ca guié' tuchi'.

<sup>22</sup> Gulú'u le nabágu'u lu në'ë Xanru', ate' utipa cazë' ládxi'u.

Bití' gu'ë lataj iguínna' tsaz nu naca tsahui'.

<sup>23</sup> Chú'unë' bönni' tu'ë dö' na' lataj chul-la ga nacua' nupa nátigaca ga na' ila'nítigaquië'.

Bití' ila'cuá' gatsaj tsca ral-la' ila'cu'ë nabángaquië' bönni' tutië' bönachi,

en bönni' ta'z'í yë'ë.

Pero neda' uzxöni ládxa'a Li'.

**56** Buéchi' ladxí' neda', Dios, tu' ta'dá'bagá' bönachi neda'.

Yugu' dza nupa tu'dí'i neda' ta'bía no neda'.

<sup>2</sup> Yugu' dza nupa bití' ta'lé'e neda' dxi'a tuá' dö' quia'.

Zián nupa ta'díl-lalen neda' lu yöl-la' run ba zxön cúinguequi.

<sup>3</sup> Cate' radxi ridzó'bida', uzxöni ládxa'a Xanru'.

<sup>4</sup> Ruzxöni ládxa'a-në' Dios, en rigu'a yöl-la' ba xtídzë'ë. Ruzxöni ládxa'a-në', en bití' bi gádxida'.

¿Bizxi caz gaca ilún quia' bönachi?

<sup>5</sup> Yugu' dza tun nigui neda' nupa bití' ta'lé'e neda' dx-i'a.

Ta'zá' ládxi'tica'sö nacxi iluá' dö' quia'.

<sup>6</sup> Tu'dubë' ga nagáchi'sö, en tu'yúlanë' yúgu'të le runa',

para gata' quégaquië' lataj ilútië' neda'.

<sup>7</sup> Bubi'ë quégaquië', Dios, ca naca dö' tu'ë, en lu yöl-la' rilé quiu' busuniti légaquië'.

<sup>8</sup> Nöz quézinu' Li' ca rö'a böniga.

Nurixu' Li' nisa ribödxí quia'.

¿Naru' cabí nuzú' léguequi lu guichi quiu'?

<sup>9</sup> Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.

Nöz quézida' rácalen cazu' neda', Dios.

<sup>10</sup> Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

<sup>11</sup> Ruzxöni ládxa'a-në', en bití' bi gádxida'.

¿Bizxi caz gaca ilún bönachi quia'?

<sup>12</sup> ¿Gunna' quiu', Dios yugu' le guzxí' lu na'a!

¿Cu'a Li' yöl-la' ba!

<sup>13</sup> Busöló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

**57** ¿Buéchi' ladxí' neda', Dios!

¿Buéchi' ladxí' neda' tu' ruzxöni ládxa'a Li' gun chi'u neda'!

Guxóa no'o neda' ca runba' böra run chí'igacaba'

bórado' xzan xílaba',

ga idxinrö tödi bönadxi raca quia'.

<sup>2</sup> Rulidza'-në' Dios nayépisëtë'ë.

Náquië' Dios Nu run ga raca dxi'a quia'.

<sup>3</sup> Ga zoa cazë' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxí' queë', en yöl-la' idú ladxí' queë' gácalenë' neda'.

<sup>4</sup> Naca quia' tscá zoa' ládjagacaba' bëdxi guixí'.

Yugu' bönni' zidzaj nagú'ugaquië' neda' lé'ajlö.

Nácagaca láy'igaquië' ca yugu' yaga tuchi' que gudil-la,

ate' nácagaca lúdxí'gaquië' ca yugu' guié' tuchi'.

<sup>5</sup> Dios quia', buluí'i lahui lúzxiba yöl-la' zxön quiu', en yödzölió ni buluí'i lahui yöl-la' bení' quiu'.

<sup>6</sup> Nupa tu'dí'i neda' nucáchí'gaca du yalaj le sön neda'. Rudú ládxa'a tu' rö'a böniga.

Gula'chó'önë' yeru ga tsöjbixa' neda',

pero gula'bixë' la' lé'gacasë' lu yeru na'.

<sup>7</sup> ¿Chinabá'a quia', Dios!

¿Chinabá'a quia'!

¿Gul-la' quiu', en cu'a Li' yöl-la' ba!

<sup>8</sup> ¿Bubán, bö' naca caza'!

¿Gulí'bán arpa, en bihuël-la!

¿Zílado' ubana',

<sup>9</sup> en gul-la' quiu' Li', Xan, ladaj bönachi yugu' yödzö!

¿Cu'a Li' yöl-la' ba lógaca yúgu'të bönachi!

<sup>10</sup> Zxóntë'rö naca yöl-la' ruhuéchi' ladxí' quiu', le ridxin-të yehua' yubá,

ate' ridxintë yöl-la' idú ladxí' quiu' lúzxiba xitsá'.

<sup>11</sup> Dios quia', buluí'i lahui lúzxiba yöl-la' zxön quiu', en yödzölió ni buluí'i lahui yöl-la' bení' quiu'.

**58** ¿Naru' ru'í'li' didza' idútë li, libí'li' na', rinná bé'ëli'?

¿Naru' ruchí'a rusöröli' ca naca le naca tsahui'?

<sup>2</sup> ¿Bití' ca! Rizá' ládxi'li' yugu' le xihui',

en rusaca' zí'li' bönachi len yugu' le cabí nácatë runlí'.

<sup>3</sup> Ta'dödi tsólá'alö nupa tuá' dö' ga gudéla'të gúljaga-ca.

Ta'z'í yë' ga gudéla'të bulu'cuá'anu xiná'aguequi léguequi.



4 Yu'u ru'íguequi le naché' yöl-la' guti ca le dxía láyi'-gacaba' bëla sínia'.

Nácagaca ca tuba' bëla sínia' nacódzuba',  
5 bëla na' biti' riyónba' chí'ë bönni' gudzá',  
o le rul-lë' bönni' runé' gudzá'.

6 ¡Dios quia! ¡Buzxuzxaj láyi'gaquié'!  
¡Guladzu' yugu' layi' tuchi' quégaquié'  
nácagaca ca layi' tuchi' quégacaba' bëdxi guixi'!

7 ¡Ben ga ila'nítië' ca raca que nisa yegu gubó'o cate' ruhu'í!

¡Ben ga ila'cuádië' ca raca que guixi' röö' la' nöza!

8 ¡Ben ga ila'nítië' ca yugu' bóruihuinna tu'únaba' lu gubidza,

o ca tubi' bí'ido' nuzóanu-bi' nigula zí'alö ca ral-la' gál-jabi', en chinátitëbí'!

9 Zí'alö ca gaca utsë'e yusu' tu guí' zxön,  
ugúë' Dios légaquié' lu yöl-la' ridzá'a queë',  
bönni' nabángaquié', en bönni' chizóa ilátië'.

10 Ulu'dzeja nupa nácagaca tsahui' cate' ila'lé'e  
uzí' lëbë' Dios bönni' tu'ë dö' na'.

Ulu'zxinë' len ná'agaquié' xichóngaca nupa na' tuá' dö'.

11 Ila'nná bönachi: "Le nácatë zoa le rubi'ë Dios qué-gaca nupa nácagaca tsahui'.

Le nácatë zoë' Dios Nu ruchi'a rusöró quégaca nupa nacua' yödzöliö."

**59** Busölá neda', Dios, lu ná'agaca nupa ta'zóa regu' neda'.

Buzóa neda' tsutsu ga biti' gaca ila'dxín nupa ta'díl-lalen neda'.

2 Busölá neda' lu ná'agaca nupa tuá' dö',  
en guléaj neda' lu ná'agaca nupa tuti bönachi.

3 Buyútsöca', ta'bó' nísiië' neda' para ilútië' neda'.  
Ta'zóa régu'ë bönni' zidzaj neda',  
calëga tu' gudá'baga'a légaquié', o tu' ben zí'a lé-gaquié', Xan,

4 en calëga tu' bëtia' bönachi, pero ta'zë'ë carelö para tíl-lalënë' neda'.

Gudá gácalenu' neda', ate' ilé'enu' naca caní.

5 Xantu' Dios quégaca ni'a no'o guixi yu,  
en Dios quégaca bönachi Israel,  
gudá dujenu' xiguia' bönachi yúgu'të yödzö.

Biti' uzá' ládXu'u quégaca nupa tuá' dö' lu yöl-la' rizí' yë' quéguequi.

6 Tu'dxinë' chí'i dzó'ölö, ta'bödxi yeché'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzö.

7 Buyútsöca', didza' tu'ë nácagaca ca le rébigaquié'.  
Nácagaca didza' tu'ë ca yugu' guíë tuchi'.  
Ta'nné': "¿Nuzxi caz yöni?"

8 Ruzxidxu' ca naca le tunë', Xan.  
Rutitju' ca naca le tun bönachi yúgu'të yödzö.

9 Tu' nal-la cazu' Lí' guna' löza Lí'.  
Nacu' Dios Nu run chí'i neda'.

10 Tu' náquië' Dios quia' dxí'i ladxí', dutságuie' neda'.  
Uxicja cazë' Dios nupa ta'díl-lalen neda'.

11 Biti' gútiu' nupa na' tuá' dö' para cabí ilal-la ladxí' bönachi ladza'.

Lu yöl-la' huáca zxön quiu' bésilasi nupa tuá' dö', en buzötaj léguequi luyú.

Naca cazu' Xantu', Nu run chí'i netu'.

12 Ben ga sön légaquié' yöl-la' run ba zxön cuíngaquié' tu' nözi dul-la' tunë' ca tu'ísé' didza',  
enca' tu' tu'dxië' dö' luzá'agaquié', en ta'zí' yë'ë.

13 Lu yöl-la' rilé quiu' busuniti légaquié'.  
Busuniti légaquié' tsaz para cabí ila'cuá'arë',  
en para iléquibe'e bönachi Dios caz rinná bé'enë' xzí'i-ni xí'sóë' Jacob,

ga ridxintë idútë yödzöliö.

14 Tu'dxinë' chí'i dzó'ölö, ta'bödxi yeché'ë ca runba' bö'cu' ragu yéchi'ba' beo',  
ate' ta'dödë' idú gásibi'ilö yödzö.

15 Ta'dé' ta'guiljé' le ilahuë',  
ate' ta'bödxi'ë channö cabí ulu'huölaj ulu'dzé'enë'.

16 Gul-la' neda' ca naca yöl-la' huáca zxön quiu'.

Yugu' zila gul-la' lu yöl-la' rudzeja quia' ca naca yöl-la' dxí'i ladxí' quiu',

tu' naca cazu' Lí' Nu run chí'i neda',  
en nacu' Nu rácalen neda' cate' bi raca quia'.

17 ¡Naca cazu' Lí' Nu rutipa ládxa'a!

¡Gul-la' quiu' yöl-la' ba,  
tu' nacu' Lí' Nu run chí'i neda', Dios, en Nu nadxí'i neda'!

**60** Nusán no'o netu', Dios, en nuzötju' netu'.  
Buécja queétu' na'a, en gúcalen netu'.

2 Ben cazu' ga gudödi budó' xzu', en gualaj luyú.  
Bun luyú ni tu' chizóa iguínaj.

3 Sizxöni busaca' zí'u bönachi quiu'.

Le guca queétu' guca tsca bugui'ju' netu' xis uva nal-la le ben ga yöjchégu'tu' ca tu bönni' nazúdxinë'.

4 Bunödzu' quégaca nupa tadxi Lí' tu lari' ulu'chisa,  
le sójácalen cate' bi raca quéguequi,

5 para ulu'lágaca nupa na' nadxí'i quézinu'.

Len yöl-la' huáca zxön quiu' busölá netu', en bubí'i didza' cate' rulidztu' Lí'.

6 Lu le naca lá'ayi queë' bë'ë didza' Dios, gunné':  
"Uzi'a xibé, en quísia' xiyúgaca bönachi Siquem, en urixa' luyú dë cuita yegu Sucot.

7 Nequi quia' xiyúgaca bönachi Galaad, enca' xiyúgaca xzí'ini xí'sóë' Manasés.

Naca ca tu le rusubín icja' xiyúgaca xzí'ini xí'sóë' Efraín.

Xiyúgaca xzí'ini xí'sóë' Judá naca ga rinná bë'a.

8 Xiyúgaca bönachi Moab naca ca tu ga riguibí na'a,  
ate' cu'a löla' uléaja' xiyúgaca bönachi Edom.  
Códxi'a tu' uxicja' bönachi Filistea."

9 ¿Nuzxi caz gaca iché' neda' lu yödzö zoa zö'ö idú gásibi'ilö le run chí'i yödzö na'?

¿Nuzxi caz iché' neda' lu xiyúgaca bönachi Edom?

10 ¿Naru' cabí nusán ládXu'u netu', Dios?

¿Naru' cabí tséajlenu' bönni' queétu' röjáquié' gudil-la'?

11 Gúcalen netu' cate' tíl-lalenu' nupa ridíl-lalen netu', tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru' tu' uxicja cazë' Lë' nupa ta'díl-lalen netu'.

**61** Ruzé naku' le rulidza' Li', Dios.  
 Ruí'i ládxa'u le rinábida' Li'.  
<sup>2</sup> Ga ni zoa' zi'tu' ga dë ladza' rulidza' Li' tu' rudú ládxa'a.  
 Guché' neda' ga zoa Nu na' naca ca tu guiójt'o, Nu na' nál-latèrö ca neda'.  
<sup>3</sup> Nacu' Li' Nu run chí'i neda'.  
 Nacu' Nu rácalen neda' cate' zoa nu ribía no neda'.  
<sup>4</sup> Bë' lataj sóatica'sa' ga zoa cazu' Li'.  
 Bë' lataj sóalena' Li', guna' neda' ca tunba' bórado' ta'yázaba' znan xílaba' yójede.  
<sup>5</sup> Biyón quézinu' Li' le guzxi' lu na'a guna' quiu' Li', Dios.  
 Benu' ga nequi quia' le runödzu' quégaca nupa tadxi Li'.  
<sup>6</sup> Gunu' ga soë' xidzé bönni' na' rinná bë'e uláz quiu'.  
 Zían iz soë' ibanë'.  
<sup>7</sup> Sóatica'së' lo' Li', Dios.  
 Bë' queë' yöl-la' dxi'i ladxí', en le naca idútë li, yugu' le ilún chí'i lë'.  
<sup>8</sup> ¡Gúl-latica'sa' yöl-la' ba que Lo',  
 para gaca guna' tu tu dza le guzxi' lu na'a!  
**62** ¡Tuzë' Dios ruzxöni ládxa'a, en rizé ládxa'a Lë!  
 ¡Lë cazë' rusölë' neda'!  
<sup>2</sup> ¡Tuzë' Lë' rapa chí'ë neda', en rusölë' neda'!  
 ¡Ruzóë' neda' tsutsu, ate' bití' gaca nu uzötaj neda'!  
<sup>3</sup> ¿Gáca'xte caz güí'i ládxi'li' ucúl-lali' neda'?  
 Ré'ënisili' uzótjalí' neda' ca tu zö'ö chizóa iguinnaj,  
 o ca tu lë'aj yaga le chinatëbi.  
<sup>4</sup> Ré'ënisili' uzótjalí' neda' ga ni tunë' neda' bal.  
 Ruzí'ili' xibé yugu' didza' bití' nácatë.  
 Ruí'ili' dxi'a didza' láhuí'sö,  
 pero lu icja ládxi'do'olí' rudidza' yúdxili' neda'.  
<sup>5</sup> ¡Tuzë' Dios ruzxöni ládxa'a,  
 en runa' löza Lë!  
<sup>6</sup> ¡Tuzë' Lë' rapa chí'ë neda', en rusölë' neda'!  
 ¡Ruzóë' neda' tsutsu, ate' bití' gaca nu uzötaj neda'!  
<sup>7</sup> ¡Tuzë' Dios rusölë' neda', en runë' ga naca' bica' ba!  
 ¡Dios nuzóë' neda' tsutsu, en rapa chí'ë neda'!  
<sup>8</sup> Libí'ili', bönachi, bulí'zöni ládxe'ë Dios yúgu'të dza.  
 Bulí'siyönnë' yugu' le raca queé'li', tu' run chí'i cazë' rë'u.  
<sup>9</sup> Le nácatë nácatë yúgutë bönachi ca tu bö' ridódisö,  
 en bití' bi nazáca'gaca nupa na' nadéli'gaca lataj lo.  
 Tu lu zxigóns bití' bi nál-lí'guequinë'.  
 Nácatëcarë' dzá'asö ca tu bö' riguéla'siru'.  
<sup>10</sup> Bití' uzxöni ládxi'li' bi idéli'li' len yöl-la' nál-la queé'zil-í'.  
 Bití' uzí'ili' xibé le cuanli'.  
 Channö gata' queé'li' yöl-la' tsahui', bití' güí'i ládxi'li' le.  
<sup>11</sup> Tu luzuísö bë'e didza' Dios.  
 Chopa luzuí biyönda' ca naca lë ni rnna:  
 "Nápatëre' Dios yöl-la' huáca,  
<sup>12</sup> ate' zóatica'sö yöl-la' dxi'i ladxí' queë'."  
 Ubí'i cazu', Xan, quégaca bönachi tsca naca le núnga-ca.

**63** Dios, nacu' Dios quia', ate' idú ládxa'a ruguilja' Li'.  
 Ribidxi ládxa'a Li', ate' idútë le naca' rizé ladxí' Li'.  
 Zoa' tu luyú bidxi ga ni rudú ládxa'a, ate' bití' bi dë nisa.  
<sup>2</sup> Ben ga ilé'eda' Li' lu lataj ga na' zoa cazu',  
 para ilé'eda' yöl-la' huáca quiu', en yöl-la' bení' quiu'.  
<sup>3</sup> Tu' nácatëro dxi'a yöl-la' dxi'i ladxí' quiu' ca yöl-la' na'bán caz.  
 Que lë ni na' cu'a Li' yöl-la' ba.  
<sup>4</sup> Guía' Li': "Xclenu" tsanni ni zoa' nabana'.  
 Uchisa' na'a, en ulidza' Lo'.  
<sup>5</sup> Ruhüölaj rudzé'e icja ládxi'da'ahua' le nácatëro dxi'a,  
 ate' lu yöl-la' rudzeja quia' rigu'a Li' yöl-la' ba.  
<sup>6</sup> Röjneda' Li' cate' déa' lu le ráti'da'.  
<sup>7</sup> Rizá' ládxa'a ca nacu' cate' rina'sa' yëla.  
 Rácalen cazu' neda',  
 en tu' run chí'u neda', lu yöl-la' rudzeja quia' rul-la' quiu'.  
<sup>8</sup> Nazón cazu' Li' bö' naca caza'.  
 Rizón cazu' Li' neda',  
<sup>9</sup> pero ila'yaza lataj chul-la  
 nupa té'ëni iluti neda'.  
<sup>10</sup> Ilátigaca lu guíë tuchi'.  
 Ilágugaca bö'cu' zuga' léguequi.  
<sup>11</sup> Nu rinná bë' uláz queë' Xanru' udzeja ladxí' lahuë'  
 Dios.  
 Ulu'z'í' xibé yúgu'të nupa tu'zöni ladxí' Lë',  
 tu' usayaj cazë' Lë' ruí'igaca nupa ta'z'í' yë'.  
**64** Dios, buzé naku' chí'a le rinabi yúdxida' Li',  
 para gun chí'u yöl-la' na'bán quia' tu' rádxi'da' bi  
 gun nu ridí'l-lalen neda'.  
<sup>2</sup> Bucachí' neda' para cabí bi ilún quia' bagáchisö nupa tu'á' dö',  
 en para cabí ila'bía dí'ë neda' bönni' tutië' bönachi.  
<sup>3</sup> Nácatëcarë' lúdxí'gaquië' ca yugu' guíë tuchi',  
 ate' nácatëcarë' didza' z'í' tu'ë ca yugu' yaga lahui tuchi'.  
<sup>4</sup> Bagáchisö tu'zé yugu' yaga lahui tuchi' na'  
 para ilunë' huë' nupa bití' bi nabága'gaca.  
 Tsárido'os tu'zé léguequi, en bití' bi tádxinë'.  
<sup>5</sup> Bití' ca' tu'cá'anë' le naca dö' té'ëne' ilunë'.  
 Tu'ë didza' ca gaca ulu'cá'hë'ë yugu' du yalaj qué-gaquië', ta'nnë':  
 "¿Nuzxi caz gaca ilé'e yugu' du na'?"  
<sup>6</sup> Tunë' didza' ca naca le naca dö' ilunë', ta'nnë': "Chin-abá'a le gunru'."  
 Tu'cá'hí'gaquië' le ta'zá' ládxe'ë, en le ta'bequi icjé'.  
<sup>7</sup> Uzal-lë' Dios tu yaga lahui tuchi' le ideli' légaquië'.  
 Tsárido'os gunë' légaquië' huë'.  
<sup>8</sup> La' didza' tuí'isë' ilún ga tseajchégu'gaquië'.  
 Lu yöl-la' rubani quéguequi ulu'tá ícjaguequi nupa ila'lé'e légaquië'.  
<sup>9</sup> Ní'irö yúgu'të bönachi iladxí Dios,  
 en ulu'siyón luzé'eguequi ca naca le nunë' Dios,  
 en ila'zá' ládxi'gaca ca naca lë na' nunë'.  
<sup>10</sup> Nu bönni' tsahui' uzi'ë xibé' Xanru', en gunë' löza Lë'.  
 Yúgu'të nupa nácatëcarë' idú ladxí' ulu'z'í' xibé'.

**65** Dios, nupa nacuá' yödzo Sión ila'gú'u Li' yöl-la' ba,  
 en ilunna quiu' le gula'zì' lu né'eguequi,  
 2 tu' riyón quézinu' Li' cate' tu'lidza Li',  
 ate' yúgu'tè bönachi ila'dxín lo'.  
 3 Tun nigui neda' dul-la' nuna',  
 pero runiti lo cazu' netu' ca naca le ridá'baga'tu' Li'.  
 4 Bica' ba nupa nabó cazu' quiu', en nulidzu' quiu',  
 para ila'cuá' yugu' lataj lá'ayi quiu'.  
 Huölaj udzé'etu' le nácgaca dxí'a yú'ugaca lidxu',  
 enca' le yú'ugaca yudo' lá'ayi quiu'.  
 5 Tu' nacu' tsahui' rubí'u didza', en runu' yugu' le zxön  
 le tácalen netu'.  
 Naca cazu' Dios Nu rusólá netu'.  
 Nupa nacuá' idútè yödzölió ulu'zxöni ladxí' Li',  
 enca' nupa nacuá' zì'tu' ia'tsölá'alö nísado'.  
 6 Len yöl-la' huáca quiu' nucú'u yugu' guí'a zxön,  
 le naca bé'gaca nál-latèrö cazu' Li'.  
 7 Ruzóa dxíu' le riyasa ridxía lu nísado', en le ru'u bö  
 que.  
 Ruzóa dxíu' bönachi cate' tu'tsatsa.  
 8 Bönachi idútè yödzölió tadxí Li' ní'a quégaca le zxön  
 nunu'.  
 Le run cazu' Li' tun ga tu'dzeja bönachi idapa la'a  
 yödzölió.  
 9 Ruí'i ladxu'u luyú, en risól-lu'u nisa guió'j.  
 Runu' ga ruhuó'ca yu ya'a.  
 Nucú'u luyú na' yugu' yegu yúdzugaca nisa zila,  
 le run ga dética'sö zxo'a-za, tu' caní raza ladxu'u Li'.  
 10 Risól-lu'u nisa guió'j gapa dégaca na, en rusubisu'  
 gapa chinadúz.  
 Ruúnu' yúludo' luyú zidzaj, en runu' ga ta'gula guixi'  
 cuando'.  
 11 Runu' ga rulá' yödx yana' le nadúz luyú ni tu iz tu iz,  
 en ga zóatica'sö le ilé'aj ilágugaca bönachi.  
 12 Nacuá'aba' böa'-bèdxi la' guixi',  
 ate' tu'dzeja bönachi yugu' lu guí'ado'.  
 13 Gapa naca lachí' nacuá'aba' bö'cu' zxila',  
 ate' dxíada' zxo'a' xtila la' yèla.  
 Lu yöl-la' rudzeja quéguequi ta'bódxí'a,  
 en tul-la bönachi quiu'.  
**66** ¡Gulí'güf' zidzaj didza' lahuë' Dios  
 lu yöl-la' rudzeja queé'li' yúgu'tèli' zóalí' yödzölió!  
 2 ¡Gulí'gul-la ca naca yöl-la' ba que Lè'!  
 ¡Gulí'cu'è yöl-la' ba!  
 3 Gulí'guié' Dios: "¡Zxöntèrö nácgaca le nunu'  
 tu' naca zxöntèrö yöl-la' huáca quiu'!"  
 Nupa bití' ta'lé'e Li' dxí'a ulu'lu'í' cuini  
 ca nupa tun ca rnna xtídz'u.  
 4 Yúgu'tè nupa nacuá' yödzölió ilún Li' zxön,  
 en ilúl-la yöl-la' ba quiu'.  
 Ilúl-la yöl-la' ba que Lo'.  
 5 Gulí'dá ilé'elí' yugu' le nuné' Dios.  
 Nayépisètèrè' Dios lu le runé' quégaca bönachi.  
 6 Bené' ga bö'ca ca luyú bidxi ga dè nísado'.  
 Gula'dödè' gatsaj láhuilö yegu, ta'zé'esó ní'agaquié'.  
 Ní' udzèjade'èru' ca náquié' Lè'.  
 7 Len yöl-la' unná bè' queé' rinná bé'tica'sè'.

Ruyútica'sè' bönachi yúgu'tè yödzö.  
 Bití' ral-la' ilún ba zxön cuínguequi nupa ta'dá'baga'  
 xtídzè'è.  
 8 ¡Gulí'gún zxönè' Dios queé'tu', libí'ili' bönachi yúgu'tè  
 yödzö,  
 en gulí'cu'è yöl-la' ba gátí'tès!  
 9 ¡Run cazè' Lè' ga zóaru' nabanru',  
 en bití' ru'è lataj cuila ní'atu'!  
 10 Guzxí' bè' cazu' netu', Dios.  
 Buchí'u netu' ca run nu ruchi'a guíè plata lu guí'.  
 11 Bè'u lataj bidzuntu' lu du yalaj.  
 Busubágu'u netu' tu yua' zí'í.  
 12 Benu' ga gula'libè' icjtu' bönni' dxíagaquié'-ba' böa'.  
 Gudóditu' lu guí', en lu nisa,  
 pero guché' cazu' netu' tu lataj ga bö'aj budzé'etu'.  
 13 Tsu'a lidxu', en cu'a-ba' lo' böa'do' uzégui'a-ba' lo'.  
 Guna' lo' Li' le guzxí' lu na'a guna',  
 14 lè na' bè'a didza' que,  
 le gunní'a cate' ní' riguí' rizáca'a.  
 15 Cu'a-ba' lo' Li' böa'-bèdxi renni' uzégui'a-ba' lo',  
 tsözxón len dzön quégacaba' chivo biguíú'.  
 Gútia'-ba' lo' yugu' bèdxi, en yugu' chivo biguíú'.  
 16 Gulí'dá uzé' nágali', yúgu'tèli' rádxili'-nè' Dios,  
 ate' usiyönda' libí'ili' yugu' le bené' le gulácalen neda'.  
 17 Len ruá' cuinsa' bulidza' Lè',  
 en bena' Lè' zxön len lúdx'a.  
 18 Channö rucácha'a le naca dö' lu ladxí'da'ahua',  
 bití' yönnè' Xanru' Dios didza' gu'a,  
 19 pero le nácatè biyönnè' Dios didza' bè'a.  
 Buzé' naguë' cate' bulidza' Lè'.  
 20 ¡Yöl-la' ba Dios!  
 ¡Bití' gudá'baguë'è neda' cate' bulidza'-nè',  
 en bití' bugüé' yöl-la' nadxí' queé' neda'!  
**67** Xantu' Dios, buzá' ladxí' queé'tu', en ben ga gaca  
 dxí'a queé'tu'.  
 Lu yöl-la' dxí' ladxí' quiu' buyú netu',  
 2 para gaca bè' le ré'ènu' guntu' yödzölió ni,  
 en para ila'nözi bönachi yúgu'tè yödzö ca naca yöl-la'  
 rusólá quiu'.  
 3 Ral-la' ila'gú'u bönachi Li' yöl-la' ba, Dios.  
 Yúgu'tè bönachi ral-la' ila'gú'u Li' yöl-la' ba.  
 4 Ral-la' ulu'dzeja bönachi yúgu'tè yödzö,  
 en ilúl-la lu yöl-la' rudzeja quéguequi.  
 Tu' uchi'a usöró'u bönachi ca naca le naca tsahui',  
 5 ral-la' ila'gú'u Li' yöl-la' ba bönachi, Dios.  
 Yúgu'tè bönachi ral-la' ila'gú'u Li' yöl-la' ba.  
 6 Yödxí yana' runödzej luyú ni.  
 Dios queéru' runé' ga raca dxí'a queéru'.  
 7 Runé' Dios ga raca dxí'a queéru',  
 para iladxí Lè' yúgu'tè nupa nacuá' yödzölió.  
**68** Raca ladxí'ru' chasè' Dios, en usulásiè' nupa  
 ta'díl-lalen Lè',  
 en guné' ga ulu'zxunnaj nupa bití' ta'lé'e Lè' dxí'a.  
 2 Ca rulaga tu bö' recja dzön, ca' bulaga léguequi.  
 Ca na' ruúna' lu guí' quízxi'ba' buz,  
 ca' ila'niti nupa tuá' dö' lahuë' Dios.  
 3 Ulu'dzeja nupa nácgaca tsahui', en ulu'zì' xibé' Dios.  
 Lu yöl-la' rudzeja quéguequi ulu'zì' xibé'.

4 ¡Guli'gul-la queë' Dios!  
 ¡Guli'gul-la yöl-la' ba que Lë!  
 Buli'pá'a nõza ga tõdë' gapa dë lataj.  
 ¡Naz'íi lë' Xanru'!  
 ¡Buli'dzeja lahuë' Lë!  
 5 Náquië' ca xúzgacabi' bi'í uzévido',  
 enca' Nu ruchí'a rusöró quégacanu nigula uzëbi.  
 Caní náquië' Dios ga na' zoë' lataj lá'ayi queë'.  
 6 Rucu'ë Dios nupa nagá'anagaca bayechí' tu yu'u.  
 Rubéajë' nupa nadzúngaca, en runë' ga raca dxí'a  
 quéguequi,  
 pero ulu'gá'ana tu luyú bidxi nupa ta'dá'baga' Lë.  
 7 Yöjnöru cazu' lógaca bönachi quiu', Dios,  
 cate' guchë'u léguequi la' guixi' ga na' dë lataj.  
 8 Gudödi budó' xzu' dza ni'.  
 Lësca' gula guiójsiu' lahuë' Dios.  
 Guzxizi guí'a Sinaí lahuë' Dios quégaca bönachi Israel.  
 9 Benu' ga gulaj guiójsiu', Dios.  
 Benu' ga böaca ya'a xiyú' ga ni' guca yu bidxi.  
 10 Yöjcuá' nupa néquiquequi quiu' luyú na'.  
 Lu yöl-la' dxí'i ladxí' quiu', Dios,  
 bucözu' le gácalen nupa nácacaca yechi' luyú na'.  
 11 Bë' cazë' didza' Xanru' Dios.  
 Ta'guísinu nigula zían didza' dxí'a queë', ta'nnanu:  
 12 "¡Ta'zxúnnajë! ¡Ta'zxúnnajë' bönni' ta'nná bë'ë,  
 enca' bönni' röjjaquië' gudil-la guizxi yu quégaquië'!"  
 Nigula gula'bózanu lídxigacanu bulu'zí'ínu xibé le  
 gutá' quégaquië'.  
 13 Sal-la' bucachí' loli' gapa tun chí'ili' bö'cu' zxila',  
 gáculi' le naca lachi ca nácacacaba' gu'dödo'  
 néquiquequiniba' guíë plata,  
 en xitúbigacaba' néquiquequini guíë oro.  
 14 Cate' bësilásië' Dios bönni' na' gula'nná bë'ë lu guí'a  
 Salmón,  
 benë' ga gula guió'j böguí' lu guí'a na'.  
 15 Nequi queë' Dios guí'a Basán.  
 Naca guí'a Basán na' tu guí'a zxön.  
 16 ¿Bizx que ruzxé'eli', yugu' guí'a zxön?  
 ¿Bizx que ruzxé'eli' guí'a na' guzé ladxë'ë Dios tsöjsóë'  
 ga na'?  
 Le nácatë tsaz soë' Dios ni'.  
 17 Gayuá', en gayuá' nácacaca carreta que gudil-la  
 queë' Dios.  
 Rizé'ë Xanru' lu guí'a Sinaí ga na' tseajtsazië' lataj  
 lá'ayi queë'.  
 18 Buëpu' yehua' yubá richë'u bönachi zían gula'dzún-  
 gaca.  
 Nu'u yugu' le bulu'nödzej bönachi quiu',  
 en le gulunna quiu' nupa ta'dá'baga' Li',  
 para tsöjsóë' Dios ni' tsaz.  
 19 ¡Yöl-la' ba Dios, Nu ruá' sua'ru' tu dza tu dza!  
 ¡Náquië' Dios Nu rusölá rë'u!  
 20 ¡Dios queëru' rusölé' rë'u!  
 ¡Rusölé' Xanru' Dios rë'u lu yöl-la' guti!  
 21 Le nácatë Dios udxíë' huë' ícjagaca nupa ta'dá'baga'  
 Lë'.  
 Udxíë' huë' icjë' bönni' biti' gusanë' ca naca dö' ru'ë.

22 Ru'ë didza' Xanru', rnnë': "Ubéaja' léguequi lu guí'a  
 Basán,  
 en ubéaja' léguequi lu nísado',  
 23 ate' ulíbilí' léguequi ga idxintë irúaj rön quéguequi,  
 ate' ilé'ajba' zxiculi' xichóngaca nupa ta'dil-lalen libí'il-  
 i'."  
 24 Ta'lé'e yúgu'të bönachi nupa ta'dalen Li', Dios.  
 Lu yöl-la' run Li' zxön ta'dá lu lataj lá'ayi quiu', Dios  
 quia', Nu rinná be'e neda'.  
 25 Nupa tul-la, en nupa ta'guínnaj lé'egaca bihuël-la,  
 ta'dá ni',  
 ate' bi'í nigula ra'bando' tunbi' léguequi tsözxön,  
 ta'gápabi' lé'egaca guídido'.  
 26 Buli'lidzë' Dios dxí'a tsáhuí'do' gapa na' rudúbili'  
 queë',  
 tu' náquië' Xanru', libí'ili' zxi'ini xi'sóë' Israel.  
 27 Nacu'ë zxi'ini xi'sóë' Benjamín ga na', bönni' gúcarë'  
 cuidi', ate' ta'nná bë'ë.  
 Bönni' lo quégaquië' zxi'ini xi'sóë' Judá nútsa'gaquië'  
 ladjagaquië',  
 enca' ladjagaquië' bönni' lo quégaquië' zxi'ini xi'sóë'  
 Zabalón, en Neftalí.  
 28 Bulu'íi lahui yöl-la' huáca quiu', Dios.  
 Bulu'íi lahui yöl-la' huáca quiu', Dios, tu' chibenu' zían  
 le gulácalen netu'.  
 29 Tu' dë yudo' quiu' lu yödzo Jerusalén,  
 bönni' ta'nná bë'ë ila'ché'ë ni' le ilunnë' quiu'.  
 30 Buzé le bach bönachi yödzo na' nácacaca ca böa'  
 guixi',  
 enca' bönachi yugu' yödzo nácacaca ca yugu' bëdxi  
 tsözxön len zxi'iniquequi.  
 Tu'libi bönachi yechi' tu' ta'zé ladxí'gaca dumí.  
 Bësilási nupa na' ta'yaza ladxí' röjaca gudil-la.  
 31 Bönni' gubáz quégaca bönachi Egipto ila'dxinë' lo'.  
 Bönni' Etiopía ila'chisa ná'agaquië' lo', Dios.  
 32 ¡Guli'gul-la queë' Dios, bönachi yúgu'të yödzo!  
 ¡Guli'gul-la yöl-la' ba queë' Xanru'!  
 33 Rö'ë yehua' yubá xitsá'tërö, le zoa caz dza ni'te.  
 Buli'yútsöca', ru'ë zidzaj didza', en naca chi'ë ca guziú'  
 rinnë.  
 34 ¡Guli'gún zxönë' Dios!  
 Yöl-la' nayépisë queë' rusubaga' bönachi Israel.  
 Yöl-la' huáca zxön queë' nalá' lúzxiba xitsá'.  
 35 Rubániru' ca nacu' Li', Dios, lu lataj lá'ayi quiu'.  
 Runnu' quégaca bönachi quiu' yöl-la' nal-la, en yöl-la'  
 huáca.  
 Náquië' Dios quégaca bönachi Israel.  
 ¡Yöl-la' ba Lë' Xanru' Dios!  
**69** Busölá neda', Xana' Dios,  
 tu' raca quia' tsca nabága'a nisa ga ridxintë  
 ruchicja' nisa.  
 2 Raca quia' tsca ruhuötja' ga rë' lu guna', en biti' zoa  
 ga gaca uliba'.  
 Zoa' ca tu lu nisa zila, en chizóa uchicja' nisa.  
 3 Rudú ladxá'a tu' rulidza' nu gácalen neda', ate' da'  
 lubá'a.  
 Chirichul-la guió'j lahua' tu' ruyúa' ga guídu' dusöló'  
 neda'.

4 Nayántërö ca guitsa' icja' nupa bití' ta'l'é'e neda' dxi'a, en bití' bi nuna' quéguequi.  
 Nál-lagaca nupa ta'díl-lalen neda', en té'ëni iluti neda', en bití' bi nuna' quéguequi.  
 Tuné' bayúdx ubí'a dumí le cabí gulana'.  
 5 Nöz quézinu' Lí, Dios, yöl-la' canöz quia', en bití' nagachi' lo' Lí dul-la' nuna'.  
 6 Bití' gu'u lataj nupa tu'zxöni ladxi' Lí ulu'tuí' ní'a quia' neda',  
 Xana' Dios nayépisëtëru'.  
 Bití' gu'u lataj nupa tun Lí zxön ila'gá'ana cá'asö ní'a quia',  
 Dios quégaca bönachi Israel.  
 7 Tu' nadxí'ida' Lí tu'lidza ditjé' neda', en que lè ni na' rutuí'ida'.  
 8 Naca' ca tu bönni' zítu' lógacabi' bí'i bócha'a, en ca tu bönni' zítu' lógaquié' dí'a dza quia'.  
 9 Tu' ruí'í ládxa'a yudo' quiu' régui rilá ládxi'da'ahua'. Naca ca tu'lidza ditaj neda' nupa tu'lidza ditaj Lí'.  
 10 Ruzötaj cuina', en runa' gubasa, en que lè ni na' tu'didza' yudxi neda'.  
 11 Rácu'a' lari' cá'asö ca run nu ribödxi yechi', ate' tu'titaj neda'.  
 12 Ta'nné' quia' yugu' la' nöza, ate' nupa nazúdxigaca tul-la ca naca quia',  
 13 pero neda' ulidza' Lí, Xan.  
 Bubí'í didza', Dios, cate' idxín dza raza ládxa'u Lí tu' nadxí'ide'enu' neda', en tu' guzxí' lu no'o usöló' neda'.  
 14 Guléaj neda' para cabí huötja' lu le naca ca guna'. Ben ga ulá' lu ná'agaca nupa ta'díl-lalen neda', en lu le naca ca nisa zila le chizóa ibaga' neda'.  
 15 Bití' gu'u lataj ibaga' neda' lè na'.  
 Bití' gu'u lataj uchicja' lu le naca ca nísado', enca' cabí huötja' tu lu yeru ba.  
 16 Bubí'í didza', Xan, tu' nacu' dxi'í ladxi', en tu' ruhuéchi' ládxa'u neda', gudá quia'.  
 17 Bití' ucachi' cuinu' lahua' neda', huen dxin quiu'.  
 ¡Rö'a böniga! ¡Gudáchi gúcalen neda'!  
 18 ¡Gudá ga zoa' dusöló' neda'!  
 ¡Ben ga ulá' lu ná'agaca nupa ta'díl-lalen neda'!  
 19 Nöz quézinu' Lí ca tu'didza' yudxi neda', en ca tu'lidza ditaj neda', en tu'cá'ana neda' cá'asö. Ril'é'e quézinu' yúgu'të nupa bití' ta'l'é'e neda' dxi'a.  
 20 Rudú ládxa'a tu' tu'didza' yudxi neda', en bití' bi gaca guna'.  
 Gulöza' nu huéchi' ladxi' neda', pero cuntú nu guzóa. Gú'unida' nu hué tsahui' neda', pero cuntú nu bidzöli.  
 21 Cate' guduna' bulu'gahué' neda' tu le silá', en cate' gubidxa' nisa, bulu'gui'jé' neda' nupe zi.  
 22 Ben ga huöáca laní quégaquié' ca tu le sön lé-gaquié',  
 en ben ga huöáca le tu'zi'ë xibé ca tu le gun ga ila'chixi ila'níguinë'.  
 23 Ben ga ichul-la guiój lógaquié' para cabirö ila'l'é'ené'.  
 Ben ga ila'zéchuticasö cúdzugaquié' znan yua' nuá-gaquié'.

24 Busubaga' légaquié' lu yöl-la' rilé quiu', en bé' quégaquié' yöl-la' ridzá'a quiu'.  
 25 Ben ga cuntú nu soa ládzagaquié', en ga bíti'rö nu soa lu yu'u lédxigaquié'.  
 26 Ta'zóa régu'ë nupa na' benu' léguequi xigua'.  
 Tu'siyönné' ca ta'gu'í ta'zaca' nupa na' nunu' léguequi hué'.  
 27 Buzúaj lu guichi yugu' dul-la' tuné', en bití' gu'u légaquié' lataj ila'déli'né' yöl-la' rusölá quiu'.  
 28 Busulu lágaquié' nazúajgaca lu guichi quégaca nupa nabángaca.  
 Bití' gu'u légaquié' lataj ila'bábalené' nupa nácagaca tsahui'.  
 29 Neda' riguí'í rizáca'a, en rudú ládxa'a. Guchisa neda', Dios, en busölá neda'.  
 30 ¡Cu'a-né' yöl-la' ba Dios len tu le gul-la'! ¡Guna' Lè' zxön, en guía'-né': "Xclenu!"  
 31 Chaza ládxe'ë Xanru' Dios lè ni ca raza ládxe'ë-ba' böa'bédxi rúti'a-ba' lahué', o ca raza ládxe'ë-ba' tuba' bédxi zxön chinagúlaba'.  
 32 Nupa ta'gu'í ta'zaca' ila'l'é'eni lè ni, en ulu'dzeja. Ila'dípa ládxi'gaca nupa tu'guilaj Dios.  
 33 Ruzé nagué' Xanru' Dios nupa ta'yadzaj ta'yudxi, en bití' ral-la ládxe'ë bönachi queé' nadzúngaca.  
 34 ¡Guli'cu'ë yöl-la' ba Dios, lib'íli' yehua' yubá, en luyú ni,  
 enca' nísado', en yúgu'të le nacué' tu tu lataj na!  
 35 Usölá cazé' Dios bönachi Sión, en uchisé' yugu' yödzö quégaca xzí'ini xí'sóë' Judá. Ila'cuá' bönachi queé' ga na', ate' guequi quéguequi luyú na'.  
 36 Xzí'ini xí'sóagaquié' huen xichiné' ila'z'í'ibí' luyú na', ate' ila'cuá'ticasö ní' nupa nadxí'igaca Lè'.  
**70** ¡Busölá neda', Dios!  
 ¡Gudáchi gácalenu' neda', Xan!  
 2 Ben ga ulu'tuí', en ila'bó' böniga nupa na' té'ëni iluti neda'.  
 Ben ga ulu'huécja, en ulu'gá'ana cá'asö nupa na' té'ëni gaca bi gaca quia'.  
 3 Ben ga ulu'huécja lu yöl-la' rutuí'í quéguequi nupa na' tu'titaj neda', ta'nná: "Ja, ja."  
 4 Ben ga ulu'dzeja, en ulu'z'í' xibó' yúgu'të nupa tu'guilaj Lí'.  
 Ben ga ilu'íticasö didza' nupa ta'dxi'í yöl-la' rusölá quiu', ila'nná:  
 "¡Zxöntërö náquié' Dios!"  
 5 Neda' nacuí'da', en bití' bi gaca guna'.  
 ¡Gudáchi gácalenu' neda', Dios!  
 Nacu' Nu rácalen neda', en Nu rusölá neda'.  
 ¡Bití' ca' tsenu' guídu' quia', Xan!  
**71** Nuzóa cazu' neda' dxi'a tsáhui'do' ga na' zu', Xan.  
 ¡Bití' gu'u lataj utuí'ida'!  
 2 ¡Tu' nacu' tsahui' gúcalen neda', en busölá neda'!  
 ¡Buzé nagu' neda', en busölá neda'!  
 3 Nacu' le uzóa neda' tsutsu,  
 en le gun chí'í neda' ga gaca ucachi' cuina'.

Chigunná bé'enu' nu usölá neda' tu' nacu' Nu ruzóa neda' tsutsu,  
 en Nu run chí'i neda'.  
 4 Dios quia', busölá neda' lu na' nu ruá' dö',  
 en lu na' nu ridá'bagá' Li', en run dzatsa.  
 5 Tuzu' Li' runa' löza, Xan.  
 Ruzxöni ládxa'a Li' ga gudéla'tè naca' bí'ido'.  
 6 Ruzxöni ládxa'a Li' ga gudéla'tè gulja',  
 tu' guzóalen cazu' neda' cate' ni' buzóanu xiná'a neda'.  
 ¡Cú'utica'sa' Li' yöl-la' ba!  
 7 Zían nupa tu'bani ca naca quia',  
 tu' run chí'i cazu' Li' neda'.  
 8 ¡Rigú'utica'sa' Li' yöl-la' ba,  
 en tu dza tu dza rulu'a lahui yöl-la' ba quiu'!  
 9 ¡Biti' usán no'o neda' na'a, ni naca' bönni' gula!  
 ¡Biti' ucá'anú' neda' na'a cate' ni rudú ládxa'a!  
 10 Tu'í didza' nupa biti' ta'lé'e neda' dxi'a ca gaca bi ilún quia',  
 ate' tun tuz xtídza'gaca nupa té'eni iluti neda'.  
 11 Ta'nná: "¡Nusán né'è Dios lé'!  
 ¡Gulí'dá sönru'-né' tu' cuntú nu zoa gácalen lé'!"  
 12 ¡Dios, biti' su' zítu' ga ni zoa!  
 ¡Dios quia', gudáchi gácalenu' neda'!  
 13 Ben ga ulu'tuí'i, en ila'niti nupa té'eni iluti neda'.  
 Ben ga ulu'tuí'iné', en ila'bö'è böniga bönni' té'éné' ilu'è dö' quia'.  
 14 ¡Neda' gúntica'sa' löza Li',  
 en cú'utica'sa' Li' yöl-la' ba!  
 15 Idú dza usiyönda' bönachi nacu' tsahui',  
 en rusöló' yúgu'tè bönachi.  
 Biti' nözda' bal-laxi luzuí busöló' neda'.  
 16 ¡Gu'a didza' ca nácagaca le zxön benu' Li', Xana' Dios!  
 ¡Usiyönda' bönachi tuzu' Li' nacu' tsahui'!  
 17 Dios, rusédinu' neda' ga gudéla'tè ni' naca' bí'ido',  
 ate' ga ridxintè na'a dza ruá'a didza' ca nácagaca le zxön nunu'.  
 18 Na'a naca' bönni' gula, en chinagucha'.  
 ¡Biti' usán no'o neda', Dios!  
 Benna neda' lataj usiyönda' yugu' xzí'ini xsoa' ca naca yöl-la' huáca quiu',  
 ate' quíxjöi'ida' nupa ilalaj ca naca yöl-la' nál-la quiu'.  
 19 ¡Le tsahui' nacu', Dios, ridxintè lúzxiba!  
 ¡Nunu' Li' yugu' le zxöntèrö!  
 ¡Cúnturö nu zoa nu naca ca nacu' Li', Dios!  
 20 Gusöl-la' cazu' quia' yugu' le guca quia' le gulún neda' zí',  
 pero ruúnu' neda' tsutsu,  
 en le yúbölö uchisu' neda' para cabí gátia'.  
 21 Gunu' ga tsépisea',  
 en hué tsahú'u neda' le yúbölö.  
 22 ¡Le nácatè cu'a Li' yöl-la' ba, en gul-la' tu bihuél-la, Dios!  
 ¡Gul-la' ca runu' ca rnno', en nacu' Nu naca lá'ayi lóga-ca bönachi Israel!  
 23 ¡Lu yöl-la' rudzeja quia' códxi'a cate' gul-la' quiu',  
 en idú ládxa'a gul-la' tu' busöló' neda'!  
 24 ¡Idú dza gu'a didza' ca nacu' tsahui'!

¡Tu'tuí'i, en ta'bó' baguí'i nupa gul'é'eni iluá' dö' quia'!  
 72 Dios, buzéajni'iné' bönni' rinná bē'è  
 para gaca uchi'a usöröé' ca ruchi'a rusöróu' Li'.  
 Ben ga ilácagacabi' tsahui' xzí'iné' ca nacu' Li' tsahui'.  
 2 Bē'è lataj uchi'a usöröé' quégaca bönachi quiu' ca naca le naca tsahui',  
 enca' quégaca bönachi quiu' ta'guí'i ta'zaca'.  
 3 Ben ga ila'cuá' dxi'a tsáhu'i'do' bönachi quiu' yugu' lu guí'a,  
 en ilácagaca tsahui' yugu' lu guí'ado'.  
 4 Bē'è lataj ubéajjē' tsahui' nupa ta'guí'i ta'zaca' ladaj bönachi quiu',  
 en usölé' yugu' xzí'inigaca nupa ta'yadzaj ta'yudxi, en ucul-lē' nu ribía no léguequi.  
 5 Ben ga iladxí bönachi quiu' Li' tsanni ni' soa gubidza, enca' tsanni ni' soa beo' ga idxintè dza udxi.  
 6 Ben ga gáquiē' bönni' rinná bē'è ca nisa guíój ribixi lu guíxí'do',  
 en ca yugu' guíój gúpa'do' tu'subisa luyú.  
 7 Ben ga gaca dxi'a quégaca nupa nácagaca dxi'a yugu' dza inná bē'è lé',  
 en ila'cuá' dxi'a tsáhu'i'do' ga idxintè bítirö soa beo'.  
 8 Ben ga inná bē'è idapa la'a yödzülió,  
 ga naguela' ra' yegu Eufrates ga idxintè idútè luyú.  
 9 Ben ga ulu'zechu zxíbigaca lahuē' lé' nupa nacua' luyú bidxi,  
 en iladxí lé' nupa ta'díl-lalen lé'.  
 10 Ben ga ila'dxinē' lahuē' bönni' ta'nná bē'è luyú Tar-sis en yugu' lu yödzö,  
 nuá'gaquiē' yugu' le ulu'nödzjē' queē'.  
 Bönni' ta'nná bē'è luyú Sabá, en luyú Seba ilá'dxinē' bi ulu'nödzjē' queē'.  
 11 Ben ga ulu'zechu zxíbigaquiē' lahuē' yúgu'tè bönni' ta'nná bē'è,  
 en ilúngaca xichinē' bönachi yúgu'tè yödzö.  
 12 Usölé' nu riyadzaj riyudxi cate' ulidza lé',  
 enca' nu riguí'i rizaca', en nu biti' zoa nu gácalen nu na'.  
 13 Huéchi' ládxe'è nupa nácagaca yechi', en nupa ta'yadzaj ta'yudxi,  
 en gun chí'è yöl-la' na'bán quégaca nupa nácagaca yechi'.  
 14 Usölé' léguequi lu ná'agaca nupa tun léguequi zí',  
 en lu ná'agaca nupa tuá' dö',  
 en gü'í ládxe'è léguequi cate' nu gué'eni guti léguequi.  
 15 Soē' ibanē', ate' iluá'gaca bönachi queē' oro que lu xiyúgaca bönachi Sabá.  
 Ben ga ulu'lidza Dios bönachi, ila'nábitica'sö Li' gá-calenu' lé'.  
 Ben ga ulu'lidza lé' dxi'a tsáhu'i'do' idú dza.  
 16 Ben ga unódzjada' xzoa' luyú queē', enca' yugu' lu guí'ado',  
 le unödzaj yödxí yana' xiyúē' ca run guí'a Líbano.  
 Ben ga ila'yán nupa nacua' ladzē' ca rö'ö guíxí'do' lu xiyúē'.  
 17 Ben ga tsöjnégaca le lé' ga idxintè dza udxi.  
 Ben ga gaca yöl-la' ba que lé' tsanni ni' soa gubidza.

Ben ga ila'nabi bönachi Li' yúgu'të yödzö  
 gunu' ga gaca dxí'a quéguequi ca benu' queë' lë'.  
 Ben ga ila'gú'u lë' yöl-la' ba bönachi yúgu'të yödzö.  
 18 ¡Yöl-la' ba Xanru' Dios, Dios quégaca bönachi Israel!  
 ¡Tuzë' Lë' runë' le túngaca ga rubániru'!  
 19 ¡Yöl-la' ba Lë' le naca lachi ga idxintë dza udxi!  
 ¡Rizé ládxi'ru' ilí idútë yödzölió le naca bení' queë'!  
 ¡Ca' gaca! ¡Ön, ca' gaca!  
 20 Chibudxi le rinábida'-në' Dios neda', David, xzí'inë'  
 Isaí.

**73** Le nácatë runë' Dios ga raca dxí'a quégaca bönachi Israel,  
 nupa na' naca dxí'a tsahui' ládxi'do'guequi.  
 2 Ia'látisö guchixi guníguida'.  
 Ia'látisö tsöjdöda' tsölá'alö,  
 3 tu' buzé'eda' nupa tun ba zxön cuínguequi,  
 en tu' dëda' yöl-la' tsahui' quégaca nupa tuá' dö'.  
 4 Biti' ca' téquinë' zí' bönni' tu'ë dö' na'.  
 Nácagaquië' tsutsu, en nacu'ë dxí'a.  
 5 Biti' ta'guí' ta'záquë'ë ca ta'guí' ta'zaca' ia'zica'rö bönachi.  
 Biti' ca' raca quégaquië' ca raca quégaca bönachi yúbölö.  
 6 Naca yöl-la' run ba zxön cuini quégaquië' ca tu le néquini oro dxía ícjagaquië'.  
 Yöl-la' rutsatsa quégaquië' naca ca xzágaquië' nácu-gaquië'.  
 7 Tu'zi'ë xibé le ta'dödi bë'ë të'aj tahuë',  
 en ta'zá' ládxi'gaquië' quégaca le zían le ila'délinë'.  
 8 Tu'titjé' ia'zica'rö bönachi,  
 en tu'ë didza' lu yöl-la' run ba zxön cuini quégaquië'.  
 Tun ba zxön cuíngaquië',  
 en té'ënë' ila'bía nahuë' ia'zica'rö bönachi.  
 9 Ta'nné' queë' Dios zoë' yehua' yubá,  
 en tu'didza' yudxë' nupa nacuá' yödzölió.  
 10 Que lë ni na' ta'dá' bönachi queë' Dios légaquië',  
 en ta'yéajlë' didza' tu'ë.  
 11 Ta'nné': "Biti' ca' nózinë' Dios,  
 en biti' ilé'e lë ni Nu na' zoa xitsá'alö."  
 12 Caní nácagaca nupa tuá' dö'.  
 Dëda' yöl-la' tsahui' quéguequi, en ta'zítica'sö ia'lati'.  
 13 ¿Naru' nítisö ben chí'i cuina' para gaca' dxí'a  
 en para cabí íbaga'a dul-la'?  
 14 Dios, benu' ga gudí'i guzácaca' idú dza.  
 Yugu' zila benu' neda' zí'.  
 15 La'tu' bë'a didza' ca nácagaca lë ni  
 guzxi' yé'eda' bönachi quiu'.  
 16 Que lë ni na' bë' ládxa'a tséajni'ida' lë ni,  
 sal-la' gúcada' böniga  
 17 ga bidxintë dza guyu'a yudo' quiu'  
 en guyéajni'ida' ca gaca quégaca nupa tuá' dö'.  
 18 Le nácatë nuzú' léguequi ga ta'chixi ta'nigui,  
 en runu' ga ila'niti tsaz.  
 19 La' ila'nítitë,  
 en ila'yaza ga udxi quéguequi.  
 20 Nácagaca ca tu le rinetu' yëla le ridödi que cate' ritó  
 yu.  
 Cate' chasu', Xan, la' udóditeu' léguequi tsölá'alö.

21 Cate' yöjdín icja' le nácagaca ca tu le silá',  
 en guzá' ládxa'a yugu' le gúquida' zí',  
 22 guca' tu' canóz, en bití' bi guyéajni'ida'.  
 Guca' ca tuba' böa' guixi' lo' Li'.  
 23 Zóatica'sa' lo' Li',  
 ate' rizón cazu' neda'.  
 24 Rigú'u yöl-lu'u neda' le rugú'u neda' nöza quiu',  
 en ga údxitë uzi'u neda', en gunu' neda' bal.  
 25 ¿Núzxirö zoa yehua' yubá nu gácalen neda'?  
 ¡Tuzu' Li'!  
 Tu' rácalenu' neda' cúnturö nu zoa yödzölió nu riquinda'.  
 26 Ricuidi' le naca', en rudú ládxa'a.  
 Le ruzóa tsutsu ládxi'da'ahua',  
 en le ruzítica'sa' xibé naca cazu' Li', Xan.  
 27 Le nácatë ila'niti nupa tu'cá'ana Li'.  
 Usunítu' yúgu'të nupa tu'zóa Li' tsölá'alö.  
 28 Raca dxí'a quia' cate' ribiga' ga zu' Li', Dios.  
 ¡Naca cazu' Li', Xana' Dios, Nu run chí'i neda'  
 para ulu'a lahui yúgu'të le nun cazu'!  
**74** Dios, ¿naru' tsaz nusán ládxi'u netu'?  
 ¿Riléde'enu' netu', bö'cu' zxila' queë cazu'?  
 2 Yöjné netu', bönachi tu'dubi quiu', nupa böá'u cazu'  
 dza ni'te,  
 nupa böá'u cazu' para gácatu' bönachi queë cazu'.  
 Yöjné gu'á Sión, ga ni guzóa cazu' Li'.  
 3 Gudá tödu' ga ni naguinnajdërö yödzö lá'ayi quiu'.  
 Bulu'sunítidërö nupa gula'dá'baga' Li'  
 yúgu'të le gula'cuá' lataj lá'ayi quiu'.  
 4 Tu'tsatsa nupa na' gula'dá'baga' Li'  
 idú gásibi'ilö ga ni budúbitu' quiu'.  
 Nucua'gaquië' ni le naca bé'gaca  
 nuxícjagaquië' yödzö lá'ayi quiu'.  
 5 Nalá' lahui yödzö ni ca nalá' tu gu'á cate' nu gulú'u  
 le bidín,  
 en nurixi nu na' yugu' yaga gula'cuá' lu gu'á na'.  
 6 Bulu'zxuzxjé' le nácagaca lachi lu yödzö ni  
 len yugu' guíë huága quégaquië', en yugu' yaga  
 zidzaj.  
 7 Bulu'zégui'ë idútë lataj lá'ayi quiu'.  
 Nucá'anagaquië' cá'asö lataj ga benru' bal Lo'.  
 8 Lu icja ládxi'do'gaquië' gula'né': "Nuxícjadërötu' bönachi ni."  
 Idútë lu xiyutu' bulu'zégui'ë yúgu'të yu'u ga na'  
 budúbitu' lo'.  
 9 Bítirö caz rilé'etu' yugu' le bulu'subán ládxi'tu'  
 gulísatu' lu xiyutu'.  
 Bítirö zoa nu bönni' ru'ë didza' uláz quiu'.  
 Bítirö zóalen netu' nu bönni' nózinë' gáca'xte caz gaca  
 caní queé'tu'.  
 10 Dios, ¿gáca'xte caz ulu'lidza ditaj netu' nupa ta'díl-  
 lalen netu'?  
 ¿Gáca'xte caz ulu'cá'ana ditaj Lo' nupa ta'dá'baga' Li'?  
 11 ¿Naru' cabí gácalenu' netu'?  
 ¿Bizx que nucáchu'u yöl-la' huáca zxön quiu'?  
 12 Rinná be'e quézinu' netu' Li', Dios, dza ni'te quez,  
 en rusölá cazu' bönachi idútë yödzölió.

<sup>13</sup> Len yöl-la' huáca zxön quiu' bubéaj cazu' choplö nísado'.

Gulá'a cazu' ícjagacaba' böa' zxön nacuá'aba' nísado'.

<sup>14</sup> Bzxuzxja cazu' ícjagacaba' böa' sínia' lèba' Leviatán. Ben cazu' ga guláguba' yugu' böa' guixi' xipéla'ba' böa' sínia' na'.

<sup>15</sup> Gusalaj cazu' yugu' beaj nisa, en gapa rálajda' nisa. Busubidxi cazu' yugu' yegu nisa gula'yúdzutica'sö nisa.

<sup>16</sup> Nequi queë cazu' lahui' dza, en nequi ca' quiu' chí'i dzó'ölö.

Ben cazu' Li' bení', enca' gubidza.

<sup>17</sup> Naguixaj cazu' Li' yúgu'tè buzá' nacuá' yödzülió.

Nun cazu' Li' beo' la, en beo' ziaga.

<sup>18</sup> Yöjné lè ni, Dios. Nupa ta'dá'baga' Li' nucá'anagaca ditaj Lo',

ate' nupa nácgaca canóz nucá'anagaca cá'asö Lo'.

<sup>19</sup> Biti' usán no'o nupa nadxí'ínu' lu ná'agaca nupa nácgaca ca yugu' böa' guixi' sínia'.

Biti' gal-la ládxi'u tsaz nupa néquiquequi quiu', en ta'guí'i ta'zaca'.

<sup>20</sup> Yöjné didza' dzaga na' núnlenu' netu', tu' nacuá' nupa tuti bönachi gapa naca chul-la lu xiyu-tu'.

<sup>21</sup> Biti' gu'u lataj ulu'gá'ana cá'asö nupa nácgaca bayechi'.

Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.

<sup>22</sup> ¡Guyasa, Dios, en ben ca rnna xtídzu'u!

¡Ruzé nagu' ca rulidza ditjé' Li' bönni' canóz idú dza!

<sup>23</sup> Biti' gal-la ládxi'u didza' zi' tuí'i nupa ta'dá'baga' Li'. Yöl-la' dzatsa tun nupa tu'cá'ana Li' cá'asö riyóntica'sö.

**75** ¡Rètu' Li': "Xclenu', Dios!"

¡Rètu' Li': "Xclenu",

tu' zóatica'su' gal-la' ga zóatu'!

¡Tuí'i didza' bönachi ca nácgaca le zxön nunu'!

<sup>2</sup> Rnné' Dios: "Nuzóa' dza cate' uchi'a usöróa' bönachi.

Uchi'a usöró caza' léguequi ca naca le nácatè.

<sup>3</sup> Tu'suniti yödzülió, en nupa nacuá' ni',

pero tsaz nuzóa caza' le."

<sup>4</sup> Gudxa' nupa tun ba zxön cuínguequi, gunná'a: "Biti' gun ba zxön cuinli'",

en gudxa' nupa tuá' dö: "Biti' huë tsahui' cuinli'.

<sup>5</sup> Biti' huë tsahui' cuinli',

en bití' gü'ili' didza' lu yöl-la' run ba zxön cuinli'."

<sup>6</sup> Calëga ga rilén gubidza, en calëga ga ribía gubidza, en calëga la' guixi' ga dè lataj irúaj le huë tsahui' bönachi,

<sup>7</sup> pero uchi'a usöró cazé' Dios bönachi.

Uzötjé' tué' bönni', en uchisé' ia'tué'.

<sup>8</sup> Nuá' cazé' Xanru' lu nëë tu xziga' yudzu xisa le ribía lubá uva le ribixi rilèbi.

Chinugútsi'dèrè' le, ate' rigu'è le para ilè'aj le nupa tuá' dö' yödzülió ni,

ate' ilé'jadèrö le silá' que.

<sup>9</sup> Neda' usiyóntica'sa' bönachi lè ni,

en gul-la' yöl-la' ba queë' Dios queë' Jacob.

<sup>10</sup> Ugúé' yöl-la' unná bè' quégaca nupa tuá' dö'.

Quíxjé' tsaz yöl-la' unná bè' quégaca nupa nácgaca tsahui'.

**76** Zxí'ini xi'sóë' Judá núnbë'gaquië' Dios.

Nayépisë le lè' ladaj bönachi Israel.

<sup>2</sup> Zoa caz lataj lá'ayi queë' lu yödzü Jerusalem, ate' nazí'i le Sión lataj ga na' zoa cazé'.

<sup>3</sup> Ni' guditsjé' yugu' yaga lahui tuchi' zoa guí' láhuiguequi,

enca' yugu' guié' la, en yugu' le ta'díl-lalen bönachi lu gudil-la.

<sup>4</sup> ¡Yöl-la' ba Li', Dios!

¡Nayépisëtèru' ca yugu' guí'a zxön!

<sup>5</sup> Buxicju' bönni' nál-lagaquië'.

Gudödi yëla guiój lógaquië' bönni' röjajúquië' gudil-la, en bití' guca ila'chisa ná'agaquië'.

<sup>6</sup> Cate' Li', Dios queë' Jacob, gudíl-lalen cazu' légaquië' gulátiba' böa', ate' gupati ca' nupa dxíagaca légacaba'.

<sup>7</sup> Li' caz ral-la' gádxitu',

tu' cabí gaca nu soa lo' cate' ilenu'.

<sup>8</sup> Ga zu' Li' yehua' yubá gunnó' uchi'a usöró'u bönachi.

Ní'irö guladxi nupa nacuá' lu yu, en gula'cuá' dxisö,

<sup>9</sup> cate' guzuínë' Dios para uchi'a usöróë' quégaca bönachi,

para usölé' nupa nácgaca nöxaj ladxí' yödzülió ni.

<sup>10</sup> Sal-la' ta'léde'e bönachi, gaca yöl-la' ba queë' Lè'.

Uzi'ë xibégaca nupa ulu'gá'ana ládjaguequi.

<sup>11</sup> Gulí'sí' lu ná'alí' bi gunlí' lahuë' Xanru' Dios,

en guli'gún ca na' innalí'.

Yúgu'tè nupa nacuá' ga na' zoë' ral-la' bi ulu'nödzej queë',

tu' náquië' Nu ral-la' gádxiru'.

<sup>12</sup> Ubéaj cazé' bö' nácgaca caz nupa nadéli'gaca lataj lo.

Bönni' ta'nná bè'ë luyú ni tádxinë' Lè'.

**77** Rulidza'-në' Dios, en ruá'a zidzej didza'.

Rulidza'-në' Dios, ate' riyönnë' chí'a.

<sup>2</sup> Cate' bi guca quia' bulidza'-në' Dios.

Chí'i dzó'ölö guchisa na'a lahuë', en bití' busana' rulidza'-në'.

Biti' guca nu huë tsahui' neda'.

<sup>3</sup> Cate' röjneda'-në' Dios, rö'a böniga.

Cate' rinné ládxa'a, ní'irö rudú ládxa'a.

<sup>4</sup> Bubéaj cazu' yëla guiój lahua'.

Tu' ribö'a böniga bití' gaca gu'a didza'.

<sup>5</sup> Chiguzá' ládxa'a ca guca dza ní'te,

ca guca yugu' iz chigula'dödi.

<sup>6</sup> Tsöjneda' le bulá' chí'i dzó'ölö,

en tsöjsá' ládxa'a ca naca que, ate' rinábini cuina':

<sup>7</sup> ¿Naru' tsaz nusán Xanru' neda'?

¿Naru' cabirö uzá' ládxe'ë quia'?

<sup>8</sup> ¿Naru' cabirö gáquië' dxí'i ladxí'?

¿Naru' cabirö tsöjnenë' le guzxí' lu nëë gunë'?

<sup>9</sup> ¿Naru' nál-la ládxe'ë Dios tu' cabirö ruzá' ládxe'ë queëru'?

¿Naru' bití'rö huéchi' ládxe'ë rë'u tu' rilenë'?

<sup>10</sup> Ní'irö gudxi cuina': Raca caní quia' tu' risébida' ládxa'a,



en que lë ni na' réquida' nadzá' yöl-la' unná bë' queë' Dios nayépisë'.

<sup>11</sup> Tsöjneda' yugu' le nun cazu' Li', Xantu'.  
Tsöjneda' yugu' yöl-la' huáca benu' dza ni'te.  
<sup>12</sup> Sa' ládxa'a ca nácgaca le nunu',  
en cuéqui icja' ca nácgaca le runu'.  
<sup>13</sup> Naca lá'ayi ca run cazu' Li', Dios.  
Cúnturö nu zoa naca dios ca nacu' Li', Dios queétu'.  
<sup>14</sup> Naca cazu' Li' Dios, runu' yugu' yöl-la' huáca zxön.  
Bulú'u lahui yöl-la' huáca quiu' lógaca bönachi yúgu'të yödzo.

<sup>15</sup> Len yöl-la' huáca zxön quiu' busöló' bönachi quiu',  
nupa nácgaca zxí'ini xi'sóagaquië' Jacob, en José.

<sup>16</sup> Bila'lé'e yugu' nísado' Li', Dios.  
Bila'lé'e yugu' nísado' Li', en gula'bó' böniga.  
Gula'xzízilë'e yugu' nísado'.

<sup>17</sup> Bulu'lalaj böaj lúzxiba nisa.  
Lúzxiba xitsá' gunnëda' guziú'.  
Guyëpi yösa ca yugu' yaga lahui tuchi'.  
<sup>18</sup> Lu bö' budunu' biyón guziú' quiu' gunnëda'.

Yösa gula'yëpi bulu'zeni' luyú.  
Gudódida' budó' xzu', en guxzi luyú.  
<sup>19</sup> Bilá' lahui nöza quiu' gatsaj lálhulö nísado',  
ate' guzóa nöza ga gudödu' gatsaj lálhulö nisa zila.  
Biti' nalá' lahui na'a ga na' bulibu'.

<sup>20</sup> Guché' cazu' bönachi quiu' ca runë' bönni' riché'e-  
ba' bö'cu' xzila' hué'enido'.

Guché'u léguequi lu ná'agaquië' Moisés, en Aarón.  
**78** Buli'zé nágali' le uzéajni'ida' libí'ilí', bönachi quia'.  
Buli'zé nágali' didza' gu'a.

<sup>2</sup> Usalja' ruá'a, en ucúdzua' didza'.  
Gu'a didza' tu le nagachi' dza ni'te quez,  
<sup>3</sup> tu didza' chibiyönru', en núnbë'ëru',  
le gulé' xuz xtó'oru' rë'u.

<sup>4</sup> Biti' ucáchi'ru' didza' na' lógacabi' xzí'iniru'.  
Usiyönru' yugu' xzí'ini xi'sóaru' yöl-la' ba queë' Xanru',  
ca naca yöl-la' huáca queë', en yugu' le zxön benë'.

<sup>5</sup> Gudixjë' tu didza' naca bë' queë' Jacob,  
en nuzóë' le rinná bë'ë quégaca bönachi Israel,  
le gunná bé'enë' yugu' xuz xtó'oru'.  
Ulu'zéajni'inë' xzí'inigaquië' ca naca,  
<sup>6</sup> para ilúnbë'gacabi' le, bí'i sí' zá'gacabi', enca' bí'i sí'  
iláljabí',  
para ulu'lu'í'ibí' ca' xzí'inigacabi' ca naca lë na' gunná  
bë'ë Dios.

<sup>7</sup> Ulu'zxöni ládxi'gacabi' Dios,  
en bití' gal-la ládxi'gacabi' yugu' le nunë' Dios.  
Ilunbi' ca nácgaca le gunná bë'ë,  
<sup>8</sup> en bití' ilácagacabi' ca guláquië' xuz xtó'ogacabi'.  
Guláquië' zidzaj ladxí' tu' gula'dá'baguë'ë xtídzë'ë  
Dios,

en bití' guláquië' nöxaj ladxí',  
ate' lu icja ládxi'do'gaquië' bití' gula'yéajlë'ë Dios.  
<sup>9</sup> Yugu' xzí'ini xi'sóë' Efraín guluá'gaquië' yaga uxiti',  
pero bulu'zxúnnajë' lu gudil-la.

<sup>10</sup> Bití' gula'dá'gaquië' didza' dzaga Dios bénlenë' lé-  
gaquië',  
en bití' gulunë' ca naca le gunná bé'enë' légaquië'.

<sup>11</sup> Gulal-la ládxi'gaquië' yugu' le benë' Dios,  
en yugu' yöl-la' huáca zxön benë' lógaquië'.

<sup>12</sup> Benë' Dios le gulún ga bulu'bánninë' xuz xtó'ogaquië'  
luyú Egipto, en luyú Zoán.

<sup>13</sup> Gusaljë' nísado', en benë' ga gula'dödë' gatsaj  
lálhulö nísado' na'.  
Benë' ga guca nísado' na' ca yugu' gu'ado' tsölá'a  
huéaj.

<sup>14</sup> Bulu'ínë' légaquië' nöza lahui' dza, bugunë' dxin tu  
böaj,  
ate' chí'i dzó'ölö bugunë' dxin tu böaj ruzeni' ca guí'.

<sup>15</sup> Bulé'ë tu guiój ga naca la' guixí' ga dë lataj,  
en bë'ë le gulé'ajë' le guca ca tu nísado'.

<sup>16</sup> Gulé'ajë' nisa yegu le gulén lu guiójto'o.  
Benë' ga birúaj nisa ca tu yegu zxön lu guiójto'o na'.

<sup>17</sup> La' ní'só gulunë' dul-la' lahuë' Lë',  
en gula'dá'baguë'ë Dios nayépisëtë're' la' guixí' na'.  
<sup>18</sup> Lu icja ládxi'do'gaquië' gula'zí' bë'ë Dios quégaquië',  
cate' gula'nábinë' Lë' ugahuë' légaquië' ca gula'zësö  
ládxi'gaquië'.

<sup>19</sup> Ní'irö gula'nnë' queë' Dios, gula'nnë':  
"¿Naru' huáca cu'ë Dios le gáguru' la' guixí' ni ga dë  
lataj?"

<sup>20</sup> Buli'yútsöca', bë'ë guiójto'o, ate' birúajda' nisa,  
le guca ca nisa yegu gubó'o zxön.

¿Naru' huáca gunnë' ca' queéru' yöta gáguru'?

¿Naru' gaca ugahuë' bönachi queë' le naca bëla'?"  
<sup>21</sup> Biyönnë' Xanru' Dios didza' ni, en guléde'enë',  
ate' gulén tu guí' le buzegui zían xzí'ini xi'sóë' Jacob,  
tu' guléde'enë' bönachi Israel,

<sup>22</sup> tu' cabí gula'yéajlë'ë Dios,  
en bití' bulu'zxöni ládxi'gaquië' Lë' usölé' légaquië'.

<sup>23</sup> Gunná bé'enë' Lë' yugu' böaj lúzxiba,  
en gusaljë' yehua' yubá.

<sup>24</sup> Gusól-lë'ë yöta maná le ilahuë',  
en bugahuë' légaquië' la' huagu que yehua' yubá.

<sup>25</sup> Gulahuë' bönni' ni' yöta tahuë' gubáz que yehua'  
yubá.

Gusól-lë'ë guizxi yu le ilahuë'.

<sup>26</sup> Benë' ga guyecja bö' birúaj ga rilén gubidza,  
ate' len yöl-la' huáca queë' gunná bé'enë' bö' recja  
le birúaj tsölá'alö ga ridödi gubidza beo' ziaga.

<sup>27</sup> Benë' ga böxaj bëla' ca bëchtö yu ládjalö ga na'  
nacu'ë,  
le naca böa' zoa xíligacaba' guró'öba' ca yuzxi dë tu ra'  
yegu zxön.

<sup>28</sup> Benë' ga böxjagacaba' gatsaj lálhulö ga na' nacu'ë,  
en ládjugaca yugu' yu'u guídido' quégaquië'.

<sup>29</sup> Ca' guca, gulahuë', en bulu'huólaj gula'dzé'enë',  
tu' bë'ë quégaquië' le gula'zësö ládxi'gaquië'.

<sup>30</sup> Zí'alö ca budxi bulu'huólaj gula'dzé'enë',  
tsanni ni' yu'u ruá'agaquië' le tahuë',

<sup>31</sup> gulénë' Dios légaquië',  
en bëtië' bál-lagaquië', bönni' nál-latë'rögaquië' ládja-  
gaquië',

en bucul-lë' bönni' Israel nayépisëtë'rögaquië'.

<sup>32</sup> Sal-la' guca caní, gulunrë' dul-la',  
en bití' gula'yéajlë'ë Lë' ní'a quégaca le zxön benë'.

33 Que lè ni na' benë' ga böáca nítisö dxin gulunë',  
ate' lu yöl-la' radxi gula'zöë' yugu' lu iz queégaquië'.  
34 Cate' bëtië' zíangaquië', ní'rö bulu'lidzë' Lë'.  
Bulu'bí'i ládxi'gaquië', en yójtá'gaquië' Dios.  
35 Ní'rö yójnéguequinë' náquië' Dios Nu run chí'i lé-  
gaquië',  
en náquië' Dios nayépisëtërë' Nu böá'uö légaquië'.  
36 Gula'zí' yé'enë' Lë' len didza' gulu'ë,  
tu' gulu'ë diza' bití' nácatë lahuë' Lë' len ruá'agaquië'.  
37 Bití' gudá'gaquië' Lë' idú ládxi'gaquië',  
en bití' gulunë' ca rna didza' dzaga na' bënlenë' lé-  
gaquië'.  
38 Tu' buéchi' ládxi'ë Dios légaquië',  
buniti lahuë' ca naca xiguia' gulunë', en bití' busunítië'  
légaquië'.  
Bubequi lahuë' queégaquië', en bití'rö gulënë' lé-  
gaquië',  
en bití' benë' ca sa'yéaj yöl-la' ridzá'a queë'.  
39 Ca' guca, yójnënë' nácagaquië' bönáchisö.  
Nácagaquië' ca tu bö' recja le ridódisö, en bití' rudxín.  
40 Zíán luzuí gula'dá'baguë'ë Lë' ga na' naca la' guixí',  
en bulu'suhu'í'në' Lë' lu yu bidxi na'.  
41 Zíán luzuí gula'zí' bë'ë Dios,  
en gulunë' zí' Dios Lá'ayi quégaca bönachi Israel.  
42 Bití' yójnéguequinë' yöl-la' huáca zxön queë',  
le bulu'e lahui dza ní' böá'uë' légaquië'  
lu ná'agaca nupa bití' bila'lé'e légaquië' dxí'a,  
43 cate' ní' benë' le gulaca bë' luyú Egipto,  
en benë' yugu' yöl-la' huáca queë' luyú Zoán,  
44 cate' benë' ga böáca nisa rön yugu' lu yegu luyú  
Egipto,  
enca' nisa yugu' lu beaj queégaquië' para cabí guca  
ilé'ajë' le.  
45 Gusól-lë'ë ládjagaquië' bótsugayu guixi yu,  
böa' gula'guídxiba' légaquië'.  
Gusól-lë'ë ca' riu bulu'sunítiba' le nequi queégaquië'.  
46 Budödë' le naz nuzóagaquië' lu ruá'agacaba' böchí'  
zu,  
ate' guláguba' böchí' zu na' le rö'ö yugu' la' yëla qué-  
gaquië'.  
47 Busunítië' yugu' lubá uva queégaquië' len nisa guió'j  
yöla sunna na',  
en busunítië' yugu' yaga higo queégaquië' len bögui'.  
48 Bëtië'-ba' böa'-bëdxi queégaquië' len nisa guió'j yöla  
sunna na',  
en lu yösa gula'yëpi.  
49 Lu yöl-la' rilé queë' gusól-lë'ë queégaquië' yugu' lë ni,  
en lu yöl-la' ridzá'a queë' busaca' zí'ë légaquië',  
en gusól-lë'ë queégaquië' gubáz que yehua' yubá para  
bulu'sunítië' légaquië'.  
50 Bití' bubequi lahuë' queégaquië' para cabirö lenë' lé-  
gaquië',  
en bití' buniti lahuë' légaquië' para cabí ilátië'.  
Budödë' légaquië' lu yöl-la' guti,  
51 en bëtië' yúgu'tëbí' bí'i bönní' lo queégaquië' bönní'  
Egipto,  
yugu' bí'i bönní' lo queégaquië' xí'ini xí'sóë' Ham.  
52 Guché'ë bönachi queë' ca yugu' bö'cu' xí'la'do',

en bulu'ínë' légaquië' nöza la' guixí' ga dë lataj.  
53 Guché'ë légaquië' lu në'ë para cabí bi iládxinë',  
pero gubaga' nísado' nupa bití' bila'lé'e légaquië' dx-  
í'a.  
54 Ca' guca, guché'ë légaquië' ga zoa luyú lá'ayi queë',  
luyú ni bidéli'në' uláz queégaquië' len yöl-la' huáca  
queë'.  
55 Buláguí'ë bönachi izá'a luyú ni lógaca bönachi  
queë',  
en burixë' que queégaquië' xiyúgaquië' ga ila'cu'ë,  
en benë' ga gula'cu'ë bönachi Israel yugu' lu yu'u guí-  
dido'.  
56 Le yúbölö gula'zí' bë'ë Lë', en gula'dá'baguë'ë Dios  
nayépisëtërë',  
en bití' gulunë' yugu' le gunná bé'enë' légaquië'.  
57 Bulu'huó'a ládxi'gaquië', en bulu'cá'anë' Lë' ca gu-  
lunë' xuz xtó'gaquië'.  
Gula'dödë' tsölá'alö ca run tu yaga lahui tuchi' bití' ná-  
catë li.  
58 Gulún lenë' Lë' tu' gulunë' xilátjagaca budó' guió'j  
budó' yaga yugu' lu guí'a,  
en gulunë' ga budú'lí'në' légaquië' ní'a quégaca budó'  
na'.  
59 Cate' bilé'enë' lë ni Dios, guléde'enë',  
en bud'ínë' bönachi Israel.  
60 Ní'rö bucá'anë' xilatjë' lu yödzö Siló,  
ga na' guzóa yu'u lá'ayi queë' ládjagaquië' bönní' ní'.  
61 Bë'ë lataj gula'ché'ë bönní' zí'tu' guí'ina lá'ayi queë',  
guí'ina na' bulu'í' lahui yöl-la' zxön queë'.  
62 Budödë' bönachi queë' lu ná'agaca nupa bétigaca  
léguequi,  
63 en gúquinë' zí' nupa nácagaca quez queë'.  
Buzegui tu guí' zxön yugu' bí'i bönní' queégaquië',  
ate' cuntu nu bugá'ana nu ulu'tsaga na'lenbí' yugu' bí'i  
nigula ra'bando'.  
64 Yugu' bixúz queégaquië' gulátië' lu guí'e tuchi',  
ate' bití' guca ila'bödxinu nigula uzëbi queégaquië'.  
65 Ní'rö gúquië' Xanru' ca tu bönní' rubanë' lu yöl-la'  
rasi.  
Gúquië' ca bönní' rejë' gudil-la gudödi bë'ë gu'ë xisi  
lubá uva nál-la.  
66 Buláguí'ë yugu' bönní' gula'díl-lalenë' bönachi  
queë',  
en tsárido'os burixë' légaquië'.  
67 Lësca' budödë' tsölá'alö yugu' xí'ini xí'sóë' José,  
en bití' guróë' yugu' xí'ini xí'sóë' Efraín.  
68 Guróë' yugu' xí'ini xí'sóë' Judá,  
en yödzö Sión le nadxí'i quézinë' Lë'.  
69 Ní' benë' tu lataj lá'ayi queë' le naca ca tu guí'a zxön,  
le zoa tsutsu ca yödzólió ni nuzóë' tsaz.  
70 Guróë' ca' David, huen dxin queë',  
en bubéajë' lë' ga na' zoë' ruyúë'-ba' yugu' bö'cu' xí'la'-  
do'.  
71 Bubéajë' lë' ga na' rapa chí'ë-ba' yugu' bö'cu' xí'la'  
guná',  
nacuá'aba' böa' hué'ënido' quégacaba',  
para gáquië' nu uyú bönachi queë', yugu' xí'ini xí'sóë'  
Jacob,

en bönachi Israel, nupa na' nácagaca quez queé'.  
 72 Ca' guca, idú ládxé'è buyúé' David bönachi na',  
 en lu yöl-la' rácada' queé' guché'è légaquié' lu në'è.

**79** Dios, nacuá' bönachi izá'a lu xiyúgaca bönachi quiu'.

Nucá'anagaca cá'asö yudo' lá'ayi quiu',  
 en nusunítigaca yödzö Jerusalén.

2 Bulu'cá'ané' bönachi quiu' nátigaca luyú para  
 iláguba' bíchulab léguequi,  
 en bëla' rön quégaca huen xichinu' ga iláguba' böa'  
 guixi' le.

3 Bulu'laljé' xichóngaca bönachi quiu' ca nisa idútè lu  
 yödzö Jerusalén,  
 ate' cuntú nu bugá'ana nu ucaché' léguequi.

4 Bönachi yugu' dzaga luyú queétu' tu'titaj netu'.  
 Tu'zixdxé', en tu'didza' yudxi netu'.

5 ¿Naru' tsaz ilenu' netu', Xan?

¿Naru' sóatica'sö yöl-la' rilé quiu' ca tu guí' ruzegui ne-  
 tu'?

6 Gulégaca bönachi yugu' yödzö zítu' bití' tun Lí' bal,  
 enca' bönachi bití' tu'lidza Lí'.

7 Bétigaca bönachi quiu' nácagaca xzí'ini xi'sóè' Jacob,  
 en nusunítigaca xiyutu' ga zoa cazu' Lí'.

8 Bití' gunu' netu' xiguia' tu' nözi dul-la' guluné' xuz  
 xtó'otu'.

Buéchi' ladxí' netu' na'a, tu' rudú ládxi'tu'.

9 Gúcalen netu', Dios, Nu rusólá netu', para guntu' bal  
 Lo'.

Busólá netu', en buniti lo netu' ca naca dul-la' nabá-  
 ga'tu' para idxí'tu' Lo'.

10 ¿Bizx que ta'nabi bönachi yugu' yödzö izá'a netu',  
 ta'nná: "Gázxité zoa Dios queé'li'?"

Bé' lataj ilé'etu', en ben ga gaca bë' lógaca yúgu'tè bö-  
 nachi

rizí' lo' nupa tu'lalaj xichóngaca huen xichinu'.

11 Buzé' nugu' ca ta'nné ládxi'gaca nupa nadzúngaca.  
 Len yöl-la' huáca zxön quiu' busólá nupa na' narugu  
 quéguequi ilátigaca,

12 en bubí' quégaca bönachi yugu' dzaga yödzö queé-  
 tu'

ia'gadxi cöl'lo ca' tsca naca didza' zí' gula'nné quiu' Lí',  
 Xan.

13 Netu', bönachi quiu', enca' bö'cu' zxila' ruyú cazu' Lí',  
 guiética'stu' Lí': "Xclenu",  
 en cú'utica'stu' Lí' yöl-la' ba na'a dza, en dza sí' zaca.

**80** Ruzé' nugu' netu', Dios, Nu rapa chí' bönachi Is-  
 rael.

Nacu' Nu ruyú yugu' xzí'ini xi'sóè' José ca nu ruyú  
 yugu' bö'cu' zxila'.

Buzení' queétu', Lí' na' rö'u rinná bë'u ga nacua'  
 nupa nál-lágacatèrö quiu' lé'gaca querubín.

2 Buluí'i yöl-la' huáca quiu' lógaca xzí'ini xi'sóagaquié'  
 Efraín, en Benjamín, en Manasés.

Gudá queétu', en busólá netu'.

3 Ben ga huécjatu' quiu' Lí', Dios.

Buluí'i netu' nadxí'inu' netu', ate' ulatu'.

4 Xantu' Dios quéguequi ní'a no'o guizxi yu,

¿gáca'xte caz ilenu' netu', en bití' yönnu' le rulidztu'  
 Lí'?

5 Rugagu' netu' nisa ribödxí queétu',  
 en ruguí'ju' netu' sizxöni nisa ribödxí.

6 Nunu' ga bönachi dzaga yödzö queétu' tu'zixdxí  
 queétu',

ate' nupa bití' ta'lé'e netu' dxí'a tu'titaj netu'.

7 Ben ga huécjatu' quiu' Lí', Dios quégaca ní'a no'o  
 guizxi yu.

Buluí'i netu' nadxí'inu' netu', ate' ulatu'.

8 Guléaju' tu lubá uva le nácatu' netu' luyú Egipto.  
 Bulagu' bönachi izá'a yugu' lu yödzö luyú ni, en  
 budó'o lubá na' ni.

9 Buchí'u lataj ga guzxon lubá na'.

Benu' ga ben luí' ga rë', ate' bulí idútè luyú ni.

10 Gulú'u xzul-la lubá na' yúgu'tè lu guí'ado',  
 ate' ní'a në'e gula'baga' yugu' guí'a zxön.

11 Gula'tunna ní'a në'e ga bidxintè ra' nísado',  
 enca' ga bidxintè ra' yegu Eufrates.

12 ¿Bizx que buquínajú' yugu' lè'aj gulún chí'i lubá  
 na',

en ru'u lataj nupa ta'dódísö ta'bán le ribía lubá uva  
 na'?

13 Tu'líbigacaba' cuchi guixi' le,  
 ate' táguba' böa' guixi' le.

14 Buécja queétu', Dios quégaca ní'a no'o guizxi yu.  
 Ga ní' zu' yehua' yubá buyú ca raca que lubá quiu', en  
 busólá netu'.

15 Gudá dusóló' lubá ni budá' cazu',  
 le naca ca tu lubá hué'èni buxon cazu' Lí'.

16 Nupa bití' ta'lé'e netu' dxí'a gula'chugu ní'a në'e lubá  
 na', en bulu'quela' le guí'.

Buyú ca tun, en lu yöl-la' rilé quiu' busuniti léguequi.

17 Gúcalen bönni' na' guró' cazu' quiu',  
 netu', bönachi na' nuzó'a cazu' tsaz quiu'.

18 Caní' gaca, bí'tí'rö ucá'anatu' Lí'.

Bunna queétu' yöl-la' na'bán, ate' uzxöni ládxi'tu' Lo'.

19 Ben ga huécjatu' quiu' Lí', Dios quégaca ní'a no'o  
 guizxi yu.

Buluí'i netu' nadxí'inu' netu', ate' ulatu'.

**81** Lu yöl-la' rudzeja queé'li' guli'gul-la queé' Dios.  
 Lè' náquié' yöl-la' nál-la queé'li'.

Lu yöl-la' rudzeja queé'li' guli'cödxí'a lahué' Dios queé'  
 Jacob.

2 Guli'gul-la tu le gúl-lali', cápa'li' lè'e guídido'.  
 Guli'quinnaj lé'egaca bihuél-la.

3 Guli'cödxí luzu chivo cate' zoa beo' hué'èni,  
 en cate' zoa beo' nál-la, en cate' raca laní.

4 Lè ni naca tu xibá quégaca bönachi Israel,  
 le naca tu le gunná bé'ené' Xanru' Dios xzí'ini xi'sóè'  
 Jacob.

5 Gudixjé' le para gaca tu le gun ba nalí queé' lógaca  
 xzí'ini xi'sóè' José,

le gudixjé' cate' gudödè' luyú Egipto,  
 ga ní' biyönda' didza' izá'a bití' guyéajni'ida'.

6 Rnné' Dios: "Gudúa' yua' zxo'a ya'zxicjagaquié',  
 en bucuita' le nuá'gaquié' le bulu'subaga' légaquié'  
 nupa bití' bila'lé'e légaquié' dxí'a.

<sup>7</sup> Bulídzali' neda' cate' bi guca queé'li', ate' busólá' libí'ili'.

Bubí'a didza' cate' bi gunábili' neda', ni' nucachi' cuina' tu lu böaj gasaj.

Guzxí' bë'a libí'ili' ga zoa nisa na' lë Meriba.

<sup>8</sup> Bulí'zé nágali', libí'ili', bönachi quia', ate' uxösa' libí'ili'.

Raca ládxa'a uzé nágali' neda', bönachi Israel.

<sup>9</sup> Biti' ral-la' soa tu dios izá'a ga na' zóali',

en bití' gunlí' zxön tu dios quégaca bönachi zítu'.

<sup>10</sup> Neda', Xanli', naca' Dios queé'li'.

Guléaja' libí'ili' luyú Egipto.

Gulí'salaj ruá'ali', ate' cu'a ruá'ali' le gáguli'.

<sup>11</sup> Biti' bulu'zé nágagaca bönachi quia' chí'a.

Biti' gulún bönachi Israel ca rna xtídza'a.

<sup>12</sup> Que lë ni na' busán ládxa'a léguequi

para gulún ca sa'yéaj yöl-la' ridá'baga' quéguequi,

en para gulún ca gula'za'sö ládxi'gaca.

<sup>13</sup> Guzá' ládxa'a ulu'zé nágagaca bönachi quia' xtídza-'a,

para ilún bönachi Israel ca ré'ënda' neda'.

<sup>14</sup> La'tu' ilún caní, uxicja caza' nupa bití' ta'lé'e léguequi dxí'a,

en tíl-lalena' nupa ta'díl-lalen léguequi.

<sup>15</sup> Ulu'luí'í cuínguequi nupa bití' ta'lé'e neda' dxí'a,

ca nupa tun ca rna xtídza'a,

pero tsaz guna' léguequi xiguia'.

<sup>16</sup> Lësca' ugahua' libí'ili', bönachi quia', zxo'a' xtila dxí'ado',

en guna' ga huölaj idzé'eli' le zxixi que buz, le irúaj lë'e guiój."

**82** Zuiné' Dios ladaj nupa tu'dubi queë' ni' yehua' yubá.

Ruchi'a rusöróë' nupa ta'nná bë'.

<sup>2</sup> Rnnë: "¿Gáca'xte caz uchí'a usöróli' quégaca bönachi lu yöl-la' bití' naca tsahui' queé'li'?"

Caní naca tu' rubéajli' tsahui' nupa tuá' dö'.

<sup>3</sup> Bulí'béaj tsahui' nupa ta'cuidí', en yugu' bí'i uzëbi.

Gulí'gún le naca tsahui' quégaca nupa ta'guí'í ta'zaca',

en quégaca nupa ta'yadzaj ta'yudxi.

<sup>4</sup> Bulí'sölá nupa ta'cuidí', en nupa nácagaca yechí'.

Bulí'sölá léguequi lu ná'agaca nupa tuá' dö'.

<sup>5</sup> Biti' nóziguequi, en bití' ta'yéajni'í.

Ta'dá ga chul-la.

Rizxizi xilibi yödzülió."

<sup>6</sup> Rna caza' neda': "Nácali' ca yugu' dios.

Nácali' yúgu'tëli' xzí'inë' Dios nayépisëtëre',

<sup>7</sup> pero gátillí' ca tati bönachi,

en ibíxili' lu gudil-la ca ta'bixi xzí'inë' bönni' lo."

<sup>8</sup> Guyasa, Dios, en buchi'a busöró quégaca bönachi yödzülió ni,

tu' nácagaca queë' cazu' yúgu'të yödzü bönachi.

**83** Biti' ugá'anú' dxisö, Dios.

Biti' su' dxisö, Dios, en bití' usayaj ru'u,

<sup>2</sup> tu' tu'tsatsa nupa ta'dá'baga' Li',

ate' nupa bití' ta'lé'e Li' dxí'a tun ba zxön cuínguequi.

<sup>3</sup> Tun tuz xtídza'guequi bi ilún quégaca bönachi queë' cazu',

en tu'pá yugu' le ilún quégaca nupa nadxí'i quézinu', ta'nná:

<sup>4</sup> "Gulí'dá, usunítiru' léguequi para cabirö ilaca tu yödzü bönachi,

en para cúnturö nu tsöjné bönachi Israel."

<sup>5</sup> Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

<sup>6</sup> Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

<sup>7</sup> en yugu' bönni' Gebal, en yugu' bönni' Amón, en

yugu' bönni' Amalec,

en yugu' bönni' Filisteo, en yugu' bönni' Tiro,

<sup>8</sup> enca' yugu' bönni' Asiria núngaquië' légaquië'

tsözxön.

Rácalengaquië' yugu' bönni' xzí'ini xisóë' Lot.

<sup>9</sup> Ben quégaquië' ca benu' quégaca bönachi Madián,

nupa na' busunítiru' dërö,

en ca na' benu' queë' Sísara, en ca na' benu' queë'

Jabín ra' yegu Cisón,

<sup>10</sup> nupa na' busunítiru' lu yödzü Endor,

ate' gulaca ca xiqué'ëba' bëdxi luyú ni'.

<sup>11</sup> Ben quégaquië' bönni' lo quéguequi

ca benu' quégaquië' Oreb, en Zeb,

en ben quégaquië' bönni' ta'nná bé'enë' léguequi

ca benu' quégaquië' Zeba, en Zalmuna,

<sup>12</sup> nupa na' gula'nná: "Ilequi queéru'

yugu' lataj gapa na' gulequi queë' Dios."

<sup>13</sup> Dios quia', ben ga ilácagaquië' ca bëchtö yu le riché' bö',

en ca bëbu zxe café le ruá' bö' budunu'.

<sup>14</sup> Ca run tu guí' zxön, ruzegui' yugu' yaga zxön,

o ca run tu guí', ruzegui' tu guí'a zxön,

<sup>15</sup> gusí regu' léguequi tu lu bö' budunu',

en ben gadxi léguequi tu lu nisa guiójsiu' zili.

<sup>16</sup> Ben ga ulu'tuí'í

para ulu'guilaj Li', Xan.

<sup>17</sup> Ben ga ulu'tuí'í, en ila'bó' tsaz böniga.

Ben ga ulu'gá'ana cá'asö, en tsaz ila'niti,

<sup>18</sup> para iléqui'be'e nayépisëtëru' tuzu' Li' idütë yödzülió

en ulu'zóa xzíbiguequi lo', Xantu' Dios.

**84** ¡Bica' lachi gapa zoa cazu' Li', Dios!

¡Nacu' Xángaca ní'a no'o guizxi yu!

<sup>2</sup> Rizé ládxa'a soa' lu yu'u lidxu', Xana' Dios.

Lu yöl-la' rudzeja quia' idú ládxa'a rul-la' quiu' Li', Dios

ban.

<sup>3</sup> Bidzüliba' biguínni chulí' lataj ga nuzóaba' lídxiba',

en bidzüliba' xiguichi guziú' ga budxíaba' xicá'aba',

ga na' rigú'uba' biguínido' queéba',

gala' ga dë lu bucugu quiu' Li', Xángaca ní'a no'o

guizxi yu.

Nacu' Nu rinná be'e neda', en nacu' ca' Dios quia'.

<sup>4</sup> ¡Bica' ba nupa ta'yaza lu yu'u lidxu'!

¡Ta'gú'utica'sö Li' yöl-la' ba!

<sup>5</sup> ¡Bica' ba bönni' nápagaquië' yöl-la' nál-la le nequi

queë' cazu',

en ta'zé ládxi'gaquië' ila'yu'ë nöza le ridxín yödzü Sión!

<sup>6</sup> Cate' ta'dödë' lu yu bidxi tunë' ga ruhuóaca gapa

ralaj nisa beaj.

Tun ga rizi' xibé yu bidxi na' yugu' nisa guió'j ta'dxín bayón.

<sup>7</sup> Lu yöl-la' huáca quégaquié' rójáquié', en tu'zíröné' yöl-la' huáca.

Ta'dxiné' yúgu'tégaquié' lo' Li', Dios, lu yödzo Sión.

<sup>8</sup> Ruzé' nagu' le rulidza' Li', Dios, Xángaca ni'a no'o guizxi yu.

Ruzé' nagu' neda', Dios queé' Jacob.

<sup>9</sup> Buyúé' bönni' rinná bé'ené' netu', Dios.

Buyúé' bönni' na' nabó cazu'.

<sup>10</sup> Nácaró dxí'a soa' tu dza lu yu'u lidxu' ca le soa' idú chi gayuá' dza ga yúbölö.

Có'a z'álö gaca' huen dxin ga nu riyaza yu'u lidxé' Dios

ca le soa caza' tu yu'u zxön ga biti' zoa Dios.

<sup>11</sup> Náquié' Xanru' Dios ca gubidza, en le rusubín rē'u.

Xanru' caz runné' queéru' yöl-la' ruzá' ladxí' queé', en yöl-la' zxön queé'.

Biti' ugúé' nitú le naca dxí'a gapa nacua' nupa tun le naca tsahuí'.

<sup>12</sup> ¡Li', Xángaca ni'a no'o guizxi yu,

bica' ba bönni' ruzxöni ladxé'ë Li'!

**85** Buzá' ladxu'u quégaca bönachi quiu', Xantu' Dios.

Buché'u Li' xzí'ini xí'sóé' Jacob gula'dzuné'.

<sup>2</sup> Buniti lo' bönachi quiu' ca naca xiguia' gula'baga'.

Bucáchu'u yugu' dul-la' gulúngaca.

<sup>3</sup> Buzóa dxíu' yöl-la' rilé quiu'.

Bugú' yöl-la' ridzá'a quiu'.

<sup>4</sup> Buzóa netu' xilátjatu' le yúbölö, Dios, Nu rusólá netu',

en bítirö lenu' netu'.

<sup>5</sup> ¿Naru' tsaz ilenu' netu'?

¿Naru' tsaz ilenu' yugu' xzí'ini xsoatu'?

<sup>6</sup> ¿Naru' cabí usabanu' ladxí'tu' le yúbölö,

para udzeja ladxí'lentu' Li' netu', bönachi quiu'?

<sup>7</sup> Lu yöl-la' dxí'i ladxí' quiu' gúcalen netu',

en busólá netu', Xan.

<sup>8</sup> Uzé naga' didza' gu'é Xanru' Dios.

Le guié' bönachi queé' gun ga gaca dxí'a quéguequi,

nupa na' nácgaca quez queé',

pero run bayúdx biti' ulu'huóá ladxí'gaca.

<sup>9</sup> Le nácaté chizóé' usólé' nupa tun Lē' bal,

para soa yöl-la' ba queé' luyú queé'tu'.

<sup>10</sup> Dzágagaca yöl-la' dxí'i ladxí', en le naca idúté li.

Tagu zxixi luzé'eguequi nu naca tsahuí', en nu riböza dxí'a tsahuí'do'.

<sup>11</sup> Luyú caz rilén le naca idúté li,

ate' yehua' yubá rirúaj le naca tsahuí'.

<sup>12</sup> Le nácaté Xanru' unödzejé' queéru' le naca dxí'a,

ate' xiyuru' unödzej le uláparu'.

<sup>13</sup> Le naca tsahuí' rójnöru lahué' Xanru',

en gun ga soa nöza gátitēs ga ulibé'.

**86** Ruzé' nagu', Xana' Dios, en rubí'u didza',

tu' zoa nu rusaca' zí' neda', ate' riyadzaj riyúdxida'.

<sup>2</sup> Ben chí'i bö' naca caza', Dios, tu' naca' quiu' Li'.

Busólá neda', huen dxin quiu', Dios quia', tu' ruzxöni ladxá'a Li'.

<sup>3</sup> Buzá' ladxí' quia', Xan,

tu' rulidza' Li' idú dza.

<sup>4</sup> Ben ga udzeja ladxá'a neda', huen dxin quiu',

tu' rigú'a lu no'o bö' naca caza', Xan.

<sup>5</sup> Nacu' dxí'a, Xan, en chizú' uniti lo' bönachi quiu'.

Nadxí'itica'su' yúgu'té nupa tu'lidza Li'.

<sup>6</sup> Ruzé' nagu' le rulidza' Li', Xan,

en ruí'i ladxu'u gunu' yugu' le inábida' lo'.

<sup>7</sup> Cate' bi gaca quia' ulidza' Li',

tu' ubí'i cazu' didza' bi gunu' quia'.

<sup>8</sup> Cúnturö nu zoa ladjagaca dios nu naca ca nacu' Li', Xan,

en biti' zoa ia'tú nu run ca nácgaca le runu' Li'.

<sup>9</sup> Ila'dxín bönachi yúgu'té yödzo naguixju' Li', Xana'

Dios,

en ila'yéaj ladxí'gaca Li', en ilún zxön Lo'.

<sup>10</sup> Nayépisëtèrösu' Li', en tuzu' Li' runu' yugu' yöl-la' huáca zxön.

Tuzu' Li' nacu' Dios.

<sup>11</sup> Busèdi neda' ca naca le ré'enu' guna', Xan.

Guna' ca naca le naca idúté li naguixju' Li'.

Ben ga gádxida' Lo' idú ladxá'a.

<sup>12</sup> Idú ladxá'a guía' Li': "Xclenu'", Xana' Dios,

en guna' zxön Lo' yugu' iz sí' zaca.

<sup>13</sup> Nadxí'ide'enu' neda',

en chibusóló' bö' naca caza' lu lataj chul-la ga nacua' nupa chinátigaca.

<sup>14</sup> Dios quia', nupa ta'dá'baga' neda' ta'díl-lalen neda',

ate' yugu' bönni' zidzaj ladxí' té'éné' ilútié' neda',

yugu' bönni' na' biti' tuné' Li' bal.

<sup>15</sup> Nacu' Dios ruhuéchi' ladxu'u netu', Xan, en ruzá'

ladxu'u queé'tu'.

Ridzenu' para ilenu' netu', en nadxí'ide'enu' netu', en runu' ca rnna xtídzu'u.

<sup>16</sup> Buyú neda', en buzá' ladxí' quia'.

Butipa ladxá'a neda', huen dxin quiu',

en busólá neda', xzí'ininu nigula huen dxin quiu'.

<sup>17</sup> Buluí' neda' tu le gaca bē' gaca dxí'a quia',

para ila'lé'e le nupa biti' ta'lé'e neda' dxí'a.

Ulu'tuí', tu' gúcalenu' neda',

en bué tsahú'u neda', Xan.

**87** Nuzóé' Dios xilibi zö'ö que yödzo queé' lu guía' lá'ayi.

<sup>2</sup> Nadxí'iröné' Xanru' lataj ga na' tu'chí'a tu'söró' bönachi Sión

ca nadxí'iné' ia'zica'rö lataj gapa nacua' bönachi Israel.

<sup>3</sup> Zían le lachi ta'nná bönachi ca naca

yödzo na' nequi queé' Dios.

<sup>4</sup> Cate' ulidza' bönachi núnbé'gaca neda', Dios,

ulidza' bönachi nníta'gaca Egipto, en Babilonia.

Ca naca quégaca bönachi Filistea, en Tiro, en Etiopía innía' nabábagaca yödzo lá'ayi na'.

<sup>5</sup> Cate' gu'a didza' que yödzo Sión innía':

Bönachi ni, en bönachi izá'a ni nabábagaca le,

ate' neda', Dios nayépisëtèrè', uzóa' tsutsu yödzo na'.

<sup>6</sup> Cate' ulabé' Xanru' nupa nácgaca queé' inné':

“Bönni’ ni nababë’ yödzo quia.”  
 7 Ní’irö iluí’i didza’ nupa tul-la, en nupa tu’cödxí gui, ila’ná:  
 “Ruzí’itu’ xibé tuzi yödzo ni.”  
**88** Xana’ Dios, Nu rusólá neda’,  
 rulidza’ Lí’ rëla, en te dza.  
 2 Bë’ lataj idxín lo’ le rulidza’ Lí’.  
 Ruzé nagu’ le rinaba yúdxida’ Lí’.  
 3 Ruúbi ruguí’i ládxi’da’ahua’,  
 en chizóa tsöjtsázia’ lataj chul-la.  
 4 Chinábábalena’ nupa chinátigaca.  
 Naca’ ca tu bönni’ nudú dërö ládxi’ë,  
 5 en nagá’anë’ cá’asö ladaj nupa chinátigaca,  
 en ca nupa dégaca yeru ba,  
 nupa na’ bití’rö røjnenu’,  
 en nusán no’o léguequi.  
 6 Nuzú’ neda’ tu lu yeru zila,  
 ga naca chul-la, en le nácada’ zila.  
 7 Rilenu’ neda’,  
 en rusaca’ zí’u neda’ tu lu nísado’ quiu’.  
 8 Nucúasu’ yúgu’të nupa núnbë’a.  
 Nunu’ neda’ ca tu le ta’guti bönachi.  
 Nadzuna’, en bití’ gaca irúaja’.  
 9 Tu’ riguí’i rizáca’a nudú guiój lahua’.  
 Tu dza tu dza rulidza’ Lí’, Xan.  
 Richisa na’a zaca’ ga na’ zu’.  
 10 ¿Naru’ guntsó’ yugu’ yöl-la’ huáca zxön  
 para gácalenu’ nupa chinátigaca?  
 ¿Naru’ ulu’yasa nupa yú’ugaca lataj chul-la,  
 en ila’gú’u Lí’ yöl-la’ ba?  
 11 ¿Naru’ ulu’luí’i lahui yöl-la’ dxi’i ladxí’ quiu’  
 nupa nagáchi’gaca yeru ba?  
 ¿Naru’ ulu’luí’i lahui nupa yú’ugaca lataj chul-la  
 ca runu’ ca rnna xtídzú’u?  
 12 ¿Naru’ gaca bë’ le zxön runu’ ga na’ naca chul-la?  
 ¿Naru’ gaca bë’ nacu’ tsahui’ ga na’ cuntú nu bi røjné’?  
 13 Rulidza’ Lí’ neda’ para gácalenu’ neda’,  
 ate’ yugu’ zila ridxín lo’ le rinábida’ Lí’.  
 14 ¿Bizx que nusán ládxi’u neda’, Xan?  
 ¿Bizx que rucachi’ lo’ lahua’ neda’?  
 15 Riguí’i rizáca’a, en chizóa gátia’ ga gudela’ naca’ bí’i-  
 do’.  
 Réquida’ zí’ tu’ ruxösu’ neda’, en rudú ládxi’a.  
 16 Nabága’a neda’ yöl-la’ rilé quiu’,  
 ate’ chizóa usuniti neda’ le ruxösu’ neda’.  
 17 Idú dza naca quia’ ca nabaga’ neda’ nisa.  
 Nagú’ugaca neda’ lé’ajlö yugu’ nisa.  
 18 Nucúasu’ ga zoa’ nu nadxí’i neda’, enca’ luzá’a.  
 Zóalensö le naca chul-la neda’.  
**89** Gúl-latica’sa’ ca naca yöl-la’ dxi’i ladxí’ quiu’, Xan.  
 Usiyönda’ xzí’ini xsoatu’ ca runu’ ca rnna  
 xtídzú’u.  
 2 Gunnía’: “Sóatica’sö yöl-la’ dxi’i ladxí’ quiu’.  
 Tsaz naca bë’ yehua’ yubá ca runu’ ca rnna xtídzú’u.”  
 3 Rnnë’ Dios: “Naguixja’ tsaz didza’ dzaga núnléna’ nu-  
 pa nabó caza’ quia’.  
 Bena’ tsutsu xtídzá’a ca guna’ queë’ David, huen dxin  
 quia’.

4 Gunnía’: Ucuá’a tsaz xzí’ini xí’sú’.  
 Guna’ ga sóatica’sö nu inná bë’ uláz quiu’.”  
 5 Nupa nacua’ yehua’ yubá quiu’ ila’gú’u yöl-la’ ba le  
 nunu’ le tun ga rubánitu’, Xan.  
 Ga nudúbigaca nupa nácagaca quez quiu’ ila’gú’u yöl-  
 la’ ba ca runu’ ca rnna xtídzú’u.  
 6 ¿Nuzxi caz zoa ní’ yehua’ yubá naca ca nacu’ Lí’, Xan?  
 ¿Nuzxi caz zoa ladaj nupa nayépiségaca naca ca nacu’  
 Lí’, Xan?  
 7 Nupa nácagaca lá’ayi tun Lí’ bal, Dios.  
 Ral-la’ gúnroru’ Lí’ bal ca tun nupa nacua’len Lí’.  
 8 Dios, Xángaca ní’a no’o guizxi yu, ¿nuzxi caz naca ca  
 nacu’ Lí’, Xantu’ nayépisëtërou’?  
 Naca bë’ rúntica’su’ ca rnna xtídzú’u.  
 9 Rinná be’e quézinu’ le riyasa ridxía que nísado’.  
 Cate’ riyasa ridxía nísado’, ruzóa cazu’ le dxisö.  
 10 Busuniti cazu’ bönachi Egipto, ate’ gulaca ca nupa  
 chinátigaca.  
 Bësilásiu’ léguequi len no’o nál-la.  
 11 Nequi quiu’ yehua’ yubá,  
 en nequi ca’ quiu’ luyú ni, tu’ nuzóa cazu’ léguequi.  
 12 Naguixaj cazu’ le dë tsölá’a ga za’ bö’ ziaga,  
 en le dë tsölá’a ga ridödi gubidza beo’ ziaga.  
 Lu yöl-la’ rudzeja quéguequi ta’bódxí’a guí’a Tabor,  
 en guí’a Hermón cate’ ta’yöni Lo’.  
 13 ¡Nál-latëro naca no’o!  
 ¡Nápatëro no’o yöl-la’ huáca!  
 ¡Nayépisëtëro no’o ibëla!  
 14 Le naca dxi’a, en le naca tsahui’ tun tsutsu le rinná  
 bë’u.  
 Nacuá’len Lí’ yöl-la’ dxi’i ladxí’, en le naca idütë li.  
 15 Bica’ bágaca nupa ta’yöni didza’ que yöl-la’ rudzeja.  
 Ta’dá lu bení’ que lo’, Xantu’ Dios.  
 16 Idú dza tu’dzeja tu’ zóalen Lo’ léguequi,  
 en tu’ zóalen léguequi le naca tsahui’ quiu’, le  
 nayépisëtëro.  
 17 Naca cazu’ Lí’ yöl-la’ zxön que yöl-la’ huáca quégue-  
 qui,  
 en tu’ ruzá’ ládxi’u queëtu’ nazxönda’ yöl-la’ nál-la  
 queëtu’.  
 18 Nequi queë’ Xanru’ le run chí’i rë’u,  
 ate’ néquinë’ queë’ Dios bönni’ rinná bé’enë’ rë’u.  
 Dios na’ náquië’ lá’ayi ladaj bönachi Israel.  
 19 Dza ní’te bé’lenu’ nupa néquiguequi quiu’ didza’  
 lu yugu’ le buluí’inu’ léguequi,  
 gunnó’: “Gúcalena’ tu nu nayépisëtëro.  
 Nuchisa’ tu nu guró caza’ quia’ ladaj bönachi.  
 20 Budzólida’-në’ David, huen dxin quia’.  
 Gulu’a-në’ le za le naca lá’ayi quia’.  
 21 Len na’ caza’ naguixja’ lë’,  
 ate’ len na’a ca’ utipa’ ládxi’ë.  
 22 Bití’ sí’ ye’e lë’ nu rilé lë’,  
 en bití’ usaca’ zí’ lë’ nu ruá’ dö’.  
 23 Uquínnaja’ lahuë’ nupa ta’díl-lalen lë’,  
 en gu’a nupa bití’ ta’lé’e lë’ dxi’a.  
 24 Sóalena’ lë’ lu yöl-la’ run ca rnna xtídzá’a,  
 en lu yöl-la’ dxi’i ladxí’ quia’,  
 ate’ tu’ ulidzë’ La’, uxöna’ yöl-la’ nál-la queë’.

25 Guna' ga inná bē'ē ga naguela' ra' nísado',  
ga idxintē ra' yegu Eufrates.  
26 Ulidzē' neda', inné': Lī' nacu' Xuza', en Dios quia',  
enca' Nu run chí'i neda', en Nu rusólá neda'.  
27 Gun caza' neda' ga gáquiē' ca bí'i lo queē' caza',  
ate' tsépisētērē' ca yugu' bōnni' ta'nná bē'ē yōdzōlió.  
28 Lu yōl-la' dxi'i ladxí' quia' gun chí'ítica'sa' lē',  
en uzóa' tsaz queē' didza' dzaga quia'.  
29 Ucu'á tsaz xzí'ini xí'sóē',  
ate' sóatica'só lataj ga inná bē'ē, tsca soa yehua' yubá.  
30 Channō ulu'cá'anē' xzí'ini xí'sóē' xibá quia',  
en cabí ilunē' ca naca le buchí'a busöröa',  
31 en channō ila'guitsjē' xibá que le gunná bē'a,  
en cabí ilunē' ca nácgaca le gunná bé'eda' légaquiē',  
32 ní'irö guna' légaquiē' xiguia' ca sa'yéaj le ta'dödi bē'  
tunē',  
en gu'a léguequi ca naca xiguia' nabága'gaquiē'.  
33 Pero bití' ugúa' queē' yōl-la' dxi'i ladxí' quia',  
en bití' usana' guna' ca rna le guzxi' lu na'a guna'.  
34 Bití' ucá'ana' cá'asö didza' dzaga nuna',  
en bití' utsá'a didza' bē'a.  
35 Tu le nuzóa' tsutsu, en nuna' ba nalí que le naca  
lá'ayi quia'.  
Bití' ca' sí' yé'eda' David.  
36 Gunní'a ila'cuá'tica'sé' xzí'ini xí'sóē',  
en ga rō'ē rinná bē'ē sóatica'sö lahua' ca gubidza.  
37 Naguixja' le tsaz ca nuzóa' tsaz beo',  
ate' nacuá'tica'sö lúxiba le tun ba nalí."  
38 Pero nuzú' tsölá'alö, en nusán ladxu'u,  
en riléde'enu' nupa na' guró cazu' quiu'.  
39 Nuzú' tsölá'alö didza' dzaga bēnlenu' huen dxin  
quiu'.  
Nuzötju' luyú yōl-la' unná bē' queē'.  
40 Nuquínnaju' zö'ö gulún chí'i lē',  
en nusunítu' yugu' lataj tsutsu queē'.  
41 Yúgu'tē nupa ta'dódisö ta'bán le nequi queē',  
ate' bōnni' dzaga yu'u queē' tu'cá'ana lē' cá'asö.  
42 Nuchisu' nupa ta'dá'baga' lē',  
en runu' ga tu'dzeja nupa bití' ta'lé'e lē' dxi'a.  
43 Runu' ga bití' sequí' idélí'nē' lu gudil-la,  
ate' cuntu nu sequí' ucul-lē' lu gudil-la na'.  
44 Bugú' yōl-la' lachi queē',  
en nuzötju' yōl-la' unná bē' queē' lu yu.  
45 Benu' ga chinagulé' sal-la' ni zoē' iz cuidí',  
en nunu' ga rutu'ínē'.  
46 ¿Gáca'xte caz gunu' caní, Xan?  
¿Naru' tsaz nucachí' lo?  
¿Naru' gácatíca'sö yōl-la' rilé quiu' ca tu guí' réguide'e?  
47 Yöjné nabábasö iz soa' ibana',  
en tu chí'isö nacuá' bōnachi yōdzōlió ni.  
48 ¿Nuzxi caz bōnni' gaca sóatica'sé' ibanē', en cabí  
gatié'?  
¿Naru' huáca usólá cuin cazē' lu yōl-la' unná bē' que  
lataj chul-la?  
49 ¿Gázxité zoa yōl-la' dxi'i ladxí' quiu' guzóa zí'alö,  
Xan,  
lē na' buzú' tsutsu xtídzu'u gunu' queē' David,  
len yōl-la' run ca rna xtídzu'u?

50 Yöjné ca tu'cá'ana cá'asö netu', huen dxin quiu',  
Xan,  
enca' ca tu'cá'ana neda' cá'asö bōnachi zían yōdzö  
izá'a.  
51 Tu'cá'ana neda' cá'asö nupa bití' ta'lé'e Lī' dxi'a, Xan.  
Tu'cá'ana cá'asö yugu' le runa' neda', bōnni' guró cazu'  
quiu'.  
52 ¡Yōl-la' ba Xanru' Dios iz sí' zaca!  
¡Ca' gaca! ¡Ön, ca' gaca!  
Naca cazu' Lī', Xan, ca yu'u lidxa'.  
90 2 Zí'atēlō ca gulata' yugu' gu'a, o ca guta'  
yōdzōlió,  
ga naguela' cate' gusí lo ga idxintē dza udxi, tsaz naca  
cazu' Dios.  
3 Runu' ga tu'huóaca bōnachi bēchtö yu cate' rnno':  
"Gulí'huóaca le néquinilí', bōnachi."  
4 Quiu' Lī' chi gayuá' iz nácgaca  
ca dza neje le chigudödi que,  
o ca tu chí'isö chí'i dzó'ölö.  
5 Bugacu' bōnachi ca tu lu yegu gubó'o, ate' gúcgaca  
ca tu yēla rineru'.  
Cate' naca zila zéaj naca ca tu guíxi'do' rilentē luyú.  
6 Cate' naca lahui' dza rizxón, en rō' ní'a nē'e,  
pero cate' chiral-la, ricuadi', en ridödi que.  
7 Rinítitu' tu' rilenu' netu',  
ate' tu' ridzó'o ruúbi ruguí'tu'.  
8 Nuzú' lo' xiguia' nabága'tu',  
en nubéaju' lu bení' quiu' dul-la' yu'u ladxí'do'otu'.  
9 Tu' riléde'enu' netu' ridödi quégaca dza queétu',  
ate' chibú'u iz queétu' ca tu le rinné ladxí'tu'.  
10 Tsónnalalaj yu' chí' ízisö zóatu' nabantu',  
o channö nál-latu', huazóatu' idú tápalalaj iz,  
pero runtu' dxin bayudxi, en ruhuí'initu' yugu' iz na',  
tu' ridóditē quéguequi iz na', ate' uzá'atu'.  
11 ¿Nuzxi caz réajni'i tsca naca yōl-la' rilé quiu'?  
¿Nuzxi caz nözi ca naca tsöbi yu'u nu na' rilenu'?  
12 Que lē ni na' busēdi netu' para guéquibe'etu' tsca  
gácagaca iz zóatu',  
para gácatu' bōnachi ta'yéajni'i lo' Lī'.  
13 ¿Gáca'xte caz bití' huéchi' ladxu'u netu', Xan?  
Buéchi' ladxí' netu', yugu' huen dxin quiu'.  
14 Tu zila tu zila buluí'i netu' ca naca yōl-la' dxi'i ladxí'  
quiu',  
para gúl-latu' lu yōl-la' rudzeja queétu', en uzí'tu' xibé  
yugu' dza na'.  
15 Ben ga udzējatu' tsca chigulaca dza busaca' zí'u ne-  
tu',  
en tsca gulaca iz bití' guca dxi'a queétu'.  
16 Buluí'i netu', yugu' huen dxin quiu', ca naca le  
nunu',  
en buluí'i xzí'initu' ca naca yōl-la' zxön quiu'.  
17 ¡Buzá' ladxí' queétu', Xantu' Dios,  
en ben ga irúaj dxi'a dxin runtu'!  
¡Ön, ben ga gaca dxi'a lo' dxin runtu'!  
91 Nu bōnni' ruzxöni ladxé'ē Dios para gun chí'ē lē',  
en rizi'ē Dios Nu napa idútē yōl-la' huáca, para  
gácalenē' lē',

<sup>2</sup> gaca guië' Xanru: "Nacu' Nu run chi'i neda', en Nu ruzóa neda' tsutsu.

Nacu' Dios quia', ate' ruzxöni ládxa'a Li'."

<sup>3</sup> Usölä cazë' Dios Li' lu du yalaj que nu rizón bönachi, en lu yödzhüé' le rusuniti.

<sup>4</sup> Usubáguë'ë li' ca rusubága'ba' böra yugu' bórado' queéba',  
ate' gaca chi'u lu në'ë ca raca quégacaba' bórado' zx-an xílaba' yójede.

Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.

<sup>5</sup> Biti' gádxinu' le run gadxi bönachi chi'i dzó'ölö, en bití' gádxinu' yaga lahui tuchi' tu'sé bönachi lahui' dza,

<sup>6</sup> en bití' gádxinu' yödzhüé' le rilén ga naca chul-la, en bití' gádxinu' le naca xihui' le ruti bönachi lahui' dza.

<sup>7</sup> Ilátigaca chi gayuá' bönachi cuitu' li', en ia'chí cö' chi gayuá' cuitu' ibëla, pero bití' bi gaca quiu' li'.

<sup>8</sup> Le nácatë uyú iná'asu', en ilé'enu' le rubí'i quégaca nupa tuá' dö'.

<sup>9</sup> Tu' nuzú'-në' Xanru' Nu run chi'i li', nuzú'-në' Dios nayépisëtëre' Nu gácalen li',

<sup>10</sup> bití' bi gaca quiu' le cabí naca dxi'a, en nitú le naché' yödzhüé' bití' tsu'u lidxu',

<sup>11</sup> tu' cu'u cazë' Dios lí' lu ná'agaquië' gubáz lá'ayi queë',

para ilún chi'ë li' gátítës ga ridó'.

<sup>12</sup> Lu ná'agaquië' ilá'ché'ë li', para cabí tsöjchégu'u guió'j.

<sup>13</sup> Uléaj ulibu' bédxi guixi', en bëla sínia'.

Usunu' lë'e labu' bédxi guíxi'do', en bëla xitsiní'.

<sup>14</sup> Rnnë' Dios: "Nadxi'inë' neda', ate' que lë ni na' usölä' lë'.

Uzóa'-në' tsaz xitsá'tërö tu' núnbë'ë La'.

<sup>15</sup> Ulidzë' neda', ate' ubí'a didza'.

Sóalena' lë' cate' bi gaca queë'.

Usölä' lë', en guna' lë' bal.

<sup>16</sup> Uzánda'a dza soë' ibanë', en ulu'ída'-në' ca gaca usölä' lë'."

**92** ¡Bica' tsahui' naca rigú'utu' Li' yöl-la' ba, Xan, en rúl-latu' le tun Li' bal, Dios nayépisëtëre',

<sup>2</sup> en rusiyöntu' bönachi yugu' zila ca ruhuéchi' ládxi'u' netu',

en rulu'íitu' lahui yugu' dzö' ca runu' ca rnna xtídzu'u!

<sup>3</sup> Rúl-latu' len yugu' bihuël-la, en rúl-latu' yugu' le lachi ca tul-la.

<sup>4</sup> Le zxön nunu' Li', Xan, run ga rudzëjatu', ate' ruzi'tu' xibé le núngaca lu no'ó.

<sup>5</sup> Bica' zxön ná'agaca le nunu' Li', Xan. Zxöntëre' le rizá' ládxi'u' gunu'.

<sup>6</sup> Zoa tu le cabí gaca inózinë' bönni' nazxi' icjë', en bití' gaca tséjni'inë' bönni' canóz le.

<sup>7</sup> Nupa nucá'anagaca Dios ila'yán ca ta'yán guíxi'do', en ulu'z'í xibé le tun nupa tuá' dö', pero ila'niti tsaz,

<sup>8</sup> tu' nayépsëtëru' Li' tsaz, Xan.

<sup>9</sup> Naca bë' le gaca quégaca nupa bití' ta'lé'e Li' dxi'a, Xan.

Naca bë' ila'niti nupa bití' ta'lé'e Li' dxi'a.

Ulu'gá'ana cá'asö yúgu'të nupa tuá' dö'.

<sup>10</sup> Nunu' ga nácatëra' nal-la ca ná'caba' bédxi.

Nagú'u neda' le za le run ga rudzëjada'.

<sup>11</sup> Ilé'e quézida' cate' uxicju' nupa bití' ta'lé'e Li' dxi'a, en yönda' cate' ila'bödxi yechi' nupa tuá' dö', nupa na' ta'díl-lalen neda'.

<sup>12</sup> Ila'yán nupa ná'agaca tsahui' ca ta'yán yaga zina' ca'.

Ila'zxón ca ta'zxón yaga ró'gaca lu guí'a Líbano.

<sup>13</sup> Ná'agaca ca yaga nudá'gacu' ra' yu'u lidxu', Xan, le ta'zxón lu lö'a lataj quiu', Dios queëtu'.

<sup>14</sup> Cate' ní' yú'ugaca iz zían ila'bía le zxixi quéguequi. Ilá'agaca tsutsu, en ila'cuá'tica'sö ya'a.

<sup>15</sup> Caní gaca para gaca bë' ná'quië' tsahui' Xanru', Nu run chi'i neda'.

Bití' bi zóalen Lë' le cabí naca tsahui'.

**93** ¡Rinná bë'ë Xanru'!

¡Nácuë' yöl-la' ba zxön queë'!

¡Nácuë' zxë' Xanru', en núguie' lë'ë yöl-la' unná bë'!

¡Nuzóë' tsutsu yödzhüé', ate' bití' utá cuini!

<sup>2</sup> ¡Tsaz nuzú' tsutsu ga rö'u rinná bë'u, Xan, en zóatica'su' Li'!

<sup>3</sup> Riyasa ridxía nisa yugu' lu nísado', Xan.

Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu yegu.

<sup>4</sup> Xanru' Dios yehua' yubá nápatëre' yöl-la' unná bë' ca bö ru'u lu nísado' le riyón ca guziú' rinné, enca' ca le riyasa ridxía nisa lu nísado'.

<sup>5</sup> Tsaz naguixju' xibá quiu', Xan,

ate' idú lá'ayi naca ga zoa cazu' Li'.

Caní zóatica'sö na'a dza, en dza si' zaca.

**94** Nacu' Dios, Xan, Nu ruzí' lëbi bönachi.

Bulu'í' cuinu', Dios, Nu ruzí' lëbi.

<sup>2</sup> Ruchi'a rusöró cazu' yúgu'të bönachi.

Guzé, ate' len yöl-la' huáca zxön quiu' bubí'i quégaca nupa tun ba zxön cuínguequi.

<sup>3</sup> ¿Gáca'xte caz ulu'z'í' xibé nupa tu'cá'ana Li', Xan?

¿Gáca'xte caz ulu'z'í' xibé?

<sup>4</sup> ¿Gáca'xte caz ilún ba zxön cuínguequi, en ilu'í' didza' zí'?

¿Gáca'xte caz ilún ba zxön cuínguequi ní'a que dö' tuá'gaca?

<sup>5</sup> Tu'sunítië' nupa néquiguequi quiu', Xan.

Tu'saca' zí'ë nupa néquiguequi quez quiu'.

<sup>6</sup> Tútigaquië' nigula uzëbi, enca' yugu' bí'i uzëbido', en tunë' le naca xihui' ladaj bönachi zí'tu'.

<sup>7</sup> Ta'nné': "Bití' ilé'enë' Xángaquië' rë'u, en bití' ru'í' ládxi'ë Dios queë' Jacob lë ni."

<sup>8</sup> Gulí'tséajni'i, bönachi bití' nózguequi, ate' libí'ili', bönachi catún bal, ¿bátaxi tséajni'ili'?

<sup>9</sup> Benë' Dios guídi nágaru'. ¿Naru' cabí riyón quézinë'?

Benë' Dios guió'j loru'. ¿Naru' cabí rilé'e quézinë'?

<sup>10</sup> Ruzéajni'i quézinë' Dios bönachi yúgu'të yödzhö.

¿Naru' cabí gunë' léguequi xiguaia'?

Ruchiza cazë' icja ládxi'do'oru' yöl-la' réajni'i.



¿Naru' cabí réquibe'ené' bi runlí'?

<sup>11</sup> Nöz quéziné' Xanru' yugu' le ta'zá' ládxi'gaca bönachi.

Nóziné' canóz naca le ta'zá' ládxi'gaca.

<sup>12</sup> Bica' ba bönni' na' ruzéajni'i quézinu'-né', Xan, en rusedi quézinu'-né' ca naca xibá naguixju' Lí.

<sup>13</sup> Gunu' ga uzí' ládxi'gaca cate' bi gaca queé', ga idxinrö dza tsú'ugaca yeru ba nupa tuá' dö'.

<sup>14</sup> Biti' usán né'è Xanru' bönachi queé', en bití' ucá'ané' nupa néquiquequi quez queé'.

<sup>15</sup> Ca naca le naca tsahui' uchi'a usöröé' rë'u le yúbölö, ate' ulu'zí' xibé nupa nácagaca tsahui'.

<sup>16</sup> ¿Nuzxi caz tíl-lalen nupa tuti bönachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

<sup>17</sup> La'tu' cabí gúcalené' Xanru' neda', la' yöjtsú'utea' lataj chul-la que yöl-la' guti.

<sup>18</sup> Gunnía': "Chizóa' ibixa'", ate' lu yöl-la' dxi'i ládxi' quiu' guzxönu' neda', Xan.

<sup>19</sup> Cate' ruúbi ruguí' ládxi'da'ahua', ruhué' tsahú'u neda', en runu' ga rudzējada'.

<sup>20</sup> Biti' ca' gunu' tsözxón nupa tu'chi'a tu'söró netu' ca naca le cabí naca tsahui', nupa na' tu'béaj tsahui' le cabí naca tsahui'.

<sup>21</sup> Tu'dubé' tsözxón para ilútié' nupa nácagaca tsahui', en ta'chúguié' quégaca nupa bití' bi nabága'gaca iláti-gaca,

<sup>22</sup> pero run chi'i cazé' Xanru' Dios neda'. Nuzóé' neda' tsutsu, ate' ruzxöni ládxa'a lé'.

<sup>23</sup> Ubi'è quégaquié' ca naca dö' tu'è, en usunítié' légaquié' tu' nözi xiguia' nabága'gaquié'. Usunítié' dërö Xanru' Dios légaquié'.

**95** Gulí'dá, gúl-laru' queé' Xanru' lu yöl-la' rudzeja queéru'.

Lu yöl-la' rudzeja queéru' códxi'aru' que Nu na' naca ca tu guiójtó'o ga nuláru'.

<sup>2</sup> Uyéajru' lahué', en guiéru'-né': "Xclenu'."

Lu yöl-la' rudzeja queéru' códxi'aru' lahué', gúl-laru' yugu' salmo.

<sup>3</sup> Xanru' Dios náquié' Dios nayépisétéré'. Nápatéré' yöl-la' unná bé' ca yúgu'té dios izá'a.

<sup>4</sup> Lu na' cazé' yu'u le dë ga rë' zcan luyú, ate' néquiquequi ca' queé' guí'a sibi.

<sup>5</sup> Nequi queé' nísado', tu' nun cazé' le, en len ná'asé' bené' luyú bidxi.

<sup>6</sup> Gulí'dá, gunru'-né' zxon, en uzóa zxíbiru' lahué'. Uzóa zxíbiru' lahué' Xanru' Nu ben rë'u.

<sup>7</sup> Naca cazé' Lé' Dios queéru', ate' nácaru' bönachi rugagu cazé', en ca bö'cu' xzila' riché' cazé'-ba' lu né'è.

Rnna cazé' Dios: "Na'a, channö ré'énili' yónili' chi'a,

<sup>8</sup> bití' gunlí' zidzaj icja ládxi'do'olí' ca guluné' xuz xtó'olí' lataj na' lé Meriba, en calëga ca guluné' la' guixi' ga dë lataj lé Masa,

<sup>9</sup> cate' ni' gula'zí' bé'è xuz xtó'olí' neda'.

Gula'zí' bé'è neda' sal-la' bila'lé'ené' yugu' le bena'."

<sup>10</sup> Idú choá' iz gúquida' zí' bönachi gula'cuá' dza ní',

ate' gunnía': "Ta'chixi ta'níguiné' lu icja ládxi'do'-gaquié', en bití' nózguequiné' le ré'ènda' iluné'."

<sup>11</sup> Que lé ni na' lu yöl-la' rilé quia' bena' tsutsu xtídza'a, gunnía': "Bití' ca' ila'yázié' ga ulu'zí' ládxi'è tsözxón len neda'."

**96** ¡Gulí'gul-la queé' Xanru' tu le cubi!  
¡Gulí'gul-la queé' Xanru', yúgu'téli' zóali' yödzölió!

<sup>2</sup> ¡Gulí'gul-la queé' Xanru'! ¡Gulí'gún zxon lé'!  
Tu dza tu dza bulí'siyón bönachi didza' dxi'a ca rusölé' rë'u.

<sup>3</sup> Bulí'siyón bönachi yúgu'té yödzö yöl-la' ba queé'. Bulí'siyón yúgu'té bönachi le nácagaca zxon nuné'.

<sup>4</sup> Zxöntërö náquié' Xanru', ate' runda' bayúdx cú'uru'-né' yöl-la' ba.

Ral-la' gádxitëru' Lé' ca tadxi bönachi izá'a dios quéguequi.

<sup>5</sup> Yugu' dios quégaca bönachi izá'a nácagacasö budó' guió' budó' yaga, pero Xanru' Dios nuné' lúzxiba xitsá'.

<sup>6</sup> Nacuá' yöl-la' bení', en yöl-la' ba lahué' Lé'. Nacuá' yöl-la' huáca, en yöl-la' lachi ga zoa cazé'.

<sup>7</sup> ¡Gulí'cu'è Xanru' yöl-la' ba, bönachi yúgu'té yödzö!  
¡Gulí'cu'è yöl-la' ba, en yöl-la' huáca!

<sup>8</sup> ¡Gulí'cu'è Xanru' yöl-la' ba ní'a que Lé'!  
¡Gulí'guá' le unódzjalí', en gulí'dá lahué'!

<sup>9</sup> ¡Gulí'gún Lé' zxon, náculí' le naca ba'a!  
¡Gulí'zxizi lahué', bönachi idúté yödzölió!

<sup>10</sup> Gulí'nná lógaca bönachi yúgu'té yödzö: "Rinná bé'è Xanru'.

Naguixjé' tsaz luyú, ate' bití' utá cuini.  
Ca naca le naca tsahui' uchi'a usöröé' quégaca yúgu'té bönachi."

<sup>11</sup> Ral-la' udzeja lúzxiba, en ulu'zí' xibé luyú.  
Ral-la' códxi'a nísado', en ila'bödxi yúgu'té le nacuá' lu nísado'.

<sup>12</sup> Ral-la' udzeja guixi' caz, en yúgu'té le nacuá' la' guixi'.

Lu yöl-la' rudzeja quéguequi ilúl-la yaga

<sup>13</sup> lahué' Xanru', tu' sí' ulé'.  
Guidé' duchi'a dusöröé' nupa nacuá' yödzölió.  
Ca naca le naca tsahui' uchi'a usöröé' quégaca yúgu'té bönachi,  
enca' quégaca bönachi yúgu'té yödzö para iluné' ca rnna xtídze'è.

**97** ¡Rinná bé' cazé' Xanru' Dios!  
¡Ral-la' ulu'dzeja bönachi idúté yödzölió!  
Bulí'sí' xibé', libí'ili' zóali' yúgu'té yödzö izá'a.

<sup>2</sup> Ró'gaca böaj, en le chul-la idú gásibi'iló ga na' zoé'.  
Le naca dxi'a, en le naca tsahui' tu'zóa tsutsu le rinná bé'è.

<sup>3</sup> Rinöru tu guí' zxon lahué',  
le uzegu' nupa ta'dá'baga' Lé'.

<sup>4</sup> Tu'zení' le ta'yëpi yösa yödzölió.  
Rilé'e luyú lé ni, en rizxizi.

<sup>5</sup> Tu'úna' guí'ado' ca ruún bidxina' buz lahué' Xanru'.  
Náquié' Xani idúté yödzölió.

<sup>6</sup> Lúzxiba xitsá naca bē' náquiē' tsahui',  
ate' ta'lé'e bönachi yúgu'tē yōdzō yöl-la' zxön queē'.  
<sup>7</sup> Tu'tuí' yúgu'tē nupa tun zxön budó' guió'j budó' ya-  
ga,  
nupa na' tun ba zxön cuínguequi ní'a quégaca budó'  
quéguequi na'.  
Ulu'gá'ana cá'asö yúgu'tē dios quégaca bönachi izá'a  
lahuē' Xanru'.  
<sup>8</sup> Bila'yöni bönachi Siön, en bulu'dzeja,  
enca' yugu' zxi'ini xi'sóé' Judá.  
Tu'dzéjanē' ca ruchi'a rusöróu' netu', Xan.  
<sup>9</sup> Nayépisētērö cazu' Li', Xan, ca yúgu'tē nupa nacuá'  
yōdzölió.  
Nayépisētērö cazu' Li' ca yúgu'tē dios quégaca bö-  
nachi izá'a.  
<sup>10</sup> Núlöli' nadxi'ili'-nē' Xanru', guli'guequi zi' le naca dö'.  
Run chi'i cazē' bö' nácacaca caz nupa néquiguequi  
queē'.  
Rusólé' léguequi lu ná'agaca nupa tuá' dö'.  
<sup>11</sup> Ruzení'tica'sö bení' queē' nupa nácacaca tsahui',  
ate' tu'zi' xibé' nupa nácacaca dxí'a.  
<sup>12</sup> ¡Buli'sí' xibé' Xanru' núlöli' nácali' tsahui'!  
¡Buli'subán ládxi'li' ca nunē' Dios Lá'ayi, en guli'cu'ē  
yöl-la' ba!  
**98** ¡Guli'gul-la queē' Xanru' tu le cubi,  
tu' nunē' le tun ga rubániru'!  
Len yöl-la' unná bē' zxön queē', en yöl-la' huáca lá'ayi  
queē' nadéli'nē' lu gudil-la.  
<sup>2</sup> Nunē' Xanru' ga naca bē' le nadéli'nē'.  
Nuluí'inē' bönachi yúgu'tē yōdzö náquiē' tsahui'.  
<sup>3</sup> Len yöl-la' dxí'i ladxí' queē', en yöl-la' li ladxí' queē'  
benē' ca rnna xtídzē'ē le guzxi' lu nē'ē gunē' quégaca  
bönachi Israel.  
Bila'lé'e bönachi idútē yōdzölió ca busólé' rē'u Dios  
queéru'.  
<sup>4</sup> ¡Lu yöl-la' rudzeja queé'li' guli'gul-la queē' Xanru',  
yúgu'téli' zóali' yōdzölió!  
¡Idú ládxi'li' guli'cu'ē yöl-la' ba, en guli'gul-la queē' le  
naca lá'ayi!  
<sup>5</sup> ¡Guli'gul-la queē' Xanru' yugu' salmo, en guli'quinnaj  
yugu' bihuél-la!  
¡Guli'quinnaj lé'egaca arpa, en guli'gul-la yöl-la' ba  
queē'!  
<sup>6</sup> ¡Guli'cödxí lúzugacaba' chivo, en lúzugacaba' bēdxi  
lahuē' Xanru' Dios, Nu rinná bē'!  
<sup>7</sup> ¡Buli'lidza zidzaj, nísado', en yúgu'tē le nacuá' nisa  
na!  
¡Guli'gul-la yōdzölió, en yúgu'tē nupa nacuá' ni'!  
<sup>8</sup> ¡Guli'capa' ná'ali', yugu' yegu,  
ate' lu yöl-la' rudzeja queé'li' guli'gul-la lahuē' Xanru',  
libí'ili', guí'ado',  
<sup>9</sup> tu' zē'ē duchi'a dusöróé' quégaca bönachi yōdzölió!  
Ca naca le naca tsahui' uchi'a usöróé' quéguequi,  
en ca naca le naca dxí'a tsahui' inná bē'enē' yúgu'tē  
bönachi.  
**99** ¡Rinná bē'ē Xanru' Dios! Ta'zxizi yúgu'tē bönachi.  
Rö'ē rinná bē'ē ladaj nupa nápagacatērö yöl-la'  
huáca,

légaca Querubín, ate' rizxizi luyú.  
<sup>2</sup> Nayépisētērē' Xanru' lu yōdzö Siön,  
ate' rinná bē'enē' bönachi yúgu'tē yōdzö izá'a.  
<sup>3</sup> Ral-la' ila'gú'u Lē' yöl-la' ba yúgu'tē bönachi,  
tu' caní sa'yéaj, en le run ga runru' Lē' bal.  
¡Lá'ayi náquiē' Lē'!  
<sup>4</sup> Nadxi'i quézinu' le naca tsahui', Li', Bönni' unná bē'  
nayépisē.  
Tsaz naguixju' le naca dxí'a tsáhui'do',  
en nuzú' quégaquiē' zxi'ini xi'sóé' Jacob le naca  
tsahui', en le naca idútē li.  
<sup>5</sup> ¡Guli'gún zxönē' Xanru' Dios!  
Buli'zechu zxi'bili' lahuē' Lē' ga rö'ē rinná bē'ē.  
¡Lá'ayi náquiē' Lē'!  
<sup>6</sup> Guláquiē' Moisés, en Aarón bixúz queē',  
ate' benē' Samuel tsözxön nupa gula'yéaj ládxi'gaca  
Lē'.  
Bulu'lidzē' Xanru', ate' bubí'i cazē' didza'.  
<sup>7</sup> Tu lu böaj bē'lenē' légaquiē' didza'.  
Gulunē' ca ta'nná bē' xibá queē', en yugu' le gunná  
bē'enē' légaquiē'.  
<sup>8</sup> Bubi'u didza' lógaca bönachi quiu', Xantu' Dios.  
Buluí'inu' légaquiē' nacu' Dios, en runiti lo' bönachi,  
pero rubí'u quégaquiē' ca sa'yéaj dö' tu'ē.  
<sup>9</sup> ¡Guli'gún zxönē' Xanru' Dios!  
¡Buli'zechu zxi'bili' lahué' lo gu'á lá'ayi ga zoa cazē',  
tu' náquiē' lá'ayi Xanru' Dios!  
**100** ¡Lu yöl-la' rudzeja queé'li' guli'gul-la queē' Xan-  
ru',  
libí'ili' zóali' idútē yōdzölió!  
<sup>2</sup> ¡Lu yöl-la' rudzeja queé'li' guli'cu'ē yöl-la' ba Xanru'!  
¡Guli'dá lahuē' Lē', en lu yöl-la' rudzeja queé'li' guli'gul-  
la queē'!  
<sup>3</sup> ¡Guli'tsöjné Xanru', náquiē' Dios!  
Buzá' cazē' rē'u, en calëga rácasö queéru' zóaru'.  
Nácaru' bönachi queē', en nácaru' ca bö'cu' zxila'  
queē'.  
<sup>4</sup> Guli'tsaza zaca' ra' yu'u queē', guiéli'-nē': "Xclenu'."  
Guli'tsaza gapa naca lö'a queē', cú'uli'-nē' yöl-la' ba.  
Guli'guiē': "Xclenu'", en guli'gunē' zxön.  
<sup>5</sup> ¡Náquiē' dxí'a tsahui' Xanru' Dios, ate' zóatica'sö yöl-  
la' dxí'i ladxí' queē'!  
¡Zóatica'sö yöl-la' run ca rnna xtídzē'ē queē'!  
**101** ¡Gul-la' ca runu' ca rnna xtídzü'u, en ca nacu'  
tsahui'!  
¡Gul-la' yöl-la' ba quiu' Li', Xan!  
<sup>2</sup> Gü'i ládxa'a guna' le naca idú dxí'a.  
¿Bátaxi huécju' quia' neda'?  
Lu yu'u lidxa' guna' le naca idú ladxí'.  
<sup>3</sup> Biti' gu'a lataj sóalen neda' nitú le naca xihui'.  
Biti' rilé'eda' dxí'a le tun nupa tu'cá'ana Li'.  
Biti' ca' guna' léguequi tsözxön.  
<sup>4</sup> Biti' ca' gaca' chopa ladxí'.  
Biti' ca' guna' le naca dö'.  
<sup>5</sup> Usunítia' dērö nu bönni' rinné' que luzé'ē balán-  
do'os.  
Biti' ca' guá' ilena' nu run ba zxön cuini.

<sup>6</sup> Uyúa' dxi'a tsáhui'do' nupa tun ca rnna xtídza'guequi luyú ni, para ila'cuá'len neda'.

Nu bití' bi xiguia' nabaga' huáca gun xichina'.

<sup>7</sup> Bití' ca' tsöjsóa lidxa' nu rizí' yé'.

Bití' gu'a lataj ugá'ana lahua' nu ruí' didza' le cabí naca.

<sup>8</sup> Yugu' zila usunítia' yúgu'tè nupa tuá' dö' luyú ni, para ucuíta' lu yödzö queë' Xanru' yúgu'tè nupa tuti bönachi.

**102** ¡Buzé' nagu' le rulidza' Li', Xan!

¡Bé' lataj idxín lo' le rinaba yúdxida' Li'!

<sup>2</sup> Bití' ucache' cuinu' lahua' cate' bi rusaca' zí' neda'. Buzé' nagu' neda', en gudáchi ubí'u didza' cate' rulidza' Li'.

<sup>3</sup> Yöl-la' na'bán quia' ruúlu ca dzön,

ate' régui rilá lu dxita lu bin quia' ca tu guí'.

<sup>4</sup> Rudú ládxa'a ca raca que guixi' nabitxi, en bítir'ró rizé ládxa'a bi gahua'.

<sup>5</sup> Tu' rinnéda' ládxa'a nadxítal'è'a.

<sup>6</sup> Naca' ca tuba' biguínni zóaba' luyú bidxi, o ca tuba' cuturú dxíaba' tu lu yu'u nadachi.

<sup>7</sup> Nabéaj yéla guió'j lahua',

ate' naca' ca tuba' biguínnido' dxíaba' túziba' ícjo'o yu'u.

<sup>8</sup> Yugu' dza nupa bití' ta'l'é'e neda' dxi'a tu'didza' yudxi neda'.

Nupa tu'titaj neda' tu'gún dxin la' cate' nu tu'dxía dö'.

<sup>9</sup> Naca le rahua' ca dódo'sö, en nutsi' nisa ribödx'a le rë'ja'.

<sup>10</sup> Caní raca quia' tu' rilenu' neda', en réquinu' neda' zí'. Gulisu' neda', en gurú'unu' neda' tsölá'alö.

<sup>11</sup> Naca yöl-la' na'bán quia' ca tu zxul-la rilá' cate' ribía gubidza,

en rudú quia' ca raca que guixi' ricuádi.

<sup>12</sup> ¡Li', Xan, zóatica'su',

en zóaléntica'sö Lo' bönachi!

<sup>13</sup> ¡Chasu', en huéchi' ládxa'u bönachi yödzö Sión!

¡Chibidxín dza gü'i ládxa'u léguequi!

¡Ön, chibidxín dza na'!

<sup>14</sup> Netu', huen dxin quiu', nadxí'tu' yugu' guió'j nacua' lu zö'ö run chí'i yödzö Sión,

en ruí' ládxi'tu' ga ridxintè bëchtö rö'ö la' nöza que.

<sup>15</sup> Bönachi yugu' yödzö izá'a iladxi Lè' Xanru', ate' nupa ta'nná bë' yödzölió iladxi yöl-la' zxön queë'.

<sup>16</sup> ¡Nuchisè' Xanru' caz yödzö Sión, ate' uluí'i lahué' ní' lu yöl-la' zxön queë'!

<sup>17</sup> Riyönné' le tu'lidza Lè' nupa ta'yadzaj ta'yudxi.

Bití' ca' uzóë' tsölá'alö le tu'lidza yudxi Lè'.

<sup>18</sup> Bulí'zúaj lè ni lu guichi para ulu'laba zxí'ini xísóali' le,

ate' nupa sí' ilalaj ila'gú'u Xanru' yöl-la' ba.

<sup>19</sup> Ga ní' ribözé' Xanru' xitsá' lu lataj lá'ayi queë', ga ní' zoë' Xanru' yehua' yubá, ruzé' naguë'.

<sup>20</sup> Riyönné' le ta'nné' ladxí' nupa nadzúngaca, en usané' nupa narugu quéguequi ilátigaca.

<sup>21</sup> Soa nu usiyöni bönachi yödzö Sión ca naca Lè' Xanru',

ate' ila'gú'u Lè' yöl-la' ba lu yödzö Jerusalén,

<sup>22</sup> cate' ulu'dubi tsözxón bönachi yugu' yödzö izá'a, en bönachi yugu' luyú,

ate' tsözxón ila'gú'u yöl-la' ba Xanru'.

<sup>23</sup> Bené' Xanru' ga gucuí'da' la' nöza, en nuné' ga soa' nabábasö dza.

<sup>24</sup> Gunnía': Dios quia', bití' gútiu' neda' cate' ni zoa' gatsaj iza ral-la' soa' ibana'. Zóatica'sö casu' Li'.

<sup>25</sup> Dza ní'te gudixju' yödzölió,

ate' len na' casu' benu' lúzxiba.

<sup>26</sup> Huadödi quéguequi, pero Li', tsaz idi'u.

Ilexu' yúgu'téguequi ca riyexu' lari',

en ca tu lari' utubu' léguequi, en utsó'o léguequi.

<sup>27</sup> Li', bití' ca' utsá' cuinu', en bití' ca' guexu'.

<sup>28</sup> Zxí'inigaca huen dxin quiu' ila'böza dxi'a tsáhui'do', ate' ucú'u tsutsu zxí'ini xísóagaquie' lo'.

**103** ¡Bil-la yöl-la' ba queë' Xanru', lí', bö' naca caza', ate' idüté le naca', bil-la yöl-la' ba que Lè' lá'ayi!

<sup>2</sup> ¡Bil-la yöl-la' ba queë' Xanru', lí', bö' naca caza', en bití' gal-la ládxa'u yúgu'tè le ruzi'u xibé'!

<sup>3</sup> Runiti lo cazé' neda' ca naca yúgu'tè dul-la' nabága'a, en rugúë' yúgu'tè xihuë'a.

<sup>4</sup> Ruhuóá'uë' neda' lu lataj chul-la,

en ruzá' ládxe'ë quia' yöl-la' dxí'i ladxí', en yöl-la' ruhuéchi' ladxí'.

<sup>5</sup> Rigu'ë xinöza' yugu' le naca dxi'a,

lè na' run ga ruhuóáca' ca tu bönni' zoë' iz cuidi' queë', ca na' raca queéba' bisía'.

<sup>6</sup> Runé' yugu' le naca dxi'a,

en ruchí'a rusöróë' quégaca yúgu'tè nupa zoa nu rusaca' léguequi zí'.

<sup>7</sup> Buzéajni'iné' Moisés yugu' le gun cazé' Lè',

en buluí'iné' bönachi Israel yugu' le zxön runé'.

<sup>8</sup> Xanru' ruhuéchi' ladxí' cazé' bönachi, en ruzá' ládxe'ë quéguequi.

Bití' rilétené', pero nadxí'itiqui'siné' léguequi.

<sup>9</sup> Bití' ruzétiqui'siné' rë'u le bach,

en bití' rilétiqui'siné'.

<sup>10</sup> Bití' runé' rë'u xiguia' ca sa'yéaj dö' nuá'aru',

en bití' rubí'ë queëru' ca naca le xihui' nabága'ru'.

<sup>11</sup> Naca caní tu' ca na' naca xitsát'ërö lúzxiba ca luyú ni,

la' canísö naca zxön ca nadxí'iné' Xanru' nupa tadxi Lè'.

<sup>12</sup> Tsca nácat'ërö zítu' ga rilén gubidza ga ridxintè ga ribía,

la' canísö rucuité' yugu' le ta'bága'ru' Lè'.

<sup>13</sup> Ca na' ruhuéchi' ládxe'ë xúzgaca cázabi' yugu' zxí'iné',

la' canísö ruhuéchi' ládxe'ë Xanru' nupa tadxi Lè'.

<sup>14</sup> Caní runé' tu' nóziné' le nácaru'.

Röjnené' néquiniru' bëchtö yu.

<sup>15</sup> Tsca nácat'ërö dza zóaru' nabanru', nácat'ërö ca raca que xiyija guí'ido'.

<sup>16</sup> Cate' recaj bö', ruúlu runítisö xiyija na', en bití' naca bë' ga na' guzóa.

<sup>17</sup> Xanru', tsaz nadxí'iné' nupa tadxi Lè',

en runé' quégaca zxí'inigaguequi le naca dxi'a.

18 Caní runé' quégaca nupa tun ca rnna xtídzë'ë, en quégaca nupa tun ca rinná bē' xibá queë'.  
 19 Naguixjē' Xanru' xilatjē' yehua' yubá ga na' rō'ë rinná bē'ë.  
 Rinná bé'enē' yúgu'tē le dē.  
 20 ¡Gulí'cu'ë yöl-la' ba Xanru', libí'ili', gubáz lá'ayi queë', nápatērōlī' yöl-la' huáca zxön, en runlí' ca rnna xtídzë'ë,  
 libí'ili' na' runlí' ca rnna didza' ru'ë!  
 21 ¡Gulí'cu'ë yöl-la' ba Xanru', libí'ili' nácalí' ní'a nē'ë guizxi yu,  
 libí'ili', huen dxin queë' na', runlí' ca ré'ëni quézinē' Lē'!  
 22 ¡Gulí'cu'ë yöl-la' ba Xanru', yúgu'tēlī' na' nucu'ë libí'ili',  
 libí'ili' zóalī' yúgu'tē lataj ga na' rinná bē'ë Lē'!  
 ¡Bil-la yöl-la' ba queë' Xanru', lí', bō' naca caza'!  
**104** ¡Gulu'ë yöl-la' ba Xanru', lí', bō' naca caza'!  
 ¡Nayépisētēru' Lí', Xana' Dios!  
 ¡Zxo' nacu' naca yöl-la' zxön, en yöl-la' ba!  
 2 ¡Nusubaga' cuinu' bení' ca zxo' nacu cazu', ate' naguixaj cazu' lúzxiba ca tu larí' zxön!  
 3 Naguixju' xilataj lidxu' lahui nisa dē xitsá'alō.  
 Dxía cazu' lu böaj ca tu lu carreta, en ridó' lu bō'ös.  
 4 Rugunu' dxin bö' raca ca tu gubáz quiu', enca' yugu' guí' ca huen dxin quiu'.  
 5 Nuzú' tsutsu luyú ni lu xilibi, en bití' ca' gaca nu utsá' xilataj.  
 6 Gudixju' nisa zxön luyú ni ca tu larí' nabaga' le, ate' yōjbaga' nísado' na' yugu' guí'a.  
 7 Buzenu' le bach nisa na', ate' burúaj, en cate' biyón chí'u, bayúdx buzunnaj nisa na'.  
 8 Gurén yugu' lu guí'a, en bōtaj ga naca ra' yegu, ga bidxintē yōjsóa ga nupó'o que nisa na'.  
 9 Gudixju' buzá' que nísado' ga bití' gaca tōdi. Bítí'rō caz tseajbaga' nisa na' luyú bidxi.  
 10 Runu' ga ralaj beaj yugu' lē'e guí'ado', enca' ga ta'dōdi yegu ga rō'ögaca rōga'.  
 11 Yudzu yugu' yegu na' nisa té'ajba' böa' guixí', le rugúa yöl-la' ribídx quégacaba' burro ta'dásiba' la' guixí'.  
 12 Yugu' ra' yegu rō'ögaca yaga ga tu'dxíaba' biguínido' xcá'agacaba', en túl-laba' yugu' lu ní'a né'eguequi.  
 13 Rigú'u nisa guió'j quiu' yugu' lu guí'a, en runu' ga tu'huōla tu'dzé'e yugu' le dzö'ö luyú.  
 14 Runu' ga rizxón yō le táguba' böa' bēdx, en yugu' cuan guixí' tu'gún dxin bōnachi, le ilagu ní'a que le nudó'o luyú,  
 15 en xisi uva le run ga tudzeja lādxi'guequi, en za olivo le ta'gú'u láhuiguequi lu yöl-la' ruzí' xibé quéguequi, en yōta le nabániguequi.  
 16 Tu'zí' xibé nisa guió'j yaga cedro dzö'ö lu guí'a Líbano, yugu' yaga na' budó'o, Xantu'.  
 17 Ní' tu'dxiaba' biguínni xcá'agacaba', ate' tunba' biyúz lídxigacaba' ní'.  
 18 Nunú' Lí' yugu' guí'a sibi ga dzó'ōba' bdxina' guixí',

enca' yugu' znan bulóaj gapa tapa chí'i cuíngacaba' bizxidxu'.  
 19 Benu' beo' le naca bē' yugu' beo' que iz, ate' ribía gubidza ga ral-la' cuía.  
 20 Benu' chí'i dzó'ölō, en cate' naca chul-la ta'rúajba' ta'daba' böa' guixí'.  
 21 Ta'bódxí'aba' bēdxí guixí'do', ta'zóa régu'ba' le ila'zōnba'.  
 Tu'guílajba' le nuzóë' Dios iláguba'.  
 22 Cate' rilén gubidza tu'dxinba' lídxigacaba', en rōjōxagacaba' yugu' lu znan bulóaj quégacaba'.  
 23 Ní'irō ta'rúaj bōnachi sōjaca huen dxin, en tun caz dxin ga ridxintē ribía gubidza.  
 24 Xan, zióntērō yugu' le nunu' Lí'.  
 Len yöl-la' réajni'í zxön quiu' nunu' yúgu'tē.  
 Nalí luyú yōdzölió ni yugu' le dxí'a nunu'.  
 25 Ní' zoa nisa nácatērō zxön, ga na' nacuá'aba' böa' guizxi yu, böa' cuidí', enca' böa' zxön.  
 26 Ní' ta'dōdi barco zxön, enca' böa' zxön lēba' leviatán, böa' na' nuzóa cazu'.  
 27 Yúgu'tēba' ta'bózaba' Lí', cate' idxinrō ugagu' légacaba'.  
 28 Rugagu' légacaba', ate' táguba'.  
 Runōdzju' le iláguba', ate' tu'huólaj ta'dzé'eba'.  
 29 Cate' ruhuecju' quiu', tádxiba', en cate' ruzí'u bö' quiu', tátiba', en ruhuóaca yu le néquinigacaba'.  
 30 Cate' rigú'u légacaba' bö', nabángacaba'.  
 Rucubu' yúgu'tē le nacuá' yōdzölió.  
 31 ¡Ral-la' gácatíca'sō yöl-la' ba queë' Xanru'!  
 ¡Ral-la' ila'yaza lādxi'tíca'sō bōnachi le nun cazé' Lē'!  
 32 Ruyúé' Xanru' luyú, ate' rizxizi.  
 Riganē' yugu' guí'a, ate' rirúaj dzön.  
 33 ¡Gul-la' queë' Xanru' yúgu'tē dza soa' ibana'!  
 ¡Gul-la' yöl-la' ba queë' Dios tsanni ni zoa' nabana'!  
 34 ¡Zxixi naca le rizá' lādxa'a ca naca queë'!  
 ¡Udzéjalenda'-nē' Xanru'!  
 35 Ila'nítiē' bōnní' dul-la' nacu'ë yōdzölió ni, en bítí'rō ila'cuá' nupa tuá' dö'.  
 ¡Gulú'u yöl-la' ba Xanru', lí', bō' naca caza'!  
 ¡Yöl-la' ba Lē' Xanru'!  
**105** ¡Gulí'guíë' Xanru' Dios: "Xclenu"!  
 ¡Bulí'lídzē' Lē'!  
 ¡Bulí'siyón bōnachi ca nácagaca le benē'!  
 2 ¡Gulí'gul-la queë'! ¡Gulí'gul-la yöl-la' ba queë'!  
 ¡Gulí'güí' didza' ca nácagaca le zxön nunē'!  
 3 ¡Bulí'sí' xibé Lē' lá'ayi!  
 Ral-la' ulu'dzeja lādxi' yúgu'tē nupa ta'guilaj Xanru'.  
 4 Gulí'guiljē' Xanru', enca' yöl-la' huáca queë'.  
 Gulí'güí' lādxi'tíca'sō idxinlí' lahué'.  
 5 Gulí'tsōjné le nácagaca zxön benē' Lē', lē na' tun ga rubániru', enca' ca nácagaca didza' bē'ë cate' buchí'a busöróë' bōnachi,  
 6 libí'ili', xzí'ini xí'sóë' Abraham, huen dxin queë' Dios, en libí'ili', xzí'ini xí'sóë' Jacob, nácalí' nupa guró cazé' queë'.  
 7 Lē' náquië' Xanru' Dios.

Idütë yödzülió naca bē' ca buchi'a busöröë' bönachi.  
<sup>8</sup> Rōjnétiqui'siné' didza' dzaga nunē',  
 didza' na' gunná bē'ē ila'z'í lu ná'agaquiē' chi gayuá'  
 cō' xz'í'ini x'ísóé' Abraham,  
<sup>9</sup> didza' dzaga na' bēnlenē' Abraham,  
 le naca didza' na' benē' tsutsu Dios ca gunē' queē'  
 Isaac.  
<sup>10</sup> Ní'irō benē' tsutsu didza' na' lahuē' Jacob,  
 le naca tu le rinná bē'enē' lē' gunē',  
 para gaca quégaca bönachi Israel tu didza' dzaga le  
 zoa tsaz.  
<sup>11</sup> Gunné': "Gunná' queé'li' xiyúgaca bönachi Canaán,  
 le guequi tsaz queé'li', en quégaca xz'í'ini x'ísóali'."  
<sup>12</sup> Caní gunné' Dios cate' ní' gula'cu'ē nabábagaquiē'  
 bönni' Israel.  
 Tu chópasé' guláquiē', en guláquiē' bönni' z'í'tu' luyú.  
<sup>13</sup> Gula'dé' tu ia'tú yödzü izá'a.  
 Buluzé'ē tu ga nu gunná bē', en bila'dxinē' ga nacua'  
 bönachi izá'a,  
<sup>14</sup> pero bití' bē'ē lataj Dios nu usaca' z'í' bönachi queē'  
 na',  
 en buzenē' le bach bönni' gula'nná bē'ē para gulá-  
 calenē' bönachi queē'.  
<sup>15</sup> Gunné': "Bití' bi gunlí' quégaca bönachi nabó caza'  
 quia',  
 en bití' bi dö' guá'alí' quégaquiē' bönni' tu'ē didza' uláz  
 quia'."  
<sup>16</sup> Benē' ga guyú'u gubín yödzülió,  
 en benē' ga biyadzaj yōta ilahuē'.  
<sup>17</sup> Gusól-lē'ē tubí' bí'í bönni', bí'í bidxinbí' ní' z'í'aló ca lé-  
 gaquiē',  
 tu' gulú'ti'ē-bí' José para gácabi' bí'í nadó'o.  
<sup>18</sup> Gulúguí'ē bönni' Egipto ní'abi' len du guíē,  
 en bulu'dé'ē yen ná'abi' breguí' guíē,  
<sup>19</sup> ga bidxintē dza budxín xtídzē'ē Xanru',  
 tu' guzxí' bē'ē Xanru' Dios José na'.  
<sup>20</sup> Ní'irō gusól-lē'ē bönni' gunná bē'ē luyú Egipto nu  
 busán-bí'.  
 Bönni' na' gunná bē'enē' yödzü izá'a zían busólé'-bí'.  
<sup>21</sup> Benē' ga gúcabi' xan yu'u queē',  
 ate' guta' lu ná'abi' yúgu'tē le dē queē' bönni' na' rinná  
 bē'ē.  
<sup>22</sup> Guta' lu ná'abi' gulú'ubi' lidxi guíē bönni' ta'nná bē'ē  
 tsca ré'ēni quézibí',  
 para busédibí' bönni' gula queē' yöl-la' réajni'í.  
<sup>23</sup> Ní'irō bila'dxín ca' bönachi Israel luyú Egipto.  
 Caní guca, guzóē' Jacob lu xiyúgaca xz'í'ini x'ísóé' Ham.  
<sup>24</sup> Benē' Dios ga gula'yántērō bönachi queē' luyú ní',  
 ate' guláquiē' zióntērē' ca nupa gula'díl-lalen lé-  
 gaquiē'.  
<sup>25</sup> Benē' Dios ga gulunē' z'í' bönni' Egipto bönachi  
 queē'.  
 Lu yöl-la' banís quégaquiē' gula'z'í' yé'enē' nupa na'  
 nácagaca huen dxin queē' Lē'.  
<sup>26</sup> Ní'irō gusól-lē'ē Moisés, huen dxin queē', lógaquiē',  
 enca' Aarón, bönni' na' nabó cazē' Lē'.  
<sup>27</sup> Gulunē' chopē' ni zían yöl-la' huáca zxön queē' Dios  
 lógaca bönachi Egipto na'.

Gulunē' zían yöl-la' huáca que yehua' yubá lu xiyúga-  
 ca xz'í'ini x'ísóé' Ham.  
<sup>28</sup> Gusól-lē'ē Dios le naca chul-la, ate' böáca chul-la  
 lahui' dza,  
 en bití' guca ila'dá'baguē'ē xtídzē'ē.  
<sup>29</sup> Benē' ga nisa yegu nacua' lu yegu quégaquiē' böá-  
 ca rōn,  
 en benē' ga gulátiba' böla dzó'ōba' yugu' yegu na'.  
<sup>30</sup> Gula'yanba' riu lu xiyúgaquiē',  
 ga bidxintē gula'yázaba' yu'u lidxē' bönni' rinná  
 bē'enē' légaquiē'.  
<sup>31</sup> Bē'ē didza' Dios, ate' gulátsjaba' bótsugayu guizxi  
 yu,  
 en gulátsjaba' ca' bó'iyudo' idütē lu xiyúgaquiē'.  
<sup>32</sup> Benē' ga guró'ō guió'j bögui' yōla sunna uláz que  
 nisa guió'j,  
 ate' böxaj ca' guí' lu xiyúgaquiē'.  
<sup>33</sup> Guditsjé' yugu' lubá uva quégaquiē', en yugu' yaga  
 higo,  
 en busunítiē' yaga ró'gaca lu xiyúgaquiē'.  
<sup>34</sup> Bē'ē didza', ate' bila'dxinba' bóchi'zu guizxi yu,  
 enca' bóchi'zu hué'enido', cuntu nu gaca ulaba léga-  
 caba',  
<sup>35</sup> ate' guláguba' idütē guixi' cuan rō'ō lu xiyúgaquiē',  
 en guláguba' ca' idütē le naz nudá'agaquiē' lu xiyú-  
 gaquiē'.  
<sup>36</sup> Benē' ga gulátibi' yúgu'tēbi' bí'í bönni' lo idütē lu  
 xiyúgaquiē'.  
 Bí'í lo na' quégaquiē' bönni' nál-la.  
<sup>37</sup> Ní'irō bubéajé' Dios yugu' bönni' Israel luyú na',  
 nuá'agaquiē' dumí plata, en oro,  
 ate' cuntu nu yójchegu' nu nutsa' légaquiē'.  
<sup>38</sup> Bulu'dzeja bönachi Egipto cate' buluzé'ē bönni' Is-  
 rael lu xiyúgaquiē',  
 ate' guladxi gula'dzöbi tu' nóziguequinē' bönni' Israel  
 na'.  
<sup>39</sup> Gusól-lē'ē Dios tu böaj le gulú'u bönachi queē' xzul-  
 la,  
 ate' chí'í dzó'ölö gusól-lē'ē guí' le buzení' quégaquiē'.  
<sup>40</sup> Gula'nábinē' Lē', ate' gusól-lē'ē böra guíxi'do' zían le  
 ilahuē',  
 en benē' ga bulu'huólaj gula'dzé'enē' yōta que yehua'  
 yubá.  
<sup>41</sup> Bulu'ē lahui tu guió'jto'o, ate' gulalaj nisa yégudo'.  
 Gudödi nisa na' luyú bidxi ní' ca tu nisa yegu gubó'o.  
<sup>42</sup> Caní benē' Dios tu' yōjnenē' didza' lá'ayi queē',  
 le guzxí' lu nē'ē gunē' queē' Abraham, huen dxin  
 queē'.  
<sup>43</sup> Bubéajé' bönachi queē' lu yöl-la' rudzeja quégue-  
 qui,  
 ate' lu yöl-la' rudzeja quéguequi gula'bódxí'a bönachi  
 guró' cazē' queē'.  
<sup>44</sup> Bunödzejé' xiyúgaca bönachi yugu' yödzü izá'a qué-  
 gaquiē'.  
 Bulu'z'í'ē xibé le ilá' luyú ní'a que dxin gulún bönachi  
 izá'a na'.  
<sup>45</sup> Caní benē' Dios para ilunē' ca rnna le gunná bē'enē'  
 légaquiē' ilunē',

en ilunë' ca rinná bē' xibá gudixjē' Lē'.  
 ¡Gulí'cu'ē yöl-la' ba Xanru'!  
**106** ¡Gulí'cu'ē yöl-la' ba Xanru'!  
 ¡Gulí'guíē' Xanru': "Xclenu'" tu' náquiē' idú dxi'a!  
 ¡Zóatica'sö yöl-la' dxi'i ladxí' queē'!  
 2 ¡Nuzxi caz gaca quixjö' ca nácgaca le zxön nunē'  
 Xanru',  
 en ulu'í lahui ca naca yöl-la' ba queē'?  
 3 ¡Bica' ba nupa tun le naca tsahuí',  
 nupa na' túntica'sö le naca dxi'a!  
 4 Yöjné neda', Xan, cate' ruzá' ladxu'u quégaca bö-  
 nachi quiu'.  
 Buzá' ladxí' quia' yöl-la' rusölá quiu',  
 5 para gaca ilé'eda' gata' yöl-la' tsahuí' quégaca nupa  
 naró cazu' quiu',  
 en para gaca udzéalenda' bönachi quiu' cate' tu'dze-  
 ja,  
 en para gaca uzí'lēna' xibé nupa néquiquequi quiu'.  
 6 Nuntu' dul-la' ca gulunē' xuz xtó'otu'.  
 Biá'atu' dö', en bentu' le naca xihuí'.  
 7 Cate' gula'cu'ē xuz xtó'otu' luyú Egipto,  
 bití' gula'yéajni'inē' le nácgaca zxön benu'.  
 Bití' yöjnéquequinē' yugu' le benu' quégaquiē' lu yöl-  
 la' dxi'i ladxí' quiu',  
 pero gula'dá'baguē'ē xtídzú'u cate' gula'cu'ē ra'  
 nísado' lē Nísado' Xiná.  
 8 Busölē' Xanru' Dios légaquiē' para gaca bē' runē' ca  
 rnna xtídzē'ē,  
 en para ulu'e lahui yöl-la' huáca zxön queē'.  
 9 Caní guca, buzenē' le bach Nísado' Xiná na', ate' la'  
 gubídxitē.  
 Guchē'ē légaquiē' ga rē'do' lu nísado' na',  
 ate' gula'dē' lu yu bidxi ga na' guró'ö nisa.  
 10 Caní guca, busölē' légaquiē' lu na' nu na' benē' lé-  
 gaquiē' zí',  
 en buá'uē' légaquiē' lu na' nu na' gudíl-lalen légaquiē'.  
 11 Ní'irö gubaga' nísado' na' nupa gula'sí regu' lé-  
 gaquiē'.  
 Cuntu nu bugá'ana nu bidzaga léguequi.  
 12 Ní'irö gula'yéajlē' bönachi queē' xtídzē'ē,  
 ate' gulul-la yöl-la' ba queē'.  
 13 Pero la' gulál-latē ladxí'gaquiē' yugu' le benē'.  
 Bití' gula'nábinē' Lē' ulu'í'nē' légaquiē' le ral-la' ilunē'.  
 14 Zían le gula'zé ladxē'ē cate' ní' gula'cu'ē la' guixí' ga  
 dē lataj,  
 en gula'zí' bē'ē Dios la' guixí' na'.  
 15 Ní'irö bē'ē Dios quégaquiē' le gula'nábinē' Lē',  
 pero gusól-lē'ē quégaquiē' tu yödzöhuē' le bēti zían-  
 gaquiē'.  
 16 Cate' bulu'xzé'enē' Moisés ga ní' gula'cu'ē tsözxón,  
 en bulu'xzé'enē' ca' Aarón, bönní' nubéajē' Xanru'  
 quez queē',  
 17 la' ná'asö gualaj luyú, en bucachí' Datán.  
 Bucachí' ca' nupa gulún tsözxón Abiram.  
 18 Gulaj tu guí' zxön ga na' nudúbigaquiē',  
 en buzeguí' nupa na' guluá' dö'.  
 19 Lu guí'a Horeb gulunē' tu bédxido' néquiniba' oro,  
 en gula'yéaj ladxē'ē budó' oro na'.

20 Caní guca bulu'cá'anē' Dios nayépisētē'ē,  
 para gula'yéaj ladxē'ē budó' oro le naca ca tu bēdxi  
 ráguba' guixí'.  
 21 Gulal-la ladxē'ē Dios Nu busölá légaquiē'.  
 Lē' benē' zían le zxön le gulácalen légaquiē' luyú Egipto.  
 22 Benē' zían le tun ga rubániru' lu xiyúgaca xzí'ini  
 xí'sóē' Ham,  
 en zían le tun ga rádxi'ru' Lē' le benē' ra' Nísado' Xiná.  
 23 Que lē ni na' gunné' Dios usunítíē' légaquiē', ate' la'  
 cá'asö gunē'  
 la'tu' cabí guzuínē' Moisés, bönní' rö queē', lahuē' Lē',  
 en buzóa dxi'ē' yöl-la' rilé queē' para cabí usunítíē' lé-  
 gaquiē'.  
 24 Ní'irö bití' gulé'ēnē' ila'yáziē' luyú dxi'a na' dē ló-  
 gaquiē'  
 tu' cabí gula'yéajlē'ē xtídzē'ē Dios.  
 25 Gula'nnē' zí'ē queē' Dios gapa naca lu yu'u guídi  
 quégaquiē',  
 en bití' bulu'zē' náguíē' chí'ē Xanru'.  
 26 Que lē ni na' benē' tsutsu Dios xtídzē'ē le bē'lenē' lé-  
 gaquiē',  
 gunné' gunē' ga ilátiē' ga na' naca la' guixí' ga dē lataj.  
 27 Gunnē' gunē' ga ilasi lásiē' xzí'ini xí'sóagaquiē' ladaj  
 zían yödzö izá'a,  
 en gúsiē' légaquiē' gapa nacuá' bönachi zítu'.  
 28 Ní'irö bulu'dödi cúngaquiē' lu na' budó' guíē lē  
 Baal-peor,  
 en gulahuē' xipéla'gacaba' böa' guixí' gulútiē'-ba'  
 para gulunē' zxön yugu' dios nati.  
 29 Ca' guca, gulún lenē' Dios ní'a que le gulunē',  
 ate' gulén tu yödzöhuē' zxön ladjagaquiē'.  
 30 Ní'irö guzuínē' Finees, en benē' le raza ladxē'ē Dios,  
 ate' guzóa dxi yödzöhuē' zxön na'.  
 31 Buzóē' Dios queē' Finees na' náquiē' tsahuí' ní'a que  
 lē na' benē' le nuzóē' tsaz ca naca queē'.  
 32 Lē'sca' gulún lenē' Dios ga na' zoa nisa lē Meriba,  
 ate' Dios gulénē' Moisés tu' nözi lē na' gulunē'  
 33 tu' gula'dá'baguē'ē xtídxē'ē Bö' Lá'ayi queē',  
 ate' Moisés, lu yöl-la' ridzá'a queē', gunné' lizē'.  
 34 Bití' bulu'sunítíē' bönachi tuá' dö' gula'cuá' lu yu ni,  
 ca na' gunná bē'enē' Xanru' légaquiē' ilunē'.  
 35 Gulunē' léguequi tsözxón  
 en bila'zédē' ilunē' ca gulún bönachi na',  
 36 ate' gula'yéaj ladxē'ē budó' guíój budó' yaga  
 quéguequi,  
 le guca quégaquiē' ca tu du yalaj le guzxón légaquiē'.  
 37 Gulútiē'-bí' xzí'inigaquiē' lógaca bö' xihuí',  
 yugu' bí'i bönní', en nigúlado',  
 38 en bulu'laljē' xichóngaca nupa bití' bi nabága'gaca  
 tu' bulu'laljē' xichóngacabí' bí'i bönní' quégaquiē', en  
 bí'i nigula quégaquiē',  
 yugu' bí'i na' gulútiē'-bí' lógaca budó' guíój budó' yaga  
 nacuá' luyú Canaán,  
 ate' gúcada' xihuí' luyú ni tu' nözi rön na' bulu'laljē'.  
 39 Ca' guca, guláquiē' xihuí' ní'a que le gulunē'.  
 Guláquiē' ca tu nigula udá dzaga tu' bulu'cá'anē' Dios  
 quégaquiē'.

40 Que lè ni na' guléde'ené' Xanru' Dios bönachi queë',  
en bití' bilé'ené' dxi'a nupa na' néquiguequi queë'.  
41 Ní'irö budödë' légaquië' lu ná'agaca bönachi zían  
yödzo izá'a,  
ate' nupa bulu'dí'i légaquië' gula'nná be'e légaquië'.  
42 Nupa na' bití' bila'lé'e légaquië' dxi'a gulunda' lé-  
gaquië' dxin,  
en bulu'zxicaj légaquië' lu yöl-la' unná bë' quéguequi.  
43 Zían luzuí gú'uné' Dios usölé' légaquië',  
pero gula'dá'baguë'ë le ré'ené' iluné',  
ate' guzxöntëro xigua' nabága'gaquië'.  
44 Bilé'ené' Dios yöl-la' bayechí' quégaquië'  
en biyönné' ta'bödxi yeché'ë.  
45 Yöjnené' didza' dzaga núnlené' légaquië',  
ate' bubequi lahuë' quégaquië' tu' nazxöntëro yöl-la'  
dxi'i ladxí' queë'.  
46 Bené' Dios ga bulu'huéchi' ladxí' légaquië'  
nupa na' gula'ché' légaquië' nadzúngaquië'.  
47 ¡Busölá netu', Xantu' Dios!  
Guléaj netu' ladjagaca yödzo izá'a  
para guíëtu' Lì: "Xclenu" ní'a que Lo' lá'ayi,  
en lu yöl-la' rudzeja zxön queëtu' cú'utu' Lì' yöl-la' ba.  
48 ¡Yöl-la' ba Lë' Xanru', Dios quégaca bönachi Israel  
na'a dza, en yúgu'të dza sí' zaca!  
Ral-la' ila'nná yúgu'të bönachi: "¡Ca' gaca!  
¡Gulí'cu'ë yöl-la' ba Xanru' Dios!"  
**107** ¡Gulí'guíë' Xanru': "Xclenu" tu' náquië' dxi'a,  
en tu' zóatica'sö yöl-la' dxi'i ladxí' queë'!  
2 Ral-la' ila'nná caní nupa na' buá'uë' Xanru',  
nupa na' buá'uë' lu ná'agaca nupa gulún léguequi zí',  
3 en nubéajë' léguequi zían lu yödzo izá'a,  
saca' ga rilén gubidza, en saca' ga ribía,  
saca' ga za' bö' ziaga, en saca' ga ridödi gubidza beo'  
ziaga.  
4 Bal-lë' gula'dé' nanítigaquië' la' guixí' ga dë lataj,  
en ga ní' bití' zoa nöza.  
Bití' guca ulu'dzöliné' tu yödzo ga gaca tsöjcu'ë.  
5 Gula'duné', en gula'bidxë' nisa,  
en gudú ladxí'gaquië'.  
6 Ní'irö lu lè na' raca quégaquië' bulu'lidzë' Xanru',  
ate' busölé' légaquië' lu zían le gula'guí'i gula'záquë'ë.  
7 Guché'ë légaquië' tu la' nöza tsahuí',  
en guché'ë légaquië' tu lu yödzo ga tsöjcu'ë.  
8 Ral-la' ilé' Xanru': "Xclenu" tu' nadxí'iné' légaquië',  
en tu' bené' yugu' le zxön, gúcalené' légaquië'.  
9 Ruguí'jé' nupa ta'bidxi ladxí',  
en rugahuë' nupa ta'dún le ná'agaca dxi'a queë'.  
10 Bal-lë' gula'cu'ë ga chul-la, en ga zoa bönadxi ilátië'.  
Gula'dzuné' yugu' lu du guíë, en gula'guí'i gu-  
la'záquë'ë  
11 tu' gula'dá'baguë'ë xtídzë'ë Xanru' Dios,  
en bulu'zóé' tsölá'alö le rigu'ë icja ladxí'do'gaquië'.  
12 Tu' guluné' bayúdx dxin, gudú ladxí'gaquië'.  
Gula'dzö'ë lu yu zcan yua' nu'á'agaquië',  
ate' cuntu nu zoa gácalen légaquië'.  
13 Ní'irö lu lè na' raca quégaquië' bulu'lidzë' Xanru',  
ate' busölé' légaquië' lu zían le gula'guí'i gula'záquë'ë.  
14 Bubéajë' légaquië' ga na' gula'cu'ë ga chul-la,

en ga guzóa bönadxi ilátië',  
ate' guditsjé' yugu' du guíë núga'gaquië'.  
15 Ral-la' ilé' Xanru': "Xclenu" tu' nadxí'iné' légaquië',  
en tu' bené' yugu' le zxön, gúcalené' légaquië'.  
16 Ruquínnajé' le tá'baga' gapa nu riyaza lidxi guíë le  
néquiniguequi guíë bronze,  
en ruzxuzxjé' yugu' vara néquiniguequi guíë.  
17 Bal-lë' gula'guí'i gula'záquë'ë tu' gula'dá'baguë'ë  
Dios,  
en tu' nözi dö' gulu'ë.  
18 Gula'gúti'né' bítí'tës la' huagu,  
en gula'zóa ilátië'.  
19 Ní'irö lu lè na' raca quégaquië' bulu'lidzë' Xanru',  
ate' busölé' légaquië' lu zían le gula'guí'i gula'záquë'ë.  
20 Gusöl-lë'ë quégaquië' xtídzë'ë, en buné' légaquië',  
en busölé' légaquië' lu yöl-la' guti.  
21 Ral-la' ilé' Xanru': "Xclenu" tu' nadxí'iné' légaquië',  
en tu' bené' yugu' le zxön, gúcalené' légaquië'.  
22 Ral-la' ilé' Dios: "Xclenu", en bi ulu'nödzejé' queë',  
en lu yöl-la' rudzeja quégaquië' ilul-lë' ca ná'agaca le  
nuné'.  
23 Bal-lë' gula'dödë' lahui nísado' yugu' lu barco zxön,  
en guluné' dxin yugu' lu nísado'.  
24 Bila'lé'ené' yugu' le nuné' Xanru',  
en yugu' le zxön nucu'ë lu nísado'.  
25 Bë'ësë' didza', ate' guyecja bö' budunu',  
ate' guyasa gudxía nísado'.  
26 Gula'yasa barco ca tu lu gu'ado' nisa,  
en la' bótjatë ga rö'ö röga' lu nisa na'.  
Tu' guzóalé'ë bönadxi ilátië' gudú ladxí'gaquië'.  
27 Gula'zxízië', en yöjchégu'gaquië' ca bönní' ta'zúdx-  
iné',  
ate' nítisö guca yöl-la' rácada' quégaquië'.  
28 Ní'irö lu lè na' raca quégaquië' bulu'lidzë' Xanru',  
ate' busölé' légaquië' lu zían le gula'guí'i gula'záquë'ë.  
29 Bené' Dios ga guzóa dxisö bö' budunu' na' recja,  
ate' guzóa dxi le rasa ridxía lu nísado'.  
30 Bulu'dzëjané' tu' guzóa dxi lu nísado',  
en tu' guché'ë Dios légaquië' dxi'a tsáhui'do' ga na'  
söjajúé'.  
31 Ral-la' ilé' Xanru': "Xclenu" tu' nadxí'iné' légaquië',  
en tu' bené' yugu' le zxön, gúcalené' légaquië'.  
32 Ral-la' ulu'lu'ë lahui yöl-la' zxön queë' ga nudúbiga-  
ca bönachi queë',  
en ila'gu'ë Lë' yöl-la' ba ga nudúbigaquië' bönní' gula  
tu'chí'a tu'söróë'.  
33 Runé' Xanru' Dios ga tu'huí'i dëro yugu' yegu,  
enca' yugu' beaj nisa.  
34 Ga naca yu ya'a runé' ga ruhuöaca yu bidxi,  
ní'a que le xihuí' nabága'gaca nupa nacuá' ní'.  
35 Ga naca yu bidxi runé' ga ruhuöaca yu nabisa,  
ate' ralaj nisa ga bití' bi nisa guzóa.  
36 Ní' ru'ë lataj ila'cuá' nupa ta'dún  
para iluné' ní' yödzo ga ila'cu'ë.  
37 Tazé' yugu' le tazé', en tu'dé'ë yugu' lubá uva,  
yugu' le ta'bía yödxi yana'.  
38 Runé' Xanru' ga raca dxi'a quégaquië',  
en ga ta'cuá'bi' zíanbí' bí'i quégaquië',

en runë' ga ta'yanba' böa' bëdxi quégaquië'.  
<sup>39</sup> Cate' yugu' bönni' unná bë' zi'tu' tu'zxicjë' bönachi queë',  
 en tu'zötjë' léguequi,  
 en tu'saca' zì'ë léguequi, en tu'ë dö' quéguequi,  
<sup>40</sup> rucá'anë' Dios bönni' na' dë lu ná'agaquië' cá'asö,  
 en runë' ga ta'dé' la' guixi' ga dë lataj, en tu luyú bidxi.  
<sup>41</sup> Rusölë' yugu' bönni' yechi' lu le ta'guí' ta'záquë'ë,  
 en runë' ga ta'yanbi' zxi'inigaquië' ca ta'yánba' bö'cu' zxíla'do'.  
<sup>42</sup> Ta'lé'e lë ni nupa ná'cagaca tsahui', en tu'dzeja,  
 pero biti' bi ta'nná nupa tuá' dö'.  
<sup>43</sup> Nupa ta'yéajni' ral-la' sa' ládxi'gaca ca ná'cagaca lë ni,  
 ate' ilé'quibe'e ná'quië' Xanru' Dios dxi'i ladxí'.

**108** ¡Chinabá'a quia', Dios!  
 ¡Gul-la' quiu'! ¡Ön, idú ládxa'a gul-la' yöl-la' ba quiu'!

<sup>2</sup> ¡Gulí'bán, libí'ili' riguín'nalí' bihuël-la!  
 ¡Gúl-laru' cate' ni' ritó yu!  
<sup>3</sup> ¡Guía' Li: "Xclenu'" Xan, lád'jagaca bönachi yugu' yöd'zö izá'a!  
 ¡Gul-la' yöl-la' ba quiu' lógaca yúgu'të bönachi!  
<sup>4</sup> ¡Zxóntë'rö naca yöl-la' dxi'i ladxí' quiu', le ridxintë lú'zxiba xitsá'!  
<sup>5</sup> Buluí' lahui lú'zxiba yöl-la' zxön quiu', Dios,  
 ate' lahui yöd'zölió ni buluí' lahui yöl-la' bení' quiu',  
<sup>6</sup> para usöló' netu', bönachi quiu', nupa nadxí'ínu'.  
 Len yöl-la' huáca zxön quiu' busólá netu', en bubí' didza'.

<sup>7</sup> Lu lataj lá'ayi queë' bë'ë didza' Dios, gunné':  
 "Uzi'a xibé, en quisia' xiyú'gaca bönachi Siquem,  
 en urixa' luyú dë cuiti yegu Sucot.  
<sup>8</sup> Nequi quia' xiyú'gaca bönachi Galaad,  
 enca' xiyú'gaca zxi'ini xi'sóë' Manasés.  
 Naca ca tu le rusubín icja' xiyú'gaca zxi'ini xi'sóë'  
 Efraín.

Naca ga rinná bë'a xiyú'gaca zxi'ini xi'sóë' Judá.  
<sup>9</sup> Naca ca tu ga riguibi na'a xiyú'gaca bönachi Moab,  
 ate' lu xiyú'gaca bönachi Edom chú'una' löla'.  
 Códxi'a tu' uxicja' bönachi Filistea."  
<sup>10</sup> ¿Nuzxi caz gaca iché' neda' lu yöd'zö dë zö'ö idú gásibi'ilö le run chi'i yöd'zö na?  
 ¿Nuzxi caz gaca iché' neda' lu xiyú'gaca bönachi Edom?

<sup>11</sup> ¿Naru' cabí nusán lád'xu'u netu', Dios?  
 ¿Naru' cabí tséajlenu' bönni' queë'tu' röj'áquië' gudil-la?

<sup>12</sup> Gúcalen netu' cate' tíl-lalentu' nupa dutíl-lalen netu',  
 tu' naca dá'dusö gácalen netu' nu naca böná'chisö.

<sup>13</sup> Len yöl-la' huáca queë' Dios idéli'ru'  
 tu' uxicja cazé' Lë' nupa ta'díl-lalen rë'u.

**109** Rigu'a Li' yöl-la' ba, Xana' Dios.  
 Biti' su' dxisö,  
<sup>2</sup> tu' ta'nná quia' nupa tuá' dö', en ta'zì' yë'.  
 Lu yöl-la' rizí' yë' quéguequi tuí' didza' le tu'zegui'  
 neda'.

<sup>3</sup> Nagú'ugaca neda' lé'ajlö,

en lu yöl-la' biti' rilé'e neda' dxi'a tuí'tica'sö didza'.  
<sup>4</sup> Sal-la' nadxí'ida' léguequi, tu'zegui' neda' didza',  
 pero neda' rulidza' Li'.

<sup>5</sup> Bena' quéguequi le naca dxi'a, pero bulu'bí' quia' le naca dö'.

Nadxí'ida' léguequi, pero biti' ta'lé'e neda' dxi'a.

<sup>6</sup> Buzóa tu bönni' huía' dö'  
 para uchi'a usöróë' que nu na' biti' rilé'e neda' dxi'a.  
 Ben ga soa gagu nu uzegui' nu na' didza'.

<sup>7</sup> Cate' nu uchi'a usöró bönni' na', biti' gu'u lataj urúa-jë' dxi'a.

Buyú le rinábinë' Li' tscá naca dul-la' nabáguë'ë.

<sup>8</sup> Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

<sup>9</sup> Ben ga ilácabi' zxi'inë' bí' uzëbi,  
 en ga gácanu nigula queë' nigula uzëbi.

<sup>10</sup> Ben ga ila'dásöbi' zxi'inë' ila'nábibi' nu bi unöd'zaj quégacabi'.

Ben ga ila'guíl'jabi' le ilágubi' zi'tu' ga zoa líd'xigacabi' le nadachi.

<sup>11</sup> Ben ga ugúa nu bi benna lë' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

<sup>12</sup> Ben ga biti' soa nu huéchi' ladxí' lë',  
 en biti' soa nu uzá' ladxí' quégacabi' zxi'inë' ná'caga-cabi' bí' uzëbi.

<sup>13</sup> Ben ga udxi quégaca zxi'ini xi'sóë',  
 en ga idxín dza bítirö soa nu si' la ca guzxi'i lë'.

<sup>14</sup> Yöjnética'sö le xihui' gula'báguë'ë xuz xtá'ahuë',  
 Xan,

en biti' gal-la lád'xu'u dul-la' bennu xiné'ë.

<sup>15</sup> Ben ga ila'cuática'sö dul-la' na' lo' Li', Xan,  
 para cabirö nu soa yöd'zölió nu tsöjné' lë'.

<sup>16</sup> Biti' buéchi' lád'xë'ë luzé'ë,  
 pero gudxía nahuë' nupa gula'guí' gula'zaca',  
 en nupa gula'yadzaj gula'yudxi,  
 enca' nupa gula'sëbi ladxí', ate' bétie' léguequi.

<sup>17</sup> Bidxi'inë' le rudxía luzé'ë dö'.

Ben ga ulu'bí' ca' queë'.

Biti' raza lád'xë'ë gaca dxi'a que luzé'ë.

Ben ga biti' gaca dxi'a queë'.

<sup>18</sup> Gulaca ca zxë' nácuë' didza' xihui' bë'ë,  
 ate' gula'yaza le nayá' nabanë' ca nisa,  
 en gula'yú'u ca' dxita queë' ca le za.

<sup>19</sup> Ben ga ilaca queë' ca tu lari' rixóa cúd'zë'ë,  
 en ca xipanë' rúguí'ë lë'ë.

<sup>20</sup> Bubí' caní quégaca nupa tu'zegui' neda' didza', Xan,  
 enca' quégaca nupa tuí' didza' zi' que bö' naca caza'.

<sup>21</sup> Li', Xana' Dios, ben quia' le naca dxi'a  
 para gaca bë' runu' ca rnna xtí'dzu'u.  
 Tu' naca dxi'a yöl-la' dxi'i ladxí' quiu', busólá neda'.

<sup>22</sup> Riguí' rizáca'a, en riyadzaj riyú'dxida',  
 en raca zì' lád'xi'da'ahua'.

<sup>23</sup> Ridödi quia' ca raca que tu zxul-la cate' ribía gu-bidza.

Naca' ca tuba' bóchi'zu, riché' bö' recja lëba'.

<sup>24</sup> Ta'cuidi' zxiba' tu' runa' gubasa.

Nadxita', en bítirö rö'ö za lu bëla' rön quia'.



<sup>25</sup> Nupa biti' ta'lé'e neda' dxí'a tu'titaj neda'.  
Cate' ta'lé'e neda', tu'tá ícjaguequi.  
<sup>26</sup> Gúcalen neda', Xana' Dios.  
Lu yöl-la' dxí'i ladxi' quiu' busölá neda'.  
<sup>27</sup> Ben ga iléquibe'e rácalen cazu' neda'.  
Nun cazu' Li' lè ni, Xan.  
<sup>28</sup> Tu'dxía neda' dö', pero Li', ben ga gaca dxí'a quia'.  
Cate' ila'yasé', ulu'tuí'né',  
pero udzédada' neda', huen dxin quiu'.  
<sup>29</sup> Ben ga ulu'gá'ana cá'asö nupa tu'zegui' neda' didza',  
en ben ga gaca yöl-la' rutuí' queguequi ca tu lari'  
nabaga' léguequi.  
<sup>30</sup> Len ruá' cuina', zían luzuí' guía'-né' Xanru': "Xclenu",  
en ladaj bönachi zían cu'a Lè' yöl-la' ba,  
<sup>31</sup> tu' zuíné' cuita lè'e ibèla nu riyadzaj riyudxi  
para usólé' nu na' lu ná'agaca nupa tu'siúdxí bö' naca  
caz nu na'.

**110** Xanru' Dios gudxé' Xana': "Gurö'i cuita lè'a ibèla  
cate' gunra' ga ulu'zechu zxíbigaca lo'  
nupa biti' ta'lé'e Li' dxí'a."

<sup>2</sup> Ga zoè' yödzo Sión gusól-lè'e Xanru' yöl-la' unná bē'  
quiu',  
gunné': "Gunná be'e nupa biti' ta'lé'e Li' dxí'a.

<sup>3</sup> Ulu'dödi cúinguequi lu no'o bönachi quiu'  
cate' sí'u yöl-la' unná bē' quiu'  
tu' napu' yöl-la' lachi que le naca lá'ayi."

Ila'cuá' bí'i bönni' ga zu' ca ribó'o buzén zílado'.

<sup>4</sup> Runé' tsutsu xtídzé'e Xanru', en biti' utsé'e le, rnné':  
"Tsaz nacu' bixúz ca na' gúquié' Melquisedec bixúz."

<sup>5</sup> Zoa cazé' Xanru' cuita lè'u ibèla.  
Ucul-lè' bönni' ta'nná bē'e cate' idxín dza usiúdxé'  
luyú.

<sup>6</sup> Uchí'a usörö'e' quégaca bönachi yúgu'tè yödzo izá'a,  
ate' il' yödzo'lió len bèla' rön quéguequi.  
Uzötjé' nupa ta'nná bē' zían lu yödzo izá'a.

<sup>7</sup> Gú'jé' nisa beaj ra' nöza,  
en ní'a que lè ni huóaca ládxé'e.

**111** ¡Gulí'cu'è yöl-la' ba Xanru'!  
Idú ládxá'a rea'-né' Xanru': "Xclenu'."

Runa' caní tsaxón len bönni' tsahui' zían ga na'  
nudúbigaca bönachi queé'.

<sup>2</sup> Zxön nácagaca le nuné' Xanru'.

Yúgu'tè nupa ta'yaza ládxí'gaca lè na' bené' tu'sèda ca  
nácagaca.

<sup>3</sup> Idútè dxí'a nácagaca, en nayépisètèrögaca le nuné'  
Lè',

ate' idiá'tica'sö le naca tsahui' queé'.

<sup>4</sup> Chinuné' ga tsójneru' yugu' le bené', le tun ga  
rubániru'.

Náquié' Xanru' dxí'i ladxi', en ruí'i ládxé'e ré'u.

<sup>5</sup> Rugahué' nupa tadxi Lè'.

Rójnética'sé' didza' dzaga núnlené' bönachi queé'.

<sup>6</sup> Buzéajni'iné' bönachi queé' ca naca yöl-la' huáca  
quégaca le nuné',

le bené' ga gula'dé'li'né' xiyúgaca bönachi izá'a.

<sup>7</sup> Tsahui', en idútè li nácagaca le núngaca lu në'e.

Nácagaca tsutsu yúgu'tè xibá gunná bē'e.

<sup>8</sup> Rucuá'tica'sé' tsutsu xibá queé',

en rusudxiné' léguequi lu le naca idútè li, en le naca  
tsahui'.

<sup>9</sup> Gusól-lè'e Nu buá'uö bönachi queé'.

Tsaz nuzóé' didza' dzaga nuné'.

Lá'ayi, en ba'a ladxi' naca Lè'.

<sup>10</sup> Lu yöl-la' radxi queé'ru' Lè' risí loru' ridé'li'ru' yöl-la'  
réajni'i.

Yúgu'tè nupa tun ca ta'nná bē' xibá queé' nápagaca  
yöl-la' réajni'i.

Ila'cuá'tica'sö nupa ila'gú'u Lè' yöl-la' ba.

**112** ¡Gulí'cu'è yöl-la' ba Xanru'!

¡Bica' ba bönni' na' rádxiné' Xanru',

bönni' na' raza ládxé'e runé' ca gunná bē'e Dios!

<sup>2</sup> Tsépiségaca zxí'ini xí'sóé' bönni' na' yödzo'lió ni.

Gáquié' bica' ba bönni' na' runé' le naca dxí'a.

<sup>3</sup> Lu yu'u lidxé' gata' yöl-la' tsahui',

ate' idiá'tica'sö le naca tsahui' runé'.

<sup>4</sup> Gulén bení' ga ridé' bönni' tsahui' ga na' naca chul-  
la.

Ruzá' ládxé'e que luzé'e, en ruí'i ládxé'e lè', en runé' le  
naca dxí'a.

<sup>5</sup> Gaca dxí'a queé' bönni' ruzá' ládxé'e que luzé'e,  
en runné' que tu chí'isö le riyadzaj que.

Urúajé' dxí'a cate' nu uchí'a usöró' queé'.

<sup>6</sup> Catu caz gaca nu utsá' bönni' na',

ate' sóatica'sö nu tsójné' lè'.

<sup>7</sup> Biti' gádxiné' cate' nu usiyöni lè' le cabí' raca dxí'a.

Ridipa ládxé'e tu' ruzxöni ládxé'e Xanru' Dios.

<sup>8</sup> Dios rutipé' ládxé'e, ate' biti' gádxiné'

cate' idxinrö dza ilé'ené' nuhuó'tjagaca nupa ta'díl-  
lalen lè'.

<sup>9</sup> Idú ládxé'e runödzjé' quégaca bönachi yechi'.

Idiá'tica'sö le naca dxí'a runé'.

Dios uchisé' lè' ga tsépisé'.

<sup>10</sup> Ila'lé'e lè ni nupa tuá' dö', en ila'bó' baguí'isö.

Ilagu zxe láyi'gaca, en ila'niti cúinguequi.

Tsaz initi le ta'zé' ládxí'gaca nupa tuá' dö'.

**113** ¡Gulí'cu'è yöl-la' ba Xanru'!

¡Gulí'cu'è yöl-la' ba, libí'ili' huen dxin queé' Xan-  
ru'!

¡Gulí'cu'è yöl-la' ba Lè' Xanru'!

<sup>2</sup> ¡Cú'uru' yöl-la' ba Lè' Xanru',

cate' risí lo na'a, en yugu' iz sí' zaca!

<sup>3</sup> ¡Ga naguela' ga rilén gubidza ga ridxintè ga ribía,

cú'uru' yöl-la' ba Lè' Xanru'!

<sup>4</sup> ¡Nayépisètèrè' Xanru' Dios ca yúgu'tè yödzo izá'a!

¡Nazxóntèrö yöl-la' zxön queé' ca naca lúzxiba!

<sup>5</sup> ¿Nuzxi caz zoa naca ca náquié' Xanru' Dios?

Ró'e rinná bē'e ga na' nayépisètèrè'.

<sup>6</sup> Ruzötaj cuiné' para uyúé'

le dè lúzxiba, en le dè luyú ni.

<sup>7</sup> Ruchisé' nupa nácagaca yechi', rubéajé' léguequi lu

bèchtö yu.

Ruchisé' nupa ta'yadzaj, rubéajé' léguequi lu dö bēbu.

<sup>8</sup> Runé' ga ta'bö'len nupa ta'nná bē'.

Ta'bö'len nupa ta'nná be'e bönachi queé'.

<sup>9</sup> Runé' ga zóanu nigula huödx yu'u lídxinu.

Rudzeja ládxí'nu tu' runé' ga nacuá'abí' zxí'ininu.

¡Gulí'cu'ë yöl-la' ba Xanru'!

**114** Cate' bila'rúaj bönachi Israel luyú Egipto  
bila'rúajë' xzí'ini xí'sóë' Judá ladaj nupa tu'í  
didza' izá'a.

<sup>2</sup> Xzí'ini xí'sóë' Judá guláquië' ca lidxë' Xanru' Dios,  
ate' gulaca bönachi Israel nupa rinná bé'enë' Dios.

<sup>3</sup> Lahuë' Dios bubiga' nísado',  
ate' bubí'í nisa yegu Jordán.

<sup>4</sup> Gula'xiti' gu'á xzön ca yugu' bö'cu' xzila' biguiú',  
ate' gula'xiti' ca' gu'ado' ca yugu' bö'cu' xzila'do'.

<sup>5</sup> ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'í nisa quiu'?

<sup>6</sup> ¿Bi raca queé'li', gu'á xzön, tu' rixítí'li' ca yugu' bö'cu'  
xzila' biguiú'?

¿Bi raca queé'li', gu'ado', tu' rixítí'li' ca yugu' bö'cu'  
xzila'do'?

<sup>7</sup> Guzxizi lahuë' Xanru', yödzülió.

Guzxizi lahuë' Dios queë' Jacob.

<sup>8</sup> Benë' Dios ga gulaj nisa tu' lë'e guió'jto'o,  
en benë' ga bö'aca le guca guió'j jara tu ga rilén nisa.

**115** Calëga queé'tu', Xan, calëga queé'tu',  
pero que lo' gaca yöl-la' ba

tu' nacú' dxí'í ladxí', en le naca idútë li.

<sup>2</sup> ¿Bizx que ta'nná bönachi yugu' yödzü izá'a:

"Gazxi caz zoë' Dios quégaquië'?"

<sup>3</sup> Zoë' Dios queé'ru' yehua' yubá.

Runë' le raza ladxë'ë gunë'.

<sup>4</sup> Néquiquequini plata, en oro budó' quégaca bönachi  
izá'a na',

yugu' le núngaca lu ní'a lu na' bönachi.

<sup>5</sup> Nacuá' ru'í'iguequi, pero bití' gaca ilu'í'í didza'.

Nacuá' guió'j lógaca, pero bití' gaca ila'lë'e.

<sup>6</sup> Nacuá' nágagaca, pero bití' gaca ila'yöni.

Nacuá' xzíniguequi, pero bití' gaca ila'lë'e.

<sup>7</sup> Nacuá' ná'agaca, pero bití' bi gaca ila'gán.

Nacuá' ní'agaca, pero bití' gaca ila'zá'.

Bití' gaca ilún bö lubá'agaca.

<sup>8</sup> Nupa tun budó' guió'j budó' yaga ilaca ca nácagaca  
budó' na',

nú'títës nu ruzxöni ladxí' budó' guió'j budó' yaga.

<sup>9</sup> Libí'ili', bönachi Israel, bulí'xzöni ladxë'ë Xanru' Dios.

Rácalen cazë' libí'ili', en rapa chí'ë libí'ili'.

<sup>10</sup> Libí'ili', xzí'ini xí'sóë' Aarón, bulí'xzöni ladxë'ë Xanru'  
Dios.

Rácalen cazë' libí'ili', en rapa chí'ë libí'ili'.

<sup>11</sup> Libí'ili' na' rádxili'-në' Dios, bulí'xzöni ladxë'ë Xanru'  
Dios.

Rácalen cazë' libí'ili', en rapa chí'ë libí'ili'.

<sup>12</sup> Xanru' Dios ru'í'í ladxë'ë rë'u, en gunë' ga gaca dxí'a  
queé'ru'.

Gunë' ga gaca dxí'a quégaca bönachi Israel.

Gunë' ga gaca dxí'a quégaca xzí'ini xí'sóë' Aarón.

<sup>13</sup> Gunë' ga gaca dxí'a quégaca nupa tadxi Lë',  
nupa na' nácagaca cá'asö, en nupa na' nayépisëgaca.

<sup>14</sup> Gunë' Xanru' Dios ga tsan le nequi queé'li',  
lë na' nequi queé'li', en le nequi quégaca xzí'inili'.

<sup>15</sup> Raca ladxá'a gunë' Xanru' ga gaca dxí'a queé'li'.

Náquië' Nu ben lúxiba, en luyú ni.

<sup>16</sup> Nequi queë' Xanru' Dios lúxiba xitsá',  
pero nudödë' lu ná'agaca bönachi luyú ni.

<sup>17</sup> Nupa chinátigaca bití' gaca ila'gú'u Xanru' yöl-la' ba,  
en calëga nupa nacué' dxisö lataj chul-la que yöl-la'  
guti.

<sup>18</sup> ¡Cú'uru' yöl-la' ba Xanru' Dios  
na'a dza, en yúgu'të dza sí' zaca!  
¡Gulí'cu'ë Xanru' yöl-la' ba!

**116** Nadxí'ida'-në' Xanru' Dios, tu' riyönnë'  
le rulidza' Lë', en le rinábida'-në'.

<sup>2</sup> Ruzé' naguë' chí'a.

Que lë ni na' ulidza' Lë' tsanni ni zoa' nabana'.

<sup>3</sup> Guzóa bönadxi quia' gátia',  
en guyu'a tsöbi que lataj chul-la que yöl-la' guti,  
ate' gusëbi ladxá'a, en bu'ínide'eda' ladxá'a.

<sup>4</sup> Ní'irö bulidza'-në' Xanru' Dios, gunní'a:  
"Ráta'yua' lo', Xan, usóló' neda'."

<sup>5</sup> Xanru' Dios ruzá' ladxë'ë queé'ru', en náquië' tsahuí'.  
Dios queé'ru' ru'í'í ladxë'ë rë'u.

<sup>6</sup> Rapa chí'ë Xanru' nupa nácagaca do' ladxí'.  
Bulu'xicja bönachi neda', ate' busölë' neda'.

<sup>7</sup> Buzí' ladxí' bö' naca caza',  
tu' runë' Xanru' Dios ga raca dxí'a quia'.

<sup>8</sup> Busöló' bö' naca caza', Xan, lu yöl-la' guti.

Benu' ga bu'í' nisa ribödxí' guió'j lahua',  
en ga bití'rö cuílagaca ní'a.

<sup>9</sup> Ta'a lahuë' Xanru' Dios  
ga nacué' nupa nabángaca.

<sup>10</sup> Guyéajlë'a Lë' cate' gunní'a:  
"Zoa le rusaca' neda' zí'."

<sup>11</sup> Lu yöl-la' rë' böniga quia' gunní'a:  
"Ta'zí' yë' yúgu'të bönachi."

<sup>12</sup> ¿Bizxi caz gu'a-në' Xanru' Dios  
ní'a que yugu' le runë' le ruzí'a xibé'?

<sup>13</sup> Sí' lu na'a yöl-la' rusölá queë' Xanru',  
en ulidza'-në' Xanru' Dios.

<sup>14</sup> Unödztja' queë' Xanru' le guxzí' lu na'a unödztja'.

Raca ladxá'a gaca guna' caní lógaca yúgu'të bönachi  
queë'.

<sup>15</sup> Rúndë'ë Xanru' bal  
yöl-la' guti quégaca nupa néquiquequi quez queë'.

<sup>16</sup> Le nácatë naca' huen dxin quiu', Xan.

Naca' huen dxin quiu', enca' xzí'ininu nigula huen dxin  
quiu'.

Busedxu' le biröli neda'.

<sup>17</sup> Cu'a lo' le unödztja' quiu', en gu'á' Li': "Xclenu",  
en ulidza' Li', Xan.

<sup>18</sup> Unödztja' queë' Xanru' le guxzí' lu na'a unödztja'.

Raca ladxá'a gaca guna' caní lógaca yúgu'të bönachi  
queë'.

<sup>19</sup> Ga zoa lö'a que yu'u lidxë' Xanru',  
lu yödzü Jerusalén guna' caní.

¡Gulí'cu'ë yöl-la' ba Xanru' Dios!

**117** ¡Gulí'cu'ë yöl-la' ba Xanru' Dios, libí'ili', bönachi  
yúgu'të yödzü izá'a!

¡Gulí'cu'ë yöl-la' ba yúgu'të'li',

<sup>2</sup> tu' buxönë' queé'ru' yöl-la' dxí'í ladxí' queë',  
en zóatica'sö le naca idú ladxí' queë'!

¡Yöl-la' ba Lë!  
**118** ¡Gulí'guié' Xanru': "Xclenu'", tu' náquié' dxí'a!  
 ¡Zóatica'sö yöl-la' dxí'i ladxí' queé'!  
 2 Ral-la' ilá'nná bönachi Israel:  
 "¡Zóatica'sö yöl-la' dxí'i ladxí' queé'!"  
 3 Ral-la' ilá'nná zxí'ini xí'sóé' Aarón:  
 "¡Zóatica'sö yöl-la' dxí'i ladxí' queé'!"  
 4 Ral-la' ilá'nná nupa tadxí Xanru' Dios:  
 "¡Zóatica'sö yöl-la' dxí'i ladxí' queé'!"  
 5 Cate' gudí'i guzácá'a bulidza'-në' Xanru',  
 ate' bubí'ë didza', en busólé' neda'.  
 6 Zoé' Xanru' cuita' neda', ate' bití' bi gádxida'.  
 ¿Bizxi caz gaca ilún bönachi quia'?  
 7 Zoé' Xanru' cuita' neda' ladaj nupa tácalen neda'.  
 Que lë ni na' idé'li'da' láhuigaca nupa bití' ta'lé'e neda'  
 dxí'a.  
 8 Nácarö dxí'a uzxöni ládxa'a-në' Xanru',  
 en bití' uzxöni ládxa'a nu naca bönáchisö.  
 9 Nácarö dxí'a uzxöni ládxa'a-në' Xanru',  
 en bití' uzxöni ládxa'a nupa ta'nná bë'.  
 10 Bönachi yúgu'të yödzo izá'a gula'gú'u neda' lé'ajlö.  
 Len yöl-la' huáca queé' Xanru' buxícja' léguequi.  
 11 Gula'gu'ë neda' lé'ajlö. Ön, gula'gu'ë neda' lé'ajlö,  
 pero len yöl-la' huáca queé' Xanru' buxícja' léguequi.  
 12 Gula'gu'ë neda' lé'ajlö ca yugu' buzú' rön,  
 pero gula'nítié' ca tu lu guí' guixí' yötsí' bidx.  
 Len yöl-la' huáca queé' Xanru' buxícja' léguequi.  
 13 Bulu'dxí'gué'ë neda' ga bidxintë guzóa tsöjtsö'a,  
 pero gúcalenë' Xanru' neda'.  
 14 Naca cazë' Xanru' yöl-la' huáca quia', en le rul-la'.  
 Naca cazë' yöl-la' rusölá quia'.  
 15 Lu yu'u lídxigaca nupa nácacaca tsahuí'  
 ru'u bö que nupa ta'bödxi'a lu yöl-la' rudzeja quégue-  
 qui tu' nulágaca.  
 ¡Runda' dxin në'ë ibëla Xanru'!  
 16 ¡Nayépisëtë'rö në'ë ibëla Xanru'!  
 ¡Runda' dxin në'ë ibëla Xanru'!  
 17 Bití' ca' gátia', pero soa' ibana',  
 ate' usiyönda' bönachi le nunë' Xanru'.  
 18 Xanru' bëndë'ë neda' xiguia',  
 pero bití' budödë' neda' lu yöl-la' guti.  
 19 Gulí'salaj quia' ga ta'yazë' bönní' tsahuí'.  
 Tsu'a ní', en guía'-në' Xanru': "Xclenu'."  
 20 Naca lataj ni ga riyaza cazë' Xanru' Dios.  
 Ila'yazë' ni bönní' tsahuí'.  
 21 ¡Guía' Lí: "Xclenu'" Xan, tu' bubí'u didza' quia',  
 en tu' nacu' Nu rusölá neda'!  
 22 Zoa tu guió'j bulu'zóé' tsölá'alö bönní' tu'cu'ë zö'ö.  
 Na'a naca guió'j na' guió'j len squin zö'ö.  
 23 Benë' Xanru' Dios ga naca caní.  
 Naca tu le run ga rubániru'.  
 24 Dza ni naca dza nunë' Xanru' Dios.  
 Udzéjaru', en uzí'iru' xibé.  
 25 Ráta'yutu' lo', Xan, usöló' netu'.  
 Ráta'yutu' lo', Xan, gunu' ga gaca dxí'a queé'tu'.  
 26 Bica' ba bönní' na' zë'ë uláz queé' Xanru'.  
 Guntu' Lí' zxön lu yu'u lídxé' Xanru'.  
 27 Dios náquié' Xanru', ate' bennë' queé'ru' bení'.

Bulí'nödzej queé' Dios yugu' bëdxi renni' uzéguí'ru'-  
 ba' lahué' lu bucugu queé'.  
 28 Naca cazu' Lí' Dios quia', ate' guía' Lí: "Xclenu'."  
 Naca cazu' Lí' Dios quia', ate' guna' Lí' zxön.  
 29 ¡Gulí'-guié' Xanru' Dios: "Xclenu'" tu' náquié' dxí'a!  
 ¡Zóatica'sö yöl-la' dxí'i ladxí' queé'!

### Le run le gunná bé'enë' Xanru' rë'u

**119** ¡Bica' ba nupa nácacaca idú dxí'a tsahuí'do',  
 nupa na' tun ca rnna xibá naguixjé' Xanru'!  
 2 ¡Bica' ba nupa tun ca nácacaca le benë' ba nalí,  
 en idú ládxi'gaca ta'zé ladxí' Lë!  
 3 Bití' bi le cabí naca tsahuí' tun,  
 pero tun ca nácacaca le nulu'ë lahui.  
 4 Nuzú' queé'tu' xibá quiu', Xan,  
 para idú ládxi'tu' guntu' ca ta'nná.  
 5 Raca ládxa'a gúntica'sa' ca ral-la' guna',  
 en guna' yugu' le gunná bë'u.  
 6 Ní'irö bití' ca' utuí'ida'  
 channö gapa chí'a yugu' le gunná bë'u.  
 7 Lu yöl-la' ba'a ladxí' quia' guía' Lí: "Xclenu'"  
 cate' chinazí'a le buchí'a busöró'u le naca tsahuí'.  
 8 Guna' ca ta'nná le gunná bë'u.  
 Bití' usán no'o neda' tsaz.

### Ral-la' gunru' ca gunné' Dios

9 ¿Nacxi gaca gunbí' tu bí'i bönní' ga ugá'ana tsahuí'  
 ládxi'do'obi'?  
 Ral-la' gunbí' ca rnna xtídzú'u.  
 10 Idú ládxa'a rizé ládxa'a Lí, Xan.  
 Bití' gu'u lataj ucá'ana' yugu' le gunná bë'u.  
 11 Lu icja ládxi'da'ahua' runa' ca rnna xtídzú'u,  
 para cabí guna' dul-la' lo' Lí.  
 12 ¡Bica' xibó', Xan!  
 Busedi neda' yugu' le gunná bë'u.  
 13 Len ruá' cuina' ru'a didza'  
 ca nácacaca yúgu'të le rusedi quézinu' netu'.  
 14 Rudzédjada' ca nácacaca le nunu' ba nalí  
 ca nu rudzeja tu' dë yöl-la' tsahuí' que.  
 15 Sa' ládxa'a ca nácacaca xibá quiu'  
 en gü'í ládxa'a yugu' le nulú'u lahui.  
 16 Udzédjada' ca nácacaca le gunná bë'u.  
 Bití' gal-la ládxa'a xtídzú'u.

### Rudzédjade'eru' runru' le rnna cazë' Dios

17 Ben ga gaca dxí'a quia' neda', huen dxin quiu', Xan,  
 para soa' ibana', en guna' ca rnna xtídzú'u.  
 18 Gusalaj guió'j lahua' para gaca ilé'eda'  
 le tun ga rubánitu' nazúajgaca lu xibá naguixju' Lí'.  
 19 Zoa' yödzo'lió ca tu bönní' ridasö.  
 Bití' ucachu'u yugu' xibá nunu' ga bití' gaca ilé'eda'  
 léguequi.  
 20 Yúgu'të dza ruhuí'ini ládxa'a tu' rizé ládxa'a  
 yugu' le nusédinu' netu' ca ral-la' guntu'.  
 21 Ruzenu' le bach nupa tun ba zxön cúinguequi, en  
 nupa nudxíagaca dö,  
 nupa na' tu'zóa tsölá'alö yugu' xibá gunná bë'u.

<sup>22</sup> Biti' gu'u lataj nu guequi neda' zi' o nu ucá'ana neda' cá'asö,  
tu' runa' ca ta'nná le nunu' ba nalí.  
<sup>23</sup> Sal-la' ta'bó' nupa ta'nná bē', en ta'nné quia',  
rizá' ládxa'a neda', huen dxin quiu', ca nácgaca le  
gunná bē'u.  
<sup>24</sup> Raza ládxa'a yugu' le nunu' ba nalí.  
Nácgaca le tu'zéajni'i neda'.

#### Idú ládxi'ru' gunru' ca gunná cazē Dios

<sup>25</sup> Nadinni lu yu bö' naca caza'.  
Busubán ládxa'a, ugunu' dxin xtídzú'u.  
<sup>26</sup> Buluí'ida' Lí' yugu' le nuna', ate' bubí'u didza'.  
Busedi neda' yugu' le gunná bē'u.  
<sup>27</sup> Buzéajni'i neda' ca nácgaca xibá quiu',  
ate' sa' ládxa'a ca nácgaca le nunu', le tun ga rubáni-  
tu'.  
<sup>28</sup> Ribödxí bö' naca caza' tu' risébida' ládxa'a.  
Butipa ládxa'a, ugunu' dxin xtídzú'u.  
<sup>29</sup> Ben ga biti' guna' le cabí sa'yéaj,  
en buzá' ladxí' quia' xibá naguixju' Lí'.  
<sup>30</sup> Guró'a' le naca idútē li para guna' ca rnna.  
Nuzó'a' lahua' yugu' le nusédinu' netu'.  
<sup>31</sup> Nazí' lu na'a yugu' le nunu' liná' lo.  
Biti' gu'u lataj bi gun ga utuí'ida', Xan.  
<sup>32</sup> Guna' ca ta'nná xibá gunná bē'u,  
tu' rutipa cazu' ládxa'a.

#### Ré'eniru' tséajni'iru' xtídzē'ē Dios

<sup>33</sup> Busedi neda', Xan, ca ta'nná le gunná bē'u,  
ate' gun chí'a léguequi ga idxinrö dza udxi.  
<sup>34</sup> Benna quia' yöl-la' réajni'i para gun chí'a xibá quiu',  
en para idú ládxa'a guna' ca ta'nná.  
<sup>35</sup> Ben ga guna' ca ta'nná le gunná bē'u,  
tu' raza ládxa'a guna' ca ta'nná xibá na'.  
<sup>36</sup> Ben ga gü'i'i ládxa'a yugu' le nunu' ba nalí,  
para cabí gü'i'i ládxa'a yöl-la' ruhuidí'.  
<sup>37</sup> Buchí'a guió'j lahua' para cabí uyú'a' le cabí nazaca'.  
Butipa ládxa'a para guna' le uluí'inu' netu'.  
<sup>38</sup> Ben tsutsu didza' bé'lenu' neda', huen dxin quiu',  
para gádxida' Lí'.  
<sup>39</sup> Bucuita ga zoa' nu rudidza' yudxi neda', lē na' rádxi-  
da'  
tu' nácgaca dxí'a tsahui' le nusédinu' netu' ca guntu'.  
<sup>40</sup> Buyútsöca', rizé ládxa'a yugu' xibá quiu'.  
Busubán ládxa'a, ugunu' dxin le tsahui' quiu'.

#### Ruzxöni ládxi'ru' xtídzē'ē Dios

<sup>41</sup> Lu yöl-la' dxí'i ladxí' quiu' buyú neda', Xan,  
en busölá neda' ca rnna xtídzú'u gunu'.  
<sup>42</sup> Ubi'a didza' bi guía' nu run ga rutuí'ida', innía':  
"Ruzxöni ládxa'a xtídzú'u", Xan.  
<sup>43</sup> Biti' ucuítu' tsaz didza' idútē li lu ru'a  
tu' runa' löza yugu' le nusédinu' netu'.  
<sup>44</sup> Gúntica'sa' ca ta'nná xibá naguixju' Lí'  
yúgu'tē dza, en yúgu'tē iz sí' zaca.  
<sup>45</sup> Lu yöl-la' rusölá quiu' soa' ibana'

tu' bē' ládxa'a guna' ca ta'nná bē' xibá quiu'.  
<sup>46</sup> Gu'a didza' que le nunu' ba nalí lógaquie' bönni'  
ta'nná bē'ē  
en biti' ca' utuí'ida'.  
<sup>47</sup> Tsaza ládxa'a yugu' xibá gunná bē'u,  
yugu' lē na' nadxí'ida'.  
<sup>48</sup> Guna' ca' ca ta'nná xibá nunu', lē na' sē ládxa'a,  
en sa' ládxa'a ca nácgaca le gunná bē'u.

#### Zóatica'sö xtídzē'ē Dios

<sup>49</sup> Yöjné didza' na' bé'lenu' neda', huen dxin quiu',  
tu' benu' ga runa' löza le.  
<sup>50</sup> Didza' na' ruhué tsahui' neda' cate' riguí'i rizáca'a,  
tu' tu'subán ládxa'a didza' bē'u.  
<sup>51</sup> Tu'títjalē'e neda' nupa tun ba zxön cuínguequi,  
pero biti' ca' usana' xibá naguixju' Lí'.  
<sup>52</sup> Röjneda' yugu' le busédinu' netu' dza ni'te, Xan,  
ate' lē na' ruhué tsahui' neda'.  
<sup>53</sup> Lu yöl-la' ridzá'a quia' rö'a bö'niga ni'a quégaca nupa  
tuá' dö',  
nupa na' tu'cá'ana xibá naguixju' Lí'.  
<sup>54</sup> Rul-la' ca nácgaca le gunná bē'u.  
Zoa' ni ca tu bönni' ridé' zítu'.  
<sup>55</sup> Chí'i dzó'ölö röjneda' Lo', Xan,  
en run chí'a xibá naguixju' Lí'.  
<sup>56</sup> Nacuá'len neda' le ruzí'a xibá  
ate' runa' ca rnna yugu' xibá quiu'.

#### Raza ládxi'ru' xtídzē'ē Dios

<sup>57</sup> Nacu' Lí', Xan, le ruzí'a xibé.  
Chigunnía' guna' ca rnna xtídzú'u.  
<sup>58</sup> Idú ládxa'a inábida' Lí' sóalenu' neda'.  
Buéchi' ladxí' neda' ca rnna xtídzú'u gunu'.  
<sup>59</sup> Guzá' ládxa'a ca nácgaca le runa',  
ate' bubí'i ládxa'a para guna' ca rnna le nunu' liná' lo.  
<sup>60</sup> Bénd'a'a bayúdx, en biti' gudzedá'  
para guna' ca rinná bē' xibá quiu'.  
<sup>61</sup> Bönachi zían bönachi tuá' dö' gula'gú'u neda' lé'ajlō,  
pero biti' gul-la ládxa'a xibá naguixju' Lí'.  
<sup>62</sup> Gulahuéla riyasa', en rigu'a Lí' yöl-la' ba  
tu' nácgaca tsahui' yugu' le nusédinu' netu'.  
<sup>63</sup> Runa' tsözxón nupa tadxi Lí',  
enca' nupa tun ca rnna xibá quiu'.  
<sup>64</sup> Ridxín idútē yödzülió yöl-la' dxí'i ladxí' quiu', Xan.  
Busedi neda' yugu' le gunná bē'u.

#### Naca le saca' le gunná cazē Dios

<sup>65</sup> Benu' quia' neda', huen dxin quiu', le naca dxí'a,  
ca rnna xtídzú'u gunu', Xan.  
<sup>66</sup> Busedi neda' yöl-la' réajni'i idú, en yöl-la' raca yenni',  
tu' réajlē'a yugu' xibá gunná bē'u.  
<sup>67</sup> Zí'alö cate' buzötju' neda' gudá' nanitia',  
pero na'a runa' ca rnna xtídzú'u.  
<sup>68</sup> Idú dxí'a tsahui' nacu', en runu' le naca dxí'a.  
Busedi neda' yugu' le gunná bē'u.  
<sup>69</sup> Nupa tun ba zxön cuínguequi ta'z'í' yē' ca naca quia',  
pero idú ládxa'a guna' ca rnna xibá quiu'.

<sup>70</sup> Chul-la niti naca icja ládxi'do'guequi,  
pero raza ládxa'a neda' xibá naguixju' Li'.  
<sup>71</sup> Naca dxi'a buzötju' neda'  
para bizédida' yugu' le gunná bë'u.  
<sup>72</sup> Nácagacarö dxi'a quia' xibá rinná bë'u  
ca nácagaca gayuá' gayuá'sö dumí oro, en plata.

#### Naca tsahui' le gunná cazë' Dios

<sup>73</sup> Len no'ó benu' neda', en buzú' neda'.  
Buzéajni'i neda' para gúnbë'a xibá gunná bë'u.  
<sup>74</sup> Nupa tadxí Li' ila'lé'e neda', en ulu'dzeja ládxi'gue-  
qui,  
tu' runa' löza xtídzú'u.  
<sup>75</sup> Nözda' naca tsahui' ca ruchí'a rusöróu' quia' neda',  
Xan,  
ate' lu yöl-la' li ladxí' quiu' busaca' zí'u neda'.  
<sup>76</sup> Na'a, lu yöl-la' dxi'i ladxí' quiu' buë tsahui' neda',  
ca rnna didza' chibé'lenu' neda', huen dxin quiu'.  
<sup>77</sup> Gudá duhuechi' ládxi'u neda' para soa' ibana',  
tu' raza ládxa'a xibá naguixju' Li'.  
<sup>78</sup> Ben ga ulu'tuí' nupa tun ba zxön cuínguequi,  
tu' gula'nné quia', en bití' bi bena' quéguequi,  
pero neda' sa' ládxa'a ca naca xibá quiu'.  
<sup>79</sup> Ral-la' udxín quia' nupa tadxí Li',  
nupa na' núnbë'gaca le nunu' ba nalí.  
<sup>80</sup> Ben ga udxín ca rnna le gunná bë'u,  
para cabí utuí'ida'.

#### Runë' Dios ca rnna xtídzë'ë

<sup>81</sup> Rudú ládxa'a tu' riböza' yöl-la' rusölá quiu',  
pero runa' löza xtídzú'u.  
<sup>82</sup> Chirequi ichul-la lahua' tu' rizëda' ládxa'a xtídzú'u,  
rnní'a: "¿Bátaxi huë tsaú'u neda'?"  
<sup>83</sup> Caní raca tu' naxú'unida' ca tu buzudi guídi nal-la'  
lahui guí',  
pero catu caz gal-la ládxa'a yugu' le gunná bë'u.  
<sup>84</sup> ¿Bál-laxi dza soa' ibana' neda', huen dxin quiu'?  
¿Bátaxi usiúdxu' nupa ta'bia no neda'?  
<sup>85</sup> Nupa tun ba zxön cuínguequi gula'chó'öna tu yeru  
ga tsöjbixa',  
nupa na' bití' tun ca rnna xibá naguixju' Li'.  
<sup>86</sup> Idútë li nácagaca yúgu'të xibá gunná bë'u.  
Lu yöl-la' rizí' yë' quéguequi ta'bia no neda'.  
¡Gúcalen neda'!  
<sup>87</sup> Gula'zóa ulu'sunítië' neda' lu yödzülió ni,  
pero bití' busán na'a xibá quiu'.  
<sup>88</sup> Lu yöl-la' dxi'i ladxí' quiu' busubán ládxa'a,  
para gapa chí'a le nunu' ba nalí len ruá' cuinu'.

#### Réajlë'ëru' xtídzë'ë Xanru'

<sup>89</sup> Rulidza' Li', Xan.  
Tsaz naguixju' xtídzú'u yehua' yubá.  
<sup>90</sup> Gunu' ca rnna xtídzú'u quégaca bönachi na'a dza,  
en yúgu'të dza sí' zaca.  
Gudixaj cazu' yödzülió, ate' idía'tica'sö.  
<sup>91</sup> Ní'a que le gunná bë'u nacua' caz yúgu'të ga ridxin-  
të na'a dza,

tu' tun xichinu' yúgu'të lë na'.  
<sup>92</sup> La'tu' cabí raza ládxa'a xibá naguixju' Li',  
chigunítia' lu le busaca' zí' neda'.  
<sup>93</sup> Catu caz gal-la ládxa'a yugu' xibá quiu',  
tu' busubanu' ládxa'a ní'a quéguequi.  
<sup>94</sup> Néquida' quiu'.  
¡Busölá neda', tu' ruí'i ládxa'a xibá quiu'!  
<sup>95</sup> Nupa tuá' dö' ta'bó' nisi neda' para ulu'suniti neda',  
pero neda' gü'i ládxa'a le nunu' ba nalí.  
<sup>96</sup> Chibilé'eda' ruúdxí que yúgu'të le naca idútë  
yödzülió ni,  
pero catu caz udxí que le gunná bë'u guntu'.

#### Nadxí'iru' xtídzë'ë Xanru'

<sup>97</sup> Nadxí'ide'eda' xibá naguixju' Li'.  
Idú dza rizá' ládxa'a ca naca que.  
<sup>98</sup> Réajni'iröda' ca nupa ta'dá'baga' neda'  
tu' ruí'i ládxa'a yugu' le gunná bë'u, en tu' dá'tica'sa'  
léguequi.  
<sup>99</sup> Réquibe'eröda' ca yúgu'të nupa tu'sedi neda',  
tu' rizá' ládxa'a le nunu' ba nalí.  
<sup>100</sup> Réajni'iröda' ca yugu' bönni' gula,  
tu' rapa chí'a xibá quiu'.  
<sup>101</sup> Gudapa chí'i cuina' para cabí guna' le cabí naca  
tsahui',  
en para guna' ca rnna xtídzú'u.  
<sup>102</sup> Bití' ca' nucá'ana' yugu' le nusédinu' netu',  
le nusedi quézinu' neda'.  
<sup>103</sup> Bica' zxixi nácagaca xtídzú'u.  
Ön, nácagacarö zxixi ca le zxixi que buz.  
<sup>104</sup> Tu'zéajni'i xibá quiu' neda'.  
Que lë ni na' réquida' zí' yúgu'të le cabí naca.

#### Xtídzë'ë Dios ruzení' lu icja ládxi'do'oru'

<sup>105</sup> Ca tu bení' naca xtídzú'u ga ridá',  
en le ruzení' nöza ga ral-la' töda'.  
<sup>106</sup> Guzxí' lu na'a bi guna', en nuna' tsutsu xtídzá'a.  
Gapa chí'a le nusédinu' netu' le naca tsahui'.  
<sup>107</sup> Zoa le rusaca' zí' neda'.  
Busubán ládxa'a, Xan, ugunu' dxin xtídzú'u.  
<sup>108</sup> Guzxí' yöl-la' ba rigu'a Li' len ru'a, Xan,  
en buzéajni'i neda' yugu' le nusédinu' netu'.  
<sup>109</sup> Zóatica'sö bönadxi gátia',  
pero bití' ral-la ládxa'a xibá naguixju' Li'.  
<sup>110</sup> Nupa tuá' dö' bulu'zé tu du yalaj le sön neda',  
pero bití' bucá'ana' xibá quiu'.  
<sup>111</sup> Tsaz nazí' lu na'a le nunu' ba nalí,  
ate' run ga rudzeja ládxa'a.  
<sup>112</sup> Ruí'i ládxa'a gúntica'sa' ca ta'nná le gunná bë'u.  
Guna' caní ga idxintë dza udxí.

#### Nagá'anaru' dxi'a ní'a que xtídzë'ë Dios

<sup>113</sup> Réquida' zí' nupa nácagaca chopá ladxí',  
pero nadxí'ida' xibá naguixju' Li'.  
<sup>114</sup> Nacu' ca tu ga rucachí' cuina', en le run chí'i neda'.  
Runa' löza xtídzú'u.  
<sup>115</sup> Gulí'cuíta ga zoa', libí'ili' ruá'alí' dö',

tu' guna' ca ta'nná le gunná bë'ë Xana' Dios.  
<sup>116</sup> Buzóa neda' tsutsu, ugunu' dxin xtídzu'u, ate' soa' ibana'.

Biti' gu'u lataj utuí'ida' ca naca le runa' löza.  
<sup>117</sup> Buzóa neda' tsutsu, ate' ulá',  
 en gü'ítica'sa' ládxa'a le gunná bë'u.  
<sup>118</sup> Nusán no'ó yúgu'të nupa nusángaca le gunná bë'u,

tu' naca yöl-la' sina' quéguequi le cabí nazaca'.  
<sup>119</sup> Ugú' nupa tuá' dö' luyú ni ca nu rugúa bëbu.  
 Que læ ni na' nadxí'ida' le nunu' ba nalí.  
<sup>120</sup> Rizxizi idütë le nayá' nabana' tu' rádxida' Li',  
 en rádxida' le gaca cate' usiúdxu' bönachi.

#### Ral-la' gunru' ca rnna xtídzë'ë Dios

<sup>121</sup> Bena' le naca tsahui', en le naca li.  
 Biti' usán no'ó neda' lu ná'agaca nupa tu'saca' zí' neda'.  
<sup>122</sup> Nacu' quia' neda', huen dxin quiu', le naca bë' gaca dxí'a quia'.

Biti' gu'u lataj ulu'saca' zí' neda' nupa tun ba zxön cúinguequi.  
<sup>123</sup> Richí guió'j lahua' tu' riböza' yöl-la' rusölá quiu',  
 enca' didza' tsahui' quiu'.  
<sup>124</sup> Lu yöl-la' dxí'i ladxí' quiu' ben quia' neda', huen dxin quiu',  
 ca ré'ëni quézinu' gunu'.  
 Busedi neda' yugu' le gunná bë'u.

<sup>125</sup> Naca' huen dxin quiu'.  
 Benna quia' yöl-la' réajni' para gaca gúnbë'a le nunu' ba nalí.

<sup>126</sup> Chibidxín dza bi gunu', Xan,  
 tu' gula'guítsjë' xibá naguixju' Li'.  
<sup>127</sup> Que læ ni na' nadxí'iröda' xibá naguixju' Li' ca nadxí'ida' oro.

ïÖn, ca oro banéquiní,  
<sup>128</sup> en réquida' náccagacarö dxí'a xibá quiu' ca yúgu'të le dë!

Biti' rilé'eda' dxí'a yúgu'të le cabí naca.

#### Raca ládxi'ru' gunru' ca rnna xtídzë'ë Dios

<sup>129</sup> Run ga rubánida' le nunu' ba nalí.  
 Que læ ni na' bö' naca caza' nazí' lu në'e le.  
<sup>130</sup> Cate' nalá' lahui xtídzu'u, ruzení' queétu'.  
 Run ga ta'yéajni' nupa náccagaca nöxaj ladxí'.  
<sup>131</sup> Gusalja' ru'a, en gunné ládxa'a,  
 tu' guzé ládxa'a xibá gunná bë'u.  
<sup>132</sup> Buyú neda', en buzá' ladxí' quia',  
 ca run cazu' quégaca nupa ta'dxí'i Li'.  
<sup>133</sup> Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.  
<sup>134</sup> Buá'u neda' lu na' nu rusaca' zí' neda',  
 para gaca guna' ca naca xibá quiu'.  
<sup>135</sup> Ben ga gaca bë' nazí' lu no'ó neda', huen dxin quiu',  
 en busedi neda' yugu' le gunná bë'u.

<sup>136</sup> Raca nisa ribödxi' guió'j lahua' ca tu yegu gubó'o,

tu' cabí tun bönachi ca rinná bë' xibá quiu'.

#### Idütë li naca le rnna cazë' Xanru'

<sup>137</sup> Nacu' Li' tsahui', Xan.  
 Dxi'a tsahui' naca le ruchi'a rusöró'u queétu'.  
<sup>138</sup> Nugú'u lu na'tu' le nunu' ba nalí.  
 Naca tsahui', en tsaz zoa.  
<sup>139</sup> Tu' riböza' le naca quiu' run ga régui rilá ládxi'-da'ahua',

ate' gulal-la ladxí' xtídzu'u nupa ta'dá'baga' neda'.  
<sup>140</sup> Idú dxí'a tsahui' naca xtídzu'u.

Que læ ni na' neda', huen dxin quiu', nadxí'ida' le.  
<sup>141</sup> Nöxaj ladxí' naca', ate' tu'cá'ana bönachi neda' cá'asö,

pero bití' ral-la ládxa'a le gunná bë'u.

<sup>142</sup> Zóatica'sö le naca tsahui' quiu',  
 en idütë li naca xibá naguixju' Li'.

<sup>143</sup> Ba bidxín le raca quia', en le rusaca' zí' neda',  
 pero raza ládxa'a xibá gunná bë'u.

<sup>144</sup> Nácatíca'sö tsahui' le nunu' ba nalí.  
 Buzéajni' neda' para soa' ibana'.

#### Ral-la' ulaba ládxi'ru' le gunná cazë' Dios

<sup>145</sup> Idú ládxa'a rulidza' Li'.  
 Bubí'i didza', Xan, ate' guna' ca naca le gunná bë'u.

<sup>146</sup> Rulídzatica'sa' Li'.  
 Busölá neda', ate' guna' ca naca le nunu' ba nalí.

<sup>147</sup> Riyasa' zí'alö ca ritó' yu zila, en rulidza' Li' para gácalenu' neda'.

Riböza' yugu' didza' gu'u.

<sup>148</sup> Chi'i dzó'ölö rubéaja' yëla guió'j lahua',  
 para ulaba ládxa'a ca naca xtídzu'u.

<sup>149</sup> Lu yöl-la' dxí'i ladxí' quiu' buzé nagu' chí'a.

Busubán ládxa'a, Xan, ca naca le nusédinu' netu'.

<sup>150</sup> Ta'biga' nupa tuá' dö' ga zoa' para ila'bía no neda'.  
 Nucá'anagaca xibá naguixju' Li'.

<sup>151</sup> Zu' gala' ga zoa', Xan,  
 ate' idütë li naca le gunná bë'u.

<sup>152</sup> Dza ni'te quez núnbë'a le nunu' ba nalí,  
 en nözda' tsaz nuzú' le.

#### Le gunná cazë' Dios run rë'u tsahui'

<sup>153</sup> Buyú le rusaca' zí' neda', en busölá neda',  
 tu' cabí ral-la ládxa'a xibá naguixju' Li'.

<sup>154</sup> Bubí'i didza' uláz quia', en buá'u neda'.  
 Busubán ládxa'a ca naca xtídzu'u.

<sup>155</sup> Zi'tu' zoa yöl-la' rusölá ga nacua' nupa tuá' dö',  
 tu' cabí tuí' ládxi'gaca le gunná bë'u.

<sup>156</sup> Zxóntërö naca yöl-la' ruhuéchi' ladxí' quiu', Xan.  
 Busubán ládxa'a ca naca le nusédinu' netu'.

<sup>157</sup> Ziángaca nupa ta'bía no neda', en ta'dá'baga' neda',

pero bití' nucá'ana' le nunu' ba nalí.

<sup>158</sup> Biti' rilé'eda' dxí'a nupa nucá'anagaca Li',  
 en bití' tun ca rnna xtídzu'u.

<sup>159</sup> Buyú ca nadxí'ida' xibá quiu', Xan.

Lu yöl-la' dxí'i ladxí' quiu' busubán ládxa'a.

<sup>160</sup> Idútë li náragaca yúgu'të xtídz'u,  
en tsaz nacuá' yúgu'të le nusédinu' netu' le náragaca  
tsahui'.

### Ral-la' udödi cuinru' lu në'ë Dios

<sup>161</sup> Ta'bia no neda' nupa ta'nná bē', en bití' bi bena'  
quéguequi,  
pero runa' bal xtídz'u lu icja ládxi'da'ahua'.  
<sup>162</sup> Rudzéjalenda' xtídz'u,  
ca rudzeja nu rudzöli tu yöl-la' tsahui' zxön.  
<sup>163</sup> Réquida' zí', en bití' rilé'eda' dxi'a le cabí nácatë,  
pero nadxí'ida' xibá naguixju' Lí'.  
<sup>164</sup> Gadxi luzú' tu dza rigu'a Lí' yöl-la' ba,  
ní'a que le nusédinu' netu', le naca tsahui'.  
<sup>165</sup> Ta'böza dxi'a tsáhui'do' nupa nadxí'igaca xibá  
naguixju' Lí',  
en bití' bi run ga røjchégu'gaca.  
<sup>166</sup> Runa' löza yöl-la' rusölá quiu', Xan,  
en runa' ca rna xibá nunu'.  
<sup>167</sup> Yugu' le nunu' ba nalí tun chí'i bö' naca caza',  
ate' nadxí'ide'eda' léguequi.  
<sup>168</sup> Runa' ca ta'nná xibá quiu', en yugu' le nunu' ba nalí  
tu' rilé'e quézinu' yúgu'të le runa'.

### Rudzéjalenu' xtídzë'ë Dios

<sup>169</sup> Ruzé nagu' le rulidza' Lí', Xan.  
Ruzéajni'i neda' ca rna xtídz'u.  
<sup>170</sup> Ruzé nagu' le rinábida' Lí',  
en busölá neda' ca rna xtídz'u gunu'.  
<sup>171</sup> Bē' neda' lataj cu'a Lí' yöl-la' ba,  
tu' nusédinu' neda' le gunná bē'u.  
<sup>172</sup> Bē' lataj gul-la lúdx'a ca naca xtídz'u,  
tu' náragaca tsahui' yúgu'të xibá nunu'.  
<sup>173</sup> Guzátë gácalenu' neda',  
tu' naböa' xibá quiu'.  
<sup>174</sup> Rizé ládxa'a yöl-la' rusölá quiu', Xan,  
en raza ládxa'a xibá naguixju' Lí'.  
<sup>175</sup> Bē' lataj soa ibán bö' naca caza' para cu'a Lí' yöl-la'  
ba,  
en ben ga gácalen neda' le nusédinu' netu'.  
<sup>176</sup> Ridöda' tsölá'alö ca tuba' bö'cu' zxila' nanítiba'.  
Gudá dudilju' neda', huen dxin quiu', tu' cabí ral-la  
ládxa'a xibá nunu'.  
**120** Cate' gudí'i guzác'a bulidza'-nē' Xanru',  
ate' Lē' bubí'ë didza'.  
<sup>2</sup> Busölá bö' naca caza', Xan, lu na' nu rizí' yē',  
en lu na' nu bití' run ca gunná caz.  
<sup>3</sup> ¿Bizxi gunē' quiu' Dios, en bizxi ubí'ë quiu', lí' na' rizí'  
yē'u?  
<sup>4</sup> Ichizē' lí' yugu' yaga lahui tuchi' que nu reaj gudil-la,  
en cu'ë icju' bo' yalaj que ya' yórido'.  
<sup>5</sup> Bica' bayechí' neda' tu' zóasa' yödzo Mesec,  
en zoa' tu lu yu'u guídí quégaca bönachi Cedar.  
<sup>6</sup> Xidzélē'ë chiguzóa bö' naca caza'  
len nupa tu'suniti yöl-la' riböza dxi'a tsáhui'do'.  
<sup>7</sup> Ré'enda' cöza' dxi'a tsáhui'do', pero cate' ru'á'a didza'  
té'ennē' ila'díl-lalen neda'.

**121** Uchisa icja' uyúa' le raca yugu' lu gu'a.  
¿Gazxi za' le gácalen neda'?

<sup>2</sup> Le gácalen neda' za' lu në'ë Xanru'.  
Lē' benē' lúzxiba, en luyú.  
<sup>3</sup> Bití' gu'ë lataj cuilu' ga ridó'.  
Bití' ca' gasi Nu na' run chí'i lí'.  
<sup>4</sup> Buyútsöca', bití' ridödi yēla guiój lahuē',  
en bití' rásiē', Lē' na' rapa chí'ë bönachi Israel.  
<sup>5</sup> Run chí'ë Xanru' Dios lí'.  
Zoē' Xanru' Dios cuitu' ibēla, rigu'ë lí' zxul-la.  
<sup>6</sup> Bití' uzegu' gubidza lí' lahui' dza,  
en bití' bi gun beo' quiu' chí'i dzó'ölö.  
<sup>7</sup> Gun chí'ë Xanru' Dios lí' ga rizó'o, en ga rudxinu',  
dza ni zóaru' na'a, en yugu' dza sí' zaca.  
<sup>8</sup> Xanru' Dios gun chí'ë lí' ga rizó'o, en ga rudxinu',  
dza ni zóaru' na'a, en yugu' dza sí' zaca.  
**122** Budzéjada' cate' gulé bönachi neda', gula'nná:  
"Uyeajru' yu'u lidxē' Xanru' Dios."

<sup>2</sup> Na'a zuíru' ni  
ga nu riyaza yödzo Jerusalén.  
<sup>3</sup> Dxi'ado' gulunē' yödzo Jerusalén,  
ate' naca lachi, en tuz ca røjlözgaca yu'u zxön que.  
<sup>4</sup> Ta'yaza yugu' cö' bönachi queē' Xanru' ga ni  
ca na' nusédinē' Dios bönachi Israel,  
para ila'gú'u yöl-la' ba Xanru' Dios.  
<sup>5</sup> Ta'bó' nupa tu'chí'a tu'söró queēru' ga ni,  
ga ta'bó' ta'nná bē' zxí'ini xí'sóē' David.  
<sup>6</sup> Gulí'nábinē' Dios gunē' ga gaca dxi'a que Jerusalén,  
en ga ulu'z'í' xibé nupa ta'dxi'i yödzo ni yöl-la' tsahui'.  
<sup>7</sup> Dios gunē' ga ila'böza dxi'a tsáhui'do' nupa nacuá'  
yödzo ni,  
en ga ulu'z'í' xibé nupa ta'nná bē' yöl-la' tsahui'.  
<sup>8</sup> Tu' nadxí'ida' yugu' bócha'a, en yugu' böchí' luzá'a,  
rnná: "Gaca yöl-la' riböza dxi ladxí' lu yödzo ni."  
<sup>9</sup> Tu' nadxí'ida' lidxē' Xanru' Dios,  
rinábida'-nē' gunē' ga gaca dxi'a que yödzo ni.

**123** Uchisa lahua' uyúa' ga zu' Lí',  
rö'u rinná bē'u yehua' yubá ní'.

<sup>2</sup> Ca runē' bönní' nadó'o, ruyúē' bi ulu'ë xanē',  
ate' ruyubí' bí'i nigula nadó'o bi ulú'unu nigula xanbí',  
lësca' caní ruyuru' rē'u bi ulu'ë Xanru' Dios,  
ga idxinrö dza uzá' ládxe'ë queēru'.  
<sup>3</sup> Buzá' ladxí' queētu', Xan. Buzá' ladxí' queētu',  
tu' nacuá' nupa tu'cá'ana netu' cá'asö.  
<sup>4</sup> Rudú ládxi'tu' tu' tu'titaj netu' nupa tu'z'í' xibé yúgu'të  
le dē,  
en tu' tu'cá'ana netu' cá'asö nupa tun ba zxön  
cuínguequi.

**124** "La'tu' cabí gúcalenē' Xanru' rē'u",  
ral-la' ila'nná bönachi Israel:

<sup>2</sup> "La'tu' cabí gúcalenē' Xanru' rē'u  
cate' nupa bití' ta'lé'e rē'u dxi'a gula'díl-lalen rē'u,  
<sup>3</sup> la' gulútitē' rē'u  
tu' gula'léde'e rē'u.  
<sup>4</sup> Guca queēru' ca la' usubága'të rē'u nisa,  
en la' uchícjatēru' lu nisa na'.  
<sup>5</sup> La' uchícjatēru' tu lu nisa zila."  
<sup>6</sup> ¡Bica' lá'ayi Xanru' Dios

tu' cabí bi'è lataj nupa bití' ta'l'é'e rë'u dxi'a ulu'suniti rë'u!

<sup>7</sup> Bularu' ca rulaba' biguinnido' tu lu le zön lëba'. Naröza' du yalaj, ate' nuláru'.

<sup>8</sup> Le rácalen rë'u za' lu në'ë Xanru' Dios. Lë' benë' lúzxiba, en lu yu.

**125** Nupa tu'zxoní ládxi'gaca Xanru' Dios nácagaca ca guí'a Sión,

tu' cabí bi gaca utá guí'a na', pero tsaz zoa caz.

<sup>2</sup> Ca ró'gaca guí'a idú gásibi'ilö yödzö Jerusalén, la' canísö zoë' Xanru' Dios idú gásibi'ilö bönachi queë', na'a dza, en yúgu'të dza sí' zaca.

<sup>3</sup> Bití' ral-la' ila'nná bë' nupa tuá' dö' lu xiyúgaca bönachi tsahuí',

para cabí iún ga ilu'ë dö' bönni' tsahuí' na'.

<sup>4</sup> Xan, ben ga gaca dxi'a quégaca nupa nácagaca dxí'a,

en quégaca nupa idú ládxi'gaca tun ca rnna xtídzu'u.

<sup>5</sup> Nupa tu'dödi cuínguequi lu le cabí nácate', ben léguequi xiguia' tsözxón len nupa tuá' dö'. Ben ga ila'cuá' bönachi Israel dxi'a tsahuí'do'.

**126** Cate' Xanru' Dios buch'é'ë bönachi yödzö Sión nupa gula'dzún zi'tu', gúquiru' yélasö rineru'.

<sup>2</sup> Ní'irö idú ládxi'ru' buzxidxiru',

en lu yöl-la' rudzeja queéru' guródxí'aru'.

Ní'irö gulu'i didza' bönachi yugu' yödzö izá'a, gula'n-ná:

"Dios, Xángaquie', benë' le nácagaca zxön, gúcalenë' légaquie'."

<sup>3</sup> Xanru' Dios benë' le nácagaca zxön, gúcalenë' rë'u, ate' ruzí'iru' xibé'.

<sup>4</sup> Buch'é' netu', irúajtu' ga ni nadzuntu', Xan, para gácatu' ca nisa rudxín lu yegu nuhuí'igaca.

<sup>5</sup> Lu yöl-la' rudzeja ila'bódxí'a cate' ila'lapa nupa lu yöl-la' ribödxí queguequi röjözagaca.

<sup>6</sup> Nu bönni' lu yöl-la' ribödxí rizé'ë, nu'ë binnedo' röjözë',

lu yöl-la' rudzeja códxí'ë cate' udxinë', nu'ë le nulapë'.

**127** Channö cabí runë' tsutsu Xanru' Dios tu yu'u, nítisö tunë' dxin bönni' tunë' yu'u na'.

Channö cabí run chí'ë Xanru' Dios tu yödzö, nítisö ruyúë' bönni' na' yu'u lu në'ë yödzö na'.

<sup>2</sup> Nítisö naca rubanu' zílado', en röjoxu' cate' chigúl-lada',

en ragu' le guzxi'u ní'a que le busaca' zi' cuinu', tu' runnë' Xanru' Dios que nu nadxí'inë' cate' ní' rasi nu na'.

<sup>3</sup> Bulí'yú, nácagacabí' xzí'iniru' le runnë' Xanru' Dios queéru',

ate' bí'ido' tu'cuá'anu nigula queéru' nácagacabí' le rubí'ë Xanru' Dios queéru'.

<sup>4</sup> Ca nácagaca yaga lahuí' tuchí' lu na' nu bönni' rejë' gudil-la

nácagacabí' xzí'inë' bönni' zoë' iz cuidí' queë'.

<sup>5</sup> Bica' ba bönni' nacuá'abí' queë' zióntë'öbí'.

Bití' ca' utuí'inë' cate' ru'ë didza' láhuí'gaquie' bönni' tu'chí'a tu'söröë' queë', en lógaca nupa ta'díl-lalen lë'.

**128** Bica' ba yúgu'të nupa tadxi Xanru' Dios, nupa na' tun ca ré'eni quézinë' Lë'.

<sup>2</sup> Cate' gagu' le gata' quiu' ní'a que dxin nun casu', uzi'u xibé lë na', en gaca dxi'a quiu'.

<sup>3</sup> Gácanu nigula quiu' ca tu lubá uva dxía ga naca lö'a lidxu',

ate' ilácabí' xzí'inu' ca yugu' yaga olívodo' ta'bó'öbí' ga ní' ráguli'.

<sup>4</sup> Bulí'yútsöca', caní gáquie' bica' ba bönni' na' rádxinë' Xanru' Dios.

<sup>5</sup> Xanru' Dios zoë' Sión gunë' ga gaca dxi'a quiu', en gu'ë lí' lataj ilé'enu' le dxi'a gaca que yödzö

Jerusalén

yúgu'të dza su' ibanu'.

<sup>6</sup> Dios gu'ë lí' lataj ilé'enu' yugu' xzí'ini xí'sú', en gunë' ga ila'böza dxi'a tsahuí'do' bönachi Israel.

**129** "Zian luzuí gula'bía no netu' ga gudela' nácatu' ra'bando",

huáca ila'nná bönachi Israel:

<sup>2</sup> "Zian luzuí gula'bía no netu' ga gudela' nácatu' ra'bando',

pero bití' gula'delí' ulu'xicja netu'.

<sup>3</sup> Guca tsa bulu'gá'ana-ba' bëdxi lu bëla' cúdzutu', en gulún tunna ga gudödi xiyágaba' bëdxi qué-gaquië'."

<sup>4</sup> Tsahuí' náquie' Xanru' Dios.

Chinachúguë' du quégaca nupa tuá' dö' le gulúgu'i'ni netu'.

<sup>5</sup> Ben ga ulu'tuí'i, en ulu'huécja guz cúdzu'lö yúgu'të nupa bití' ta'l'é'e dxi'a netu', bönachi Sión.

<sup>6</sup> Ben ga ilácagaca ca guíxi'do' da' ícjo'olö yu'u, le ribídxitë cate' ní' naca hué'ënido'.

<sup>7</sup> Bití' gaca ulí në'e nu tsöjchugu le, en bití' gaca nu gachi tsölén guizxi que,

<sup>8</sup> en bití' ta'nná nupa ta'dödi ní':

"Rinábitu'-në' Xanru' Dios gunë' ga gaca dxi'a quiu'. Lu Lë' Xanru' rinábitu' Lë' gunë' ga gaca dxi'a quiu'."

**130** Ga ni nó'tjada' rulidza' Lí', Xan.

<sup>2</sup> Ruzé nagu' chí'a, Xana' Dios.

Ruzëda' nagu' le rinábida' Lí'.

<sup>3</sup> La' nnanu' tsöjnenu' xiguia' nabága'gaca bönachi, çnuzxi caz urúaj tsahuí' lo', Xan?

<sup>4</sup> Runiti lo casu' netu', Xan, para guntu' Lí' bal.

<sup>5</sup> Runa' löza Lí', Xana' Dios. Run löza bö' naca caza' Lí', ate' runa' löza gaca ca rnna xtídzu'u.

<sup>6</sup> Bö' naca caza' runrö löza Lí', Xan, ca tunë' bönni' tapa chí'ë yödzö chí'í dzó'ölö ta'bözë' itó yu zila,

ca tunë' löza itó yu zila yugu' bönni' na'.

<sup>7</sup> Gulí'gún löza Xanru' Dios, libí'ili', bönachi Israel, tu' náquie' dxi'í ladxí' Xanru',

en ruhuá'uë' bönachi Israel.

<sup>8</sup> Xanru' Dios huóá'uë' bönachi Israel

lu yúgu'të xiguia' nabága'gaca.

**131** Bití' run ba zxön cuina', Xan, en bití' rigú'u' cuina' yöl-la' ba,



en bití' ulapa' na'a le nácgaca zxön, en le nácgaca böniga.

<sup>2</sup> Idú ládxa'a nuzóa cuina' nöxaj, en zoa' dxisö. Ca runbí' bí'i hué'eni ruzí' ládxi'bí' cuítanu xiná'abi', ca' riböza bö' naca caza' lu icja ládxi'da'ahua'.

<sup>3</sup> ¡Libí'ili', bönachi Israel, guli'guné' löza Xanru' Dios ga naguela' na'a dza, en yúgu'tè dza sí' zaca!

**132** Rinábida' Lí, Xan, uláz queé' David tsöjnénu' yúgu'tè le gudí' guzáquë'e,

<sup>2</sup> en ca bené' tsutsu xtídzë'e, Xan, en guxzí' lu në'e bi guné' lo',

nacu' Nu nál-latèrö láhuigaquië' xzí'ini xí'sóé' Jacob, gunné':

<sup>3</sup> "Bití' ca' tsu'a lidxa',

en bití' gáta'a le ráti'da',

<sup>4</sup> en bití' gu'a lataj tödi yèla guió'j lahua',

en bití' utsudí' lahua',

<sup>5</sup> ga idxinrö dza ucöza' tu lataj ga soé' Xanru' Dios, le gaca yu'u lidxi Nu na' nál-latèrö láhuigaquië' xzí'ini xí'sóé' Jacob."

<sup>6</sup> Biyönitu' didza' que guí'ina lá'ayi queé' Dios cate' ní' zóatu' Efrata,

ate' budzólitu' le lu xiyúë' Jaar.

<sup>7</sup> Uyéajru' ga na' zoa cazé' Xanru' Dios.

Tseaj ládxi'ru'-nè' ga naca xilibi ní'è.

<sup>8</sup> Gudödi, Xan, ga na' soa cazu' Lí.

Gudá tsözxön len guí'ina lá'ayi que yöl-la' zxön quiu'.

<sup>9</sup> Ben ga sóalen le naca tsahui' yugu' bixúz quiu' ca tu lari' ta'xóé' cúdzu'gaquië'.

Ben ga ilúl-la bönachi quiu' lu yöl-la' rudzeja quéguequi.

<sup>10</sup> Uláz queé' David, huen dxin quiu', rinábida' Lí' cabí' ucá'anú' bönní' na' guró'cazu' Lí'.

<sup>11</sup> Xanru' Dios bené' tsutsu xtídzë'e bi guné' queé' David,

le naca idútè li, ate' Lè' bití' unítië' xtídzë'e na', gunné': "Uzóa' tuè' xzí'ini xí'sú' xilatju' ga inná bé'ëbi'.

<sup>12</sup> Channö ilunbi' xzí'ini xí'sú' ca rna didza' dzaga quia',

en le nuna' ba nalí para uzéajni'ida' légacabi', ilá'nná bé'ëbi' ga rö'u rinná bë'u yúgu'tè dza sí' zaca."

<sup>13</sup> Xanru' Dios nabó'cazé' queé' yödzo Sión.

Raca ládxe'è gaca Sión ga soa cazé' Lè'.

<sup>14</sup> Rnné': "Nácatíca'sö lataj ni ga soa caza' neda'. Soa' ni tu' raca ládxa'a soa' ni.

<sup>15</sup> Guna' ga gátada' le ilágugaca bönachi ni, en guna' ga ulu'huólaj ila'dzé'e yöta xtila nupa ta'yadzaj ta'yudxi lu yödzo ni.

<sup>16</sup> Guna' ga sóalen yöl-la' rusólá yugu' bixúz quia' ca tu lari' ila'xóa cúdzu'gaquië',

ate' ilúl-la bönachi quia' lu yöl-la' rudzeja quéguequi.

<sup>17</sup> Guna' ni ga ilá' lahui yöl-la' unná bë' queé' David.

Guna' ga sóaticasö nu inná bë' xilatjé' bönní' na' nabó'caza'.

<sup>18</sup> Guna' ga sóalen nupa bití' ta'lé'e lè' dxí'a yöl-la' ru-tuí'i

ca tu lari' ilácuguequi, pero tsèpi yösa bení' le dxía icjé'."

**133** Bulí'yútsöca': ¡Bica' dxí'a tsahui' naca cate' nupa nácgaca böchí' luzé'e ta'böza lu yöl-la' tuz quéguequi!

<sup>2</sup> Naca ca le za ta'gú'u ícjaguequi bönachi, le ridzún lu guitsa' láhuiguequi, en bidzún lu guitsa' lúzxuë' Aarón, le bidzún ga ridxintè lu yeni zxé'.

<sup>3</sup> Naca ca buzén le ridinni lu guí'a Hermón, en ca le ribö'a lu guí'a Sión, tu' gunná bë'è Xanru' gaca dxí'a queëru' lu guí'a na', en gata' yöl-la' na'bán idú queëru'.

**134** ¡Bulí'yútsöca'!

¡Gulí'cu'è Xanru' Dios yöl-la' ba, yúgu'tèli' runlí' xichiné' Xanru',

yúgu'tèli' na' zóali' yu'u lidxé' Xanru' chí'i dzó'ölö!

<sup>2</sup> ¡Gulí'chisa ná'alí' ga zóali' lataj lá'ayi queé', en gulí'nná dxí'a queé'!

<sup>3</sup> Xanru' Dios, zoa cazé' yödzo Sión, guné' ga gaca dxí'a queé'li'.

Naca cazé' Nu ben yehua' yubá, en yödzülió ni.

¡Gulí'cu'è yöl-la' ba Xanru' Dios!

**135** ¡Gulí'cu'ú yöl-la' ba La la'ayi queé' Xanru' Dios!

¡Gulí'cu'è yöl-la' ba, libí'ili' runlí' xichiné' Xanru',

<sup>2</sup> libí'ili' na' zuílí' yu'u lidxé' Xanru',

ga na' zóali' lö'a que yu'u lidxé' Dios queëru'!

<sup>3</sup> ¡Gulí'cu'è yöl-la' ba Xanru' Dios tu' náquië' dxí'a!

¡Gulí'gul-la yöl-la' ba que La la'ayi queé', tu' naca lachi!

<sup>4</sup> Nabó'cazé' Xanru' xzí'ini xí'sóé' Jacob para ilaca quez queé'.

Guróë' bönachi Israel para ilequi queé'.

<sup>5</sup> Nözda' nayépisë' Xanru' Dios.

Nayépisëtèrë' ca yugu' dios quégaca bönachi izá'a.

<sup>6</sup> Run cazé' Xanru' ca riyaza ladxi' cazé' yehua' yubá ní', en luyú ni, en lu nísado', en znan lu yu.

<sup>7</sup> Runé' ga rö' böaj gátí'tës luyú ni,

en runé' ga rëpi yösa cate' ralaj guió'j.

Rubéajé' bö' recja ga rapa chí'è le nequi queé'.

<sup>8</sup> Bètië' yugu' bí'i bönní' zí'alö quégaca bönachi Egipto, xzí'inigaca bönachi, en böa' hué'enido' quégacaba' böa' guixí'.

<sup>9</sup> Bené' yugu' yöl-la' huáca zxön le gulaca bë' luyú

Egipto,

yugu' lè na' gulaca queé' Faraón, en quégaca huen xichiné'.

<sup>10</sup> Busunítië' Dios bönachi zían yödzo izá'a, en bëtië' bönní' lo ta'nná bë'è.

<sup>11</sup> Bètië' Sehón, bönní' gunná bé'enë' bönachi Amorreo,

en Og, bönní' gunná bé'enë' bönachi Basán,

en bönní' gula'nná bé'enë' bönachi yödzo nacua' luyú Canaán.

<sup>12</sup> Budödë' xiyúgaquië' bönní' na'

lu ná'agaquië' bönní' Israel, bönachi queé'cazé'.

<sup>13</sup> Tsaz zoa caz Lo', Xan.

Ila'cuá'tíca'sö nupa tsöjnégaca Lí, Xan,

<sup>14</sup> tu' uchí'a usöróu' bönachi queu', Xantu' Dios, en huéchi' ládxi'u nupa tun xichinu'.

<sup>15</sup> Budó' quégaca bönachi yugu' yödzo izá'a néquiniguetqui plata, en oro, yugu' le núngaca lu ní'a lu ná'agaca bönachi.

<sup>16</sup> Zóagaca ruí'iguetqui, pero bití' bi didza' tuí'i.

Zóagaca guió'j lóguetqui, pero bití' bi ta'lé'e.

<sup>17</sup> Zóagaca ná'agaca, pero bití' bi ta'yöni, en bití' ta'guelá' bö' ruí'igaca.

<sup>18</sup> Nupa tun lé'guetqui ilaca ca ná'agaca budó' na', en caní' ilaca yú'gu'té' nupa tu'zxöni ladxí' lé'guetqui.

<sup>19</sup> Libí'ili', bönachi Israel, guli'guí'ë' Xanru' ná'quië' dxí'a. Libí'ili', xzí'ini xí'sóë' Aarón, guli'guí'ë' Xanru' ná'quië' dxí'a.

<sup>20</sup> Libí'ili', xzí'ini xí'sóë' Leví, guli'guí'ë' Xanru' ná'quië' dxí'a.

Libí'ili', núlöli' rádxili'-në' Xanru', guli'guí'ë' Xanru' ná'quië' dxí'a.

<sup>21</sup> Núlöli' zóali' yödzo Sión ral-la' guiéli'-në' Xanru' ná'quië' dxí'a,

tu' zoa cazë' Xanru' Dios yödzo Jesusalén.

¡Guli'cu'ë' yöl-la' ba Xanru'!

**136** ¡Xclenë' Xanru' Dios tu' ná'quië' dxí'a!  
Zóatica'sö yöl-la' dxí'i ladxí' queë'.

<sup>2</sup> ¡Xclenë' Dios nayé'pisëtë're' ca yugu' dios izá'a!  
Zóatica'sö yöl-la' dxí'i ladxí' queë'.

<sup>3</sup> ¡Xclenë' Xanru', nayé'pisëtë're' ca yugu' xángaca bönachi!

Zóatica'sö yöl-la' dxí'i ladxí' queë'.

<sup>4</sup> ¡Xclenë' Dios, tuzë' Lë' runë' yugu' yöl-la' huáca zxön!  
Zóatica'sö yöl-la' dxí'i ladxí' queë'.

<sup>5</sup> ¡Xclenë' Dios, len yöl-la' rácada' queë' benë' lú'xiba!  
Zóatica'sö yöl-la' dxí'i ladxí' queë'.

<sup>6</sup> ¡Xclenë' Dios, gudixjé' luyú' láhuilö nísado!  
Zóatica'sö yöl-la' dxí'i ladxí' queë'.

<sup>7</sup> ¡Xclenë' Dios, benë' gubidza, en beo!  
Zóatica'sö yöl-la' dxí'i ladxí' queë'.

<sup>8</sup> ¡Benë' Dios gubidza para tsení' lahuí' dza!  
Zóatica'sö yöl-la' dxí'i ladxí' queë'.

<sup>9</sup> ¡Benë' Dios beo', en yugu' bö'ljaj para ulu'zení' chí' dzó'ölö!

Zóatica'sö yöl-la' dxí'i ladxí' queë'.

<sup>10</sup> ¡Xclenë' Dios, bë'tië' yugu' bí'i bönni' lo quégaca bönachi Egipto!

Zóatica'sö yöl-la' dxí'i ladxí' queë'.

<sup>11</sup> ¡Bubé'ajë' bönachi Israel ladaj bönachi Egipto na'!  
Zóatica'sö yöl-la' dxí'i ladxí' queë'.

<sup>12</sup> ¡Len yöl-la' huáca zxön queë', en lu yöl-la' nadxí'i queë' benë' caní'!

Zóatica'sö yöl-la' dxí'i ladxí' queë'.

<sup>13</sup> ¡Xclenë' Dios, bubé'ajë' choplö Nísado' Xiná!  
Zóatica'sö yöl-la' dxí'i ladxí' queë'.

<sup>14</sup> ¡Benë' ga gula'dödi bönachi Israel gatsaj láhuí'lö nísado' na'!

Zóatica'sö yöl-la' dxí'i ladxí' queë'.

<sup>15</sup> ¡Lu nísado' na' busunítie' Faraón, en bönni' queë' rö'jáquië' gudil-la!

Zóatica'sö yöl-la' dxí'i ladxí' queë'.

<sup>16</sup> ¡Xclenë' Dios, guché'ë' bönachi queë' la' guixi' ga ní' naca yu bidxi!

Zóatica'sö yöl-la' dxí'i ladxí' queë'.

<sup>17</sup> ¡Xclenë' Dios, bë'tië' bönni' gula'nná' bë'ë', gulá'quië' nal-la!

Zóatica'sö yöl-la' dxí'i ladxí' queë'.

<sup>18</sup> ¡Bë'tië' bönni' gula'nná' bë'ë', dë'da' lu ná'agaquië' yöl-la' unná' bë'!

Zóatica'sö yöl-la' dxí'i ladxí' queë'.

<sup>19</sup> ¡Bë'tië' Sehón, bönni' gunná' bé'enë' bönachi Amorreo!

Zóatica'sö yöl-la' dxí'i ladxí' queë'.

<sup>20</sup> ¡Bë'tië' Og, bönni' gunná' bé'enë' bönachi Basán!

Zóatica'sö yöl-la' dxí'i ladxí' queë'.

<sup>21</sup> ¡Budödë' xiyú'gaquië' lu ná'agaca bönachi queë'!

Zóatica'sö yöl-la' dxí'i ladxí' queë'.

<sup>22</sup> ¡Budödë' le lu ná'agaca bönachi Israel, bönachi tun xichinë'!

Zóatica'sö yöl-la' dxí'i ladxí' queë'.

<sup>23</sup> ¡Yöjnenë' rë'u cate' ní' bugá'anaru' cá'asö!

Zóatica'sö yöl-la' dxí'i ladxí' queë'.

<sup>24</sup> ¡Busölë' rë'u lu ná'agaca nupa gula'díl-lalen rë'u!

Zóatica'sö yöl-la' dxí'i ladxí' queë'.

<sup>25</sup> ¡Rugahuë' yú'gu'të' bönachi!

Zóatica'sö yöl-la' dxí'i ladxí' queë'.

<sup>26</sup> ¡Xclenë' Dios, zoa cazë' yehua' yubá!

Zóatica'sö yöl-la' dxí'i ladxí' queë'.

**137** Ra' yegu nacué' lu yu Babilonia guró'ötu', en gurödxí' yéchi'tu', cate' yöjnetu' yödzo Sión.

<sup>2</sup> Lu yaga ró'gaca yugu' ra' yegu ní' bugála'tu' yugu' le rúl-lalentu'.

<sup>3</sup> Caní' bentu' tu' gula'nabi yudxi nupa gulaché' netu' nadzuntu' ní' gúl-latu'.

Nupa bulu'saca' zi' netu' gula'naba queë'tu' yöl-la' ruzxidxi, gula'nná:

"Guli'gul-la queë'tu' tu le rul-la que yödzo Sión."

<sup>4</sup> ¿Nacxi caz gaca gúl-latu' le rul-la queë' Xanru' ga ni nadzuntu' tu lu yödzo izá'a?

<sup>5</sup> Channö gal-la ládxa'a yödzo Jerusalén, rinábida'-në' Dios ugú'ë' yöl-la' raca que na'a ibëla.

<sup>6</sup> Rinábida'-në' gunë' ga ta' lú'dxa'a chichja' channö cabí' tsöjneda' ladza',

en channö cabí' huí' zxönra' yödzo Jerusalén ca ia'tú' le ruzí'ida' xibé.

<sup>7</sup> Yöjné' le gulunë' xzí'ini xí'sóë' Edom, Xan, le gulunë' dza busiúdxu' yödzo Jerusalén,

ca na' gula'nné': "Guli'quinnaj dëra.

Guli'quinnaj dëra ga idxintë' xilibi zö'ö yödzo na'."

<sup>8</sup> Libí'ili', bönachi Babilonia, libí'ili' rusunítili', bica' ba nu ubí'i queéli' ca na' benli' queë'tu'.

<sup>9</sup> Bica' ba nu quela' yugu' bí'ido' queéli' en uzxuzxaj lé'gacabi' yugu' lu guió'j.

**138** Idú' ládxa'a guía' Li', "Xclenu" Xan.

Gul-la' yöl-la' ba quiu' lógaca le tun zxön bönachi yugu' yödzo izá'a.

<sup>2</sup> Uzóa' zxiba' saca' yudo' lá'ayi quiu', en guía' Li', "Xclenu"

ni'a que Lo', tu' nacu' dxi'i ladxi', en runu' ca rnna didza' bë'u,  
 tu' benu' ca naca lu xtídz'u, en lu le naca ca nazí' lo.  
 3 La' dza ná'asö cate' bulidza' Li', bubí'u didza'.  
 Tu' butipú' ládxa'a, guca' rugu ladxi'.  
 4 Yúgu'tè bönní' ta'nná' bë'è ilé' Li': "Xclenu" Xan,  
 cate' ila'yönné' didza' ru'u.  
 5 Ilul-lè' ca nácgaca le runé' Xanru' Dios,  
 tu' nácatèrö zxön yöl-la' ba queé' Xanru'.  
 6 Sal-la' nayépisètèrè' Xanru' Dios  
 ru'í ládxe'è nupa nácgaca cá'asö,  
 pero zi'tu' zítu'sö ruyúé' nupa tun ba zxön cuíngue-  
 qui.  
 7 Sal-la' ridá' ga zoa bönadxi quia', Li' utipa cazu' ládxa-  
 a'a.  
 Tíl-lalen cazu' nupa ta'díl-lalen neda',  
 ate' len yöl-la' huáca quiu' usöló' neda'.  
 8 Xanru' gun cazè' quia' ca chinuzóa cazé' guné'.  
 Zóaticasö yöl-la' dxi'i ladxi' quiu', Xan.  
 Bití' usán no'o le nun cazu' len na' cuinu'.  
**139** Ruyú cazu' le yu'u icja ládxi'da'ahua', Xan, en  
 nunbè' cazu' neda'.  
 2 Nöz quézinu' cate' ribö'a, en cate' riyasa'.  
 Nózinu' le rizá' ládxa'a ní' zu' zítu'.  
 3 Ruyú cazu' neda' cate' bi runa', en cate' rasia',  
 en nózinu' yúgu'tè le runa'.  
 4 Zí'atèlò ca bi didza' ru'a,  
 chi nöz quézinu' bi innía', Xan.  
 5 Röjnöru cazu' lahua', en za' cazu' cúdza'a,  
 en naxóaticasö no'o neda'.  
 6 Run ga rubánida' tu' nöz quézinu' Li'.  
 Bití' séqui'da' tséajni'ida' ca naca.  
 7 ¿Naru' huáca tseja' ga bití' idxín Bö' quiu'?  
 ¿Naru' huáca izxúnnaja' ga bití' zoa cazu' Li'?  
 8 La'tu' huabena' lúzxiba, ní' soa cazu' Li',  
 en la'tu' huötja' lataj chul-la, ní' zoa cazu' ca'.  
 9 La'tu' uyija' ga rilén gubidza,  
 o la'tu' huadöda' ia'tsölá'alö nísado',  
 10 ní' caz ichè'u neda',  
 ate' len no'o ibèla sön cazu' neda'.  
 11 La'tu' innía': "Ucachí' neda' le naca chul-la",  
 en la'tu' huóaca chul-la bení' zóalen neda',  
 12 bití' gaca chul-la lo' Li' lè na' naca chul-la quia',  
 pero chí'i dzó'ölö gaca quiu' ca lahui' dza.  
 Tuz ca nácgaca lo' Li' le naca chul-la, en le naca lahui'  
 dza.  
 13 Nun cazu' Li' le zoa icja ládxi'da'ahua'.  
 Benu' ga guyá' lé'ènu xiná'a le naca caza'.  
 14 Guía' Li': "Xclenu" tu' run ga rubánida' ca nun cazu'  
 neda',  
 ate' rádxida' Li' tu' tun le nunu' ga rubánida',  
 ate' bö' naca caza' nözi caz naca caní'.  
 15 Bití' bigachí' lo' le naca caza' cate' ní' sí' galja',  
 cate' ní' yu'a lé'ènu xiná'a.  
 16 Bilé'e quézinu' neda' cate' ní' sí' galja',  
 tu' chinuzúajgaca lu guichi quiu'  
 yugu' dza ral-la' soa' ibana',  
 sal-la' bití' ridxini nitú dza na'.

17 Nazáca'tèrögaca quia' le rizá' ládxa'u, Dios.  
 Ziántèrö nácgaca lè na' rizá' ládxa'u.

18 La'tu' huáca nu ulaba léguequi,  
 ilácgaca zióntèrö ca nácgaca guió'j yuzxi.  
 Cate' rubana', ní' zóalena' Li'.

19 Raca ládxa'a usunítu' nupa tuá' dö', Dios.

Que lè ni na', guli'cuíta ga zoa', núlölí' rútilí' bönachi.

20 Tu'í didza' zí' ca nacu' Li', Dios,

ate' nupa ta'dá'baga' Li' ta'nné' liz que Lo'.

21 ¿Naru' cabí rileda' nupa ta'lé' Li', Xan?

¿Naru' cabí ruzóa' tsölá'alö nupa ta'dá'baga' Li'?

22 Idú ládxa'a bití' rilé'eda' léguequi dxi'a.

Nuzóa' léguequi ca nupa ta'díl-lalen neda'.

23 Buyú neda', Dios, en gúquibe'e le zoa icja ládxi'-  
 da'ahua'.

Guzxí' bë' neda', en gúquibe'e le rizá' ládxa'a.

24 Buyú channö zóalen neda' le naca dö',

en bulu'í neda' nöza tsahuí' quiu' zóaticasö.

**140** Busólá neda', Xan, lu ná'agaca nupa tuá' dö'.

Ben chí'i neda' para cabí bi iluné' bönní' zí'  
 quia'.

2 Ta'zá' ládxe'è le nácgaca xihuí' iluné',  
 en tuné' ga ila'díl-lalen bönachi luzé'éguequi.

3 Didza' tu'è tun ga nácgaca lúdxí'gaquié' ca yugu'  
 bëla sínia'.

Yu'u ruá'agaquié' le naché' yöl-la' guti ca le dxía lu láy-  
 í'ba' bëla na'.

4 Ben chí'i neda', Xan, para cabí bi iluné' bönní' tu'è dö'  
 quia'.

Ben chí'i neda' para cabí bi iluné' bönní' zidzaj quia',  
 bönní' na' té'èné' iluné' ga ichixi iníguida'.

5 Nupa tun ba zxön cuínguequi nucáchí'gaca le sön  
 neda',

enca' du yalaj iröli neda'.

Nucáchí'gaca du yalaj ga ral-la' töda'.

Nucózagaca le ila'zón neda'.

6 Gudxa'-né' Xanru': "Nacu' Dios quia'.

Ruzé' nagú', Xan, yugu' le rinábida' Li'.

7 Xana' Dios, naca cazu' Nu rusólá neda' len yöl-la'  
 huáca quiu'.

Ben chí'i cazu' icja' cate' ní' zoa' lu gudil-la.

8 Bití' gu'u lataj, Xan, gaca quia' le ré'èné' guné' bönní'  
 ru'è dö'.

Bití' gu'u lè' lataj idé'í'né' le rizá' ládxe'è, para cabí  
 tsépisé'.

9 Nacuá' nupa nagú'ugaca neda' lé'ajlö.

Busubaga' ícjagaquié' dö' té'èné' ilu'è quia'.

10 Ben ga ila'bixaj bo' yalaj lahui ícjagaquié'.

Bé' lataj tsöjtsázagaquié' tu lu guí' zxön,  
 en yugu' lu yeru zila ga bití' ila'zéqui'né' ulu'rúajé'.

11 Bití' gu'u lataj soé' bönní' rizí' y'é'è luyú ni.

Ben ga udxín queé' bönní' zidzaj dö' ru'è."

12 Nözda' guné' Xanru' ga ulu'rúaj tsahuí' nupa ta'gu'í'  
 ta'zaca',

en uchi'a usöröé' quégaca bönachi yechí'.

13 Le nácatè ilé' Li': "Xclenu" nupa nácgaca tsahuí' tu'  
 tu'lidza Lo'.

Ila'cuá' ga zoa cazu' Li' nupa nácgaca dxi'a.

**141** Rulidza' Li', Xan. Gudáchi ga zoa'.  
 Ruzé nagu' chí'a cate' rulidza' Li'.  
<sup>2</sup> Buyú le rulidza' Li' ca dzön yalaj le ridxín lo',  
 en cate' richisa na'a, buzí' le ca tu böa'do' uzéguí'a-ba'  
 lo'.  
<sup>3</sup> Ben chí'i ruá'a, Xan,  
 en gudapa chí'i guídi ruá'a para cabí gu'a didza' zí'.  
<sup>4</sup> Bití' gu'u lataj gaca ládxa'a le cabí nácatè,  
 para cabí guna' le naca xihuí'  
 len yugu' bönní' tutiè' bönachi.  
 Bití' gu'u lataj guna' léguequi tsözxón.  
<sup>5</sup> Bè' lataj gu'è neda' bönní' tsahuí' lu yöl-la' nadxí'  
 queè'  
 para uzéajni'inè' neda'.  
 Le gunè' gaca quia' ca le za cu'è icja'.  
 Bití' gu'u lataj tá'baga' icja' le ilún nupa tuá' dö'.  
 Rinábida' Li' uzagu' xinózguequi.  
<sup>6</sup> Ila'ládzu'gaquiè' bönní' lo queguequi lè'e gu'ía guió,j,  
 ate' iléquibe'e gulaca dxí'a didza' bè'a.  
<sup>7</sup> Ca raca cate' nu rugá'ana-ba' bédxi, en rulá'a yu,  
 ca' gaca que dxita yú'ugaquiè',  
 le gulásilasi ra' ba que xilátjagaca nupa nátigaca.  
<sup>8</sup> Richisa lahua' ruyúa' ga zu' Li', Xantu' Dios.  
 Rucachí' cuina' ga na' zu'. Bití' usán no'o neda'.  
<sup>9</sup> Ben ga bití' tsöjbixa' lu le sön neda', lè na' nucáchi'-  
 gaca,  
 en ga bití' tsöjtsaza' lu du yalaj nucózagaca nupa tuá'  
 dö'.  
<sup>10</sup> Bè' lataj ila'yaza la' cuíngacasö lu du yalaj bulu'cachí'  
 nupa tuá' dö',  
 pero benna lataj tódisa' neda' ga na' nagachí' du yalaj  
 na'.

**142** Rulidza'-nè' Xanru', ru'a zidzaj didza'.  
 Ráta'yua' lahuè' Xanru' uzá' ládxe'è quia'.  
<sup>2</sup> Rudöda' lahuè' yöl-la' rinaba yudxi quia',  
 en rusiyönda' Lè' le rácagaca quia'.  
<sup>3</sup> Cate' budú ládxa'a,  
 gunözi quézinu' Li' le guca quia'.  
 La' nöza ga ridá' neda'  
 bulu'cachí' le sön neda'.  
<sup>4</sup> Buyú cuita' ibèla  
 tu' cuntu nu zoa nu ruí'i ladxi' neda'.  
 Bití' bi zoa le gácalen neda'.  
 Cuntu nu run chí'i bö' naca caza'.  
<sup>5</sup> Guródxí'a lo' Li', Xan, gunnía':  
 Run chí'i cazu' neda' Li',  
 en naca cazu' Nu rácalen neda' ladaj nupa nabánga-  
 ca.

<sup>6</sup> Ruzé nagu' le rulidza' Li',  
 tu' nagá'ana' cá'asö.  
 Busölá neda' lu ná'agaca nupa ta'zóa regu' neda',  
 tu' nácatèrögaca nál-la ca neda'.  
<sup>7</sup> Guléaj bö' naca caza' lu yu'u lidxi guíè,  
 para gaca guía' Li': "Xclenu" tu' rulidza' Lo'.  
 Nupa ná'agaca tsahuí' ulu'dubi idú gásibi'ilö ga zoa',  
 tu' gunnu' sizxöni quia' le riquinda'.

**143** Ruzé nagu' le rulidza' Li', Xan.  
 Ruzé nagu' le rinabi yúdxida' Li'.

Tu' runu' ca rna didza' bé'u, en nacu' tsahuí' gunnú'  
<sup>2</sup> bití' iché'u neda' lo' ga uchi'a usöró'u quia', huen dx-  
 in quiu'.

Cuntu nu zoa naca tsahuí' lo' Li'.  
<sup>3</sup> Nu bití' rilé'e neda' dxí'a zoa regu' bö' naca caza'.  
 Nuzöjtjè' yöl-la' na'bán quia' lu yu.  
 Benè' ga zoa' lataj naca chul-la ca raca quégaca nupa  
 gulati dza ni'te.

<sup>4</sup> Que lè ni na' rudú ládxa'a, en rö'a böniga.

<sup>5</sup> Röjneda' dza chigula'dödi.

Rizá' ládxa'a ca ná'agaca le benu' Li'.

Ribequi icja' ca ná'agaca le nun no'o.

<sup>6</sup> Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guió,j.

<sup>7</sup> Bubí'tè didza', Xan, tu' rudú ládxa'a.

Bití' ucachí' lo' lahua' neda',  
 para cabí gaca' ca tu bönní' ru'è lataj chul-la ga nacué'  
 nupa nátigaca.

<sup>8</sup> Ben ga yönda' yugu' zila ca naca yöl-la' dxí'i ladxi'  
 quiu',

tu' ruzxöni ládxa'a Li'.

Busèdi neda' ca ral-la' guna',

tu' ruchisa' lo' Li' bö' naca caza'.

<sup>9</sup> Busölá neda', Xan, lu ná'agaca nupa bití' ta'lé'e neda'  
 dxí'a.

Nacu' Nu ruzóa neda' tsutsu.

<sup>10</sup> Busedi neda' para guna' ca ré'enu' Li',

tu' naca cazu' Li' Dios quia'.

Bè' lataj iché' Bö' Lá'ayi quiu' neda' lu nöza tsahuí'.

<sup>11</sup> Butipa ládxa'a, Xan, para gaca yöl-la' ba que Lo'.

Tu' nacu' tsahuí' busölá neda' lu le raca quia'.

<sup>12</sup> Lu yöl-la' dxí'i ladxi' quiu' guchugu quégaca nupa  
 bití' ta'lé'e neda' dxí'a.

Busuniti yúgu'tè nupa tu'saca' zí' bö' naca caza',  
 tu' naca' huen dxin quiu'.

**144** ¡Yöl-la' ba Lè', Xanru' Dios!  
 ¡Náquiè' ca tu guió,j ga zoa' tsutsu!

Rutipè' na' para gaca tseja' gudil-la,  
 en rutipè' ca' xibón na'a para gaca tíl-lalena' bönní'  
 ná'agacaquiè' nál-la.

<sup>2</sup> Naca cazè' Xanru' yöl-la' dxí'i ladxi' quia',

enca' ca tu ga zoa' tsutsu lu gudil-la.

Rusölé' neda', en náquiè' ca tu ga zoa' tsaz.

Náquiè' ca tu le run chí'i neda' lu gudil-la, ate' rucachí'  
 cuina' ga na' zoè'.

Runè' ga tun nupa rinná bé'eda' ca rna didza' ru'a.

<sup>3</sup> ¿Bíxatè caz náquiè' bönní' tu' runu' lè' ba lá'ana,  
 Xan?

¿Bíxatè caz náquiè' bönní' tu' ruí'i ladxi' cazu' lè'?

<sup>4</sup> Naca cazè' bönní' na' ca tu bö'do' recja,  
 ate' yugu' dza zoè' nabanè' ná'agacasö ca tu zxul-la le  
 rigú'u tu böaj ridódisö.

<sup>5</sup> Buzötaj lúzxiba, en bdinne ni, Xan.

Gudán yugu' gu'ía, ate' irúaj dzön lé'eguequi.

<sup>6</sup> Ben ga tsèpi yösa quiu', en bésilasi léguequi.

Busé yugu' yaga lahui tuchi', en ben ga ila'bó'  
 baguí'isö.

<sup>7</sup> Bulí no'o ga na' zu' xitsá'alö.

Busölá neda', en guléaj neda' lu ná'agaca bönachi zi'-tu',

le gaca ca rubéaju' neda' lu nisa zila.

<sup>8</sup> Ta'zí' yè' bönachi na',

ate' le cabí nácatè naca yöl-la' unná bè' quéguequi.

<sup>9</sup> ¡Gul-la' quiu' Li', Dios, tu le cubi!

¡Gul-la' quiu' yöl-la' ba, en quínnia' bihuél-la nuá' chi du que!

<sup>10</sup> Rusölá cazu' bönni' ta'nná bè'è.

Busöló' David, huen dxin quiu', lu gufè tuchi' queè' bönni' ru'è dö'.

<sup>11</sup> Gúcalen neda', en busölá neda' lu ná'agaca bönachi zi'tu'.

Ta'zí' yè' bönachi na',

ate' le cabí nácatè naca yöl-la' unná bè' quéguequi.

<sup>12</sup> Ben ga ilácabi' bí'i bönni' queé'tu' ni yu'ugacabi' iz cuidi'

ca yugu' yaga nazxóngaca,

en ben ga ilácabi' bí'i nigula queé'tu'

ca nácagaca ya'zén que tu yu'u nazaca'.

<sup>13</sup> Ben ga ilígaca yu'u queé'tu' xoa' za utúbitu',

en ben ga iláljaba' gayuá' gayuá'aba' chibodo',

en bö'cu' xíla'do' ga nucuá'atu'-ba'.

<sup>14</sup> Ben ga ulu'cuá'aba' böa' hué'énido' quégaca böa' guixi' queé'tu',

en ga bití' bi gaca quégacaba' bédxi zxön, en bédxido' ca'.

Biti' gu'u lataj soa nu cödxí yechi' la' nöza que ládzatu'.

<sup>15</sup> ¡Bica' bágaca bönachi raca caní quéguequi!

¡Bica' bágaca bönachi na' Xanru' Dios náquiè' Dios quéguequi!

**145** ¡Guna' Li' zxön, Dios!

¡Nacu' Nu rinná be'e neda'!

¡Gádxitica'sa' Lo', Xana' Dios!

<sup>2</sup> ¡Tu dza tu dza cu'a Li' yöl-la' zxön,

en cú'utica'sa' Lo' yöl-la' ba!

<sup>3</sup> ¡Nayépisètèrè' Xanru' Dios, ate' cú'uru'-nè' yöl-la' ba!

¡Biti' ca' gaca gúnbè'èru' ca naca yöl-la' zxön queè'!

<sup>4</sup> Yúgu'tè bönachi ila'gú'u yöl-la' ba le nun cazu' Li',

para ulu'siyón xí'inigaca,

en ulu'luí'i lahui le nácagaca zxön benu'.

<sup>5</sup> Sa' ládxa'a ca naca yöl-la' zxön que yöl-la' unná bè' quiu',

en ca nácagaca yöl-la' huáca zxön runu'.

<sup>6</sup> Ilu'í' didza' yúgu'tè bönachi ca naca yöl-la' zxön

quégaca yöl-la' huáca runu'.

Usiyönda' bönachi ca naca yöl-la' zxön quiu'.

<sup>7</sup> Idú ládxi'gaca ilu'í' didza' cate' tsöjnégaca yöl-la' dxí'i ladxí' zxön quiu'.

Lu yöl-la' rudzeja quéguequi ila'bódxí'a tu' nacu' tsahui'.

<sup>8</sup> Xanru' Dios ruzá' ládxi'è queé'ru', en ruhuéchi' ládxi'è rë'u.

Biti' ilética'sé', ate' zxöntèrö naca yöl-la' dxí'i ladxí' queè'.

<sup>9</sup> Runè' Xanru' Dios le naca dxí'a quégaca yúgu'tè bönachi,

en ruhuéchi' ládxi'è yúgu'tè le nunè'.

<sup>10</sup> Yúgu'tè le nunu' ilé Li': "Xclenu" Xan,

ate' nupa néquiguequi quez quiu' ilún Li' zxön.

<sup>11</sup> Ilu'í' didza' ca naca yöl-la' zxön que le rinná bè'u,

en ulu'luí'i lahui yöl-la' zxön quiu',

<sup>12</sup> para ulu'siyón bönachi ca nácagaca le zxön runu',

en ca naca yöl-la' zxön que le rinná bè'u le

nayépisètèrö.

<sup>13</sup> ¡Zóatica'sö le rinná bè'u,

ate' idía'tica'sö yöl-la' unná bè' quiu'!

¡Lu le naca idú ladxí' queè' runè' Dios ca rnnágaca

yúgu'tè didza' ru'è,

en lu yöl-la' dxí'i ladxí' queè' runè' yúgu'tè le runè'!

<sup>14</sup> ¡Röjzönè' Xanru' yúgu'tè nupa röjtsó'ögaca,

en ruchisé' yúgu'tè nupa ndínnegaca!

<sup>15</sup> ¡Yúgu'tè bönachi tu'yú Li', Xan,

ate' runödzu' le ilágugaca cate' ridxín dza que!

<sup>16</sup> ¡Rusalaj cazu' no'o

en rugagu' yúgu'tè le nacuá' nabángaca!

<sup>17</sup> Náquiè' tsahui' Xanru' Dios ca naca yúgu'tè le runè'

en náquiè' ca' dxí'i ladxí'.

<sup>18</sup> Zoè' Xanru' gala' ga nacuá' yúgu'tè nupa tu'lidza Lè',

nupa na' tu'lidza Lè' idú ládxi'guequi.

<sup>19</sup> Gunnè' le ta'zé ládxi'gaca quégaca nupa tadxi Lè'.

Riyönnè' cate' tu'lidza Lè', en rusólé' léguequi.

<sup>20</sup> Run chí'i cazè' Xanru' yúgu'tè nupa nadxi'igaca Lè',

pero usunítiè' nupa tuá' dö'.

<sup>21</sup> Len ru'a cuina' cu'a-nè' Xanru' yöl-la' ba,

ate' yúgu'tè bönachi ilúntica'sö Lè' zxön.

**146** ¡Gulí'cu'è yöl-la' ba Xanru'!

¡Li', bö' naca caza', gulu'è yöl-la' ba Xanru'!

<sup>2</sup> ¡Cu'a-nè' Xana' yöl-la' ba tsanni ni zoa' nabana'!

¡Gul-la' yöl-la' ba queè' Dios quia' tsanni ni zoa' bö'

naca caza'!

<sup>3</sup> Biti' uzxöni ládxi'li' bönni' ta'nná bè'è,

en calèga bönni' tati cazè', bönni' bití' ca' gaca

ulu'sölé' rë'u.

<sup>4</sup> Rurúaj bö' yu'è nu bönni', ate' ruhuöáquiè' yu.

La' dza náasö riniti le rizá' ládxi'è gunè'.

<sup>5</sup> Bica' ba bönni' rácalenè' Dios queè' Jacob lè',

bönni' na' runè' löza Xanru' Dios.

<sup>6</sup> Nunè' Xanru' Dios lúzxiba, en luyú ni,

enca' nísado', en yúgu'tè le nacuá' yugu' lataj na'.

Rúntica'sè' Lè' ca rnna didza' bè'è,

<sup>7</sup> en ruchí'a rusöróè' nupa zoa nu rusaca' zí' léguequi.

Rugagu cazè' nupa ta'dún.

Rusanè' Xanru' Dios nupa nadzúngaca.

<sup>8</sup> Rusaljè' Xanru' Dios guió'j lógaca nupa nácagaca lo

chul-la.

Ruchisé' Xanru' Dios nupa nadzó'ögaca.

Nadxi'inè' Xanru' Dios nupa nácagaca tsahui'.

<sup>9</sup> Rapa chí'è Xanru' Dios yugu' bönni' zítu'.

Rácalenè'-bí' yugu' bí'i uzèbi, enca' yugu' nigula uzèbi,

pero ruzaguè' xinó'zguequi nupa tuá' dö'.

<sup>10</sup> Inná bética'sè' Xanru' Dios.

Náquiè' Dios queéli', bönachi Sión.

¡Gulí'cu'è yöl-la' ba Xanru'!

147 ¡Gulí'cu'ë yöl-la' ba Xanru'!  
 ¡Tshahuí' naca gúl-laru' yöl-la' ba queë' Dios queéru'!  
 ¡Naca lachi, en le ral-la' gunru', cú'uru'-në' yöl-la' ba!  
 2 Runë' Xanru' Dios ga rizxón yödzo Jerusalén.  
 Rutubë' bönni' Israel násilasigaquië'.  
 3 Ruúnë' bönni' nácagaquië' yechi' ladxi', en rudë'ë lari' ga dxíagaquië' huë'.  
 4 Rulabë' tsca nacuá' bölj lúxiba.  
 Nucu'ë lágacaba' tu tuba' yúgu'të bölj na'.  
 5 Nayépisëtë'rë' Xanru' Dios, en nál-latë'rë'.  
 Ga rë'ë dzu réajni'inë' yúgu'të.  
 6 Xanru' Dios rácalenë' nupa ta'guí' ta'zaca'.  
 Ruzötjé' nupa tuá' dö' lu yu.  
 7 ¡Gulí'gul-la queë' Xanru' Dios, guiéli'-në': "Xclenu"!  
 ¡Gulí'gul-la yöl-la' ba queë' Xanru', quínnilí' lé'egaca bi-huél-lado'!  
 8 Riguísië' yugu' böaj lúxiba, en risól-lë'ë nisa guiój luyú.  
 Runë' ga rilén yö yugu' lu guí'ado'.  
 9 Rugahuë' yugu' böa' guixi'do', enca' bóiquiajdo' ta'bódxí'aba'.  
 10 Biti' raza ládxë'ë yöl-la' nál-la queé'ba' böa', en biti' ruzi'ë xibé yöl-la' nál-la queë' bönni'.  
 11 Raza ládxë'ë Xanru' Dios nupa tadxi Lë', nupa na' tun löza yöl-la' dxí'i ladxi' queë'.  
 12 ¡Gulí'cu'ë yöl-la' ba Xanru', libí'ili' zóalí' Jerusalén!  
 ¡Gulí'cu'ë yöl-la' ba Dios queéli', libí'ili' zóalí' Sión!  
 13 Bucu'ë tsutsu le tu'bagá' gapa nu riyaza yödzo queéli', en runë' ga raca dxí'a quégaca xzí'inilí' ga na' zóalí'.  
 14 Runë' ga ribózalí' dxí'a tsáhui'do', en runë' ga ruhuölaj ridzé'elí' xxa' xtila dxí'atë'rö.  
 15 Rinná bé'enë' yödzo'lió ni, ate' xtídzë'ë ridóditë gátit'tës.  
 16 Risól-lë'ë guiój bögui' ca zxila', en riguísië' buzén ca dö.  
 17 Riguísië' bögui' ca yugu' guiój ruaj.  
 ¿Nuzxi caz gaca guá' ilén le naca ziaga queë'?  
 18 Risól-lë'ë xtídzë'ë, ate' ruúna' bögui' na'.  
 Runë' ga recja bö', ate' ruhuóáca nisa.  
 19 Ruí'ilenë' xzí'ini xí'sóë' Jacob didza', en riguíxjé' xibá queë' para ilún bönachi Israel ca rna.  
 20 Biti' benë' caní' ní'a quégaca bönachi ia'tú yödzo izá'a, ate' biti' nózigaca ca nácagaca le gunná bë'ë.  
 ¡Gulí'cu'ë yöl-la' ba Xanru'!

148 ¡Gulí'cu'ë yöl-la' ba Xanru'!  
 ¡Gulí'cu'ë yöl-la' ba, libí'ili' zóalí' yehua' yubá!  
 ¡Gulí'cu'ë yöl-la' ba, libí'ili' zóalí' xitsá'alö!  
 2 ¡Gulí'cu'ë yöl-la' ba, libí'ili' gubáz lá'ayi queë'!  
 ¡Gulí'cu'ë yöl-la' ba, libí'ili' tscali' dá'alí' Lë'!  
 3 ¡Gulí'cu'ë yöl-la' ba, libí'ili' gubidza, en beo'!  
 ¡Gulí'cu'ë yöl-la' ba, libí'ili' bölj bení'!  
 4 ¡Gulí'cu'ë yöl-la' ba, libí'ili' zóalí' zxa' lúxiba!  
 ¡Gulí'cu'ë yöl-la' ba, libí'ili' nisa, zxóalí' láhuilö lúxiba!  
 5 ¡Gulí'cu'ë yöl-la' ba La la'ayi queë' Xanru', yúgu'tëli',

tu' bë'ësë' didza', en canísö benë' libí'ili'!  
 6 Naguixjé' tsaz libí'ili'.  
 Naguixjé' xtídzë'ë le catu caz tödi que.  
 7 ¡Gulí'cu'ë yöl-la' ba Xanru' idütë yödzo'lió, en libí'ili' böa' ridali' lu nísado', en nísado' caz,  
 8 en libí'ili' guí', en guiój bögui' yöla sunna, bögui', en böaj,  
 enca' lí', bö' budunu', runu' ca rna xtídzë'ë,  
 9 en libí'ili' yugu' guí'a, en yúgu'të guí'ado', en libí'ili' yaga dxíagaca le ta'bía, en yugu' yaga dxí'a,  
 10 en libí'ili' böa' guixi', en böa' bëdxi,  
 böa' tá'ayöj lé'ëba' lu yu, en böa' zoa xíligacaba',  
 11 enca' libí'ili' rinná bë'ëli' yödzo'lió, en bönachi yugu' yödzo izá'a,  
 yugu' xzí'inigaquië' bönni' ta'nná bë'ë, en bönni' ruchi'a rusöröli' yödzo'lió,  
 12 enca' libí'ili' bí'i bönni', en bí'i nigúlado', yugu' bönni' zxön, en yugu' bí'ido'!  
 13 ¡Gulí'cu'ë yöl-la' ba La la'ayi queë' Xanru' tu' nayépisëtë'rö tuzë' Lë'!  
 ¡Nayépisëtë'rö yöl-la' ba queë' ca luyú ni, en ca lúxiba xitsá'!  
 14 Nuchisë' tu le nuzóa tsutsu bönachi queë', le naca yöl-la' ba ta'gú'u Lë' nupa néquiguequi queë', yugu' xzí'ini xí'sóë' Israel, nupa na' nadxí'inë'.  
 ¡Gulí'cu'ë yöl-la' ba Xanru'!

149 ¡Gulí'cu'ë yöl-la' ba Xanru'!  
 ¡Gulí'gul-la queë' Xanru' Dios tu le cubi, en gulí'gul-la yöl-la' ba queë' ga nudúbigaca nupa néquiguequi queë'!  
 2 Ral-la' ulu'zí' xibé' Xanru' Dios bönachi Israel, tu' náquië' Nu ben léguequi.  
 Ral-la' ulu'dzéjalen Dios nupa nacuá' Sión, tu' náquië' Nu rinná be'e léguequi.  
 3 Ral-la' ila'gú'u yöl-la' ba La la'ayi queë', en lu yöl-la' rudzeja ulu'yá'a lahuë'.  
 Ral-la' ilúl-la yöl-la' ba queë', ila'capa' lë'e guídi, en ila'quínni lé'egaca bihuél-lado',  
 4 tu' raza ládxë'ë Xanru' Dios bönachi queë'.  
 Uchisë' nupa ta'guí' ta'zaca', en usólé' léguequi.  
 5 Nupa néquiguequi queë' ral-la' ulu'dzeja ládxí'-gaca lu bení' queë'.  
 Lu yöl-la' rudzeja quéguequi ral-la' ilúl-la queë' cate' ní' dégaca lu le ráti'gaca.  
 6 Yöl-la' ba queë' Xanru' Dios ral-la' sóatica'sö ruí'iguequi,  
 en tu guië tuchi' natuchi' iropa la'a lu ná'agaca,  
 7 para ulu'zí' lëbi bönachi yugu' yödzo izá'a, en ilún xigua' bönachi izá'a na',  
 8 para ilúguë'ë bregui' guië ná'agaquië' bönni' ta'ná bë'enë' bönachi yödzo izá'a na', en ulu'cu'ë bregui' guië yen ná'agaquië' bönni' lo qué-gaquië',  
 9 para ilunë' quéguequi ca nachuguë' Dios gaca quéguequi.  
 Naca lë ni le run bal nupa néquiguequi queë' Dios.  
 ¡Gulí'cu'ë yöl-la' ba Xanru'!

150 ¡Gulí'cu'è yöl-la' ba Xanru!  
 ¡Gulí'cu'è yöl-la' ba Dios lu lataj lá'ayi queë!  
 ¡Gulí'cu'è yöl-la' ba ga dëda' lataj queë!  
 2 ¡Gulí'cu'è yöl-la' ba ca nácgaca le zxön nunë!  
 ¡Gulí'cu'è yöl-la' ba ca naca yöl-la' zxön queë!  
 3 ¡Gulí'cu'è yöl-la' ba, ucódxilí' lúzugacaba' chivo!  
 ¡Gulí'cu'è yöl-la' ba, quínnili' l'é'egaca bihuël-la ca!

4 ¡Gulí'cu'è yöl-la' ba, cápa'li' lë'e guídi, en uya'ali'!  
 ¡Gulí'cu'è yöl-la' ba, quínnili' l'é'egaca bihuël-la, en  
 ucódxilí' gui!  
 5 ¡Gulí'cu'è yöl-la' ba, utíl-lalí' guíë lë'e luzé'e!  
 ¡Gulí'cu'è yöl-la' ba, utíl-lalí' guíë zxön lë'e luzé'e!  
 6 ¡Gulí'cu'è yöl-la' ba Xanru', tscalí' rizí'ili' bö!  
 ¡Gulí'cu'è yöl-la' ba Xanru'!

# San Mateo

## Yugu' xuz xině'e gudödi queë' Jesús (Lc. 3:23-38)

**1** Ni ruzúaja' lágaquië' xuz xině'e gudödi queë' Jesu-cristo. Nabábagaquië' David, enca' Abraham xuz gudödi queë'.

<sup>2</sup> Abraham gúquië' xuzë' Isaac.  
Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bóchë'ë.

<sup>3</sup> Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.  
Esrom gúquië' xuzë' Aram.

<sup>4</sup> Aram gúquië' xuzë' Aminadab.  
Aminadab gúquië' xuzë' Naasón.

<sup>5</sup> Naasón gúquië' xuzë' Salmón.  
<sup>5</sup> Salmón gúquië' xuzë' Booz, ate' Rahab gúcanu xině'ë.

Booz gúquië' xuzë' Obed, ate' Rut gúcanu xině'ë.  
Obed gúquië' xuzë' Isaí.

<sup>6</sup> Isaí gúquië' xuzë' David.

David na' gunná bé'enë' bönachi Israel, ate' butsaga ná'alënë'-nu nigula na' gúcanu zí'alö nigula queë' Urías, ate' David, en nigula ni guláquië' xuz xině'ë Salomón.

<sup>7</sup> Salomón gúquië' xuzë' Roboam.  
Roboam gúquië' xuzë' Abías.

Abías gúquië' xuzë' Asa.  
<sup>8</sup> Asa gúquië' xuzë' Josafat.

Josafat gúquië' xuzë' Joram.  
Joram gúquië' xuzë' Uzías.

<sup>9</sup> Uzías gúquië' xuzë' Jotam.  
Jotam gúquië' xuzë' Acaz.

Acaz gúquië' xuzë' Ezequías.

<sup>10</sup> Ezequías gúquië' xuzë' Manasés.  
Manasés gúquië' xuzë' Amón.

Amón gúquië' xuzë' Josías.

<sup>11</sup> Josías gúquië' xúzgaquië' Jeconías, en yugu' bönni' bóchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'ché'ë bönachi Israel nadzúngaca lu xiyúgaquië'.

<sup>12</sup> Jeconías gúquië' xuzë' Salatiel.  
Salatiel gúquië' xuzë' Zorobabel.

<sup>13</sup> Zorobabel gúquië' xuzë' Abiud.  
Abiud gúquië' xuzë' Eliaquim.

Eliaquim gúquië' xuzë' Azor.

<sup>14</sup> Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

<sup>15</sup> Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

<sup>16</sup> Jacob gúquië' xuzë' José.

José ni gúquië' bönni' queënu María, ate' María ni gúcanu xině'ë Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

<sup>17</sup> Caní naca, gulaca chidá' cö' dí'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' dí'a dza ga gusí lo zoë' David ga bidxintë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' dí'a dza ga gusí lo dza ni' gula'ché'ë léguequi ga bidxintë dza guljë' Cristo.

## Yugu' le guca cate' guljë' Jesucristo (Lc. 2:1-7)

<sup>18</sup> Caní guca cate' guljë' Jesucristo. Cate' ni' chinazí' lu ná'abi' María, xině'ë Jesucristo utsaga ná'alënë'bi' José, en zí'atëlö cate' si' utsaga ná'alënë'-bi', en cabí ne sóalënë'-bi', guyú'ubi' tubi' bí'ido' lé'ëbi' María na'. Guca caní n'í'a que yöl-la' huáca queë' Dios Bö' Lá'ayi.

<sup>19</sup> Náquië' José na', bönni' queë'bi' María, bönni' tsahui', pero bití' gú'unnë' uzéguië'-bi' didza' lógaca bönachi. Gú'unnë' ulá'alënë'-bi' bagáchi'sö. <sup>20</sup> Tsanni ni' rizá' ládxe'ë José ca na' gunë', buluí' lahuë' gubáz lá'ayi queë' Xanru' lahuë' José lu yëla béchigal, en gudxë' lé':

—José, xzí'ini xzi'sóë' David. Biti' gádxinu' sí'u-bi' María, para gácabi' nigula quiu', tu' yú'ubi' bí'i bönni'do' lé'ëbi' n'í'a que yöl-la' huáca queë' Dios Bö' Lá'ayi. <sup>21</sup> Gáljabí' tubi' bí'i bönni'do' queë'bi', ate' gu'u labi' Jesús, tu' usölábi' bönachi queë'bi' lu dul-la' nabága'gaca.

<sup>22</sup> Caní guca yúgu'të lë ni para gaca lë na' gunné' Xanru' lu ru'ë bönni' bé'ë didza' uláz queë' Dios, gunné':

<sup>23</sup> Buli'yútsöca', tu nigula ra'bando',  
tsú'ubi' bí'ido' lé'ëbi',

ate' gáljabí' tubi' bí'i bönni'do',  
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

<sup>24</sup> Cate' bubanë' José lu yëla béchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. <sup>25</sup> Biti' guzóalënë'-bi' cate' bidxinrö dza chigúlajbi' bí'i bönni'do' queë'bi', bí'i zí'alö queë'bi', ate' gulu'ë labi' Jesús.



### Bönni' ta'yéajni'inë' ridiyúgaquië' bí'ido' Jesús

2 Cate' gúljabí' Jesús lu yödzo Belén, luyú Judea, rina bé'ë Herodes luyú ní', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. <sup>2</sup> Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' sí' gúljabí'? Cate' ní' zóatu' ga rilén gubidza bilé'etu'-ba' bölaj bení' naca bé' chigúljabí', ate' za'tu' ni para tseaj ládxi'tu'-bí'.

<sup>3</sup> Cate' gúquibe'enë' Herodes, bönni' rinná bé'ë, lë ni, guró'ödë' böniga, en lësca' caní gula'bó' böniga yúgu'të bönachi nacua' Jerusalén. <sup>4</sup> Ní'irö Herodes na' bulidzë' yúgu'të bixúz unná bé', len bönni' yudo' tu'séd-inë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bé'enë' légaquië'. <sup>5</sup> Të' lë':

—Lu yödzo Belén luyú Judea. Caní naca tu' buzúajé' tu bönni' bé'ë didza' uláz queë' Dios le rna caní:

<sup>6</sup> Biti' nácarö cá'asö yödzo Belén luyú Judá lahuë' Dios ca nácgaca yödzo gapa nacua' nupa ta'nná bé' luyú ni,

tu' irúajé' tu bönni' yödzo Belén, en gáquië' lo, bönni' na' gun chí'ë bönachi Israel quia'.

<sup>7</sup> Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inózinë' dxí'a gáca'xte chiguca buluí'i lahui bölaj na' bila'lé'enë'.

<sup>8</sup> Ní'irö gusól-lë'ë légaquië' tsöjajúquië' Belén. Rë' légaquië':

—Gulí'tséaj ní', en gulí'tsöjnaba dxí'a nacxi naca queé'bí' bí'ido' na'. Cate' chibidzólili'-bí', ididíxjö'íli' neda', para tseja' ca' neda', tseaj ládxa'a-bí'.

<sup>9</sup> Gudödi bila'yönnë' didza' bé'ë Herodes na', söjajúquië' bönni' ta'yéajni'inë' na', ate' bölaj na' bila'lé'enë' cate' ní' nacu'ë ládzaqaquië' söjnóruba' lógaquië' ga bidxintë yöjsóa ga na' débí' bí'ido' na'. <sup>10</sup> Cate' bila'lé'enë' bölaj na', buludzéjade'enë'. <sup>11</sup> Cate' gula'yázië' yu'u, bila'lé'enë'-bí' bí'i bönni'do' na', zóalenbí'-nu María, xiná'abi'. Buluzóa zxibigaquië' lobí', en gula'yéaj ládxi-gaquië'-bí'. Gudödi na' gula'saljé' yugu' yöxaj quégaquië', ate' bulu'nödzjé' queé'bí' oro, en yalaj, en nórído' rilá' zxixi que yaga mirra. <sup>12</sup> Tu' chibuzéajni'inë' Dios légaquië' lu yëla béchigal para cabí tsöjhuójqüië' ga zoë' Herodes na', que lë ni na' yöjhuójqüië' ládzaqaquië' nöza yúbölö.

### José, en María, ta'ché'ë-bí' Jesús luyú Egipto

<sup>13</sup> Gudödi buluzé'ë yugu' bönni' ta'yéajni'inë' ní', buluí'i lahuë' tuë' gubáz lá'ayi queë' Xanru' lu yëla béchigal, ga na' dë' José, en rë' lë':

—Guyaschi. Guché'-bí' bí'ido' ni, enca' xiná'abi', ate' buzunnaj ni. Guyéaj luyú Egipto, ate' ugá'anú' ní' cate' guíera' lí' ia'tú. Caní gunu' tu' uguiljé' Herodes bí'ido' ni para gútië'-bí'.

<sup>14</sup> Ní'irö guyasë' José, en ní' naca chí' dzó'ölö, guché'ë-bí' bí'ido' na', enca' xiná'abi', ate' yöjajúquië' luyú Egipto. <sup>15</sup> Bulugá'anë' ní' cate' gútië' Herodes. Caní gu-

ca para gaca lë na' gunné' Xanru' Dios lu ru'ë tu bönni' bé'ë didza' uláz queë', gunné': "Ga naca luyú Egipto bulidza' Zxí'ina'."

### Risól-lë'ë Herodes bönni' ilútië'-bí' bí'i hué'ënido' nacua'abi' yödzo Belén

<sup>16</sup> Cate' gúquibe'enë' Herodes bití' gulunë' bönni' ta'yéajni'inë' ca rnnë', gulénë', ate' gunná bé'enë' bönni' tsöjajúquië' ní' para ilútië'-bí' yúgu'tëbí' bí'i bönni'do' nacua'abi' yödzo Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahué'ë'nigacaröbi'. Caní benë' ca busáquië' queë' Herodes na', tsca chiguca dza buluí'i lahui bölaj na', dza na' buluzéajni'inë' bönni' ta'yéajni'inë' na' lë'.

<sup>17</sup> Caní guca, bidxín lë na' gunné' Jeremías, bönni' bé'ë didza' uláz queë' Dios, gunné':

<sup>18</sup> Lu yödzo Ramá riyón chí'igaca

nupa ta'bödxi, en nupa ta'bödxi yechí'.

Raquel ribódxinu ní'a quégacabi' zxí'ininu.

Bití' gaca nu huë tsahuí' lënu, tu' chinátigacabi'.

<sup>19</sup> Gudödi gútië' Herodes na', ní'irö buluí'i lahuë' gubáz lá'ayi na' queë' Xanru' lu yëla béchigal lahuë' José ga ní' zoë' luyú Egipto, ate' rë' lë':

<sup>20</sup> —Guyasa. Guché'-bí' bí'i bönni'do' ni, enca' xiná'abi', ate' böaj luyú Israel, tu' chigulátië' bönni' ní' gulé'ënnë' ilútië'-bí' bí'i bönni'do' ni.

<sup>21</sup> Ní'irö guyasë' José, ate' guché'ë-bí' bí'i bönni'do' na', enca' xiná'abi', ate' yöhuójqüië' luyú Israel. <sup>22</sup> Cate' gúquibe'enë' José rinná bé'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huöjé' ní'. Cate' buzéajni'inë' Dios lë' lu yëla béchigal, guyjé' luyú Galilea. <sup>23</sup> Cate' bidxinë' ní', yöjsóë' lu yödzo Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, sí' Lë', Bönni' Nazaret.

### Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

3 Yugu' lu dza ní' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea. <sup>2</sup> Juan na' rnnë':

—Bulí'bí' ládxi'li', tu' chizóa idxín dza idinná bé' Nu na' zoa yehua' yubá luyú ni.

<sup>3</sup> Ca naca queë' Juan na', buzúajé' Isaías, bönni' bé'ë didza' uláz queë' Dios dza ní'të, le rna caní:

Riyón chí'ë bönni' rulidzë' lu lataj cá'asö, rnnë':

"Bulí'pá'a nöza para idxín Xanru' ga zóali'.

Gulí'béaj li yugu' nöza lasi tödë' lu icja ládxi'do'oli'."

<sup>4</sup> Nácue' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' bóchí'zu, en re'jé' bidxindo' que buzdo'. <sup>5</sup> Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. <sup>6</sup> Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

<sup>7</sup> Cate' bilé'ené' Juan ta'dxiné' zían bönni' yudo' fariseo len yugu' bönni' yudo' saduceo ga zoé' para ila'dilé' nisa, gudxé' légaquié':

—Libí'ili', dí'a dza quégacaba' bëla sínia'. ¿Zoa nu buzéajni' libí'ili' para izxúnnajli' yöl-la' rusiúdxí na' sí' gaca quégaca bönachi? <sup>8</sup> Gulí'gún le gaca bë' chibubí'i ládxi'li'. <sup>9</sup> Biti' cuéqui ícjali', bití' innali' nácali' tsahui' tu' naca Abraham xuz gudödi queé'li'. Rea' libí'ili', huáca guné' Dios ga ulu'huóaca yugu' guió'j nacua' ni dí'a dza queé' Abraham. <sup>10</sup> Chizóa riböza guié huága para ichugu yugu' yaga le rulu'í ca gaca queé'li'. Yúgu'té ya-ga bití' ta'bía le naca dxi'a, irúgugaca, até' ila'gu'é léguequi lu gui'. <sup>11</sup> Le nácaté neda' ruquila' libí'ili' nisa lu nisa, núlöli' chibubí'i ládxi'li', pero Bönni' na' ral-la' guidé' cate' tódi quia' neda', Lè' guné' le rulu'isö yöl-la' ridila nisa ni, uchizié' libí'ili' Dios Bö' Lá'ayi len gui' queé'. Bönni' ni nácaté' lo ca neda', até' neda' neda' naca' lesaca' ilecja' xiráchué' nudé'è. <sup>12</sup> Zöné' lu në'è böc'ó' queé', le ulúbiné' ga ridxi'a xzoa' xtila queé'. Cu'é xzoa' xtila queé' lu yu'u ga ní' gun chí'è le, pero uzégu'è bëbu que lu gui', até' gui' na' bití' ca' ulu.

#### Ridile' nisa Jesús (Mr. 1:9-11; Lc. 3:21-22)

<sup>13</sup> Ní'irö buzé'è Jesús luyú Galilea, até' bidxiné' ra' yegu Jordán ga na' zoé' Juan, para idilé' nisa lu në'è Juan na'. <sup>14</sup> Juan buzágué'è xinözé', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

<sup>15</sup> Bubi'è didza' Jesús, rë' lè':

—Benna lataj na'a, tu' caní ral-la' gunru' idútè le naca tsahui'.

Ní'irö Juan bë'è Lè' lataj. <sup>16</sup> Cate' chinadilè' Jesús nisa, la' burúajtè' lu nisa. Ní'irö gyalaj lúxhiba lahué' Jesús, até' bilé'ené' ruhuó'tjé' Dios Bö' Lá'ayi, en bidxiné' ga na' zoé', riné'è ca riná'aba' gu'dödo'. <sup>17</sup> Ní'irö biyón chí'i nu ru'í didza' yehua' yubá, rnna:

—Bönni' ni náquié' Zxí'ina'. Nadxí'ida' Lè', en raza ládxa'a Lè'.

#### Ré'eni Satanás tu' xihui' ibaga' Jesús dul-la' (Mr. 1:12-13; Lc. 4:1-13)

**4** Ní'irö la' guchè'tè' Dios Bö' Lá'ayi Jesús lu lataj cá'asö para gata' lataj sí' bë' Satanás tu' xihui' Lè'.

<sup>2</sup> Idú choá' dza choá' yèla bití' bi gudahué' Jesús, até' gudödi ní' riduné'. <sup>3</sup> Ní'irö tu' xihui', nu na' run ga tá'ba-ga' bönachi dul-la', bidxín ga zoé' Jesús, en rë' Lè':

—Channö naçu' idú Zxí'iné' Dios, gunná na'a ulu'huóaca guió'j nacua' ni yöta xtila.

<sup>4</sup> Bubi'è didza' Jesús, rë' le:

—Nazúaj lu guichi lá'ayi le rnna: “Calé'gasö yöta xtila nabánigaca bönachi, pero lësca' yúgu'té didza' ru'é Dios nabánigaca bönachi.”

<sup>5</sup> Ní'irö tu' xihui' guché' Jesús lu yödzö lá'ayi Jerusalén, até' budxía Lè' ga naca xitsá' ícjo'olö yudo'. <sup>6</sup> Ní'irö tu' xihui' rë' Lè', rnna:

—Channö nacu' Li' idú Zxí'iné' Dios, busuladzu' cuinu' ni, tu' nazúaj lu guichi lá'ayi le rnna:

Dios isól-lè'è gubáz lá'ayi queé' para ilún chí'è Li', até' ulu'chisé' Li' lu ná'agaquié', para cabí tsöjchégu'u guió'j, en cabí gunu' zi' ní'u.

<sup>7</sup> Bubi'è didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Bití' ugunu' dxin Xanu' Dios.”

<sup>8</sup> Ní'irö tu' xihui' guché' Jesús ga naca tu lu gui'a sibi, até' ní' bulu'í Lè' yúgu'té yödzö nacua' yödzölió ni, en yúgu'té yöl-la' tsahui' quéguequi. <sup>9</sup> Ní'irö rë' Lè':

—Yúgu'té lè ni udöda' lu no'o channö uzóa zxibu' lahua', en gunu' neda' zxon.

<sup>10</sup> Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxi'u, en udödi cuinu' lu na' tuzé' Lè'.”

<sup>11</sup> Ní'irö buzá' Satanás tu' xihui' ga na' zoé' Jesús, até' gubáz lá'ayi queé' Dios bila'dxiné' ga zoé', en gulá-calené' Lè', en gula'gu'é le gudahué'.

#### Risí lahué' Jesús runé' libán luyú Galilea (Mr. 1:14-15; Lc. 4:14-15)

<sup>12</sup> Cate' biyönné' Jesús nadzuné' Juan lidxi guié, guyi-jé' luyú Galilea. <sup>13</sup> Buzé'è yödzö Nazaret, até' yöjsóé' lu yödzö Capernaum ga naca ra' nísado', lu buzá' quéga-ca bönachi Zabulón, en bönachi Neftalí. <sup>14</sup> Caní guca, bidxín lè na' gunné' Isaías, bönni' bë'è didza' uláz queé' Dios, gunné':

<sup>15</sup> Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacua' bönachi bití' nácagaca judío.

<sup>16</sup> Bönachi chul-la niti ní' bila'lé'e bení', até' bönni' ní' nácagaquié' ca nupa chinátigaca, gulén quégaquié' bení'.

<sup>17</sup> Cate' ní'irö gusí lahué' Jesús runé' libán, en rë' bönachi ní':

—Bulí'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

#### Jesús rulidzé' tapé' bönni' uzxón böla para tsöjtá-gaquié' Lè' (Mr. 1:16-20; Lc. 5:1-11)

<sup>18</sup> Cate' gudé' Jesús ra' nísado' que Galilea, bilé'ené' chopé' bönni'. Tué' lè' Simón, en zoa ia'tú lè' Pedro, até' dzáguié' Andrés, bönni' böché'è, lè'. Chopé' ni ta'chiljé' yöxaj böla quégaquié' lu nísado' na' tu' nácagaquié' uzxón böla. <sup>19</sup> Jesús rë' légaquié':

—Gulí'dutá' neda', até' guna' ga iché'èli' bönachi quia', gunlí' ca runlí' rizönlí'-ba' böla.

<sup>20</sup> Chopé' ni la' bulu'cá'anané' yugu' yöxaj böla quégaquié', até' sójácalené' Jesús.

<sup>21</sup> Cate' gudödé' Jesús ia'lati' ní'lö, bilé'ené' ia'chopé' bönni'. Tué' lè' Jacobo, até' dzáguié' Juan, bönni' böché'è lè'. Nácagaquié' zxí'iné' Zebedeo. Nacu'è lè'e bárcodo' dzágagaquié' Zebedeo, xúzgaquié', en tu'úné' yöxaj böla quégaquié'. Ní'irö Jesús bulidzé' chopé' ni para tsöjtá'gaquié' Lè'. <sup>22</sup> La' bulu'cá'anané' bárcodo' na', enca' xúzgaquié', até' sójácalené' Jesús.

## Jesús rusédinë' bönachi zián

(Lc. 6:17-19)

<sup>23</sup> Gudé' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sedë' queë' Dios. Benë' libán ni' que didza' dxí'a ca si' idinná bë'ë Dios luyú ni', en bunë' yúgu'të nupa te'e tsca naca yödzhüé' té'eguequi. <sup>24</sup> Guzë' didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zián yödzöhué' que queégaquië', en ta'guí' ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' hué' xjote', en yugu' bönni' nacú'uni-gaquië' bin ní'a ná'agaquië', ate' Jesús bunë' yúgu'të bönni' na'. <sup>25</sup> Bönachi zián bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsölál'alö yegu Jordán saca' ga rilén gubidza, ate' rójácalen Jesús.

## Libán benë' Jesús ga naca lu guí'ado'

(Lc. 6:20-23)

**5** Cate' bilé'enë' Jesús bönachi zián söjácálen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. <sup>2</sup> Gusí lahuë' rusédinë' légaquië', rnnë':

<sup>3</sup> —Bica' ba yugu' bönni' té'quibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

<sup>4</sup> Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz lé-gaquië'.

<sup>5</sup> Bica' ba yugu' bönni' nácagaquië' nöxaj ladxí' lahuë' Dios, tu' gata' quegaquië' luyú ni.

<sup>6</sup> Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quegaquië' ca raca quega-ca nupa ta'dún, en ta'bidxi nisa, tu' gunë' Dios ga ulu'z-i'ë xibé lë na' ta'zë ládxi'gaquië'.

<sup>7</sup> Bica' ba yugu' bönni' tu'huechi' ládxi'gaquië' luzá'a-gaquië', tu' huechi' ládxi'ë Dios légaquië'.

<sup>8</sup> Bica' ba yugu' bönni' naca tsahui' icja ládxi'do'-gaquië', en bití' bi dul-la' nabága'gaquië', tu' ila'lé'enë' Dios.

<sup>9</sup> Bica' ba yugu' bönni' ta'bequi dxíë' didza' bizxaj, tu' ila'zí' lágaquië' xzí'ini cazë' Dios.

<sup>10</sup> Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quegaquië' ga rinná bë'ë Bönni' na' zoë' yehua' yubá.

<sup>11</sup> Bica' ba libí'ili' cate' tu'lidza bönachi libí'ili' zí', en ta'bía ládxi'gaquië' libí'ili', ate' lu yöl-la' rizí' yë' ta'nnë' queé'li' le xihui' tu' dá'alí' neda'. <sup>12</sup> Bulí'dzeja, en gulí'c-haza ládxi'lí', tu' uzí'da'alí' xibé yehua' yubá. Ca raca queé'li', guca quegaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

## Bönachi dá'gaca Cristo ilaca ca zödi', en ca bení'

(Mr. 9:50; Lc. 14:34-35)

<sup>13</sup> Gunné' ca' Jesús:

—Libí'ili' nácalí' ca zödi' luyú ni, pero channö initi zödi' na' yöl-la' siná'a que, bití' gaca gunru' ga huóaca siná'a. Bítí'rö naca lesaca', pero chinaca tu le chú'u-naru', ate' ulu'libi bönachi le.

<sup>14</sup> Libí'ili' nácalí' ca bení' yödzölió ni para ulu'í'ili' lahui le naca queë' Dios. Ral-la' gácalí' ca tu yödzö rö'ö tu lu guí'a, tu' cabí gaca igachí' yödzö na'. <sup>15</sup> Cate' ruquela'ru' guí', bití' rigú'uru' le tu zxan guí'ina, pero ruzóaru' le ga liná' para uzéní' yúgu'të nupa nacua' lu yu'u. <sup>16</sup> Ca na' run bení', ral-la' gunlí' ca' libí'ili', gü'í'ili' lataj gaca bë' le nácalí' lógaca yúgu'të bönachi, para cate' ila'lé'e le naca tsahui' runlí', ila'gú'u-në' Xúzili' Dios zoë' yehua' yubá yöl-la' ba.

## Rusédinë' Jesús que le gunná bë'ë Dios lu në'ë Moisés

<sup>17</sup> Gunné' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idütë le tu'sedi lë na'. <sup>18</sup> Le ná-catë rea' libí'ili'. Tsanni nacua' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. <sup>19</sup> Que lë ni na', nútí'tës bönni' quítsjë' tu xibá cuídí'do'os le zoa lu xibá na', en usédinë' bönachi para ilún caní, bönni' ni gá-catërë' cuídí'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútí'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. <sup>20</sup> Rea' ca' libí'ili': Channö cabí gunlí' le ná-catërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'ulí' ga rinná bë'ë Dios yehua' yubá.

## Rusédinë' Jesús ca naca que nu rilé luzé'ë

(Lc. 12:57-59)

<sup>21</sup> Gunné' ca' Jesús:

—Chibiyónilí' ca gula'nnë' bönni' guta' lu ná'agaquië' le gulé' xuz xtó'oli': "Bití' gútilí' bönachi. Nu bönni' gútië' bönachi, nabáguë'ë xíguia', ate' huadxinë' ga uchí'a usöröë' Dios lë'." <sup>22</sup> Na'a, neda' rea' libí'ili': Nu bönni' rilenë' böchí' luzé'ë, nabáguë'ë xíguia' huadxinë' ga uchí'a usöröë' Dios lë'. Lë'sca' caní, nu bönni' innë' zí'ë queë' böchí' luzé'ë nabáguë'ë xíguia' ulu'chí'a ulu'söröë' bönni' lo tu'chí'a tu'söröë' lë', ate' nu bönni' guí'ë luzé'ë: "¡Böa' canó'z!" nabáguë'ë xíguia' tsöjtsu'ë lu guí' gabila.

<sup>23</sup> Caní naca, channö chizóa cu'u tu le ünödzu' lu bucugu lá'ayi, ate' tsöjnenu' ni' zoa bizx que rilenë' böchí' luzó'o lí', <sup>24</sup> bucá'ana lë na' ünödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchí' luzó'o, ate' ní'irö gudá ünödzu' lë na' nu'u.

<sup>25</sup> Channö zoa nu bönni' rinábiné' lí' bi ubi'u queé', en iché'è lí' ga uchi'a usöróé' tu bönni' lí', budzágaté tsahui' bönni' na' tsanni ni' yú'ulenu' lè' nōza, para cabí udödé' lí' lahué' bönni' ruchi'a rusöróé', ate' bönni' ni udödé' lí' lu në'è bönni' rusayjé' lidxi guié', ate' lè' cu'è lí' lidxi guié' na'. <sup>26</sup> Le nácatè' rea' lí', bití' ca' uruju' ni' cate' idxinrö dza quixzju' ga buitè le ral-lu'u.

**Rusédiné' Jesús ca naca que nu riguitsaj xibá que yöl-la' nutsaga na'**

<sup>27</sup> Gunné' ca' Jesús:

—Chibiyónilí' ca na' gula'nné': "Bití' gunu' dul-la' le riguitsaj xibá que yöl-la' nutsaga na'." <sup>28</sup> Na'a, neda' rea' libí'ili': Núti'tès bönni' ruyúé' tu nigula len yöl-la' rizé' ladxi' le ruá' dö', chibené' dul-la' len lènu lu icja ládxi'-da'ahué'.

<sup>29</sup> Que lè ni na', channö guió'j lo' ibèla gun ga gunu' dul-la', guléaj le, en gurú'una le. Gácarö dxí'a quiu' unítu' tu guió'j lo', en calèga idúteo' tsöjtsú'u lu guí' gabila. <sup>30</sup> Channö no'o ibèla gun ga gunu' dul-la', guchugu le, en gurú'una le. Gácarö dxí'a quiu' unítu' tu no'o, en calèga idúteo' tsöjtsú'u lu guí' gabila.

**Rusédiné' Jesús ca naca que nu bönni' rulá'alené' nigu-la queé'**

(Mt. 19:9; Mr. 10:11-12; Lc. 16:18)

<sup>31</sup> Gunné' ca' Jesús:

—Lësca' gula'nné': "Núti'tès bönni' rusané'-nu nigula queé', ral-la' unödzejé' queénu tu guichi le rnna rulá'alené'-nu." <sup>32</sup> Na'a, neda' rea' libí'ili', channö zoé' nu bönni' rusané'-nu nigula queé', en bití' zoa le ruá' dö' runnu, guné' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' sí'è-nu nigula na', lësca' guné' dul-la' le riguitsaj xibá que yöl-la' nutsaga na'.

**Rusédiné' Jesús ca naca que nu ruzötaj La la'ayi queé' Dios**

<sup>33</sup> Gunné' ca' Jesús:

—Lësca' biyónilí' ca yugu' bönni' guta' lu ná'agaquié' gulé' xuz xtó'olí', gula'nné': "Bití' sí' yé'u cate' run tsutsu xtídz'u'u ní'a queé' Dios, en ral-la' gunu' lahué' Xanru' Dios idútè lè na' run tsutsu xtídz'u'u ní'a queé' Lè'."

<sup>34</sup> Na'a, neda' rea' libí'ili', bití' ca' gun tsutsu xtídz'a'lí'. Bití' gun tsutsu xtídz'a'lí' ní'a que yehua' yubá, tu' naca ga rö'è rinná bē'è Dios. <sup>35</sup> Bití' gun tsutsu xtídz'a'lí' ní'a que luyú ni, tu' naca luyú ni ca xilibi ní'è Dios, en calèga ní'a que Jerusalén, tu' naca ladzé' Bönni' nayépisètèrè' rinná bē'è. <sup>36</sup> Bití' gun tsutsu xtídz'u'u ní'a que icju', tu' cabí gaca gunu' ga huó'áca chiguichi o gasaj nitú' guitsa' icju'. <sup>37</sup> Ral-la' innásilí': "Ön", o innásilí': "Bití'", tu' naca que tu' xihui' le nadödi bē' ca nácaga-ca didza' ni.

**Rusédiné' Jesús ca naca que nu ruzí' lèbi luzé'e**

(Lc. 6:29-30)

<sup>38</sup> Gunné' ca' Jesús:

—Chibiyónilí' ca naca le gunná bē'è Moisés, gunné': "Nu bi run que guió'j lahui luzé'e, ubí'i ca' que, enca' nu bi run que layí' luzé'e, ubí'i ca' que." <sup>39</sup> Na'a, neda' rea' libí'ili': Bití' tá'baga'lí' nu guá' dö' queéli', ate' channö nu capa' xagu' ibèla, bē' lataj capa' ca' ia'tú xagu' yógöla. <sup>40</sup> Channö zoa nu gun ga uchi'a usöróé' tu bönni' lí', en cué' xzo', bē' ca' queé' lari' rixó'a cúdz'u'u. <sup>41</sup> Channö zoa nu gun bayudxi gu'u yua' que tu chí'i, guyéajlen nu na' chopa chí'i. <sup>42</sup> Nu bi rinábini lí', bunödzej que, en nu bi gué'eni gunnu' que tu chí'i, bití' tá'bagu'u lè na' inabi lí'.

**Rusédiné' Jesús ca ral-la' idxí'iru' nupa bití' ta'lé'e rē'u dxí'a**

(Lc. 6:27-28, 32-36)

<sup>43</sup> Gunné' ca' Jesús:

—Lësca' caní biyónilí' lè na' gula'nné': "Ral-la' idxí'inu' nu nadxí'i lí', en udí'inu' nu bití' rilé'e lí' dxí'a." <sup>44</sup> Na'a, neda' rea' libí'ili', guli'dxí'i nupa bití' ta'lé'e libí'ili' dxí'a. Guli'nábiné' Dios gácalené' nupa tu'lídza libí'ili' zí'. Guli'gún le naca tsahui' quégaca nupa tu'dí'i libí'ili', en bulí'lidzé' Dios inábili'-nè' guné' ga gaca dxí'a quégaca nupa ta'nné' queéli', en tuá' dö' queéli'. <sup>45</sup> Channö gunlí' caní, gácalí' xzí'ini cazé' Xúziru' Dios, zoé' yehua' yubá, tu' runé' Lè' ga ruzení' gubidza queé' ga nacua' bönachi tuá' dö', enca' ga nacua' bönachi tsahui'. Risól-lè'è tu nisa guió'j lu yu quégaca bönachi tsahui', enca' lu yu quégaca bönachi bití' nácagaca tsahui'. <sup>46</sup> Channö nadxí'isilí' bönni' nadxí'iguequiné' libí'ili', ¿nuzxi caz cu'u libí'ili' yöl-la' ba? Lësca' caní tuné' bönni' bití' nácagaca tsahui' na', bönni' tu'quixzjé' uláz que yödzo zí'tu', nadxí'iguequiné' luzá'agaquié'. <sup>47</sup> Channö rugápali' Dios tuzé' böchi' luzá'alí', ¿bizxi caz runlí' le nácatèrö dxí'a? Lësca' caní tuné' bönni' bití' núnbé'gaquié' Dios. <sup>48</sup> Pero libí'ili', guli'gaca idú tsahui', ca na' náquié' Xúziru' Dios, zoé' yehua' yubá, náquié' idú tsahui'.

**Rusédiné' Jesús ca ral-la' gácalenru' bönachi**

<sup>6</sup> Gunné' ca' Jesús:

—Guli'gú'í' ládxi'li' gaca idú ca reaj ládxi'li'-nè' Dios. Bití' gúnsilí' lè ni lógaca bönachi para ila'lé'e ca na' runlí'. Channö runlí' caní, bití' bi gunné' Xúziru' Dios zoé' yehua' yubá queéli'. <sup>2</sup> Cate' bi unödzu' que nu bi riyadzaj, bití' gunu' ga ilá' lahui lè na' runu' ca tuné' bönni' tu'lu'ísö tsahui' cuíngaquié' ga naca lu yu'u ga tu'dubé' bönni' judío, en tu'sédé' queé' Dios, enca' ga naca lu yé'èyi. Caní tuné' para ila'gú'u bönachi lé-gaquié' yöl-la' ba. Le nácatè' rea' libí'ili', cá'asö naca yöl-la' ba gata' quégaquié'. <sup>3</sup> Pero lí', cate' bi unödzu' que nu bi riyadzaj, bití' ca' gu'u lataj nu inözi. <sup>4</sup> Na'a, lè na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lè' ubi'è quiu'.

**Rusédiné' Jesús ca ral-la' ulídzaru'-nè' Dios**

(Lc. 11:2-4)

<sup>5</sup> Gunné' ca' Jesús:

—Cate' ulídzali'-nè' Dios, bití' gunlí' ca tuné' bönni' tu'lu'ísö tsahui' cuíngaquié', tu' ta'yaza ládxi'gaquié'

ta'zuínë tu'lidzë Dios gapa naca lu yu'u ga tu'dubë tu'sëdë bönni' judío queë Dios, en gapa naca lu yé'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. <sup>6</sup> Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë Dios inábili'-në' Xúziru' Dios, zóalenë libí'ili' ga na' zóali' queézili', ate' Xúziru' Dios, Nu rilé'e ca runlí' bagáchi'sö, Lë' ubi'ë queé'li'.

<sup>7</sup> Cate' ulídzali'-në' Dios biti' gunlí' la' yé'ëyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yé'ëyi la' lez.

<sup>8</sup> Biti' gunlí' ca na' tunë' légaquië'. Xúziru' Dios, zí'atëlö cate' sí' inábali'-në', chinöz quézinë' le riyadzaj queé'li'.

<sup>9</sup> Que lë ni na', ral-la' ulídzali'-në' Dios innalí' caní:

Xuz netu', zu' yehua' yubá, gaca zxön Lo'.

<sup>10</sup> Gudá inná bë'u luyú ni.

Ben ga gaca luyú ni ca raza ládxu'u Li'

ca na' raca yehua' yubá.

<sup>11</sup> Benna le gágutu' na'a dza.

<sup>12</sup> Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queé'tu'.

<sup>13</sup> Biti' gu'u lataj sí' bë' tu' xihui' netu',

pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní ré'ënitú gácatíca'sö. ¡Ca' gaca!

<sup>14</sup> Channö uniti loli' luzá'ali', nupa tuá' dö' queé'li', uniti lahuë' Xúziru' Dios, zoë' yehua' yubá, libí'ili'. <sup>15</sup> Channö cabí uniti loli' luzá'ali', biti' uniti lahuë' Xúziru' Dios libí'ili' ca naca dul-la' nabága'li'.

### Rusédinë' Jesús ca ral-la' gunru' gubasa

<sup>16</sup> Gunnë' ca' Jesús:

—Cate' gunlí' gubasa, biti' gunlí' bayechi' loli' ca tunë' bönni' tu'luí'sö tsahui' cuíngaquië', tu' tunë' bayechi' ló-gaquië' para iléqui'be'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'.

<sup>17</sup> Libí'ili', cate' gunlí' gubasa, buli'pá'a ícjali', en guli'quibi loli', <sup>18</sup> para cabí iléqui'be'e bönachi runlí' gubasa. Bagáchi'sö ral-la' gunlí' gubasa, ate' Xúziru' Dios, zóalenë libí'ili' ga na' zóali' queézili', Lë' ubi'ë queé'li'.

**Yehua' yubá ral-la' utúbiru' yöl-la' tsahui' queé'ru'**

(Lc. 12:33-34)

<sup>19</sup> Gunnë' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'banë'. <sup>20</sup> Buli'tubi yöl-la' tsahui' yehua' yubá, ga ni bélado' que biti' ulu'töba' le, en biti' gaca ditaj, en ga ni biti' ila'yázië' bönni' gubán, en biti' ila'banë'. <sup>21</sup> Ga ni' dë yöl-la' tsahui' queé'li', ni' gü'í ládxí'li' idxinlí'.

**Le rigú'u bení' icja ládxí'do'oru'**

(Lc. 11:34-36)

<sup>22</sup> Gunnë' ca' Jesús:

—Guiöj loru' naca ca tu le rigú'u bení' icja ládxí'do'oru'. Que lë ni na', channö guiöj loli' naca tsahui', idútëli' tsépili' yösa bení'. <sup>23</sup> Channö guiöj loli' biti' naca tsahui', idútëli' nachúl-lali'. Que lë ni na', channö bení' zóalen libí'ili' nuhuöáca le naca chul-la, yénni'tërö nachúl-lali'.

**Dios, en dumí**

(Lc. 16:13)

<sup>24</sup> Gunnë' ca' Jesús:

—Cuntu nu bönni' gaca gunë' xichíngaquië' chopa xanë', tu' uzóë' tuë' tsölá'alö, ate' ia'túé' na' idxí'inë', o ugá'analënë' tuë', ate' ia'túé' na' usán ládxë'ë. Biti' gaca gunlí' xichinë' Dios, enca' dumí.

**Dios rapa chí'ë nupa néquiquequi queë'**

(Lc. 12:22-31)

<sup>25</sup> Gunnë' ca' Jesús:

—Ia'stú rea' libí'ili': Biti' ubi uguí'ili' ní'a que le gáguli' o ní'a que le guí'jali', yugu' le nabánili', o ní'a que lari' gáculi'. Nazáca'tërö yöl-la' na'bán queé'li' ca le gáguli', ate' nácatërö lesaca' le nácali' ca lari' gáculi'. <sup>26</sup> Buli'yú ca raca quégacaba' biguínido' ta'daba' lúxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë légacaba'. Nazáca'tëröli' libí'ili' ca yugu' biguínido' na'. <sup>27</sup> ¿Nuzxi caz bönni' nútsë'ë ladjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

<sup>28</sup> ¿Bizx que ruúbi ruguí'ili' ní'a que le gáculi'? Buli'yútsöca' ca raca quégaca yöjdo' rógaca la' guixi' ca ta'zxón. Biti' tun dxin, en biti' tun du lari'. <sup>29</sup> Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'. <sup>30</sup> Dios caz runë' lachi yöj guixi'do', le rógaca la' guixi', le nacué' na'a dza, ate' cuxó huidzaj ila'yegui lu guí'. Channö caní ruí' ládxë'ë yöj guixi'do', runë' léguequi lachi, gúnda'arë' ca' queé'li', sal-la' biti' réajlë'ëli'-në' idú ládxí'li'. <sup>31</sup> Que lë ni na', biti' ubi uguí'ili', en biti' innalí': "¿Bizxi gágutsatu?" o "¿Bizxi guí'jatsatu?" o "¿Bizxi lari' gágutsatu?" <sup>32</sup> Bönachi yödzölió ni tu'úbi tu'guí' ní'a que yúgu'të lë ni, pero zoë' Xúziru' yehua' yubá, ate' Lë' nözínë' naquínili' yúgu'të lë ni. <sup>33</sup> Na'a, guli'gü'irö ládxí'li' inná bé'enë' Dios libí'ili', en gunlí' le naca tsahui' lahuë' Lë', ate' Lë' cu'ë xinózáli' yúgu'të lë ni. <sup>34</sup> Que lë ni na', biti' ubi uguí'ili' ní'a que le ral-la' gaca cuxó huidzaj, tu' huáca gü'í ládxí'li' cuxó huidzaj le gaca queé'li' dza na'. Tu tu dza ilaca le ral-la' gü'í ládxí'li' dza na'.

**Biti' ral-la' ichugu bé'ëru' böchi' luzá'aru'**

(Lc. 6:37-38, 41-42)

**7** Gunnë' ca' Jesús:

—Biti' ichugu bé'ëli' böchi' luzá'ali', para cabí ichugu bë'ë Dios queé'li', <sup>2</sup> tu' ichugu bë'ë Lë' queé'li' la' leze ca na' richugu bé'ëli' queë' böchi' luzá'ali', ate' ca na' rurixi rudódili' que luzá'ali', la' cá'asö urixi udödë' Dios queé'li'. <sup>3</sup> ¿Bizx que ruyú' bé'budo' yu'u guiöj lahuë'

böchi' luzó'o, en bití' réquibe'enu' yu'u le zxóntèrö guió'j lo' lí? <sup>4</sup> ¿Guíëtso' böchi' luzó'o: "Guló'z, cueja' bé'budo' yu'u guió'j lo'", ate' lí', le zxóntèrö ca' yu'u guió'j lo' lí'?

<sup>5</sup> Lí', bönní' rulu'ísö tsahuí' cuinu'. Guléaj zí'alö le zxön yu'u guió'j lo' lí', ate' ní'irö ilé'enu' tsáhú'ido' para gaca cueju' bé'budo' yu'u guió'j lahué' böchi' luzó'o.

<sup>6</sup> Bití' gü'í'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' ch'únalí' le naca lesaca' queé'li' láhuigacaba' cuchi, para cabí ulu'zadí' ní'aba' le.

### Gulí'naba, guli'guilaj, en bulí'lidza ra' yu'u (Lc. 11:9-13; 6:31)

<sup>7</sup> Gunné' ca' Jesús:

—Gulí'naba, ate' Dios gunné' queé'li'. Guli'guilaj, ate' gunné' lataj idzöli queé'li'. Bulí'lidza ra' yu'u, ate' Lë' isaljé' queé'li'. <sup>8</sup> Nú'títès bönní' rinabé', ridé'li'né', ate' bönní' riguiljé', ridzöli queé', ate' bönní' rulidzé' ra' yu'u, ralaj queé'.

<sup>9</sup> Channö zoé' nu bönní' ladjalí' libí'ili', ate' zóabi' bí'i queé', channö inábibi' lë' yöta xtila, ¿naru' unödzejé'-bí' guió'j? <sup>10</sup> Channö inábibi' lë' tuba' böla, ¿naru' unödzejé'-bí' bëla? <sup>11</sup> Libí'ili' nácalí' huiá' dö', pero nózilí' unödzejalí' xzí'nili' le naca tsahuí'. Nácatèrö löza, Xúzili' zoé' yehua' yubá unödzejé' nupa ta'nábini Lë' le naca dxí'a.

<sup>12</sup> Que lë ni na', ca na' ré'ení'li' ilún bönachi queé'li', lësca' caní guli'gún quégaquié'. Lë ni naca le rinná bë' xibá queé' Moisés, enca' le gula'nné' bönní' gulu'é didza' uláz queé' Dios.

### Tu ga ral-la' tsú'uru' le naca tsú'pí'do' (Lc. 13:24)

<sup>13</sup> Gunné' ca' Jesús:

—Gulí'tsáz ga nu riyaza le naca tsú'pí'do'. Blaga' naca ga nu riyaza, en yalaj naca nöza le rójácalené' bönní' ga ní' ila'nítie', ate' ta'yázié' bönní' zían ní'. <sup>14</sup> Tsú'pí'do' naca ga nu riyaza, en lásido'os naca nöza le rójácalen bönachi ga ní' ila'delí' yöl-la' na'bán idú, ate' nabábasö nupa ta'dzöli le.

### Le runru' naca bë' le nácaru' (Lc. 6:43-45)

<sup>15</sup> Gunné' ca' Jesús:

—Gulí'gún chí'i cuinlí' para cabí ila'zí' yé'ené' bönní' ta'zí' yé'ë libí'ili', ta'nné' tu'é didza' uláz queé' Dios. Ila'dxiné' bönní' caní ga zóalí', en ulu'lu'í' cuíngaquié' nöxaj ladxí'do' ca nácgacaba' bö'cu' zxí'la'do', pero lu icja ladxí'do'gaquié' nácgagaquié' ca bö'cu' guí'a sínia'. <sup>16</sup> Yugu' le tuné' ilaca bë' le nácgagaquié'. Bití' ruchíbiru' le ribía lubá uva lu yaga yötsí', en bití' ruchíbiru' le ribía yaga higo lu guixí' legui lásido'. <sup>17</sup> Caní naca, yúgu'té yaga dxí'a ta'bia le naca dxí'a, ate' tu yaga cabí naca dxí'a ribía le cabí naca dxí'a. <sup>18</sup> Yaga dxí'a na' bití' gaca cuía le cabí naca dxí'a, ate' yaga na' bití' naca dxí'a bití' gaca cuía le naca dxí'a. <sup>19</sup> Yúgu'té yaga bití' ta'bia le naca dxí'a ila'rugu, ate' ila'gu'é léguequi lu guí'. <sup>20</sup> Caní naca, yugu' le tuné' bönní' na' ilaca bë' le nácgagaquié'.

### Nupa bití' ila'yázié' ga rinná bë'ë Dios (Lc. 13:25-27)

<sup>21</sup> Gunné' ca' Jesús:

—Zian nupa të neda': "Xan, Xan", pero calëga yúgu'té' ila'yázié' ga rinná bë'ë Dios yehua' yubá. Ila'yázasé' ní' bönní' tuné' ca ré'ëné' Xuza' Dios, zoé' yehua' yubá.

<sup>22</sup> Cate' idxín dza údxi que yödzülió ni, bönní' zían ilé' neda', ila'nné': "Xan, Xan, bentu' libán que xtídzé'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihuí', en buguntu' ca' dxin Lo' bentu' zían yöl-la' huáca zxön." <sup>23</sup> Ní'irö neda' guía' lé-gaquié': "Bití' ca' núnbé'a libí'ili'. Guli'cuíta ga zoa', libí'ili' ruá'ali' dö'."

### Chopa ca gaca udxíaru' xilibi zö'ö (Lc. 6:47-49; Mr. 1:22)

<sup>24</sup> Gunné' ca' Jesús:

—Ia'stú ca', nu bönní' riyönné' xtídzá'a ni, en guné' ca rna, bönní' ni náquié' ca tu bönní' réajni'iné', budxié' lidxé' ga naca lu guió'j. <sup>25</sup> Cate' gulaj guió'siu', en guzxón yegu gubó'o, en guyecja bö', gudibi nisa cuita yu'u na', pero bití' gubixi, tu' dxía xilibi lu guió'j. <sup>26</sup> Na'a, nu bönní' riyönné' xtídzá'a ni, en bití' runé' ca rna, bönní' ni náquié' ca tu bönní' bití' réajni'iné', budxié' lidxé' lu yu dzöbi. <sup>27</sup> Cate' gulaj guió'siu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubixité, en tsaz biguinna'j.

<sup>28</sup> Cate' Jesús budxi bé'lené' légaquié' didza' ni, bu-lu'bani bönachi zían nacua' ní' ca naca le rusédiné', <sup>29</sup> tu' rusédiné' légaquié' ca tu bönní' dë lu në'ë, en calëga ca tuné' bönní' yudo' usedi quégaquié'.

### Ruhuóáquié' tu bönní' ré'ené' hué' nudzu' ruzödi (Mr. 1:40-45; Lc. 5:12-16)

**8** Cate' bö'tjé' Jesús lu guí'a na', söjácalen bönachi zían Lë'. <sup>2</sup> Bidxiné' tu bönní' ré'ené' hué' nudzu' ruzödi ga zoé' Jesús, ate' buzóa zxibé' lahué' Jesús, en rë' Lë':

—Xan, channö ré'ënu', huáca unu' neda'.

<sup>3</sup> Ní'irö Jesús la' bulité në'ë, en gudané' lë'. Rë' lë':

—Ré'ënda'. Huóácu' dxí'a.

La' bunítité xihué'ë bönní' hué' na'. <sup>4</sup> Ní'irö Jesús gudxé' lë':

—Buyú, cuntu nu guío' caní, pero guyéaj, yöjlu'í' cuinu' lahué' bixúz, ate' yöjnödzej le gunná bë'ë Moisés le ulu'í' bönachi chibóácu'.

### Jesús ruúné' bí'i huen dxin queé' tu bönní' rinná bë'ë lu gudil-la (Lc. 7:1-10)

<sup>5</sup> Cate' guyázié' Jesús yödzö Capernaum, bidxiné' tu bönní' ga zoé', bönní' rinná bé'ené' tu gáyü'ë bönní' rójáquié' gudil-la, ate' gúta'yüé' lahué' Jesús, <sup>6</sup> en rë' Lë':

—Xan, bí'i huen dxin quia' dëbi' yu'u, ré'ebi' hué' nacú'unibi' bin, ate' riguí'í' rizáca'da'abi'.

<sup>7</sup> Jesús rë' lë':

—Neda' guída' una'-bí'.

<sup>8</sup> Bubi'ë didza' bönni' na' rinná bé'ené' bönni' röjáquié' gudil-la, en ré' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'. <sup>9</sup> Lësca' neda', zoa nu rinná be'e neda', en nacu'ë ca' bönni' röjáquié' gudil-la rinná bé'egacada'-né'. Cate' rea'-né' tué': "Guyéaj ni'", rejé'. Cate' rea'-né' ia'túé': "Gudá ni'", ridé'. Cate' rea'-né' bönni' huen dxin quia': "Ben dxin ni'", la' runté' dxin na'.

<sup>10</sup> Cate' biyönné' Jesús didza' ni, bubáinéné', ate' gudxé' bönni' sójácalené' Lë', rnné':

—Le nácaté' rea' libí'ilí', ga nacuá' bönachi Israel, cuntu nu bönni' röjxéqui'da'-né' réajlé'ë neda' ca runé' bön-ni' ni. <sup>11</sup> Ia'stú' rea' libí'ilí': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxön Abraham, en Isaac, en Jacob, yehua' yubá ni' ga rinná bé'ë Dios, <sup>12</sup> pero yugu' bönni' na' guró cazé' Dios para ila'yázié' ga na' rinná bé'ë Lë', chú'uné' lé-gaquié' ní'iló ga na' naca chul-la, ate' ni' ila'bödxé', en ulú'til-la láyë'ë lu yöl-la' ruhu'ini quégaquié'.

<sup>13</sup> Ní'irö Jesús gudxé' bönni' na' rinná bé'ené' bönni' röjáquié' gudil-la, rnné':

—Böaj lidxu'. Ca na' réajlé'u, ca' gaca quiu'.

La' ná'asö böácate'bi' bi'i huen dxin queé' na'.

#### Jesús ruúné' xiná'anu nigula queé' Pedro

(Mr. 1:29-31; Lc. 4:38-39)

<sup>14</sup> Bidxiné' Jesús lidxé' Pedro, ate' ni' bilé'ené'-nu xiná'anu nigula queé', dënu lu da'a, en yú'unu tu xilá.

<sup>15</sup> Gudané' Jesús ná'anu, ate' la' burúajté xilá na' yú'unu. Ní'irö böásanu, en bunöd'zjanu le gulahué'.

#### Jesús ruúné' zían nupa te'e

(Mr. 1:32-34; Lc. 4:40-41)

<sup>16</sup> Cate' chiridzó' dza na', dujuá'agaquié' zían bönni' yú'ugaca bö' xihui' légaquié' ga zoé' Jesús, ate' len yöl-la' rinnésö queé' bubéajé' yugu' bö' xihui' na', en buné' ca' yúgu'té nupa te'e. <sup>17</sup> Caní guca para gaca ca na' gunné' Isaías, bönni' bé'ë didza' uláz queé' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhué' queéru'."

#### Nupa gulé'ëni tsójácalen Jesús

(Lc. 9:57-62)

<sup>18</sup> Cate' bilé'ené' Jesús nacuá' bönachi zían gásibi'ilé', gunná bé'ené' yugu' bönni' usëda queé' ila'dödé' ia't-sölá'a nísado' ni'. <sup>19</sup> Bidxiné' tu bönni' yudo' usedi ga na' zoé' Jesús, en ré' Lë':

—Bönni' Usedi, sá'lena' Li' gáti'tës ga tseju'.

<sup>20</sup> Jesús ré' lë':

—Yugu' böza' nacuá' znan guiój quégacaba', ate' yugu' biguínido', nudxiagacaba' xicá'agacaba', pero neda', Bönni' Guljé' Bönachi, biti' dë ga quíxaj icja'.

<sup>21</sup> Ia'túé' bönni', náquié' bönni' usëda queé' Jesús, gudxé' Lë':

—Xan, benna neda' lataj huója' ga idxinrö dza chibucácha'a-né' xuzá'.

<sup>22</sup> Jesús gudxé' lë':

—Gudá' neda'. Bé' lataj yugu' bönni' tati cazé' ulu'cáché'ë nupa ilátigaca quégaquié'.

#### Jesús ribequi dxíé' bö' budunu'

(Mr. 4:35-41; Lc. 8:22-25)

<sup>23</sup> Gurené' Jesús lë'e bárcodo', ate' dzágagaquié' Lë' bönni' usëda queé'. <sup>24</sup> Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxinté riyaza nisa lë'e bárcodo' na'. Dë' rásié' Jesús lë'e barco na'. <sup>25</sup> Ní'irö bila'dxiné' bönni' usëda queé' Jesús ga na' zoé', ate' bulu'subané' Lë', en të' Lë':

—Xan, busölá netu'. Chirigáchi'ru' lu nisa.

<sup>26</sup> Bubi'ë didza' Jesús, en ré' légaquié':

—¿Bizx que rádxili'? Láti'do'os réajlé'ëli'-né' Dios.

Ní'irö guyasé' Jesús, en bulidzé' bö' na' recja, en nísado' na', ate' la' guró'oté dxi. <sup>27</sup> Bulu'báinéné' bönni' na', ta'nné':

—¿Nuzxi caz bönni' ni? Ruí'sé' didza', ate' bö' recja, en nísado' tun ca rnné'.

#### Yugu' bönni' Gadara yú'ugaca bö' xihui' légaquié'

(Mr. 5:1-20; Lc. 8:26-39)

<sup>28</sup> Cate' bidxiné' Jesús ia'tsölá'a nísado' ga na' naca lu xiyú yödzö Gadara, bila'rúajé' chopé' bönni' ga nacuá' ba quégaca nupa nátigaca, dutságagaquié' Jesús.

Nácagaquié' sínia', ate' cuntu nu gaca tódi la' nöza ni'.

<sup>29</sup> La' gulu'itë' zidzaj didza' chopé' ni, ta'nné':

—¿Bizxi ral-la'tu' quiu', Jesús, Zxí'iné' Dios? ¿Naru' bidxintso' ni dusaca' zí'u netu' zí'aló ca idxin dza queé-tu'?

<sup>30</sup> Ga ni' nacu'ë nacuá'aba' cuchi zían ta'daba' táguba', nacuá'aba' láti'do' ga naca zí'tu'. <sup>31</sup> Gula'naba yechi' bö' xihui' na' Jesús, en të' Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

<sup>32</sup> Ní'irö Jesús gudxé' léguequi:

—Gulí'tséaj.

La' bila'rúajté bö' xihui', en yöjcházagaca cuchi zían ni'.

Ní'irö yúgu'téba' cuchi zían na' yöjbíxitégacaba' ga naca lë'e guiój, en yöjcházagacaba' lu nísado', ga ni' gula'yé'piba' nisa, en gulátiba'.

<sup>33</sup> Guládxiné' bönni' tu'yúé'-ba' cuchi na', ate' bu-lu'zxúnnajé'. Cate' bila'dxiné' lu yödzö, gula'guíxjé' yúgu'té lë' na' guca quégaquié' bönni' ni' gula'yú'u bö' xihui' légaquié'. <sup>34</sup> Ní'irö bila'rúaj bönachi lu yödzö ni', yöjtságagaquié' Jesús. Cate' bila'lé'ené' Lë', guláta'yué' lahué' uzé'ë lu xiyúgaquié' na'.

#### Jesús ruúné' tu bönni' nacú'unié' bin

(Mr. 2:1-12; Lc. 5:17-26)

**9** Ní'irö bubené' Jesús lë'e bárcodo', en gudödé' ia't-sölá'a nísado' ni', ate' budxiné' ga naca ladzé'. <sup>2</sup> Ní' dujuá'gaquié' tu bönni' nacú'unié' bin ga zoé' Jesús, zx-oé' lu da'a yaga. Cate' bilé'ené' Jesús ca na' ta'yéajlé'ë bönni' ni' Lë', gudxé' bönni' na' nacú'unié' bin, rnné':

—Butipa lád'xu'u, zxí'ina'do'. Chibuníti lahua' dul-la' nabágu'u.

<sup>3</sup> Nacu'è ca' bönni' yudo' tu'sédinè' ni', ate' ta'nné' lu icja ládxi'do'gaquié', ta'nné': "Didza' ru'è bönni' ni ruzóa Dios tsölá'alö."

<sup>4</sup> Cate' réquibe'ené' Jesús le ta'zá' ládxi'gaquié', ré lé-gaquié':

—¿Bizx que rizá' ládxi'li' caní le cabí naca tsahui'?

<sup>5</sup> Biti' naca böniga nu guiésö bönni' ni: "Yugu' dul-la' nabágu'u chibuníti lahua'", pero naca böniga nu gun ga huóásè', en uzé'ené'. <sup>6</sup> Na'a, ulu'ida' libí'ili' neda', Bönni' Guljé' Bönachi, dè lu na'a yöl-la' unná bè' uniti lahua' dul-la' luyú ni.

Ní'irö Jesús gudxè' bönni' na' nacú'unié' bin, rnné':

—Guyása. Buchisa da'a yaga quiu', en böaj lidxu'.

<sup>7</sup> Ní'irö la' guyásatè' bönni' na' nacú'unié' bin, en böaj-jè' lidxè'. <sup>8</sup> Cate' bila'lé'ené' bönni' nacué' ni' lè ni, bulu'bánninè', ate' gula'gu'è Dios yöl-la' ba tu' bunödzejè' yöl-la' huáca caní quegaca bönachi.

### Jesús rulidzè' Mateo

(Mr. 2:13-17; Lc. 5:27-32)

<sup>9</sup> Cate' buzé'è Jesús ni', bilé'ené' bönni' lè' Mateo, rø'è ga na' ruquíxjè' uláz que yödzo' zitu', ate' Jesús gudxè' lè':

—Gudá' neda'.

Ní'irö la' guyásatè' Mateo na', ate' sa'yéajlené' Jesús.

<sup>10</sup> Ia'tú le guca, cate' ni' rø'è Jesús rahué' ga naca lidxè' Mateo, zían bönni' tu'quíxjè', en yugu' bönni' cá'asö bila'dxiné' ga zoé', ate' gula'bó'lené' Jesús tsözxón len yugu' bönni' usèda queé'. <sup>11</sup> Cate' bönni' yudo' fariseo bila'lé'ené' lè ni, gula'nábiné' yugu' bönni' usèda queé' Jesús, ta'nné':

—¿Naru' bönni' rusédinè' libí'ili' rágulentsè' tsözxón bönni' tu'quíxjè', en iá'zica'rè' bönni' dul-la'?

<sup>12</sup> Cate' biyönnè' Jesús lè ni, ré' légaquié':

—Biti' naquíniguequiné' bönni' nacagaquié' dxi'a nu un bönachi, pero bönni' té'ené' naquíniguequiné' nu un bönachi. <sup>13</sup> Gulí'tséaj, en buli'sèda le rnna lè na' nazúaj lu guichi lá'ayi, le rnna caní: "Ré'ènda' ulu'huéchi' ládxi'gaquié' bönni' luzá'agaquié', en calèga ilútié'-ba' böa' bédxi lu bucugu lá'ayi quia'." Bida' ni, calèga para ulídzagaca'-né' bönni' tsahui', pero bida' para ulídzagaca'-né' bönni' dul-la' para ulu'bí'i ládxi'-gaquié'.

### Rusédinè' Jesús ca ral-la' gunru' gubasa

(Mr. 2:18-22; Lc. 5:33-39)

<sup>14</sup> Ní'irö bönni' dá'gaquié' Juan, bönni' na' buquilé' bönachi nisa, bila'dxiné' ga zoé' Jesús, ate' gula'nábiné' Lè', ta'nné':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usèda quiu' Li' bití' tunè' gubasa?

<sup>15</sup> Bubi'è didza' Jesús, en ré' légaquié':

—¿Naru' huácatsö ila'sèbi ládxi'gaca nupa nacué' laní que yöl-la' rutsaga na' tsanni ni' bönni' rutsaga në'è zóalené' légaquié'? Za' dza cate' idúé' bönni' na' rutsaga në'è ga nacué'. Dza ní'irö iluné' gubasa.

<sup>16</sup> Bucúdzu'è didza' Jesús, rnné':

—Cuntu nu un tu lari' tèbi len lari' cubi, tu' uxú'uni lari' cubi na' nugu'è lari' tèbi na', ate' ichóza'rö lari' tèbi na'. <sup>17</sup> Lèscá' caní, cuntu nu bönni' rigu'é'ené' xisi uva cubi tu lu buzudi guídi gula, tu' galaj ilèbi xisi uva cubi na', en uzuzxaj buzudi guídi gula na', ate' gaca ditaj xisi uva na', ate' iníti ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatè' taca chí'i.

### Rubanbí' bí'i nigula queé' Jairo, en ruhuóacanu tu nigu-la gudannu lari' nacué' Jesús

(Mr. 5:21-43; Lc. 8:40-56)

<sup>18</sup> Tsanni ni' Jesús ru'ilené' légaquié' didza' ni, tu bönni' rinná bé'ené' bönachi judío bidxiné' ga zoé', ate' buzóa zxbè' lahué' Jesús, en ré' Lè':

—Bí'i nigúlado' quia' la' gútitèbi'. Gudá ixóa no'o lèbi', ate' ubanbí'.

<sup>19</sup> La' guzuítené' Jesús, en sa'yéajlené' lè'. Dzága-gaquié' bönni' usèda queé' Lè'.

<sup>20</sup> Ní'irö bidxinnu tu nigula zaca' cúdzu'lè' Jesús, chiguca chinnu iz ré'enu, bití' ruhuí' rön queénu que hué' quegaca cázanu nigula, ate' gudannu lari' nacué' Jesús. <sup>21</sup> Caní bennu tu' rizá' ládxi'nu, rnnanu: Channó cansa' zxè', huóáca'. <sup>22</sup> Ní'irö buécjè' Jesús, en ruyúé' lènu, ate' rø'è-nu:

—Butipa ládxi'nu, xzí'ina'do'. Chiböácateu' tu' réajlè'u neda'.

La' ná'asö böacatènu.

<sup>23</sup> Cate' bidxiné' Jesús lidxè' bönni' unná bè' na', bilé'ené' nacué' ni' bönni' tu'cödxé' gui, en nupa ta'bödxi yechi'. <sup>24</sup> Jesús ré' légaquié':

—Gulí'cuita ni, tu' cabí nátibi' bí'i nigúlado' ni. Rásisi-bí' na'.

Ní'irö nupa nacué' ni' bulu'titaj Lè'.

<sup>25</sup> Cate' chinubéajè' Jesús bönachi na' ní'ilö, guyázié', en gudélè'è ná'abi' bí'i nigula na', ate' la' guyásatèbi'.

<sup>26</sup> Guzè' didza' ca guca lè ni, ate' bila'yöni bönachi nacué' idútè luyú na'.

### Jesús ruúnè' bönni' nachul-la guió'j lógaquié'

<sup>27</sup> Cate' Jesús burúajè' ni', chopè' bönni' nachul-la guió'j lógaquié' sòjácalené' Lè'. Tu'è zidzaj didza', ta'nné':

—Xzí'ini xí'sóé' David, buéchi' ladxí' netu'.

<sup>28</sup> Cate' bidxiné' Jesús ga naca lu yu'u, bila'dxiné' chopè' bönni' na' nachul-la guió'j lógaquié' ga zoé'. Jesús gunábiné' légaquié', rnné':

—¿Ba réajlè'èli' neda', huáca una' libí'ili'?

Légaquié' ta'nné':

—Ön, Xan.

<sup>29</sup> Ní'irö Jesús gudané' guió'j lógaquié', ate' rnné':

—Ca réajlè'èli', ca' gaca queé'li'.

<sup>30</sup> La' böáljatè' guió'j lógaquié'. Ní'irö Jesús buzené' bach légaquié', rnné':

—Gulí'gü'ítica'sö ládxi'li' cuntu nu inözi lè ni.

<sup>31</sup> Cate' bulu'rúajè' ni', la' bulu'zètè' didza' idútè luyú ni' ca naca lè na' bené' Jesús.



### Jesús ruúnë' tu bönni' biti' ru'ë didza'

<sup>32</sup> Cate' Jesús, en yugu' bönni' usëda queë' bulu'ruájë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'.

<sup>33</sup> Cate' bubéajë' Jesús bö' xihui' na', la' gunnëtë' bönni' na' biti' guca gu'e didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

<sup>34</sup> Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöla' unná bë' que xángaca bö' xihui' na'.

### Jesús ruhuéchi' ládxë'ë bönachi zían

<sup>35</sup> Gudé' Jesús idú gásibi'ilö gapa nacuá' yödzö zxon, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxí'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'. <sup>36</sup> Cate' Jesús bil'éne' bönni' zían ni', buéchi' ládxë'ë légaquië', tu' ta'guí'i ta'záquië', en nudú ládxí'gaquië' ca raca quégacaba' bö'cu' xzila' biti' zoa nu ruyú légacaba'. <sup>37</sup> Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa.

<sup>38</sup> Que lë ni na', guli'gáta'yu lahuë' Dios, náquië' Xan yöla na', inábilí-në' isól-lë'ë bönni' huen dxin ulu'lapë' yöla queë'.

### Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

**10** Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöla' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí'i ta'zaca'.

<sup>2</sup> Caní naca lágaquië' idxínnutë' gubáz na' nasól-lë'ë Jesús:

Simón, (lë' ca' Pedro),  
Andrés, (bóchë'ë Simón na'),  
Jacobo, (zxí'inë' Zebedeo),  
Juan, (bóchë'ë Jacobo na'),  
<sup>3</sup> Felipe, Bartolomé, Tomás,  
Mateo, (bönni' uquízxaj),  
Jacobo, (zxí'inë' Alfeo),  
Lebeo, (lë' ca' Tadeo),

<sup>4</sup> Simón, (bönni' ruí'i ládxë'ë yödzö queë'),  
Judas Iscariote, (bönni' udödë' Jesús lu ná'agaquië' bönni' ilútië' Lë').

### Jesús risól-lë'ë gubáz queë' tsöjéngaquië' libán

(Mr. 6:7-13; Lc. 9:1-6)

<sup>5</sup> Ní'irö Jesús gusól-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacuá' bönachi biti' nácagaca judío, en biti' tsú'uli' ládzagaca bönachi nacuá' luyú Samaria.

<sup>6</sup> Guli'tséaj ga nacuá' bönachi Israel, nácagaquië' ca

bö'cu' xzila'do' nanítigacaba'. <sup>7</sup> Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." <sup>8</sup> Buli'ún nupa te'e. Buli'ún dxí'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénna'sa' queé'li' yöla' unná bë' ni. Buli'gún dxin le, en biti' bi uquízxjali'.

<sup>9</sup> 'Biti' bi guá'ali' lu buzudi queé'li', calëga dumí oro, en calëga dumí plata, en calëga dumí lásido'. <sup>10</sup> Biti' guá'ali' yöxaj yöta queé'li' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queé'li', tu' idzöli quézinë' bönni' huen dxin le gahuë'.

<sup>11</sup> 'Gátitës yödzö zxon o yödzödo' ga idxinli', guli'naba nuzxi naca idú ladxí' lu yödzö ni', ate' ugá'analí' lidxi nu na' cate' gála'rö dza urúajli' yödzö na'. <sup>12</sup> Cate' tsú'uli' tu lu yu'u, buli'gapa Dios bönachi nacuá' lu yu'u na', inábilí-në' Dios unödzejë' quégaquië' le cuéqui dxi icja ládxí'do'gaquië'. <sup>13</sup> Channö bönachi nacuá' lu yu'u ni' nácagaca lesaca', ugá'analen le ribequi dxi ladxí' na' léguequi, pero channö bönachi na' cabí nácagaca lesaca', inábalí' cabí ugá'ana lë na' ribequi dxi ladxí' len léguequi. <sup>14</sup> Gátitës ga idxinli' ga bönachi ni' biti' ilún libí'ili' bal, en biti' ulu'zé nagui xtí'dza'li', buli'ruáj lu yu'u ni' o yödzö ni', ate' guli'cuíbi bëchtö da' lë'e lábali', le ulu'í' léguequi nabága'gaca xíguia'. <sup>15</sup> Le nácatë rea' libí'ili', cate' idxín dza ichúguië' Dios quégaca bönachi, ila'guí'i ila'záca'rö bönachi yödzö na' ca ila'guí'i ila'zaca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

### Nupa biti' ta'yéajlë' ulu'saca' zí' nupa dá'gaca Cristo

<sup>16</sup> Gunnë' ca' Jesús:

—Buli'yútsöca', neda' risól-la'a libí'ili', ate' gácali' ca bö'cu' xzila'do' ta'daba' ga dzó'öba' bö'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxí' ca nácagacaba' gu'dödo'.

<sup>17</sup> Guli'gún chí'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios. <sup>18</sup> Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bë'ë, tu' dá'alí' neda'. Caní gaca para gaca gunlí' ba nalí' quia' lógaquië' bönni' ni', en lógaquië' bönni' biti' nácagaquië' judío.

<sup>19</sup> Ní'irö cate' ulu'dödë' libí'ili' lu ná'agaquië' bönni' unná bë' na', biti' có'öli' böniga nacxi innali', tu' ichizë' Dios icja ládxí'do'oli' didza' gü'í'ili', en ca innali' la' dza ná'asö.

<sup>20</sup> Calëga libí'isili' na' innali', pero Dios Bö' Lá'ayi, Nu na' risól-lë'ë Xúziru' Dios queé'li', Lë cazë' sóalenë' libí'ili', en gu'ë didza'.

<sup>21</sup> 'Ila'cuá' bönachi ulu'dödi bóchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' xí'inigaquië', ate' ila'cuá'abi' bí'i ila'dá'baga'bi' xúzgacabi', en ilunbi' ga ilátië' xúzgacabi' na'. <sup>22</sup> Yúgu'të bönachi ulu'zöa libí'ili' tsölá'alö tu' dá'alí' neda', pero nu ugá'ana tsutsu ga idxinrö dza údxi, nu ni ulá. <sup>23</sup> Cate' ulu'saca' zí' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljé' Bönachi, zí'alö cate'

údxí gunlí' libán gapa nacuá' yugu' yödzö quégaca bönachi Israel.

<sup>24</sup> Núti'tès bönni' náquië' bönni' usëda bití' nácarë' lo ca nu rusëdi lë', en lësca' caní, nu bönni' náquië' huen dxin bití' nácarë' lo ca xanë'. <sup>25</sup> Nu na' naca bönni' usëda ral-la' udzëjanë' channö huadëli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zírë' quégaca bönachi tá'gaquië' neda'.

### Nu ral-la' gádxiru'

(Lc. 12:2-9)

<sup>26</sup> Gunnë' ca' Jesús:

—Que lë ni na', bití' gádxilí' bönachi. Hualá' lahui yúgu'të le raca bëdxi lándó'os, ate' huáca bë' yúgu'të le nagachi'. <sup>27</sup> Yugu' didza' ruí'ilená' libí'ili' ga naca chul-la, gulí'quixjö' ga naca lu bení', ate' le rea' libí'ili' ga nagachi', gulí'nnë' zidzaj ga naca lahui' lógaca bönachi. <sup>28</sup> Bití' gádxilí' nupa tuti le nácagaca caz bönachi, pero bití' gaca ulu'suniti bö' naca cazaru'. Gulí'gadxi Dios, Bönni' na' gaca gútië' idútë le nácalí', en chú'unë' bö' naca cázalí' lu guí' gabila.

<sup>29</sup> Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channö cabí ru'ë Xúziru' Dios lataj gaca caní. <sup>30</sup> Lësca' caní, nabábagaca yúgu'të guitsa' ícjalí' lahuë' Dios. <sup>31</sup> Que lë ni na', bití' gádxilí'. Ruí'tërö lándxë'ë Dios libí'ili' ca ruí' lándxë'ë-ba' zianba' biguínido'.

### Yugu' bönni' ta'zí' lu ná'agaquië' Cristo lógaca bönachi

(Lc. 12:8-9)

<sup>32</sup> Gunnë' ca' Jesús:

—Nu bönni' sí' lu në'ë neda' lógaca bönachi, neda' sí' lu na'a bönni' na' lahuë' Xuza' zoë' yehua' yubá. <sup>33</sup> Bönni' ta'dá'baguë'ë lógaca bönachi, ila'nnë' bití' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

### Jesús náquië' le run ga ila'rúaj choplö bönachi

(Lc. 12:51-53; 14:26-27)

<sup>34</sup> Gunnë' ca' Jesús:

—Bití' guéquili' za'a idigu'a le ribequi dxi bönachi yödzölió ni. Bití' za'a idigu'a le ribequi dxi, pero za'a idigu'a le gun ga ila'rúaj choplö bönachi. <sup>35</sup> Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula xzoa' lídxigacanu ila'dá'baga'nu xto' xzí'in-inu. <sup>36</sup> Caní gaca, la' dí'a dzasö quégaca bönachi ulu'saca' zí' luzé'eguequi.

<sup>37</sup> Nu nadxí'irö xuz xinë'e ca nadxí'i neda', bití' naca bachi nu na' ta' neda', ate' nu nadxí'irö bí'i bönni' que o bí'i nigula que ca nadxí'i neda', bití' naca bachi nu na' ta' neda'. <sup>38</sup> Nu bití' sí' lu në'e gaca ca tu bönni' söjtë'ë lë'e yaga cruz, en ta' neda', bití' naca bachi guequi quia' neda'. <sup>39</sup> Nu ruí' ladxí' gun chí'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

### Yugu' le ubí'ë Dios queéru'

(Mr. 9:41)

<sup>40</sup> Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lë'ë neda'. <sup>41</sup> Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. <sup>42</sup> Núti'tès nu unödzaj queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', bití' uniti nu na' le ral-la' sí' lu në'ë Dios.

### Ta'dxinë' bönni' nasól-lë'ë Juan ga zoë' Jesús

(Lc. 7:18-35)

**11** Cate' Jesús budxi buzëajni'inë' yugu' bönni' usëda queë', buzë'ë ní', sa'yëajë' röjsëdinë' bönachi, en röjenë' libán yugu' lu ládzagaca bönachi na'.

<sup>2</sup> Juan, bönni' buquilië' bönachi nisa, ní' yu'ë lidxi guié, ate' biyönnë' ca nácagaca le runë' Jesús. Ní'irö Juan na' gusól-lë'ë chopë' bönni' dá'gaquië' lë', ate' bila'dxinë' ga na' zoë' Jesús. <sup>3</sup> Chopë' ni gula'nábinë' Jesús, të' Lë': —¿Nacu' Lí' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'túë' bönni'?

<sup>4</sup> Bubi'ë didza' Jesús, rë' légaquië':

—Gulí'tséaj tsöjtíxjö'ili'-në' Juan lë ni riyónili', en rilé'eli'. <sup>5</sup> Gulí'tsöjödxe' ca raca, tu'lé'enë' bönni' guchulla guiój lógacaquië', ate' tu'zë'ë bönni' bití' guca ila'dé'. Nuhuóácagaquië' bönni' gü'igüequinë' huë' nudzu' ruzödi, ate' ta'yönnë' bönni' gula'códzuë'. Nnita' nabán-gaquië' bönni' gulátië', ate' raca libán que didza' dxí'a lógaca bönachi yechí'. <sup>6</sup> Bica' ba nu bönni' bití' gáquië' chopá lándxë'ë, bití' ubéaj lándxë'ë neda'.

<sup>7</sup> Cate' yugu' bönni' na' dá'gaquië' Juan bulu'zë'ë söjhuó'gaquië', ní'irö gusí lahuë' Jesús ruí'ilenë' bönachi nacuá' ní' didza' ca naca queë' Juan na'. Rë' lé-gaquië':

—¿Bizxi gú'unilí' ilé'eli' cate' ní' guyéajli' lu lataj cá'asö? ¿Naru' gú'unilí' ilé'eli'-në' tu bönni' náquië' ca tu gui ruzecaj bö' recja le? <sup>8</sup> Channö cabí, ¿bizxi gú'unilí' ilé'eli'? ¿Naru' gú'unilí' ilé'eli'-në' tu bönni' nácuë' lari' dxí'ado? Nöz quézili' bönni' nácugaquië' lari' dxí'ado' nacu'ë lídxigaquië' bönni' ta'nná bë'ë. <sup>9</sup> Channö cabí, ¿bizxi gú'unilí' ilé'eli'? ¿Naru' gú'unilí' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'rë' lo ca ia'zica'rë' bönni' gulu'ë didza' uláz queë' Dios. <sup>10</sup> Caní naca, tu' náquië' Juan bönni' na' ruí' didza' le nazúaj lu guichi lá'ayi ca naca queë', le rnna:

Buyú, risól-la'a bönni' gubáz quia', inóruë' ca Lí'.

Lë' upé'ë nōza ga tödu'.

<sup>11</sup> Le nácatë rea' libí'ili'. Idútë yödzölió ni, cuntú nu zoa nácarö lo ca Juan, bönni' ní' buquilië' bönachi nisa, pero nu naca cuidí'do'os ga rinná bë' Nu na' zoa yehua' yubá nácatë'rö lo ca Juan na'.

<sup>12</sup> Cate' ni' gusí lahué' buquilé' Juan bönachi nisa, ga ridxinté na'a dza, bayudxi túngaca bönachi para ta'yaza ga rinná bē'ë Bönni' na' zoë' yehua' yubá, ate' nupa tunsö bayudxi ta'delí' le. <sup>13</sup> Ga bidxinté dza na' blē'ë Juan, le rinná bē' xibá queë' Moisés, en le bu-lu'zúajé' lu guichi yúgu'té bönni' gulu'ë didza' uláz queë' Dios gulu'í didza' ca rinná bē'ë Bönni' na' zoë' yehua' yubá. <sup>14</sup> Channö ré'ënilí' sí' lu ná'alí' lē ni, ral-la' inózilí' Juan na' náquié' Elías, bönni' ni' bē'ë didza' uláz queë' Dios, bönni' na' Dios gunné' ral-la' ilá' lahué' leyúbölö dza ni zóaru' na'a. <sup>15</sup> Nu zoa nagui, en riyöni ral-la' uzé' nagui.

<sup>16</sup> ¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquié' ca yugu' bí'ido' ta'bó'obi' lu yé'ëyi. Zidzaj tu'lídzabi' luzá'agacabi', <sup>17</sup> ta'nnabi': "Rucódxitu' queé'li' gui. ¿Bizx que bití' ruyá'alí'? Rul-la yéchi'tu' queé'li'. ¿Bizx que bití' ribödxi yéchi'li'?" <sup>18</sup> Caní nácalí', tu' bidé' Juan, ate' tu' cabí' gü'í' gudahué' ca ráguli' libí'ili', gunné'li' queé', gunnalí': "Tu' xihuí' dzágui lē." <sup>19</sup> Ní'irö bidxina' neda', Bönni' Guljé' Bönachi, ate' re'aj rahua', ate' rnné'li' quia', rnnalí': "Náquié' bönni' huágulē'ë, en bönni' re'jé'. Náquié' luzá'agaquié' bönni' uquixaj, en ia'zica'rö huen dul-la'." Yöl-la' réajni'í queë' Dios naca bē' ni'a que le tun nupa ta'z'í' lu né'eguequi le.

#### Le gaca que nu bití' run ca rna xtídzē'ë Dios

(Lc. 10:13-15)

<sup>20</sup> Ní'irö gusí lahué' Jesús ruzenē' bach bönachi nacua' yugu' yödzo gapa ni' benē' zían yöl-la' huáca, tu' cabí' tu'bí'ini ládxi'guequi. <sup>21</sup> Gudxé' léguequi:

—Bica' bayechí' libí'ili', bönachi Corazín. Bica' bayechí' libí'ili', bönachi Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca bena' ga zóalí', dza ní'télö ulu'bí'í ládxi'gaca bönachi yödzo Tiro, en yödzo Sidón na', en ilácugaca lari' tēbi, en ulu'dxia dö ícjaguequi, le ulu'lu'í' tu'bí'í ládxi'gaca bönachi na'. <sup>22</sup> Na'a, neda' rea' libí'ili', cate' idxín dza ichúguié' Dios quégaca bönachi, quí'í sáca'röli' libí'ili' ca ila'gu'í' ila'zaca' bönachi yödzo Tiro, en yödzo Sidón, nupa na' busuní'tiē' Dios. <sup>23</sup> Libí'ili', bönachi Capernaum, guca queé'li' ca bidxinté'li' ga nu riyaza yehua' yubá. Huó'tjalí' lu guí' gabila. La'tu' gulaca yugu' yöl-la' huáca bena' ga zóalí' lu yödzo Sodoma, ulu'gá'ana bönachi yödzo ní' ga ridxinté na'a dza. <sup>24</sup> Na'a, neda' rea' libí'ili', cate' idxín dza ichúguié' Dios quégaca bönachi, quí'í sáca'röli' libí'ili' ca ila'gu'í' ila'zaca' bönachi Sodoma na'.

#### Rnné' Jesús: "Gulí'dá ga zoa', uzí' ládxi'li'"

(Lc. 10:21-22)

<sup>25</sup> Dza na' bē'ë didza' Jesús, rnné':

—Xuzá', nacua' Xani yehua' yubá, en Xani luyú ni. Rigua' Lí' yöl-la' ba, tu' bucáchu'u lē ni, para cabí' ila'lé'ené' bönni' ta'yéajni'ide'ené' le, pero bulu'í'nu' nupa nácagaca ca yugu' bí'ido' le. <sup>26</sup> Ca' gaca, Xuzá', tu' caní' guyaza ládxi'u Lí'. <sup>27</sup> Yúgu'té nudödē' Xuzá' lu na'a. Cuntu nu nunbē' neda', Zxí'inē' Dios, pero tuzē' Dios Xuz, en cuntu nu nunbē' Dios Xuz, pero tuza' neda',

Zxí'inē' Dios, enca' nupa na' ré'ënda' ulu'í'ida' léguequi Dios Xuz. <sup>28</sup> Gulí'dá ga zoa' yúgu'té'li' rójxéqui'li' tu' rún-tica'silí' dxin que yöl-la' yudo', en nuá'alí' yua' zí'í quégaca xibá que, ate' neda' guna' ga uzí' ládxi'li'. <sup>29</sup> Lu yöl-la' nōxaj ladxí' queé'li' guli'gún xichina', gácalí' ca bēdxi ta'z'í'iba' yugu' quégacaba'. Gulí'sēda lu na'a neda', tu' naca' nōxaj ladxí', en do' ladxí', ate' idzöli yöl-la' ruzí' ladxí' queé'li', le cuéqui dxi ládxi'li'. <sup>30</sup> Yugu' na' ugu'a libí'ili', le naca le inná bē'eda' libí'ili', bití' naca böniga, ate' yua' ugu'a libí'ili' le naca le rusédida', dzá'do'os naca.

#### Ta'lecjé' do bönni' usēda queë' Jesús dza lá'ayi

(Mr. 2:23-28; Lc. 6:1-5)

**12** Dza ni', le naca dza lá'ayi quégaquié' bönni' judío, gudödē' Jesús gapa dē yöla xzoa' xtila, ate' ta'dunē' bönni' usēda queë', en gusí lógaquié' ta'lecjé' do ga dxía xzoa' xtila, en tahué' xzoa' xtila na'. <sup>2</sup> Cate' bila'lé'ené' bönni' yudo' fariseo lē ni, tē' Jesús:

—Buyútsöca', tunē' bönni' usēda quiu' le cabí' ral-la' gunru' dza lá'ayi.

<sup>3</sup> Ní'irö Jesús gudxé' légaquié':

—¿Naru' cabí' nulábanilí' lu guichi lá'ayi bi benē' David cate' gudunē', ate' gula'dún ca' nupa gula'cuá'len lē?

<sup>4</sup> Guyu'ë lu yu'u queë' Dios, en gudahué' yugu' yöta xtila nagú'ugaquié' lu bucugu lá'ayi, le cabí' ral-la' gahué' lē, en bití' ral-la' ilahué' bönni' gula'cuá'lenē' lē, pero légacsé' bixúz dē lataj ilahué' le. <sup>5</sup> ¿Naru' cabí' nulábanilí' le rinná bē' xibá queë' Moisés ca tunē' bixúz yugu' dza lá'ayi? Tunē' dxin lö'a yudo' yugu' dza lá'ayi, en bití' ta'bágué'ë xíguia'. <sup>6</sup> Na'a, neda' rea' libí'ili', zoa' neda' ni, en naca' bönni' nácarē' lo ca yudo'. <sup>7</sup> Bití' réajni'í' lē na' nazúaj lu guichi lá'ayi, le rna: "Ré'ënda' huéchi' ládxi'li' luzá'alí', en caléga gútigacalí'-ba' böa' bēdxi'do' ruzéguí'gacalí'-ba' lu bucugu lá'ayi quia'." La'tu' réajni'í' lē ni, bití' ichúguli' quégaca nupa bití' nabága'gaca xíguia'. <sup>8</sup> Ca' naca, tu' naca' neda', Bönni' Guljé' Bönachi, Xani dza lá'ayi.

#### Jesús ruúnē' tu bönni' narequi' nē'ë

(Mr. 3:1-6; Lc. 6:6-11)

<sup>9</sup> Ní'irö buzé'ë Jesús ni', ate' guyu'ë lu yu'u ga tu'dubē' bönni' judío, en tu'sédē' queë' Dios. <sup>10</sup> Lu yu'u na' zoë' tu bönni' narequi' nē'ë, ate' tu' té'ënnē' bönni' judío uná bē' ila'dzölinē' bi ulu'zégui'ë Jesús didza', que lē ni na' gula'nábinē' Lē, ta'nné':

—¿Naru' dē lataj unru' nu re'e cate' naca dza lá'ayi?

<sup>11</sup> Bubi'ë didza' Jesús, rē' légaquié':

—Nu bönni' nútsē'ë ladjalí', channö zóaba' tuba' bö'cu' xzila' queé', en channö ibíxiba' lu yeru cate' naca dza lá'ayi, ¿naru' cabí' tsójxönē'-ba', en tsójléajé'-ba'?

<sup>12</sup> Nazácatērē' tu bönni' ca tuba' bö'cu' xzila'. Que lē ni na', dē lataj gunru' le naca dxía quégaca bönachi cate' naca dza lá'ayi.

<sup>13</sup> Ní'irö Jesús gudxé' bönni' hué' na':

—Bulí' no'o.

Cate' bulí' nē'ë, la' böacaté dxí'a ca naca ia'tsölá'a nē'ë.

<sup>14</sup> Ní'irö bulu'ruájé' bönni' yudo' fariseo na', ate' gulún xtídza'gaquié' para gaca ilútié' Jesús.

### Le gunné' tu bönni' bē'ē didza' uláz queē' Dios ca ral-la' gaca queē' Jesús

<sup>15</sup> Cate' réquibe'ené' Jesús lē ni, buzé'ē ní, ate' sōjá-calēn bōnachi zían Lē'. Jesús bunē' yúgu'tē nupa te'e ladaj bōnachi na', <sup>16</sup> en gunná bé'ené' léguequi bití' usiyōnguequi bōnachi Nu náquié'. <sup>17</sup> Caní gunné', para gaca lē na' gunné' Isaías, bönni' bē'ē didza' uláz queē' Dios, gunné':

<sup>18</sup> Bulí'yútsōca', Bönni' ni náquié' Huen Dxin quia', na' guró caza' neda' Lē'.

Nadxí'ida' Lē', en raza lādxa'a Lē'.

Ichiza' Lē' Bō' Lá'ayi.

Lē' usiyōnnē' yúgu'tē bōnachi ca guna', uchi'a usōrō'a' quéguequi.

<sup>19</sup> Cuntu nu tíl-lalenē' didza', en bití' ulidzē' zidzaj.

Cuntu nu yōni chí'ē ga naca zítu'.

<sup>20</sup> Tu guído' zoa bö bití' quítsjē' le, ate' guí' chízoa ulu, bití' usúluē' le, cate' uzóarē' le naca tsahuí' queē'.

<sup>21</sup> Yúgu'tē bōnachi ilún lōza Lē'.

**Ta'nné' bönni' judío unná bē': "Dzaga Jesús tu' xihuí"**  
(Mr. 3:19-30; Lc. 11:14-23; 12:10)

<sup>22</sup> Ní'irö dujú'agaquié' tu bönni' ga zoē' Jesús, nachul-la lahué', en bití' raca gu'ē didza', tu' yu'u bö' xihuí' lē', ate' Jesús bunē' bönni' na'. Caní guca, ril'é'enē', en ru'ē didza' bönni' na' guchul-la lahué', en bití' guca gu'ē didza'. <sup>23</sup> Que lē ni na' bulu'bani yúgu'tē bōnachi nacua' ní, ta'nná:

—¿Naru' nácatsē' bönni' ni Zxí'ini Xí'sóé' David, Bönni' na' ral-la' guídē'?

<sup>24</sup> Cate' bila'yōnnē' bönni' yudo' fariseo lē ni, ta'zá' lādxi'ē, ta'nné': Bönni' ni rubéajé' yugu' bö' xihuí' tu' dzaga Beelzebú tu' xihuí', xángaca bö' xihuí', Lē'.

<sup>25</sup> Réquibe'ené' Jesús lē na' ta'zá' lādxi'gaquié', ate' rē' légaquié':

—Gátitēs ga ta'nná bē' bōnachi, channō bōnachi ní' ila'ruáj choplō, en ila'díl-lalen luzé'eguequi, initi yōl-la' unná bē' quéguequi. Lē'sca' caní, channō ila'ruáj choplō bōnachi nacua' tu yōdzō o tu yu'u, en ila'dil-la, bití' gaca ila'día' bōnachi nacua' yōdzō na' o yu'u na'.

<sup>26</sup> Lē'sca' caní, channō ubéaj Satanás tu' xihuí' la' luzé'esō, ate' yugu' bö' xihuí' na' ila'díl-lalen la' léguequi, ¿naru' idía' yōl-la' unná bē' que tu' xihuí'? <sup>27</sup> Rnnalí quia' rubéaja' yugu' bö' xihuí' tu' dzaga Beelzebú tu' xihuí' neda'. Channō runa' caní, ¿nuzxi dzaga nupa dá-gaca libí'ilí' cate' tu'béaj yugu' bö' xihuí'? Que lē ni na' le túngaca caz naca bē' nachíxilí'. <sup>28</sup> Na'a, channō neda' rubéaja' yugu' bö' xihuí' tu' zóalen yōl-la' huáca queē' Dios Bō' Lá'ayi neda', le nácate' chibidxín le rinná bē'ē Dios ga zóalí.

<sup>29</sup> ¿Naru' huácatsō nu bönni' tsu'ē lidxé' bönni' nal-la, en cuéajé' yōl-la' tsahuí' dzō'ō lidxé' channō cabí gúgué'ē bönni' nal-la na' zí'alō? Ní'irö gaca tsu'ē, en ulatjé' lidxé' bönni' nal-la na'.

<sup>30</sup> 'Nu bití' run neda' tsōzxón, ridá'baga' neda', en nu bití' rutubi tsōzxón len neda', rusilasi nu na'.

<sup>31</sup> 'Que lē ni na' rea' libí'ilí', ca naca yúgu'tē dul-la' tun bōnachi, en yugu' didza' xihuí' ta'nná, uniti lahué' Dios léguequi, pero nu bönni' inné' zí'ē queē' Dios Bō' Lá'ayi, bití' ca' uniti lahué' Dios lē'. <sup>32</sup> Lē'sca' caní, nu bönni' inné' quia' neda', Bönni' Guljé' Bōnachi, Dios uniti lahué' lē', pero nu bönni' inné' queē' Dios Bō' Lá'ayi, bití' ca' uniti lahué' Dios lē'. Bití' uniti lahué' lē' dza ni zóaru' na'a, en bití' uniti lahué' lē' dza sí' za'.

### Le runru' naca bē' le nácaru'

(Mt. 7:15-20; Lc. 6:43-45)

<sup>33</sup> Gunné' ca' Jesús:

—Channō naca dxí'a tu yaga, cuía le naca dxí'a, pero channō naca cá'asō yaga na', cuía ca' le naca cá'asō. Caní naca, le ribía tu yaga naca bē' yaga na'. <sup>34</sup> Libí'ilí' nácali' dí'a dza quégacaba' bēla sínía'. ¿Nacxi gaca gü'ílí' dxí'a didza', channō cabí nácali' dxí'a? Ca naca le ta'zá' lādxi'gaca bōnachi, lē'sca' caní tu'í didza'. <sup>35</sup> Tu bönni' tsahuí' ru'ē didza' tsahuí' tu' yu'u le naca tsahuí' icja lādxi'da'ahué', pero tu bönni' huiá' dö' ru'ē didza' bití' naca tsahuí' tu' yu'u le cabí naca tsahuí' icja lādxi'da'ahué'. <sup>36</sup> Que lē ni na' rea' libí'ilí', cate' idxín dza ichúguié' Dios quégaca bōnachi, uchi'a usōrōé' tu tu bönni' ca naca yúgu'tē didza' gula'nnazé' ca'. <sup>37</sup> Ca naca didza' ru'u, uchi'a usōrōé' lí, ate' uruju' tsahuí' o ibágu'u xíguia' ní'a que didza' na' bē'u.

### Ta'nábinē' Jesús guné' le gaca bē' nu náquié'

(Mr. 8:12; Lc. 11:29-32)

<sup>38</sup> Ní'irö bulu'bi'ē didza' yugu' bönni' yudo' fariseo, en yugu' bönni' yudo' tu'sédiné', en tē' Jesús:

—Bönni' Usedi, ré'énitu' ilé'tetu' tu le gunu' le gaca bē' dē lu no'o yōl-la' unná bē'.

<sup>39</sup> Bubi'ē didza' Jesús, en rē' légaquié':

—Yugu' bönni' tuá' dö' ni, bití' zoa idú lādxi'do'-gaquié', ta'nábinē' neda' guna' tu le gaca bē' nu naca'. Bití' bi le gaca bē' ila'lé'ené', pero le naca bēsō na' ca guca queē' Jonás, bönni' bē'ē didza' uláz queē' Dios. <sup>40</sup> Ca na' guca queē' Jonás na', bugá'ané' lē'ēba' tu bōla zxon idú tsonna dza tsonna yēla, lē'sca' caní gaca quia' neda', Bönni' Guljé' Bōnachi, tsonna dza tsonna yēla ugá'ana' zxan yu. <sup>41</sup> Ila'yasé' bönni' gula'cu'ē yōdzō Nínive dza ichúguié' Dios quégaca bōnachi cate' uchi'a usōrōé' bōnachi nacua' dza ni zóaru' na'a, ate' le guluné' usubaga' bōnachi ni xíguia' tu' bulu'bí'i lādxi'-gaquié' bönni' Nínive na' cate' ní' busiyōnnē' Jonás lé-gaquié' xtídzé'ē Dios, ate' na'a zoa' ni neda', en nácatera' lo ca Jonás na'. <sup>42</sup> Lē'sca' caní, nigula ní' gunná bé'enu yōdzō dē saca' ga ridōdi gubidza beo' ziaga chásanu dza ichúguié' Dios quégaca bōnachi cate' uchi'a usōrōé' bōnachi nacua' dza ni zóaru' na'a, ate' le bennu usubaga' légaquié' xíguia', tu' birúajnu nigula na' ga nácaterō zítu' para yōninu didza' réajni' bē'ē Salomón, ate' na'a zoa' ni neda', en nácatera' lo ca Salomón na'.

## Cate' rudxín tu bö' xihui' xilataj

(Lc. 11:24-26)

<sup>43</sup> Gunné' ca' Jesús:

—Cate' rirúaj tu bö' xihui' yu'u bönni', ridá gapa nabitxi, riguillaj ga uzí ladxí'. Channö cabí idzöli ga na' uzí ladxí', <sup>44</sup> ní'irö inná: "Huöja' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquié' ca tu yu'u nadachi', en nalúaj, en chinabá'a para nu tsöjsóa ni'. <sup>45</sup> Ní'irö tseaj, tsöjzxi' ia'gadxi bö' xihui' nácagacatèrö xihui' ca le, ate' ila'yaza yúgu'tè, en ila'cuá' icja ládxida'ahué' bönni' na', ate' ga údxi huayáli'tèrö ca gaca queé' bönni' na' ca guca queé' zí'alö. Lësca' caní gaca quégaca bönachi tuá' dö' ni.

## Xiné'ë Jesús, en yugu' bönni' bóché'ë

(Mr. 3:31-35; Lc. 8:19-21)

<sup>46</sup> Cate' ni' ruí'ilené' Jesús bönachi didza' ni, xiné'ë, en yugu' bönni' bóché'ë bila'dxiné' ni'. Gula'cu'é ló'alö, en gulé'ëniagueuiné' ilu'í'ilené' Jesús didza'. <sup>47</sup> Ní'irö tu bönni' busiyönné' Jesús, en rë' Lë':

—Buyútsöca', nacu'ë xinó'o, en yugu' bönni' bóchu'u ló'alö, en té'ënné' ilu'í'ilené' Li' didza'.

<sup>48</sup> Bubi'ë didza' Jesús, en rë' bönni' na' busiyönné' Lë' caní, rnné':

—¿Nózi' nuzxi caz xiná'a, en nupxi caz bönni' bócha'a?

<sup>49</sup> Ní'irö bulí' në'ë, en bulu'e yugu' bönni' usëda queé', en rnné':

—Bulí'yútsöca', bönni' ni nácagaquié' ca xiná' caza', en yugu' bóchi' caza'. <sup>50</sup> Núti'tës nu run ca ré'ëni quéz-iné' Xuza' zoé' yehua' yubá, nu ni naca bí'i bóchi' caza', en bí'i zan caza', en xiná' caza'.

## Rucúdzü'ë didza' Jesús ca naca queé' tu bönni' guz

(Mr. 4:1-9; Lc. 8:4-8)

**13** La' dza ní'sö birúajé' Jesús niu' yu'u, ate' yöjchö'ë ra' nísado'. <sup>2</sup> Tu' bila'dxín bönachi zían ga zoé' Jesús, gurené' tu lë'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'. <sup>3</sup> Ní'irö Jesús bé'lené' légaquié' didza', zían le busédiné' légaquié'. Bucúdzü'ë didza', rnné':

—Bulí'yútsöca', birúajé' tu bönni' guz, söjésié' xisedo'.

<sup>4</sup> Tsanni ni' söjésié', bal-la xisedo' na' gulasí ra' nöza, ate' bila'dxinba' biguinnido', en gulé'ajba' xisedo' na'.

<sup>5</sup> Gulasí ia'zica'rö xisedo' na' luyú ga rö'ö guió'j, ga na' rö'ö láti'sö yu, ate' la' gula'lenté, tu' cabí rö'öda' yu ni'.

<sup>6</sup> Ní'irö cate' budzá'a gubidza, lë na' bësié' la' gula'cuáditè, en gula'bidxi, tu' cabí dë ga ilún luí. <sup>7</sup> Gula'lén ia'zica'rö xisedo' na' ga bulu'lén lubá yötsi', ate' gula'zón lubá yötsi' na', en bila'röli lë na' bësié', en gulún ditaj le. <sup>8</sup> Gulasí ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësié' bulu'nödzej ia'tú gayuá'tèrö ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'. <sup>9</sup> Nu zoa nagui, en riyöni, ral-la' uzé' nagui.

## Le té'ëni ilún le bucúdzü'ë Jesús didza'

(Mr. 4:10-12; Lc. 8:9-10)

<sup>10</sup> Ní'irö bila'dxiné' bönni' usëda queé' Jesús ga zoé', en gula'nábine' Lë', ta'nné':

—¿Bizx que ruí'ilenü' bönachi didza' yugu' le rucúdzü'u didza'?

<sup>11</sup> Bubi'ë didza' Jesús, en rë' légaquié':

—Dios ru'é libí'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' té'ëni ila'yéajni'i. <sup>12</sup> Nu si' xtídzé'ë, Dios unödzejé' que ia'lati', ate' gá-ta'da'arö que, pero nu bití' si' le, la's dui le dë que udúa. <sup>13</sup> Que lë ni na' ruí'ilena' légaquié' didza' yugu' le rucúdzü'a didza', tu' tu'yúé' pero bití' ta'lé'ené'. Ta'yönné' pero bití' tu'zé' nágagaquié', en bití' ta'yéajni'iné'.

<sup>14</sup> Caní raca quégagaquié' para gaca ca na' gunné' Isaias, bönni' bë'ë didza' uláz queé' Dios, gunné':

Le nácatè yónili' pero bití' tséajni'ili'.

Uyuli' iná'ali' pero bití' ilé'eli'.

<sup>15</sup> Caní raca tu' nazidi ládxí'do'gaca bönni' ni, en bití' bi riyaza icja nágagaquié'.

Nadzudí' guió'j lógaquié',

para cabí ila'lé'ené' len guió'j lógaquié' na'.

Bití' ulu'zé' nágagaquié',

en bití' ulu'zéajni'i ládxí'gaquié',

en bití' ulu'huöáquié' quia' neda'

para gaca una' légaquié'.

<sup>16</sup> 'Na'a, bica' ba libí'ili', tu' rilé'e guió'j loli', en riyöni nágali'. <sup>17</sup> Le nácatè rea' libí'ili', zían bönni' gulu'ë didza' uláz queé' Dios en yugu' bönni' tsahui' gulé'ënné' ila'lé'ené' le rilé'eli' libí'ili' pero bití' bila'lé'ené' le. Gulé'ënné' ila'yönné' le riyónili' libí'ili' pero bití' bila'yönné' le.

## Riguíxjö'ë Jesús le bucúdzü'ë didza'

(Mr. 4:13-20; Lc. 8:11-15)

<sup>18</sup> Gunné' ca' Jesús:

—Bulí'zé' nágali' ca naca le bucúdzü'a didza' que bönni' guz. <sup>19</sup> Núti'tës nu riyöni didza' ca rinná bë'ë Dios yehua' yubá, en bití' réajni'i le, raca que didza' riyöni nu na' ca guca que xisedo' na' gulasí ra' nöza. La' za'tè tu' xihui', en rugúa didza' na' guyú'u icja ládxí'da'ahué' bönni' na'. <sup>20</sup> Xisedo' na' gulasí luyú ga rö'ö guió'j ruluí'i ca raca queé' bönni' riyönné' didza' na', en la' ruzètè náguié' lu yöl-la' rudzeja queé', <sup>21</sup> pero ca na' bití' ridía' xisedo' na' tu' cabí dë ga gun luí, lësca' caní raca queé' bönni' ni. Cate' idxín tu le usaca' zí' lë', ate' ila'bía ná'gaca bönachi lë' tu' nazí' lu në'ë didza' na', la' gátatè chopa ládxé'ë. <sup>22</sup> Xisedo' na' gulasí ga na' bulu'lén lubá yötsi' ruluí'i ca raca queé' bönni' na' riyönné' didza' na', pero ruí'i ládxé'ë yugu' le dë yödzölió ni, ate' nazí' yé'ë bönni' na', tu' ruí'i ládxé'ë yugu' yöl-la' tsahui' que. Yugu' lë ni ta'röli didza' na', en tun ga bití' gun dxin lu icja ládxí'da'ahué'. <sup>23</sup> Xisedo' na' gulasí luyú bëbu ruluí'i ca raca queé' bönni' riyönné' didza' na', en réajni'iné' le, ate' run dxin didza' na' lu icja ládxí'da'ahué'. Nácagaca bal-la bönachi ca xisedo' na' bulu'nödzej ia'tú gayuá'tèrö ca'. Nácagaca ia'zica'rö bönachi ca xisedo'

na' bulu'nödzej ia'tsónnalalaj ca', ate' nácagaca ia'zí-ca'rö bönachi ca xisedo' na' bulu'nödzej ia'chí uruá' ca'.

### Tu guíxi'do' cané le nalá' ca rilá' yöla xzoa' xtila

<sup>24</sup> Ia'tú le bucúdzu'è didza' Jesús, ate' rë' légaquiè':

—Ca gaca cate idxín ni le rinná bē'è Dios yehua' yubá naca ca guca que xisedo' dxí'a le guzè' tu bönni' ga naca lu xiyúè'. <sup>25</sup> Tsanni na' tasiè' bönni' nacu'è lidxè', bidxín tu nu bití' rilé'e xan yu'u na' dxí'a, ate' yöjza lu xiyúè' xisedo' guíxi'do' cané le nalá' ca naca yöla xzoa' xtila, ate' böaj xilataj. <sup>26</sup> Cate' gulén xzoa' xtila na', en guró'o do que, ga na' dxía xui'i, ní'irö gulaca bē' guíxi'do' cané na'. <sup>27</sup> Ní'irö bila'dxinè' bönni' huen dxin ga zoè' bönni' xan la' yöla na', en tē' lē': "Xan, channö guzu' xisedo' dxí'a lu yu quiu', ¿nacxi guca gula'lén guíxi'do' cané na?" <sup>28</sup> Xan yu na' gudxè' légaquiè', rñè': "Tu bönni' bití' rilé'enè' neda' dxí'a benè' caní." Ní'irö gula'nábinè' huen dxin queè' lē', ta'nné': "¿Ba ré'enu' tséajtu' tsöjólajtu' guíxi'do' cané na?" <sup>29</sup> Xán-gaquiè' rē' légaquiè': "¿Bití' ca'! Nadx ca' cate' iládzulí' guíxi'do' cané na', iládzuléntèli' ca' yöla xzoa' xtila. <sup>30</sup> Gácarö dxí'a gü'íli' lataj ila'zxongarö tsözxón cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbilí' xzoa' xtila lu yu'u quia'."

### Rucúdzu'è didza' Jesús ca naca que xisé mostaza (Mr. 4:30-32; Lc. 13:18-19)

<sup>31</sup> Ia'tú le bucúdzu'è didza' Jesús, ate' rë' légaquiè':

—Ca gaca ga idxín le rinná bē'è Dios yehua' yubá, gaca ca raca que tu xisé mostaza, le guzè' tu bönni' ga naca lu xiyúè'. <sup>32</sup> Le nácatè xisé mostaza na' nácatèrö cuidí' ca yúgu'tè xisedo' ia'zíca'rö, pero cate' chinadúz, rizxöntèrö ca yúgu'tè guixi' cuan, en rizxón ca naca tu yaga, ate' ta'dxinba' biguinnido', en tunba' xicá'agacaba' lu ni'a nē'e.

### Rucúdzu'è didza' Jesús que cúa zi que yöta xtila (Lc. 13:20-21)

<sup>33</sup> Ia'tú le bucúdzu'è didza' Jesús, ate' rë' légaquiè':

—Ca gaca ga idxín le rinná bē'è Dios yehua' yubá gaca ca le run cúa zi que yöta xtila, le buchixinu tu nigula len tsonna libixi yöjza xzoa' xtila, ate' guyazxa idütè cúa na'.

### Le ré'eni gun le rucúdzu'è didza' Jesús (Mr. 4:33-34)

<sup>34</sup> Yúgu'tè lē ni bucúdzu'è didza' Jesús, le bē'lenè' bönachi nacua' ni' didza', en bití' bi didza' bē'lenè' légaquiè' le cabí bucúdzu'è didza'. <sup>35</sup> Caní benè' para gaca lē na' buzúajè' lu guichi tu bönni' bē'è didza' uláz queè' Dios, gunné':

Gu'a didza' yugu' le ucúdzu'a didza'.  
Inniá' yugu' le nagachi' cate' ni' gusi lo si' guta' yödzölió.

### Riguíxjö'è Jesús le bucúdzu'è didza' que guíxi'do' cané

<sup>36</sup> Ní'irö buzenè' Jesús bönachi nacua' ni' didza', en gusól-lē'è légaquiè', ate' guyu'è yu'u. Ní'irö bila'dxinè' bönni' usèda queè' ga zoè', en tē' Lē':

—Gudíxjö'i' netu' le ré'eni inná lē na' bucúdzu'u didza' que guíxi'do' cané le nalá' ca naca yöla xzoa' xtila.

<sup>37</sup> Bubi'è didza' Jesús, ate' rë' légaquiè':

—Bönni' razè' xisedo' dxí'a naca' neda', Bönni' Guljè' Bönachi. <sup>38</sup> La' yöla na' naca yödzölió ni, ate' xisedo' dxí'a na' tu'lu'í ca nácagaca nupa nabábagaca ga rinná bē'è Dios. Guíxi'do' cané na' le nalá' ca naca yöla xzoa' xtila tu'lu'í ca nácagaca nupa néquiquequi que tu' xihui'. <sup>39</sup> Nu na' bití' rilé'e dxí'a xan la' yöla na', en yöjza guíxi'do' cané na', tu' xihui' caz naca. Dza ulu'tubè' na' rulu'í ca gaca dza údxi que yödzölió ni, ate' nupa na' tu'tubi nácagaca gubáz lá'ayi queè' Dios. <sup>40</sup> Ca na' guca, bulu'tubè' guíxi'do' cané na', en bulu'zéguiè' le lu guí', lēasca' caní gaca cate' údxi que yödzölió ni. <sup>41</sup> Neda', Bönni' Guljè' Bönachi, isól-la'gaca'-nè' gubáz lá'ayi quia', ate' ulu'béajè' ga rinná bē'è Dios yúgu'tè nupa tun ga tun dul-la' luzé'eguequi, enca' nupa tuá' dö'. <sup>42</sup> Yugu' gubáz lá'ayi na' ila'gu'è bönni' tuá' dö' na' lu guí' gabila. Ní' ila'bödxè', en ulu'tíl-la láyi'gaquiè'. <sup>43</sup> Ní'irö ila'yèpi yösa bení' bönachi tsahui', en iláca-gaquiè' ca gubidza ga ni' rinná bē'è Dios yehua' yubá. Nu zoa nagui, en riyöni ral-la' uzé nagui.

### Rucúdzu'è didza' Jesús que tu yöl-la' tsahui' nagachi'

<sup>44</sup> Lēasca' caní bucúdzu'è didza' Jesús, rñè':

—Le rinná bē'è Dios yehua' yubá naca ca tu yöl-la' tsahui' nagachi' tu la' yöla. Cate' bidzölinè' tu bönni' le, bucáchè'è le leyúbölö ga na' bigachi', ate' lu yöl-la' rudzeja queè' guyijè', yöjéti'è yúgu'tè le dē queè' ate' gú'uè' la' yöla na' para gata' yöl-la' tsahui' na' queè'.

### Rucúdzu'è didza' Jesús que tu bugá le nazáca'da'

<sup>45</sup> Gunné' ca' Jesús:

—Ca ral-la' sē lādxi'li' le rinná bē'è Dios yehua' yubá naca ca benè' tu bönni' rá'uè', en ruúti'è, en riguiljè' bugá nazáca'gaca. <sup>46</sup> Cate' bidzölinè' tu bugá le nazáca'da', guyijè', yöjéti'è yúgu'tè le dē queè', ate' gú'uè' bugá na'.

### Rucúdzu'è didza' Jesús que tu yöxaj böla

<sup>47</sup> Lēasca' caní gunné' Jesús:

—Ca gaca ga ridxín le rinná bē'è Dios yehua' yubá, gaca ca run tu yöxaj böla le ta'chiljè' bönni' lu nísado', le röjxí' zían böla izá'a. <sup>48</sup> Cate' chibidzá' yöxaj na', bulu'béajè' le luyú bidxi ra' nísado' na', ate' gula'bö'è ní', en gula'gu'è-ba' yugu' böla dxí'a tu lu ga'böra, pero gula'ru'unè'-ba' yugu' böla cá'asö. <sup>49</sup> Lēasca' caní gaca cate' údxi que yödzölió ni. Ila'ru'ajè' gubáz lá'ayi queè' Dios, ate' ulu'béajè' quez yugu' bönachi tsahui', ate' ulu'cuítiè' légaquiè' ladaj bönachi tuá' dö'.

<sup>50</sup> Ní'irö ila'gu'è bönachi tuá' dö' na' lu guí' gabila. Ní' ila'bödxè', en ulu'tíl-la láyè'è.

### Yöl-la' tsahui' le naca gula, en le naca cubi

<sup>51</sup> Ní'irö Jesús gunábinë' yugu' bönni' usëda queë', rn-  
në':

—¿Ba réajni'ili' yúgu'të lè ni?

Bulu'bi'ë didza', të' Lë':

—Ön, Xan.

<sup>52</sup> Jesús gudxë' légaquië':

—Cate' tu bönni' yudo' usedi chinazí' lu në'ë le rinná  
bë'ë Dios yehua' yubá, náquië' ca tu bönni' xan yu'u,  
rubéajë' ladaj yöl-la' tsahui' queë' le naca cubi, en le  
naca gula, le nácagaca tsahui' le ruzi'ë xibé.

### Le benë' Jesús lu yödzo Nazaret

(Mr. 6:1-6; Lc. 4:16-30)

<sup>53</sup> Cate' budxi bucúdu'ë Jesús yugu' didza' ni, buzé'ë  
ni'. <sup>54</sup> Cate' budxinë' ladzë', busédinë' bönachi nacua' lu  
yu'u ga tu'dubë' bönni' judío, en tu'sédë' queë' Dios,  
ate' bulu'bábinë, ta'nnë':

—¿Gazxi caz guzëdë' bönni' ni yöl-la' réajni'i ni?

¿Nacxi caz naca, runë' yugu' yöl-la' huáca ni? <sup>55</sup> Náquië'  
bönni' ni xzí'inë' bönni' gubëdxi yaga, ate' xiné'ë lënu  
María. Náquië' bóchi'gaquië' Jacobo, en José, en Simón,  
en Judas. <sup>56</sup> Lësca' nigula zanë' nacua'lennu rë'u ni.

¿Gazxi caz guzëdë' yúgu'të lè ni?

<sup>57</sup> Que lè ni na' gulaca chopá ládxi'gaquië', ate' bu-  
lu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz  
queë' Dios, pero bönachi uláz queë', en bönachi  
nacua' lidxë' bití' tun lë' bal.

<sup>58</sup> Que lè ni na' bití' benë' Jesús zían yöl-la' huáca ni',  
tu' cabí ta'yéajlë'ë Lë'.

### Ca bëtgaquië' Juan, bönni' buquilé' bönachi nisa

(Mr. 6:14-29; Lc. 9:7-9)

**14** Lu dza ni', biyönnë' Herodes, bönni' rinná bë'ë  
luyú Galilea, ca nácagaca yugu' yöl-la' huáca  
runë' Jesús. <sup>2</sup> Herodes na' gudxë' yugu' ni'a në'ë, rnnë':

—Bönni' na' Juan, bönni' buquilé' bönachi nisa.  
Chibubanë' lu yöl-la' guti. Que lè ni na' dë lu në'ë yöl-la'  
huáca zxön na'.

<sup>3</sup> Caní gunné' Herodes tu' gusól-lë'ë lë cazë' bönni'  
gula'zönë' Juan, en gulúguí'ë lë' du guíë, ate' gula'gu'ë  
lë' lidxi guíë tu' gú'uninu Herodías ilunë' caní. Herodías  
na' gúcanu nigula queë' Felipe, bóchë'ë Herodes na'.

<sup>4</sup> Caní benë' Herodes, tu' gudxë' Juan na' lë: "Bití' ral-la'  
sóalenu'-nu."

<sup>5</sup> Que lè ni na' gú'unnë' Herodes gútië' Juan, pero  
gúdxinë' ila'dá'baga' bönachi lu yödzo ni' lë', tu'  
téquiguequi bönachi náquië' Juan na' tu bönni' ru'ë  
didza' uláz queë' Dios. <sup>6</sup> Ní'irö cate' guca laní que dza  
guyé'enë' iz Herodes, birúajbí' bí'i nigula queënu  
Herodías na', en buyá'abi' lógaca nupa nacua' laní na',  
ate' guyaza ládxi'ë Herodes le benbí'. <sup>7</sup> Guzxí' lu në'ë  
Herodes, en benë' tsutsu xtídzë'ë ünödzejë' queébi'  
bí'ti'tës bi inábibi' lë'. <sup>8</sup> Tu' chibusédinu-bí' zí'aló  
xiná'abi', gúdxibi' lë':

—Benna quia' na'a icjë' Juan, bönni' buquilé' bönachi  
nisa. Gulú'u le tu lu zxiga' zxön.

<sup>9</sup> Ní'irö buí'innë' Herodes, pero tu' chibenë' tsutsu  
xtídzë'ë, en tu' bila'yöni nupa te'aj tágulen lë', que lè ni  
na' gunná bé'enë' nu tsöjnödzej icjë' Juan na' queébi'.

<sup>10</sup> Caní guca, gusól-lë'ë nu tsöjrixí yenë' Juan ga ni' yu'ë  
lidxi guíë. <sup>11</sup> Bönni' na' nasól-lë'ë bu'ë icjë' Juan na',  
zxoá lu zxiga' zxön, ate' bunödzejë' le queébi' bí'i nigula  
na', ate' lëbi' buá'abi' le queënu xiná'abi'.

<sup>12</sup> Ní'irö bila'dxinë' bönni' gula'dé'ë Juan na', ate' bu-  
lu'ú'ë lë', en bulu'cáché'ë lë'. Gudödi ni', yójtíxjöi'igue-  
quinë' Jesús ca gulaca lè ni.

### Jesús rugahuë' zíanró ca chi-un gayuá' bönachi

(Mr. 6:30-44; Lc. 9:10-17; Jn. 6:1-14)

<sup>13</sup> Cate' réquibe'enë' Jesús lè ni, buzé'ë ni', ate'  
gurenë' tu lë'ë bárcodo', en sa'yéajë' la' queézë' tu lataj  
cá'asö. Cate' bila'yöni bönachi zéajë' ni', bila'rúaj yugu'  
yödzo ni', en yójaca ga ni' idxinë' Jesús, ta'zë'e ní'ague-  
qui. <sup>14</sup> Cate' burúajë' Jesús lë'ë barco, bilé'enë' nacua'  
bönachi zían ni', ate' buéchi' ládxi'ë léguequi, en bunë'  
nupa te'e, nútsa'gaca ládjaguequi. <sup>15</sup> Cate' chiridzó' dza  
na', bila'dxinë' yugu' bönni' usëda queë' Jesús ga zoë',  
en të' Lë':

—Chiridzó' na'a, ate' cá'asö naca lataj ni. Busöl-la' bö-  
nachi ni para tsójaca gapa dë yödzo'do' para gá'ugaca  
bi ilagu.

<sup>16</sup> Ní'irö Jesús gudxë' légaquië':

—Bití' run bayudxi tsójáquië'. Bulí'nödzej libí'ili' le  
ilahuë'.

<sup>17</sup> Ní'irö të' Lë':

—Gáyu'sö yöta xtila dë, en chópasöba' böla dëba'  
queétu' ni.

<sup>18</sup> Jesús rë' légaquië':

—Bulí'dödi le lu na'a.

<sup>19</sup> Ní'irö Jesús gunná bé'enë' bönachi na' ila'bó' ga  
yu'u daca'. Gudödi na' gudélë'ë gayu' yöta xtila na', en  
chópaba' böla na', ate' guchisa lahuë', ruyú'ë zaca'  
yehua' yubá. Gudxë' Dios: "Xclenu'." Ní'irö buzuxzjé'  
yöta xtila na', en budödë' le lu ná'agaquië' bönni' usë-  
da queë', ate' légaquië' gula'guísië' le lógaca bönachi  
zían na'. <sup>20</sup> Gulahuë' yúgu'tëgaquië', en bulu'huóljanë'.  
Ní'irö bulu'tubë' yugu' bizxaj nagá'anagaca, en bulu'lié'  
chinnu ga'böra. <sup>21</sup> Bönni' ni' gulahuë' guláquië' idú chi-  
un gáyu'ë, pero cuntú nu bulaba yugu' nigula, en bí'i-  
do'.

### Jesús rizë'e ni'ë lu nísado'

(Mr. 6:45-52; Jn. 6:16-21)

<sup>22</sup> Ní'irö la' bentë' Jesús ga gula'benë' bönni' usëda  
queë' lë'ë bárcodo', en tsójáquië', ila'nóruë' lahuë' Lë',  
para ila'dödë' ia'tsölá'a nísado' ni', tsanni na' uzenë' Lë'  
bönachi nacua' ni' didza'. <sup>23</sup> Cate' chibusól-lë'ë Jesús bö-  
nachi na', gurenë' tu lu guí'ado' ga ni' yöjsóë' tuzé'. Ní'  
bulidzë' Dios. Cate' chigul-la, tuzé' zoë' ni'. <sup>24</sup> Bárcodo'  
ga na' nacué' bönni' usëda queë' ridödi gatsaj láhui'ló  
nísado' na', ate' riyasa bárcodo' na' tu' riyasa ridxia  
nísado' na', ate' ruzaga' bö' recja barco na'. <sup>25</sup> Gudödi

guluhuëla, gubígui'ë Jesús gala' ga na' nacu'ë, rizé'e ni'ë lu nísado'. <sup>26</sup> Cate' yugu' bönni' usëda queë' bi-la'lé'enë' Lë', rizé'e ni'ë lu nísado', gula'bó'dé'ë böniga tu' tádxinë'. Gula'bó'dxi'ë, ta'nné':

—Tu' ridasö na'.

<sup>27</sup> Ní'irö Jesús la' bulidztë' légaquië', rnnë':

—Buli'zxoní ládxi'li'. Neda' ni. Biti' gádxili'.

<sup>28</sup> Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

<sup>29</sup> Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. <sup>30</sup> Ní'irö cate' bilé'enë' Pedro ca bö' na' recja rutá nisa, gúdxinë'.

Ní'irö gusí lahuë' rötjë' lu nisa, ate' guródxí'ë. Bulidzë' Jesús, rnnë':

—Xan, busólá neda'.

<sup>31</sup> Jesús la' bulitë në'ë. Buguélë'ë lë', en rë' lë':

—Látisö réajlë'u neda'. ¿Bizx que guca chopa ládxi-u'u?

<sup>32</sup> Cate' bulu'benë' lë'e bárcodo' na', guró'o dxi bö' na' recja. <sup>33</sup> Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nné':

—Le nácatë, Zxí'inë' Dios nacu'.

**Jesús ruünë' yugu' bönni' huë' nacu'ë yödzö Genesaret**  
(Mr. 6:53-56)

<sup>34</sup> Cate' chigula'dödë' ia'tsólá'a nísado' na', la' bila'dx-intë' lu xiyú yödzö Genesaret. <sup>35</sup> Cate' bulu'únbë'ë bönni' yödzö ni' Jesús, gula'sól-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús.

<sup>36</sup> Guláta'yuë' lahuë' Jesús gu'ë légaquië' lataj ila'gansë' ruí' lari' nácuë', ate' la' bulu'huóacatë yúgu'të nupa na' bila'gán lari' na'.

**Le tun ga bití' nácaru' tsahui' lahuë' Dios**

(Mr. 7:1-23)

**15** Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tē' Lë':

<sup>2</sup> —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' sí' ilahuë'.

<sup>3</sup> Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'analí' cá'asö xibá queë' Dios para gunlí' le nulaga lolí' runlí'? <sup>4</sup> Caní' raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu inné' zí' que xuz xinë'e, tsaz gati nu na'." <sup>5</sup> Pero libí'ili' rnnali': "Channö nu guíë' xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios, <sup>6</sup> bití'rö bi run bayudxi' gun nu na' que xuz xinë'e." Caní' runlí', rucá'analí' cá'asö le gunná bë'ë Dios, para gunlí' le nulaga lolí' runlí'. <sup>7</sup> Libí'ili', bönni' rulu'ísö tsahui' cuinlí', idú ca nácalí' gudíxjõ'ë Isaías, bönni' bë'ë didza' uláz queë' Dios, gunné':

<sup>8</sup> Bönni' ni, len rú'agacsë' tunë' neda' bal, en calëga idú ládxi'gaquië'.

<sup>9</sup> Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

<sup>10</sup> Ní'irö bulidzë' Jesús bönachi nacuá' ni', en rë' légue-qui:

—Buli'zé nágalí' le guía' libí'ili', en guli'tséajni'i. <sup>11</sup> Calë-ga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

<sup>12</sup> Ní'irö yugu' bönni' usëda queë' Jesús gula'bígui'ë ga zoë', en tē' Lë':

—¿Naru' nóztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

<sup>13</sup> Ní'irö bubi'ë didza' Jesús, en rë' légaquië':

—Yúgu'të le nadúz, le cabí'guzë' Xuzá' zoë' yehua' yubá, huadúl'jagaca idú luí. <sup>14</sup> Buli'cá'ana légaquië'. Chínachúl-la lógaquië', en ta'ché'ë nupa nachul-la lógaca. Channö tu bönni' lo chul-la iché'ë ia'tuté' bönni' lo chul-la, iropë' ila'bixë' tu lu yeru.

<sup>15</sup> Ní'irö bubi'ë didza' Pedro, en rë' Jesús:

—Buzéajni'i netu' lë ni rucúdz'u'u didza'.

<sup>16</sup> Jesús rë' légaquië':

—¿Naru' cabí' réajni'itseli' ca' libí'ili'? <sup>17</sup> ¿Naru' cabí' réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'? <sup>18</sup> Na'a, le rirúaj rúa'alí', lu icja ládxi'do'oli' za', ate' lë ni run ga bití' nácalí' tsahui' lahuë' Dios.

<sup>19</sup> Caní' raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runlí', en yugu' le rizé ládxi'li' cuanlí', en yugu' le rinnëli' que luzá'alí' le cabí' nácate, en yugu' le rinnë xihui'li'.

<sup>20</sup> Yugu' le caní' tun ga bití' náquië' tu bönni' tsahui' lahuë' Dios, pero channö cabí' nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

**Tu nigula izá'a réajlë'ënu Jesús**

(Mr. 7:24-30)

<sup>21</sup> Ní'irö buzé'ë Jesús ni', en guyéajë' lu xiyú yödzö Tiro, en yödzö Sidón. <sup>22</sup> Tu nigula nabábanu luyú Canaán birúajnu yödzö ni', ate' bé'ënu zidzaj didza', rënu Jesús:

—Xan, zxí'ini xi'sóë' David, buéchi' ladxí' neda'. Bí'i nigúlado' quia' riguí'i rizáca'da'abi' tu' yu'u bö' xihui' lëbi'.

<sup>23</sup> Biti' bi didza' bubi'ë Jesús. Ní'irö gula'bígui'ë bönni' usëda queë' ga zoë', ate' gulé' Lë', ta'nné':

—Busól-la-nu, tu' zá'anu cúdzuru' ribódxí'anu.

<sup>24</sup> Ní'irö bubi'ë didza' Jesús, ate' rë'ë-nu:

—Dios nasól-lë'ë neda' gácalena' bönachi Israel, nupa nácalaga ca bö'cu' zxí'la'do' nanítigacaba'.

<sup>25</sup> Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

<sup>26</sup> Bubi'ë didza' Jesús, rnnë':

—Biti' naca dxí'a ugúaru' yöta quégacabi' bí'ido', en chú'unaru' le lógacaba' bó'cu'do'.

<sup>27</sup> Ní'irö nigula na' rënu Jesús, rnnanu:



—Ön, Xan, pero táguba' b'cu'do' na' le bizxaj tu'huóxaj ga tagu xángacaba'.

<sup>28</sup> Ní'irö bubi'ë didza' Jesús, rnné':

—Nigúlado'. Idú naca ca réajlë'u neda'. Gaca quiu' ca ré'ënnu'.

La' ní'isö böacatëbi' bi'i nigúlado' queénu.

### Jesús ruúnë' zían nupa te'e

<sup>29</sup> Ní'irö buzé'ë Jesús ni', en gudödë' ga naca ra' nísado' que Galilea. Gurenë' tu lu gu'ado', ate' gurö'ë ni'. <sup>30</sup> Bönachi zían dujuá'gaquië' nupa bití' guca ila'zá', en nupa nachul-la guiój lógaca, en nupa bití' guca ila'n-né, en nupa narugu ni'a né'eguequi, en ia'zica'rö zían nupa te'e, ate' gula'guixaj léguequi xini'ë Jesús, ate' Lë' bunë' léguequi. <sup>31</sup> Bulu'bani bönachi ni' ca naca le benë' Jesús, tu' bila'lé'e tu'nnë nupa bití' guca ila'nné, ate' nuhuóacagaca nupa gurugu ni'a né'eguequi, ate' tu'zá' nupa bití' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

### Jesús rugahuë' zianrö ca choá' gayuá' bönachi

(Mr. 8:1-10)

<sup>32</sup> Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tson-na dza zá'lenguequi neda', en bití' bi dë le ilagu. Bití' ré'ënda' usöl-la'gaca'-në' tsöjhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

<sup>33</sup> Ní'irö yugu' bönni' usëda queë' të' Lë', ta'nné':

—¿Gazxi caz idzólitu' yöta xtila zían lu lataj cáasö ni, le ugágutu' bönachi zían ni?

<sup>34</sup> Gunábinë' Jesús légaquië', rnné':

—¿Bal-laxi yöta xtila dë queé'li'?

Bulu'bí'ë didza', ta'nné':

—Gadxi, ate' nabábasöba' böla cuidi' dëba' queé'tu' ni.

<sup>35</sup> Ní'irö Jesús gunná bé'enë' bönachi zían na' ila'bó' lu yu. <sup>36</sup> Gudélé'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzuxzjë' iroptë na', en bunödzejë' quégaquië' bönni' usëda queë', ate' lé-gaquië' gula'guisië' le lógaca bönachi zían na'. <sup>37</sup> Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra.

<sup>38</sup> Yugu' bönni' na' gulahuë' nácagaquië' choá' gáyu'ë, pero cuntú nu bulaba yugu' nigula, en bí'ido'. <sup>39</sup> Ní'irö busöl-lë'ë Jesús bönachi na' tsöjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

### Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

**16** Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'z'í bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. <sup>2</sup> Bubi'ë didza' Jesús, en rë' lé-gaquië':

—Cate' ridzó', rnnali' caní: "Gun dxi'a cuxó, tu' rö'ö böaj xiná lúzxi-ba." <sup>3</sup> Cate' naca zílado', rnnali' caní: "Bití' gun dxi'a na'a dza tu' rö'ö böaj xiná, en ruchul-la lúzxi-ba." Libí'ili', bönni' rulu'í'sö tsahui' cuinli'. Raca innë ya'alí' naca gun lúzxi-ba, pero bití' gaca tséajni'ili' le tu'sedi le taca dza ni zóaru' na'a. <sup>4</sup> Yugu' bönachi tuá' dö' ni, en bití' zoa idú ládxi'gaca ta'nábini neda' guna' tu le gaca bë' Nu naca', pero bití' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús buca'anë' légaquië', söhuójë'.

### Le tu'sedinë' bönni' yudo' naca ca cúa zi que yöta xtila

(Mr. 8:14-21)

<sup>5</sup> Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. <sup>6</sup> Ní'irö Jesús gudxë' légaquië':

—Buli'yútsöca'. Gulí'gún chí'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>7</sup> Ní'irö la' légacasë' gulún xtídza'gaquië' bönni' usëda queë', ta'nné':

—Rnnë' caní tu' cabí nuá'aru' yöta xtila.

<sup>8</sup> Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yö-ta xtila? Látí'do'os réajlë'ëli' neda'. <sup>9</sup> ¿Naru' cabí réajni'it-seli', en bití' röjnëtseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? <sup>10</sup> ¿Naru' cabí röjnëtseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? <sup>11</sup> ¿Naru' cabí réajni'ili'? Bití' bë'a didza' que yöta xtila cate' gudx-a' libí'ili' gun chí'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

<sup>12</sup> Ní'irö gula'yéajni'inë' bití' gudxë' Jesús légaquië' ilún chí'i cuíngaquië' que cúa zi que yöta xtila, pero ral-la' ilún chí'i cuíngaquië' que le tu'sedinë' yugu' bönni' yudo' fariseo, en yugu' bönni' yudo' saduceo.

### Pedro rnnë' Jesús náquië' Cristo

(Mr. 8:27-30; Lc. 9:18-21)

<sup>13</sup> Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnné':

—¿Bizxi ta'nná bönachi nu naca' neda', Bönni' Guljë' Bönachi?

<sup>14</sup> Bulu'bí'ë didza', ta'nné':

—Bal-lë' ta'nné': "Juan nacu', bönni' ni' buquilë' bön-nachi nisa." Ia'zica'rë' ta'nné': "Elías nacu', bönni' ni' bë'ë didza' uláz queë' Dios dza ni'te." Ia'zica'rë' ta'nné': "Jeremías nacu', o ia'túë' bönni' bë'ë didza' uláz queë' Dios."

<sup>15</sup> Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

<sup>16</sup> Bubi'ë didza' Simón Pedro, en rë' Lë':

—Lí' nacu' Cristo, Zxí'inë' Dios ban.

<sup>17</sup> Bubi'ë didza' Jesús, rë' lë':

—Bica' xibó' lí, Simón, xzí'iné' Jonás, tu' cabí buluí'iné' nu bönni' lí' lè ni. Xuza' zoé' yehua' yubá buluí'iné' lí' lè ni. <sup>18</sup> Neda' rea' lí, lí' nacu' Pedro, ate' lu guió'j ni ucuá'a nupa ulu'dubi quia', ate' yöl-la' unná bē' que tu' xihui' bití' sequí' uzaga' xinó'zgaquié'. <sup>19</sup> Gunna' quiu' yugu' xzí'ini guíe' que lataj ga rinná bē' Nu zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lè na' Nu na' zoa yehua' yubá ni'.

<sup>20</sup> Ní'irö Jesús gunná bé'ené' yugu' bönni' usèda queé' cuntú nu ilé'è náquié' Lè' Cristo.

### Jesús riguixjō'è ca sí' ilútié' Lè'

(Mr. 8:31-9:1; Lc. 9:22-27)

<sup>21</sup> La' dza ní'sò gusí lahué' Jesús riguixjōi'iné' yugu' bönni' usèda queé' run bayudxi tsejé' Jerusalén, ga ní' yugu' bixúz unná bē' en bönni' gula tu'zējajni'iné', en bönni' yudo' tu'sédinē' ulu'saca' zī'è Lè', ate' ní'irö ilútié' Lè', pero cate' gaca tsonna dza ubané' lu yöl-la' guti.

<sup>22</sup> Ní'irö Pedro guché'è Jesús quez, en gusí lahué' ridil-lè' Lè' didza', rnné':

—Xan, bití' gu'è Dios lataj. Bití' ca' gaca quiu' ca rno'.

<sup>23</sup> Ní'irö buécjé' Jesús, en rē' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa lādxa'a tu' cabí naca le rizá' lādxa-u' lí' ca rizá' lādxe'è Dios, pero ca ta'za'sò lādxi'gaca bönachi.

<sup>24</sup> Ní'irö Jesús gudxé' yugu' bönni' usèda queé', rnné':

—Channó zoé' tu bönni' ré'ené' tē'è neda', ral-la' uzóé' tsölá'alö yugu' le ré'eni quéziné', en gáquié' ca tu bönni' sa'yéajé' zeajté'è lè'e yaga cruz, ate' ní'irö gaca tē'è neda'. <sup>25</sup> Nu bönni' gué'enné' gun chí'è yöl-la' na'bán queé', unítié' le, pero bönni' unítié' yöl-la' na'bán queé' tu' dē'è neda', gata' yöl-la' na'bán idú queé'. <sup>26</sup> ¿Naru' uzi'tsē' xibé tu bönni' channó utubé' yúgu'tè le dē yödžölí' ni pero unítié' yöl-la' na'bán idú queé'? Bití' bi gaca unödžjé' tu bönni' para gata' yöl-la' na'bán idú queé'. <sup>27</sup> Caní rnní'a, tu' huōda' neda', Bönni' Guljé' Bönachi, en idzaga yöl-la' unná bē' queé' Xuza' Dios neda', ate' idzágagaquié' gubáz lá'ayi quia' neda'. Ní'irö ubi'a que queé' bönachi tsa naca le nungaca.

<sup>28</sup> Le nácatē rea' libí'ili': "Bití' ca' ilátigaca bal-la nupa nacua' ni cate' ila'lé'erö idinná bē'a neda', Bönni' Guljé' Bönachi."

### Ridzá' ca nalá' lahué' Jesús

(Mr. 9:2-13; Lc. 9:28-36)

**17** Gudödi xopa dza, Jesús gudélé'è Pedro len Jacobo, en Juan, böché'è Jacobo na', en guché'è légaquié', ate' yójáquié' quez tu lu gu'á sibi. <sup>2</sup> Ní' bidzá' ca nalá' lahué' Jesús lógaquié'. Guyēpi yōsa bení' lahué' Jesús ca ruzení' gubidza, ate' lari' nacué' böáca chiguíchido'os ca bení'. <sup>3</sup> Ní'irö bila'lé'ené' bönni' usèda queé' buluí'i lógaquié' Moisés, en Elías, ate' tu'ílené' Jesús didza'. <sup>4</sup> Ní'irö Pedro rē' Jesús:

—Xan, naca dxí'a zóaru' ni. Channó ré'enu', guna' ni tsonna yu'u lágado', tu quiu', ia'tú queé' Moisés, en ia'tú queé' Elías.

<sup>5</sup> Tsanni ní' ru'è Pedro didza' ni, la' guró'ötē tu böaj bení' le guzxóa légaquié', ate' lu böaj na' biyón chí'i nu rna:

—Bönni' ni Xzí'ini caza'. Nadxí'ida-nē', en raza lādxa'a Lè'. Bulí'zé' nágali' didza' gu'è.

<sup>6</sup> Cate' bila'yönné' bönni' usèda queé' chí'i na', gula'dzö'è gusurú'alö, en guladxi bila'dzöbiné'. <sup>7</sup> Ní'irö gubíguí'è Jesús ga na' nacué', ate' gudané' légaquié', rnné':

—Gulí'chasa. Bití' gádxilí'.

<sup>8</sup> Cate' gula'chisa lógaquié', en bulu'yúé', cúnturö nu bila'lé'ené', pero tuzé' Jesús.

<sup>9</sup> Cate' ní' tu'dínniē' lu gu'á na', Jesús gunná bé'ené' légaquié', rnné':

—Cuntu nu guiéli' ca guca lè ni bilé'eli' cate' ubanra' lu yöl-la' guti neda', Bönni' Guljé' Bönachi.

<sup>10</sup> Ní'irö yugu' bönni' usèda queé' gula'nábiné' Lè', ta'nné':

—¿Bix que ta'nné' bönni' yudo' usèdi run bayudxi uluí'i lahué' Elías zí'alö ca uluí'i lahué' Cristo?

<sup>11</sup> Bubi'è didza' Jesús, rē' légaquié':

—Le nácatē uluí'i lo cazé' zí'alö Elías, en ucá'ané' tsahui' yúgu'tē. <sup>12</sup> Neda' rea' libí'ili': "Chibuluí'i lahué' Elías na', pero bití' bulu'únbē'è lē', ate' yúgu'tē ca rnasö quégaquié' guluné' queé'." Lē'sca' caní iluné' quia' neda', Bönni' Guljé' Bönachi, ulu'saca' zī'è neda'.

<sup>13</sup> Ní'irö gula'yéajni'iné' bönni' usèda queé', bé'lené' Jesús légaquié' didza' ca guca queé' Juan, bönni' na' buquilé' bönachi nisa.

### Ruüné'-bí' Jesús tubí' bí'i bönni' ré'ebi' xjote'

(Mr. 9:14-29; Lc. 9:37-43)

<sup>14</sup> Cate' bila'dxiné' ga na' nacua' bönachi zían, gubíguí'è tu bönni' ga zoé' Jesús, ate' buzóa zxibé' lahué' Lè', <sup>15</sup> en rē' Lè':

—Xan, buéchi' lādxi'-bí' bí'i bönni'do' quia', tu' ré'ebi' xjote', en riguí'i rizáca'da'abi', ate' zían luzuí ridzö'öbī' lu guí' o lu nisa. <sup>16</sup> Chidiguá'a-bí' lógaquié' bönni' usèda quiu' pero bití' guca ulu'úné'-bí'.

<sup>17</sup> Bubi'è didza' Jesús, rnné':

—Libí'ili', bönachi cabí réajlé'èli', en bití' nácali' tsahui'. ¿Gáca'xte caz ral-la' sóalena' libí'ili' para tséa-jlé'èli' neda'? ¿Gáca'xte caz ral-la' guá' ilena' queé'li'? Gulí'diguá'-bí' quia' ni.

<sup>18</sup> Ní'irö Jesús buzené' le bach bö' xihui' na' yu'u lèbi', ate' la' burúajtē lèbi', ate' la' ná'asö böácatēbi' bí'i bön-ní'do' na'.

<sup>19</sup> Ní'irö, yugu' bönni' usèda queé' Jesús gula'biguē'è quez ga zoé', ate' gula'nábiné' Lè', ta'nné':

—¿Bix que na' bití' guca ubéajtu' netu' bö' xihui' na'?

<sup>20</sup> Jesús rē' légaquié':

—Bití' guzéquí'li' tu' cabí réajlé'èli' Dios idú lādxi'li'. Le nácatē rea' libí'ili', sal-la' cuídí'sö naca yöl-la' réajlé' queé'li' Dios, nácatē ca tu xisedo' mostaza, huáca guiéli' guí'ado' ni: "Gucuíta ni, en yöjsóa ní'ilö", ate' la' icuítatē guí'ado' na'. Bití' bi zoa le cabí gaca gunlí' channó réajlé'èli' Dios idú lādxi'li'. <sup>21</sup> Tu bö' xihui' caní gácasö ubéajli' channó ulídzalí'-nē' Dios, en gunlí' gubasa.

**Riguíxjö'ë Jesús leyúbölö ca sí' ilútië' Lë'**

(Mr. 9:30-32; Lc. 9:43-45)

<sup>22</sup> Tsanni ni' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'a-gaca bönachi. <sup>23</sup> Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

**Jesús riguizxaj lazë' que yudo'**

<sup>24</sup> Cate' bulu'dxinë' Jesús, en yugu' bönni' usëda queë' lu yödzo Capernaum, bila'dxinë' yugu' bönni' tu'quizxjë' bönachi lázagaca que yudo' ga zoë' Pedro, ate' të' lë':

—¿Naru' cabí quizxaj lazë' que yudo' bönni' rusédinë' libí'ili'?

<sup>25</sup> Bubi'ë didza' Pedro, rnnë':

—Ön, huaguizxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quizxjë' le riguizxaj laz, en lazaxaj que yu? ¿Naru' tu'quizxjë' bönachi uládz quëgaquië' o bönachi izá'a?

<sup>26</sup> Bubi'ë didza' Pedro, rë' Lë':

—Bönachi izá'a tu'quizxjë'.

Ní'irö Jesús rë' lë':

—Que lë ni na', bití' run bayudxi quizxaj laza' que yudo' tu' naca' Zxí'inë' Dios ca na' bití' bi ta'guíxaj nupa nácagaca bönachi uládz queë' bönni' na' ruquíxjë'.

<sup>27</sup> Na'a, para cuntú nu gun leru', guyéaj ra' nísado', yöjzalaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu dumí lásido'. Guzxí'i le, ate' gudizxaj laza', en lazu'.

**¿Núzxilö gaca lo?**

(Mr. 9:33-37; Lc. 9:46-48)

**18** La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná bë'ë Dios yehua' yubá?

<sup>2</sup> Bulidzë'-bi' Jesús tubi' bí'i bónni'do', ate' buzóë'-bi' gatsaj láhui'lö ga na' nacué. <sup>3</sup> Ní'irö rë' légaquië':

—Le nácatë rea' libí'ili', channö cabí huóacali' ca zeaj nácabi' bí'ido', bití' ca' tsú'uli' ga ní' rinná bë'ë Dios yehua' yubá. <sup>4</sup> Que lë ni na', nútítës nu gaca nöxaj ladxi', en huóaca ca nácabi' bí'ido' ni, nu ni gaca lo ga ní' rinná bë'ë Dios yehua' yubá. <sup>5</sup> Nútítës nu gun bal tubi' bí'ido' caní tu' néquibi' quia', neda' caz gun bal.

**Le tun ga nu gun dul-la'**

(Mr. 9:42-48; Lc. 17:1-2)

<sup>6</sup> Gunné' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxí'a queë' bönni' na' la'tu' ugalë'ë guíój riyétuni yaga yenë', ate' tsöjsuladzu' cuinë' lu nísado'.

<sup>7</sup> Bica' bayechi' bönachi yödzülió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

<sup>8</sup> Que lë ni na', channö gun no'ó o ni'u ga gunu' dul-la', guchugu le, en gurú'una le. Gácarö dxí'a quiu' tsöjt-sáziu' ga su' ibanú' bití' rizó'ó o narugu ní'a no'ó, en calëga nacué' chopa no'ó, en chopa ní'u ate' tsöjtsáziu' lu guí' gabila le catu caz ulu. <sup>9</sup> Channö gun guíój lo' ga gunu' dul-la', guléaj le, en gurú'una le. Gácarö dxí'a quiu' tsöjtsáziu' ga su' ibanú', zoa tuz guíój lo', en calëga nacué' chopa guíój lo', ate' tsöjtsáziu' lu guí' gabila.

**Jesús rucúdzü'ë didza' que tu bö'cu' zxila' nanítiba'**

(Lc. 15:3-7)

<sup>10</sup> Gunné' ca' Jesús:

—Gulí'gún chí'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chí'ë légacabi' nacué'tica'sé' lahué' Xuzá' zoë' yehua' yubá. <sup>11</sup> Bida' ni neda', Bönni' Guljë' Bönachi, para usölá' nu ni naniti.

<sup>12</sup> ¿Nacxi rusáca'li' queéli'? Tu bönni', nacué'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chënnaba' na', ate' tsejé' gapa naca lu guí'a, para tsöjtiljë'-ba' bö'cu' zxila'do' na' nanítiba'? <sup>13</sup> Channö udzölinë'-ba', le nácatë rea' libí'ili', udzéjarönë' ní'a queëba' bö'cu' zxila'do' na' ca gunë' quégacaba' ia'tápalalaj yu' chënnaba' ni' bití' gu-la'nítiba'. <sup>14</sup> Lësca' caní, Xúziru' Dios, zoë' yehua' yubá, bití' ré'ënë' nítibi' tubi' bí'ido' caní.

**Ca ral-la' uniti loru' böchi' luzá'aru'**

(Lc. 17:3)

<sup>15</sup> Gunné' ca' Jesús:

—Channö böchi' luzó'ó guá' dö' quiu', guyéajtsöca', en yöjca'analenë' tsahui' la' libí'isili'. Channö uzé' náguië' lí', chibuguélu'u böchi' luzó'ó. <sup>16</sup> Channö cabí uzé' náguië' xtídzü'u, guché'ë ia'túé' o ia'chopë' bönni' para urúaj li xtídzü'u lógaquië' chopa tsonné' bönni', nupa gaca ilún ba nalí que xtídzá'li'. <sup>17</sup> Channö cabí uzé' náguië' xtídzá'gaquië', gudxi ca' bönachi tu'dubi tu'sëdi queë' Dios, en channö cabí uzé' náguië' xtídzá'gaca bönachi na', ní'irö bönni' na' gáquië' quiu' ca tu bönni' bití' réajlë'ë Dios, en ca tu bönni' ruquíxjë' uláz que yödzo zítu'.

<sup>18</sup> Le nácatë rea' libí'ili', yúgu'të le inná bë'ëli' lu yödzülió ni, naca le chigunná bë'ë Dios yehua' yubá, ate' yúgu'të le gü'ili' lataj lu yödzülió ni, naca le chibé'ë lataj Dios yehua' yubá.

<sup>19</sup> Lësca' caní rea' libí'ili', channö chópasili' gun tuz xtídzá'li' lu yödzülió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. <sup>20</sup> Ga nacué' chopa tsonna nupa ni nudúbigaca quia' neda', zoa caza' neda' gatsaj láhui'lö ga na' nacué'.

<sup>21</sup> Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

<sup>22</sup> Jesús rë' lë':

—Neda' rea' lí, calégasö gadxi luzuí, pero idú tsónalalaj yu' chi cuía le naca gadxi luzuí.

**Jesús rucúdzu'ë didza' que tu bönni' huen dxin biti' buniti lahuë' luzé'ë**

<sup>23</sup> Gunné' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unnë' ucá'analënë' tsahui' yugu' bönni' huen dxin queë'. <sup>24</sup> Cate' gusí lahuë' rucá'analënë' légaquië' tsahui', dujuá'gaquië' ga zoë' tu bönni' ral-lë'ë queë' zían gayuá' dumí. <sup>25</sup> Tu' cabí guca quíxjé', gunná bë'ë xanë' idó'ogaquië' lë', en nigula queë', en yugu' bí'i queë', en yúgu'të le dë queë', ate' ní'irö gazxaj le ral-lë'ë queë' xanë' na'. <sup>26</sup> Ní'irö bönni' huen dxin na' buzóa zxi bë' lahuë' xanë', en gunábinë' lë', rnnë': "Xan, ben zxön ládxi'u neda'. Huaguizxaj caza' lí idutë." <sup>27</sup> Ní'irö xanë' na' buéchi' ládxi'ë bönni' huen dxin queë' na', en buniti lahuë' lë' lë na' ral-lë'ë queë', ate' busanë' lë'. <sup>28</sup> Cate' burúajë' bönni' huen dxin na', la' yöjtsá gatë' tu bönni' rúnlenë' lë' tsözxón dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guxzínna jë' yenë', ate' rë' lë': "Gudíxjatë lë na' ral-lu'u quia'." <sup>29</sup> Ní'irö luzé'ë na' buzóa zxi bë' lahuë', en gunaba yeché'ë lahuë', rnnë': "Ben zxön ládxi'u neda'. Huaguizxaj caza' lí idutë." <sup>30</sup> Biti' gú'unnë' bönni' huen dxin na', ate' yöjlu'ë lë' lidxi guíë dza quíxjarë' lë na' ral-lë'ë queë'. <sup>31</sup> Cate' bi-la'lé'enë' lë ni ia'zica'rë' huen dxin, bulu'huí'inide'enë' ní'a queë', ate' yöjtíxjoi'igüequinë' xángaquië' yúgu'të lë na' guca. <sup>32</sup> Ní'irö xángaquië' bulidzë' bönni' huen dxin na', ate' rë' lë': "Lí, huen dxin catsahui'. Yúgu'të dumí na' gúl-lu'u quia' buniti lahua' lí. Busúlua' lë na' gúl-lu'u quia' tu' gunaba yechu'u lahua'. <sup>33</sup> ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxi'a lí?" <sup>34</sup> Ní'irö guléde'enë' xanë', en budödë' lë' lu ná'agaca nupa ulu'saca' z' lë' dza quíxjarë' idutë le ral-lë'ë queë'.

<sup>35</sup> Ní'irö rnnë' Jesús:

—Lësca' caní gunë' Xuza' zoë' yehua' yubá queé'li' channö cabí uniti lolí' idú ládxi'li' yugu' böchi' luzá'ali'.

**Nupa tu'lá'a yö'l-la' nutsaga na'**  
(Mr. 10:1-12; Lc. 16:18)

**19** Cate' budxi bë'ë Jesús yugu' didza' ni, buzé'ë luyú Galilea, ate' bidxinë' luyú Judea le dë ia't-sölá'a yegu Jordán saca' ga rilén gubidza. <sup>2</sup> Bönnachi zían söjácálen Jesús, ate' bunë' léguequi ní'.

<sup>3</sup> Ní'irö bila'dxinë' bal-lë' bönni' yudo' fariseo ga zoë' Jesús para ila'z'í bë'ë Lë', ate' gula'nábinë' Lë', ta'nnë':

—¿Naru' dë lataj bönni' nutsaga në'ë usanë' nigula queë' tu' nözi bití'tës bi raca?

<sup>4</sup> Bubi'ë didza' Jesús, rë' légaquië':

—¿Naru' cabí nulábanilí' le nazúaj lu guichi lá'ayi ca benë' Dios bönnachi cate' sí' benë' yödzölió? Bönni', en nigula benë' légaquië'. <sup>5</sup> Caní gunné' Dios: "Que lë ni na', ral-la' usanë' tu bönni' xuz xiné'ë, ate' tsaz tsöjsóalenë'-nu nigula queë', ate' iropë' na'

ulu'huöáquië' tuz bönnachi." <sup>6</sup> Caní naca, bíti'rö náca-gaquië' chopë' pero tuz bönnachi chinuhuöáquië'. Que lë ni na', bití' ral-la' ulu'lé'ë bönni' nupa na' benë' Dios tuz.

<sup>7</sup> Ní'irö bönni' yudo' na' gula'nábinë' Jesús, ta'nnë':

—¿Bizx que na' gunná bë'enë' Moisés légaquië' le ru'íi lataj nu bönni' unödzjé' tu guichi queënu nigula queë' le rnna nulá'a yö'l-la' nutsaga na', ate' usanë'-nu nigula queë' na'?

<sup>8</sup> Jesús rë' légaquië':

—Caní benë' Moisés tu' nazidi icja ládxi'do'oli'. Bennë' lib'íli' lataj usanli'-nu nigula queé'li', pero cate' gusí lo guta' guró'ö yödzölió, bití' guca caní. <sup>9</sup> Neda' rea' lib'íli', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alënë'-nu nigula yúbölö, gunë' dul-la' le riguitsaj xibá que yö'l-la' nutsaga na'. Lësca' caní, channö nu bönni' utsaga ná'alënë'-nu nigula na', nusanë'-nu bönni' queënu, gunë' dul-la' le riguitsaj xibá que yö'l-la' nutsaga na'.

<sup>10</sup> Ní'irö yugu' bönni' uséda queë' Jesús gulé' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

<sup>11</sup> Bubi'ë didza' Jesús, rë' légaquië':

—Bití' gaca ila'z'í' lu ná'agaca yúgu'të bönnachi didza' ni, pero núpasö na' Dios ruzéajni'inë' léguequi.

<sup>12</sup> Nacu'ë bönni' bití' tu'tsaga ná'alengaquië' nigula tu' cabí ná'cagaquië' idú bönni' biguiú', tu' gulaljé' ca', ate' ia'zica'rë' bönni' bití' tu'tsaga ná'alengaquië' nigula tu' bulu'zaga' bönnachi xinó'zgaquië', ate' ia'zica'rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequí' sí' lu në'ë didza' ni ral-la' sí' lu në'ë le.

**Jesús ruidza tsáhuë'ë-bi' yugu' bí'ido'**  
(Mr. 10:13-16; Lc. 18:15-17)

<sup>13</sup> Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixó'a në'ë lé'gacabi', en ulidzë' Dios ní'a quégacabi', ate' bönni' uséda queë' bulu'zágui'ë xinó'zgaquië'. <sup>14</sup> Ní'irö Jesús rë' légaquië', rnnë':

—Gulí'gü'í-bi' yugu' bí'ido' lataj ila'dxinbi' ga zoa', en bití' uzá'ga'li' xinó'zga'cabi', tu' ila'z'í' lataj nupa ná'cagaca ca yugu' bí'ido' caní ga ní' rinná bë'ë Dios yehua' yubá.

<sup>15</sup> Jesús guxó'a në'ë lé'gacabi', ate' ní'irö buzé'ë ní'.

**Tu bönni' unná bë' cuidi' dë yö'l-la' tsahui' queë'**  
(Mr. 10:17-31; Lc. 18:18-30)

<sup>16</sup> Tu bönni' ni zoë' iz cuidi' queë' buduyúé' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yö'l-la' na'bán idú quia'?

<sup>17</sup> Bubi'ë didza' Jesús, rë' lë':

—¿Naru' nó'ztsenu' lë na' rnno' quia', rnno' naca' idú tsahui'? Cuntu nu bönni' ná'quië' idú tsahui'. Tuzë' Dios ná'quië' idú tsahui'. Channö ré'ënu' gata' yö'l-la' na'bán idú quiu', ben ca rinná bë' xibá queë' Dios.

<sup>18</sup> Ní'irö bönni' na' rë' Jesús, rnnë':

—¿Bízxilö xibá na?  
 Jesús rë' lë':  
 —Xibá na' gunná bē'ë Moisés:  
 Biti' gútiu' bönachi.  
 Biti' gunu' dul-la' le riguitsaj xibá que yöl-la' nutsaga na'.  
 Biti' cuanu'.  
 Biti' innió' que böchi' luzó'o le cabí nácate.  
<sup>19</sup> Ben bal xuz xinó'o.  
 Bidxí'i böchi' luzó'o ca nadxí'i cuinu'.  
<sup>20</sup> Bönni' na' ni zoë' iz cuidi' queë' gudxë' Jesús, rnnë':  
 —Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

<sup>21</sup> Jesús rë' lë':  
 —Channö ré'ënu' gacu' tsahui', guyéaj, yöjëtí' le dë quiu', ate' dumí na' sí'u, bunödzej quégaca bönachi yechi'. Caní gata' yöl-la' tsahui' quiu' ní' yehua' yubá. Ní'irö gudá, gudá' neda'.

<sup>22</sup> Cate' bönni' na' ni zoë' iz cuidi' queë' biyönnë' didza' ni, söhuó'jé' ruhu'innë' tu' dëda' yöl-la' tsahui' queë'.

<sup>23</sup> Ní'irö Jesús gudxë' yugu' bönni' usëda queë', rnnë':  
 —Le nácate rea' libí'ili', böniga naca tsázië' nu bönni' dë yöl-la' tsahui' queë' ga rinná bē'ë Dios yehua' yubá.

<sup>24</sup> Ia'stú rea' libí'ili', nácáro böniga tsázië' tu bönni' dë yöl-la' tsahui' queë' ga ní' rinná bē'ë Dios ca tódiba' böa' lu nagui yötsí'.

<sup>25</sup> Cate' bila'yönnë' yugu' bönni' usëda queë' didza' ni, bulu'bánnië, ta'nnë':

—¿Nuzxi caz gaca ulá, channö?

<sup>26</sup> Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

<sup>27</sup> Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'len-tu' Lí'. ¿Bízxiro gata' queëtu'?

<sup>28</sup> Jesús rë' légaquië':

—Le nácate rea' libí'ili', dza ní' cate' ucubi yödzölió, ate' cö'a inná bē'a neda', Bönni' Guljé' Bönachi, ga ní' gácatëra' lo, lësca' libí'ili' zá'lenlí' neda' na'a, có'öli' chin-nu lataj ga inná bé'ëli', en uchi'a usöröli' quégaca idxin-nu cö'të yödzö quégaca xzí'ini xí'söë' Israel. <sup>29</sup> Nu bönni' rucá'anë' lidxë', o yugu' böché'ë, o yugu' zanë', o xuzë', o xiné'ë, o nigula queë', o yugu' xzí'inë', o yugu' xiyúë', para gunë' xichina', bönni' ni sí'ë ia'tú gáyua'tërö ca' queë', en gata' ca' yöl-la' na'bán idú queë'. <sup>30</sup> Zían nupa nácagaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

**Rucúdzü'ë didza' Jesús ca tunë' bönni' huen dxin**

**20** Gunnë' ca' Jesús:

—Ca gun Bönni' na' rinná bē'ë yehua' yubá naca ca benë' tu bönni' xan yu'u. Birúajë' zílado', yöjdliljé' yugu' bönni' ilunë' dxin ga naca lu xiyúë' ga na' nadúzgaca lubá uva. <sup>2</sup> Cate' chibugá'analënë' tsahui' yugu' bönni' huen dxin na', quizxjé' légaquië' lu dumí lazaj que tu dza, gusól-lë'ë légaquië' ilunë' dxin ga naca lu xiyúë'. <sup>3</sup> Cate' burúajë' idú xsila, bilé'enë' ia'zica'rë' bönni' nacua'asë' ca' ga naca lu yé'ëyi. <sup>4</sup> Rë' lé-

gaquië': "Gulí'tséaj ca' libí'ili' ga naca lu xiyú'a, ate' quizxja' libí'ili' le naca tsahui'." La' yöjácate' ca' lé-gaquië'. <sup>5</sup> Burúajë' bönni' xan yu'u na' leyúbölo idú huagubidza, enca' idú xihuó udzó', en la' tuz ca benë', gusól-lë'ë yugu' bönni' yöjxáquië' lu xiyúë'. <sup>6</sup> Burúajë' ca' cate' ní' zoa ia'látí'do'os gubidza, en yöjxáquië' ia'zica'rë' bönni' nacua'asë' ca' ní', ate' rë' légaquië': "¿Bizx que zóatsali' ni cá'asö idú dza, bití' bi dxin runlí'?" <sup>7</sup> Yugu' bönni' na' tē' lë', ta'nnë': "Cuntu nu benna xich-intu'." Ní'irö rë' légaquië': "Gulí'tséaj ca' libí'ili' ga naca lu xiyú'a, ate' quizxja' libí'ili' le naca tsahui'." <sup>8</sup> Cate' chizóa gal-la, bönni' xan yu na' rë' bönni' yu'u lu nē'ë yugu' huen dxin na', rnnë': "Bulidza yugu' bönni' huen dxin na', ate' gu'u lázjagaquië'. Quizxju' zí'aló yugu' bönni' na' bila'dxinë' yöjsetë. Udxí na' quizxju' yugu' bönni' na' bila'dxinë' zí'atëlö." <sup>9</sup> Ní'irö bila'dxinë' bönni' yöjéngaqië' dxin cate' ní' zoa ia'látí'do'os gubidza, en gula'zi'ë tu tuhuéajë' dumí lazaj que tu dza. <sup>10</sup> Cate' bila'dxinë' bönni' yöjéngaqië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazaj que tu dza. <sup>11</sup> Cate' gula'zi'ë le, gula'n-nédë'ë queë' bönni' xan yu'u na', <sup>12</sup> ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudí'zjatsó' légaquië' ca netu', ate' netu' ni bentu' dxin idú dza, en gúguida'atu' gubidza." <sup>13</sup> Bubi'ë didza' xan yu na', en rë' tuë': "Bócha'a, bití' bi runa' quiu' le cabí naca tsahui'. ¿Naru' cabí bugá'ana tsáhui'ru' sí'u tu dumí lazaj que tu dza? <sup>14</sup> Guzxí' lazxju', en böaj lidxu'. Neda' ré'ënda' quizxja' bönni' ni yöjenë' dxin ga yöjsetë la' leze ca na' riguíxja' lí'. <sup>15</sup> ¿Naru' cabí dë lu na'a guna' ca ré'ënda' len le nequi quia'?' ¿Naru' ruzxé'etsenu'-në' luzó'o tu' rúnnada'a queë'?" <sup>16</sup> Caní naca, bal-lë' bönni', tu'cá'ana bönachi lé-gaquië' cá'asö, ilácagaquië' lo, ate' ia'zica'rë' bönni', nácagaquië' lo na'a, ulu'gá'anë' cá'asö. Zían nupa nulidza', pero nabábasö nupa narógaca.

**Rigúixjö'ë Jesús leyúbölo ca sí' ilútië' Lë'**

(Mr. 10:32-34; Lc. 18:31-34)

<sup>17</sup> Cate' ní' yu'ë Jesús nöza, sa'yéajë' Jerusalén, guché'ë quez idxínnutë' bönni' usëda queë', en rë' lé-gaquië':

<sup>18</sup> —Bulí'yútsöca', ribenru' zéajru' Jerusalén, ate' ní' soa nu udödi neda', Bönni' Guljé' Bönachi, lu ná-a-gaquië' bixúz unná bē', en lu ná'agaquië' bönni' yudo' usëdi, ate' ila'chúguië' quia' gátia'. <sup>19</sup> Ulu'dödë' neda' lu ná'agaquië' bönni' zítu' para ulu'titjé' neda'. Ila'guinë' neda', en ulu'dé'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

**Le gunábanu xiná'agaquië' Jacobo, en Juan**

(Mr. 10:35-45)

<sup>20</sup> Ní'irö bidxinnu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzágagaquië'-nu chopë' ní, ate' buzóa xzíbinu lahuë' Jesús, en gunábinu Lë' tu le uzá' ládxë'ë queënu. <sup>21</sup> Jesús gunábinë'-nu, rnnë':

—¿Bizxi ré'ënu'?

Rënu Lë':

—Gunná bè' có'òbì' tubì' zxfína' ni cuita lè'u ibèla, en ia'tubì' có'òbì' cuita lè'u yògòla ga nì' inná bè'u.

<sup>22</sup> Bubi'è didza' Jesús, rè' légaquiè':

—Bitì' nòzilì' le rinábalì'. ¿Naru' huáca guá' ilenlì' le qui'í saca' neda', en idílalì' nisa ca idila' neda' nisa, gátia'?

Tè' Lè':

—Huácatu'.

<sup>23</sup> Ní'irò Jesús rè' légaquiè':

—Le nácatè le ral-la' qui'í saca'a neda', gaca ca' queé'li', en le ral-la' idila' neda' nisa, gátia', idílalì' ca' nisa libí'ili', pero que có'òlì' cuita lè'a ibèla o cuita lè'a yògòla, bitì' dè lu na'a nu gu'a que, pero gata' quégaca nupa nì' chinupé'è Xuza' quéquequi.

<sup>24</sup> Cate' ia'chíè' bònni' usèda queè' Jesús bila'yönnè' lè ni, gula'lenè'. <sup>25</sup> Ní'irò Jesús bulidzè' légaquiè', rnnè':

—Nözquézilì' ca tunè' yugu' bònni' ta'nná bé'enè' bönachi izá'a, ridóditè bè' ta'nná bé'enè' légaquiè', ate' nupa nì' náccagacarò lo ta'nná be'e la' luzé'eguequisò.

<sup>26</sup> Bitì' gaca caní queé'li'. Nútì'tèslòlì' libí'ili' nu ré'èni gaca zxon ga zóalì', nu ni ral-la' gun dxin que ia'zì-ca'ròlì'. <sup>27</sup> Lè'sca' caní, nútì'tèslòlì' libí'ili' nu gué'èni gaca lo, ral-la' gaca ca tu bònni' nadó'o que ia'zì-ca'ròlì'.

<sup>28</sup> Lè'sca' neda', Bònni' Guljè' Bönachi, bida' ni, calèga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' nì'a quégaca bönachi zían para ulu'lágaca.

#### Ruúnè' Jesús chopè' bònni' nachul-la lógaquiè'

(Mr. 10:46-52; Lc. 18:35-43)

<sup>29</sup> Cate' nì' tu'ruájè' yödzo Jericó, bönachi zían sòjácacalèn Jesús. <sup>30</sup> Nacu'è chopè' bònni' nachul-la lógaquiè' nì', ró'gaquiè' ra' nöza. Cate' bila'yönnè' ridödè' Jesús nì', gulu'è zidzaj didza', ta'nnè':

—Xan, zxfí'ini xí'sóè' David, buéchi' ladxì' netu'.

<sup>31</sup> Bönachi zían nacua' nì' gulé légaquiè' ila'cu'è dxisò, pero zidzajrò gulu'è didza', ta'nnè':

—Xan, zxfí'ini xí'sóè' David, buéchi' ladxì' netu'.

<sup>32</sup> Ní'irò guzè' ribözè' Jesús, en bulidzè' légaquiè', ate' gunábinè' légaquiè', rnnè':

—¿Bizxi ré'ènilì' guna' queé'li'?

<sup>33</sup> Tè' Jesús:

—Xan, ré'ènitù' gunu' ga huóálaj guiój lotu'.

<sup>34</sup> Ní'irò Jesús buéchi' ladxè'è légaquiè', ate' gudanè' guiój lógaquiè'. La' böáljatègaca guiój lógaquiè', ate' yöjácacalènè' Jesús.

#### Ridxinè' Jesús yödzo Jerusalén len yöl-la' ba zxon

(Mr. 11:1-11; Lc. 19:28-40; Jn. 12:12-19)

**21** Cate' bila'dxingalè' yödzo Jerusalén, en nì' nacu'è ga dè yödzo Betfagé ga na' zoa Gu'ía Ya-ga Olivo, ní'irò gusól-lè'è Jesús chopè' bònni' usèda queè', <sup>2</sup> ate' rè' légaquiè':

—Gulì'tséajtsöca' yödzo' nì' ca dódilò ga ni zóaru', ate' la' tsöjxáca'tèlì'-ba' tuba' burro guná' nága'ba', ate' dzaga lèba' tuba' burro biguí'ú'do'. Gulì'tsöjsexi-ba', en iché'èlì'-ba' quia' ni. <sup>3</sup> Channò nu bi gué' libí'ili', gulì'gué'

nu na': "Xanru' riquinnè'-ba'." Ní'irò isól-lè'è légacaba' quia'.

<sup>4</sup> Caní guca para gaca lè na' buzúajè' lu guichi bònni' bè'è didza' uláz queè' Dios, gunné':

<sup>5</sup> Gulì'gué' nupa nacua' yödzo Sión, Bulì'yútsöca', zè'è Bònni' inná bé'enè' libí'ili'.

Lu yöl-la' nöxaj ladxì' queè' dxíè'-ba' tuba' burro.

Dxíè' cúdzu'ba' búrrodo' nácaba' zxfí'iniba' böa' ruá'aba' yua'.

<sup>6</sup> Ní'irò bònni' usèda queè' yöjáquiè' nì', ate' gulunè' ca na' gunná bé'enè' Jesús légaquiè'. <sup>7</sup> Gula'ché'è-ba' burro guná' na', en burro biguí'ú'do' na', ate' bulu'dxíè' cúdzu'gacaba' yugu' lari' guitsa' quégaquiè', ate' gudxíè' Jesús lahui' lari' na'. <sup>8</sup> Nacuá' ca' bönachi zían nì', ate' gula'chilaj yugu' lari' ta'xóa cúdzu'guequi la' nöza. Ia'zìca'rè' bulu'chibè' zin le bulu'zxóè' ga naca la'

nöza. <sup>9</sup> Gulu'í zidzaj didza' bönachi na' nanörugaca, en nupa na' sòjácacalèn Jesús, ta'nná:

—¿Yöl-la' ba Lè', zxfí'ini xí'sóè' David! ¡Bica' ba nu ni za' nì'a que Lè' Xanru'! ¿Yöl-la' ba Dios!

<sup>10</sup> Cate' guyáziè' Jesús yödzo Jerusalén, bulu'dzatsa yúgu'tè bönachi lu yödzo na', ate' zían nupa gulé luzé'eguequi, ta'nná:

—¿Nuzxi caz bònni' nì'?

<sup>11</sup> Ia'bal-la bönachi nì' ta'nná:

—Nu ni Jesús, bònni' ru'è didza' uláz queè' Dios, ate' naca ladxè' Nazaret luyú Galilea.

#### Jesús rulatjè' lö'a yudo'

(Mr. 11:15-19; Lc. 19:45-48; Jn. 2:13-22)

<sup>12</sup> Cate' guyáziè' Jesús lö'a yudo' queè' Dios, bulágui'è ní'ilò yúgu'tè nupa tutì' to'o ga naca lö'a yudo' na'. Burixè' ca' yugu' blaga quégaquiè' bònni' tu'tsé'è dumí yödzo zì'tu', en yugu' le ta'bó'i nupa tutì' gu'dòdo'. <sup>13</sup> Ré' légaquiè':

—Nazúaj lu guichi lá'ayi le rna: "Lidxa' sí'i le, yu'u ga nu ulidza Dios", pero libí'ili' chinunilì' lataj ni ca naca yu'u lídxigaca gubán.

<sup>14</sup> Cate' nì' zoè' Jesús chila yudo', bal-lè' bònni' nachul-la lógaquiè', en bònni' bitì' raca ila'zè'è bila'dxinè' ga na' zoè', ate' Lè' bunè' légaquiè'. <sup>15</sup> Gula'lenè' yugu' bixúz unná bè', en bònni' yudo' tu'sédinè' cate' bila'lé'enè' yugu' yöl-la' huáca ni runè' Jesús, en bila'yönnè' tu'í'ibi' bí'ido' zidzaj didza' ga naca chila yudo', ta'nnabi':

—¿Bica' ba Lè', zxfí'ini xí'sóè' David!

<sup>16</sup> Ní'irò tè' Jesús:

—¿Naru' cabí riyönnu' ca ta'nnabi' bí'i ni?

Bubi'è didza' Jesús, rnnè':

—Ön, riyönda'. ¿Naru' catu caz nulábanilì' le nazúaj lu guichi lá'ayi caní caz ral-la' gaca? Caní rna: "Lì' benu' ga yugu' bí'i cuidì', en yugu' bí'ido' nì' tádxì'bi' gulúl-labi' yöl-la' ba le naca idú."

<sup>17</sup> Ní'irò Jesús bucá'anè' légaquiè', ate' burúajè' Jerusalén. Guyijè' yödzo Betania ga nì' bugá'anè' idú yèla.

**Jesús rulidza zì'è yaga higo**

(Mr. 11:12-14, 20-26)

<sup>18</sup> Cate' za' rení', ate' ní' söhuójjé' Jesús Jerusalén, riduné'. <sup>19</sup> Bilé'ené' tu yaga higo rō' gal-la' cuite nōza, ate' gubíguí'è ga na' rō', pero bití' bi bidzólíné' lu yaga na'. Xiláguí'sō dxía. Ní'irō Jesús gudxé' le:

—Bítí'rō cuía le ribía quiu'.

La' gubídxité yaga higo na'. <sup>20</sup> Cate' bila'lé'ené' bönní' usēda queé' lē ni, bulu'bábiné', ate' gula'nábiné' Jesús, ta'nné':

—¿Nacxi caz guca, gubídxité yaga ni?

<sup>21</sup> Bubi'è didza' Jesús, rē' légaquié':

—Le nácatē rea' libí'ili', channō tséajlè'èli' Dios, en bití' gaca chopa ládxí'li', calégasō huáca gunlí' ca na' bena' que yaga ni, pero channō guíé'li' guía ni: Gucuíta, en yōjsóa lu nísado', gaca ca na' innalí'. <sup>22</sup> Lēscá' caní, yúgu'tē le inábalí' cate' ulídzalí'-nē' Dios, channō huayéjlè'èli' gunné' Dios queé'li', huazí'ili' lē na' inábalí'.

**Yöl-la' unná bē' dē lu nē'è Jesús**

(Mr. 11:27-33; Lc. 20:1-8)

<sup>23</sup> Ní'irō guyázié' Jesús chila yudo', ate' tsanni ní' rusédiné' bōnachi nacua' ní', bila'dxiné' yugu' bixúz uná bē' len bönní' gula tu'zéajni'iné' ga zoé', ate' gula'nábiné' Jesús, ta'nné':

—¿Bizxi yöl-la' unná bē' dē lu no'ó, runtso' yugu' lē ni? ¿Nuzxi budōdi lu no'ó yöl-la' unná bē' ni?

<sup>24</sup> Bubi'è didza' Jesús, rē' légaquié':

—Lēscá' neda' inábatsōqui'da' libí'ili' tu didza'. Channō quíxjōi'ili' neda' ca naca, neda' ca' guía' libí'ili' bizxi yöl-la' unná bē' dē lu na' runa' caní. <sup>25</sup> ¿Nuzxi caz gusól-la' Juan para buquilé' bōnachi nisa? ¿Naru' Dios gusól-lè'è lē', o gula'sól-lè'è yugu' bönní' lē'?

Ní'irō gula'sí lógaquié' bönní' yudo' na' ta'nné' la' lé-gacasē':

—Channō innaru': Dios gusól-lè'è lē', la' guíé'tē rē'u: "¿Bizx que bití' guyéajlè'èli' lē'?" <sup>26</sup> Na'a, channō innaru': Gula'sól-lè'è yugu' bönní' lē', rádxi'ru' le ilún bōnachi lu yōdzō tu' ta'yéajlè'è yúgu'tē Juan na' bē'è didza' uláz queé' Dios.

<sup>27</sup> Que lē ni na' bulu'bi'è didza', tē' Jesús:

—Bití' nōztu'.

Jesús rē' légaquié':

—Neda' ca', bití' guía' libí'ili' bizxi yöl-la' unná bē' dē lu na'a runa' lē ni.

**Rucúdzu'è didza' Jesús ca gulunbí' chópabí' xzí'iné' tu bönní'**

<sup>28</sup> Ní'irō Jesús gudxé' yugu' bönní' yudo' na':

—¿Nacxi rusáca'li' queé'li'? Guzóé' tu bönní' nacua'abí' chópabí' bí'i bönní' queé', ate' yōjōdxé'-bí' tubí' bí'i queé' na', gunné': "Zxí'ina', guyéaj na'a tsōjenu' dxin ga naca luyú quia' ga rō'gaca lubá uva." <sup>29</sup> Bubi'ibi' didza' bí'i na', gúdxibi'-nē': "Bití' ré'ēnda' tseja'." Gudōdi ní' bubí'í ládxí'bi', ate' yōjenbí' dxin. <sup>30</sup> Ní'irō bönní' na' yōjōdxé'-bí' ia'tubí' bí'i queé' na', en la' tuz ca gunné',

ate' bubí'ibi' didza' bí'i ni, gúdxibi'-nē': "Huaca, Dad. Uyéaja'." Bití' guyéajbí' bí'i ni. <sup>31</sup> ¿Núzxilōbí' bí'i chopa ni benbí' le guyaza ládxé'è xúzibi'?

Bulu'bi'è didza', tē' Jesús:

—Bí'i zí'alō na'.

Ní'irō Jesús rē' légaquié':

—Le nácatē rea' libí'ili', ila'nórué' bönní' uquízaxj tuá' dō', en yugu' nigula udá dzaga ca libí'ili', ate' ila'yázié' ga ní' rinná bē'è Dios. <sup>32</sup> Caní gaca, tu' bidé' Juan, bönní' buquilé' bōnachi nisa, ga zóalí', en busédiné' libí'ili' le naca tsahuí' ca ral-la' gunlí', ate' libí'ili' bití' guyéajlè'èli' lē', pero yugu' bönní' uquízaxj, en yugu' nigula udá dzaga gula'yéajlè'è lē'. Sal-la' bilé'elí' lē ni, bití' bubí'í ládxí'li' para tséajlè'èli' lē'.

**Rucúdzu'è didza' Jesús ca bēngaquié' bönní' huen dxin bití' nácagaquié' tsahuí'**

(Mr. 12:1-12; Lc. 20:9-19)

<sup>33</sup> Gunné' ca' Jesús:

—Bulí'zé nágalí' ia'tú le ucúdzu'a didza'. Guzóé' tu bönní' xan yu'u, ate' bönní' ni budé'è yugu' lubá uva luyú queé'. Guléquié' lē'aj que, en guchó'ōné' tu lerui guiój ga isié' xisi uva na'. Bené' ca' tu yu'u xitsá' ga gaca nu uyú idútē luyú queé'. Ní'irō budōdē luyú na' lu ná'agaquié' bönní' huen dxin, para ila'zi'è quégaquié' gat-saj huéaj, ate' sa'yéajé' yōdzō zí'tu'.

<sup>34</sup> Cate' chibidxín dza ulu'chibé' yugu' lubá uva na', gusól-lè'è bönní' xan luyú na' bal-lé' ní'a nē'è ga na' nacué' bönní' huen dxin ní' para ulu'zi'è lu ná'agaquié' uláz queé'. <sup>35</sup> Ní'irō gula'zōné' bönní' huen dxin na' yugu' ní'a nē'è na'. Guluné' hué' tué', en ia'túé' bēti-gaquié' lē', en ia'túé' bulu'laxé' lē' guiój. <sup>36</sup> Leyúbölō bönní' xan luyú na' gusól-lè'è ca' ia'zica'rē' ní'a nē'è, ate' guláquié' zióntèrē' ca nupa na' gusól-lè'è zí'alō, ate' la' tuz ca guluné' bönní' huen dxin ní' quégaquié'.

<sup>37</sup> Ga yōjsete, gusól-lè'è ca' xzí'iné' ga na' nacué'. Guzá' ládxé'è, rnné': Hualuné' bal bí'i quia'. <sup>38</sup> Cate' yugu' bönní' huen dxin na' bila'lé'ené'-bí' xzí'iné', la' gula'nnatē' la' lé-gacasē': "Bí'i ni guequi queé'bi' luyú ni. Gulí'dá, gútiru'-bí', ate' le ral-la' guequi queé'bi' guequi queé'ru'." <sup>39</sup> Ní'irō gula'zōné'-bí', ate' bulu'béajé'-bí' ní'ílo luyú ga na' rō'gaca lubá uva, ate' bēti-gaquié'-bí' ní'.

<sup>40</sup> Ní'irō Jesús gunábiné' légaquié', gunné':

—Cate' udxiné' bönní' xan luyú na', ¿nacxi guné' qué-gaquié' bönní' huen dxin ní'?

<sup>41</sup> Bulu'bi'è didza' bönní' yudo' na', tē' Jesús:

—Usunítie' bönní' tuá' dō' na', ate' luyú queé' na' udōdē' lu ná'agaquié' ia'zica'rē' bönní' huen dxin, bönní' ilu'è lē' uláz queé' cate' idxín dza ulu'chibé' le.

<sup>42</sup> Ní'irō Jesús gudxé' légaquié':

—¿Naru' catu caz nulábanilí' lē na' nazúaj lu guichi lá'ayi ca naca lē ni? Caní rna:

Guiój na' gula'rú'uné' bönní' tu'cu'è zō'ō, la' guiój ná'asō chinaca guiój len zō'ō.

Lē cazē' Xanru' bené' ga naca caní, ate' naca tu le run ga rubániru'.

<sup>43</sup> Que lē ni na' rea' libí'ili', xilátjalí' ga na' rinná bē'è Dios idúa queé'li', en gata' quégaca bōnachi ilún ca ral-

la' gun nu nadelí' lataj ni'. <sup>44</sup> Nu tsöjchegu' lu guió'j ni, la' cuinsi quítsaj, ate' channö guió'j ni tseajbaga' bönni' na', uzuzxaj lé'.

<sup>45</sup> Cate' yugu' bixúz unná bē', en yugu' bönni' yudo' fariseo bila'yönnē' lē' na' bucúdzu'ē didza' Jesús, téquibe'enē' bē'ē Jesús didza' ca naca quégaquiē'.

<sup>46</sup> Gula'zóa gula'bō'ē ila'zōnē' Jesús, pero guládxinē' bi ilún bönachi zían nacuá' ni' tu' ta'yéajlé' náquiē' Jesús bönni' ru'ē didza' uláz queē' Dios.

### Rucúdzu'ē didza' Jesús ca naca que laní que yöl-la' rut-saga na'

**22** Jesús bé'lenē' légaquiē' didza' leyúbölö, ate' bucúdzu'ē didza', rnnē':

<sup>2</sup> —Ca gaca quégaca nupa ila'yaza ga rinná bē'ē Dios yehua' yubá naca ca guca quégaca nupa bulidzē' tu bönni' rinná bē'ē cate' benē' laní que dza utsaga ná'abi' bí' bönni' queē'. <sup>3</sup> Gusól-lē'ē ní'a nē'ē tsöjxí'gaquiē' yugu' bönni' chinulidzē' para guídagaquiē' laní queébi', pero bití' gulé'ēnē' guídagaquiē'. <sup>4</sup> Ní'irö gusól-lē'ē ia'zica'rē' ní'a nē'ē, en gudxē' légaquiē': "Gulí'tsöjdxitsöca' nupa na' chinulidza', na' guiéli' légaquiē': Bulí'yútsöca', chinupá'a la' huagu. Chibétia'-ba' yugu' xpédxa', en yugu' böa' bēdxi renni' quia'. Yúgu'tē chinupá'a.

Gulí'dá, sóaru' laní queébi' bí' bönni' quia' utsaga ná'abi'." <sup>5</sup> Yugu' bönni' na' yöjlídzagaquiē' bití' gulunē' légaquiē' bal, ate' yöjáquiē' que queégaquiē'. Tu' yö-jenē' dxin, en ia'tué' guyijē' tsöjō'u tsöjéti'ē. <sup>6</sup> Ia'zica'rē' gula'zōnē' yugu' ní'a nē'ē na', ate' gulu'ē dö' qué-gaquiē', en bétgaquiē' légaquiē'. <sup>7</sup> Cate' bönni' na' rinná bē'ē biyönnē' lē' ni, gulénē', en gusól-lē'ē yugu' bönni' queē' röjáquiē' gudil-la, ate' bétigaquiē' yugu' bönni' hueti bönachi na', en bulu'quélé'ē guí' lázagaquiē'.

<sup>8</sup> Ní'irö bönni' na' rinná bē'ē gudxē' yugu' ní'a nē'ē, gunné': "Le nácatē chinupá'a que laní na', pero yugu' bönni' bulidza' bití' guláquiē' lesaca' guídagaquiē' laní quia'. <sup>9</sup> Gulí'tséajtsöca' gapa naca la' nöza, en bulí'lidza yúgu'tē nupa tsöjxáca'li' ni' para guídagaquiē' laní queébi' bí' bönni' quia' utsaga ná'abi'." <sup>10</sup> Ní'irö bila'rúajē' ní'a nē'ē na', söjáquiē' gapa naca la' nöza, ate' bulu'tubē' yúgu'tē nupa yöjxáca'gaquiē', yugu' bönni' dxí'a, en yugu' bönni' tuá' dö', ate' ga na' raca laní bilí'ró bönachi.

<sup>11</sup> 'Cate' guyáziē' bönni' na' rinná bē'ē para uyúē' nupa ni' nudúbigaca, bilé'enē' tu bönni' bití' nácuē' lari' tsahuí' le bunödzejē' quégaquiē' bönni' nacu'ē laní na'.

<sup>12</sup> Ní'irö gudxē' bönni' na': "Bönni'do', ¿zóatso' ni, en bití' nacu' lari' tsahuí' bunödzejā' quégaca nupa nacuá' laní?" Bönni' na' busayaj ru'ē. <sup>13</sup> Ní'irö bönni' na' rinná bē'ē gudxē' nupa na' tun xichinē', gunné': "Gulí'guga' ní'a nē'ē bönni' ni. Gulí'tsöjchú'un-nē' ní'ilö ga na' rö'ö chul-la. Ní' cödxē', en útil-la láyē'ē, lu yöl-la' ruhu'í'ni queē'."

<sup>14</sup> Ní'irö Jesús gudxē' légaquiē':

—Zian nupa nulidza', pero nabábasö nupa ila'rógaca.

### Jesús ru'ē didza' ca naca le riguízxaj lázaru'

(Mr. 12:13-17; Lc. 20:20-26)

<sup>15</sup> Ní'irö yugu' bönni' yudo' fariseo na' bulu'zé'ē ni', ate' gulún xtídzagaquiē' ilunē' ga bi innē' Jesús para gaca ulu'zéguiē' Lē' didza'. <sup>16</sup> Para ilunē' caní, gula'sól-lē'ē bal-lē' bönni' dá'gaquiē' légaquiē', len bönni' dá'gaquiē' Herodes, ga zoē' Jesús, nupa na' gulé' Jesús:

—Bönni' Usedi, nöztu' Lí' ru'u didza' cátēze naca, en naca idútē li ca rusédinu' ca naca queē' Dios, en bití' ru'í' ládzu'u le ta'nná quiu' bönachi, tu' cabí ruchi'a rusöró'u bönachi ca naca le ta'nnasö bönachi na'.

<sup>17</sup> Gudí'xjöi' netu'. ¿Nacxi runi lí? ¿Naru' run bayudxi, o bití' run bayudxi quízxaj laztu' queē' César, bönni' yödzö zítu' na' rinná bé'enē' rē'u?

<sup>18</sup> Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Libí'ilí', bönni' rulu'ísö tsahuí' cuinlí', ¿bizx que ru'í'il-i' didza' le ruzóa neda' ra' guí'a? <sup>19</sup> Bulí'lu'í' neda' dumí le riguízxaj lázalí'.

Ní'irö bulu'lu'ínē' Lē' tu dumí que yödzö Roma.

<sup>20</sup> Jesús gunábinē' légaquiē', rnnē':

—¿Nuzxi lahui da' ni, en nuzxi le nazúaj lē'e dumí ni?

<sup>21</sup> Tē' Lē':

—Queē' César na'.

Ní'irö Jesús gudxē' légaquiē':

—Gulí'guízxjē' César le nequi queē' César, ate' Dios le nequi queē' Dios.

<sup>22</sup> Cate' bila'yönnē' lē' ni, bulu'bábinē' ca naca didza' tsahuí' bubí'ē Jesús, ate' bulu'cá'anē' Lē', söhuóajtē-gaquiē'.

### Ta'nabi yúdxinē' Jesús ca ulu'bán nupa chinátigaca

(Mr. 12:18-27; Lc. 20:27-40)

<sup>23</sup> La' dza ná'asö yugu' bönni' yudo' saduceo, bönni' na' ta'nnē' bití' ulu'bán nupa chinátigaca, bila'dxinē' ga zoē' Jesús, ate' gula'nábinē' Lē', <sup>24</sup> ta'nnē':

—Bönni' Usedi, Moisés gunné': "Channö gátíē' tu bönni' zóanu nigula queē', en cuntu nu bí' zóabi' queē', ní'irö bí' bóchē'ē bönni' na' ral-la' utsaga ná'alēnbí'-nu nigula uzēbi queē', para cabí initi dí'a dza queē' bönni' bóchí'bi' na'." <sup>25</sup> Gula'cuá'abi' gadxi bí' bönni' ga zóatu', naca bóchí'gacabi'. Bí' zí'alö na' but-saga ná'alēnbí'-nu nigula, ate' gútitébi'.

Tu' cuntu nu bí' queébi' zóabi', bí' buropi na' but-saga ná'alēnbí'-nu nigula uzēbi queébi' bí' bóchí'bi' na'. <sup>26</sup> Lē'sca' caní guca queébi' bí' buropi na', enca' queébi' bí' bunni, en la' tuz ca guca quégacabi' igádxitébi', gulátibi' yúgu'tébi'.

<sup>27</sup> Ga búdxité gútinu ca' nigula na'. <sup>28</sup> Cate' idxín dza ulu'bán nupa chinátigaca, ¿núzxilögacabi' bí' gadxi ni' guéquinu nigula na' queébi', tu' bulu'tsaga ná'alēnbí'-nu yúgu'tébi' nigula na'?

<sup>29</sup> Ní'irö bubí'ē didza' Jesús, ate' rē' légaquiē':

—Nachíxili' libí'ilí' tu' cabí réajni'ilí' le nazúaj lu guichi lá'ayi, en tu' cabí núnbē'ēlí' yöl-la' huáca queē' Dios.

<sup>30</sup> Cate' idxín dza ulu'bán nupa chinátigaca, bití'ró gaca yöl-la' rizóalen nigula, en bití' ulu'tsaga ná'agaquiē', pero gácagaquiē' ca ná'agaquiē' gubáz lá'ayi queē'



Dios nacu'ë yehua' yubá. <sup>31</sup> Ca na' ral-la' ulu'bán nupa chinátigaca, ¿naru' cabí nulábanilí' lè na' gudxi cazè' Dios libí'ili? <sup>32</sup> Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabángaquië' sal-la' gulátië'.

<sup>33</sup> Cate' bila'yöni bönachi nacuá' ni' didza' ni, bu-lu'bani ca naca lè na' rusédinë' Jesús léguequi.

### Xibá queë' Dios le naca lo

(Mr. 12:28-34)

<sup>34</sup> Cate' guléquibe'enë' bönni' yudo' fariseo ca benë' Jesús, busayjè ruá'agaquië' bönni' yudo' saduceo, ní'irö bulu'dubë' yúgu'të'. <sup>35</sup> Tuë' bönni' nútsë'ë ládjagaquië', en nazèdë' xibá queë' Moisés, gú'unnë' sí' bë'ë Jesús.

<sup>36</sup> Que lè ni na' gunábinë' Jesús, rnnë':

—Bönni' Usedi, ¿bíxilö xibá queë' Dios naca lo?

<sup>37</sup> Jesús rë' lë':

—Idxi'inu' Xanu' Dios idú ládxi'u, en idú icja ládxi'-do'ó, enca' len idú yöl-la' réajni' quiu'. <sup>38</sup> Xibá ni naca lo, en nazáca'tërö. <sup>39</sup> Xibá na' naca buropi, la' ca nácatë, en caní rna: "Idxi'inu' böchi' luzó'ó ca nadxi'i cuinu'."

<sup>40</sup> Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

### ¿Nuzxi zxi'ini náquië' Cristo?

(Mr. 12:35-37; Lc. 20:41-44)

<sup>41</sup> Tsanni ni' nacu'ë tsözxón bönni' yudo' fariseo na', Jesús gunábinë' légaquië', <sup>42</sup> rnnë':

—¿Nacxi rusáca'li' queéli' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xisóë' David náquië'.

<sup>43</sup> Ní'irö Jesús rë' légaquië':

—¿Bizx que na' lë' cazè' David bulidzë' Lë', gunné': "Xana"? Caní gunné' cate' ni' bë'ë didza' uláz queë' Dios Bö' Lá'ayi, gunné':

<sup>44</sup> Xanru' Dios gudxë' Xana':

"Guró'ö cuita lë'a ibëla, cate' gunra' ga ulu'zachu zxi'bigaca Lo' nupa tequi Lí' zi'."

<sup>45</sup> Channö David na' gunné' queë' náquië' Xanë', ¿nacxi caz naca, rnnali' náquië' zxi'ini xisóë' David na'?

<sup>46</sup> Cuntu nu guca ubí' didza', ate' ga gusí lo dza na', cúnturö nu burugui bi inábini Lë'.

### Jesús ruzéguí'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

**23** Ní'irö Jesús bë'lenë' bönachi nacuá' ni' len yugu' bönni' usëdi queë' didza'. <sup>2</sup> Rë' légaquië':

—Yugu' bönni' yudo' fariseo, en yugu' bönni' yudo' usedi nuhuóázagaquië' xilatjè' Moisés, en tu'sédinë' bönachi. <sup>3</sup> Que lè ni na', guli'gún yúgu'të le ilé' libí'ili', pero bití' gunlí' libí'ili' ca na' tunë' légaquië', tu' tu le ta'nnë', en ia'tú le tunë'. <sup>4</sup> Le ta'nná bé'enë' bönachi naca ca tu yua' zi'i le cabí sequí' nu guá', ate' tu'gu'ë le

ya'zxi'cagaca bönachi, pero légaquië' bití' té'ënnë' ulu'tenë' le, calëga len tuze xibón ná'agaquië'. <sup>5</sup> Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. <sup>6</sup> Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sédë' queë' Dios. <sup>7</sup> Lësca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilé' bönachi légaquië': "Padiux, bönni' usedi."

<sup>8</sup> "Pero libí'ili', bití' ral-la' gunlí' ga nu guí'ë libí'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'tëli' nácali' böchi'li' tulí' ia'tuli'.

<sup>9</sup> Cuntu nu guí'ëli' luyú ni, bití' innali': Xuz, tu' zoa tuz Nu naca Xúziilí', zoë' yehua' yubá. <sup>10</sup> Bití' gunlí' ga nu guí'ë libí'ili': Xan, tu' zoa tuz Nu naca Xanlí', neda', Cristo.

<sup>11</sup> Nu nutsa' ládjalí' nu run xichinlí' ia'zica'röli', nu ni na' gácarö lo ga zóali'. <sup>12</sup> Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

<sup>13</sup> "Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Ruzága'li' nöza söjácálen bönachi para ila'dxín ga ni' rinná bë'ë Dios yehua' yubá. La' libí'isili' bití' sequí' tsú'uli', en bití' ru'í'ili' lataj ila'yú'u nupa té'ëni ila'yú'u.

<sup>14</sup> "Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Rugúali' yugu' lédxigacanu nigula uzébidó', en para ulu'ísö tsahui' cuinli', xidzé rulídzali'-në' Dios. Que lè ni na', zítërö irugu queéli' quí'í sáca'li'.

<sup>15</sup> "Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'. Ridódilí' idú lu nísado', en idú yödzölió ni para gunlí' ga tseaj ládxi'ë tu bönni' Dios tsözxón len libí'ili', en cate' chiguzxéqui'li'-në', runlí' ga nabága'rë' xíguia' ca libí'ili', ate' tsöjtsu'ë lu guí' gabila.

<sup>16</sup> "Bica' bayechi' libí'ili'. Nachul-la lolí', ate' ré'ënilí' ulu'í'ili' nöza bönachi. Caní naca queéli' tu' rnnali': "Channö bi rizí' lu në'ë tu bönni' ni'a que yudo', bití' run bayudxi, pero channö runë' le ni'a que oro dzö'ö yudo', bayudxi gun." <sup>17</sup> Libí'ili', bönni' lo chul-la, en tu' caréajni'í. ¿Bíxilö nácarö lo? ¿Naru' oro na', o yudo' le run lá'ayi oro na'? <sup>18</sup> Lësca' caní rnnali': "Channö nu bönni' gunë' le ni'a que bucugu lá'ayi, bití' gun bayudxi, pero channö gunë' le ni'a que gun zxoa lahui, bayudxi gun."

<sup>19</sup> Libí'ili', nazídili', en nachul-la lolí'. ¿Bíxilö nácarö lo? ¿Naru' gun zxoa láhuisö, o bucugu lá'ayi na' run lá'ayi gun na'? <sup>20</sup> Que lè ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhuisö. <sup>21</sup> Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazè' xilatjè' ni'.

<sup>22</sup> Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazè' Dios rö'ë ni'.

<sup>23</sup> "Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinli'.

Caní naca queé'li' tu' riguixxjali' que yudo' tu cö' huéaj tu' chi cö' le rizí'ili' que xöhuéaj, en que guixí' anís, en que comino la' huagu, pero rucá'analí' le nácarö lo le rinná' bē' xibá' queē' Dios, tu' cabí' runlí' le naca tsahuí', en bití' ruhuéchi' ládxí'li' luzá'alí', en bití' réajlē'ēli'-nē' Dios. Yugu' lē ni run bayudxi gunlí', en lēs bití' ucá'analí' ia'zícá'rö lē na' runlí', le riguixxjali' que yudo'. <sup>24</sup> Libí'ili', nachul-la lolí', en ré'ēnili' ulu'í'ili' nöza bönachi. Ca na' runlí' naca ca rudódili' bödzázdado' le ré'jali', rubéajgacalí'-ba' bö'iyudo', pero ré'jali'-ba' böa' ta'bí'ē'-ba' bönni'.

<sup>25</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahuí' cuinlí'. Nácalí' ca xzíga'do' ré'jali', en yó'öna ráhuili'. Riguíbilí' le nuá' cuita lē'e, pero lu icja ládxí'do'olí' nalí' yugu' le rib-anlí', en yugu' le ruá' dö' runlí'. <sup>26</sup> Libí'ili', bönni' yudo' fariseo lo chul-la. Zí'alö gulí'quibi le nuá' lu xzíga'do', en lu yó'öna, lē na' sa'yéaj gacalí' tsahuí' lu icja ládxí'do'olí', para gacalí' ca' tsahuí' cuita lē'ēli'.

<sup>27</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahuí' cuinlí'. Caní naca queé'li' tu' nácalí' ca yugu' yeru ba quégaca nupa chinátigaca, le nácgaca chiguichido'os cuita lē'e, en le nácatē lachi nalá'gaca, pero nalí'gaca dxita qué-gaca nupa chinátigaca, enca' yúgu'tē le siguti. <sup>28</sup> Lēscá' caní nácalí' libí'ili'. Le nácatē láhuisö rulu'í' cuinlí' tsahuí' lógaca bönachi, pero lu icja ládxí'do'olí' nalí'li' yugu' le rulu'ísö tsahuí' cuini, en le ruá' dö' runlí'.

<sup>29</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahuí' cuinlí'. Ruchísali' biquitaj que ba gapa nagáchi'gaquiē' bönni' gulu'ē didza' uláz queē' Dios, en ruí'ili' biquitaj gapa nagáchi'gaca bönachi tsahuí'. <sup>30</sup> Lēscá' caní rnnalí': "La-tu' zóatu' dza ni'te cate' gula'cu'ē xuz xtó'otu', bití' gun-tu' légaquiē' tsözxón cate' gulútiē' yugu' bönni' gulu'ē didza' uláz queē' Dios." <sup>31</sup> Tu' rnnalí' caní, la' libí'isilí' runlí' ba nalí' nácalí' xzí'ini xí'sóagaca nupa ni' bétigaca yugu' bönni' gulu'ē didza' uláz queē' Dios. <sup>32</sup> Caní naca, rusubaga' cuinlí' xíguia' na' gula'báguie' xuz xtó'olí'.

<sup>33</sup> 'Libí'ili' na', nácalí' ca yugu' bēla sínia', en dí'a dza quégacaba' bēla sínia'. ¿Nacxi caz ulá'li' lu le usaca' zí' libí'ili' lu guí' gabila? <sup>34</sup> Que lē ni na', neda' isól-la'a queé'li' yugu' bönni' ilu'ē didza' uláz queē' Dios, enca' yugu' bönni' ta'yéajni'inē', en yugu' bönni' usedi. Yugu' bönni' ni, bal-lē' gútili'-nē', en ia'zícá'rē' udá'alí' lē'e yaga cruz, en ia'zícá'rē' quinlí' gapa naca lu yu'u ga rudúbili' rusédali' queē' Dios, ate' ulágali' légaquiē' tu ia'tú yödzo. <sup>35</sup> Caní gaca, ibága'li' libí'ili' xíguia' que idútē rön quégaquiē' bönni' tsahuí' le gulalaj luyú, ga gudela' nu bēti Abel, bönni' tsahuí', ga ridxintē nupa bétigaca Zacarías, xzí'inē' Berequías, bönni' na' bétili'-nē' gatsaj láhuil'ö ga dē yudo', en ga dē bucugu lá'ayi ga na' tu'zégui'ē' böa' bédxido' lahuē' Dios. <sup>36</sup> Le nácatē rea' libí'ili', yúgu'tē lē ni ila'baga' bönachi nacua' dza ni zóaru' na'a.

**Jesús ribödxē' ni'a que yödzo Jerusalén**

(Lc. 13:34-35)

<sup>37</sup> Lēscá' caní gunné' Jesús:

—Jerusalén, Jerusalén, libí'ili' na' rútagacali'-nē' bönni' tu'ē didza' uláz queē' Dios, en ruládxí'gacalí' guió'j nupa nasól-lē'ē Dios. Zían luzuí' gú'unida' utuba' libí'ili' quia', ca runba' yöjede, rutúbiba' bórado' queē'ba' zxan xíliba', pero bití' gú'unilí'. <sup>38</sup> Bulí'yútsöca', cá'asö ugá'ana yu'u lídxilí'. <sup>39</sup> Caní gaca, tu' rea' libí'ili', na'a isí lo bití' ulé'eli' neda' cate' inná'röli': "Lá'ayi náquiē' Bönni' na' zē'ē uláz queē' Xanru'."

**Riguixjö'ē Jesús ca sí' ulu'quinnajē' yudo'**

(Mr. 13:1-2; Lc. 21:5-6)

**24** Birúajē' Jesús chila yudo', en tsanni ni' rizé'ē ni', gula'bíguie' bönni' usēda queē' ga na' zoē', ate' bulu'lu'ínē' Lē' ca nácgaca zö'ö nagú'ugaca lē'a yudo'. <sup>2</sup> Bubi'ē didza' Jesús, ate' ré' légaquiē':

—¿Rilé'etseli' yúgu'tē lē ni? Le nácatē rea' libí'ili', bití' ca' ugá'ana guió'j nabaga' luzé'e ni, le cabí' iguinnaj.

**Le ilaca bē' chizóa idxín dza údxi que yödzo'lió**

(Mr. 13:3-23; Lc. 21:7-24; 17:22-24)

<sup>3</sup> Cate' ni' rō'ē Jesús ga naca lu Guí'a Yaga Olivo, bi-la'dxinē' bönni' usēda queē' ga na' zoē' queēzē', en tē Lē':

—Gudí'xjö'i' netu', ¿bátaxi ilaca lē ni, en bizxi gaca bē' dza huödu', en dza údxi que yödzo'lió ni?

<sup>4</sup> Ní'rö bubí'ē didza' Jesús, ate' ré' légaquiē':

—Bulí'yú para cabí' nu sí' ye'e libí'ili', <sup>5</sup> tu' zá'gaquiē' zían bönni' légaquiē' ca lea' neda'. Ila'nnē' nácgacquiē' Cristo, en ila'zí' yé'enē' bönachi zían. <sup>6</sup> Huayónilí' raca gudil-la, en le ruí' didza' que gudil-la, pero bití' có'ölí' böniga, tu' ral-la' ilaca yúgu'tē lē ni, pero cabí' ridxini dza údxi cate' ilácarö lē ni. <sup>7</sup> Til-la tu yödzo len ia'tú yödzo, ate' tu ga nu rinná' bē' len ia'tú ga nu rinná' bē'. Ilatsaj yödzo'hué' zön, en gaca gubín, ate' zían lataj tö-di budó' xzu'. <sup>8</sup> Yúgu'tē lē ni nácgaca le isí lógaca yugu' le ila'guí' ila'zaca' bönachi.

<sup>9</sup> Ní'rö ulu'dödi bönachi libí'ili' lu na' nu usaca' zí' libí'ili'. Yúgu'tē bönachi ulu'dí' libí'ili' tu' dá'alí' neda', en ilútiē' bál-lalí' libí'ili'. <sup>10</sup> Cate' gaca caní, gaca chopa ládx-i'gaca zían bönachi, en ulu'cá'ana neda', ate' udödi tu ia'tú luzé'e, en tu ia'tú udí' luzé'e. <sup>11</sup> Ní'rö ulu'lu'í' ló-gacquiē' zían bönni' ta'zí' yē'ē. Ulu'lu'í' cuíngaquiē' ca yugu' bönni' tu'ē didza' uláz queē' Dios, en ila'zí' yé'enē' bönachi zían. <sup>12</sup> Iluá'ada' dö' bönachi, ate' que lē ni na' bítirö ila'dxí' böchi' luzé'eguequi. <sup>13</sup> Nu guequi tsaz queē' Dios ga idxintē dza údxi, nu ni ulá. <sup>14</sup> Idú yödzo'lió gaca libán que didza' dxí'a ca rinná' bē'ē Dios para gaca ba nalí' que lógaca yúgu'tē bönachi izá'a, ate' ní'rö idxín dza údxi.

<sup>15</sup> 'Nu ulaba lē ni ral-la' uzéajni'í ladxí'. Gunné' Daniel, bönni' bē'ē didza' uláz queē' Dios, gunné': "Tsaza le rudí'inē' Dios lataj lá'ayi queē' Dios, lē na' rusuniti." Cate' ilé'elí' gaca caní, ní'rö nulí' zóalí' luyú Judea ral-la' tsöjxúnajilí' saca' guí'ado'. <sup>17</sup> Nu dxía ícjo'ölö bití' gal-la' huötaj tsöjxí' bi dē que lu yu'u, pero ral-la' izxúnna-jtē. <sup>18</sup> Nu zoa la' guixí', bití' gal-la' huóaj tsöjxí' larí' que. <sup>19</sup> Bica' bayechi' yugu' nigula sí' ulu'zóanu bí'ido' quégacanu, enca' nigula ni' tu'gádxí'nu-bí' bí'ido' quégacanu

cate' idxín dza ní'. <sup>20</sup> Bulí'lidzè' Dios inábili'-nè' cabí idxín dza ní' izxúnnajilí' cate' raca beo' ziaga o cate' naca dza lá'ayi, <sup>21</sup> tu' ila'guí' ila'záca'tèrò bönachi dza ní' ca gu-la'guí' gula'záca' bönachi dza ní'te cate' sí' guta' guró'ö yödžölió, ga ridxintè na'a dza, en calèga dza zá'gaca bití' ila'guí' ila'záca' caní. <sup>22</sup> Cate' idxín dza ní', channö Dios bití' cuéqui lahuè' quégaquiè', cuntu nu ulá, pero cuéqui lahuè' quégaquiè' dza ní', en gácalenè' nupa guró' cazè' Lè'.

<sup>23</sup> 'Ní'irö bití' tséajlè'èlì' channö nu idxín queé'li', en gué libí'ili': "Bulí'yútsöca', ni zoè' Cristo", o inná: "Ní' zoè'." <sup>24</sup> Ulu'luí' lógaquiè' zían bönni' ta'zì' yè'è, en ila'n-nè' nácagaquiè' Cristo, o ila'nnè' tu'è didza' uláz queè' Dios. Ilunè' le ilaca bè', en le ilún ga ulu'bani bönachi, ate' ila'zì' yé'enè' nupa guró' cazè' Dios channö hualazéqui'nè'. <sup>25</sup> Bulí'yútsöca', chigudxi caza' libí'ili' yúgu'tè lè ni zí'atèlò ca sí' ilaca. <sup>26</sup> Que lè ni na', bití' irúajilí' channö ila'dxin queé'li' nupa ilé libí'ili': "Bulí'yútsöca', ní' zoè' Cristo lu lataj cá'asö." Lè'sca' caní, bití' tséajlè'èlì' channö ila'nná: "Bulí'yútsöca', lu yu'u zoè'." <sup>27</sup> Ca na' raca cate' rèpi yösa ga rilén gubidza, en ruzení' ga ribía gubidza, lè'sca' caní gaca cate' huöda' neda', Bönni' Guljè' Bönachi. <sup>28</sup> Ilácatè caní, ca na' ta'n-ná bönachi: "Gátitès ga dè tu le nati, ní' ulu'dubi cáz-aba' bíchulab."

### Ca gaca cate' huödè' Bönni' Guljè' Bönachi

(Mr. 13:24-37; Lc. 21:25-33; 17:26-30, 34-36)

<sup>29</sup> Gunnè' ca' Jesús:

—Tödi yugu' dza ní' cate' ila'guí' ila'záca' bönachi caní, ichul-la gubidza, ate' beo' bití' gunna bení' que. Ila'guí'nnajba' böla'j lúzxiba, ate' ila'z'xízi le nalá'gaca naca tsutsu lúzxiba. <sup>30</sup> Ní'irö ilá' lahui lúzxiba le gaca bè' huöda' neda', Bönni' Guljè' Bönachi, ate' ila'bödxi yechí' yúgu'tè bönachi yödžölió ni, cate' ila'lé'e neda', Bönni' Guljè' Bönachi, suzá'a lu böaj lúzxiba, dè lu na'a yöl-la' unná bè', en yöl-la' huáca zxön. <sup>31</sup> Ní'irö isól-la'-gaca'-nè' gubáz lá'ayi quia'. Ulu'cödxè' zidzaj lúzuba' böa' guixí', ate' ulu'tubè' nupa nabó'a quia', nacua' idapa la'atè yödžölió, en yúgu'tè lataj zxan lúzxiba.

<sup>32</sup> 'Bulí'zéajni' l'í' l'ádxilí' le rusedi libí'ili' le raca que yaga higo. Cate' ta'lén ní'a nè'e yúludo', en chirubía xilagui' yúludo', inózilí' chizóa idxín cusubá. <sup>33</sup> Lè'sca' caní, cate' ilé'elí' taca yúgu'tè lè ni, inózilí' chizóa idxín dza údxi na', en chiridzaga lahui. <sup>34</sup> Le nácatè rea' libí'ili', yúgu'tè lè ni ilaca zí'atèlò ca ilátigaca bönachi nacua' dza ní'. <sup>35</sup> Huadödi quégaca lúzxiba, en luyú ni, pero yugu' xtídzá'a bití' ila'dödi cá'asö.

<sup>36</sup> 'Cate' idxín dza ní' cuntu nu nözi. Bití' nózguequinè' gubáz lá'ayi queè' Dios nacua' yehua' yubá, en bití' nöz-da' neda', Zxí'inè' Dios, pero tuzè' Dios Xuz nózine'.

<sup>37</sup> 'Ca na' guca dza cate' ní' zoè' Noé, lè'sca' caní gaca cate' huöda' neda', Bönni' Guljè' Bönachi. <sup>38</sup> Yugu' dza ní' zí'atèlò ca sí' idxín nisa guió'j le busuniti yödžölió, gulè'aj gulahuè', bulu'tsaga ná'agaquiè', en bulu'dödè' zxí'iní'gaquiè' lu yöl-la' rutsaga na' ga bidxintè dza guyáziè' Noé lè'e barco zxön ní' benè', <sup>39</sup> en bití' gulé'quibe'enè' cate' bidxintè nisa guió'j le busuniti

yödžölió, ate' gula'ní'tiè' yúgu'tè'. Lè'sca' caní gaca cate' sí' huöda' neda', Bönni' Guljè' Bönachi, cuntu nu gué'quibe'e. <sup>40</sup> Dza huöda' ila'cu'è chopè' bönni' la' guix-i'. Tuè' uchè'a-nè' quia', ate' ia'túé' ucá'ana'-nè'.

<sup>41</sup> Ila'cuá'anu chópanu nigula nacua'anu huètu. Tunu uchè'a-nu quia', ate' ia'tunu ucá'ana'-nu.

<sup>42</sup> 'Bulí'subán l'ádxilí' tu' cabí nózilí' bizxi dza huöda' neda', Xanlí'. <sup>43</sup> Na'a, guli'tséajni' lè ni. La'tu' nózine' xan yu'u bizxi dza guídè' gubán, huané'è yèla, en bití' gu'è lataj nu quidaj zö'ö para cuan le dzö'ö lidxè'.

<sup>44</sup> Que lè ni na', bulí'subán l'ádxilí' ca' libí'ili', tu' huöda' neda', Bönni' Guljè' Bönachi, tu dza bití' nuzóa icjalí'.

### Bönni' huen dxin tsahui', en bönni' huen dxin bití' náquiè' tsahui'

(Lc. 12:41-48)

<sup>45</sup> Gunnè' ca' Jesús:

—¿Nuzxi caz bönni' huen dxin náquiè' tsahui', en réa-jní'inè', bönni' huen dxin na', xanè' cu'è lu nè'è bönachi nacua' lidxè' para gu'è le ilágugaca cate' idxín dza?

<sup>46</sup> Bica' ba bönni' huen dxin na' náquiè' tsahui', bönni' na', cate' udxiné' xanè', uduxáquiè' lè' caní runè' le nudödè' xanè' lu nè'è. <sup>47</sup> Le nácatè rea' libí'ili', yúgu'tè lè dè queè' xanè', udödè' lu nè'è bönni' huen dxin na' runè' caní. <sup>48</sup> Channö huóáquiè' bönni' huen dxin queè' huiá' dö', en sa' l'ádxè'è, innè': "Huadzenè' xana', en bití' huódatiè'", <sup>49</sup> en channö isí lahuè' gundè' zì' bönni' túnlènè' lè' tsözxön dxin, en isí lahuè' ca' guí'aj gágulenè' nupa ta'zudxi, <sup>50</sup> ní'irö huödè' xanè' bönni' huen dxin na' tu dza cate' bití' zoè' ribözè', o tu yèla bití' réquinè'. <sup>51</sup> Ní'irö xanè' na' usaca' zí'dè'è bönni' huen dxin na', en gunè' ga gaca queè' ca na' ral-la' gaca quégaca nupa tu'lu'ísö tsahui' cuínguequi. Ní'irö cödxí yeché'è, en gagu zxea láyè'è.

### Rucúdzü'è didza' Jesús ca naca quégacabi' chibi' bí' nigula ra'bando'

<sup>25</sup> Gunnè' ca' Jesús:

—Ca gaca quégaca nupa ila'yaza ga rinná bè'è Dios yehua' yubá naca ca guca quégacabi' chibi' bí' nigula ra'bando'. Gula'z'í'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga nè'è.

<sup>2</sup> Gáyu'bí' nácagacabi' bí' bití' ta'yéajni'ibi' ate' ia'gáyu'bí' nasína'gacabi'. <sup>3</sup> Yugu' bí' nigula bití' ta'yéajni'ibi' na' gula'z'í'ibi' le nuá'gaca guí' quégacabi' pero bití' guluá'abi' ia'lati' za régui. <sup>4</sup> Yugu' bí' sina' na' guluá'abi' za régui lu bóga'do' quégacabi' len le nuá'gaca guí' quégacabi'. <sup>5</sup> Tu' gudzenè' bönni' utsaga nè'è, gudödi yèla lógacabi', en gulásitèbi'. <sup>6</sup> Cate' bidxín idú guluhuèla, biyön chí'í nu rinné zidzaj, rna: "¡Chizé'è bönni' utsaga nè'è! ¡Gulí'rúaj tsöjtságali'-nè'!" <sup>7</sup> Ní'irö gula'yásabi' yúgu'tèbi' bí' nigula na', ate' bulu'pá'abi' le nuá'gaca guí' quégacabi'. <sup>8</sup> Gulu'í'ibi' didza' bí' bití' ta'yéajni'ibi' na', en gulèbi' yugu' bí' sina' na': "Gulí'gunna queétu' l'átí'do' za régui queé'li' tu' tu'úlu le nuá'gaca guí' queétu' ni." <sup>9</sup> Bulu'bí'ibi' didza' bí' sina' na', gula'nnabi': "Bití' gaca, tu' cabí bi ugá'ana queétu', en queé'li'. Gulí'tséajtsöca' ga ridó'o za régui, tsójó'uli'

queé'li'." <sup>10</sup> Tsanni ní sōjácabí' sōjxí'gacabí' le, bidxiné' bōnní' utsaga nē'ē. Yugu' bí'i na' nacuá'abí' sina', en ta'bózbabí' lē' gula'yú'ulentēbí' lē' ga na' raca laní que ut-saga na', atē' la' guyáyajtē yu'u. <sup>11</sup> Gudōdi ní ia'zī-ca'rōbī' bí'i nigula ra'bando' na' bila'dxinbí' ní, atē' bu-lu'lídzabí'-nē', en gula'nnabí': "Xan, Xan, gusalaj queé-tu'." <sup>12</sup> Lē' bubí'ē didza', rnnē': "Le nácatē rea' libí'ili', bití' nōzda' gazxi libí'ili'."

<sup>13</sup> Ní'irō Jesús gudxē' légaquiē':

—Bulí'subán lādxi'li', tu' cabí' nōzili' bizxi dza o bizxi yēla huōda' neda', Bōnní' Guljē' Bōnachi.

#### Rucúdzu'ē didza' Jesús ca naca que dumí zaca'

<sup>14</sup> Gunné' ca' Jesús:

—Ca gun Nu na' rinná bē' yehua' yubá naca ca benē' tu bōnní', chizóa tsejē' zítu'. Bulidzē' yugu' bōnní' huen dxin queē' en gulu'ē yugu' le dē queē' lu ná'agaquiē'.

<sup>15</sup> Tuē' bōnní' huen dxin na', gulu'ē gayu' dumí nazaca' lu nē'ē. Ia'túē' gulu'ē tu dumí nazaca' lu nē'ē. Tu tuē' gulu'ē lu nē'ē tsca huéaj le ila'zéqui'nē'. Ní'irō la' guzá'atē' ga naca zítu'. <sup>16</sup> Guyijē' bōnní' huen dxin na' guzxi'ē gayu' dumí nazaca' na', en yōjtíljalenē' le ia'gayu' dumí nazaca'. <sup>17</sup> Lē'sca' caní, bōnní' na' guzxi'ē chopa dumí na', yōjtíljalenē' le ia'chopa ca'. <sup>18</sup> Bōnní' na' guzxi'ē tu dumí guyijē', en yōjchō'ōnē' lu yu, atē' bucáchē'ē dumí queē' xanē' lu yu ní'.

<sup>19</sup> Cate' chigudzé, budxinē' xángaqiē' bōnní' huen dxin na', atē' bucá'analē' légaquiē' tsahuí'. <sup>20</sup> Ga gusí lo bidxintē' bōnní' na' guzxi'ē gayu' dumí nazaca' na', en sunu'ē ia'gayu' dumí ca', atē' rē' xanē': "Xan, gayu' dumí gulú'u lu na'a. Ni dē ia'gayu' dumí ca' yōjtíljalēna' le." <sup>21</sup> Xanē' na' rē' lē': "Naca dxí'a. Nacu' huen dxin tsahuí'. Tsáhú'ido' benu' cate' ni dē lu no'o látí'do'os. Na'a yēnní'tērō cu'a lu no'o. Guyaza ga zoa', udzē-jalenu' neda'." <sup>22</sup> Gudōdi ní bidxinē' ca' bōnní' huen dxin na' guzxi'ē chopa dumí nazaca', atē' rnnē': "Xan, chopa dumí gulú'u lu na'a. Ni dē ia'chopa dumí ca' yōjtíljalēna' le." <sup>23</sup> Ní'irō xanē' na' rē' lē': "Naca dxí'a. Nacu' huen dxin tsahuí'. Tsáhú'ido' benu' cate' ni dē lu no'o látí'do'os. Na'a, yēnní'tērō cu'a lu no'o. Guyaza ga zoa', udzējalenu' neda'." <sup>24</sup> Ní'irō cate' bidxinē' bōnní' huen dxin na' guzxi'ē tu dumí nazaca' na', rnnē': "Xan, nōzda' nacu' bōnní' bizxaj, tu' rulapu' ga bití' guzu', en rutubu' ga bití' guchilju'. <sup>25</sup> Que lē' ni na' gúdxida' lí, atē' guyija', yōjcácha'a dumí quiu' lu yu. Ni dē na'a le nequi quiu'." <sup>26</sup> Ní'irō bubí'ē didza' xanē', en rē' lē': "Nacu' huen dxin bití' naca tsahuí', en xōhuēdi. Nōz quézinu' rulapa' ga bití' guza', en rutuba' ga bití' guchilja'. <sup>27</sup> Que lē' ni na', gácarō dxí'a quiu' la'tu' bunōdzju' dumí quia' lu ná'agaquiē' bōnní' ulu'gunē' le dxin, ila'guíljalenē' le ia'latí', para cate' huōda' neda', uzi'a le nequi quia' len icja ca'." <sup>28</sup> Ní'irō xanē' na' gudxē' nupa nacuá' ní':

"Gulí'cúa dumí na' dē lu nē'ē bōnní' ní, en gulí'cú'u le lu nē'ē bōnní' na' dē queē' chi dumí." <sup>29</sup> Nútí'tēs nu rugún tsahuí' dxin le dē queē', zoa nu unōdzaj queē' ia'latí', atē' gátá'da' queē', pero nu na' bití' rugún tsahuí' dxin le dē lu nē'e, la's dui le dē queē' idúa. <sup>30</sup> Na'a, bōnní'

huen dxin bití' naca tsahuí' ní, gulí'tsōjchú'una-nē' ní'ilo ga naca chul-la. Ní' cōdxi yéché'ē, en gagu zxea láyē'ē.

#### Cristo uchí'a usōrōē' quégaca bōnachi

<sup>31</sup> Gunné' ca' Jesús:

—Cate' ní huōda' neda', Bōnní' Guljē' Bōnachi, idinná bē'a, atē' dzágagaquiē' neda' yúgu'tē gubáz lá'ayi quia', ní'irō cō'a lataj tsahuí' quia', ga na' uchí'a usōrō'a' qué-gaca bōnachi. <sup>32</sup> Ulu'dubi dērō lahua' neda' bōnachi yōdzōlió ní, atē' ucu'a léguequi tsōlá'a huéaj ca runē' bōnní' uyú bō'cu' zxila', rucu'ē-ba' tsōlá'a huéajba' yugu' chivo, en yugu' bō'cu' zxila'. <sup>33</sup> Yugu' bō'cu' zxila' na' ucu'ē-ba' cuita lē'ē ibēla, atē' yugu' chivo na' ucu'ē-ba' cuita lē'ē yōgōla. <sup>34</sup> Ní'irō, neda', bōnní' unná bē', guía' nupa nacuá' cuita lē'a ibēla, inní'a: "Gulí'dá ga zoa', libí'ili' bubéajē' Xuzá' libí'ili' quez queē'. Nequi queé'li' lataj ga na' rinná bē'ē, lē' na' bupé'ē queé'li' dza ní'te cate' ní' benē' yōdzōlió. <sup>35</sup> Caní nequi queé'li' tu' guduna', atē' bēnnalí' le gudahua'. Gubidxa' nisa, atē' bēnnalí' le gu'a. Guca' ca tu bōnní' ridá zítu', atē' gulú'ulí' neda' lídxili'. <sup>36</sup> Biyadzaj le gácu'a, atē' bugáculí' neda' le ráculí'. Gū'ida', atē' buduyúli' neda'. Guyu'a lidxi guíē, atē' buduyúli' neda'." <sup>37</sup> Ní'irō ulu'bi'ē didza' bōnní' tsahuí' na', ilē' neda': "Xan, ¿bátaxi bilé'etu' Lí' gudunu', atē' bugágutu' Lí'? ¿Bátaxi gubidxu', atē' bēnnatu' le gu'u? <sup>38</sup> ¿Bátaxi bilé'etu' Lí' gudó' zítu', atē' gulú'utu' Lí' lídxitu'? ¿Bátaxi biyadzaj le gacu', atē' bugácutu' Lí' le rácutu'? <sup>39</sup> ¿Bátaxi bilé'etu' Lí' gū'ínu', o guyú'u lidxi guíē, atē' buduyútu' Lí'?" <sup>40</sup> Ubi'a didza' neda', bōnní' unná bē', atē' guía' légaquiē': "Le nácatē rea' libí'ili', tu' benlí' caní queē' nu bōnní' bócha'ado' ní, sal-la' náquiē' bōnní' cá'asō, quia' neda' caz benlí' ca'." <sup>41</sup> Ní'irō guía' nupa nacuá' cuita lē'a yōgōla, inní'a: "Gulí'cuíta ga zoa', libí'ili' na' nabága'li' xíguia', tsōjt-sázalí' lu guí' na' bití' ulu, lē' na' bupé'ē Dios ní'a que tu' xihuí', en quéguequi gubáz dá'gaca le. <sup>42</sup> Caní gaca queé'li' tu' guduna', atē' bití' bēnnalí' le gahua'. Gubidxa' a' nisa, atē' bití' bēnnalí' le guí'ja'. <sup>43</sup> Guca' ca bōnní' ridé' zítu', atē' bití' gulú'ulí' neda' lídxili'. Biyadzaj le gácu'a, atē' bití' bugáculí' neda' le ráculí'. Gū'ida', enca' guyu'a lidxi guíē, atē' bití' buduyúli' neda'." <sup>44</sup> Ní'irō ila'nná ca' nupa na', ilē' neda': "Xan, ¿bátaxi bilé'etu' Lí' gudunu', o gubidxu', o gucu' ca bōnní' ridé' zítu', o biyadzaj le gacu', o gū'ínu', o guyú'u lidxi guíē, atē' bití' gúcalentu' Lí'?" <sup>45</sup> Ní'irō ubi'a didza' neda', bōnní' unná bē', guía' légaquiē': "Le nácatē rea' libí'ili', tu' cabí' bi benlí' que tu nu nutsa' ladaj nupa nacuá' ní, sal-la' naca cá'asō nu na', bití' bi benlí' quia' neda'." <sup>46</sup> Ní'irō bōnachi tuá' dō' na' la' tsōjtsázagacatē ga ní' ila'guí' ila'záca'ti-ca'sō, pero bōnachi tsahuí' ní' gata' yōl-la' na'bán idú quéguequi.

#### Tun xtídza'gaquiē' bōnní' yudo' ila'zōnē' Jesús

(Mr. 14:1-2; Lc. 22:1-2; Jn. 11:45-53)

**26** Cate' budxi bē'ē Jesús yugu' didza' ní, gudxē' yugu' bōnní' usēda queē', <sup>2</sup> rnnē':

—Nöz quézili' ia'chopa dza idxín Laní Pascua, ate' dza na' neda', Bönni' Guljé' Bönachi, ulu'dödé' neda' lu ná'agaca nupa ulu'dá' neda' lè'e yaga cruz.

<sup>3</sup> Ní'irö bila'dxiné' yugu' bixúz unná' bē' len yugu' bönni' judó' usedi, en bönni' gula tu'zéajni'iné' bönachi judío, ate' bulu'dubé' ga naca lö'a lidxi bixúz lo, lè' Caifás. <sup>4</sup> Ni' gulún xtídza'gaquié' ila'zöné' Jesús, lu yöl-la' rizí' yé' quégaquié', para ilútié' Lè'. <sup>5</sup> Ta'nné':

—Biti' gunru' lè ni dza laní, para cabí ila'dzatsa bönachi.

### Tu nigula rigú'unu le rilá' zxixi icjé' Jesús

(Mr. 14:3-9; Jn. 12:1-8)

<sup>6</sup> Cate' ní' zoé' Jesús lu yödzo Betania lu yu'u lidxé' Simón, bönni' na' gü'iné' hué' nudzu' ruzödi, <sup>7</sup> bidxinnu cúdzu'lé' Jesús tu nigula, nuá'anu tu bóga'do' néquini guió'j nazaca', en yudzu tu le rilá' zxixi le nazaca'da', ate' gulú'unu le icjé' Jesús cate' ní' rö'è rahué'. <sup>8</sup> Cate' bila'lé'ené' bönni' uséda queé' Jesús lè ni, gula'lené', ta'nné':

—¿Bizx que réqui ditaj lè ni? <sup>9</sup> Guca nu guti' lè ni, en sí' dumí zían para gácalenru' yugu' bönachi yechi'.

<sup>10</sup> Cate' biyönné' Jesús lè ni, ré' légaquié':

—¿Bizx que rnnéli' queénu nigula ni? Tshui' naca le bennu quia'. <sup>11</sup> Yugu' bönachi yechi' ila'cuá'lentica'sö libí'ili', pero neda' bití' ugá'analentica'sa' libí'ili'. <sup>12</sup> Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. <sup>13</sup> Le nácaté rea' libí'ili', gátitès luyú yödzülió ga gaca libán que didza' dxí'a ni, lèsca' ila'guixjé' bönachi le bennu nigula ni quia' para nu tsöjné lènu.

### Rizí' lu në'è Judas udödé' Jesús lu ná'agaquié' bönni' unná' bē'

(Mr. 14:10-11; Lc. 22:3-6)

<sup>14</sup> Ní'irö guyijé' Judas Iscariote ga na' nacu'è bixúz unná' bē'. Náquié' bönni' dzáquié' chinnuè' na' dá'gaquié' Jesús, <sup>15</sup> ate' gudxé' légaquié':

—¿Bizxi gúnnali' quia' channö neda' udöda'-né' Jesús lu ná'alí'?

Bulu'gá'analéné' lè' tshui' ilu'è lè' chi uruá' dumí plata. <sup>16</sup> Ní'irö gúsí lahué' Judas na' risí ribö'è udödé' Jesús lu ná'agaquié'.

### Le ráguru' le rusá' ládxi'ru' ca gútié' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Cate' naca dza risí lo laní quégaquié' bönni' judío cate' tahué' yöta xtila le cabí nazí'i cúa zi que, gula'bígui'è bönni' uséda queé' Jesús ga zoé', en tē' Lè':

—¿Gazxi ré'ènu' tsöjpa'atu' queéru' para gáguru'-ba' bö'cu' xzíla'do' dzö' Laní Pascua?

<sup>18</sup> Jesús ré' légaquié':

—Guli'tséajtsöca' yödzo ní' ga na' zoé' tu bönni', en guli'guié': "Bönni' rusédiné' netu' rnné': Chizá' gala' dza quia'. Lu yu'u lidxu' gágulengaca'-né' bönni' uséda quia' bö'cu' xzíla'do' dzö' Laní Pascua."

<sup>19</sup> Ní'irö guluné' bönni' uséda queé' ca na' gunná bé'ené' Jesús légaquié', ate' bulu'pé'è le ilahué' dzö' Laní Pascua.

<sup>20</sup> Cate' chigudzó' dza na', Jesús guró'lené' idxínnuté' bönni' uséda queé' tahué'. <sup>21</sup> Tsanni ní' tahué', Jesús ré' légaquié':

—Le nácaté rea' libí'ili', tu nu nutsa' ladjali' ni udödi neda'.

<sup>22</sup> Ní'irö bulu'hu'ini ládxi'gaquié', en gula'nábiné' Jesús tu tué', ta'nné':

—Xan, ¿naru' neda'?

<sup>23</sup> Bubi'è didza' Jesús, rnné':

—Bönni' ni runé' në'è tsözxón len na'a lu yó'öna, bönni' ni udödé' neda'. <sup>24</sup> Le nácaté neda', Bönni' Guljé' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxí'a queé' bönni' na' la' cabí guljé'.

<sup>25</sup> Ní'irö bubi'è didza' Judas, bönni' na' udödé' Jesús, rnné':

—Bönni' Usedi, ¿naru' neda'?

Jesús ré' lè':

—Ön, lí' na'.

<sup>26</sup> Tsanni ní' tahué', gudélé'è Jesús yöta xtila, en gudxé' Dios: "Xclenu'." Ní'irö buzxuzxjé' le, en bunödzejé' quégaquié' bönni' uséda queé', rnné':

—Guli'sí', guli'gagu. Lè ni le naca caza'. Ca bena' que yöta xtila ni rulu'í ca gaca que le naca caza'.

<sup>27</sup> Gudélé'è ca' tu xzíga'do', en gudxé' Dios: "Xclenu'." Ní'irö bunödzejé' ca' quégaquié', rnné':

—Guli'gui'aj yúgu'téli'. <sup>28</sup> Lè ni rulu'í ca naca xichöna' le run tsutsu didza' cubi rucá'ana tshui'. Xichöna' na' ilalaj ní'a quégaca bönachi zían para gaca uniti lahué' Dios yugu' dul-la' nabága'gaquié'. <sup>29</sup> Rea' ca' libí'ili', bítirö guí'ja' xisi le ribía lubá uva ni cate' idxinrö dza ní' guí'jalena' libí'ili' tu le cubi ga ní' rinná bē'è Xuza'.

### Jesús rnné' inné' Pedro bití' núnbē'è Lè'

(Mr. 14:26-31; Lc. 22:31-34; Jn. 13:36-38)

<sup>30</sup> Cate' budxi gulúl-lè' yöl-la' ba queé' Dios, yöjáquié' lu Guí'a Yaga Olivo. <sup>31</sup> Ní'irö Jesús ré' légaquié':

—Yúgu'téli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rna: "Guna' ga gátie' Bönni' Uyú Bö'cu' Xzíla', ate' ilási-lasiba' bö'cu' xzíla' na'." <sup>32</sup> Cate' ubana' lu yöl-la' guti, ní'irö tséaja' tsöjnrúa' lolí' saca' luyú Galilea.

<sup>33</sup> Ní'irö bubi'è didza' Pedro, en ré' Jesús:

—Sala' ilaca chopa ládxi'gaquié', en ulu'cá'ané' yúgu'té' Lí', neda' bití' gaca chopa ládxa'a, bití' ucá'ana Lí'.

<sup>34</sup> Jesús gudxé' lè':

—Le nácaté rea' lí', na'a dzö' ni, cate' sí' códxilöba' böra, lí' innó' tsonna luzuí bití' núnbē'u neda'.

<sup>35</sup> Ní'irö Pedro gudxé' Jesús:

—Sal-la' gátilentea' Lí', bití' ca' innía' bití' núnbē'a Lí'. Lèsca' caní gula'nné' yúgu'té bönni' uséda queé'.

**Jesús rulidzë' Dios la' yëla Getsemaní**

(Mr. 14:32-42; Lc. 22:39-46)

<sup>36</sup> Ní'irö Jesús bidxínlenë' légaquië' la' yëla Getsemaní, atë' gudxë' yugu' bönni' usëda queë' na', rnnë':

—Guli'cò'tsöca' ni tsanni tséaja' ia'lati' ní'ilo, tsöjlidza'-në' Dios.

<sup>37</sup> Jesús guchë'ë Pedro len iropë' xzí'inë' Zebedeo, atë' gusi lahuë' ruhuí'innë', en risëbi lãdxë'ë. <sup>38</sup> Ní'irö Jesús gudxë' légaquië':

—Ruhuí'ini lãdxa'a, en huáti caza' lu yöl-la' risëbi lãdxi'. Guli'gá'ana ni, en guli'ná' yëla tsözxón len neda'.

<sup>39</sup> Gudödë' Jesús ia'látido' ní'ilo, atë' ni' biyéchuë'.

Busudxín lahuë' lu yu, en bulidzë' Dios, gunné':

—Xuza', channö huáca, ben ga bití' gun bayudxi qui'i saca'a lë ni, calëga ca ré'ënda' neda', pero ca ré'ënu' Lí' gunu'.

<sup>40</sup> Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', atë' rë' Pedro:

—¿Naru' cabí gúcatsö iná'alenu' neda' tsözxón yëla tu chí'ido'? <sup>41</sup> Guli'ná' yëla, en buli'lidzë' Dios inábili'-në' gácalenë' libí'ili', para cabí gü'ili' Satanás tu' xihui' lataj sí' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queéli' nacuí'dí'li'.

<sup>42</sup> Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga bití' qui'i saca'a lë ni, ben ca raza lãdxu'u Lí'.

<sup>43</sup> Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'. <sup>44</sup> Ní'irö bucá'anë' Jesús légaquië', atë' guyijë' leyúbölö, en bulidzë' Dios le bunni luzuí, atë' tuz ca gunné' zí'alö rnnë'. <sup>45</sup> Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö lãdxi'li'? Buli'yútsöca', chibudzaga lo. Neda', Bönni' Guljë' Bönachi, chinadóda' lu ná'agaquië' bönni' dul-la'. <sup>46</sup> ¿Guli'chasa, uyéajru'! Buli'yútsöca', bönni' na' rudödë' neda' chibidxinë' ni.

**Ta'ché'ë Jesús nadzunë'**

(Mr. 14:43-50; Lc. 22:47-53; Jn. 18:2-11)

<sup>47</sup> Tsanni ní' ru'ë Jesús didza' ni, Judas, bönni' nabábalenë' idxínnutë' na', la' bidxintë' ní', atë' dzáagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasól-la'gaquië' légaquië'.

<sup>48</sup> Judas, bönni' na' rudödë' Jesús, chibulu'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

<sup>49</sup> Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. <sup>50</sup> Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', atë' gula'zönë' Jesús.

<sup>51</sup> Tuë' bönni' dzáguie' Jesús gulecjë' guíë tuchi' queë', en benë' huë', guchúguië' guídí náguie' bönni' huen dxin queë' bixúz lo. <sup>52</sup> Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca. <sup>53</sup> ¿Naru' cabí nózin-u' huáca ulidza' Xuza', atë' Lë' la' isól-la'të' zióntërö ca chinnu cö' gubáz lá'ayi le naca zían gáyu'ë tu cö' huéaj? <sup>54</sup> Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

<sup>55</sup> Ní'irö Jesús gudxë' yugu' bönni' ní':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero bití' guzxönli' neda'. <sup>56</sup> Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zúnnajë' ní'.

**Ridxinë' Jesús lógaquië' bönni' yudo'**

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ní'irö yugu' bönni' na' zóngaqüie' Jesús gula'ché'ë Lë', atë' bila'dxinë' lahuë' Caifás, bixúz lo, ga ní' nudúbi-gaquië' ca' yugu' bönni' yudo' usedi len bönni' gula tu'zëajni'inë'. <sup>58</sup> Pedro söjnáhuë' Jesús zítu' zítu'sö, en bidxinë' ga naca lö'a lidxi bixúz lo na', para ilé'enë' nacxi utságuie' Jesús.

<sup>59</sup> Yugu' bixúz unná bë' len bönni' gula tu'zëajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' sí' yë'ë bönni' na', para gaca ila'chúguie' queë' gátië'. <sup>60</sup> Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', atë' lu yöl-la' rizí' yë' quégaquië' gula'nnë' queë', <sup>61</sup> ta'nnë':

—Bönni' ni gunné': "Huaca uquínajaj' yudo' queë' Dios, atë' uchisa' le ia'tsonna dzasö."

<sup>62</sup> Ní'irö guzúnë' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë ni ta'nnë' bönni' ni quiu'?

<sup>63</sup> Jesús bití' bi gunné'. Ní'irö bixúz lo gudxë' Lë':

—Ní'a queë' Xanru' Dios ban rinná bé'eda' Lí' quíxjö'u le nácatë. Gudíxjö'i netu' channö nacu' Lí' Cristo, Xzí'inë' Dios.

<sup>64</sup> Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ní' dë lu na'a yöl-la' unná bë', atë' guída' lu böaj lúzx-iba, en idxina' ga zóali'.

<sup>65</sup> Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zí'ë bönni' ni queë' Dios! ¿Núzxirö naquíniru' nu innë' queë' bönni' ni? Chibiyón quézili' didza' zí' bë'ë queë' Dios. <sup>66</sup> ¿Nacxi rusáca'li' queéli'?

Bulu'bi'ë didza', gula'nnë':

—Nabáguë'ë xíguia' gátië'.

<sup>67</sup> Ní'irö bulu'chejë' zöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', <sup>68</sup> en të' Lë':

—¿Nácatsö' Lí' Cristo? Gunnëya'atsöca' na'a, ¿nuzxi na' gudapa' Lí'?

**Pedro rnnë: "Biti' núnbë'a-në' Jesús"**

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Tsanni ni' gulaca lë na', rö'ë Pedro ló'alö, ate' bidx-innu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

<sup>70</sup> Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

<sup>71</sup> Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

<sup>72</sup> Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni.

<sup>73</sup> Íá'láti'do'os gudzé, gula'biga' nupa nacuá' ni' ga na' zoë' Pedro, en tē' lë':

—Le nácatē' li' nunu' ca' tsözxón légaquië' tu' naca bē'u yöl-la' ru'isö quiu' didza'.

<sup>74</sup> Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' ni.

La' náasö gurödxitëba' böra. <sup>75</sup> Ní'irö yöjnenë' Pedro didza' gudxë' Jesús lë', gunné': Cate' si' códxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en gurödxí yéchi'dë'ë.

**Tu'dödë' Jesús lu në'ë Pilato**

(Mr. 15:1; Lc. 23:1-2; Jn. 18:28-32)

**27** Cate' za' rení' dza na', gulún xtídza'gaquië' yúgu'të bixúz unná bē' len bönni' gula tu'zëa-jni'inë' bönni' judío para ilútië' Jesús. <sup>2</sup> Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bē'ë uláz que yödzö Roma.

**Ratië' Judas**

<sup>3</sup> Cate' chinózinë' Judas, bönni' na' budödë' Jesús lu náagaquië' bönni' judo', narugu queë' Jesús gátië', buí'innë', ate' yöju'ë chi uruá' dumí plata na' lu náagaquië' bixúz unná bē', en yugu' bönni' gula na'. <sup>4</sup> Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö tē' lë':

—Biti' gun lë ni ga có'ötu' böniga. Le ben cazu' li' na'.

<sup>5</sup> Ní'irö gurú'unë' Judas yugu' dumí plata na' ga naca chila judo', ate' buzë'ë ni', en yöjsí yenë'.

<sup>6</sup> Bulu'zì'ë bixúz unná bē' yugu' dumí plata na', ta'n-në':

—Biti' sa'yéaj cú'uru' dumí ni ga rigú'uru' dumí que judo', tu' naca lazxjë' tu bönni' ratië' bönachi.

<sup>7</sup> Ní'irö gulún xtídza'gaquië', ate' guláuinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zítu'. <sup>8</sup> Que lë ni na', ga ridxintë na'a dza nazí' le lataj na', La' Yëla Rön. <sup>9</sup> Caní guca ca na' gunné' Jeremías, bönni' bē'ë didza' uláz queë' Dios, gunné': "Gula'guélë'ë chi uruá' dumí plata na', tsca le gula'zëqui'në' bönni' Israel Lë', <sup>10</sup> ate' dumí na'

guláuinë' la' yëla queë' tu bönni' huen rö'ö. Lë ni bulú'inë' Xana' neda'."

**Ridxinë' Jesús lahuë' Pilato**

(Mr. 15:2-5; Lc. 23:3-5; Jn. 18:33-38)

<sup>11</sup> Cate' bulu'sudxinë' Jesús lahuë' Pilato, bönni' na' rinná bē'ë uláz que yödz Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rno'.

<sup>12</sup> Cate' yugu' bixúz unná bē' len bönni' gula tu'zëa-jni'inë' bulu'zëguië' Jesús didza', bití' bi didza' bubí'ë Jesús. <sup>13</sup> Ní'irö Pilato rë' Jesús:

—¿Naru' cabí riyóntsenu' cate' xö le ta'nnë' quiu'?

<sup>14</sup> Jesús bití' bi didza' bubí'ë. Caní guca, bubáinë' bönni' unná bē' na'.

**Rirugu queë' Jesús gátië'**

(Mr. 15:6-20; Lc. 23:13-25; Jn. 18:38-19:16)

<sup>15</sup> Cate' naca dza Laní Pascua na', dë caz tu le runë' Pilato, bönni' unná bē' na', ca ta'naba bönachi rusanë' tuë' bönni' yu'ë lidxi guië', nútítës nu tē'ëni usanë'.

<sup>16</sup> Dza na' tu bönni' nabáguë'ë xíguia', lë' Barrabás, yu'ë lidxi guië' ni'. <sup>17</sup> Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënili' usana' queé'li'? ¿Naru' Barrabás o Jesús, Bönni' na' lë' Cristo?

<sup>18</sup> Caní gunné' Pilato tu' réquibe'enë' bulu'dödë' bönni' judo' Jesús lu në'ë tu' tu'zë'enë' Lë'.

<sup>19</sup> Tsanni ni' rö'ë Pilato ga na' ruchí'a rusöröë', nigula queë' gusól-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdx-

ide'eda' guduyëla lu yëla béchigal tu' nózinë' Lë'.

<sup>20</sup> Yugu' bixúz unná bē' len bönni' gula tu'zëajni'inë' gula'gú'u yól-lë'ë bönachi zían na' para ila'nabi Pilato usanë' Barrabás na', ate' gútië' Jesús. <sup>21</sup> Leyúbölö bē'ë didza' bönni' unná bē' na', rë' légaquië':

—¿Núzxilë' chopë' ni ré'ënili' usana'-në' queé'li'?

Gula'nnë':

—Barrabás.

<sup>22</sup> Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

<sup>23</sup> Ní'irö bönni' unná bē' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

<sup>24</sup> Cate' réquibe'enë' Pilato bití' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lögaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

<sup>25</sup> Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'ba-ga' ca' zxi'initu'!

<sup>26</sup> Ca' guca, Pilato busanë' Barrabás na' lu náagaquië'. Ní'irö gunná bé'enë' bönni' röjáquië' gudil-la

ila'guínè' Jesús, ate' gudödi ni' budödè' Lè' lu ná-a-gaquiè' para ulu'dé'è Lè' lè'e yaga cruz.

<sup>27</sup> Yugu' bönni' röjáquiè' gudil-la nacu'è lu në'è bönni' unná bè' na' gula'ché'è Jesús lu yu'u yúlahui' nazí'i le pretorio, ate' ni' bulu'tubè' yúgu'tè bönni' röjáquiè' gudil-la nacu'è ni' ga na' zoè' Jesús. <sup>28</sup> Ní'irö gula'lecjè' lari' nácuè' Jesús, en bulu'gácuè' Lè' tu lari' xiná chul-la, ca rácugaca nupa ta'nná bè'. <sup>29</sup> Bulu'dxíè' icjè' tu le néquini ní'a në'e yaga yötsi' le naca ca le dxia icjè' bönni' rinná bè'è, en bulu'zóè' tu guído' lu në'è ibèla le ru-lu'í ca tu yaga que bönni' yúlahui'. Ní'irö bulu'zóa zx-ibè' lahuè', en bulu'titjè' Lè', ta'nné':

—¡Bica' ba Li', rinná bé'enu' bönachi judío!

<sup>30</sup> Ní'irö bulu'chejè' Lè' zxöna', ate' bulu'guél'è'è gui na', en gula'guínè' icjè'. <sup>31</sup> Gudödi bulu'titjè' Jesús, gula'lecjè' lari' na' nácuè', ate' bulu'gácuè' Lè' lari' que cazè'. Ní'irö gula'ché'è Lè' para tsöjdá'agaquiè' Lè' lè'e yaga cruz.

### Tu'dé'è Jesús lè'e yaga cruz

(Mr. 15:21-32; Lc. 23:26-43; Jn. 19:17-27)

<sup>32</sup> Cate' ni' bila'rúajè' bönni' na', yöjxáca'gaquiè' Simón, tu bönni' Cirene, ate' gulunè' ga bi'è yaga cruz queè' Jesús.

<sup>33</sup> Cate' bila'dxinè' lataj nazí'i le Gólgota, le rna lu didza' xidza', Lataj Que Böga' Ícjaru', <sup>34</sup> bulu'guijè' Jesús nupi zi nutsí'i xígala'aba' böa' guixi'. Cate' buxí'i ru'è Jesús, biti' gúunnè' guíjè'.

<sup>35</sup> Cate' chinudá'agaquiè' Lè' lè'e yaga cruz, gula'guisiè' lari' nácuè', en bulu'quitjè' lahui le gaca bè' núzxilè' guequi queè'. Caní guca, budxín lè na' gunné' bönni' bè'è didza' uláz queè' Dios, gunné': "Gula'guisiè' lari' nácué', en bulu'quitjè' lahui le gaca bè'." <sup>36</sup> Ní'irö gula'bö'è ni', tu'yúè' Jesús. <sup>37</sup> Lè'sca' bulu'zóè' lè'e yaga cruz ícjälè' Jesús tu didza' le riguixjö' le nabáguè'è le rna caní: "Bönni' ni Jesús, Bönni' rinná bé'enè' bönachi judío."

<sup>38</sup> Ga ni' dè'è Jesús, bulu'dé'è ca' lè'egaca yaga cruz chopè' bönni' gubán. Tuè' bulu'dé'è cuita lè'è ibèla, en ia'túè' na' cuita lè'è yögöla. <sup>39</sup> Gula'dödè' ni' yugu' bönni' bulu'lidza zi'è Jesús, en bulu'tá ícjagaquiè', tu'titjè' Lè', <sup>40</sup> ta'nné':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'inè' Dios! ¡Bótjatsöca' lè'e yaga cruz na'!

<sup>41</sup> Lè'sca' caní bulu'titjè' Lè' yugu' bixúz unná bè' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inè', ta'nné':

<sup>42</sup> —Yugu' nu yúbölö busölé' bönni' ni, pero biti' gaca usölá cuiné'. Channö náquiè' Bönni' inná bé'enè' bönachi Israel, huótjatsöquiè' na'a lè'e yaga cruz, ate' tséajlè'èru' Lè'. <sup>43</sup> Lè' buzxöni lédxè'è Dios. Dios usölá cazè' Lè' na'a channö raza lédxè'è Lè', tu' gunné': "Zxí'inè' Dios naca'."

<sup>44</sup> Lè'sca' caní yugu' bönni' gubán na' dá'gaquiè' lè'e-gaca yaga cruz ga ni' dè'è Jesús bulu'lidza zi'è Lè'.

### Ratiè' Jesús

(Mr. 15:33-41; Lc. 23:44-49; Jn. 19:28-30)

<sup>45</sup> Cate' bidxín huagubidza, guchul-la idútè yödzülió ga bidxintè idú ridödi xihuó. <sup>46</sup> Idú ridödi xihuó na', bè'è zidzaj didza' Jesús, rnnè':

—Elí, Elí, ¿lama sabactani?

Didza' ni rna lu didza' xidza': "Dios quia', Dios quia', ¿bizx que nubéaj lédxu'u neda'?"

<sup>47</sup> Cate' nupa nacua' ni' bila'yöni didza' ni, ta'nná:

—Bönni' ni rulidzè' Elías, bönni' ni' bè'è didza' uláz queè' Dios.

<sup>48</sup> La' guxítitè' tuè' bönni' nútsè'è lédjagaquiè', en gudélè'è tu le bululu rizxupi nisa, ate' buxúpinè' le nupi zi, en buzöè' le tu lu gui, ate' butságuie' le ru'è Jesús para xupè'. <sup>49</sup> Ní'irö ia'zica'rè' bönni' ni' ta'nné':

—¡Gulózarö! ¡Uyútsöca'ru' channö huidè' Elías usölé' Lè'!

<sup>50</sup> Leyúbölö guródxi'è zidzaj Jesús, ate' burúajtè bö' naca cazè', gútitè'. <sup>51</sup> La' násö biróza'tè lari' nal-la' lu yudo', birúaj choplö, le gudela' icjlö ga bidxintè xiní'i. Ní'irö gudödi budó' xzu', en gula'láa guió. <sup>52</sup> Gula'yala' yeru ba quégaca nupa chinátigaca, nupa ni' gula'yéajlè' Dios, ate' bulu'bán bönachi na'. <sup>53</sup> Gudödi bubané' Jesús, bulu'rúajè' bönni' na' yeru ba quégaquiè', en gula'yáziè' yödzü láyai Jerusalén, ga ni' bila'lé'e bönachi zían légaquiè'.

<sup>54</sup> Ní'irö gúdxinè' bönni' na' rinná bé'enè' bönni' röjáquiè' gudil-la, enca' yugu' bönni' röjáquiè' gudil-la nacua'lenè' lè' tu'yúè' Jesús, ate' gunné':

—Le nácatè bönni' ni gúquiè' Zxí'inè' Dios.

<sup>55</sup> Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzé'è luyú Galilea, ate' gulunnu xichiné', gula'gú'unu le gulahuè'. <sup>56</sup> Lè'sca' María Magdalena, en María, xiná'agaquiè' Jacobo, en José, nútsa'gacanu lédjagacanu, ate' zóanu ca' ni' xiná'agaquiè' yugu' zxí'inè' Zebedeo.

### Ta'gu'è Jesús yeru ba le nadaj lè'e guí'a guió

(Mr. 15:42-47; Lc. 23:50-56; Jn. 19:38-42)

<sup>57</sup> Cate' chiridzó' dza na', bidxinè' José, bönni' Arimatea, tu bönni' rilé'enè' yöl-la' tsahui' queè', en dè'è ca' Jesús. <sup>58</sup> Bönni' ni yöjyúè' Pilato, en gunabè' lataj u'è Jesús. Ní'irö Pilato gunná bè'è ulu'nödzjè' queè' Jesús. <sup>59</sup> Guzxí'è José Lè', en buchólinè' Lè' tu lari' nazaca'.

<sup>60</sup> Ní'irö gulu'è Lè' lu yeru ba cubi queè' le naguidjè' lè'e guí'a guió. Budé'è tu guió. <sup>61</sup> Gula'cuá'anu María Magdalena, en ia'tunu María ni', ró'gacanu ra' yeru ba na'.

### Yugu' bönni' röjáquiè' gudil-la tapa chí'è ba queè' Jesús

<sup>62</sup> Cate' za' rení' ia'tú dza, gudödi bulu'pé'è que dza láyai quégaquiè' bönni' judío, bulu'dubè' yugu' bixúz unná bè', en yugu' bönni' yudo' fariseo ga zoè' Pilato.

<sup>63</sup> Tè' Pilato:

—Bönni', röjnetu' bi gunné' bönni' rizí' yè'è na', cate' ni' zoè' nabanè', gunné': "Cate' gaca tsonna dza ubana'



lu yöl-la' guti." <sup>64</sup> Que lë ni na' gunná be'e nupa ilún chí'i ba ní' ga idxintë dza bunní, para cabí ídigaquië' bönní' usëda queë' chí'i dzó'ölö, en ulu'béajë' Lë'. Ní'irö ilë' bönnachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

<sup>65</sup> Pilato gudxë' légaquië':

—Ni nacu'ë bönní' rójáquië' gudil-la. Guli'ché'ë queé'li'. Guli'tséaj, guli'gún chí'i yeru ba na' tsca séqui'li' gunli'.

<sup>66</sup> Ní'irö yójáquië' ní', en bulu'sayjë' dxi'a yeru ba na', en bulu'dé'ë lë'e guió'j na' tu le gaca bë' channö isalaj, ate' bulu'cá'anë' ní' bönní' rójáquië' gudil-la ilún chí'ë le.

### Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

**28** Cate' chigudödi dza lá'ayi quégaquië' bönní' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. <sup>2</sup> Tsárido'os gudödi budó' xzu'. Caní guca, tu' bö'tjé' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudúë' guió'j blaga zxön na', en gurö'ë lu guió'j na'. <sup>3</sup> Nalá' lahui gubáz lá'ayi na' ca yösa bení', ate' zxíla'do'os naca lari' nácuë'. <sup>4</sup> Cate' yugu' bönní' na' rójáquië' gudil-la tapa chí'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönní' nati caz. <sup>5</sup> Ní'irö gubáz lá'ayi na' gudxë' yugu' nigula na', rnnë':

—Bití' gádxili'. Nözda' ruguíljali'-në' Jesús, bönní' na' bulu'dé'ë lë'e yaga cruz. <sup>6</sup> Bití' zoë' ni tu' chibubanë' ca na' chigunná cazë' Lë'. Guli'dá, uyuli' ga ní' gutë' Xanru'. <sup>7</sup> Guli'tséaj na'a, guli'tsöjödxi yugu' bönní' usëda queë' chibubanë' Jesús lu yöl-la' guti, ate' na'a Lë' cazë' in-óruë' lolí' saca' luyú Galilea. Ní' ulé'eli'-në'. Chigudxa' libí'ili' le gulu'ë Dios lu na'a.

<sup>8</sup> Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö sójácanu söjtíxjöi'igüequinu yugu' bönní' usëda queë'. <sup>9</sup> Tsanni ní' sójácanu, Jesús yöjtsáquië' légaicanu, ate' rë' légaicanu:

—Padiux.

Ní'irö gula'bíga'nu ga zoë' Jesús, en bulu'nída'nu ní'ë.

Gula'yéaj ládxi'gacanu Lë'. <sup>10</sup> Ní'irö Jesús rë' légaicanu:

—Bití' gádxili'. Guli'tséaj, guli'tsöjtíxjöi' yugu' bócha'a tsójáquië' saca' luyú Galilea, ate' ní' ulu'lé'enë' neda'.

### Le gula'guíxjö'ë yugu' bönní' rójáquië' gudil-la

<sup>11</sup> Tsanni ní' sójácanu nigula na', yugu' bönní' na' rójáquië' gudil-la gulún chí'ë yeru ba na' bulu'dxinë' lu yödzö ní', ate' gula'guíxjöi'inë' yugu' bixúz unná bë' yúgu'të lë na' gulaca. <sup>12</sup> Cate' chibulu'tubë' yugu' bönní' gula tu'zéajni'inë', gulún xtí'dza'gaquië'. Ní'irö bulu'nödzjë' dumí zían quégaquië' bönní' na' rójáquië' gudil-la. <sup>13</sup> Të' légaquië':

—Caní innali': "Bila'dxinë' bönní' usëda queë' chí' dzó'ölö, en bulu'béajë' Lë' tsanni ní' rásitu'." <sup>14</sup> Channö huayönnë' bönní' rinná bë'ë lë ni, netu' uzéajni'itu' lë', en guntu' ga bití' bi gunë' queé'li'.

<sup>15</sup> Ní'irö yugu' bönní' rójáquië' gudil-la na' gula'zi'ë dumí na' ate' yöjéngaqüië' ca na' chinazédagaquië'. Caní guca, tu'zë' bönní' judío didza' ni ga ridxintë na'a dza.

### Jesús risól-lë'ë yugu' bönní' gubáz queë'

(Mr. 16:14-18; Lc. 24:36-49; Jn. 20:19-23)

<sup>16</sup> Ní'irö idxinéajtë' bönní' usëda queë' Jesús yöjáquië' luyú Galilea, ate' bila'dxinë' lu gu'ado' na' chibulu'ínë' Jesús légaquië'. <sup>17</sup> Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopá ládxi'gaquië'. <sup>18</sup> Ní'irö gubígu'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. <sup>19</sup> Que lë ni na', guli'tséaj, guli'tsöjsëdi yúgu'të bönnachi idütë yödzölió. Bulí'quíla légaquië' nisa, ugunlí' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. <sup>20</sup> Guli'sëdi légaquië' ilunë' yúgu'të lë na' gunná bé'eda' libí'ili'. Bulí'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

# San Marcos

## Libán benë' Juan, bönni' buquile' bönachi nisa (Mt. 3:1-12; Lc. 3:1-9, 15-17; Jn. 1:19-28)

**1** Caní gusí lo didza' dxí'a ca guca queë' Jesucristo, Zxí'inë' Dios.  
<sup>2</sup> Budxín lë na' buzúajë' lu guichi Isaías, bönni' bëë didza' uláz queë' Dios, le gunné' Dios: Buyútsöca', risól-la'a bönni' gubáz quia', inóruë' Lo'. Lë' upé'ë nöza ga tödu'.  
<sup>3</sup> Yön chí'ë tu bönni' ulidzë' zidzaj lu lataj cá'asö, innë': "Bulí'pá'a nöza para idxín Xanru' yichaj lázxdö'oli'. Bulí'béaj li yugu' nöza lasi ga tödë'."  
<sup>4</sup> Caní budxín, tu' ruquile' Juan bönachi nisa lu lataj cá'asö, en runë' libán para ila'dila bönachi nisa, bönni' na' bulu'bí'i ládxí'gaquie' para uniti lahuë' Dios dul-la' nabága'gaquie'. <sup>5</sup> Bila'ruáj bönachi zían yúgu'të yödzö luyú Judea, enca' yödzö Jerusalén, en yöjáquie' ga na' zoë' Juan, ate' Juan na' buquile' légaquie' nisa lu yegu Jordán, bönni' na' gula'xóalëpë' dul-la' nabága'gaquie'.  
<sup>6</sup> Nácue' Juan larí' néquini lítsa'ba' böa', en núguë'ë lë'ë tu guídi. Rahuë'-ba' bóchí'zu, en re'jé' le zxixi que buzdo'. <sup>7</sup> Runë' Juan libán, rnnë':  
 —Sí' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchia', para ilecja' xiráchuë' nudé'ë. <sup>8</sup> Neda' ruquila' libí'ili' nisa, pero Lë' gunë' le rulu'isö yöl-la' ridila nisa ni, uchizië' libí'ili' Dios Bö' Lá'ayi.

## Ridilë' Jesús nisa (Mt. 3:13-17; Lc. 3:21-22)

<sup>9</sup> Tu dza ni' birúajë' Jesús yödzö Nazaret luyú Galilea, ate' Juan na' buquile' Lë' nisa lu yegu Jordán. <sup>10</sup> Cate' burúajë' Jesús lu nisa, la' ná'asö bilé'enë' gyalaj lúzxi-ba, en ruhuötjé' Dios Bö' Lá'ayi, rulu'í cuinë' ca tuba' gu'dödo', en bidisóalenë' Lë'. <sup>11</sup> Biyón chí'í nu ruí' didza' yehua' yubá, rnna:  
 —Lí' nacu' Zxí'ina'. Nadxí'ida' Lí', en raza ládxa'a Lí'.

## Ré'ëni tu' xihui' gun ga ibáguë'ë Jesús dul-la' (Mt. 4:1-11; Lc. 4:1-13)

<sup>12</sup> Ní'irö Dios Bö' Lá'ayi guché'ë Jesús bayudxi lu lataj cá'asö. <sup>13</sup> Guzöë' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguë'ë Jesús dul-la'. Guzöë' Jesús ga ni' ta'daba' böa' guixi' dzó'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

## Rusédinë' Jesús bönachi luyú Galilea (Mt. 4:12-17; Lc. 4:14-15)

<sup>14</sup> Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxí'a ca rinná bë'ë Dios. <sup>15</sup> Caní rnnë':  
 —Chibidxín dza. Chizóa idinná bë'ë Dios. Bulí'bí'i ládxí'li', en guli'tséajlë' didza' dxí'a ni.

## Rulidzë' Jesús tapë' bönni' uzxón böla (Mt. 4:18-22; Lc. 5:1-11)

<sup>16</sup> Tsanni ni' ridé' Jesús ra' nísado' luyú Galilea, bilé'enë' Simón len Andrés, bönni' bóchë'ë Simón na'. Nácagaquie' uzxón böla, en ta'chiljé' yöxaj böla quégaquie' lu nisa na'. <sup>17</sup> Jesús gudxë' légaquie', rnnë':  
 —Gulí'dutá' neda', ate' guna' ga iché'ëli' bönachi quia' neda', gunlí' ca runlí' rizónli'-ba' böla.  
<sup>18</sup> La' bulu'cá'anatë' yöxaj quégaquie', en söjácalenë' Jesús.  
<sup>19</sup> Gudödë' Jesús ia'látí'do' ní'ilö, ate' bilé'enë' Jacobo, en Juan, yugu' zxí'inë' Zebedeo, nacu'ë lë'e bárcodo' quégaquie', tu'únë' yöxaj böla quégaquie'. <sup>20</sup> Jesús la' bulidztë' légaquie', ate' bulu'cá'anë' xúzgaquie' Zebedeo, dzáguie' yugu' huen dxin queë' lë'e bárcodo' na', ate' söjácalenë' Jesús.

## Tu bönni' yu'u lë' bö' xihui' (Lc. 4:31-37)

<sup>21</sup> Bila'dxinë' Jesús, en yugu' bönni' dá'gaquie' Lë' lu yödzö Capernaum. Cate' ni' naca dza lá'ayi quégaquie' bönni' judío, guyázië' Jesús yu'u ga tu'dubë' bönni' judío, en tu'sédë' queë' Dios, ate' gusí lahuë' rusédinë' nupa nudúbigaca ni'. <sup>22</sup> Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. <sup>23</sup> Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sédë' queë' Dios, ate' guródxí'ë bönni' na', rnnë':

<sup>24</sup> —¿Bizxi rál-la'tu' quiu', Jesús, bönni' Nazaret? ¿Za't-su' usunítu' netu'? Núnbë'a Lí', nacu' Bönni' Lá'ayi queë' Dios.

<sup>25</sup> Jesús buzenë' le bach, rnnë':

—Busayaj ru'u, en burúaj lu bönni' ni.

<sup>26</sup> Ní'irö bö' xihui' na' buxízida' bönni' na' yu'u lë', ate' guródxí'a zidzaj, en la' burúajtë. <sup>27</sup> Bulu'bánninë' yúgu'të bönni' nacu'ë ní', ate' gula'nabi luzé'egaquie', ta'nnë':

—¿Bizxi caz lë ni? ¿Naru' nácatsö xibá cubi? ¿Len yöl-la' unná bë' rinná bé'enë' yugu' bö' xihui', ate' tun ca rnnë'!

<sup>28</sup> La' guzetë didza' que yöl-la' huáca queë' Jesús, ate' bila'yöni bönachi idütë luyú Galilea na'.

**Ruúnë' Jesús xiná'anu nigula queë' Pedro**  
(Mt. 8:14-15; Lc. 4:38-39)

<sup>29</sup> Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. <sup>30</sup> Ní' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. <sup>31</sup> Ní'irö gubíguíë' Jesús, ate' gudélë'ë ná'anu, en guchisé'-nu. La' burúajtë tu xilá na' yú'unu, ate' bupá'anu le gulahuë'.

**Ruúnë' Jesús zían nupa te'e**  
(Mt. 8:16-17; Lc. 4:40-41)

<sup>32</sup> Cate' chiridzö', ca gudxía gubidza, la' dujuágacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. <sup>33</sup> Yúgu'të bönachi lu yödzö bila'guíró ga nu riyaza yu'u ga na' zoë' Jesús. <sup>34</sup> Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'n-në bö' xihui' na' tu' núbë'gaca Lë' Nu náquië'.

**Runë' libán Jesús luyú Galilea**  
(Lc. 4:42-44)

<sup>35</sup> Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. <sup>36</sup> Simón, en nupa nacua'len lë' söjdíljagaquië' Jesús. <sup>37</sup> Cate' yöjxáca'gaquië' Lë', të' Lë':

—Yúgu'të bönachi tu'guílaj Lì'.

<sup>38</sup> Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

<sup>39</sup> Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sédinë' queë' Dios, ate' rubéajë' bö' xihui' yú'ugaca bönachi.

**Tu bönni' ré'enë' huë' nudzu' ruzödi**  
(Mt. 8:1-4; Lc. 5:12-16)

<sup>40</sup> Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxi'bë', en gúta'yue' lahuë', rnnë':

—Channö ré'ënu', huáca unu' neda'.

<sup>41</sup> Jesús buéchi' ládxë'ë lë'. Bulí në'ë, gudanë' lë', en gudxë' lë':

—Ré'ënda'. Chinuhuóacu'.

<sup>42</sup> Ca gunné' ca', la' bunítitë huë' ré'enë', en böáquië' dxí'ado'. <sup>43</sup> Ní'irö Jesús buzenë' bach bönni' na', en la' busól-la'të' lë'. <sup>44</sup> Caní gudxë' lë':

—Cuntu nu guí' ca bena' quiu', pero guyéaj, yöjluí' cuinu' lahuë' bixúz, en yöjnodzaj para le böácanu' lí' que yudo' ca na' gunná bë'ë Moisés, lë na' uluí' bönachi chinuhuóacu'.

<sup>45</sup> Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzé' didza' ni, biti'rö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të yödzö bila'dxín ga na' zoë' Jesús.

**Bönni' ré'enë' huë' nacú'unië' bin**  
(Mt. 9:1-8; Lc. 5:17-26)

**2** Cate' chigudödi chopa tsonna dza, buázië' Jesús yödzö Capernaum, ate' guzé didza' zoë' yu'u. <sup>2</sup> La' bulu'dúbitë bönachi zían ga na' zoë' Jesús, ga bidxintë biti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. <sup>3</sup> Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. <sup>4</sup> Biti' guca ila'dxinë' lahuë' Jesús tu' nacua' bönachi zían ni'. Que lë ni na' gula'saljë' ícjo'olö ca dódilö ga zoë' Jesús. Cate' budxi bulu'dxíë' yeru na', ni' bulu'zötjë' le denë' bönni' huë' na'. <sup>5</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' lí' ca naca dul-la' nabágu'u.

<sup>6</sup> Ró'ogaquië' bal-lë' bönni' yudo' usedi ni'. Ta'zá' ládx-i'gaquië', ta'nnë': <sup>7</sup> ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. <sup>8</sup> La' gúquibe'etenë' Jesús le ta'zá' ládx-i'gaquië', ate' gudxë' légaquië':

—¿Bizx que rizá' ládx-i'lí' caní? <sup>9</sup> Biti' naca böniga nu guiesö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ni'ë. <sup>10</sup> Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'-gaca bönachi.

Ní'irö Jesús gudxë' bönni' huë' na':

<sup>11</sup> —Lí' rea' Guyasa. Buá' le denu', en böaj lidxu'.

<sup>12</sup> La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacua' ni'. Bulu'bájinë' yúgu'të', en gula'gu'ë Dios yöl-la' ba, ta'nnë':

—Catu caz rilë'etu' le caní.

**Jesús rulidzë' Leví**  
(Mt. 9:9-13; Lc. 5:27-32)

<sup>13</sup> Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. <sup>14</sup> Cate' ridödë' Jesús ni', bilé'enë' Leví, zxi'inë' Alfeo, rö'ë ga ruquíxjé' uláz que yödzö zítu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

<sup>15</sup> Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö ró'ölengaquië' tsözxón Jesús, en yugu' bönni' usëda queë'. Caní guca, tu' rójaca bönachi zían len Jesús. <sup>16</sup> Cate' yugu' bönni' yudo' usedi, en yugu' bönni' yudo' fariseo, bila'lë'enë' Lë' rö'ë rágulenë' tsözxón yugu' bönni' uquíxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¿Rë'aj rágulentë' yugu' bönni' uquíxaj, en ia'bal-lë' bönni' dul-la'!

<sup>17</sup> Biyönnë' Jesús didza' ni tu'ë, en gudxë' légaquië':

—Nupa nacua' dxí'a biti' naquíniguetqui nu un bönachi, pero nupa te'e naquíniguetqui nu un bönachi.

Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bíi láchí'gaca.

**Ru'ë Jesús didza' que yöl-la' run gubasa**  
(Mt. 9:14-17; Lc. 5:33-39)

<sup>18</sup> Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bi-la'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bönni' dá'gaquië' Li' bití' tunë' gubasa?

<sup>19</sup> Bubi'ë didza' Jesús, rë' légaquië':

—¿Naru' réquitseli' ilún gubasa nupa nacua' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. <sup>20</sup> Idxín dza cate' udüë' bönni' na' rutsaga në'ë, en bití'ró sóalenë' légaquië', ate' dza ní'irö ilunë' gubasa.

<sup>21</sup> 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachöza' lari' tëbi na', ate' huaröza'ró lari' tëbi na'. <sup>22</sup> Lësca' caní cuntu nu bönni' que'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

**Bönni' dá'gaquië' Jesús ta'lecjé' do dza lá'ayi**  
(Mt. 12:1-8; Lc. 6:1-5)

<sup>23</sup> Tu dza lá'ayi quégaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí lógaquië' ta'lecjé' do ga dxía xzoa' xtila. <sup>24</sup> Ní'irö bönni' yudo' fariseo gulé' Jesús, ta'nné':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

<sup>25</sup> Jesús gudxë' légaquië':

—¿Naru' cabí nulábanilí' ca benë' David cate' gudunë'? Biyadzaj le ilahuë' lë', en nupa nacua'len lë' <sup>26</sup> ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua'lenë' lë'.

<sup>27</sup> Ní'irö Jesús gudxë' légaquië':

—Dios benë' dza lá'ayi le ulu'z'í xibé bönachi, calëga benë' bönachi para ilún chí'i dza lá'ayi. <sup>28</sup> Que lë ni na', neda', Bönni' Guljé' Bönachi, naca' Xani dza lá'ayi.

**Ruúnë' Jesús tu bönni' narequi' në'ë**  
(Mt. 12:9-14; Lc. 6:6-11)

**3** Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. <sup>2</sup> Bönni' yudo' nacua'ë ni' tu'yúë' Jesús channö ünë' bönni' na' dza lá'ayi, tu' té'ënnë' ulu'zégui'ë Lë' didza'. <sup>3</sup> Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

<sup>4</sup> Jesús gunábinë' bönachi ni', rnnë':

—¿Naru' dë lataj gunru' le naca dxí'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. <sup>5</sup> Ní'irö len yöl-la' rilé queë', buyúë' Jesús bönachi na' nacua' gásibi'ilë'. Ruhuí'innë' tu' nácagaquië' zidi ladxí'. Gudxë' bönni' na' narequi' në'ë, rnnë':

—Bulí no'ö.

Ní'irö bulí në'ë bönni' na', ate' böacatë dxí'ado' në'ë. <sup>6</sup> Ní'irö bulu'rúajë' bönni' yudo' fariseo, ate' la' guluntë' tsözxón didza' len bönni' dá'gaquië' Herodes bi ilunë' queë' Jesús, para ilútië' Lë'.

**Tu'dubi bönachi zían ra' nísado'**

<sup>7</sup> Buzë'ë Jesús ni' tsözxón len bönni' dá'gaquië' Lë', en bidxinë' ra' nísado', ate' sójacalen Lë' bönachi zían narúajgaca luyú Galilea, en luyú Judea. <sup>8</sup> Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzo nacua' idü gásibi'ilö ga nacua' yödzo Tiro, en yödzo Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxon runë' Jesús. <sup>9</sup> Que lë ni na' Jesús gunná bé'enë' bönni' dá'gaquië' Lë' ulu'cóztica'së' tu bárcodo' ga gaca cuenë', para cabí ulu'quí bönachi zían na' Lë'. <sup>10</sup> Caní guca tu' chibunë' zían nupa te'e, ate' bila'guíró bönachi zían na' ga zoë' para ila'gán Lë'. <sup>11</sup> Cate' bö' xihui' yú'u-gaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bódxí'a, ta'nná:

—Nacu' Li' Zxí'inë' Dios.

<sup>12</sup> Jesús buzenë' le bach bö' xihui' na', cabí ila'guixjõ' nu náquië' Lë'.

**Riböë' Jesús chinu bönni' ilácagaquië' gubáz queë'**  
(Mt. 10:1-4; Lc. 6:12-16)

<sup>13</sup> Ní'irö gurenë' Jesús tu lu guí'ado', ga ni' bulidzë' nupa ré'ënnë'. Gula'biguë'ë bönni' ni gásibi'ilë'. <sup>14</sup> Jesús bucu'ë chinnuë' bönni' ni, para ila'cuá'lenë' Lë', en para isól-lë'ë légaquië' tsöjéngaquië' libán. <sup>15</sup> Budödë' lu ná'agaquië' yöl-la' huáca ulu'únë' nupa te'e, en ulu'béa-jë' bö' xihui' yú'ugaca bönachi. <sup>16</sup> Caní nácagaca lá-gaquië':

Simón, (buzóë' Jesús ia'tú lë', Pedro),

<sup>17</sup> Jacobo,

Juan, (bönni' bóchë'ë Jacobo, ate' nácagaquië' zxí'inë' Zebedeo. Chopë' ni, Jesús buzóë' ia'tú lágagaquië', Boanerges, le rna lu didza' xidza': Bönni' sínia' ca guziú'),

<sup>18</sup> Andrés, Felipe, Bartolomé, Mateo, Tomás,

Jacobo, (zxí'inë' Alfeo),

Tadeo,

Simón, (bönni' ru'í láchxë'ë yödzo queë'),

<sup>19</sup> Judas Iscariote, (bönni' udödë' Jesús lu ná'agaquië' bönni' ilútië' Lë').

**Yugu' bönni' yudo' ta'nné': "Tu' xihui' dzaga Jesús"**  
(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. <sup>20</sup> Leyúbölö bila'guíró bönachi zían ga zoë'

Jesús, ate' bití'rö guta' lataj bi ilahuë' Jesús, en bönni' na' dá'gaquië' Lë'. <sup>21</sup> Cate' di'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'n-né': Richixi icjé'.

<sup>22</sup> Lësca' caní bönni' yudo' usedi, narúajgaquië' Jerusalén gula'nné' queë', ta'nné':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

<sup>23</sup> Ní'irö Jesús bulidzë' yugu' bönni' yudo' usedi na', en bucúdzü'ë didza', rnnë':

—¿Naru' ubéaj la' cuinsi Satanás tu' xihui'? <sup>24</sup> Channö ila'rúaj choplö bönachi tu yödzo, en ila'díl-lalen luzé'eguequi, bití' gaca idía' yödzo na'. <sup>25</sup> Lësca' caní channö ila'rúaj choplö bönachi nacua' tu yu'u, en ila'díl-lalen luzé'eguequi, bití' gaca ila'día' bönachi nacua' yu'u na'. <sup>26</sup> Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

<sup>27</sup> Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' z'álö bönni' nál-la na', ate' ní'rö sequí' cuéaj le dzö'ö lidxë'.

<sup>28</sup> Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná, <sup>29</sup> pero nútítës nu inné schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

<sup>30</sup> Caní gunné' Jesús tu' ta'nné' queë' bönni' yudo' use-di na', ta'nné':

—Tu' xihui' dzaga Lë'.

#### Nu naca xiné'ë Jesús, en bönni' böché'ë

(Mt. 12:46-50; Lc. 8:19-21)

<sup>31</sup> Ní'irö bila'dxinë' yugu' bönni' böché'ë Jesús, enca' xiné'ë ga zoë'. Gula'cu'ë ló'alö, en gula'sól-lë'ë nu tsöjlidza Jesús. <sup>32</sup> Bönachi zían na' rógaca cuitë' Jesús gulé' Lë', ta'nná:

—Yugu' bönni' böchu'u, enca' xinó'o nacu'ë ló'alö, tu'lidzë' Li'.

<sup>33</sup> Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' bócha'a?

<sup>34</sup> Ní'irö buyúë' nupa na' rógaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' bócha'a. <sup>35</sup> Nu run ca ré'ënë' Dios, nu ni naca ca bí'i bócha'a, en bí'i zana' enca' xiná'a.

#### Rucúdzü'ë didza' Jesús ca naca queë' bönni' guz

(Mt. 13:1-9; Lc. 8:4-8)

**4** Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' xzoa lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. <sup>2</sup> Zían le busédinë' Jesús légaquië', bucúdzü'ë didza'. Tsanni ni' rusédinë' légaquië', rnnë':

<sup>3</sup> —Gulí'zé nágalí' didza' ni. Birúajé' tu bönni' guz, söjjesië' xisedo'. <sup>4</sup> Tsanni ni' rúsië', gulasi bal-la xisedo' na' ra' nöza, ate' bila'dxinba' biguinnido', gulé'ajba' le. <sup>5</sup> Gulasi ia'bal-la xisedo' na' ga rö'ö guió'j ga bití' rö'ö

yenni' yu. Bayón gula'lén xisedo' na' tu' cabí rö'ö yenni' yu. <sup>6</sup> Ní'irö cate' gulén gubidza, buquexu' le, ate' gu-bidxi, tu' cabí nun luí ga ré'. <sup>7</sup> Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití' bi bunödzej. <sup>8</sup> Gulasi ia'bal-la xisedo' na' ga naca luyú bëbu, ate' gula'zxon, en xitsá' ra' gula'bó'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

<sup>9</sup> Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

#### Riguíxjö'ë Jesús bizx que rucúdzü'ë didza'

(Mt. 13:10-17; Lc. 8:9-10)

<sup>10</sup> Cate' chibugá'anë' tuzë' Jesús, bila'dxín nupa dá'ga-ca Lë' ga zoë', núngaca tsözxón idxínnutë' bönni' usë-da queë', ate' gula'nábinë' Lë' bi sa'yéaj lë na' bucúdzü'ë didza'. <sup>11</sup> Jesús gudxë' légaquië', rnnë':

—Libí'ili' nadé'ili' tséajni'ili' le nagachi' ca rinná bë'ë Dios, pero nupa na' bití' nácgaca tuz len ré'u, ru'ílena' légaquië' didza' yugu' le rucúdzü'a didza'. <sup>12</sup> Caní runa' para gaca lë na' nazúaj lu guichi lá'ayi, rna: Ulu'yúë', en bití' ila'lé'enë'.

Ulu'zé nágagaquië', en bití' ila'yéajni'inë'.

Bití' ulu'bí'i ladxí'gaquië' para gaca uniti lahua' lé-gaquië' ca naca dul-la' nabága'gaquië'.

#### Riguíxjö'ë Jesús le bucúdzü'ë didza'

(Mt. 13:18-23; Lc. 8:11-15)

<sup>13</sup> Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzü'a didza'?

¿Nacxi caz gaca tséajni'ili' ia'zica'rö le ucúdzü'a didza'?

<sup>14</sup> Bönni' guz na' náquië' nu ruzé xtídzë'ë Dios.

<sup>15</sup> 'Nácgaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ladxí'do'gaquië'.

<sup>16</sup> 'Nácgaca ia'bal-la bönachi ca xisedo' na' gulasi ga rö'ö guió'j. Ta'yönnë' didza' na', ate' len yöl-la' rudzeja quégaquië' ta'zi'ë le. <sup>17</sup> Bití' riyaza icja ladxí'do'gaquië', ate' tu chí'sö ta'dé'ë le. Cate' bi raca quégaquië', o zoa nu ribía ladxí' légaquië' tu' ta'dé'ë didza' na', la' tu'huóatë ladxí'gaquië'.

<sup>18</sup> 'Nácgaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', <sup>19</sup> pero tu'íi ladxí'gaquië' le nácgaca que yödzo'lió ni. Nazí' yé'eguequinë' tu' nadxí'iguequinë' yugu' yöl-la' tsahui', en ta'zé ladxí'gaquië' yugu' le dë. Ta'yaza icja ladxí'do'-gaquië' yúgu'të lë ni, en tu'suniti didza' na', para cabí gun dxin lu icja ladxí'do'gaquië'.

<sup>20</sup> 'Nácgaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zi' lu ná'-gaquië' le, ate' run dxin lu icja ladxí'do'gaquië'. Nácgaca bal-la bönachi caní ca xisedo' na' bulu'nödzej ia'chí uruá' huéaj. Nácgaca ia'bal-lë' ca xisedo' na' bu-lu'nödzej ia'tsónnalalaj ca', ate' nácgaca ia'bal-la bönachi ca xisedo' na' bulu'nödzej ia'tú gayuá' ca'.

**Rucúdzu'ë didza' Jesús que tu le rigú'u bení'**

(Lc. 8:16-18)

<sup>21</sup> Jesús gudxë' ca' bönni' dá'gaquië' Lë', rnnë':  
—¿Naru' rigá'la'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní.  
Ruzóaru' guí' ga naca xitsá' ga cu'u bení'. <sup>22</sup> Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. <sup>23</sup> Nu zoa nagui, en riyöni ral-la' uzé nagui.

<sup>24</sup> Gudxë' ca' légaquië':  
—Guli'güi' ládxi'li' le riyónili'. Ca naca le ruríxili', la' leze urixë' Dios queéli', ate' gunné' queéli' ia'lati'. <sup>25</sup> Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

**Rucúdzu'ë didza' Jesús ca rizxón xzoa' xtila**

<sup>26</sup> Gunné' ca' Jesús:  
—Ca raca ni le rinná bë'ë Dios naca ca raca cate' ruchejë' tu bönni' xzoa' xtila lu yu. <sup>27</sup> Chí'i dzó'ölö rásië', en riyasë' cate' za' rení'. Ta'lén xzoa' xtila na', en ta'zxón, pero bití' nózinë' lë' nacxi raca ta'zxón. <sup>28</sup> La' cuinsi luyú na' ruxón le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. <sup>29</sup> Cate' chinal-la xui'i na', la' tséajtë' tsöjchibë' do na' tu' chibidxín dza uzí'ë xui'i.

**Rucúdzu'ë didza' Jesús ca raca que xisé mostaza**

(Mt. 13:31-32; Lc. 13:18-19)

<sup>30</sup> Gunné' ca' Jesús:  
—¿Bizxi caz innaru' ca raca ni le rinná bë'ë Dios?  
¿Bizxi ucúdzu'ru' didza' ca raca? <sup>31</sup> Raca ca raca que tu xisedo' mostaza. Cate' riyaza luyú naca tu xisedo' ná-catëro cuidi' ca yúgu'të xisedo' dzó'ö luyú, <sup>32</sup> pero cate' chinadúz, rilén, en rizxöntëro ca yúgu'të guixi' cuan ró-gaca luyú. Tsa run yana' ní'a në'e, gaca ilá'dxinba' biguínido', en ulu'dxiaba' xicá'agacaba' lu zxul-la que.

**Ca rugunë' dxin Jesús le rucúdzu'ë didza'**

(Mt. 13:34-35)

<sup>33</sup> Caní guca, busédinë' Jesús légaquië', en zíanrö ca' le bucúdzu'ë didza' tsa guca ila'yéajni'inë'. <sup>34</sup> Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

**Jesús ribequi dxíë' bö' budunu'**

(Mt. 8:23-27; Lc. 8:22-25)

<sup>35</sup> La' dza ná'asö, cate' ridzó', Jesús gudxë' yugu' bönni' dá'gaquië' Lë', rnnë':  
—Tóditsöca'ru' ia'tsölá'a nísado' ni.

<sup>36</sup> Ní'irö bulu'lá'alënë' bönachi zían nacua' ní', ate' bulu'sé'ë bárcodo' ga na' chizóasë' Jesús. Gula'cuá' ca' ní' ia'zica'rö bárcodo' sójácalen légaquië'. <sup>37</sup> Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. <sup>38</sup> Dë'

rásië' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¿Bönni' Usedi! ¿Naru' cabí ru'i ládxi'tso' netu'?  
¿Huáti caztu' lu nisa ni!

<sup>39</sup> Ní'irö guyasë' Jesús, en gunná bé'enë' bö' na' recja, gunné':

—Guró'ö dxi.

Gudxë' ca' nisa na', gunné':

—Dxisö guzóa.

Guró'ö dxi bö' na' guyecja, en guzóa dxi lu nísado' na'. <sup>40</sup> Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzóbili' caní? ¿Naru' cabí réajlë'ëli' Dios?

<sup>41</sup> Ní' tádxinë' gulé luzé'ë tuë' ia'túë':

—¿Nuzxi caz bönni' ní? ¿Tun bö' recja, en nísado' ca rna xtídzë'è!

**Bönni' Gadara yu'u bö' xihui' lë'**

(Mt. 8:28-34; Lc. 8:26-39)

**5** Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. <sup>2</sup> Cate' burúajë' Jesús lë'e bárcodo' na', tu bönni' rirúajë' znan bulóaj ga nacua' yeru ba la' dutságatë' Lë'. Bönni' ni yu'u bö' xihui' lë', <sup>3</sup> ate' nun xilatjë' ga na' nacua' yeru ba. Cuntu nu guca guga' bönni' na', calëga len du guíë. <sup>4</sup> Zían luzuí bulu'zóë' bregui' guíë yen në'ë, en ní'ë, en gulúguí'ë lë' du guíë. Yugu' du guíë na' bulé'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. <sup>5</sup> Ridática'së' ribödxí'ë rëla, en të dza ga na' nacua' yeru ba, en gapa naca lu guí'ado', run huë' cuiné' yugu' lu guiöj dzó'ö ní'. <sup>6</sup> Cate' bilé'enë' zë'ë zítu' Jesús, guxiti'ë guyijë' ga na' zë'ë, ate' buzóa xzibë' lahuë' Lë'. <sup>7</sup> Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtëre'? Ní'a queë' Xanru' Dios ráta'yua' lo', bití' usaca' zítu' neda'.

<sup>8</sup> Caní gunné' bönni' na' tu' chigudxë' Jesús bö' xihui' na':

—Lí', bö' xihui', burúaj lu bönni' ni.

<sup>9</sup> Jesús gunábinë' le, rnnë':

—¿Bi leu'?

Bubí'i dídza' le, gudxi Lë':

—Lea': Le Zían, tu' rö'ö ziantu'.

<sup>10</sup> Gula'nabi yechi' yugu' bö' xihui' na' Jesús para cabí isól-lë'ë léguequi zítu' luyú ní'. <sup>11</sup> Nacuá'aba' cuchi zían lu guí'ado' ní'isö, ta'daba' táguba' ní'. <sup>12</sup> Gula'nabi yechi' bö' xihui' na' Jesús, ta'nná:

—Gusöl-la' netu' ga ní' dzó'öba' cuchi zían. Bë' netu' lataj tsöjtsú'ugacatu'-ba'.

<sup>13</sup> La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zían na', ate' gula'xíti'ba' cuchi zían na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yépiba' nisa, gulátiba', en nácacacaba' ca galaj gayuá'aba'.

<sup>14</sup> Ní'irö bulu'zxunnaj nupa ní' gulún chí'i cuchi zían na'. Yöjtíxjöi'iguequinë' bönachi lu yödzö ní', enca' bö-nachi nacua' la' guixi' ní'. Bila'rúaj bönachi lu yödzö,

söjyúgaquië' bizxi na' guca ni'. <sup>15</sup> Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. <sup>16</sup> Nupa na' bila'lé'e le benë' Jesús gula'guíxjöi'i bönachi na' bila'ruáj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchi na'. <sup>17</sup> Ní'irö gula'sí lógaca bönachi zían na' ta'tayu lahuë' Jesús urúajë' lu xiyúguequi.

<sup>18</sup> Cate' bubenë' Jesús lë'e bárcodo', bönni' na' zí'alö yú'ugaca bö' xihui' zían lë', gúta'yuë' lahuë' Jesús gu'ë lë' lataj tséajlenë' Lë'. <sup>19</sup> Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i dí'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

<sup>20</sup> Söhuöjë' bönni' na', en ruzé' didza' yugu' yödzö Decápolis ca nácgaca le zxön benë' Jesús queë', ate' bulu'bani yúgu'të bönachi nacua' yugu' yödzö ni'.

**Bi'i nigula queë' Jairo, en nigula na' gudannu lari' nácuë' Jesús**

(Mt. 9:18-26; Lc. 8:40-56)

<sup>21</sup> Cate' budxinë' Jesús ia'tsölá'a nísado' na', ní'irö bulu'dubi bönachi zían ga na' zoë' ra' nísado'. <sup>22</sup> Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zixibë' lahuë', <sup>23</sup> en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

<sup>24</sup> Sa'yéajlenë' Jesús lë', ate' bönachi zían söjácalen Jesús, tu'quirö Lë'. <sup>25</sup> Tu nigula, chinaca chinu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula. <sup>26</sup> Yenni' chigudí'i guzxáca'nu lu ná'agaquië' zían bönni' tu'únë' bönachi. Nítisö chibutönu dëra le dë queënu, tu' cabí bi gúcalen lënu, pero riyali' queënu. <sup>27</sup> Cate' biyóninu tu'í didza' bönachi ca naca queë' Jesús, gudódinu ládjälö bönachi zían na', en bidxinu zaca' cúdzu'lë' Jesús, en gudannu lari' nácuë'. <sup>28</sup> Caní bennu tu' rnnanu: "Channö cansa' le nácuë', huóaca'." <sup>29</sup> La' bu'ítë rön queënu, ate' réquibe'enu chibóacanu que le guca queënu.

<sup>30</sup> La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zían na'. Rnnë':

—¿Nuzxi na' gudán neda'?

<sup>31</sup> Ní'irö bönni' dá'gaquië' Lë' të' Lë', ta'nnë':

—Rilé'e quézinu' bönachi zían ni tu'quirö Lí', en rnatso': "¿Nuzxi na' gudán neda'?"

<sup>32</sup> Ruyúë' Jesús gásibi'lë' para ilé'enë' nuzxi na' gudán Lë'. <sup>33</sup> Ní'irö nigula na' gubíga'nu lahuë'. Rádxinu, en rizxízinu tu' chinózinu bi na' guca queënu, ate' buzóa zixibinu lahuë' Jesús, en gúdxinu Lë' idútë le nácatë.

<sup>34</sup> Jesús rë'ë-nu:

—Nigúlado'. Chibóacu' tu' réajlë'u neda'. Böaj lidxu' idú ládxu'u. Tsaz nuhuóacu' que le guca quiu'.

<sup>35</sup> Tsanni ni' ru'ë caní didza' Jesús, bönni' narúaj-gaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

<sup>36</sup> Biti' bë'ë ládxë'ë Jesús lë na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

<sup>37</sup> Biti' bë'ë lataj Jesús tsöjácalen Lë' ia'zica'rö bönachi, pero légacasë' Pedro, en Jacobo, en Juan, bóché'ë Jacobo na'. <sup>38</sup> Cate' bidxinë' lidxë' bönni' na' rinná bë'ë lu yu'u ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxu, en nupa ta'bödxu yechi'. <sup>39</sup> Guyázië' Jesús, en gudxë' légaquië':

—¿Bizx que rutsátsali', en ribódxili' caní? Biti' nátibí bi'i nigúlado' ni. Rásisibi' na'.

<sup>40</sup> Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacua'len Lë', ate' guyázië' ga na' dëbi'.

<sup>41</sup> Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rna lu didza' xidza': Bi'i nigúlado', guyasa. <sup>42</sup> La' guyásatëbi' bi'i nigúlado' na', en buzé'ë-bi'. Chiyú'ubi' chinu iz. Bulu'bani nupa nacua' ni'.

<sup>43</sup> Ní'irö Jesús gunná bé'enë' légaquië' cuntu nu ulu'siyönnë' lë na' guca. Gudxë' légaquië':

—Gulí'güí' le gágubi' bi'i nigúlado' ni.

**Ridxinë' Jesús Nazaret, le naca ladzë'**

(Mt. 13:53-58; Lc. 4:16-30)

**6** Buzé'ë Jesús ni', budxinë' ladzë', ate' yugu' bönni' dá'gaquië' Lë' söjácalenë' Lë'. <sup>2</sup> Cate' bidxín dza lá'ayi quégaquië' bönni' judío, gusí lahuë' Jesús ruséd-inë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni' ni nadélinë'? ¿Nacxi caz runë' le nácgaca bë' na' zá'gaca yehua' yubá? <sup>3</sup> Náquië' bönni' ni gubëdxi yaga na', en zxi'ininu María. Náquië' bóchi'-gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö. <sup>4</sup> Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi dí'a dza queë', en bönachi nacua' lidxë' biti' tun lë' bal.

<sup>5</sup> Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. <sup>6</sup> Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacua' gásibi'lö, rusédinë' bönachi ni'.

**Risól-lë'ë Jesús bönni' dá'gaquië' Lë' tsöjéngaquië' libán**

(Mt. 10:5-15; Lc. 9:1-6)

<sup>7</sup> Ní'irö bulidzë' Jesús idxínnutë' bönni' dá'gaquië' Lë', en gusí lahuë' risól-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. <sup>8</sup> Gunná bé'enë' légaquië'

biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quëgaquië', pero ilu'asë' xiyágado'. <sup>9</sup> Ral-la' ulu'dé'ë xiráchugaquië', pero calëga chopa lari' ulu'xóa yéngaquië'. <sup>10</sup> Gudxë' ca légaquië':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'. <sup>11</sup> Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë' nága-gaquië' xtídzalí', buli'rúaj ni', en buli'quínaj bëchtö da' lë'e lálali'. Lë ni gaca bë' nabága'gaquië' xíguia'. Le nácatë rea' libí'ili', cate' idxín dza ichúguië' Dios quégaca bönachi, ila'guí' ila'záca'rö bönachi lu yödzö na' ca ila'guí' ila'záca' bönachi Sodoma, en Gomorra, yugu' yödzö na' busunítië' Dios.

<sup>12</sup> Ní'irö bila'rúajë' bönni' dá'gaquië' Lë, yöjéngaquië' libán ca ral-la' ulu'bí'í ládxi'gaca bönachi. <sup>13</sup> Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

### Ca bétigaquië' Juan, bönni' buquilë' bönachi nisa

(Mt. 14:1-12; Lc. 9:7-9)

<sup>14</sup> Biyönnë' Herodes, bönni' unná bë', ca naca le runë' Jesús, tu' rizé didza' gátitës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

<sup>15</sup> Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ní'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ní'te.

<sup>16</sup> Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

<sup>17</sup> Caní gunné' Herodes tu' gusól-lë'ë lë cazë' bönni' yöjxóngaqië' Juan na', ate' gulúgui'ë lë' du guié' lu yu'u lidxi guié'. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, bóchë'ë Herodes na'. Herodes gudúë'-nu Herodías na', en butsga ná'alënë'-nu. <sup>18</sup> Juan na' gudxë' Herodes:

—Biti' ral-la' sóalenu'-nu nigula queë' bóchu'u.

<sup>19</sup> Que lë ni na' gusí guró'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu <sup>20</sup> tu' rádxi'në' Herodes Juan. Nózinë' náquië' Juan na' tsahui', en láyai. Que lë ni na' gudapa chí'ë lë', en buzé náguië' lë' idú ládxi'ë sal-la' lë na' rnë' Juan ben ga guró'ë böniga Herodes na'. <sup>21</sup> Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupé'ë le ilé'aj ilahuë' bönni' dë lu náagaquië' uláz queë', en bönni' ta'nná bé'enë' bönni' röjjaquië' gudil-la, enca' bönni' náca-gaquië' lo luyú Galilea. <sup>22</sup> Guyázabi' bí'i nigula queënu Herodías ga na' t'é'aj tahuë', en buyá'abi' ló-gaquië'. Guyaza ládxi'ë Herodes ca runbí', en gula'yaza ládxi'gaca ca' nupa t'é'aj tágulen lë'. Ní'irö Herodes gudxë'-bí' bí'i nigula na', gunné':

—Gunaba bi ré'ënu' gunna' quiu', ate' guna' ca'.

<sup>23</sup> Benë' tsutsu xtídzë'ë, gudxë'-bí':

—Ní'a queë' Xanru' Dios gunna' quiu' bítitës bi inabu' ga idxintë gatsaj ga rinná bë'a.

<sup>24</sup> Burúajbi' lëbí', ate' gunábabi' xiná'abi':

—¿Bizxi inábatsa'?

Lënu gudxinu-bí':

—Ícjë' Juan, bönni' buquilë' bönachi nisa, inabu'.

<sup>25</sup> La' buázatëbí' ga na' zoë' Herodes, en rëbí'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

<sup>26</sup> Ní'irö bulí'innë' Herodes, pero tu' buzöjtjë' Dios, en tu' bila'yöni ca' nupa tágulen lë', biti' gú'unnë' iníti xtídzë'ë na' guzxí' lu në'ë queëbí'. <sup>27</sup> Herodes la' gusól-la'të' tu bönni' rejë' gudil-la zoë' rapa chí'ë, ate' gunná bé'enë' lë' tsöjxi'ë icjë' Juan. <sup>28</sup> Bönni' na' rejë' gudil-la guyijë' lidxi guié', yöjrixë' yen Juan na', ate' bu'ë icjë', nuxöë' le tu lu zxiga' zxön. Budödë' le lu ná'abi' bí'i nigula na', ate' lëbí' bunódzjabi' le queënu xiná'abi'.

<sup>29</sup> Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcháchi'gaquië' lë' yeru ba.

### Rugahuë' Jesús zíanrö ca chi-un gayuá' bönachi

(Mt. 14:13-21; Lc. 9:10-17; Jn. 6:1-14)

<sup>30</sup> Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sëdinë' bönachi. <sup>31</sup> Nacuá' bönachi zían ni', nupa zá'gaca, en nupa söjaca, ga bidxintë bítirö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Gulí'dá. Uyéaj cázaru' ga naca lataj cá'asö, en uzí' ládxi'ru' tu chí'i.

<sup>32</sup> La' légacasë' yöjáquië' tu lë'e bárcodo', ate' bila'dxinë' ni' lataj cá'asö. <sup>33</sup> Bila'lé'e bönachi zían légaquië' söjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. <sup>34</sup> Cate' burúajë' Jesús lë'e bárcodo' na', bilé'enë' bönachi zían na', ate' buéchi' ládxi'ë légaquië' tu' náca-gaquië' ca bö'cu' zxíla'do' biti' zoa nu gapa chí'i légacaba'. Gusí lahuë' rusëdinë' légaquië' le zían. <sup>35</sup> Cate' chiridzó' dza na', yugu' bönni' dá'gaquië' Jesús bila'dxinë' ga zoë', en të' Lë':

—Chiridzó', ate' lataj cá'asö naca ni. <sup>36</sup> Busöl-la' bönachi zían ni para tsöjaca yugu' yú'udo', en yugu' yödzödo' nacua' gásibi'ilö, tsöjój'ugaca yöta, tu' cabí bi dë ni le ilagu.

<sup>37</sup> Bubi'ë didza' Jesús, gudxë' légaquië':

—Gulí'güí' libí'í cázali' le ilahuë'.

Gulé' Lë':

—¿Naru' tsöjój'utsatu' yöta xtila len lászjatu' que idú xunu' beo', ate' gü'ítu' le ilahuë'?

<sup>38</sup> Jesús gudxë' légaquië':

—¿Bal-laxi yöta xtila dë queé'li'? Gulí'tsöjyútsöca'.

Cate' chinóziguequinë', të' Lë':

—Gáyu'sö yöta xtila dë, en chópasöba' böla dëba'.



<sup>39</sup> Ní'irö gunná bē'ē Jesús ilunē' ga ila'bó' bönachi zían na', ila'cuá' tu cō' huéajguequi ga naca lachi' lu daca'.  
<sup>40</sup> Gula'cu'ē tu cō' huéajgaquiē', tu gayuá' huéajgaquiē', en chi-un huéajgaquiē'.  
<sup>41</sup> Ní'irö gudélē'ē Jesús igáyu'tē yōta xtila na', en irópaba' böla na'. Buyúē' zaca' lúzxiba, en gudxē' Dios: "Xclenu'." Ní'irö buzuzxjē' yōta xtila na', en bē'ē quégaquiē' bönni' usēda queē' para ila'guisiē' quégaca bönachi zían na'. Gudisiē' ca' iró-patēba' böla na' quégaca yúgu'tē bönachi na'.  
<sup>42</sup> Gulahuē' yúgu'tē, en bulu'huóljanē'.  
<sup>43</sup> Ní'irö bulu'tubē' le bizxaj que yōta xtila na', en quégacaba' böla, ate' chinu ga'bōra bulu'lí'.  
<sup>44</sup> Guláquiē' ca chi-un gáyu'ē bönni' na' gulahuē'.

### Rizē'e ní'ē Jesús lu nísado'

(Mt. 14:22-27; Jn. 6:16-21)

<sup>45</sup> La' bentē Jesús ga gula'benē' yugu' bönni' dá-gaquiē' Lē' lē'e bárcodo', para ila'nóruē' lahuē', ila'dödē' lu nísado' na', para ila'dxinē' lu yōdzō Betsaida, tsanni ní' Lē' rusöl-lē' bönachi zían na' lídxiguequi.  
<sup>46</sup> Cate' chibudxi busöl-lē' légaquiē', guyijē' tu lu gu'ado', ate' ní' ru'ilenē' Dios didza'.  
<sup>47</sup> Cate' chizá' ral-la, zeaj bárcodo' na' gatsaj láhui'lō nísado', ate' zoē' Jesús tuzē' luyú bidxi na'.  
<sup>48</sup> Bilē'enē' Jesús légaquiē', böniga tu'sé'ē bárcodo' na' tu' recja bö' za' ga na' ta'dödē'. Gudōdi guluhuēla bidxinē' Jesús ga na' nacu'ē, rizē'e ní'ē lu nísado' na', ate' gú'unnē' tōdisē' ga na' nacu'ē.  
<sup>49</sup> Cate' bila'lē'enē' Lē' rizē'e ní'ē lu nísado', guléquinē' bixín na', ate' gula'bōdxi'ē <sup>50</sup> tu' bila'lē'enē' yúgu'tē Lē', en guladxi gula'dzōbinē'. Ní'irö la' bulidztē' Jesús légaquiē', rnnē':

—Bulí'tipa ládxi'li'. Neda' caz. Biti' gádxili'.

<sup>51</sup> Gurenē' Jesús lē'e bárcodo' ga na' nacu'ē, ate' guró' dxi bö' na' recja, ate' légaquiē' gula'niti gula'tíqui'siné' bulu'bábinē'.  
<sup>52</sup> Biti' ta'yéajni'ininé' le rulu'í lē na' benē' Jesús que yōta xtila na'. Ní' naca zidi icja ládxi'do'gaquiē'.

### Ruúnē' Jesús nupa te'e lu yōdzō Genesaret

(Mt. 14:34-36)

<sup>53</sup> Gula'dödē' Jesús, en yugu' bönni' dá'gaquiē' Lē' ia't-sölá'a nísado', ate' bila'dxinē' ga naca lu xiyúgaca bönachi Genesaret. Bulu'dxíguē'ē bárcodo' luyú bidxi ní'.  
<sup>54</sup> Cate' bulu'rúajē' lē'e bárcodo' na', la' bulu'únbē'tē bönachi ní' Jesús.  
<sup>55</sup> Gula'xiti' bönachi na', yōjaca yúgu'tē yōdzōdo' idú gásibi'ilō, en gula'sí lógaquiē' dujuá'gaquiē' yúgu'tē nupa te'e ga zoē' Jesús, zxóagaca yugu' le déguequini, ate' bila'dxinē' gátitēs ta'yönnē' zoē' Jesús.  
<sup>56</sup> Gátitēs ga ridödē' Jesús, yugu' lu yōdzōdo', en yugu' yōdzō zxön, en yugu' yú'udo', tu'cu'ē nupa te'e quégaquiē' gapa naca la' nōza, en gapa naca lu yé'eyi, en ta'tá'yuē' lahuē' Jesús gu'ē légaquiē' lataj ila'gansē' luzxi lari' nácuē'. Yúgu'tē nupa na' bila'gán lari' nácuē' bulu'huócatē dxí'ado'.

### Le tun ga bití' nácagaca bönachi tsahui' lahuē' Dios

(Mt. 15:1-20)

**7** Ní'irö bal-lē' bönni' yudo' fariseo len bal-lē' bönni' yudo' usedi narúajgaquiē' Jerusalén, bulu'dubē' ga zoē' Jesús.  
<sup>2</sup> Bönni' yudo' ni bila'lē'enē' bönni' usēda queē' Jesús tahuē' yōta, bití' nuchí'agaquiē' ná'agaquiē', lē na' rna: Biti' nayárigaca ca nalébiguequinē' tunē' bönni' yudo' na'. Que lē ni na' gula'nnē' quégaquiē'.  
<sup>3</sup> Yugu' bönni' yudo' fariseo na', en ia'zica'rō bönachi judío tunē' ca gulébiguequinē' gulunē' xuz xtó'ogaquiē', ate' channō cabi ta'guibi ná'agaquiē' zían luzuí ca na' nalébiguequinē' tunē', bití' ca' tahuē'.  
<sup>4</sup> Cate' tu'dxinē' rōjō'ugaquiē' lu yé'eyi, channō cabi ta'guibē' lē na' ca nalébiguequinē' tunē', bití' ca' tahuē'. Zíanrō ca' tunē', yugu' le nalébiguequinē' tunē'. Caní ta'guibē' zxiga' yō'ōna, en yugu' zxiga' guíē, en yugu' le tátinē'.  
<sup>5</sup> Que lē ni na' yugu' bönni' yudo' fariseo, en yugu' bönni' yudo' usedi gula'nábinē' Jesús, ta'nnē':

—¿Naru' cabi tunē' yugu' bönni' usēda quiu' ca gulébiguequinē' gulunē' xuz xtó'oru', pero tahuē' yōta bití' nuchí'agaquiē' ná'agaquiē'?

<sup>6</sup> Bubi'ē didza' Jesús, rē' légaquiē':

—Libí'ili', bönni' rulu'ísō tsahui' cuinli'. Nácatē le gudíxjō'ē Isaías, bönni' ní' bē'ē didza' uláz queē' Dios, ca naca queéli'. Buzúajē' lu guichi, gunné':

Yugu' bönni' ni, len rú'agacasē' tunē' neda' bal, calēga idú ládxi'gaquiē'.

<sup>7</sup> Nítisō naca yöl-la' ba ta'gu'ē neda' tu' tu'sédinē' le ta'nná bē' bönachi, calēga xibá quia'.

<sup>8</sup> Caní naca, tu' rucá'analí' le gunná bē'ē Dios, ate' runlí' yugu' le nazí' láhuilí' lu ná'agaca bönachi.

<sup>9</sup> Gudxē' ca' légaquiē':

—Idú ládxi'li' rucá'analí' cá'asō le gunná bē'ē Dios para gunlí' ca naca le nulaga lolí' runlí'.  
<sup>10</sup> Moisés gunné' caní: "Ben bal xuz xinó'o." Gunné' ca: "Nu ulidza zí' xuzi o xiné'e, guli'gútité nu na'."  
<sup>11</sup> Libí'ili' rnnalí' caní: "Channō nu bönni' guíē' xuzē' o xiné'ē: Bití' gaca bi gunna' queéli', tu' naca Corbán." (Didza' ni rna lu didza' xidza': Tu' nuzóa' quez queē' Dios yúgu'tē.) Ní'irö rnnalí': "Bití' run bayudxi bi gunē' bönni' na' quégaquiē' xuz xiné'ē."  
<sup>13</sup> Caní naca, rucá'analí' cá'asō xtídzē'ē Dios para gunlí' le nulaga lolí' runlí', yugu' le rudódlilí' lu ná'agaca xzí'ini xísóali'. Zíanrō ca' le caní runlí'.

<sup>14</sup> Ní'irö Jesús bulidzē' bönni' zían na' nacu'ē ní', en rē' légaquiē':

—Gulí'zé nágali' didza' gu'a, yúgu'tēli', en guli'tséajni'í.  
<sup>15</sup> Biti' bi dē le riyaza nu bönni' le gaca gun ga bití' náquiē' tsahui' lahuē' Dios, pero le rirúaj lē, lē ni gaca gun ga bití' náquiē' tsahui' lahuē' Dios.  
<sup>16</sup> Channō zoa nágali', en riyónilí', bulí'zé nágali'.

<sup>17</sup> Cate' Jesús bulá'alenē' bönachi zían na', guyu'ē tu yu'u, ate' yugu' bönni' usēda queē' gula'nábinē' Lē' ca naca lē na' bucúdzu'ē didza'.  
<sup>18</sup> Jesús gudxē' légaquiē':

—¿Riyádzjatsō ca' queéli' yöl-la' réajni'í? ¿Naru' cabi réajni'ili', yúgu'tē le riyaza nu bönni', bití' gaca gun ga bití' náquiē' tsahui' lahuē' Dios?  
<sup>19</sup> Naca caní tu' cabi

riyaza icja ládxi'da'ahuë', pero lé'ësë' riyaza, ate' rurúaj lë'ë.

Tu' gunné' caní Jesús, bulu'ínë' rë'u naca dxí'a yúgu'të le rë'aj ráguru'. <sup>20</sup> Gunné' ca' Jesús:

—Le rirúaj lu bönni' run ga bití' náquië' tsahui' lahuë' Dios. <sup>21</sup> Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjé' xibá que yöl-la' nutsaga na', en yugu' le ruá' dö'. Tun ga tútië' bönachi, <sup>22</sup> en ta'banë', en ta'zé ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná zí'ë que luzá'agaquië', en tun ba zxön cuíngaquië', en tunë' le canöz. <sup>23</sup> Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

### Tu nigula izá'a réajlë'ënu Jesús (Mt. 15:21-28)

<sup>24</sup> Buzé'ë Jesús ni', ate' bidxinë' gala' ga nacua' yödzo Tiro, en yödzo Sidón. Guyázië' tu yu'u ni', en gú'unnë' cuntú nu inözi, pero bití' ca' guca ucachí' cuinë'. <sup>25</sup> Tu nigula zóabi' bíi nigúlado' queënu, yu'u bö' xihui' lëbi', biyóninu didza' rizé ca naca queë' Jesús, ate' la' bí-datënu ga zoë' Jesús, en buzóa zxíbinu xini'ë. <sup>26</sup> Nigula ni bití' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bí' bíi nigúlado' queënu. <sup>27</sup> Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nácagaca ca zxí'ini xan yu'u, tu' cabí naca dxí'a ugúaru' yöta quégacabi' bí' na', en chú'unaru' le lógacaba' bó'cu'do'.

<sup>28</sup> Bubí'ínu didza' nigula na', gúdxinu Jesús:

—Ön, Xan, pero yugu' bó'cu'do' nacua'aba' zxani ga tágubi', táguba' le bizxaj tu'huóxaj ga na' tágubi'.

<sup>29</sup> Ní'irö Jesús gudxë'-nu, rnnë':

—Tu' gunnó' caní, huáca huóaju'. Chiburúaj bö' xihui' na' guyú'u-bí' bíi nigúlado' quiu'.

<sup>30</sup> Cate' budxinnu lídxinu, bilé'enu-bí' bíi nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

### Jesús ruúnë' tu bönni' nacódzuë', en bití' gaca innë'

<sup>31</sup> Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea. <sup>32</sup> Bönachi ní' dujuágaca tuë' bönni' nacódzuë', en bití' raca innë' ga zoë' Jesús, ate' ta'ta'yu lahuë' Jesús ixóa në'ë lë'. <sup>33</sup> Jesús bubéajë' lë' tsölá'alö ladjagaca bönachi na', ate' buné'ë xibón në'ë yeru náguië' bönni' na'. Gurú'unë' zxóna'do', en gudanë' lúdxë'ë. <sup>34</sup> Ní'irö buyúë' lúzxibálö, en gunné' lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

<sup>35</sup> La' böáljatë náguië', en la' buguítjatë lúdxë'ë, en gunnëtë' dxí'ado'. <sup>36</sup> Jesús gunná bé'enë' légaquië' cuntú nu ilé' ca', pero tsca gunná bé'enë' légaquië', bulu'zëtëre' ca' didza' que lë na' benë'. <sup>37</sup> Bulu'bábinë', ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tu'í didza' nupa bití' guca ila'nnë'.

### Rugahuë' Jesús zíanrö ca choá' gayuá' bönachi (Mt. 15:32-39)

**8** Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bé'lenë' légaquië' didza'. <sup>2</sup> Gudxë' légaquië':

—Ruhuechí' ládxa'a bönachi zían ni tu' chinaca tsonna dza nacua'len neda' ni, en bití' dë le ilágugaca.

<sup>3</sup> Channö usól-la'a léguequi lídxigaca ta'dunsö ca', huala'cuídí' la' nöza, tu' zá'gaca zítu' bál-lagaca.

<sup>4</sup> Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

<sup>5</sup> Gunábinë' Jesús légaquië', rnnë':

—¿Bál-laxi yöta xtila dë queé'li'?

Të' Lë':

—Gádxisö.

<sup>6</sup> Ní'irö Jesús gunná bé'enë' bönachi zían na' ila'bó' lu yu. Gudélë'ë gadxi yöta xtila na', ate' gudxë' Dios:

“Xclenu.” Ní'irö buzuxzjé' léguequi, en bë'ë quégaquië' bönni' usëda queë' para ila'guisië' lógaca bönachi zían na'. <sup>7</sup> Guta' ca' quégaquië' tu chópaba' böla cuidí'. Jesús gudxë' Dios: “Xclenu”, ate' gunná bé'enë' légaquië' ila'guisië' ca' légacaba' lógaca bönachi. <sup>8</sup> Gulagu yúgu'të bönachi na', en bulu'huölaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. <sup>9</sup> Bönachi na' gulagu gulaca idú ca choá' gayuá'gaca. Jesús busól-lë' léguequi lídxigaca, <sup>10</sup> ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

### Ta'nábinë' Jesús gunë' tu le gaca bë' nuzxi náquië' (Mt. 16:1-4; Lc. 12:54-56)

<sup>11</sup> Ní'irö bila'dxinë' bönni' yudo' fariseo ga zoë' Jesús, en gula'sí lógacabé' ta'díl-lalenë' Lë' didza'. Gulé'ennë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. <sup>12</sup> Gunnëda' lúdxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

<sup>13</sup> Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsölá'a nísado'.

### Le tu'sédinë' bönni' yudo' naca ca cúa zi que yöta xtila (Mt. 16:5-12)

<sup>14</sup> Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'.

<sup>15</sup> Ní'irö Jesús buzéajni'ínë' légaquië', rnnë':

—Buli'yútsöca' queé'li'. Guli'gún chí' cuiní' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

<sup>16</sup> Gula'sí lógacabé' tu'ë didza' bönni' usëda queë' la' légasasë', ta'nnë':

—Gunné' caní tu' cabí dë yöta xtila gáguru'.

<sup>17</sup> Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dè yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'? <sup>18</sup> ¿Zóatsö guiój lolí', en bití' rilé'eli', en zóatsö guídi nágali', en bití' riyónili'? ¿Naru' cabí röjnétseli'? <sup>19</sup> Cate' ní' buzzuxja' gayu' yöta xtila, ate' gulahué' chi-un gáyu'è bönni', ¿bál-laxi ga'böra bulilí' le bizxaj butúbili'?

Gula'nné':

—Chinnu.

<sup>20</sup> Gunné' ca' Jesús:

—Cate' ní' buzzuxja' gadxi yöta xtila, ate' gulagu choá' gayuá' bönachi, ¿bál-laxi ga'böra bulilí' le bizxaj butúbili'?

Gula'nné':

—Gadxi.

<sup>21</sup> Ní'irö Jesús gudxé' légaquié':

—¿Naru' cabí réajni'itseli' na'a, bé'a didza' que le tu'sédiné' bönni' na'?

### Jesús ruiné' bönni' Betsaida nachul-la lahué'

<sup>22</sup> Cate' Jesús, en bönni' dá'gaquié' Lè' bila'dxiné' yödzo Betsaida, bila'dxín ga zoé' Jesús nupa dujuá'-gaquié' queé' tu bönni' nachul-la lahué'. Ta'tá'yué' lahué' cané' bönni' na'. <sup>23</sup> Jesús gudélé'è në'è bönni' na' nachul-la lahué', ate' guché'è lè' ní'ilö ra' yödzo. Ní' budxié' zxöna' guiój lahué', en guxóa në'è lè'. Ní'irö gunábiné' lè', rnné':

—¿Ba rilé'enu' lati'?

<sup>24</sup> Buyúé' bönni' na' nachul-la lahué', rnné':

—Rilé'egacada' bönachi, nalá'gaca ca yugu' yaga, pero ta'dá bönachi na'.

<sup>25</sup> Leyúbölö guxóa në'è Jesús guiój lahué', ate' buyúdé'è bönni' na' nachul-la lahué', ate' böácaté dxí'ado' guiój lahué'. Na'a rilé'ené' dxí'ado' yúgu'té.

<sup>26</sup> Ní'irö Jesús gusól-lé'è lè' lidxé', rnné':

—Bití' tsöjdödu' lahui' yödzo, en cuntu nu guío' le be-na' nu zoa lu yödzo ni.

### Rnné' Pedro: "Jesús náquié' Cristo"

(Mt. 16:13-20; Lc. 9:18-21)

<sup>27</sup> Gudödi na', bulu'zé'è Jesús, en yugu' bönni' uséda queé' ní', ate' gula'dödé' yugu' yódzödo' nabábagaca Cesarea, ga na' rinná bé'è Filipo. Tsanni ní' yú'ugaquié' nöza, Jesús rinabi yudxé' yugu' bönni' uséda queé', rnné':

—¿Nuzxi ta'nná bönachi naca'?

<sup>28</sup> Bulu'bi'è didza', ta'nné':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-la nacu' Elías, bönni' bé'è didza' uláz queé' Dios dza ní'te. Ta'nná ia'bal-la nacu' bönni' yúbölö bé'è didza' uláz queé' Dios dza ní'te.

<sup>29</sup> Ní'irö Jesús gunábiné' légaquié', rnné':

—Nazxi libí'ili', ¿nuzxi rnnalí' naca'?

Bubi'è didza' Pedro, rnné':

—Lí' nacu' Cristo.

<sup>30</sup> Ní'irö Jesús gunná bé'ené' légaquié' cuntu nu ulu'siyönné' Nu náquié'.

### Riguíxjö'è Jesús ca si' ilútié' Lè'

(Mt. 16:21-28; Lc. 9:22-27)

<sup>31</sup> Ní'irö gusí lahué' Jesús rusédiné' bönni' dá'gaquié' Lè', rnné':

—Run bayudxi qui'i saca'a neda', Bönni' Guljé' Bönachi. Bönni' gula tu'zéajni'iné', en yugu' bixúz unná bé', en bönni' yudo' tu'sédiné' ulu'zóé' neda' tsólá'alö. Ilútié' neda', pero cate' gaca tsonna dza ubana'.

<sup>32</sup> Yálajsö bé'lené' légaquié' didza' ni. Ní'irö Pedro guché'è Jesús tsólá'alö, en gusí lahué' ridil-lè' lè' didza'. <sup>33</sup> Buécjé' Jesús, en buyúé' ia'zica'rè' bönni' uséda queé', ate' buzené' bach Pedro, rnné':

—Gucuita ga zoa'. Nacu' ca Satanás, tu' xihui'. Le rizá' ládxi'u bití' za' lu në'è Dios, pero ca ta'zá' ládxi'gaca bönachi naca.

<sup>34</sup> Ní'irö Jesús bulidzé' yugu' bönni' uséda queé', enca' bönachi nacuá' ní', en gudxé' légaquié':

—Channö ré'ené' nu bönni' té'è neda', ral-la' uzóé' tsólá'alö le ré'eni quéziné', en gáquié' ca tu bönni' sa'yéajé' söjté'è lè'e yaga cruz, ate' ní'irö huáca té'è neda'. <sup>35</sup> Nu bönni' ruí'ida' ládxi'è yöl-la' na'bán queé', uní'tié' le, pero nu bönni' uní'tié' yöl-la' na'bán queé' tu' dé'è neda', o tu' dé'è didza' dxí'a quia', udélí'né' bönni' ni yöl-la' na'bán queé'. <sup>36</sup> ¿Naru' uzi'tsè' xibé tu bönni' channö utubé' yúgu'té le dè yódzölió ni, pero uniti cuiné'? <sup>37</sup> Bití' bi gaca unödzejé' tu bönni' le huó'ái cuiné'. <sup>38</sup> Channö zoé' nu bönni' rutuí'iné' quia' neda', en que xtídza'a lógaca bönachi ni nucá'anagaca Dios, en tun dul-la', lésca' caní neda', Bönni' Guljé' Bönachi, utuí'ida' queé' bönni' na' cate' guídalena' yöl-la' huáca zxön queé' Xuzá', ate' dzágagaquié' gubáz lá'ayi neda'.

**9** Jesús gudxé' ca' légaquié', rnné':

—Le nácaté' rea' libí'ili', nacuá' ni nupa bití' iláti-gaca cate' ila'lé'erö idinná bé'è Dios luyú ni, en ilá' lahui yöl-la' huáca zxön queé'.

### Ridzá'a ca riná' lahué' Jesús

(Mt. 17:1-13; Lc. 9:28-36)

<sup>2</sup> Cate' chigudödi xopa dza, Jesús guché'è Pedro, en Jacobo, en Juan, ate' légacasé' yöjáquié' tu lu guí'a sibi. Ní' bidzá'a ca riná' lahué' Jesús lógaquié' yonné' na'.

<sup>3</sup> Guyèpi yösa bení' lari' nácué' Jesús, ate' guca chiguíchido'os. Zxíla'do'os guca, le cuntu nu ra' lari' yódzölió ni gaca gun chiguíchido'os ca guca lari' na'.

<sup>4</sup> Bulu'lú'i lógaquié' Elías, en Moisés, tu'ílené' Jesús didza'. <sup>5</sup> Ní'irö Pedro gudxé' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queé' Moisés, en ia'tú queé' Elías.

<sup>6</sup> Caní gunné' Pedro tu' cabí nóziné' bi na' rnné', tu' tádxiné' bönni' uséda queé' Jesús na'. <sup>7</sup> Ní'irö guró'ö böaj le gulú'u xzul-la légaquié', ate' biyón chí'i nu ruí' didza' lu böaj na', rna:

—Bönni' ni Zxí'ina'. Nadxí'ida' Lè'. Buli'zé' nágali' Lè'.

<sup>8</sup> La' bulu'yuté' pero cúnturö nu ta'lé'ené'. Tuzé' Jesús zóalené' légaquié'.

<sup>9</sup> Tsanni ni' yú'ugaquië' nöza, tu'dinnië' lu gu'ía sibi na', Jesús gunná bé'enë' légaquië' cuntu nu ulu'siyön-në' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. <sup>10</sup> Que lë ni na' gula'gú'usë' ícja-gaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunné' ubanë' lu yöl-la' guti. <sup>11</sup> Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guidë' Elías zí'aló ca guidë' Cristo?

<sup>12</sup> Bubi'ë didza' Jesús, rnnë':

—Le nácatë guidë' Elías zí'aló, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'í sáquë'ë Bönni' Guljë' Bönachi, ate' cá'asó ulu'cá'ana bönachi Lë'? <sup>13</sup> Rea' libí'ilí': Chibidë' Elías, ate' gulunë' queë' tsca gulé'ënnë', tsca nazúaj lu guichi lá'ayi ca ral-la' gaca queë'.

### Jesús ruünë'-bí' bí'i bönni' yu'u lëbi' bö' xihui'

(Mt. 17:14-21; Lc. 9:37-43)

<sup>14</sup> Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacua' bönachi zían ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'. <sup>15</sup> Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijódxigaca Lë': "Padiux."

<sup>16</sup> Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenlí' légaquië'?

<sup>17</sup> Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bí' bí'i bönni'do' quia' ni quiu', yu'u lëbi' bö' xihui' le run ga bití' raca innëbi'. <sup>18</sup> Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidí' ruá'abi', en rutil-la láya'bi'. Que lë ni na' zeaj ridxítabi'. Gunábigacada-në' bönni' usëda quiu' ulu'béajjë' bö' xihui' na', pero bití' gula'zéqui'në'.

<sup>19</sup> Bubi'ë didza' Jesús, rnnë':

—Libí'ilí', bönni' cabí' ta'yéajlë'ë. ¿Gáca'xte caz ral-la' sóalena' libí'ilí'? ¿Gáca'xte caz ral-la' guá' ilena' queé'lí? Gulí'diguá'-bí' quia' ni.

<sup>20</sup> Djuuá'agaquië'-bí' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzó'öbi' lu yu, ate' burixi butula lëbi', ate' bidxia bidxina' zidí' ruá'abi'.

<sup>21</sup> Ní'irö Jesús gunábinë' xúzibi' bí'i na', rnnë':

—¿Gáca'xi chiguca raca caní' queé'bi'?

Rnnë' xúzibi' na':

—Ní' nácatëbi' bí'ido' ré'ebi' caní. <sup>22</sup> Zían luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxí' netu', gácalenu' netu'.

<sup>23</sup> Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

<sup>24</sup> La' bë'të' zidzaj didza' xúzibi' bí'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

<sup>25</sup> Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', rë' le:

—Lí', bö' xihui' runu' ga bití' raca inná, en bití' raca yöni bönachi, rinná bé'eda' lí' uruju' lu bí'i ni, en bítí'rö tsu'u lëbi'.

<sup>26</sup> Guródxí'a bö' xihui' na', en burixi butúlada' bí'i na'. Ní'irö burúajtë, en bucá'ana bí'i na' ca bí'i nati cázabi'. Ca' naca, gulu'í didza' bönachi zían ni', ta'nná:

—Chinátibi'.

<sup>27</sup> Ní'irö Jesús gudélë'ë ná'abi', en buchisé'-bí', ate' guzuíbi' bí'i na'.

<sup>28</sup> Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que bití' guca ubéajtu' netu' bö' xihui' na'?

<sup>29</sup> Jesús gudxë' légaquië':

—Bití' gaca ubéajlí' cá'asó bö' xihui' caní, pero tuz channö ulídzalí'-në' Dios, en gunlí' gubasa.

### Jesús riguixjö'ë leyúbölö ca sí' ilútië' Lë'

(Mt. 17:22-23; Lc. 9:43-45)

<sup>30</sup> Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Bití' ré'ënnë' Jesús nu inözi ga na' zoë' <sup>31</sup> tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

<sup>32</sup> Bití' gula'yéajni'inë' didza' ni rë' légaquië', ate' tu' tádxinë', bití' bi gula'nábinë' Lë'.

### Nu naca lo

(Mt. 18:1-5; Lc. 9:46-48)

<sup>33</sup> Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

<sup>34</sup> Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. <sup>35</sup> Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu ré'ëni gaca lo ral-la' gaca ca tu bönni' cuídí'sö, enca' ca ní'a ná'alí' yúgu'téli'.

<sup>36</sup> Ní'irö Jesús gudélë'ë-bí' tubí' bí'ido', en buzöë'-bí' gatsaj láhui'lö ga na' nacu'ë. Ní' ruidë'-bí', rë' légaquië':

<sup>37</sup> —Nu bönni' sí' lu në'ë tu bí'ido' caní tu' néquibi' quia', sí' lu në'ë ca' neda', ate' nu bönni' sí' lu në'ë neda', calëga néda'sö sí' lu në'ë, pero sí' lu në'ë ca' Xuza', Bönni' na' nasól-lë'ë neda'.

### Nu bití' ridá'baga' rë'u, rácalen rë'u

(Mt. 10:42; Lc. 9:49-50)

<sup>38</sup> Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajjë' yugu' bö' xihui', rugunë' dxin lo'. Gunná bé'etu' lë' bítí'rö gunë' ca', tu' cabí' dë'ë rë'u.

<sup>39</sup> Ní'irö Jesús gudxë' lë':

—Bití' inná bé'elí'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La'

neda', bití' ca' gaca bönni' na' inné' zí'è quia'. <sup>40</sup> Caní naca, nu bití' ridá'baga' rë'u, rácalen nu na' rë'u. <sup>41</sup> Núti'tës nu gunna queé'li' tu zxíga'do' nisa guí'jali' tu dá'alí' neda', Cristo, sí'i caz nu na' le ral-la' gata' que.

**Zoa bönadxi queéru' gunru' ga nu gun dul-la'**  
(Mt. 18:6-9; Lc. 17:1-2)

<sup>42</sup> Gunné' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxí'a ugal-la' nu na' guichi riyë-tu yaga yeni, en tsöjchú'una cuini lu nísado'. <sup>43</sup> Channö tu no'o gun ga gunu' dul-la', guchugu le. Dxí'arö gaca quiu' tsöjtsáziu' ga su' ibanu' zoa tuz no'o, calëga zoa chopa no'o, ate' tsöjtsáziu' lu guí' gabila, ga ni' bití' ulu guí' que. <sup>44</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. <sup>45</sup> Lësca' caní, channö tu ni'u gun ga gunu' dul-la', guchugu le. Gácarö dxí'a quiu', tsöjtsáziu' ga su' ibanu' zoa tuz ni'u, calëga zoa chopa ni'u, ate' tsöjtsáziu' lu guí' gabila, ga ni' bití' ulu guí' que. <sup>46</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu. <sup>47</sup> Lësca' caní, channö tu guí' lo' gun ga gunu' dul-la', guléaj le. Gácarö dxí'a quiu' tsöjtsáziu' ga rinná' bë'è Dios zoa tuz guí' lo', calëga zoa chopa guí' lo', ate' tsöjtsáziu' lu guí' gabila. <sup>48</sup> Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

<sup>49</sup> 'Ruxí'iru' bëla' zödi', en rugála'ru' le ra' guí', para cabí' gaca ditaj. Lë ni rusedi rë'u ca ulu'huöaca dxí'a yúgu'të bönachi. Lësca' caní, ré'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. <sup>50</sup> Dxí'a naca zödi', pero channö initi yöl-la' siná'a que, ¿nacxi úniru' le siná'a? Gulí'gaca la' libí'isili' ca zödi' dxí'a, sóali' dxí'ado' tuli' len ia'tuli'.

**Rusédinë' Jesús que nu rulá' yöl-la' nutsaga na'**  
(Mt. 19:1-12; Lc. 16:18)

**10** Buzé'ë Jesús yödzö Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busédinë' légaquië' ca run cazë'. <sup>2</sup> Ní'irö bila'dxinë' bönni' yudo' fariseo ga zoë' Jesús, ate' té'ënë' ilunë' ga bi inné' Jesús para gaca ulu'zéguië' Lë' didza'. Gula'nábinë' Lë', ta'nné':

—¿Dë lataj bönni' nutsaga në'ë usanë'-nu nigula queë'?

<sup>3</sup> Bubi'ë didza' Jesús, rnnë':

—¿Bizxi gunná' bé'enë' Moisés libí'ili'?

<sup>4</sup> Gula'nné':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

<sup>5</sup> Bubi'ë didza' Jesús, rnnë':

—Gunná' bé'enë' Moisés libí'ili' caní tu' naca zidi icja ládxí'do'oli', <sup>6</sup> pero cate' gusí lo rata' yödzölió, Dios benë' légaquië' bönni', en nigula. <sup>7</sup> Gunné': "Que lë ni na' ucá'anë' bönni' xuz xiné'ë, en tsöjsóalenë'-nu nigula queë', <sup>8</sup> ate' chopë' ni ulu'huöáquië' ca tuz bönachi." Que lë ni na' bí'tirö nácaquië' chopë' pero tuz

chinácagaquië'. <sup>9</sup> Que lë ni na' ca', nu naca bönachi bití' ral-la' ulá'a nupa na' chinutsáquië' Dios.

<sup>10</sup> Cate' gula'yázië' yu'u, gula'nabi yúdxinë' bönni' usë-da queë' Jesús ca naca didza' na' bë'ë. <sup>11</sup> Jesús gudxë' légaquië':

—Núti'tës bönni' ulá'alenë'-nu nigula queë', en ut-saga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'-nu dul-la' nigula na' guzóalenë'-nu zí'alö. <sup>12</sup> Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

**Jesús rulidza tsáhuë'-bi' yugu' bí'ido'**  
(Mt. 19:13-15; Lc. 18:15-17)

<sup>13</sup> Ní'irö bila'dxín bönachi ga zoë' Jesús dujuá'gaquië' bí'ido' quéguequi. Té'ëni ixó'a në'ë légaabi', ate' gula'sí lógaquië' bönni' usëda queë' Jesús ta'dil-la dídza'-gaquië' nupa na' dujuá'agaca légaabi'. <sup>14</sup> Cate' bilé'enë' Jesús lë ni, gulénë' légaquië', en gunné':

—Gulí'güi'-gácabi' bí'ido' lataj ilá'dxinbi' quia'. Bití' uzága'gacali'-bi', tu' gata' quégaca nupa náca'gaca ca bí'ido' ni, lataj ga rinná' bë'è Dios. <sup>15</sup> Le nácatë' rea' libí'ili': Nu cabí' sí' lu në'e le rinná' bë'è Dios ca runbi' tu bí'ido', bití' ca' tsaza ga ni' rinná' bë'ë.

<sup>16</sup> Ní'irö Jesús bunidë'-bi' yugu' bí'ido' na'. Guxó'a në'ë légaabi', en bulidza tsáhuë'-bi'.

**Bönni' cuidi' napë' yöl-la' tsahui'**  
(Mt. 19:16-30; Lc. 18:18-30)

<sup>17</sup> Cate' bu'ë Jesús nöza, carelö bidë' tu bönni', en buzó'a zxibë' lahuë' Jesús, en gunábinë' Lë', rnnë':

—Bönni' Usedi idú dxí'a, ¿nacxi guna' para idéli'da' yöl-la' na'bán idú?

<sup>18</sup> Jesús gudxë' lë':

—¿Bizx que ru'u neda' didza', rnnö': "Idú dxí'a"? Cuntu nu bönni' náquië' idú dxí'a. Tuzë' Dios náquië' idú dxí'a. <sup>19</sup> Chinóz quézinu' yugu' le gunná' bë'ë Dios, gunné':

Bití' gunu' dul-la' le riguitsaj xibá que yöl-la' nutsaga na'.

Bití' gútiu' bönachi.

Bití' cuanu'.

Bití' innió' que luzó'o le cabí' nácatë'.

Bití' ucáchí'lanu'.

Ben bal xuz xinó'o.

<sup>20</sup> Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' náca'catea' bí'ido'.

<sup>21</sup> Len yöl-la' dxí'i ladxí' queë', Jesús buyúë' lë', rnnë':

—Tu le riyadzaj quiu'. Guyéaj, yöjëtí' yúgu'të le dë quiu', en bunödzej quégaca bönachi yechí' lë na' sí'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjté'ë lë'e yaga cruz, ate' to'o neda'.

<sup>22</sup> Cate' biyönnë' didza' ni, buí'innë', ate' söhuó'jë' risëbi ládxë'ë tu' dëda' yöl-la' tsahui' queë'.

<sup>23</sup> Ní'irö buyüë' Jesús gásibi'ilé', en gudxë' yugu' bön-ni' usëda queë':

—Böniga naca ila'yaza nupa ta'lé'e yöl-la' tsahui' ga rinná b'ë'ë Dios.

<sup>24</sup> Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libí'ili', xzí'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná b'ë'ë Dios. <sup>25</sup> Nácarö böniga tsázië' nu bönni' rilé'enë' yöl-la' tsahui' ga rinná b'ë'ë Dios, ca tódiba' böa' ta'bía-ba' bönachi lu nagui yötsi'.

<sup>26</sup> Cate' bila'yönnë' didza' ni, bulu'bánnitëronë' ca'. Ta'n-né' la' légacase':

—¿Nuzxi caz gaca ulá, channö?

<sup>27</sup> Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

<sup>28</sup> Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

<sup>29</sup> Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o bóchë'ë, o zanë', o xuzë', o xinë'ë, o nigula queë', o yugu' xzí'inë', o xiyüë', tu' runë' xichina' o tu' runë' libán que didza' dxi'a quia', <sup>30</sup> bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' bóchë'ë, en yugu' zanë', en yugu' xinë'ë, en yugu' xzí'inë', en yugu' xiyüë', enca' yugu' le ila'bía ládxi'gaca bönachi lë', ate' lu yödzölió sí' za', gata' yöl-la' na'bán idú queë'. <sup>31</sup> Zían nupa nácatë lo na'a, ilaca cuídísö ni', ate' nupa nácatë cuídísö na'a, ilaca lo ni'.

#### Leyúbölö riguíxjö'ë Jesús ca sí' ilútië' Lë'

(Mt. 20:17-19; Lc. 18:31-34)

<sup>32</sup> Cate' ni' yú'ugaquië' nöza, ta'benë' sōjāquië' Jerusalén, nanóruë' Jesús lōgaquië' bönni' usëda queë'. Nanítiguequinë', en lu yöl-la' rádxisö sōjācalenë' Lë'.

Leyúbölö Jesús guchë'ë quez idxínnutë' na'. Gusí lahuë' ru'ílenë' légaquië' didza' ca naca le ral-la' gaca queë'.

<sup>33</sup> Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná b'ë', en lu ná'agaquië' bönni' yudó' usedi, ate' chūguië' quia' gátia', en ulu'dödë' neda' lu ná'agaquië' bönni' zítu'. <sup>34</sup> Bönni' na' ulu'titjë' neda', en ilúndë'ë neda' zí'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

#### Jacobo en Juan ta'nábinë' Jesús bi gunë' quégaquië'

(Mt. 20:20-28)

<sup>35</sup> Ní'irö gula'bigüë'ë Jacobo, en Juan, xzí'inë' Zebedeo, lahuë' Jesús, en té' Lë':

—Bönni' Usedi, ré'ënitü' gunu' queëtu' le inábatu'.

<sup>36</sup> Jesús gudxë' légaquië':

—¿Bizxi ré'ënilí' guna' queé'li'?

<sup>37</sup> Gulé' Lë':

—Cate' idxín dza cō'u ga inná b'ë'u, ben ga có'ötu' tu-tu' cuitu' ibëla, en ia'tutu' cuitu' yógöla.

<sup>38</sup> Ní'irö Jesús gudxë' légaquië':

—Biti' nózili' bi rinábali'. ¿Naru' huáca sí'ili' le ral-la' sí'a neda', le naca le qui' saca'a? ¿Naru' huáca idílali' nisa ca idila' neda' nisa, gátia'?

<sup>39</sup> Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui' saca'a neda', sí'ili' ca' libí'ili', en ca idila' neda' nisa, idílali' ca' nisa, <sup>40</sup> pero bití' dë lu na'a cóa' nu cuía cuita' ibëla, en nu cuía cuita' yógöla. Dios unödziejë' quégaquië' bönni' chinupë'ë quégaquië' yugu' lataj na'.

<sup>41</sup> Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. <sup>42</sup> Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácatë lo ládja-gaquië' ta'nná be'e luzé'eguequi. <sup>43</sup> Biti' gaca caní queé'li', pero nu gué'ëni gaca zxön ga zóali', ral-la' gun xichinlí' ia'zica'röli', <sup>44</sup> ate' nú'titëslöli' nu gué'ëni gaca lo ral-la' gaca ca bönni' huen dxin tsaz queé'li' yúgu'té'li'.

<sup>45</sup> Caní ral-la' gunlí' tu' bida' ni neda', Bönni' Guljë' Bönachi, calëga para nu gun xichina', pero para guna' xichingaca bönachi, en udöda' yöl-la' na'bán quia' le huó'áuida' bönachi zían.

#### Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

<sup>46</sup> Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujé' Jesús yödzö ni, dzága-gaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, xzí'inë' Timeo. Rinabë' nu bi gúnna'sö queë'.

<sup>47</sup> Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¿Jesús, xzí'ini xísóë' David! ¿Buéchi' ladxí' neda'!

<sup>48</sup> Nupa ta'dödi ni' gula'dil-la lë' didza'. Té lë':

—Busayaj ru'u.

Ní'irö zídzejrö bulidzë', rnnë':

—¿Xzí'ini xísóë' David! ¿Buéchi' ladxí' neda'!

<sup>49</sup> Ní'irö guzóë' dxisö Jesús, ribözë', ate' ré' légaquië':

—Buli'lidzë'.

Bulu'lidzë' bönni' na' nachul-la lahuë'. Té lë':

—¿Butipa ládxi'u! ¿Guyaschi! ¿Rulidzë' lí'!

<sup>50</sup> Ní'irö gurú'unë' tsölá'alö lari' naxóa yenë'. La' guyásatë', en bidë' ga na' zoë' Jesús. <sup>51</sup> Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huó'alaj guiój

lahua'.

<sup>52</sup> Jesús gudxë' lë':

—Böaj lidxu'. Chinuhuóacu' tu' réajlë'u neda'.

La' böáljatë guiój lahuë', ate' sa'yéajlenë' Jesús.

#### Riyazië' Jesús yödzö Jerusalén

(Mt. 21:1-11; Lc. 19:28-40; Jn. 12:12-19)

**11** Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzö

Betfagé, en yödzo Betania, en ga na' dè ca' Guí'a Yaga Olivo. Ní'irö Jesús gusól-lè'è chopè' bönni' usèda queè',<sup>2</sup> en rë légaquiè':

—Guli'tséaj lu yödzo'do' dè loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lèba'. Guli'sedxi-ba', en guli'ché'-ba' quia' ni.

<sup>3</sup> Channö nu bi gufé libí'ili' tu' runli' lè ni, guli'guié nu na': "Xanru' riquinnè'-ba', ate' la' usól-la'tè'-ba' quiu'."

<sup>4</sup> Ní'irö yöjáquiè', en yöjxáca'gaquiè'-ba' búrrodo' na', nága'ba' ra' nöza ga nu riyaza lö'a, ate' gula'sedxè'-ba'.

<sup>5</sup> Nupa nacua' ni' tē légaquiè':

—¿Bizxi ni runli'? ¿Bizx que risédxili'-ba' búrrodo' na'?

<sup>6</sup> Bulu'bi'è didza' bönni' usèda queè' Jesús, gulé' légaquiè' ca na' chigudxi cazè' Jesús légaquiè', ate' gulu'è légaquiè' lataj. <sup>7</sup> Ní'irö gula'ché'-ba' búrrodo' na' ga na' zoè' Jesús. Gula'xóè' lari' quégaquiè' cúdzu'ba', ate' Jesús gudxié'-ba'. <sup>8</sup> Zián bönni' nacué' ni' gula'chiljè' lari' quégaquiè' gapa naca la' nöza. Ia'bal-la bönachi ni' gula'guítsaj zin le bulu'xó'a la' nöza.

<sup>9</sup> Gula'sí lo nupa nanórugaca lahué' Jesús, en nupa na' zá'gaca cúdzulè' tu'i zidzaj didza', ta'nné':

—¡Yöl-la' ba! ¡Xanru' Dios gun lá'ayé' Bönni' zè'è ni, nasól-lè'è Dios Lè! <sup>10</sup> ¡Dios gun lá'ayé' Bönni' ni si' inná bē'è, ca na' gunná bē'è xuz xtó'oru' David! ¡Yöl-la' ba Dios!

<sup>11</sup> Caní guca, bidxinè' Jesús Jerusalén, ate' guyáziè' lö'a yudo'. Cate' budxi buyúè' yúgu'tè le nacua' idú gásibi'ilö ni', burúajè' zaca' yödzo Betania tu' chiridzó', ate' dzágagaquiè' Lè' yugu' bönni' usèda queè'.

### Jesús rulidza zì'è tu yaga higo

(Mt. 21:18-19)

<sup>12</sup> Cate' za' rení' ia'tú dza, ate' tu'rúajè' Jesús, en yugu' bönni' dá'gaquiè' Lè' yödzo Betania, ridunè' Jesús. <sup>13</sup> Zi'-tu' bilé'enè' tu yaga higo dxía xilaguí'. Gubígui'è ga na' zoa yaga na' channö utsöjxaquiè' lati' le ribía. Cate' bidxinè' ni' bití' bi yöjxáquiè' le ribía. Xiláguí'sö dxía tu' cabí ridxini dza cuía. <sup>14</sup> Ní'irö Jesús bulidzè' yaga na', rn-nè':

—Bíti'rö nu gagu le ribía quiu'.

Yugu' bönni' usèda queè' bila'yönnè' didza' ni.

### Jesús rulatjè' lö'a yudo'

(Mt. 21:12-17; Lc. 19:45-48; Jn. 2:13-22)

<sup>15</sup> Cate' bila'dxinè' Jesús, en yugu' bönni' dá'gaquiè' Lè', yödzo Jerusalén, guyáziè' Jesús lö'a yudo', en gusi lahué' rubéajè' ní'ilö nupa tuti', en nupa to'o lu lö'a yudo'. Burixè' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dodo'.

<sup>16</sup> Bití' ca' bē'è lataj nu bi guá', uzóa nöza ga naca lö'a yudo'. <sup>17</sup> Busédinè' nupa nacua' ni', rnné':

—Nazúaj lu guichi lá'ayi, rnna: "Lidxa' sí'i le, yu'u ga bönachi iduté yödzo'lió ulu'lidza Dios." Libí'ili' chinunilí' le ca naca lídxigaca gubán.

<sup>18</sup> Cate' yugu' bixúz unná bē', en yugu' bönni' yudo' usedi bila'yönnè' didza' ni, gula'sí lógaquiè' tu'guiljè' nacxi ilútiè' Jesús, pero tu' tádxinè' le ilún bönachi, bití' bi gulunè' queè', tu' tu'bani yúgu'tè bönachi ca naca le

rusédinè' Jesús. <sup>19</sup> Cate' chiridzó' burúajè' Jesús lu yödzo na'.

### Ribidxi yaga higo bulidza zì'è Jesús

(Mt. 21:20-22)

<sup>20</sup> Cate' za' rení' ia'tú dza, gula'dödè' Jesús, en yugu' bönni' dá'gaquiè' Lè' ga zoa yaga higo na' bulidza zì'è Jesús, en bila'lé'enè' le, chinabidxi idú luí. <sup>21</sup> Ní'irö yöjnenè' Pedro bi guca, ate' gudxè' Jesús:

—Bönni' Usedi, buyútsöca'. Chinabidxi yaga higo ni bulidza zì'u néaje.

<sup>22</sup> Bubi'è didza' Jesús, rë légaquiè':

—Guli'tseajlè' Dios. <sup>23</sup> Le nácatè rea' libí'ili', channö nu bönni' guié' guí'ado' ni: "Gucuíta ni, yöjsóa lu nísado'", en bití' gaca chopa ládxè'è bönni' na', pero idú ládxè'è tseajlè'è gunè' Dios ca na' rnnè', ca' gaca. <sup>24</sup> Que lè ni na' rea' libí'ili': Yúgu'tè le inábalí' cate' ulídzalí-nè' Dios, guli'tséajlè' chibennè' Dios queé'li' lè na' rinábalí', ate' gunnè' queé'li'. <sup>25</sup> Cate' ni' rulídzalí-nè' Dios, channö zoa nu rileli' nu bi ben queé'li', bulí'niti lo nu na', para uniti lahué' ca' libí'ili' Xúzili' na' zoè' yehua' yubá ca naca dul-la' nabága'li'. <sup>26</sup> Channö cabí uniti lolí' bönachi, bití' uniti lahué' Xúzili' zoè' yehua' yubá libí'ili' dul-la' nabága'li'.

### Yöl-la' unná bē' dē lu nē'è Jesús

(Mt. 21:23-27; Lc. 20:1-8)

<sup>27</sup> Ní'irö Jesús, en yugu' bönni' dá'gaquiè' Lè' yöjhuój-gaquiè' Jerusalén. Cate' ni' ridé' Jesús ga naca chila yudo', bila'dxinè' yugu' bixúz unná bē', en yugu' bönni' yudo' usedi, en bönni' gula tu'zéajni'inè', ga zoè'. <sup>28</sup> Gula'nábinè' Jesús, ta'nné':

—¿Bizxi yöl-la' unná bē' dē lu no'o runu' yugu' lè ni? ¿Nuzxi caz budödi lu no'o yöl-la' unná bē' gunu' caní?

<sup>29</sup> Bubi'è didza' Jesús, rë légaquiè':

—Neda' ca' inábidá' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lè ni. <sup>30</sup> ¿Nuzxi budödi lu nē'è Juan uquilè' bönachi nisa? ¿Naru' Dios o bönachi? Guli'nnátsöca'.

<sup>31</sup> Gula'sí lógaquiè' tun xtídzá'gaquiè' la' légacasè', ta'nné':

—Channö innaru' Dios gusól-lè'è lè', guié' rē'u: "¿Bizx que bití' guyéajlè'è'li' lè'?" <sup>32</sup> ¿Naru' gufètsaru'-nè': Gula'sól-lè'è bönni' lè'?

Caní ta'zá' ládxí'gaquiè' tu' tádxinè' le ilún bönachi zían nacua' ni' tu' téquiquequi yúgu'tè bönachi na' bē'è didza' Juan na' uláz queè' Dios. <sup>33</sup> Que lè ni na' gulé' Jesús:

—Bití' nöztu'.

Ní'irö Jesús gudxè' légaquiè':

—Neda' ca' bití' quíxjö'ida' libí'ili' bi yöl-la' unná bē' dē lu na'a rúnida' yugu' lè ni.

### Rucúdzu'è didza' Jesús ca gaca quégaca huen dxin bití' nácagaca tsahuí'

(Mt. 21:33-46; Lc. 20:9-19)

**12** Ní'irö gusí lahué' Jesús ru'ilenè' yugu' bönni' dá'gaquiè' Lè' didza' yugu' le rucúdzu'è didza', rnnè':

—Guzóë' tu bönni', bud'éë lubá uva zían ga naca lu xiyúë'. Guléquië' lë'a que, en guchó'önë' tu röga' guió'j ga isié' xisi uva na'. Budxië' tu yu'u gupa ga naca xitsá' ga nu uyú xiyúë' na'.

<sup>1</sup>Ní'irö budödë' xiyúë' na' lu ná'agaquië' huen dxin, ila'zi'ë gatsaj huéaj le unödzej, ate' guyijë' yödzo zítu'. <sup>2</sup>Cate' bidxín dza ulu'chibë' le ribía, gusól-lë'ë-bí' bí'i huen dxin tsójxí'ibi' lu ná'agaquië' huen dxin na' le ral-la' sí'ë xanbí' que le gula'bía lubá uva na'. <sup>3</sup>Ní'irö yugu' huen dxin na' gula'guélé'ë-bí' bí'i na', en gulundë'-bí' zí', ate' bulu'sól-lë'ë-bí' cá'asóbi'. <sup>4</sup>Ní'irö bönni' xan luyú na' gusól-lë'ë-bí' ia'tubi' bí'i huen dxin queë', ate' bí'i ni bulu'ladxë'-bí' guió'j. Bulu'lë'ë ícjabi'. Gulu'ë dö' queëbi'.

<sup>5</sup>Ní'irö bönni' xan luyú na' gusól-lë'ë-bí' ca' ia'tubi' bí'i huen dxin queë', ate' bí'i ni gulútië'-bí'. Gusól-lë'ë-bí' ca' zíanröbi', ate' bál-labi' gulúngacadë'-bí' zí', en ia'bál-labi' gulútigaquië'-bí'.

<sup>6</sup>Cúnturö nu nagá'ana queë' xan luyú na'. Nagá'ana-sibi' zxi'inë', ate' nadxí'ide'enë'-bí'. Ga yöjsetë, gusól-lë'ë-bí' zxi'inë', rnnë': "Ilunë' bal zxi'ina'." <sup>7</sup>Ní'irö yugu' bönni' huen dxin na' gula'nnë' la' légcasë', ta'nnë': "Bí'i ni ral-la' guequi queëbi' luyú ni. Gulí'dá, gútiru'-bí', ate' guequi queëru' luyú ni." <sup>8</sup>Que lë ni na' gula'zönë'-bí', en gulútië'-bí'. Gula'ru'unë'-bí' ní'ilö ga dá'gaca lubá uva na'.

<sup>9</sup>Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

<sup>10</sup>¿Naru' cabí nulábanilí' lë na' nazúaj lu guichi lá'ayi? Caní rna:

Guió'j na' gula'ru'unë' bönni' tu'cu'ë zö'ö, na'a naca guió'j len, squin zö'ö.

<sup>11</sup>Xanru' Dios benë' ga naca caní ate' rubániru' ca naca lë ni rilé'eru'.

<sup>12</sup>Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacuá' ni', en que lë ni na' bulu'cá'anë' Lë', söhuó'jgaquië'.

### Ca naca le ta'guíxaj lázagaca bönachi

(Mt. 22:15-22; Lc. 20:20-26)

<sup>13</sup>Gudödi lë ni yugu' bönni' yudo' unná bë' na' gula'sól-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. <sup>14</sup>Bila'dxinë' bönni' ni ga na' zoë' Jesús, en të' Lë':

—Bönni' Usedi, nózitu' ru'u didza' idútë li. Bití' ru'í ládzu'u bi ta'nasö bönachi, tu' cabí ruyusu' le tu'lu'í'so cúnguequi bönachi, pero rusédinu' ca nácatë le ré'ënë' Dios ilún bönachi. ¿Ru'í netu' lataj xibá queë' Moisés quíxaj lastu' le tu'quíxjë' uláz queë' César? ¿Naru' uguíxajtu' o bití' quíxajtu'?

<sup>15</sup>Réquibe'enë' Jesús tu'ë didza' lu yöl-la' riguílaj ladxí' quégaquië', ate' rë' légaquië':

—¿Bizx que rubéajli' neda' didza'? Gulí'diguá'tsöca' tu dumí ridá para ilé'eda' le.

<sup>16</sup>Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

<sup>17</sup>Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bánninë' ca naca didza' bubí'ë Jesús.

### Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

<sup>18</sup>Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulé' Jesús, ta'nnë':

<sup>19</sup>—Bönni' Usedi, Moisés nuzúajë' queëru' lu guichi channö gátie' tu bönni' bití' zoa bí'i queë', ate' ugá'ananu nigula queë', bí'i bóchë'ë bönni' na' ral-la' utsaga ná'aleni'-nu, en uzóabi' bí'ido' gácabi' bí'i queëbi' bóchi'abi'. <sup>20</sup>Gula'cuá'abi' gádxibi' bí'i náagacabi' bóchi'gacabi'. Bí'i huáca na' butsaga ná'aleni'-nu nigula, ate' gútibi', cuntú nu zoa bí'ido' queëbi'. <sup>21</sup>Bí'i buropi na' butsaga ná'aleni'-nu nigula uzëbi na', ate' gútibi' ca', cuntú nu zoa bí'ido' queëbi'. Lë'sca' caní guca queëbi' bí'i bunny. <sup>22</sup>Caní guca, bulu'tsaga ná'aleni'-nu yúgu'tëbi', cuntú nu zoa bí'ido' quégacabi'. Ga yöjsetë, gútinu ca' nigula na'. <sup>23</sup>Na'a, cate' ulu'bán nupa chinátigaca, ¿núzxilöbí' guéquinu nigula na' queëbi', tu' bulu'tsaga ná'aleni'-nu igádxitëbi'?

<sup>24</sup>Bubí'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en bití' nózili' ca naca yöl-la' huáca queë' Dios. <sup>25</sup>Cate' ulu'bán nupa chinátigaca, bití' ca' ulu'tsaga ná'agaquië', ate' yugu' bönni' bití' ila'cuá'lenë' nigula, pero ilácagaquië' ca náagagaquië' gubáz lá'ayi queë' Dios, nacu'ë yehua' yubá. <sup>26</sup>Na'a, ca naca quégaca nupa chinátigaca channö ulu'bán, ¿naru' cabí nulábanilí' le buzúajë' lu guichi Moisés? Ru'í didza' ca na' bulidzë' Dios lë' lu yaga yótsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabánagaquië' sal-la' gulátie' zí'alö. <sup>27</sup>Dios náquië' Dios quégaca nupa nabángaca, calëga quégaca nupa náti-gaca tsaz. Richíxiteröli'.

### Le naca lo le gunná bë'ë Dios

(Mt. 22:34-40)

<sup>28</sup>Bidë' ca' tu bönni' yudo' usedi ga zoë' Jesús. Biyön-në' ca na' gulu'ílenë' Jesús didza', en nózinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatëro lo ca yúgu'të le gunná bë'ë?

<sup>29</sup>Bubí'ë didza' Jesús, rë' lë':

—Le gunná bë'ë le nácatëro lo ca yúgu'të naca lë na' rna: "Gulí'yöni bönachi Israel. Xanru' Dios, tuzë' Lë' náquië' Xanru'. <sup>30</sup>Ral-la' idxí'inu' Xanu' Dios idú ládzu'u, en lu idú ícja ládxi'do'o, en lu idú yöl-la' réajni' quiu', en lu idú yöl-la' huáca quiu'." Lë ni naca le gunná bë'ë le



nácatërö lo. <sup>31</sup> Le gunná bē'ē le naca buropi, lēbisō ca naca. Caní rna: "Ral-la' idxí'ínu' luzó'o ca nadxí'i cuinu'." Biti' ca' zoa ia'tú le gunná bē'ē le nácarō lo ca chopa ni gunná bē'ē.

<sup>32</sup> Ní'irō bönni' yudo' usedi na' gudxē' Jesús, rnnē':

—Dxi'ado' gunnó', Bönni' Usedi. Le nácatē rno'.

Tuzē' náquiē' Dios, en cúnturō nu zoa naca Dios.

<sup>33</sup> Para idxí'iru'-nē' Dios idú lādxi'ru', en lu idú yōl-la' réajni'i queēru', en lu idú icja lādxi'do'oru', en lu idú yōl-la' huáca queēru', en para idxí'iru' luzá'aru' ca nadxí'i cuinru', nácarō lesaca' ca yúgu'tē böa' bédxido' rútigacaru'-ba' lu bucugu lá'ayi queē' Dios, enca' ca yúgu'tē böa' bédxido' ruzégui'gacaru'-ba' lu bucugu na'.

<sup>34</sup> Cate' biyönnē' Jesús dxi'ado' rubi'ē didza' bönni' ni, ní'irō gudxē' lē', rnnē':

—Ia'látisō riyadzaj quiu' gúnbē'u le rinná bē'ē Dios.

Cúnturō nu burugui bi inábini Jesús.

### ¿Nuzxi zxi'ini náquiē' Cristo?

(Mt. 22:41-46; Lc. 20:41-44)

<sup>35</sup> Cate' ní' rusédinē' Jesús bönachi ga naca chila yudo', rnnē':

—¿Bizx que ta'nnē' bönni' yudo' usedi náquiē' Cristo zxi'ini xi'sóé' David? <sup>36</sup> Lē cazē' David na' bē'ē didza', zóalenē' Dios Bö' Lá'ayi lē', gunné':

Xanru' Dios gudxē' Xana':

"Guró'ō cuita lē'a ibēla

cate' gunra' ga ulu'zóa zxi'bigaca lo'

nupa bití' ta'lé'e Lí' dxi'a."

<sup>37</sup> ¿Naru' nácatsē' Cristo zxi'ini xi'sóé' David channō lē cazē' David na' rnnē' queē' náquiē' Xanē'?

Bönachi zían nacua' ní' tu'zé nágagaca Lē' gula'yaza lādxi'gaca didza' ni.

### Jesús ruzégui'ē didza' bönni' yudo' tu'sédinē'

(Mt. 23:1-36; Lc. 11:37-54; 20:45-47)

<sup>38</sup> Ní' rusédinē' Jesús yugu' bönni' dá'gaquiē' Lē', rē légaquiē':

—Gulí'gún chí'i cuinlí' quégaquiē' bönni' yudo' tu'sédinē'. Ta'yaza lādxi'gaquiē' ta'dé' nilō na'lō, nácuagaquiē' lari' tunna. Ta'yaza lādxi'gaquiē' ca' tu'lidza tsahui' bönachi légaquiē' gapa naca lu yé'eyi. <sup>39</sup> Ta'bō'ē yugu' lataj lo lu yu'u ga tu'dubē' tu'sédē' queē' Dios, enca' gapa tu'dubē' tē'aj tahuē'. <sup>40</sup> Rugúagaquiē' lídxigacanu nigula uzēbi, en para ulu'lú'isō tsahui' cuíngaquiē', xidzé tu'lidzē' Dios. Bönni' ni, gúnda'rē' Dios légaquiē' xigua'.

### Le bunódzjanu tu nigula uzēbido' queē' Dios

(Lc. 21:1-4)

<sup>41</sup> Tsanni ní' rō'ē Jesús chila yudo' ga zoa guí'ina ga ta'gú'u bönachi dumí que yudó', ruyú'e' ca tun bönachi ta'gú'u dumí lu guí'ina. Dumí zían ta'gu'ē bönni' dē yōl-la' tsahui' quégaquiē'. <sup>42</sup> Ní'irō bidxinnu tu nigula yechi' uzēbido' ní', ate' gulú'unu chopa dumí lásido', le nazá-ca'gaca látido'os. <sup>43</sup> Ní'irō bulidzē' Jesús yugu' bönni' usēda queē', en rē' légaquiē':

—Le nácatē rea' libí'ili', nigula yechi' uzēbido' ni gulú'urōnu ca yúgu'tē nupa bi ta'gú'u lu guí'ina que yudo'. <sup>44</sup> Yúgu'tē bönni' ni ta'gu'ē que le nagá'anasō quégaquiē', pero nigula ni, lu yōl-la' yéchi'do' queēnu gulú'unu idútē la's dui tsca le dēsō queēnu, le ral-la' gáhuinu.

### Riguíxjö'ē Jesús ca sí' ulu'quínnajē' yudo'

(Mt. 24:1-2; Lc. 21:5-6)

**13** Cate' burúajē' Jesús chila yudo', tuē bönni' usēda queē' gudxē' Lē', rnnē':

—Bönni' Usedi, buyútsōca' náctiga yugu' yu'u zxon ni, en náctiga yugu' guió'j lē'e zō'ō quéguequi.

<sup>2</sup> Bubi'ē didza' Jesús, rē' lē':

—Rilé'enu' yugu' yu'u zxon ni, pero bití' ca' ugá'ana guió'j lahui luzé'e ni, tu' ulu'quínnaj bönachi léguequi.

### Le ilaca bē' cate' sí' údxi que yödžölíó

(Mt. 24:3-28; Lc. 21:7-24; 17:22-24)

<sup>3</sup> Ní'irō yōjáquiē' Jesús, en yugu' bönni' dá'gaquiē' Lē' lu Guí'a Yaga Olivo, guí'a na' dē ca dódilō ra' yudo'. Cate' chirō'ē Jesús ní', la' légacasē' Pedro, en Jacobo, en Juan, en Andrés, gulé' Lē', ta'nnē':

<sup>4</sup> —Gudíxjö'i netu' bátaxi ilaca lē ni. ¿Bizxi gaca bē' chizóa ilaca yúgu'tē lē ni?

<sup>5</sup> Bubi'ē didza' Jesús, rusédinē' légaquiē', rnnē':

—Gulí'gún chí'i cuinlí' para cabí nu sí' ye'e libí'ili'.

<sup>6</sup> Ila'lá' lahuē' zían bönni' sí' lágaquiē' ca lea' neda', ila'n-nē' nácuagaquiē' Cristo. Caní ila'z'í yé'enē' bönachi zían.

<sup>7</sup> Ní'irō cate' yónilí' raca gudil-la nilō ná'alō, bití' gádx-ili'. Yúgu'tē lē ni ral-la' ilaca, pero bití' ridxini dza údxi.

<sup>8</sup> Tu yödžō tíl-lalen ia'tú yödžō, en tu ga nu rinná bē' tsójtíl-lalen ia'tú ga nu rinná bē'. Zían lataj tōdi budó' zxu', en tsu'u gubín. Ila'tsatsa bönachi. Yugu' lē ni ilaca le isí lo ila'guí'í ila'zaca' bönachi dza ní'.

<sup>9</sup> Ní'irō gulí'gún chí'i cuinlí', tu' ulu'dödē' libí'ili' lu ná'agaquiē' bönni' yúlahui'. Ila'guiné' libí'ili' gapa tu'dubē' tu'sédē' queē' Dios bönni' judío. Idxinlí' lógaquiē' bönni' ta'nná bé'enē' libí'ili', en lógaquiē' bönni' ta'nná bé'enē' yödžō zítu'. Ilunē' caní queé'li' tu' dá'alí' neda', pero gunlí' ba nalí' quia' neda' ní'. <sup>10</sup> Zí'alō ca idxín dza údxi, run bayudxi gaca libán que didza' dxi'a quia' ló-gaca bönachi idútē yödžölíó. <sup>11</sup> Cate' ní' ila'ché'ē libí'ili', en ulu'dödē' libí'ili' lu ná'agaquiē' bönni' yúlahui', bití' gú'í' lādxi'li' bizxi innalí'. La' dza ní'isō Dios gunné' queé'li' didza' gú'í'ili', ate' lē ni innalí'. Cate' ní' gú'í'ili' didza', calēga libí'isili' na' innalí', pero Dios Bö' Lá'ayi innē'. <sup>12</sup> Ulu'dödi bönachi la' bóchi'gacasō lu ná'agaquiē' bönni' ilútiē' légaquiē'. Yugu' bönni' nacua'abi' bí'i quégaquiē' ulu'dödē' la' zxi'ínigaca cazē' ca', ate' zxi'ini-gaquiē' na' ulu'dödē' la' xuz xiná'agaca cázabi' lu ná'agaquiē' bönni' ilútiē' légaquiē'. <sup>13</sup> Yúgu'tē bönachi ulu'zóa libí'ili' tsólá'alō tu' dá'alí' neda', pero núlōlí' guá' ilenlí' lē na' ga idxinrō dza údxi, ulálí'.

<sup>14</sup> Nupa tu'laba didza' ni ral-la' ila'yéajni'i. Buzúajē' lu guichi Daniel, bönni' ní' bē'ē didza' uláz queē' Dios, le rna caní: "Tsaz tu le xihui' le rucá'ana cané ga naca la'ayi." Dza ní'irō ral-la' ila'zxunnaj nupa nacua' luyú

Judea, en tsöjaca gapa naca lu guí'ado'. <sup>15</sup> Nu zoa ícjo'olò dza ní' ral-la' izxúnnajtè, en bití' huòtaj zxan yu'u para tsöjzxi' bi dè que lu yu'u. <sup>16</sup> Nu zoa la' guixi' ral-la' izxúnnajtè, en bití' huòaj tsöjzxi' lari' rixóa yeni. <sup>17</sup> Bica' bayechi' yugu' nigula dza ní' nu'ágacanu-bí' bí'ido', enca' nigula tu'gádxí'nu-bí' bí'ido'. <sup>18</sup> Buli'lidzè Dios inábili'-nè' cabí gun bayudxi izxúnnajli' cate' raca beo' ziaga ca'. <sup>19</sup> Yugu' dza ní' ila'guí' ila'zaca'rò bönachi ca le guca zí'atèlò cate' sí' guta' yödžölió le benè' Dios ga ridxintè na'a dza, ate' dza zá'gaca bití' gaca caní. <sup>20</sup> La'tu' cabí nunè' Dios ga ulu'huóaca nabábasò yugu' dza ní', cuntú nu ulá, pero tu' nadxí'inè' nupa chiguró cazè', chinunè' queè' gunè' ga ulu'huóaca nabábasò yugu' dza ní'.

<sup>21</sup> 'Na'a, channò nu guíè libí'ili': "Buli'yútsöca', ni zoè' Cristo", o inná: "Buli'yútsöca', ní' zoè'", bití' ca' tséajlè'èli' nu na'. <sup>22</sup> Ila'lá' lahuè' zian bönni' ila'zì' yé'enè' bönachi. Ila'nnè' nácagaquiè' Cristo, en ila'nnè' nácagaquiè' bönni' tu'è didza' uláz queè' Dios. Ulu'lu'ínè' le ilaca bè', en ilunè' yugu' yöl-la' huáca zxön. Hualá'zì' yé'enè' ca' nupa guró cazè' Dios channò ila'zéqui'nè'. <sup>23</sup> Ní'irò libí'ili', guli'sóa ban ladxí'. Yúgu'tè chigudxa' libí'ili' zí'atèlò ca gaca.

#### Ca huödè' Bönni' Guljè' Bönachi

(Mt. 24:29-35, 42-44; Lc. 21:25-36)

<sup>24</sup> Gunnè' ca' Jesús:

—Yugu' dza ní', tódi gaca dza na' ila'guí' ila'zaca' caní bönachi, ichul-la gubidza, en bití' cu'u bení' beo'.

<sup>25</sup> Ila'guínnaj bölaj lúzxiba, en ila'zxizi le nál-lagaca nalá'gaca lúzxiba na'. <sup>26</sup> Ní'irò ila'lé'eni neda', Bönni' Guljè' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. <sup>27</sup> Isól-la'gaca'-nè' gubáz lá'ayi quia', ate' ulu'tubè' bönachi guró caza' quia' naca' idapa la'a yödžölió, ga naguéla'tè luyú bidxi, ga ridxintè ga naguela' lúzxiba.

<sup>28</sup> 'Guli'tséajni' le rusedi yaga higo ní'. Cate' ta'lén ní'a nè'e hué'enido', en rubía xilagui' yulu, nózili' chizóa idxín beo' cusubá. <sup>29</sup> Lésca' caní, cate' ilé'elí' taca lè ni, inózili' chizóa idxín dza údxí na', en chiridzaga lo. <sup>30</sup> Le nácatè rea' libí'ili', yúgu'tè lè ni ilaca zí'atèlò ca ilátigaca nupa naca' dza na'. <sup>31</sup> Huadödi que lúzxiba, en que luyú ni, pero xtídzá'a catu caz tódi que.

<sup>32</sup> 'Cate' idxín dza ní' o rëla ní', cuntú nu nòzi. Bití' nózguequinè' gubáz lá'ayi naca'è yehua' yubá, en bití' nòzda' neda', Zxí'inè' Dios. Tuzè' Dios Xuz nózinè'.

<sup>33</sup> Que lè ni na', buli'subán ladxí'li'. Guli'sóa sina', en buli'lidzè' Dios tu' cabí nózili' bizxi dza gaca lè ni. <sup>34</sup> Gaca ca raca cate' sa'yéajè' zítu' tu bönni'. Cate' chizóa uzé'è lidxè', udödè' lu ná'agaquiè' huen dxin queè' yugu' le dè queè'. Que queé'gaquiè' gu'è xichíngaquiè', en inná bè'è soa ban ladxí' nu zoa huen chí' ga nu riyaza.

<sup>35</sup> Guli'sóa libí'ili' ban ladxí' tu' cabí nózili' bátaxi huödè' xan yu'u, cate' chiridzò', o gatsaj lahui' yèla, o cate' ribódxiba' böra, o zílado'. <sup>36</sup> Guli'gún caní, para cabí idixáquiè' libí'ili' rásili' channò huödè' tsálido'os. <sup>37</sup> Lè ni rea' libí'ili', rea' ca' yúgu'tè bönachi: Guli'sóa ban ladxí'.

#### Tun xtídzá'gaquiè' bönni' yudo' ila'zönè' Jesús

(Mt. 26:1-5; Lc. 22:1-2; Jn. 11:45-53)

**14** Ia'chopa dza ca' gaca Laní Pascua cate' tu'subanè' bönni' judío ca benè' Dios, bubéajè' xuz xtó'ogaquiè' luyú Egipto. Naca laní cate' tahuè' yöta xti-la bití' nazí' cúa zi que. Ta'zóa ta'bö'è yugu' bixúz unná bè', en bönni' yudo' tu'sédinè' ila'zönè' Jesús bagáchi'sò para ilútiè' Lè'. <sup>2</sup> Ta'nnè':

—Bití' gaca sönru'-nè' dza laní tu' ila'tsatsa bönachi.

#### Nigula rigú'unu le rilá' zxixi icjè' Jesús

(Mt. 26:6-13; Jn. 12:1-8)

<sup>3</sup> Zoè' Jesús yödžö Betania, lu yu'u lidxè' Simón, bönni' gü'ínè' huè' nudzu' ruzödi. Tsanni ní' röhè' rahuè' Jesús, guyázanu tu nigula, nuá'anu tu bóga'do' néquini guiój zaca', yudzu le rilá' zxixi que yöj susén lasi idú, le nazaca' yenni'. Gulá'anu bóga'do' na', en gulú'unu le rilá' zxixi na' icjè' Jesús. <sup>4</sup> Gula'lélanè' bal-lè' bönni' nacu'è ní'. Ta'nnè' la' légacasè':

—¿Bizx que guca ditaj le zxixi na'? <sup>5</sup> La'tu' nu gutí' lè na', huazí' que ia'lati' ca lászjaru' que tu iz para nu quisi le quégaca bönachi yechi'.

Gula'nnédè'è queénu.

<sup>6</sup> Ní'irò Jesús bè'è didza', rnnè':

—Guli'gü'í'nu lataj. ¿Bizx que rinnè' zí'ili' queénu?

Naca dxí'a le bennu quia'. <sup>7</sup> Nacu'alentica'sò bönachi yechi' libí'ili', en bátatítès gué'ènilí', huáca gunlí' dxí'a quégaquiè', pero neda' bití' sóatica'sa' ga zóali'. <sup>8</sup> Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atèlò ca igácha'a yeru ba. <sup>9</sup> Le nácatè rea' libí'ili', gátitès ga gaca libán que didza' dxí'a quia' idú yödžölió, soa nu quixjö' ca' lè ni bennu nigula ni quia'. Caní gaca para nu tsöjné lènu.

#### Rizí' lu nè'è Judas udödè' Jesús

(Mt. 26:14-16; Lc. 22:3-6)

<sup>10</sup> Ní'irò birúajè' Judas Iscariote, bönni' nabábalenè' chínnuè' na' dá'gaquiè' Jesús. Guyijè' ga nacu'è bixúz unná bè' para udödè' Jesús lu ná'agaquiè'. <sup>11</sup> Cate' bi-la'yönnè' xtídzè'è Judas na', bulu'dzéjanè', ate' gula'zì' lu ná'agaquiè' ilu'è lè' dumí. Ní'irò gusí lahuè' Judas rizóa ribö'è udödè' Jesús lu ná'agaquiè'.

#### Le rë'aj ráguru' rusubanru' ca gútiè' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Naca dza risí lo laní cate' tahuè' yöta xti-la bití' nazí' cúa zi que, dza na' tutiè'-ba' bö'cu' zxíla'do' tahuè'-ba' dzó' Laní Pascua na', cate' tu'subanè' ca benè' Dios busölé' bönachi judío luyú Egipto. Ní'irò bönni' usèda queè' Jesús gula'nábinè' Lè', ta'nnè':

—¿Gazxi ré'ènu' tséajtu' tsöjpá'atu' le gáguru' xtsö' que Laní Pascua?

<sup>13</sup> Ní'irò Jesús gusól-lè'è chopè' bönni' usèda queè', en rë' légaquiè':

—Guli'tséaj lu yödžö. Ní' huadzágali' tu bönni' nu'è tu röhè' nisa. Guli'tséajlenè'. <sup>14</sup> Ga na' tsáziè', guli'guíè' xan yu'u na': "Rnnè' Bönni' Usedi: ¿Gazxi zoa yu'u ga na'?

gágulengaca'-nè' bönni' usèda quia' xtsö' que Laní Pascua?" <sup>15</sup> Ní'irö uluí'inè' libí'ilí' tu yu'u zxon ga naca buropi cuía ga chinabá'a. Bulí'pá'a le gáguru' ni'.

<sup>16</sup> Bila'rúajè' bönni' usèda queé' na', en bila'dxinè' lu yödzo, ate' yöjxáca'gaquiè' yúgu'tè ca na' chigudxè' légaquiè' Jesús. Bulu'pé'e le ilahué' ni' que Laní Pascua.

<sup>17</sup> Cate' chizá' ral-la, bidxinè' Jesús ni', dzágagaquiè' idxinnutè' bönni' usèda queé' Lè'. <sup>18</sup> Tsanni ni' röö-gaquiè' tahué', bè'è didza' Jesús, rnnè':

—Le nácatè rea' libí'ilí', zoa nu dzaga libí'ilí', nu rágulen neda' tsözxón, nu udödi neda' lu ná'agaca bö-nachi.

<sup>19</sup> Ní'irö bulu'huí'innè', en gula'sí lógaquiè' tu tuè' tè' Lè':

—¿Naru' neda'?

Ia'tué' ca' gunné':

—¿Naru' neda'?

<sup>20</sup> Bubi'è didza' Jesús, rè' légaquiè':

—Naca tu nu nutsa' ladaj chínnuli' ni, bönni' na' nunè'è nè'è tsözxón len na'a lu yó'ona. <sup>21</sup> Tseja' ga gátia' neda', Bönni' Guljè' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödè' neda' lu ná'agaquiè' bönni' ilútiè' neda'. Gácarö dxí'a queé' bönni' na' la'tu' cabí guljè'.

<sup>22</sup> Tsanni ni' tahué', gudélè'è Jesús yöta xtila. Gudxè' Dios: "Xclenu'." Buzxuzxjè' le, en bè'è quégaquiè', rnnè':

—Gulí'gagu. Lè ni naca bèla' rön quia'.

<sup>23</sup> Gudélè'è ca' tu xzíga'do', en gudxè' Dios: "Xclenu'." Ní'irö bè'è quégaquiè', ate' yúgu'tè' gulé'ajè' le. <sup>24</sup> Jesús rè' légaquiè':

—Lè ni xichöna' le run tsutsu didza' cubi rucá'ana tsahui', le núnnenè' Dios bönachi. Rön ni ilalaj ní'a qué-gaca bönachi zían. <sup>25</sup> Le nácatè rea' libí'ilí', bití'rö guí'ja' xisi uva ga idxinrö dza guí'ja' le cubi ga ni' rinná bè'è Dios.

### Jesús rnnè' inné' Pedro biti' núnbè'è Lè'

(Mt. 26:30-35; Lc. 22:31-34; Jn. 13:36-38)

<sup>26</sup> Gudödi gulúl-lè' yöl-la' ba, bila'rúajè' söjáquiè' Guí'a Yaga Olivo. <sup>27</sup> Ní'irö Jesús gudxè' légaquiè', rnnè':

—Yúgu'tèli' gaca chopa ládxi'li', ucá'analí' neda' na'a dzö, tu' nazúaj lu guichi lá'ayi, rna: "Gutia'-nè' uyú bö'cu' zxila', ate' ilásilasiba' bö'cu' zxila' na'." <sup>28</sup> Tödi ubana' lu yöl-la' guti, tseja' luyú Galilea zí'alö ca libí'ilí'.

<sup>29</sup> Ní'irö Pedro gudxè' Jesús, rnnè':

—Sal-la' yúgu'tè' ilaca chopa ládxi'gaquiè', en ulu'cá'anè' Lí', biti' ca' gaca chopa ládxa'a neda'.

<sup>30</sup> Jesús gudxè' lè', rnnè':

—Le nácatè rea' lí', la' dzö' nisö, sí' códxilöba' böra le buropi luzuí, tsonna luzuí innó' biti' núnbè'u neda'.

<sup>31</sup> Ní'irö Pedro buzötjè' Dios, rnnè':

—Sal-la' gátilentea' Lí' tsözxón, biti' ca' innía' biti' núnbè'a Lí'.

Lësca' caní gula'nné' yúgu'tè'.

### Jesús rulidzè' Dios la' yèla Getsemaní

(Mt. 26:36-46; Lc. 22:39-46)

<sup>32</sup> Ní'irö Jesús, en bönni' dá'gaquiè' Lè' bila'dxinè' la' yèla Getsemaní, ate' Jesús gudxè' légaquiè', rnnè':

—Gulí'có' ni, tsanni tseja' neda', tsöjlidza'-nè' Dios.

<sup>33</sup> Jesús guché'è Pedro, en Jacobo, en Juan, ate' gusí lahué' ridzöbinè', en risèbi ládxi'è. <sup>34</sup> Gudxè' légaquiè', rnnè':

—Huati caza' lu yöl-la' risèbi ladxí'. Gulí'có'z ni, en gulí'ná' yèla.

<sup>35</sup> Ní'irö guzè'è Jesús ia'látido', en busudxín lahué' lu yu, bulidzè' Dios. Gunábinè' Lè', channö huáca, ucuítè' queé' le ral-la' qui'i sáque'è dza na'. <sup>36</sup> Ni' rulidzè' Dios, rnnè':

—Xúza'do', yúgu'tè huáca gunu' Lí'. Gucuíta lè na' ral-la' qui'i saca'a, pero calèga ca ré'ènda' neda', pero ca ré'ènu' Lí', gunu'.

<sup>37</sup> Ní'irö böajè' Jesús ga na' nacu'è bönni' usèda queé', ate' yöjxáquiè' légaquiè' tasiè'. Gudxè' Pedro:

—Simón, ¿rásitso'? ¿Naru' cabí rubéajtso' yèla lo' tu chí'ido'? <sup>38</sup> Gulí'ná' yèla, en bulí'lidzè' Dios, inábili'-nè' para cabí gata' lataj tu' xihui' idilú'u yöl-la' libí'ilí'. Le nácatè bö' naca cázalí' zoa caz sina', pero lu yöl-la' bönáchisö queé'li' ricuídí'li'.

<sup>39</sup> Ní'irö sa'yéajè' Jesús leyúbölö, rulidzè' Dios, en la' tuz ca gunné'. <sup>40</sup> Cate' böajè' leyúbölö ga na' nacu'è, yöjxáquiè' légaquiè' tasiè' tu' nadödité yèla lógaquiè'. Bití' nözguequinè' bizxi didza' ulu'bi'è, le ilé' Lè'. <sup>41</sup> Cate' böajè' le bunni luzuí ga na' nacu'è, rè' légaquiè':

—¿Rásitsali'? ¿Ruzi'tsa ládxi'li'? ¿Tsa'ti' gaz! ¿Chibidxín dza! ¿Bulí'yútsöca', Neda', Bönni' Guljè' Bönachi, chinnadöda' lu ná'agaca bönachi dul-la'! <sup>42</sup> ¿Gulí'chasa, uyéajru'! ¿Bulí'yútsöca', chizé'è bönni' na' udödè' neda' lu ná'agaca bönachi!

### Ta'zönè' Jesús

(Mt. 26:47-56; Lc. 22:47-53; Jn. 18:2-11)

<sup>43</sup> Ni' ru'è Jesús didza' ni, bidxinè' Judas, bönni' nabábalenè' chínnuè' na' dá'gaquiè' Jesús, ate' zá'len-gaquiè' bönni' zían lè', nuá'agaquiè' guié' tuchi', en yaga. Yugu' bixúz unná bè', en yugu' bönni' yudo' usedi, en bönni' gula tu'zéajni'inè' nasól-la'gaquiè' légaquiè'. <sup>44</sup> Judas, bönni' na' rudödè' Jesús lu ná'agaquiè' chinu-luí'inè' légaquiè' tu le gunè' le gaca bè' nu naca Jesús, gunné':

—Bönni' na' utsaga lahua'-nè', Lè' na' Jesús. ¿Gulí'sönè', en gulí'ché'è! ¿Gulí'yútsöquiè'!

<sup>45</sup> Cate' bidxinè' Judas ni', la' gubíga'tè' ga na' zoè' Jesús, en gudxè' Lè':

—Bönni' Usedi, Bönni' Usedi.

Ní'irö busudxín lahué' Jesús. <sup>46</sup> Ní'irö gula'zönè' Jesús, en gula'ché'è Lè' nadzunè'.

<sup>47</sup> Ní'irö tué' bönni' ni' dé'è Jesús guléajè' guié' tuchi', en benè'-bi' hué' bi'i huen dxin queé' bixúz lo. Guchúguiè' guídi nágabi'. <sup>48</sup> Jesús gudxè' bönachi na', rnnè':

—¿Narúajtsali' nuá'ali' guié tuchi', en yaga para sönli' neda', runli' ca runli' cate' rizönli'-në' gubán? <sup>49</sup> Yugu' dza guzóalena' lib'ili' rusédigacada' bönachi ga naca chila yudo', ate' bití' guzxönlí' neda', pero raca caní para gaca le nazúaj lu guichi lá'ayi.

<sup>50</sup> Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

### Rixúnnajbi' tubi' bí'i ra'bán

<sup>51</sup> Zóabi' ca' ni' tubi' bí'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' naché'gaquië' Jesús gula'zönë'-bi' <sup>52</sup> pero busanbi' lari' na', en xiguídisöbi' buzúnnajbi'.

### Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Gula'ché'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. <sup>54</sup> Pedro yöjnahuë' Jesús zítu' zítu'sö, en guyazië' lö'a lidxi bixúz lo na', en guró'ölenë' tsözxón yugu' ní'a në'ë bixúz lo na', rutsë'e cuinë' ra' guí'.

<sup>55</sup> Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero bití' bi bulu'dzölinë'.

<sup>56</sup> Bönni' zían gula'nnë' queë' Jesús le cabí nácatë, pero bití' yöjlózagaca le gula'nnë' queë'. <sup>57</sup> Ní'irö gula'zuinë' yugu' bönni' gula'nnë' queë' Jesús le cabí nácatë, ta'n-në':

<sup>58</sup> —Netu' biyónitu' didza' bë'ë bönni' ni, gunné': "Uquínajaj' yudo' ni, lë ni nequi lu ní'a lu na' bönachi, ate' tsonna dzasö uchisa' ia'tú le cabí nequi lu ní'a lu na' bönachi."

<sup>59</sup> Lësca' lë ni, bití' yöjlózagaca xtídza'gaquië'.

<sup>60</sup> Ní'irö guyasë' bixúz lo na' gatsaj láchui'lö bönachi nacua' ní', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

<sup>61</sup> Jesús, dxisö zoë'. Bití' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacua' Li' Cristo, Zxí'inë' Dios Lá'ayi?

<sup>62</sup> Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ní' huöda' lu böaj lúzxiba.

<sup>63</sup> Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'? <sup>64</sup> ¡Riyón quézili' rucá'anë' Dios cá'asö len didza' ru'ë! ¿Nacxi rusáca'li' queé'li'?

Yúgu'të gula'chúguië' queë' gátië'.

<sup>65</sup> Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zí', ta'nnë':

—Gunnë yá'atsöca' nuzxi na' bë' Li'.

Yugu' bönni' ní'a në'ë bixúz lo gula'gápë'ë ru'ë Jesús.

### Rnnë' Pedro bití' núnbë'ë Jesús

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Cate' ní' zoë' Pedro lö'a zxan yu'u, bidxinbi' tubi' bí'i nigula huen dxin queë' bixúz lo na' ga na' zoë'. <sup>67</sup> Cate' bilé'ebi' Pedro, rö'ë rutsë'e cuinë' ra' guí', buyubi' lë', rnnabi':

—Do'ó ca' li' Jesús, bönni' Nazaret na'.

<sup>68</sup> Gudá'baguië' Pedro, rnnë':

—Bití' núnbë'a-në', en bití' nözda' bizxi na' rno'.

Burúajë' Pedro yöjsöë' ga nu riyaza lö'a. Ní'irö guródxiba' böra. <sup>69</sup> Buyubi' lë' leyúbölö bí'i nigula huen dxin na', en gusí lobí' rëbi' nupa nacua' ní':

—Bönni' ni dzáguië' légaquië'.

<sup>70</sup> Leyúbölö gudá'baguië' Pedro. Ia'lati' gudzé nupa nacua' ní' të Pedro, ta'nná:

—Le nácatë dzagu' légaquië', tu' nacua' bönni' Galilea. Yöl-la' ru'isö quiu' didza' naca bë'u, tu' tuz ca ru'ili' didza'.

<sup>71</sup> Gusí lahuë' Pedro rudxía dö' cuinë', en ruzötjë' Dios, rnnë':

—Bití' ca' núnbë'a-në' bönni' na' ru'ili' didza' ca naca queë'.

<sup>72</sup> La' guródxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': "Zi'alö códxiba' böra le buropi luzuí, tsonna luzuí innó' bití' núnbë'u neda'." Cate' yöjnenë' didza' ni, gusí lahuë' ribódxidë'.

### Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18:28-38)

**15** Ní' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'ché'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma. <sup>2</sup> Pilato gunábinë' Jesús, rnnë':

—¿Naru' nacua' Li' Bönni' inná bé'enë' bönachi judío? Bubi'ë didza' Jesús, rnnë':

—Ca nácatë rno'.

<sup>3</sup> Yugu' bixúz unná bë' bulu'zéguië' Jesús didza' le zían. <sup>4</sup> Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsöca' nagu' cate' xö zían le ta'nnë' quiu'.

<sup>5</sup> Bití' bi didza' bubí'ë Jesús. Ca' guca, bubábinë' Pilato.

### Ta'chúguië' queë' Jesús gátië'

(Mt. 27:15-31; Lc. 23:13-25; Jn. 18:38-19:16)

<sup>6</sup> Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guié, nútítës nu ta'naba. <sup>7</sup> Nadzunë' tu bönni' lë' Barrabás lidxi guié, ate' dzágagaquië' lë' ia'bal-lë' luzé'ë, yugu' bönni' gulútië' bönachi cate' gula'dá'baguië' yúlahui'. <sup>8</sup> Cate' bila'dxín bönachi zían ní', gula'sí lógaquië' ta'nabë' lahuë' Pilato gunë' quégaquië' ca run cazë'. <sup>9</sup> Bubi'ë didza' Pilato, rnnë':

—¿Rë'enilí' usana'-në' queé'li' Bönni' Inná Bé'enë' Bönachi Judío?

<sup>10</sup> Caní gunné' Pilato tu' réquibe'ené' bulu'dödë' yugu' bixúz unná bé' Jesús lu në'ë tu' tu'zxé'ené' Lë'. <sup>11</sup> Yugu' bixúz unná bé' na' gula'gu'e xilá ládxi'gaca bönachi zían na', para ila'nabé' lahué' Pilato usané' lu ná'agaquié' Barrabás. <sup>12</sup> Ní'irö Pilato gunábiné' légaquié' leyúbölö, rnné':

—¿Bizxi ré'enilí' guna' queé' bönni' na' ru'íli' lë', Bön-ni' Inná Bé'ené' Bönachi Judío?

<sup>13</sup> Gulu'ë zidzaj didza', ta'nné':

—¿Budé'ë lë'e yaga cruz!

<sup>14</sup> Gunábiné' Pilato légaquié', rnné':

—¿Bizxi caz dö' nu'ë?

Leyúbölö tu'ë zidzaj didza', ta'nné':

—¿Budé'ë lë'e yaga cruz!

<sup>15</sup> Tu' gú'unné' Pilato guné' ga ila'yaza ládxi'gaca bönachi zían na', busané' Barrabás lu ná'agaquié'. Ní'irö gunná bé'ené' nu quin Jesús, ate' budödë' Lë' lu ná'agaquié' bönni' ulu'dé'ë Lë' lë'e yaga cruz.

<sup>16</sup> Ní'irö yugu' bönni' röjáquié' gudil-la gula'ché'ë Jesús lö'a yúlahui', ate' bulu'tubé' luzá'agaquié' ni'.

<sup>17</sup> Bulu'gácué' Jesús tu lari' xiná gul-la, en guluné' tu bregui' ni'a në'e yötsi', le bulu'dxié' icjé'. <sup>18</sup> Ní'irö gula'si lögaquié' tu'lidzë' Jesús, ta'nné':

—¿Yöl-la' ba lí', rinná bé'enu' bönachi judío!

<sup>19</sup> Gula'guiné' gui icjé', en bulu'chejë' Lë' zxöna'. Bulu'zóa xzíbigaquié' lahué', en lu yöl-la' rutitaj guluné' Lë' bal. <sup>20</sup> Cate' budxi bulu'titjé' Lë', bulu'gúé' lari' xiná chul-la na' nácué' ate' bulu'gácué' Lë' lari' que cazé'. Ní'irö gula'ché'ë Lë' ní'ilo yúlahui' na' para tsöjda'gaquié' Lë' lë'e yaga cruz.

#### Tu'dé'ë Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

<sup>21</sup> Guluné' ga bi'ë tu bönni' Cirene yaga cruz queé' Jesús, ridódisë' ni' suzé'ë la' guixi'. Lë' Simón, xúzga-cabi' Alejandro, en Rufo.

<sup>22</sup> Gula'ché'ë Jesús lataj na' nazí'i le Gólgota, tu didza' hebreo le rna lu didza' xidza', Lataj Que Böga' Ícjaru'.

<sup>23</sup> Gulu'ë le guí'jë Jesús xisi uva nutsí' nöri silá' que yaga mirra, pero Lë' bití' gu'ë le. <sup>24</sup> Ní'irö bulu'dé'ë Jesús lë'e yaga cruz, ate' gula'guisié' lari' nácué', le gula'zí' que queé'gaquié' bönni' na' röjáquié' gudil-la. Bulu'béa-jé' le gaca bé' para ila'nóziné' bízxilö idela' que queé'gaquié'.

<sup>25</sup> Naca idú xsila cate' bulu'dé'ë Lë' lë'e yaga cruz.

<sup>26</sup> Didza' na' bulu'zóë' lë'e yaga cruz ícjalé' Jesús ca naca le tu'quíé' Lë' rna caní: "Bönni' Rinná Bé'ené' Bönachi Judío." <sup>27</sup> Bulu'dá'lené' Jesús tsözxón lé'egaca yaga cruz chopé' gubán, tué' cuita lë'ë ibëla, en ia'túé' cuita lë'ë yógöla. <sup>28</sup> Caní guca lë na' nazúaj lu guichi lá'ayi, rna: Gubábalené' bönni' tuá' dö'.

<sup>29</sup> Yugu' bönni' ta'dödë' ni' tu'lidza zí'ë Jesús, en tu'tá ícjagaquié', ta'nné':

—¿Ön! ¿Naru' uquínnajtso' yudo' queé' Dios, ate' tsonna dzasö uchísatsu' le? <sup>30</sup> ¿Busölá cuinu' na'a, en bötaj lë'e yaga cruz na'!

<sup>31</sup> Lësca' caní yugu' bixúz unná bé', en yugu' bönni' yudo' usedi tu'titjé' Lë'. Të' luzá'agaquié' tué' ia'túé':

—Bönachi yúbölö busölé', pero bití' gaca usölá cuiné'.

<sup>32</sup> Ta'nné' ca':

—¿Ön! ¿Nácatsu' Cristo, Bönni' Inná Bé'ené' Bönachi Israel? ¿Bótjatsöca' na'a lë'e yaga cruz para ilé'tu', ate' tséajlé'tu' Lí'!

Yugu' bönni' na' dá'gaquié' tsözxón len Lë' lé'egaca yaga cruz bulu'lidza zí'ë ca' Lë'.

#### Le guca cate' gútié' Jesús

(Mt. 27:45-56; Lc. 23:44-49; Jn. 19:28-30)

<sup>33</sup> Cate' bidxín idú huagubidza, guchul-la idútë yödzülió. Guca caní ga bidxinté idú ridödi xihuó. <sup>34</sup> Idú ridödi xihuó na' bé'ë Jesús zidzaj didza', rnné':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj ládxi'u neda'?

<sup>35</sup> Yugu' bönni' nacué' ni' bila'yönné' didza' ni, ate' ta'nné':

—Buli'zëtsöca' nágali'. Elías rulidzë'.

<sup>36</sup> Ní'irö guxíti'ë tu bönni' nútsé'ë ladjagaquié', en buxúpiné' nupi zi tu le bululu rë'aj nisa. Budé'ë le lahui gui, en bé'ë le xupé' Jesús, rnné':

—Cöztsöca'ru', uyuru' channö huidé' Elías uzötjé' Lë'.

<sup>37</sup> Gurödxi'ë zidzaj Jesús, en la' gútité'. <sup>38</sup> Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö. <sup>39</sup> Bönni' na' rinná bé'ené' bönni' röjáquié' gudil-la zuiné' lahué' Jesús, en bilé'ené' ca na' guca gurödxi'ë Jesús, en la' gútité', ate' gunné':

—Le nácatë bönni' ni gúquié' Zxí'iné' Dios.

<sup>40</sup> Nacuá'anu ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidí', en José. <sup>41</sup> Nigula ni yöjácalennu Jesús cate' ni' gudé' luyú Galilea, en gulá-calennu Lë', gula'gú'unu le gulahué'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

#### Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

<sup>42</sup> Chizá' ral-la, en naca dza tu'pé'ë, dza si' idxín dza lá'ayi quégaquié' bönni' judío. <sup>43</sup> Que lë ni na' bidé' José, bönni' yödzö Arimatea, bönni' lo ladjagaquié' bönni' yúlahui' lo. Ribözé' ca' dza idinná bé'ë Dios. Idú ládxi'ë guyázié' ga na' zoé' Pilato, en gunábiné' lë' gu'ë lë' lataj u'ë Jesús. <sup>44</sup> Bubábiné' Pilato tu' gunné' chigútié' Jesús, ate' bulidzë' bönni' na' rinná bé'ené' bönni' röjáquié' gudil-la para inábiné' lë' channö chinátie' Jesús. <sup>45</sup> Cate' biyönné' ca na' gunné' bönni' na' rinná bé'ené' bönni' röjáquié' gudil-la, bé'ë José lataj u'ë Jesús. <sup>46</sup> Ní'irö José na' gú'ué' tu lari' xtila dxí'ado', ate' buzötjé' Jesús lë'e yaga cruz, en buchóliné' Lë' lari' na'. Ní'irö gulu'ë Lë' yeru ba nadaj lë'e guí'a guió'j. Budé'ë tu guió'j blaga xön ga nu riyaza ba na'. <sup>47</sup> María Magdale-na, en María, xiné'ë José tu'yunu ga na' ta'gu'ë Jesús.

**Rubanë' Jesús lu yöl-la' guti**  
(Mt. 28:1-10; Lc. 24:1-12; Jn. 20:1-10)

**16** Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xiné'ë Jacobo, ta'zí'ínu yugu' le rilá' zixi para tsöjlú'ugacanu Jesús. <sup>2</sup> Ni' naca zílado' dza risí lo, yöjácanu ra' yeru ba queë'. Bila'dxinnu ni' cate' si' gulén gubidza. <sup>3</sup> Gula'nábinu luzá'agacanu: —¿Nuzxi cúatsö queéru' guió'j na' da' ga nu riyaza ba queë'?

<sup>4</sup> Cate' bila'dxinnu ni', bulu'yunu, en bila'lé'enu chinadúa guió'j na', ate' guió'j zön naca. <sup>5</sup> Gula'yú'unu yeru ba lé'e guí'a guió'j na', ate' ni' bila'lé'enu-bí' tubí' bí'i bönni' ra'bán, nácabi' gubáz lá'ayi queë' Dios. Ró'öb'i tsölá'a ibëla lu yeru ba na', nácubi' lari' tunna chiguíchido'os. Guládxide'enu. <sup>6</sup> Ní'irö bí'i na' gúdxibi' légacanu, rnnabi':

—Bíti'rö gádxilí'. Ruguílajli' Jesús, Bönni' Nazaret, Bönni' na' gudé'ë lé'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. <sup>7</sup> Guli'tséaj na'a, guli't-söjtíxjö'i ca' yugu' bönni' usëda queë', enca' Pedro. Guiéli' légaquië': "Tsejë' Jesús luyú Galilea zí'alö ca libí'ili'. Ni' ulé'elí'-në' ca na' chigudxi cazé' libí'ili'."

<sup>8</sup> Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

**Rulu'í lahuë' Jesús lonu María Magdalena**  
(Jn. 20:11-18)

<sup>9</sup> Cate' bubanë' Jesús zílado' dza na', bulu'í lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. <sup>10</sup> Guyéajnu yöjtíxjö'i'ínu nupa na' gula'dalen Jesús. Nupa ni ta'sëbi ládxi'gaca, en ta'bödxí yechí'. <sup>11</sup> Cate' bila'yöni didza' ruí'ínu, zoë' na-

banë' Jesús, ate' bilé'e quézinu Lë', bití' gula'yéajlë' lënu.

**Chopë' bönni' usëda queë' Jesús tu'lé'enë' Lë'**  
(Lc. 24:13-35)

<sup>12</sup> Gudödi na', nadzá'alö bulu'í lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. <sup>13</sup> Ní'irö bulu'dxinë', dutíxjö'i'iguequinë' ia'zícá'rë', ate' ni xtídza'gaquië' bití' gula'yéajlë'ë.

**Le rigu'ë Jesús lu ná'agaquië' bönni' gubáz queë'**  
(Mt. 28:16-20; Lc. 24:36-49; Jn. 20:19-23)

<sup>14</sup> Ga yöjsetë, bulu'í lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. <sup>15</sup> Ní'irö gudxë' légaquië', rnnë':

—Guli'tséaj idútë yödzölió tsöjenlí' libán que didza' dxi'a lógaca yúgu'të bönachi. <sup>16</sup> Nu tséajlë' neda', en idila nisa, ulá nu na', pero nu bití' tséajlë', irugu que gati nu na'. <sup>17</sup> Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. <sup>18</sup> Channö ila'zönë'-ba' bëla sínia' lu ná'agaquië', o channö ile'jë' le naché' yöl-la' guti, bití' bi gun quégaquië'. Ila'xóa në'ë nupa te'e, ate' ulu'huóacatë.

**Ruhuëpë' Jesús yehua' yubá**  
(Lc. 24:50-53; Hc. 1:6-11)

<sup>19</sup> Cate' Xanru' budxi bé'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. <sup>20</sup> Bila'rúajë' légaquië', yöjéngaqië' libán yúgu'të yödzö. Gúcalenë' Xanru' légaquië', en benë' ga gulunë' le nácagaca bë' naca idútë li didza' tu'ë. Ca' naca.

# San Lucas

## Didza' rigu'e Lucas lu n'e'e Teófilo

**1** Zián nupa chigulún bayudxi ulu'zúaj lu guichi idútè le nácatè, le guca ga zóaru', <sup>2</sup> ca na' bila'lé'e nupa ní' dza ní'te, ate' bulu'luí'i rë'u, en bulu'zè didza' que. <sup>3</sup> Teófilo, bönni' tsáhuí'do', runi neda' naca dxí'a uzúaja' quiu' lu guichi, ga ze lo dzö' yúgu'tè lè ni, tu' chibuguílaj bubéquia' ga ze lo dzö' ca naca yúgu'tè lè na' guca dza ní'te. <sup>4</sup> Ruzúaja' quiu' lu guichi ni para in-ózinu' naca idútè li lè na' chinazëdu'.

### Rulu'inë' gubáz lá'ayi queë' Dios ca sí' gálajbi' Juan, bönni' uquilè' bönachi nisa

<sup>5</sup> Dza ní'te cate' gunná b'e'e Herodes luyú Judea, ní' zoë' tu bixúz lè' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xí'sóë' Aarón, bönni' gúquië' bixúz lo dza ní'te. <sup>6</sup> Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'e Dios, en le rinná b'e' xibá queë'. Caní guca, cuntú nu guca bi inné' quégaquië'. <sup>7</sup> Cuntú nu zoa bí'i quégaquië', tu' nácanu Elisabet nigula huödx, ate' chinagúлагаquië' irópatë'.

<sup>8</sup> Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. <sup>9</sup> Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzéguí'e yalaj lahuë' Xanru' Dios. <sup>10</sup> Tsanni ní' ruzéguí'e Zacarías na' yalaj, gula'cuá' yúgu'tè bönachi ní'ilö, tu'lidza Dios. <sup>11</sup> La' ná'asö bulu'í'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. <sup>12</sup> Cate' bilé'enë' Zacarías gubáz lá'ayi na', gurö'e böniga, en gudxi bidzöbinë'. <sup>13</sup> Ní'irö gubáz lá'ayi na' gudxë' lè', gunné':

—Zacarías, bití' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubí' bí'i bönni'do', ate' gu'u labí' Juan. <sup>14</sup> Gata' quiu' le uzi'u xibé, en udzéjanu', ate' zián nupa ulu'dzeja ládxi-gaca cate' gálajbi' bí'ido' na', <sup>15</sup> tu' gácatëbi' xzön lahuë' Dios. Bití' guí'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo sí' gálajbi'. <sup>16</sup> Gunë' Juan ni ga ulu'huóaca zián bönachi Israel queë' Xanru'. <sup>17</sup> Inóruë' lè' ca Xanru', ate' ila'cuá'alen lè' Bö' na', en yöl-la' huáca na' gula'cuá'alen Elías, bönni' b'e'e didza' uláz queë' Dios dza ní'te. Caní gunë' para únë' tuz nupa nácgaca xuz len xzí'inigaquië', en uzéa-

jní'inë' nupa ta'dá'baga' para ilácagaca tsahui', en ucözë' bönachi para ila'zí' lu né'eguequi Xanru'.

<sup>18</sup> Zacarías gunábinë' gubáz lá'ayi na', rnnë':

—¿Bizxi gaca b'e' para inözda' ilaca lè ni? Chinagúla' neda', en chinagúlanu ca' nigula quia'.

<sup>19</sup> Bubi'e didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lè cazë' gusól-lë'e neda' para gü'ílena' lí' didza', en usiyönda' lí' didza' dxí'a ni. <sup>20</sup> Na'a, tu' cabí guyéajlë'u xtídzá'a, icödzü', en bití'rö gaca innó' cate' gácarö lè ni. Yúgu'tè lè ni udxín cate' idxín dza que.

<sup>21</sup> Tsanni ní' raca lè ni, nacua' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. <sup>22</sup> Cate' burúajë' Zacarías, bití' guca gü'ílenë' légaquië' didza', ate' guléquibe'enë' bilé'enë' tu le bulu'í'inë' Dios lè' lu lataj lá'ayi. Bulá'a bulu'ísë' Zacarías, buzéajni'inë' légaquië', tu' cabí raca innë'.

<sup>23</sup> Cate' bizá'a yugu' dza na' ral-la' gunë' dxin Zacarías lahuë' Dios, ní'irö bóajë' lidxë'. <sup>24</sup> Gudödi yugu' dza na' Elisabet, nigula queë' Zacarías na', biá'anu-bi' l'é'ënu bí'ido', ate' idú gayu' beo' bugá'anasinu ga zoa lídxi-gaquië'. Guzá' ládxi'nu, rnnanu: <sup>25</sup> "Caní runë' Xanru' quia'. Ruzá' ládxi'ë quia' bí'ido', en runë' ga bití'rö utuí'ida' lógaca bönachi."

### Rigu'xjö'e gubáz lá'ayi ca sí' gálajbi' Jesús

<sup>26</sup> Cate' chiguca xopa beo', bulu'í'i lahuë' gubáz lá'ayi na', tu' gusól-lë'e Dios lè cazë' Gabriel, tsejë' Nazaret, tu yödzo luyú Galilea. <sup>27</sup> Dios gusól-lë'e lè' ní' tsöjyúé'-bi' tubí' bí'i nigula ra'bando' lëbi' María. Chinazí' lu ná'abi' María utsaga ná'aleni'-në' bönni' lè' José. Nababë' José dí'a dza queë' David, bönni' gunná bé'enë' bönachi Israel dza ní'te. <sup>28</sup> Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxi'ë quiu'. Xanru' Dios zóalenë' lí'. Lè cazë' benë' ga nácaru' lí' bica' ba ca yúgu'tè nigula.

<sup>29</sup> Cate' bilé'ebi' María gubáz lá'ayi na', guró'öbi' böniga tu' nözi didza' na' b'e'e, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'. <sup>30</sup> Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxi'ë Dios quiu'. <sup>31</sup> Na'a, tsú'ubi' tubí' bí'ido' lè'u, ate' uzú'-bi' tubí' bí'i bönni'do', ate' gu'u labí' Jesús. <sup>32</sup> Jesús ni tsépisëtë'rë', en sí' Lè' Xzí'inë' Dios, Nu nayépisëtë'rö. Xanru' Dios gunë' ga inná b'e'e ca na' gunná b'e'e David, xuz gula gudödi queë'. <sup>33</sup> Jesús na' inná bé'etica'sinë' bönachi Israel, ate' le inná b'e'e Lè' catu caz tödi que.

<sup>34</sup> Ní'irö María gunábibi' gubáz lá'ayi na', rnnabi':  
—¿Nacxi caz gaca læ ni, tu' cabí zóalena' bönni'?  
<sup>35</sup> Bubi'è didza' gubáz lá'ayi na', r'è-bi':  
—Guidè' Dios Bö' Lá'ayi ga zu', ate' yöl-la' huáca queé'  
Dios, Nu nayépisètèrö, sóalen lí', le gaca ca tu zxul-la  
rigú'u böaj ga zu'. Que læ ni na' bí'i bönni'do' na' ral-la'  
gálajbi', tsú'ubi' lu n'è'è Dios, ate' sí' labi' Zxí'inè' Dios.  
<sup>36</sup> Cá'anqueze Elisabet, nigula dí'a dza quiu', chin-  
uá'anu-bi' l'é'ènu tubi' bí'i bönni'do' sal-la' chinagúlanu.  
Gula'nné' queé'nu: "Nácanu nigula huödx", pero chizéaj  
xopa beo' nuá'anu-bi' l'é'ènu bí'ido' na'.<sup>37</sup> Biti' bi zoa le  
cabí séqui'nè' Dios.  
<sup>38</sup> Ní'irö María gunabi':  
—Ni zoa'. Tsaz naca' huen dxin queé' Xanru'. Gaca  
quia' ca na' chigunnó'.  
Ní'irö la' buza'tè' gubáz lá'ayi na' ga zóabi' María.

### María sōjyubi'-nu Elisabet

<sup>39</sup> La' dza ní'isö guyú'ubi' nöza María, ate' carelö  
sa'yéajbi' ga naca gu'ado', en bidxinbi' tu yödzo luyú  
Judea.<sup>40</sup> Ní' guyázabi' lidxè' Zacarías, en gúdxibi'-nu  
Elisabet:  
—Padiux.  
<sup>41</sup> Cate' biyö'ninu Elisabet didza' na' bé'èbi' María, la'  
butátè cuinbi' bí'i hué'ènidó' na' yú'ubi' l'é'ènu, ate'  
bidisóalenè'-nu Dios Bö' Lá'ayi.<sup>42</sup> Ní'irö bé'ènu Elisabet  
zidzaj didza', rnnanu:  
—¿Chinunè' Dios ga nácaru' lí' bica' ba ca yúgu'tè  
nigula, en chinunè' ca' ga nácabí' bica' ba bí'ido' na'  
yú'ubi' læ'u!<sup>43</sup> ¿Núzxitè neda', zá'anu xiné'è Xana' quia'?  
<sup>44</sup> Cate' biyönda' didza' bé'u, bulidzu' neda', lu yöl-la'  
rudzeja queé'bi' la' butátè cuinbi' bí'i hué'ènidó' ni yú'u-  
bi' læ'a.<sup>45</sup> ¿Bica' ba lí' tu' guyéajlè'u xtídzè'è gubáz lá'ayi,  
ate' udxín caz læ na' gudxè' lí' uláz queé' Xanru'!  
<sup>46</sup> Ní'irö gunabi' María:  
¿Idútè le naca' rigú'u Xanru' yöl-la' ba,  
<sup>47</sup> en rudzeja ládxí'lèna'-nè' Dios, Nu rusölá neda'!  
<sup>48</sup> ¿Dios caz buzá' ládxè'è quia' neda'!  
Yu'a lu n'è'è, en tsaz naca' huen dxin queé'.  
Na'a isí lo, ca naca quia' ila'nná:  
Bica' ba nigula na'.  
<sup>49</sup> ¿Zxóntèrö naca le benè' Dios unná bé' quia'!  
¿Lá'ayi naca Lè'!  
<sup>50</sup> Lè' ruhuéchi' ládxí'tica'sè' bönachi tadxi Lè'  
na'a dza, en dza zá'gaca.  
<sup>51</sup> Yugu' yöl-la' huáca zxön chibenè' Lè'.  
Buzötjè' nupa gulún zxön yöl-la' réajni'i quéguequi.  
<sup>52</sup> Bugúè' yöl-la' unná bé' quégaca nupa gulaca lo,  
en benè' ga gulaca lo nupa gulaca nöxaj ladxi'.  
<sup>53</sup> Benè' ga bulu'huólaj bulu'dzé'e nupa gula'dún,  
en bucá'anè' cá'asó nupa bila'lé'e yöl-la' tsahuí'.  
<sup>54</sup> Gúcalenè' bönachi Israel, nupa na' tun xichiné',  
tu' yöjnenè' légaquiè', en buéchi' ládxè'è légaquiè'.  
<sup>55</sup> Benè' ca guzxí' lu n'è'è gunè' quégaquiè' xuz xtó'oru'  
enca' queé' Abraham, en quégaca dí'a dza queé'.  
<sup>56</sup> María bugá'analenbi'-nu Elisabet idú ca tsonna  
beo', ate' gudödi ní' böajbi' lídxibi'.

### Le guca cate' gúlajbe' Juan, bönni' uquilè' bönachi nisa

<sup>57</sup> Cate' bidxín dza ral-la' sóabi' bí'ido' queé'nu Elisa-  
bet, buzóanu-bi' tubi' bí'i bönni'do'.<sup>58</sup> Bila'yöni dzaga  
yu'u queé'nu, en yugu' dí'a dza queé'nu ca na' guca,  
buéchi' ládxè'è-nu Dios, ate' bulu'dzèjalen lænu.<sup>59</sup> Cate'  
chiguca xunu' dza zóabi' bí'ido' na', bila'dxinè' dí'a dza  
queé'nu para ila'chúguiè' lu xipéla'bi' bí'i bönni'do' na' læ  
na' gaca bè' néquibi' queé' Dios, ate' té'ènnè' ilu'è labi'  
Zacarías ca na' læ' xúzibi'.<sup>60</sup> Ní'irö bubí'inu didza' Elisa-  
bet, xiná'abi', rnnanu:  
—Calèga. Juan sí' labi'.  
<sup>61</sup> Gula'nábinè'-nu, ta'nné':  
—¿Bizx que? Cuntu nu dí'a dza quiu' læ' Juan.  
<sup>62</sup> Ní'irö bulu'lá' bulu'lu'ísinè', gula'nábinè' xúzibi'  
nacxi ré'èné' gu'è labi'.<sup>63</sup> Zacarías na' gunabè' tu blá-  
gado', ate' buzúajè' lahui caní: Juan læbi'. Bulu'bábinè'  
yúgu'tè'.<sup>64</sup> La' ní'isö böäljatè ru'è Zacarías na', en  
bugújtatè lúdxè'è, ate' bè'è didza' le gulu'è Dios yöl-la'  
ba.<sup>65</sup> Ní'irö guládxiné', en bulu'bábinè' yúgu'tè dzaga  
yu'u quégaquiè', ate' yúgu'tè yödzo'do' naca' lu  
gu'ado' luyú Judea, guzè didza' ca guca læ ni.<sup>66</sup> Gula'zá'  
ládxí'gaca yúgu'tè nupa bila'yöni ca na' guca, ta'nná:  
"¿Nacxi caz gácabí' bí'i bönni'do' ni? Le nácatè Xanru'  
zóalenè'-bi'."

### Didza' bè'è Zacarías uláz queé' Dios

<sup>67</sup> Ní'irö Dios Bö' Lá'ayi bidisóalenè' Zacarías, xúzibi'  
Juan, ate' bè'è didza' uláz queé' Dios, rnné':  
<sup>68</sup> ¿Yöl-la' ba Dios, Xángaca bönachi Israel  
tu' buduyúè' rè'u, bönachi queé', en böá'uè' rè'u!  
<sup>69</sup> ¿Gusól-lè'è queé'ru' Bönni' usölé'è rè'u,  
len yöl-la' huáca zxön queé'!  
Bönni' ni guljè' ládajgaca dí'a dza queé' David,  
huen dxin queé' Dios.  
<sup>70</sup> ¿Dza ní'te guzxí' lu n'è'è gunè' ga gaca caní!  
Raca ca na' gunné' lu ruá'agaquiè' bönni' gulu'è didza'  
uláz queé'.  
<sup>71</sup> Guzxí' lu n'è'è usölé'è rè'u  
lu ná'agaca nupa tequi rè'u zí',  
enca' lu ná'agaca nupa bití' ta'lé'e rè'u dxí'a.  
<sup>72</sup> Guzxí' lu n'è'è huéchi' ládxè'è xuz gudödi queé'ru',  
en tsöjnenè' le guzxí' lu n'è'è le naca lá'ayi.  
<sup>73</sup> Lè ni benè' tsutsu xtídzè'è, en guzxí' lu n'è'è,  
le gunè' queé' Abraham, xuz gudödi queé'ru',  
le naca tu le ral-la' gunè' queé'ru' rè'u.  
<sup>74</sup> Guzxí' lu n'è'è usölé'è rè'u  
lu ná'agaca nupa bití' ta'lé'e rè'u dxí'a  
para cabirö gádxiru' gunru' xichiné' Lè',  
<sup>75</sup> en para gácaru' ba'a ladxi', en idú dxí'a  
lahuè' Lè' yúgu'tè dza sóaru' ibanru'.  
<sup>76</sup> Lí', xzí'ina'do', sí' lo' bönni' ru'è didza' uláz queé' Dios  
unná bé'  
tu' tsöjnoru' ca Xanru' caz, en upó'o nöza ga tödè'.  
<sup>77</sup> Gunu' ga ila'nözi bönachi queé' ca gaca ulu'lágaca,  
en ca na' uniti lahuè' Dios dul-la' nabá'aga'gaca.  
<sup>78</sup> Caní gaca, tu' ruhuéchi'da' ládxè'è Dios rè'u,



en runë' ga tsení' queëru' Bönni' na' náquië' bení' idú.  
<sup>79</sup> Lë' uzení'ë quégaca nupa nacua' gapa naca chul-la,  
 en gapa nacua' nupa chizóa ilátigaca  
 para ugú'ë rë'u nöza ga cö'ö dxi lãdxi'do'oru'.  
<sup>80</sup> Guzxönbí' bí'i bönni'do' na', en bidipa lãdxi'bi'.  
 Guzósabí' gapa naca lu lataj cá'asö cate' bidxinrö dza  
 bulu'íi lobí' lógaca bönachi Israel.

### Le guca cate' gúlajbí' Jesús (Mt. 1:18-25)

**2** Lu dza na' gunná bë'ë Augusto César, bönni' Roma,  
 ila'yaza lu guichi yúgu'të bönachi nacua' yödžölió.  
<sup>2</sup> Cate' gusí lo ta'yaza lu guichi caní, rinná bë'ë bönni' lë' Cirenio luyú Siria. <sup>3</sup> Yúgu'të bönachi yöja-  
 ca yödžö que queéguéqui ga na' zeaj nababa para  
 ila'yaza lu guichi. <sup>4</sup> Guzë'ë José yödžö Nazaret luyú  
 Galilea, sa'yéajë' luyú Judea, en bidxinë' yödžö Belén,  
 ga ní' guljë' David, tu' guljë' José lãdajgaca dí'a dza  
 queë' David na'. <sup>5</sup> Guyijë' José ní' para tsázië' lu guichi,  
 ate' dzágabi'-në' María, bí'i nigula nazí' lu ná'abi' utsaga  
 ná'alënbí' lë', en chizóa sóabi' bí'ido' queëbi'. <sup>6</sup> Cate' ní'  
 nacué' lu yödžö Belén, bidxin dza sóabi' bí'ido' queëbi'.  
<sup>7</sup> Buzóanu-bí' tubí' bí'i bönni'do', bí'i huáca queënu.  
 Buchólinu-bí' yugu' lãri'do', ate' gudíxjanu-bí' tu lu yú'u-  
 do' ga tun chí'i le tãguba' böa' quégaca bönachi yú'u-  
 gaca nöza. Caní guca, tu' cabí bidžöli lataj ila'cu'ë lu  
 yú'u ga ní' ta'dxin bönachi yú'ugaca nöza.

### Tu'lu'íi lahuë' gubáz lá'ayi queë' Dios ga nacué' bönni' tu'yúë'-ba' bö'cu' xzila'

<sup>8</sup> Gala' ra' yödžö Belén nacué' bönni' tu'yúgaquië'-ba'  
 bö'cu' xzila' la' guixí', tapa chí'igaquië'-ba' chí'i dzó'ölö.  
<sup>9</sup> La' bulu'ítë lahuë' gubáz lá'ayi queë' Xanru' ga na'  
 nacué'. Yöl-la' bení' queë' Xanru' buzení' ga na' nacué',  
 ate' gulãdxinë'. <sup>10</sup> Ní'irö gubáz lá'ayi na' gudxë' lé-  
 gaquië', rnnë':

—Bití' gãdxilí'. Na'a rusiyönda' libí'ili' didza' le gun ga  
 udzëjade'eli', le ulu'zí' ca' xibé yúgu'të bönachi. <sup>11</sup> Na'a  
 chigúlajbí' lu ladzë' David Nu usölá libí'ili'. Nu ni naca  
 Cristo, Xanru'. <sup>12</sup> Lë ni gaca bé'ëbi'. Udzóli'li'-bí' Bí'ido'  
 na', narólibi' yugu' lãri'do', en dëbi' tu lu yú'udo' ga tun  
 chí'i le tãguba' böa' quégaca bönachi yú'ugaca nöza.

<sup>13</sup> Ga na' zoë' gubáz lá'ayi na', tsálido'os bulu'lu'íi ló-  
 gaquië' zianrö ca' gubáz lá'ayi queë' Dios, narúaj-  
 gaquië' yehua' yubá, en ta'gu'ë Dios yöl-la' ba, ta'nnë':

<sup>14</sup> Yöl-la' ba Dios zoë' xitsá',  
 ate' luyú gaca le cuéqui dxi lãdxi'do'gaquië'  
 bönni' raza lãdxë'ë Dios légaquië'!

<sup>15</sup> Cate' bulu'zë'ë gubáz lá'ayi na' ga ní' nacué',  
 søjhuójgaquië' yehua' yubá, ní'irö gulë luzë'ë tuë'  
 ia'túë' bönni' uyú bö'cu' xzila' na', ta'nnë':

—Uyéajtsöca'ru' Belén para ilé'eru' lë ni chiguca ca  
 na' chibusiyönnë' Xanru' rë'u.

<sup>16</sup> La' yójacatië', ate' yójxáca'gaquië' María len José,  
 enca' bí'ido' na', dëbi' tu lu yú'udo' ga tun chí'i le  
 tãguba' böa' quégaca bönachi yú'ugaca nöza. <sup>17</sup> Cate'  
 bila'lé'enë' lëbi', gula'guíxjö'ë lë na' sí' busiyönnë' gubáz  
 lá'ayi na' légaquië' ca naca queëbi' bí'ido' na'. <sup>18</sup> Bu-

lu'bani yúgu'të nupa bila'yöni didza' gulu'ë bönni'  
 tu'yúë' bö'cu' xzila' na'. <sup>19</sup> María gulú'usö icja náganu  
 didza' ni, ate' guzá' lãdxi'nu ca naca que. <sup>20</sup> Søjhuó-  
 gaquië' bönni' na' tu'yúë'-ba' bö'cu' xzila', tunë' xzön  
 Dios, en ta'gu'ë Lë' yöl-la' ba ní'a que yúgu'të lë na' bi-  
 la'yönnë', en bila'lé'enë', le guca ca na' busiyönnë'  
 gubáz lá'ayi na' légaquië'.

### Ta'gu'ë-bí' bí'ido' Jesús lu në'ë Dios

<sup>21</sup> Cate' chiguca xunu' dza zóabi' bí'ido' na', gu-  
 la'chúguie' lu xipéla'bi' lë na' naca bë' néquibi' queë'  
 Dios, ate' gulu'ë labí' Jesús ca na' chibé' cazë' labí'  
 gubáz lá'ayi na' zí'alö cate' sí' tsú'ubi' lë'ënu xiná'abi'.

<sup>22</sup> Cate' chibizá'a dza que le tu'pá'a cuíngacanu nigula  
 ca rinná bë' xibá queë' Moisés, gula'ché'ë-bí' bí'ido'  
 Jesús yödžö Jerusalén para ila'gu'ë-bí' lu në'ë Xanru'  
 Dios. <sup>23</sup> Caní gulunë', tu' nazúaj lu guichi lu xibá queë'  
 Xanru' le rnna: "Yúgu'tëbi' bí'i bönni'do' nãcagacabi' bí'i  
 zí'alö queënu xiná'agacabi', ulu'béajë'-bí' quez queë'  
 Xanru' Dios." <sup>24</sup> Que lë ni na' yójáquië' ní' para ilútië'-  
 ba', en ila'gú'ë-ba' lahuë' Dios chópaba' gúgudo' o chó-  
 paba' budödu' ca na' rinná bë' xibá queë' Xanru' Dios.

<sup>25</sup> Dza ní'isö zoë' tu bönni' lë' Simeón lu yödžö  
 Jerusalén. Bönni' ni náquië' tsahui', en reaj lãdxë'ë  
 Dios. Ribözë' Bönni' na' isól-lë'ë Dios, Bönni' na' gá-  
 calenë' bönachi Israel. Dios Bö' Lá'ayi zóalenë' Simeón  
 na', <sup>26</sup> en chibulu'ínë' lë' bití' gátië' cate' ilé'erönë'  
 Cristo, Bönni' na' isól-lë'ë Xanru' Dios. <sup>27</sup> Bidxinë'  
 Simeón na' chila yudo' tu' guchë'ë Dios Bö' Lá'ayi lë' ní'.  
 Cate' xuz xiná'abi' gula'ché'ë-bí' bí'ido' Jesús chila yudo'  
 para ilunë' queëbi' ca rinná bë' xibá na', <sup>28</sup> ní'irö  
 bunidë'-bí' Simeón na', en guyéaj lãdxë'ë Dios, rnnë':

<sup>29</sup> Xana', na'a huáca gunnu' neda' lataj gátia', soa dxi  
 lãdxa'a

tu' chiguca le gudxu' neda', huen dxin quiu'.

<sup>30</sup> Chibilé'eda' Nu na' buzóa cazu', Nu usölá bönachi,

<sup>31</sup> Nu na' ulú'u lahui lógaca yúgu'të bönachi.

<sup>32</sup> Lëbi' nãcabi' bení' le uzení' bönachi izá'a,  
 en nãcabi' ca' bení' quégaca bönachi Israel quiu'.

<sup>33</sup> Bulu'báinë' José, en María, xiná'abi' bí'ido' Jesús,  
 ca naca lë na' gunné' Simeón ca naca queëbi' Jesús.

<sup>34</sup> Simeón na' gunábinë' Dios gunë' ga gaca dxi'a qué-  
 gaquië', ate' gudxë'-nu María, xiná'abi' Jesús, rnnë':

—Buyútsöca'. Bí'i ni nuzöë'-bí' Dios para gunbí' ga  
 ila'chixi bönachi zian, ate' ulu'huóása bönachi zian  
 ladaj bönachi Israel. Gãcabi' tu le naca bë', ate' ila'nnë'  
 bönachi queëbi'. <sup>35</sup> Gaca caní para ila'lá' lahui le ta'zá'  
 lãdxi'gaca bönachi zian. Yugu' lë ni ilaca quiu' ca tu  
 guíë tuchi' le tsaza lãdxi'do'.

<sup>36</sup> Ana, nigula ru'ínu didza' uláz queë' Dios, zóanu ca'  
 ní'. Nãcanu xzí'inë' Fanuel, bönni' nababë' dí'a dza  
 queë' Aser. Chinagúlada'anu Ana na', tu' guzóalennu

bönni' queënu idú gadxi iz gudödi gúcanu ra'bando',  
<sup>37</sup> ate' bugá'ananu tuzi cate' bidxintë dza chiyú'unu idú

ca tápalalaj yu' tapa iz. Bití' ca' rubí'i ruzá'anu ga naca  
 chila yudo'. Rëla, en te dza reaj lãdxi'nu-në' Dios, runnu  
 gubasa, en rulídzanu-në' Dios. <sup>38</sup> La' ná'asö bidxintënu  
 ní', rënu-në' Dios: "Xclenu'." Gudíxjö'ínu yúgu'të bö-

nachi ca naca queébi' bí'ido' Jesús, bönachi na' nacua' Jerusalén, nupa ta'böza dza idxín Nu na' isól-lë'e Dios para gácalen bönachi.

### Söjhuójgaquië' José, en María yödzo Nazaret

<sup>39</sup> Gudödi gulunë' José, en María yúgu'të le rinná bë' xibá queë' Xanru' Dios, yójhuójgaquië' ládzaqaquië' Nazaret luyú Galilea. <sup>40</sup> Guzxönbi' bí'ido' Jesús, en bidipa ládxi'bi'. Guta' queébi' yöl-la' réajni'i, ate' zxon naca le ruzá' ládxe'ë queébi' Dios.

### Rudxinbi' bí'ido' Jesús chila yudo'

<sup>41</sup> Yugu' iz röjajúquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>42</sup> Cate' chiyú'ubi' chinnu iz bí'i Jesús, yójajúquië' Jerusalén ca tuncazë' cate' raca laní na'. <sup>43</sup> Cate' gudödi laní, söjhuójgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús. <sup>44</sup> Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'e. Ní'irö cate' bulu'guiljé'-bi' gapa nacua' dí'a dza quegaquië', en gapa nacua' nupa núnbë'gaquië' <sup>45</sup> bití' bulu'dzölinë'-bi'. Que lë ni na' yójhuójgaquië' Jerusalén, söjdljagaquië'-bi'.

<sup>46</sup> Cate' chiguca dza bunni, bulu'dzölinë'-bi' ga naca chila yudo', ró'öbi' gatsaj láhui'lë' bönni' yudo' tu'sédinë'. Ruzé nágabi' didza' tu'ë, en rinaba yúdxibi' légaquië'. <sup>47</sup> Bulu'bani yúgu'të nupa bila'yöni didza' bé'ëbi' ca naca yöl-la' réajni'i queébi', en ca nácagaca didza' bubí'ibi'. <sup>48</sup> Cate' bila'lé'enë'-bi' xuz xiná'abi', bulu'báinë', ate' gúdxinu-bi' xiná'abi', rnnanu:

—Zxi'ina', ¿bixz que benu' caní queétu? Buyútsöca, len yöl-la' ruúbi ruguí' neda', en xuzu' buguúljatu' lí'.

<sup>49</sup> Ní'irö gúdxibi' Jesús légaquië', rnnabi':

—¿Bixz que buguúljali' neda'? ¿Naru' cabí nózili' run bayudxi guna' xichinë' Xuza'?

<sup>50</sup> Bití' gula'yéajni'inë' xuz xiná'abi' didza' na' gúdxibi' légaquië'.

<sup>51</sup> Jesús böajlenbi' légaquië', budxinbi' Nazaret, ate' benbi' ca rna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni. <sup>52</sup> Ráta'rö yöl-la' réajni'i queébi' bí'i Jesús, en rizxonbi'. Burúajbi' dxí'a lahuë' Dios, en lógaca bönachi.

### Libán runë' Juan, bönni' ruquilë' bönachi nisa

(Mt. 3:1-12; Mr. 1:1-8; Jn. 1:19-28)

**3** Cate' chiguca chinu iz rinná bé'enë' Tiberio César iduté yödzólió, rinná bé'ë Poncio Pilato luyú Judea, ate' Herodes rinná bé'ë ca' luyú Galilea. Felipe, bóché'ë Herodes na', rinná bé'ë luyú Iturea, en luyú Traconite, ate' Lisanas rinná bé'ë luyú Abilinia. <sup>2</sup> Yugu' dza na' nácagaquië' bixúz lo Anás, en Caifás, ate' la' ná'asö Dios bé'lenë' Juan, zxi'inë' Zacarías, didza' cate' ní' zoë' Juan lu lataj cá'asö. <sup>3</sup> Ridé' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabá'agaca. <sup>4</sup> Guca caní ca na' nazúaj lu guichi lá'ayi

yugu' didza' bé'ë Isaías, bönni' bé'ë didza' uláz queë' Dios, rna:

Riyón chí'ë bönni' rulidzë' lu lataj cá'asö, rnnë':  
“Bulí'pá'a nöza lu icja ládxi'do'oli' para idxín Xanru' queé'li'.

Bulí'béaj li yugu' nöza lasi ga tödë'.

<sup>5</sup> Ral-la' ulígaca yúgu'të gapa naca röga', en ulu'huóaca lachi' yúgu'të guí'a sibi, en guí'ado'. Ral-la' ulu'rúaj li nöza nayecja nabí'igaca, ate' ulu'huóaca dxí'a nöza guí'oj.

<sup>6</sup> Ila'lé'eni yúgu'të bönachi Bönni' na' isól-lë'e Dios, Nu usólá bönachi.”

<sup>7</sup> Cate' bila'rúaj bönachi zían para ila'dila nisa lu në'e Juan, lë' gudxë' légaquië':

—Libí'ili', dí'a dza quegacaba' bëla sínia'. ¿Zoa nu bulu'li libí'ili' ral-la' izxúnnajli' yöl-la' rusiúdxí' sí' gaca quegaca bönachi? <sup>8</sup> Na'a, guli'gún le ilaca bé' chibubí'i ládxi'li', en bití' sa' ládxi'li', bití' innalí': “Nácatu' tsahuí' tu' nácatu' dí'a dza queë' Abraham”, tu' rea' libí'ili', huáca quélë'e Dios yugu' guí'oj ni, en gunë' ga ulu'huóaca dí'a dza queë' Abraham. <sup>9</sup> Nácalí' ca yugu' yaga. Chizóa riböza guí'ë huága para ichugu yugu' yaga. Yúgu'të yaga bití' ta'bía le naca dxí'a, ila'chúguië' yaga na', en ila'gu'ë léguequi lu guí'.

<sup>10</sup> Ní'irö bönachi nacua' ní' gula'nabi lë', ta'nná:

—¿Nacxi gúntsatu'?

<sup>11</sup> Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu bití' dë que, ate' nu dë le gagu, lësca' caní ral-la' quisi quegaca nupa bití' dë le ilágugaca.

<sup>12</sup> Bal-lë' bönni' tu'quizxjé' lázagaca bönachi uláz que yödzo zítu' bila'dxinë' ca' ní' para ila'dilé' nisa, ate' gula'nábinë' lë', ta'nné':

—Bönni' usëdi, ¿nacxi gúntsatu' netu'?

<sup>13</sup> Juan gudxë' légaquië':

—Bití' uquízjaröli' tsca le chigunnë' bönni' yú'uli' lu në'e.

<sup>14</sup> Bal-lë' bönni' röjajúquië' gudil-la gula'nábinë' ca' lë', ta'nné':

—¿Nazxi netu', nacxi guntu'?

Juan gudxë' légaquië':

—Bí'tirö gun gádxili' bönachi para cúali' le dë quéguequi. Bí'tirö innëli' quégaca bönachi le cabí nácate para gunli' ga ila'guizxaj libí'ili', pero guli'tsaza ládxi'li' tsca rázjali'.

<sup>15</sup> Ta'zá' ládxi'gaca bönachi na' ta'böza Bönni' na' ral-la' isól-lë'e Dios, channö náquië' Juan na' Bönni' lë' Cristo. <sup>16</sup> Bubi'ë didza' Juan, gudxë' yúgu'të, rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bé' ca neda', ate' neda' bití' naca' lesaca' ilecja' le nudé'ë ní'e. <sup>17</sup> Zönë' lu në'e böcö' queë', ate' ulubë' ga rilubi xzoa' xtila queë', lë ni rulu'li' le gaca quégaca bönachi. Utubë' xzoa' xtila, en cu'ë le xilataj, pero bëbu que uzéguí'ë lu guí' le catu caz ulu.

<sup>18</sup> Ca nácagaca didza' ni, en ia'zica'rö zían didza' le guchízië' icja nágagaca bönachi, benë' libán Juan ló-

gaquië' que didza' dxi'a. <sup>19</sup> Juan na' buzéguië' didza' Herodes, bönni' rinná bē'ē, tu' zóalenē'-nu Herodías, nigula queë' Felipe, bönni' bóchē'ē, enca' tu' runē' zían le ruá' dö'. <sup>20</sup> Ní'irö benē' Herodes tu le nácarö huiá' dö', gulu'ë Juan na' lidxi guié'.

**Ridíle' Jesús nisa**  
(Mt. 3:13-17; Mr. 1:9-11)

<sup>21</sup> Dza na' cate' cabí nadzunē' Juan lidxi guié', cate' ni' ruquilé' bönachi nisa, bidilē' ca' Jesús nisa. Cate' ni' rulidzē' Dios, guyalaj lúxiba, <sup>22</sup> ate' bötjē' Dios Bö' Lá'ayi, bidxinē' ga na' zoē' Jesús. Buluí' lahuē', rinē' ca riná' tuba' gu'dödo', ate' biyón chí'i Nu ruí' didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

**Yugu' xuz xinē'e gudödi queë' Jesús**  
(Mt. 1:1-17)

<sup>23</sup> Cate' gusí lahuē' runē' xichinē' Jesús, yu'ë ca chi uruá' iz. Téquiguequi bönachi náquiē' xzí'inē' José.

Jesús náquiē' xzí'ini xí'sóé' Elí,  
nu na' náquiē' xúzinu María, nigula queë' José na'.

<sup>24</sup> Elí na' gúquiē' xzí'inē' Matat,

nu ni guca xzí'inē' Leví,  
nu ni guca xzí'inē' Melqui,  
nu ni guca xzí'inē' Jana,  
nu ni guca xzí'inē' ia'túé' José.

<sup>25</sup> José ni gúquiē' xzí'inē' Matatías,  
nu ni guca xzí'inē' Amós,  
nu ni guca xzí'inē' Nahum,  
nu ni guca xzí'inē' Esli,  
nu ni guca xzí'inē' Nagai.

<sup>26</sup> Nagai na' gúquiē' xzí'inē' Mat,  
nu ni guca xzí'inē' ia'túé' Matatías,  
nu ni guca xzí'inē' Semei,  
nu ni guca xzí'inē' ia'túé' José,  
nu ni guca xzí'inē' Judá.

<sup>27</sup> Judá na' gúquiē' xzí'inē' Joana,  
nu ni guca xzí'inē' Resa,  
nu ni guca xzí'inē' Zorobabel,  
nu ni guca xzí'inē' Salatiel,  
nu ni guca xzí'inē' Neri.

<sup>28</sup> Neri na' gúquiē' xzí'inē' ia'túé' Melqui,  
nu ni guca xzí'inē' Adi,  
nu ni guca xzí'inē' Cosam,  
nu ni guca xzí'inē' Elmodam,  
nu ni guca xzí'inē' Er.

<sup>29</sup> Er na' gúquiē' xzí'inē' Josué,  
nu ni guca xzí'inē' Eliezer,  
nu ni guca xzí'inē' Jorim,  
nu ni guca xzí'inē' ia'túé' Matat.

<sup>30</sup> Matat na' gúquiē' xzí'inē' Leví,  
nu ni guca xzí'inē' Simeón,  
nu ni guca xzí'inē' Judá,  
nu ni guca xzí'inē' ia'túé' José,  
nu ni guca xzí'inē' Jonán,  
nu ni guca xzí'inē' Eliaquim.

<sup>31</sup> Eliaquim na' gúquiē' xzí'inē' Melea,

nu ni guca xzí'inē' Mainán,  
nu ni guca xzí'inē' Matata,  
nu ni guca xzí'inē' Natán.  
<sup>32</sup> Natán na' gúquiē' xzí'inē' David,  
nu ni guca xzí'inē' Isaí,  
nu ni guca xzí'inē' Obed,  
nu ni guca xzí'inē' Booz,  
nu ni guca xzí'inē' Salmón,  
nu ni guca xzí'inē' Naasón.

<sup>33</sup> Naasón na' gúquiē' xzí'inē' Aminadab,  
nu ni guca xzí'inē' Aram,  
nu ni guca xzí'inē' Esrom,  
nu ni guca xzí'inē' Fares,  
nu ni guca xzí'inē' ia'túé' Judá.

<sup>34</sup> Judá na' gúquiē' xzí'inē' Jacob,  
nu ni guca xzí'inē' Isaac,  
nu ni guca xzí'inē' Abraham,  
nu ni guca xzí'inē' Taré,  
nu ni guca xzí'inē' Nacor.

<sup>35</sup> Nacor na' gúquiē' xzí'inē' Serug,  
nu ni guca xzí'inē' Ragau,  
nu ni guca xzí'inē' Peleg,  
nu ni guca xzí'inē' Heber,  
nu ni guca xzí'inē' Sala.

<sup>36</sup> Sala na' gúquiē' xzí'inē' Cainán,  
nu ni guca xzí'inē' Arfaxad,  
nu ni guca xzí'inē' Sem,  
nu ni guca xzí'inē' Noé,  
nu ni guca xzí'inē' Lamec.

<sup>37</sup> Lamec na' gúquiē' xzí'inē' Matusalén,  
nu ni guca xzí'inē' Enoc,  
nu ni guca xzí'inē' Jared,  
nu ni guca xzí'inē' Mahalalel,  
nu ni guca xzí'inē' ia'túé' Cainán.

<sup>38</sup> Cainán na' gúquiē' xzí'inē' Enós,  
nu ni guca xzí'inē' Set,  
nu ni guca xzí'inē' Adán,  
nu ni guca ca xzí'ini cazē' Dios.

**Satanás tu' xihui' ré'ëni usubaga' Jesús dul-la'**  
(Mt. 4:1-11; Mr. 1:12-13)

**4** Buzé'ë Jesús ra' yegu Jordán, zóalenē' Dios Bö' Lá'ayi Lē', ate' Dios Bö' Lá'ayi na' guché'ë Jesús lu lataj cá'asö. <sup>2</sup> Guzöé' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuē' Jesús yugu' dza na', ate' gudödi ni' ridunē'. <sup>3</sup> Ní'irö tu' xihui' na' gudxi Jesús, rnna:

—Channö naca cazú' Li' Xzí'inē' Dios, gunnátsöca' ulu'huóaca guió'j ni yöta xtila.

<sup>4</sup> Bubi'ë didza' Jesús, rē' le:

—Nazúaj lu guichi, rnna: "Calé'gasö yöta xtila nabáni-gaca bönachi, pero nabánigaca ca' yúgu'tē xtídzē'ë Dios."

<sup>5</sup> Ní'irö guché' tu' xihui' na' Jesús ga naca tu lu guí'a sibi ate' tu chí'ido'osö buluí' Lē' yúgu'tē xilát'jagaca nupa ta'nná bē' yödzölió. <sup>6</sup> Tu' xihui' na' rē' Jesús, rnna:

—Gunna' quiu' yúgu'tē xilát'jagaca nupa ta'nná bē' ni, en yö'l-la' tsahui' qué'guequi, tu' nadödi lu na'a yúgu'tē

lè ni, ate' nu ré'énisida' ruá'a que. <sup>7</sup> Channö Li' uzóa zx-ibu' lahua', en gunu' neda' zxon, yúgu'tè lè ni guequi quiu'.

<sup>8</sup> Bubi'è didza' Jesús, rè' le:

—Gucuita ga zoa', Satanás, tu' nazúaj lu guichi lá'ayi le rè netu', rna: "Xanu' Dios tseaj ládzu'u-nè', en tuzé' Lè' gunu' xichiné'."

<sup>9</sup> Ní'irö tu' xihui' na' guché' Jesús Jerusalén, ate' budxia Lè' lu zö'ö ícjo'olö yudo', en rè Lè':

—Channö nacu' Zx'ínè' Dios, busuládzu'tsöca' cuinu' ni <sup>10</sup> tu' nazúaj lu guichi lá'ayi, rna:

Dios isól-lè'è gubáz lá'ayi queé', ilácalenè' Li'.

<sup>11</sup> Lu ná'agaquié' ulu'chisé' Li' para cabí tsöjchégu'u guió',

en bití' gunu' zí' ni'u.

<sup>12</sup> Bubi'è didza' Jesús, rè' le:

—Nazúaj lu guichi lá'ayi le rè netu': "Bití' sí' bē'u Xanu' Dios."

<sup>13</sup> Cate' bití' budzöli tu' xihui' na' ia'tú le sí' bē' Jesús, buzá' ga zoé' tu chí'ido'.

### Risí lahué' Jesús runé' xichiné' luyú Galilea

(Mt. 4:12-17; Mr. 1:14-15)

<sup>14</sup> Bóajé' Jesús luyú Galilea, dè lu në'è yöl-la' huáca queé' Dios Bó' Lá'ayi. Guzé' didza' ca naca queé', ate' bila'yöni bönachi nacua' yúgu'tè yödzö idú gásibi'ilö.

<sup>15</sup> Busédiné' Jesús bönachi gapa naca lu yu'u ga tu'dubé' tu'sédè' bönni' judío queé' Dios, ate' yúgu'tè bönachi gulún Lè' zxon.

### Le bené' Jesús yödzö Nazaret, ga naca ladzè'

(Mt. 13:53-58; Mr. 6:1-6)

<sup>16</sup> Ní'irö budxiné' Jesús yödzö Nazaret ga ni' guzxönè'. Cate' bidxín dza lá'ayi quégaquié' bönni' judío, ca run cazé' Jesús, guyázié' lu yu'u ga tu'dubé' tu'sédè' bönni' judío queé' Dios, ate' guzuíné' para ulabé' tu le nazúaj lu guichi lá'ayi. <sup>17</sup> Bulu'dödè' lu në'è Jesús guichi ga na' nazúaj didza' bē'è Isaías, bönni' bē'è didza' uláz queé' Dios. Cate' gusaljé' guichi na', budzóliné' ga nazúaj lu guichi le rna:

<sup>18</sup> Zóalené' Bó' Lá'ayi queé' Xanru' neda' tu' nubéajé' neda' quez queé' para usiyönda' bönachi yechi' didza' dxí'a. Gusól-lè'è neda' para una' nupa raca zí' ládxi'do'guequi,

en usiyönda' nupa nadzúngaca, ca gaca ulu'lágaca, en úna' bönachi nachul-la lóguequi, en usólá' bönachi zoa nu run léguequi zí',

<sup>19</sup> en guna' libán que dza ruzá' ládxi'é' Xanru' Dios quégaca bönachi.

<sup>20</sup> Ní'irö butubé' Jesús guichi na', en bugu'è le lu në'è bönni' rapa chí'è yugu' guichi lá'ayi, ate' gurö'è. Ní'irö yúgu'tè nupa nudúbigaca lu yu'u na' gula'ná' Jesús.

<sup>21</sup> Gusí lahué' Jesús rè' légaquié':

—Na'a dza ni zóali' libí'ili', rudxín caz le nazúaj lu guichi ni.

<sup>22</sup> Yúgu'tè' gula'nné' dxí'a queé', en bulu'bájiné' ca naca didza' dxí'a ru'è, ate' ta'nné':

—¿Naru' caléga bönni' ni xzí'iné' José?

<sup>23</sup> Jesús rè' légaquié', rnné':

—Nadxi huéli' neda' lè ni ta'nná bönachi, le rna: "Li', bönni' ruún bönachi, bun cuinu'." Lè'sca' caní huéli' neda': "Yugu' le biyónitu' benu' Capernaum, ben ca' ga ni naca ladzu'."

<sup>24</sup> Gunné' ca' Jesús:

—Le nácatè rea' libí'ili', channö zoé' nu bönni' ru'è didza' uláz queé' Dios, bití' tun bönachi uládz queé' lè' bal. <sup>25</sup> Le nácatè rea' libí'ili', gula'cuá'anu zían nigula uzèbi luyú Israel yugu' dza ni' zoé' Elías, bönni' bē'è didza' uláz queé' Dios, cate' ni' bití' gulaj guió'j idú ca tsonna iz yu' xopa beo', ate' guca gubín luyú na', <sup>26</sup> pero Dios bití' gusól-lè'è Elías na' ga nacua'anu nigula uzèbi nabábagacanu Israel, pero gusól-lè'è lè' ga na' zóanu tu nigula uzèbi lu yödzö Sarepta, le nababa yödzö Sidón. <sup>27</sup> Lè'sca' caní, gula'cuá' zían nupa te'e hué' nudzu' ruzödi luyú Israel dza ni' zoé' Eliseo, bönni' bē'è didza' uláz queé' Dios, pero bití' böáquié' nu bönni' nútsè'è ladaj bönachi Israel na', pero böáquié' tuzé' Naamán, bönni' nababé' luyú Siria.

<sup>28</sup> Cate' bila'yönné' didza' ni, gula'lené' yúgu'tè bönni' nacua'è lu yu'u ga na' tu'dubé' tu'sédè' queé' Dios.

<sup>29</sup> Ní'irö gula'yasé', en bulu'béajé' Jesús ní'ilo ra' yödzö. Gula'ché'è Lè' ga naca lè'e guí'a guió'j ga na' dè ládza-gaquié' para ulu'suládué' Lè' ga naca lè'e guí'a guió'j na'. <sup>30</sup> Ní'irö gudödè' Jesús gatsaj láhui'lö ga na' nacua'è, söhuóajtè'.

### Tu bönni' yu'u lè' bö' xihui'

(Mr. 1:21-28)

<sup>31</sup> Ní'irö guyijé' Jesús yödzö Capernaum luyú Galilea, ate' busédiné' bönachi yugu' dza lá'ayi quégaquié' bönni' judío. <sup>32</sup> Bulu'bájiné' ca naca le rusédiné' Jesús lé-gaquié', tu' bē'è didza' ca tu bönni' dè lu në'è yöl-la' un-ná bē'.

<sup>33</sup> Zóatè' ca' tu bönni' yu'u lè' bö' xihui' lu yu'u ga na' tu'dubé' tu'sédè' queé' Dios, ate' bē'è zidzaj didza', <sup>34</sup> rnné':

—¿Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbē'a Li' Nu nacua'. Bönni' Lá'ayi queé' Dios nacua'.

<sup>35</sup> Jesús buzené' le bach bö' xihui' na', en rè' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacua' ni'. Burúajtè lu bönni' na', en bití'rö bi ben queé'. <sup>36</sup> Bulu'bájiné' yúgu'tè', en gulu'è didza' tué' len ia'túé', ta'nné':

—¿Bizxi didza' ni ru'è? Len yöl-la' unná bē', en yöl-la' huáca zxon rinná bē'ené' yugu' bö' xihui', ate' tu'rúajtè bö' xihui' na'.

<sup>37</sup> Guzé' didza' ca naca queé' Jesús, ate' bila'yöni bönachi yúgu'tè yödzö idú gásibi'ilö.

### Ruúné' Jesús xiná'anu nigula queé' Pedro

(Mt. 8:14-15; Mr. 1:29-31)

<sup>38</sup> Ní'irö guyasé' Jesús, en burúajé' lu yu'u ga na' tu'dubé' tu'sédè' queé' Dios, ate' guyázié' lidxé' Simón.

Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. <sup>39</sup> Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bé'ënu le gulahuë'.

### Ruúnë' Jesús zían nupa te'e

(Mt. 8:16-17; Mr. 1:32-34)

<sup>40</sup> Cate' chiribía gubidza, yúgu'të nupa nacué'len léguequi nupa na' te'e que queé'guequi yödzhuë' bi-la'dxín ni', ate' dujuágaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. <sup>41</sup> Bulu'rúaj ca' zían bö' xihui' yú'ugaca bönachi te'e na'. Ta'bódxí'a bö' xihui' na', ta'nná:

—Li' nacu' xzí'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ilá'nná, tu' nöziguequi náquië' Cristo.

### Runë' Jesús libán luyú Galilea

(Mr. 1:35-39)

<sup>42</sup> Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guilaj Jesús. Cate' bila'dxinë' ga na' zoë', gulë'niguequinë' ulu'tsenë' Lë', para cabí uzë'ë ga na' nacu'ë.

<sup>43</sup> Ní'irö Jesús gudxë' légaquië', rnnë':

—Run bayudxi tseja' gapa nacué' ia'zica'rö yödzö, tsöjena' ca' libán ni' que didza' dxí'a ca rinná bë'ë Dios. Que lë ni na' gusól-lë'ë neda' ni.

<sup>44</sup> Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

### Ta'dzunba' böla zían

(Mt. 4:18-22; Mr. 1:16-20)

**5** Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. <sup>2</sup> Ní'irö bilé'enë' Jesús chopa bárcodo', xzóagaca lu nísado' ga na' naca ra' yu bidxi, ate' narúajgaquië' bönni' uzxón böla lé'egaca bárcodo' na', en ta'guibë' yöxaj böla quégaquië'. <sup>3</sup> Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zítu' ga naca ra' yu bidxi na'. Ní'irö gurö'ë Jesús lë'e bárcodo' na', en röö'së ca' ni' rusédinë' bönachi zían nacué' lu yu bidxi na'. <sup>4</sup> Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' röö' zila, ate' ni' gulí'zalaj yöxaj böla queé'li' para sönli'-ba' böla.

<sup>5</sup> Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en bití' bi böla nazónitu'-ba', pero didza' quiu' izáljagara' yöxaj.

<sup>6</sup> Cate' chigula'zaljë' le, gula'zönë' ziantëröba' böla, ate' réquitiqui' irözä' yöxaj böla na'. <sup>7</sup> Ní'irö bulu'lá'a bulu'lu'ísinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huótaj bárcodo' na' lu nisa. <sup>8</sup> Cate'

bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

<sup>9</sup> Caní gunné' tu' radxi ridzöbinë' Pedro ni'a quéga-caba' böla zían na' gula'zónagaquië'-ba', en lësca' caní guca quégaca nupa nacué'len lë'. <sup>10</sup> Guladxi gula'dzöbinë' ca' Jacobo, en Juan, yugu' xzí'inë' Zebedeo, nupa ni nacagaca luzë'ë Simón Pedro na'. Ní'irö Jesús rë' Simón na', rnnë':

—Bití' gádxinu'. Na'a isí lo' ichë'u quia' bönachi ca runu' rizönu'-ba' böla.

<sup>11</sup> Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

### Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

<sup>12</sup> Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

<sup>13</sup> Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxí'a.

La' gubídxitë huë' nudzu' queë' bönni' na'. <sup>14</sup> Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjlu'í cuinu' lahuë' bixúz, ate' yöjnödzej que yudo' le rulu'í nuhuöácu' dxí'a ca gunná bë'ë Moisés, lë na' ulu'í légaquië' chibóácu'.

<sup>15</sup> Guzëtërö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi.

<sup>16</sup> Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

### Ruúnë' Jesús tu bönni' huë' nacú'unië' bin

(Mt. 9:1-8; Mr. 2:1-12)

<sup>17</sup> Ia'tú dza, cate' ni' rusédinë' Jesús bönachi, röö'-gaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacué' ni'. <sup>18</sup> Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. <sup>19</sup> Cate' bití' gula'dzölinë' nacxi ilunë', tu' nacué' bönachi zían ni', gula'benë' ícjo'olö yu'u na', en gula'saljë' ícjo'ona'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láhui'lö bönachi ni' lahuë' Jesús.

<sup>20</sup> Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

<sup>21</sup> Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': "¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la? Tuzë' Dios runiti lahuë' dul-la'."

<sup>22</sup> Réquibe'enë' Jesús le ta'zá' ládxi'gaquië', ate' rë' lé-gaquië':

—¿Bizx que rizá' ládxi'li' caní? <sup>23</sup> Biti' naca böniga nu guié's bönni' ni: "Yugu' dul-la' nabágu'u chibuníti lahua", pero naca böniga nu gun ga chasë', en së'e ni'ë. <sup>24</sup> Guna' ga inózil' dë lu na'a neda', Bönni' Guljé' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

<sup>25</sup> La' guyásatë' bönni' huë' na' lógaquië', ate' bu'ë lë na' gúti'në', en söhuójë' lidxë', rigu'ë Dios yöl-la' ba.

<sup>26</sup> Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

### Jesús rulidzë' Leví

(Mt. 9:9-13; Mr. 2:13-17)

<sup>27</sup> Gudödi gulaca yugu' lë ni burúajë' Jesús ni', ate' bilé'enë' tu bönni' uquízaj lázagaca bönachi, lë' Leví, rözë ga na' ruquízjé', ate' Jesús rë' lë':

—Gudá' neda'.

<sup>28</sup> La' guyásatë' Leví, ate' bucá'anë' yúgu'të, en sa'yéa-jlenë' Jesús.

<sup>29</sup> Gudödi ni' benë' Leví na' tu gü'í huagu queë' Jesús ga naca lu yu'u lidxë', ate' gula'cu'ë zían bönni' uquízaj ni' len ia'bal-lë' bönni' ta'bó'lenë' légaquië' tahuë'.

<sup>30</sup> Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízaj, en ia'zica're' bönni' dul-la'?

<sup>31</sup> Bubi'ë didza' Jesús, rë' légaquië':

—Yugu' bönni' nacué' dxí'a bití' naquíniguequinë' nu un bönachi, pero bönni' té'enë' naquíniguequinë' nu un bönachi. <sup>32</sup> Za'a, calëga ulídzagaca'-në' bönni' tsahuí', pero za'a ulídzagaca'-në' bönni' dul-la' para ulu'bí' ládxi'gaquië'.

### Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

<sup>33</sup> Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

<sup>34</sup> Jesús rë' légaquië':

—¿Naru' huácatsö gunli' ga ilunë' gubasa bönni' nacué' laní que yöl-la' rutsaga na' tsanni ni' bönni' rutsaga në'ë zóalenë' légaquië'? <sup>35</sup> Huadxín dza cate' udúë' bönni' rutsaga në'ë ga nacué'. Dza ní'irö ilunë' gubasa.

<sup>36</sup> Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejé' tsötaca' le udé'ë lë'e lari' tēbi. Channö gunë' caní, calëgasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'. <sup>37</sup> Lë'sca' caní, cuntu nu bönni' rigu'ë xisi uva cubi lu buzudi guídi gula. Channö nu gun caní, xisi uva cubi na' uchöza'

buzudi guídi gula, ate' ilalaj xisi uva na', ate' gaca ditaj buzudi guídi gula na'. <sup>38</sup> Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i. <sup>39</sup> Channö zoa nu rë'aj xisi uva gula, bití' gué'ënitë guí'aj xisi uva cubi, tu' rna: "Nácarö sizxí' xisi uva gula na'."

### Bönni' usëda queë' Jesús ta'lecjé' do xzoa' xtila dza lá'ayi

(Mt. 12:1-8; Mr. 2:23-28)

**6** Cate' naca tu dza lá'ayi quégaquië' bönni' judío, ridödë' Jesús gapa dë yöla xzoa' xtila, ate' bönni' usëda queë' ta'lecjé' do ga dxí'a xzoa' xtila. Ta'zxúbí'ni ná'agaquië' le, en tahuë'. <sup>2</sup> Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

<sup>3</sup> Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacué'len lë'? <sup>4</sup> Guyázië' lu yu'u queë' Dios, en guzxí'ë yöta xtila tu'cu'ë lahuë' Dios, lë na' bití' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacué'len lë'.

<sup>5</sup> Ní'irö Jesús gudxë' légaquië', rnnë':

—Neda', Bönni' Guljé' Bönachi, naca' xani dza lá'ayi.

### Tu bönni' narequi' në'ë

(Mt. 12:9-14; Mr. 3:1-6)

<sup>6</sup> Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busédinë' nupa nacué' ni'. Zoë' ca' tu bönni' ni' narequi' në'ë ibëla. <sup>7</sup> Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. <sup>8</sup> Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. <sup>9</sup> Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ilí' tu didza'. ¿Naru' dë lataj cate' naca dza lá'ayi gunru' le naca dxí'a o gunru' le ruá' dó? ¿Naru' dë lataj uguéla'ru' yöl-la' na'bán quégaca bönachi, o uguáru' le?

<sup>10</sup> Ní'irö buyúë' Jesús yúgu'të bönni' na' nacué' gási-bí'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. <sup>11</sup> Ní'irö gula'lenë' bönni' yudo' na', ate' gulún xtidza'gaquië' la' légacasë' nacxi bi ilunë' queë' Jesús.

### Ribóë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

<sup>12</sup> Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bé'lenë' Dios didza'. <sup>13</sup> Cate' za' rení', bulidzë' yugu' bönni' dá'gaquië' Lë', ate' guróë' chínnuë' para iláquië' gubáz queë'. <sup>14</sup> Bulidzë': Simón, (lë' ca' Pedro),

Andrés, (bóchëë Pedro),  
 Jacobo, en Juan, en Felipe, en Bartolomé,  
<sup>15</sup> Mateo, en Tomás,  
 Jacobo, (zxí'inë Alfeo),  
 Simón, (bönni' ruí'i ládxëë yödzö queë'),  
<sup>16</sup> Judas, (bóchëë Jacobo),  
 en Judas Iscariote, (bönni' udödë' Jesús lu ná'agaquië'  
 bönni' ilútië' Lë').

### Ruúnë' Jesús bönachi zían

(Mt. 4:23-25)

<sup>17</sup> Jesús bótjalënë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacu'á'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' déggaca ra' nísado' ga na' nacu'á' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídzë' Jesús, en ulu'huóáca lu yödzöhuë' té'eguequi. <sup>18</sup> Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. <sup>19</sup> Yúgu'të bönachi zían na' tuí'i ládxí'gaca ila'gán Jesús tu' ruúnë' léguequi len yöl-la' huáca queë'.

### Nupa nácagaca bica' ba, en nupa nácagaca bica' bayechi'

(Mt. 5:1-12)

<sup>20</sup> Ní'irö buyúë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjalí' le naca queë' Dios, tu' gata' queé'li' lataj ga rinná bë'ë Dios.

<sup>21</sup> 'Bica' ba libí'ili' ridunlí' le gunné' Dios queé'li', tu' huóljali'.

'Bica' ba libí'ili' ribódxilí' tu' bi nadé'li' le naca tsahui', tu' huadxín dza uzxidxilí'.

<sup>22</sup> 'Bica' ba libí'ili', tu' za' dza caté' bití' ila'lé'e bönachi libí'ili' dxí'a, en ulu'béaj libí'ili' ga nacu'á', en ila'nné' zí' queé'li', en ulu'cá'ana cá'asö le nazí'i lalí' ca tu le naca xihui' tu' dá'alí' neda', Bönni' Guljé' Bönachi. <sup>23</sup> Bulí'sí' xibé dza na', en bulí'dzeja, tu' naca zxön le guequi queé'li' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

<sup>24</sup> 'Bica' bayechi' libí'ili', dë yöl-la' tsahui' queé'li', tu' chidé le ruzí'ili' xibé.

<sup>25</sup> 'Bica' bayechi' libí'ili' nuhuólaj nudzé'eli' na'a, tu' huadunlí'.

'Bica' bayechi' libí'ili' ruzxidxili na'a, tu' huí'inilí', en cödxí yéchi'li'.

<sup>26</sup> 'Bica' bayechi' libí'ili' ta'nné' yúgu'të bönachi dxí'a queé'li'. Lësca' caní gulunë' xuz xtó'oli', gula'nné' dxí'a quégaquië' bönni' gula'zí' yë'ë, gula'nné' nácagaquië' bönni' tu'ë didza' uláz queë' Dios.

### Ral-la' idxí'iru' nupa bití' ta'lé'e rë'u dxí'a

(Mt. 5:38-48; 7:12)

<sup>27</sup> Gunné' ca' Jesús:

—Libí'ili' zóalí' ni, en riyónilí' xtídzá'a, rea' libí'ili': Gulí'dxí'i nupa bití' ta'lé'e libí'ili' dxí'a. Gulí'gún le naca

dxí'a quégaca nupa tu'dí'i libí'ili'. <sup>28</sup> Gulí'nabi Dios gaca dxí'a quégaca nupa tu'a' dö' queé'li', en bulí'lidzë' Dios inábili'-né' gácalenë' nupa ta'nné' zí' queé'li'. <sup>29</sup> Channö nu capa' tsölá'a xagu', buzé ia'tsölá'a ca' xagu'. Channö nu cúa lari' naxó'a cúdzu'u, bë' lataj cúa ca' xzo'.

<sup>30</sup> Nú'títës nu bi inaba le dë quiu', bunödzej que, ate' nu cúa le nequi quiu', bití' unabu' le. <sup>31</sup> Ca ré'ënilí' ilún bönachi queé'li', lësca' caní gulí'gún quéguequi.

<sup>32</sup> 'Channö nadxí'isilí' nupa nadxí'igaca libí'ili', ¿bizxi yöl-la' ba idé'li'li? Lësca' caní tunë' bönni' dul-la', ta'dxí'inë' nupa nadxí'iguequi légaquië'. <sup>33</sup> Channö runlí' le naca dxí'a quégacasö nupa tun dxí'a queé'li', ¿bizxi yöl-la' ba idé'li'li? Lësca' caní tunë' bönni' dul-la'.

<sup>34</sup> Channö runödzejali' quégaca nupa runlí' löza ulu'bí'i queé'li', ¿bizxi yöl-la' ba idé'li'li? Lësca' caní tunë' bönni' dul-la', tu'nödzejë' quégaca nupa tun dul-la', tu' tunë' löza ulu'bí'i quégaquië' lë na' bulu'nödzejë'. <sup>35</sup> Neda' rea' libí'ili': Gulí'dxí'i nupa bití' ta'lé'e libí'ili' dxí'a, en gulí'gún le naca dxí'a. Bulí'nödzej quégaca bönachi sal-la' bití' runlí' löza nu ubí'i queé'li'. Channö caní gunlí', zxön naca le gata' queé'li', ate' gácalí' zxí'ini cazë' Dios, Nu nácatërö lo, tu' runë' Lë' le naca dxí'a quégaca bönachi bití' ta'yaza ládxí'gaca, en quégaca bönachi tuá' dö'.

<sup>36</sup> Bulí'huéchi' ládxí'li' bönachi ca na' runë' Xúzilí' Dios, ruhuéchi' ládxë'ë yúgu'të bönachi.

### Bití' ral-la' ichugu bë'ëru' que luzá'aru'

(Mt. 7:1-5)

<sup>37</sup> Gunné' ca' Jesús:

—Bití' ichugu bë'ëli' que luzá'ali', ate' cuntú nu ichugu bë' queé'li'. Bití' cuéaj bë'ëli' que luzá'ali', ate' cuntú nu cuéaj bë' queé'li'. Bulí'niti lo luzá'ali', ate' Dios uniti lahuë' ca' libí'ili'. <sup>38</sup> Bulí'nödzej que luzá'ali', ate' Dios gunné' queé'li'. Ulu'nödzejë' queé'li' le ulu'rixë' len tu guí'ina ribixi le naca idú, le naguirö, en naguí gate ga rë', en zóaticá' gubá. Ca naca le ruríxili', la' cá'asö urixë' Dios ca' queé'li'.

<sup>39</sup> Bucúdzü'ë didza' Jesús, rë' légaquië':

—¿Naru' huácatsö nu bönni' lo chul-la' ichë'ë ia'túé' bönni' lo chul-la? Bití' ca' gaca, tu' ila'bixë' iropé' tu lu yeru. <sup>40</sup> Bití' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

<sup>41</sup> '¿Bizx que ruyú' bébudo' yu'u guiój lahuë' böchi' luzó'o, en bití' rilé'enu' le zxön yu'u guiój lo cazu?

<sup>42</sup> ¿Naru' huácatsö guío'-né' böchi' luzó'o: "Bócha'a, benna lataj cueja' bébudo' yu'u guiój lo'", en bití' rilé'enu' le zxön yu'u guiój lo cazu? Li', bönni' rulu'ísö tsahui' cuinu', guléaj zí'alö le zxön yu'u guiój lo cazu', ate' ní'irö ilé'enu' dxí'a para cueju' bébudo' yu'u guiój lahuë' böchi' luzó'o.

### Le runru' naca bë' le nácaru'

(Mt. 7:17-20; 12:34-35)

<sup>43</sup> Gunné' ca' Jesús:

—Tu yaga dxí'a bití' cuía le naca cá'asö. Lësca' caní, tu yaga guí'a bití' gaca cuía le naca dxí'a. <sup>44</sup> Caní naca, le ribía tu yaga naca bë' ca naca yaga na'. Bití' ruchíbiru'

le ribía yaga higo lu yaga yötsi', en calëga lu bisequi' yötsi' bití' ruchíbiru' le ribía lubá uva. <sup>45</sup> Tu bönni' dxí'a ru'ë didza' dxí'a tu' yu'u le naca dxí'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

### Chopa ca gaca cuéquiru' xilibi yu'u

(Mt. 7:24-27)

<sup>46</sup> Gunné' ca' Jesús:

—¿Bizx que ruldzali' neda', rnnali': "Xantu', Xantu'", pero bití' runli' ca rinná bé'eda' libí'ili? <sup>47</sup> Ulu'ida' libí'ili' ca naca nu na' za' quia', en riyöni xtídza'a, en run ca rna xtídza'a. <sup>48</sup> Nu ni naca ca tu bönni', cate' benë' lidxë', guchó'önë' ga rë', en guléquië' xilibi yu'u ga naca lu guió'j. Cate' bötaj yegu gubó'o, guchó'öna cuita yu'u na', pero bití' guca uquinnaj le, tu' nulibi ga naca lu guió'j. <sup>49</sup> Na'a, nu riyöni xtídza'a, en bití' run ca rna, nu ni naca ca tu bönni' benë' lidxë' ga naca lu yu cá'asö. Bití' benë' xilibi. Cate' guchó'öna yegu gubó'o cuita yu'u na', la' biguinnajtë, ate' gubixi dërö zö'ö que.

**Jesús ruúnë'-bi' bi'i huen dxin queë' tu bönni' unná bë'**

(Mt. 8:5-13)

**7** Cate' Jesús budxi bé'lenë' légaquië' didza' ni, guyázië' yödzö Capernaum. <sup>2</sup> Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. <sup>3</sup> Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsjöta'yugaquië' lahuë' Lë' guidë' uduhuénë'-bi' bi'i huen dxin queë' na' ré'ebi'. <sup>4</sup> Bönni' gula tu'zéajni'inë' na' bila'dxinë' ga zoë' Jesús, ate' gulá'tayue' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, <sup>5</sup> tu' runë' bal bönachi uládz queë'ru', en benë' tu yu'u queë'ru' ga rudúbiru' rusédaru' queë' Dios.

<sup>6</sup> Ní'irö Jesús guyéajlenë' légaquië'. Cate' chizóa ilá'dxinë' lidxë' bönni' na', lë' gusól-lë'ë bal-lë' böchi' luzé'ë ga zë'ë Jesús, ate' të' Lë':

—Xan, rnnë' bönni' na': "Bití' uguí'inu', tu' cabí naca' lesaca' tsáziu' lidxa', <sup>7</sup> en bití' naca' lesaca' guída' ga zu'. Que lë ni na' bití' burúguida' guída' ga zu'. Bé'ësö didza', ate' huóacatëbi' bi'i huen dxin quia'. <sup>8</sup> Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

<sup>9</sup> Cate' biyönnë' Jesús didza' ni, bubáninë' queë' bönni' na', ate' buécjé', en gudxë' bönachi na' zá'gaca cúdzulë', rnnë':

—Le nácatë rea' libí'ili', cuntu nu bönni' Israel bití' röjxáqui'da'-në' réajlë'ë quia' ca réajlë'ë quia' bönni' ni.

<sup>10</sup> Cate' bulu'dxinë' bönni' na' gusól-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chiböacabi' bi'i huen dxin na'.

**Jesús rusubanë'-bi' bi'i bönni' queë'nu tu nigula uzëbi**

<sup>11</sup> Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían. <sup>12</sup> Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjçáci'gaquië'-bi'. Bi'i nati na' nácabi' la's dui bi'i queë'nu tu nigula uzëbido'. Zían bönachi uladza queë'nu nigula uzëbi na' söjçacalen-nu. <sup>13</sup> Cate' Xanru' bilé'enë'-nu, buéchi' ládxe'-nu, ate' gudxë'-nu:

—Bí'tirö cödxu'.

<sup>14</sup> Ní'irö gubí'guie' Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bí'ido', lí' rea', guyasa.

<sup>15</sup> Ní'irö bubanbi'. Guró'öbi' bi'i na' zí'alö nátibi', ate' gusí lobi' ru'í'ibi' didza'. Jesús budöde'-bi' lu ná'anu xiná'abi'. <sup>16</sup> Cate' bönni' ni' bila'lé'enë' lë ni, gulá'dxinë' yúgu'të', ate' gula'gu'ë Dios yöl-la' ba, ta'nnë':

—Bidxín queë'ru' tu bönni' lo, ru'ë didza' uláz queë' Dios. Dios caz rácalenë' bönachi queë'.

<sup>17</sup> Guzë' didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

**Le rinabë' Juan, bönni' buquilë' bönachi nisa**

(Mt. 11:2-19)

<sup>18</sup> Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, <sup>19</sup> ate' gusól-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Lí' Cristo, bönni' ral-la' guidë', o naru' ral-la' cöztu'-në' bönni' yúbölö?" <sup>20</sup> Cate' bila'dxinë' bönni' na' nasól-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasól-lë'ë netu' para inábitu' Lí', innatu': "¿Nacu' Lí' Cristo, bönni' na' ral-la' guidë', o naru' ral-la' cöztu'-në' bönni' yúbölö?"

<sup>21</sup> La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guió'j lógaquië'. <sup>22</sup> Bubi'ë didza' Jesús, rë' chopë' bönni' na' nasól-lë'ë Juan, rnnë':

—Gulí'tséaj, gulí'tsöjtíxjöi'-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zë'ë bönni' gulatsjé'. Nuhuóacagaquië' bönni' gü'í'guequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulatië'. Ta'yönnë' bönni' yechi' didza' dxí'a. <sup>23</sup> Bica' ba nu bití' gaca chopa ladxí', ate' za'len neda' sal-la' bití' runa' ca réqui nu na' ral-la' guna'.

<sup>24</sup> Cate' bönni' na' gusól-lë'ë Juan bulu'zë'ë ni', gusí lahuë' Jesús rulu'í'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? <sup>25</sup> ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'z'í xibé yöl-la' tsahui', nacuá' lídxigaquië' bönni' ta'nná bë'ë. <sup>26</sup> ¿Bizxi caz birúajli' yöjyuli'? ¿Naru'



birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayépisëtëré' ca nu ru'í didza' uláz queë' Dios. <sup>27</sup> Náquië' Juan bönni' na' nazúaj lu guichi lá'ayi ca naca queë', rna:

Buyútsöca', risól-la'a-në' gubáz quia', inóruë' ca Lí'. Bönni' ni uchi'ë nöza ga tödu'.

<sup>28</sup> Neda' rea' libí'ili': Gapa nacua' bönachi, channö zoë' nu bönni' ru'ë didza' uláz queë' Dios, bití' nácarë' lo ca Juan, bönni' na' buquilë' bönachi nisa, pero nu nácatëro cuídí'sö ga rinná bë'ë Dios nayépisëtëro ca Juan na'.

<sup>29</sup> Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, <sup>30</sup> pero yugu' bönni' yudo' fariseo, en bönni' yudo' tu'sédinë' xibá queë' Moisés bití' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

<sup>31</sup> Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácaquië'? <sup>32</sup> Nácaquië' ca bí'ido' ta'guítjabi'. Ta'bó'öbi' lu yé'eyi, en ta'bó'dxi'abi'. Ta'nnabi' tubi' ia'tubi': "Rucódxitu' queéli' gui, pero bití' ruyá'alí'. Rul-la yéchi'tu', pero bití' ribódxili'." <sup>33</sup> Caní nácalí' tu' bidë' Juan, bönni' buquilë' bönachi nisa, en bití' gu-dahuë' yöta xtila, en bití' gu'ë xisi uva, ate' rnalí' queë': "Tu' xihui' dzaga lë'." <sup>34</sup> Cate' bida' neda', Bönni' Guljë' Bönachi, en ré'aj rahua', rnalí' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zícá'rë' bönni' dul-la'." <sup>35</sup> Rea' libí'ili': Naca bë' nupa nápagaca yöl-la' réajni' queë' Dios ní'a que le túngaca.

### Le benë' Jesús lidxë' tu bönni' yudo' fariseo

<sup>36</sup> Tu bönni' yudo' fariseo bulidzë' Jesús gágulenë' lë' tsözxón, ate' guyazië' Jesús lidxë' bönni' na', en gurö'ë rahuë'. <sup>37</sup> Zóanu lu yödzö na' tu nigula udá dzaga, en cate' nózinu rö'ë rahuë' Jesús lidxë' bönni' yudo' fariseo na', ní'irö bidxinu ni' nuá'anu tu bóga'do' néquini guió'j nazaca' le yudzu tu le rilá' zxixi. <sup>38</sup> Cate' bidxinu zaca' cúdzu'lë' Jesús, guró'önu xini'ë ribódxinu. Ní'irö gusí lonu rigú'unu nisa ribódxinu ní'ë Jesús, en ruzxinu ní'ë len guitsa' ícjanu. Butsaga lonu ní'ë, en gulú'unu ní'ë lë na' rilá' zxixi. <sup>39</sup> Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rig-annu Lë', tu' nácanu nigula udá dzaga." <sup>40</sup> Ní'irö Jesús gudxë' bönni' fariseo na', rnnë':

—Simón, dë tu le ral-la' guía' lí'.

Bubi'ë didza' bönni' na', rnnë':

—Gunná, Bönni' Usedi.

<sup>41</sup> Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'tué' na' ral-lë'ë queë' lazxjë' que chopa beo'. <sup>42</sup> Tu' cabí dë quégaquië' dumí ulu'guíxjë' lë na' tál-lë'ë queë', que lë ni na' buniti

lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

<sup>43</sup> Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

<sup>44</sup> Ní'irö buécjë' Jesús, ate' ní' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' bití' bennu' quia' nisa quí'bida' ní'a, pero nigula ni gulú'unu ní'a nisa ribódxinu, en buzxinu ní'a len guitsa' ícjanu.

<sup>45</sup> Bití' butsaga lo' neda', pero cate' bidxíntea' lidxu', bití' ruzóa dxinu nigula ni, rutsaga lonu ní'a. <sup>46</sup> Bití' gulú'u icja' le za, pero nigula ni gulú'unu ní'a lë na' rilá' zxixi.

<sup>47</sup> Que lë ni na' rea' lí', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí' Dios nu na'.

<sup>48</sup> Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

<sup>49</sup> Yugu' bönni' na' ta'bó'lenë' Jesús tahuë' gula'sí ló-gaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

<sup>50</sup> Ní'irö Jesús gudxë'-nu nigula na', rnnë':

—Tu' réajlë'u neda', chibuló' lí'. Böaj lidxu', zoa dxi ládxu'u.

### Yugu' nigula tácalenu Jesús, ta'gú'unu le tahuë'

**8** Gudödi gulaca lë ni, gudé' Jesús gapa nacua' zían yödzö zxón, en yugu' yödzödo', ate' benë' libán ni', en bë'ë didza' que didza' dxí'a ca rinná bë'ë Dios, ate' idxínnutë' bönni' usëda queë' dzágagaquië' Lë'. <sup>2</sup> Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzöhuë' gü'í'guequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. <sup>3</sup> Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nódzjanu le dë quéga-canu.

### Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

<sup>4</sup> Bila'rúaj bönachi zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

<sup>5</sup> —Birúajë' bönni' guz, sòjésië' xisedo'. Cate' ní' sòjésië', bulu'huöxaj bal-la xisedo' na' ga naca lá' nöza, ate' bulu'libi bönachi léguequi. Bila'dxinba' ca' biguín-nido', en gulé'ajba' xisedo' na' dzö'ö la' nöza. <sup>6</sup> Bulu'huöxaj ia'bal-la xisedo' na' lu yu ga rö'ö guió'j. Cate' gula'lén xisedo' na', la' gula'bídxitë' tu' cabí nalupa' yu na'. <sup>7</sup> Bulu'huöxaj ia'bal-la xisedo' na' ga bulu'lén lubá yötsí'. Tsözxón gula'zxón lubá yötsí' na', en xisedo' na',

ate' lubá yötsi' na' bila'röli xisedo' na' gula'lén, en gulún ditaj léguequi. <sup>8</sup> Bulu'huöxaj ia'bal-la xisedo' na' ga naca luyú bëbu. Cate' chigula'zxón, bulu'nödzej. Tu dxigu' na' bunödzej ia'tú gayuát'èrö xisedo' ca'.

Cate' budxi gunné' caní Jesús, bë'è zidzej didza', rnné':

—¡Nu zoa nagui, en riyöni ral-la' uzé nagui!

### Bixz que rucúdzue Jesús didza'

(Mt. 13:10-17; Mr. 4:10-12)

<sup>9</sup> Ní'irö yugu' bönni' usèda queë' Jesús gula'nábiné' Lè', ta'nné':

—¿Bizxi sa'yéaj lè na' bucúdzuu didza'?

<sup>10</sup> Jesús gudxé' légaquié':

—Dios ruzéajni'iné' libí'ili' le nagachi' ca rinná bë'è Lè', pero ia'zica'rö bönachi ni, ruí'ílèna' léguequi didza' le rucúdzua didza' para cate' ulu'yúé', bití' ila'lé'ené', en cate' ila'yönné', bití' ila'yéajni'iné'.

### Rigúxjö'è Jesús le rulu'í le bucúdzue didza'

(Mt. 13:18-23; Mr. 4:13-20)

<sup>11</sup> Gunné' ca' Jesús:

—Caní naca le rulu'í lè na' bucúdzua didza'. Xisedo' na' naca xtídzé'è Dios. <sup>12</sup> Xisedo' na' bulu'huöxaj la' nöza tu'lu'í ca raca quégaca bönni' ta'yönné' didza' na', pero la' za'tè tu' xihui', en rigúa didza' na' bidxín lu icja ládxí'do'gaquié', para cabí ila'yéajlé'è, en cabí ulu'lé'.

<sup>13</sup> Xisedo' na' bulu'huöxaj lu yu ga rö'ö guiój tu'lu'í ca raca quégaquié' bönni' ta'yönné' didza' na', en tu'dzé-jané' ta'zi'è le, pero nácagaquié' ca xisedo' na' bití' ben lui. Tu chí'isö ta'yéajlé'è, tu' ridxín le rizí' bë' légaquié', ate' la' tu'huóatè ládxí'gaquié'. <sup>14</sup> Xisedo' na' bulu'huöxaj ga bulu'lén lubá yötsi' tu'lu'í ca raca quégaquié' bönni' ta'yönné' didza' na', en cate' chibila'yönné', yugu' le tu'í ládxí'gaquié' yödzöliö ni, en yugu' yöl-la' tsahui' que, en yugu' le ta'yaza ládxí'gaquié' le taca ni, tun nigui légaquié', ate' bití' run dxin didza' na' lu icja ládxí'do'gaquié'. <sup>15</sup> Xisedo' na' bulu'huöxaj ga naca luyú bëbu tu'lu'í ca raca quégaquié' bönni', idú ládxí'gaquié' ta'yönné' didza' na', en ta'gu'è tsutsu le lu icja ládxí'do'gaquié', ate' lu yöl-la' riböza zxón ladxí' tuné' ca rnna didza' na'.

### Rucúdzue didza' Jesús que le rigú'u bení' lídxiru'

(Mt. 4:21-25)

<sup>16</sup> Gunné' ca' Jesús:

—Cuntu nu bönni' ruquélé'è guí', ate' la' rudúsi'té' le guí'ina, en bití' rigú'è le xzani le ráti'né', pero ruzóé' le xilataj ga naca liná' lu yu'u, ate' nupa ila'yaza ní' ulu'z'í xibé guí' na'. <sup>17</sup> Ilá' lahui yúgu'tè le nagachi', ate' gaca bë', ate' irúaj ga liná' yúgu'tè le raca balándo'os.

<sup>18</sup> 'Que lè ni na', bulí'zé nágali', tu' huadélí'né' ia'lati' bönni' ruzóé' tsutsu icja ládxí'da'ahué' didza' riyönné', en huazí'rè' xtídzé'è Dios, pero bönni' bití' ruzóé' tsutsu icja ládxí'da'ahué' didza' riyönné', huadúa didza' na' biyönné'.

### Xiné'è Jesús, en yugu' bönni' bóché'è

(Mt. 12:46-50; Mr. 3:31-35)

<sup>19</sup> Ní'irö bila'dxiné' xiné'è Jesús, en yugu' bönni' bóché'è ga na' zoé', pero bití' guca ila'bígué'è gala' ga zoé' tu' nacuá' bönachi zían ní'. <sup>20</sup> Zoa ní' nu bulidza Jesús, rnna:

—Nacu'è xinó'o, en yugu' bönni' bóchu'u lö'a. Té'ènné' ilu'ílené' Lí' didza'.

<sup>21</sup> Bubi'è didza' Jesús, rè' légaquié':

—Nupa ni ta'yöni xtídzé'è Dios, en tun ca rnna, bönni' ni nácagaquié' ca xiná' caza', en yugu' bönni' bóchi' caza'.

### Jesús ribequi dxíé' bö' budunu'

(Mt. 8:23-27; Mr. 4:35-41)

<sup>22</sup> Tu dza gurené' Jesús tu lè'e bárcodo', dzágagaquié' bönni' usèda queë' Lè', ate' Jesús rè' légaquié':

—Udóditsöca'ru' ia'tsölá'a nísado' ni.

Ní'irö söjácate'. <sup>23</sup> Tsanni ní' ta'dödé' lu nísado' na', rásié' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zzan nisa, en zoa bönadxi quégaquié'. <sup>24</sup> Ní'irö gula'bigué'è ga dè' Jesús, en bulu'subané' Lè', ta'nné':

—¡Bönni' Usedi! ¡Bönni' Usedi! ¡Chirequi huótjaru' lu nisa!

Cate' bubané' Jesús, bulidzé' bö' na' recja, en nisa na' riyasa ridxiada', ate' guzóa dxi bö' na' recja, en guró'ö dxi lu nísado' na'. <sup>25</sup> Ní'irö Jesús gudxé' yugu' bönni' usèda queë', rnné':

—¿Naru' cabí réajlé'èli' Dios?

Guládxiné' légaquié', en tu'bábiné'. Gulé luzá'a-gaquié' tué' ia'túé':

—¿Nuzxi caz bönni' ni? Rinná bé'ené' bö' recja, en nísado', ate' tun ca rnna xtídzé'è.

### Tu bönni' yödzö Gadara yu'u lè' bö' xihui'

(Mt. 8:28-34; Mr. 5:1-20)

<sup>26</sup> Ní'irö bila'dxiné' lu xiyúgaquié' bönni' Gadara, le dè' ia'tsölá'a nísado' ca dódilö ga dè' luyú Galilea. <sup>27</sup> Cate' birúajé' Jesús lè'e bárcodo' na' ga naca lu yu na', dut-ságuié' tu bönni' yödzö na' Lè'. Chigudzé yu'u bö' xihui' lè', ate' bití'rö rácué' lari', en bití'rö rizóé' lu yu'u, pero nun xilatjé' lu zzan bulóaj ga nádjagaca yeru ba. <sup>28</sup> Cate' bönni' na' yu'u bö' xihui' lè' bilé'ené' Jesús, guró'dxi'è zidzej, ate' buzóa zxibé' lahué' Jesús, en bë'è zidzej didza', rnné':

—¿Bizxi ral-la'a quiu', Jesús, Zxí'iné' Dios nayépisètèrè'? Rátayua' lo' cabí usaca' zí'u neda'.

<sup>29</sup> Caní gunné' tu' chigunná bé'ené' Jesús bö' xihui' na' urúaj lu bönni' na'. Zían luzuí z'atèlö burixi butúluda' bö' xihui' na' bönni' na', ate' yugu' bönni' yödzö ní' gulúguí'è lè' du guíé', en bulu'xéjané' breguí' guíé' ní'a në'è, pero blé'è yugu' du guíé' na', ate' bö' xihui' na' yu'u lè' guché' lè' lu lataj cá'asö. <sup>30</sup> Ní'irö Jesús gunábiné' bö' xihui' na', rnné':

—¿Bi leu'?

Bö' xihui' na' gudxi Lè':

—Le Zián lea’.

Caní gunná tu’ yú’ugaca bö’ xihui’ zían bönni’ na’.

<sup>31</sup> Ní’irö yugu’ bö’ xihui’ na’ guláta’yugaca lahué’ Jesús cabí isóil-lè’è léguequi lataj chul-la quégaca nupa náti-gaca. <sup>32</sup> Nacuá’aba’ ca’ tu có’öba’ cuchi zían ta’daba’ táguba’ lu gu’ado’ ní’, ate’ bö’ xihui’ na’ gula’naba yechi’ Jesús gu’è léguequi lataj tsöjtsú’ugaca cuchi zían na’. Jesús bē’è léguequi lataj. <sup>33</sup> Bulu’rúaj yugu’ bö’ xihui’ lu bönni’ na’, en yöjtsú’ugaca cuchi zían na’, ate’ yöjácaba’ cuchi zían na’ ga naca tu lē’e guió’j. Yöjbíxigacaba’ lu nísado’, ate’ ní’ gula’yé’piba’ nisa, gulátiba’.

<sup>34</sup> Cate’ bila’lé’enē’ bönni’ tu’yúgaquiē’-ba’ cuchi zían na’ ca na’ guca quégacaba’, guladxi gula’dzöbinē’. Bulu’zúnna’jē’ ní’, ate’ yöjhuöjgaquiē’ yöjtixjöi’igüequinē’ nupa nacua’ yödzo na’, en nupa nacua’ la’ guixi’ ní’.

<sup>35</sup> Ní’irö bila’rúajē’ bönni’ yödzo na’, yöjyúgaquiē’ lē na’ guca. Cate’ bila’dxinē’ ga na’ zoē’ Jesús, bila’lé’enē’ bönni’ na’ gula’yú’u bö’ xihui’ lē’, rö’è xini’è Jesús. Nacuē’ lari’, en dxí’ado’ chizö’è, ate’ guládxinē’. <sup>36</sup> Nupa na’ bila’lé’e lē na’ guca gula’guixjöi’ légaquiē’ ca guca, böáquiē’ bönni’ na’ gula’yú’u bö’ xihui’ lē’. <sup>37</sup> Ní’irö yúgu’tē bönachi zían na’ quégaca yödzo nabábagaca Gadara na’ guláta’yu lahué’ Jesús urúajē’ lu xiyúguequi, tu’ tádxinē’. Bubenē’ Jesús lē’e bárcodo’ na’, en söhuó’jē’. <sup>38</sup> Bönni’ na’ bulu’rúaj bö’ xihui’ na’ lē’ gú-ta’yuē’ lahué’ Jesús gu’è lē’ lataj tséajlenē’ Lē’ tsözxón. Gunná bé’enē’ Jesús lē’ ugá’anē’ ní’, rnnē’:

<sup>39</sup> —Böaj lidxu’. Yöjtixjöi’i bönachi uládz quiu’ yugu’ le zxön benē’ Dios quiu’.

Böajē’ bönni’ na’ lidxē’, ate’ buzé’ didza’ idú lu yödzo ní’ ca naca le zxön benē’ Jesús queē’.

**Jesús ruúnē’-bi’ bí’i nigula queē’ Jairo enca’ nigula na’ gudannu lari’ nácuē’**  
(Mt. 9:18-26; Mr. 5:21-43)

<sup>40</sup> Cate’ budxinē’ Jesús ia’tsölá’a nísado’ na’, bulu’dzeja bönachi zían nacua’ ní’ ní’a queē’ Lē’, tu’ ta’böza Lē’.

<sup>41</sup> Ní’irö bidxinē’ Jairo ga zoē’ Jesús. Náquiē’ bönni’ lo que yu’u ga tu’dubē’ bönni’ judío, en tu’sedē’ queē’ Dios. Biyéchuē’ xini’è Jesús, en gúta’yuē’ lahué’ tsejē’ lidxē’. <sup>42</sup> Caní benē’ tu’ zóabi’ tubi’ bí’i nigula queē’, chirequi gátibi’. Nácabi’ bí’i la’s dui queē’, en yú’ubi’ ca chinnu iz. Tsanni ní’ sa’yéajē’ Jesús, sönógaca tu’quirö bönachi zían Lē’.

<sup>43</sup> Nútsa’nu tu nigula ladaj bönachi zían na’, chiguca chinnu iz riguí’i rizáca’nu. Biti’ ruhu’i rön queé’nu que hué’ quégaca cázanu nigula, ate’ chibutönu dera le dē queé’nu, riguíxjanu nupa tu’ún bönachi, pero bití’ guca nu bönni’ únē’-nu. <sup>44</sup> Gubíga’nu zaca’ cúdzu’lē’ Jesús, en gudannu ruí’i lari’ nácuē’, ate’ la’ buí’tē hué’ rön queé’nu.

<sup>45</sup> Ní’irö Jesús gunábinē’ nupa nacua’ ní’, rnnē’:

—¿Nuzxi na’ gudán neda’?

Gula’dá’bagui’è yúgu’tē’. Ní’irö Pedro, en nupa nacua’len lē’ gulé’ Lē’, ta’nnē’:

—Bönni’ Usedi, nacua’ bönachi zían ni, tu’quirö Li’, en tu’dxiga’ Li’, ate’ ¿rnnatso’: “¿Nuzxi na’ gudán neda’?”

<sup>46</sup> Ní’irö Jesús gunné’:

—Zoa nu gudán neda’, tu’ gúquibe’eda’ birúaj yöl-la’ huáca neda’ le ruún bönachi.

<sup>47</sup> Cate’ réquibe’enu nigula na’ nózinē’ Jesús le bennu, ní’irö guxzízinu. Biyéchunu xini’è Jesús, en gudíxjöi’inu Lē’ lógaca bönachi zían na’ bizx que na’ gudannu lari’ nácuē’, en ca na’ guca, la’ böácatēnu. <sup>48</sup> Ní’irö Jesús gudxē’-nu:

—Nigúlado’, tu’ réajlē’u neda’ chiböácu’. Böaj lidxu’, zoa dxi ládxu’u.

<sup>49</sup> Cate’ ní’ ru’è Jesús didza’ ni, bidxinē’ tu bönni’ ní’, zē’è lidxē’ bönni’ lo na’ que yu’u ga tu’dubē’ tu’sedē’ queē’ Dios, ate’ gudxē’ bönni’ lo na’:

—Chigútibi’ bí’i nigúlado’ quiu’. Bítí’rö upízxjanu’-nē’ Bönni’ Usedi.

<sup>50</sup> Cate’ biyönnē’ Jesús lē ni, bubí’è didza’, rē’ bönni’ lo na’:

—Biti’ gádxinu’. Guyéajlē’èsö Dios. Huöácabi’ bí’i nigúlado’ quiu’.

<sup>51</sup> Cate’ guyáziē’ Jesús yu’u na’, bití’ bē’è lataj nu tsázalen Lē’, pero légacasē’ Pedro, en Jacobo, en Juan, enca’ xuz xiná’abi’ nigúlado’ na’. <sup>52</sup> Ta’bödxu nupa nacua’ ní’. Ta’bödxu yeché’è ní’a queé’bi’ bí’i nigúlado’ na’, ate’ Jesús rē’ légaquiē’, rnnē’:

—Bítí’rö códxili’. Biti’ náti’i’ nigúlado’ ni. Rásisibi’.

<sup>53</sup> Bulu’titjē’ Lē’ tu’ nózguequinē’ chinátibi’. <sup>54</sup> Ní’irö gudélē’è Jesús ná’abi’, en bē’è zidzaj didza’, rnnē’:

—Bí’i nigúlado’, guyaschi.

<sup>55</sup> Ní’irö bu’u bö’ naca cázabi’, bubanbi’, ate’ la’ gúyasatēbi’. Jesús gunná bé’enē’ légaquiē’ ilu’è le gágubi’. <sup>56</sup> Bulu’báninē’ xuz xiná’abi’, pero Jesús gunná bé’enē’ légaquiē’ cuntú nu ilé’ ca na’ guca.

**Risól-lē’è Jesús bönni’ usēda queē’ tsöjéngaquiē’ libán**  
(Mt. 10:5-15; Mr. 6:7-13)

**9** Ní’irö butubē’ Jesús idxínnutē’ bönni’ usēda queē’, ate’ budödē’ lu ná’agaquiē’ yöl-la’ huáca, en yöl-la’ unná bē’ para ulu’béajē’ bö’ xihui’ yú’ugaca bönachi, en ulu’únē’ nupa te’e. <sup>2</sup> Gusól-lē’è légaquiē’ tsöjéngaquiē’ libán ca rinná bē’è Dios, en tsöjhuéngaquiē’ nupa te’e. <sup>3</sup> Jesús gudxē’ légaquiē’:

—Biti’ bi guá’alí’ para la’ nöza, calēga xiyágado’, en calēga yöxaj, en calēga yöta, en calēga dumí, en bití’ ixóa yenlí’ chopa lari’. <sup>4</sup> Bítí’tēs yu’u ga tsú’uli’, guli’sóa ní’ cate’ uzá’aröli’ yödzo na’. <sup>5</sup> Gátí’tēs ga bití’ ilún bönachi libí’ili’ bal, buli’rúaj yödzo na’, en guli’cuí’bi bēchtö da’ lē’e lábali’, le ulu’í’ légaquiē’ nagá’ana xíguia’ nabá-ga’gaquiē’.

<sup>6</sup> Ní’irö bila’rúajē’ bönni’ usēda queē’ na’. Gula’dödē’ yúgu’tē yödzo’do’, tunē’ libán que didza’ dxí’a, en tu’únē’ nupa te’e yúgu’tē lu yödzo na’.

**Ca gútiē’ Juan, bönni’ buquilé’ bönachi nisa**  
(Mt. 14:1-12; Mr. 6:14-29)

<sup>7</sup> Biyönnē’ Herodes, bönni’ rinná bē’è, ca naca yúgu’tē le runē’ Jesús, ate’ gurö’è böniga, tu’ ta’nná bönachi:

—Juan na’ chibubanē’ lu yöl-la’ guti.

<sup>8</sup> Ia’bal-lē’ ta’nnē’:

—Chibul'é Elias, bönni' na' b'e'e didza' uláz quee' Dios.

—Ia'bal-l'e' ta'nné':

—Chibuban'e' tu bönni' bíts'e'e yugu' bönni' gulu'e didza' uláz quee' Dios dza ni'te.

<sup>9</sup> Herodes na' gunné':

—Juan na' burixa' yené'. ¿Nuzxi caz bönni' ni, riyönda' quee' runé' yugu' l'e ni?

Rizóa ribö'e Herodes ilé'ené' Jesús.

### Rugahué' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

<sup>10</sup> Cate' bulu'dxiné' bönni' gubáz nasól-l'e'e Jesús ga zoé' L'e', bulu'siyönné' L'e' yúgu'té le guluné'. Ní'irö guché'e Jesús légaquié' quez. Yöjáquié' tu lataj cá'asö lu xiyú yödzö Betsaida. <sup>11</sup> Cate' chinóziguequi bönachi l'e ni, yöjnóguequi L'e', ate' Jesús bené' léguequi bal, en bé'lené' léguequi didza' ca rinná b'e'e Dios, ate' buné' nupa te'e.

<sup>12</sup> Cate' chizá' ral-la dza na', idxínnuté' bönni' gubáz quee' Jesús gula'bígué'e ga zoé', en té' L'e':

—Busöl-la' bönachi ni tsöjaca gapa d'e yödzödo', en gapa d'e yú'udo' idú gásibí'ilö para tsöjtíljagaquié' gapa ulu'gá'ané', en bi ilahué', tu' naca lataj cá'asö ga ni zóaru'.

<sup>13</sup> Ní'irö Jesús r'e légaquié':

—Gulí'gu'e libí'ili' le ilahué'.

Té' L'e':

—Gáyu'sö yöta xtílado' d'e, en chópasöba' böla d'eba' queé'tu', o ¿naru' huayéajtsatu' tsöj'öutu' le ilágugaca bönachi zían ni?

<sup>14</sup> Nacu'e ca chi-un gáyu'e bönni' ga na'. Ní'irö Jesús gudxé' yugu' bönni' uséda quee', rnné':

—Gulí'gún ga ila'bö'e tu cö' huéajgaquié', ilaca ca chi-un huéajgaquié'.

<sup>15</sup> Caní guluné', ate' gula'bö'e yúgu'té'. <sup>16</sup> Ní'irö gudél'é Jesús gayu' yöta xtila na', en chópaba' böla na', ate' guchisa lahué' ruyú'é' lúxiba, en r'e Dios: "Xclenu'." Ní'irö buzuxxjé' léguequi, en b'e'e quégaquié' bönni' uséda quee' para ulu'cu'e lógaca bönachi na'. <sup>17</sup> Gulahué' yúgu'té', en bulu'huóljané'. Gudödi na' bulu'tubé' yugu' bizxaj bugá'ana, ate' bulu'lié' idú chinu ga'böra.

### Rnné' Pedro Jesús náquié' Cristo

(Mt. 16:13-19; Mr. 8:27-29)

<sup>18</sup> Tu dza tsanni ní' zoé' quez Jesús, rulidzé' Dios, bila'dxiné' bönni' uséda quee' ga zoé', ate' gunábiné' légaquié', rnné':

—¿Nuzxi ta'nná bönachi naca' neda'?

<sup>19</sup> Bulu'bi'e didza', ta'nné':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-l'e' nacu' Elías, ate' ta'nná ia'bal-l'e' nacu' tu bönni' bíts'e'e yugu' bönni' gulu'e didza' uláz quee' Dios dza ni'te, en nubané' lu yöl-la' guti.

<sup>20</sup> Ní'irö Jesús gunábiné' légaquié', rnné':

—Názxi libí'ili', ¿nuzxi rnnalí' naca'?

Bubi'e didza' Pedro, rnné':

—Nacu' Cristo nasól-l'e'e Dios.

### Rigúxjö'e Jesús ca sí' ilútié' L'e'

(Mt. 16:20-28; Mr. 8:30-9:1)

<sup>21</sup> Ní'irö Jesús gúdxidé'e légaquié', en gunná bé'ené' légaquié' cuntu nu ilé' Nu náquié' L'e'. <sup>22</sup> Ní'irö r'e légaquié':

—Run bayudxi qui'i saca'a neda', Bönni' Guljé' Bönachi, zían le gaca quia'. Ulu'cá'ané' neda' cá'asö yugu' bönni' gula tu'zéajni'iné', en yugu' bixúz unná b'e', en yugu' bönni' yudo' usedi. Ilútié' neda', pero dza tsonna dza Dios usubané' neda' lu yöl-la' guti.

<sup>23</sup> Gudxé' ca' yúgu'té':

—Channö ré'ené' nu bönni' té'e neda', ral-la' uzóé' tsölál'alö le d'e quee', en gáquié' ca tu bönni' sa'yéajé' söjté'e l'e'e yaga cruz, ate' ní'irö gaca té'e neda'.

<sup>24</sup> Nútítés bönni' ruí'í ladxé'e gun chí'e yöl-la' na'bán quee', unítie' le, pero channö unítie' yöl-la' na'bán quee' tu' d'e'e neda', bönni' ni gata' yöl-la' na'bán idú quee'. <sup>25</sup> Biti' bi uzi'e xibé tu bönni' channö utubé' quee' yúgu'té le d'e yödzölió ni, pero unítie' tsaz yöl-la' na'bán quee'. <sup>26</sup> Nu bönni' rutuí'iné' neda', en rutuí'iné' ca' xtídzá'a, lésca' neda', Bönni' Guljé' Bönachi, utuí'ida' bönni' na' cate' huöda' idinná b'e'a, dzágagaca neda' yöl-la' zxön quee' Xuza', en yöl-la' zxön quégaquié' gubáz lá'ayi quee' Dios. <sup>27</sup> Le nácaté rea' libí'ili', nacuá' bal-l'e' bönni' ni bití' ilátie' cate' ila'l'é'eröné' dza idinná b'e'e Dios.

### Ridzá' ca riná' lahué' Jesús

(Mt. 17:1-8; Mr. 9:2-8)

<sup>28</sup> Cate' bizá'a xunu' gubidza gudödi b'e'e Jesús yugu' didza' ni, ní'irö guché'e Pedro, en Juan, en Jacobo, ate' gurené' tu lu gu'ado', ga na' bulidzé' Dios. <sup>29</sup> Tsanni ní' ruí'ilené' Dios didza', bidzá' ca riná' lahué', ate' böaca chiguíchido'os lari' nácué', en guyépi yösa bení'.

<sup>30</sup> Ní'irö bulu'luí'í lógaquié' chopé' bönni' ga zoé' L'e' tuí'ilené' L'e' didza'. Nácagaquié' Moisés, en Elías.

<sup>31</sup> Chopé' ni gula'yépé' yösa bení', ate' tuí'ilené' Jesús didza' ca sí' uzé'e yödzölió ni, gátie' lu yödzö Jerusalén.

<sup>32</sup> Sal-la' chirácada' ilásié' Pedro, en nupa nacuá'len l'e', bayudxi gula'násé', ate' bila'l'é'ené' yöl-la' bení' quee' Jesús, en chopé' na' nacuá'lené' L'e'. <sup>33</sup> Cate' bulu'zé'e chopé' na' ga na' zoé' Jesús, ní'irö Pedro gudxé' L'e':

—Bönni' Usedi, dxí'a naca zóaru' ni. Gúntsöca'tu' tsonna yu'u lága'do', tu quiu', ia'tú quee' Moisés, en ia'tú quee' Elías.

Biti' réquibe'ené' Pedro bi na' rnné'. <sup>34</sup> Tsanni ní' ru'é didza' ni, la' guró'öté böaj le bugacu légaquié', ate' guládxiné' tu' nacu'e lu böaj na'. <sup>35</sup> Ní'irö biyón chí'í Nu ruí'í didza' lu böaj na', rna:

—Bönni' ni náquié' Zxí'ina'. Nadxí'ida' L'e'. Bulí'zé nágalí' didza' gu'é.

<sup>36</sup> Cate' budxi b'e' didza' chí'í na', tuzé' Jesús nagá'analéné' légaquié'. Ta'cuá' dxíé' bönni' uséda quee', ate' dza na' cuntu nu gulé' ca naca le bila'l'é'ené'.

**Ruúnë Jesús bí'i bönni' yu'u bö' xihui' lëbi'**

(Mt. 17:14-21; Mr. 9:14-29)

<sup>37</sup> Cate' za' rení' ia'tú dza bulu'huötjé' Jesús, en bönni' na' dzágagaquié' Lë' lu gu'ado' na', ate' bila'rúaj bö-nachi zián dutságagaca Jesús. <sup>38</sup> Ní'irö bē'ē zidzaj didza' tu bönni' nútsē'ē ladaj bönachi zián na'. Bulidzē' Jesús, rnnē':

—Bönni' Usedi, ráta'yua' lo' duyú'-bí' bí'i bönni' quia' tu' nácabi' bí'i la's dui quia'. <sup>39</sup> Yu'u bö' xihui' lëbi' le run ga ribódxí'abi', en ruxízida' lëbi'. Run ga ribía bidxina' zxoná' ruá'abi', en rurixi rutúluda' lëbi', ate' catu caz rusán lëbi'. <sup>40</sup> Gúta'yua' lógaquié' bönni' usëda quiu' ulu'béajé' le, pero bití' gula'zëqui'nē'.

<sup>41</sup> Bubi'ē didza' Jesús, rnnē':

—Libí'ili', bití' réajlë'ēli', en nachixi ícjali'. ¿Gáca'xte rala' sóalena' libí'ili', en guá' ilena' queé'li'? Dijuá'a-bí' bí'i bönni' quiu' ni.

<sup>42</sup> Cate' ní' zá'abi' ribíga'bi' ga na' zoé' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bí' bí'i bönni' na'. Ní'irö bugu'ë-bí' lu në'ē xúzibi'. <sup>43</sup> Bulu'bani yúgu'të bönachi ní' ca naca yöl-la' huáca zxon queé' Dios.

**Jesús ru'ë didza' leyúbölö ca si' ila'zönë' Lë'**

(Mt. 17:22-23; Mr. 9:30-32)

Tsanni ní' tu'bani yúgu'të bönachi ca naca le zxon runë' Jesús, Lë' gudxë' yugu' bönni' usëda queé', <sup>44</sup> rnnë':

—Gulí'cú'u icja nágalí' didza' ni, tu' sí' ulu'dödë' neda', Bönni' Guljé' Bönachi, lu ná'agaca bönachi.

<sup>45</sup> Bití' gula'yéajni'inë' bönni' usëda queé' didza' ni, tu' cabí' ru'ínë' Dios légaquié' lataj ila'yéajni'inë', pero bití' bulu'rúguinë' ila'nábinë' Jesús ca naca didza' ni.

**Nu naca lo**

(Mt. 18:1-5; Mr. 9:33-37)

<sup>46</sup> Ní'irö gula'sí lógaquié' bönni' usëda queé' Jesús tu'ë didza'. Ta'nábini luzá'agaquié' tué' ia'tué' núzxilë' gáquié' lo. <sup>47</sup> Réquibe'enë' Jesús le ta'zá' ládxi'gaquié', ate' gudélë'ë-bí' tubí' bí'ido', en buzóë'-bí' cuitë'. <sup>48</sup> Ní'irö rë' légaquié':

—Núti'tës bönni' gunë' bal tu bí'ido' caní' tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ládjali' nácarë' nöxaj ladxi', bönni' ni náquié' lo.

**Nu bití' ridá'baga' rë'u, rácalen rë'u**

(Mr. 9:38-40)

<sup>49</sup> Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajé' bö' xihui', ate' gunná bé'etu'-në' tu' cabí' dë'ë rë'u.

<sup>50</sup> Jesús rë' lë':

—Bití' inná bé'eli'-në', tu' rácalen rë'u nu bití' ridá'baga' rë'u.

**Jesús ridil-lë' Jacobo, en Juan**

<sup>51</sup> Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejé' Jerusalén. <sup>52</sup> Gusól-lë'ë yugu' bönni' gubáz queé' ila'nóruë' ca Lë', ate' yójáquié' tu yódzodo' quégaca bönachi Samaria para tsöjpá'agaquié' ga ugá'anë' Jesús tu yëla. <sup>53</sup> Yugu' bönni' yódzö na' bití' gulunë' Jesús bal tu' chinaca queé' sa'yéajé' Jerusalén. <sup>54</sup> Cate' Jacobo, en Juan, bönni' usëda queé' Jesús, bila'lë'enë' lë ni, tē' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquié', guntu' ca na' benë' Elías?

<sup>55</sup> Buécjé' Jesús, en gudil-lë' légaquié', rnnë':

—Bití' nózili' bizxi bö' dzágui libí'ili'. <sup>56</sup> Bida' ni neda', Bönni' Guljé' Bönachi, calëga para usunítia' yöl-la' na'bán quégaca bönachi, pero bida' dusölá' bönachi. Ní'irö yójáquié' yódzö yúbölö.

**Nupa té'ëni tsójácalen Jesús**

(Mt. 8:19-22)

<sup>57</sup> Tsanni ní' yú'ugaquié' nöza Jesús, en yugu' bönni' dá'gaquié' Lë', bidxinë' tu bönni' yódzö Jerusalén, en rë' Jesús:

—Xan, ré'ënda' sá'lëna' Lí' gáti'tës ga tseju'.

<sup>58</sup> Jesús rë' lë':

—Yúgu' böza', nacué' zcan bulóaj quégacaba', ate' biguínido', dxíagaca xcá'agacaba', pero neda', Bönni' Guljé' Bönachi, bití' dë quia' ga gáta'a uzí' ládxa'a.

<sup>59</sup> Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuza'.

<sup>60</sup> Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégagaquié', pero lí', guyéaj, yójén libán ca inná bē'ë Dios.

<sup>61</sup> Ní'irö bidxinë' ia'tué' ca', en rë' Jesús:

—Xan, ré'ënda' sá'lëna' Lí', pero benna neda' lataj tseja' tsójzégacada'-në' didza' dí'a dza quia'.

<sup>62</sup> Jesús gudxë' lë':

—Núti'tës bönni' ru'í ládxi'ë le raca yódzölió náquié' ca tu bönni' rugá'anë'-ba' bëdxi, en ruyúé' zaca' cúdzulë'. Nu run caní' bití' naca lesaca' tsaza ga rinná bē'ë Dios.

**Risól-lë'ë Jesús tsónnalalaj yu' chië' bönni' tsójëngaqüë' libán**

**10** Gudödi gulaca yugu' lë ni, guróë' Xanru' ia'tsónnalalaj yu' chië' bönni' usëda queé', ate' gusól-lë'ë légaquié' chopa huéajgaquié' para ila'nóruë' ca Lë', en tsójáquié' yúgu'të yódzö, en yódzodo' gapa chizóa tödë' Lë'. <sup>2</sup> Gudxë' légaquié':

—Le nácatë, dëda' dxin quia', le naca ca tu la' yëla zxon ga nu tsöjlapa', pero nabábasö huen dxin quia' nacué'. Que lë ni na', gulí'gáta'yu lahuë' Dios, náquié' Xan la' yëla na', isól-lë'ë yugu' huen dxin ga naca la'

yëla queë'. <sup>3</sup> Guli'tséaj na'a. Buli'yútsöca', neda' risól-la'a libí'ili', nácali' ca yugu' bö'cu' zxila' söjácaba' ladjagacaba' bö'cu' gu'a sínia'. <sup>4</sup> Biti' guá'ali' yöxaj dumí, en calëga buzudi yöta, en bití' guá'ali' ia'tú cö' xiráchulí, en bití' tseli' para gü'ilenlí' bönachi didza' gapa naca la nöza. <sup>5</sup> Gátitès yu'u ga tsú'ulí, innalí: "Le ribequi dxi ladxí' gaca quégaca bönachi nacua' yu'u ni." <sup>6</sup> Channö zoa ní' nu bönni' sí'ë yöl-la' ribequi dxi ladxí', ugá'analen lë' le ribequi dxi ladxí' na' inábalí, pero channö cabí zoa ní' nu bönni' caní, ugá'analen libí'ili' le ribequi dxi ladxí' na' inábalí. <sup>7</sup> Guli'gá'ana yu'u ga na' tsú'ulí, en guli'gu'aj guli'gagu bi ilunnë' queéli', tu' udzöli quézinë' bönni' huen dxin le gahuë'. Biti' tódili' yu'u yu'u. <sup>8</sup> Gátitès yödzo ga tsú'ulí, ate' ilún libí'ili' bal, guli'gagu le ulu'cu'ë lolí. <sup>9</sup> Buli'ún nupa te'e nacua' yödzo na', en guli'gué' léquequi: "Chibidxín le rinná bë'ë Dios ga zóali'." <sup>10</sup> Gátitès yödzo ga tsú'ulí, channö cabí ilún libí'ili' bal, guli'rúaj, tsöjsóali' la' nöza que yödzo na', en innalí: <sup>11</sup> "Bëchtö que ládzali' le da' lë'e lábatu' ruquinnajtu', le rulu'í nabága'li' xíguia', pero ralla' inózilí' lë ni, chibidxín le rinná bë'ë Dios ga zóali'." <sup>12</sup> Neda' rea' libí'ili', cate' idxín dza ichúguie' Dios quégaca bönachi, ila'gu'í ila'zaca'rö bönachi yödzo ní' ca ila'gu'í ila'zaca' bönachi yödzo Sodoma, nupa ní' busunítië' Dios.

#### Le gaca quégaca nupa bití' ulu'bí'í ladxí'gaca

(Mt. 11:20-24)

<sup>13</sup> Gunnë' ca' Jesús:

—Bica' bayechí' libí'ili', bönachi yödzo Corazín. Bica' bayechí' libí'ili', bönachi yödzo Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca rubani ca yugu' le bena' ga zóali', dza ní'te ulu'bí'í ladxí'gaquie' bönni' ní', ate' ilácuë' lari' cá'asö, en ila'gu'ë dö ícjagaquie', le ulu'ígaca chibulu'bí'í ladxí'gaquie'. <sup>14</sup> Que lë ni na', cate' idxín dza ichúguie' Dios quégaca bönachi, quí'í sáca'röli' ca ila'gu'í ila'záquie' bönni' yödz Tiro, en yödz Sidón. <sup>15</sup> Libí'ili', bönachi Capernaum. Réquili' tsázali' yehua' yubá. Huó'tjalí' tsöjtsázali' lataj chul-la quégaca nupa nátagaca.

<sup>16</sup> Ní'irö Jesús gudxë' yugu' bönni' usëda queë', rnnë':

—Nu ruzé nagui libí'ili', ruzé nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

#### Bönni' yöjéngaquie' libán tu'dxinë' ga zoë' Jesús

<sup>17</sup> Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yöjéngaquie' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

<sup>18</sup> Jesús gudxë' légaquie':

—Neda' bilé'eda' Satanás tu' xihui', gubixi zxan lúzxi-ba ca run yösa, le riyaza luyú. <sup>19</sup> Buli'yútsöca', neda' nudöda' lu ná'ali' yöl-la' unná bë' para gaca sóngacali'ba' bëla sínia', en xöjnó', en bití' bi gaca queéli', ate' ucúl-lalí' yöl-la' unná bë' que tu' xihui', nu bití' rilé'e rë'u

dxí'a. <sup>20</sup> Na'a, buli'dzeja, calégasö tu' tun bö' xihui' ca rnnalí, pero tu' nuzúajgaca lalí' lu guichi ní' yehua' yubá.

#### Rudzéjanë' Jesús

(Mt. 11:25-27; 13:16-17)

<sup>21</sup> La' ní'isö rudzéjanë' Jesús, dzáguie' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquie' bönni' táquie' yenni', en bönni' ta'yéajni'inë', pero bulu'íguequinu'-bi' bí'ido' ca naca. ¡Ca' gaca, Xuza', tu' caní guyaza ladxu'u!

<sup>22</sup> Ní'irö gunné':

—Yúgu'të budödë' Xuza' lu na'a. Cuntu nu bönni' nöz-inë' Nu náquie' Zxí'inë' Dios, pero tuzë' Dios Xuz nöz-inë', ate' cuntu nu nözi Nu náquie' Dios Xuz, pero tuzë' Zxí'inë' nöz-inë', ate' inözigaca ca' nupa na' Zxí'inë' ré'ënë' ulu'í'inë' léquequi Xuzë'.

<sup>23</sup> Ní'irö Jesús buyúë' yugu' bönni' usëda queë', en ré' légaquie':

—Bica' bágaca nupa ta'lé'e le rilé'eli' libí'ili', <sup>24</sup> tu' rea' libí'ili': Zían bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero bití' bila'lé'enë' le. Gulé'ënnë' ila'yönnë' le riyónilí, pero bití' bila'yönnë' le.

#### Tu bönni' Samaria, bönni' tsahui'

<sup>25</sup> Ní'irö guyasë' tu bönni' yudo' usedi, en para sí' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idélí'da' yöl-la' na'bán idú?

<sup>26</sup> Jesús rë' lë':

—¿Bizxi caz nazúaj lu guichi lu xibá queë' Moisés?

¿Nacxi rusaca' quiu' lë na' rulabu'?

<sup>27</sup> Bubi'ë didza' bönni' na', rnnë':

—Caní rna: "Idxí'inu' Xanu' Dios idú ladxu'u, en len idú icja ladxí'do'o, en len idú yöl-la' run quiu', en len idú yöl-la' réajni' quiu', ate' idxí'inu' bönni' luzó'o ca nadxí' cuinu'."

<sup>28</sup> Jesús rë' lë':

—Dxí'ado' bubí'u didza'. Ben caní, ate' gata' quiu' yöl-la' na'bán na'.

<sup>29</sup> Tu' gú'unnë' bönni' na' ubéaj dxí'a cuinë', rë' Jesús:

—¿Nuzxi na' bönni' luzá'a?

<sup>30</sup> Bubi'ë didza' Jesús, rë' lë':

—Buzé'ë tu bönni' Jerusalén, rudínnië', sa'yéajë' yödzo Jericó. La' nöza ní' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bulu'zë'ë ní', en nucá'anagaquie' lë', chirati cazë'. <sup>31</sup> Ní'irö gudödë' tu bixúz la' nöza ní'. Cate' bilé'enë' bönni' huë' na', tsölál'alö gudödë'. <sup>32</sup> Gudödë' ca' ní' tu bönni' nababë' zxí'ini xí'sóë' Leví, yugu' bönni' na' tunë' dxin que yudo'. Cate' bilé'enë' lë', tsölál'alö ca' gudödë'. <sup>33</sup> Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ladxë'ë lë'.

<sup>34</sup> Gubíguie' ga na' dë', ate' gulu'ë le za, en xisi uva nál-la lu huë' queë', ate' buchólinë' le lari'. Ní'irö budxíë' lë'

cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. <sup>35</sup> Cate' za' reni' ia'tú dza, en chizóa uzé'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda.'" <sup>36</sup> Na'a, ¿nacxi runi li'? ¿Núzxilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

<sup>37</sup> Bubi'ë didza' bönni' yudo' usedi na', rë' Jesús:

—Bönni' na' buéchi' ládxe'ë lë'.

Ní'irö Jesús gudxë' lë':

—Guyéaj na'a, yójén ca' li'.

### Le benë' Jesús lídxigacanu Marta, en María

<sup>38</sup> Ní'irö bu'ë nöza Jesús, ate' bidxinë' tu yódzödo' ga ni' tu nigula lënu Marta guché'ënu Lë' lídxinu. <sup>39</sup> Marta ni zóanu nigula zxílanu lënu María, ate' María na' guró'ötënu ga naca xini'ë Jesús, en ruzé' náganu xtídzë'ë. <sup>40</sup> Marta na' bubi buguí'inu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'í ládxi'tso' neda' tu' nucá'anabi' bi'í zxila' ni neda', ate' tuza' runa' dxin? Gudxi-bi' gácalenbi' neda'.

<sup>41</sup> Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'í ládxi'u' runu'. <sup>42</sup> Tuz le run bayudxi nu gun, ate' María ni guröbi' lë na' nácatëro dxí'a, ate' lë na' guröbi' bití' udúa queébi'.

### Ca ral-la' ulídzaru'-në' Dios

(Mt. 6:9-15; 7:7-11)

**11** Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gú'í'ilentu'-në' didza', ca benë' Juan, busëdinë' bönni' dá'gaquië' lë'.

<sup>2</sup> Ní'irö Jesús rë' légaquië':

—Cate' ulídzali'-në' Dios gú'í'ilenli'-në' didza', guli'ná: Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'u' Li' luyú ni, ca na' raca yehua' yubá.

<sup>3</sup> Benna le gágutu' na'a dza.

<sup>4</sup> Buniti lo netu' dul-la' nabága'tu'

ca netu' ca' runiti lotu' nupa tua' dö' queé'tu'.

Bití' gu'u lataj si' bë' tu' xihui' netu', pero busöla' netu' lu na' nu ruá' dö'.

<sup>5</sup> Jesús rë' ca' légaquië':

—Channö zoë' nu bönni' ládjali', en zoë' böchi' luzé'ë, en channö huidë' ga na' zoë' guluhuëla, ate' ulidzë' lë', innë': "Bócha'a, benna quia' tsonna yöta xtila <sup>6</sup> tu' si' bidxinë' quia' böchi' luzá'a, zë'ë zítu', pero bití' bi' dö' le gu'a-në' gahuë'." <sup>7</sup> ¿Naru' ubi'ë didza' caní bönni' na' zoë' yu'u, guié' lë': "Bití' utsó'o neda' tu' chinayayaj yu'u, en chidélengacabi' bi'í quia' neda', ate' bití' gaca chasa' bi gunna' quiu'?" <sup>8</sup> Neda' rea' libí'ili': Sal-la' bití' chasë' bi unödzjë' queë' tu' náquië' böchi' luzé'ë, pero chasë', en unödzjë' queë' idutë' le riquinnë' para cabirö upízxjanë'

lë'. <sup>9</sup> Que lë' ni na' rea' libí'ili': Guli'naba, ate' Dios gunné' queé'li'. Guli'quilaj, ate' idzöli queé'li'. Buli'lidza ra' yu'u, ate' tsalaj queé'li'. <sup>10</sup> Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

<sup>11</sup> 'Channö zoë' nu bönni' ládjali', en náquië' xuz, ate' channö zxí'inë' inábibi' lë' yöta xtila, ¿naru' unödzjatsë' queé'bi' guió'j? Channö inábibi' lë' tuba' böla, ¿naru' unödzjatsë' queé'bi' bëla? <sup>12</sup> Channö inábibi' lë' dxita que böra, ¿naru' unödzjatsë' queé'bi' xójnó'? <sup>13</sup> Caní naca, nácali' libí'ili' huiá' dö', pero nózili' unödzjali' qué-gacabi' zxí'inili' le naca dxí'a. Nácatëro löza Xúzili' zoë' yehua' yubá gunné' queé'li' Dios Bó' Lá'ayi, núlöli' inábili' Lë'.

### Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

<sup>14</sup> Tu dza bubéajë' Jesús bö' xihui' yu'u tu bönni', le run ga bití' raca innë'. Cate' burúaj bö' xihui' na', bë'ë didza' bönni' na' bití' guca innë', ate' bulu'bani bönachi nacua' ni'. <sup>15</sup> Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

<sup>16</sup> Ia'bal-la bönachi na' gulé'ëni ila'z'í' bë' Jesús, ate' gula'nabi Lë' gunë' tu le gaca bë' le za' yehua' yubá.

<sup>17</sup> Réquibe'enë' Jesús le ta'zá' ládxi'gaquië', ate' rë' lé-gaquië':

—Gátitës ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údxi quéguequi. <sup>18</sup> Lësca' caní raca que Satanás, tu' xihui', nazí' le ca' Beelzebú. Channö ila'rúaj choplö nupa dá-gaca le, ¿nacxi gaca idía' yöl-la' unná bë' que? ¿Rnnát-salí' na'a: Len yöl-la' huáca que Beelzebú rubéaja' yugu' bö' xihui'? <sup>19</sup> Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna qué-gaca nupa dá-gaca libí'ili' yöl-la' huáca tu'béaj yugu' bö' xihui'? Que lë' ni na', le tun nupa ni naca bë' nachíxili'.

<sup>20</sup> Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

<sup>21</sup> 'Cate' tu bönni' nál-la dö' lu në'ë le rudí'inë', en rapa chi'ë lidxë', naca chi'i dërö le dö' queë'. <sup>22</sup> Na'a, channö zë'ë ia'túë' bönni' nál-latëre' ca lë', en ucul-lë' lë', ní'irö cuë' yúgu'të le rudí'inë', lë' na' ruzxöni ládxe'ë, ate' quisië' le dö' queë' bönni' na'.

<sup>23</sup> 'Nu bití' rácalen neda', ridá'baga' neda'. Nu bití' rutúbilen neda', rusilasi nu na'.

### Ca naca que bö' xihui' rudxín xilataj

(Mt. 12:43-45)

<sup>24</sup> Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxí'. Channö cabí idzöli que, inná: "Huöja' xilatja' ga ni' birúaja'." <sup>25</sup> Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. <sup>26</sup> Ní'irö reaj, en röjxí' ia'gadxi bö' xihui', nácatëro xihui' ca le, ate' ta'yú'u bönni' na'.

Na'a, le raca queë' bönni' na' nayáli'tërö ca le guca queë' zí'alö.

### Le naca bica' ba le naca idú

<sup>27</sup> Tsanni ni' ru'è Jesús didza' ni, tu nigula nútsa'nu ladaj bönachi zián na' bé'enu zidzaj didza', rnanu:  
—Bica' ba nigula na' biá'anu Lí' lé'enu, en bica' ba ca' luchú'unu ga na' gúdxu'u.

<sup>28</sup> Bubi'è didza' Jesús, gunné:  
—Nácagacatërö bica' ba nupa ta'yöni xtídzë'è Dios, en tun ca rna.

### Ta'nábinë' Jesús gunë' le gaca bë' nuzxi náquië' (Mt. 12:38-42; Mr. 8:12)

<sup>29</sup> Tsanni ni' ta'biga' bönachi zián ga zoë' Jesús, gusi lahuë' ru'è didza', rnnë:  
—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. <sup>30</sup> Ca na' guca queë' Jonás, gúquië' tu le naca bë' lógaca bönachi yödzo Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. <sup>31</sup> Cate' idxín dza ichúguië' Dios quégaca bönachi ila'gu'í ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu ulu'í nabága'gaca bönachi ni xíguia', tu' bídanu lënu, birúajnu ga naca zítu' para uduzë naganu didza' réajni' bë'è Salomón, bönni' gunná bé'enë' bönachi Israel, pero na'a, zoa' neda' ni, en nayépisëtëra' ca Salomón na'. <sup>32</sup> Lësca' caní, Dios uchisë' bönni' gula'cu'è yödzo Nínive cate' idxín dza ichugu bë'è quégaca bönachi, en uchi'a usöröë' bönachi dza ni zóaru' na'a, ate' le gulunë' ulu'í nabága'gaca bönachi ni xíguia', tu' bulu'bí'í ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayépisëtëra' ca Jonás na'.

### Le rigú'u bení' lu icja ládxi'do'oru' (Mt. 5:15; 6:22-23)

<sup>33</sup> Gunnë' ca' Jesús:  
—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga líná', para uzení' quégaca nupa ta'yú'u yu'u na'. <sup>34</sup> Guiój loru' naca ca tu le rigú'u bení' lu icja ládxi'do'oru'. Channö guiój lo' naca dxí'a, idúteo' yudzu le naca bení', pero channö naca xihui' guiój lo', idúteo' yudzu le naca chul-la. <sup>35</sup> Ben chí'í cuinu' na'a, para cabí huóaca chul-la lë na' rigú'u bení' lu icja ládxi'do'o. <sup>36</sup> Caní naca, channö idúteo' nalísinu' le naca bení', en biti' bi zóalen lí' le chul-la, yúgu'të ilé'enu' dxí'a ca raca cate' ruzeni' quiu' guí'.

### Jesús ruzégui'è yugu' bönni' yudo' didza' (Mt. 23:1-36; Mr. 12:38-40; Lc. 20:45-47)

<sup>37</sup> Cate' budxi bë'è didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'è rahuë'. <sup>38</sup> Cate' bön-

ni' yudo' fariseo na' bilé'enë' Lë', bubáninë' tu' cabí gudibi në'è Jesús cate' sí' gahuë'. <sup>39</sup> Xanru' rë' lë':

—Libí'ili', bönni' yudo' fariseo, riguibi cuinlí' ca riguí-bilí' láchuilögaca le ré'aji ráhuilí', pero lu icja ládxi'do'olí' ruhuídí'li', en rizá' ládxi'li' le ruá' dö'. <sup>40</sup> Libí'ili', bönni' biti' réajni'li'. ¿Naru' cabí nózilí', Nu ben le zoa láchuisö ben ca' le yu'u lé'elö? <sup>41</sup> Na'a, guli'gún gun le dë queé'li', ate' ní'irö huóaca dxí'a yúgu'të le dë queé'li'.

<sup>42</sup> 'Bica' bayechi' libí'ili', bönni' yudo' fariseo. Riguízx-jalí' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisilí' le naca tsahui', en yöl-la' nadxí'í queé'li' Dios. Yugu' lë ni run bayudxi gunlí', en biti' ucá'analí' ia'zica' lë na' runlí'.

<sup>43</sup> 'Bica' bayechi' libí'ili', bönni' yudo' fariseo. Ré'ënilí' có'olí' gapa naca lo lu yu'u ga rudúbilí' rusédalí' queé' Dios, en ré'ënilí' ulu'lidza bönachi libí'ili' ba zxön gapa naca láchuilögacqui bönachi.

<sup>44</sup> 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísö tsahui' cuinlí', tu' nácalí' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láchuigaca yeru ba na', en biti' téquibe'e.

<sup>45</sup> Ní'irö bubi'è didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rno' caní, netu' ca' runu' zí'.

<sup>46</sup> Jesús rë' lë':

—Bica' bayechi' ca' libí'ili', bönni' yudo' usedi rácalí' xibá queë' Moisés, tu' rusubága'gacalí' bönachi tu yua' zí' le cabí gaca nu guá', pero libí'ili' calëga látí'do'os biti' ruláhuilí' le len ná'alí'.

<sup>47</sup> 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'è didza' uláz queë' Dios, ate' gulútië' xuz xtó'olí' légaquië'. <sup>48</sup> Caní naca, runlí' ba nalí runlí' tuz le gulunë' xuz xtó'olí' tu' gulútië' xuz xtó'olí' na' légaquië', ate' libí'ili' richísali' biquitaj quégaca ba ga nagáchi'gaquië'.

<sup>49</sup> 'Que lë ni na', lu yöl-la' réajni' queë', Dios gunné' caní: "Isól-la'a queé'li' bönni' ilu'è didza' uláz quia', en yugu' bönni' gubáz quia', ate' yugu' bönni' ni, bal-lë' gútilí', en ia'bal-lë' cuia na'li' légaquië'." <sup>50</sup> Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'è didza' uláz queë', bönni' ni' bëtigaca bönachi légaquië' cate' gusi lo rata' yödzölió, <sup>51</sup> ga gusi lo nu bëti Abel, ga bidxintë gulútië' Zacarías, bönni' na' gulútië' gatsaj láchu'í'lo ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'olí' légaquië'.

<sup>52</sup> 'Bica' bayechi' libí'ili', bönni' yudo' usedi, rácalí' xibá queë' Moisés. La' libí'isilí' dë lu ná'alí' zxí'ini guíë que lataj ga ta'dzöli bönachi yöl-la' réajni'í. Libí'ili' biti' riyázalí', ate' ruzága'li' xinózigaca nupa té'ëni ila'yaza.

<sup>53</sup> Cate' Jesús budxi bé'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdx-



ide'enë' Lë' ca naca zían le taca, <sup>54</sup> en tu'béajë' Lë' didza' para gaca ulu'zéguië' Lë' didza' n'ía que didza' ubi'ë.

### Rusédinë' Jesús ca naca yöl-la' rulu'físö tsahui' cuini

**12** La' dza na' bulu'dubi zían gayuá' bönachi ga zoë' Jesús ga bidxintë ta'rólísö luzé'eguequi bönachi na'. Ní'irö gusí lahuë' Jesús rë' yugu' bönni' usëda queë cazë', rnnë':

—Gulí'gún chí'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'físö tsahui' cuini quégaquië'. <sup>2</sup> Biti' bi dë le naca balándo'os le cabí ilá' lahui, en bití' bi dë le nagachi' le cabí gaca bë'. <sup>3</sup> Que lë ni na', yúgu'të le chigunná'li' ga naca chul-la, ila'yöni bönachi ga naca lu bení', ate' didza' bé'ëli' bagáchisö ga guzóa lu yu'u nayayaj, gaca libán que ga naca lógaca bönachi.

### Nu ral-la' gádxiru'

(Mt. 10:28-31)

<sup>4</sup> Gunnë' ca' Jesús:

—Bócha'ado', rea' libí'ili': Biti' gádxili' bönni' túti-gaquië' bönachi, ate' tödi na' bítirö bi gaca ilunë' quéguequi. <sup>5</sup> Ulu'fída' libí'ili' nu ral-la' gádxili'. Gulí'gadxi Nu na' gaca ugúa yöl-la' na'bán queé'li', en tödi na' dë lu në'ë yöl-la' unná bë' chúnë' libí'ili' lu guí' gabila. Ön, rea' libí'ili', gulí'gadxi Nu na'.

<sup>6</sup> Túti'gaquië'-ba' gáyu'ba' biguinnido' len chopa dumí lásido'. Biti' ral-la ládxe'ë-ba' Dios tu biguinnido' na'. <sup>7</sup> Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguinnido'.

### Nupa ta'nnasö néquiguequi queë' Jesús

(Mt. 10:32-33; 12:32; 10:19-20)

<sup>8</sup> Gunnë' ca' Jesús:

—Rea' libí'ili': Yúgu'të bönni' ta'nnë' néquiguequinë' quia' neda' lógaca bönachi, lësca' neda', Bönni' Guljë' Bönachi, innía' néquiguequinë' quia' lógaquië' gubáz lá'ayi queë' Dios, <sup>9</sup> ate' bönni' ta'dá'baguë'ë néquiguequinë' quia' lógaca bönachi, lësca' neda' tá'bagá'a néquiguequinë' quia' lógaquië' gubáz lá'ayi queë' Dios.

<sup>10</sup> Yúgu'të nupa bi ila'nnë' quia' neda', Bönni' Guljë' Bönachi, gaca uniti lahuë' Dios léguequi, pero nu innë' zí' queë' Dios Bö' Lá'ayi, bití' uniti lahuë' Dios nu na'.

<sup>11</sup> 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chí'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'. <sup>12</sup> La' dza ná'asö usédinë' Dios Bö' Lá'ayi libí'ili' le ral-la' innali'.

### Huáca gun yöl-la' tsahui' queëru' ga gal-la ládxi'ru'-në' Dios

<sup>13</sup> Tu bönni' núsë'ë ladaj bönachi zían na' rë' Jesús, rnnë':

—Bönni' Usedi, gudxë' bócha'a gunnë' uláz quia' le guta' queë' xuztu'.

<sup>14</sup> Jesús rë' lë':

—Bönni'. ¿Naru' zoa nu buzóa neda' ca nu uchí'a usörö libí'ili', o nu gun gatsaj le dë queé'li'?

<sup>15</sup> Ní'irö Jesús gudxë' bönachi nacua' ni', rnnë':

—Bulí'yútsöca'. Gulí'gún chí'i cuinli' para cabí uhuídí'li'. Le uzi'ë xibé nu bönni' bití' nácasö le zían le dë queë'.

<sup>16</sup> Ní'irö Jesús bé'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödzejada' gulapa lu xiyúë'. <sup>17</sup> Ní'irö guzá ládxe'ë bönni' na', rnnë': "¿Nacxi guntsa'? Bití' dë ga gapa chí'a le rulá' quia'." <sup>18</sup> Ní'irö rnnë': "Caní guna'. Uquínnajgaca' yu'u ga rapa chí'a le rulá' quia', ate' guna' yugu' yu'u zxóntërö ca', ate' gapa chí'a le rulá' quia' ni', len yugu' le dë quia'." <sup>19</sup> Ní'irö gaca guíë' cuina': Chidéda' quia' zían le chinutuba', le gáhuída' zían iz. Uzi' ládxa'a. Gu'aj gahua', en udzëjada'." <sup>20</sup> Ní'irö Dios rë' lë': "Lí', bönni' bití' bi nózinë'. Na'a dzö' gátíu'. Na'a, ¿nuzxi caz guequi que, lë na' chinutubu'?" <sup>21</sup> Caní raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

### Dios run chí'ë yugu' bönachi queë'

(Mt. 6:25-34)

<sup>22</sup> Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' n'ía que le gu'aj gáguli', lë na' nabánili', o n'ía que lari' gáculí'.

<sup>23</sup> Nácarö lesaca' yöl-la' na'bán queé'li' ca le ráguli', ate' nácarö lesaca' idú le nácali' ca lari' ráculí'. <sup>24</sup> Bulí'yutëz ca raca quégacaba' bo'quiaj. Biti' tázaba', en bití' ta'lá-paba', en bití' nacua' quégacaba' ga ilún chí'iba' le rulá' quégacaba', pero Dios rugahuë' léga'caba'. ¿Naru' cabí nazáca'tëröli' libí'ili' ca yugu' biguinnido'? <sup>25</sup> ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi ruguí'i ládxi'da'ahuë'? <sup>26</sup> Que lë ni na', channö cabí gaca gunli' lë ni naca cuídísö, ¿bizx que ruúbi ruguí'ili' n'ía que le naca zxóntërö?

<sup>27</sup> 'Bulí'yutëz ca ta'zxón yöjdo'. Biti' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca ná'cagaca yöjdo' ni, sal-la' gúta'da' yöl-la' tsahui' queë'. <sup>28</sup> Channö Dios runë' lachi yöj guíxi'do' ró'gaca na'a la' guixi', ate' cuxó huidzaj ila'gu'ë léguequi lu guí', ¿naru' cabí gunë' le nácarö dxí'a queé'li', libí'ili' na' bití' réajlë'ëli' Dios idú ládxi'li'? <sup>29</sup> Que lë ni na', bití' gü'í ládxi'li' le ral-la' gáguli', en le ral-la' guí'jali', en bití' ubi uguí'ili' ládxi'do'oli'. <sup>30</sup> Yúgu'të lë ni ta'guilaj bönachi yödölió ni, pero chinóz quézinë' Xúzili' Dios le riquinili'. <sup>31</sup> Gulí'gú' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queé'li'.

### Yöl-la' tsahui' rigú'uru' yehua' yubá

(Mt. 6:19-21)

<sup>32</sup> Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queé'li' lataj tsú'uli' ga ni' rinná bë'ë Lë'. <sup>33</sup> Gulí'guti' le

dë queé'li', en buli'nödzej quégaca bönachi yechi'. Caní gaca, gunli' queé'li' yöxaj dumí le cabí gaca ditaj, en cú'ulí' yöl-la' tsahui' na' yehua' yubá le bití' ubidxi udú, ga ní' bití' idxiné' bönni' gubán, en bití' usunítiba' böa'-do' le. <sup>34</sup> Ga ní' dë yöl-la' tsahui' queé'li', ní' gü'í' ládxi'lí' idxinlí'.

### Ral-la' sóaru' ban ladxí'

<sup>35</sup> Gunné' ca' Jesús:

—Gulí'sóa siná', en gulí'quela' guí' le uzení' queé'li'.  
<sup>36</sup> Gulí'gaca ca bönni' huen dxin ta'bözé' dza huödé' xángaquié', bönni' sa'yéajé' laní' que yöl-la' rutsaga na', para cate' udxiné', en ulidzé', la' ila'sáljaté' queé' tsu'é.  
<sup>37</sup> Bica' bágaca huen dxin na' ila'cu'é ban ladxí' cate' huödé' xángaquié'. Le nácaté' rea' libí'ili', upá'a cuiné' xángaquié' na', ate' guné' ga ila'bö'é ga ilahué', ate' cu'é le ilahué'.  
<sup>38</sup> Sal-la' huödé' cate' chiral-la o idú gu-luhuëla, channö idixáquié' légaquié' nacué' ban ladxí', bica' bágaca huen dxin na'.  
<sup>39</sup> Lè ni ral-la' inózili'. La'tu' nóziné' xan yu'u bizxi dza huadxiné' bönni' gubán, usubán ládxi'é, en bití' gu'é lataj bönni' na' udxíé' yeru lidxié', para cabí cuané' le dzö'ö lidxié'.  
<sup>40</sup> Que lè ni na', gulí'sóa ban ladxí' ca' libí'ili', tu' huöda' neda', Bönni' Guljé' Bönachi, tu dza bití' ribózalí' neda'.

### Bönni' huen dxin tsahui', en bönni' huen dxin bití' náquié' tsahui'

(Mt. 24:45-51)

<sup>41</sup> Ní'irö Pedro gunábiné' Jesús, rnné':

—Xan, ¿naru' reo' nétu'sö lè ni rucúdz'u didza', o reo' ca' caní yúgu'té bönachi?

<sup>42</sup> Rë' Xanru' lè':

—¿Nuzxi na' bönni' huen dxin tsahui', en réajni'iné', dë lu në'é uláz queé' xané'? Bönni' ni, xané' udödé' lu në'é lidxié' para cate' gála'rö ilahué' bönni' nacué' lidxié', gu'é que queégaquié' le ilahué'.  
<sup>43</sup> Bica' ba bönni' huen dxin na' cate' huödé' xané', idixáquié' lè' runé' caní dxin na' nudödé' lu në'é.  
<sup>44</sup> Le nácaté' rea' libí'ili', udödé' xané' lu në'é bönni' huen dxin tsahui' na' iduté' le dë queé'.  
<sup>45</sup> Channö guéquiné' bönni' huen dxin na' huadzené' huödé' xané', ate' isí lahué' gu'é dö' quégaquié' ia'zica'ré' huen dxin, bönni' en nigula, en isí lahué' guí'aj gahué', en súdxiné',  
<sup>46</sup> ní'irö huödé' xané' bönni' huen dxin na' cate' bití' ribözé' lè', en cate' bití' réquibe'ené', ate' usaca' zí'é bönni' huen dxin bití' náquié' tsahui' na', en ichúguié' queé' quí'í sáquié' ca narugu quégaquié' bönni' bití' ta'yéajlé'.

<sup>47</sup> Bönni' huen dxin na' nóziné' le ré'ené' xané', en bití' zoé' sina', en bití' runé' ca rnné' xané', bönni' ni, quínitèrè' xané' lè'.  
<sup>48</sup> Channö cabí nóziné' tu bönni' huen dxin le ré'ené' xané', en guné' le gun ga ibágué' le quiné' xané' lè', bönni' ni quiné' lè' látí'do'os. Tu bönni' yu'u lu në'é yenni', yenni' unabé' xané' lu në'é, ate' bönni' na' xané' nuzxöni ládxi'é lè' le zxön, le zxöntèrö ca' unabé' xané' lu në'é bönni' huen dxin na'.

### Le náquié' Jesús gun ga ila'rúaj choplö bönachi

(Mt. 10:34-36)

<sup>49</sup> Gunné' ca' Jesús:

—Bida' neda' dujéna' ga tsegui guí' yödzölió ni, en caba ládxa'a chinaguéla' guí' na'.  
<sup>50</sup> Na'a, dë tu le ral-la' quí'í saca'a le naca ca tu le idlíida' nisa, ate' rö'a böniga ga idxinté' gaca caní quia'.  
<sup>51</sup> ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi.  
<sup>52</sup> Na'a isí lo ulu'lá'alén luzé'eguequi gayu' bönachi nacué' tu yu'u. Tsonné' ila'dá'bagué'è chopé' nazí'igaquié' xtídza'a, ate' chopé' na' ila'dá'bagué'è tsonné' na'.  
<sup>53</sup> Nu bönni' zóabi' bí'í bönni' queé' tá'bagué'è zxí'iné' na', ate' bí'í bönni' na' tá'baga'bí' xúzibi'. Nigula zóabi' bí'í nigula queénu tá'baga'nu zxí'ininu na', ate' bí'í nigula na' tá'baga'bí' xiná'abi'. Nigula zóanu nigula xzoa' lídxinu tá'baga'nu xzoa' lídxinu na', ate' nigula xzoa' lídxinu na' tá'baga'nu xto' zxí'ininu.

### Le nácgaca b'é le taca na'a dza

(Mt. 16:1-4; Mr. 8:11-13)

<sup>54</sup> Jesús gudxé' ca' bönachi zían nacué' ní', rnné':

—Cate' rilé'eli' za' böaj saca' ga ribía gubidza, la' rn-nátèli': "Hualaj guió'j", ate' caní raca.  
<sup>55</sup> Cate' recja bö' za' saca' ga ridödi gubidza beo' ziaga, rnnali': "Udzá'a na'a", ate' caní raca.  
<sup>56</sup> Libí'ili', bönni' ruluí'isö tsahui' cuinlí'. Nózili' le ruluí'í le raca lúzxiba, en le raca luyú ni, pero bití' réquibe'eli' le ruluí'í le nácgaca b'é taca dza ni zóaru' na'a.

### Ral-la' ugá'analenu' tsahui' nu rilé' rë'u

(Mt. 5:25-26)

<sup>57</sup> Gunné' ca' Jesús:

—¿Bizx que bití' ruchí'a rusöröli' la' libí'isili' ca naca le naca tsahui'?  
<sup>58</sup> Channö zoa nu bi unabi yudxi lí', ate' zéajlí' idxinlí' yúlahui', b'é ladxí' ugá'analenu' tsahui' nu na' tsanni ní' yú'ulí' nöza, para cabí uzegui lí' lahué' bönni' uchi'a usöróé' libí'ili', ate' bönni' uchi'a usöróé' na' udödé' lí' lu në'é bönni' rusayjé' lidxi guié', ate' bönni' na' rusayjé' lidxi guié' cu'é lí' lidxi guié' na'.  
<sup>59</sup> Rea' lí', bití' uruju' ní' cate' údxirö quizxju' yúgu'té dumí lásido' ral-lu'u que nu na'.

### Run bayudxi ubí'í ládxi'ru'

**13** La' dza ní'isö bila'dxiné' bönni' ta'guíxjöi'iné' Jesús ca bené' Pilato, bétié' bal-lé' bönni' Galilea, en guzxí'é rön quégaquié', le bugútsi'né' xichóngacaba' böa' bédxi chigulútié' léga'caba' para ila'gu'é xichóngacaba' na' lahué' Dios.  
<sup>2</sup> Bubi'é didza' Jesús, ré' légaquié':  
 —¿Naru' réquili' gulácaré' bönni' dul-la' bönni' Galilea na' ca ia'zica'ré' bönni' Galilea, tu' gula'guí'í gula'zaquié' caní?  
<sup>3</sup> Rea' libí'ili': ¡Calëga! Channö cabí ubí'í ládxi'lí', nítili' ca' yúgu'tèli'.  
<sup>4</sup> Lësca' caní guca quégaquié' chix-uné' bönni' ní', yöjbaga' yu'u sibi na' nazí'í le Siloé légaquié', ate' gulátié'.  
 ¿Naru' réquili' gula'bága'tèrè' légaquié' xíguia' ca ia'zica'rö bönachi nacué' Jerusalén?

<sup>5</sup> Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

### Rucúdzu'ë didza' Jesús que yaga higo bití' bi ribía

<sup>6</sup> Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Rõtjiljë' le ribía yaga na', pero bití' bi ridzölinë'.

<sup>7</sup> Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en bití' bi ridzöliða'. Guchugu le. ¿Bizx que run nigui luyú ni?" <sup>8</sup> Ní'irö bubí'ë didza' bönni' huen dxin na', rë' lë': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. <sup>9</sup> Channö cuía yaga ni, gaca dxí'a, pero channö cabí bi cuía, ní'irö ichugu' le."

### Ruúnë' Jesús tu nigula ré'enu cate' naca dza lá'ayi

<sup>10</sup> Tu dza rusédinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quëgaquië'. <sup>11</sup> Zóanu tu nigula ní' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayécutica'sinu ridanu, en bití' ca' raca ulí cuinnu. <sup>12</sup> Cate' bilé'enë'-nu Jesús, bulidzë'-nu, rnnë': —Nigúlado', chiböácu' que yödzhüë' quiu'.

<sup>13</sup> Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. <sup>14</sup> Ní'irö gulënë' bönni' lo que yu'u ga na' tu'dubë' tu'sëdë' queë' Dios. Rilënë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ní', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

<sup>15</sup> Ní'irö bubí'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa? <sup>16</sup> Nácanu nigula ni xí'ini xí'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

<sup>17</sup> Cate' bë'ë didza' ni Jesús, bulu'tu'ínë' yúgu'të bönni' nacu'ë ní' ta'lenë' Lë', pero bulu'dzeja ia'zica'rö bönachi, yúgu'të nupa nacua' ní', tu' ta'lé'enë' yugu' le zxön runë' Jesús.

### Rucúdzu'ë didza' Jesús que xisedo' mostaza

(Mt. 13:31-32; Mr. 4:30-32)

<sup>18</sup> Ní'irö rnnë' Jesús:

—¿Nacxi caz raca rizxón le rinná bë'ë Dios, o bizxi uséqui'tseru' le? <sup>19</sup> Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ní'a në'e yaga mostaza na'.

### Rucúdzu'ë didza' Jesús que cúa zi que yöta xtila

(Mt. 13:33)

<sup>20</sup> Lësca' caní rnnë' Jesús:

—¿Bizxi caz uséqui'tseda' le rinná bë'ë Dios? <sup>21</sup> Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.

### Tu ga tódiru' le naca guído'

(Mt. 7:13-14, 21-23)

<sup>22</sup> Tsanni ní' yu'ë nöza Jesús, sa'yéajë' Jerusalén, ridödë' yugu' yödzhö zxön, en yugu' yödzhödo', ate' rusédinë' bönachi nacua' gapa na'. <sup>23</sup> Tu bönni' zoë' ní' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacua' ní', rnnë':

<sup>24</sup> —Gulí'gü'í ládxi'li' tsú'uli' saca' ga nu ridödi le naca guído', tu' rea' libí'ili': Zían nupa ilé'ëni ila'yaza ní', pero bití' ila'zéqui'në'. <sup>25</sup> Tödi chasë' Xan yu'u, en usayjë' yu'u, isí lolí' libí'ili' na' zóali' ní'ilo ulídzalí'-në' ra' yu'u na', ate' guié'li'-në': "Xan, Xan, gusalaj queëtu'." Ní'irö ubí'ë didza' Lë', en guié' libí'ili': "Bití' nözda' nuzxi libí'ili'."

<sup>26</sup> Ní'irö isí lolí' innali': "Gü'í gudágulentu' Lí', ate' busédinu' gapa naca lu yé'ëyi queëtu'." <sup>27</sup> Ní'irö guié' libí'ili': "Rea' libí'ili', bití' nözda' gazxi bönachi libí'ili'." Gulí'cuíta ga zoa', yúgu'tëli' ruá'ali' dö'." <sup>28</sup> Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ní' rinná bë'ë Dios, pero libí'ili' sóali' ní'ilo. <sup>29</sup> Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ní' rinná bë'ë Dios. <sup>30</sup> Ní'irö ilaca lo bal-la bönachi nátagaca cá'asö na'a, ate' ulu'gá'ana cá'asö bal-la nupa nátagaca lo na'a.

### Ribödxí yeché'ë Jesús ní'a quégaca bönachi Jerusalén

(Mt. 23:37-39)

<sup>31</sup> La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¡Burúaj! ¡Buzxunnaj ni! ¡Ré'ënë' Herodes gútië' Lí'!

<sup>32</sup> Jesús rë' légaquië':

—Gulí'tséaj, gulí'tsöjödxi' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxó, en cate' gaca lidzaj, údxi guna' dxin quia'." <sup>33</sup> Run bayudxi tséajlensa' ca' nöza na'a, en cuxó, en huidzaj, ate' idxina' Jerusalén, tu' túti-gaquië' bönni' tu'ë didza' uláz queë' Dios ní'.

<sup>34</sup> 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxí'gacali'-në' guió'j bönni' gubáz risól-lë'ë Dios ga zóali'. Cate' xö zían luzu'í gú'unida' utuba' libí'ili' quia' ca runba' yöjede, rutúbiba' bórado' queéba' xzan xíliba', pero bití' gú'unilí'. <sup>35</sup> Bulí'yútsöca', cá'asö ugá'ana lídxilí', ate' rea' libí'ili', bítí'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

### Ruúnë' Jesús tu bönni' ré'enë' huë' gui

**14** Cate' naca dza lá'ayi quëgaquië' bönni' judío, guyu'ë Jesús lidxë' tu bönni' unná bë', bönni' yu-

do' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. <sup>2</sup> Zoë' ca' tu bönni' ré'enë' huë' gui ga na' zoë' Jesús. <sup>3</sup> Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

<sup>4</sup> Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busól-la'të' lë'. <sup>5</sup> Ní'irö Jesús rë' yugu' bönni' yudo' na', rnnë':

—Channö nu bönni' ládjalí' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

<sup>6</sup> Biti' bi didza' guca ulu'bi'ë ca naca lë ni.

### Nu cö' lataj lo

<sup>7</sup> Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

<sup>8</sup> —Cate' nu bönni' ulidzë' lí' guídu' ga raca laní que yöl-la' rutsaga na', bití' cö'u lataj lo. Nadxi ca' nulidzë' ca' tu bönni' nácatërë' lo ca lí'. <sup>9</sup> Ní'irö bönni' na' bulidzë' lí' huidë' ga zu', en guíë' lí': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u xánitëlö.

<sup>10</sup> Que lë ni na', cate' nu bönni' ulidzë' lí', guyéaj yöjchö' xánitëlö, para cate' idxinë' bönni' na' bulidzë' lí', huë' lí': "Bócha'a, gudödi ia'latí' nilö." Ní'irö gácaru' lí' lo lóga ca nupa ta'bö'len lí' tsözxón. <sup>11</sup> Nu run ba zxön cuini, ilunë' ga huöta' huöxaj, pero nu zoa nöxaj ladxí', ilunë' ga gácarö lo nu na'.

<sup>12</sup> Jesús rë' ca' bönni' na' bulidzë' Lë', rnnë':

—Catí' gunu' tu gü'í huagu o tu lanído', bití' ulídza-gacu'-në' yugu' böchi' luzó'o, en yugu' bönni' bóchu'u, en yugu' dí'a dza quiu', en dzaga yu'u quiu' ta'lé'enë' yöl-la' tsahuí' quégaquië', tu' ulu'lidzë' ca' lí', ate' caní gaca, ubí' quiu'. <sup>13</sup> Cate' gunu' tu gü'í huagu, bulidza yugu' bönachi yechí', en nupa nabixi ní'a ná'agaca, en nupa bití' raca sá'gaca, en yugu' bönni' lo chul-la.

<sup>14</sup> Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí' quiu' cate' idxín dza ulu'bán nupa gulún le naca tsahuí', en gulátigaca.

### Rucúdzu'ë didza' Jesús que tu laní zxön

<sup>15</sup> Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ní' rinná bë'ë Dios.

<sup>16</sup> Jesús rë' lë':

—Zoë' tu bönni' benë' laní zxön, ate' zían nupa bulidzë'. <sup>17</sup> Cate' chinabá'a la' huagu, gusól-lë'ë bönni' huen dxin queë' tsöjdxë' nupa na' chinulidzë', gunné': "¡Gulí'dá! ¡Yúgu'të chinabá'a!" <sup>18</sup> Gula'sí lógaquië' yúgu'të ta'nabë' lataj cabí tsöjáquië'. Bönni' zí'alö na' rnnë': "Sí' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." <sup>19</sup> Ia'túë' rnnë': "Sí' guzxi'a gayu' nózaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj."

<sup>20</sup> Ia'túë' rnnë': "Sí' butsaga na'a, en que lë ni na' bití' gaca guída." <sup>21</sup> Cate' bóajë' bönni' huen dxin na',

yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yé'ëyi, en gapa naca la' nöza que yödzö ni, ate' ichë'u yugu' bönachi yechí' ni, en nupa nabixi ní'a ná'agaca, en nupa bití' raca sá'gaca, en yugu' bönni' lo chul-la." <sup>22</sup> Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj." <sup>23</sup> Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídígaca nupa nacuá' ní' para ilí lidxa', <sup>24</sup> tu' rea' libí'ili': Bití' gahuë' que laní quia' nitúë' bönni' ní' bulidza' zí'alö."

### Le sáca'ru' cate' zéajlenru'-në' Cristo

<sup>25</sup> Yugu' dza ní' röjácálen Jesús bönachi zían, ate' buécjë' Jesús, en rë' légaquië':

<sup>26</sup> —Channö guídalenë' neda' tu bönni', en bití' idxí'irönë' neda' ca nadxí'inë' xuz xinë'ë, en nigula queë', en yugu' zxi'inë', en yugu' bi'í bóchë'ë, en yugu' bi'í zanë', en yöl-la' na'bán queë', bití' gaca gáquië' bönni' usëda quia'. <sup>27</sup> Nu bönni' bití' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', bití' gaca gáquië' bönni' usëda quia'. <sup>28</sup> Channö zoë' nu bönni' ladaj libí'ili' gué'ënnë' gunë' tu yu'u zían cuía, ¿naru' cabí cö'ë zí'alö ulabë' gáca'xi dumí ral-la' utöë' para in-ózinë' channö dë queë' tsca le riquinnë' para údxi gunë' yu'u na'? <sup>29</sup> Channö cabí gunë' caní, en isí lahuë' cuéquië' xilibi yu'u na', ate' bití' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', <sup>30</sup> ila'nná: "Bönni' ni gusí lahuë' runë' yu'u, pero bití' guca údxi gunë' le." <sup>31</sup> Lësca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'túë' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ní' nachë'ë galaj milë' bönni', ate' lë' chi milsë' bönni' nachë'ë? <sup>32</sup> Channö cabí séqui'në', cate' ní' zoë' zítu' ia'túë' bönni' na' rinná bë'ë, isól-lë'ë bönni' gubáz queë', ate' inábinë' lë' nacxi ral-la' gunë' para ulu'dzáquië' dxí'a. <sup>33</sup> Caní naca, channö zoë' nu bönni' ladaj libí'ili' bití' ucá'anë' yúgu'të le dë queë', bití' gaca gáquië' bönni' usëda quia'.

### Zödi' le naniti yöl-la' siná'a que

(Mt. 5:13; Mr. 9:50)

<sup>34</sup> Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? <sup>35</sup> Bítí'rö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë' nagui nu na'.

Rucúdzu'ë didza' Jesús ca naca queéba' bö'cu' zxila'

gunítiba'

(Mt. 18:10-14)

**15** Bulu'dubë' yúgu'të bönni' tu'quízxi' lázagaca bönachi, en yugu' bönni' cá'asö ga zoë' Jesús para ulu'zë' náguië' Lë'. <sup>2</sup> Que lë ni na' yugu' bönni' yu-

do' fariseo, en yugu' bönni' yudo' usedi gula'nné' queé' Jesús, ta'nné':

—Bönni' ni runé' bal yugu' bönni' dul-la', en rágulené' légaquié'.

<sup>3</sup> Ní'irö bucúdzu'ë didza' Jesús, rë' légaquié':

<sup>4</sup> —Channö zoé' tu bönni' ladaj libí'ili', nacua'aba' queé' tu gayua'aba' bö'cu' zxila', en channö nítiba' tuba', ¿naru' cabi ucá'ané' ia'zica'röba' tápalalaj yu' chénnaba' na' ga naca lu lataj cá'asö, ate' tsejé' tsöjdiljé'-ba' bö'cu' zxila' na' nanítiba', cate' udzóliröné'-ba'? <sup>5</sup> Cate' udzólíné'-ba', lu yöl-la' rudzeja queé' ixóé'-ba' ya' xziçjé', <sup>6</sup> en cate' udxiné' lidxé' utubé' yugu' böchi' luzé'ë, en yugu' dzaga yu'u queé', ate' guié' lé-gaquié': "Buli'dzéjalen neda', tu' chibudzólida'-ba' bö'cu' zxila' quia' gunítiba'." <sup>7</sup> Rea' libí'ili': Lësca' caní gácatèrö yöl-la' rudzeja yehua' yubá ni'a queé' tué' bönni' dul-la' ubí'i ládxé'ë ca gaca quégaquié' tápalalaj yu' chénné' bönni' tsahui', bönni' téquiné' bití' naquíniguequiné' ulu'bí'i ládxí'gaquié'.

### Rucúdzu'ë didza' Jesús que tu dumí guniti

<sup>8</sup> Rnné' ca' Jesús:

—Channö zóanu tu nigula, dë queénu chi dumí plata, en channö initi tu dumí plata na', ¿naru' cabi uquéla'nu guí', ate' ulúanu yu'u, uguilaj yúdxinu le cate' udzólirönu le? <sup>9</sup> Cate' udzólínu le, utúbinu yugu' nigula luzá'anu, en yugu' nigula dzaga yu'u queénu, ate' guiénu légacanu: "Buli'dzéjalen neda', tu' chibudzólida' dumí plata na' guniti." <sup>10</sup> Rea' libí'ili': Lësca' caní, ulu'dzéjade'eröné' gubáz lá'ayi queé' Dios ni'a queé' tué' bönni' dul-la' ubí'i ládxé'ë.

### Rucúdzu'ë didza' Jesús queébi' tu bí'i gunítibi'

<sup>11</sup> Rnné' ca' Jesús:

—Zoé' tu bönni' nacua'abi' chópabi' bí'i bönni' queé'. <sup>12</sup> Bí'i cuidí' na' rëbi'-né' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísié' quégacabi' le dë queé'. <sup>13</sup> Nabábasö dza gudzé, bí'i cuidí' na' butúbibi' yúgu'të, ate' guyéajbí' tu yödzo zítu', ate' ní' butöb'i' dërö le dë queébi'. Le ruá' dö' benbí'. <sup>14</sup> Cate' chibutöb'i' dërö le dë queébi', guca gubín lu yödzo ga na' zóabi', ate' biyadzaj queébi'. <sup>15</sup> Ní'irö guyéajbí' yöjsóabi' huen dxin queé' tu bönni' lu yödzo ní', ate' bönni' na' gusól-lé'ë-bi' ga dë xiyúé' tsöjgágubi'-ba' yugu' cuchi queé'. <sup>16</sup> Guca ládxí'bi' gágubi' guixi' cá'asö na' táguba' cuchi, pero cuntú nu bi bé' le gágubi'. <sup>17</sup> Ní'irö bubí'i ládxí'bi', rnnabi': "Cate' xö bönni' huen dxin nacué lidxé' xuzá', en dëda' le tahué', pero neda' ni huáti caza' yöl-la' ridún. <sup>18</sup> Uzá'a ni, huója' ga zoé' xuzá', en tsöjödxa'-né': Dad, bena' dul-la' lahué' Dios, zoé' yehua' yubá, en lo' lí'. <sup>19</sup> Bítirö naca' neda' lesaca' gaca' xzí'inu'. Ben neda' ca bönni' huen dxin quiu'." <sup>20</sup> Ní'irö guyú'ubi' nöza, söhuóajbí' ga zoé' xúzibi'. 'Cate' ní' zóabi' zítu' suzá'abi', bilé'ené'-bí' xúzibi', en buéchi' ládxé'ë-bi'. Carelö yöjzxi'galé'-bí' xúzibi', en yöjnidé' yenbí', gudahué'-bí' zxixi. <sup>21</sup> Ní'irö xzí'iné' na' rëbi'-né': "Dad, bena' dul-la' lahué' Dios, zoé' yehua'

yubá, en lo' lí'. Bítirö naca' neda' lesaca' gaca' xzí'inu'." <sup>22</sup> Ní'irö xúzibi' rë' yugu' bönni' huen dxin queé', rnné': "Gulí'tsöjléajtë lari' nazácatèrö, en gulí'gacu-bi'.

Gulí'cú'u le nazaca' xibón ná'abi', en bulí'dá' huarache ní'abi'. <sup>23</sup> Gulí'tsöjzxi'-ba' bëdxi renni', ate' gulí'guti-ba'. Gáguru'-ba', en gunru' laní, <sup>24</sup> tu' guca bí'i bönni' quia' ni ca tu bí'i chinátibi', ate' bubanbí'. Gunítibi', ate' chibulá'abi' na'a." Ní'irö gula'sí lógaquié' tu'dzéjané'.

<sup>25</sup> Tsanni ní' raca lë ni, zóabi' bí'i bönni' zí'alö queé' bönni' na' la' guixi'. Cate' suzá'abi' rudxinbí' gala' ra' yu'u, riyónibi' raca huila, en raca huó'a lu yu'u na'.

<sup>26</sup> Ní'irö bulídzabi'-né' tué' bönni' huen dxin zoé' ní', en gunábibi' lë' bizxi na' raca. <sup>27</sup> Bönni' huen dxin na' rë'ë-bi': "Bí'i bóchu'u na' budxinbí', ate' gunná bë'ë xuzu' gulútié'-ba' bëdxi renni', tu' budxinbí' lu në'ë dxí'a tsáhu'i'do'." <sup>28</sup> Ní'irö gulébi' bí'i zí'alö na', en bití' gú'u-nibi' tsú'ubi' yu'u. Ní'irö birúajé' xúzibi', en gúta'yué' lo-bi' tsú'ubi'. <sup>29</sup> Bubí'ibi' didza' bí'i zí'alö na', rëbi'-né' xúzibi': "Nöz quézinu' cate' xö iz bena' dxin lo', en catu caz gudá'baga'a lí', pero catu caz bennu' quia' tuba' bö'cu' zxíla'do' para gü'ílena' xibé yugu' luzá'a. <sup>30</sup> Na'a, cate' budxinbí' bí'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútié'-ba' bëdxi renni' ni'a queébi'." <sup>31</sup> Ní'irö xúzibi' rë'ë-bi', rnné': "Xzí'ina', lí' zóalen cazu' neda' ate' yúgu'të le dë quia', quiu' nequi. <sup>32</sup> Ben bayudxi gunru' laní, en udzéjaru', tu' gúcabi' bí'i bóchu'u ni ca tu bí'i chinati cázabi', ate' nubanbí'. Gunítibi' ate' chibulá'abi'."

### Rucúdzu'ë didza' Jesús queé' bönni' huen dxin bití' náquié' tsahui'

**16** Jesús rë' ca' yugu' bönni' dá'gaquié' Lë', rnné':

—Zoé' tu bönni' dë yöl-la' tsahui' queé', en zoé' ca' queé' tué' bönni' huen dxin dë lu në'ë uláz queé'. Bi-la'dxiné' yugu' bönni' tu'zéguié' bönni' huen dxin na' lahué' xané', ta'nné' queé' rutösé' le dë queé' xané' na'. <sup>2</sup> Ní'irö xan yu'u na' bulidzé' bönni' huen dxin na', en rë' lë': "¿Bizxi didza' ni riyönda' quiu'? Buluí' neda' le naca bë' dxin nunu', tu' cabirö gata' lu no'o uláz quia'." <sup>3</sup> Ní'irö guzá' ládxé'ë bönni' huen dxin na', rnné': ¿Nacxi guntsa? Rubéajé' xana' neda' lataj lo ga runa' dxin. Bití' séqui'da' guna' dxin gú'una, en utuí'ida' inaba' nu bi gúnna'sö quia'. <sup>4</sup> Na'a nözda' naca guna' para cate' ubéajé' neda' lataj lo ni, ila'cuá' nupa ulu'zí' neda' lídx-iguequi. <sup>5</sup> Ní'irö bönni' huen dxin na' bulidzé' yugu' bönni' bi tál-lé'ë queé' xané', ate' rë' bönni' zí'alö: "¿Gá-ca'xi ral-lu'u queé' xana'?" <sup>6</sup> Lë' rnné': "Tu gayuá' rö'ö chugu le za ral-la'a." Bönni' huen dxin lo na' rë' lë', rnné': "Ni dë guichi ga nazúaj le ral-lu'u. Guró'ötë ni, en buzúaj ia'tú lu guichi le inná chi-un rö'ö chugu ral-lu'u." <sup>7</sup> Gudödi ní' gunábiné' ia'túé', rnné': "Nazxi lí', ¿gáca'xi ral-lu'u?" Lë' rnné': "Tu gayuá' da'a xzoa' xtila." Ní'irö bönni' huen dxin lo na' rë' lë', rnné': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." <sup>8</sup> Réquibe'ené' xané' na' sína'të bené' bönni' huen dxin bití' náquié' tsahui' na'. Caní naca, náca-gacaré' sina' bönni' yödzo'lió ni lu le tuné' la' légacasé', ca náca'gaca bönachi ta'dalen Dios lu bení' queé'.

<sup>9</sup>Neda' rea' libí'ili': Guli'cózalen bönachi dxi'a, ugunli' dxin yöl-la' tsahui' dë queé'li' yödzülió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

<sup>10</sup>Nu rugún dxi'a dxin tu le cuídísö dë lu në'e, lësca' ugún dxi'a dxin tu le zxön gata' lu në'e. Nu bití' rugún dxi'a dxin tu le cuídísö dë lu në'e, bití' ugún dxi'a dxin tu le zxön gata' lu në'e. <sup>11</sup>Que lë ni na', channö cabí ru-gunli' dxi'a dxin yöl-la' tsahui' dë queé'li' yödzülió ni, ¿nuzxi caz udödi lu ná'alí' yöl-la' tsahui' le naca idú? <sup>12</sup>Channö cabí rugunli' dxi'a dxin le dë lu ná'alí' le nequi que nu yúbölö, ¿nuzxi caz udödi lu ná'alí' le ral-la' guequi que quezili'?

<sup>13</sup>Bití' gaca nitúé' bönni' huen dxin gunë' xichíngaca chopaxanë', tu' udí'inë' tué', en idxí'inë' ia'túé', o gunë' bal tué', en uzóé' tsólá'alö ia'túé' na'. Bití' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzülió.

<sup>14</sup>Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquié', que lë ni na' bulu'titjé' Jesús. <sup>15</sup>Ní'irö Jesús rë' légaquié':

—Libí'ili' rubéaj dxi'a cuinli' lógaca bönachi, pero nózinë' Dios le yu'u icja ladxí'do'oli', tu' naca lë na' tun zxön bönachi tu le ruzóé' Dios tsólá'alö.

#### Xibá queé' Moisés, en le rinná bë'ë Dios

<sup>16</sup>Gunné' ca' Jesús:

—Ga bidxintë dza zoë' Juan, ben dxin le rinná bë' xibá queé' Moisés, en le bulu'zúajé' lu guichi yugu' bönni' gulu'ë didza' uláz queé' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

<sup>17</sup>Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queé' Dios.

#### Le ruláa yöl-la' nutsaga na'

(Mt. 19:1-12; Mr. 10:1-12)

<sup>18</sup>Gunné' ca' Jesús:

—Channö tu bönni' ulá'alënë' nigula queé', ate' ut-saga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alënë' nigula na' nusanë'-nu bönni' queé'nu, gun ca' dul-la' le riguitsaj xibá que yöl-la' nutsaga na'.

#### Bönni' dë yöl-la' tsahui' queé', en Lázaro

<sup>19</sup>Ní'irö bucúdzü'ë didza' Jesús, rnnë':

—Zoë' tu bönni' rilé'enë' yöl-la' tsahui' queé'. Rácuë' lari' xiná, en lari' nazáca'da', ate' yugu' dza rúntica'së' laní, ate' t'é'aj tahué' le banéquiní. <sup>20</sup>Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queé', ate' hué'tëzë' rë'ë ra' yu'u queé' bönni' na' rilé'enë' yöl-la' tsahui'. <sup>21</sup>Raca ladxë'ë bönni' yéchi'do' na' gahué' le bizxaj tu'huöxaj xzani ga rahué' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu hué' queé' bönni' yéchi'do' na'. <sup>22</sup>Bidxín dza gútië' bönni' yéchi'do' na', ate' gubáz lá'ayi queé' Dios gu-

la'ché'ë lë' tsöjsóalenë' Abraham ga naca lataj lachi queé' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. <sup>23</sup>Cate' ni' riguí' rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahué', en bilé'enë' Abraham zoë' zítu', en dzáguië' Lázaro na' lë'. <sup>24</sup>Ní'irö bë'ë zidzaj didza', rnnë': "Xuza', Abraham, buéchi' ladxí' neda'. Gusól-la' Lázaro quia' para usubisë' xibón në'ë, en udusuhuóalë' lúdxá'a, tu' riguí' rizáca'a lu guí' ni."

<sup>25</sup>Abraham rë' lë', rnnë': "Zxí'ina', busá ladxu'u ca guca quiu', buzí'u xibé yöl-la' tsahui' tsanni ni' zu' nabanu', pero Lázaro ni, guca queé' yöl-la' yechi', ate' na'a, ruzí' zxönë' Lázaro ni, pero lí' riguí' rizácu'u. <sup>26</sup>Ia'stú, tu ra' guí'a sibi rë', le zoa gatsaj láhuil'ö ga ni' zóalí' libí'ili', en ga ni zóatu' netu'. Que lë ni na' nupa nacua' ni, en ilé'ëni ila'dödi ga zóalí' libí'ili', bití' ca' gaca ilunë' ca', en bití' gaca ilida ni nupa nacua' ni'." <sup>27</sup>Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, rá-ta'yua' lo' isól-lu'u-në' Lázaro tsejé' lidxë' xuza', <sup>28</sup>tu' nacua'ë gáyu'ë bönni' bócha'a ni'. Gusól-lë'ë tsöjenë' liná' lo que le raca ni, para cabí guídigaquié' ca' lataj ga ni riguí' rizáca'a." <sup>29</sup>Ní'irö Abraham rë' lë', rnnë': "Dë quégaquié' le buzúajé' lu guichi Moisés, en le bulu'zúajé' lu guichi bönni' gulu'ë didza' uláz queé' Dios. Yugu' didza' quégaquié' na' ral-la' ulu'zé náguie'." <sup>30</sup>Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, bití' gaca caní, pero channö ubanë' tu bönni' lu yöl-la' guti, en tsejé' ga na' nacua'ë, ulu'bí'i ladxí'-gaquié'." <sup>31</sup>Abraham rë' lë', rnnë': "Channö cabí tu'zé náguie' didza' bë'ë Moisés, en le gula'nnë' bönni' gulu'ë didza' uláz queé' Dios, bití' ila'yéajlë'ë sal-la' nu ubán lu yöl-la' guti."

#### Run bönadxi queé'ru' gunru' ga nu gun dul-la'

(Mt. 18:6-7, 21-22; Mr. 9:42)

**17** Jesús rë' yugu' bönni' dá'gaquié' Lë', rnnë':

—Nacuática'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'.

<sup>2</sup>Dxí'arö gaca queé' bönni' na' runë' caní, nu ugal-la' tu guí'oj riyétu yaga yenë', en tsöjchú'una lë' lu nísado', cáte'lö gunë' ga gun dul-la' nu bí'i néquibi' quia'.

<sup>3</sup>Gulí'gún chí'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ladxë'ë, buniti lo lë'. <sup>4</sup>Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' lí': "Rubí'i ladxá'a", ral-la' uniti lo' lë'.

#### Yöl-la' huáca que le réajlë'ëru' Cristo

<sup>5</sup>Ní'irö yugu' bönni' gubáz queé' Xanru' t'é' Lë', ta'n-në':

—Ben ga tséajlë'ërötu'-në' Dios.

<sup>6</sup>Xanru' rë' légaquié', rnnë':

—La'tu' naca cuídísö yöl-la' réajlë' queé'li' Dios, ná-casö ca tu xisedo' mostaza, huáca guié'li' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

### Le ral-la' gun nu naca huen dxin

<sup>7</sup> Gunné' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó' rugá'ané'-ba' bédxi o rulapè', cate' údxi guné' xichiné' xané', ¿naru' huëtsé' xané' lè', inné': "Gudá, guró'ö gagu'?" <sup>8</sup> ¿Calëga! Caní guíë' lè': "Bupá'a le gahua'. Guzóa sina' cu'u le guí'aj gahua', ate' tódíro na' huáca guí'aj gagu' li'." <sup>9</sup> ¿Naru' huëtsé' bönni' nadó' queë' na': "Xclenu'", tu' bené' ca gunná bé'ené' lè'? Runi neda', bití' guné' caní. <sup>10</sup> Lësca' caní gaca queé'li'. Cate' chinunli' yúgu'tè le gunná bé'ené' Díos libí'ili', ral-la' in-nali': "Nácatu' huen dxin cabí nácatu' lesaca', tu' bénsö-tu' le run bayudxi guntu'."

### Chië' bönni' té'ené' huë' nudzu' ruzödi

<sup>11</sup> Tsanni ni' yu'ë Jesús nöza, sa'yéajé' Jerusalén, ridödé' gapa dè yódzodo' nabábagaca luyú Samaria, en luyú Galilea. <sup>12</sup> Cate' guyázié' tu yódzodo', bila'rúajé' dutságagaquié' Lè' chië' bönni' té'ené' huë' nudzu' ruzödi, ate' gula'cu'è zítu'sö, <sup>13</sup> en tu'ë zidzaj didza', ta'nné':

—¡Jesús, Bönni' Usedi! ¡Buéchi' ladxí' netu'!

<sup>14</sup> Cate' bilé'ené' Jesús légaquié', rë' légaquié':

—Gulí'tséaj, gulí'tsöjlu'i cuinli' lógaca bixúz.

Tsanni ni' sôjáquié', bulu'huöáquié' dxí'a. <sup>15</sup> Ní'irö tuë' bönni' nútsé'ë ladjagaquié', cate' réquibe'ené' chin-uhuöáquié' dxí'a, bóajé' ga na' zoë' Jesús, ruí'tica'sé' zidzaj didza', rigu'ë Díos yöl-la' ba. <sup>16</sup> Biyéchuë', en busudxín lahuë' lu yu lahuë' Jesús, en rë' Lè': "¡Xclenu'!"

Bönni' ni nababé' Samaria. <sup>17</sup> Ní'irö Jesús rë' lè':

—¿Naru' cabí bulu'huöáquié' dxí'a chië' bönni'? ¿Gazxi nacuá'tsé' ia'zica'rë' bönni' na'? <sup>18</sup> ¿Naru' cabí zoa nu huöda cu'u Díos yöl-la' ba, pero tuzé' bönni' zítu' ni?

<sup>19</sup> Ní'irö Jesús gudxé' bönni' na', rnné':

—¡Guyasa, en böaj lidxu'! ¡Chiböácu' dxí'a tu' réajlë'u neda'!

### Ca idxín le rinná bë'ë Díos

(Mt. 24:23-28, 36-41)

<sup>20</sup> Cate' yugu' bönni' yudo' fariseo ta'nábinë' Jesús bá-taxi ral-la' idxín le rinná bë'ë Díos, Lè' bubí'ë didza', rë' légaquié':

—Ca idxín le rinná bë'ë Díos, bití' naca le ilé'eli'.

<sup>21</sup> Cuntu nu gaca inná: "¡Ni bidxín!", o inná: "¡Ni' bidxín!" ¡Bulí'yútsöca'! ¡Rinná bë'ë Díos lu icja ladxí'do'gaca bö-nachi!

<sup>22</sup> Ní'irö Jesús gudxé' yugu' bönni' usëda queë', rnné':

—Huadxín dza cate' gué'ënilí' ilé'eli' dza huöda' neda', Bönni' Guljé' Bönachi, pero bití' ilé'eli' le. <sup>23</sup> Ila'cuá' nupa ilé libí'ili': "¡Ni zoë'!", o ilá'nná: "¡Ni' zoë'!" Bití' tséajli' ni', en bití' tséajlenli' légaquié'. <sup>24</sup> Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljé' Bönachi. <sup>25</sup> Zí'alö ca gaca lè ni, run bayudxi quí'í sáca'da', ate' bönachi dza ni zóaru' na'a ulu'cá'ana neda' cá'asö. <sup>26</sup> Ca na' guca dza ni' zoë' Noé, lësca' caní gaca cate' idxín dza huöda' neda', Bön-

ni' Guljé' Bönachi. <sup>27</sup> Dza ni'te na' gulé'aj gulahuë'. Bulu'tsaga ná'agaquié', en bulu'dödé' xzí'inigaquié' lu yöl-la' rutsaga na' ga bidxinté dza guyázié' Noé lè'e barco zxon na' nazí'í le arca, ate' bidxinté nisa guió'j usuniti yödzo'lió le busuniti yúgu'té. <sup>28</sup> Lësca' caní guca dza ni' zoë' Lot. Gulé'aj gulahuë'. Gulá'uë', en gulú'ti'ë. Gulazé' xiyúgaquié', en guluné' yugu' yu'u quégaquié'. <sup>29</sup> Cate' bidxín dza na' burúajé' Lot lu yödzo' Sodoma, böxaj guí' ca tu nisa guió'j, enca' le ruzéguida' nazí'í le azufre, ate' bulu'suniti yúgu'té. <sup>30</sup> Lësca' caní gaca cate' idxín dza ulu'í lahua' neda', Bönni' Guljé' Bönachi.

<sup>31</sup> 'Cate' idxín dza na', channö zoë' tu bönni' ícjo'olö, en dzö'ö le dè queë' lu yu'u na', bití' ral-la' huötjé' tsöjzxi'ë le dè queë', ate' nu zoa la' guixí', lësca' caní, bití' ral-la' huöjé' lidxé'. <sup>32</sup> Gulí'sá' ladxí'li' ca guca queënu nigula queë' Lot. <sup>33</sup> Nu bönni' ré'ëné' gun chí'ë yöl-la' na'bán queë', uní'tië' le, pero bönni' udödé' yöl-la' na'bán queë' ní'a quia', udélé'ë le.

<sup>34</sup> 'Rea' libí'ili': Cate' idxín rëla na', ila'cu'ë chopé' bönni' tsözxón ga tasié', ate' tuë' uduzxi'a-né', en ia'túé' ucá'ana' lè'. <sup>35</sup> Ila'cuá'anu huëtu tsözxón chópanu nigu-la, ate' tunu uduzxi'a-nu, en ia'tunu ucá'ana-nu.

<sup>36</sup> Ila'cu'ë chopé' bönni' la' guixí', ate' tuë' uduzxi'a-né', en ia'túé' ucá'ana' lè'.

<sup>37</sup> Cate' bila'yönné' lè ni bönni' usëda queë' Jesús, gula'nábinë' Lè', ta'nné':

—Xan, ¿gazxi gaca lè ni?

Jesús rë' légaquié':

—Ga dè tu le nati, ni' ulu'dubi quéziba' bíchulab.

### Tu nigula uzëbi, en bönni' ruchí'a rusöröë'

**18** Ní'irö bucúdzü'ë didza' Jesús, rë' légaquié' ca run bayudxi ulídzatica'siru'-né' Díos, en bití' gaca chopa ladxí'ru'. <sup>2</sup> Rnné':

—Zoë' tu bönni' ruchí'a rusöröë' tu yödzo, bönni' bití' rádxiné' Díos, en bití' runé' nu bönni' bal. <sup>3</sup> La' yödzo ná'asö zóanu tu nigula uzëbi, ate' bidxinnu nigula ni ga zoë' bönni' ruchí'a rusöröë' na', rnnanu: "Buchí'a busörö le run quia' nu ruá' dö' quia'." <sup>4</sup> Xidzé bití' gú'un-né' bi guné' queënu, pero gudödi ni' guzá' ladxé'ë, rnné': "Bití' rádxida'-né' Díos, en bití' runa' nu bönni' bal, <sup>5</sup> pero tu' rupízxjanu nigula uzëbi ni neda', que lè ni na' uchí'a usöröa'-nu, para cabí guídatica'sinu ni, en para cabí tödi bë' upízxjanu neda'."

<sup>6</sup> Ní'irö Xanru' rë' légaquié', rnné':

—Gulí'zé nágalí' ca na' gunné' bönni' ruchí'a rusöröë' na', bönni' bití' náquié' tsahuí'. <sup>7</sup> ¿Naru' cabí uchí'a usöröë' Díos bönachi guró' cazé' queë', nupa na' tu'lidza Lè' rëla te dza? ¿Naru' huadzétsenë' gácalenë' légaquié'? <sup>8</sup> Rea' libí'ili': La' uchí'a usörötenë' légaquié'. Cate' huöda' neda', Bönni' Guljé' Bönachi, ¿naru' idzöli-da' nupa ta'yéajlë' neda' luyú ni?

### Tu bönni' yudo' fariseo, en tu bönni' uquízxaj

<sup>9</sup> Bucúdzü'ë didza' Jesús ca naca quégaquié' bönni' tu'béaj tsahuí' cúingaquié', en tu'cá'anë' cá'asö ia'zica'rö bönachi. <sup>10</sup> Gunné':

—Bila'dxinë chopë bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquízjë' lázaga-ca bönachi. <sup>11</sup> Guzuinë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zícá'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' bití' naca' ca bönni' uquízxaj ni. <sup>12</sup> Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'të le rata' quia'." <sup>13</sup> Guzóazë' zi'tu' bönni' uquízxaj na', en biti' böázxjanë' ichisa lahuë' uyúë' lúzxiba, pero gudapë' luchu'ë, rnnë': "Dios, buéchi' ladxí' neda', bönni' dul-la'." <sup>14</sup> Neda' rea' libí'ili': Bójajë' lidxë' bönni' uquízxaj na', nuhuóáquië' tsahui' lahuë' Dios, calëga ia'túë' bönni' ní'. Núti'tës bönni' run ba zxon cuinë', gunë' Dios ga huöta' igulë', pero nu bönni' rizóë' nöxaj ladxí', gunë' Dios ga gácarë' lo.

### Jesús rulidza tsáhuë'ë-bí' yugu' bí'ido'

(Mt. 19:13-15; Mr. 10:13-16)

<sup>15</sup> Ní'irö bila'dxinë' yugu' bönni', en nigula ga zoë' Jesús, nachë'gaquië'-bí' yugu' bí'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. <sup>16</sup> Ní'irö Jesús bulidzë' yugu' bönni' dá'gaquië' Lë', rnnë':  
—Gulí'gü'í-bí' lataj ila'dxinbi' bí'ido' ni ga zoa'. Biti' uzága'lí' xinözagacabi', tu' gata' quégaca nupa nácaga-ca ca bí'í caní lataj ga rinná bë'ë Dios. <sup>17</sup> Le nácatë rea' libí'ili': Nu cabí sí' lu në'e le rinná bë'ë Dios, ca runbí' tubí' bí'ido', bití' ca' tsaza ga ní' rinná bë'ë Lë'.

### Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

<sup>18</sup> Tu bönni' unná bë' gunábinë' Jesús, rnnë':  
—Bönni' Usedi idú dxí'a. ¿Bizxi ral-la' guna' para idéli'-da' yöl-la' na'bán idú?  
<sup>19</sup> Jesús rë' lë':  
—¿Bizx que rë'u neda': "Idú dxí'a"? Cuntu nu bönni' náquië' idú dxí'a. Tuzë' Dios náquië' idú dxí'a. <sup>20</sup> Nöz quézinu' yugu' le gunná bë'ë Dios:  
Biti' gunu' dul-la' le riguitsaj xibá que yöl-la' nutsaga na'.  
Biti' gútigacu' bönachi.  
Biti' cuanu'.  
Biti' innío' que luzó'o le cabí nácatë.  
Ben bal xuz xinó'o.  
<sup>21</sup> Bönni' na' rë' Jesús, rnnë':  
—Yúgu'të lë ni runa' ga gudela' naca' bí'ido'.  
<sup>22</sup> Cate' biyönnë' Jesús didza' ni, rë' lë':  
—Ia'tú le riyadzaj quiu' gunu'. Bëti' yúgu'të le dë quiu', ate' lë na' sí'u bunödza' quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.  
<sup>23</sup> Cate' bönni' na' biyönnë' didza' ni, ruhu'innë', tu' dëda' yöl-la' tsahui' queë'. <sup>24</sup> Cate' bilé'enë' Jesús ca na' ruhu'innë' bönni' na', rnnë':

—¿Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios? <sup>25</sup> Gácarö tódiba' böa' nagui yötsí', ca tsázië' tu bönni' rilé'enë' yöl-la' tsahui' ga rinná bë'ë Dios.

<sup>26</sup> Ní'irö nupa bila'yöni didza' ni gula'nná:

—¿Nuzxi caz gaca ulá, channö?

<sup>27</sup> Jesús gudxë' légaquië':

—Le bití' gaca ilunë' bönni', huáca gunë' Dios.

<sup>28</sup> Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Lí'.

<sup>29</sup> Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' xzí'inë', tu' ru'í ladxë'ë inná bë'ë Dios, <sup>30</sup> bönni' ni huazí'irë' dza ni zóaru' na'a, ate' dza sí' za' idéli'në' yöl-la' na'bán idú.

### Jesús riguixjöö' leyúbölö ca sí' ilútië' Lë'

(Mt. 20:17-19; Mr. 10:32-34)

<sup>31</sup> Jesús guchë'ë quez queë' idxínnutë' bönni' usëda queë', en rë' légaquië':

—Bulí'yútsöca', ribenru' zéajru' Jerusalén, ga ní' ilaca yúgu'të le nazúajgaca lu guichi ca gula'nnë' bönni' gu-lu'ë didza' uláz queë' Dios ca ral-la' gaca quia' neda', Bönni' Guljë' Bönachi. <sup>32</sup> Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza zi'ë neda', en ulu'chejë' neda' zxoná'. <sup>33</sup> Ila'guinë' neda', ate' tódirö ní' ilútië' neda', pero cate' gaca tsonna dza ubana'.

<sup>34</sup> Biti' gula'yéajni'inë' bönni' usëda queë' didza' ni, en bití' guléquibe'enë' ca sa'yéaj le ru'ílenë' légaquië' didza' que, tu' naca le cabí sequí' ila'yéajni'inë'.

### Jesús ruúnë' tu bönni' yödzo Jericó nachul-la lahuë'

(Mt. 20:29-34; Mr. 10:46-52)

<sup>35</sup> Cate' chizóa idxinë' Jesús yödzo Jericó, zoë' tu bönni' ní' nachul-la lahuë'. Rö'ë ra' nöza rinabë' nu bi gún-nasö queë'. <sup>36</sup> Bönni' ní' biyönnë' ta'dódi bönachi zían ní', ate' gunabë' bizxi na' raca. <sup>37</sup> Bönachi ní' tē lē':

—Jesús, bönni' Nazaret, ridödë' ni.

<sup>38</sup> Ní'irö bönni' na' nachul-la lahuë' bë'ë zidzaj didza', rnnë':

—¿Jesús, xzí'ini xí'sóë' David, buéchi' ladxí' neda'!

<sup>39</sup> Yugu' bönni' nanórugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zidzajrö bë'ë didza', rnnë':

—¿Xzí'ini xí'sóë' David, buéchi' ladxí' neda'!

<sup>40</sup> Ní'irö guzé' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

<sup>41</sup> —¿Bizxi ré'ënu' guna' quiu'?

Bönni' na' nachul-la lahuë' rnnë':

—Ré'ënida' huóálaj guió'j lahua'.

<sup>42</sup> Jesús rë' lë':

—Chibóálaj guió'j lo'. Chibóácu' tu' réajlë'u neda'.



<sup>43</sup> La' ní'isö bulé'etené', ate' sa'yéajlené' Jesús, rigu'è Dios yöl-la' ba. Lësca' yúgu'tè bönachi nacua' ni', en bila'lé'e lè na' guca gula'gú'u Dios yöl-la' ba.

### Jesús, en Zaqueo

**19** Ní'irö guyázié' Jesús yödzo Jericó, en ridödè' lu yödzo na'. <sup>2</sup> Zoè' tu bönni' lè' Zaqueo ni', bönni' lo ladjagaquié' bönni' uquíxaj, ate' dè yöl-la' tsahui' queé'. <sup>3</sup> Ruí'i ladxé' bönni' ni ilé'ené' Jesús, pero bití' guca queé' tu' nacua' bönachi zían ni', en náquié' bönni' ga ré'èdo'. <sup>4</sup> Ní'irö carelö yojnórue' lógaca bönachi zían na', ate' yójchené' tu lu yaga para gaca ilé'ené' Jesús, tu' ral-la' tödè' ni'. <sup>5</sup> Cate' bidxiné' Jesús ni', guchisa lahué' ruyúé' ga na' dxíé' Zaqueo na', en ré' lè':

—Zaqueo, bótjatè' lu yaga na', tu' run bayudxi tsöjgá'ana' lidxu' na'.

<sup>6</sup> Ní'irö la' bótjatè' Zaqueo lu yaga, ate' lu yöl-la' rudzeja queé' guché'è Jesús lidxé'. <sup>7</sup> Cate' bila'lé'e bönachi nacua' ni' lè' ni, gula'sí lógaquié' yúgu'tè' ta'nné' queé', ta'nné':

—Guyázié' Jesús ugá'analéné' bönni' dul-la'.

<sup>8</sup> Ní'irö guzuíné' Zaqueo, en ré' Xanru':

—Xan, buyútsöca'. Gatsaj le dè quia' gu'a quégaca bönachi yechi', en channö bi gudödi bè' buquixja' bönachi, ubí'a quégaca bönachi na' tapa có'tèlò ca'.

<sup>9</sup> Jesús ré' lè':

—Na'a dza ni bidxín yöl-la' rusölá quégaca nupa nacua' yu'u ni, tu' nababé' bönni' ni dí'a dza queé' Abraham. <sup>10</sup> Bida' neda', Bönni' Guljé' Bönachi, ududilja', en udusölá' nupa nanítigaca.

### Rucúdzu'è didza' Jesús que chi cö' dumí

<sup>11</sup> Tsanni ni' ta'yönné' didza' ni ru'è Jesús, ré' légaquié' le rucúdzu'è didza', tu' chizóa ila'dxiné' yödzo Jerusalén, ate' téquiné' chizóatè ilá' lahui le rinná bē'è Dios. <sup>12</sup> Caní rnné' Jesús:

—Zoè' tu bönni' lo, sa'yéajé' tu yödzo zítu' para sí' lu në'è yöl-la' unná bē', ate' ní'irö huödè'. <sup>13</sup> Cate' chizóa tsejé' ni' bulidzé' chié' bönni' huen dxin queé', en bē'è que queé'gaquié' tu cö' huéaj dumí, ate' ré' légaquié': "Gulí'guilajlen dumí ni tsanni huöda'." <sup>14</sup> Yugu' bönni' uládz queé' bití' ta'lé'ené' lè' dxí'a, ate' gula'sól-lè'è yugu' gubáz quégaquié' ga ni' tsejé', ila'nné': "Bití' ré'ènitú' inná bé'ené' bönni' ni netú'." <sup>15</sup> Ní'irö guzxí' lu në'è yöl-la' unná bē', ate' budxiné' ladzè'. Cate' bidxiné' ni' gunná bé'ené' nu tsöjlidza yugu' bönni' huen dxin na' budödè' lu ná'agaquié' dumí na', para inóziné' gá-ca'xi bulu'guílajlené' le tu tué'. <sup>16</sup> Cate' bönni' zí'alö na' bidxiné' lahué', rnné': "Xan, tu cö' dumí quiu' na' chibén icja ia'chí cö' ca'." <sup>17</sup> Xanè' na' ré' lè': "Tsahui' benu'. Nacu' huen dxin tsahui'. Tu' dxí'ado' bugunu' dxin látí'-do'os na' guta' lu no'ó, na'a, guna' ga inná bé'enu' chi yödzo." <sup>18</sup> Ní'irö bidxiné' ia'túé' bönni' huen dxin na' lahué' lè', rnné': "Xan, tu cö' dumí quiu' na' chibén icja ia'gayu' cö' ca'." <sup>19</sup> Xanè' na' ré' ca' lè': "Inná bé'enu' gayu' yödzo." <sup>20</sup> Ní'irö bidxiné' ia'túé' lahué' lè', rnné': "Xan, ni dè tu cö' dumí quiu' na'. Ben chí'a le, butúlida'

le lari'. <sup>21</sup> Caní bena' tu' rádxida' lí', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga bití' guzu'." <sup>22</sup> Ní'irö xanè' na' ré' lè': "Nacu' huen dxin bití' naca tsahui'. Ní'a que didza' bē'u uchi'a usöróa' lí'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga bití' guza'?" <sup>23</sup> Na'a, ¿bizx que bití' yöjlú'u dumí quia' na' ga gun icja, para cate' huöda', uzí'a le idú len icja na'?" <sup>24</sup> Ní'irö ré' nupa nacua' ni': "Gulí'cúa lu në'è dumí na', ate' gulí'gú'í queé' bönni' na' dè queé' chi cö' dumí." <sup>25</sup> Légaquié' tē' lè': "Xan, chidé queé' chi cö' dumí." <sup>26</sup> Ní'irö bubi'è didza' xángaqié', rnné': "Rea' libí'ili': Nu rugún dxí'a dxin le do' dè lu në'e, ulu'zxöni ladxí'gaca lè' ia'late', pero nu bití' rugún dxí'a dxin le do' dè lu në'e, ulu'béaj lu në'e lè' na' guta' lu në'e." <sup>27</sup> Ca naca quégaquié' bönni' ni' bití' ta'lé'ené' neda' dxí'a, en bití' gulé'enné' inná bé'eda' légaquié', gulí'tsöjzxi' légaquié' para idigaquié' ni, ate' gulí'guti légaquié'."

### Len yöl-la' ba zxön razié' Jesús yödzo Jerusalén

(Mt. 21:1-11; Mr. 11:1-11; Jn. 12:12-19)

<sup>28</sup> Cate' budxi gunné' caní Jesús, buguelé'è xinözé', sa'yéajé' zaca' yödzo Jerusalén. <sup>29</sup> Cate' bila'dxiné' gala' ga nacua' yödzo Betfagé, en yödzo Betania, ga naca ra' guí'ado' nazí' le Guí'a Yaga Olivo, gusól-lè'è Jesús chopé' bönni' uséda queé', <sup>30</sup> ate' ré' légaquié':

—Gulí'tséaj yödzo' ni' ca dódilö ga zóaru', en cate' idxinlí' ni', tsöjxáca'li'-ba' tuba' búrrodo' nága'ba' ni', búrrodo' na' cuntú nu ribíani lèba'. Gulí'sedxi-ba', en gulí'duché'-ba' quia' ni. <sup>31</sup> Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní inná: "Xanru' riquinné'-ba'."

<sup>32</sup> Söjajúié' bönni' uséda queé' na' nasól-lè'è, ate' yöjxáca'gaquié'-ba' ca na' chigudxé' Jesús légaquié'.

<sup>33</sup> Cate' gula'sedxé'-ba' búrrodo' na', yugu' bönni' xanba' tē' légaquié':

—¿Bizx que risédxili'-ba' búrrodo' na'?

<sup>34</sup> Bulu'bí'è didza', ta'nné':

—Xanru' riquinné'-ba'.

<sup>35</sup> Gula'ché'è-ba' ga na' zoé' Jesús. Cate' chigula'xóé' yugu' lari' tsölá'a quégaquié' cúdzu'ba' búrrodo' na', bulu'dxié' Jesús cúdzu'ba' lahui lari' na'. <sup>36</sup> Gapa ral-la' tödè' Jesús, gula'chiljé' lari' quégaquié' la' nöza. <sup>37</sup> Cate' chibila'dxiné' gala' ga zoa lidinni que Guí'a Yaga Olivo, lu yöl-la' rudzeja quégaquié' gula'sí lógaquié' yúgu'tè bönni' dá'gaquié' Jesús, tu'è zidzaj didza', ta'gu'è Dios yöl-la' ba, ní'a quégaca yugu' yöl-la' huáca zxön bila'lé'ené' bené' Jesús. <sup>38</sup> Ta'nné':

—¡Yöl-la' ba bönni' unná bē' ni zē'è uláz queé' Xanru' Dios! ¡Yehua' yubá za' le ribequi dxi ladxí'ru'! ¡Yöl-la' ba Dios!

<sup>39</sup> Ní'irö yugu' bönni' yudo' fariseo nútsa'gaquié' ladaj bönachi zían ni' tē' Jesús, ta'nné':

—¡Bönni' Usedi, gudil-la yugu' bönni' uséda quiu'!

<sup>40</sup> Bubi'è didza' Jesús, ré' légaquié':

—Rea' libí'ili': Channö ila'cuá' dxíé' bönni' ni, yugu' guió'j hualuí' caz zidzaj didza'.

<sup>41</sup> Cate' bidxinë' Jesús gala' ra' yödzo na', en rilé'enë' le, ní'irö ribödxë' que, <sup>42</sup> rnnë':

—Raca lãdxa'a huanözili' na'a dza le gaca gun ga cuéqui dxi lãdxi'li' lahuë' Dios, pero na'a chinagachi' queé'li', para cabi ilé'eli' le. <sup>43</sup> Hualãdxi' queé'li' dza cate' nupa biti' ta'lé'e libí'ili' dxi'a ila'bequi zö'ö idú gási-bí'ilö ga zóali', en ila'gú'u libí'ili' lé'alö, ate' yúgu'të lataj idú gásibi'ilö ilúnlenë' libí'ili' gudil-la. <sup>44</sup> Ulu'quinnajë' zö'ö run chi'i yödzo queé'li', en ilútië' nupa nacua' lu yödzo ni. Biti' ugá'ana guió'j lahui luzé'e. Yúgu'të lë ni gaca queé'li' tu' cabi gúquibe'eli' dza bidë' Dios buduyúë' libí'ili'.

### Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

<sup>45</sup> Ní'irö guyázië' Jesús lö'a yudo', en gusi lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. <sup>46</sup> Rë' légaquië':

—Nazúaj lu guichi lá'ayi, rnna: "Lidxa' naca yu'u ga ulu'lidza bönachi Dios", pero libí'ili' chinunli' le ca tu lídxigaca bönni' gubán.

<sup>47</sup> Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzo ilútië' Lë'. <sup>48</sup> Biti' bulu'dzölinë' nacxi ilútië' Lë', tu' idú lãdxi'gaca tu'zé nãgagaca yúgu'të bönachi xtídze'ë.

### Yöl-la' unná bë' dë lu në'ë Jesús

(Mt. 21:23-27; Mr. 11:27-33)

**20** Tu dza, cate' ni' rusédinë' Jesús bönachi ga naca chila yudo', en riguixjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', <sup>2</sup> ate' të' Jesús:

—Gudixjö'i' netu'. ¿Bizxi yö'l-la' unná bë' dë lu no'o runu' caní? ¿Nuzxi caz budödi lu no'o yö'l-la' unná bë' ni?

<sup>3</sup> Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'.

<sup>4</sup> ¿Nuzxi gusól-la' Juan ruquilé' bönachi nisa? ¿Naru' Dios, o bönachi?

<sup>5</sup> Gulún xtídza'gaquië' la' légacasë' bönni' yudo' na', ta'nnë':

—Channö innaru': Gusól-lë'ë Dios lë', guié' rë'u: "¿Bizxi que biti' guyéajlë'ëli'-në'?" <sup>6</sup> Channö guiëru'-në': Gula'sól-lë'ë yugu' bönni' lë', bönachi lu yödzo ni ulu'lãdxi' rë'u guió'j, tu' nöziguequi bë'ë didza' Juan na' uláz queë' Dios.

<sup>7</sup> Ní'irö bulu'bi'ë didza', ta'nnë':

—Biti' nöztu' nuzxi na' gusól-la' Juan.

<sup>8</sup> Ní'irö Jesús rë' légaquië':

—Neda' ca' biti' guía' libí'ili' bi yö'l-la' unná bë' rúnida' caní.

### Yugu' bönni' huen dxin biti' nãcagaquië' tsahui'

(Mt. 21:33-44; Mr. 12:1-11)

<sup>9</sup> Ní'irö la' gusi lotë' Jesús ru'ilenë' bönachi nacua' ni' didza'. Rucúdzu'ë didza', rnnë':

—Zoë' tu bönni' budé'ë yugu' lubá uva lu xiyüë', ate' budöde' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. <sup>10</sup> Cate' bidxin dza ulu'chibë' uva luyú na', gusól-lë'ë tuë' bönni' gubáz queë' ga na' nacue' huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lë'ë lë' cá'asö. <sup>11</sup> Leyúbölö gusól-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö. <sup>12</sup> Leyúbölö gusól-lë'ë que-gaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

<sup>13</sup> Ní'irö guzá' lãdxe'ë xani luyú na', gunné': "¿Nacxi guntsa? Isól-la'a xzí'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." <sup>14</sup> Ní'irö, cate' yugu' bönni' huen dxin na' bila'lé'enë'-bi', gulún xtídza'-gaquië' la' légacasë', ta'nnë': "Bí'i ni guequi queé'bi' luyú ni. Gulí'dá, gútiru'-bi', para guequi queéru' le ral-la' guequi queé'bi'." <sup>15</sup> Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'?

<sup>16</sup> Guíde', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nnë':

—¿Inná Dios biti' gaca caní!

<sup>17</sup> Ní'irö buyüë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guió'j na' gula'rú'unë' bönni' huen zö'ö,

guió'j ni chinaca guió'jlen squin zö'ö?

<sup>18</sup> Nútítës nu ibixi lahui guió'j ni, quitsaj nu na', ate' nu bönni' tsöjbága' guió'j ni lë', uzxuzxaj lë'.

### Ca naca dumí ta'guizxaj lázagaca bönachi

(Mt. 21:45-46; 22:15-22; Mr. 12:12-17)

<sup>19</sup> La' dza ní'sö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero gulãdxinë' bi ilún bönachi zian nacua' ni'. <sup>20</sup> Ní'irö bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'lu'i' cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. <sup>21</sup> Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchí'a rusöróu' ca naca le tu'lu'isö lahui bönachi, pero idútë li naca ca rusédinu' xibá queë' Dios. <sup>22</sup> Gudixjö'i' netu'. ¿Naru' run bayudxi quizxaj lastu' queë' César, bönni' Roma rinná bë'ë, o cabí?

<sup>23</sup> Réquibe'enë' Jesús le té'ënnë' ilunë' queë', ate' rë' légaquië':

—¿Bizxi que rizí' bé'ëli' neda? <sup>24</sup> Buli'lu'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

<sup>25</sup> Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

<sup>26</sup> Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'bábinë' ca naca didza' bubi'ë, ate' bulu'sayaj ruá'a-gaquië'.

**Ca gaca quégaca nupa ulu'bán lu yöl-la' guti**  
(Mt. 22:23-33; Mr. 12:18-27)

<sup>27</sup> Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

<sup>28</sup> —Bönni' Usedi, Moisés buzúajë' queéru' lu guichi, le rna: "Channö gátie' nu bönni', ate' ugá'ananu nigu-la queë', en channö cuntú nu zoa bí'i queë', ní'irö bí'i bóchi'bi' ral-la' sí'ibi' nu nigu-la queë' na', para uzóabi' bí'i queëbi' bóchi'bi' na' gútibi'." <sup>29</sup> Gula'cuá'abi' gadxi bí'i bönni' nácagacabi' bóchi'bi', ate' bí'i z'älö na' but-saga ná'aleni' bí'i nigu-la, en gútibi', bití' zóabi' bí'i queëbi'. <sup>30</sup> Ní'irö bí'i buropi na' but-saga ná'aleni' nu nigu-la na', ate' gútibi' ca' bí'i ni, bití' zóabi' bí'i queëbi'. <sup>31</sup> But-saga ná'aleni' nu bí'i bunni na', ate' la' tuz ca gu-lunbi' igádxitëbi', ate' gulátibi', bití' zóabi' bí'i quégacabi'. <sup>32</sup> Ga búdxitë, gútinu ca' nigu-la na'. <sup>33</sup> Na'a, cate' ulu'bán nupa chinátigaca, ¿núzxilöbi' guéquinu nigu-la na' queëbi', tu' bulu'tsaga ná'aleni' nu igádxitëbi'?

<sup>34</sup> Ní'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bí' xí'inigaquië' para ulu'tsaga ná'agacabi'. <sup>35</sup> Na'a, nupa nácagaca lesaca' ulu'bán lu yöl-la' guti, en tsöjcuá' yödžölió sí' gata', bití' ilún yöl-la' rizóalen nigu-la, en bití' ulu'tsaga ná'agaca. <sup>36</sup> Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca xí'ini cazë' Dios. <sup>37</sup> Ca na' ral-la' ulu'bán nupa chinátigaca, ru-lu'ínë' rë'u Moisés caz ga na' nazúaj lu guichi ca naca que yaga yötsi' régui, ga ní' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. <sup>38</sup> Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

<sup>39</sup> Ní'irö bulu'bi'ë didza' bal-lë' bönni' yudo' usedi, ta'n-në':

—Bönni' Usedi, dxí'ado' gunnó'.

<sup>40</sup> Bítirö bulu'rúguinë' ila'nábinë' Lë' didza'.

**¿Nuzxi xí'ini náquië' Cristo?**  
(Mt. 22:41-46; Mr. 12:35-37)

<sup>41</sup> Ní'irö Jesús rë' légaquië':

—¿Nacxi caz na' ta'nnë': "Cristo náquië' xí'inë' David"? <sup>42</sup> David caz bë'ë didza' le nazúaj lu guichi lá'ayi ga nazúajgaca salmo, le rna:

Xanru' Dios gudxë' Xana':

"Gurö'i cuita lë'a ibëla

<sup>43</sup> cate' gunra' ga ulu'zechu xzíbigaca lo' nupa ta'dá'baga' Li'."

<sup>44</sup> David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' xí'inë'?

**Jesús ruzéguië' diza' bönni' yudo' tu'sédinë'**  
(Mt. 23:1-36; Mr. 12:38-40; Lc. 11:37-54)

<sup>45</sup> Tsanni ní' yúgu'të bönachi nacua' ní' tu'zë' nágagaca Jesús, rë' yugu' bönni' usëda queë':

<sup>46</sup> —Gulí'gún chí'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dé' nácugaquië' lari' tunna, en té'ënnë' ulu'lidza bönachi légaquië' zxon gapa naca lu yé'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'. <sup>47</sup> Ta'gúë' lídxigacanu nigu-la uzé'bido', ate' para ulu'lu'í tsahui' cuíngaquië', xidzë tu'lidzë' Dios. Yugu' bönni' ni, yénni'tërö gunë' Dios ga ila'gu'í ila'záquië'.

**Gun le gulú'unu tu nigu-la yechi' lahuë' Dios**  
(Mr. 12:41-44)

**21** Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' qué-gaquië', ta'gu'ë dumí lu gu'ína que dumí gun que yudo'. <sup>2</sup> Bilé'enë' ca' tu nigu-la yechi' uzé'bido', rigú'unu chopa dumí lásido', le nazáca'gaca láti'do'os. <sup>3</sup> Rnnë' Jesús:

—Le nácatë rea' libí'ili', tu le zxon'tërö gulú'unu nigu-la yechi' uzé'bido' ni ca ia'zica'rö bönachi na' ta'gu'ë dumí. <sup>4</sup> Yúgu'të, tsca le nadödi bë' dë quégaquië', gula'gu'ë dumí que yudo', pero nigu-la ni, lu yöl-la' yechi' queënu gulú'unu idütë le dë queënu, le ral-la' gáhuinu.

**Riguíxjö'ë Jesús ca ulu'sunítie' yudo'**  
(Mt. 24:1-2; Mr. 13:1-2)

<sup>5</sup> Nacuá' ní' nupa tu'í didza' ca naca que yudo' na', ca na' nazí' biquitaj que, yugu' guiój nazácalé'egaca, en yugu' gundo' nácagaca lachi, ate' Jesús rë' légaquië', rnnë':

<sup>6</sup> —Yúgu'të lë ni rilé'eli', huadxín dza cate' bítirö ugá'ana guiój lahui luzé'e ni, tu' ulu'sunítie' bönachi yudo' ni.

**Le ilaca bë' cate' sí' idxín dza údxi**  
(Mt. 24:3-28; Mr. 13:2-23)

<sup>7</sup> Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

<sup>8</sup> Bubi'ë didza' Jesús, rnnë':

—Gulí'gún chí'i cuinli', para cabí nu sí' ye'e libí'ili', tu' ila'lá'gaquië' bönni' zían, en ila'z'í' lágaquië' ca lea' neda', ila'nnë' nácagaquië' Cristo, en ila'nnë': "Chizá' gala' dza údxi." Neda' rea' libí'ili': Bití' tséajlenli' lé-gaquië'. <sup>9</sup> Cate' yónili' raca gudil-la, en ta'dá'baga' bönachi yúlahui', bití' gadxi idzóbili', tu' run bayudxi ilaca le caní, pero bití' zuítëni dza údxi.

<sup>10</sup> Ní'irö rë' ca' légaquië':

—Til-la tu yödžö len ia'tú yödžö, ate' bönachi tu ga nu rinná bë' ila'díl-lalen bönachi ia'tú ga nu rinná bë'.

<sup>11</sup> Tódigaca budó' xzu', ate' zían lataj gaca gubín, en ilatsaj yödžöhuë' zxon. Ila'lá' lahui lúzxiba le ilún gadxi bönachi, en le ilaca bë'.

<sup>12</sup> 'Zí'atèlò cate' sí' ilaca lè ni, ila'zón bönachi libí'ili', en ila'bía láché'gaca libí'ili'. Ila'ché'è libí'ili' gapa tu'dubè' tu'sèdè' queè' Dios para ilútiè' libí'ili', en ila'gu'è libí'ili' lidxi guié. Ila'ché'è libí'ili' lógaquiè' bönni' ta'nná bē'è, en lógaquiè' bönni' lo, tu' dá'alí' neda'. <sup>13</sup> Gaca caní queé'li' para séqui'li' gunlí' ba nali' quia' neda'. <sup>14</sup> Tsutsu gulí'gún láchí'li', para cabí cuéqui ícjalí' zí'alò nacxi in-nalí' uláz queé'li', <sup>15</sup> tu' gunna' queé'li' didza' ubí'ili', en yöl-la' réajni', para cabí gaca ulu'cul-lè' libí'ili', en para cabí gaca bi ila'nné' que xtídza'li' bönni' ní' bití' ila'lé'ené' libí'ili' dxi'a. <sup>16</sup> Ní'irò xuz quézili' ulu'dödè' libí'ili', en cá'anqueze yugu' bönni' böchi' quézili', en yugu' dí'a dza que quézili', en yugu' böchi' luzé'e quézili', ate' ilútiè' bál-lalí'. <sup>17</sup> Yúgu'tè bönachi ulu'zóa libí'ili' tsölá'alò tu' dá'alí' neda', <sup>18</sup> pero bití' iníti nitú guitsa' íc-jalí'. <sup>19</sup> Channö ugá'analí' tsutsu, idéli'li' yöl-la' na'bán idú.

<sup>20</sup> 'Cate' ilé'eli' bönni' rójáquiè' gudil-la nagú'ugaquiè' lè'a Jerusalén, inózili' chibidxín dza iníti yödzo ni.

<sup>21</sup> Ní'irò nupa nacua' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacua' lu yödzo ni ral-la' ila'rúaj ni, ate' nupa nacua' la' guixi', bití' ral-la' ulu'dxín lu yödzo ni. <sup>22</sup> Yugu' dza ní' Dios gunè' xíguia' nupa nacua' yödzo ni para gaca yúgu'tè le nazúaj lu guichi lá'ayi ca ral-la' gaca quégaquiè'. <sup>23</sup> Cate' idxín dza ní', bica' bayechi' yugu' nigula nuá'gacanu-bí' bí'ido' sí' ilaljbi', en nigula tu'gádxí'nu-bí' bí'ido', tu' ila'guí' ila'zá-ca'da' bönachi nacua' ní', ate' Dios gúndè'è bönachi ní' xíguia'. <sup>24</sup> Ilátiè' zíanè' lu gudil-la na', ate' ila'ché'è ia'bal-lè' nadzúngaquiè' ga ila'dxinè' idútè yödzo'lió, ate' yödzo Jerusalén ni, ulu'léaj ulu'libè' le bönni' zítu', cate' izá'arò dza quégaquiè'.

### Le ilaca bē' sí' huödē' Bönni' Guljē' Bönachi

(Mt. 24:29-35, 42-44; Mr. 13:24-37)

<sup>25</sup> Gunné' ca' Jesús:

—Ní'irò ila'cuá' le ilaca bē' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yón chí' guziú' yu que nísado', en que le riyasa ridxía nisa na'. <sup>26</sup> Ulu'dú láchí'gaca lu yöl-la' radxi quéguequi tu' ila'zá' láchí'gaca quégaca le ral-la' ilaca lu yödzo'lió, en ila'xzixi le nalá'gaca lúzxiba.

<sup>27</sup> Ní'irò ila'lé'ené' neda', Bönni' Guljē' Bönachi, guída' lu böljaj lúzxiba, dè lu na'a yöl-la' unná bē', ate' ilá' lahui yöl-la' zxon quia'. <sup>28</sup> Cate' isí lo ilaca lè ni, bulí'tipa láchí'li', en guli'chisa lolí', tu' chizóa udxina' neda', para huö'ua' libí'ili'.

<sup>29</sup> Jesús gudxè' ca' légaquiè' tu le bucúdzu'è didza', rñé':

—Bulí'yútsöca' ca raca que yaga higo, en que bití'tès yaga yúbölö. <sup>30</sup> Cate' rilé'eli' ta'lén n'ra nē'e hué'enido', nöz quézili' chizá' gala' cusu ba. <sup>31</sup> Lésca' caní, cate' ilé'eli' chitaca yugu' lè ni, inózili' chizá' gala' dza idinná bē'è Dios luyú ni.

<sup>32</sup> 'Le nácatè rea' libí'ili', bití' ilátigaca bönachi ila'cuá' dza ní' cate' ilaca yúgu'tè lè ni. <sup>33</sup> Ila'dödi que lúzxiba, en que luyú ni, pero xtídza'a, bití' tödi cá'asö, tu' idxín caz ca rna.

<sup>34</sup> 'Gulí'gún chí' cuinli' para cabí gü'ili' lataj tsaza icja láchí'do'olí' le gun ditaj libí'ili', lè na' naca yöl-la' rágulé'e, en yöl-la' rizudxi, en yöl-la' ruubi rugu'í, para cate' idxín dza ní', cabí sóalí' niti láchí', <sup>35</sup> en para cabí gaca queé'li' ca tu le rizón bönachi, ca naca le gaca quégaca yúgu'tè bönachi nacua' idútè yödzo'lió. <sup>36</sup> Que lè ni na', gulí'sóa ban láchí', en bulí'lidzatica'sé' Dios, para gaca ulálí' lu lè na' ral-la' ilaca, en para cabí utu'í'li' cate' idxinli' lahua' neda', Bönni' Guljē' Bönachi.

<sup>37</sup> Lahui' dza rizóè' Jesús chila yudo', rusédinè' bönachi, ate' chí' dzö'ölö rirúajè' ní', en rejè' lu guí'ado' nazí' le Guí'a Yaga Olivo. <sup>38</sup> Yugu' zila bila'dxín yúgu'tè bönachi ga zoè' Jesús chila yudo' para ulu'zè' náagaca xtídzè'è.

### Tun xtídza'gaquiè' ilútiè' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Cate' chizóa idxín laní cate' tahuè' yöta xtila cabí nazí'í cúa zi que, nazí'í le Pascua laní na', <sup>2</sup> bulu'dubè' yugu' bixúz unná bē' len bönni' yudo' tu'sédinè'. Ta'zóa ta'bō'è ilútiè' Jesús, pero bití' gula'zéquínè' tu' tádxinè' bi ilún bönachi.

<sup>3</sup> Ní'irò Satanás tu' xihui' yöjtsaga Judas. Judas lè' ca' Iscariote, en nababè' idxinnutè' gubáz nasól-lè'è Cristo. <sup>4</sup> Guyijè' Judas na', yöjé'lenè' didza' yugu' bixúz unná bē', en bönni' dè lu ná'agaquiè' que yudo', nacxi gunè' para udödè' Jesús lu ná'agaquiè'. <sup>5</sup> Bulu'dzéjanè' bönni' yudo' na', en gula'z'í lu ná'agaquiè' ulu'nödzejé' queè' dumí. <sup>6</sup> Raza láché'è Judas lè ni, ate' rizóa ribö'è udödè' Jesús lu ná'agaquiè' bagáchi'sö.

### Le ráguru' le rusá' láchí'ru' ca gútiè' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidxín dza na' tahuè' yöta xtila cabí nazí'í cúa zi que, cate' ral-la' ilútiè'-ba' bö'cu' zxila' le tahuè' dzö' Laní Pascua. <sup>8</sup> Jesús gusól-lè'è Pedro, en Juan, rñné':

—Gulí'tséaj, guli'tsöjpá'a queéru' le gáguru' dzö' Laní Pascua.

<sup>9</sup> Tè' Lè':

—¿Gazxi ré'ènu' tsöjpá'atu' queéru'?

<sup>10</sup> Jesús ré' légaquiè', rñné':

—Bulí'yútsöca', cate' tsú'ulí' lu yödzo ni, irúajè' tu bönni' dutságuiè' libí'ili', söjnu'è tu rö'ö nisa. Gulí'tséaj-jlenè' ga idxintèli' yu'u ga tsáziè'. <sup>11</sup> Gulí'gué'è xan yu'u na': "Bönni' Usedi ré' lí': ¿Gazxi zoa yu'u laní ga gágule-na' yugu' bönni' usèda quia' dzö' Laní Pascua?" <sup>12</sup> Ní'irò ulu'ínè' libí'ili' tu yu'u zxon xitsá' ga ní' chinabá'a. Bulí'pá'a ní' le gáguru'.

<sup>13</sup> Ní'irò yöjáquiè', en yöjxáca'gaquiè' ca na' chigudxè' Jesús légaquiè', ate' bulu'pé'è ní' le ilahuè' dzö' Laní Pascua.

<sup>14</sup> Cate' bidxín dzö' na', gurö'è Jesús ga ilahuè', ate' bönni' gubáz queè' na' gula'bó'lenè' Lè' tsözxón.

<sup>15</sup> Ní'irò Jesús ré' légaquiè':

—Gúcada' láchá'a gágulena' libí'ili' tsözxón xtsö' ni zí'atèlò cate' sí' qui'í saca'a, en gátia'. <sup>16</sup> Rea' libí'ili': Bití'rö gahua' lè ni cate' idxinrö dza gaca le rulufísö xtsö' ni ga ní' rinná bē'è Dios.

<sup>17</sup> Gudélë'ë Jesús tu xzíga'do', en gudxë' Dios: "Xclenu'." Ní'irö rë' légaquië':

—Gulí'sí' lë ni, en gulí'guí'aj lati' huéaj, <sup>18</sup> tu' rea' lib'í-il-í: Bítí'rö guí'ja' xisi uva cate' idxinrö le rinná bë'ë Dios.

<sup>19</sup> Ní'irö gudélë'ë yöta xtila, en gudxë' Dios: "Xclenu'." Gudödi ní' buzuzxjë' le, en bë'ë que queégaquië', rñë':

—Lë ni naca idütë le naca' le rudöda' uláz queé'li'.

Gulí'gún caní para usá' ládxi'lí' neda'.

<sup>20</sup> Cate' budxi gulahuë', lësca' caní bë'ë didza' que xzíga'do' na', rñë':

—Xzíga'do' ni rulu'í ca naca didza' cubi rucá'ana tsahuí, ate' rön quia' run tsutsu le, rön na' ilalaj ní'a queé'li'.

<sup>21</sup> 'Na'a, bönní' na' udödë' neda' lu ná'agaca bönachi rö'ë rágulenë' neda' tsözxón. <sup>22</sup> Le nácatë huayija' ga ilútië' neda', Bönní' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechí' bönní' na' udödë' neda'.

<sup>23</sup> Ní'irö gula'sí lógaquië' ta'nábinë' Lë' tu tuë', ta'nnë': —¿Núzxilötu' nu gun caní?

### Tuí'í xtídza'gaquië' núzxilögaquië' gáquië' lo

<sup>24</sup> Ní'irö gulu'ë didza' la' légacasë' núzxilögaquië' idéli'në' lataj lo. <sup>25</sup> Jesús gudxë' légaquië':

—Yugu' bönní' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönní' tácalen.

<sup>26</sup> Lib'í'ilí' bití' ral-la' gunlí' caní, pero nu naca lo ládjalí' ral-la' gaca ca nu naca cuídí'tërö, ate' nu rinná bë' ral-la' gaca ca nu run dxin quéguequi luzé'e. <sup>27</sup> ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' lib'í'ilí' ca nu rupá' la' huagu.

<sup>28</sup> Lib'í'ilí' ni guzóaleni' neda' cate' ní' bi guca quia', yugu' le gula'z'í' bë' neda'. <sup>29</sup> Que lë ni na' udöda' lu ná'alí' tu ga inná bé'ë'li', ca na' benë' Xuza', budödë' lu na'a ga inná bë'a neda'. <sup>30</sup> Caní guna' para gaca có'ölí', en guí'aj gágulenlí' neda' ga ní' inná bë'a, ate' có'ölí' xi-lataj cázalı' ga uchi'a usöröli' idxinnu cö' xzí'ini xí'sóë' Is-rael.

### Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Jn. 13:36-38)

<sup>31</sup> Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihuí' lib'í'ilí', para urixi udödi lib'í'ilí' ca nu rurixi rudödi xzoa' xtila, <sup>32</sup> pero chibulidza'-në' Dios, en gunábida' Lë' gácalenë' lí', para cabí' údxi udú yöl-la' réajlé' quiu' neda'. Na'a, cate' huóacu' quia', butipa ládxi'gaquië' böchi' luzó'o.

<sup>33</sup> Pedro rë' Lë':

—Xan, chizóa' sá'lëna' Lí', calégasö tseja' lidxi guié, pero lësca' gátilëna' Lí'.

<sup>34</sup> Jesús rë' lë':

—Pedro, rea' lí': Zí'alö códxiba' böra na'a, chigudá'bagu'u tsonna luzuí, innó' cabí' núnbë'u neda'.

### Le benë' Jesús cate' chizóa ilútië' Lë'

<sup>35</sup> Jesús gunábinë' légaquië', rñë':

—Catí' gusól-la'a lib'í'ilí' cabí' nuá'alí' yöxaj yöta, en calëga buzudi dumí, en calëga chopá cö' xiráchulí', ¿naru' bi biyadzaj queé'li'?

Légaquië' ta'nnë':

—Bití' bi.

<sup>36</sup> Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guié tuchi' ral-la' gutí' lari' rixóa yeni, en sí' tu guié tuchi'. <sup>37</sup> Rea' lib'í'ilí': Run bayudxi gaca quia' lë na' nazúaj lu guichi lá'ayi, rñna: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

<sup>38</sup> Ní'irö légaquië' ta'nnë':

—Xan, ni dë chopá guié tuchi'.

Lë' rë' légaquië':

—Chinaca.

### Jesús rulidzë' Dios la' yëla Getsemaní

(Mt. 26:36-46; Mr. 14:32-42)

<sup>39</sup> Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönní' usëda queë' sôjá-calënë' Lë'. <sup>40</sup> Cate' bila'dxinë' ní', Jesús rë' légaquië', rñë':

—Bulí'ídzë' Dios, inábili'-në' cabí' gata' lataj sí' bë' tu' xihuí' lib'í'ilí'.

<sup>41</sup> Ní'irö Jesús guzë'ë ga na' nacué, en gudödë' ia'latí' tsca ga ridxín tu guí'j rírú'uniru', ate' ní' buzóa zxibë', en rulidzë' Dios. <sup>42</sup> Rñë':

—Xúz, channö ré'ënu', bucuása ga zoa' lë na' ral-la' quí'í saca'a, pero calëga ca ré'ënda' neda', pero ca ré'ënu' Lí' gunu'.

<sup>43</sup> Ní'irö buluí'í lahuë' gubáz lá'ayi queë' Dios, zë'ë yehua' yubá, ate' butipë' ládxe'ë Jesús. <sup>44</sup> Lu yöl-la' risëbi ladxí' queë', idú ládxe'ë Jesús bulidzë' Dios, ate' nisa yösa queë' guca ca rön raba' luyú.

<sup>45</sup> Cate' budxi bulidzë' Dios, guyasë', en bóajë' ga na' nacué bönní' usëda queë', ate' duxáquië' légaquië' tásië' tu' tu'huí'inigaquië'. <sup>46</sup> Ní'irö Jesús rë' légaquië':

—¿Rásitsalı'? ¿Gulí'chasa, en bulí'ídzë' Dios! Inábili'-në' cabí' gata' lataj sí' bë' tu' xihuí' lib'í'ilí'.

### Ta'zönë' Jesús

(Mt. 26:47-56; Mr. 14:43-50; Jn. 18:2-11)

<sup>47</sup> Tsanni ní' ru'ë didza' Jesús, la' bila'dxintë' bönní' zían ní', ate' Judas, bönní' na' nababë' idxinnuë' bönní' usëda queë' Jesús dzáguie' légaquië', ate' nanöruë' ló-gaquië' bönní' zían na'. Gubí'guí'ë ga zoë' Jesús para ut-saga lahuë' Lë'. <sup>48</sup> Ní'irö Jesús rë' lë':

—Judas, ¿naru' rudóditso' caní neda', Bönní' Guljë' Bönachi, rutsaga lo' neda'?

<sup>49</sup> Cate' yugu' bönní' na' nacué'lenë' Jesús bila'lé'enë' ca na' raca queë' Lë', të' Lë':

—Xan, ¿naru' gü'ítu' légaquië' guié tuchi'?

<sup>50</sup> Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. <sup>51</sup> Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. <sup>52</sup> Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' bití' ta'lé'enë' Lë' dxí'a, rnnë':

—¿Narúajtsali' nuá'alí' guíë tuchi', en yaga para sönli' neda' ca runlí' rizönli'-në' gubán? <sup>53</sup> Yugu' dza guzóalen caza' libí'ili' chila yudo', ate' bití' bi benlí' quia', pero na'a chibidxín dza queé'li', le naca dza dë lu në'e nu na' zoa lataj chul-la.

### Rnnë' Pedro: "Bití' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

<sup>54</sup> Ní'irö gula'zönë' Jesús, en gula'ché'ë Lë' ga na' bulu'sudxinë' Lë' lidxë' bixúz lo. Pedro yöjnahué' Jesús zítu' zítu'sö. <sup>55</sup> Cate' ní'a në'ë bixúz lo chigula'béquië' guí lö'a lidxë' bixúz lo na', gula'bö'ë idú gásibi'ilö ra' guí na', ate' Pedro guró'lenë' légaquië' tsözxón. <sup>56</sup> Cate' tubí' bí'i nigula huen dxin bilé'ebi'-në' Pedro, ní' röö'së' ra' guí, buyubi' lë', en rnnabi':

—Bönni' ni dë'ë ca' Jesús.

<sup>57</sup> Gudá'baguië' Pedro, rnnë':

—Nigúla, bití' ca' núnbë'a-në' bönni' na'.

<sup>58</sup> Ia'latí' gudzé ia'túë' bönni' bilé'enë' Pedro, ate' rnnë':

—Li' do'ó ca' légaquië'.

Pedro gunné':

—Bönni', calëga neda'.

<sup>59</sup> Ia'latí'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

<sup>60</sup> Ní'irö Pedro gunné':

—Bönni', bití' nözda' bizxi na' ru'u didza' que.

Tsanni ní' ru'ë didza' ni, la' guró'dxitë'ba' böra. <sup>61</sup> Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'alö códxiba' böra na'a, lí' chigudá'bagu'u tsonna luzuí, innó' bití' núnbë'u neda'." <sup>62</sup> Burúajë' Pedro ní'ilö, ate' rön caz guró'dxë'.

### Tu'titjë' Jesús

(Mt. 26:67-68; Mr. 14:65)

<sup>63</sup> Yugu' bönni' na' nazóngaqüië' Jesús bulu'titjë' Lë', ate' gula'guinë' Lë'. <sup>64</sup> Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¿Gunnéya'atsöca'! ¿Nuzxi na' gudapa' Li'?

<sup>65</sup> Zíánrö ca' gula'nnë' queë' le gulu'ë dö' queë'.

### Ridxinë' Jesús lógaquië' bönni' yudo' tu'chí'a tu'söröë'

(Mt. 26:59-66; Mr. 14:55-64; Jn. 18:19-24)

<sup>66</sup> Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'ché'ë Jesús lógaquië' bönni' yudo' tu'chí'a tu'söröë', ate' gula'nábinë' Lë', <sup>67</sup> ta'nnë':

—Gudíxjöi' netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, bití' tséajlë'ëli' neda', <sup>68</sup> en channö inábida' libí'ili' tu didza', bití' ubí'ili' didza', en bití' usanli' neda'. <sup>69</sup> Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatë'ë yö-la' unná bë'.

<sup>70</sup> Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

<sup>71</sup> Ní'irö ta'nnë':

—¿Núzxirö naquíniru' nu gun ba nali' queë'? La' ré'usö chibiyóniru' didza' ru'ë.

### Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

**23** Ní'irö gulazuinë' yúgu'të bönni' zían ní', ate' gula'ché'ë Jesús lahuë' Pilato, <sup>2</sup> ga ní' gula'sí lógaquië' tu'zégüië' Lë' didza', ta'nnë':

—Bönni' ni, budzólitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinózigaca nupa ta'guíxaj laz ruquíxjë' César, en rnnë' lë cazë náquië' Cristo, bönni' ral-la' inná bë'ë.

<sup>3</sup> Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubí'ë didza' Jesús, rnnë':

—Le nácasö rnnó'.

<sup>4</sup> Ní'irö Pilato gudxë' yugu' bixúz unná bë', en bönachi nacua' ní', rnnë':

—Bití' bi rudzólida' le naca xíguia' nunë' bönni' ni.

<sup>5</sup> Ní'irö gulunrë' tsutsu xtídzagaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

### Ridxinë' Jesús lahuë' Herodes, bönni' rinná bë'ë luyú Galilea

<sup>6</sup> Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. <sup>7</sup> Cate' gunózinë' nababë' Jesús ga ní' rinná bë'ë Herodes, gusól-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. <sup>8</sup> Cate' Herodes na' bilé'enë' Jesús, budzëjanë', tu' chiguca xidzë ré'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yö-la' huáca gunë'. <sup>9</sup> Ní'irö Herodes gunábinë' Jesús le zían, pero Jesús bití' bi didza' bubí'ë. <sup>10</sup> Nacu'ë ca' ní' yugu' bixúz unná bë', len bönni' yudo' tu'sédinë', ate' bulu'zégüidë'ë Jesús didza'. <sup>11</sup> Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. <sup>12</sup> Dza na' bulu'dzágüië' dxí'a Pilato, en Herodes, tu' zí'alö gula'lé luzé'ë tuë' ia'túë'.

**Ta'chúguië' queë' Jesús gátië'**

(Mt. 27:15-26; Mr. 15:6-15; Jn. 18:39-19:16)

<sup>13</sup> Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzo, <sup>14</sup> ate' rë' lé-gaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, bití' bi budzólida' le naca xíguia' nabáguë'e, yugu' lë na' ruzéguili'-në' didza'. <sup>15</sup> Cate' gusól-la'a libí'ili' lahuë' Herodes, bití' bi budzólinë' le benë' bönni' ni le naca xíguia' nabáguë'e para nu ichugu queë' gátië'. <sup>16</sup> Na'a usaca' zí'a-në', ate' tödi na' usana'-në'.

<sup>17</sup> Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní' na', ca na' run cazë'. <sup>18</sup> Ní'irö gulu'ë zidzaj didza' yúgu'të bönni' nacu'ë ní', ta'nnë':

—Bëtië' bönni' ni, en busanë' queëtu' Barrabás.

<sup>19</sup> Nadzunë' Barrabás na' lidxi guíë tu' gudíl-lalenë' yúlahui' lu yödzo na', en tu' bëtië' bönachi. <sup>20</sup> Bulidzë' Pilato légaquië' leyúbölö, tu' rë'enë' usanë' Jesús.

<sup>21</sup> Leyúbölö gulu'ë zidzaj didza', ta'nnë':

—¡Budë'e lë'e yaga cruz! ¡Budë'e lë'e yaga cruz!

<sup>22</sup> Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dö' benë' bönni' ni? Bití' bi budzólida' nunë' le run ga nabáguë'e xíguia' gátië'. Usaca' zí'a-në', ate' ní'irö usana'-në'.

<sup>23</sup> Zidzajrö gulu'ë didza', ta'nabë' të'e Jesús lë'e yaga cruz. Tu' gula'bódxí'ë yenni' yugu' bönni' na', en yugu' bixúz unná bë', gula'déli'në' gaca ca na' té'ënnë'.

<sup>24</sup> Ní'irö Pilato guchúguië' queë' Jesús, para gaca queë' ca na' ta'nabë'. <sup>25</sup> Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' té'ënnë'.

**Dë'e Jesús lë'e yaga cruz**

(Mt. 27:32-44; Mr. 15:21-32; Jn. 19:17-27)

<sup>26</sup> Cate' ní' ta'ché'e Jesús tsöjdá'gaquië' Lë' lë'e yaga cruz, gula'zönë' Simón, bönni' yödzo Cirene, suzë'e la' guixí', ate' gula'xóe' yen zxicjé' yaga cruz na' para gu'ë le, en tsejé' cúdzul'ë' Jesús.

<sup>27</sup> Bönachi zían, enca' yugu' nigula söj'nógaca Jesús, ta'bódxinu nigula na', en ta'bódxu yéchi'nu queë' Lë'.

<sup>28</sup> Ní'irö buécjé' Jesús, en ruyúë' légacanu, ate' rë' léga-canu:

—Libí'ili' nigula Jerusalén. Bití' códxili' quia' neda', pero gulí'cödxu que quézili', en quégacabí' xí'ini' <sup>29</sup> tu' huadxín dza ila'nná: "Bica' bágaca yugu' nigula huödx, en nigula bití' guluá'anu-bí' bí'ido', en bití' bulu'gádx-i'nu-bí' bí'ido'." <sup>30</sup> Ní'irö ila'sí lógaca ila'nná bönachi, ilé' yugu' guí'a sibi: "Gulí'dubága netu'", en ilé' ca' yugu' guí'ado': "Gulí'cachí' netu'." <sup>31</sup> Channö caní tunë' quia' neda', naca' ca tu yaga ya'a, z'narú cabí ilúntë'rë' ca' queéli', nácalí' ca yaga bidxi?

<sup>32</sup> Gula'ché'e ca' chopë' bönni' tuá' dö', para ilútië' lé-gaquië' tsözxón len Jesús. <sup>33</sup> Cate' bila'dxinë' lataj nazí'i

le Calavera, le rna len didza' xidza' Lataj Que Böga' Íc-jaru', bulu'dë'e Jesús lë'e yaga cruz. Bulu'dë'e ca' lé'ega-ca yaga cruz chopë' bönni' tuá' dö'. Tuë' bulu'dë'e cuita lë'e ibëla Jesús, en ia'túë' bulu'dë'e cuita lë'e yó'göla.

<sup>34</sup> Ní'irö Jesús rnnë':

—Xuz, buniti lo légaquië', tu' cabí nózguequinë' bi tunë'.

Bönni' röjáquië' gudil-la nacu'ë ní' bulu'lë'e que queë-gaquië' le nácuë' Jesús, en bulu'quitjé' le gaca bë' lahui.

<sup>35</sup> Bönachi nacua' ní' tu'yú, en yugu' bönni' dë lu ná-gaquië' bulu'titjé' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' guró cazë' Dios.

<sup>36</sup> Yugu' bönni' na' röjáquië' gudil-la bulu'titjé' ca' Jesús. Gula'biguë'e ga na' zoë', en bulu'guijé' Lë' nupi zi, <sup>37</sup> ta'nnë':

—Channö nacu' Lí' bönni' inná bé'enë' bönachi judío, busölá cuinu'.

<sup>38</sup> Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: "Bönni' Rinná Bé'enë' Bönachi Judío." <sup>39</sup> Tuë' bönni' huiá' dö' na' dë'e lë'e yaga cruz bu-lidza zí'ë Jesús, rnnë':

—Channö nacu' Lí' Cristo, busölá cuinu', enca' netu'.

<sup>40</sup> Bubi'ë didza' ia'túë' bönni' huiá' dö' na', en gudil-lë' luzë'e na', rnnë':

—¿Naru' cabí rádxinu'-në' Dios? Lësca' lí' narugu quiu' gátiu'. <sup>41</sup> Le nácatë rë'u, le rál-la'sö gaca queëru' riguí' rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ë.

<sup>42</sup> Ní'irö bönni' ni rë' Jesús:

—Yöjné neda' cate' idxinu' ga ní' inná bë'u.

<sup>43</sup> Jesús rë' lë':

—Le nácatë rea' lí', na'a dza ni sóalenu' neda' lataj lachi quia'.

**Ratië' Jesús**

(Mt. 27:45-56; Mr. 15:33-41; Jn. 19:28-30)

<sup>44</sup> Cate' bidxín idú huagubidza, guchul-la iduté yödzo'lió ga bidxinrö idú ridödi xihuó. <sup>45</sup> Guchul-la gu-bidza, ate' lari' nal-la' lu yudo' biröza' chopa dí'liö.

<sup>46</sup> Ní'irö bë'e zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

<sup>47</sup> Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

<sup>48</sup> Cate' yúgu'të bönni' nacu'ë ní' tu'yúë' bila'lé'enë' lë na' guca, yöjhuó'gaquië' yödzo, ta'gapa' luchú'ugaquië' tu' tu'bánnë'. <sup>49</sup> Zí'tu'sö bulu'gá'ana yúgu'të nupa ní' núnbë'gaca Jesús, en yugu' nigula na' yöj'alennu Lë' cate' ní' gudé' luyú Galilea, ate' tu'yúë' lë ni raca.

**Rigáchë'e Jesús yeru ba**

(Mt. 27:57-61; Mr. 15:42-47; Jn. 19:38-42)

<sup>50</sup> Zoë' ca' ní' tu bönni' yödzo Arimatea que luyú Judea, lë' José. Bönni' ni náquië' dxí'a, en tsahui', en

nabábalenë' yugu' bönni' yudo' tu'chi'a tu'söröë'. <sup>51</sup> Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bé'ë Dios. <sup>52</sup> Ní'irö guyijë' José na' lahuë' Pilato, en gunabë' lataj u'ë Jesús. <sup>53</sup> Cate' chinuzötjé' Lë', buchölinë' Lë' lari', ate' gulu'ë Jesús yeru ba, le nadaj lë'e guí'a guió'j, ate' lu ba na', cuntu nu nagüí'iguequinë'. <sup>54</sup> Dza na' naca dza tu'pé'ë que dza lá'ayi quégaquië' bönni' judío, tu' sí' idxín dza na'.

<sup>55</sup> Yöjácánu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. <sup>56</sup> Cate' yöjhuó'jgacánu yu'u, bulu'pá'ánu nöri rilá' zixixi, en yugu' le za rilá' zixixi. Ní'irö bulu'zí' ládxi'gacánu dza lá'ayi na' quégaquië' bönni' judío ca na' rinná bé' xibá queë' Dios.

**Rubanë' Jesús lu yöl-la' guti**  
(Mt. 28:1-10; Mr. 16:1-8; Jn. 20:1-10)

**24** Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacánu yugu' le rilá' zixixi, lë na' chin-upá'agacánu, ate' dzágagacánu lé'gacánu ia'bál-lanu nigula. <sup>2</sup> Cate' bila'dxinnu ni', bila'lé'enu chinadúa guió'j na' gudá' ga nu riyaza yeru ba queë'. <sup>3</sup> Cate' gula'yázanu yeru ba na', bití' bulu'dzólínu zoa Xanru' Jesús ni'. <sup>4</sup> Cate' ni' ta'bó'ónu böniga ní'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacué'ánu. <sup>5</sup> Ní'irö gulá'dxinu, en bulu'zötaj íc'jagacánu, tu'yunu lu yu, ate' chopë' gubáz lá'ayi na' tē' lé'gacánu, ta'nné':

—¿Bizx que ruguílajli' nu zoa nabán xilataj nu nati? <sup>6</sup> Bití' zoë' ni, tu' chibubanë'. Gulí'tsöjnë lë na' chigudxi cazë' libí'ili' cate' ni' zoë' luyú Galilea. <sup>7</sup> Gunnë': "Run bayudxi nu udödi neda', Bönni' Guljé' Bönachi, lu ná'agaquië' bönni' dul-la', ate' ulu'dé'ë neda' lë'e yaga cruz, ate' ubana' cate' gaca tsonna dza."

<sup>8</sup> Ní'irö yöjné'gacánu didza' na' bé'ë Jesús, <sup>9</sup> ate' bulu'zá'ánu ra' yeru ba na', yöjtí'xjöi'iguequinu idxiné'ájtë' bönni' gubáz queë' Cristo, en ia'zica'rë' ca', ca naca lë na' guca. <sup>10</sup> Nigula na' yöjtí'xjöi'iguequinu bönni' gubáz na' yugu' lë ni, nácagacánu María Magdalena, en Juana, en María, xinë'ë Jacobo, en ia'bál-lanu nigula na' dzágagacánu lé'gacánu. <sup>11</sup> Gulé'quinë' bönni' gubáz na' tu'í'nu didza' chixi, en bití' gula'yéajlë'ë lé'gacánu.

<sup>12</sup> Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lá'risö nacué'á ni', ate' ní'irö bóajë' lidxë', rubáninë' ca naca lë na' guca.

**Le guca la' nöza ridxintë Emaús**  
(Mr. 16:12-13)

<sup>13</sup> La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. <sup>14</sup> Yú'ugacasë' ca' nöza, tu'ë didza' ca naca yúgu'të lë na' guca. <sup>15</sup> Tsanni ni' yú'ugaquië' nöza, tu'ë didza' la' lé'gacasë', gubí'guí'ë gala' Lë cazë' Jesús, ate' gudálenë' lé'gaquië' tsözxón. <sup>16</sup> Bití' bulu'únbë'ë Lë' tu' naca ca tu le nabaga' guió'j lógaquië'. <sup>17</sup> Ní'irö Jesús gunábinë' lé'gaquië', rnnë':

—¿Bizxi didza' na' ru'í'ili' la' libí'isili' yú'uli' nöza? ¿Bizx que na' ruhu'í'ini'?

<sup>18</sup> Bubi'ë didza' bönni' na' lë' Cleofas, rë' Lë':

—¿Nácatsö' bönni' zítu' lu yödzö Jerusalén, en tuzu' lí' bití' nözinu' lë na' guca néaje nasi ni'?

<sup>19</sup> Ní'irö Jesús rë' lé'gaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bé'ë didza' uláz queë' Dios, ate' len yöl-la' huáca zxön benë' dxin, en bé'ë didza' lahuë' Dios, en lógaca yúgu'të bönachi. <sup>20</sup> Yugu' bixúz unná bé', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dé'ë Lë' lë'e yaga cruz. <sup>21</sup> Netu' bentu' löza gúquië' Lë' bönni' na' ral-la' huó'á'uë' bönachi Israel, pero na'a chiguca tsonna dza cate' gulaca lë ni. <sup>22</sup> Ia'stú, bál-lanu nigula nútsa'gacánu netu' gulunnu ga guró'ötu' böniga. Yöjácánu ra' yeru ba queë' cate' sí' gulén gubidza na'a dza, <sup>23</sup> en cate' bití' bulu'dzólínu Lë', buduhuó'jgacánu, en gulënu netu' bila'lé'enu yugu' gubáz lá'ayi queë' Dios, nupa ni' gulé' lé'gacánu zoë' nabanë' Jesús. <sup>24</sup> Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

<sup>25</sup> Ní'irö Jesús gudxë' lé'gaquië':

—Libí'ili', bönni' bití' réajni'íninë'. Nazidi icja ládxi'-do'olí' para cabí tséajlë'ëli' yúgu'të le gula'nné' bönni' gulu'ë didza' uláz queë' Dios. <sup>26</sup> ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsëpisëtë'rë'?

<sup>27</sup> Ní'irö gusí lahuë' Jesús riguí'xjöi'ínë' lé'gaquië' yúgu'të le ru'í' didza' ca naca queë' le nazúajgaca lu guichi lá'ayi, ca na' gusí lo bé'ë didza' Moisés ga bidxintë yugu' le gula'nné' yúgu'të bönni' gulu'ë didza' uláz queë' Dios.

<sup>28</sup> Cate' bila'dxinë' yödzödo' ga na' söjáquië', benë' Jesús ca tu bönni' zéajtë'rë' zítu'. <sup>29</sup> Gulunë' bayudxi ugá'analenë' lé'gaquië', ta'nné':

—Bugá'analen netu', tu' chiridzó' na'a, en chizó'a gal-la.

Ní'irö guyázië' Jesús yu'u, en bugá'analenë' lé'gaquië'.

<sup>30</sup> Cate' ni' Jesús rö'ë rá'gulenë' lé'gaquië', gudélë'ë yöta xtila, en gudxë' Dios: "Xclenu'." Ní'irö buzuzxjé' le, en bé'ë quégaquië'. <sup>31</sup> La' ní'isö bidúa lë na' gubaga' guió'j lógaquië', ate' bulu'únbë'ë Jesús, ate' Lë' buniti cuiné' lógaquië'. <sup>32</sup> Ní'irö gulé' luzé'ë tué' ia'túé':

—¿Naru' cabí böála'tica' ládxi'do'oru' tsanni ni' ru'í'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

<sup>33</sup> La' ní'isö gula'zuínë' yöjhuó'jgaquië' Jerusalén, ate' yöjxá'agaquië' nudúbigaquië' idxiné'ájtë' bönni' gubáz queë' Jesús, en nupa nacué'álen lé'gaquië'. <sup>34</sup> Ní'irö yugu' bönni' na' nacué'ë ni' gulé' chopë' na':

—Chibubán cazë' Xanru', en bulu'í' lahuë', ate' bilé'enë' Simón Lë'.

<sup>35</sup> Ní'irö chopë' na' gula'guí'xjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzuzxjé' yöta xtila na'.



**Bönni' usëda queë' Jesús tu'lé'enë' Lë'**

(Mt. 28:16-20; Mr. 16:14-18; Jn. 20:19-23)

<sup>36</sup> Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Guli'sóa dxi ládxi'li'.

<sup>37</sup> Ní'irö guladxi gula'dzöbinë' tu' téquinë' bixín ta'lé'enë'. <sup>38</sup> Jesús rë' légaquië':

—¿Bizx que ró'öli' böniga? ¿Bizx que rizá' ládxi'li' yugu' lë ni? <sup>39</sup> Buli'yútsöca' na'a, en ní'a. Neda' caz ni. Guli'cán neda', en buli'yú neda', tu' cabí da' bixín bëla', en bití' yu'u dxita ca ni rilé'eli' naca quia' neda'.

<sup>40</sup> Ní' ruí'së' ca' didza' ni, bulu'ínë' légaquië' në'ë, en ní'ë. <sup>41</sup> Tu' tu'dzëjaguequinë' bití' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queé'li' ni le gahua'?

<sup>42</sup> Ní'irö bulu'nödzjë' queë' láti'do'oba' böla chinégui'ba', en tu quíxí'ba' buz. <sup>43</sup> Guzxí'ë Jesús le, en gudahuë' lógaquië'. <sup>44</sup> Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ní' zóalena' libí'ili', gunní'a: Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'í le Yugu' Salmo, ca ral-la' gaca quia' neda'.

<sup>45</sup> Ní'irö buzéajni'inë' légaquië' lë na' nazúajgaca lu guichi lá'ayi. <sup>46</sup> Rë' légaquië':

—Caní nazúaj lu guichi ca run bayudxi gaca queë' Cristo, qui'í sáquë'ë, en ubanë' lu yöl-la' guti cate' gaca tsonna dza, <sup>47</sup> ate' idútë yödzölió ral-la' gaca libán ca naca quia' neda' para ulu'bí'í ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' <sup>48</sup> ate' libí'í cázali' na' bilé'eli' yugu' lë ni ral-la' gunli' ba nalí que. <sup>49</sup> Buli'yútsöca', isó'la'a queé'li' le guzxí' lu në'ë Xuza' gunné' queé'li', pero buli'gá'anasö Jerusalén cate' idxinrö queé'li' yöl-la' huáca na' za' yehua' yubá.

**Ruhuëpë' Jesús yehua' yubá**

(Mr. 16:19-20)

<sup>50</sup> Ní'irö Jesús guché'ë yugu' bönni' dá'gaquië' Lë', söjáquië' yödzö Betania, ate' ní' guchisa në'ë, en bulidza tsáhuë'ë légaquië'. <sup>51</sup> Tsanni ní' rulidza tsáhuí'së' ca' légaquië', buzá'atë' ga na' nacu'ë, buëpë' yehua' yubá. <sup>52</sup> Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuójgaquië' Jerusalén. <sup>53</sup> Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

# San Juan

## Bönni' na' nazí' lè' Didza' gúlajè' bönachi

**1** Cate' gusí lo, zí'atèlò cate' sí' gata' yödžölió, ní' zoa cazè' Bönni' lè' Didza', ate' Bönni' na' náquiè' Didza' zóalenè' Dios, ate' Didza' na' naca caz Dios. **2** Bönni' na' náquiè' Didza' zóalenè' Dios cate' ní' gusí lo sí' rata' yödžölió. **3** Lu nè'è Bönni' ni, Dios benè' yúgu'tè le dè, en bití' bi dè le nunè' Dios le cabí benè' lu nè'è Bönni' na'. **4** Dè caz queè' yöl-la' na'bán, ate' yöl-la' na'bán na' naca ca tu bení' le ruzení' lu icja ládxí'do'gaca bönachi. **5** Ruzení' bení' na' ga naca chul-la que dul-la', pero bití' ca' sequí' le chul-la na' usulu bení' na'.

**6** Dios gusól-lè'è ni tu bönni' lè' Juan. **7** Bidè' bönni' ni para gáquiè' nu gun ba nalí. Bidè' para gunè' ba nalí queè' Bönni' na' náquiè' bení', para tséjlè'gaca yúgu'tè bönachi Dios ní'a que lè na' runè' ba nalí. **8** Biti' náquiè' Juan bení' na', pero bidè' para gunè' ba nalí queè' Bönni' na' náquiè' bení'. **9** Bönni' na' náquiè' bení' le naca idú ní' raziè' yödžölió ni, ate' ruzení'è lu icja ládxí'do'gaca yúgu'tè bönachi.

**10** Bönni' na' náquiè' bení' bidxinè' yödžölió ni, ate' lu nè'è Lè' Dios benè' yödžölió ni, pero bönachi yödžölió bití' bulu'únbè'è Lè'. **11** Bidxinè' ga nequi queè', pero bití' ca' gula'zí' lu ná'agaquiè' Lè' bönni' nabábalenè'.

**12** Yúgu'tè bönni' gula'zí' lu ná'agaquiè' Lè', bönni' ní' gula'yéajlè'è Jesús, Lè' benè' ga dè lu ná'agaquiè' ilaca-gaquiè' xzí'inè' Dios. **13** Bönni' ni ná'agaquiè' xzí'inè' Dios, calèga tu' ná'agaquiè' xzí'inè' nu bönni', en calèga tu' ná'ajgaquiè' ní'a que le rizé ládxè'è nu bönni', o ní'a que tu le ré'nè'è nu bönni', pero ná'agaquiè' caní tu' naca le ré'èni quezínè' Dios.

**14** Bönni' na' náquiè' Didza' guljè' bönachi, en tu chí'isò guzóalenè' rè'u, idú dzágagaca Lè' le ruzá ládxè'è Dios queéru', en le naca idútè li. Bil'etu' yöl-la' zxön queè', ate' yöl-la' zxön queè' na' naca le ruí' queébi' bí'í la's dui que, Nu na' naca Xúzibi'. **15** Juan na' benè' ba nalí queè' Bönni' na', en bè'è zidzaj didza', rnè':

—Bönni' ni náquiè' Nu na' gudíxjò'a que, gunní'a: Bönni' sí' zátèlè' ca neda' nayépisètèrè' ca neda', tu' zoa cazè' Lè' zí'alò ca neda'.

**16** Le naca idú queè' buzí'iru' xibé yúgu'tèru', lè na' buzá ládxè'è queéru' Dios, en zíanrò ca' le ruzá ládxè'è queéru'. **17** Bidxín queéru' xibá queè' Dios lu nè'è Moisés, pero le ruzá ládxè'è queéru' Dios, en le naca idútè li bila'dxín queéru' lu nè'è Jesucristo. **18** Catu caz nu bilé'e Dios, pero Lè', la's dui Xzí'inè' Dios, Bönni' na'

nadxí'ide'enè' Dios Xuz, Bönni' ni na' benè' ga nún-bè'èru'-nè' Dios.

## Le benè' ba nalí Juan, bönni' buquilè' bönachi nisa, ca náquiè' Jesús

(Mt. 3:1-12; Mr. 1:7-8; Lc. 3:1-17)

**19** Lè ni naca le benè' ba nalí Juan, cate' ní' bönni' judío unná bè' nacué' Jerusalén gula'sól-lè'è yugu' bixúz, en bönni' nabábagaquiè' Leví, nupa ni ná'cagaca ní'a ná'agaquiè' bixúz, para ila'nábinè' Juan na', ila'nnè':

—¿Nuzxi bönni' lí'?

**20** Yálajdo' bè'è didza' Juan, en bití' gudá'baguiè', pero gudíxjò'è catèz naca, rnnè':

—Bití' naca' Cristo, Bönni' na' guzxí' lu nè'è Dios isól-lè'è queéru'.

**21** Ní'irò gula'nábinè' lè' leyúbölò, tè' lè':

—¿Nuzxi caz lí'? ¿Naru' nacué' lí' Elías, bönni' bè'è didza' uláz queè' Dios dza ní'tè?

Gunné' Juan:

—Bití' naca'.

Ní'irò tè' lè':

—¿Naru' nacué' lí' bönni' na' ral-la' guídè' gu'è didza' uláz queè' Dios?

Bubi'è didza' Juan, rnnè':

—Calèga neda'.

**22** Ní'irò tè' lè':

—¿Nuzxi caz nacué'? Gudíxjò'i' netu' para gaca usiyön-tu' nupa gula'sól-la' netu'. ¿Bizxi rnno' lí' nuzxi nacué'?

**23** Bubi'è didza' Juan, rè' légaquiè':

—Neda' naca' bönni' na', nazúaj lu guichi lá'ayi ca naca queè', rnna: Riyón chí'í nu rulidza lu lataj cá'asò, rnna: Buli'béaj li nòza para idxín Xanru' queé'li'. Caní gunné' Isafías, bönni' na' bè'è didza' uláz queè' Dios.

**24** Yugu' bönni' ni ná'agaquiè' bönni' yudo' fariseo nasól-la'gaquiè' bönni' judío unná bè'. **25** Gula'nábinè' Juan, tè' lè':

—¿Bizx que ruquilu' bönachi nisa channò cabí nacué' lí' Cristo, en bití' nacué' Elías, en calèga bönni' na' ral-la' guídè' gu'è didza' uláz queè' Dios?

**26** Bubi'è didza' Juan na', rè' légaquiè':

—Neda' ruquila' bönachi nisa lu nisa, pero gatsaj láhui'lò ga zóalí' zoè' tu bönni' bití' núnbè'èli'-nè'.

**27** Bönni' ni náquiè' Bönni' na' sí' zátèlè' ca neda', en nayépisètèrè' ca neda', ate' bití' naca' neda' lesaca' uleca' xiráchuè' nudé'è.

**28** Yúgu'tè lè ni guca lu xiyú yödžö Betábara, ga naca ia'tsólá'a yegu Jordán, zaca' ga rilén gubidza, ga ní' buquilè' Juan bönachi nisa.

Jesús náquië' ca bö'cu' zxíla'do' tutië'-ba' lahuë' Dios tu nözi dul-la'

<sup>29</sup> Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gátië' para ugúë' dul-la' nabága'gaca bönachi yödžölió. <sup>30</sup> Lë' náquië' bönni' na' gunniá' queë': "Si' zá'tëlë' ca neda' tu bönni', nayépisëtërë' ca neda', tu' zoa cazë' zí'alö ca neda'." <sup>31</sup> Neda' bití' bénbë'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

<sup>32</sup> Benë' ba nali Juan ca naca queë' Jesús, rnnë':

—Bilé'eda'-në' Dios Bö' Lá'ayi, bö'tjë' birúajë' yehua' yubá, gunë'ë ca riná'aba' gu'dödo', ate' bidxinë' ga zoë' Jesús, en bugá'analenë' Lë'. <sup>33</sup> Bití' bénbe'eda' Lë' zí'alö. Gudxi neda' Nu na' gusól-la' neda' para uquila' bönachi nisa, gunné': "Cate' ilé'enu'-në' huötjë' Dios Bö' Lá'ayi, tsöjsóalenë' Bönni' na', en ugá'analenë' Lë', Bönni' ni gunë' le rulu'isö yöl-la' ridila nisa ni, uchzië' bönachi Dios Bö' Lá'ayi." <sup>34</sup> Na'a, chibilé'eda' lë na', en runa' ba nali queë' Bönni' ni, náquië' Zxí'inë' Dios.

**Yugu' bönni' usëda zí'alö queë' Jesús**

<sup>35</sup> Ia'tú dza ca', leyúbölö zoë' Juan ni', ate' nacua'lenë' lë' chopë' bönni' dá'gaquië' lë'. <sup>36</sup> Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

<sup>37</sup> Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. <sup>38</sup> Ní'irö buécjë' Jesús, en buyüë' chopë' ni söjnógaquië' Lë', ate' rë' lé-gaquië':

—¿Bizxi riguíjali'?

Të' Lë':

—Bönni' Usedi, ¿gazxi zu'?

<sup>39</sup> Bubi'ë didza' Jesús, rë' légaquië':

—Gulí'dá, uyulí'.

Ní'irö yöjácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la.

<sup>40</sup> Andrés, bóchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. <sup>41</sup> Andrés na', zí'alö yöjdiljë' bönni' bóchë'ë, lë' Simón, ate' rë' lë':

—Chibidžólitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

<sup>42</sup> Ní'irö Andrés na' la' guchëtë' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guió'j.

**Jesús rulidzë' Felipe, en Natanael**

<sup>43</sup> Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

<sup>44</sup> Náquië' Felipe bönni' yödžö Betsaida, le naca ládzagaquië' Andrés, en Pedro. <sup>45</sup> Felipe budžólinë' Natanael, en rë' lë':

—Chibidžólitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödžö Nazaret.

<sup>46</sup> Natanael rë' lë':

—¿Naru' huala'tsö Nazaret tu le naca dxí'a?

Felipe rë' lë':

—Gudá uyú'.

<sup>47</sup> Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

<sup>48</sup> Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe lí', cate' ni' zu' zcan yaga higo, bilé'eda' lí'.

<sup>49</sup> Ní'irö bubi'ë didza' Natanael, rë' Lë':

—Bönni' Usedi, Li' nacu' Zxí'inë' Dios. Lí' nacu' Nu in-ná be'e bönachi Israel.

<sup>50</sup> Bubi'ë didza' Jesús, rë' lë':

—¿Réajlë'tso' tu' gudxa' lí' bilé'eda' lí' zcan yaga higo? Yugu' le zxóntërö ca lë ni hualé'enu'.

<sup>51</sup> Lësca' caní' rë' Jesús légaquië', rnnë':

—Le nácatë rea' libí'ili', ilé'eli' nayalaj lúxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

**Laní que yöl-la' rutsaga na' le guca lu yödžö Caná**

**2** Cate' chiguca tsonna dza, guca laní que yöl-la' rutsaga na' lu yödžö Caná luyú Galilea, ate' zóanu xinë'ë Jesús ni'. <sup>2</sup> Lësca' zoa nu bulidza Jesús, en yugu' bönni' usëda queë' dijáquië' laní na'. <sup>3</sup> Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:

—Bití'rö dë xisi uva ilé'ajë'.

<sup>4</sup> Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda' Bití' ca' ridxini dza ulu'a lahui yöl-la' huáca quia'.

<sup>5</sup> Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Gulí'gún yúgu'të le guië' libí'ili'.

<sup>6</sup> Nacuá' ni' xopa yusu' guió'j tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopa tsonna rö'ö nisa tu tu yusu' na'. <sup>7</sup> Jesús gudxë' yugu' bönni' huen dxin na', rnnë':

—Bulí'li' yugu' yusu' ni nisa.

Bulu'lí'ë yugu' yusu' na' nisa. <sup>8</sup> Ní'irö Jesús rë' lé-gaquië':

—Gulí'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. <sup>9</sup> Buyüë' bönni' na' zoë' ra' yusu' channö nazxí'i nisa na' nuhuöáca xisi uva, pero bití' réquibe'enë' gazxi za'. Nóziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, <sup>10</sup> en rë' lë':

—Zí'alö tu'nödzejé' yúgu'té bönní' xisi uva nácarö sizxí'i, en cate' chigulé'ajé' yenni', ní'irö tu'nödzejé' le cabí nazxí'i. Lí, ga bidxinté na'a ben chí'u xisi uva nácarö sizxí'i.

<sup>11</sup> Yöl-la' huáca naca bé' ni bené' Jesús lu yödzo Caná luyú Galilea naca le risí lo yugu' yöl-la' huáca guné'. Caní guca, bulu'e lahui yöl-la' zxon queé', ate' gula'yéajlé' Lè' bönní' uséda queé'.

<sup>12</sup> Gudödi na' guyijé' Jesús yödzo Capernaum, ate' dzágagaquié' xiné'ë, en yugu' bönní' bóché'ë, en yugu' bönní' uséda queé' Lè', ate' zían dza gula'cu'ë Capernaum na'.

**Rulatjé' Jesús lö'a yudo', rubéajé' nupa tun le cabí ral-la' ilún ní'**

(Mt. 21:12-13; Mr. 11:15-18; Lc. 19:45-46)

<sup>13</sup> Cate' chizóa idxín Laní Pascua cate' tu'subané' bönní' judío ca bené' Dios, ca na' bubéajé' xuz xtó'ogaquié' luyú Egipto, guyijé' Jesús yödzo Jerusalén. <sup>14</sup> Lu yödzo na' yójxáquié' Jesús nacu'ë bönní' lö'a yudo' ga na' tútí'ë-ba' yugu' bédxi, en yugu' bö'cu' zxila', en yugu' gu'dödo', böa' bédxi na' tútigaquié'-ba' lahué' Dios. Ró'ogaquié' ca' ní' bönní' tu'tsé'ë dumí za' idúté yödzülió. <sup>15</sup> Cate' bilé'ené' Jesús lè ni, buzalé' yugu' du lasi le quindé' bönachi na', ate' buláguí'ë yúgu'té' ní'ilö lö'a yudo', en buláguí'ë-ba' ca' ní'ilö yugu' bö'cu' zxila', en yugu' bédxi. Bésié' dumí quégaquié' bönní' na' tu'tsé'ë dumí lu yu, en burixé' yugu' blaga quégaquié'.

<sup>16</sup> Ní'irö Jesús gudxé' bönní' na' tútí'ë-ba' yugu' gu'dödo', rnné':

—Gulí'cúa yugu' lè ni. Bití' únili' lidxé' Xuza' tu yé'eyi.

<sup>17</sup> Ní'irö yójnéguequiné' bönní' uséda queé' Jesús le nazúaj lu guichi lá'ayi, rna: Tu' ruí'ida' ládxa'a lidxu', régui rilá ládxi'da'ahua'.

<sup>18</sup> Ní'irö bulu'bí'ë didza' bönní' judío unná bé' nacu'ë ní', tē' Jesús:

—¿Bizxi yöl-la' huáca uluí'inu' netu' le gaca bé' dē lu no'o runu' yugu' lè ni?

<sup>19</sup> Bubi'ë didza' Jesús, rē' légaquié':

—Gulí'quinnaj yudo' ni, ate' tsonna dzasö uchisa' le.

<sup>20</sup> Ní'irö tē' Lè' bönní' judío, ta'nné':

—Idú xopa-un iz guyá' yudo' ni, ate' Lí, ¿tsonna dzasö uchísatso' le?

<sup>21</sup> Yudo' na' bé'ë didza' que Jesús naca la' cuin cazé'.

<sup>22</sup> Que lè ni na', cate' bubané' Jesús lu yöl-la' guti, yójnéguequiné' bönní' uséda queé' Jesús ca na' gunné', ate' gula'yéajlé' le nazúaj lu guichi lá'ayi, enca' yugu' didza' bé'ë Jesús.

**Jesús núnbē'ë yúgu'té bönachi**

<sup>23</sup> Cate' ní' zoé' Jesús Jerusalén, cate' raca Laní Pascua na', gula'yéajlé' bönachi zían Lè', tu' bila'lé'ené' yugu' yöl-la' huáca runé'. <sup>24</sup> Bití' buzxöni ládxi'ë Jesús légaquié', tu' nunbē' cazé' yúgu'té bönachi. <sup>25</sup> Bití' naquinné' Jesús nu quíxjöi'í Lè' ca nácagaca bönachi, tu' nöz quéziné' Lè' le yu'u icja ládxi'do'gaca bönachi.

**Jesús, en Nicodemo**

**3** Nicodemo, tu bönní' yudo' fariseo, nabábalené' yugu' bönní' judío unná bé'. <sup>2</sup> Bidé' bönní' ni ga zoé' Jesús chí'i dzó'ölö, en rē' Lè':

—Bönní' Usedi. Réquibe'etu' nasól-lé'ë Dios Lí para usédinu' netu'. Bití' séqui'né' tu bönní' guné' yugu' yöl-la' huáca nácagaca bé' ca nácagaca le caní runu' Lí channö cabí zóalené' Dios lè'.

<sup>3</sup> Bubi'ë didza' Jesús, rē' lè':

—Le nácaté rea' lí, nu cabí galaj leyúbölö, bití' ca' ilé'e lataj ga ní' rinná bé'ë Dios.

<sup>4</sup> Nicodemo gunábiné' Lè', rnné':

—¿Nacxi caz séqui'né' tu bönní' galjé' leyúbölö cate' chináquié' bönní' gula? ¿Naru' huácatsö tsu'ë leyúbölö lé'ënu xiné'ë, ate' galjé' ia'tú?

<sup>5</sup> Bubi'ë didza' Jesús, rē' lè':

—Le nácaté rea' lí. Nu bönní' cabí galjé' ní'a que nisa, en ní'a queé' Dios Bö' Lá'ayi, bití' gaca tsázié' ga rinná bé'ë Dios. <sup>6</sup> Nu na' nalaj lu ní'a lu na' bönachi, bönáchisö naca, pero nu nalaj ní'a queé' Dios Bö' Lá'ayi, Bö' Lá'ayi nabani nu na'. <sup>7</sup> Bití' ubánu' tu' rea' lí, run bayudxi galju' leyúbölö. <sup>8</sup> Gátit'ës recja bö', ate' riyönnu' rnné' bö' na', pero bití' nózinu' gazxi za', o gazxi zeaj. Lësca' caní raca quégaca nupa náljagaca ní'a queé' Dios Bö' Lá'ayi.

<sup>9</sup> Ní'irö Nicodemo gunábiné' Jesús, rnné':

—¿Nacxi caz gaca lè ni?

<sup>10</sup> Bubi'ë didza' Jesús, rē' lè':

—¿Ruséditsenu' lí' bönachi Israel, en bití' nózinu' yugu' lè ni? <sup>11</sup> Le nácaté rea' lí, le nöztu' ruí'itu' didza' que, en le bilé'etu' runtu' ba nalí que, pero bití' rizí' lu ná'alí lè na' runtu' ba nalí. <sup>12</sup> Channö cabí réajlé'ëlí' neda' cate' ruí'ilena' libí'ilí' didza' ca naca le raca yödzülió ni, ¿nacxi caz gaca tséajlé'ëlí' channö guía' libí'ilí' le raca yehua' yubá?

<sup>13</sup> 'Catu caz gurené' nu bönní' yehua' yubá, pero tuza' neda', Bönní' Guljé' Bönachi, bötja' birúaja' yehua' yubá, ate' zoa caza' ní' yehua' yubá. <sup>14</sup> Ca na' bené' Moisés lu lataj cá'asö, buchisé'-ba' bëla néquiniba' guíé, budé'ë-ba' lè'e yaga, lësca' caní run bayudxi gaca quia' neda', Bönní' Guljé' Bönachi, ulu'chisé' neda' xit-sá'. <sup>15</sup> Caní gaca quia', para cabí ila'niti yúgu'té nupa ila'yéajlé' neda', pero gata' quéguequi yöl-la' na'bán idú.

**Dios nadxí'ide'ené' bönachi yödzülió**

<sup>16</sup> Tu' bidxí'ide'ené' Dios bönachi yödzülió, buzá' ládxi'ë quéguequi Zxí'iné' la' buduiné', para cabí ila'niti yúgu'té nupa ila'yéajlé' Lè', pero gata' yöl-la' na'bán idú quéguequi. <sup>17</sup> Dios gusól-lé'ë Zxí'iné' yödzülió ni, caléga para ichúguié' quégaca bönachi yödzülió ni gátigaca, pero para ulu'lágaca bönachi yödzülió ni ní'a queé' Lè'.

<sup>18</sup> Nu bönní' réajlé'ë Zxí'iné' Dios, bití' ca' narugu queé' iní'tié', pero bönní' na' bití' réajlé'ë Lè', chinarugu queé' gátíé', tu' cabí réajlé'ë Zxí'iné' Dios la' buduiné'.

<sup>19</sup> Que lè ni na' chinarugu quégaca bönachi gátigaca,

tu' bidxinë' Bönni' na' náquië' bení' yödžolió ni, pero gulunrö zxon bönachi ni le naca chul-la que dul-la' ca gulunë' zxon Bönni' na' náquië' bení', tu' nacagaca xihui' le tunë'. <sup>20</sup> Yúgu'të bönni' tu'ë dö' bití' raza ládxi'gaquië' bení', en bití' rídigaquië' lu bení', para cabí ilá' lahui le tunë'. <sup>21</sup> Nu run le naca idútë li ridxin lu bení' para gaca bë' núngaca ní'a queë' Dios le run nu na'.

**Juan, bönni' ruquilë' bönachi nisa, ru'ë didza' ca naca queë' Jesús**

<sup>22</sup> Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ní', ga na' tu'quilë' bönachi nisa. <sup>23</sup> Lësca' ruquilë' Juan bönachi nisa ga nazí'i le Enón, gala' ga dë yödžö Salim, tu' dë nisa zila lataj na', ate' ta'dxin bönachi ní', en ta'dila nisa. <sup>24</sup> Raca caní zí'atëlö cate' bití' idzunë' Juan na' lidxi guë.

<sup>25</sup> Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. <sup>26</sup> Bila'dxinë' ga zoë' Juan, en tē' lē':

—Bönni' usedi. Buyútsöca'. Bönni' na' guzóalenë' lí' ia'tsölá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxin yúgu'të bönachi ga zoë'.

<sup>27</sup> Ní'irö bubi'ë didza' Juan, rē' légaquië':

—Bití' bi dë lu nē'ë nu bönni', channö cabí nudödë' Dios le lu nē'ë. <sup>28</sup> Biyón quézilí' lë na' bena' ba nalí, gunná'a: "Bití' naca' neda' Cristo", pero Dios nasól-lë'ë neda' para guía' bönachi sí' zē'ë Lë'. <sup>29</sup> Bönni' na' rizi'ë-bí' bi'i nigula rutsaga ná'abi' náquië' bönni' rutsaga nē'ë, pero böchi' luzé'ë bönni' rutsaga nē'ë, en dzáguie' lë', ruzé náguie' didza' ru'ë, en rudzéjanë' tu' riyönnë' didza' ru'ë bönni' rutsaga nē'ë. Lësca' caní, rudzéjade'eda' neda' tu' raca lë ni caní. <sup>30</sup> Run bayudxi gácarë' zxon Cristo, pero neda', run bayudxi gácara' cuídí'sö.

**Nu za' zaca' yehua' yubálö**

<sup>31</sup> Gunnë' ca' Juan:

—Bönni' na' zē'ë zaca' xitsá'alö nayépisëtërë' ca yúgu'të bönachi. Nu bönni' náquië' bönachi yödžolió ni, que yödžolió ni náquië', en ru'ë didza' que le raca yödžolió ni, pero Bönni' na' zē'ë zaca' yehua' yubálö nácatërë' lo ca yúgu'të bönachi. <sup>32</sup> Bönni' na' runë' ba nalí que le bilé'enë', en le biyönnë', pero cuntú nu rizi' lu nē'ë le runë' ba nalí. <sup>33</sup> Núti'tës bönni' rizi' lu nē'ë lë na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios. <sup>34</sup> Bönni' na' nasól-lë'ë Dios, didza' queë' Dios ru'ë, tu' nuzóadërë' Dios Bö' Lá'ayi queë' lu Bönni' na'. <sup>35</sup> Dios Xuz nadxí'inë' Zxí'inë', ate' yúgu'të le dë chinudödë' lu nē'ë Zxí'inë' na'. <sup>36</sup> Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' bití' réajlë'ë Dios Zxí'ini, bití' idélí'në' yöl-la' na'bán na', pero nabáguë'ë xíguia' lahuë' Dios.

**Jesús ru'ilenë'-nu didza' tu nigula Samaria**

<sup>4</sup> Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan. <sup>2</sup> Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa. <sup>3</sup> Cate' gúquibe'enë' Jesús lë ni, buzé'ë luyú Judea, ate' sa'yéajë' leyúbölö luyú Galilea.

<sup>4</sup> Ga ní' sa'yéajë', run bayudxi tödë' luyú Samaria.

<sup>5</sup> Caní guca, bidxinë' Jesús tu yödžödö' luyú Samaria, nazí'i le Sicar, gala' ga dë yu na' bunödzjé' Jacob queëbi' José, zxí'inë' Jacob na', dza ní'te. <sup>6</sup> Lataj na' zoa tu yeru nisa nachó'önë' Jacobo na' ga rë'. Cate' bidxinë' Jesús ní', gurö'ë ra' yeru nisa na' tu' yöjxéqui'në' yu'ë nöza. Guca idú huagubidza. <sup>7</sup> Ní'irö bidxinnu tu nigula Samaria ní' para sí'nu nisa. Jesús rē'ë-nu:

—Benna le guí'ja'.

<sup>8</sup> Tuzé' zoë' Jesús tu' chisöjáquië' bönni' usëda queë' lu yödžö söjxí'gaquië' le ilahuë'. <sup>9</sup> Ní'irö nigula Samaria na' rënu Jesús, rnnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxí'a bönachi Samaria len bönachi judío.

<sup>10</sup> Bubi'ë didza' Jesús, rē'ë-nu:

—La'tu' núnbë'u le runödzjé' Dios, en Nuzxi na' rë lí': "Benna le guí'ja'", lí' inabu', ate' Lë' gunné' quiu' nisa runna yöl-la' na'bán.

<sup>11</sup> Ní'irö nigula na' rënu Lë', rnnanu:

—Bönni', bití' nu'u le cuéaju' nisa, ate' yeru nisa ni, dxí'tërö rō'. ¿Gazxi dë nisa na' runna yöl-la' na'bán?

<sup>12</sup> ¿Naru' nácatërötso' Lí' zxon ca xúziru' gudödi Jacob, bönni' ní' bennë' queëtu' yeru nisa ni, ga ni guzxi'ë nisa gu'ë, en gulé'ajbí' ca' zxí'inë', en gulé'ajba' ca' böa' bëdxi queë'?

<sup>13</sup> Bubi'ë didza' Jesús, rē'ë-nu:

—Núti'tës nu guí'aj nisa ni, leyúbölö ubidxi nisa, <sup>14</sup> pero nu guí'aj nisa na' unödzja' neda', bítí'rö ubidxi icja ládxi'da'ahuë', tu' unödzja' queë' nisa na' gaca lu icja ládxi'da'ahuë' ca tu ga ralaj nisa, le gü'i yöl-la' na'bán idú queë'.

<sup>15</sup> Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

<sup>16</sup> Jesús rē'ë-nu:

—Guyéaj, yöjlidzé' bönni' quiu', ate' huödu' ni.

<sup>17</sup> Bubi'ínu didza' nigula na', rënu Lë':

—Cuntu nu zoa bönni' quia'.

Ní'irö Jesús rē'ë-nu:

—Ca nácatë rño': "Cuntu nu zoa bönni' quia'", <sup>18</sup> tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rño'.

<sup>19</sup> Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. <sup>20</sup> Xuz xtó'oru' guléquinë' Dios le bach lu

guí'a ni, pero rnnalí' libí'ili' Jerusalén naca ga ral-la' ile-qui bönachi Dios le bach.

<sup>21</sup> Jesús rë'ë-nu:

—Nigula, guyéajlë' neda'. Za' dza cate' tseaj lãdxi'li'-në' Dios Xuz sal-la' bití' idisóali' guí'ado' ni, en bití' tsöjsóali' Jerusalén. <sup>22</sup> Libí'ili' reaj lãdxi'li' Nu bití' nún-bë'ëli', pero netu' núnbë'ëtu' Nu na' reaj lãdxi'tu', tu' benë' queë' Dios ilá' lahui yöl-la' rusólá' n'á' quegaquië' bönni' judío. <sup>23</sup> Na'a, za' dza, en chiridxin dza na', cate' nupa le nácatë ta'yéaj lãdxi'gaca Dios, ila'yéaj lãdxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilãcagaquië' queë' bönni' ila'yéaj lãdxi'gaquië' Lë' caní. <sup>24</sup> Dios náquië' Bö', ate' nupa ta'yéaj lãdxi'gaca Lë', run bayudxi ila'yéaj lãdxi'gaca Lë', zóalenë' Dios Bö' Lá'ayi léguequi, en le naca idútë li.

<sup>25</sup> Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

<sup>26</sup> Jesús rë'ë-nu:

—Lë' cazë' ruí'ilenë' li' didza'.

<sup>27</sup> La' ná'asö bulu'dxinë' bönni' usëda queë' Jesús, ate' bulu'báinë' tu' ruí'ilenë'-nu nigula didza', pero bití' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenë'-nu?" <sup>28</sup> Ní'irö nigula na' bucá'ananu xichö'önu ní', ate' bóajnu la' yödzo, söjódxinu nupa nacué' ní', rnnanu:

<sup>29</sup> —¡Gulí'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

<sup>30</sup> Ní'irö bila'rúaj bönachi yödzo na', en bila'dxin ga zoë' Jesús.

<sup>31</sup> Tsanni ní' söhuóajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

<sup>32</sup> Jesús rë' légaquië':

—Dë tu le rahua', le cabí réquibe'eli'.

<sup>33</sup> Ní'irö gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

<sup>34</sup> Ní'irö Jesús rë' légaquië':

—Le nabánida' naca guna' ca rë'ënë' Xuzá' nasól-lë'ë neda', en údxi guna' xichinë'. <sup>35</sup> Caní rnnalí' libí'ili': "Ia'-tapa beo' huadxin dza uláparu'." Neda' rea' libí'ili':

Gulí'chisa lolí' uyulí' bönachi nácatë ca gapa nadúz-gaca, le chinábídxigaca para tsöjláparu'. <sup>36</sup> Bönni' na' rulapë' rizi'ë lazxië', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxón nu raza, en nu rulapa. <sup>37</sup> Naca idútë li lë na' rna caní: Tu nu raza, ate' ia'tú nu rulapa. <sup>38</sup> Neda' gusól-la'a libí'ili' tsöjlápalí' ga bití' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquië'.

<sup>39</sup> Zían bönachi Samaria nacué' yödzo Sicar na' gula'yéajlë'ë Jesús n'á' que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'." <sup>40</sup> Cate' bila'dxinë' bönni' Samaria ga ní' zoë' Jesús, guláta'yue' lahuë' ugá'analënë' légaquië'. Jesús bugá'anë' ní' ia'chopa dza. <sup>41</sup> Caní guca, ziantërë' ca'

bönni' ní' gula'yéajlë'ë Jesús n'á' que didza' bë'ë.

<sup>42</sup> Ní'irö bönni' ní' gulé'-nu nigula na', ta'nnë':

—Na'a réajlë'ëtu' Lë', calégasö n'á' que didza' bë'u li', pero lëasca' tu' biyónitu' netu' Lë', en nöztu' le nácatë bönni' ni náquië' Cristo, Nu rusólá bönachi yödzo'lió.

### Ruúnë' Jesús zxi'finë' tuë' bönni' dë lu në'ë

<sup>43</sup> Ia'chopa dza ca', buzë'ë Jesús luyú Samaria, en sa'yéajë' luyú Galilea. <sup>44</sup> Caní benë', tu' gudíxjö'ë Lë' cazë' Jesús, gunné': "Bönachi uládz queë' nu bönni' ru'ë didza' uláz queë' Dios bití' tun lë' bal." <sup>45</sup> Cate' bidxinë' Jesús luyú Galilea, gulunë' bönni' Galilea na' Lë' bal tu' yójáquië' ca' Jerusalén cate' guca Laní Pascua, en bila'lé'enë' le benë' Jesús ní'.

<sup>46</sup> Ní'irö bóajë' Jesús yödzo Caná luyú Galilea, ga ní' benë' ga böaca nisa xisi uva. Lu yödzo Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bí'i bönni' queë' bönni' na' dë lu në'ë. <sup>47</sup> Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yue' lahuë' guídë' lidxë', para uduhuënë'-bí' bí'i bönni' queë' na', tu' chirequi gátibi'. <sup>48</sup> Ní'irö Jesús rë' lë':

—Bití' ca' tséajlë'ëli' channö cabí ilé'eli' le nácatë bë', en yugu' yöl-la' huaca guna'.

<sup>49</sup> Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudíatë para cabí gátibi' bí'i quia'.

<sup>50</sup> Ní'irö Jesús rë' lë':

—Böaj lidxu'. Nabanbí' bí'i quiu'.

Bönni' ni guyéajlë'ë didza' bë'ë Jesús, ate' söhuójë'.

<sup>51</sup> Tsanni ní' yu'ë nöza söhuójë', duzxi'gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbí' bí'i quiu'.

<sup>52</sup> Gunábinë' légaquië' bátaxi gusí lo ruhuóaca lãdxi'bi'. Të' lë':

—Ba'ayi, idú huagubidza, burúaj xilá yú'ubi'.

<sup>53</sup> Ní'irö gúquibe'enë' xúzibi' bí'i na', böácabi' cate' ní' bé'lenë' Jesús lë' didza', en gudxë' lë': "Nabanbí' bí'i quiu'." Que lë ni na' guyéajlë'ë Jesús, ate' gula'yéajlë' ca' Lë' bönachi nacué' lidxë'.

<sup>54</sup> Yöl-la' huaca ni naca le buropi benë' Jesús cate' ní' zoë' luyú Galilea, gudödi buzë'ë luyú Judea.

### Ruúnë' Jesús tu bönni' nacú'unië' bin ga nazí'i le Betesda

**5** Gudödi guca lë ni, guca laní quégaquië' bönni' judío, ate' guyijë' Jesús Jerusalén. <sup>2</sup> Lu yödzo na', gala' ga tu'ú'uba' bö'cu' zxi'la', dë tu le zxon yudzu nisa, nazí'i le Betesda lu didza' hebreo, en nacué' gayu' chila don que. <sup>3</sup> Yugu' lu chila na' dégaquië' zían bönni' té'enë', bönni' nachul-la lógaquië', en bönni' bití' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. <sup>4</sup> Caní raca, tu' ruhuötjë' tu gubáz lá'ayi queë' Dios tu chí'i huéaj, en röjtsu'ë lu nisa na', en ruté' nisa na'. Huóacatë' nu bönni' tsöjtsú'utië' lu nisa na' cate' rutá cuini ca naca bití'tës yödzo'hué' raca queë'. <sup>5</sup> Zoë' tu bönni' ní', chiguca chixxunu' uruá' iz

ré'enë'. <sup>6</sup> Cate' bil'é'enë' Jesús dë' bönni' huë' na' ni', réquibe'enë' chiguca zián iz ré'enë', ate' gunábinë' lë', rnnë':

—¿Ba ré'ënu' huóácu'?

<sup>7</sup> Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

<sup>8</sup> Jesús rë' lë':

—Guyaschi. Buá' le denu', en guzë'e.

<sup>9</sup> La' böacatë' bönni' na', ate' bu'ë le gúti'në', en guzë'e. Dza na' raca caní naca dza lá'ayi quégaquië' bönni' judío. <sup>10</sup> Ní'irö bönni' judío unná bë' gulé' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

<sup>11</sup> Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': "Buá' le denu', en guzë'e." Bönni' na' bunë' neda'.

<sup>12</sup> Ní'irö gula'nábinë' lë', ta'nnë':

—¿Nuzxi na' gudxi caní lí: "Buá' le denu', en guzë'e"?

<sup>13</sup> Biti' nózinë' bönni' na' nuhuóáquië' nuzxi na', tu' chibuzë'ë Jesús lataj ní' tu' nacua' bönachi zián ní'.

<sup>14</sup> Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Biti'rö gunu' dul-la', para cabí gaca quiu' tu le nácarö zí' ca lë na' guca quiu'.

<sup>15</sup> Guyijë' bönni' na', yöjtixjöi'në' yugu' bönni' judío unná bë' Jesús na' bunë' lë'. <sup>16</sup> Que lë ni na' bönni' judío unná bë' gula'bía ládxí'gaquië' Jesús, en gulé'ënnë' ilútië' Lë', tu' runë' yugu' lë ni cate' naca dza lá'ayi quégaquië'. <sup>17</sup> Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

<sup>18</sup> Que lë ni na' gulé'ënrönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

### Yöl-la' unná bë' dë lu në'ë Zxí'inë' Dios

<sup>19</sup> Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'. <sup>20</sup> Dios Xuz nadxí'inë' neda', Zxí'inë', en rulu'í'inë' neda' yúgu'të le runë', ate' yugu' le zxóntëro ca lë ni ulu'í'inë' neda', le ilún ga ubánili' libí'ili'. <sup>21</sup> Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca ré'ëni quézida'. <sup>22</sup> Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöró'a bönachi. <sup>23</sup> Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasól-lë'ë neda', Zxí'inë' na'.

<sup>24</sup> Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasól-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú

queë'. <sup>25</sup> Le nácatë rea' libí'ili', za' dza, en chiridxín dza na', cate' ila'yöni nupa chinátigaca chi'a neda', Zxí'inë' Dios, ate' nupa ila'yöni xtídza'a, en ilún ca rnna, huóá-ta' yöl-la' na'bán quéguequi. <sup>26</sup> Ca na' dë lu në'ë Dios Xuz unödzejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödza' yöl-la' na'bán quégaca bönachi. <sup>27</sup> Lësca' caní budödë' lu na'a yöl-la' unná bë' uchi'a usöró'a bönachi, tu' naca' Bönni' Guljë' Bönachi. <sup>28</sup> Biti' ubánili' ca naca lë ni, tu' huadxín dza cate' yúgu'të nupa chinátigaca ila'yöni chi'a, <sup>29</sup> en ulu'rúaj yeru ba. Ulu'bán nupa na' gulún le naca tsahuí', en huóáta' yöl-la' na'bán quéguequi, pero nupa na' gulún le bití' naca tsahuí', ulu'bán, ate' irugu quéguequi ilátigaca tsaz.

### Le naca bë' le náquië' Jesús

<sup>30</sup> Gunné' ca' Jesús:

—Biti' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöró'a, ate' ca na' ruchi'a rusöró'a naca tsahuí', tu' cabí runa' ca ré'ënisida' neda', pero ca ré'ëni quézinë' Xuza' nasól-lë'ë neda', runa'. <sup>31</sup> Channö neda' runa' ba nalí que la' cuin caza', bití' naca lesaca' lë na' runa' ba nalí. <sup>32</sup> Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. <sup>33</sup> Libí'ili' gusól-la'li' bönni' yöjnábiguequinë' Juan, ate' lë na' benë' ba nalí quia' naca idútë li. <sup>34</sup> Neda' bití' naquinda' nu bönni' gunë' ba nalí quia', pero ruá'a didza' caní para uláli'. <sup>35</sup> Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu' chí'isö guyaza ládxí'li' uzí'ili' xibé bení' queë'. <sup>36</sup> Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácgaca bë' gusól-lë'ë Dios Xuz neda'. <sup>37</sup> Lësca' Dios Xuz nasól-lë'ë neda' runë' ba nalí quia'. Catu caz biyónili' chí'ë, en catu caz bilé'eli' lahuë', <sup>38</sup> en cabí nazí' lu ná'alí' xtídzë'ë, tu' cabí réajlë'ëli' neda', Nu na' gusól-lë'ë. <sup>39</sup> Rusédali' le nazúaj lu guichi lá'ayi, tu' réquili' huáta' yöl-la' na'bán idú queé'li' nía que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. <sup>40</sup> Bití' ré'ënilí' guídali' quia' neda' para gata' yöl-la' na'bán queé'li'.

<sup>41</sup> 'Biti' riguilja' yöl-la' ba le ila'gú'u bönachi neda'.

<sup>42</sup> Neda' núnbë'a libí'ili', en nözda' bití' nadxí'ili'-në' Dios.

<sup>43</sup> Bidxina' ni uláz queë' Dios Xuz, ate' libí'ili' bití' rizí' lu ná'alí' neda', pero channö huadxín nu yúbölö nu guídi rácasö que, sí' lu ná'alí' nu na'. <sup>44</sup> ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'alí' tuli' ia'tuli', en bití' riguiljalí' yöl-la' run zxön na' za' lu në'ë la's dui Dios? <sup>45</sup> Bití' uzó'a ícjalí' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë Moisés, bönni' na' ruzxöni ládxí'li'-në', sal-la' gútië' dza ní'te. <sup>46</sup> La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'.

<sup>47</sup> Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

### Rugahuë' Jesús zíanrö ca chi-un gayuá' bönachi

(Mt. 14:13-21; Mr. 6:30-44; Lc. 9:10-17)

**6** Gudödi guca lë ni, guyijë' Jesús ia'tsölá'a Nísado' Que Galilea, nazí' le ca' Nísado' Queë' Tiberias. <sup>2</sup> Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. <sup>3</sup> Ní'irö gurenë' Jesús, guyijë' ga naca tu lu gu'ado', ga ni' guró'ölenë' yugu' bönni' usëda queë'. <sup>4</sup> Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. <sup>5</sup> Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöj'ó'uru' yöta xtila le ilágugaca bönachi zían ni?

<sup>6</sup> Caní gunné' Jesús para sí' bë'ë Felipe na', tu' chinóz-inë' Lë' naca gunë'. <sup>7</sup> Bubi'ë didza' Felipe, rnnë':

—La'tu' sí'iru' yöta xtila len láxjaru' que idú xunu' beo', bití' guequi láti'do' huéaj le ilágugaca bönachi zían ni.

<sup>8</sup> Ní'irö tu bönni' usëda queë' Jesús, lë' Andrés, bóché'ë Simón Pedro, rë' Lë', rnnë':

<sup>9</sup> —Ni zóabi' tubí' bí'i bönni', nu'á'abi' gayu' yöta xtila néquiguequini xzoa' cebada, en chópaba' böla cuídido'. ¿Naru' huéqui'tse ugagu le do' ni cate' xö bönachi?

<sup>10</sup> Ní'irö Jesús rë' légaquië':

—Gulí'gún ga ila'bó' bönachi zían ni lu yu.

Lataj na', ró'oda' daca', ate' gula'bö'ë idú ca chi-un gayu'ë bönni' ni'. <sup>11</sup> Ní'irö gudélë'ë Jesús yugu' yöta xtila na'. Cate' chigudxë' Dios: "Xclenu'", gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' ró'gaca lu daca' ni'. Lësca' caní gulunë' quégacaba' böla cuídido' na', ate' gula'huë' tsca gulé'ënnë' ilahuë'. <sup>12</sup> Cate' chibulu'huó'ljanë', Jesús gudxë' yugu' bönni' usëda queë', gunné':

—Bulí'túbi le bizxaj nagá'anagaca, para cabí ilaca di-taj.

<sup>13</sup> Bulu'tubë' ca', ate' bulu'lí'ë' chinnu ga'bó'rado' yugu' le bizxaj quégaca gayu' yöta xtila néquiguequini xzoa' cebada na', le bulu'gá'ana quégaquië' bönni' na' gula'huë'. <sup>14</sup> Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödzülió ni.

<sup>15</sup> Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu gu'á.

### Rizë'e ni'ë Jesús lu nísado'

(Mt. 14:22-27; Mr. 6:45-52)

<sup>16</sup> Cate' chizá' ral-la, yöjáquië' bönni' usëda queë' Jesús, ate' bila'dxinë' ra' nísado'. <sup>17</sup> Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús bití' ridxíninë' ga na' nacu'ë. <sup>18</sup> Gusí lo recja bö' budunu' lu nísado' na', ate' riyasa ridxía nisa na'. <sup>19</sup> Cate' chibulu'sé'ë bárcodo' na', le guzá' le naca tsca rizá'aru' tu hórásö, ní'irö bila'lé'enë' Jesús rizë'e ni'ë lu nísado' na',

en zë'ë ribíguë'ë ga na' zeaj barco na', ate' guladxi gula'dzóbinë'. <sup>20</sup> Ní'irö Jesús rë' légaquië':

—Neda' caz ni. Bití' gádxilí'.

<sup>21</sup> Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' söjáquië'.

### Bönachi zían tu'guilaj Jesús

<sup>22</sup> Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús bití' gurénlenë' yugu' bönni' usëda queë' lë'e bárcodo' na', pero légacasë' na' yöjáquië'. <sup>23</sup> Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu'" que. <sup>24</sup> Tu' bila'lé'enë' bití'rö zoë' Jesús ni', en bití' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yöjáquië' Capernaum, tu'guiljë' Jesús.

### Náquië' Jesús yöta xtila nabánigaca tsaz bönachi

<sup>25</sup> Cate' bila'dxín bönachi zían na' ia'tsölá'a nísado' na', yöjxáca'gaquië' Jesús, en té' Lë':

—Bönni' Usedi, ¿bátaxi bidxinu' ni?

<sup>26</sup> Bubi'ë didza' Jesús, rë' légaquië':

—Le nácatë rea' libí'ili': Ruguílajlí' neda', calëga tu' bilé'elí' yugu' yöl-la' huáca bena', pero tu' gudáguli' yöta xtila ni', en bó'ljali'. <sup>27</sup> Gulí'gún dxin, calëga para sí'ilí' la' huagu ridödi que, pero para sí'ilí' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queé'li', tu' bulu'ë lahui Xuza' Dios naca' Zxí'inë'.

<sup>28</sup> Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxe'ë Dios?

<sup>29</sup> Bubi'ë didza' Jesús, rë' légaquië':

—Lë ni le raza ládxe'ë Dios, tséajlë'ëli' neda', naca' nu gusól-lë'ë Lë'.

<sup>30</sup> Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? <sup>31</sup> Gulahuë' xuz gudödi queëru' yöta xtila nazí' le maná lu lataj cá'asö, ca nazúaj lu guichi lá'ayi, rna: "Yöta xtila que yehua' yubá Moisés bë'ë quégaquië', gulahuë'."

<sup>32</sup> Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queé'li' yöta xtila que yehua' yubá, pero Xuza' Dios rnnë' queé'li' yöta xtila le naca idú que yehua' yubá. <sup>33</sup> Yöta xtila na' rnnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzölió ni.

<sup>34</sup> Ní'irö të' Lë':

—Xan, bénnatica'sö queé'tu' yöta xtila na'.

<sup>35</sup> Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huólaj udzë'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. <sup>36</sup> Naca ca na' chigudxi caza' libí'ili': "Sal-la' rilé'elí'



neda', bití' ca' réajlë'ëli' neda'." <sup>37</sup> Yúgu'të nupa na' runnë' Xuza' quia', ídigaca quia', ate' nupa na' zaca quia', bití' usá'gaca-në'. <sup>38</sup> Caní naca, tu' bötja' birúaja' yehua' yubá, calëga para guna' ca ré'ënda' neda' caz, pero para guna' ca ré'ëne' Dios Xuz, nasól-lë'ë neda'. <sup>39</sup> Lë ni le ré'ëne' Xuza' nasól-lë'ë neda', ré'ëne' cabí unítia' nitú nupa na' bennë' quia', pero usubana' léguequi dza údxí. <sup>40</sup> Lë ni le ré'ëne' Dios Xuz nasól-lë'ë neda', ré'ëne' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxí na'.

<sup>41</sup> Ní'irö gula'nnë' queë' Jesús bönni' judío unná bë' tu' gunné': "Neda' caz naca' yöta xtila na' bötaj, birúaj yehua' yubá." <sup>42</sup> Que lë ni na' ta'nnë':

—¿Naru' cabí bönni' ni Jesús, zxí'inë' José? Nunbë' cazaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

<sup>43</sup> Ní'irö bubi'ë didza' Jesús, rë' légaquië':

—Bití' innëli' quia' la' libí'ili'. <sup>44</sup> Bití' séqui'në' nitúë' bönni' guídë' quia' channö cabí idigu'ë quia' Xuza' nasól-lë'ë neda' nu na', ate' neda' usubana' nu na' dza údxí. <sup>45</sup> Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chí'ë Xuza', en nazédagaquië' lu në'ë Lë' zá'gaquië' quia'.

<sup>46</sup> Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. <sup>47</sup> Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. <sup>48</sup> Neda' caz naca' yöta xtila nabánigaca tsaz bönachi. <sup>49</sup> Gulahuë' xuz xtó'oli' yöta xtila na' nazí' le maná lu lataj cá'asö, en cate' bizá'a dza quégaquië' gulátië'. <sup>50</sup> Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'. <sup>51</sup> Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quégaca bönachi yödzoilió.

<sup>52</sup> Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunné' queëru' xipélë'ë le gáguru'?

<sup>53</sup> Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', bití' ca' zóalen libí'ili' yöl-la' na'bán na'.

<sup>54</sup> Núti'tës nu gagu xipéla'a, en guí'aj xichöna', dë que yöl-la' na'bán idú, ate' neda' usubana' nu na' dza údxí.

<sup>55</sup> Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. <sup>56</sup> Núti'tës bönni' gahuë' xipéla'a, en guí'jë' xichöna', sóaléntica'së' bönni' na' neda', ate' neda' sóaléntica'sa' lë'. <sup>57</sup> Ca na' zoë' nabanë' Dios Xuz nasól-lë'ë neda', ate' neda' nabánida' Lë', lësca' caní íbaninë' neda' núti'tës bönni' gahuë' neda'. <sup>58</sup> Lë ni yöta xtila bötaj birúaj yehua' yubá, en bití' naca ca yöta xtila na' nazí' le maná, lë na'

gulahuë' xuz xtó'oli', en cate' bizá'a dza quégaquië', gulátië'. Núti'tës bönni' gahuë' yöta xtila ni sóatica'së' íbanë'.

<sup>59</sup> Yugu' didza' ni bë'ë Jesús ga naca tu lu yu'u ga tu' dubë' bönni' judío, en tu'sédë' queë' Dios, ate' guca lë ni tsanni ni' rusédinë' bönachi Capernaum.

### Didza' rúnnagaca queëru' yöl-la' na'bán idú

<sup>60</sup> Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca sí' lu në'e le?

<sup>61</sup> Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zí'? <sup>62</sup> ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? <sup>63</sup> Le naca queë' Dios Bö' Lá'ayi naca le runna yöl-la' na'bán queé'li'. Le naca béla'sö cuntú nu uzí' xibé. Didza' na' bé'lena' libí'ili' náca gaca queë' Dios Bö' Lá'ayi, en rúnnagaca yöl-la' na'bán quégaca bönachi. <sup>64</sup> Na'a, bál-lali' bití' réajlë'ëli'.

Gunnë' caní Jesús tu' nózinë' dza ni'te nupa na' bití' ta'yéajlë', enca' nu na' udödi Lë' lu náagaquië' bönni' ilútië' Lë'. <sup>65</sup> Que lë ni na' gunné':

—Que lë ni na' chigudxi caza' libí'ili': Bití' séqui'në' nitúë' bönni' të'ë neda' channö Dios Xuz cabí gu'ë lë' lataj.

<sup>66</sup> Dza na' gulaca chopá ladxí'gaquië' zían bönni' usëda queë', en bíti'rö gula'dálenë' Lë'. <sup>67</sup> Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsalí' ca' libí'ili'?

<sup>68</sup> Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú. <sup>69</sup> Netu' réajlë'ëtu' Li', en nún-bë'ëtu' Li', nacu' Cristo na' nasól-lë'ë Dios, en nacu' ca' Zxí'inë' Dios ban.

<sup>70</sup> Bubi'ë didza' Jesús, rë' légaquië':

—Guró caza' libí'ili' chínnulí' ni, pero tuë' bönni' láda-jlí' libí'ili' dzaga tu' xihui' lë'.

<sup>71</sup> Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu náagaquië' bönni' ilútië' Lë', en nabábalenë' ía'chinéajë' bönni' usëda queë' Jesús.

### Bönni' böchí' cazë' Jesús bití' ta'yéajlë'ë Lë'

**7** Gudödi guca lë ni ridé' Jesús luyú Galilea. Bití' gú'unnë' tsejë' luyú Judea tu' té'ënnë' bönni' judío unná bë' nacu'ë ni' ilútië' Lë'. <sup>2</sup> Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' zcan libín lága'do'. <sup>3</sup> Que lë ni na' yugu' bönni' bóchë'ë Jesús gulé' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. <sup>4</sup> Channö ré'ëne' nu bönni' ilúnbë'e bönachi lë', bití' runë' bagáchisö le runë'. Tu' runu' yugu' yöl-la' huáca caní, buluí' cuinu' lógaca yúgu'të bönachi.

<sup>5</sup> Caní gula'nné', tu' cabí ta'yéajlë'ë bönni' bóchë'ë Jesús Lë'. <sup>6</sup> Ní'irö Jesús rë' légaquië':

—Biti' ridxini dza quia' para ulu'í lahua' lógaca bö-nachi, pero dza queé'li' tséajli' ni' chizóa caz. <sup>7</sup> Bönachi yödžölió ni bití' tu'zóa libí'ili' tsólá'alö, pero tu'zóa neda' tsólá'alö tu' runa' ba nalí quégaquië', rnniá' naca xihui' le tunë'. <sup>8</sup> Guli'tséaj libí'ili' laní na'. Biti' tseja' laní na' na'a tu' bití' ridxini dza quia'.

<sup>9</sup> Cate' chigudxë' légaquië' lë ni, bugá'anë' luyú Galilea.

### Sa'yéajë' Jesús laní quégaca bönachi judío

<sup>10</sup> Gudödi söjáquië' bönni' bóchë'ë Jesús laní na', ní'irö sa'yéajë' ca' Lë', calëga yálajdo', pero bagáchisö sa'yéajë'. <sup>11</sup> Ga na' raca laní na', bulu'guiljë' bönni' judío unná bë' Jesús, ta'nné':

—¿Gazxi zoë' bönni' na'?

<sup>12</sup> Bönachi zían ni' gulu'í'ida' didza' ca naca queë' Jesús. Bal-lë' ta'nné':

—Náquië' dxí'a.

Ia'bal-lë' ta'nné':

—Biti' náquië' dxí'a tu' rizí' yé'enë' bönachi.

<sup>13</sup> Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

<sup>14</sup> Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'. <sup>15</sup> Bulu'báininë' bönni' judío, ta'nné':

—¿Nacxi caz naca, rácadë'ë bönni' ni, en bití' ca' nazëdë' que yudo'?

<sup>16</sup> Bubi'ë didza' Jesús, rë' légaquië':

—Le rusévida' neda', calëga quia' naca, pero queë' Dios Xuz na' nasól-lë'ë neda'. <sup>17</sup> Channö ré'ënë' nu bönni' gunë' ca ré'ënë' Dios, huéquibe'enë' bönni' na' channö nequi queë' Dios le rusévida' bönachi o channö rá-casö quia' ruá'a didza'. <sup>18</sup> Nu bönni' ru'ë didza' rácasö queë', runë' caní para ilún bal bönachi lë', pero Bönni' na' ré'ënë' ilún bönachi bal Nu nasól-la' lë', Bönni' ni ru'ë didza' idütë' li, en bití' ca' rizí' yé'ë.

<sup>19</sup> Moisés bennë' queé'li' xibá queë' Dios, pero bití' runlí' ca rinná bë' xibá na'. ¿Bizx que rizóa ribó'öli' gútil-i' neda'?

<sup>20</sup> Bulu'bí'i didza' bönachi zían na', të Lë':

—Tu' xihui' dzaga lí'. ¿Nuzxi caz rizóa ribó'ö guti lí'?

<sup>21</sup> Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'. <sup>22</sup> Le nácatë Moisés bennë' queé'li' lë na' narugu lu xipéla'li' le naca bë', pero calëga Moisés caz bennë' queé'li' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipéla'gacabi' bí'i bönni'do' lë na' naca bë' néquiquequibi' queë' Dios.

<sup>23</sup> Channö ta'z'í'ibi' lu xipéla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétselí' neda' tu' buna'-në' tu bönni', ate' böáquië' dxí'ado' cate' naca dza lá'ayi? <sup>24</sup> Biti' ral-la' uchi'a usörö lízilí' ca', pero buli'chí'a buli'sörö ca naca le naca idütë' li.

### Riguíxjö'ë Jesús ga narúajë'

<sup>25</sup> Ní'irö gulu'ë didza' bal-lë' bönni' nacu'ë Jerusalén, ta'nné':

—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'? <sup>26</sup> Buli'yútsöca, yálajdo' ru'ë didza', en bití' bi të' Lë'. ¿Naru' téquibe'enë' bönni' ta'n-ná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u? <sup>27</sup> Bönni' ni, nöz quéziru' gazxi bönni' Lë'. Cate' guídë' Cristo, cuntú nu inözi gazxi bönni' Lë'.

<sup>28</sup> Ni' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' núnbe'etseli' neda', en nózitseli' gazxi bönni' neda'? Bida' ni, calëga rácasö quia', pero Dios caz nasól-lë'ë neda', ate' Lë', bití' núnbe'ëli'-në' libí'ili'.

<sup>29</sup> Neda' núnbe'eda'-në', tu' za'a queë' Lë', ate' Lë' cazë' nasól-lë'ë neda'.

<sup>30</sup> Ní'irö gulunë' bayudxi ila'zönë' Lë', pero cuntú nu guzxon Lë', tu' cabí ridxini dza queë' tsu'ë lu ná'agaquië'. <sup>31</sup> Gula'yéajlë' zían bönachi ni' Lë', ta'nná:

—Cate' guídë' Cristo, ¿naru' gunë' zíanrö yöl-la' huáca ca le runë' bönni' ni?

### Bönni' yudo' ta'sól-lë'ë nupa ila'zón Jesús

<sup>32</sup> Bila'yönnë' bönni' yudo' fariseo yugu' didza' ni tu'íi bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'sól-lë'ë ni'a ná'agaquië' para tsöjxongaquië' Lë'. <sup>33</sup> Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuzá' nasól-lë'ë neda'. <sup>34</sup> Uguíljalí' neda', pero bití' udžólili' neda'. Ga ni' tsöjsóa' neda' bití' gaca guídali' libí'ili'.

<sup>35</sup> Ní'irö të' luzá'agaquië' bönni' judío, ta'nné':

—¿Gazxi tséajtsë' bönni' ni, ga ni' bití' udžóliru'-në'? ¿Naru' huayéajtsë' ga nacu'ë bönni' judío násilasi-gaquië' idütë' yödžölió, en usédinë' yugu' bönni' zítu' ni'? <sup>36</sup> ¿Bizxi ré'ëni inná didza' na' bë'ë: "Uguíljalí' neda', pero bití' udžólili' neda'", enca: "Ga ni' tsöjsóa' neda' bití' gaca guídali' libí'ili'?"

### Nisa yegu le runna yöl-la' na'bán queéru'

<sup>37</sup> Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guídë' bönni' na' ga zoa', en guí'jë'. <sup>38</sup> Nu bönni' réajlë'ë neda', gaca queë' ca na' nazúaj lu guichi lá'ayi, rna: Lu icja ládxi'da'ahuë' bönni' na' ilén le naca ca nisa yegu, lë na' ulu'z'í' xibé bönachi, gata' yöl-la' na'bán quéguequi.

<sup>39</sup> Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunné' Jesús tu' cabí ridxininë' Dios Bö' Lá'ayi, tu' cabí ruhuépinë' Jesús ga tsépisëtëre'.

## Ta'rúaj choplö bönachi

<sup>40</sup> Cate' bila'yöni didza' ni, gula'nná bal-la bönachi zían na', ta'nná:

—Le nácatè Bönni' ni náquiè' Bönni' na' ru'è didza' uláz queè' Dios, Bönni' na' guzxí' lu në'è Dios isól-lè'è queéru'.

<sup>41</sup> Ta'nné' ia'bal-lè':

—Bönni' ni náquiè' Cristo.

Ta'nná bal-la bönachi:

—¿Naru' irúajtsè' Cristo luyú Galilea? <sup>42</sup> Nazúaj lu guichi lá'ayi le rnna: "Cristo galjè' ladaj dí'a dza queè' David, en gáquiè' ca' bönni' Belén le guca ladzè' David na'."

<sup>43</sup> Caní guca, bila'rúaj bönachi na' choplö tu' nózínè' Jesús. <sup>44</sup> Tè'ènnè' bal-lè' ila'zönè' Jesús, pero cuntú nu bi ben queè'.

## Bití ta'yéajlè'è Jesús bönni' unná bè'

<sup>45</sup> Ní'irö bulu'dxinè' ni'a ná'agaquiè' yugu' bixúz unná bè', en yugu' bönni' yudo' fariseo ga na' nacué'è bönni' yudo' na', ate' légaquiè' gulé' ni'a ná'agaquiè' na', ta'n-né':

—¿Bizx que bití' diché'èli'-nè'?

<sup>46</sup> Bulu'bi'è didza' ni'a ná'agaquiè', ta'nné':

—Cuntu nu bönni' ru'è didza' ca ru'è didza' Bönni' ni.

<sup>47</sup> Ní'irö bulu'bi'è didza' bönni' yudo' fariseo na', ta'n-né':

—¿Naru' bé'tsalí' lataj guzxí' yé'enè' ca' libí'ili'?

<sup>48</sup> ¿Naru' guyéajlè'tsè' Lè' nu bönni' unná bè' o nu bönni' yudo' fariseo? <sup>49</sup> Libí'ili' dxíalí' dó' tu' cabí rácalí' xibá queè' Dios.

<sup>50</sup> Zoè' ca' Nicodemo ní', bönni' na' bidxinè' ga zoè' Jesús chí'i dzó'ölö, tu' náquiè' ca' bönni' yudo' fariseo, ate' rè' légaquiè':

<sup>51</sup> —¿Naru' richúguru' queè' tu bönni' gátie' lu xibá queéru' channö cabí yóniru' lè' z'álö para inóziru' bi benè'?

<sup>52</sup> Ní'irö bulu'bi'è didza' ia'zícá'rè' na', tè' lè':

—¿Nácatso' ca' lí' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúè' bönni' ru'è didza' uláz queè' Dios luyú Galilea.

<sup>53</sup> Ní'irö yöjhuógaquiè' lidxi que queégaquiè'.

**8** Guyijè' Jesús ga naca lu Guí'a Yaga Olivo.

## Nigula naguítjanu xibá que yöl-la' nutsaga na'

<sup>2</sup> Cate' za' rení' budxinè' Jesús ra' yudo', ate' bila'dxín yúgu'tè bönachi ga zoè'. Gurö'è Jesús, rusédinè' légaquiè'. <sup>3</sup> Ní'irö yugu' bönni' yudo' usedi, en yugu' bönni' yudo' fariseo duché'ègaquiè'-nu tu nigula ga zoè' Jesús, tu' gula'dzólinè'-nu ní' riguítjanu xibá que yöl-la' nutsaga na'. Bulu'sudxinè'-nu lógaca bönachi na' tu'zè' nágagaca Jesús, <sup>4</sup> ate' tè' Lè':

—Bönni' Usedi, nigula ni guzxöntu'-nu ní' runnu dul-la' riguítjanu xibá que yöl-la' nutsaga na'. <sup>5</sup> Lu xibá queè' Moisés, gunná bé'enè' netu' uládxí'tu'-nu guió'j

nu nigula runnu caní, para gátinu. ¿Náxigá Lí', nacxi rnno'?

<sup>6</sup> Caní gula'nné' para ila'zí' bë'è Jesús para ila'zéquínè' ulu'zéguiè' Lè' didza'. Ní'irö biyéchuè' Jesús, ruyúè' lu yu, en ruzúajè' lu yu na' len xibón në'è. <sup>7</sup> Cate' gula'nábide'enè' Lè', ní'irö buzuínè' Jesús, en rè' légaquiè':

—Núli' cabí nunli' dul-la' isí loli' uládxí'li'-nu guió'j.

<sup>8</sup> Leyúbölö biyéchuè' Jesús, ruyúè' lu yu, en buguéllè' ruzúajè' leyúbölö lu yu na'. <sup>9</sup> Cate' bila'yönnè' didza' ni, bulu'xósa ládxí'do'gaquiè' légaquiè', ate' bila'rúajè' tu tuè'. Gula'sí lógaquiè' bönni' gúlarö ga bidxintè bönni' cuidí'. Nagá'anè' Jesús ní', dzáganu nigula na' Lè' gatsaj láhuil'ö nupa na' tu'zè' nágagaca Lè'. <sup>10</sup> Ní'irö buzuínè' Jesús leyúbölö, en cuntú nu bilé'enè' nu ruzegui lènu didza', pero túzinu nigula na', ate' rè'è-nu:

—Nígúla, ¿gazxi nacué' nupa na' bulu'zegui lí' didza' ¿Naru' cabí zoa nu bönni' richúguiè' quiu'?

<sup>11</sup> Lènu rnanu:

—Cuntu nu caz, Xan.

Ní'irö Jesús rè'è-nu:

—Lèzca' neda', bití' richuga' quiu'. Böaj lidxu', en bití'rö gunu' dul-la'.

## Náquiè' Jesús bení' quégaca bönachi yödzölió

<sup>12</sup> Leyúbölö Jesús bé'lenè' bönachi didza', rnné':

—Neda' naca' bení' quégaca bönachi yödzölió. Nu bönni' zá'lenè' neda', bití' tè' ga naca chul-la que dul-la', pero tu bení' sóalen bönni' na' le uluí' lè' naca gata' yöl-la' na'bán idú queè'.

<sup>13</sup> Ní'irö tè' Lè' bönni' yudo' fariseo, ta'nné':

—Lí' runu' ba nalí que la' cuinsu'. Bití' naca lesaca' le runu' ba nalí. Nítisö naca.

<sup>14</sup> Bubi'è didza' Jesús, rè' légaquiè':

—Sal-la' runa' ba nalí que la' cuinsa', idútè li naca le runa' ba nalí, tu' nözda' ga birúaja', en ga tseja', pero libí'ili' bití' nózilí' gazxi za'a, en calèga gazxi tseja'.

<sup>15</sup> Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntú nu bönni' ruchi'a rusöró'a queè'. <sup>16</sup> La'tu' uchi'a usöró'a, ca nácatè uchi'a usöró'a, tu' calèga néda'sö uchi'a usöró'a, pero Xuza' nasól-lè'è neda' gunè' neda' tsözxón. <sup>17</sup> Lè'sca' caní lu xibá queè' Moisés nazúaj lu guichi le rnna: Le tunè' ba nalí chopè' bönni', idútè li naca. <sup>18</sup> Neda' runa' ba nalí que la' cuinsa', ate' Xuza' nasól-lè'è neda', runè' ca' ba nalí quia'.

<sup>19</sup> Ní'irö bönni' yudo' fariseo na' gula'nábinè' Lè', ta'n-né':

—¿Gazxi zóatsè' Xuzu'?

Bubi'è didza' Jesús, rè' légaquiè':

—Bití' núnbè'èli' neda', en bití' núnbè'èli'-nè' Xuza'.

La'tu' núnbè'èli' neda', lè'sca' Xuza' gúnbè'èli'-nè'.

<sup>20</sup> Yugu' didza' ni bë'è Jesús cate' ní' zoè' rusédinè' bönachi lu chila yudo', ga na' nacué' guí'ina gapa ta'gu'è gun que yudo', pero cuntú nu guzxón Lè', tu' cabí ridxi-ni dza queè' tsu'è lu ná'agaquiè'.

Rnnë' Jesús: "Ga tseja' neda', bití' gaca guídali'"

<sup>21</sup> Leyúbölö Jesús rë' légaquië', rnnë':

—Uzá'a yödzölió ni, ate' uguiljali' nu usólá libí'ili', pero ugá'ana dul-la' nabága'li', en gátíli'. Ga tseja' neda', bití' gaca guídali'.

<sup>22</sup> Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' bití' gaca guídali'."

<sup>23</sup> Jesús rë' légaquië':

—Libí'ili' nácali' que luyú dë cadxí'ilo ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' bití' naca' bönni' yödzölió ni. <sup>24</sup> Que lë ni na' gudxa' libí'ili': Ugá'ana dul-la' nabága'li', en gátíli'. Channö cabí tséajlë'ëli' naca caza' Nu usólá, ugá'ana dul-la' nabága'li', en gátíli'.

<sup>25</sup> Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te.

<sup>26</sup> Zián le ral-la' guía' libí'ili', en uchí'a usöró'a' le naca queé'li'. Didza' idútë li ru'ë Xuza' nasól-lë'ë neda', ate' didza' riyönda' ru'ë Lë', ruí'ilena' bönachi yödzölió ni.

<sup>27</sup> Bití' gula'yéajni'inë' ruí'ilenë' légaquië' didza' ca naca queë' Dios Xuz. <sup>28</sup> Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusólá, en bití' bi runa' rácasö quia', pero ca na' ru-lu'ínë' Xuza' neda', ca' ruá'a didza'. <sup>29</sup> Xuza' nasól-lë'ë neda' zóalenë' neda'. Bití' nucá'anë' Xuza' neda' tuza', tu' rúntica'sa' le raza ládxë'ë Lë'.

<sup>30</sup> Cate' bë'ë Jesús didza' ni, bönni' zián gula'yéajlë'ë Lë'.

**Nupa nácatë reá' libí'ili': Yúgu'të nupa tun dul-la', nadzúngaca lu na' dul-la'**

<sup>31</sup> Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'. <sup>32</sup> Gúnbë'ëli' le naca idútë li, ate' le naca idútë li na' usólá libí'ili'.

<sup>33</sup> Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso': "Usólá libí'ili'?"

<sup>34</sup> Jesús rë' légaquië':

—Le nácatë reá' libí'ili': Yúgu'të nupa tun dul-la', nadzúngaca lu na' dul-la'. <sup>35</sup> Nu naca bönni' nadó'o bití' ugá'anatica'sö lidxë' xan yu'u, pero nu naca xzí'inë' xan yu'u na' rugá'anatica'sö lidxi nu na' naca xan yu'u.

<sup>36</sup> Caní naca, channö Nu na' naca Xzí'inë' Dios usólá libí'ili', le nácatë uláli'. <sup>37</sup> Nözda' naquië' Abraham xuz gudödi queé'li', pero rizó'a ribó'öli' gútili' neda', tu' cabí nazí' lu ná'alí' xtídza'a. <sup>38</sup> Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyónili' ga zoa xuz quézili'.

<sup>39</sup> Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú xzí'ini xi'sóë' Abraham, gunlí' ca na' benë' Abraham. <sup>40</sup> Na'a, rizó'a ribó'öli' gútili' neda', sal-la' ruí'ilena' libí'ili' didza' idútë li, didza' na' biyönda' bë'ë Dios. Bití' benë' Abraham caní. <sup>41</sup> Libí'ili' runli' ca run xuz quézili'.

Ní'irö të' Lë':

—Netu' bití' ca' nácatu' bí'i lando'. Tuzë' Dios náquië' Xuztu'.

<sup>42</sup> Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' caléga rácasö quia' bida', pero Dios caz gusól-lë'ë neda'.

<sup>43</sup> ¿Bizx que bití' gaca tséajni'ili' didza' ruá'a? Naca tu' cabí ré'ënilí' uzé nágalí' xtídza'a. <sup>44</sup> Xuz quézili' naca tu' xihuí'. Néquili' que tu' xihuí', en ré'ënilí' gunlí' le rizé ladxí' xúzili' na'. Dza ni'te naca tu' xihuí' nu guti bönachi, en cabí nazí' lu në'e le naca idútë li, tu' cabí ruí' didza' idútë li. Cate' rizí' yë' tu' xihuí', ca naca caz ruí' didza', tu' naca nu rizí' yë', en naca ca xúzgaca caz nupa ta'zí' yë'. <sup>45</sup> Tu' ruá'a neda' didza' idútë li bití' réajlë'ëli' neda'. <sup>46</sup> ¿Núzxilöli' gaca usubága'li' neda' dul-la' Channö ruá'a didza' idútë li, ¿bizx que bití' réajlë'ëli' neda'? <sup>47</sup> Nu naca queë' Dios, ruzé nagui xtídzë'ë Dios, pero libí'ili', tu' cabí nácali' queë' Dios, bití' ruzé nágalí' xtídzë'ë.

**Cristo zoa cazë' zí'atëlö ca Abraham**

<sup>48</sup> Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihuí' Lí'.

<sup>49</sup> Bubi'ë didza' Jesús, rë' légaquië':

—Bití' dzaga tu' xihuí' neda'. Neda' runa' Xuza' bal, ate' libí'ili' ruzóali' neda' tsólá'alö. <sup>50</sup> Bití' runa' zxön cuina'. Zoa Nu run zxön neda', ate' Lë' ruchí'a rusöröë' rë'u. <sup>51</sup> Le nácatë reá' libí'ili': Nu bönni' sí' lu në'ë xtídza'a, bití' ca' gátie' bönni' na'.

<sup>52</sup> Ní'irö yugu' bönni' judío na' të' Lë', ta'nnë':

—Na'a réquibe'etu' dzaga tu' xihuí' Lí'. Abraham gútië', ate' gulátië' ca' bönni' gulu'ë didza' uláz queë' Dios, pero Lí' rnno': "Nu bönni' sí' lu në'ë xtídza'a, bití' ca' gátie' bönni' na'." <sup>53</sup> ¿Naru' nácatë'rötso' Lí' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

<sup>54</sup> Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' bití' bi gaca. Xuza' runë' neda' zxön, ate' libí'ili' rnnali' náquië' Dios queé'li'. <sup>55</sup> Libí'ili' bití' núnbë'ëli'-në' Dios Xuz, pero neda' núnbë'a-në'. La'tu' inniá': Bití' núnbë'a-në', gaca' nu rizí' yë' ca na' nácali' libí'ili', rizí' yë'ëli'. Na'a, le nácatë núnbë'a-në', en nazí' lu na'a xtídzë'ë.

<sup>56</sup> Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzéjade'enë'.

<sup>57</sup> Ní'irö yugu' bönni' judío na' të' Jesús, ta'nnë':

—Bití' yuí'inu' chi-un iz. ¿Naru' bilé'etsenu' Abraham? <sup>58</sup> Jesús rë' légaquië':

—Le nácatè rea' libí'ili': Zí'atèlò ca soé' Abraham, neda' zoa caza'.

<sup>59</sup> Ní'irò gula'guél'è guió'j para ulu'ladxé' Jesús, pero Lè' bunítitè cuiné', en burúajé' lö'a yudo' na'. Gudödè' gatsaj láhui'lò ga na' nacu'è, ate' söhuó'jé'.

### Ruúné' Jesús tu bönni' guljé' nachúl-latè lahué'

**9** Cate' gudödè' Jesús tu lataj, bilé'ené' tu bönni' ní' guljé' nachúl-latè lahué'. <sup>2</sup> Gula'nábiné' Jesús bönni' uséda queé', ta'nné':

—Bönni' Usedi, ¿nuzxi ben dul-la? ¿Naru' bönni' ni o xuz xiné'è tu' guljé' nachúl-latè lahué'?

<sup>3</sup> Bubi'è didza' Jesús, rë' légaquié':

—Biti' naca tu' bené' dul-la' bönni' ni, en calèga tu' guluné' dul-la' xuz xiné'è, pero naca para ilá' lahui yölla' huáca queé' Dios ní'a queé' bönni' ni. <sup>4</sup> Run bayudxi gunru' xichiné' Xuza' nasól-lè'è neda', tsanni ni naca ca lahui' dza. Huadxín dza gaca chul-la que yölla' guti, cate' cuntú nu gaca gun dxin. <sup>5</sup> Tsanni ni zoa' yödzólió ni, naca' bení' quégaca bönachi yödzólió.

<sup>6</sup> Cate' Jesús budxi bē'è didza' ni, gurú'uné' xzöna' lu yu, en bené' gúna'do' len xzöna' na', ate' bugu'è guna' na' guió'j lahué' bönni' na' nachul-la lahué'. <sup>7</sup> Ní'irò rë' lè':

—Guyéaj yöjtibi lo' lu beaj nisa nazí' le Siloé.

Siloé naca tu didza' hebreo le rnna: Nasól-la'.

Ní'irò bönni' na' nachul-la lahué' guyijé' ní', yöjtibi lahué'. Cate' buzé'è ní' chiril'é'ené'. <sup>8</sup> Ní'irò bulu'bani bönachi dzaga yu'u queé', en nupa ní' bila'lé'è lè' zí'atèlò cate' ní' nachul-la lahué', ta'nná:

—¿Naru' calèga bönni' ni bönni' na' ribö'è rinabé' nu bi unödzej queé'?

<sup>9</sup> Bal-lè' ta'nné':

—Lè' na'.

Ia'bal-lè' ta'nné':

—Calèga lè', pero ca rna' lahué' bönni' na', rna' lahué' ca' bönni' ni.

Lè' rnné':

—Neda' na'.

<sup>10</sup> Ní'irò gula'nábiné' lè', ta'nné':

—¿Nacxi caz guca, gualaj guió'j lo'?

<sup>11</sup> Bubi'è didza', rë' légaquié':

—Bönni' na' lè' Jesús bené' gúna'do', ate' gudèbè' gúna'do' na' guió'j lahua', en gudxé' neda': "Guyéaj ra' beaj nisa nazí' le Siloé, yöjtibi lo'." Guyija' ní', yöjtibi lahua', ate' gualajjtè guió'j lahua'.

<sup>12</sup> Ní'irò gula'nábiné' lè', ta'nné':

—¿Gazxi zoé' bönni' na'?

Lè' rë' légaquié':

—Biti' nözda'.

### Yugu' bönni' yudo' ta'náb yúdxiné' bönni' na' gualaj guió'j lahué'

<sup>13</sup> Ní'irò gula'ché'è bönni' na' zí'alò nachul-la lahué', en bulu'sudxiné' lè' lógaquié' bönni' yudo' fariseo. <sup>14</sup> Tu naca dza lá'ayi quégauquié' cate' bené' Jesús gúna'do' na', en gualjé' guió'j lahué' bönni' na' zí'alò nachul-la

lahué', <sup>15</sup> que lè' ni na' yugu' bönni' yudo' fariseo na' gula'nábiné' lè' leyúbölö nacxi guca gualaj guió'j lahué'. Lè' gudxé' légaquié':

—Budxié' gúna'do' guió'j lahua', ate' yöjtiba' le, en rilé'eda'.

<sup>16</sup> Ní'irò gulu'è didza' bal-lè' bönni' yudo' fariseo na', ta'nné':

—Biti' nasól-lè' Dios bönni' na', tu' cabí rapa chí'è dza lá'ayi.

Ia'bal-lè' ta'nné':

—¿Naru' huácatsö tu bönni' dul-la' guné' yugu' yölla' huáca runé' bönni' na'?

Caní guca, bila'rúajé' choplö. <sup>17</sup> Leyúbölö gula'nábiné' bönni' na' zí'alò nachul-la lahué', ta'nné':

—¿Bizxi ranno' lí' queé' bönni' na', gusaljé' guió'j lo'?

Lè' rnné':

—Náquié' bönni' ru'è didza' uláz queé' Dios.

<sup>18</sup> Biti' gula'yéajlè'è bönni' judío unná bē' na' guljé' nachúl-latè lahué' bönni' na', en gualaj guió'j lahué', cate' bulu'lídzaré' xuz xiné'è bönni' na' gualaj guió'j lahué', <sup>19</sup> ate' gula'nábiné' légaquié', ta'nné':

—¿Naru' náquié' bönni' ni xzí'inilí', rnnalí' guljé' nachúl-latè lahué'? ¿Nacxi caz naca rilé'ené' na'a?

<sup>20</sup> Bulu'bi'è didza' xuz xiné'è na', tē' légaquié':

—Nóztu' bönni' ni náquié' xzí'initu', en guljé' nachúl-latè lahué', <sup>21</sup> pero nacxi guca, rilé'ené' na'a, bití nöztu', en nuzxi na' gusalaj guió'j lahué', bití nöztu'. Gulí'nabiné' lè', tu' chináquié' bönni' chinaca. Lè' cazé' quíxjö'è.

<sup>22</sup> Caní gula'nné' xuz xiné'è bönni' na' zí'alò nachul-la lahué', tu' tádxiné' yugu' bönni' judío unná bē', tu' chigulún xtídza'gaquié' bönni' judío na' channö nu bönni' sí' lu në'è Jesús náquié' Cristo, tsaz ulu'béajé' bönni' na' lu yu'u ga tu'dubé' bönni' judío, en tu'sédé' queé' Dios. <sup>23</sup> Que lè' ni na' gula'nné' xuz xiné'è: "Gulí'nabi-né' lè', tu' chináquié' bönni' chinaca."

<sup>24</sup> Ní'irò yugu' bönni' judío unná bē' bulu'lídze' leyúbölö bönni' na' zí'alò nachul-la lahué', ate' tē' lè':

—Ní'a queé' Xanru' Dios gudixjö' le nácatè. Netu' réquibe'etu' bönni' na' náquié' bönni' dul-la'.

<sup>25</sup> Ní'irò bubi'è didza', rnné':

—Channö náquié' bönni' dul-la' bití nözda'. Tu le nözda'. Zí'alò nachul-la lahua', ate' na'a rilé'eda'.

<sup>26</sup> Gula'nábiné' lè' leyúbölö, ta'nné':

—¿Bizxi bené' quiu'? ¿Nacxi bené' gusaljé' guió'j lo'?

<sup>27</sup> Bubi'è didza', rë' légaquié':

—Chigúdxí caza' libí'ili', pero bití' gú'unilí' sí' lu ná'alí' xtídza'a. ¿Bizx que na' ré'énilí' yónilí' leyúbölö? ¿Naru' ré'énilí' tá'alí' ca' Lè'?

<sup>28</sup> Ní'irò bulu'lídza' zí'è lè', ta'nné':

—Lí' do'o Lè', pero netu' dá'atu' Moisés. <sup>29</sup> Netu' nöztu' Dios bé'lené' Moisés didza', pero ca naca queé' bönni' ni, bití nöztu' nuzxi caz gusól-la' Lè'.

<sup>30</sup> Ní'irò bubi'è didza' bönni' na', rë' légaquié':

—Lè' ni run ga rubánida'. Libí'ili' bití' nózilí' nuzxi gusól-la' bönni' ni, ate' Lè' gusaljé' guió'j lahua'.

<sup>31</sup> Nóziru' bití' riyönné' Dios yugu' bönni' dul-la', pero channö reaj ládxe'è tu bönni' Dios, en runé' ca ré'éné' Lè', Dios riyönné' bönni' ni. <sup>32</sup> Dza ní'te bití' riyón nu

gunná channö nu bönni' gusaljé' guió'j lahué' tu bönni' guljé' nachúl-laté lahué'. <sup>33</sup> La'tu' cabí náquié' bönni' ni queé' Dios, biti' bi gaca guné'.

<sup>34</sup> Ní'irö bulu'bi'é didza', té' lé':

—Ca gulju' naca bé' nabágu'u dul-la'. ¿Naru' lí' ruséditsenu' netu'?

Ní'irö bulu'béajé' lé' ní'ilö.

### Nupa nácgaca chul-la niti

<sup>35</sup> Biyönné' Jesús ca guluné' bönni' judío unná bé', bulu'béajé' bönni' na' z'í'alö nachul-la lahué'. Cate' budzágué' lé', gudxé' lé':

—¿Ba réajlé'u Xzí'iné' Dios?

<sup>36</sup> Bubi'é didza' lé', ré' Jesús:

—¿Nuzxi na', Xan, para tséajlé'a Lé'?

<sup>37</sup> Jesús ré' lé':

—Chibilé'enu' Lé', ate' neda' ni ruí'ílena' lí' didza', naca' Xzí'iné' Dios.

<sup>38</sup> Ní'irö bönni' na', gyalaj guió'j lahué', guyéaj ládxé'è Jesús, en ré' Lé':

—Xan, réajlé'a Lí'.

<sup>39</sup> Jesús rnné':

—Para uchi'a usöró'a' bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'l'é'e.

<sup>40</sup> Cate' yugu' bönni' yudo' fariseo na' nacua'lené' Jesús bila'yönné' didza' ni, ní'irö té' Lé':

—¿Naru' nachul-la nanítitsatu'?

<sup>41</sup> Bubi'é didza' Jesús, ré' légaquié':

—La'náru' nachúl-lasö guió'j lolí', biti' ibága'lí' dul-la'. Na'a rnnalí': "Rilé'etu'." Que lé' ni na' nabága'lí' dul-la'.

### Rucúdzu'è didza' Jesús que lé'a quégacaba' bö'cu' xzila'

**10** Gunné' ca' Jesús:

—Le nácaté rea' libí'íli': Nu bönni' biti' razié' saca' ga nu riyaza lé'a quégacaba' bö'cu' xzila', pero tsázié' saca' ga yúbölö, bönni' ni náquié' gubán, en ribán cazé'. <sup>2</sup> Nu bönni' razié' saca' ga nu riyaza náquié' bönni' run chí'i cazé' bö'cu' xzila' na'. <sup>3</sup> Para tsázié' bönni' ni, risalaj nu zoa run chí'i ga nu riyaza, ate' ta'yóni-ba' bö'cu' xzila' na' chí'è, en tu'únbé'èba'-né'. Lé' rulidzé'-ba' que queé'ba' ca légacaba', en rubéajé' yugu' bö'cu' xzila' na'. <sup>4</sup> Cate' chinubéajé'-ba' yúgu'téba' bö'cu' xzila' néquigacaba' queé', röjnórué' lógacaba', ate' bö'cu' xzila' na' röjnógacaba' lé', tu' tu'únbé'èba' chí'è. <sup>5</sup> Bönni' yúbölö biti' tsójnógacaba' lé', pero ulu'zxúnna-jba' queé', tu' cabí núnbé'gacaba' chí'igaquié' bönni' yúbölö.

<sup>6</sup> Le rucúdzu' didza' ni gudxé' Jesús légaquié', pero biti' gula'yéajni'iné' lé' na' ré' légaquié'.

### Náquié' Jesús ca bönni' rapa chí'è-ba' bö'cu' xzila'

<sup>7</sup> Ní'irö Jesús ré' légaquié' leyúbölö, rnné':

—Le nácaté rea' libí'íli': Neda' naca' ca tu ga ta'yázaba' bö'cu' xzila'. <sup>8</sup> Chigula'l'é'è zían bönni' gula'nné' náca-gaquié' Cristo, pero yúgu'té bönni' na' bila'dxiné' z'í'alö ca neda', nácaquié' gubán, en ta'bán cazé', ate' biti'

bulu'zé' nágaba' bö'cu' xzila' na' légaquié'. <sup>9</sup> Neda' naca' ca tu ga nu riyaza. Núti'tés bönni' tsázalené' neda', ulé' bönni' na', en gáquié' ca tuba' bö'cu' xzila' rázaba', en rurúajba', en ridzólíba' le ráguba'.

<sup>10</sup> 'Za'zé' bönni' gubán para cuané'-ba', en gútié'-ba', en usunítíé'-ba'. Neda' bida' para gata' yöl-la' na'bán idú quégaca bönachi nácgaca ca bö'cu' xzila' quia'. Le nácaté gata' quégaquié' yöl-la' na'bán idú na'. <sup>11</sup> Neda' run chí'igaca' bönachi quia' ca runé' bönni' na', lu yöl-la' dxi'i ladxí' queé' rapa chí'è yugu' bö'cu' xzila'. Bönni' na' rapa chí'è-ba' bö'cu' xzila' caní zoa cazé' udödé' yöl-la' na'bán queé' ní'a quégacaba' bö'cu' xzila' queé'. <sup>12</sup> Tu bönni' nazxjé' rapa chí'è-ba' bö'cu' xzila', cate' rilé'ené' zá'aba' bö'cu' guí'a síní'a, rucá'ané'-ba' bö'cu' xzila' na', en ruzxúnnejé', ate' bö'cu' guí'a síní'a na' ráguya'aba' yugu' bö'cu' xzila' na', en rusilásiba' légacaba'. Caní runé' bönni' na' rapa chí'è-ba' bö'cu' xzila' tu' cabí náquié' idú nu run chí'i-ba' bö'cu' xzila', ate' biti' néquigacaba' que cazé' bö'cu' xzila' na'. <sup>13</sup> Ruzxúnnejé' bönni' nazxjé' na' tu' rapa chí'è-ba' bö'cu' xzila' na' para sí'isé' dumí, en biti' ruí'í ládxé'è-ba' bö'cu' xzila' na'.

<sup>14</sup> 'Neda' naca' bönni', lu yöl-la' dxi'i ladxí' quia' run chí'igaca'-ba' bö'cu' xzila'. Ca na' núnbé'è Xuzá' neda', ate' neda' núnbé'a-né' Xuzá', lèscá' caní núnbe'egacada' bönachi quia' nácgaca ca bö'cu' xzila' quia', en rudö-da' yöl-la' na'bán quia' ní'a quégacaba' bö'cu' xzila' na', ate' bö'cu' xzila' na' néquiguequiba' quia' núnbé'ga-caba' neda'. <sup>16</sup> Lèscá' nacua'aba' ia'zícá'röba' bö'cu' xzila' quia' biti' nabábagacaba' ni. Lèscá' légacaba' ral-la' tsöjxí'gaca'-ba'. Léga-caba' ulu'zé' nágaba' chí'a, en ilá-caba' tuz len ia'zícá'röba' bö'cu' xzila' quia', ate' neda' caz gun chí'igaca'-ba'.

<sup>17</sup> 'Que lé' ni na' nadxí'iné' Xuzá' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. <sup>18</sup> Cuntu nu bönni' séqui'né' gútié' neda', pero neda' rudödi caza' yöl-la' na'bán quia', gátia'. Dè lu na'a udöda' le, en dè lu na'a uzi'a le leyúbölö. Caní naca le gunná bé'ené' Xuzá' neda'.

<sup>19</sup> Cate' yugu' bönni' judío bila'yönné' didza' ni, leyúbölö bila'rúajé' choplö ca téquiné' queé'. <sup>20</sup> Zíané' ta'nné':

—Yu'u bö' xihui' Lé', en nachixi icjé'. ¿Bizx que ruzé' nágalí' Lé'?

<sup>21</sup> Ia'bal-lé' ta'nné':

—Biti' ca' ru'é caní didza' bönni' yu'u bö' xihui' lé'. ¿Naru' huácatsö bö' xihui' usalaj guió'j lógaquié' bönni' nachul-la lógaquié'?

### Yugu' bönni' judío unná bé' tu'zóé' Jesús tsólá'alö

<sup>22</sup> Raca beo' ziaga, en naca dza na' tuné' laní yödzö Jerusalén, tu'subané' ca gula'gu'é yudo' quégaquié' lu në'è Dios. <sup>23</sup> Ridé' Jesús ra' yudo' ga naca chila que, nazí'i le Chila Queé' Salomón. <sup>24</sup> Yugu' bönni' judío uná bé' gula'gu'é Jesús lé'alö, en té' Lé':

—¿Bátaxi caz usanu' runu' ga ró'otu' böniga? Channö nacu' lí' Cristo, ca nácaté gudíxjö'i netu'.

<sup>25</sup> Jesús ré' légaquié':

—Chigudxi caza' libí'ili', pero bití' réajjlé'éli' neda'. Yugu' dxin runa' tu' dè lu na'a uláz queë' Xuza' nácagaca bē' Nu naca'. <sup>26</sup> Libí'ili' bití' réajjlé'éli' neda', tu' cabí nabábalenlí' nupa nácagaca bö'cu' zxila' quia', ca na' chigudxi caza' libí'ili'. <sup>27</sup> Ta'yóniba' bö'cu' zxila' quia' chí'a, en tu'únbe'eba' neda', ate' neda' núnbe'egacada'ba', ate' ridijácalenba' neda'. <sup>28</sup> Neda' runödza' yöl-la' na'bán idú quegacaba', ate' bití' ca' ila'nítiba', ate' cuntú nu sequí' ubéaj légacaba' lu na'a neda'. <sup>29</sup> Xuza' Dios benné' quia' légacaba', ate' Lè' nápatèrè' yöl-la' huáca ca yúgu'tè bönachi, ate' cuntú nu sequí' ubéaj légacaba' lu nē'è Xuza'. <sup>30</sup> Neda', en Dios Xuz, tuz nácatu'.

<sup>31</sup> Leyúbölö yugu' bönni' judío unná bē' na' bu-lu'guélé'è guió'j ulu'ladxé' Jesús. <sup>32</sup> Jesús rē' légaquié': —Zian le naca dxí'a bena' lolí' tu' dè lu na'a uláz queë' Xuza'. ¿Ni'a que bízxilö dxin dxí'a ni uládxí'li' neda' guió'j?

<sup>33</sup> Bulu'bi'è didza' bönni' judío unná bē' na', tē' Lè': —Ni'a que dxin dxí'a bití' uládxí'tu' lí' guió'j, pero tu' cabí rnnió' dxí'a queë' Dios, tu' nacu' lí' bönáchisö, en run cuinu' Dios.

<sup>34</sup> Bubi'è didza' Jesús, rē' légaquié': —¿Naru' cabí nazúaj lu guichi lu xibá queéli' ca gunné' Dios, rna: "Neda' rnnía': Nácalí' yugu' dios"? <sup>35</sup> Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'í lágaquié' dios, bönni' ní' Dios bé'lené' légaquié' didza'. <sup>36</sup> Dios bubéajjé' neda' quez queë', en gusól-lè'è neda' yödzölió ni. ¿Naru' rnnátsali' quia': "Lí' bití' rnnió' dxí'a queë' Dios", tu' gunní'a: Xzí'iné' Dios naca? <sup>37</sup> Channö cabí runa' dxin budödè' Xuza' Dios lu na'a, bití' ral-la' tséajjlé'éli' neda'. <sup>38</sup> Channö runa' dxin budödè' Dios lu na'a, sal-la' bití' réajjlé'éli' neda' caz, gulí'tséajjlé' le nácagaca bē' dxin na' runa', para guéquibe'eli' náquié' Dios Xuz tuz len neda', ate' neda' ca' naca' tuz len Xuza'.

<sup>39</sup> Leyúbölö gula'zóa gula'bö'è ila'zönè' Jesús, pero Lè' bulé' lu náagaquié'.

<sup>40</sup> Ní'irö guyijjé' Jesús leyúbölö ia'tsölá'a yegu Jordán, ga ní' buquilé' Juan bönachi nisa zí'atèlö, ate' bugá'ané' Jesús ní'. <sup>41</sup> Bila'dxín bönachi zían ga zoë' Jesús, ta'nná:

—Le nácatè bití' bené' Juan nitú yöl-la' huáca zxön, pero yúgu'tè le gunné' Juan na' ca ral-la' gaca queë' bönni' ni, idútè li zeaj naca.

<sup>42</sup> Que lè ni na' gula'yéajjlé'è bönni' zían Jesús ga na' zoë'.

### Le guca cate' gútié' Lázaro

**11** Dza ní' ré'ené' Lázaro, bönni' Betania, le naca ládzagacanu María, en Marta. Nácanu Marta na' xzílanu María na'. <sup>2</sup> Nácanu María na' nigula zané' Lázaro, bönni' na' ré'ené', en nácanu ca' nigula na' gulú'unu le rilá' zxixi ní'è Xanru', en buzxinu ní'è len guitsa' ícjanu. <sup>3</sup> Gula'sól-la'nu nigula zané' Lázaro na' nu yójödx Jesús, gunná:

—Xan, buyútsöca', ré'ené' Lázaro, bönni' na' nadxí'in-u-né'.

<sup>4</sup> Cate' biyönné' Jesús didza' ni, gudxé' nupa nacuá' ní', rnné':

—Yödzöhué' ni bití' naca le guti lè' tsaz, pero naca para ilá' lahui yöl-la' zxön queë' Dios, ate' ní'a que yödzöhué' ni ilá' lahui ca' yöl-la' zxön quia' neda', Xzí'iné' Dios.

<sup>5</sup> Jesús nadxí'iné' Marta, en nigula xzílanu Marta na', en Lázaro na'. <sup>6</sup> Sal-la' nadxí'iné' Jesús légaquié', cate' biyönné' ré'ené' Lázaro, bugá'ané' ga na' zoë' ia'chopa dza ca'. <sup>7</sup> Cate' bizá'a chopa dza na', Jesús gudxé' yugu' bönni' usèda queë', rnné':

—Uyéajru' leyúbölö luyú Judea.

<sup>8</sup> Ní'irö yugu' bönni' usèda queë' tē' Lè', ta'nné':

—Bönni' Usedi, sí' gula'zóa gula'bö'è bönni' judío uná bē' ní' ulu'ladxé' Lí' guió'j. ¿Naru' uyéajtsö' leyúbölö ní'?

<sup>9</sup> Bubi'è didza' Jesús, rē' légaquié':

—Nacuá' caz chinnu hora lahui' dza. Nu bönni' ridé' lahui' dza, bití' tsöjchégu'è, tu' rilé'ené', tu' zóalen lè' bení' zoa yödzölió ni. <sup>10</sup> Channö ridé' bönni' na' chí'í dzó'ölö, röjchégu'è, tu' cabí zóalen bení' lè'.

<sup>11</sup> Cate' budxi bē'è Jesús didza' ni, ní'irö gudxé' légaquié':

—Rásié' Lázaro, böchi' luzá'aru', ate' tseja' neda', en usubana'-né'.

<sup>12</sup> Ní'irö yugu' bönni' usèda queë' tē' Lè', ta'nné':

—Xan, channö rásié', huóáquié'.

<sup>13</sup> Gunné' caní Jesús tu' chigútié' Lázaro, pero légaquié' téquiné' gunné': Rásisè' Lázaro. <sup>14</sup> Ní'irö Jesús gudxé' légaquié' yálajdo', gunné':

—Chigútié' Lázaro. <sup>15</sup> Rudzédada' tu' cabí zoa' ní', tu' gaca na'a tu le uzí'ili' xibé, le gun ga tséajjlé'éli' neda'. Uyéajru' na'a ga na' dē' Lázaro.

<sup>16</sup> Ní'irö Tomás, bönni' na' tu'è lè', Bönni' Bilidí' gudxé' ia'zícá'rè' bönni' usèda queë' Jesús, rnné':

—Uyéajru' ca' rē'u, en gátillenru'-né'.

### Náquié' Jesús Nu rusubán nupa chinátigaca, enca' Nu nabániru'

<sup>17</sup> Dè yödzö Betania gála'sö ga dē' Jerusalén na', le naca ca rizá'aru' tu' hórátèz. Que lè ni na' chibila'dxiné' zían bönni' judío ga na' nacuá'anu Marta, en María, en tu'hué' tsáhué'è légacanu tu' gútié' bönni' zángacanu. Cate' Jesús bidxiné' ní', biyönné' chiguca tapa dza yu'è Lázaro na' yeru ba. <sup>20</sup> Cate' biyóninu Marta didza' zē'è Jesús, ní'irö birúajnu yu'u, yöjtságanu Lè', pero María bugá'ananu yu'u na'. <sup>21</sup> Marta na' rēnu Jesús:

—Xan, la'tu' zu' ni, bití' gátié' bönni' zana'. <sup>22</sup> Lésca' na'a, nözda' yúgu'tè le inábinu' Dios, Lè' gunné' quiu'.

<sup>23</sup> Jesús rē'è-nu:

—Ubané' bönni' zanu'.

<sup>24</sup> Marta rēnu Lè':

—Nözda' ubané' cate' idxín dza údxi cate' ulu'bán nupa chinátigaca.

<sup>25</sup> Ní'irö Jesús rē'è-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajjlé' neda', sal-la' gati nu na', ubán caz, <sup>26</sup> ate' yúgu'tè bönni' nabán-gaquié', en ta'yéajjlé'è neda', bití' ca' ilátié' tsaz. ¿Réajjlé'u lè ni?

<sup>27</sup> Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bön-ni' na' guzxí' lu në'ë Dios isól-lë'ë yödzölió ni.

**Ribödxë' Jesús tu' ru'í lãdxë'ë nigula zanë' Lázaro**

<sup>28</sup> Cate' budxi bé'ënu Marta na' didza' ni, bóajnu yu'u, yöjldzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' lí'.

<sup>29</sup> Cate' biyönninu María didza' ni, la' guyástënu, zéajnu ga na' zoë' Jesús. <sup>30</sup> Biti' rázinë' Jesús la' yódzödo' na', pero zóasë' ga na' yöjtságanu Marta Lë'. <sup>31</sup> Cate' yugu' bönni' judío na' nacuá'lenë' María na', en tu'hué tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnë':

—Uyéajnu ra' yeru ba tsöjchödxinu ni'.

<sup>32</sup> Ní'irö bidxinu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

<sup>33</sup> Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö bu'innë', en gunnë-da' lãdxë'ë. <sup>34</sup> Rnnë':

—¿Gazxi bucáchi'li'-në'?

Të' Lë':

—Gudá uyú'.

<sup>35</sup> Gurödxë' Jesús. <sup>36</sup> Ní'irö gula'nnë' bönni' judío na', ta'nnë':

—Buli'yútsöca' ca naxí'ide'enë' lë'.

<sup>37</sup> Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

**Rubanë' Lázaro lu yöl-la' guti**

<sup>38</sup> Leyúbölö gunnëda' lãdxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e gu'ía guió'j, ate' da' tu guió'jta'a le nusayaj ga nu riyaza le. <sup>39</sup> Jesús gudxë' nupa nacuá' ni', rnnë':

—Gulí'cúa guió'j ni.

Ní'irö Marta, nigula zanë' bönni' nati na', rënu Lë':

—Xan, chirilé'ë siguti tu' chiguca tapa dza nátië'.

<sup>40</sup> Jesús rë'ë-nu:

—¿Naru' cabí chigudxi caza' lí' channö réajlë'u, hualé'enu' yöl-la' zxön queë' Dios?

<sup>41</sup> Ní'irö gula'gúë' guió'jta'a na' nusayaj ga nu riyaza yeru ba ga na' yu'ë bönni' nati na'. Buyúë' Jesús zaca' lúxibalö, rnnë':

—Xuza', rea' Lí', xclenu' tu' riyönnu' neda'. <sup>42</sup> Neda' nözda' riyöntiquí'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Lí' na' nasól-lu'u neda'.

<sup>43</sup> Cate' budxi bé'ë Jesús didza' ni, zidzaj bulidzë', rnnë':

—Lázaro, burúaj nilö.

<sup>44</sup> Burúajë' bönni' na' gúquië' bönni' nati lu yeru ba, naróligacarö ní'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Bulí'li' lári' na' naröli ní'a në'ë, en guli'gu'ë lataj së'ë.

**Tun xtídzë'ë yugu' bönni' judío unná bë' ilútië' Jesús**

(Mt. 26:1-5; Mr. 14:1-2; Lc. 22:1-2)

<sup>45</sup> Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'. <sup>46</sup> Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. <sup>47</sup> Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru? Runë' bönni' ni zían yöl-la' huá-ca zxön. <sup>48</sup> Channö gü'íisiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínajgaquië' yudo' lá'ayi queëru', en yödzö queëru'.

<sup>49</sup> Ní'irö bé'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nózili', <sup>50</sup> en biti' réquibe'eli' run bayudxi gátië' tuë' bönni' ní'a quégaca bönachi, para cabí initi idú yödzö.

<sup>51</sup> Calëga rásasö queë' bé'ë didza' ni, pero tu' náquië' bixúz lo iz na', que lë ni na' bé'ë didza' uláz queë' Dios ca ral-la' gátië' Jesús ní'a quégaca bönachi yödzö na'.

<sup>52</sup> Gátië' Jesús, calëgasö ní'a que yödzö na', pero gátië' ca' para utubë' yugu' zxí'inë' Dios násilasigaquië', para ilácagaquië' tuz. <sup>53</sup> Caní guca, la' dza ná'asö gulún xtídzá'gaquië' ilútië' Jesús. <sup>54</sup> Que lë ni na' bítirö gudë' Jesús yálajdo' gapa nacuá' bönachi judío, pero buzë'ë ní', sa'yéajë' tu lataj gala' ga naca lataj cá'asö, ate' bidxinë' yödzö Efraín, ga ní' bugá'anë', ate' dzágagaquië' bönni' usëda queë' Lë'.

<sup>55</sup> Dza na' chizá' gala' Laní Pascua quégaquië' bönni' judío cate' tu'subané' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzö ní', ate' gula'benë', söjáquië' Jerusalén cate' sí' idxín laní na' para tsöj'pá'a cuíngaquië' ca naca que yudo'.

<sup>56</sup> Yugu' bönni' na' nacu'ë Jerusalén tu'guiljë' Jesús, en cate' ní' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huídatsë' laní, o biti' guidë'?

<sup>57</sup> Chigula'nná bé'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ralla' ududíxjö'i légaquië' para gaca tsöjxóngaqüië' Lë'.

**María rigú'unu le rilá' zxixi ní'ë Jesús**

(Mt. 26:6-13; Mr. 14:3-9)

**12** Cate' ní' nagá'anagaca ia'xopa dza cate' idxín Laní Pascua cate' tu'subané' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubané' lu yöl-la' guti. <sup>2</sup> Gula'gu'ë tu gü'í huagu ní' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' ró'ölengaqüië' Jesús ga na' tahuë'. <sup>3</sup> Ní'irö gudéla'nu María ca tu guié le rilá' zxixi que yöj susén lasi idú, le nazáca'da', en gulú'unu le ní'ë Jesús. Buzxinu ní'ë len guitsa' ícjanu. Idútë lu yu'u na' guzé bö' zxixi. <sup>4</sup> Ní'irö bé'ë didza' tu bönni' usëda queë' Jesús, lë' Judas Iscariote, zxí'inë' tu



bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

<sup>5</sup> —¿Bixx que bití' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quéga-ca bönachi yechi'?

<sup>6</sup> Gunnë' caní, calëga tu' ru'í lãdxë'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. <sup>7</sup> Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. <sup>8</sup> Yugu' bönachi yechi' ila'cuá'lentica'só libí'ilí, pero neda' bití' ugá'anatica'sa' ga zóalí'.

### Tun xtídza'gaquië' bönni' judío unná bë' ilútië' Lázaro

<sup>9</sup> Cate' bila'yönnë' bönni' judío zoë' Jesús yödz Beta-nia, bila'dxinë' zianë' ni', calëgasó tu' zoë' Jesús ni', pero lëasca' tu' té'ënnë' ila'lé'enë' Lázaro, bönni' na' busub-anë' Jesús lu yöl-la' guti. <sup>10</sup> Ní'irö gulún xtídza'gaquië' yugu' bixúz unná bë', ilútië' ca' Lázaro, <sup>11</sup> tu' ta'yéajlë' zian bönni' judío Jesús ni'a queë' Lázaro na', en chin-ulá'alengaquië' yugu' bixúz unná bë' na'.

### Len yöl-la' ba zxön razië' Jesús Jerusalén

(Mt. 21:1-11; Mr. 11:1-11; Lc. 19:28-40)

<sup>12</sup> Bönachi zian bila'dxin Jerusalén dza Laní Pascua, ate' dza buropi na' ta'yöni zë'ë Jesús ni'. <sup>13</sup> Ní'irö gula'guitsjë' zin, en bila'rúajë' söjxí'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

<sup>14</sup> Budzólínë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rna:

<sup>15</sup> ¡Bití' gádxilí, libí'ilí, zóalí' yödzö Sión!

¡Buli'yútsöca', zë'ë Bönni' inná bé'enë' libí'ilí!

¡Dxië'-ba' tuba' búrrodo'!

<sup>16</sup> Cate' ni' si' guca lë ni, bití' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguëquinë' lë ni nazúaj lu guichi lá'ayi ca ral-la' gaca queë', ate' guca queë' caní.

<sup>17</sup> Lëasca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. <sup>18</sup> Que lë ni na' ca' bila'rúajë' bönni' yöjxí'gala'gaquië' Jesús, tu' bila'yönnë' ca naca yöl-la' huáca ni benë' Lë'. <sup>19</sup> Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' bití' bi séqui'ru' gunru'. Buli'yú ca dá-gaca yúgu'të bönachi Lë'.

### Yugu' bönni' zi'tu' tu'guiljë' Jesús

<sup>20</sup> Bal-lë' bönni' zi'tu' dzágagaquië' nupa na' bila'dxin Jerusalén dza Laní Pascua na' para ila'yéaj lãdxí'gaquië' Dios. <sup>21</sup> Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yue' lahuë', ta'nnë':

—Bönni', ré'ënitú ilé'etu'-në' Jesús.

<sup>22</sup> Guyijë' Felipe na', en yöjödxe' ca' Andrés. Ní'irö Andrés, en Felipe na' gulé' ca' Jesús. <sup>23</sup> Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. <sup>24</sup> Le nácatë rea' libí'ilí:

Ugá'ana cá'asó tu xisedó' channö cabí igachi' luyú, en údxí que. Channö údxí que xisedó' na', ate' ilén, yén-ni'tërö unödzej. <sup>25</sup> Nu bönni' ru'í lãdxí'dë'ë yöl-la' na'bán queë', unítië' le, tu' gátie' tsaz bönni' na'. Nu bönni' bití' ru'í lãdxë'ë yöl-la' na'bán dë queë' yödzölió ni gun chí'ë le ga idxinrö dza gata' yöl-la' na'bán idú queë'. <sup>26</sup> Channö ré'ënë' nu bönni' gunë' xichina', ral-la' tē'ë neda' bönni' na', ate' ga ni' tsöjsó'a neda', ni' tsöjsó'e' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

### Riguíxjö'ë Jesús ca si' ilútië' Lë'

<sup>27</sup> Gunnë' ca' Jesús:

—Na'a róa böniga neda'. ¿Nacxi innatsa'? ¿Naru' inía': Xuza', busólá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a.

<sup>28</sup> Xuza', ben ga ilá' lahui yöl-la' zxön quiu'.

Ní'irö biyón chí'í Nu ru'í didza' yehua' yubá, rna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

<sup>29</sup> Bila'yöni bönachi zian nacua' ni' chí'í ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lenë' Lë' didza'.

<sup>30</sup> Ní'irö bubí'ë didza' Jesús, rë' légaquië':

—Biyón chí'í ni, calëga para uzí'a xibé neda', pero para uzí'ilí' xibé libí'ilí'. <sup>31</sup> Chibidxín dza uchí'a usöröë' Dios bönachi yödzölió ni. Na'a chú'unë' Dios tu' xihui' ní'ilö, nu na' rinná be'e bönachi yödzölió ni. <sup>32</sup> Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

<sup>33</sup> Didza' ni bë'ë Jesús naca bë' ca gátie'. <sup>34</sup> Bönachi zian na' tē Jesús, ta'nná:

—Netu' biyónitu' nupa bulu'laba le rna xibá queë' Dios, lë na' rna: Sóatica'sé' Cristo. ¿Nacxi caz naca, rno' Lí': "Run bayudxi Bönni' Guljë' Bönachi, ulu'chisë' Lë' xitsá'?" ¿Nuzxi na' Bönni' Guljë' Bönachi?

<sup>35</sup> Ní'irö Jesús rë' légaquië':

—Ia'tú chí'ido'osó sóalena' neda' libí'ilí, en naca' bení queé'li'. Guli'tá tsanni ni zóalena' libí'ilí, en zóalen bení libí'ilí, para cabí ichul-la inítilí'. Nu bönni' ridé' ga chul-la niti bití' nózinë' gazxi sa'yéajë'. <sup>36</sup> Tsanni ni zóalena' libí'ilí, naca' bení queé'li'. Guli'tséajlë' neda' naca' bení queé'li' para ilé'elí' bení na' naca idú.

Cate' Jesús budxi bë'ë didza' ni, yöjhuöjë' yöjcatchi' lahuë' lógaquië'.

### Le run nigui bönachi judío, para cabí ila'yéajlë' Jesús

<sup>37</sup> Sal-la' benë' Jesús zian yöl-la' huáca lógaquië', bití' gula'yéajlë' Lë'. <sup>38</sup> Caní guca lë na' buzúajë' Isafas lu guichi, bönni' na' bë'ë didza' uláz queë' Dios, gunné: Xan, ¿nuzxi caz guyéajlë' didza' bé'ëtu'?

¿Nuzxi caz bulu'ínè' Xanru' yöl-la' huáca queë'?

<sup>39</sup> Caní guca, bití' guca ila'yéajlè'è Jesús. Guca ca na' gunné' ca' Isaías:

<sup>40</sup> Dios benè' ga gula'chul-la gula'nítiè',  
ate' guca zidi ládxi'do'gaquiè'  
para cabí ila'lé'enè' len guió'j lógaquiè',  
en cabí ila'yéajni'ínè' lu icja ládxi'do'gaquiè'.

Bití' ulu'huóáquiè' quia' para úngaca'-nè'.  
<sup>41</sup> Bè'è Isaías didza' ni tu' bilé'enè' yöl-la' zxon queë'  
Cristo, en bè'è didza' ca naca queë' Lè'. <sup>42</sup> Sal-la' raca  
caní, gula'yéajlè' bönachi zían Jesús, ga bidxintè gu-  
la'yéajlè'è bal-lè' bönni' unná bè' Lè', pero tu' tádxinè'  
yugu' bönni' yudo' fariseo, bití' gulunè' ba nalf queë'  
yálajdo', para cabí ulu'béajè' légaquiè' tsaz ga na' tu'-  
dubè' tu'sédè' queë' Dios. <sup>43</sup> Caní gulunè' tu' tunrè' zxon  
le tun bönachi légaquiè' bal ca le runè' Dios légaquiè'  
bal.

### Ilún didza' bè'è Jesús ga irugu quégaca bönachi ilátiga- ca

<sup>44</sup> Bè'è zidzaj didza' Jesús, rnnè':

—Nu bönni' réajlè'è neda', calèga néda'sö réajlè'è,  
pero réajlè'è ca' Xuza' nasól-lè'è neda'. <sup>45</sup> Lësca' caní, nu  
bönni' rilé'enè' neda', rilé'enè' ca' Xuza' nasól-lè'è neda'.  
<sup>46</sup> Neda' naca' bení', en bida' yödzülió ni, para cabí  
ulu'gá'anè' ga chul-la yúgu'tè bönni' ila'yéajlè'è neda'.  
<sup>47</sup> Channö riyönnè' nu bönni' xtídzá'a, en bití' runè' le  
bal, calèga neda' ichuga' queë' bönni' na' gátie', tu'  
bida' ni, calèga para ichuga' quégaca bönachi yödzülió  
ni, pero para usólá' bönachi yödzülió ni. <sup>48</sup> Nu bönni'  
ruzóè' neda' tsólá'alö, en bití' rizí' lu nè'è xtídzá'a,  
chizóa le ichugu queë' bönni' na'. Didza' na' chibé'lena'  
libí'ili' naca tu le ichugu queë' bönni' na' dza údxi.  
<sup>49</sup> Caní naca, ruá'a didza', calèga rácasö quia', pero  
Xuza' nasól-lè'è neda' gudxè' neda' le ral-la' innía', enca'  
ca ral-la' gu'a didza'. <sup>50</sup> Nözda' gunná bè'è Dios caní  
para gata' yöl-la' na'bán idú quégaca bönachi. Caní  
naca, didza' na' ruá'a, ruá'a didza' ca na' Xuza' chigudxi  
cazé' neda'.

### Jesús riguibè' ní'agaquiè' bönni' usèda queë'

**13** Ní' naca dza sí' idxín Laní Pascua cate' tu'sub-  
anè' bönni' judío ca benè' Dios, bubéajè' bönachi  
queë' luyú Egipto. Nözínè' Jesús chibidxín dza queë'  
gátie', cate' ral-la' uzé'è yödzülió ni, en huöjè' ga zoè'  
Xuzè'. Ca na' nadxí'inè' bönachi queë' nacuá' yödzülió  
ni, na' nadxí'inè' légaquiè' ga idxintè gátie' uláz qué-  
gaquiè'.

<sup>2</sup> Satanás tu' xihuí' chinagú'u yöl-la' Judas Iscariote,  
zxí'inè' tu bönni' lè' Simón, para udödè' Jesús lu ná'aga-  
ca nupa iluti Lè'. <sup>3</sup> Nözínè' Jesús ca naca, birúajè' ga  
zoè' Dios, en huöjè' ca' ga na' zoè' Dios, ate' Dios Xuzè'  
chinudödè' lu nè'è Lè' idütè yöl-la' unná bè' queë'.

<sup>4</sup> Que lè ni na', cate' ní' tahuè', guzúnè' Jesús, en  
gudúè' lari' rixóa yenè'. Gudélè'è tu lari' ruzxini ná'aru'  
le budè'è lè'è. <sup>5</sup> Ní'irö gudé'è nisa tu lu zxiga' guíè, ate'

gusí lahuè' riguibè' ní'agaquiè' bönni' usèda queë', en  
ruzxinè' ní'agaquiè' len lari' na' da' lè'è.

<sup>6</sup> Cate' bidxinè' ga rö'è Simón Pedro, Pedro na' rè' Lè':  
—Xan, ¿naru' Li' quíbitso' ní'a?

<sup>7</sup> Bubi'è didza' Jesús, rè' lè':

—Lè ni runa', bití' réajni'íninu' na'a, pero huadzé tséa-  
jni'ínu'.

<sup>8</sup> Ní'irö Pedro rè' Lè':

—Bití' ca' quíbi cazu' Li' ní'a.

Jesús rè' lè':

—Channö neda' bití' quiba' lí', bití' ca' séqui'nu' gunu'  
neda' tsözxón.

<sup>9</sup> Ní'irö Simón Pedro rè' Lè':

—Xan, calègasö ní'a quibu', pero quibu' ca' na'a, en  
icja'.

<sup>10</sup> Jesús rè' lè':

—Nu nayari, ní'asö run bayudxi tsari, tu' naca cazè'  
dxí'a iduté', ate' libí'ili' nácalí' dxí'a, pero calèga  
yúgu'tèlì'.

<sup>11</sup> Gunné' caní Jesús: "Calèga yúgu'tèlì' nácalí' dxí'a",  
tu' nözínè' nülögaquiè' na' udödi Lè'.

<sup>12</sup> Gudödi gudibè' Jesús ní'agaquiè', buguelè'è lari' na'  
buxóa yenè'. Bubö'è ga tahuè', ate' rè' légaquiè':

—¿Réajni'ili' lè na' sí' bena' queé'li'? <sup>13</sup> Libí'ili' ru'í'ili' La:  
Bönni' Usedi enca': Xan. Dxí'a naca ca rnnalí', tu' caní  
naca'. <sup>14</sup> Na'a, channö neda' naca' Xanlí', en Bönni' Use-  
di queé'li', ate' gudiba' ní'ali', lësca' caní ral-la' gunlí'  
libí'ili', quíbili' ní'a luzá'ali' tuli' ia'tuli'. <sup>15</sup> Tu le bulu'ida'  
libí'ili' para gunlí' libí'ili' ca na' bena' neda'. <sup>16</sup> Le nácatè  
rea' libí'ili': Bití' nayépisètèrè' tu bönni' huen dxin ca  
xanè', ate' bönni' gubáz bití' nayépisètèrè' ca nu nasól-  
la' lè'. <sup>17</sup> Channö réajni'ili' yúgu'tè lè ni, bica' ba libí'ili'  
channö gunlí' caní. <sup>18</sup> Didza' ni ruá'a bití' rea' yúgu'tèlì'.  
Nöz quézida' nupa guró caza' neda', pero run bayudxi  
gaca lè na' nazúaj lu guichi lá'ayi, le rnna: "Nu rágulen  
neda' tsözxón, nu ni tá'baga' neda'." <sup>19</sup> Na'a riguixjö'i-  
da' libí'ili' zí'alö ca gaca, para cate' gaca caní, tséajlè'èlì'  
zoa caza' neda'. <sup>20</sup> Le nácatè rea' libí'ili': Nu bönni' gunè'  
bal gubáz isól-la'a neda', neda' ca' gunè' bal, ate' nu  
bönni' gunè' neda' bal, gunè' ca' bal Xuza', nasól-lè'è  
neda'.

### Riguixjö'è Jesús ca gunè' Judas, udödè' Lè'

(Mt. 26:20-25; Mr. 14:17-21; Lc. 22:21-23)

<sup>21</sup> Cate' Jesús budxi bè'è didza' ni, buí'innè', ate' yálaj-  
do' gunné':

—Le nácatè rea' libí'ili': Tu bönni' nútsè'è ladjali'  
udödè' neda'.

<sup>22</sup> Ní'irö bulu'yú lo luzá'agaquiè' tuè' ia'tué' bönni' usè-  
da queë', en gula'cu'è böniga, ate' ta'naba ládxi'gaquiè'  
nuzxi que na' gunné' Jesús caní. <sup>23</sup> Tuè' bönni' usèda  
queë' Jesús, bönni' na' Jesús nadxí'inè' lè', zoè' cuita  
lè'è. <sup>24</sup> Simón Pedro bulá'a bulu'isè' bönni' ni para in-  
ábinè' Jesús nuzxi que na' gunné' caní. <sup>25</sup> Ní'irö bönni'  
na' zoè' cuita lè'è Jesús rè' Lè':

—Xan, ¿nuzxi na' ru'u didza' que?

<sup>26</sup> Bubi'è didza' Jesús, rè' lè':

—Náquiè' bönni' na' gu'a-nè' yöta xtila nabisa.

Ní'irö busubisië' yöta xtila na', en bë'ë queë' Judas Iscariote, xzí'inë' tu bönni' lë' Simón. <sup>27</sup> Gudödi gudahuë' Judas yöta xtila na', guyaza Satanás tu' xihui' icja ládxí-da'ahuë'. Ní'irö Jesús rë' lë':

—Lë na' gunu', yöjentë na'a.

<sup>28</sup> Biti' ta'yéajni'inë' ia'zica'rë' bönni' usëda queë' röö-gaquië' tahuë' bizx que na' Jesús gudxë' lë' caní. <sup>29</sup> Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yöxi' le gáguru' laní, o gunné: Bë' lati' quégaca bönachi yechi'. <sup>30</sup> Cate' budxi gudahuë' Judas yöta xtila na', en ní' naca chí' dzó'ölö, la' birúajtë'.

### Tu xibá cubi

<sup>31</sup> Cate' chibirúajë' Judas na', ní'irö gunné' Jesús:

—Na'a chizóa ilá' lahui yöl-la' xzön quia' neda', Bönni' Guljë' Bönachi, en ilá' lahui ca' yöl-la' xzön queë' Dios.

<sup>32</sup> Channö ilá' lahui yöl-la' xzön queë' Dios ní'a quia' neda', Xzí'inë', lësca' Lë cazë' Dios gunë' ga ilá' lahui yöl-la' xzön quia' neda', Xzí'inë', en la' guntë' caní.

<sup>33</sup> Libí'ili', xzí'ina'do', ia'tú chí'isö zóalena' libí'ili'. Uguíljalí' neda', ate' ca na' chigúdxigaca'-në' bönni' judío, lësca' rea' libí'ili' na'a: Ga na' tseja' neda', biti' gaca guídali' rá-casö queé'li'. <sup>34</sup> Rea' libí'ili' tu xibá cubi le rnna caní: Gulí'dxí'li' luzá'alí' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'alí' tuli' ia'tuli'.

<sup>35</sup> Channö huadxi'li' luzá'alí' tuli' ia'tuli', iléquibe'e yúgu'të bönachi dá'alí' neda'.

### Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Lc. 22:31-34)

<sup>36</sup> Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

<sup>37</sup> Pedro rë' Lë':

—Xan, ¿bizx que biti' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

<sup>38</sup> Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'alö ca códxiba' böra, li' tá'bágu'u tsonna luzuí, innó' biti' núnbë'u neda'.

### Náquië' Jesús nöza tséajlenru' para idxinru' ga zoë' Dios Xuz

**14** Rnnë' Jesús:

—Biti' cö'li' baniga lu icja ládxí'do'oli'. Gulí'tséajlë' Dios, en guli'tséajlë' ca' neda'. <sup>2</sup> Lu yu'u lidxë' Xuza' lataj zían nacua'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queé'li' ga tsöjsóal-i'. <sup>3</sup> Channö huayéaja', en tsöjpá'a lataj queé'li' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsóa' neda', tsöjsóali' ca' libí'ili'. <sup>4</sup> Nöz quézilí' ga ní' tseja', en núnbë'ëli' ca' nöza.

<sup>5</sup> Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbë'ëtu' nöza?

<sup>6</sup> Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ní'a quia' néda'sö gaca nu idxín ga zoë' Dios Xuz. <sup>7</sup> La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'ëli'-në'.

<sup>8</sup> Ní'irö Felipe rë' Lë':

—Xan, buluí' netu' Xuzu', ate' nácatë queé'tu'.

<sup>9</sup> Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí' netu' Xuzu'"? <sup>10</sup> ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. <sup>11</sup> Gulí'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunlí' caní, guli'tséajlë' neda' ní'a quégaca dxin ni runa'. <sup>12</sup> Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le xzöntëro ca' gunë' bönni' na' tu' huöja' ga zoë' Dios Xuz. <sup>13</sup> Yúgu'të le inábilí' Dios Xuz, en ugunlí' dxin La' neda', neda' guna' lë na' inábali', para ulu'a lahui neda', Xzí'inë', yöl-la' xzön queë' Dios Xuz. <sup>14</sup> Bítitës bi inábali', en ugunlí' dxin La' neda', neda' guna' le.

### Jesús isól-lë'ë Dios Bö' Lá'ayi, para idisóalenë' bönachi queë'

<sup>15</sup> Rnnë' ca' Jesús:

—Channö nadxí'ili' neda', guli'gún le rea' libí'ili', <sup>16</sup> ate' neda' gáta'yua' lahuë' Dios Xuz, ate' Lë' isól-lë'ë queé'li' Nu yúbölö Nu gácalen libí'ili', Nu utipa ládxí'li', en sóalenticasö libí'ili'. Nu ni naca Dios Bö' Lá'ayi, Nu ruí' didza' idútë li. <sup>17</sup> Biti' gaca ulu'z' bönachi yödzülió ni xibé' Lë', tu' cabí gaca ila'lé'e Lë', en biti' gaca ilúnbe'e Lë'. Zóalen cazë' libí'ili', ate' soë' lu icja ládxí'do'oli'. <sup>18</sup> Biti' ucá'ana' libí'ili' ca yugu' bi' uzé'bido'. Huöda' udusóalena' libí'ili'. <sup>19</sup> Ia'tú chí'ido'osö bítirö ila'lé'e bönachi yödzülió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanlí'. <sup>20</sup> Dza ní'irö cate' Dios Bö' Lá'ayi na' idisóalenë' libí'ili', inóz quézilí' zóalen caza'-në' Xuza' Dios, ate' libí'ili' zóalenlí' neda', ate' neda' ca' zóalen caza' libí'ili'. <sup>21</sup> Nu bönni' rizí' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en uluí' lahua' lahuë'.

<sup>22</sup> Judas rë' lë', pero calëga Judas Iscariote, rnnë':

—Xan, ¿nacxi caz gaca uluí' lo' lotu' netu', en biti' uluí' lo' lógaca bönachi yödzülió?

<sup>23</sup> Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxí'da'ahuë'. <sup>24</sup> Bönni' na' biti' nadxí'inë' neda' biti' runë' ca rnna xtídza'a. Didza' na' biyönili' bë'a neda', calëgasö quia' na', pero naca queë' Dios Xuz nasól-lë'ë neda'.

<sup>25</sup> 'Rè caza' libí'ili' yugu' lè ni tsanni ni zóalena' libí'ili',  
<sup>26</sup> pero Dios Bō' Lá'ayi gácalenë' libí'ili', en utipë' láchxí'li'.  
Xuza' Dios isól-lë'è Lë' queé'li' tu' ugunlí' dxin La' neda'.  
Usédinë' libí'ili' yúgu'të, en usé'è láchxí'li' ca naca  
yúgu'të didza' na' chigudxa' libí'ili'.

<sup>27</sup> 'Rucá'ana' queé'li' le cuéqui dxi láchxí'li'. Runna'  
queé'li' yöl-la' rō'ō dxi láchxí' quia'. Yöl-la' rō'ō dxi láchxí'  
na' runna' queé'li' bití' naca ca le tunna queé'li' bōnachi  
yōdzōlió ni. Bití' ichixi icja láchxí'do'oli', en bití' gadxi  
idzōbili'. <sup>28</sup> Chibiyōnili' ca na' chigudxa' libí'ili': Huōja',  
ate' huōda' udusóalena' libí'ili'. La'tu' nadxí'ili' neda',  
udzéjali' cate' ni' gudxa' libí'ili' huōja' ga zoë' Dios Xuz,  
tu' nayépisëtë'rë' Dios Xuz ca neda'. <sup>29</sup> Na'a, chigudxa'  
libí'ili' zí'alō ca sí' gaca, para cate' gaca caní, tséajlë'ëli'  
neda'.

<sup>30</sup> 'Bítirō' gū'ílena' libí'ili' didza' zían, tu' za' tu' xihui',  
nu rinná be'e bōnachi yōdzōlió ni. Sal-la' bití' bi dë lu  
në'e bi gun quia' neda', ral-la' gaca caní para iléquibe'e  
bōnachi yōdzōlió ni nadxí'ida'-në' Dios Xuz, en runa' ca  
na' chigudxë' neda' guna'. Gulí'chasa, uzá'aru' ni.

#### Ca naca que lubá uva, en nía në'e lubá na'

**15** Lësca' caní Jesús gudxë' légaquie':  
—Naca' neda' ca tu lubá uva le naca idú dxi'a,  
ate' Xuza' náquie' ca bōnni' guz gú'una rapa chi'ë lubá  
na'. <sup>2</sup> Ugúë' yúgu'të nía në'e lubá na' naca' neda', le  
cabí bi ta'bía, ate' uchi'ë yúgu'të nía në'e na' ta'bía,  
para ila'bía ia'lati'. <sup>3</sup> Libí'ili' chinácali' dxi'a nía que didza'  
na' chibé'lena' libí'ili'. <sup>4</sup> Gulí'dática'sō neda', ca na' neda'  
dática'sa' ca' libí'ili'. Ca naca que nía në'e lubá na', bití'  
gaca bi cuía rácasō que, channō cabí dática'sō lubá  
na', lësca' caní naca queé'li', bití' bi gaca gunlí' channō  
cabí tá'tica'sili' neda'.

<sup>5</sup> 'Naca' neda' ca lubá na', ate' libí'ili' nácali' ca nía  
në'e. Nu bōnni' dática'së' neda', ca na' neda' dática'sa'  
lë', bōnni' ni náquie' ca nía në'e lubá na' ribía yenni', tu'  
channō nulá'alenli' neda', bití' bi gaca gunlí'. <sup>6</sup> Nu bōn-  
ni' bití' dática'së' neda', gaca queë' ca raca quégaca nía  
në'e lubá na' bití' nácagaca dxi'a, ta'ru'unë' nía në'e na',  
ate' ila'bidxi. Cate' chinábídxigaca nía në'e na', ulu'-  
tubë' léguequi, en ila'gu'ë léguequi lu guí, ate'  
tséguigaca.

<sup>7</sup> 'Channō tá'tica'sili' neda', en gunlí' ca rnna xtídza'a,  
huáca inábalí' bi gué'ënili', ate' neda' guna' lè na' in-  
ábalí'. <sup>8</sup> Gunlí' bal Xuza' Dios cate' gunlí' xichinë', ate'  
gácali' ca nía në'e lubá na' ta'bía, en caní gaca bë' ná-  
cali' idú bōnni' ta'dé'ë neda'. <sup>9</sup> Ca na' nadxí'inë' Dios Xuz  
neda', lësca' caní nadxí'ida' libí'ili'. Gulí'gúntica'sō ca ral-  
la' gunë' bōnni' nadxí'ida'-në'. <sup>10</sup> Channō gunlí' ca rea'  
libí'ili', gunlí' ca ral-la' gunë' bōnni' nadxí'ida'-në', ca na'  
neda' ca' runa' ca chigudxë' Xuza' Dios neda' guna', en  
rúntica'sa' le raza láchxë'è Lë', Bōnni' na' nadxí'inë'  
neda'.

<sup>11</sup> 'Yugu' didza' ni rea' libí'ili' para udzéaleni' tsōzxon'  
neda', en gaca idú ca na' udzéjali'. <sup>12</sup> Lë ni naca le rea'  
libí'ili' gunlí': Gulí'dxí'i luzá'ali' tulí' ia'tulí', ca na' neda' ca'  
nadxí'ida' libí'ili'. <sup>13</sup> Bití' gaca idxí'irōnë' nu bōnni' luzé'ë  
ca nu bōnni' udōdë' yöl-la' na'bán queë', gátië' para gá-

calenë' yugu' böchi' luzé'ë tu' nadxí'inë' légaquie'.

<sup>14</sup> Libí'ili' nácali' böchi' luzá'a channō gunlí' ca na'  
chigudxa' libí'ili' gunlí'. <sup>15</sup> Bítirō innía' queé'li' nácali'  
huen dxin quia', tu' cabí nōzinë' bōnni' huen dxin naca  
gunë' xanë'. Neda' chigunnía' queé'li' nácali' böchi'  
luzá'a, tu' chibena' ga nōzili' yúgu'të le chigudxë' Xuza'  
neda' guna'. <sup>16</sup> Calëga libí'ili' gurōli' neda', pero neda'  
gurō caza' libí'ili', en buzóa' libí'ili' para tséajli' bi tsōjen-  
li', ca na' tun nía në'e lubá na' ta'bía yenni', ate' ugá'a-  
natica'sō lè na' gunlí'. Caní gaca, Xuza' Dios gunnë'  
queé'li' yúgu'të le inábilí' Lë', en ugunlí' dxin La' neda'.  
<sup>17</sup> Lë ni naca le rea' libí'ili' gunlí': Gulí'dxí'i luzá'ali' tulí'  
ia'tulí'.

#### Bōnachi yōdzōlió tu'zóa tsōlál'alō Jesús, en nupa dá'ga- ca Lë'

<sup>18</sup> Gunnë' ca' Jesús:

—Channō bōnachi yōdzōlió ni tu'zóa libí'ili' tsōlál'alō,  
nōzili' chibulu'zōë' neda' tsōlál'alō zí'alō ca tu'zōë' libí'ili'  
tsōlál'alō na'a. <sup>19</sup> La'tu' nácali' tuz len bōnachi yōdzōlió  
ni, huala'dxí'i bōnachi yōdzōlió ni libí'ili' ca na' ta'dxí'i  
luzé'eguequi, pero tu'zóa bōnachi yōdzōlió ni libí'ili'  
tsōlál'alō tu' cabí nácali' tuz len léguequi, tu' gurō caza'  
neda' libí'ili', en guléaja' libí'ili' ladaj bōnachi yōdzōlió  
ni. <sup>20</sup> Gulí'tsōjnë' didza' na' chigudxa' libí'ili', gunnía': Bití'  
nayépisëtë'rë' nu bōnni' huen dxin ca xanë'. Channō  
gula'bía láchxí'gaca bōnachi neda', ila'bía láchxí'gaca ca'  
libí'ili'. Channō nacua' nupa tun ca rnna xtídza'a, ilún  
ca' ca rnna xtídza'li' libí'ili'. <sup>21</sup> Yúgu'të lè ni ilún bōnachi  
queé'li' tu' dá'ali' neda', tu' cabí núnbë'gaca Dios Xuz  
nasól-lë'ë neda'.

<sup>22</sup> 'La'tu' cabí bida', en la'tu' cabí bé'lena' légaquie'  
didza', bití' ila'báguë'è dul-la', pero na'a tu' bida' ni, bití'  
bi gaca ila'nnë' que dul-la' nabága'gaquie' le ubéaj lé-  
gaquie' dxi'a. <sup>23</sup> Nu bōnni' ruzōë' neda' tsōlál'alō, ruzōë'  
ca' Xuza' Dios tsōlál'alō. <sup>24</sup> La'tu' cabí bena' yugu' yöl-la'  
huáca ga nacué', yugu' le cuntú nu ben ca gulaca, bití'  
ila'báguë'è dul-la'. Na'a, bila'lé'enë' yugu' lè na' bena',  
ate' tu'zōë' neda' tsōlál'alō, en tu'zōë' ca' Xuza' tsōlál'alō.  
<sup>25</sup> Caní raca, para gaca ca rnna xtídzë'è Dios, le nazí' lu  
ná'agaquie', le rnna: Tu'zōë' neda' tsōlál'alō, en bití' zoa  
bizx que.

<sup>26</sup> 'Cate' idxinë' Dios Bō' Lá'ayi, Bōnni' ru'ë didza' idútë  
li, en gácalenë' libí'ili', utipë' láchxí'li'. Isól-la'a Bōnni' na'  
queé'li' uláz queë' Dios Xuz, ate' gunë' ba nalí quia'  
neda'. <sup>27</sup> Libí'ili' ca' gunlí' ba nalí quia', tu' zóalen cázali'  
neda' tsōzxon' dza ní'te.

**16** Gunnë' ca' Jesús:

—Yugu' didza' ni chigudxa' libí'ili', para cabí  
gaca chopa láchxí'li'. <sup>2</sup> Yugu' bōnni' judío ulu'béajë' libí'ili'  
tsaz ga tu'dubë' tu'sédë' queë' Dios, ate' idxín dza cate'  
nu bōnni' gútië' libí'ili' guéquinë' dxin queë' Dios runë'.  
<sup>3</sup> Caní ilunë', tu' cabí núnbë'gaquie' Dios Xuz, en cabí  
núnbë'gaquie' neda'. <sup>4</sup> Rea' libí'ili' yugu' didza' ni, para  
cate' idxín dza na', tsōjnëli' didza' ni chigudxi caza'  
libí'ili'.

### Le gunë' Dios Bö' Lá'ayi

Gunnë' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'. <sup>5</sup> Na'a huöja', tsöjsóalena'-në' Dios Xuz, nasól-lë'ë neda'. Bití' inábili' neda' nituli' libí'ili', bití' innali': ¿Gazxi tseju? <sup>6</sup> Na'a, tu' rea' libí'ili' yugu' didza' ni, risëbi lãdxi'li'. <sup>7</sup> Neda' rea' libí'ili' le naca idútë li. Gá-carö dxi'a queéli' huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' lãdxi'li', pero channö huöja', isól-la'a-në', na' idisóalenë' libí'ili'. <sup>8</sup> Cate' guídë' Lë', gunë' ga iléquite'e bönachi yödzölió ni nabága'gaca dul-la', en bití' núnbë'gaca le naca tsahui', ate' ichúguië' Dios quéguequi ilátigaca. <sup>9</sup> Nabága'gaquië' dul-la' tu' cabí ta'yéajlë'ë neda'. <sup>10</sup> Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bíti'rö ila'lé'enë' neda'. <sup>11</sup> Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

<sup>12</sup> 'Ia'zica' zían didza' ré'ënda' gü'ílena' libí'ili', pero bití' gaca tséajni'ilí' na'a. <sup>13</sup> Cate' guídë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inózili' yúgu'të le ral-la' gaca. <sup>14</sup> Lë' gunë' neda' bal, tu' si'ë le nequi quia', en gunë' ga inózili' le. <sup>15</sup> Yúgu'të le nequi queë' Dios Xuz nequi quia'. Que lë ni na' gunniá' si'ë le nequi quia', en gunë' ga inózili' le.

### Yöl-la' risëbi lãdxi' queéli' huóca yöl-la' rudzeja

<sup>16</sup> Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

<sup>17</sup> Ní'irö bönni' usëda queë' gulé luzá'agaquië' tuë' ia'túë', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz."

<sup>18</sup> Ní'irö gula'nnë':

—¿Bizxi caz ré'ëni inná didza' ni, gunné': "Ia'tú chí'ido'osö"? Bití' réajni'itu' didza' ni ru'ë.

<sup>19</sup> Réquite'enë' Jesús té'ënnë' ila'nábinë' Lë', ate' rë' lé-gaquië':

—¿Naru' rinábitsö luzá'ali' ca naca que didza' na' bë'a, gunniá': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'? <sup>20</sup> Le nácatë rea' libí'ili': Códxilí', en isëbi lãdxi'li', pero bönachi yödzölió ni ulu'dzeja cate' iluti neda'. Ní'irö sal-la' isëbi lãdxi'li', yöl-la' risëbi lãdxi' queéli' huóca yöl-la' rudzeja cate' ulé'eli' neda'. <sup>21</sup> Tu nigula cate' chizóa gáljabí' bí'ido' queënu, rigu'í rizáca'nu, tu' chibidxín dza queënu, pero cate' chizóabi' tubi' bí'i bónni'do' queënu, bíti'rö rójnenu lë na' butságanu, tu' rudzéjanu tu' chigúljabí' tubi' bí'i bónni'do' yödzölió ni. <sup>22</sup> Lësca' caní raca queéli', risëbi lãdxi'li' na'a, pero huóda' uduyúa' libí'ili',

ate' ní'irö udzeja lãdxi'li', ate' bití' séqui'në' nu bönni' ugüë' yöl-la' rudzeja queéli' na'.

<sup>23</sup> 'Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunné' queéli'. <sup>24</sup> Ga ridxintë na'a dza bití' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queéli'.

### Ridéli'në' Jesucristo lu le raca yödzölió ni

<sup>25</sup> Gunnë' ca' Jesús:

—Yugu' lë na' chibé'lena' libí'ili' didza' bucúdu'á didza'. Huadxín dza cate' bíti'rö gü'ílena' libí'ili' didza' le rucúdu'á didza', pero yálajdo' gü'ílena' libí'ili' didza' ca naca queë' Dios Xuz. <sup>26</sup> Dza na' inábili'-në' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queéli', tu' nadxí'inë' Lë' cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. <sup>28</sup> Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

<sup>29</sup> Ní'irö yugu' bönni' usëda queë' gulé' Lë', ta'nnë':

—Na'a ru'u didza' yálajdo', en bíti'rö rucúdu'u didza'.

<sup>30</sup> Na'a réquite'etu' nöz quézinu' Li' yúgu'të, en bití' run bayudxi nu bi inabi yudxi Li', tu' rigu'ixjöl'inu' netu' le si' inábatu'. Que lë ni na' réajlë'ëtu' birúaju' ga zoë' Dios.

<sup>31</sup> Bubi'ë didza' Jesús, rë' légaquië':

—¿Naru' réajlë'tsali' neda' na'a? <sup>32</sup> Buli'yú, huadxín dza, en chiridxín dza na', cate' gásilasili' que queéli', en ucá'analí' neda' tuza', pero bití' soa' tuza', tu' zóalen cazë' Dios Xuz neda'. <sup>33</sup> Yugu' didza' ni chigudxa' libí'ili' para cuéqui dxi lãdxi'li', tu' nácali' quia' neda'. Lu yödzölió ni gaca queéli' le usaca' zí' libí'ili', pero buli'tipa lãdxi'li'. Neda' chibidéli'da' lu le raca yödzölió ni.

### Jesús rinábinë' Dios gácalenë' nupa dá'gaca Lë'

**17** Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxon quia' neda', Zxi'inu', para gaca guna' ga ilá' lahui yöl-la' zxon quiu' Li'. <sup>2</sup> Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. <sup>3</sup> Lë ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasól-lu'u neda'.

<sup>4</sup> 'Neda' chibena' ga nalá' lahui yöl-la' zxon quiu' yödzölió ni, en chibudxi bena' dxin na' budödu' lu na'a. <sup>5</sup> Na'a, Xuz, ben ga ilá' lahui yöl-la' zxon napa' tsözxón len Li', para gaca quia' yöl-la' zxon guta' quia' tsözxón len Li' dza ni'te quez cate' si' gata' yödzölió.

<sup>6</sup> 'Chibulu'a lahui le nacu' Li' lógaquië' bönni' ni bennu' quia', nupa na' guró cazu' Li' ladaj bönachi yödzölió. Guléquinë' bönni' ni quiu', ate' bennagacu'në' quia', ate' tunë' ca rna xtídu'u. <sup>7</sup> Na'a nózguequinë' yúgu'të lë na' bennu' quia' zá'gaca lu no'o Li', <sup>8</sup> tu' chibudöda' lu ná'agaquië' didza' na' budödu' Li' lu

na'a neda', ate' légaquië' nazí' lu ná'agaquië' le, en téquibe'enë' birúaja' ga zu' Li', ate' ta'yéajlë' Li' nasól-lu'u neda'.

<sup>9</sup>Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzülió, pero gácalengacu'-në' bönni' ni chibënnagacu'-në' quia', tu' néquiguequinë' quiu'. <sup>10</sup>Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca ná'cagaca nupa na' rulu'í lahui yöl-la' xzön quia'.

<sup>11</sup>'Na'a, bíti'rö ugá'ana' yödzülió ni, pero yugu' bönni' ni ulu'gá'anë' yödzülió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilá'cagaca tuz, ca na' ná'caru' ré'u tuz.

<sup>12</sup>Cate' ní' guzóalena' légaquië' yödzülió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunitia'-në', pero tuzë' bönni' na' ná'quië' ca xzí'ini tu' xihuí, en narugu queë' gátië' tsaz. Caní' raca ca nazúaj lu guichi lá'ayi.

<sup>13</sup>'Na'a udusóalena' Li', ate' tsanni ni zoa' yödzülió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. <sup>14</sup>Neda' chibudöda' lu ná'agaquië' xtídz'u, ate' bönachi yödzülió ni tu'zóa légaquië' tsólá'alö tu' cabí ná'cagaquië' tuz len léguequi, ca na' naca quia' neda', bití' naca' tuz len bönachi yödzülió ni. <sup>15</sup>Ráta'yua' Lo', calëga cúagacu'-në' yödzülió ni, pero gun chí'igacu'-në', para cabí ila'dzunë' lu na' tu' xihuí. <sup>16</sup>Bití' ná'cagaquië' tuz len bönachi yödzülió ni ca na' naca quia' neda', bití' naca' tuz len bönachi yödzülió. <sup>17</sup>Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. <sup>18</sup>Ca na' benu' Li', gusól-lu'u neda' ladaj bönachi yödzülió ni, lësca' caní' runa' neda', risól-la'gaca'-në' ladaj bönachi yödzülió. <sup>19</sup>Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

<sup>20</sup>'Ráta'yua' Lo', calëga quégacasë' bönni' ni, pero lësca' quégaquië' bönni' ní' ila'yéajlë' neda' ní'a que didza' ilu'ë bönni' ni. <sup>21</sup>Ráta'yua' Lo' gunu' ga ilá'cagaquië' tuz yúgu'të, en ilá'cagaquië' ca' tuz len ré'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní' ral-la' ilá'cagaquië' para ila'yéajlë' ia'zícá'rö bönachi yödzülió ni, Li' caz gusól-lu'u neda'.

<sup>22</sup>Yöl-la' xzön na' bennu' quia', neda' bë'a ca' quégaquië', para ilá'cagaquië' tuz, ca na' ná'caru' tuz ré'u.

<sup>23</sup>Li' nacu' tuz len neda', ate' neda' naca' tuz len légaquië', para gaca idú ca ná'cagaquië' tuz, en caní' iléquibe'e ia'zícá'rö bönachi yödzülió ni, Li' caz gusól-lu'u neda', ate' nadxí'igacanu'-në' ca na' nadxí'inu' neda'.

<sup>24</sup>Xúza'do', ré'ënda' ila'cuá'lenë' neda' bönni' ni bën'nagacu'-në' quia' ga na' tsöjsóa', para ila'lé'enë' yöl-la' xzön na' bennu' quia' dza ní'te cate' sí' gunu' yödzülió tu' nadxí'inu' neda'. <sup>25</sup>Xuza' tsahuí, bönachi yödzülió ni bití' núnbë'gaca Li', pero neda' nunbë' caza' Li', ate' yugu' bönni' ni chinóziguequinë' Li' caz gusól-lu'u neda'. <sup>26</sup>Bena' ga nóziguequinë' le nacu' Li', en gunra'

ca' ga ila'nózinë' lë ni para ca na' nadxí'inu' Li' neda', lësca' caní' ila'dxí'i luzá'agaquië', ate' gaca caza' tuz len légaquië'.

### Ta'zönë' Jesús

(Mt. 26:47-56; Mr. 14:43-50; Lc. 22:47-53)

**18** Cate' budxi bë'ë Jesús yugu' didza' ni, birúajë' ní', ate' sa'yéajlenë' yugu' bönni' usëda queë'. Gudödë' ia'tsólá'a yegu Cedrón, en bidxinë' ga ní' nacuá' yaga olivo ca', ate' lataj ni guyázalenë' yugu' bönni' usëda queë'. <sup>2</sup>Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ní' zían luzuí. <sup>3</sup>Ní'irö guchë'ë Judas tu' cö' bönni' röjáquië' gudil-la, en yugu' bönni' ní'a ná'agaquië' bixúz unná bë', en ní'a ná'agaquië' yugu' bönni' judo' fariseo, ate' yöjáquië' ga ní' zoë' Jesús, nuá'agaquië' yugu' guí' yöri, en yugu' le tu'dí'inë'. <sup>4</sup>Ní'irö, tu' nózinë' Jesús yúgu'të le ral-la' gaca queë', birúajë' ga ní' zoë', en rë' légaquië':

—¿Nuzxi riguíljalí?

<sup>5</sup>Bulu'bí'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalene' légaquië'. <sup>6</sup>Cate' Jesús gudxë' légaquië': "Neda' caz", ní'irö bulu'bíguë'ë cusi xzanlö, en gula'dzö'ë lu yu. <sup>7</sup>Jesús gunábinë' légaquië' leyúbölö, rñ-në':

—¿Nuzxi riguíljalí?

Të' Lë':

—Jesús, bönni' Nazaret, riguíljatu'-në'.

<sup>8</sup>Ní'irö bubí'ë didza' Jesús, rñ-në':

—Chigúdxá' lib'íli': Neda' caz. Channö riguíljalí' neda', gullí'güí'-gáquië' lataj tsöjhuó'jgaquië' bönni' ni.

<sup>9</sup>Caní' gunné' Jesús para idxín didza' na' bë'ë, gunné': "Nupa ni bennu' quia', nitúë' bití' bunitia'-në'." <sup>10</sup>Ní'irö, tu' nu'ë Simón Pedro tu' guíë tuchi', gulecjë' le, en bentë' huë' Malco, tu' bönni' huen dxin queë' bixúz lo, guchúguië' guídi ná'guië' ibëla bönni' na'. <sup>11</sup>Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'í saca'a lë na' chinunë' Xuza' ca gaca quia'?

### Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

<sup>12</sup>Yugu' bönni' na' röjáquië' gudil-la, en bönni' na' nacu'ë lu në'ë, enca' yugu' bönni' ní'a ná'agaquië' bönni' judío unná bë' gula'zönë' Jesús, en gulúguí'ë Lë'.

<sup>13</sup>Ní'irö gula'ché'ë Lë' zí'alö lahuë' Anás, tu' ná'quië' xto' xzí'inë' Caifás, bönni' ná'quië' bixúz lo iz na'. <sup>14</sup>Ná'quië' Caifás bönni' na' buzéajni'inë' yugu' bönni' judío unná bë', bulu'í'inë' légaquië' dxí'arö gaca gátië' tuzë' bönni', en calëga initi idútë yödzo quégaquië'.

**Rnnë' Pedro: "Biti' núnbë'a-në' Jesús"**

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedro, en ia'túë' bönni' usëda queë' Jesús yojáquië' cúdzulë' Lë', söjnéhoquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'. <sup>16</sup> Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bé'lenë'-nu didza' nigula na' run chí'ínu ga nu riyaza lö'a na', ate' benë' ga guyázië' Pedro lö'a. <sup>17</sup> Ní'irö nigula na' run chí'ínu ga nu riyaza lö'a rënu Pedro, rnnanu:

—¿Naru' cabí do'ó ca' lí' bönni' ni?

Bubi'ë didza' Pedro, rnnë':

—Calëga neda'.

<sup>18</sup> Tu' run ziaga, yugu' bönni' huen dxin, en yugu' bönni' ní'a ná'agaca bönachi yudo' nabéquiagaquië' guí', ate' zuíguequinë' ra' guí' na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

**Bixúz lo rinabi yúdxinë' Jesús**

(Mt. 26:59-66; Mr. 14:55-64; Lc. 22:66-71)

<sup>19</sup> Ní'irö gunabi yúdxinë' bixúz lo Jesús para inózinë' nupxi dá'gaca Lë', en nacxi naca le rusedinë' Jesús bönachi. <sup>20</sup> Bubi'ë didza' Jesús, rë' lë':

—Lahui' lo bé'lena' yúgu'të bönachi didza'. Busedi-tiquí'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ní' tu'dubë' yúgu'të bönni' judío, en bití' bi didza' bë'a bagáchi'sö. <sup>21</sup> ¿Bizx que rinabi yúdxinu' neda'? Gunabi yudxi nupa ní' bila'yöni didza' bé'lena' léguequi. Nó'zguequi quézinë' bönni' na' didza' na' bé'lena' légaquië'.

<sup>22</sup> Cate' budxi bë'ë Jesús didza' ni, tu bönni' ní'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

Bubi'ë didza' Jesús, rë' lë':

—Channö bití' gunní'a' dxí'a, gudixjö' bízxilö didza' bë'a bití' naca dxí'a, en channö guca dxí'a didza' bë'a, ¿bizx que na' gudápu'u neda'?

<sup>24</sup> Ní'irö Anás na' gusól-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

**Leyúbölö rnnë' Pedro: "Biti' núnbë'a-në' Jesús"**

(Mt. 26:71-75; Mr. 14:69-72; Lc. 22:58-62)

<sup>25</sup> Cate' ní' zuínë' Pedro ra' guí' rutsë'e cuinë', yugu' bönni' nacué'ë ní' gulé' lë', ta'nnë':

—¿Naru' cabí do'ó ca' lí' Jesús na'?

Gudá'baguië' Pedro, rnnë':

—Calëga neda'.

<sup>26</sup> Zoë' ní' tu bönni' huen dxin queë' bixúz lo, náquië' dí'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' lí' la' yëla ní', dzagu'-në' Jesús?

<sup>27</sup> Leyúbölö gudá'baguië' Pedro, ate' la' guródxitëba' böra.

**Ridxinë' Jesús lahuë' Pilato**

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ní'irö gula'ché'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí' le Pretorio. Chizá' rení' dza na', ate' bití' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ní', le gun ga bití' gaca ilahuë' xtsö' Laní Pascua, laní na' tu'sub-anë' ca benë' Dios, bubéajë' bönachi Israel luyú Egipto. <sup>29</sup> Ní'irö birúajë' Pilato, bönni' na' yu'u lu në'ë, en bidxinë' ga na' nacué'ë, ate' rë' légaquië':

—¿Bizxi ruzéguí'li'-në' bönni' ni didza'?

<sup>30</sup> Bulu'bi'ë didza', të' lë':

—La'tu' cabí nu'ë bönni' ni dö', bití' udóditu'-në' lo'.

<sup>31</sup> Ní'irö Pilato rë' légaquië', rnnë':

—Libí'í cázali' gulí'ché'ë, en bulí'chí'a bulí'sörö Lë' ca rinná bë' xibá queéli'.

Yugu' bönni' judío të' lë', ta'nnë':

—Bití' dë lu na'tu' nu gútitu'.

<sup>32</sup> Caní guca para idxín xtídzë'ë Jesús, le bë'ë naca ralla' gátie'. <sup>33</sup> Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Lí' Bönni' Rinná Bé'enë' Bönachi Judío?

<sup>34</sup> Bubi'ë didza' Jesús, rë' lë':

—¿Naru' rácasö quiu' rno' caní, o gulé' bönachi lí' caní ca naca quia'?

<sup>35</sup> Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Lí' lu na'a. ¿Bizxi caz benu'?

<sup>36</sup> Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' bití' naca ca ta'nná bë' bönachi yödzölió ni.

<sup>37</sup> Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rno'. Que lë ni na' bida' ga gulja' yödzölió ni, para guna' ba nalí que le naca idütë li. Yúgu'të nupa ni tun le naca idütë li tu'zë' nágagaca dí'dza' ruá'a.

<sup>38</sup> Pilato rë' Lë':

—¿Bizxi na' le naca idütë li?

**Ta'chúguië' queë' Jesús gátie'**

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacué'ë bönni' judío unná bë' na', en rë' légaquië':

—Bití' bi dö' ridzólida' nu'ë bönni' ni. <sup>39</sup> Libí'í'li' dë tu le nulaga lolí' runlí' cate' raca Laní Pascua ni, rinábilí' neda' usana'-në' queéli' tuë' bönni' nadzunë'. ¿Ré'ënili' usana'-në' queéli' Bönni' Rinná Bé'enë' Bönachi Judío?

<sup>40</sup> Ní'irö yúgu'të' gulu'ë zidzaj didza' leyúbölö, ta'nnë':

—¡Calëga bönni' ni, pero Barrabás usanu'-në' queé-tu'!

Barrabás na' náquië' gubán.

**19** Ní'irö Pilato guché'ë Jesús, en benë' ga gula'guinë' yugu' bönni' röjáquië' gudil-la Lë'. <sup>2</sup> Bönni' röjáquië' gudil-la na' gulunë' tu bregui' n'á në'e yötsi', ate' bulu'dxië' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë.

<sup>3</sup> Ní'irö gula'biguë'ë lahuë' Jesús, en të' Lë':

—¡Bica' bo' Lì, Bönni' Rinná Bé'enë' Bönachi Judío!

Ní'irö gula'gápë'ë lahuë'.

<sup>4</sup> Ní'irö burúajë' Pilato, en rë' yugu' bönni' judío unná bë', rnnë':

—Bulí'yú, rubéaja'-në' lolí' ni para inózzilí' bití' bi rudzóllida' le naca dö' nu'ë bönni' ni.

<sup>5</sup> Ní'irö birúajë' Jesús, dxía icjë' bregui' n'á në'e yötsi' na', en nácuë' lari' tunna xiná chul-la na'. Pilato rë' lé-gaquië':

—Ni zoë' bönni' ni.

<sup>6</sup> Cate' yugu' bixúz unná bë', en yugu' bönni' n'á ná-gaquië' bila'lé'enë' Jesús, zidzaj gulu'ë didza', ta'nnë':

—¡Budé'ë lë'e yaga cruz! ¡Budé'ë lë'e yaga cruz!

Pilato rë' légaquië':

—Libí'i cázali' guli'ché'ë, en guli'tsöjdé'ë lë'e yaga cruz. Neda' bití' bi dö' budzóllida' nu'ë bönni' ni.

<sup>7</sup> Ní'irö bönni' judío na' të' lë':

—Dë queé'tu' tu xibá, ate' rinná bë' xibá queé'tu' na' ral-la' gátië' bönni' ni tu' gunné' náquië' Xzí'inë' Dios.

<sup>8</sup> Cate' biyönnë' Pilato didza' ni, gúdxirönë'.

<sup>9</sup> Leyúbölo buázië' yúlauhí' na', en rë' Jesús:

—¿Gázxitë bönni' Lì?

Bití' bi didza' bubí'ë Jesús.

<sup>10</sup> Ní'irö Pilato rë' Lë':

—¿Naru' cabí ubí'tso' didza', quíxjöi'inu' neda'? ¿Naru' cabí nózinu' dë lu na'a udá'a Lì lë'e yaga cruz, en dë lu na'a usana' Lì?

<sup>11</sup> Bubi'ë didza' Jesús, rë' lë':

—Bití' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca lì.

<sup>12</sup> La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, bití' ridzagu'-në' dxí'a César, bönni' rinná bé'enë' idütë yödzölió. Nu bönni' run cuinë' bönni' rinná bë'ë, ridá'báguë'ë César na'.

<sup>13</sup> Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchí'a rusöröë', lataj na' nazí'i le Lö'a Ga Xzóagaca Guiójtá'a, en ca naca didza' hebreo nazí'i le Gabata. <sup>14</sup> La' dza ná'asö naca dza sí' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

<sup>15</sup> Gulu'ë zidzaj didza', ta'nnë':

—¡Bétië'! ¡Bétië'! ¡Budé'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

<sup>16</sup> Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélé'ë Jesús, en gula'ché'ë Lë' ní'ilö.

### Tu'dé'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

<sup>17</sup> Birúajë' Jesús ní', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. <sup>18</sup> Bulu'dé'ë Jesús lë'e yaga cruz ní', ate' bulu'dá'lenë' Lë' tsözxón lé'egaca yaga cruz ia'chopë' bönni'. Tsölá'a huéaj ta'dé'ë, ate' Jesús dé'ë gatsaj láhuilö chopë' bönni' na'. <sup>19</sup> Gusól-lë'ë Pilato tu bönni' nu'ë le buzúajë' lu guichi le buzóë' lë'e yaga cruz icjlë' Jesús, le rna caní: "Jesús, Bönni' Nazaret, Bönni' Rinná Bé'enë' Bönni' Judío." <sup>20</sup> Bulu'labë' zían bönni' judío didza' ni, tu' zoa ga na' bulu'dé'ë Jesús lë'e yaga cruz gála'sö ra' yödzö, ate' didza' na' nuzúajë' len didza' hebreo, en len didza' griego, en len didza' latín. <sup>21</sup> Yugu' bixúz unná bë' quégaquië' bönni' judío të' Pilato, ta'nnë':

—Bití' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné': Inná bé'eda' bönni' judío."

<sup>22</sup> Bubi'ë didza' Pilato, rë' légaquië':

—Le chinuzúaja', tsaz chinuzúaja'.

<sup>23</sup> Cate' yugu' bönni' na' röjáquië' gudil-la budxi bulu'dé'ë Jesús lë'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélé'ë ca' lari' guxóa yenë' Jesús, ate' lari' na' bití' nadía, pero naduba tuz ca naduba. <sup>24</sup> Ní'irö yugu' bönni' na' röjáquië' gudil-la gulé luzá'agaquië' tuë' ia'túë', ta'nnë':

—Bití' ichúguru' le, pero dxí'arö gaca uyuru' le gaca bë' para inózziru' nuzxi guequi que.

Caní guca, budxín ca nazúaj lu guichi lá'ayi, le rna: Gula'guísië' que queégaquië' lari' nacuá', en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

<sup>25</sup> Xiné'ë Jesús, en nigula xzilanu xiné'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz. <sup>26</sup> Cate' Jesús bilé'enë'-nu xiné'ë, en bilé'enë' ca' zoë' ní' bönni' usëda queë' na' nadxí'inë', gudxë'-nu xiné'ë:

—Na'a, na' zoë' xzí'inu'.

<sup>27</sup> Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

### Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

<sup>28</sup> Gudödi ni, tu' nózinë' Jesús yúgu'të chibó'a budzaga lahui, en para udxín le nazúaj lu guichi lá'ayi, gunné':

—Ribidxa' nisa.



<sup>29</sup> Dë ni' tu xziga' yudzu nupi zi. Ní'irö yugu' bönni' na' röjáquië' gudil-la bulu'guijje' nupi zi na' tu le bululu rizxupi nisa, ate' bulu'zöë' le tu lahui gui, en bulu'déë le ru'ë Jesús para xupë'. <sup>30</sup> Budxi gu'ë Jesús nupi zi na', gunné':

—Chinácatë.

Ní'irö buzötaj icjé'. Burúajtë bö' naca cazë', gútië'.

### Tu bönni' reajë' gudil-la runéë yaga tuchi' cuita lëë Jesús

<sup>31</sup> Ní'irö, tu' naca dza si' idxín Laní Pascua na', en tu cabí ral-la' ulu'gá'ana nupa nátigaca lé'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío gulá'tayuë' lahuë' Pilato guië' bönni' röjáquië' gudil-la tsöjtítsja-gaquië' xiguíchjagaquië' bönni' dá'gaquië' lé'egaca yaga cruz, en ulu'zötjé' légaquië' lé'egaca yaga cruz na'. <sup>32</sup> Que lë ni na' gula'biguëë bönni' röjáquië' gudil-la, ate' gula'guítsjé' xiguichjé' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz. <sup>33</sup> Cate' bila'dxinë' ga na' dëë Jesús, en bila'lé'enë' chinátië', bití' gula'guítsjé' xiguichjé'.

<sup>34</sup> Ní'irö tuë' bönni' na' reajë' gudil-la bunéë yaga tuchi' cuita lëë Jesús, ate' la' birúajtë rön, en nisa.

<sup>35</sup> Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús.

<sup>36</sup> Gulaca yugu' lë ni para budxín le nazúaj lu guichi lá'ayi, le rnna: "Bití' gatsaj nitú dxita yu'ë." <sup>37</sup> Ia'tú le nazúaj ca' lu guichi rnna caní: "Ulu'yúë' bönni' na' bulu'néë lë' yaga tuchi'."

### Tu'cáchéë Jesús

(Mt. 27:57-61; Mr. 15:42-47; Lc. 23:50-56)

<sup>38</sup> Gudödi guca yúgu'të lë ni, guyijé' José, bönni' yödzo Arimatea, bönni' dëë Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bëë lë' lataj. Ní'irö bidxinë' José ga na' dëë Jesús lë'e yaga cruz, ate' bu'ë Lë'. <sup>39</sup> Lësca' bidxinë' Nicodemo ni', bönni' na' guyijé' zí'alö yöjyüë' Jesús chí' dzó'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guië'. <sup>40</sup> Ní'irö José, en Nicodemo na' gula'guélëë Jesús, en bulu'chólinë' Lë' yugu' lári'do', ate' gula'gu'ë láchuilö lë na' nutsí'i nöri silá' que mirra, en le rilá' zxixi. Gulunë' ca nalébiguequinë' tunë' bönni' judío cate' tu'cáchéë tu bönni' nati. <sup>41</sup> Gala' ga na' bulu'déë Jesús lë'e yaga cruz dë tu luyú ga zeaj da' yaga olivo, ate' gatsaj láchuilö lataj na' zoa tu yeru ba cubi le nadaj lë'e gu'á guiój, yeru ba na' cuntu nu ta'gü'inë'. <sup>42</sup> Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'péë bönni' judío que Laní Pascua.

### Rubanë Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

**20** Cate' chinaca zílado' dza domingo, en ni' naca chul-la, guyéajnu María Magdalena ra' yeru ba

na', ate' bilé'enu chinadúa guiójta'a na' busayaj ga nu riyaza yeru ba na'. <sup>2</sup> Ní'irö bóajnu carelö ga zoë' Simón Pedro, dzáguie' lë' ia'túë' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajé' Xanru' yeru ba ni', en bití' nöztu' gazxi gula'gu'ë Lë'.

<sup>3</sup> Ní'irö bila'rúajé' Pedro, en ia'túë' bönni' usëda na', söjáquië' ra' yeru ba na'. <sup>4</sup> Tsözxón ta'xítí'ë iropë', pero ia'túë' bönni' usëda na' guxítí'rë' carelö ca Pedro, ate' zí'alö lë' bidxinë' ra' yeru ba na'. <sup>5</sup> Biyéchuë', en buyüë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero bití' guyázië' yeru ba na'. <sup>6</sup> Ní'irö bidxinë' Simón Pedro cúdzulë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. <sup>7</sup> Lësca' bilé'enë' lári'do' na' gula'xóë' icjé' Jesús, bití' dëlen ia'zica'rö lári'do' na', pero tsölá'alö nudubi quez. <sup>8</sup> Ní'irö guyázië' ca' ia'túë' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlëë didza' bëë Jesús. <sup>9</sup> Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. <sup>10</sup> Ní'irö iropë' bönni' usëda na' yöjhuójgaquië' lídxi-gaquië'.

### Rulu'í lahuë' Jesús lonu María Magdalena

(Mr. 16:9-11)

<sup>11</sup> Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'.

<sup>12</sup> Bilé'enu chopë' gubáz lá'ayi queë' Dios ni', nácu-gaquië' lari' chiguichi. Ró'ogaquië' ni', tuë' ícjälö ba na', en ia'túë' xiní'alö ba na' ga ni' gula'gu'ë Jesús. <sup>13</sup> Yugu' gubáz lá'ayi na' të' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en bití' nözda' gazxi gula'gu'ë Lë'.

<sup>14</sup> Cate' budxi gunnánu caní, buécjanu, en bilé'enu-në' Jesús, zoë' ni', pero bití' réquibe'enu Jesús na'.

<sup>15</sup> Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chí'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

<sup>16</sup> Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

<sup>17</sup> Jesús rëë-nu:

—Bití' canu' neda', tu' cabí ruhuépinida' ga zoë' Xuza'.

Na'a, guyéaj ga nacu'ë böchi' luzá'a, ate' yöjödxi-gaquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queé'li'."

<sup>18</sup> Ní'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

**Ruluí'í lahuë' Jesús lógaquië' bönni' usëda queë'**  
(Mt. 28:16-20; Mr. 16:14-18; Lc. 24:36-49)

<sup>19</sup> Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío uná bé'. Ní'irö buluí'í lahuë' Jesús gatsaj láhui'lö ga na' nacu'ë, en rë' légaquië':

—Gulí'zóa dxi ládxí'li'.

<sup>20</sup> Cate' budxi gudxë' légaquië' didza' ni, buluí'inë' légaquië' nëë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. <sup>21</sup> Ní'irö Jesús rë' légaquië' leyúbölö, rnnë':

—Gulí'zóa dxi ládxí'li'. Ca benë' Xuza', gusól-lë'ë neda', lësca' caní risól-la'a libí'ili' tsöjenlí' xichina'.

<sup>22</sup> Cate' budxi gunné' caní, bulubë' lógaquië', en rë' légaquië':

—Gulí'sí' Dios Bö' Lá'ayi. <sup>23</sup> Núti'tës nu uniti lolí', nu na' ben dul-la', chiyú'u yöl-la' runiti lo que, ate' núti'tës nu bití' uniti lolí' le, ugá'ana dul-la' que nu na' nun dul-la'.

### Bití' réajlë'ë Tomás

<sup>24</sup> Tomás bití' zóalenë' légaquië' cate' Jesús buduyüë' légaquië'. Náquië' Tomás tuë' bönni' chínnuë' ní', en tu'ë ca' lë' Bönni' Bilidi'. <sup>25</sup> Gudödi ní' ia'zica'rë' bönni' usëda na' gulé' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' nëë ga gunné' bididaj, en unë'a xibón na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', bití' ca' tséajlë'a.

<sup>26</sup> Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, buluí'í lahuë' Jesús gatsaj láhui'lö ga na' nacu'ë, en rë' légaquië':

—Gulí'zóa dxi ládxí'li'.

<sup>27</sup> Ní'irö Jesús rë' Tomás na':

—Buné' xibón no'o ni, en buyú na'a ni. Buné' no'o cuita lë'a ni, en bití'rö gaca chopa ládxu'u, pero guyéajlë' neda'.

<sup>28</sup> Ní'irö bubí'ë didza' Tomás, rë' Lë':

—Xána'do', en Dios quia'.

<sup>29</sup> Jesús rë' lë':

—Tomás, tu' bulé'enu' neda', réajlë'u. Bica' ba nupa ní' ila'yéajlë' neda' sal-la' bití' ila'lé'eni neda'.

### Le ré'ëni gun didza' nazúaj lu guichi ni

<sup>30</sup> Benë' Jesús zianrö ca' yöl-la' huáca lógaquië' bönni' usëda queë', le cabí nazúajgaca lu guichi ni. <sup>31</sup> Yugu' lë' ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queé'li' yöl-la' na'bán idú tu' réajlë'ëli'-në'.

**Ruluí'í lahuë' Jesús lógaquië' gadxë' bönni' usëda queë'**

**21** Gudödi guca lë' ni, leyúbölö buluí'í lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluí'í lahuë' lógaquië'. <sup>2</sup> Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia'chopë' ca' bönni' usëda queë' Jesús.

<sup>3</sup> Simón Pedro rë' légaquië':

—Tseaja' tsöjxöna'-ba' böla.

Të' lë' ia'zica'rë', ta'nnë':

—Guntu' lí' tsözxón.

Ní'irö yöjáquië', en gula'benë' tu lë'e bárcodo', ate' rëla ní' nituba' böla bití' gula'zönë'-ba'. <sup>4</sup> Cate' chizá rení', yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'. <sup>5</sup> Ní'irö Jesús rë' légaquië':

—Zxí'ina'do', ¿naru' cabí deba' latí' böla queé'li'?

Bulu'bi'ë didza', të' Lë':

—Nituba'.

<sup>6</sup> Ní'irö Jesús rë' légaquië':

—Gulí'chilaj yöxaj böla queé'li' tsölá'a ibëla barco, ate' söngacalí'-ba'.

Ní'irö gula'chiljë' le, ate' bití'rö guca ulu'béajë' le, tu' naguíraba' böla lë'e yöxaj böla na'. <sup>7</sup> Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, "Xanru' na'", böácuë' lari' gúcuë', tu' nagüë' le zí'alö, ate' guyázië' lu nisa. <sup>8</sup> Bila'dxinë' ia'zica'rë' bönni' usëda na', tu'séë barco na', suná'yöjgaquië' yöxaj ga na' dzó'öba' böla, tu' cabí naca zí'tu' ga dë luyú bidxi. Nácatë ca tu gayuá' lögá ní'aru'. <sup>9</sup> Cate' bila'dxinë' luyú bidxi na', bila'lé'enë' rö'ö tu guí' bo' yalaj ní', en zxóaba' tuba' böla láhuilö, en dë ca' yöta ní'. <sup>10</sup> Jesús rë' légaquië':

—Gulí'diguá'a-ba' ni böla na' sí' guzóngacalí'-ba'.

<sup>11</sup> Gurenë' Pedro lë'e barco na', ate' gú'uyöjë' yöxaj na' zaca' luyú bidxi, nalí'rö-ba' böla zxön, idú tu gayuá' yu' chí'inu-unba'. Sal-la' nácagacaba' böla zían, bití' biröza' yöxaj na'. <sup>12</sup> Ní'irö Jesús rë' légaquië':

—Gulí'dá gágulí'.

Bití' burúguinë' nitúë' bönni' usëda queë' na' inábinë' Lë', innë': "¿Nuzxi Lí'?" Nózguequi quézinë' náquië' Xanru'. <sup>13</sup> Ní'irö gubíguí'ë Jesús, en gudélë'ë yöta na', enca' böla na', ate' bë'ë quégaquië'.

<sup>14</sup> Lë' ni naca le bunny luzuí buluí'í lahuë' Jesús lógaquië' bönni' usëda queë' gudödi bubanë' lu yöl-la' guti.

### Jesús ruí'ilenë' Simón Pedro didza'

<sup>15</sup> Cate' budxi gulahuë', Jesús rë' Simón Pedro:

—Simón, zxí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubí'ë didza' Pedro, rë' Lë':

—Ön, Xan. Lí' nöz quézinu' raza ládxa'a Lí'.

Jesús rë' lë':

—Bugagu yugu' bö'cu' zxila'do' quia'.

<sup>16</sup> Jesús rë' lë' le buropi luzuí, rnnë':

—Simón, zxí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'.

<sup>17</sup> Jesús rë' lë' le bunni luzuí:

—Simón, zxí'inë' Jonás, ¿raza ládXu'u neda'?

Buí'innë' Pedro tu' le chibunni luzuí rinabi yúdxinë' lë', gunné': "¿Raza ládXu'u neda'?" Bubi'ë didza' Pedro, rë' Lë':

—Xan, yúgu'të nöz quézinu' Li'. Nózinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'. <sup>18</sup> Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en iché' li' ga ni' bití' gué'ënnu' tseaju'.

<sup>19</sup> Yugu' didza' ni bë'ë Jesús naca bë' naca gátië' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

**Ru'ë didza' Jesús ca gaca queë' bönni' usëda na' nadxí'inë'**

<sup>20</sup> Buécjë' Pedro, en bilé'enë' söjnhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: "Xan, ¿nuzxi na' udödi Li'?" <sup>21</sup> Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

<sup>22</sup> Jesús rë' lë':

—Channö ré'ënda' ugá'anë' bönni' ni ga idxinrö dza huöda', bití' ral-la' cö'u böniga. Gudá'a neda' li'.

<sup>23</sup> Guzë' didza' ni ga nacu'ë bóchi'ru' ta'yéajlë'ë Cristo. Téquinë' bití' gátië' bönni' usëda na'. Jesús bití' gudxë' lë' bití' gátië', pero caní gunné': "Channö ré'ënda' ugá'anë' bönni' ni ga idxinrö dza huöda', bití' ral-la' cö'u böniga."

<sup>24</sup> Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nózilí' naca idútë li le runa' ba nalí.

<sup>25</sup> Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' bití' guequi yödZölió ni ila'cuá' guichi na' ral-la' nu uzúaj. Ca' caz.

# Hechos

## Le guzxí' lu në'ë Dios, isòl-lë'ë Dios Bö' Lá'ayi

**1** Cate' buzúaja' lu guichi zí'alö, quiu' lí', Teófilo, neda', Lucas, buzúaja' yúgu'tè le gusí lahuë' runë' Jesús, en rusédinë' <sup>2</sup> ga bidxintë dza buëpë' yehua' yubá. Cate' sí' huëpë' Jesús yehua' yubá, dzáguie' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' guró cazë'. <sup>3</sup> Gudödi gudí'i guzxáquë'ë Jesús, gútië'. Ní'irö bubanë', en bulu'íi lahuë' lógaquie' gubáz queë' na'. Bulu'íinë' légaquie' zían le gulaca bë' zoë' nabanë', le cabí gaca nu tá'baga'. Zían luzuí bulu'íi lahuë' lógaquie' idú ca choá' dza, en bé'lenë' légaquie' didza' ca rinná bë'ë Dios.

<sup>4</sup> Cate' ní' nacu'ë tsözxón, gunná bé'enë' légaquie' cabí ulu'zë'ë Jerusalén. Jesús gudxë' légaquie', rnnë':  
—Gulí'cöz ní' le guzxí' lu në'ë Xuza' isòl-lë'ë queé'li' ca na' chibusiyón quézida' libí'ili'.

<sup>5</sup> Gunnë' ca':

—Le nácatë Juan buquile' bö'nachi nisa lu nisa. Na'a bití' tse xidzé gaca queé'li' le rulu'íi yöl-la' ridila nisa ni, idisóalenë' Dios Bö' Lá'ayi libí'ili'.

## Ruhuëpë' Jesús yehua' yubá

<sup>6</sup> Ní'irö yugu' bönni' ta'yéajlë'ë Jesús, nudúbigaquie' ní', gula'nábinë' Lë', ta'nnë':

—Xan, ¿naru' gunu' ga ila'nná bë' bö'nachi Israel leyúbölö dza ni zóaru' na'a?

<sup>7</sup> Jesús gudxë' légaquie':

—Bití' nequi queé'li' inózili' bizxi dza o bizxi dzö' gunë' Dios Xuz le nuzó'ë lu na' cazë'. <sup>8</sup> Sí'ili' yöl-la' huáca cate' guidë' Dios Bö' Lá'ayi idisóalenë' libí'ili'. Ní'irö gunlí' ba nalí quia' neda' lu yödzo Jerusalén, en idú luyú Judea, en luyú Samaria, en ga idxíntëli' idúte yödzöliö.

<sup>9</sup> Cate' budxi bé'lenë' légaquie' didza' ni, tsanni ní' tu'yusë' ca' Lë', la' buépitë' xitsá' ga rö'ö tu böaj le bu-cache' Lë', ate' bití'rö bila'lë'enë' Lë'. <sup>10</sup> Tsanni ní' tu'yüë' lúzxibalö cate' ní' buëpë' Jesús, bulu'lu'íi lógaquie' chopë' gubáz lá'ayi ga na' nacu'ë, nácugaquie' lari' chiguíchido'os. <sup>11</sup> Chopë' ni gulé' légaquie', ta'nnë':

—Bönni' Galilea, ¿bizx que ruyulí' lúzxibalö? Lë' cazë' Jesús ni sí' guzë'ë ga zóali', buëpë' yehua' yubá, læsca' caní huödë' leyúbölö ca na' chibilé'eli'-në' söhuójë' yehua' yubá.

## Ta'böö' Matías para tsázië' xilatjë' Judas

<sup>12</sup> Ní'irö gula'zë'ë ga na' rö'ö gu'ado' na' nazí' le Guí'a Yaga Olivo, ate' yöjhuójgaquie' Jerusalén. Guí'ado' ni dë' gála'sö ga dë' Jerusalén, tsca nazí'gaquie' lataj

ta'zë'ë dza lá'ayi quégaquie'. <sup>13</sup> Cate' bulu'dxinë' yödzo ní', gula'benë' ga naca buropi cuía lu yu'u, ga ní' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inë' Alfeo, en Simón, bönni' na' ru'íi ládxe'ë ladzë', en Judas, böché'ë Jacobo. <sup>14</sup> Yúgu'të bönni' ni tu'lidzë' Dios tsözxón, ate' yugu' böché'ë Jesús, en María, xinë'ë Jesús, en ia'zica'rönu nigula ca' núnagaquie' légaquie' tsözxón.

<sup>15</sup> La' dza násö guzuínë' Pedro gatsaj láhuilö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bö'nachi nupa nudúbigaca ní'. <sup>16</sup> Pedro gudxë' légaquie', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ní'të, le buzúajë' David lu guichi, ca guca queë' Judas, bönni' na' guchë'ë nupa ní' gula'zón Jesús. <sup>17</sup> Judas na' gubábalenë' rë'u, en bénlenë' rë'u tsözxón dxin ni. <sup>18</sup> Gula'zí'inë' tu la' yëla lazxaj que dö' na' bí'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. <sup>19</sup> Cate' bila'yöni bö'nachi nacuá' Jerusalén lë' ni, gulu'ë le la' yëla na' Acéldama, tu didza' hebreo le rna lu didza' xidza': La' Yëla Rön. <sup>20</sup> Caní guca queë' Judas, ca na' nazúaj lu guichi lá'ayi nazí' le Salmos, le rna:

Ugá'ana cá'asö lidxë',

en bití' idzöli nu soa yu'u na'.

Rna ca':

Nu yúbölö tsaza xilatjë'.

<sup>21</sup> 'Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquie' bönni' nabábalenë' bönni' ní' gula'cuá'lenë' rë'u dza ní'te cate' ní' Xanru' Jesús gudálenë' rë'u. Gula'sí lógaquie' nacuá'lenë' rë'u cate' ní' buquile' Juan bö'nachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

<sup>23</sup> Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. <sup>24</sup> Ní'irö bulu'lidzë' Dios, ta'nnë':

—Xantu' Dios, nunbë' casu' icja ládxi'do'gaca yúgu'të bö'nachi. Bulu'íi netu' nulë' chopë' ni chiguró casu' Lí' <sup>25</sup> para tsázië' lu dxin ni para gáquie' gubáz quiu'. Tsázië' xilatjë' Judas, bönni' ní' bunitië' xilatjë' tu' benë' dul-la', ate' guyijë' xilataj cazë' lataj chul-la.

<sup>26</sup> Ní'irö bulu'zúajë' yugu' lu guichi lágaquie', tu queë' José, en ia'tú queë' Matías. Bulu'gútsi'në' luzé'eguequi, en bulu'béajë' tu, ate' birúaj le nazúaj lë' Matías. Caní

guca, Matías na' gubábalenë' ia'chinéajë' gubáz queë' Cristo.

### Dios Bö' Lá'ayi ridisóalenë' légaquië'

**2** Cate' chibidxín dza Pentecostés, nudúbigaquië' tsözxón yúgu'të bönni' ta'yéajlë'ë Cristo. <sup>2</sup> Tsáli-do'os biyón bö le birúaj lúzxiba, le biyón ca riyón cate' recja bö' budunu', ate' biyón idútë lu yu'u ga na' ró'ö-gaquië'. <sup>3</sup> Bulu'lu'i lahui yugu' bululu guí'do' lu bö'ös ló-gaquië', ate' gula'guísi que queégaquië'. Bidisóalengaca tu tuë'. <sup>4</sup> Caní guca, Dios Bö' Lá'ayi bidisóalenë' yúgu'të, ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

<sup>5</sup> Nacu'ë zían bönni' judío yödzö Jerusalén dza na', nácagaquië' bönni' ta'yéaj láchxí'gaquië' Dios, en zá-gaquië' narúajgaquië' yúgu'të yödzö idútë yödzölió ni. <sup>6</sup> Cate' bila'yönnë' bö na', bulu'dubë' bönni' zían, ate' gula'bó'ë böniiga, tu' bila'yönnë', ca naca xtí'dza'gaquië' que queégaquië', tu'ë didza' bönni' na' ta'yéajlë'ë Cristo. <sup>7</sup> Gula'ná' badxë' yúgu'të, en bulu'bánninë, ta'n-né':

—Bulí'yútsöca'. ¿Naru' calëga bönni' Galilea yúgu'të bönni' ni tu'ë didza'? <sup>8</sup> ¿Nacxi caz naca riyóniru' tu'ë xtí'dza'ru' ca naca didza' ruí'iru' tu turu'? <sup>9</sup> Rë'u ni ná-caru' bönni' zían yödzö, bönni' narúajgaquië'

luyú Partia, en luyú Media, en luyú Élam, en luyú Mesopotamia, en luyú Judea, en luyú Capadocia,

en luyú Ponto, en luyú Asia,

<sup>10</sup> en luyú Frigia, en luyú Panfilia, en luyú Egipto, en luyú Africa, ga nácarö zítu' ga dë luyú Cirene.

'Lësca' nacu'ë bönni' yödzö Roma ni. Bal-lë' náca-gaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. <sup>11</sup> Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ruí'iru' que queëru', ate' ta'guíxj'ë yugu' le zxön benë' Dios, le tun ga rubániru'.

<sup>12</sup> Caní guca, bulu'bánninë yúgu'të, en gula'bó'ë böniiga. Gulé luzá'agaquië' tu'ë ia'tué', ta'nné':

—¿Bizxi caz lë ni?

<sup>13</sup> Bulu'titjë' bal-lë', ta'nné':

—¡Ta'zúdxinë'!

### Libán benë' Pedro lógaca bönachi zían

<sup>14</sup> Ní'irö Pedro guzuílenë' ia'chinéajë' gubáz na' nasól-lë'ë Cristo, ate' gusí lahuë' ru'ë zidzaj didza', rë' lé-gaquië':

—¡Libí'ili', bönni' Judea, en yúgu'tëli' nacuá'ali' yödzö Jerusalén! ¡Lë ni ral-la' inózilí'! ¡Bulí'zé nágalí' le guía' libí'ili'! <sup>15</sup> Netu' ni bití' rizúdxitu' ca na' réquili' libí'ili', tu' ni zóaru' sí' gala' xsila, ate' cuntu nu rizudxi hora caní. <sup>16</sup> Lë ni naca le gunné' Joel, bönni' bë'ë didza' uláz queë' Dios, gunné':

<sup>17</sup> Caní rnnë' Dios: Lë ni le gaca dza tsöjsétëgaca.

Isól-la'a Bö' Lá'ayi quia', tsöjsóalenë' yúgu'të bönachi.

Zxí'inilí', bönni', en nigula, ilu'í'ibi' didza' uláz quia' neda'.

Yugu' bí'i ra'bán ila'lé'ebi' le ulu'a lahui, ate' yugu' bönni' gula ila'nenë' yëla.

<sup>18</sup> Cate' idxín dza ni' quisia' Bö' Lá'ayi quia', tsöjsóalenë' huen dxin quia', bönni', en nigula, ate' ilu'ë didza' uláz quia' neda'.

<sup>19</sup> Ulu'a lahui lúzxiba xitsá' le ilún ga ulu'bani bönachi, ate' yödzölió ulu'a lahui le ilaca bë', rön, en guí', en dzön ca böaj.

<sup>20</sup> Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

<sup>21</sup> Ulu'lágaca yúgu'të nupa ni' ulu'lidza Lë' Xanru', lu yöl-la' réajlë' quéquequi Lë'.

<sup>22</sup> 'Bulí'zé nágalí' lë ni guía' libí'ili', bönachi Israel. Dios caz benë' bal Jesús, bönni' Nazaret ga zóalí'. Dios bë'ë Lë' lataj benë' le tun ga rubániru', yugu' yöl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinó'z quézilí'. <sup>23</sup> Lësca' caní, Dios bë'ë lataj nu budödi Jesús lu ná'alí'. Caní guca, ca na' chigunná láchxë'ë Dios gunë', en ca naca le chibucözë' dza ni'te. Libí'í cázalí' guzxónlí'-në' Jesús, en bétí'li'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. <sup>24</sup> Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'. <sup>25</sup> Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiquí'sida'-në' Xanru', zoë' lahuá'.

Lë' zoë' cuita lë'a ibëla, rizönë' neda',

para cabí gaca nu bi gun quia'.

<sup>26</sup> Que lë ni na' budzeja láchxa'a,

ate' lu yöl-la' rudzeja quia' bil-la'.

Que lë ni na' guna' löza Lë'

cate' idxín dza gátia'.

<sup>27</sup> Xantu' Dios, nözda' bití' ucá'anu' neda'

lataj chul-la ga nacuá' nupa nátigaca.

Bití' gu'u lataj initi idútë le naca'.

Naca' bönni' nadxí'i quézinu' Li'.

<sup>28</sup> Buzéajni'inu' neda' ca ral-la' guna'

para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

<sup>29</sup> 'Na'a, libí'ili', bócha'a. Naca bë' gútië' xuz xtó'oru'

David, en bigáchë'ë yeru ba, ate' ba queë' na' dë ga

zóaru' ga ridxintë na'a dza. <sup>30</sup> David na' bë'ë didza' uláz

queë' Dios, en gunózinë' benë' tsutsu Dios didza' le

guzxí' lu në'ë queë', gunë' ga galjë' Cristo ladaj dí'a dza

queë' sí' zá'gaca, ate' Cristo na' inná bë'ë xilatjé' David

na'. <sup>31</sup> Tu' bilé'enë' David lë ni zí'alö, bë'ë didza' ca guca,

bubanë' Cristo, en ca guca, bití' bugá'anë' lataj chul-la

ga nacuá' nupa nátigaca, en bití' guniti le naca cazë'.

<sup>32</sup> Dios busubanë' Jesús lu yöl-la' guti, ate' ca guca lë ni

yúgu'tëtu' runtu' ba nalí' que. <sup>33</sup> Caní guca, len yöl-la'

huáca queë', Dios buchisë' Lë' xitsá' ga ni' nácatëre'

zxön. Na'a, Cristo chigusól-lë'ë Dios Bö' Lá'ayi ni, ate'

raca ca na' guzxí' lu në'ë Dios gunë' lu në'ë Cristo, ate'

Dios Bö' Lá'ayi na' runë' yugu' lë ni rilé'elí', en riyónilí'.

<sup>34</sup> Biti' buëpë' David na' yehua' yubá, pero lè cazë' David na' gunné':

Xanru' Dios gudxë' Xana':

Gurö'i cuita lë'a ibëla ga naca lo

<sup>35</sup> cate' gunra' ga ulu'zechu zxi'bigaca nupa ta'dá'baga' Li' lo' Li'.

<sup>36</sup> Na'a, bönachi Israel, ral-la' inózili' le nácatë. Dios benë' ga náquië' Lë cazë' Jesús ni Xanru', en Bönni' Rusölá, bönni' na' budá'ali'-në' lë'e yaga cruz.

<sup>37</sup> Cate' yugu' bönni' ni' bila'yönnë' lë ni, gula'bö'ë böniga, ate' gulë' Pedro, en ia'zica'rë' bönni' gubáz queë' Cristo, ta'nnë':

—Bóchi'ru', ¿nacxi gúntsatu'?

<sup>38</sup> Ní'irö Pedro gudxë' légaquië':

—Buli'b'íi ládxi'li', en guli'dila nisa tu tuli' lu Lë' Jesu-cristo para uniti lahuë' Dios dul-la' nabága'li', ate' Dios Bö' Lá'ayi idisóalenë' lib'í'li', Nu na' isól-lë'ë Dios.

<sup>39</sup> Queé'li' nequi le guzxi' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

<sup>40</sup> Yugu' didza' ni, en ia'bal-la zían didza' benë' ba nalí Pedro, le guchizië' icja nágagaquië', gunné':

—Guli'gún ga uláli', irúajli' ládjagaca bönachi tuá' dö' nacua' dza ni zóaru' na'a.

<sup>41</sup> Caní guca, gula'dila nisa nupa ni' gula'z'í lu né'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz. <sup>42</sup> Gulunë' yúgu'të' idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'túë', en gulahuë' tsözxón le rusá' ládxi'ru' ca gútië' Jesús, ate' gulunë' tsözxón, bulu'lidzë' Dios.

### Ca tun bönachi queë' Cristo

<sup>43</sup> Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi. <sup>44</sup> Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi. <sup>45</sup> Cate' bi-la'lé'enë' ta'yadzaj nupa nútsa'gaca ládjagacië', ní'irö yugu' bönni' bi dë quégaquië' gulúti'ë le, ate' gula'guisië' dumí na' que queégaca nupa ni' bi ta'yadzaj. <sup>46</sup> Bulu'dubë' tsözxón chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxón, ate' bulu'dzéjanë', en gulaca idú ládxi'gaquië'. <sup>47</sup> Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

### Ruhuóáquië' tu bönni' bití' raca së'ë

**3** Tu dza ni' gula'benë' Pedro, en Juan, söjáquië' tsözxón lu chila yudo', cate' tu'dubi bönachi tu'lidza Dios ni', le naca idú ridödi xihuó. <sup>2</sup> Ga ni' ta'dödë' zoë' tu bönni' bití' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí' le Ra' Yu'u Lachi, para inábinë' nu bi unódzjasö queë' ladaj nupa ni' ta'yaza lö'a yudo'. <sup>3</sup> Bönni' ni, cate' bilé'enë' Pedro, en Juan, söjáquië' ta'yázië'

lö'a yudo', gúta'yue' lógaquië' bi ulu'nódzjasë' queë'.

<sup>4</sup> Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

<sup>5</sup> Ní'irö bönni' na' buzëda' náguië' légaquië' tu' runë' löza bi ulu'nódzjasë' queë'. <sup>6</sup> Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesu-cristo, bönni' Nazaret, guyasa, en guzë'e.

<sup>7</sup> Ní'irö gudélé'ë Pedro në'ë ibëla bönni' huë' na', en buchisë' lë', ate' la' böácatë ni'ë, en buguitaj bëchaj ni'ë bönni' na'. <sup>8</sup> Ní'irö guzuínë' bönni' na', ate' guxiti'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixiti'ë, en rigu'ë Dios yöl-la' ba. <sup>9</sup> Yúgu'të bönachi nacua' ni' ta'lé'e lë' rizë'e ni'ë, en rigu'ë Dios yöl-la' ba. <sup>10</sup> Caní guca, guládxinë', en bulu'báinë' ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí' le Ra' Yu'u Lachi, rinabë' nu bi unódzjasö queë'.

### Didza' bë'ë Pedro chila yudo'

<sup>11</sup> Tsanni ni' bönni' na' bití' guca së'ë, ate' böáquië', zönë' náagaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí' le: Chila Queë' Salomón, ate' gula'ná' badxë'. <sup>12</sup> Cate' bilé'enë' Pedro lë ni, gudxë' bönachi na':

—Lib'í'li', bönni' Israel, ¿bizx que rubánili' ca naca lë ni? ¿Bizx que ruyulí' netu', en réquitseli' nétu'sö buntu'në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxi'tu'-në' Dios? <sup>13</sup> Naca lë ni le benë' Dios. Náquië' Dios quégaquië' xuz gudödi queëru' Abraham, en Isaac, en Jacob. Lë cazë' béntë'rë' bal Jesús, Zxi'inë'. Jesús ni, lib'í' cázali' bëtili'-në' lu náagaquië' bönni' ta'nná bé'enë' lib'í'li'. Cate' gú'unnë' Pilato usanë' Jesús, gudá'baga'li'-në'. <sup>14</sup> Buzóali' tsölá'alö Bönni' Tshui', en Lá'ayi, ate' gunábili'-në' Pilato usanë' queé'li' tu bönni' rútië' bönachi. <sup>15</sup> Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. <sup>16</sup> Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'téli' le nácatë na'.

<sup>17</sup> Na'a, bócha'a, nözda' benli' caní, bëtili'-në' Jesús tu' cabí guyéajni'ili', en bití' gula'yéajni'inë' bönni' ta'nná bé'enë' lib'í'li'. <sup>18</sup> Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'í sáquë'ë Cristo. <sup>19</sup> Que lë ni na', buli'b'íi ládxi'li', en buli'huóáca queë' Dios, para ugúë' dul-la' nabága'li', en gunë' ga huóáca ládxi'li'. <sup>20</sup> Ní'irö isól-lë'ë leyúbölö Jesús, Bönni' na' buzö'ë dza ni'te para gáquië' Cristo, Bönni' Rö queë', Bönni' na' inná bé'enë' lib'í'li'. <sup>21</sup> Na'a, run bayudxi ugá'anë' yehua' yubá ni' cate' idxinrö dza uduhuënë' tshui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. <sup>22</sup> Lësca' caní Moisés gudxë' xuz xtó'oru', gunné': "Xanru' Dios isól-lë'ë queé'li' tu bönni' galjë' ládjagaca dí'a dza queé'li'.

Gáquië' bönni' gu'ë didza' uláz queë' Dios. Isól-lë'ë Lë' queé'li' ca na' gusól-lë'ë neda'. Run bayudxi uzé nágali-në' ca naca yúgu'të le guié' libí'ili'. <sup>23</sup> Yúgu'të nupa bití' ulu'zë nágagaca bönni' ní' gu'ë didza' uláz queë' Dios ila'niti, en ulu'lá'alén bönachi queë' Dios."

<sup>24</sup> Ca naca dza ni zóaru' na'a, gula'guíxj'ö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ní'. <sup>25</sup> Libí'ili' nácali' xzí'ini xí'sóagaquië' bönni' gulu'ë didza' uláz queë' Dios, ate' nequi queé'li' didza' rucá'ana tsahui', le bënlenë' Dios xuz xtó'oru', cate' ní' gudxë' Abraham: "Ní'a que le gunë' xzí'ini xí'sú' ilaca bica' ba yúgu'të bönachi yödzölió."  
<sup>26</sup> Cate' Dios busubanë' Xzí'inë' lu yöl-la' guti, gusól-lë'ë Lë' z'álö queé'li' para gunë' ga gácali' bica' ba, en ucá'analí' le cabí naca dxí'a runlí'.

**Ta'dxinë' Pedro, en Juan lógaquië' bönni' yudo' tu'chi'a tu'söröë'**

**4** Tsanni ní' bönachi na' tuí'ilenë' Pedro, en Juan, didza', yugu' bixúz judío, en yugu' bönni' yudo' sa-duceo, en bönni' ta'nná bé'enë' ní'a ná'agaquië' bönni' yudo', bila'dxinë' tsárido'os ga na' nacué'. <sup>2</sup> Gula'lenë' bönni' ni tu' tu'sédinë' Pedro, en Juan, bönachi, en t' léguequi ulu'bán nupa chinátigaca tu' bubanë' Jesús. <sup>3</sup> Ní'irö gula'zönë' Pedro, en Juan, ate' gula'gu'ë légaquië' lidxi guié' ga idxinrö dza yúbölö tu' chiridzó' dza na'. <sup>4</sup> Zían nupa ní' bila'yöni didza' gulu'ë Pedro, en Juan, gula'yéajlé' Cristo. Na'a, yugu' bönni' biguíú'só ta'yéajlé'ë Cristo nácaagaquië' idú chi-un gáyu'ë.

<sup>5</sup> Dza buropi ní', yugu' bönni' unná bé', en bönni' gula tu'zéajni'inë' bönachi judío, en yugu' bönni' yudo' usë-di, bulu'dubë' lu yödzö Jerusalén. <sup>6</sup> Lësca' Anás, bixúz lo, en Caifás, en Juan, en Alejandro, enca' yúgu'të bönni' dí'a dza quégaquië' bixúz lo bulu'dubë' ní'. <sup>7</sup> Ní'irö duché'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacué', en gula'nábinë' légaquië', ta'nnë':

—¿Bizxi yöl-la' unná bé' dë lu ná'alí' runlí' lë ni? ¿Nuzxi budödi lu ná'alí' yöl-la' unná bé' ní'?

<sup>8</sup> Ní'irö Pedro gudxë' légaquië', zóalenë' Dios Bö Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula. <sup>9</sup> Na'a, ¿rinábitseli' netu' ca naca dxin dxí'a bentu' queë' bönni' huë' ni, en nacxi guca, böáquië' bönni' ní'? <sup>10</sup> Riguíxj'ö'itu' libí'ili' para ila'nözi yúgu'të bönachi Israel. Zoë' bönni' ni lolí', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ní' budá'alí'-në' lë'e yaga cruz, pero Dios busubanë' Lë' lu yöl-la' guti. <sup>11</sup> Dios bé'ë didza' ca naca queë' Jesús ni, cate' ní' gunné': "Libí'ili', bönni' rucá'alí' zö'ö, gurú'unalí' guíó'j na', pero guró' caza' neda' guíó'j na' para gaca guíó'jlen zö'ö."  
<sup>12</sup> Cúnturö nu zoa nu gaca usölá bönachi, tu' cabí zoa yödzölió ni ia'tué' bönni' nuzóë' Dios, nu gaca usölá rë'u.

<sup>13</sup> Cate' bila'lé'enë' nácaagaquië' rugu ladxí' Pedro, en Juan, en guléquibe'enë' bití' nazédagaquië' que yudo', en nácaagaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús.

<sup>14</sup> Lësca' bila'lé'enë' bönni' na' böáquië', zuínë' lógaquië', ate' bití' guca bi ila'nnë' quégaquië'. <sup>15</sup> Ní'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtídzë'ë la' légacasé'.

<sup>16</sup> Gula'nnë':

—¿Nacxi gúntsaru' quégaquië' bönni' ní'? Le nácatë gulunë' tu le run ga tu'bani bönachi, ate' nózigaca yúgu'të bönachi nacué' Jerusalén lë ni. Bití' gaca tá'bagaru' le. <sup>17</sup> Na'a, para cabí sërö didza', en ila'yöni zíanrö ca' bönachi, uzeru' bach légaquië' para cabí ilu'ílenrë' bönachi didza' ca naca queë' Jesús na'.

<sup>18</sup> Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ílenrë' bönachi didza', en para cabí ulu'sédinë' légaquië' ca naca queë' Jesús.

<sup>19</sup> Ní'irö bulu'bi'ë didza' Pedro, en Juan. Gulé' légaquië':

—Bulí'chi'a bulí'sörö libí'ili' channö naca tsahui' lahuë' Dios uzërö nágatu' xtídzalí' libí'ili' ca xtídzë'ë Dios.

<sup>20</sup> ¡Bití' gaca soa dxitu'! ¡Run bayudxi gü'ítu' didza' que le bilé'etu', en le biyónitu'!

<sup>21</sup> Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ní', tu' ta'gú'u Dios yöl-la' ba ní'a que lë na' guca. <sup>22</sup> Bönni' na' böáquië', en guca queë' lë na' run ga rubániru', chiyú'urë' ca choá' iz.

**Ta'nábinë' Dios gunë' ga ilácaagaquië' rugu ladxí'**

<sup>23</sup> Cate' bönni' yudo' bulu'sanë' Pedro, en Juan, bóajgaquië' ga na' nacué' luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bé', en bönni' gula tu'zéajni'inë' bönachi judío. <sup>24</sup> Cate' bila'yönnë' lë ni, bulu'lidzë' Dios tsözxón, gula'nnë':

—Xantu' Dios, ¿zxöntërö nacué' Lí'! ¡Lí' nacué' Dios! ¡Benu' lúxiba! ¡Benu' luyú! ¡Benu' nísado! ¡Benu' yúgu'të le nacué' tu tu lataj na'! <sup>25</sup> Uláz quiu' Lí' bé'ë didza' David, bönni' huen dxin quiu', ní' zóalenë' Dios Bö Lá'ayi lë', gunné':

¿Bizx que tun dzatsa bönachi, en ta'zá' ladxí'gaca le ruá' dö'?

<sup>26</sup> Yugu' bönni' ta'nná bé'ë yödzölió ni gulún dzatsë', ate' guláquië' tuz bönni' unná bé'.

Gula'dá'báguë'ë Xanru' Dios, enca' Cristo, bönni' guró' cazë' Lë'.

<sup>27</sup> Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Xzí'inu' lá'ayi, Bönni' na' buzú' queé'tu'. <sup>28</sup> Gulunë' yúgu'të le bucözu' zí'atëlö, en guxzí' lu no'o, ate' guca ca na' benu' tsutsu xtídzú'u ca ral-la' gaca. <sup>29</sup> Na'a, Xantu', buyú le tu'zenë' bach netu', en ben ga gácatu' rugu ladxí', para gü'ítu' xtídzú'u, netu' bönni' huen dxin quiu'. <sup>30</sup> Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bé'. Gaca caní tu' zóalenë' Jesús, Xzí'inu' lá'ayi, netu'. ¡Ca' gaca!

<sup>31</sup> Cate' budxi bulu'lidzë' Dios, guxzizi lataj ga na' nacué', ate' Dios Bö' Lá'ayi guzóalenë' yúgu'të', ate' len yöl-la' rugu ladxí' quégaquië' gulu'ë xtídzë'ë Dios.

### Tu'únë' tuz le dë quégaquië'

<sup>32</sup> Bönachi zían na' ta'yéajlë' Cristo, tuz ca ta'zá' ládx-í'guequi, en tuz ca gulúngaca. Bití' gunné' nu bönni' nútsë'ë ládjagaquië' nequi queé'zë' le dë queë', pero bulu'únë' tuz le dë quégaquië'. <sup>33</sup> Len yöl-la' huáca zxön gula'guixjö'ë gubáz na' nasól-lë'ë Xanru' Jesús ca bubanë' Lë', ate' le buzá' ládxë'ë Dios quégaquië' gúcalen yúgu'të'. <sup>34</sup> Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', <sup>35</sup> en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queégaca nupa bi biyadzaj quéguequi. <sup>36</sup> Zoë' José ni', bönni' bulu'zóë' gubáz na' nasól-lë'ë Cristo ia'tú lë' Bernabé, le rnna lu didza' xidza', Bönni' Ruhué Tsáhuë'ë. Nabábalenë' xí'ini xí'sóë' Leví, en guljë' luyú Chipre. <sup>37</sup> Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

### Dul-la' gulunë' Ananías, en Safira

**5** Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxón lë'. <sup>2</sup> Ananías na' bucachí' lanë' late' dumí que yu na', ate' nózinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tscá nisö guzxi'a.

<sup>3</sup> Pedro gudxë' lë':

—Ananías, ¿naru' guyázatsö Satanás tu' xihui' lu icja ládxí'do'o, en ben ga rizí' yé'enu' Dios Bö' Lá'ayi, ate' bucachí' lanu' late' dumí que xiyú' na'? <sup>4</sup> Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que guró'o icju' gunu' caní? Dios caz guzxi' yé'enu', calégasö bönachi.

<sup>5</sup> Cate' biyönnë' Ananías didza' ni, gudzö'ë, en gútitë'. Ní'irö gula'bíga'tëbi' bí'i ra'bán, ate' bulu'chólibi' lë' lari', en gulu'á'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

<sup>7</sup> Ca tsonna hora gudödi ni', bidxinnu nigula queë' Ananías na' ni', en bití' nózinu lë na' guca queë' bönni' queénu. <sup>8</sup> Ní'irö Pedro gudxë'-nu:

—Gudíxjö'i neda'. ¿Naru' guzxi'ili' tscá nisö xiyuli' na'? Gunnánu:

—Ön, tscá nisö guzxi'ítu'.

<sup>9</sup> Ní'irö Pedro gudxë'-nu:

—¿Bizx que ben tuz xtídza'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bí'i bulu'cáchi'bi'-në' bönni' quiu', ate' ulu'béajbi' ca' li'.

<sup>10</sup> Ní'irö la' gudzö'tënu xini'ë Pedro, en gútitënu. Cate' gula'yázabi' bí'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queénu. <sup>11</sup> Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

### Tunë' bönni' gubáz nasól-lë'ë Cristo le taca bë'

<sup>12</sup> Gulunë' bönni' gubáz na' nasól-lë'ë Cristo zían le taca bë', en zían yöl-la' huáca zxön lógaca bönachi lu yödzo. Yúgu'të' bulu'dübë' tsözxón ga naca chila yudo' nazí'i le Chila Queë' Salomón. <sup>13</sup> Ladaj nupa ni' bití' ta'yéajlë' Cristo, cuntú nu burugui tsöjtá' légaquië', ate' bönachi lu yödzo ni' gulún légaquië' bal. <sup>14</sup> Ní'irö ia'bal-la bönachi zían ca' gula'yéajlë' Cristo, bönni', en nigula. <sup>15</sup> Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca. <sup>16</sup> Lësca' bila'rúaj bönachi yugu' dzaga yödzo, en bila'dxín Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'tëguequi.

### Bönni' yudo' ta'bía ládxí'gaquië' bönni' gubáz nasól-lë'ë Cristo

<sup>17</sup> Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. <sup>18</sup> Ní'irö bixúz lo na', en bönni' na' dá'gaquië' lë' gula'zönë' gubáz na' nasól-lë'ë Cristo, ate' gula'gu'ë légaquië' lidxi guíë.

<sup>19</sup> Ní'irö bidxinë' gubáz lá'ayi queë' Xanru' chí'i dzö'ölö, ate' gusaljë' lidxi guíë na', en bubéajë' légaquië'.

<sup>20</sup> Gubáz lá'ayi na' gudxë' légaquië', rnnë':

—Gulí'tséaj, gulí'tsöjsóa chila yudo', en guli'tsöj'len bönachi ni' didza', quíxjö'ili' légaquië' ca naca yöl-la' na'bán idú ni, en ca gaca ila'déli'në' le.

<sup>21</sup> Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dübë' bixúz lo, en nupa nacuá'len lë' tsözxón, len bönni' yudo' tu'chí'a tu'söröë', en bönni' gula tu'zéajni'inë' bönachi Israel, ate' gula'sól-lë'ë nupa tsöj'aca lidxi guíë para tsöj'xí'gaquië' yugu' gubáz na' nasól-lë'ë Cristo, tu' téquinë' ni' nacu'ë lidxi guíë na'.

<sup>22</sup> Cate' ní'a ná'agaquië' bönni' yudo' na' bila'dxinë' ni', bití' yöjxáca'gaquië' légaquië' lu yu'u lidxi guíë na', ate' ní'irö bulu'huóajë' tsöjtíxjö'gaquië' ca'. <sup>23</sup> Gulé' bönni' yudo' tu'chí'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacuá' nupa tun chí'i ra' lidxi guíë na', pero cate' gusalajtu', cuntú nu yöjxáca'tu' lu yu'u na'.

<sup>24</sup> Cate' bixúz lo, en yugu' bixúz unná bë', en bönni' nacuá' lu në'ë ní'a ná'agaca bönachi yudo', bila'yönnë' didza' ni, gula'bó'dë'ë böniga tu' cabí nóziguequinë' bizxi guntë lë na' raca. <sup>25</sup> Ní'irö bidxinë' tu bönni' ni', en gudíxjö'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guíë nacu'ë chila yudo' tu'sédinë' bönachi.

<sup>26</sup> Ní'irö guyijë' bönni' na' rinná bé'enë' ní'a ná'agaca bönachi yudo', dzágagaquië' lë' ní'a ná'agaquië' na', ate' gula'ché'ë yugu' gubáz na' nasól-lë'ë Cristo, pero bití' bi gulunë' quégaquië', tu' guládxinë' ulu'ládxí' bö-



nachi nacua' ni' légaquië' guió. <sup>27</sup> Cate' chinaché'-gaquië' yugu' gubáz na', bulu'sudxinë' légaquië' ló-gaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

<sup>28</sup> —¿Naru' cabí gúdxida'atu' libí'ili' biti' usédili' bö-nachi ca naca queë' bönni' na'? Na'a, chigudísili' xibá ni idútë yödö Jerusalén, en ré'ënilí' usubága'li' netu' xigua' tu' nözi yöl-la' guti queë' bönni' na'.

<sup>29</sup> Ní'irö bulu'bí'ë didza' Pedro, en ia'zica'rë' gubáz na' nasól-lë'ë Cristo, ta'nnë':

—Run bayudxi uzërö náratu' xtídzë'ë Dios ca xtídzá'-gaca bönachi. <sup>30</sup> Libí'ili' bétili'-në' Jesús cate' ni' budá'al-i'-në' lë'e yaga cruz, pero Dios quégaquië' xuz xtó'oru' busubanë' Lë'. <sup>31</sup> Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusólá, en gunë' ga ulu'bí'i ládxi'gaca bö-nachi Israel, para gaca uniti lahuë' dul-la' nabága'-gaquië'. <sup>32</sup> Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risól-lë'ë Dios quégaca nupa tun ca rna xtídzë'ë.

<sup>33</sup> Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulé'ënnë' ilútië' légaquië'. <sup>34</sup> Ní'irö guzuínë' tu bönni' yudo' ruchí'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasól-lë'ë Cristo ló'alö tu chí'ido'. <sup>35</sup> Ní'irö gudxë' bönni' yudo' tu'chi'a tu'söröë' na', gunné':

—Libí'ili', bönni' Israel, bulí'yutëz queé'li' ca naca le ré'ënilí' gunli' quégaquië' bönni' ni. <sup>36</sup> Ral-la' tsöjnéli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtërë'. Guláquië' bönni' yöjtá'gaquië' lë' idú tapa gáyü'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'. <sup>37</sup> Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yöjtá'gaca lë'. <sup>38</sup> Que lë ni na' rea' libí'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz, <sup>39</sup> pero channö naca queë' Dios, biti' gaca usunítili' le. ¡Bulí'yú cuinli' cabí tíl-lalen-lí'-në' Dios!

<sup>40</sup> Ní'irö gulunë' tuz didza' len lë'. Bulu'lidzë' yugu' gubáz na' nasól-lë'ë Cristo, ate' gula'guínë' légaquië', en bulu'zenë' légaquië' bach para cabirö ilu'ílenë' bö-nachi didza' ca naca queë' Jesús. Ní'irö bulu'sané' lé-gaquië'. <sup>41</sup> Bila'rúajë' gubáz na' nasól-lë'ë Cristo ló-gaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'guí' gula'záquë'ë tu' dá'gaquië' Jesús. <sup>42</sup> Yugu' dza bulu'séditiqui'sinë' bö-nachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

### Ta'bóë' gadxi bönni' para ilácalenë' bönachi queë' Cristo

**6** Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' qué-gaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntú nu ruí'i le ilágunu nigula uzëbi quégaquië' bönni' ni' tu'ë didza' griego. <sup>2</sup> Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Biti' naca dxí'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bö-nachi. <sup>3</sup> Que lë ni na', böchi' luzá'atu', guli'cö gadxë' bönni' ládjalí', para ugu'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni', en naca bë' Dios Bö' Lá'ayi zóalenë' lé-gaquië'. <sup>4</sup> Netu' ni ulídzatica'stu'-në' Dios, en uséditu' bönachi xtídzë'ë Dios.

<sup>5</sup> Yúgu'të' gula'yaza ládxi'gaquië' didza' ni, ate' gula'bóë' Esteban, tu bönni' réajlë'ë Cristo idú ládxe'ë, en zóalenë' Dios Bö' Lá'ayi lë'. Lësca' gula'bóë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquí'a, bönni' zí'alö butsé'ë ca runë' para tseaj ládxe'ë Dios ca tunë' yugu' bönni' judío. <sup>6</sup> Ní'irö bulu'sudxinë' bönni' na' gula'bóë' ló-gaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

<sup>7</sup> Guzërö xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

### Ta'zönë' Esteban

<sup>8</sup> Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' ládxe'ë queë'. <sup>9</sup> Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sédë' queë' Dios, nazí' le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandría, en luyú Cilicia, en luyú Asia, gulunë' légaquië' tsözxón. Bönni' ni gula'díl-lalenë' Esteban didza'. <sup>10</sup> Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni', tu' zóalenë' Dios Bö' Lá'ayi lë'. <sup>11</sup> Ní'irö gula'guíxjë' bönni' ila'zí' yë'ë, ila'nnë': "Netu' biyónitu' didza' ru'ë Esteban ni, rnnë' zí'ë queë' Moisés, en queë' Dios." <sup>12</sup> Caní guca, bönni' ni gula'gu'ë xilá ládxi'gaca bönachi, tsözxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía dí'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söröë'. <sup>13</sup> Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zí'ë que yudo' lá'ayi ni, en que xibá queë' Dios. <sup>14</sup> Biyónitu' didza' bë'ë bönni' ni ca gunë' Jesús, bönni' Nazaret, rnnë' usunítie' yudo' ni,

en utsé'e yugu' le nalébiru' runru', yugu' lè na' gunná bé'ené' Moisés rë'u.

<sup>15</sup> Ní'irö bönni' yudo' tu'chi'a tu'söröë', en yúgu'tè nupa ró'gaca ni' bulu'yúé' Esteban, ate' bila'lé'ené' lahué', rna' ca rna' lahué' tu gubáz lá'ayi queé' Dios.

### Didza' bēē Esteban, le gunné' uláz queé'

**7** Ní'irö bixúz lo gunábiné' Esteban na', rnné':  
—¿Naru' nácatè caní?

<sup>2</sup> Bubi'è didza' Esteban, rnné':

—Libí'ili', bönni' gula, en libí'ili', bócha'a. Bulí'zé nágal-í' le guía' libí'ili'. Dios, Bönni' nayépisëtèrè', bulu'í' lahué' ga zoé' Abraham, xúziru' gudödi, cate' ni' zoé' luyú Mesopotamia, cate' si' tsöjsöë' yödzö Harán.

<sup>3</sup> Dios gudxé' lè: "Birúaj ladzu', en bulá'alén di'a dza quiu', ate' guyéaj luyú ni' ulu'í'ida' lí'." <sup>4</sup> Ní'irö birúajé' Abraham luyú Mesopotamia le naca xiyúgaca bönachi Caldea, ate' yöjsöë' yödzö Harán. Lu yödzö ni' gútié' xuzé' Abraham na', ate' lè' buzé'è ni', ate' Dios guché'è lè' luyú ga ni zóaru' na'a. <sup>5</sup> Dios bití' bē'è lè' lataj guequi queé' luyú ni. Calëga látí'sö bunödzjé' queé' ga soé' luyú ni, pero guxzí' lu në'è Dios unödzjé' queé' luyú ni, ate' tödi gátie' Abraham guequi luyú ni quégaca xzí'ini xí'söë', sal-la' bití' nacu'ínibi' bí'i queé'. <sup>6</sup> Lësca' caní Dios gudxé' Abraham: "Tsöjáquié' xzí'ini xí'sú' lu xiyúgaca bönachi izá'a, ate' ni' ilácagaquié' ca bönachi zítu'. Iluné' bönni' luyú ni' ga ilácagaquié' xzí'ini xí'sú' bönni' nadó'ogaquié'. Ulu'saca' zí'è légaquié' idú ca tapa gayuá' iz." <sup>7</sup> Lësca' Dios gudxé' lè: "Neda' uzötja' bönachi luyú ni', ga ni' ilácagaquié' xzí'ini xí'sú' bönni' nadó'ogaquié', ate' tödi ni' ulu'rúajé' ni', ate' iluné' xichi-na' luyú ni." <sup>8</sup> Dios bénlené' Abraham tu didza' rucá'ana tsahuí', en gunná bé'ené' lè' ichúguié' lu xipéla'gaquié' bönni' biguí' nacu'è lidxé' tu le gaca bē' nazí' lu ná'agaquié' didza' na' rucá'ana tsahuí'. Gudödi ni' gúquié' Abraham xúzibi' bí'i Isaac, en cate' chigúquibi' xunu' gubidza, guchúguié' lu xipéla'bi' lè na' naca bē'. Isaac na', lësca' caní bené' queé'bi' bí'i Jacob, xzí'iné', en caní bené' ca' Jacob quégaca idxínnutèbi' bí'i bönni' queé', nupa ni' gulaca xuz xtó'ogaca idxinnu cö' bönachi Israel.

<sup>9</sup> Yugu' xuz xtó'oru' na', lu yöl-la' ruzxé'e quégaquié', gulúti'è-bí' bí'i José, bóchi'gaquié', lu ná'agaquié' bönni' ni' gulúti'gaquié'-bí' luyú Egipto. Dios guzóalené'-bí' bí'i José na' <sup>10</sup> en busólé'-bí' lu le gulaca queé'bi'. Dios bē'è-bí' yöl-la' réajni'í, le ben ga guyaza ládxé'è-bí' Faraón, bönni' rinná bé'ené' bönachi Egipto, ate' Faraón na' budödé' lu ná'abi' bí'i José yöl-la' unná bē' para gunná bē'ebi' bönachi luyú Egipto, en yúgu'tè bönachi nacuá' lidxé' Faraón na'.

<sup>11</sup> Ní'irö gúcada' gubín idú luyú Egipto, en luyú Canaán ni, ate' gula'guí' gula'zaca' yúgu'tè bönachi dza ni'. Bití' bidzöli le ilahué' xuz xtó'oru'. <sup>12</sup> Cate' biyönné' Jacob dē xoa' xtila luyú Egipto, gusól-lè'è yugu' xzí'iné', bönni' ni' nácagaquié' xuz xtó'oru', luyú ni'. Caní guca le zí'aló luzuí yöjáquié' ni'. <sup>13</sup> Cate' le buropi luzuí yöjáquié' luyú Egipto, bené' José ga bulu'únbē'è bóchē'è lè'. Caní guca, gunóziné' Faraón nupa nácaga-

ca di'a dza queé' José. <sup>14</sup> Ní'irö gusól-lè'è José didza', en bené' ga bidxiné' Jacob, xuzé', luyú Egipto, ate' dzá-gaca di'a dza queé' lè'. Gulaca idú tsónnalalaj yu' chinu bönachi. <sup>15</sup> Caní guca, bidxiné' Jacob luyú Egipto, ga ni' gútié' lè', ate' gulátié' ca' xuz xtó'oru' luyú ni' cate' bizá'a dza que quéégaquié'. <sup>16</sup> Cate' gulátié' tu tu xuz xtó'oru', xzí'ini xí'sóagaquié' yöjá'agaquié' légaquié' luyú Siquem, ate' ni' bulu'cáché'è légaquié' yeru ba lu xzan bulóaj na' gú'ué' Abraham lu ná'agaca xzí'iné' Hemor, bönni' Siquem na'.

<sup>17</sup> Gudödi zían iz, cate' bidxín dza ral-la' gaca le guxzí' lu në'è Dios, lè na' bené' tsutsu xtídzé'è guné' queé' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. <sup>18</sup> Ní'irö guyázié' bönni' yúbölö gunná bē'è luyú Egipto na', en catu caz biyönné' ca naca le bené' José, gúcalené' bönachi Egipto. <sup>19</sup> Bönni' unná bē' na' bí'è dö' quégaca bönachi uládz queé'ru'. Busaca' zí'è yugu' xuz xtó'oru' na', en bené' ga bulu'sané'-bí' bí'i bönni' hué'énido' que quéégaquié', para ilátibi'. <sup>20</sup> La' dza ní'sö gúljabí' ca' bí'ido' Moisés, ate' Dios guyaza ládxé'è-bí'. Xuz xiná'abi' bulu'sculé'-bí' lídxigaquié' idú ca tsonna beo'. <sup>21</sup> Cate' bidxín dza ulu'sané'-bí' xuz xiná'abi' para gátibi' bí'ido' Moisés na', bidxinu nigula xzí'iné' Faraón ga ni' bulu'cá'ané'-bí', ate' yöjxí'ínu-bí', en buscúlunu-bí' ca bí'i que cázanu. <sup>22</sup> Caní guca, bizédabi' bí'i Moisés yúgu'tè le táquié' bönni' Egipto, en gúcatèröbi' zxön ca naca didza' bē'èbi', en ca nácagaca le benbi'.

<sup>23</sup> 'Cate' Moisés na' chiyú'ubi' choá' iz, gunná ládxí'bi' tsöjyubi' bönachi uládz queé'bi', bönachi Israel. <sup>24</sup> Cate' bidxinbi' ga na' nacu'è, bilé'ebi'-nè' tu bönni' Egipto, rusaca' zí'è tu bönni' uládz queé'bi'. Ní'irö gúcalenbi'-nè' bönni' uládz queé'bi' na', en bétibi'-nè' bönni' Egipto na'. Caní guca, buzí' labí' bí'i Moisés bönni' na' uláz queé' bönni' uládz queé'bi'. <sup>25</sup> Gúquibi' Moisés huala'yéajni'iné' bönni' bóchi'bi' guné' Dios ga usölábi' lè cázabi' légaquié', pero légaquié' bití' gula'yéajni'iné'. <sup>26</sup> Ia'tú dza ca' yöjxáca'bi' ia'chopé' bönni' Israel, ta'dil-lé', ate' gú'unibi' cuéqui dxibi' légaquié', en gúdxibi' légaquié': "Libí'ili', bóchi'li' naca. ¿Bizx que ruá'ali' luzá'ali' dö'?" <sup>27</sup> Ní'irö bönni' na' ru'è dö' que luzé'è budxígué'è-bí' bí'i Moisés, gunné': "¿Núzxité buzóa lí' para inná bé'enu' netu', en uchi'a usöróu' le runtu?" <sup>28</sup> ¿Naru' ré'énitsenu' gútiu' ca' neda' ca benu' néaje, bétiu'-nè' bönni' Egipto na'?" <sup>29</sup> Cate' Moisés biyónibi' didza' ni, buxzúnnajbi' ni', en yöjsóabi' luyú Madián ga ni' guzóabi' ca tu bönni' zítu'. Luyú Madián na' butsaga ná'alénbi'-nu nigula lu yödzö ni', ate' gúl'agacabi' chó-pabi' bí'i bönni' queé'.

<sup>30</sup> 'Cate' chigudödi choá' iz zoé' ni', bulu'í' lahué' tu gubáz lá'ayi queé' Dios ga zoé' lu guí' que yaga yótsi'-do' régui, ga ni' naca lu lataj cá'asö, le ró'ö ra' guí'a nazí' le Sinaí. <sup>31</sup> Cate' Moisés bilé'ené' guí' na', bubán-iné', ate' gubí'guí'è gala' para ilé'ené' dxí'a, ate' biyönné' chí'è Xanru'. <sup>32</sup> Caní gudxé' Xanru' lè: "Neda' naca' Dios quégaquié' xuz xto'o. Naca' Dios queé' Abraham, en Dios queé' Isaac, en Dios queé' Jacob." Ní'irö lu yöl-la' radxi queé', guxzí'zidé'è Moisés, en bití'rö burúguiné'

uyúe'. <sup>33</sup> Xanru' gudxè' lè: "Guléaj xirachu' nudó'o, tu naca lá'ayi ga ni zu' tu' zoa caza' neda', Dios, ni. <sup>34</sup> Le nácatè chibilé'eda' le ta'guí' ta'zaca' bönachi quia' nacuá' luyú Egipto, en chibiyönda' ta'bödxi yeche'. Böt-ja', zoa' ni para usólá' légaquie'. Gudá na'a, isól-la'a lí luyú Egipto."

<sup>35</sup> 'Sal-la' bönni' uládz queé' Moisés, bulu'cá'anè' lè' cá'asö, gula'nné: "¿Núxité buzóa lí para inná bé'enu' netu', en uchi'a usöró'u' le runtu'?" Dios gusól-lè'è lè' para gáquie' bönni' unná bè', en bönni' rusólá, ca na' gubáz lá'ayi na' queé' Dios gudxè' Moisés, cate' bulu'í lahué' lu yaga yótsi'do' régui ga na' zoé'. <sup>36</sup> Moisés ni bubéajè' bönni' uládz queéru' luyú Egipto. Guca caní gudödi bené' le gulún ga bulu'bani bönachi ni', en le taca bè' bené' luyú ni'. Lësca' caní bené' lu nísado' nazí' le Nísado' Xiná. Caní bené' lógaquie' idú ca choá' iz lu lataj cá'asö. <sup>37</sup> Lè cazè' Moisés na' gudxè' bönachi Israel ni', gunné: "Xanru' Dios isól-lè'è queéli' tu bönni' galjè' ladaj dí'a dza queéli', ate' gáquie' bönni' gu'è didza' uláz queé' Dios. Isól-lè'è lè' queéli' ca na' gusól-lè'è neda'. Lè cazè' run bayudxi uzé nágali'-nè'." <sup>38</sup> Lësca' lè cazè' Moisés na' guzóalenè' bönachi nudúbigaca queé' Dios lu lataj cá'asö, ate' gudzáguie' gubáz lá'ayi queé' Dios lè', Nu na' bé'len lè' didza' lu guí'a Sinaí na'. Moisés na' guzóalenè' xuz xtó'oru', ate' Dios budödè' lu në'è xibá lá'ayi queé', le ruí' didza' ca gaca ila'deli' bönachi yöl-la' na'bán, ate' budödè' Moisés xibá ni lu ná'agaca xzí'ini xísóagaquie' ga ridxintè queéru' r'è'u.

<sup>39</sup> 'Biti' gulé'ennè' xuz xtó'oru' ilunè' ca rnna xtídzè'è Moisés, pero bulu'zóé' lè' tsólá'alö, en gulé'ennè' tsöjhuójgaquie' luyú Egipto. <sup>40</sup> Cate' ni' zoé' Moisés na' lu guí'a Sinaí na', légaquie' gulé' Aarón, bóchë'è Moisés na', gula'nné: "Ré'ënitú' gunu' yugu' dios queétu', tu budó' guiè, para tsöjnórugaca lotu'. Biti' nöztu' bi guca queé' Moisés, bönni' na' nubéajè' netu' luyú Egipto."

<sup>41</sup> Ní'irö gulunè' tu budó' oro le naca ca tu bédxido', ate' gulútiè'-ba' bö'cu' xzí'la'do', en gulú'ugaquie'-ba' lo budó' oro na', ate' gulunè' laní lo budó' na' nungaquie'.

<sup>42</sup> Que lè ni na' Dios bucá'anè' légaquie', en guléaj ládxe' légaquie'. Ní'irö gula'yéaj ládxi'gaquie' yugu' le ta'yèpi lúxiba. Ca naca lè ni nazúaj lu guichi le gula'n- né' bönni' gulu'è didza' uláz queé' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bédxi ni' bétigacali'-ba', en buzégui'gacali'-ba', lè na' benlí' lu lataj cá'asö idú ca choá' iz?

<sup>43</sup> Biti' gulú'ugacali'-ba' quia' neda', pero bí'ali' le nequi que Moloc, budó' guiój queéli'. Bí'ali' ca' tu le naca ca böljaj lúxiba nazí' le Refán, lè na' buzóali' ca dios queéli'.

Yugu' budó' guiój budó' yaga ni, la' libí'isili' benlí' para guyéaj ládxi'li' léguequi.

Que lè ni na', ubéaja' libí'ili' lu xiyulí', en iché'a libí'ili' zítu'rö ga dè luyú Babilonia.

<sup>44</sup> 'Cate' ni' gula'cu'è xuz xtó'oru' lu lataj cá'asö, guta' quégaquie' yu'u lari' na' ga gulún chi'è xibá queé' Dios, lè na' naca bè' Dios caz zóalenè' légaquie'. Gulunè' tu yu'u lari' na' ca na' Dios gunná bé'enè' Moisés, cate' ni'

gudxè' lè' gunè' le ca naca lè na' bilé'enè', le bulufinè' Dios lè' lu guí'a ni'. <sup>45</sup> Lësca' bulu'dödè' yu'u lari' na' lu ná'agaquie' xzí'inigaquie' ga bidxintè dza ni' gulu'è xuz xtó'oru' le luyú ni, cate' ni' dzáguie' Josué légaquie', ate' gula'gúè' xiyúgaca bönachi izá'a, nupa ni' buláguie' Dios lógaquie' xuz xtó'oru'. Caní gulunè' zían iz ga bidxintè dza zoé' David. <sup>46</sup> Dios guyaza ládxe'è David na', ate' lè' gunábinè' Dios gu'è lè' lataj gunè' tu yu'u ga soé' Dios queé' Jacob. <sup>47</sup> Biti' bè'è Dios lè' lataj, ate' Salomón, xzí'inè' David na' bené' yu'u queé' Dios. <sup>48</sup> Caní bené' sal-la' bití' zoé' Dios, Nu nácatèrö lo, tu lu yudo' núngaca bönachi. Ca naca lè ni gunné' tu bönni' bè'è didza' uláz queé' Dios, gunné':

<sup>49</sup> Yehua' yubá naca ga rö'a rinná bè'a, ate' yödzöliö naca xilibi ni'a.

Rnnè' Xanru': "¿Naru' gúntsalí' tu yu'u ga soa'?

¿Naru' zóatsö tu lataj ga ral-la' uzí ládxa'a?

<sup>50</sup> ¿Naru' cabí len na'a caza' bena' yúgu'tè lè ni'?"

<sup>51</sup> Ní'irö Esteban na' gudxè' yugu' bönni' yudo' tu'chi'a tu'söröè' na', gunné':

—Libí'ili', bönni' zidi, bití' bi raza icja nágali'. Nazidi icja ládxi'do'oli' ca raza quégaca bönachi bití' núnbè-gaquie' Dios. Ridá'baga'tica'sili'-nè' Dios Bö' Lá'ayi. Ca na' gulunè' xuz xtó'oli', runlí' ca' libí'ili'. <sup>52</sup> Gula'bía ládxi'-gaquie' xuz xtó'oli' na' yúgu'tè bönni' ni' gulu'è didza' uláz queé' Dios. Lësca' gulútiè' bönni' ni' gula'guíxjö'è zí'alö ca ral-la' guidè' Cristo, Bönni' Tsahui', ate' na'a, cate' ni' bidxinè' Bönni' Tsahui' na', libí'í cázali' bétili'-nè' lu ná'agaquie' bönni' gulútiè' Lè'. <sup>53</sup> Libí'í cázali' dè lu ná'alí' xibá queé' Dios, lè na' gubáz lá'ayi queé' Dios bulu'dödè' lu ná'agaquie' xuz xtó'oli', pero bití' runlí' ca rnna.

### Tútiè' Esteban

<sup>54</sup> Cate' bönni' yudo' tu'chi'a tu'söröè' na' bila'yönnè' didza' ni, gula'léde'enè' Esteban, ate' lu yöl-la' rilé qué-gaquie' lè' gulagu xzéatica' láyè'è. <sup>55</sup> Ní'irö buyúè' Esteban na' lúxibalö, ate' zóalenè' Dios Bö' Lá'ayi lè', bilé'enè' lataj bení' ga zoé' Dios, enca' Jesús, zuiné' cuita lè'è ibèla Dios ga nayépisètèrè'. <sup>56</sup> Ní'irö gunné':

—Bulí'yútsöca'. Rilé'eda' nayalaj lúxiba, ate' zuiné' Bönni' Guljè' Bönachi cuita lè'è ibèla Dios.

<sup>57</sup> Ní'irö bönni' yudo' tu'chi'a tu'söröè' na' bulu'sayaj nágagaquie'. Gula'bódxí'è zidzaj, en tsözxón gula'bía dí'è Esteban na'. <sup>58</sup> Bulu'béajè' lè' ní'ilö ra' yödzö na', ga ni' bulu'ládxè' lè' guiój. Yugu' bönni' ni' tunè' ba nalí le tu'zéguié' Esteban didza' bulu'cu'è lari' ta'xóa yén-gaquie' xini'è tu bönni' lè' Saulo cate' ni' bulu'ládxè' Esteban guiój. <sup>59</sup> Cate' ni' tu'ládxè' Esteban guiój, lè' bulídzè' Dios, gunné':

—Xána' Jesús. Buzí' bö' naca caza'.

<sup>60</sup> Ní'irö biyéchuè', buzóa zxbè', en bè'è zidzaj didza', gunné':

—¡Xan! ¡Biti' usubágu'u légaquie' dul-la' ni! Cate' budxi bè'è didza' ni, gútitè'.

### Saulo ribía láchxë bönachi queë' Cristo

8 Saulo benë' tsözxón yugu' bönni' ni' gulútië' Esteban.

La' ní'sö yugu' bönni' ta'yéaj láchxí'gaquië' Dios gulá'agaquië' Esteban, ate' yöjcháxí'gaquië' lë'. Gula'bódxidë'ë ní'a queë'.

Dza na' yugu' bönni' judío cabí ta'yéajlë'ë Cristo gula'bía láchxí'da'gaquië' bönachi queë' Cristo nacua' Jerusalén. Lësca' Saulo gudxía láchxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'látisö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasól-lë'ë Cristo bulu'gá'anë' Jerusalén.

### Raca libán que didza' dxí'a luyú Samaria

4 Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxí'a. 5 Ní'irö Felipe, tu bönni' dzáguie' nupa na' gulásilasi, guyijë' luyú Samaria, ate' benë' libán ni' ca naca queë' Cristo. 6 Bulu'dubë' yugu' bönni' ni', ate' idú láchxí'gaquië' bulu'zë' nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. 7 Caní guca, tu' benë' ga bulu'rúaj zían bö' xihui' yú'ugaca bönachi, ta'bódxí'a zidzaj, ate' bulu'huóaca zían nupa te'ë huë' nacú'uni bin, en nupa bití' guca sá'gaca. 8 Caní guca, bulu'dzeja bönachi yödzö ni'.

9 Zoë' Simón, tu bönni' zí'alö gúquië' bönni' udzá' uné ya'a lu yödzö na', bönni' guzxí' yé'enë' bönachi Samaria na', gunné' lë' cazë' náquië' bönni' nayépisëtë're'.

10 Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zön queë' Dios." 11 Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' uné ya'a queë'.

12 Cate' gula'yéajlë'ë libán runë' Felipe que didza' dxí'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. 13 Ní'irö guyéajlë'ë ca' Simón na', en bidilë' nisa, ate' gudá'entica'së' tsözxón Felipe na'. Cate' bilé'enë' yugu' yöl-la' huáca zön, en yugu' le taca bë' runë' Felipe, bubá'ninë' Simón na'.

14 Cate' yugu' gubáz na' nasól-lë'ë Cristo nacue' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'sól-lë'ë Pedro, en Juan ni'. 15 Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. 16 Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. 17 Ní'irö Pedro, en Juan na', gula'xóca ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

18 Cate' bilé'enë' Simón, bönni' udzá' na', le guca cate' gubáz na' nasól-lë'ë Cristo gula'xóca ná'agaquië' bö-

nachi ni', bidisóalenë' Dios Bö' Lá'ayi légaquië', gú'unë' quízxjë' légaquië' dumí, 19 ate' rë' légaquië':

—Benna ca' yöl-la' huáca ni quia', para cate' ixóca na'a nútí'tës bönachi, idisóalenë' Dios Bö' Lá'ayi nu na'.

20 Ní'irö Pedro gudxë' lë', rnnë':

—Initi dumí quiu' tsözxón len lí', tu' réquinu' len dumí idélí'nu' yöl-la' huáca queë' Dios. 21 Bití' nacu' bachi gút-su'u lë ni, tu' dxía le naca ruá' dö' icja láchxí'do'o lahuë' Dios. 22 Bubí'i láchxí' ca naca huiá' dö' ni runu', en gú-ta'yu lahuë' Dios, nadxi ca' uniti lahuë' lí' ca naca lë ni rizá' láchxu'u. 23 Réquibe'eda' nabágu'u xíguia', en nadzunu' lu yalaj que tu' xihui'.

24 Ní'irö bubí'ë didza' Simón na', rë' légaquië':

—Bulí'lídzë' Dios, gáta'yulí' lahuë' Xanru' ní'a quia' neda' para cabí gaca quia' nitú lë na' chigunnálí'.

25 Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxí'a yugu' lu láchxí'gaquië' bönni' Samaria, ate' gudödi ni' yöjhuó'jgaquië' Jerusalén.

### Felipe, en tu bönni' Etiopía

26 Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' zia-ga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajë'. La' nöza ni' yöjtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj láchxë'ë Dios.

28 Na'a, söhuó'jë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. 29 Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

30 Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajní'inu' lë na' rulabu'?

31 Bubi'ë didza' bönni' Etiopía na', gunné':

—¿Nacxi gaca tséajní'ida' channö cuntú nu zoa uzéajní' neda'?

Ní'irö gúta'yuë' lahuë' Felipe cuenë', en có'lenë' lë' tsözxón lu carreta na'.

32 Lë na' nazúaj lu guichi rulabë', rnna caní:

Ca bö'cu' zxíla'do', gula'ché'ë Lë' para ilútië' Lë',

en ca bö'cu' zxíla'do', bití' rnnëba' cate' nu richugu lítsa'ba', ca' benë' Lë', bití' gusalaj ru'ë bi innë'.

33 Bulu'cá'anë' Lë' cá'asö, en bití' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uláz queë'?

La' légacasë' gulútië' Lë'.

<sup>34</sup> Bönni' huödx na' gunábinë' Felipe, rë' lë':  
—Ráta'yua' lo' quíxjöi'nu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

<sup>35</sup> Ní'irö la' didza' nisö buguélë'ë Felipe, en busiyönnë' lë' didza' dxí'a ca naca queë' Jesús. <sup>36</sup> Cate' ní' yú'u-gaquië' nöza sôjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?  
<sup>37</sup> Felipe gudxë' lë':

—Channö réajlë'u idú ládXu'u, huáca idilu' nisa.  
Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

<sup>38</sup> Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquillë' bönni' huödx na' nisa. <sup>39</sup> Cate' bulu'rúajë' lu nisa, Dios Bô' Lá'ayi buchë'ë Felipe, ate' bönni' huödx na' bití'rö bilé'enë' lë'. Ní'irö buguélë'ë xinözë', sôhuójjë' rudzéjanë'. <sup>40</sup> Cate' chiréquiibe'enë' Felipe, zoë' lu yödzo Azoto. Gudödë' yúgu'të yödzo ní', ate' benë' libán que didza' dxí'a, ga bidxintë' yödzo Cesarea.

### Saulo ruhuóáquië' queë' Cristo

**9** Ní' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, <sup>2</sup> en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzo Damasco, ate' channö utsöjxáquië' yugu' bönni', en nigula ta'yéajlë'ë Jesús ní', gaca ichë'ë légaquië' nadzúngaquië' lu yödzo Jerusalén. <sup>3</sup> Tsanni ní' yú'u-gaquië' nöza Saulo, en nupa nacué'len lë', sôjáquië', en cate' chizóa ila'dxinë' Damasco, tsárido'os buzení'da' tu bení' za' lúxiba, le buzení' ga ní' sôjáquië'. <sup>4</sup> Ní'irö gudzö'ë Saulo lu yu, en biyönnë' chí'i Nu rë lë':

—Saulo, Saulo, ¿bixz que ribía ládXu'u neda'?

<sup>5</sup> Saulo gunábinë' Lë', gunné':

—¿Nuzxi lí, Xan?

Lë' gunné':

—Neda' Jesús, Nu ribía ládXu'u. Run zí' cuinu', ridá'bagu'u neda'. Raca quiu' ca na' raca queé'ba' bëdxi, run zí' cuinba' richégu'ba' yaga tuchi' túndë'ë-ba' zí'.

<sup>6</sup> Ní'irö Saulo guzxízidë'ë, gúdxinë', en gunné':

—Xan, ¿bixxi ré'ënu' guna'?

Xanru' gudxë' lë':

—Guyasa, en guyáz lu yödzo, ate' ní' isól-la'a quiu' nu guié lí' le ral-la' gunu'.

<sup>7</sup> Guládxinë' yugu' bönni' na' sôjácálenë' Saulo, tu' bila'yönnë' chí'i na', sal-la' cuntu nu bila'lé'enë'. <sup>8</sup> Ní'irö böasë' Saulo luyú, en cate' guxá' guiójj lahuë', bití' ca' rilé'enë'. Que lë' ni na' gula'guélë'ë në'ë, en gula'ché'ë lë' Damasco. <sup>9</sup> Guzóë' ní' tsonna dza nachul-la lahuë', en bití' bi gü'íi gudahuë'.

<sup>10</sup> Zoë' ca' Ananías, bönni' réajlë'ë Cristo, yödzo Damasco, ate' Xanru' bulu'íi lahuë' ga zoë' ca tu lu yëla béchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

<sup>11</sup> Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. <sup>12</sup> Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóá në'ë lë' para huóálaj guiójj lahuë'.

<sup>13</sup> Ní'irö bubí'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Lí', nacué' Jerusalén. <sup>14</sup> Zë'ë ca' ni, dë lu në'ë uláz quégacaquië' bixúz unná bë' sönë' yúgu'të nupa tu'lidza Dios len Lo' Lí'.

<sup>15</sup> Ní'irö Xanru' rë' Ananías na', rnnë':

—Guyéaj, tu' guró caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. <sup>16</sup> Ulu'í'da' lë' le zían le qui'í sáquë'ë uláz quia' neda', gunë' xichina'.

<sup>17</sup> Ní'irö guyijë' Ananías ní', ate' guyázië' yu'u, en guxóá në'ë Saulo, ate' rë' lë':

—Böcha'a Saulo, Xanru' Jesús, Nu na' bulu'íi lahui la' nöza ga ní' zo'ó, gusól-lë'ë neda' para huóálaj guiójj lo', en idisóalenë' Dios Bô' Lá'ayi lí'.

<sup>18</sup> La' ní'sisö gula'guínnaj le naca ca xilácuba' böla lu guiójj lahuë', ate' la' böáljatë' guiójj lahuë'. Ní'irö guyasë' Saulo, en bidilë' nisa. <sup>19</sup> Gudödi ní' gudahuë', en böáca ládXë'ë. Ca chopa tsonna dza guzóalenë' yugu' bönni' ta'yéajlë'ë Cristo nacué' Damasco.

### Runë' libán Saulo lu yödzo Damasco

<sup>20</sup> La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sëdë' queë' Dios, rnnë':

—Jesús náquië' Zxí'ini cazë' Dios.

<sup>21</sup> Bulu'bábinë' yúgu'të bönni' ní' ta'yönnë' lë', ta'nnë':

—¿Naru' calëga bönni' ni bönni' na' busuní'tië' nupa nacué' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

<sup>22</sup> Bidíparö ládXë'ë Saulo, en benë' ga gula'bö'ë böni-ga bönni' judío nacué' Damasco, tu' bulu'í'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

### Rulé' Saulo lu ná'agaquië' bönni' judío

<sup>23</sup> Cate' chigudödi zían dza, gulún xtídza'gaquië' bönni' judío nacué' ní' ilútië' Saulo. <sup>24</sup> Rëla, en të dza gula'bó' nísie' yugu' bönni' judío ga nu ridödi lu zö'ö run chí'i yödzo na' para ilútië' lë', pero gúquiibe'enë' Saulo le té'ënnë' ilunë' queë'. <sup>25</sup> Ní'irö yugu' bönni' ta'yéajlë'ë Cristo gula'guélë'ë Saulo chí'i dzó'ölö, ate' gula'gu'ë lë' tu lu ga'böra zxon naga' du, en bulu'zötjë' lë' ní'ilö lu zö'ö run chí'i yödzo na'.

### Rudxinë' Saulo Jerusalén

<sup>26</sup> Cate' budxinë' Saulo Jerusalén, gú'unnë' tsöjenë' tsözxón bönni' ní ta'yéajlë'ë Cristo, pero yúgu'të guládxinë' lë', tu' cabí téquinë' réajlë'ë Saulo na' Cristo. <sup>27</sup> Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasól-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bé'lenë' lë' didza', en ca na' benë' Saulo lu yödzo Damasco, len yöl-la' rugu ladxí' benë' libán ca naca queë' Jesús. <sup>28</sup> Ní'irö Saulo guzóalenë' légaquië' lu yödzo Jerusalén, ate' gudálenë' légaquië' tsözxón. <sup>29</sup> Lu yöl-la' rugu ladxí' benë' libán Saulo ca naca queë' Xanru', en gudí-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. <sup>30</sup> Cate' guléquibe'enë' böchi'ru' ta'yéajlë'ë Cristo lë' ni, gula'ché'ë Saulo lu yödzo Cesarea, ate' gula'sól-lë'ë lë' yödzo Tarso, le naca ladzë' Saulo.

<sup>31</sup> Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ladxí'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

### Pedro ruúnë' tu bönni' lë' Eneas

<sup>32</sup> Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzo Lida. <sup>33</sup> Yöjxáquië' tu bönni' ní lë' Eneas, chiguca xunu' iz dë' ré'enë', nacu'unië' bin. <sup>34</sup> Pedro gudxë' lë':

—Eneas, Jesucristo ruúnë' lí'. Guyasa, en butubi xto'o.

La' guyásatë' Eneas na'. <sup>35</sup> Yúgu'të nupa nacuá' yödzo Lida, en yödzo Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

### Rátinu Dorcas, en rubannu

<sup>36</sup> Ia'stú le guca, lu yödzo Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le nácagaca dxí'a le tácalen bönachi yechi'. <sup>37</sup> Le guca dza ni', gü'í'nu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. <sup>38</sup> Tu' dë yödzo Lida gála'sö ga na' dë yödzo Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ní', ate' que lë' ni na' gula'sól-lë'ë chopë' bönni' ga na' zoë', ate' guláta'yüë' lahuë', të' lë':

—Biti' tsenu' guídu' queé'tu'.

<sup>39</sup> Ní'irö la' guyásatë' Pedro, sa'yéajlenë' légaquië'. Cate' bidxinë' ní', la' gula'ché'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'lu'í'nu lë' lari' quégaquië' bönni', en nigula, yugu' le benu Dorcas cate' ní' zóalenu légacanu. <sup>40</sup> Ní'irö Pedro bubéajë' ní'ilö yúgu'të nupa nacuá' ní', ate' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guió'j Ionu Dorcas. Cate' bilé'enu-në' Pedro, la' guyástënu, guró'önu. <sup>41</sup> Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. <sup>42</sup> Ca guca lë' ni guzé didza' idú lu yödzo Jope, ate' gula'yéajlë' bönachi zían Xanru' Jesús. <sup>43</sup> Bugá'anë' Pedro yödzo Jope na' zían dza lu yu'u lidxë' Simón, bönni' runë' tsahui' guídi zxa bëdxi.

### Le benë' Pedro lidxë' Cornelio

**10** Zoë' yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i légaquië' Bönni' Italia Röjáquië' Gudil-la. <sup>2</sup> Cornelio na' reaj ladxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxón. Runödzjë' Cornelio dumí zían le rácalen bönachi yechi', en rulídzaticá'së' Dios. <sup>3</sup> Tu dza idú ridödi xihuó bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

<sup>4</sup> Gúdxinë' Cornelio. Buyüë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nózinë' ca runu', rácalenu' bönachi yechi'. <sup>5</sup> Na'a, gusól-la' yugu' bönni' tsöjáquië' yödzo Jope tsöjlídzagaquië' bönni' na' lë' Simón, zoa ia'tú lë' Pedro. <sup>6</sup> Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' lí' le ral-la' gunu'.

<sup>7</sup> Cate' chibuzë'ë gubáz lá'ayi na' bé'lenë' lë' didza', bulidzë' Cornelio chópabi' bí'i huen dxin queë', en tuë' bönni' rejë' gudil-la reaj ladxë'ë Dios, en dzáguië' bönachi nacuá' lidxë' Cornelio. <sup>8</sup> Cate' budxi busiyönnë' légaquië' yúgu'të le guca, gusól-lë'ë légaquië' yödzo Jope.

<sup>9</sup> Dza buropi, tsanni ní' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ní' naca idú huagubidza. <sup>10</sup> La' ná'asö ridunë' Pedro, en gú'unnë' gahuë', ate' tsanni ní' tu'pé'ë queë', bilé'enë' le naca ca tu lu yëla béchigal.

<sup>11</sup> Bilé'enë' naya'aj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. <sup>12</sup> Lahui lari' na' dxíagacaba' yugu' böa' guixi' izá'a nacuá' tapa ní'a ná'agacaba', en yugu' böa' tá'ayöj lé'egacaba' lu yu, en yugu' böa' zoa xíligacaba'. <sup>13</sup> Ní'irö biyönnë' chí'i nu rë lë':

—Pedro, guyasa. Béti-gacaba', en gudagu.

<sup>14</sup> Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxí'a.

<sup>15</sup> Le buropi luzuí biyönnë' chí'i nu na' gudxi lë':

—Le nunë' Dios dxí'a, bití' innó' que: "Bití' naca dxí'a."

<sup>16</sup> Tsonna luzuí guca caní, ate' ní'irö la' buépitë lari' zxön na' lúzxiba. <sup>17</sup> Tsanni ní' rö'ë böniga Pedro, rizá' ladxë'ë bizxi sa'yéaj lë' na' bilé'enë' ca tu lu yëla béchigal, bila'dxinë' bönni' na' nasól-lë'ë Cornelio légaquië'

ra' yu'u, ta'nabë' gazxi zoa lidxë' Simón na'. <sup>18</sup> Cate' bila'dxinë' ni', bulu'lidzë' nupa nacua' yu'u na', en gula'nabinë' légaquië' channö zoë' tu bönni' lë' Simón ni', zoa ia'tú lë' Pedro. <sup>19</sup> Tsanni ni' rizá' ládxë'ë Pedro ca naca lë' na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' lí'. <sup>20</sup> Guyaschi na'a, en bötaj zcan yu'u. Biti' gaca chopa ládxu'u tséajlenu' légaquië', tu' nasól-la'a neda' yugu' bönni' ni.

<sup>21</sup> Ní'irö bö'tjë' Pedro zcan yu'u ga na' nacué' bönni' na' nasól-lë'ë Cornelio, en gudxë' légaquië':

—Neda' bönni' rugu'ajlil'. ¿Bizxi huen zá'alí' ni?

<sup>22</sup> Bulu'bi'ë didza', té' lë':

—Cornelio, tu bönni' rinná bé'enë' bönni' röjajúë' gudil-la, nasól-lë'ë netu'. Náquië' bönni' tsahui', en rádxiñë' Dios. Yúgu'të bönni' judío tunë' bal bönni' ni, en nadxí'güequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isól-lë'ë nu udulídza lí' guídu' lidxë' para yönnë' didza' gu'u.

<sup>23</sup> Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacué' Jope na' gulunë' lë' tsözxón.

<sup>24</sup> Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' dí'a dza queë', en yugu' böchi' luzé'ë nadxí'irönë' lidxë'. <sup>25</sup> Cate' guyáz-ië' Pedro lö'a, birújajë' Cornelio yu'u, yöjtságuie' lë'. Biyéchuë' xini'ë Pedro, en guyéaj ládxë'ë lë' ca runru' queë' Dios caz. <sup>26</sup> Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacué' lí'.

<sup>27</sup> Ní' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. <sup>28</sup> Ní'irö Pedro gudxë' légaquië', rnnë':

—Libí'ili' nöz quézilí' ca rinná bë' xibá queë' Moisés, rnna bití' ral-la' gunë' tu bönni' judío tsözxón o tsáza-lenë' nu bönni' izá'a. Na'a, Dios bulu'íinë' neda' bití' ral-la' inní'a queë' nitüë' bönni' náquië' cá'asö o bití' náquië' dxí'a. <sup>29</sup> Que lë' ni na' cate' bulídzalí' neda', la' bí-datea', en bití' guca chopa ládxa'a. Rinaba' na'a, ¿bizx que na' bulídzalí' neda'?

<sup>30</sup> Ní'irö bubí'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bí' tubi' bönni' ra'bán nácubi' larí' rëpi yösa bení', dului'í lobí' neda'. <sup>31</sup> Caní' gúdxibi' neda': "Cornelio. Dios riyönnë' le rulidzu'-në', en nözinë' ca runu', rá-calenu' yugu' bönachi yechi'. <sup>32</sup> Na'a, isól-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' lí' didza' dxí'a." <sup>33</sup> Caní' guca, la' gusól-la'tea' nu tsöjlidza' lí', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzé' nágatu' le inná bé'enë' Dios lí' innó'.

#### Didza' bë'ë Pedro lidxë' Cornelio

<sup>34</sup> Ní'irö gusí lahuë' Pedro ru'ë didza', rnnë':

—Le nácatë réajní'ida' na'a, bití' ruyusë' Dios yö'l-la' rinnësö quégaca bönachi, pero tuz ca rilé'enë' rë'u.

<sup>35</sup> Dios raza ládxë'ë bönachi iduté yödzölió, nupa na' tadxi Lë', en tun le naca dxí'a. <sup>36</sup> Gusól-lë'ë Dios xtídzë'ë ga nacua' bönachi Israel, en gusól-lë'ë nu ben libán que didza' dxí'a, le run ga raza dxí'a quégaca bönachi, lë' na' bidxín queëru' lu në'ë Jesucristo. Lë' cazë' náquië' Xanru' yúgu'tëru'. <sup>37</sup> Libí'ili' nöz quézilí' lë' na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. <sup>38</sup> Nözilí' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yö'l-la' huáca queë' para sóalengaca Lë'. Nözilí' ca na' gudë' Jesús, runë' le naca tsahui', en ruúnë' yúgu'të nupa gula'gu'í gula'zaca' lu na' tu' xi-hui'. Caní' benë', tu' guzóalenë' Dios Lë'. <sup>39</sup> Na'a, netu' runtu' ba nalí que yúgu'të lë' na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. <sup>40</sup> Ní'irö Dios busub-anë' Lë' cate' guca tsonna dza nátië', en benë' ga bulu'í lahuë' ga zóatu' netu'. <sup>41</sup> Bití' bulu'í lahuë' lógaca yúgu'të bönachi, pero lotu' netu' bulu'í lahuë'. Dios guröë' netu' dza ní'te para guntu' ba nalí queë' Jesús, ate' gü'í gudágulentu' Lë' tsözxón gudödi bubanë' lu yö'l-la' guti. <sup>42</sup> Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabán-gaca, en nupa chinátigaca. <sup>43</sup> Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ní'a que le benë' Lë'."

#### Dios Bö' Lá'ayi ridisóalenë' bönachi izá'a

<sup>44</sup> Ní' ru'í'së' caní' didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. <sup>45</sup> Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasól-lë'ë Dios Xuz. Bidisóalenë' bönachi ni' bití' nácagaca judío. <sup>46</sup> Caní' gulunë' tu' bila'yönnë' tu'ë bönni' zítu' na' didza' yúbölö, en tunë' Dios zxön. <sup>47</sup> Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

<sup>48</sup> Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' gulá-ta'yüë' lahuë' Pedro ugá'analenë' légaquië' ca chopa tsonna dza.

#### Didza' bë'ë Pedro lógaca bönachi queë' Cristo nacua' Jerusalén

**11** Bila'yönnë' gubáz nasól-lë'ë Cristo, en böchi'ru' nacué' luyú Judea ca na' bönni' bití' nácagaquië' judío gula'zí' lu ná'agaquië' xtídzë'ë Dios. <sup>2</sup> Cate' budxinë' Pedro Jerusalén, böchi'ru' judío gula'díl-lalenë' lë' didza'. <sup>3</sup> Gulé' Pedro:

—¿Bizx que yöjtsú'ulenu' bönni' bití' nácagaquië' judío, en gudágulenu' légaquië' tsözxón?

<sup>4</sup> Ní'irö gusí lahuë' Pedro rusiyönnë' légaquië' idútë lë na' guca, rnnë':

<sup>5</sup> —Guzóa' lu yödzo Jope, en cate' ni' ruidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxon, naga' idapa la'a, ate' bidxin ga na' zoa'.

<sup>6</sup> Cate' ni' ruyúa' le para ilé'eda' le dxía láhuilö, bilé'ega-cada'-ba' böa' guixi' nacua' tapa ní'agacaba', yugu' böa' guixi' sínía', en böa' tá'ayöj lé'egacaba' lu yu, en böa' zoa xilíagacaba'. <sup>7</sup> Biyönda' chí'i nu gudxi neda': "Pedro, guyasa. Bëti-ba', en gudagu." <sup>8</sup> Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxí'a." <sup>9</sup> Ní'irö le buropi luzuí bulidza chí'i lúzxiba na' neda', en gudxi neda': "Le nunë' Dios dxí'a, biti' innö' biti' naca dxí'a." <sup>10</sup> Tsonna luzuí guca caní, ate' ní'irö idútë lë na' bilé'eda' la' buépitë lúzxiba. <sup>11</sup> La' ní'isö bila'dxintë' tsonné' bönni' ra' yu'u ga na' zoa', narúajgaquië' yödzo Cesarea, nasöl-lë' légaquië' tu bönni' lë' Cornelio. Sududíljagaquië' neda'. <sup>12</sup> Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gu-la'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'. <sup>13</sup> Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isól-la-gacu'-në' bönni' tsöjajúquië' yödzo Jope, tsöjlídzagaquië' Simón, zoa ia'tú lë' Pedro." <sup>14</sup> Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'." <sup>15</sup> Cate' ni' gusí lahua' ru'ílena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. <sup>16</sup> Ní'irö yöjneda' didza' na' bë'ë Xanru', gunné': "Le nácatë Juan buquilë' bönachi nisa lu nisa, pero libí'ili', gaca queé'li' le rulu'ísö yöl-la' ridila nisa na', idisóalenë' Dios Bö' Lá'ayi libí'ili'." <sup>17</sup> Que lë ni na', channö Dios gusól-lë'ë Dios Bö' Lá'ayi quégaquië', la' tuz ca benë' queéru' rë'u réajlë'ëru' Xanru' Jesucristo, znúxkitë neda' inná bé'eda'-në' Dios?

<sup>18</sup> Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ládxí'gaquië' para ila'délinë' yöl-la' na'bán idú.

#### Yugu' bönni' nacué Antioquia ta'yéajlë'ë Cristo

<sup>19</sup> Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxí'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzo luyú Fenicia, en luyú Chipre, en lu yödzo Antioquia. Gulunë' libán ni' que xtídzë'ë Dios, pero lógacasö bönachi judío. <sup>20</sup> Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquia, gulu'ílenë' ca' didza' yugu' bönni' izá'a. Gulunë' libán lógaquië' que didza' dxí'a ca naca queë' Xanru' Jesús. <sup>21</sup> Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

<sup>22</sup> Cate' bidxin didza' ca guca lë ni, ate' bila'yönnë' bönni' queë' Cristo nacué Jerusalén, gula'sól-lë'ë Bern-

abé tséajë' Antioquia na'. <sup>23</sup> Cate' Bernabé na' bidxinë' Antioquia, bilé'enë' le ruzá' ládxë'ë Dios quégaquië', en budzéjanë'. Guchizië' icja nágagaquië' para ila'día'ti-ca'së' queë' Xanru' idú ládxí'gaquië'. <sup>24</sup> Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ní'a que libán benë' Bernabé na', bönachi zían lu yödzo na' gula'yéajlë' Xanru'.

<sup>25</sup> Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' lë', buchë'ë lë' Antioquia. <sup>26</sup> Idú ca tu iz gula'cu'ë ni', tunë' tsözxón bönachi queë' Cristo, en tu'sédinë' bönachi zían. Lu yödzo Antioquia na', gusí lo gula'zí' légaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

<sup>27</sup> Dza ni' bila'ruájë' Jerusalén, en yöjajúquië' Antioquia bal-lë' bönni' tu'ë didza' uláz queë' Dios. <sup>28</sup> Guzuínë' Agabo, bönni' dzáguie' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín idútë yödzo lió.

Guca gubín na' cate' ni' rinná bë'ë Claudio, lu yödzo Roma. <sup>29</sup> Ní'irö gula'zí' lu ná'agaquië' bönni' ta'yéajlë'ë Cristo nacué Antioquia, ila'sól-lë'ë tsa le désö que queégaquië', le gácalen böchi'ru' nacué luyú Judea.

<sup>30</sup> Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chí'ë bönachi queë' Cristo nacué Judea.

#### Tútië' Jacobo, en ta'gu'ë Pedro lidxi guíë

**12** Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zí'ë légaquië'. <sup>2</sup> Gunná bé'enë' bönni' gulútië' Jacobo, böchë'ë Juan. Gulu'ë lë' guíë tuchi'. <sup>3</sup> Cate' gúquibe'enë' Herodes gula'yaza ládxí'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'i cúa zi que. <sup>4</sup> Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquië' tapa cö' bönni' rójajúquië' gudil-la, nacué tapë' tu huéaj cö' na', para uyúgaquië' lë'. Yu'u ládxë'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. <sup>5</sup> Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

#### Dios rubéajë' Pedro lidxi guíë

<sup>6</sup> Cate' si' idxín dza yu'u ládxë'ë Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacué chopë' bönni' rójajúquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' rójajúquië' gudil-la tapa chí'ë ga nu riyaza lidxi guíë na'. <sup>7</sup> Tsálido'os bulu'íi lahuë' tu gubáz lá'ayi queë' Xanru' ni', ate' buzení'da' bení lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.



Ní'irö bulu'huédxi du guié na' naga' ni'a nëë Pedro.

<sup>8</sup> Gubáz lá'ayi na' gudxé' lè', gunné':

—Béga' lè'u, en gudá' xirachu'.

La' benté' Pedro caní. Ní'irö gubáz lá'ayi na' gudxé' lè', rnné':

—Guxóa lari' cúdzu'u, en gudá' len neda'.

<sup>9</sup> Burúajé' Pedro, sa'yéajlené' gubáz lá'ayi na', pero bití' réquibe'ené' nácatè le runé' gubáz lá'ayi na'.

Gúquiné' yélasö rinené'. <sup>10</sup> Cate' chigula'dödè' ga nacu'è bönni' zí'alö, en bönni' buropi cö', bönni' na' röjáquié' gudil-la tapa chí'è, bila'dxiné' ga zoa le néqui-ni guié le nusayaj ga nu riyaza lidxi guié na', ga nu rurúaj la' nöza que yödzo. Ga nu riyaza na', rácasö que gualaj. Cate' bila'rúajé' ní', gula'zè'è ga ridzaga ia'turö nöza, ate' ní' gubáz lá'ayi na' la' bulá'alenté' Pedro.

<sup>11</sup> Ní'irö réquibe'ené' Pedro, ate' lu icja ládxi'da'azé' gunné':

—Na'a chinözda' le nácatè gusól-lè'è Xanru' gubáz lá'ayi queé', en busólé' neda' lu nëë Herodes, en lu yúgu'tè le gulé'enné' bönni' judío iluné' quia'.

<sup>12</sup> Tsanni ní' yu'è nöza Pedro, rizá' ládxi'è ca naca lè na' guca, ate' bidxiné' lídxinu María, xiná'abi' Juan, bí'i na' zoa ia'tú labi' Marcos. Lu yu'u na' nudúbigaca bönachi zían ta'yéajlé' Cristo, en tu'lidza Dios. <sup>13</sup> Cate' bulidzè' Pedro ra' yu'u lö'a, birúajbí' bí'i nigula lèbí' Rode para inózi' nuzxi na'. <sup>14</sup> Cate' búnbé'èbí' bí'i nigula ni chí'è Pedro, lu yöl-la' rudzeja queé'bi' bití' gusaljbi' yu'u, pero carelò bóajbí' lu yu'u, yójtíxjöi'ibi' nupa nacuá' ní', rnnabi':

—Zoé' Pedro ra' yu'u.

<sup>15</sup> Ní'irö gulé' lèbí':

—Nachixi icju'.

Lèbí' tsútsurö ben xtídza'bi' naca caní. Ní'irö gula'n-né':

—Calèga lè'. Bixín queé' na'.

<sup>16</sup> Tsanni na' bití' zoa dxíé' Pedro rulidzè' nupa nacuá' lu yu'u. Cate' gula'saljé' yu'u, gula'nítisiné' cate' bi-la'lé'ené' lè'. <sup>17</sup> Ní'irö guchisa nëë Pedro para ila'cu'è dxisö, ate' busiyönné' légaquié' ca bené' Xanru', bubéajé' lè' lidxi guié. Ní'irö gudxé' légaquié':

—Gulí'siyönné' ca' Jacobo, en yugu' bóchi'ru' ca na' guca.

Ní'irö burúajé' Pedro, sa'yéajé' ga yúbölö.

<sup>18</sup> Cate' za' rení' dza na', bönni' röjáquié' gudil-la gula'bö'è böniga nacxi guca, bí'ti'rö yu'è Pedro lidxi guié.

<sup>19</sup> Ní'irö gusól-lè'è Herodes nupa tsöjxi'gaca Pedro. Cate' bití' bulu'dzólíné' lè', Herodes gunabi yúdxiné' yugu' bönni' na' röjáquié' gudil-la, bönni' gulún chí'è Pedro. Gudödi ní' gunná bé'ené' nupa bétigaca yugu' bönni' na' röjáquié' gudil-la. Ní'irö buzé'è Herodes luyú Judea, sa'yéajé' Cesarea, ate' bugá'ané' ní'.

### Ca gútié' Herodes

<sup>20</sup> Dza ní'sö rilené' Herodes bönachi yödzo Tiro, en yödzo Sidón. Zí'alö bönachi lu xiyúé' Herodes na' gula'sól-la' le biyadzaj quégaca bönachi lu xiyúgaca yödzo Tiro, en Sidón na', pero tu' rilené' Herodes légaquié', bí'ti'rö bi ta'sól-lè'è quégaquié'. Ní'irö guluné'

tuz bönni' Tiro, en Sidón na', ate' guluné' ga soé' Blasto uné' quégaquié' lahué' Herodes na'. Náquié' Blasto na' huen dxin nadéliné' lataj lo lahué' Herodes. Gulé'enné' bönni' Tiro, en Sidón na' ila'dxiné' lahué' Herodes, para ila'nábiné' lè' ugá'ana tsahui' didza' bizxaj quégaquié'.

<sup>21</sup> Ní'irö budxié' bè' Herodes dza yönné' légaquié', ate' dza na' gurö'è xilatjé' ga ruchí'a rusörö'è bi raca, nacué' lari' nazaca', en bené' libán lógaquié'. <sup>22</sup> Ní'irö bulidzè' zidzaj bönni' na', ta'nné':

—¡Calèga bönni'sö ni! ¡Dios caz ni ru'è didza'!

<sup>23</sup> La' ná'asö la' bétè' gubáz lá'ayi queé' Xanru' lè' tu' buzí'è lè' cazé' yöl-la' ba ral-la' gaca queé' Dios. Ní'irö gurö'è Herodes na' buzuga', ate' gútié' tu' táguba' lè'.

<sup>24</sup> Ní'irö guca libán que xtídze'è Xanru', ate' gula'yán nupa nazí' lu ná'agaca le.

### Le zí'alö luzuí röjégaquié' Bernabé, en Saulo libán

<sup>25</sup> Cate' Bernabé, en Saulo chibulu'dödè' dumí na' lu ná'agaquié' bönni' gula tapa chí'è bönachi queé' Cristo nacu'è Jerusalén, bulu'zè'è ní', yöjhuójgaquié' yödzo Antioquia. Gula'ché'è-bi' ca' bí'i Juan, zoa ia'tú labi' Marcos.

**13** Dza ná'asö gula'cu'è bönni' tu'è didza' uláz queé' Dios, en bönni' tu'sédiné' bönachi lu yödzo Antioquia, tuné' tu' zxon bönachi queé' Cristo lu yödzo na'. Caní légaquié':

Bernabé,  
Simón, (lè' ca' Bönni' Gasja),  
Lucio, (bönni' Cirene),  
Saulo,

Manaén, (bönni' na' guzxónlené' tsözxón Herodes, bönni' rinná bè'è luyú Galilea).

<sup>2</sup> Tsanni ní' nudúbigaquié' bönni' ni queé' Xanru', en tuné' gubasa, Dios Bö' Lá'ayi gudxé' légaquié', rnné':

—Gulí'béaj-gáquié' quez quia' Bernabé, en Saulo para tsöjégaquié' dxin na' bulidza' légaquié' iluné'.

<sup>3</sup> Budxi guluné' gubasa, en gulu'iléné' Dios didza', ní'irö gula'xóa ná'agaquié' chopé' ni, en gula'sól-lè'è légaquié'.

### Yugu' gubáz nasól-lè'è Cristo tuné' libán luyú Chipre

<sup>4</sup> Ní'irö yöjáquié' Bernabé, en Saulo yödzo Seleucia, tu' gusól-lè'è Dios Bö' Lá'ayi légaquié' ní', ate' ní' gula'bené' tu' lè'e barco le guché' légaquié' ga naca tu luyú bidxi lu nísado', nazí'i le Chipre. <sup>5</sup> Cate' bila'dxiné' lu yödzo Salamina luyú na', gulu'è xtídze'è Dios gapa naca lu yu'u ga tu'dubè' bönni' judío luyú na', en tu'sédè' queé' Dios. Naché'gaquié'-bi' bí'i Juan para gunbí' légaquié' tu' zxon. <sup>6</sup> Budxi gula'dödè' idú gapa dè yödzo' luyú bidxi na' lu nisa zxon, ní'irö bila'dxiné' yödzo Pafos. Yöjxáca'gaquié' Barjesús, tu' bönni' judío ní'. Náquié' bönni' udzá' rinné' yè'è, en rnné' ru'è didza' uláz queé' Dios. <sup>7</sup> Bönni' ni dzáguié' Sergio Paulo, bönni' réajni' rinná bè'è. Bönni' unná bè' na' bulidzè' Bernabé, en Saulo, tu' ré'èné' yönné' xtídze'è Dios. <sup>8</sup> Ní'irö bönni' udzá' na' gudá'baguié' Bernabé, en Saulo, tu' gú'unné' guné' ga bití' tséajlé'è Dios bönni' rinná bè'è.

Bönni' udzá' na' lè' ca' Elimas tsca naca xtídza'gaca bö-nachi izá'a ga na'.<sup>9</sup> Ní'irö Saulo, lè' ca' Pablo, buzóa tsutsu lahuë', zóalenë' Dios Bö' Lá'ayi lè'. Ruyúë' Elimas na'<sup>10</sup> en rë' lè':

—Li', bönni' rizí' yë', en bönni' huiá' dö', nacu' ca xzí'ini caz tu' xihui', en bönni' bití' rilé'enë' dxí'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu ré'eni tséajlë' Lë'?<sup>11</sup> Na'a, Xanru' usaca' zí'ë li', ate' ichul-la lo', en bití' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lè'.<sup>12</sup> Cate' bilé'enë' bönni' unná bë' na' lè na' guca, bubáninë' ca naca xtídzë'ë Xanru', ate' guyéajlë'ë Cristo.

### Le gulunë' Pablo, en Bernabé lu yödzö Antioquia luyú Pisidia

<sup>13</sup> Ní'irö buzé'ë Pablo lu yödzö Pafos na' len yugu' bönni' dzágagaquië' lè', nacu'ë tu lë'e barco, ate' bi-la'dxinë' yödzö Perge luyú Panfilia. Lu yödzö na' bí'i Juan bulá'alenbi' légaquië', en bóajbi' Jerusalén.

<sup>14</sup> Gudödi ni' bulu'zë'ë Perge na', en yöjáquië' yödzö Antioquia luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sëdë' queë' Dios, ate' lu yu'u na' gula'bö'ë.

<sup>15</sup> Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'sól-lë'ë nu yöjódx Saulo, en Bernabé, gunné':

—Libí'ili', bóchit'u'. Channö nuá'alí' bi innali' le uzéajni'i netu', guli'nnë'.

<sup>16</sup> Ní'irö guzuínë' Pablo, en guchisa në'ë para ila'cu'ë dxisö, gunné':

—Bulí'zë' nágali' le guía' libí'ili', bönni' Israel, en libí'ili', núlöli' rádxili'-në' Dios.<sup>17</sup> Xanru' Dios, Nu ta'yéaj ládxí-gaca bönachi Israel, guró cazë' xuz xtó'oru', en benë' ga gula'yándë'ë cate' ni' nácagaquië' bönni' zítu' luyú Egipto. Len yöl-la' huáca zxön queë' bubéajë' légaquië' luyú ni'.<sup>18</sup> Idú choá' iz Dios bí'a' gulënë' quégaquië' cate' ni' gula'dé' idú luyú bidxi lu lataj cá'asö.<sup>19</sup> Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'.<sup>20</sup> Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios.<sup>21</sup> Ní'irö gula'nábinë' Dios uzóë' tu bönni' unná bë' quégaquië'. Dios guröë' Saúl, xzí'inë' Cis, bönni' nababë' dí'a dza queë' Benjamín. Idú ca choá' iz gunná bé'enë' Saúl na' légaquië'.<sup>22</sup> Gudödi ni' Dios gudúë' Saúl na', ate' buzöë' David quégaquië' para inná bë'ë. Dios benë' ba nalí queë' David ni, gunné': "Nözda' runë' David, xzí'inë' Isaí, le raza ládxa'a, en gunë' yúgu'të le ré'enda' neda'."<sup>23</sup> Ladaj xzí'ini xí'sóë' David na' benë' Dios ga guljë' Jesús para gáquië' bönni' usólë' bönachi Israel, ca na' guzxí' lu në'ë Dios zí'atëlö gunë'.

<sup>24</sup> Zí'alö cate' sí' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxí'gaca, en ila'di-

la nisa.<sup>25</sup> Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Bití' naca' Cristo, bönni' na' ral-la' guidë'. ¡Na'a, bulí'yútsöca! Chizöë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudë'ë."

<sup>26</sup> Libí'ili', bócha'a, yugu' xzí'ini xí'sóë' Abraham, en núlöli' zóali' ni, en rádxili'-në' Dios. Dios caz gusól-lë'ë queéli' didza' ni para uláli'.<sup>27</sup> Nupa nacuá' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'.<sup>28</sup> Sal-la' bití' budzöli le nabáguë'ë Jesús gátië', gula'nábinë' Pilato inná bé'enë' bönni' ilútië' Lë'.<sup>29</sup> Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba.<sup>30</sup> ¡Ní'irö Dios busubanë' Lë' lu yöl-la' guti!<sup>31</sup> Zíán dza bulu'í lahuë' Jesús lógaca nupa yöjácalen Lë' tsözón cate' ni' buzé'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

<sup>32</sup> Caní naca, lësca' netu' ni rusiyöntu' libí'ili' didza' dxí'a ca naca lè na' guzxí' lu në'ë Dios gunë' quégaquië' xuz xtó'oru'.<sup>33</sup> Lè na' guzxí' lu në'ë Dios quégaquië', Lë cazë' benë' ga budxín queë'ru', nácaru' xzí'ini xí'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Lí' nacu' Xzí'ina'. Neda' buzóa caza' Lí'."<sup>34</sup> Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunná' quiu' le nácagaca bicá' ba guzxí' lu na'a lahuë' David."<sup>35</sup> Que lè ni na' nazúaj ca' lu guichi, ga zoa ia'tú salmo, le rnna caní: "Bití' gu'u lataj ugá'anë' bönni' lá'ayi quiu' ga initi le naca cazë'."<sup>36</sup> Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lè', ní'irö gútië', ate' gula'gu'ë lè' yeru ba ga nacu'ë xuz xtá'ahuë', ate' guniti le naca cazë'.

<sup>37</sup> Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba.<sup>38</sup> Libí'ili', bócha'a, ral-la' inózili' lè ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ní'a que le benë' Jesús ni.<sup>39</sup> Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés.<sup>40</sup> Gulí'gún chí'i cuinli' na'a para cabí gaca queéli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

<sup>41</sup> Bulí'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queéli' gátili'.

Neda' guna' tu dxin dza ni zóali',

en sal-la' nu ulu'í libí'ili' le rulu'í dxin na', bití' ca' tséajlë'ëli'.

<sup>42</sup> Cate' bulu'rúajë' Pablo, en yugu' bönni' na' dzágagaquië' lè' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu lógagaquië' ulu'sédinë' légaquië' ca naca lè ni cate' idxín ia'tú dza lá'ayi quégaquië'.<sup>43</sup> Cate' ni' bulu'rúajë' lu yu'u na' bönni' nudúbigaquië' ni', zíán bönni' judío, en bön-

ni' nuhuóacagaquié' judío, yugu' bönni' ta'yéaj ládxi'-gaquié' Dios, guluné' tsözxón Pablo, en Bernabé. Chopé' ni gulu'ílené' légaquié' didza', en bulu'sé' ládxi'-gaquié' para ilácatica'sé' tsutsu, iluné' löza le ruzá ládxi'é Dios quégaquié'.

<sup>44</sup> Ia'xunu' gubidza ca' cate' bidxín ia'tú dza lá'ayi quégaquié', bulu'dubé' látu'biqui' yúguté bönachi lu yödzo na' para ila'yönné' xtídzé' Dios. <sup>45</sup> Ní'irö bulu'xzé'ené' bönni' judío bití' ta'yéajlé'ë, cate' bila'lé'ené' bönachi zían na', ate' gula'nné' que didza' ru'é Pablo, en gula'dá'bágué'ë le. <sup>46</sup> Ní'irö lu yöl-la' rugu ládxi' quégaquié' Pablo, en Bernabé, gulé' yugu' bönni' judío na', ta'nné':

—Ben bayudxi usiyöntu' lib'íli' zí'aló xtídzé' Dios, pero tu' rucá'analí' cá'asö didza' ni, en rusá'ali' queéli' bití' nácalí' lesaca' sí'íli' yöl-la' na'bán idú ni, que lè ni na', na'a uyéajtu' ga nacua' bönachi izá'a. <sup>47</sup> Lësca' caní gunná bé'ené' Xanru' Dios netu' guntu' libán queé' Cristo lógaca bönachi izá'a, en naca ca rna didza' na' bé'ë Dios ca naca queé' Cristo, gunné':

Nuzóa' Lí' para gacu' bení' quégaca bönachi izá'a, en gacu' Nu usólá bönachi iduté yödzo'lió.

<sup>48</sup> Cate' bila'yöni bönachi izá'a nacua' ni' didza' ni, bulu'dzéjané', en gula'gu'ë Xanru' yöl-la' ba nía que xtídzé'ë, yúgu'té nupa ni' chinuné' Dios quéguequi gata' quéguequi yöl-la' na'bán idú. <sup>49</sup> Caní guca, guzé xtídzé'ë Xanru', ate' bila'yöni bönachi yúgu'té yödzo nacua' luyú ni'. <sup>50</sup> Ní'irö bönni' judío bití' ta'yéajlé'ë na' gula'gú'u yól-lé'ë yugu' bönni' lo que yödzo ni' para cabí ila'lé'ené' dxi'a Pablo, en Bernabé. Lësca' caní gula'gú'u yól-lé'ë nigula lo ta'yéaj ládxi'nu Dios. Caní guca, guluné' ga gula'bía ládxi'gaquié' Pablo, en Bernabé, ate' bulu'lágué' chopé' ni ní'ilo lu xiyúgaquié'. <sup>51</sup> Ní'irö Pablo, en Bernabé bulu'quínnajé' yu bëchtö da' la' lábagaquié' le rulu'í nagá'ana xíguia' nabága'gaca bönachi lu yödzo na', ate' yójajúie' lu yödzo Iconio. <sup>52</sup> Bulu'dzéjané' bönni' yödzo Antioquia na', bönni' ta'yéajlé'ë Xanru', ate' guzóalené' Dios Bö' Lá'ayi légaquié'.

#### Le guluné' Pablo, en Bernabé lu yödzo Iconio

**14** Cate' bila'dxiné' Pablo, en Bernabé yödzo Iconio, gula'yu'ë tsözxón lu yu'u ga tu'dubé' bönni' judío, en tu'sedé' queé' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlé'ë Cristo. <sup>2</sup> Ní'irö bönni' judío bití' ta'yéajlé'ë gula'gú'u yól-lé'ë bal-lé' bönni' izá'a, para cabí ila'lé'ené' dxi'a böchí'ru' ta'yéajlé'ë Cristo. <sup>3</sup> Tu' gula'yéajlé' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ládxi' gulu'ë xtídzé'ë Dios, tu' tu'zxöni ládxi'gaquié' Xanru'. Lè cazé' Xanru' bulu'ë naca iduté li didza' tu'ë ca naca le ruzá ládxi'é Dios quégaca bönachi, tu' bé'ë légaquié' lataj guluné' yugu' le taca bé', en le tun ga tu'bani bönachi. <sup>4</sup> Ní'irö bönachi lu yödzo na' bila'rúaj choplö. Bal-lé' gula'dé'ë bönni' judío bití' ta'yéajlé'ë, ate' ia'bal-lé' gula'dé'ë Bernabé, en Pablo, gubáz na' nasól-lé'ë Cristo. <sup>5</sup> Ní'irö bönni' judío bití' ta'yéajlé'ë na', en yugu' bönni' izá'a ni' guluné' tuz bönni' ta'nná bé'ené' légaquié', ate' bulu'dubé'

para ilu'ë dö' quégaquié' gubáz na' nasól-lé'ë Cristo, en ulu'ladxé' légaquié' guió'j. <sup>6</sup> Cate' téquibe'ené' Pablo, en Bernabé lè ni, bulu'xzúnnajé' ni', yójajúie' yödzo Lистра, en Derbe luyú Licaonia, ate' gula'dödé' yúgu'té yödzo' do' idú gásibí'ilo ni', <sup>7</sup> gapa ni' guluné' libán que didza' dxi'a ca naca queé' Cristo.

#### Tu'ladxé' Pablo guió'j lu yödzo Lистра

<sup>8</sup> Zoé' tu bönni' lu yödzo Lистра bití' raca sé'ë. Ró'ösé' ni' tu' cabí rizé'ë cate' ni' guljé', en catu caz guzé'ë ni'ë. <sup>9</sup> Bönni' ni ruzé' náguie' didza' ru'é Pablo. Pablo buyúé' lè', en gúquibe'ené' réajlé'ë Cristo para huó'áquié'.

<sup>10</sup> Ní'irö Pablo bé'ë zidzaj didza', en rë' lè':

—Guzuí.

La' guxítit'ë bönni' na', en guzé'ë ni'ë. <sup>11</sup> Cate' yugu' bönni' Lистра bila'lé'ené' lè na' bené' Pablo, gula'sí lógaquié' tu'ë zidzaj didza' lu didza' tu'ë bönni' Licaonia na', ta'nné':

—¡Yugu' dios bönni' ni! ¡Nuhuótjagaquié' ga zóaru', en tu'lu'í cuíngaquié' ca nácagaquié' bönni'!

<sup>12</sup> Gula'nné' Bernabé na' náquie' Júpiter, ca lè' dios lo quégaquié', ate' gula'nné' náquie' Pablo Mercurio, ia'tú dios quégaquié'. Caní gula'nné' tu' ru'é didza' Pablo ca na' ta'nné' runé' Mercurio na'. <sup>13</sup> Zoa yudo' que Júpiter ga ni' nacué', cuita nöza ga ni' ta'yaza bönachi lu yödzo na'. La' bidxinté' bixúz que Júpiter na', naché'ë-ba' yugu' bédxi, en nu'ë ca' yugu' bregui' yöj, ate' dzágagaca bönachi zían lè'. Gulé'enné' ilútié'-ba' bédxi na' lógaquié' Pablo, en Bernabé para ila'yéaj ládxi'gaquié' légaquié' ca tuné' quégaca dios quégaquié'. <sup>14</sup> Cate' Bernabé, en Pablo, gubáz na' nasól-lé'ë Cristo, guléquibe'ené' lè ni, gula'chözé' lari' nácugaquié'. Tu'hu'íininé' tu' tuné' bönni' ni le cabí ral-la' iluné', ate' gula'xítí'ë, en yöjcu'ë gatsaj láhuilö bönachi zían na', en gulu'ë zidzaj didza', té' légaquié':

<sup>15</sup> —¡Lib'íli' bönachi! ¿Bizx que runlí' caní? Lësca' bönni' ca lib'íli' nácatu', en riguixjoi'itu' lib'íli' lè ni caz ral-la' ucá'analí', le cabí nácaté, para guéquili' queé' Dios ban. Dios ni bené' lúzxiba, en yödzo'lió, en nísado', en yúgu'té le nacua' tu tu lataj na'. <sup>16</sup> Yugu' iz chigula'dödi, gulún yúgu'té bönachi ca rnasö que queé'guequi, ate' Dios bití' buzágué'ë xinó'zguequi, <sup>17</sup> pero bené' ga gula'ca le tun ba nalí' queé', yugu' le nácagaca dxi'a bené' quégaquié'. Risól-lé'ë queé'ru' nisa guió'j, en runé' ga ta'yán le rázaru'. Ruzölaj rudzé'ené' rë'u, en runé' ga rudzeja ládxi'ru'.

<sup>18</sup> Sal-la' Bernabé, en Pablo gulé' légaquié' caní, cánisö bila'déli'né' bulu'zágué'ë xinó'zguequi bönachi zían na', para cabí ilútié'-ba' bédxi na' lógaquié'.

<sup>19</sup> Ní'irö bal-lé' bönni' judío bití' ta'yéajlé'ë, narúajgaquié' Antioquia, en Iconio, bila'dxiné' ni', ate' gula'gú'u yól-lé'ë bönachi zían na'. Ní'irö yúgu'té' bulu'ladxé' Pablo guió'j, en gula'ayöjé' lè' ní'ilo ra' yödzo na', tu' téquiné' chinatié'. <sup>20</sup> Ní'irö bulu'dubé' yugu' bönni' ta'yéajlé'ë Cristo idú gásibí'ilo ga dè' Pablo. Guyasé' lè', en buazié' lu yödzo na'. Cate' za' rení' ia'tú dza, burúajlené' Bernabé, yójajúie' yödzo Derbe.

<sup>21</sup> Lu yödzo ni' gulunë libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yöjhuógaquië' Lистра, en Iconio, en Antioquía. <sup>22</sup> Cate' gula'dödë' Bernabé, en Pablo yugu' yödzo na', bulu'tipë' ládxi'gaquië' bönni' ni' ta'yéajlë' Cristo, en bulu'séë' ládxi'gaquië' ulu'gá'anë' tsutsu ca na' ta'yéajlë' Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

<sup>23</sup> Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'.

#### Pablo, en Bernabé tu'dxinë' Antioquía luyú Siria

<sup>24</sup> Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. <sup>25</sup> Budxi gulunë' libán que xtídzë'ë Cristo lu yödzo Perge, yöjáquië' yödzo Atalia. <sup>26</sup> Bulu'zé'ë ni', ate' gula'benë' tu lë'e barco, en bulu'dxinë' yödzo Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'. <sup>27</sup> Cate' ni' bulu'dxinë' Antioquía, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. <sup>28</sup> Pablo, en Bernabé bulu'gá'analenë' bönachi ni' ta'yéajlë' Cristo zían dza.

#### Tu'dubë' huen dxin queë' Cristo lu yödzo Jerusalén

**15** Ní'irö bal-lë' bönni' narúajgaquië' luyú Judea bila'dxinë' yödzo Antioquía, ate' bulu'sédinë' bóchi'ru', bönni' izá'a ni', ta'nnë':

—Channö cabí irugu lu xipéla'li' ca nalébitu' runtu' ca na' gunná bë'ë Moisés, bití' gaca uláli'.

<sup>2</sup> Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' bóchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para ilu'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

<sup>3</sup> Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzëjanë' yúgu'të böchi' luzá'aru' ni'.

<sup>4</sup> Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. <sup>5</sup> Ní'irö gula'zuínë' bal-lë' bönni' yudo' fariseo, bönni' ta'yéajlë' Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'ëru' légaquië' ilunë' ca rna na bë' xibá queë' Moisés.

<sup>6</sup> Ní'irö bulu'dubë' gubáz nasól-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. <sup>7</sup> Gudödi gulu'ë zían didza', guzuínë' Pedro, en gudxë' légaquië':

—Libí'ili', bócha'a. Nöz quézili' ca guca dza ni'te, Dios guró cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. <sup>8</sup> Dios, Nu nunbë' caz le yu'u icja ládxi'do'gaca bönachi, buzöë' le naca bë' runë' légaquië' bal, gusól-lë'ë Dios Bö' Lá'ayi quégaquië', ca na' gusól-lë'ë Lë' queëru'. <sup>9</sup> Bití' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo. <sup>10</sup> Na'a, ¿bizx que run lëli'-në' Dios, rusubágalí' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le. <sup>11</sup> Rë'u ni, réajlë'ëru' nuláru' ni'a que le buzá' ládxi'ë Xanru' Jesús queëru', en ca na' nuláru' rë'u, ulu'lë' ca' légaquië'.

<sup>12</sup> Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zé'ë nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a. <sup>13</sup> Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libí'ili', bócha'a. Bulí'zé'ë nágali' le guía' libí'ili'.

<sup>14</sup> Simón Pedro chigudíxjö'i' quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajjé' quez queë' bönachi nüt'sa'gaca ladjagaquië'. <sup>15</sup> Ca naca lë ni röjlózgaca xtídzá'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rna:

<sup>16</sup> Dza tödi lë ni huóda', en uchisa' Nu inná bë', bönni' na' tsázië' xilatjé' David.

Guna' ca run nu ruchisa tu yu'u naguinnaj. Uchisa' ca' bönachi ila'cuá' lidxë', nupa nagá'anagaca. Guna' ca run nu ruchisa tu zö'ö yexu'.

Caní uchisa' le gunná bë'ë David

<sup>17</sup> para ulu'guilaj ia'zica'rö bönachi Xanru'.

Ulu'guilaj bönachi izá'a Lë', ate' sí' láguequi: Bönachi Queë' Dios.

<sup>18</sup> Caní rnnë' Xanru',

Nu na' dza ni'te ben ga naca bë' yúgu'të lë ni.

<sup>19</sup> 'Que lë ni na' runi neda' bití' ral-la' gun níguiru' bönachi izá'a, nupa tu'huóáca queë' Dios. <sup>20</sup> Ral-la' uzúajru' lu guichi quégaquië' ulu'cá'anë' yugu' le bití' ral-la' ilahuë', le nadödi lógaca budó' guió' budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' bití' narúaj-gácaba' rön, en cabí ilahuë' xichönba' bítitës böa' guixi'. <sup>21</sup> Dza ni'te nacuá' yúgu'të yödzo nupa tun libán lu yu'u gapa tu'dubë' bönni' judío, en tu'sédë' queë' Dios. Tunë' libán ni' que le buzúajjé' lu guichi Moisés. Tu'laba cazë' le yugu' dza lá'ayi.

<sup>22</sup> Ní'irö gula'yaza ládxi'gaquië' gubáz nasól-lë'ë Cristo, en bönni' gula tapa chi'ë, en yúgu'të bönachi

queë' Cristo, ila'böö' bal-lë' bönni' ladjagaquië', en ila'sóil-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böö', légaquië' Judas, zoa ia'tú lë' Barsabás, enca' Silas. Nácagaquië' bönni' lo ladjagaquië' bóchi'ru' ni'. <sup>23</sup> Bulu'zúajë' lu guichi le bulu'dödë' lu náagaquië' ilu'ë, le rna caní:

"Netu', gubáz nasól-lë'ë Cristo, en bönni' gula tun chí'ë, en yugu' bóchi'ru', rugápatu' libí'ili' Dios, bóchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia. <sup>24</sup> Biyónitu' ca tun bal-la bönachi bila'rúaj ga zóatu', nupa na' bití' nasól-la'tu'. Dutsá-gaquië' libí'ili' len le ta'nnë', en tu'bequi böniga icja láchí'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. <sup>25</sup> Que lë ni na' guyaza láchí'tu' cate' chibén tuz xtídza'tu', gurötu' chopë' bönni', nupa isól-la'tu' para uduyúgaquië' libí'ili'. Guídlengaqië' Bernabé, en Pablo, nupa na' nadxí'iru'.

<sup>26</sup> Chiyóajáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. <sup>27</sup> Caní naca, risól-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. <sup>28</sup> Dios Bö' Lá'ayi bulu'ínë' netu' le raza láchxë'ë, en lësca' caní raza láchí'tu' netu', bití' usubágarötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

<sup>29</sup> Bití' gágulí' le nadödi lógaca budó' guiój budó' yaga. Bití' gágulí' rön.

Bití' gágulí' xipéla'gacaba' böa' guixi' bití' narúaj-gacaba' rön.

Bití' gunli' le ruá' dö'.

Channö gun chí'i cuinli' para gunli' ca rna yugu' lë ni, gunli' dxí'a."

<sup>30</sup> Caní guca, yugu' bönni' na' nasól-la'gaquië' bila'dxinë' Antioquía. Bulu'tubë' bönachi queë' Cristo nacua' ni', ate' gula'gu'ë guichi na' lu náagaquië'. <sup>31</sup> Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhué' tsahui' légaquië'. <sup>32</sup> Tu' náca-gaquië' Judas, en Silas bönni' tu'ë didza' uláz queë' Dios bulu'hué' tsáhuë'ë légaquië', en bulu'tipë' láchí'gaquië' bóchi'ru' ni', bulu'gunë' dxin didza' zían le gulufí'ilenë' légaquië'. <sup>33</sup> Gudödi bulu'dzénë' Judas, en Silas ni' nababa dza, ní'irö bóchi'ru' ni' bulu'zenë' légaquië' dxí'a didza' para tsöjhuóajgaquië' Jerusalén ga nacua' bönni' gula'sól-lë'ë légaquië'. <sup>34</sup> Guyaza láchxë'ë Silas bugá'anë' Antioquía. <sup>35</sup> Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídze'ë Xanru'. Lësca' caní gulún zíanrö ca' bönachi.

#### Risí lahuë' Pablo röjenë' libán le buropi luzui

<sup>36</sup> Gudödi nababa dza Pablo gudxë' Bernabé:  
—Uyéajru' leyúbölö tsöjyúgacaru'-në' bóchi'ru' nacua' yúgu'të yödzö gapa chiyöjenru' libán que xtídze'ë Xanru', para ilé'eru' nacxi raca queégaquië'.

<sup>37</sup> Gú'unnë' Bernabé ila'ché'ë-bi' bí'i Juan Marcos, tséajlenbi' légaquië', <sup>38</sup> pero bití' guyaza láchxë'ë Pablo ila'ché'ë-bi' tséajlenbi' légaquië' tu' bulá'aleni' légaquië' luyú Panfilia, en bití'rö yójénlenbi' légaquië' dx-

in queë' Xanru'. <sup>39</sup> Bití' guca tuz xtídza'gaquië' Bernabé, en Pablo ga bidxintë bulu'lá'aleni' tuë' ia'tué'. Bernabé guchë'ë-bi' bí'i Marcos, ate' gula'benë' tu lë'e barco, yójáquië' luyú Chipre. <sup>40</sup> Pablo gurö'ë Silas para tséajlenë' lë'. Ní'irö yugu' bóchi'ru' gula'gu'ë légaquië' lu në'ë Xanru', en gula'nábinë' Lë' uzá' láchxë'ë queégaquië', ate' bulu'zë'ë Pablo, en Silas ni'. <sup>41</sup> Gula'dödë' yugu' yödzö luyú Siria, en Cilicia, ate' bulu'tipë' láchí'gaca bönachi queë' Cristo nacua' ni'.

#### Bití Timoteo runbi' tsözxón Pablo, en Silas

**16** Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bí'i bönni' ni', réajlë'ëbi' Cristo, lëbi' Timoteo. Nácabi' zxi'ninu tu nigula judío réajlë'ënu Cristo, pero xúzibi' bití' náquië' judío. <sup>2</sup> Yugu' bóchi'ru' nacua'ë Listra, en Iconio tunë' ba nalí queëbi', ta'nnë' runbi' le naca dxí'a. <sup>3</sup> Gú'unnë' Pablo tséajlenbi' bí'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacua'ë yugu' yödzö ni', tu' nóziguequinë' yúgu'të' xúzibi' bití' náquië' judío. <sup>4</sup> Cate' Pablo, en nupa dzágagaca lë' gula'dödë' gapa nacua' yödzö ni', tu tu yödzö na' bulu'dödë' lu náagaquië' yugu' bóchi'ru' nacua'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chí'ë bönachi queë', nacua'ë Jerusalén. Bulu'dödë' yugu' xibá ni lu náagaquië' para ilunë' ca rinná bë' xibá na'. <sup>5</sup> Caní guca, bönachi yúgu'të cö' bönachi queë' Cristo bila'dipa láchí'gaca ca naca le réajlë'ëru' Cristo, ate' gula'yán tu tu dza.

#### Tu bönni' Macedonia rulidze' Pablo lu yëla béchigal

<sup>6</sup> Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídze'ë Xanru' luyú Asia. <sup>7</sup> Cate' bila'dxinë' luyú Misia, gulé'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queéru', bití' bë'ë légaquië' lataj. <sup>8</sup> Ní'irö gula'dödë' gala' ga dë Misia, ate' yójáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. <sup>9</sup> Lu yödzö ni' Dios bulu'ínë' Pablo tu le bilé'enë' lu yëla béchigal. Tu bönni' Macedonia bulu'í lahuë' lë', zuínë', en ráta'yue' lahuë' Pablo, rnnë': "Gudödi ladztu', lu xiyú Macedonia, en gúcalen netu'." <sup>10</sup> Cate' bilé'enë' Pablo lë ni, lë na' bulu'í lahué lë', la' bë' láchí'tëtu' tséajtu' luyú Macedonia, tu' gúquibe'etu' Dios chibulidze' netu' tsöjentu' libán que didza' dxí'a lógaca bönachi luyú ni'.

#### Le gulunë' Pablo, en Silas lu yödzö Filipos

<sup>11</sup> Ní'irö gurentu' lë'e barco, en buzá'atu' Troas. Gudóditu' líra ga bidxintu' yödzö Samotracia, ate' gudödi ia'tú dza bidxintu' yödzö Neápolis. <sup>12</sup> Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz queégaquië'. Lu yödzö nisö guzóatu' nababa dza.

<sup>13</sup> Cate' bidxín tu dza lá'ayi, birúajtu' lu yödzo, en guyéajtu' ra' yegu ga na' tu'dubi caz bönachi yödzo na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë' Xanru'. <sup>14</sup> Nútsa'nu ladjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ladxí'nu Dios, ate' buzé náganu didza' ru'ë Pablo, ate' Xanru' gúcalenë'-nu para guzxí' lu ná'anu didza' na' bë'ë.

<sup>15</sup> Ní'irö bidílanu lënu nisa, ate' gula'dila ca' nisa bönachi nacua' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

<sup>16</sup> Ia'tú le guca tu dza tsanni ni' zéajtu' ga na' rulidz-tu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinné yá'abi'. Len yöl-la' rinné ya'a queébi' runbi' ga ta'z'í'dë'ë dumí yugu' bönni' xanbi'.

<sup>17</sup> Bi'i nigula ni sudunóbi'-në' Pablo, en netu', ru'í'bi' zidzaj didza', rnnabi':

—¡Yugu' bönni' ni tunë' xichinë' Dios nayépisëtëre'!  
¡Tu'siyönnë' libí'ili' naca gaca uláli'!

<sup>18</sup> Caní benbi' zían dza. Cate' bítirö guyaza ladxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' lí'. ¡Burúaj icja ladxí'do'obi' bi'i nigula ni!

La' ní'sö burúajtë bö' na'.

<sup>19</sup> Cate' bila'lé'enë' xanbi' chiburúaj bö' na' run ga rinné yá'abi', en bítirö naca löza ila'zi'ë dumí ní'a queébi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi. <sup>20</sup> Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu't-satsa bönachi yödzo ni. <sup>21</sup> Tu'sédinë' le cabí ral-la' sí' lu ná'aru', en bití' ral-la' gunru', tu' nabábaru' Roma.

<sup>22</sup> Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guínë' légaquië' gubá'ayi. <sup>23</sup> Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. <sup>24</sup> Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxí' lidxi guíë na', en gulu'ë ní'agaquië' yeru yaga ta'zón ní'agaquië'.

<sup>25</sup> Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'. <sup>26</sup> Ní'irö tsáldo'os gudödi budó' zxu' bach. Caní guca ga bidxintë guzxizi xilibi zö'ö lidxi guíë na', ate' la' gula'yáljatë yúgu'të gapa nu riyaza, ate' bulu'huédxi ca' yugu' du guíë nága'gaca bönni' nadzúngaquië' ni'. <sup>27</sup> Bubanë' bönni' na' rusayjë' lidxi guíë. Cate' bilé'enë' nayáljagaca gapa nu riyaza lidxi guíë na', gulecjë' guíë tuchi' queë' para guti cuiné', tu' réquinë' chibulu'zxúnajë' bönni' nadzúngaquië' lidxi guíë na'. <sup>28</sup> Ní'irö Pablo zidzaj bulidzë' lë', gunné':

—¡Bití' bi gúni cuinu', tu' zóatu' ni yúgu'tëtu'!

<sup>29</sup> Ní'irö bönni' na' gunabë' guí', ate' gudá'atë' lu yu'u lidxi guíë na'. Guzxídzë'ë lu yöl-la' radxi, ate' biyéchuë' xiní'agaquië' Pablo, en Silas. <sup>30</sup> Cate' chinubéajë' légaquië' lidxi guíë na', gudxë' légaquië':

—Libí'ili', bönni', ¿bizxi ral-la' guna' para ulá'?

<sup>31</sup> Légaquië' të' lë':

—Guyéajlë' Xanru' Jesucristo, ate' uló' lí', en lësca' caní ulu'lágaca bönachi nacua' lidxu'.

<sup>32</sup> Gulu'ílenë' lë' didza' ca naca xtídzë'ë Xanru', dzága-gaca lë' yúgu'të bönachi nacua' lidxë'. <sup>33</sup> La' ná'asö, ni' naca chí' dzó'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacua' lidxë'. <sup>34</sup> Ní'irö guchë'ë légaquië' lidxë', en bë'ë le gula'huë'. Rudzëjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

<sup>35</sup> Cate' za' rení' dza na', yugu' bönni' yúlahui' gula'sól-lë'ë ní'a ná'agaquië', ate' gulë' bönni' na' rusayjë' lidxi guíë:

—Busán-gáquië' bönni' na'.

<sup>36</sup> Ní'irö bönni' na' rusayjë' lidxi guíë gudíxjöi'inë' Pablo didza' ni, gunné':

—Gula'sól-lë'ë bönni' yúlahui' didza' usana' libí'ili'. Na'a, guli'rúaj, en bulí'huóaj dxí'ado' ga rizóali'.

<sup>37</sup> Ní'irö birúajë' Pablo, en gudxë' yugu' ní'a ná'agaquië' bönni' yúlahui' na', gunné':

—Chigula'guínë' netu' lógaca bönachi sal-la' bití' narúguini queétu' ca rinná bë' xibá, en gula'gu'ë netu' lidxi guíë, ate' netu' ni nabábatu' Roma. ¿Naru' tu'santsé' netu' bagáchi'sö? ¡Bití' ca' gaca! ¡Ílídigarë' légaquië' udusángaquië' netu'!

<sup>38</sup> Yöjhuójgaquië' ní'a ná'agaquië' bönni' yúlahui' na', en bulu'siyönnë' yugu' bönni' yúlahui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma. <sup>39</sup> Cate' bila'dxinë' lidxi guíë ni', guláta'yuë' lógaquië' Pablo, en Silas cabí ulu'subáguë'ë légaquië' xíguia'. Ní'irö gula'béajë' légaquië' lidxi guíë na', en guláta'yuë' lógaquië' ulu'rúajë' yödzo na'.

<sup>40</sup> Ní'irö bila'rúajë' Pablo, en Silas lidxi guíë na', ate' gula'yázië' lídxinu Lidia. Cate' chibila'lé'enë' bóchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

### Yugu' bönachi Tesalónica tunë' dzatsa

**17** Gula'dödë' Pablo, en Silas lu yödzo Anfípolis, en lu yödzo Apolonia, ate' bila'dxinë' lu yödzo Tesalónica, ga ni' zoa tu yu'u ga tu'dubë' bönni' judío, en tu'sédë' queë' Dios. <sup>2</sup> Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'. <sup>3</sup> Buchila lá'anë', en bulu'ínë' légaquië' rusëdi le nazúaj lu guichi lá'ayi run bayudxi quí'í sáquë' Cristo, Bönni' na' tunë' löza bönni' judío udusólë' légaquië', ate' tödi gátie' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

<sup>4</sup> Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ladxí'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. <sup>5</sup> Ní'irö yugu' bönni' judío bití' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' bití' nácagaquië' tsahui', bönni' ta'dasé' ca'. Cate' chibulu'túbë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxé' Jasón para ulu'béajë' Pablo, en Silas lógaca bönachi na' tun dzatsa. <sup>6</sup> Cate' bití' bulu'dzölinë' Pablo, en Silas, gula'béajë' Jasón, en ia'zícá'rë' bóchi'ru' nacué' ni', ate' gula'ché'ë légaquië' lógaquië' bönni' yúlahui'. Gulu'ë zidzaj didza', ta'nné':

—Yugu' bönni' na' nutsá'gaquië' bönachi iduté yödzölió chibila'dxinë' ca' ni'. <sup>7</sup> Jasón ni gulu'ë légaquië' lidxé'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nné': “Zoë' ia'túë' bönni' rinná bé'ë, lë' Jesús.”

<sup>8</sup> Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böniga. <sup>9</sup> Ní'irö, gudödi gula'zi'ë bönni' yúlahui' dumí le bulu'cá'ana-garë' Jasón, en ia'zícá'rë' bönni' na', bulu'sané' lé-gaquië'.

#### Le gulunë' Pablo, en Silas lu yödzö Berea

<sup>10</sup> Ní'irö yugu' bóchi'ru' ni' la' gula'sól-la'të' Pablo, en Silas, ni' naca chí'i dzó'ölö, ate' sōjāquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacué' ni', en tu'sëdë' queë' Dios. <sup>11</sup> Gulácarë' tsahui' bönni' ni ca bönni' nacué' Tesalónica, tu' gula'z'í lu ná'agaquië' xtídzë'ë Xanru' idú ladxí'gaquië'. Yugu' dza bulu'labë' dxí'a le nazúaj lu guichi láyai, para iléquié'benë' channö nácatë' lë na' rnnë' Pablo. <sup>12</sup> Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. <sup>13</sup> Ní'irö cate' guléquié'benë' bönni' judío nacué' Tesalónica, lësca' riguixjō'ë Pablo xtídzë'ë Dios lu yödzö Berea, yōjāquië' ni', en gulunë' ca' ni' ga gulún dzatsa bönachi zían. <sup>14</sup> Ní'irö yugu' bóchi'ru' ni' la' gula'sól-la'të' Pablo, para tsejë' ga naca ra' nísado', pero bulu'gá'anasë' Silas, en bí'i Timoteo lu yödzö Berea. <sup>15</sup> Yugu' bönni' Berea na' gula'ché'ë Pablo lu yödzö Atenas. Ní'irö la' yōjhuōjgacatë' lu yödzö Berea, tu'ú'ë xtídzë'ë Pablo, para ilé' Silas, en bí'i Timoteo, tsōjācatë' ga ni' zoë' Pablo.

#### Le benë' Pablo lu yödzö Atenas

<sup>16</sup> Tsanni ni' zoë' Pablo ribözë' Silas, en bí'i Timoteo, lu yödzö Atenas, ruhu'ini ladxé'ë tu' rilé'enë' ta'yéaj ladxí'gaca yúgu'të bönachi yödzö na' yugu' budó' guió' budó' yaga. <sup>17</sup> Que lë ni na' bé'lenë' bönni' judío, en bönni' ta'yéaj ladxí'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yé'eyi didza' ca naca xtídzë'ë Cristo. <sup>18</sup> Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'ílenë' Pablo didza'. Bal-lë' gula'nné':

—¿Bizxi ré'ënitsenë' innë' bönni' huë' didza' ni? Ia'bal-lë' gula'nné':

—Réquitu' náquië' nu run libán quégaca dios zi'tu'.

Caní gula'nné' tu' runë' libán Pablo lógaquië' que didza' dxí'a queë' Jesús, en que yöl-la' rubán. <sup>19</sup> Ní'irö gula'guélë'ë në'ë Pablo, en gula'ché'ë lë' lu guí'a ga tu'dubë' tu'ë didza', nazí'i le Areópago, ta'nné':

—¿Naru' huácatsö yónitu' didza' cubi ni rusiyönnu' netu'? <sup>20</sup> Rusiyönnu' netu' le tun ga rubánitu'. Ré'ënitú' inózitu' bizxi rna didza' ni ru'u.

<sup>21</sup> Bití'rö ta'yaza ladxí'gaquië' ilunë' bönni' Atenas na', en bönni' izá'a nacué' ni', pero ila'yónisinë', en ilu'ísë' didza' tu le cubi.

<sup>22</sup> Ní'irö guzuinë' Pablo gatsaj láchui'lö lö'a Areópago na', gunné':

—Bönni' Atenas, yúgu'të le rilé'eda' naca bé' reaj ladxí'da'alí' yugu' dios queé'li'. <sup>23</sup> Cate' gudöda' lu yödzö, en buyógaca' yugu' le reaj ladxí'li', yōjxáca' ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ladxí'li'-në' sal-la' bití' nún-bë'ëli'-në', Dios ni runa' libán queë' lolí'.

<sup>24</sup> ‘¿Dios ni benë' yödzölió, en yúgu'të le nacué' yödzölió ni! ¡Náquië' Xani yehua' yubá, en Xani luyú ni, en bití' ca' zoë' tu yudo' nungaca bönachi! <sup>25</sup> Bití' bi riyadzaj queë' le gaca ulu'nödzaj bönachi, tu' runödzjé' Lë' cazë' quégaca yúgu'të bönachi yöl-la' na'bán, en yúgu'të le riquiniru'.

<sup>26</sup> ‘Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. <sup>27</sup> Dios bucu'ë légaquië' para ulu'guiljé' Lë', channö nácatí'tës ila'dzölinë' Lë' sal-la' ila'gán ila'zönsë'. Caní raca sal-la' bití' zoë' zi'tu' ga zóaru' tu turu'. <sup>28</sup> Lë' cazë' runë' ga zóaru' nabanru', en bi gaca gunru', en le nácaru'. Naca ca na' gula'nné' bal-lë' bönni' núsá'gaquië' libí'li', nupa bulu'zúaj le do' rúl-lalí', le ta'nná: “Dí'a dza queë' Dios nácaru'.” <sup>29</sup> Na'a, channö nácaru' dí'a dza queë' Dios, bití' ral-la' innaru' náquië' Dios ca tu budó' guió' budó' yaga, o tu le néquini oro, o plata, o guió'j, le nungaca bönachi ca naca tu le ta'guínnajsö ícjaguequi. <sup>30</sup> Dios budöde' cá'asö yugu' le gulunë' lu yöl-la' bití' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi iduté yödzölió ulu'bí'i ladxí'gaca. <sup>31</sup> Dios chinu-lu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

<sup>32</sup> Cate' bila'yönnë' didza' bé'ë Pablo ca guca, zoa nu bubán lu yöl-la' guti, bulu'titjé' bal-lë', ate' ia'bal-lë' gula'nné':

—Yóniguëtu' ia'tú lë ni ru'u didza' que.

<sup>33</sup> Ní'irö burúajë' Pablo gatsaj láchui'lö ga na' nacué', söhuó'jé'. <sup>34</sup> Bal-lë' gula'yéajlë'ë Cristo, en gulunë' tsözxón Pablo. Nútsë'ë Dionisio, bönni' areópago, ladjagaquië', ate' núsá'nu ca ladjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

### Le benë' Pablo lu yödzo Corinto

**18** Gudödi guca lë ni, buzë'ë Pablo yödzo Atenas na', ate' guyijë' yödzo Corinto. <sup>2</sup> Yöjxáquië' Aquilo, tu bönni' judío ni'. Guljë' bönni' ni luyú Ponto, en sí' bidxíngazë' yödzo Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzo Roma. Guyijë' Pablo ga nacué' Aquilo, en Priscila na' <sup>3</sup> tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'. <sup>4</sup> Cate' nacagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bé'lenë' légaquië' didza'. Gú'unnë' ulu'ínë' yugu' bönni' judío, en yugu' bönni' izá'a nacué' ni', naca idütë li le riguíxjö'ë ca naca queë' Jesucristo.

<sup>5</sup> Cate' bila'dxinë' Silas, en bí'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

<sup>6</sup> Cate' bönni' judío nacué' ni' gula'dá'báguë'ë xtídzë'ë, en gula'nnë' zí'ë que, ní'irö Pablo gudxibë' lari' nácuë' para ulu'ínë' légaquië' bí'ti'rö nabáguë'ë lë' ní'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queéli', calëga neda' nabága'a le. Na'a, uyija' ga nacué' bönachi izá'a.

<sup>7</sup> Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. <sup>8</sup> Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacué' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. <sup>9</sup> Ní'irö Lë cazë' Xanru' gudxë' Pablo lu yëla béchigal, gunné':

—Biti' gádxinu', en biti' su' dxisö, quíxjö'u xtídzá'a, <sup>10</sup> tu' zóalen caza' neda' lí', ate' cuntu nu uzapa' në'e lí' para guá' dö' quiu', tu' néquiquequi quia' bönachi zían lu yödzo ni.

<sup>11</sup> Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

<sup>12</sup> Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'. <sup>13</sup> Gulé' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

<sup>14</sup> Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Lib'í'li', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídzá'li' ca ral-la' guna', <sup>15</sup> pero channö naca didza' bizxaj que dídzá'sö, o que lágaca bönachi, en ca naca xibá queézilí', guli'cá'ana tsahuí' lib'í'silí', tu' cabí ré'ën-da' neda' gaca' nu uchí'a usörö yugu' le caní.

<sup>16</sup> Ní'irö Galión bulágui'ë légaquië' lu yu'u yúlahui'.

<sup>17</sup> Ní'irö yúgu'të bönni' uládz na' gula'guél'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lö'a yúlahui', pero bití' bë' ládxë'ë Galión lë na' raza.

<sup>18</sup> Pablo bugá'anë' lu yödzo na' zían dza, ate' gudödi busiyönnë' böchi'ru' nacué' ni' didza', guyijë' yödzo Cencrea, ga ni' benë' yútusö icjë', tu' dë tu le nazí' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo.

<sup>19</sup> Cate' bila'dxinë' yödzo Éfeso, Pablo bulá'alënë' légaquië' ni'. Guyázië' lu yu'u ga tu'dubë' bönni' judío, en tu'sëdë' queë' Dios, ate' bé'lenë' nupa nacué' ni' didza'. <sup>20</sup> Yugu' bönni' ni' gulá'tayuë' lahuë' Pablo ugá'analenë' légaquië' ia'lati' xidzé, pero lë' bití' gú'unnë'. <sup>21</sup> Bé'lenë' légaquië' didza', gunné':

—Run bayudxi soa' gapa' laní sí' gaca Jerusalén, ate' leyúbölö huöda' ga ni zóali', channö gué'ennë' Dios.

Ní'irö gurenë' Pablo tu lë'e barco, en buzë'ë Éfeso na'.

### Ridxinë' Pablo Antioquía, ate' risí lahuë' röjenë' libán le bunni luzuí

<sup>22</sup> Gudödi bidxinë' Pablo yödzo Cesarea, gurenë' guyijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en guyijë' Antioquía. <sup>23</sup> Gudödi zoë' ni' nababa dza, buzë'ë ni', sa'yéajë' tu tu yödzo luyú Galacia, en Frigia. Benë' tsutsu böchi'ru' nacué' ni' ca naca le ta'yéajlë'ë Cristo.

### Runë' libán Apolos lu yödzo Éfeso

<sup>24</sup> Tu dza ni' bidxinë' Apolos, tu bönni' judío lu yödzo Éfeso. Guljë' bönni' ni lu yödzo Alejandría, en nabé'ede'enë' ru'ë didza', en nazédadë'ë le nazúaj lu guichi lá'ayi. <sup>25</sup> Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan. <sup>26</sup> Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'ché'ë lë' quez, en bulu'zéajni'irö'në' lë' xibá queë' Dios. <sup>27</sup> Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zídë'ë xibé didza' ru'ë Apolos na', tu' ruzá' ládxë'ë Dios quégaquië'. <sup>28</sup> Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

### Le benë' Pablo lu yödzo Éfeso

**19** Tsanni ni' zoë' Apolos lu yödzo Corinto, gudödë' Pablo gapa nacué' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. <sup>2</sup> Pablo gunábinë' légaquië', rnnë':



—¿Naru' bidisóalené' Dios Bö' Lá'ayi libí'ili' cate' ni' guyéajlè'èli' Cristo?

Gulé' lè':

—Biti' nayónitu' channö zoë' Dios Bö' Lá'ayi.

<sup>3</sup> Ní'irö Pablo gunábiné' légaquié', rnné':

—¿Nacxi guca le bidí'ali' nisa?

Ta'nné':

—Ca buquílè' Juan bönachi nisa.

<sup>4</sup> Pablo gunné':

—Buquílè' Juan bönachi nisa, nupa ni' bulu'bí'i ládx-i'guequi, ate' Juan caz gudxé' léguequi ral-la' ila'yéajlè' Bönni' na' sí' zá'telè' ca lè', ate' Bönni' ni naquié' Jesús, Lè' Cristo.

<sup>5</sup> Cate' yugu' bönni' na' bila'yönné' didza' ni ru'è

Pablo, bila'dilè' nisa tu' chita'yéajlè' Xanru' Jesús.

<sup>6</sup> Cate' guxóa në'è Pablo légaquié', en ni' rulidzè' Dios, bidisóalené' Dios Bö' Lá'ayi légaquié', ate' gulu'è didza' yúbölö, en gulu'è didza' uláz queë' Dios. <sup>7</sup> Guláquié' bönni' ni idú chínnuè'.

<sup>8</sup> Guzöé' Pablo idú ca tsonna beo' ni', ate' guyázié' lu yu'u ga tu'dubè' bönni' judío, en tu'sédè' queë' Dios, ate' lu yöl-la' rugu ladxí' benè' libán lógaquié'. Bè'lené' légaquié' didza', en gú'unné' ulu'ínè' légaquié' nácatè le riguíxjö'è ca rinná bē'è Dios. <sup>9</sup> Ní'irö bizídi icja ládxí'-do'gaquié' bal-lè', en bití' gula'yéajlè'è Cristo, ate' gula'nné' zí'è que xtídzè'è Xanru' ga nacua' bönachi zían na'. Ní'irö Pablo bulá'alené' légaquié', ate' bubéajé' quez nupa ta'yéajlè' Cristo. Bè'lené' bönachi ni ta'yéajlè' Cristo didza' yugu' dza ga na' tu'dubè' lu yu'u ga ruséd-iné' Tiranno bönachi. <sup>10</sup> Caní béntica'sè' Pablo idú ca chopá iz, ate' caní guca, bila'yöni yúgu'tè bönachi didza' ca naca queë' Xanru' Jesús, bönachi nacua'è yugu' yödzo luyú Asia, bönachi judío, en bönachi izá'a.

<sup>11</sup> Dios bené' yugu' yöl-la' huáca zxön lu në'è Pablo.

<sup>12</sup> Caní guca, bal-lè' bönni' gula'zi'è yugu' lári'do' bégué'è icjé' Pablo, en yugu' lari' tsölá'a bugalè' lè'è, ate' yöjuá'gaquié' léguequi gapa nacua' nupa te'e, ate' bulu'huóáquié' ca naca yödzo'hué' que queégaquié', en bulu'rúaj bö' xihui' yú'ugaca bönachi na'.

<sup>13</sup> Ní'irö bal-lè' bönni' judío udá dzaga tu'béajé' bö' xihui' gulé'enné' ulu'guné' dxin Lè' Xanru' Jesús para ulu'béajé' yugu' bö' xihui' yú'ugaca bönachi, ta'nné':

—Ní'a que Lè' Jesús, Nu na' runé' libán que Pablo, riná bé'etu' libí'ili' urúajli'.

<sup>14</sup> Caní guluné' gadxi bönni' xzí'iné' Esceva, tu bönni' judío náquié' bönni' lo ládjagaquié' bixúz unná bē'.

<sup>15</sup> Bubí'i didza' bö' xihui' na', gunná:

—Núnbè'a-né' Jesús, en núnbe'eda' bönni' lè' Pablo, pero libí'ili', ¿núzxitè libí'ili'?

<sup>16</sup> Ní'irö guxítí'è bönni' na' yu'u lè' bö' xihui', yöjené' légaquié' zí', en bucul-lè' yúgu'tè', tu' guzxéqui'röné' ca légaquié'. Caní guca, xiguídigacasé', en hué'gacatzé' bulu'zxúnnajé' gadxé' bönni' na' lu yu'u ni'. <sup>17</sup> Guzè didza' ca guca lè ni, ate' bila'yöni yúgu'tè nupa nacua' lu yödzo Éfeso, bönachi judío, en bönachi izá'a, ate' yúgu'tè' guládxiné' Dios. Que lè ni na' guluné' zxön Lè' Xanru' Jesús.

<sup>18</sup> Lësca' bila'dxiné' zían bönni' ta'yéajlè'è Cristo, en gula'xóalèpè' dul-la' nabága'gaquié', en gula'guíxjö'è le chiguluné'. <sup>19</sup> Lësca' caní guluné' zían bönni', zí'alö guluné' yöl-la' udzá'. Dujuá'agaquié' yugu' guichi udzá' quégaquié', ate' bulu'zégui'è léguequi lógaca yúgu'tè bönachi. Bulu'labé' tsca nazáca'gaca guichi na', le guca idú chi un mil dumí plata. <sup>20</sup> Caní guca, guzèda' xtídzè'è Xanru', en bidéli'da' bönachi zían. Idú ládxí'gaquié' gula'yéajlè'è Cristo.

<sup>21</sup> Gudödi gulaca lè ni, bené' queë' Pablo tsejé' Jerusalén, pero zí'alö ral-la' tödè' yugu' yödzo luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

<sup>22</sup> Ní'irö gusól-lè'è-bí' chópabí' bí'i bönni' tácalenbí' lè', légacabí' Timoteo, en Erasto, luyú Macedonia, pero bugá'ané' lè' nababa dza luyú Asia na'.

### Tu'tsatsa bönachi lu yödzo Éfeso

<sup>23</sup> Bulu'tsatsa bönachi Éfeso dza ni', ate' gula'dá'baguè'è xtídzè'è Xanru'. <sup>24</sup> Bené' Demetrio, bönni' gubèdxi guíè plata ga bulu'tsatsè'. Run cazé' yugu' lidxi budó' guíój budó' yaga néquiguequini plata que dios quégaquié', lènu Diana. Gula'zi'è bönni' tuné' dxin ni dumí bach. <sup>25</sup> Butubé' Demetrio na' ia'zícá'rè' bönni' tuné' la' dxin nisö, ate' gudxé' légaquié':

—Böcha'a, nöz quézili' ca naca dxin runru', runna dumí queéru'. <sup>26</sup> Rilé'eli', en riyónili' ca runé' Pablo na'. Calégasö Éfeso ni, pero idú luyú Asia chibidéli'né' bönachi zían, ate' chibutsé'è ca tuné', tu' ré' légaquié': "Yúgu le núngaca bönachi bití' nacagaca dios." <sup>27</sup> Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lènu Diana. Caní gaca, ugá'ana cá'asö yöl-la' zxön queénu, dios ni ta'yéaj ládxí'gaca-nu bönachi iduté luyú Asia, enca' iduté yödzo'lió.

<sup>28</sup> Cate' yugu' bönni' na' bila'yönné' didza' ni, gula'léde'ené', ate' gulu'è zidzaj didza', ta'nné':

—Nácatèronu zxön Diana, dios queéru' ré'u, bönachi Éfeso.

<sup>29</sup> Caní guca, bulu'tsatsa bönachi iduté lu yödzo na', ate' guláquié' tuz, en carelö yöjáquié' lö'a yúlahui'. Gulá'ayöjé' Gayo, en Aristarco, bönni' Macedonia túngaquié' Pablo tsözxón, ga ní'. <sup>30</sup> Cate' gú'unné' Pablo tsázié' ga nacua' bönachi zían na', bití' ca' gulu'è lè' lataj bönni' ta'yéajlè'è Cristo. <sup>31</sup> Lësca' caní guluné' bal-lè' bönni' yúlahui' que luyú Asia, bönni' ta'lé'ené' Pablo dxí'a. Gula'sól-lè'è queë' nupa guláta'yu lahué' bití' tsazié' lö'a yúlahui' na'. <sup>32</sup> Ga ní' tu'tsatsè', en ta'bódxí'è, tu le ta'nné' bal-lè', en ia'tú le ta'nné' ia'zícá'rè', tu' ró'ogacasé' baröli bönni' zían na' tu'tsatsè', en lá'tu'biquí' yúgu'tégaquié' bití' nözguequiné' bizx que na' nudúbigaquié' ní'. <sup>33</sup> Ní'irö yugu' bönni' judío gula'béajé' Alejandro ladaj bönachi zían na', ate' bulu'dxígué'è lè' lógaca bönachi zían na'. Bulu'e Alejandro na' len në'è para ila'bó' dxisö, tu' gú'unné' gu'è didza' le gácalen yugu' bönni' judío na' lógaca yúgu'téguéqui. <sup>34</sup> Cate' guléquibe'ené' náquié' judío, yúgu'tè' gulu'è tsözxón zidzaj didza' idú ca chopá hora, ta'nné':

—Nácatērōnu zxōn Diana, dios queēru' rē'u bōnachi Éfeso!

<sup>35</sup> Ní'irō bōnni' uzúaj que yúlahui' benē' ga gula'bó' dxisō bōnachi zían na', gunné':

—Bōnni' Éfeso, nōzigaca yúgu'tē bōnachi zoa yudo' queēnu Diana, dios zxōn, ni. Rē'u ni, bōnachi Éfeso, run chí'iru' yudo' na', enca' budó' na' bōxaj ga zóaru', le birúaj lúzxiba. <sup>36</sup> Cuntu nu gaca tá'baga' lē ni. Que lē ni na' run bayudxi sóalí' dxisō, en bití' bi gúntēzili'.

<sup>37</sup> Naché'gacali'-nē' bōnni' ni, en bití' ta'banē' le dzō'ō yudo', en bití' ta'nnē' xihuē'ē queēnu dios queēlí'.

<sup>38</sup> Que lē ni na', channō zoa didza' bizxaj quégaquiē' Demetrio, en yugu' bōnni' gubēdxi guié plata nacua'lenē' lē', len nūti'tēs bōnni', dē lataj ga nu uzé nagui légaquiē', en zoa nu uchi'a usōrō légaquiē'. Ní' huáca ulu'zegui luzá'agaquiē' didza' tuē' ia'túē'. <sup>39</sup> Na'a, channō dē ia'tú le inábalí', huáca ucá'anaru' tsahuí' le cate' ulu'dubi bōnni' yúlahui' ca na' rinná bē' yúlahui'.

<sup>40</sup> Zoa bōnadxi nu zegui rē'u didza' ní'a que dzatsa ni guca na'a, inná ridá'baga'ru' yúlahui'. Bití' bi gaca in-naru' bizx que guca dzatsa ni.

<sup>41</sup> Cate' budxi bē'ē didza' ni, busól-lē'ē bōnachi zían na' nudúbigaca ní' tsōhuó'jgaca lídxiguequi.

#### Sa'yéajē' Pablo luyú Macedonia, en luyú Grecia

**20** Cate' guró'ō dxi dzatsa na' guca lu yōdzō Éfeso, bulidzē' Pablo yugu' bōnni' ta'yéajlē'ē Cristo, ate' guchiziē' icja nágagaquiē' didza'. Gudōdi ní' bunidē' lé-gaquiē', en la' bulá'alentē' légaquiē'. Birúajē' ní', ate' sa'yéajē' luyú Macedonia. <sup>2</sup> Gudōdē' yugu' yōdzō luyú ní', ruzéajni'ide'enē' bóchi'ru' nacué' ní', ate' gudōdi ní' bidxinē' luyú Acaya. <sup>3</sup> Guzōé' Pablo ní' idú ca tsonna beo'. Cate' chizóa cuenē' tu lē'e barco para tsejē' luyú Siria, gúquibe'enē' ta'bó' nísie' bōnni' judío lē' para ila'zōnē' lē'. Que lē ni na' buguelē'ē nōza sōhuó'jē' luyú Macedonia, ate' bidxinē' yōdzō Filipos. <sup>4</sup> Sópater, zxí'inē' Pirro, bōnni' Berea, en Aristarco, en Segundo, yugu' bōnni' Tesalónica, en Gayo, bōnni' Derbe, enca' bí'í Timoteo, en Tíquico, en Trófimo, yugu' bōnni' Asia, sōjácalenē' tsōzxón lē'. <sup>5</sup> Ní'irō yugu' bōnni' ni yōjnōru-gaquiē' lahuē' Pablo, yōjāquiē' yōdzō Troas, ga ní' gula'bōzē' lē'. <sup>6</sup> Lu yōdzō Filipos na', neda', Lucas, yōjt-saga'-nē' Pablo. Cate' chigudōdi laní' cate' tahuē' bōnni' judío yōta xtila bití' nazí'í cúa zi que, gurentu' tu lē'e barco, en buzá'atu' Filipos na'. Gudōdi gayu' dza budzágatu' bōnni' ní' yōjnōrugaquiē' lahuē' Pablo, yōjāquiē' Troas, ate' ní' bugá'anatu' gadxi dza.

#### Le benē' Pablo lu yōdzō Troas

<sup>7</sup> Dza risí lo le gadxi dza bulu'dubē' bōnni' ta'yéajlē'ē Cristo para ilahuē' yōta xtila le rusá' lādxi'ru' ca gútiē' Jesucristo. Ní' rusédinē' Pablo légaquiē', en tu' ral-la' uzé'ē ní' cate' za' rení' dza na', xidzé bē'ē didza', ga bidxintē gudōdi guluhuēla. <sup>8</sup> Ga ní' nudúbigaquiē' naca lu yu'u xitsá', ate' nacua' zían le ta'gú'u bení' ga na'. <sup>9</sup> Zóabi' bí'í Eutico ní', rō'ōbi' ga ra'a lení' que yu'u na', ate' nadódirō yēla lobi' tu' ritunna libán runē' Pablo. Ga

ní' rō'ōbi' rásibi' bí'í na' naca ga bunny cuía lu yu'u, ate' rásisibi' ca' gubíxitebi', bóxjabi' ga bidxintēbi' zxan yu'u. Nátitēbi' bulu'lisē'-bí'. <sup>10</sup> Bōtjē' Pablo zxan yu'u na', ate' yōjxóé' lēbi', en bunidē'-bí'. Ní'irō gudxē' nupa nacua' ní':

—Bití' gadxi idzóbili'. Nabanbí'.

<sup>11</sup> Cate' chibubenē' Pablo xitsá', gudélē'ē yōta xtila, gudahuē'. Ní'irō Pablo bē'lenē' légaquiē' didza' ga bidx-intē zila balō. Gudōdi ní' burúajē' ní'. <sup>12</sup> Bí'í bōnni' ra'bán na' gubíxibi', bulu'ché'ē-bí' nabanbí', en bulu'zí' zxōndē'ē.

#### Ca guca bidxintu' Mileto

<sup>13</sup> Gunórutu' lahuē' Pablo, en yōjchentu' tu lē'e barco, ate' gudóditu' ga bidxintu' yōdzō Asón para tsōjtsá-gatu'-nē' Pablo ní', para gaca ca na' chibén xtízta'tu', tu' gú'unnē' Pablo tsejē' ní' sé'esi ní'ē. <sup>14</sup> Cate' chibudzá-gatu'-nē' lu yōdzō Asón na', gurénlenē' netu' lē'e barco, ate' guyéajtu' yōdzō Mitilene. <sup>15</sup> Buzá' barco ní', ate' dza buropi bidxintu' tōdi li ga zoa luyú bidxi nazí'í le Quío, ate' ia'tú dza ca' gudóditu' tōdi li ga dē yōdzō Samos, en bidxintu' yōdzō Trogilio ga ní' guzóatu' tu chí'í. Ia'tú dza ca' bidxintu' yōdzō Mileto. <sup>16</sup> Caní bentu' tu' chibenē' queē' Pablo tódise' yōdzō Éfeso, para cabí tsenē' luyú Asia, tu' run bayudxi soē' Jerusalén cate' naca dza Pentecostés channō séqui'nē'.

#### Didza' bē'ē Pablo lu yōdzō Mileto

<sup>17</sup> Cate' ní' zoē' Pablo lu yōdzō Mileto, gusól-lē'ē nu yōjlidza bōnni' gula tapa chí'ē bōnachi queē' Cristo nacué' Éfeso. <sup>18</sup> Cate' bila'dxinē' ga zoē' Pablo, lē' gudxē' légaquiē':

—Libí'ilí' chinóz quézili' ca béntica'sa' ga zóali' ga gudela' bidxina' luyú Asia. <sup>19</sup> Yugu' dza bena' xichinē' Xanru' lu yōl-la' nōxaj lādxi', ga bidxintē gurōdxa' ní'a queēlí', ate' zían le guca quia' le guzxí' bē' neda' ní'a que le ruá' dō' gulunē' quia' bōnachi judío bití' ta'yéajlē' Cristo. <sup>20</sup> Béntica'sa' libán ga zóali' que yúgu'tē le ruzí'ilí' xibé, en busédida' libí'ilí' yáladjo' ga nudúbili', en gapa naca lu yu'u lídxili'. <sup>21</sup> Bena' ba nalí lógaca bōnachi judío, en lógaca bōnachi izá'a para ulu'bí'í lādxi'gaca, en ulu'huó'aca queē' Dios, en ila'yéajlē' Xanru' Jesu-cristo. <sup>22</sup> Na'a, Dios Bō' Lá'ayi chinunē' quia' tseja' Jerusalén, en bití' nōzda' bizxi gaca quia' ní'. <sup>23</sup> Yúgu'tē yōdzō ga ridá', riguíxjō'ínē' Dios Bō' Lá'ayi neda', rē' neda' ila'gu'ē neda' lidxi guié bōnni' judío bití' ta'yéajlē', en ulu'saca' zí'ē neda'. <sup>24</sup> Bití' bi runi neda' que lē na' gaca, sal-la' gátia' o cabí gátia', pero ru'í' lādxi'sida' údxi guna' le chigudéla'a runa', para guna' dxin na' budōdē' Xanru' Jesús lu na'a, le naca guna' libán que didza' dxí'a ca naca le ruzá' lādxe'ē Dios queēru'. Caní guna' len yōl-la' rudzeja.

<sup>25</sup> Na'a, yúgu'tēli' na' chibena' libán lolí' ca rinná bē'ē Dios, nōzda' bí'tirō ulé'eli' neda'. <sup>26</sup> Que lē ni na', le ná-catē rea' libí'ilí' na'a dza. Bití' nabága'a neda' queēlí' nit-uli' libí'ilí'. <sup>27</sup> Bití' bi bucáchi'da' libí'ilí', pero gudíxjō'í'da' libí'ilí' yúgu'tē le rnnē' Dios. <sup>28</sup> Que lē ni na', guli'gún

chí'i cuinlí, en guli'gún chí'i yúgu'tè bönachi queé' Cristo, tu' nuzóe' Dios Bö' Lá'ayi libí'ili' para gácalenlí légaquié', en gun chí'ili' bönachi queé' Xanru', Bönni' na' gútié' uláz quégaquié', bulaljé' xichöné' le böá'uinë' légaquié'.<sup>29</sup> Chinözda', tódi uzá'a ga zóalí', ila'yaza nupa ilé'eni ulu'suniti bönachi queé' Cristo ga zóalí', iluné' ca tunba' bö'cu' guí'a sínía', tu'sunítiba' yugu' bö'cu' xzila'.<sup>30</sup> Ila'rúajé' bönni' nútsa'gaquié' ladjalí', ate' ilu'é didza' bití' nácatè para ulu'béajé' quégacasé' nupa ta'yéajlé' Cristo nútsa'gaca ladjalí'.<sup>31</sup> Que lè ni na', guli'sóa ban ladxí', en guli'tsójné ca bena' neda' idú ca tsonna iz, réla, en tè dza buchízia' icja nágalí' tu tuli' ga bidxintè gurödxá' queé'li'.

<sup>32</sup> Na'a, böchí' luzá'ado', rigú'a libí'ili' lu në'è Dios. Rinábida' Lè' uzá' ladxé'è queé'li', en guné' ca rnna xtídzé'è. Dios guné' libí'ili' tsutsu, en guné' ga idéli'li' gunlí' tsözxón yugu' bönni' rò queé'.<sup>33</sup> Catu caz guzè ladxá'a le nequi quégaquié' böchí' luzá'a. Bití' guzè ladxá'a dumí, o lari' quégaquié'.<sup>34</sup> Nöz quézili' dxí'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'.<sup>35</sup> Ca naca yúgu'tè le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsójneru' didza' bë'è Xanru' Jesús, gunné': "Uzírö xibé nu bi runödzaj ca nu bi rizí'."

<sup>36</sup> Cate' budxi bë'è Pablo didza' ni, buzóa xzibé', ate' bené' tsözxón yúgu'tè', bulu'lidzé' Dios.<sup>37</sup> Ní'irö gula'bödxé' yúgu'tè'. Bulu'nidé' yené' Pablo, en bulu'tsaga lahué' lè'.<sup>38</sup> Caní guluné' tu' bulu'huí'inné' ní'a que didza' na' bë'è Pablo, gunné': "Bíti'rö ulé'eli' neda'." Yójácalené' tsözxón lè' ga na' gurené' lu barco.

### Sa'yéajé' Pablo Jerusalén

**21** Gudödi bulá'alentu' légaquié', guyú'utè nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudóditu' ia'tú lataj nazí'i le Rodas, ate' buzá'atu' ní', en bidxintu' yödzö Pátara.<sup>2</sup> Yöjxáca'tu' tu barco yúbölö ní' le zeaj luyú Fenicia. Gurentu' lè'e barco na', ate' guyú'utè nöza.<sup>3</sup> Gudóditu' ga nalá' Chipre, le guta' tsölá'a yógöla, ate' guyéajtu' luyú Siria, ga ní' guyaza barco na' lu yödzö Tiro, tu' rala' tsójcá'ana yua' ní' le dzö'ö lè'e barco na'.<sup>4</sup> Lu yödzö Tiro na' yöjxáca'tu' tu bönni' réajlé'è Cristo, ate' bugá'analentu' lè', en yugu' böchí'ru' ní' idú gadxi dza. Tu' chibulu'íné' Dios Bö' Lá'ayi légaquié' le ral-la' gaca queé' Pablo, gulé' lè' bití' tsejé' Jerusalén.<sup>5</sup> Cate' chibizá'a dza na', burúajtu' ní', ate' gula'zá'lené' netu' tsözxón yúgu'tè' len nigula que quégaquié', en yugu' bí'i quégaquié', ga bidxintètu' ní'ilo ra' yödzö na'. Ra' nísado' ní' buzóa xzibitu', en bulidztu'-né' Dios.<sup>6</sup> Budxi bunida' luzá'atu' tutu' ia'tutu', bubentu' lè'e barco, ate' légaquié' yöjhuójgaquié' lidxigaquié'.

<sup>7</sup> Buzá'atè barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lè'e barco na' ní'. Bugápatu' Dios böchí'ru' nacu'è ní', ate' bugá'analentu' légaquié' tu dza.<sup>8</sup> Cate' za' rení' ia'tú dza, burúajé' Pablo ní', ate' dzá'gatu'-né' netu' guyéajtu' yödzö Cesarea. Ní' guyú'utu' lu yu'u lidxé' Felipe, ate' bugá'analentu' lè'.

Runé' Felipe na' libán que didza' dxí'a. Bítsé'è gadxé' bönni' ní' bulu'cu'è dza ní'te para ilácalené' bönachi queé' Cristo.<sup>9</sup> Nacuá'abi' tapa bí'i nigula ra'bán queé' Felipe na', tu'ibi' didza' uláz queé' Dios.<sup>10</sup> Gudödi gudzetu' chopa tsonna dza ní', ní'irö bidxiné' Agabo ní', bönni' ru'è didza' uláz queé' Dios, narúajé' luyú Judea.<sup>11</sup> Bönni' ni buduyúé' netu', ate' gudélé'è pan le néquini guídi queé' Pablo. Bégué'è ní'a na' cuiné', en gunné':

—Caní rnné' Dios Bö' Lá'ayi: "Caní iluné' bönni' judío nacu'è Jerusalén. Ilúguié' bönni' ni nequi queé' pan guídi ni, ate' ulu'dödé' lè' lu ná'agaca bönachi izá'a."

<sup>12</sup> Cate' biyönitu' didza' ni, gúta'yutu' lahué' Pablo, netu', en nupa nacuá' ní', para cabí tsejé' Jerusalén.<sup>13</sup> Bubi'è didza' Pablo, gunné':

—¿Bizxi ni runlí, ribódxili', en rusuhu'ínili' neda? Neda' chizóa caza' sina', calégasö ilúguié' neda', pero gátia' ca' lu yödzö Jerusalén ní'a queé' Xanru' Jesús.

<sup>14</sup> Tu' cabí guzxéqui'tu'-né' didza', bití'rö bi gúdxitu'-né', ate' gunnatu':

—Gaca ca raza ladxé'è Xanru'.

<sup>15</sup> Cate' chigula'dödi dza na', bupa'atu' queé'tu', ate' guyéajtu' Jerusalén.<sup>16</sup> Gula'zá'lené' netu' bal-lè' bönni' ta'yéajlé'è Cristo, nacu'è Cesarea, ate' dzá'guié' Mnasón, tu bönni' Chipre, légaquié'. Réajlé'è Cristo dza ní'te, ate' ral-la' tsójgá'anatu' lidxé' bönni' ni.

### Pablo röjyúé' Jacobo

<sup>17</sup> Cate' bidxintu' Jerusalén, len yöl-la' rudzeja quégaquié' böchí'ru' ní' ta'yéajlé'è Cristo guluné' netu' bal.<sup>18</sup> Dza buropi na' Pablo guyázalené' netu' lu yu'u, yöjyutu'-né' Jacobo, ate' nudúbigaquié' ní' yúgu'tè bönni' gula tapa chí'è bönachi queé' Cristo nacu'è Jerusalén.

<sup>19</sup> Cate' Pablo chibugapé' légaquié' Dios, busiyönné' légaquié' yúgu'tè le bené' Dios lu në'è lè' ga nacuá' bönachi izá'a.<sup>20</sup> Cate' bila'yönné' lè ni, gula'gu'è Dios yöl-la' ba. Ní'irö gulé' Pablo:

—Nöz quézinu', böchí'tu', cate' xö zían gáyu'è bönni' judío ta'yéajlé'è Cristo, ate' yúgu'tè' túndé'è bal xibá queé' Moisés.<sup>21</sup> Chibila'yönné' yugu' le tu'í didza' bönachi le ta'nné' quiu', ta'nná rigú'u yól-lu'u yúgu'tè bönni' judío nútsa'gaquié' ladaj bönachi izá'a, para ulu'cá'ané' le gunná bë'è Moisés, en rinná bé'enu' légaquié' bití' ila'chúguié' lu xpéla'gacabí' bí'i bönni'do' quégaquié', en bití' iluné' bal yugu' le nalébiru' runru' ré'u, bönachi judío.<sup>22</sup> ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni.<sup>23</sup> Na'a, ben lè ni rétu' lí'. Nacuá'lené' netu' ni tapé' bönni', chinazí' lu ná'agaquié' lahué' Dios tu le iluné'.<sup>24</sup> Guché'è yugu' bönni' ni, en ben légaquié' tsözxón gun dxí'a cuinlí' ca naca que yudo', en gudixaj lí' le ral-la' ila'guizxjé' para ilún yútusö ícjagaquié'. Ní'irö ila'nóziné' yúgu'tè bönni' judío bití' nácatè lè na' ta'nné' quiu', pero lésca' lí' runu' le naca dxí'a, en runu' ca rinná bë' xibá queé' Moisés.

<sup>25</sup> Ca naca quégaca bönachi izá'a, nupa ní' chita'yéajlé' Cristo, chibén xtídzatu', en buzúajtu' lu guichi ca ral-la' iluné'. Bití' run bayudxi ilún chí'è yugu' lè ni tuné' bönni' judío, pero tuz:

Biti' ilahuë' le ta'gú'u bönachi lógaca budó' guió'j budó' yaga.

Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gá-caba' rön.

Biti' ilunë' le ruá' dö'.

### Ta'zönë' Pablo lö'a yudo'

<sup>26</sup> Ní'irö Pablo guchéë' queë' tapë' bönni' na', ate' dza buropi ni' ben dxí'a cuinë' tsözxón len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxí'a cúngaquië', dza ni' ral-la' tsöjuá'agaquië' le ila'gu'ë lahuë' Dios que queë-gaquië'. <sup>27</sup> Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo. <sup>28</sup> Gulu'ë zidzaj didza', ta'nnë':

—Guli'gácalen netu', bönni' Israel! Bönni' ni ruséd-inë' yúgu'të bönachi yúgu'të lataj ulu'cá'ana cá'asö yödzo queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

<sup>29</sup> Caní gula'nnë' tu' bila'lé'enë' Pablo zí'alö lu yödzo dzáguië' Trófimo, bönni' Éfeso, en téquinë' gulu'ë bönni' ni lu yudo'.

<sup>30</sup> Caní guca, bulu'dubi yúgu'të bönachi yödzo, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. <sup>31</sup> Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén. <sup>32</sup> Bönni' lo ni la' butúbitë' bönni' röjáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' röjáquië' gudil-la, en bönni' na' röjáquië' gudil-la, bulu'sanë' ta'guinë' Pablo. <sup>33</sup> Ní'irö gubíguië' bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lë' len chopa du guié. Gudödi ni' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

<sup>34</sup> Ta'bódxí'a bönachi zían na', que queëgaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'ché'ë Pablo lu yu'u zxön ga nagá'anagaquië' bönni' na' röjáquië' gudil-la. <sup>35</sup> Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'ínë' Pablo, tu' dxíadi'igaca bönachi zían légaquië', <sup>36</sup> en zá'gaca cúdzu'lögaquië', ta'bódxí'a, ta'nná:

—Guli'gútië'.

### Didza' bë'ë Pablo uláz queë' lógaca bönachi

<sup>37</sup> Cate' ni' gula'sí lógaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' lí' tu didza'?

Bönni' lo na' gudxë' Pablo:

—¿Rácatso' didza' griego? <sup>38</sup> ¿Naru' calëga lí' bönni' Egipto na' dza lahui nisö butubë' yugu' bönni' gula'dá'baguë'é yúlahui', ate' guchéë' idú choá' gáyú'ë bönni' huëti bönachi lu lataj cá'asö?

<sup>39</sup> Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

<sup>40</sup> Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bé'lenë' légaquië' didza' lu didza' hebreo.

22 Caní gunné' Pablo:

—Libí'ili', bönni' gula, en libí'ili' böcha'a. Buli'zé nágalí' le guía' libí'ili' ca naca le runa'.

<sup>2</sup> Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

<sup>3</sup> —Naca caza' neda' bönni' judío. Gulja' lu yödzo Tarso luyú Cilicia, pero guzxóna' lu yödzo ni, ate' buséd-inë' Gamaliel neda' idú ca naca xibá quegaquië' xuz xtó'oru'. Bética'sö ládxa'a guyéaj ládxa'a Dios ca runlí' libí'ili' na'a. <sup>4</sup> Zí'alö gudxía ládxi'gaca-në' bönni' nazí' lu ná'agaquië' xtídzë'ë Cristo, en guché'gaca-në' ga ilátië'. Guzxóngaca-në', en gulú'ugaca-në' lidxi guié, yugu' bönni', en nigula. <sup>5</sup> Lë'sca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzo Damasco. Guyija' ni' para tsöjxóngaca' nupa ni' ta'yéajlë' Cristo, para idiché'gaca-në' ná'agaquië' Jerusalén ni, para ilácagaquië' xigua'.

### Riguíxjö'ë Pablo ca böáquië' queë' Cristo

<sup>6</sup> Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúzxiba, le buzení' ga na' sa'yéaja'. <sup>7</sup> La' yöjóta'tea' lu yu, en biyönda' chí'i Nu gudxi neda': "Saulo, Saulo, ¿bizx que ribía ládxi'u neda'?" <sup>8</sup> Ní'irö gunábida' lë', gunnía': "¿Nuzxi lí', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." <sup>9</sup> Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chí'i Nu na' bulidza neda'. <sup>10</sup> Ní'irö gudxa-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' lí' ca naca yúgu'të le ral-la' gunu'." <sup>11</sup> Tu' cabirö rilé'eda' tu' budí'i yösa bení' na' guyépidá' lahua', que lë' ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

<sup>12</sup> Zoë' Ananías ni', tu bönni' runë' idütë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. <sup>13</sup> Bidxinë' Ananías na' ga zoa', en gudxë' neda': "Saulo, böcha'a, huóalaj guió'j lo'." La' ní'isö böálaj guió'j lahua', ate' bilé'eda' lë'. <sup>14</sup> Lë' gudxë' neda': "Dios quegaquië' xuz xtó'oru', dza ní'te guró cazë' lí' para inózinu' le ré'ëni quézinë' Lë', en ilé'enu-në' Bönni' Tsahuí', Lë' cazë' Zxí'inë', en yönnu' le guié' Lë' cazë' lí'. <sup>15</sup> Caní gaca, tu' ral-la' gunu' ba nalí queë' Lë'

lógaca yúgu'tè bönachi, usiyönnu' légaquiè' ca naca le chibilé'enu', en le chibiyóninu'. <sup>16</sup> Na'a, ¿bizx que ridzenu'? ¡Guyasa, en bidila nisa! Bulidzè' Xanru' para únè' lí' dxí'a, en ugúè' dul-la' nabágu'u."

### Cristo gusól-lè'è Pablo para gunè' libán lógaca bönachi izá'a

<sup>17</sup> Gunné' ca' Pablo:

—Gudódi ní', cate' budxina' Jerusalén, en tsanni ní' rulidza'-nè' Dios lu chila yudo', bilé'eda' tu le naca ca tu lu yèla béchigal. <sup>18</sup> Bilé'eda'-nè' Xanru', ate' gudxè' neda': "¡Guyéaj carelò! ¡Burúajtè Jerusalén ní', tu' cabí ilunè' bal bönni' ni le gunu' ba nalí quia!" <sup>19</sup> Neda' gudxa'-nè': "Xan, nózgaca quézinè' ca bena' neda'. Guyázia' gapa naca lu yu'u ga tu'dubè' tu'sèdè' bönni' judío queè' Dios. Gudina' nupa ní' ta'yéajlè' Lí', en gulú'ugaca'-nè' lidxi guié. <sup>20</sup> Cate' ní' gulútiè' Esteban, bönni' ní' benè' ba nalí quiu', lèscá' zoa' neda' ní', en be-na' tuz yugu' bönni' gulútiè' lè' tu' ben chí'a lari' nácu-gaquiè' bönni' na' bulu'ladxè' lè' guíój." <sup>21</sup> Ní'irò Xanru' gudxè' neda': "Guyéaj, tu' risól-la'a lí' lógaca bönachi izá'a."

### Pablo ruí'ilenè' bönni' lo didza', bönni' rinná bé'enè' bönni' rójáquiè' gudil-la

<sup>22</sup> Nisö ze lo yugu' bönni' judío bulu'zè' nágagaquiè' didza' bé'è Pablo, ate' ní'irò gula'bódxí'è. Gulu'è zidzaj didza', ta'nné':

—¡Gulí'gútiè' bönni' ni! ¡Bíti'rò ral-la' soè' ibanè'!

<sup>23</sup> Ní'irò tu' ta'bódxí'è, en ta'chözè' le nácu-gaquiè' lu yöl-la' rilé' quégaquiè', en tu'chejè' bëchtò yu lu bö'ös, <sup>24</sup> bönni' lo na' rinná bé'enè' bönni' rójáquiè' gudil-la gunná bé'è ulu'gu'è Pablo lu yu'u zxön na'. Lèscá' gunná bé'enè' légaquiè' ila'guiné' Pablo para quíxjö'è le ná-catè, para ila'nózinè' bizx que na' ta'bódxí'è bönni' judío caní queè' Pablo. <sup>25</sup> Cate' gulúgui'è lè' du guídi para ila'guiné' lè', Pablo gudxè' tu bönni' nacu'è lu nëè' bönni' rójáquiè' gudil-la zoè' ní', rnné':

—¿Naru' dè lataj quínili' neda'? Nababa' Roma, ate' cuntu nu buchí'a busöró neda' channò nabága'a xíguia'.

<sup>26</sup> Cate' bönni' na' biyönnè' lè ni, guyijè' yójtíxjö'í'ne' bönni' lo na' rinná bé'enè' bönni' rójáquiè' gudil-la. Rè' lè':

—¿Bizxi caz ni runru'? ¡Bönni' ni nababè' Roma!

<sup>27</sup> Ní'irò bidè' bönni' lo na' ga zoè' Pablo, en gudxè' lè':

—¡Gudíxjö'! ¿Naru' nababu' lí' Roma?

Pablo gudxè' lè':

—Ön, nababa'.

<sup>28</sup> Bubí'è didza' bönni' lo na', gunné':

—Neda' ni, dumí zían gudíxja' para ibaba' Roma.

Ní'irò Pablo gudxè' lè':

—Neda' gubaba' Roma cate' ní' gulja' tu' nabába-gaquiè' xuz xiná'a Roma.

<sup>29</sup> Cate' bönni' na' chizóa ila'guiné' lè' bila'yönnè' lè ni, la' bulu'bíga'tè' ga zoè' Pablo. Lèscá' gúdxinè' bönni' lo

na' cate' gunózinè' nababè' Pablo Roma, tu' chigunná bé'è ilúguiè' lè'.

### Ridxinè' Pablo lógacaquiè' bönni' yudo' tu'chí'a tu'söróè'

<sup>30</sup> Dza buropi ní', gú'unnè' bönni' lo na' inózinè' gazxi ga rè' bizxi na' yugu' bönni' judío tu'zéguiè' Pablo didza'. Gunná bé'è bulu'sedxè' du guié na' náguè'è Pablo, ate' gunná bé'è ulu'dubè' bixúz unná bé' judío, en yúgu'tè bönni' yudo' tu'chí'a tu'söróè'. Ní'irò bubéa-jè' Pablo ga na' nagú'ugaquiè' lè', ate' buzóè' lè' ló-gaquiè'.

**23** Ní'irò buyúde'è Pablo lógacaquiè' bönni' yudo' tu'chí'a tu'söróè' na', en gunné':

—Libí'ili', bócha'a. Ga ridxintè na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuè' Dios.

<sup>2</sup> Ní'irò Ananías, bixúz lo, gunná bé'enè' nupa nacua' cuita lè'è Pablo ila'gápè'è ru'è. <sup>3</sup> Pablo gudxè' lè':

—Lèzca' caní Dios ubi'è quiu', lí', rulufí'sö tsahui' cuinu'. ¿Naru' röö'cazu' ruchí'a rusöróu' neda' ca rinná bé' xibá, pero ridödi bëtso' ca rinná bé' xibá na', na' rinná bé'enu' ila'gápè'è neda'?

<sup>4</sup> Nupa nacua' ní' tè Pablo:

—¿Naru' rulidza zítso'-nè' bixúz lo queè' Dios?

<sup>5</sup> Pablo gudxè' légaquiè':

—Libí'ili', bócha'a. Nazúaj lu guichi, rnna: "Bití' ulidza zí'u nu rinná be'e bönachi uládz quiu'", pero neda' bití' gúquibe'eda' náquiè' bixúz lo.

<sup>6</sup> Ní'irò gúquibe'enè' Pablo bal-lè' nácagaquiè' bönni' yudo' saduceo, ate' ia'bal-lè' bönni' yudo' fariseo. Ní'irò bé'è zidzaj didza' lógacaquiè' bönni' yudo' tu'chí'a tu'söróè' na', gunné':

—¡Libí'ili', bócha'a! ¡Naca' bönni' fariseo, en naca' zxi'inè' tu bönni' fariseo! ¡Na'a ruchí'a rusörölí' neda' tu' runa' löza ulu'bán nupa chinátigaca!

<sup>7</sup> Cate' bé'è Pablo didza' ni, bila'ruájè' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzè'è la' légacasè'. <sup>8</sup> Caní gulunè' tu' ta'nné' bönni' saduceo na' bití' ulu'bán nupa chinátigaca, en bití' nacu'è gubáz lá'ayi, en bití' nacua' bö' náca-gaca caz bönachi, pero ta'yéajlè'è bönni' yudo' fariseo náca-gaca yúgu'tè lè ni. <sup>9</sup> Que lè ni na' gula'bódxí'è. Ní'irò gula'yasè' bönni' nazédagaquiè' xibá queè' Dios, yugu' bönni' yudo' fariseo, en gula'dil-la dídzè'è, ta'n-né':

—Rusáca'tu' queétu' bití' bi dö' nu'è bönni' ni. Channò tu bö' naca caz bönachi bé'len lè' didza', o channò tu gubáz lá'ayi queè' Dios bé'lenè' lè' didza', bití' ral-la' tá'bagaru'-nè' Dios.

<sup>10</sup> Cate' chita'díl-lada' dídzè'è bönni' judío na', gúdx-inè' bönni' lo na' rinná bé'enè' bönni' rójáquiè' gudil-la, tu' réquinè' ulu'zxuzxaj ulu'quínna'jè' Pablo. Ní'irò gunná bé'enè' bönni' rójáquiè' gudil-la tsöjléajgaquiè' Pablo ladaj bönni' judío na', en ulu'ché'è lè' lu yu'u zxön ga na' nagá'anagaquiè' bönni' na' rójáquiè' gudil-la.

<sup>11</sup> Cate' chinaca chí'i dzó'ölö la' dza ná'asö, buluí'i lahuè' Xanru' ga zoè' Pablo, en gudxè' lè':

—Butipa ládXu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzo Roma.

### Tun xtídza'gaquië' ilútië' Pablo

<sup>12</sup> Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nné' gunë' Dios légaquië' xíguia' channö cabí ilunë' lë na' gulún xtídza'gaquië', gula'nné' bití' ca' ilë'aj ilahuë' ga idxinrö chigulútië' Pablo. <sup>13</sup> Nayanrö ca choá'gaquië' bönni' na' gulún tsutsu xtídza'gaquië' caní. <sup>14</sup> Yöjáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nné':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Bití' gu'aj gágutu' ga gútrötu'-në' Pablo. <sup>15</sup> Na'a, lib'ili', en bönni' yudo' tu'chi'a tu'söröë', guli'guíë' bönni' lo rinná bé'enë' bönni' röjáquië' gudil-la idichë' Pablo cuxó para idxinë' ga nudúbili', innalí' ré'enili' inábili'-në' Pablo tu didza' gate ga ré'. Netu' cö'ö nistu'-në' la' nöza, ate' gútitu'-në' z'á'lo ca idxinë' ni.

<sup>16</sup> Biyónibi' bí'i bönni' queënu nigula zanë' Pablo ca na' ila'bó' nísie' Pablo, ate' guyéajbí', en guyú'ubi' yu'u zxön na', ate' yöjtíxjöi'ibi'-në' Pablo. <sup>17</sup> Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bí'i ni lahuë' bönni' lo, tu' nu'áabi' didza' guiébi'-në'.

<sup>18</sup> Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulidzë' Pablo, bönni' na' yu'ë lidxi guíë, neda', en gúta'yuë' lahua' idigu'a-bi' bí'i ni lo', tu' ré'enibi' gú'ilen-bi' lí' didza'.

<sup>19</sup> Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

<sup>20</sup> Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxó, para idxinë' lógaquië' bönni' yudo' tu'chi'a tu'söröë'. Ilë' lí' té'ennë' ila'nábinë' lë' tu didza' gate ga ré', <sup>21</sup> pero bití' tséajlë'u le ila'nné' tu' nadödi choá'gaquië' ila'bó' nísie' Pablo. Chigulún tsutsu xtídze'ë gula'nné' gunë' Dios légaquië' xíguia' channö cabí ilútië' lë'. Bití' bi ilë'aj ilahuë' ga idxinrö ilútië' lë'. Chizóagaquië' ta'bözë' sí' lu no'ö gunu' le ila'nábinë' lí'.

<sup>22</sup> Ní'irö bönni' lo na' rinná bé'enë' bönni' röjáquië' gudil-la gunná bé'enë'-bi' cuntu nu guiébi' lë na' chigúdxibi' lë', ate' ní'irö busól-lë'ë-bi' bí'i ni.

### Ridxinë' Pablo lahuë' Félix, bönni' rinná bë'ë luyú na'

<sup>23</sup> Ní'irö bönni' lo na' bulidzë' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' röjáquië' gudil-la ta'zë'e ní'agaquië', en tsónnalalaj yu' chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsöjáquië' yödzo Cesarea idú ridödi xtsö'.

<sup>24</sup> Lësca' gunná bé'enë' légaquië' ulu'cözë'-ba' tu böa' cuíë'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

<sup>25</sup> Gusól-lë'ë ca' tu guichi le rnna caní:

<sup>26</sup> “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios lí'.

<sup>27</sup> “Bönni' ni risól-la'a-në' quiu', gula'zönë' bönni' judío lë', en gulë'ennë' ilútië' lë'. Cate' gúquibe'eda' nababë' Roma, guchë'gaca'-në' bönni' röjáquië' gudil-la, en busólá'-në' lu ná'agaquië' judío na'. <sup>28</sup> Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'. <sup>29</sup> Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en bití' bi nabáguë'ë bönni' ni para nu guti lë', o nu cu'u lë' lidxi guíë. <sup>30</sup> Ní'irö cate' bidxín nu gudíxjöi' neda' ta'bó' nísie' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' lí', para ila'guíxjöi'inë' lí' bi didza' nápa-gaquië' lë'. ¡Dios gun tsáhuë'ë lí'!”

<sup>31</sup> Ní'irö bönni' na' röjáquië' gudil-la gula'guélë'ë Pablo, en gulunë' ca na' chigunná bé'enë' légaquië', ate' gula'ché'ë lë' yödzo Antípatris, ní' naca chí' dzó'ölö.

<sup>32</sup> Cate' za' rení' ia'tú dza bönni' röjáquië' gudil-la ta'zë'e ní'agaquië' yöjhuójgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzá-gagaquië' Pablo. <sup>33</sup> Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzej' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'. <sup>34</sup> Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, <sup>35</sup> gudxë' lë':

—Yónida' le innó' cate' ila'dxín ni nupa tu'zegui lí' didza'.

Ní'irö gunná bé'enë' ilún chí'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

### Pablo ru'ë didza' uláz queë' lahuë' Félix

**24** Cate' chibizá'a gayu' dza, bidxinë' Ananías, bixúz lo, ní', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazé'ede'enë' didza'. Bila'dxinë' lahuë' bönni' unná bë', ate' gula'nné' queë' Pablo. <sup>2</sup> Cate' chibulu'lidzë' Pablo, ate' bidxinë' ní', gusí lahuë' Tértulo ruzéguië' lë' didza', rnnë':

—Bönni' lo unná bë', Félix. Ní'a quiu' lí' ruzi'tu' xibé le run tsahui' netu', ate' lu yöl-la' réajni'í quiu' rinná bé'enu' dxí'a bönachi uládz queëtu'. <sup>3</sup> Yúgu'të lë ni ruzítica'stu' xibé gátitës, ate' idú ládxi'tu' rëtu' lí': “Xclenu'.” <sup>4</sup> Na'a, para cabí upíxjarötu' lí', ráta'yu'a' lo' gun zxön ládXu'u, yönnu' tu le do' guíëtu' lí'.

<sup>5</sup> Gúquibe'etu' bönni' ni rigú'u yól-lë'ë bönachi, en runë' ga ta'dábaguë'ë yúlahui' yugu' bönni' judío nacu'ë idútë yödžölió, en náquië' bönni' lo quégaquië' bönni' dá'gaquië' bönni' Nazaret na'. <sup>6</sup> Lësca' gú'unnë' gun dít-janë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'.

<sup>7</sup> Ní'irö Lisias, bönni' lo rinná bé'ené' bönni' röjáquié' gudil-la bidxiné' ga zóatu', en lu yöl-la' sínia' zxön bugüé' bönni' ni lu na'tu'. <sup>8</sup> Ní'irö gunná bé'ené' Lisias na' ídigaca nupa tu'zegui lé' didza' lo' li'. Na'a, li' caz, cate' rinabi yúdxinu'-né' Pablo ni, huáca inózinu' gate ga ré' yúgu'tè le ni ruzéguitu' lé' didza'.

<sup>9</sup> Lésca' caní gula'nné' yugu' bönni' judío ni', gula'nné' naca caz caní. <sup>10</sup> Ní'irö butásö në'e bönni' rinná bë'é uláz que Roma na' para gu'é didza' Pablo, ate' lé' bubi'é didza', gunné':

—Idú ládxa'a quíxjö'a ca naca le runa', tu' chinaca zían iz ruchí'a rusöröu' le raca quégaca bönachi ladztu'.

<sup>11</sup> Le bena' huáca inabu'. Biti' réquini chinnu dza bidxina' Jerusalén para tseaj ládxa'a-né' Dios. <sup>12</sup> Biti' yöjxá-ca'gaquié' neda' nu ridíl-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubé' tu'sédé' queé' Dios, en cabí lu yödzo. <sup>13</sup> Biti' ca' gaca ulu'béaj lié' yugu' lé' ni tu'zéguié' neda' didza'. <sup>14</sup> Lè ni rixóalépa' lo'. Ca runa' xichiné' Dios quégaquié' xuz xtó'otu' nalébi ca le tu'sédiné' légaquié', pero bönni' judío ni tu'é le: Le ridá'baga' Dios, tu' réajlè'a yúgu'tè le rinná bë' xibá queé' Dios, enca' yúgu'tè le bulu'zúajé' bönni' gulu'é didza' uláz queé' Dios. <sup>15</sup> Ca na' légaquié' tuné' löza Dios, lésca' neda' runa' löza Dios, usubané' nupa chinátigaca, bönachi tsahui', en bönachi bití' nácagaca tsahui'. <sup>16</sup> Que le ni na' ru'í ládxi'tica'sa' cabí ibága'a le gun ga uxós ládxi'da'ahua' neda' lahué' Dios o lógaca bönachi.

<sup>17</sup> Gudödi zoa' ga yúbölö idú chopa tsonna iz, budxina' ga nacua' bönachi uládz quia' para unödza' dumí le gácalen bönachi yechi', en unödza' le rigua' lahué' Dios. <sup>18</sup> Tsanni ni' runa' caní, bal-lé' bönni' judío narúajgaquié' luyú Asia bidixáca'gaquié' neda'. Ni' zoa' lö'a yudo', nubéaj dxí'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. <sup>19</sup> Yugu' bönni' judío ni' ral-la' ila'dxiné' lo' li', en ulu'zéguié' neda' didza' channö nápaqaquié' neda' didza'. <sup>20</sup> Ila'nnátsöquié' bönni' judío ni channö bulu'dzóliné' bi le cabí naca dxí'a bena' cate' ni' bidxina' lógaquié' bönni' yudo' tu'chi'a tu'söröé' légaquié'. <sup>21</sup> Tuz cate' ni' zoa' lógaquié', bë'a zidzaj didza', gunnía': "Ruchí'a rusöröli' neda' na'a tu' runa' löza ulu'bán nupa chinátigaca."

<sup>22</sup> Cate' biyönné' Félix didza' ni, en dxí'ado' chinóziné' ca naca que le na' rusédiné' Pablo, buzé láchui'sé' ca' didza' bizxaj ni, gunné':

—Cati' idxiné' Lisias, bönni' lo rinná bé'ené' bönni' röjáquié' gudil-la, údxi yónida' ca naca didza' bizxaj queé'li'.

<sup>23</sup> Ní'irö Félix gunná bé'ené' tu bönni' nacué' lu në'é bönni' röjáquié' gudil-la zoé' ni', gun chí'é Pablo, pero gu'é lé' lataj té' lö'a, en bití' uzágué'é xinózgaquié' böchi' luzé'é duyúgaquié' lé' bi dxin iluné' queé'.

<sup>24</sup> Chopa tsonna dza gudzé, bidé' leyúbölö Félix na'. Drusila, nigula queé' dzáganu lé'. Nácanu nigula judío. Félix bulidzé' Pablo, ate' buzé náguié' xtídzé'é ca naca le réajlè'èru' Jesucristo. <sup>25</sup> Cate' bë'é didza' Pablo ca ral-la' gácaru' tsahui', en inná be'e cuinru', ate' idxinru' ga

uchi'a usöröé' Dios ré'u dza sí' za', ní'irö gudxi bidzóbiné' Félix, en gudxé' Pablo:

—Guyéaj na'a. Cate' gapa' lataj ulidza' li'.

<sup>26</sup> Lésca' gú'unné' Félix sí'é dumí le unödzejé' Pablo lé' para usané' lé', ate' que le ni na', zían luzuí bulidzé' Pablo, en bé'lené' lé' didza'. <sup>27</sup> Cate' bizá'a chopa iz guyázié' Porcio Festo xilatjé' Félix, ate' tu' gú'unné' Félix guné' le tsaza ládxi'gaquié' bönni' judío, bucá'ané' Pablo nadzuné' lidxi guié'.

**Ridxiné' Pablo lahué' Festo, bönni' unná bë'**

**25** Bidxiné' Festo yödzo Cesarea para tsázié' xilatjé', gáquié' bönni' unná bë' ulaz que Roma. Cate' bizá'a tsonna dza buzé'é yödzo na', sa'yéajé' Jerusalén. <sup>2</sup> Cate' bidxiné' Festo ni' yugu' bixúz unná bë', en yugu' bönni' lo quégaca bönachi judío bila'dxiné' lahué' para ila'nné' queé' Pablo, ate' guláta'yué' lahué' Festo <sup>3</sup> bi uzá ládxi'é quégaquié', isól-lé'é nupa tsöjxí'gaca Pablo, para udxiné' Jerusalén. Gulé'enné' ila'bó' nísiié' lé' la' nöza para ilútié' lé'. <sup>4</sup> Bubi'é didza' Festo, gudxé' légaquié':

—Lu yödzo Cesarea nadzuné' Pablo, ate' ral-la' tseja' ni' cuxó huidzaj nisö. <sup>5</sup> Que le ni na', nútí'tésölöli' dè lu ná'alí', ral-la' sá'lenli' neda', en channö nabágué'é bönni' ni' xíguia', huáca uzéguié' né' didza' ni'.

<sup>6</sup> Gudzené' Festo Jerusalén idú ca xunu' gubidza, ate' ní'irö bóajé' Cesarea. Cate' guzá' rení' ia'tú dza gurö'é ga ruchí'a rusöröé', en gunná bé'ené' nupa tsöjxí'gaca Pablo. <sup>7</sup> Cate' chibidxiné' Pablo ni', yugu' bönni' judío narúajgaquié' Jerusalén gula'gu'é lé' lé'alö, en zían le gula'nné' queé'. Bulu'zéguié' lé' le tu'subágué'é lé' xíguia', pero bití' guca ulu'béaj lié' yugu' lé' na' gula'nné' queé'. <sup>8</sup> Ní'irö bë'é didza' Pablo uláz queé', gunné':

—Bití' bi le ruá' dö' bena' que xibá quégaquié' bönni' judío, en cabí que yudo' quégaquié', en cabí queé' César, bönni' Roma, rinná bé'ené' ré'u.

<sup>9</sup> Gú'unné' Festo guné' le ila'yaza ládxi'gaquié' bönni' judío, ate' bubi'é didza', gudxé' Pablo:

—Z'Ré'ènu' so'o Jerusalén, ga na' soa nu uchi'a usörö li' ca nácagaca le ni ta'nné' quiu'?

<sup>10</sup> Bubi'é didza' Pablo, gudxé' lé':

—Zoa caza' ga rö'ö nu ruchí'a rusörö uláz queé' César, ga na' ral-la' uchi'a usöröu' neda'. Bití' bi huiá' dö' nuna' quégaquié' bönni' judío, ate' chinóz quézinu' lé' ni. <sup>11</sup> La'tu' nuna' tu le ruá' dö', o bítí'tés le run ga ibá-ga'a xíguia' gátia', bití' tá'baga'a gátia'. Na'a, channö cabí nuna' ca ta'nné' quia' bönni' ni, cuntu caz nu dè lu në'e udödi neda' lu ná'agaquié'. Rinaba' tseja' lahué' César ga udxí'a uró quia'.

<sup>12</sup> Cate' Festo chibé'lené' yugu' bönni' yúlahui' didza', bubi'é didza', gudxé' Pablo:

—Chigunábu' tseju' lahué' César. Lahué' César uyiju'.

**Ru'é didza' Pablo lahué' Agripa, bönni' unná bë'**

<sup>13</sup> Gudödi chopa tsonna dza, bidxiné' Agripa, bönni' rinná bë'é lu yödzo Cesarea, dzáganu Berenice lé', duyúgaquié' Festo. <sup>14</sup> Cate' chigula'cu'é ni' zían dza,

Festo buluíné' Agripa, bönni' rinná bē'ē, ca naca queē' Pablo. Gudxē' lē':

—Zoē' tu bönni' ni bucá'anē' Félix lē' lidxi guíē.

<sup>15</sup> Cate' guzóa' Jerusalén, yugu' bixúz unná bē', en bönni' gula tu'zéajni'iné', bila'dxiné' lahua', ate' gula'nné' queē' bönni' ni. Gula'nábiné' neda' ichuga' queē' gátie'.

<sup>16</sup> Neda' bubí'a didza', gudxa' légaquié' bití' nalébiguequiné' bönni' Roma ila'chúguie' queē' tu bönni' gátie' channó cabí ila'dxini lahué' nupa tu'zegui lē' didza', para gaca ubi'é didza' ca naca lē' na' ta'nné' queē'.

<sup>17</sup> Que lē' ni na', cate' bila'dxiné' légaquié' ni, bití' ca' gudzedá', pero cate' guzá' guyaní' ia'tú dza guró'a ga ruchí'a rusó'ó'a, ate' gunná bé'eda' nupa yöjxí'gaca bönni' ni. <sup>18</sup> Cate' gula'cu'é ni bönni' na' tu'zéguie' lē' didza', bití' bi gula'nné' queē' ca busaca' quia' ila'nné'.

<sup>19</sup> Gula'nné' queē' bal-la didza' bizxaj ca naca le ta'yéajl'é Dios, en ca naca queē' tu bönni' lē' Jesús, nu na' guti, pero Pablo runé' tsetu xtídzé'ē rnné' ni zoé' nabané' leyúbölö. <sup>20</sup> Tu' buchíxida' ca nácagaca lē' ni, gunábida'-né' Pablo channó ré'éné' tsejé' Jerusalén, ga ní' soa nu uchi'a usó'ó' lē' ca nácagaca lē' ni. <sup>21</sup> Ní'irö cate' gunabé' Pablo tsejé' lahué' Augusto César para uchi'a usó'ó' lē' ní', gunná bé'eda' bönni' röjáquié' gudil-la ilún chí'igaré' lē' cate' gála'rö dza isól-la'a-né' lahué' César.

<sup>22</sup> Ní'irö Agripa gudxé' Festo na':

—Lēzca' neda' ré'ēnda' yónida' le inné' bönni' na'.

Festo gudxé' lē':

—Cuxó yönnu' le inné'.

<sup>23</sup> Cate' za' rení' ia'tú dza, len ba zxön bila'dxiné' Agripa, en Berenice ní'. Gula'yázié' ga ral-la' ilu'é didza', dzágagaquié' légaquié' bönni' unná bē', ate' gula'sóll'é nupa tsöjxí'gaca Pablo. <sup>24</sup> Ní'irö Festo gudxé' Agripa, bönni' unná bē':

—Bönni' unná bē', Agripa, en yúgu'téli' zóali' ni tsözxón len netu'. Ni zoé' rilé'eli'-né' bönni' na', ta'nné' queē' yúgu'tē bönni' judío nacu'é Jerusalén, enca' nupa nacuá' ni, tē' neda' ral-la' gátie'. <sup>25</sup> Runi neda' bití' bi bené' le nabágué'ē xíguia' gátie', pero tu' gunabé' lē' cazé' tsejé' ga uchi'a usó'ó' Augusto César lē', que lē' ni na' chinuna' quia' isól-la'a-né' lahué' Augusto. <sup>26</sup> Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu nē'ē César, xana', que lē' ni na' naché'a-né' lolí', en le nácarö lo, naché'a-né' lo' lí', Agripa, bönni' unná bē', para cate' údxi rinábini yudxu'-né', ní'irö inözda' bi ral-la' uzúaja' lu guichi ca naca queē' bönni' ni. <sup>27</sup> Réquida' bití' naca dxí'a isól-la'a-né' nu bönni' nágué'ē ní' channó cabí gaca ulu'a le nabágué'ē.

**Didza' bē'ē Pablo uláz queē' lahué' Agripa, bönni' unná bē'**

**26** Ní'irö Agripa gudxé' Pablo:

—Dē lataj gu'u didza' uláz quiu'.

Buchila nē'ē Pablo lahué' Agripa, ate' gusí lahué' ru'é didza', rnné':

<sup>2</sup>—Bönni' unná bē', Agripa. Raza ládxa'a tu' dē lataj na'a gu'a didza' uláz quia' lo' lí' ca naca yúgu'tē le tu'zéguie' bönni' judío neda' didza'. <sup>3</sup> Raza ládxi'ra' tu'

núnbē'u yúgu'tē le nalébiguequiné' tuné' bönni' judío, enca' yugu' lē' ni ridíl-latu' didza'.

### Yugu' le bené' Pablo z'fatelö

<sup>4</sup> Gunné' ca' Pablo:

—Nó'zguequi quéziné' yúgu'tē bönni' judío ca na' bena' ga gudéla'tē cuidia' ga nacuá' bönachi uládz quia', enca' lu yödzö Jerusalén. <sup>5</sup> Nó'zguequi quéziné' ca', en huáca ila'guíxjö'ē ca na' bena' dza ní'te. Guca' bönni' fariseo. Yugu' bönni' fariseo tu'í ládxi'gacaré' ila'yéaj ládxi'gaquié' Dios ca tuné' ia'z'ca'rē' bönni' judío. <sup>6</sup> Na'a, zoa' ni lolí' para nu uchi'a usó'ó' neda' tu' runa' löza Dios, usubané' bönni' nati, en guné' ca na' guzxí' lu nē'ē lógaquié' xuz xtó'otu'. <sup>7</sup> Tuné' löza yugu' bönni' idxinnu cö' dí'a dza queétu' ila'déliné' lē' na' guzxí' lu nē'ē Dios. Que lē' ni na' ta'yéaj ládxi'gaquié' Dios, en tuné' xichiné' rēla, en tē dza. Tu' runa' löza lē' ni, nuzéguigaquié' bönni' judío neda'. Caní naca, bönni' unná bē', Agripa. <sup>8</sup> Na'a, ¿naru' réquitseli' libí'ili' bití' naca le tséajl'é'ru', usubané' Dios bönni' nati?

### Pablo gudxía ládxi'ē bönachi queē' Cristo

<sup>9</sup> Gunné' ca' Pablo:

—Lēzca' neda', z'fatelö gúquida' le zían ral-la' guna', tá'baga'a-né' Jesús, bönni' Nazaret. <sup>10</sup> Caní bena' lu yödzö Jerusalén. Gulu'a zían bönachi ta'yéajl'é Jesús lidxi guíē, tu' bulu'dödé' yugu' bixúz unná bē' lu na'a yöl-la' unná bē'. Cate' gulútié' bönachi ní', bénlena' légaquié' tuz didza'. <sup>11</sup> Zían luzuí busaca' z'í'a yugu' bönni' ní' para ulu'sán ládxi'gaquié' ca ta'yéajl'é Cristo. Caní bena' gapa naca lu yu'u ga tu'dubé' bönni' judío, en tu'sédé' queē' Dios. Guléde'eda' légaquié', ate' gudxía ládxa'a légaquié' ga bidxinté' guyija' gapa nacuá' yödzö z'í'tu' para tsöjxöngaca'-né'.

### Riguíxjö'ē Pablo ca böáquié' queē' Cristo

<sup>12</sup> Gunné' ca' Pablo:

—Para guna' caní guyija' yödzö Damasco, ate' bixúz unná bē' nasól-la'gaquié' neda' nudódigaquié' lu na'a yöl-la' unná bē'. <sup>13</sup> Caní guca, bönni' unná bē', Agripa. Cate' ní' sa'yija' la' nöza, ní' naca idú huagubidza, bilé'eda' tu bení' lúxiba le buzení'rö ca gubidza. Buzení' ga na' zoa', en ga nacuá' nupa söjácálen neda'.

<sup>14</sup> Ní'irö yúgu'tétu' gudzó'ötu' lu yu, ate' biyönda' chí'í nu bulidza neda'. Bē'ē didza' hebreo, gunné': "Saulo, Saulo, ¿bizx que ribía ládxi'u neda'? Run z'í' cuinu', ridá'bagu'u neda'. Raca quiu' ca raca queéba' bēdxi, run z'í' cuinba', richégu'ba' yaga tuchi' le túndé'ē-ba' z'í'."

<sup>15</sup> Ní'irö gudxa'-né': "¿Nuzxi lí', Xan?" Xanru' gudxé' neda': "Neda' ni Jesús, Nu na' ribía ládxi'u." <sup>16</sup> Na'a, guyasa, en guzuí, tu' bulu'í lahua' lí' na'a, para uzó'a lí' gunu' xichina', en gunu' ba nalí que lē' ni chibilé'enu', enca' quégaca le uluí'ida' lí', uluí' lahua' ga zu'. <sup>17</sup> Usólá' lí' lu ná'agaquié' bönni' uládz quiu', en lu ná'agaquié' bönni' izá'a, lógaca nupa ní' risól-la'a lí' na'a. <sup>18</sup> Risól-la'a lí' ga na' nacu'é para gunu' ga ulu'huó'alaj guió'j lógaquié', en ulu'huó'áquié' queē' Dios, en ulu'cá'ané' le



naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'è Dios. Chan-nö ila'yéajlë'è neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

#### Benë' Pablo ca naca le buluí'në' Xanru' lë'

<sup>19</sup> Gunné' ca' Pablo:

—Qui lë ni na', bönni' unná bë', Agripa, bití' gudá'ba-ga'a guna' le buluí'në' Dios, zoë' yehua' yubá, neda'.  
<sup>20</sup> Buzéajni'ida' nupa nacua' yödzö Damasco, en gudödi ni' nupa nacua' Jerusalén, en nupa nacua' luyú Judea, en bönachi yugu' yödzö zítu' para ulu'bí'i ládxi'gaca, en ulu'huöaca queë' Dios, en ilún le ilaca bë' chibulu'bí'i ládxi'gaca. <sup>21</sup> Tu' bena' caní, yugu' bönni' judío gu-la'zönë' neda' cate' ni' zoa' lö'a yudo', en gulé'ennë' ilútië' neda'. <sup>22</sup> Ní'irö gúcalenë' Dios neda', ate' ga ridx-intë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. <sup>23</sup> Gula'nnë': "Qui'i sáque'è Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

#### Pablo ruzéajni'inë' Agripa para tséajlë'è Cristo

<sup>24</sup> Cate' chibë'è Pablo yugu' didza' ni, le bë'è uláz queë', ní'irö bë'è zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

<sup>25</sup> Ní'irö Pablo gudxë' lë':

—Bití' nachixi icja', rea' lí', Festo, ate' didza' ni ruá'a naca idútë li, en naca lesaca'. <sup>26</sup> Lë cazë' Agripa, bönni' ni rinná bë'è, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. <sup>27</sup> Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

<sup>28</sup> Ní'irö Agripa gudxë' Pablo:

—Ia'látisö la' réquinu' idéli'nu' neda' para gaca' queë' Cristo.

<sup>29</sup> Pablo gudxë' lë':

—Ní'a queë' Xanru' Dios ré'ënda', sal-la' ia'látisö o yenni', calé'gasö lí', pero lësca' yúgu'të nupa ni ta'yöni neda', gácalí' idú ca naca' neda', néquida' queë' Cristo, pero calëga gága'li' du guié ca ni nága'a neda'.

<sup>30</sup> Cate' budxi bë'è Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'è, en Berenice, en nupa ró'lengaca légaquië'. <sup>31</sup> Cate' bi-la'rúajë' quez, gulu'í' xtídza'gaquië', ta'nnë':

—Bití' bi nunë' bönni' ni le nabáguë'è xíguia' gátië', en calëga tsázië' lidxi guié.

<sup>32</sup> Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchí'a usöröë' lë'.

#### Ta'sól-lë'è Pablo yödzö Roma

<sup>27</sup> Cate' chigulunë' quégaquië' ila'sól-lë'è netu' lë'e barco para tséajtu' yödzö Roma, luyú Italia, gu-la'guélë'è Pablo, en ia'bal-lë' nupa nadzúngaca, ate' bulu'dödë' légaquië' lu në'è Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la. <sup>2</sup> Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguie' netu'. <sup>3</sup> Cate' za' rení' ia'tú dza, bidxintu' yödzö Sidón, ate' ni Julio, bönni' na' rinná bé'enë' bönni' rójáquië' gudil-la, lu yöl-la' dxí'i ládxi' queë', bë'è Pablo lataj tsejë' ga nacu'ë böchi' luzé'è para ilácalenë' lë' bi riyadzaj queë'.

<sup>4</sup> Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'.

<sup>5</sup> Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

<sup>6</sup> Bönni' na' rinná bé'enë' bönni' rójáquië' gudil-la, en naché'è netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'. <sup>7</sup> Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'. <sup>8</sup> Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

<sup>9</sup> Tu' chigudzéda'atu', chigula' zoa bönadxi gaca ditaj bítitës barco rizá' lu nísado' na', tu' chigudödi yugu' dza tunë' gubasa cate' sí' idxín beo' ziaga cate' récjada' bö'. Que lë ni na' Pablo buzéajni'inë' légaquië', <sup>10</sup> rnnë':

—Libí'ili', bönni', réquibe'eda' ga tseaj barco ni, huazöa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

<sup>11</sup> Bönni' na', rinná bé'enë' bönni' rójáquië' gudil-la, guyéajlë'erë' le gula'nnë' bönni' na' dë lu në'è barco, en bönni' xan caz, ca le gunné' Pablo. <sup>12</sup> Tu' cabí naca dxí'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biquí' yúgu'të bönni' nacu'ë lë'e barco na' gulún tuz xtídza'gaquië' ulu'z'é'è ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ennë' ulu'gá'anë' ni' yugu' beo' ziaga.

#### Recja bö' budunu' lu nísado'

<sup>13</sup> Tu' recja tu bö'do' le za' saca' tsölá'a ga ridödi gudidza beo' ziaga, téquinë' chiraca ilunë' ca té'ennë', ate' bulu'lisë' guié zí'i naga' du guié le ruzöa dxisö barco, ate' gudödi barco na' gala' ra' luyú bidxi na' nazí'i le Creta. <sup>14</sup> Ia'tú chí'isö ca', guyecja tu bö' budunu' za' lo

tu', nazí'i le Euroclidón. <sup>15</sup> Tu' ruzéaj bö' na' recja barco na' tsölál'aló, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. <sup>16</sup> Cate' gudödi barco na' ga bidxintu' tsölála tu luyú bídrido' nazí'i le Cauda, tsölála ni' ga bití' récjada' bö', lu yöl-la' rizáca'sö buchíatu' bárcodo' ná'ayöj barco zxon na' yú'utu'. <sup>17</sup> Gudödi burentu' le lahui barco zxon na', ní'irö béga'ratu' barco zxon na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. <sup>18</sup> Cate' za' rení' ia'tú dza, en ní' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. <sup>19</sup> Dza bunny, len na' cuintu' gurú'unatu' le tun dxin que barco na' lu nísado'. <sup>20</sup> Cate' chiguca zían dza bití' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bití'rö runtu' löza ulatu'.

<sup>21</sup> Tu' chiguca zían dza bití' nágotu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzé nágalí' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni. <sup>22</sup> Na'a, rea' libí'ili': Tsutsu guli'gún ládxí'li', tu' cabí gátíli' nitulí' libí'ili' tscali' zóali' ni, sal-la' gaca ditaj barco ni. <sup>23</sup> Caní gaca tu' budulu'í'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. <sup>24</sup> Gubáz lá'ayi na' gudxë' neda', gunné': "Pablo, bití' gádxinu'. Run bayudxi idxinu' lahuë' César. Tu' nadxí'inë' Dios lí', usölé' yúgu'të bönachi nacua'len lí' lë'e barco ni." <sup>25</sup> Que lë ni na', tsutsu guli'gún ládxí'li', tu' ruzxöni ládxá'a-në' Dios, gaca ca na' chigudxë' gubáz lá'ayi queë' neda'. <sup>26</sup> Caní gaca sal-la' run bayudxi gaca ditaj barco ni tu luyú bídrido', ga ní' tsöjca'ana rë'u.

<sup>27</sup> Cate' ní' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. <sup>28</sup> Gula'ru'unë' du lu nísado' na', ate' gula'nózinë' galaj ösa naca ga bidxintë ga rë' lu nisa. Cate' gudödi barco na' ia'látí'do', gula'ru'unë' du na' leyúbölö, en gula'nózinë' chinaca chinu ösa. <sup>29</sup> Tu' guládxinë' tsöjdxín barco na' lu guió'j, que lë ni na', tsölála láhuilö que barco gula'ru'unë' lu nísado' tapa guië zí'i nága'gaca du guië le tu'zóa dxisö barco lu nisa. Lu yöl-la' ruúbi ruguí'isö ládxí'do'gaquië' gula'bözë' tsení'. <sup>30</sup> Ní'irö gulé'ënnë' bönni' tunë' dxin lu barco ulu'zxúnnajë' lë'e barco na'. Bulu'zötjë' bárcodo' na' dë lahui barco zxon na' lu nísado'. Gulunë' ca té'ënnë' ilu'ë ia'lati' zítu' guië zí'i na' naga' du guië le ruzóa dxisö barco na', le zoa saca' tsölála láhuilö. <sup>31</sup> Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxón len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, bití' gaca uláli'.

<sup>32</sup> Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

<sup>33</sup> Cate' chizá' rení', Pablo gúta'yüë' lögaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runlí' gubasa, bití' bi náguli'. <sup>34</sup> Que lë ni na', ráta'yua' loli' gágulí' para huóaca ládxí'li', tu' cabí gátíli' nitulí' libí'ili'.

<sup>35</sup> Cate' Pablo budxi bé'ë didza' ni, gudélë'ë yöta xtila, en gudxë' Dios: "Xclenu'." Caní benë' lögaquië' yúgu'të'. Ní'irö buzuzxjë' yöta xtila na', en gusí lahuë' rahuë'.

<sup>36</sup> Ní'irö bila'dipa ládxí'gaquië' yúgu'të', en gulahuë'.

<sup>37</sup> Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chixzópatu'. <sup>38</sup> Gudödi gulahuë', en bulu'huóljanë', ní'irö gula'ru'unë' xzoa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

### Raca ditaj barco lu nísado'

<sup>39</sup> Cate' chiguca lahui' dza, yugu' bönni' tunë' dxin lu barco na' bití' bulu'únbë'ë luyú na'. Bila'lé'enë' ga röjrö' nisa zxon na' gatsaj láhui'lö luyú bidxi na', en dë lataj ní' ga naca lachí' ra' nísado'. Gulé'ënnë' ilunë' ga tsaza barco na' ga ní'. <sup>40</sup> Ní'irö bulu'sedxë' yugu' du guië ná-ga'gaca yugu' guië zí'i tu'zóa dxisö barco na', en bulu'sané' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölála láhuilö barco na', ate' ní'irö gusí lo ridödi barco saca' ga röjrö' nísado' gatsaj láhui'lö luyú bidxi na'. <sup>41</sup> Cate' bídrixín barco na' tu lataj ga ridzaga chopa nisa, ní' binídxí' tsölála láhuilö barco na' lu yuzxi lu nísado' na', ate' bugá'anasö barco na' ga ní'. Bítí'rö guca bi utá le, ate' tsölála cúdz-i'lö barco na', gusí lo riguitsaj nísado' na' le, len yöl-la' rizá' que. <sup>42</sup> Ní'irö bönni' röjáquië' gudil-la gulé'ënnë' ilútië' bönni' nadzúngaquië', para cabí ila'zxúnnajë', ila'zxöë' lu nisa na'. <sup>43</sup> Bönni' na' rinná bé'enë' bönni' na' röjáquië' gudil-la gú'unnë' usölé' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxöë' lu nisa, zí'alö légaquië' ila'yázië' lu nisa para ila'dxinë' luyú bidxi. <sup>44</sup> Gunná bé'enë' ca' yugu' bönni' nagá'ana-gaquië' ila'zxöë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lé' yúgu'të'. Canísö bila'dxinë' luyú bidxi na'.

### Le benë' Pablo luyú bidxi nazí'i le Malta

**28** Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. <sup>2</sup> Bönni' xidza' nacué' luyú bidxi na' lu yöl-la' dxí'i ladxi' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guió'j, en runda' zia-ga. <sup>3</sup> Ní'irö Pablo gúchë'ë tu tsölén huága zxisi bídrido', en cate' gulu'ë le lu guí, birúajba' tuba' bëla sínia' lë'e huágado', rizúnnajba' bóchila que guí na', ate' yöjtí'iniba' yen në'ë Pablo. <sup>4</sup> Cate' bönni' xidza' na' bila'lé'enë' bëla na', nála'ba' yen në'ë Pablo, gulé' tuë' ia'túë':

—Le nácatë bönni' ni náquië' nu ruti bönachi. Sal-la' bulé' lu nísado', dios queëru' lë' Tshui' bití' ru'ë lë' lataj soë' ibanë'.

<sup>5</sup> Gudxibi nëë Pablo, en busládzu'ë-ba' bëla sínia' na'. Yöjxóatëba' lu guí', ate' lë' bití' bi guca queë'. <sup>6</sup> Bönní' xidza' nacu'ë ní' tu'yúé' Pablo, bátacalö cö'ë gui, o tsó'otë' gátie'. Ní'irö cate' chigudzé ta'bözë', en bila'lé'enë' bití' bi raca queë', ia'tú le guléquinë', ate' gula'nnë' naca cazë' tu dios.

<sup>7</sup> Lataj ní'isö dë xiyúë' Publio, bönní' lo que luyú bidxi na', ate' bönní' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. <sup>8</sup> Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóa nëë bönní' huë' na', en bunë' lë'. <sup>9</sup> Tu' benë' Pablo lë ni, lësca' bila'dxín nupa te'e ga zoë', nacua' luyú bidxi ní', en bulu'huóaqië'. <sup>10</sup> Yugu' bönní' ni gulunë' netu' bal, en zían le gulunë' queëtu'. Cate' chizóa uzá'atu' luyú ní', bulu'nödzjë' yugu' le naquínitu' queëtu'.

### Ridxinë' Pablo lu yödzö Roma

<sup>11</sup> Cate' chiguca tsonna beo' zóatu' ní', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidí' quégaca bönachi Alejandría na'. <sup>12</sup> Buzá'a barco na' ga ní', ate' bidxín yödzö Siracusa, ga ní' bugá'anatu' tsonna dza. <sup>13</sup> Buzá'atu' ní', ate' gudóditu' tsölá'alö luyú ní', en bidxintu' yödzö Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ní', ate' dza buropi na' bidxintëtu' yödzö Puteoli luyú Italia. <sup>14</sup> Lu yödzö na' yöjxáca'tu' yugu' bóchí'ru' ta'yéajlë'ë Cristo, ate' gulá'tayuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ní' para tséajtu' yödzö Roma, rizë'e ní'atu'. <sup>15</sup> Chibila'yönnë' bóchí'ru' nacu'ë Roma chizóa idxintu' ní', ate' bila'rúajë' idixí'gala'gaquië' netu'. Bila'dxinë' tu yödzödo' nazí' le Yé'ëyi Que Apio. Ia'bal-lë' bila'dxinë' tu lataj nazí' le Tsonna Yu'u Quégaquië' Bönní' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

<sup>16</sup> Cate' bidxintu' Roma, bönní' na' rinná bé'enë' bönní' röjáquië' gudil-la, guchë'ë bönní' na' nadzúngaquië', ate' budödë' légaquië' lu nëë tu bönní' lo rinná bé'enë' bönní' röjáquië' gudil-la, ate' bë'ë Pablo lataj soë' queézë', zóalenë' lë' tu bönní' rejë' gudil-la ruyúë' lë'.

### Runë' Pablo libán lu yödzö Roma

<sup>17</sup> Cate' chigudödi tsonna dza, bulidzë' Pablo yugu' bönní' lo quégaquië' bönní' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ilí', bócha'a, sal-la' bití' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönní' judío nacu'ë

Jerusalén bulu'dödë' neda' lu ná'agaquië' bönní' Roma nacu'ë Jerusalén, ate' bulu'sayjë' neda' lidxi guíë.

<sup>18</sup> Ní'irö cate' chigula'nabi yúdxinë' neda' bönní' Roma, gulé'ënnë' ulu'sanë' neda', tu' gulé'quibe'enë' bití' nabá'ga'a xíguia' gátia'. <sup>19</sup> Yugu' bönní' judío ní' gula'dá'báguë'ë nupa na' gulé'ëni ulu'sán neda', ate' ben bayudxi gunaba' tseja' lahuë' César ga uchí'a usöröë' neda', en calëga para uzé'guia' bönachi uládz queëru' didza'. <sup>20</sup> Que lë ni na' bulidza' libí'ilí' para ilé'eda' libí'ilí', en gü'ílena' libí'ilí' didza', tu' ná'ga'a du guíë ni tu' runa' löza le runru' löza rë'u, bönachi Israel, gácatë lë na' guzxí' lu nëë Dios gata' queëru'.

<sup>21</sup> Ní'irö légaquië' gulé' Pablo:

—Bití' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca bóchí'ru' judío, nu usiyöni netu' channö nu bi rnnë quiu' le ruá' dö'. <sup>22</sup> Na'a, ré'ënitú' yónitu' xtídzu' lu, lë na' riguinnaj icju', tu' chinó'zitu' ta'nnë bönachi yúgu'të lataj quégaca nupa nazí' lu né'eguequi xibá cubi ni.

<sup>23</sup> Caní' guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zíladó', ate' ní' gúl-lí'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'í'inë' légaquië' naca idútë li libán runë' queë' Jesús. Para gunë' caní' bugunë' dxin le rinná bë' xibá queë' Moisés, enca' le gula'nnë' bönní' gulu'ë didza' uláz queë' Dios. <sup>24</sup> Bal-lë' gula'zí' lu ná'agaquië' didza' bë'ë Pablo, pero ia'bal-lë' bití' ca' gula'yéajlë'ë. <sup>25</sup> Tu' bila'rúajë' choplö, gula'sí lógaquië' tu'zë'ë ní', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunné' Isaías, bönní' bë'ë didza' uláz queë' Dios, ca na' buzéajni'inë' xuz xtó'oru', gunné':

<sup>26</sup> Guyéaj lógaca bönachi ní', yöjödxi légaquië':

Yöni nágali', pero bití' tséajni'ilí'.

Uyulí' iná'alí', pero bití' ilé'elí'.

<sup>27</sup> Yugu' bönní' ni chinazidi icja ládxí'do'gaquië', en bití' bi riyaza icja nágagaquië'.

Gulunë' ca tun nupa nachul-la guíój lóguequi

para cabí ila'lé'e len guíój lóguequi,

en cabí ila'yöni nágaguequi

para cabí ulu'zéajni'í ládxí'guequi,

en cabí ilé'ëni ulu'huóaca queë' Dios

para gaca una' léguequi.

<sup>28</sup> Na'a, ral-la' inózilí' lë ni. Dios risól-lë'ë netu' lógaca bönachi izá'a para ulu'lágaca, ate' légaquië' ila'yönnë'.

<sup>29</sup> Cate' Pablo budxi bë'ë didza' ni, bila'rúajë' bönní' judío, ta'díl-lada' dídzë'ë la' légacasë'.

<sup>30</sup> Idú chopa iz bugá'anë' Pablo ní', zoë' tu lu yu'u ga na' riguizxjë', ate' benë' bal yúgu'të nupa buduyógaca Lë'. <sup>31</sup> Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesu-cristo, ate' cuntu nu buzaga' xinözë'. ¡Ca' naca!

# Romanos

**Pablo rugapë' Dios bönachi queë' Cristo nacu'ë Roma**

**1** Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxí'a queë'.

<sup>2</sup> Dza ni'te guzxi' lu në'ë Dios isó'l-lë'ë didza' dxí'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. <sup>3</sup> Bulu'zúajë' lu guichi yúgu'të le ral-la' gunë' Zxí'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, <sup>4</sup> pero ca naca bö' naca cazë', le naca lá'ayi, naca bë' náquië' Zxí'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. <sup>5</sup> Ni'a que le benë' Jesucristo ruzí'iru' xibë le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzülió Lë', en ilún ca rna xtídzë'ë. <sup>6</sup> Bít'sa'li' libí'ili' ládjagaca bönachi yödzülió na', pero na'a nulidzë' Dios libí'ili' para guéquili' queë' Jesucristo.

<sup>7</sup> Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queéli' le ruzá' ládxe'ë queëru', en le ribequi dxi ládxi'ru'.

**Ré'enë' Pablo tsöjyúë' bönachi queë' Cristo nacu'ë Roma**

<sup>8</sup> Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queéli' yúgu'tëli', ate' ta'guixjö' bönachi idútë yödzülió ca réajlë'ëli' Jesucristo. <sup>9</sup> Idú ládxa'a runa' xichinë' Dios, runa' libán que didza' dxí'a ca naca queë' Zxí'inë'. Nózinë' Dios rulídzatica'sa'-në', en rinábida'-në' gaca tsahui' queéli'. <sup>10</sup> Rinábitica'sida' Dios, channö naca le ré'enë' Lë', gunnë' neda' lataj uduyúa' libí'ili'. <sup>11</sup> Caní rinábida'-në' tu' raca ládxa'a ilé'eda' libí'ili' para gaca guna' ga gata' queéli' tu le unödzejë' Dios Bö' Lá'ayi queéli', le gun ga gácali' tsutsu. <sup>12</sup> Lë na' ré'enda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

<sup>13</sup> Böchi' luzá'ado', ré'enda' inózili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Ré'enda' guída' ga zóali' para guna' ga uzí'ili' xibë libán na' runa', ca na' tu'zí' xibë ia'bal-la bönachi yödzülió ni. <sup>14</sup> Dë le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni', en quégaca bönachi cabí ta'yéajni'. <sup>15</sup> Que lë ni na', tsca

gaca guna', zoa' riböza' guna' ca' libán que didza' dxí'a ga ni' zóali' libí'ili', zóali' Roma.

**Yöl-la' huáca zxön que didza' dxí'a**

<sup>16</sup> Bití' ca' rutuí'ida' runa' libán que didza' dxí'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'enë' Dios ila'yön-në' bönni' judío le, ate' tödi na' ila'yöni ca' bönachi izá'a. <sup>17</sup> Didza' dxí'a ni rulu'í' ré'u gunë' Dios ga huóácaru' tsahui', channö uyéajlë'ëru' Lë', en bití' gaca chopa ládxi'ru'. Ca naca lë ni nazúaj ca' lu guichi lá'ayi, rna: "Nu naca tsahui' tu' réajlë' Dios, gata' yöl-la' na'bán que nu na'."

**Xíguia' nabága'gaca bönachi**

<sup>18</sup> Dios, Nu zoa yehua' yubá, bulu'e lahui bití' rilé'enë' dxí'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idútë li. <sup>19</sup> Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' bulu'í' quézinë' Dios lë ni ga na' nacué. <sup>20</sup> Dza ni'te cate' si' guta' yödzülió, ga ridxintë na'a dza, yugu' le nunë' Dios nácagaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', bití' gaca ila'nnë' bití' nabága'gaquië' xíguia'. <sup>21</sup> Cate' ni' gulún-bë'ë Dios, bití' gula'yéaj ládxi'gaquië' Lë' ca ral-la' tseaj ládxi'ru'-në' Dios, en bití' gulé' Lë': "Xclenu'." Que lë ni na', cá'asö böáca le gula'zá' ládxi'gaquië', ate' gula'chulla gula'nítie' tu' nazidi icja ládxi'do'gaquië'. <sup>22</sup> Sal-la' guléquinë' ta'yéajni'inë' yenni', bulu'huóáquië' bönni' bití' bi nózguequinë' <sup>23</sup> tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guió' budó' yaga, budó' na' nácagaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lé'ëba' lu yu ni.

<sup>24</sup> Que lë ni na' Dios guléaj ládxe'ë légaquië' para ilunë' yugu' le ta'zé ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túë'. <sup>25</sup> Guca caní tu' bulu'cá'anë' xtídzë'ë Dios, le naca idútë li, ate' gula'z'í' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácat-ica'sö queë' yöl-la' ba. ¡Ca' gaca!

<sup>26</sup> Que lë ni na' Dios guléaj ládxe'ë légaquië' para ilunë' yugu' le ta'zé ládxi'gaquië' le ruá' dö'. Yugu' nigu-la bulu'cá'ananu yöl-la' rizóalen bönni', para ilunnu le

ruá' dö'. <sup>27</sup> Lësca' caní guluné' yugu' bönní' biguíú', bu-lu'cá'ané' yöl-la' rizóalen nigula, ate' gula'zé ládxi-gaquié' le ruá' dö' túnlené' tué' ia'túé', en guluné' le tun ga nu rutuí', tu' gula'cuá'lené' la' luzá'a bönní'gacasé'. Que læ ni na' gula'guí' gula'záquié' lu xipéla'gaquié' yugu' bönní' guluné' caní tu' bubí'è Dios quégaquié' ca sa'yéaj dul-la' na' guluné' tu' nucá'anagaquié' Dios.

<sup>28</sup> Tu' cabí gul'énné' iluné' Dios bal, que læ ni na' guléaj ládxi'é Dios légaquié' para ila'zá' ládxi'gaquié' le bití' naca dxi'a, en iluné' le cabí nazaca'.

<sup>29</sup> Túntica'sé' yúgu'té le cabí naca tsahuí', en yugu' le naca stu'.

Tuné' le ruá' dö', en tu'huídi'né'.

Bití' ta'lé'ené' dxi'a luzá'agaquié', en tu'zxé'ené' luzá'agaquié'.

Tutié' luzá'agaquié', en ta'díl-lalené' luzá'agaquié'.

Ta'z'í yé'ené' bönnachi, en zítè nácagaquié' xihuí'.

Ta'nné' que luzá'agaquié'.

<sup>30</sup> Ta'nné' le cabí nácaté que luzá'agaquié'.

Bití' ta'lé'ené' Dios dxi'a, en nácagaquié' bönní' bizxaj.

Tun cuíngaquié' lo, en tun ba zxön cuíngaquié'.

Ta'guiljé' le ruá' dö' iluné', en ta'dá'bagué'è xuz xiná'agaquié'.

<sup>31</sup> Nácagaquié' bönní' bití' ta'yéajni'iné', en tun dítjagaquié' xtídza'gaquié'.

Bití' nácagaquié' dxi'i ladxí' ca ral-la' ilácagaquié'.

Bití' tu'niti lahué' luzá'agaquié'.

Bití' tu'huechí' ládxi'gaquié' luzá'agaquié'.

<sup>32</sup> Nózguequi quéziné' le nuzóé' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nóziguequiné' læ ni, calégasö caní tuné', pero ta'yaza ládxi'gaquié' nupa tun ca' caní.

### Naca tsahuí' ichúguié' Dios quégaca bönnachi gátigaca

2 Que læ ni na', bití' gaca ubéaj tsahuí' cuinu', nútítès nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. <sup>2</sup> Nöz quéziru' ca ruchí'a rusöróé' Dios. Naca idútè li ca ruchí'a rusöróé' nupa tun le ruá' dö'. <sup>3</sup> Lí' richugu bë'u nupa tun le ruá' dö', en tuz ca runu' lí'. ¿Naru' réquitsenu' uló' lí' cate' uchí'a usöróé' Dios? <sup>4</sup> ¿Naru' rucá'angatso' cá'asö yöl-la' dxi'i ladxí' idú queé' Dios, en yöl-la' riböza zxön ladxí' queé', en ca runé', ridzené' para lené' lí'? ¿Naru' cabí nöz quézinu' ruzá' ládxi'é Dios quiu' yöl-la' dxi'i ladxí' queé' para guné' ga ubí'i ládxi'u? <sup>5</sup> Lu yöl-la' ládxi'do' zidi quiu' bití' rubí'i ládxi'u. Que læ ni na' rusubaga' cuinu' xíguia' guné' Dios lí' cate' uchí'a usöróé' bönnachi, ate' gaca bë' naca ca ral-la' guné' Dios cate' ichúguié' quégaca bönnachi ilátigaca. <sup>6</sup> La' dza ní'isö ubí'i cazé' Dios que queé' bönní' tsa naca le guluné' tu tué'.

<sup>7</sup> Ünödzejé' yöl-la' na'bán idú quégaca nupa túntica'sö le naca dxi'a, tu' tu'í ládxi'gaquié' ulu'zi'é xibé' Dios, en ulu'rúajé' dxi'a lahué' Lè', en ila'cuá'tica'sé'. <sup>8</sup> Lu yöl-la' rilé queé', Dios guné' xíguia' nupa ta'dá'baga', en bití' té'èni ilún ca rna le naca idútè li, pero tun ca rna le cabí naca tsahuí'. <sup>9</sup> Ila'guí' ila'záquié', en hu'ínida' ládxi'é yúgu'té bönní' tuné' le ruá' dö'. Ga risí lo gaca

caní quégaca bönnachi judío, en gaca ca' caní quégaca bönnachi izá'a. <sup>10</sup> Dios guné' ga ilácagaquié' bica' ba, en guné' légaquié' bal, en gu'é le cuéqui dxi ládxi'gaquié' yúgu'té bönní' tuné' le naca tsahuí'. Ga risí lo guné' caní quégaca bönnachi judío, en guné' ca' caní quégaca bönnachi izá'a.

<sup>11</sup> Caní uchí'a usöróé' Dios bönnachi, ate' Lè' bití' runé' bal le ta'nnasö bönnachi. <sup>12</sup> Yúgu'té bönní' na' bití' bila'yönné' le rinná bë' xibá queé' Dios, en guluné' dul-la', lësca' ilátié', sal-la' bití' téquibe'ené' gula'dá'bagué'è le rinná bë' xibá na', ate' yúgu'té bönní' bila'yönné' le rinná bë' xibá queé' Dios, en guluné' dul-la', Lè' uchí'a usöróé' légaquié' ca naca le rinná bë' xibá na'. <sup>13</sup> Caní gaca, tu' cabí nácagaquié' tsahuí' lahué' Dios yugu' bönní' ta'yónisè' xibá queé', pero ulu'huóaca tsahuí' lahué' Lè' yugu' bönní' tuné' ca rna xibá queé'. <sup>14</sup> Bönní' na' bití' nácagaquié' judío, en bití' bila'yönné' le rinná bë' xibá queé' Dios, pero tun cazé' ca rinná bë' xibá queé' na', bönní' ni, sal-la' bití' bila'yönné' le rinná bë' xibá queé' Dios, zóalen légaquié' tu xibá le nuzóé' Dios icja ládxi'do'gaquié'. <sup>15</sup> Nupa ni tu'lu'í lahui le run xibá na' nazúaj lu icja ládxi'do'gaquié'. Le yu'u icja ládxi'do'gaquié' naca bë' naca caní. Ca ta'zá' ládxi'gaquié', tu'zéguié' luzá'agaquié' didza', o tu'béaj tsahuí' luzá'agaquié' tué' ia'túé'. <sup>16</sup> Caní ubí'è Dios quégaquié' dza ní' uchí'a usöróé' lu na' Jesucristo yugu' le núngaquié', en le gula'zá' ládxi'gaquié' yúgu'té'. Caní rusèdi didza' dxi'a runa' libán que.

### Yugu' bönní' judío, en xibá queé' Dios

<sup>17</sup> Núlöli' rnnalí' nácalí' judío, en ruzxöni ládxi'lí' xibá queé' Dios, en run ba zxön cuinlí' tu' núnbè'èli'-né' Dios, <sup>18</sup> nöz quézili' le ré'èné' Dios gunlí', en le rusèdi libí'ili' xibá queé', en réquibe'elí' le nácatèrö dxi'a. <sup>19</sup> Réquili' gaca ulu'í'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. <sup>20</sup> Réquili' gaca usédili' nupa bití' ta'yéajni'í, en nupa ta'yéajni'í ládi'do'os, tu' dè lu ná'ali' xibá queé' Dios le rusèdi bönnachi ca naca yöl-la' réajni'í idú, en le naca idútè li. <sup>21</sup> Na'a, libí'ili' rusédili' ia'zica'rö bönnachi. ¿Naru' cabí ral-la' usèdi cuinlí'? Libí'ili' rnnalí': "Bití' cuanu'." ¿Naru' ribántsali' libí'ili'? <sup>22</sup> Rnnalí' ca: "Bití' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' bití' rilé'eli' dxi'a yugu' budó' guiój budó' yaga. ¿Naru' ribántsali' le dzó'o lu yudo' quéguequi? <sup>23</sup> Run ba zxön cuinlí' tu' dè lu ná'ali' xibá queé' Dios. ¿Naru' rucá'anatsali' Dios cá'asö, en riguitsjali' xibá le gunná bë'è Lè'? <sup>24</sup> Nazúaj lu guichi lá'ayi ca runlí', rna: Ní'a que le runlí' libí'ili' nupa bití' nácagaca judío ta'nné' zí' queé' Dios.

<sup>25</sup> Le nácaté ruzí'u xibé læ na' narugu lu xipélu'u le naca bë' nazí' lu ná'ali' xibá queé' Dios channö runu' ca rinná bë' xibá na' queé' Dios, pero channö riguitsju' xibá le gunná bë'è Lè', nuhuóacu' ca tu bönní' bití' néquiné' queé' Dios. <sup>26</sup> Que læ ni na', channö zoé' tu bönní' bití' narugu lu xipél'é læ na' naca bë' nu nazí' xibá queé' Dios, pero runé' idútè ca rinná bë' xibá

queë' Lë', bönni' ni náquië' lahuë' Dios ca tu bönni' narugu caz lu xipélë'è lë na' naca bë' sal-la' biti' narugu lu xipëla' cazë'. <sup>27</sup> Bönni' na' biti' narugu lu xipélë'è lë na' naca bë' nu nazí' xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'í nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'. <sup>28</sup> Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipélë'è nu bönni'. <sup>29</sup> Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipélë'è nu bönni' le naca bë' nu nazí' xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

**3** Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'è? <sup>2</sup> Yenni' ruzi'ë xibé, en zían ca ruzi'ë xibé. Le nácatëro lo, Dios gulu'ë lu ná'agaquië' yugu' bönni' judío didza' lá'ayi queë'. <sup>3</sup> Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? <sup>4</sup> ¡Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'z'í yë' yúgu'të bönachi. Ca naca queë' nazúaj lu guichi lá'ayi le rnna:

Gaca bë' nacu' tsahui' n'á que didza' ru',  
en uruju' tsahui' channö nu uchi'a usörö Lì'.

<sup>5</sup> Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." <sup>6</sup> ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzülió ni?

<sup>7</sup> Cate' nu rizí' yë', Dios rnnë' biti' ruí' didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'z'í yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'. <sup>8</sup> ¿Naru' huannát-saru': "Guá'aru' dö' para gaca le naca dxi'a"? Nupa na' ta'nnë zí' queëru' ta'nná rusédiru' caní, ate' tsahui' naca ichúguië' Dios quéguequi.

### Yúgu'tëru' nabága'ru' dul-la'

<sup>9</sup> ¿Bizxi caz innaru' na'a? Ca naca queëtu' netu', bönni' judío, ¿nácarötu' tsahui' ca ia'z'ica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'! <sup>10</sup> Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

<sup>11</sup> Cuntu nu réajni'í.

Cuntu nu riguilaj Dios.

<sup>12</sup> Yúgu'të' ta'dé' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

<sup>13</sup> Lubá'agaquië' nácgaca ca yeru ba nayáljagaca. Len yöl-la' rinnësö quégaquië' ta'z'í yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

<sup>14</sup> Len yugu' didza' tu'ë, tu'didza' yúdxinë' bönachi, en ta'nnë zí'ë quégaca bönachi na'.

<sup>15</sup> Nacu'ë sina' tútigaquië' bönachi.

<sup>16</sup> Gátitës ga ta'dödë' tu'suntitë', en tu'saca' zí'ë luzá'agaquië'.

<sup>17</sup> Biti' ta'zéqui'në' ila'bözë' dxí'ado'.

<sup>18</sup> Biti' ca' tádxinë' Dios.

<sup>19</sup> Nóziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'të bönachi idútë yödzülió, uchi'a usöröë' Dios quéguequi. <sup>20</sup> Tu'í ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

### Uláru' tu' réajlë'ëru' Jesucristo

<sup>21</sup> Na'a, chibulu'í lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nnë' bönni' gulu'ë didza' uláz queë' Dios, ru'í didza' ca gaca huóácaru' tsahui'. <sup>22</sup> Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca nácgaca yúgu'të bönachi <sup>23</sup> tu' núngaquië' yúgu'të' dul-la', en biti' ca' nácagaquië' tsahui' ca na' náquië' Dios idú tsahui'. <sup>24</sup> Dios ruzá' ládxi'ë queëru', en nunsë' rë'u tsahui' tu' böá'uë' Jesucristo rë'u. <sup>25</sup> Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxí' queë' budódisë' cá'asö yugu' dul-la' benru' dza ní'te. <sup>26</sup> Caní benë' Dios, bulu'í cuiné' tsahui' dza ni zóaru' na'a, ate' rugá'anë' tsahui' sal-la' rugúë' dul-la' nabága'gaca bönachi, runë' ga tu'huóáca tsahui' nupa ta'yéajlë' Cristo.

<sup>27</sup> ¿Naru' huácatsö gun ba zxön cuinru' ca naca queëru'? ¡Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. <sup>28</sup> Na'a, rusáca'ru' queëru' nuhuóáquië' tsahui' tu' bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

<sup>29</sup> Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Òn, náquië' ca' Dios quégaca bönachi izá'a na' <sup>30</sup> tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zítu' tu' ta'yéajlë'ë Jesucristo, en biti' narugu lu xipëla'gaquië' lë na' naca

bë'. <sup>31</sup> Na'a, channö nuláru' tu' réajlë'siru' Jesucristo, ¿ba nagá'ana cáasö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

#### Le benë' Abraham rusedi rë'u

**4** ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? <sup>2</sup> La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. <sup>3</sup> Ca naca lë ni nazúaj lu guichi lá'ayi, le rnna: "Abraham guyéajlë'ë Dios, atë' que lë ni na' Dios benë' ga böáquië' tsahui' lahuë' Lë'." <sup>4</sup> Channö zoa nu bönni' runë' xichinru', le rigúixjaru'-në' bití' naca tu le ruzá' ladxí'ru' queë', pero naca tu le ral-la'ru' queë' bönni' na'. <sup>5</sup> Lësca' caní channö tu bönni' réajlë'ë Dios, sal-la' bití' bi dxin benë' bönni' na', Dios, Nu run ga ulu'huóaca tsahui' bönachi bití' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. <sup>6</sup> Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' bití' bi dxin nunë' bönni' na'. <sup>7</sup> Caní gunné' David: ¿Bica' ba bönni' na' Dios runiti lahuë' le bití' naca tsahui' nunë',

en rugúë' yugu' dul-la' nabáguë'ë!

<sup>8</sup> ¿Bica' ba bönni' na', Dios bití' rusubáguë'ë lë' xíguia' tu' nözi dul-la' benë' bönni' na'!

<sup>9</sup> ¿Naru' nácagacsë' bica' ba bönni' narugu lu xipéla-gaquië' lë na' naca bë', o nácagaca ca' caní nupa na' cabí narugu lë na' lu xipéla-gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. <sup>10</sup> ¿Bátaxi böáquië' tsahui' caní Abraham? ¿Naru' guca cate' ní' chinarugu lu xipélë'ë lë na' naca bë', o guca zí'alö? Bití' guca cate' chinarugu lu xipélë'ë, pero zí'alö guca. <sup>11</sup> Abraham guyéajlë'ë Dios cate' ní' bití' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'ísö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' bití' narugu lu xipéla-gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'. <sup>12</sup> Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla-gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ní' bití' narúguni lu xipélë'ë lë na'.

#### Le guzxí' lu në'ë Dios gata' queëru' tu' réajlë'ëru' Lë'

<sup>13</sup> Guzxí' lu në'ë Dios bi unödzjë' queë' Abraham, en quégaca xzí'ini xí'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuóacagaquië' tsahui' lahuë' Lë' tu' ta'yéajlë'ë Lë'. <sup>14</sup> La'tu' gata' yödzölió ni quégacasö nupa tun ca rinná bë' xibá queë' Dios, bití' gun bayudxi nu tséajlë' Lë', atë' nítisö gaca le guzxí' lu në'ë Dios. <sup>15</sup> Rulu'í xibá queë' Dios rë'u nabága'ru' xíguia', le run ga ichúguie' Dios queëru' gátiru'. Ga ní' bití' ridxini xibá

queë' na', bití' gaca ila'dá'baga' bönachi le rinná bë' xibá na'.

<sup>16</sup> Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' ladxë'ë queëru'. Caní naca, para gaca bë'da' gata' quéguequi yúgu'të xzí'ini xí'sóë' Abraham lë na' guzxí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. <sup>17</sup> Caní náquië' ca na' nazúaj lu guichi lá'ayi, le rnna: "Nuzóa' lí' ca xúzgaca bönachi idütë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubané' nupa chinátigaca, en ru'ë didza' que nu bití' zuíni tsca chizóa caz nu na' bití' zuíni.

<sup>18</sup> Caní naca tu' gudxë' Dios Abraham na': "Ziántëro ila'cuá' xzí'ini xí'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' bití' guca ilé'enë' lë na' runë' löza, atë' caní guca, bidéli'në' náquië' xúzgaca bönachi idütë yödzölió. <sup>19</sup> Bití' guca Abraham chopa ladxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúladë'ë, enca' ca naca queënu Sara queë', nácanu nigula huödx. <sup>20</sup> Bití' guca chopa ladxë'ë, en bití' gúquië' tu' caréajlë' ca naca le guzxí' lu në'ë Dios gunë' queë', pero bidipa ladxë'ë tu' guyéajlë'ë Dios, atë' gu-lu'ë Dios yöl-la' ba. <sup>21</sup> Idú ladxë'ë benë' löza Dios, napë' yöl-la' huáca gunë' idütë lë na' guzxí' lu në'ë. <sup>22</sup> Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

<sup>23</sup> Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzí'ë xibé Abraham, <sup>24</sup> pero para uzí'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. <sup>25</sup> Jesús na', Dios budödë' Lë' para gútië' tu' nözi dul-la' nabága'ru', atë' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

#### Le rata' queëru' tu' rnnë' Dios nuhuóácaru' tsahui'

**5** Na'a, rnnë' Dios nuhuóácaru' tsahui' lahuë' Lë' ní'a que le benë' Xanru' Jesucristo, channö réajlë'ëru' Lë', atë' que lë ni na' nuhuóácaru' tuz len Lë'. <sup>2</sup> Tu' réajlë'ëru' Jesucristo, ruzí'iru' xibé le ruzá' ladxë'ë Dios queëru', le rutipa ladxí'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. <sup>3</sup> Calégasö caní rudzéjaru', pero rudzéjaru' ca' cate' riguí' rizáca'ru', tu' chinóziru' le riguí' rizáca'ru' rusedi rë'u cózaru' zxön ladxí'. <sup>4</sup> Cate' ribózaru' zxön ladxí' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. <sup>5</sup> Cate' runru' löza Lë', bití' ca' raca chopa ladxí'ru'. Caní naca, tu' nuhuóaj nudzë'ë icja ladxí'do'oru' yöl-la' nadxí' queë' Dios rë'u. Runë' Dios Bö' Lá'ayi, Bönni' gusól-lë'ë Dios queëru' ga raca caní.

<sup>6</sup> Cate' ní' bití' ca' guca uláru' rácasö queëru', cate' gúla'rö dza queë', Cristo gútië' uláz queëru', ní' nácaru' bönachi dul-la'. <sup>7</sup> Cuntu nu gué'ëni gati uláz queë' tu

bönni' tsahui'. Nadxi ca' nu urugui gati uláz queé' tu bönni' náquié' idú dxi'a. <sup>8</sup> Dios rulu'íné' rë'u ca nadxí'ide'ené' rë'u, tu' gútié' Cristo uláz queéru' cate' ni' nácaru' bönni' dul-la'. <sup>9</sup> Chinuhuóácaru' tsahui' lahué' Dios tu' bulaljé' Cristo xichöné', gútié' uláz queéru'. Que læ ni na' chinácada' löza usölé' Lë' rë'u lu dza ichúguié' Dios quégaca bönachi dul-la' gátigaca. <sup>10</sup> Cate' ni' bití' rilé'ru'-né' Dios dxi'a, gútié' Zxí'íné' Dios uláz queéru' para huóácaru' tuz len Lë'. Na'a, tu' zoé' nabané', en chinuhuóácaru' tuz len Lë', chinácada' löza uláru'. <sup>11</sup> Rudzéjaru' lahué' Dios ni'a que le bené' Xanru' Jesucristo, tu' nuhuóácaru' tuz len Dios ni'a que læ na' bené' Lë'.

### Le bené' Adán, en le bené' Cristo

<sup>12</sup> Guyú'u dul-la' yödzölió ni tu' nözi le bené' tuzé' bönni', ate' tu' bené' dul-la', guyú'u ca' yöl-la' guti. Que læ ni na' ilátigaca yúgu'té bönachi tu' nabága'gaca yúgu'té bönachi dul-la'. <sup>13</sup> Zí'atëlö ga bidxinté xibá queé' Dios, gulún bönachi yödzölió ni dul-la', pero bití' busubágué' Dios bönachi na' xíguia' ca nupa ta'dá'ba-ga' xibá queé' tu' nözi dul-la' na', tu' bití' ridxini xibá queé' quégaquié'. <sup>14</sup> Ga gudela' zoé' Adán ga bidxinté zoé' Moisés gulati yúgu'té bönachi tu' gula'baga' dul-la', sal-la' bití' gula'dá'baga' tu le gunná bē'è Dios ca bené' Adán. Nácagaca yúgu'té bönachi tuz len Adán tu' nácagaca zxí'ini xi'sóé'. Lë ni rulu'í rë'u ca ilaca tuz len Cristo yúgu'té nupa ila'yéajlë' Lë'.

<sup>15</sup> Le rúnasé' queéru' Dios bití' naca ca le guca queéru' tu' nözi dul-la' bené' Adán. Tu' nözi dul-la' bené' tuzé' bönni', ilátigaca yúgu'té bönachi. Dxí'atërö naca le ruzá' ládxé'è queéru' Dios, en le rúnasé' queéru'. Ruzá' ládxé'è queéru' læ ni ni'a que le bené' yetuzé' Bönni', Jesucristo. <sup>16</sup> Le rúnasé' Dios queéru' bití' naca ca le guca queéru' tu' nözi dul-la' na' bené' tuzé' bönni' na'. Le guchúguié' Dios queé' Adán gátie' tu' nözi dul-la' na' bené', guchúguié' ca' Dios quégaca yúgu'té bönachi gátigaca. Le rúnasé' Dios queéru' naca para huóácaru' tsahui' lahué' Lë' sal-la' nabága'ru' dul-la' zían. <sup>17</sup> Guyú'u yöl-la' guti tu' nözi dul-la' bené' tuzé' bönni'. Nácaterö löza ila'deli' yöl-la' na'bán nupa ulu'huóáca tsahui' lahué' Dios tu' zoa le ruzá' ládxé'è queéru' Dios ni'a que le bené' yetuzé' Bönni', Jesucristo.

<sup>18</sup> Dios guchúguié' quégaca yúgu'té bönachi ilátigaca tu' nözi dul-la' bené' tuzé' bönni' na'. Lësca' caní gaca ulu'huóáca tsahui' yúgu'té bönachi ni'a que le naca tsahui' bené' yetuzé' Bönni' na', gata' yöl-la' na'bán idú quégaquié'. <sup>19</sup> Bulu'huóáca huen dul-la' bönachi zían tu' cabí bené' tuzé' bönni' ca rna xtídzé'è Dios. Lësca' caní ulu'huóáca tsahui' bönachi tu' bené' yetuzé' Bönni' na' ca rna xtídzé'è Dios.

<sup>20</sup> Guyú'u xibá queé' Dios yödzölió ni para gaca bē'da' nabága'gaca bönachi dul-la'. Tu' guca bē'rö nabága'gaca dul-la', guca bē'rö ca' zxöntërö naca le buzá' ládxé'è Dios quégaca bönachi. <sup>21</sup> Guta' yöl-la' huáca unná bē' que dul-la' guti rë'u. Lësca' caní le ruzá' ládxé'è Dios queéru' napa yöl-la' huáca gun ga huóácaru' tsahui'

lahué' Lë', ate' gata' yöl-la' na'bán idú queéru' ni'a que le bené' Xanru' Jesucristo.

### Naca tsca chinátiru' para cabirö gunru' dul-la' tu' nabániru'-né' Jesucristo

<sup>6</sup> ¿Bizxi caz innaru' na'a? ¿Naru' gúntsaru' dul-la' para gáta'rö queéru' le ruzá' ládxé'è Dios queéru'? <sup>2</sup> ¿Bití' gun cázaru' ca! Naca queéru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? <sup>3</sup> ¿Naru' cabí nózili' ca na' naca queéru'? Channö bidílaru' nisa para huóácaru' tuz len Cristo, læ na' bidílaru' nisa rulu'í rë'u chigudódiru' lu yöl-la' guti tsözxón len Lë'. <sup>4</sup> Ca na' guca, gútilenru'-né' Cristo tsözxón, lësca' caní bigách'i'lenru'-né' tsözxón niu' yeru ba cate' ni' bidílaru' nisa. Ca na' busubané' Dios Cristo lu yöl-la' guti len yöl-la' huáca zxön queé', læs caní ca' rë'u nubánlenru'-né' Jesús tsözxón para gácaru' bönachi idüté cubi queé'.

<sup>5</sup> Channö nunru' Cristo tsözxón, gútiru' ca na' gútié' Lë', lësca' caní gunru'-né' tsözxón, ubanru' lu yöl-la' guti ca na' bubané' Lë'. <sup>6</sup> Chinóz quéziru' læ ni, yöl-la' bönachi queéru' le guzóa zí'alö gudá'len Lë' tsözxón læ'e yaga cruz, para initi yöl-la' bönachi queéru' na' bénlenru' le dul-la', para cabirö inná be'e le naca dul-la' rë'u. <sup>7</sup> Channö nácaru' tuz len Nu na' guti tu' nözi dul-la', nuhuóácaru' tsahui' lahué' Dios tu' cabirö nabága'ru' dul-la' na', ate' bití'rö yúuru' lu na' dul-la'. <sup>8</sup> Na'a, channö nátilenru'-né' Cristo tsözxón, réajlë'ëru' ubánlenru'-né' ca' tsözxón, <sup>9</sup> tu' chinóziru' bubané' Cristo lu yöl-la' guti, en bití'rö gátie'. Que læ ni na' bití'rö bi gaca gun yöl-la' guti na' queé' Lë'. <sup>10</sup> Ca na' guca, gútié' Lë', tu luzuísö gútié' tu' nözi dul-la' quégaca yúgu'té bönachi, pero ca na' naca, zoé' nabané', nabánlené' Dios. <sup>11</sup> Lësca' caní ral-la' usáca'li' queé'li' naca queé'li' ca chinati cázali' para cabirö gunli' dul-la', pero zóali' nabanli' para gunli' ca rna xtídzé'è Dios tu' nácali' tuz len Xanru' Jesucristo.

<sup>12</sup> Que læ ni na', bití' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizé' ládxí'li' le ruá' dö', lu le naca cázali'. <sup>13</sup> Bití' udödi cuinli' lu dul-la', bití' gunli' le ruá' dö', pero guli'dödi cuinli' lu në'è Dios tu' nubanli' lu yöl-la' guti, en guli'dödi lu në'è idüté le naca cázali' para ugúnlené' le le naca dxi'a. <sup>14</sup> Bití' gü'ili' lataj le naca dul-la', para cabí gun ga gunli' dul-la', tu' nuzóé' Dios libí'ili', calëga para inná be'e libí'ili' xibá queé', pero para inná be'e libí'ili' le ruzá' ládxé'è queéru'.

### Le rucudzu' didza' ca naca que nu bönni' nadó'o

<sup>15</sup> ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queé' Dios rë'u, pero rinná be'e le ruzá' ládxé'è Dios rë'u? ¿Bití' ca' gunru' caní! <sup>16</sup> Chinóz quézili' dxi'a channö udödi cuinli' lu në'è nu bönni' para gácali' bönni' nadó'ogaca queé', en gunli' ca rna xtídzé'è, tsaz nácali' bönni' nadó'ogaca queé' bönni' na' runli' ca rna xtídzé'è. Lësca' caní gaca channö udödi cuinli' para gunli' dul-la' le gun ga gátili', o channö udö-



di cuinli' para gunli' ca rnna xtídzë'è Dios, Nu gun ga huöacali' tsahui'. <sup>17</sup> Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. <sup>18</sup> Tu' chinulali' lu na' dul-la', nuhuöacali' ca yugu' bönni' nadó'ogaca lu na' le naca dxi'a. <sup>19</sup> (Ru'ílena' libí'ili' didza' ca tu'í didza' bönachi, tu' cabí réajni'íli' idútë lu yöl-la' bönachi queé'li'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

<sup>20</sup> Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. <sup>21</sup> Na'a, ¿naru' buzí'tsalí' xibé lë na' benli' zí'alö? Na'a lë na' benli' run ga rutu'íli', en run ga nu gati tsaz. <sup>22</sup> Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queé'li' yöl-la' na'bán idú. <sup>23</sup> Lazxaj nu run dul-la' naca yöl-la' guti, pero le rúnнасë' Dios queéru' naca yöl-la' na'bán idú, le rata' queéru' tu' nácaru' tuz len Xanru' Jesucristo.

#### Le rucudzu' didza' yöl-la' nutsaga na'

**7** Bócha'ado', núlöli' núnbë'èli' xibá queë' Dios. Nöz quezilí' rinná be'e xibá na' nu bönni' tsanni ni zoë' nabanë'. <sup>2</sup> Naca queé'li' ca naca que tu nigula nutsaga ná'lennu-në' bönni', yú'unu lu në'e bönni' queénu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. <sup>3</sup> Caní naca, tsanni ni zoë' nabanë' bönni' queénu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queénu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

<sup>4</sup> Lëscá' caní raca queé'li', bócha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxi'è Dios.

<sup>5</sup> Tsanni ni' guyú'uru' lu na' yöl-la' bönáchisö queéru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxin lu idútë le naca cázaru' para ilún ga gátiru'. <sup>6</sup> Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queéru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

#### Le dzaga neda' le naca dul-la'

<sup>7</sup> ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí

buzéajni' le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxi'u le dë que luzó'o", biti' gunözda' naca dul-la' yöl-la' rizé ládxi' le dë que luzá'a. <sup>8</sup> Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxi'a yúgu'të le ruá' dö'. Ga biti' ridxini xibá na', biti' naca bë' le naca dul-la'. <sup>9</sup> Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. <sup>10</sup> Dios gunná bë'è xibá na' para gun ga gata' queéru' yöl-la' na'bán, pero ben ga gúquibe'eda' chinati caza'. <sup>11</sup> Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

<sup>12</sup> Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'è. <sup>13</sup> ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatëro xihui' yúgu'të le naca dul-la'.

<sup>14</sup> Nóziru' Dios Bö' Lá'ayi bennë' queéru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. <sup>15</sup> Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. <sup>16</sup> Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. <sup>17</sup> Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. <sup>18</sup> Nözda' biti' zóalen neda' le naca dxi'a, o huáca inná, lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a. <sup>19</sup> Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. <sup>20</sup> Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

<sup>21</sup> Caní naca le raca queéru' yúgu'tëru'. Cate' ré'ënu' gunru' le naca dxi'a, dzaga rë'u le run ga runru' le ruá' dö'. <sup>22</sup> Lu icja ládxi'da'ahua' raza ládxi'a xibá queë' Dios <sup>23</sup> pero réquibe'eda' dzaga idútë le naca' le rinná be'e neda', ate' lë ni ridá'bagá' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

<sup>24</sup> ¿Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? <sup>25</sup> ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

#### Le runru' tu' zóalenë' Dios Bö' Lá'ayi rë'u

**8** Que lë ni na', bítirö bi xíguia' nabága'gaquië' yugu' bönni' néquiqueuinë' queë' Jesucristo, bönni' na' bítirö tunë' ca ré'ëni yöl-la' bönáchisö quégaquië', pero ca ré'ëne' Dios Bö' Lá'ayi tunë'. <sup>2</sup> Tu' naca'

tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. <sup>3</sup> Chinunë' Dios le cabí guca gun xibá na', tu' cabí bi guxzéqui' gun tu' nácaru' bönáchisö. Dios gusól-lë'è Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero bití' bi dul-la' benë' Lë'. Busubaga' cuinë' dul-la' nabágaru' rë'u, ate' caní guca, guchúguië' que dul-la' runru' lu yöl-la' bönáchisö queëru'. <sup>4</sup> Caní benë' para gaca gunru' idútë le naca tsahui' le rinná bë' xibá queë', núlöru' na' bití'rö runru' ca ré'ëni yöl-la' bönáchisö queëru', pero ca ré'ënë' Dios Bö' Lá'ayi runru'.

<sup>5</sup> Bönni' tunë' ca ré'ëni yöl-la' bönáchisö quégaquië', tu'í ládxi'gaquië' le naca que yöl-la' bönáchisö quégaquië', pero bönni' tunë' ca ré'ënë' Dios Bö' Lá'ayi, tu'í ládxi'gaquië' le naca queë' Dios Bö' Lá'ayi. <sup>6</sup> Channö ru'í ládxi'siru' le naca que yöl-la' bönáchisö queëru', tsaz gátiru', pero channö ru'í ládxi'ru' le naca queë' Dios Bö' Lá'ayi, chidé yöl-la' na'bán idú queëru', en ribózaru' dxi ládxi'. <sup>7</sup> Núti'tës nu ru'í ládxi'sö le naca que yöl-la' bönáchisö que, bití' rilé'e Dios dxi'a, tu' cabí run nu na' ca rinná bë' xibá queë' Dios, en bití' ca' gaca gun caní. <sup>8</sup> Que lë ni na', bönni' na' tunë' ca ré'ëni yöl-la' bönáchisö quégaquië' bití' gaca ilunë' le raza ládxi'ë Dios.

<sup>9</sup> Na'a, bití'rö runli' ca ré'ëni yöl-la' bönáchisö queéli', pero runli' ca ré'ënë' Dios Bö' Lá'ayi tu' zóalen cazë' Lë' libí'ili'. Tu bönni' bití' zóalenë' Dios Bö' Lá'ayi lë', Nu na' risól-lë'è Cristo queëru', bití' néquinë' queë' Cristo.

<sup>10</sup> Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. <sup>11</sup> Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

<sup>12</sup> Que lë ni na', libí'ili' bócha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca ré'ëni yöl-la' bönáchisö queëru' na'. <sup>13</sup> Channö runli' ca ré'ëni yöl-la' bönáchisö queéli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queéli', gata' yöl-la' na'bán idú queéli'.

<sup>14</sup> Yúgu'të nupa tun ca ré'ënë' Dios Bö' Lá'ayi nácacaga ca zxi'inë' Dios. <sup>15</sup> Dios Bö' Lá'ayi na' zóalenë' libí'ili' bití' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxi'inë' Dios caz, en runë' ca' ga rulídzaru'-në' Dios, rnaru': "Abba", le rnna: Dad. <sup>16</sup> Lë cazë' Dios Bö' Lá'ayi ruzéajni'inë' bö' naca cázaru', en runë' ga nóziru' nácaru' zxi'inë' Dios.

<sup>17</sup> Channö chinácaru' zxi'inë' Dios, gata' ca' queëru' tsözxón len Cristo le nequi queë' Xúziru' Dios. Caní gaca queëru' channö riguí' rizáca'lenru'-në' tsözxón Cristo para uzí'iru' xibé tsözxón len Cristo yöl-la' zxón queë' Dios.

<sup>18</sup> Runi neda', yugu' lë ni riguí' rizáca'ru' na'a naca tu le cuídido'os tsca naca yöl-la' zxón na' gata' queëru' dza sí' za'. <sup>19</sup> Ta'böza yúgu'të le nunë' Dios, en ta'zé

ládxi'gaca idxintë dza na' ulu'ë lahui Dios yugu' bönni' nácacagaquië' zxi'ini cazë'. <sup>20</sup> Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', <sup>21</sup> ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zí' ca' xibé yöl-la' rusólá le nazáca'da' na' ulu'zí'ë xibé yugu' zxi'inë' Dios. <sup>22</sup> Nóziru' ta'gu'í ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nigula chizóa sóabi' bí'ido' queënu. <sup>23</sup> Riguí' rizáca'a, calëgasö yödžolió ni, pero riguí' rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'í rë'u ca ral-la' gaca cázaru'. Riguí' rizáca'ru' tsanni ni ribózaru' dza ní' ulu'ë lahui Dios nácaru' idú zxi'inë', dza ní' únë' ca' idútë le naca cázaru'. <sup>24</sup> Tu' runru' löza lë ni, nuláru' rë'u, pero channö gaca ilé'ëru' lë na' runru' löza, bití' naca tu le ribózaru'. Bití' ribózaru' le chirilé'ëru'. <sup>25</sup> Na'a, channö runru' löza tu le cabí gaca ilé'ëru', lu yöl-la' riböza zxón ládxi' ribózaru' le.

<sup>26</sup> Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nóziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídzaru' lahuë' Dios, ate' lu yöl-la' rinaba yudxi queë' rinnëda' ládxi'ë, tsca cabí gaca nu inná. <sup>27</sup> Dios ruyúë' le yu'u icja ládxi'do'gaca bönachi, en nózinë' le ré'ënë' innë' Dios Bö' Lá'ayi na', ate' Lë', ca ré'ëni quézinë' Dios, rudödë' xtídzaru' gaca nupa néquiquequi quez queë' Cristo lahuë' Dios.

#### Nadéli'tëröru' tu' zóalenë' Cristo rë'u

<sup>28</sup> Nóziru' tu'zi'ë xibé bönni' yúgu'të le raca quégaquië', bönni' na' nadxi'iguequinë' Dios, ate' bulidzë' Dios légaquië' ca nuzóa cazë' gunë'. <sup>29</sup> Yugu' bönni' na' guró cazë' queë' Dios zí'atëlö, buzöë' ca' quégaquië' zí'atëlö ilácagaquië' ca naca cazë' Zxi'inë', para gáquië' Zxi'inë' lo ladaj zían bóché'ë. <sup>30</sup> Nupa na' buzöë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxón queë'.

<sup>31</sup> ¿Bizxi caz innaru' na'a ca nácacaga lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'. <sup>32</sup> Dios, idú ládxi'ë bennë' queëru' Zxi'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxón len Zxi'inë' yúgu'të le dë? <sup>33</sup> ¿Nuzxi caz gaca bi usubaga' nupa na' guró cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'? <sup>34</sup> ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatë'ë zxón, ate' rnnë' dxi'a uláz queëru' lahuë' Dios! <sup>35</sup> Sal-la' bi raca queëru', nöz quéziru' nadxi'inë' Cristo rë'u. Nóziru' nadxi'inë' rë'u:

sal-la' riguí' rizáca'ru', o sal-la' risëbi ládxi'ru',  
o sal-la' ta'bía ládxi'gaca bönachi rë'u,  
o sal-la' ridunru', o sal-la' riyadzaj le gácuru',

o sal-la' zoa bönadxi queéru', o sal-la' ilútié' bönni' rë'u.

<sup>36</sup> Ca nácagaca lè ni nazúaj lu guichi lá'ayi, rnna: Tu' néquitu' quiu' Li', túntica'sö bönachi ga gátitu'. Nácatu' ca yugu' bö'cu' xzila', nadódigacaba' lu na' nu guti légaçaba'.

<sup>37</sup> Na'a, tu' zóalen rë'u Nu na' nadxí'i rë'u, nácaterö löza idéli'ru' lu le raca queéru'. <sup>38</sup> Que lè ni na' runi neda':

Biti' bi sequi' gun ga bítirö idxí'iné' Dios rë'u.  
Nadxí'iné' rë'u tu' néquiru' queé' Xanru' Jesucristo.  
Biti' sequi' gun caní yöl-la' guti o yöl-la' na'bán,  
o yugu' gubáz lá'ayi o nupa ta'nná bē',  
o yugu' yöl-la' huáca que tu' xihui',  
o bítitēs bi zoa o bítitēs bi sí' za',  
o tu le dē xitsá'alō o tu le dē cadxí'ilō,  
o bítitēs bi nuné' Dios.

### Dios guró cazé' queé' bönachi Israel

**9** Ruá'a didza' idútē li tu' néquida' queé' Cristo, ate' röjlöz didza' ni le naca queé' Dios Bö' Lá'ayi le yu'u icja ládxí'da'ahua'. ¡Biti' rizí' yē'a! <sup>2</sup> Ruhuí'inide'eda', en risébitica'sö ládxa'a <sup>3</sup> tu' raca ládxa'a guna' ga ulu'lé' böchi' luzá'a, bönni' uládz quia'. La'tu' huácalen légaquie', gué'eni quézida' ubéaj ládxē'ē Dios neda', en ulá'alena' Cristo. <sup>4</sup> Yugu' bönni' uládz quia' na' náca-gaquié' xzí'ini xí'sóé' Israel, ate' Dios bē'ē légaquie' lataj ilácagaquié' xzí'ini cazé'. Yöl-la' zxön queé' Dios guzóalen légaquie', ate' Dios budödē' lu náagaquie' didza' rucá'ana tsahui', enca' xibá queé'. Bulidzē' légaquie' para tseaj ládxí'gaquié' Lē', ate' budödē' lu náagaquie' yugu' le guxzí' lu nē'ē gunē' le ilún tsahui' bönachi. <sup>5</sup> Nácagaquié' xzí'ini xí'sóagaquié' xuz xtó'otu' Abraham, en Isaac, en Jacob, ate' ladaj dí'a dza quégaquie', ca naca yöl-la' bönachi queé', guljē' Cristo, Nu naca caz Dios, en rinná bē'enē' yúgu'tē. ¡Rácatica'sö queé' yöl-la' ba! ¡Ca' gaca!

<sup>6</sup> Sal-la' yúgu'tē bönni' uládz quia' bití' nazí' lu náagaquie' Cristo, bití' ral-la' innaru': Nítisö böáca xtídzē'ē Dios. Caléga yúgu'tē xzí'ini xí'sóé' Israel nácagaquié' idú bönachi Israel, nupa néquiguequi queé' Dios. <sup>7</sup> Sal-la' gúljagaquié' zían xzí'ini xí'sóé' Abraham, bití' guláquié' yúgu'tē idú xzí'ini xí'sóé' Abraham, pero guca ca na' nazúaj lu guichi lá'ayi, le rnna: "Yugu' xzí'ini xí'sóé' Isaac ilaca idú xzí'ini xí'sú'." <sup>8</sup> Caní naca, nupa nácagaca xzí'iné' tu bönni' néquiné' queé' Dios, caléga yúgu'tē nácagaquié' xzí'iné' Dios. Lësca' caní, nácagaca idú xzí'ini xí'sóé' Abraham nupasö na' náljagaca ní'a que lè na' guxzí' lu nē'ē Dios. <sup>9</sup> Lè na' guxzí' lu nē'ē Dios unödzejē' queé' Abraham rnna caní: "Ia'tú iz na'a dza huöda', ate' Sara quiu' uzóanu-bí' tubí' bí'i bönni'do'."

<sup>10</sup> Calégasö lè ni guca caní, pero lësca' cate' Rebeca ní' nuá'anu-bí' yugu' bí'i bönni'do' queé' Isaac, xuz xtó'otu', <sup>11</sup> cate' ní' sí' iláljabi', en bití' bi núnigacabí' le naca dxí'a o le ruá' dö', Dios gudxé'-nu Rebeca na', gunné': "Bí'i bönni' zí'alö quiu' gunbí' xichinbí' bí'i buropi." Didza' ni röjlöz lè na' nazúaj lu guichi ca gunné' Dios, le rnna: "Bídxí'ida'-nē' Jacob, en caléga Esaú'."

Caní guca, bugá'ana tsutsu le buzóé' tsaz Dios ca naca lè na' chiguró cazé'. Que lè ni na' bití' raca caní ní'a que tu le gaca ilún bönachi, pero naca caní tu' ribó cazé' Dios nu rulidzē'.

<sup>14</sup> ¿Bizxi caz innaru' na'a? ¿Naru' runtsé' Dios le cabí naca tsahui'? ¡Bití' ca' runé' caní! <sup>15</sup> Dios gudxé' Moisés, gunné': "Huéchi' ládxa'a nu ré'enda' huéchi' ládxa'a, en gü'í ládxa'a nu ré'enda' gü'í ládxa'a." <sup>16</sup> Que lè ni na', bití' raca caní ní'a que le té'eni caz bönachi, o tu' runé' bayudxi nu bönni', pero naca tu' ré'eni quéziné' Dios, ruhuéchi' ládxē'ē bönachi. <sup>17</sup> Ca naca lè ni nazúaj lu guichi lá'ayi ca na' Dios gudxé' Faraón, gunné': "Que lè ni na' buzóa' lí' ga rinná bē'u para ulu'a lahui yöl-la' huáca quia' ga zu', en guna' ga ilunbē' bönachi idútē yödözlió le naca' neda'." <sup>18</sup> Caní naca, Dios ruhuéchi' ládxē'ē nu ré'eni quéziné', en lësca' caní runé' zidzaj icja ládxí'da'ahué' nu bönni' ré'éné' guné' zidzaj icja ládxí'da'ahué' bönni' na', ca na' bené' queé' Faraón na'.

<sup>19</sup> Na'a guiéli' neda': "Channö caní naca, ¿bizxi que rusubágué'ē Dios bönachi xíguia'? ¿Nuzxi caz gaca tá'baga' le ré'eni quéziné' Dios guné'?" <sup>20</sup> ¡Bití' ca' naca caní! ¿Nuzxi caz lí' rnnió' que Dios? ¿Naru' huácatsö tu yusu' néquini yu guié' bönni' huen rö'ö, inná: "¿Bizxi que benú' neda' caní?" <sup>21</sup> ¿Naru' cabí dē lu nē'ē bönni' huen rö'ö guné' que guna' na' tu yusu' nu ugún le dxin ga liná', en que la' guna' ná'asö guné' ia'tú yusu' nu ugún le dxin ga bití' naca liná'?

<sup>22</sup> Ré'eni quéziné' Dios ulu'ē lahui ca guné' xíguia' nu ruá' dö' en guné' ga gaca bē' yöl-la' huáca queé', pero lu yöl-la' riböza zxön ladxi' queé' bíá' guléné' yugu' bönni' ní' ral-la' ichúguié' quégaquie', yugu' bönni' na' nabága'gaquié' xíguia', en run bayudxi usunítie' légaquie'. <sup>23</sup> Caní runé' Dios para gaca bē' nácaterö lesaca' yöl-la' ruzá' ladxi' queé', lè na' rulu'ē lahui lógaca nupa na' ruhuéchi' ládxē'ē, bönni' na' buzóé' quégaquie' zí'atèlö ulu'zì'ē xibé yöl-la' zxön queé'. <sup>24</sup> Yugu' bönni' caní bulidzē' Dios. Calégasö bulidzē' netu', bönachi judío, pero lësca' bulidzē' bönachi izá'a. <sup>25</sup> Ca naca lè ni nazúaj lu guichi lá'ayi ca na' bē'ē didza' Os-eas uláz queé' Dios, gunné':

Nupa bití' nácagaca bönachi quia',  
gu'a láguequi: Bönachi quia',  
ate' nupa na' bití' bídxí'ida',  
gu'a láguequi: Nupa nadxí'ida'.  
<sup>26</sup> La' ná'asö ga gunní'a' quéguequi:  
"Bití' nácalí' bönachi quia'",  
sí' láguequi: "Yugu' xzí'iné' Dios ban."

<sup>27</sup> Na'a, ca naca quégaca xzí'ini xí'sóé' Israel, Isaías gunné':

Sal-la' ila'yané' xzí'ini xí'sóé' Israel,  
en iláquié' tsca naca yuzxi tu ra' yegu zxön,  
ulu'lé' nabábasé'.

<sup>28</sup> Xanru' Dios la' gunté' ga gaca idútē lè na' ichúguié' quégaca bönachi yödözlió ni.

<sup>29</sup> Lësca' caní Isaías bē'ē didza' zí'atèlö, gunné':

Dios, Xanru' unná bē' idú,  
la'tu' cabí buçá'ané' queéru' yugu' xzí'ini xí'sóaru',  
ugá'anaru' ca yödözö Sodoma, en yödözö Gomorra,

yugu' yödzo na' busunítië' Dios.

### Bönachi Israel, en didza' dx'ia

<sup>30</sup> ¿Bizxi caz innaru' na'a? Yugu' bönni' biti' nabábagacquië' Israel chibila'déli'në' nuhuóacagacquië' tsahui' lahuë' Dios, en biti' gulunë' bayudxi ulu'huóacquië' tsahui' lahuë' Dios, pero nuhuóacagacquië' tsahui' tu' ta'yéajlë'ë Dios. <sup>31</sup> Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagacquië' tsahui', biti' bila'déli'në' le ral-la' gata' quégacquië' tu' tunë' ca rinná bë' xibá na'. <sup>32</sup> ¿Bizx que na' guca caní? Caní guca, tu' cabí gulunë' caní lu yöl-la' réajlë' quégacquië' Dios, pero rácasö quégacquië' gulé'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchéguga'gacquië' lu lë na' nazí'i le: Guiój Ga Nu Røjchegu'. <sup>33</sup> Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzo Sión bönni' na' gáquië' ca tu guiój ga nu tsøjchegu',  
guiój na' gun ga nu ichixi inigui.  
Nu tséajlë' Lë', biti' ca' utuí'i nu na'.

**10** Libí'ili', bócha'ado', le rizé ládxa'a, en le rinábida'-në' Dios gunë' quégaca bönachi Israel naca gunë' ga ulu'lé'. <sup>2</sup> Runa' ba nalí quégacquië', idú ládxi'gacquië' tu'í ládxi'gacquië' Dios, pero calëga len yöl-la' réajni'í idú. <sup>3</sup> Biti' nózguequinë' ca runë' Dios, runsë' ga nácaru' tsahui', pero té'ënnë' ilún cuíngacquië' tsahui' rácasö quégacquië', en biti' ta'cu'ë nöxaj ladxí lahuë' Dios para gaca gunë' légaquië' tsahui'. <sup>4</sup> Budxi benë' Cristo le ré'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

<sup>5</sup> Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idütë ca rinná bë' xibá na', soë' ibanë' tu' gunë' caní." <sup>6</sup> Na'a, ca naca que nu huóaca tsahui' tu' réajlë' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo, <sup>7</sup> en biti' innó': "¿Nuzxi caz huötaj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti. <sup>8</sup> Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë ni naca didza' que le réajlë'ëru' Dios runtú' libán que, rnnatu': <sup>9</sup> "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' lí'." <sup>10</sup> Lu icja ládxi'do'oru' réajlë'ëru' Jesús para gácaru' tsahui', ate' len didza' ru'íru', rulu'íru' lahui le náquië' Jesucristo para uláru'.

<sup>11</sup> Nazúaj lu guichi lá'ayi le rnna: "Biti' ca' ulu'tuí'i yúgu'të nupa ta'yéajlë' Lë'." <sup>12</sup> Dios, la' tuz ca ru'í ládxi'ë yugu' bönni' judío, enca' yugu' bönni' idütë yödžolió, tu' Lë cazë' Xanru' náquië' Xángacquië' yúgu'të, en nápadë'ë bi unödžjë' quégaca yúgu'të nupa tu'lidza Lë'. <sup>13</sup> Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." <sup>14</sup> ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca

queë'? ¿Nacxi gaca ila'yönnë' channö cuntú nu zoa nu gun libán lógaquië'? <sup>15</sup> ¿Nacxi caz gaca ilunë' libán channö cuntú nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' rójéngacquië' libán que le ribequi dxi ládxi'ru', en tunë' libán que didza' dx'ia."

<sup>16</sup> Na'a, calëga yúgu'të' gula'zí' lu ná'agaquië' didza' dx'ia. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" <sup>17</sup> Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

<sup>18</sup> Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna: Idütë yödžolió bila'yöni chí'igacquië'.

Yúgu'të lataj bila'dxín xtídzaga'gacquië'.

<sup>19</sup> Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'elí',  
tu' idxí'ida' bönachi biti' nabábagaca libí'ili'.  
Ní'a quégaca bönachi cabí ta'yéajni'í guna' ga leli'.

<sup>20</sup> Gudödi ní' gúcadë'ë rugu ladxí' Isaías na', en bë'ë didza' uláz queë' Dios, gunné':

Bila'džoli neda' nupa biti' gula'guílaj neda'.  
Bulu'í lahua' lógaquië' bönni' biti' bi gula'nábinë' neda'.

<sup>21</sup> Na'a, ca naca quégacquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi biti' túngaca ca rnna xtídzaga'a, en ta'dá'baga' neda'."

### Nupa nulágaca ladaj bönachi Israel

**11** Na'a rnnía': ¿Naru' nusán në'ë Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' dí'a dza queë' Benjamín, xzí'ini cazë' Israel na'. <sup>2</sup> Dios biti' nusán në'ë bönachi queë', nupa na' guró cazë' queë' dza ní'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': <sup>3</sup> "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzégugacatu'-ba' böa' bédxido' lo' Lí'. Tuza' neda' nagá'ana' quiu', ate' té'ënnë' ilútië' ca' neda'." <sup>4</sup> Na'a, ¿bizxi didza' bubí'ë Dios? Caní gunné': "Nun chí'igaca caza'-në' quia' tsónnalalaj yu' chi gáyü'ë bönni' biti' tu'zecu xzíbigacquië' lo budó' guiój na' nazí'i le Baal." <sup>5</sup> Lësca' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxi'ë caní quégacquië'. <sup>6</sup> Channö naca le ruzá' ládxi'ë caní quégacquië', biti' naca ní'a que tu le gaca ilunë'. La'tu' guca ní'a que tu le gaca gunru', lë na' ruzá' ládxi'ë queë'ru' Dios bití'rö gaca tu le ruzá' ládxi'ë queë'ru'.

<sup>7</sup> ¿Bizxi caz innaru' na'a? Lë na' gula'guílajë' bönni' Israel, biti' bila'déli'në', pero chibila'déli' le nupa ní' guró cazë' queë' Dios, ate' ia'zica'rë' na', Dios benë' zidi icja ládxi'do'gacquië'. <sup>8</sup> Ca naca lë ni nazúaj lu guichi lá'ayi, rnna: "Dios benë' ga nácagacquië' chul-la niti." Caní

benë, en sal-la' gaca ila'lé'enë' le runë, en ila'yönnë' xtídzë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. <sup>9</sup> Ca naca lë ni bë'ë ca' David didza', gunné':

Yugu' laní quégaquië' ulu'huöaca le ila'zón légaquië',  
en ca tu yalaj ga ila'rólinë'.

Ilaca ca' le ilún ga ila'chíxinë',  
en ca tu le uzí' lëbi légaquië'.

<sup>10</sup> Ila'chul-la guiój lógaquië', para cabí ila'lé'enë'.  
Ila'yechu tsaz cúdzu'gaquië' tu' ilu'ë yua'.

### Ca gaca ulu'lágaca bönachi bití' nácagaca judío

<sup>11</sup> Na'a rnníá': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Bití' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' nácagaca judío para gunë' ga ulu'xzé'enë' yugu' bönni' judío léguequi. <sup>12</sup> Le gulunë' bönni' judío, gula'chíxinë', ben ga bidxín quégaca bönachi yödzólió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa bití' nácagaca judío tu' gula'nítië' yugu' bönni' judío, zxóntëro gaca le gata' quéguequi cate' yugu' bönni' judío na' ulu'huöaquië' queë' Dios.

<sup>13</sup> Na'a rea' libí'ili' bití' nácali' judío, rnníá': Tu' naca' gubáz nasól-lë'ë Dios lógaca nupa bití' nácagaca judío, runa' zxön lë na' dë lu na'a <sup>14</sup> para nadxi ca' huáca guna' ga ulu'xzé'enë' bönni' uládz quia' libí'ili', en caní guna' ga ulu'lé' bal-lë'. <sup>15</sup> Channö bulu'huöaca bönachi nacua' idú yödzólió queë' Dios tu' bulu'nítië' yugu' bönni' judío xilátjagaquië', zxóntëro gaca le gata' quéguequi cate' ulu'huöazië' xilátjagaca cazë' na'. Gaca ca raca cate' tu'bángaca nupa chinátigaca. <sup>16</sup> Channö rigú'uru' quez queë' Dios cúa nilado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ní'a në'e yaga na'.

<sup>17</sup> Nácagaquië' bal-lë' bönni' judío ca ní'a në'e tu yaga olivo narúgugaca, ate' libí'ili', ca ní'a në'e tu yaga olivo guí'a, yöjtá'alí' yaga olivo dxí'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxí'a na'. <sup>18</sup> Que lë ni na', bití' gun ba zxön cuinlí', bití' uzóali' tsólá'alö nupa nácagaca ca ní'a në'e na' narúgugaca. Channö run ba zxön cuinlí', ral-la' inózili' calëga libí'ili' rugáguli' luí yaga na', pero luí yaga na' rugagu libí'ili'.

<sup>19</sup> Nadxi ca' innó': "Gula'rugu ní'a në'e yaga na' para gaca tsázia' neda' xilátjagaca." <sup>20</sup> Nácatë didza' ru'u, pero gula'rúguië' tu' cabí gula'yéajlë'ë, ate' yöjtó'o lí' yaga na' tu' réajlë'u Dios. Que lë ni na', bití' ral-la' gun ba zxön cuinu', pero ral-la' gádxinu' Dios. <sup>21</sup> Channö benë' Dios léguequi xíguia', nupa na' nácagaca caz ní'a në'e yaga dxí'a na', ¿naru' cabí gunë' xíguia' ca' lí'? <sup>22</sup> Buyútsöca' na'a ca náquië' dxí'i ladxí' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxí'i ladxí' len lí'. Que lë ni na', ral-la' gúntica'su' ca sa'yéaj yöl-la' dxí'i ladxí' queë' na', para cabí ichúguië' ca' lí' lu yaga queë' na'. <sup>23</sup> Lësca' caní gaca quégaquië' channö cabí ulu'gá'anë' lu yöl-la' cabí réajlë'

quégaquië', tsójtá'gaquië' leyúbölö lu yaga na', tu' napë' Dios yöl-la' huáca gunë' ga tsójtá'gaquië' le leyúbölö. <sup>24</sup> Nacu' lí' ca tu ní'a në'e gurugu lu yaga olivo guí'a, en yöjtó'o yaga olivo dxí'a ga cuntú nu udá' tu ní'a në'e yaga guí'a. Yénni'tëro huáca quégaquië', náca-gaca cazë' ní'a në'e yaga dxí'a na', huáca tsójtá'gaquië' leyúbölö lu yaga quéguequi cazë' na'.

### Ca gaca ulu'lágaca bönachi Israel

<sup>25</sup> Bócha'ado', ré'ënda' inózili' lë ni bigachi', para cabí gun ba zxön cuinlí' ca naca yöl-la' réajni'i queé'li'. Bulu'huöaca bal-la bönachi Israel zidi ladxí', ate' caní iláquië' ga idxinrö dza chinayázcaca yúgu'të bönachi bití' nácagaca judío ga rinná bë'ë Dios, nupa na' ral-la' ulu'lágaca. <sup>26</sup> Tödi na' gata' lataj ulu'lé' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusólá,

en ugúa le ruá' dö' nabága'gaca zxí'ini xi'sóë' Jacob.

<sup>27</sup> Lë ni naca didza' dzaga gúnlena' légaquië' cate' ugúa' dul-la' nabága'gaquië'.

<sup>28</sup> Caní naca, gula'dá'baguë'ë didza' dxí'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' guró cazë' queë' xuz xtó'ogaquië'. <sup>29</sup> Tsaz runödzjë' Dios le runödzjë', en tsaz rulidzë' bönachi. <sup>30</sup> Ca na' naca queé'li', zí'atëlö bití' benlí' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. <sup>31</sup> Lësca' caní naca quégaquië' na'a, bití' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. <sup>32</sup> Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

<sup>33</sup> Zxóntëro naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözí yugu' le runë' Dios. <sup>34</sup> ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? <sup>35</sup> ¿Nuzxi caz bi bunödzaj queë' Dios para gun bayudxi bi ubi'ë Dios que? <sup>36</sup> Yúgu'të le dë narúajgaca lu në'ë Dios, en taca lu në'ë, en nácagaca para uzi'ë xibéguequi. ¡Gácatíca'sö queë' Dios yöl-la' ba! ¡Ca' gaca!

### Ral-la' udödi cuinru' quez queë' Dios

**12** ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' lolí' udödi cuinlí' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunlí', ca sa'yéaj le reaj ládxí'ru'në' Dios. <sup>2</sup> Bití'rö gunlí' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxí'do'olí'. Guli'gún caní para gaca inózili' le naca dxí'a ré'ënë' Dios gunlí', lë na' raza ládxë'ë, en le naca idú.

<sup>3</sup> Na'a, tu' zoa le buzá' ládxë'ë quia' Dios, rea' yúgu'tëli': Bití' gun ba zxön cuinlí', le cabí ral-la' gunlí', pero ral-la' gácali' nöxaj ladxí' ca ribequi ícjalí', tsa naca yöl-la' réajlë' queé'li' Dios le bennë' que queé'li'.

<sup>4</sup> Ca na' naca tuz idütë le naca cázaru', sal-la' zían le

nagudi' dzágalenru', en calèga tuz dxin tun yúgu'tè le zían na' nagudi' dzágalenru', <sup>5</sup> lësca' caní naca queéru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lè ni na' yúgu'tèru' nácaru' tuz turu' len ia'turu'.

<sup>6</sup> Tu turu' dè lu ná'aru' tu le bennè' queéru' Dios, ate' nadzá'gaca tu tu tsca naca le buzá' ládxè'è que queéru'.

Bönni' na' Dios bunödzejè' queé' gu'è didza' uláz queé', tsca réajlè'è Lè', ral-la' gu'è didza' bönni' na'.

<sup>7</sup> Bönni' na' Dios bunödzejè' queé' gunè' xichinè', dxí'ado' ral-la' gunè' dxin na'.

Bönni' na' Dios bunödzejè' queé' usédinè' bönachi, dxí'ado' ral-la' usédinè' bönachi.

<sup>8</sup> Bönni' na' Dios bunödzejè' queé' uzéajni'inè' bönachi, dxí'ado' ral-la' uzéajni'inè' légaquiè'.

Bönni' bi unödzejè' que nu yúbölö, idú ládxè'è ral-la' unödzejè'.

Bönni' rinná bé'enè' bönachi, idú ládxè'è ral-la' gunè' caní.

Bönni' rácalenè' luzé'è, len yöl-la' rudzeja ral-la' gunè' caní.

#### Yugu' le ral-la' gun nu nequi queé' Cristo

<sup>9</sup> Ral-la' idxí'ili' luzá'ali' idú ládxí'li'.

Buli'cá'ana le ruá' dö'.

Gulí'gü'í' ládxí'li' gunli' le naca dxí'a.

<sup>10</sup> Gulí'dxí'i-guéquinè' luzá'ali'

ca nadxí'igueli'-nè' böchi' cázali'.

Ca runli'-nè' bal luzá'ali'

ral-la' gunli' ga gácarè' lo ca nácali' la' cuínsili'.

<sup>11</sup> Buli'típatica'sö ládxí'li', en bití' gácali' xöhuèdi.

Gulí'gún xichinè' Xanru' idú ládxí'li'.

<sup>12</sup> Bulí'dzeja tu' zoa le runli' löza.

Gulí'cóz zxön ladxí' cate' bi riguí' rizáca'li'.

Bulí'lidzatica'sè' Dios.

<sup>13</sup> Bulí'nödzej' quégaca bönachi queé' Cristo

tsca nayádzjaguequinè'.

Gulí'gü'í' lataj ga ila'cuá' nupa ta'dxín queé'li'.

<sup>14</sup> Gulí'nábinè' Dios gunè' dxí'a

quégaca nupa ta'bía ládxí'gaca libí'ili'.

Gulí'naba gaca dxí'a quégachiè',

en bití' udxí'ali' légaquiè' dö'.

<sup>15</sup> Bulí'dzèjalen nupa tu'dzeja.

Gulí'códxilen nupa ta'bödxi.

<sup>16</sup> Gulí'gaca tuz len luzá'ali'.

Bití' gun ba zxön cuinli',

pero gulí'gún tsözxön yugu' bönni' nöxaj ladxí'.

Bití' guéquili' chinadéli'li' idútè yöl-la' réajni'i.

<sup>17</sup> Cuntu nu ubí'ili' que,

bití' guá'ali' dö' que nu ruá' dö' queé'li'.

Gulí'gún dxí'a quégaca yúgu'tè bönachi.

<sup>18</sup> Channö huáca, tsca séqui'li', gulí'cóz dxí'a

len yúgu'tè bönachi.

<sup>19</sup> Böchi' luzá'ado', bití' uzí' lébili' bönachi la' libí'isili', pero gulí'gü'í' lataj ubí'è Dios quégaca bönachi na', tu' nazúaj lu guichi lá'ayi le rnna:

Neda' caza' uzí' lèba'.

Neda' ubi'a quégaca bönachi.

Caní gunné' Xanru' Dios. <sup>20</sup> Lësca' caní rnna:

Channö zoè' nu bönni' bití' ridzáguiè' li' dxí'a, en ridunè', bë'è le gahuè'.

Channö ribidxè' nisa, bë'è le guí'jè'.

Cate' gunu' caní, gunu' ga utuí'inè' bönni' na'.

<sup>21</sup> Bití' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxí'a.

**13** Yúgu'tèli' ral-la' gunli' ca ta'nnè' bönni' yúlahui'.

Dios caz budödè' lu ná'agaquiè' yöl-la' unná bë' ná'agaquiè', en nucu'è xilátjagaquiè' bönni' ni dè lu

ná'agaquiè' yöl-la' unná bë'. <sup>2</sup> Que lè ni na', nu ridá'bagá' yúlahui' ridá'bagá' le nuzóa cazè' Dios, ate' nupa

ta'dá'bagá' caní, nabága'gaca xigua'. <sup>3</sup> Nacu'è bönni'

yúlahui', calèga para ulu'zenè' bach nu run le naca dx-

i'a, pero para ulu'zenè' bach nu ruá' dö'. Channö ré'ènu'

gunu' ga bití' ulu'zenè' li' bach, ben le naca dxí'a, ate'

uruju' dxí'a lógaquiè'. <sup>4</sup> Náquiè' bönni' yúlahui' ni'a në'è

Dios para gácalenè' li', pero channö runu' le ruá' dö',

ral-la' gádxinu', tu' cabí nu'è nítisö xiyaga yúlahui'.

Náquiè' ni'a në'è Dios para uzí' lèbè', gunè' xigua' nu

ruá' dö'. <sup>5</sup> Que lè ni na' run bayudxi gunli' ca rnnè' bön-

ni' na' dè lu në'è, calégasö tu' budödè' Dios lu në'è

gunè' libí'ili' xigua', pero lësca' para soa dxi ládxí'do'oli'

lahuè' Dios. <sup>6</sup> Que lè ni na' ca' riguí'zaj lázali' que

yúlahui', tu' ná'agaquiè' bönni' yúlahui' ni'a në'è Dios,

en tunè' le nudödi cazè' lu ná'agaquiè'.

<sup>7</sup> Gulí'guí'zaj yúgu'tè bönachi le rál-la'li' quégachiè'.

Gulí'guí'zaj lázali' lu na' nu ral-la' quí'zaj lázali'.

Gulí'guí'zaj dumí nu ral-la' quí'zajali'. Gulí'gadxi nu ral-

la' gádxili', en gulí'gún bal nu ral-la' gunli' bal. <sup>8</sup> Cuntu

nu bi ral-la' gál-la'li' que, pero tuz ral-la' idxí'ili' luzá'ali',

tu' chibén idú ca rinná bë' xibá queé' Dios nu nadxí'i

luzé'e. <sup>9</sup> Caní ta'nná bë' xibá na':

Bití' gunu' dul-la' le riguí'saj xibá que yöl-la' nutsaga

na'.

Bití' gútiu' bönachi.

Bití' cuanu'.

Bití' innió' que luzó'o le cabí nácatè.

Bití' sè ládxu'u le dè que luzó'o.

Yugu' xibá ni, en yúgu'tè xibá ia'zica'rö, údxi gun nu

run ca rnna didza' rnna caní:

Bidxí'i luzó'o ca nadxí'i cuinu'.

<sup>10</sup> Nu na' nadxí'i luzé'e bití' bi run que luzé'e le ruá' dö'.

Caní naca, nu na' nadxí'i luzé'e run idú ca rinná bë' xibá

queé' Dios.

<sup>11</sup> Gulí'gún caní tu' nózili' ca raca dza ni zóaru' na'a, en

nózili' ca' chibidxín dza usubán ládxí'li' ca rubán nu

chiguxi, tu' chizóarö gal-la' dza uláru' lu le ruá' dö' ca

guca cate' ni' gusí loru' réajlè'èru' Cristo. <sup>12</sup> Ga zóaru'

na'a naca ca chí'i dzó'ölö, ate' chizóa tödi rëla na', pero

ga na' zoè' Cristo naca ca lahui' dza, ate' chizóa

tsöjsóaru' ni'. Que lè ni na' ral-la' ucá'anaru' le tun bö-

nachi ga naca chul-la que dul-la'. Ca na' rugacu cuinè'

tu bönni' rejè' gudil-la le run chí'i lè' lu gudil-la, ral-la'

taru' lu bení' queé' Dios, le gun chí'i rë'u lu na' tu' xihui'.

<sup>13</sup> Para gunru' caní ral-la' gunru' dxí'a ca ral-la' gun nu ridá lahui' dza.

Bití' ral-la' súdxiru', en cabí gágulë'ëru'.

Bití' ral-la' gunru' le ruá' dö', en calëga le gun ditaj rë'u.

Bití' ral-la' tíl-lalenru' luzá'aru', en cabí uzxë'ëru' luzá'aru'.

<sup>14</sup> Na'a, ral-la' un cuinlí' lu icja ládxí'do'oli' ca náquië' Xanru' Jesucristo, en bití' gü'í' ládxí'lí' gunlí' le rizé ládxí'lí' lu yöl-la' bönáchisö queé'li'.

#### Bití' ral-la' sí' quídza'ru' böchi' luzá'aru'

**14** Gulí'gü'í' lataj nu réajlë' Cristo gun libí'í'li' tsözxón sal-la' bití' naca idú ca réajlë' nu na' Lë'. Bití' tíl-lalenlí' nu na' ca nácagaca le runi nu na' huáca nu gun. <sup>2</sup> Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. <sup>3</sup> Na'a, bönni' na' rahuë' yúgu'të bití' ral-la' uzóë' tsölál'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' sí' quídze'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. <sup>4</sup> ¿Nuzxi caz lí', rizi' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

<sup>5</sup> Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxí'a le runru'. <sup>6</sup> Bönni' na' runë' bal tu dza, runë' le bal para tseaj ládxë'ë Xanru', ate' bönni' na' bití' runë' bal dza na', para tseaj ládxë'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' bití' rahuë' yúgu'të, bití' rahuë' le para tseaj ládxë'ë Xanru', en rë'ë ca' Dios: "Xclenu'."

<sup>7</sup> Bití' zoë' nabanë' queéze' nitúë' bönni' nabábalenë' rë'u, en bití' ratië' queéze' nitúë' bönni'. <sup>8</sup> Channö zóaru' nabanru', para tseaj ládxí'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. <sup>9</sup> Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

<sup>10</sup> Na'a lí', ¿bizx que richugu bë'u böchi' luzó'o? ¿Bizx que ruzú' tsölál'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. <sup>11</sup> Ca naca lë ni nazúaj lu guichi lá'ayi, rnna:

Rnnë' Xanru': "Ní'a quia' neda' caz, ulu'zëchu zxíbigaca yúgu'të bönachi lahua' neda'. Ila'guixjö' yálajdo' naca' Dios."

<sup>12</sup> Caní naca, uchi'a usöröë' Dios yúgu'tëru'.

#### Bití' ral-la' gunru' ga ichixi iníguinë' böchi' luzá'aru'

<sup>13</sup> Que lë ni na', bítirö ral-la' ichugu bé'ëru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'.

<sup>14</sup> Nöz quézida' bití' bi dë le ráguru' le gaca gun ga bítirö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca. <sup>15</sup> Channö rusuhu'í'nnu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopá ládxë'ë bönni' na', gútië' Cristo uláz queë'. <sup>16</sup> Que lë ni na', bití' bi gunlí' le gun ga ila'n-né xihui' bönachi que le rusáca'lí' queé'li' naca tsahui'. <sup>17</sup> Cate' rinná bé'enë' Dios rë'u, bití' ru'í' ládxí'ru' le gu'áj gáguru', pero ru'í' ládxí'ru' gácaru' tsahui', en sóaru' dxí' ladxi', en udzëjaru', yugu' le gaca gunru' tu' zóalenë' Dios Bö' Lá'ayi rë'u. <sup>18</sup> Núti'tës nu run xichinë' Cristo ca nácagaca lë ni, run le raza ládxë'ë Dios, ate' urúaj dxí'a lógaca bönachi.

<sup>19</sup> Que lë ni na' ral-la' gunru' le ilún ga gata' le ribequi dxi ládxí'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. <sup>20</sup> Bití' bi ral-la' gagu' le gun ga gaca chopá ladxi' nu na' nuzóë' Dios. Nácate lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. <sup>21</sup> Gácarö dxí'a cabí gagu' bë'la', en cabí gu'í'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopá ládxë'ë, o le gun ga huóaj ládxë'ë ca réajlë'ë Cristo. <sup>22</sup> Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxí'da'ahuë' lë' tu' nözi lë na' runi lë' dë lataj gunë', <sup>23</sup> pero bönni' na' raza chopá ládxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

#### Ral-la' gunru' le raza ládxë'ë böchi' luzá'aru'

**15** Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxí'gaca ca ta'yéajlë' Cristo. Bití' ral-la' gunru' le raza ládxí'ru' la' cuínsiru'. <sup>2</sup> Yúgu'tëru' ral-la' gunru' le raza ládxë'ë böchi' luzá'aru' para gaca dxí'a queë', en idipa ládxë'ë ca réajlë'ë Cristo. <sup>3</sup> Caní ral-la' gunru', tu' cabí benë' Cristo le guyaza ládxë'ë la' cuínsë', pero guca queë' ca na' nazúaj lu guichi lá'ayi, le rnna: "Budubá-ga'gaca neda' yugu' didza' xihui' gulu'í' nupa gula'nné xihui' quiu' Lí', Dios." <sup>4</sup> Yúgu'të le bulu'zúajë' lu guichi lá'ayi dza ní'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxön ladxi', en ruhuë' tsahui' rë'u. Que lë ni na' zoa le runru' löza. <sup>5</sup> Rinábida'-në' Dios, Nu run ga ribózaru' zxön ladxi', en Nu ruhuë' tsahui' rë'u, gunë' ga gunlí' tuz ca rusáca'lí' queé'li', para gácali' ca na' ré'ënë' Jesucristo. <sup>6</sup> Caní ral-la' gunlí' para gácali' tuz, cú'ulí'-në' tsözxón yöl-la' ba

Dios, Xuzë' Xanru' Jesucristo. <sup>7</sup> Que lè ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u. <sup>8</sup> Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxin le guzxí' lu në'ë Dios unödzejë' qué-gaquië' xuz xtó'otu'.

#### Yugu' bönachi izá'a ila'yöni didza' dxí'a

<sup>9</sup> Bidë' ca' Cristo para benë' ga ila'gú'u Dios yöl-la' ba nupa bití' nátagaca judío tu' ruhuéchi' ládxë'ë Dios lé-gaquië'. Ca naca lè ni nazúaj lu guichi lá'ayi le rnna:

Que lè ni na', ulu'a lahui le nacu' Li'  
lógaca bönachi idütë yödzölió,  
en gul-la' quiu' yöl-la' ba.

<sup>10</sup> Ga yúbölö nazúaj lu guichi lá'ayi le rnna:  
Libí'ili', bönachi idütë yödzölió,  
bulí'dzëjalén bönachi queë' Dios.

<sup>11</sup> Ga yúbölö nazúaj ca' lu guichi lá'ayi le rnna:  
Guli'cu'ë Xanru' yöl-la' ba,  
yúgu'tëli' bití' nácali' judío.  
Guli'tséaj ladxí' Lë',  
yúgu'tëli' zóali' idütë yödzölió.

<sup>12</sup> Lësca' caní buzúajë' Isaías lu guichi le rnna:  
Ilá' lahui Nu nababa dí'a dza queë' Isaí.  
Gaca lo Nu na' para inná be'e nupa bití' nátagaca judío.

Nupa ni ilún löza Lë'.

<sup>13</sup> Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxí'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

<sup>14</sup> Böchi' luzá'ado'. Chinóz quézida' rúntica'sili' le naca dxí'a, en dëda' yöl-la' réajni'i queé'li' para gaca uzéa-jni'ili' luzá'ali'. <sup>15</sup> Na'a naca' rugu ladxí', ruzúaja' queé'li' lu guichi ni, bócha'a, en rusá'a ládxí'li' tu' zoa le buzá' ládxë'ë Dios quia' neda'. <sup>16</sup> Que lè ni na' runa' xichinë' Jesucristo lógaca bönachi bití' nátagaca judío, en runa' libán que didza' dxí'a queë' Dios, para gaca ugu'a bönachi bití' nátagaca judío lu në'ë Dios, nupa na' guró cazë' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxë'ë Lë'.

<sup>17</sup> Na'a, tu' rúnlena' tsözxón Jesucristo dxin, dë lu na'a tsaza ládxa'a ca naca le nuna' lu xichinë' Dios. <sup>18</sup> Lësca' rurúguida' inniá' ca naca lè na' benë' Cristo lu na'a neda', benë' ga tun bönachi bití' nátagaca judío ca rnna xtídzë'ë Dios. Lè ni benë' Lë', bugunë' dxin didza' bë'a neda', en yugu' dxin bena' neda'. <sup>19</sup> Lu na'a neda' bugunë' dxin ca' le nátagaca bë' bulu'e lahui Lë', en yugu' yöl-la' huáca zxón benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusi lahua' runa' libán lu yödzö Jerusalén, ate' idú gásibí'ilo ga ridxintë luyú Ilírico, chinuna' libán que didza' dxí'a ca naca queë' Cristo. <sup>20</sup> Bë' ládxa'a bena' libán que didza' dxí'a ga bití' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélë'ë lahui dxin zxón chin-

unë' bönni' yúbölö. <sup>21</sup> Ca bena' neda' naca ca na' nazúaj lu guichi lá'ayi le rnna:

Ila'lé'e nupa nacuá' ga cuntu nu ben libán queë' Lë',  
en ila'yéajni'i nupa catu caz bila'yöni ca naca queë'.

#### Ré'ënë' Pablo tsejë' yödzö Roma

<sup>22</sup> Que lè ni na', sal-la' zián luzuí gú'unida' guída' ga zóali', bití' guca guída'. <sup>23</sup> Na'a, chibudxi bena' dxin quia' yugu' lataj ni, en chiré'ënda' zián iz guída' ga zóali'. <sup>24</sup> Que lè ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tödi ni' huáca ugu'uli' neda' nöza. <sup>25</sup> Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo. <sup>26</sup> Caní guna', le gula'yaza ládxí'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzejë' quéguequi bönachi yechí' dzágagaca bönachi queë' Cristo, nacu'ë Jerusalén. <sup>27</sup> Gula'yaza ládxí'gaquië' bönni' bití' nátagaquië' judío gulunë' lè ni. Le nácatë naca tu le rál-la'-gaquië' quégaca bönachi judío ni'. Channö bönni' bití' nátagaquië' judío tu'zi'ë xibé le nátagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë qué-gaquië'. <sup>28</sup> Que lè ni na', cate' údxi udöda' lu nátagaca bönachi judío lè na' bulu'nödzejë' bönni' ni, ní'iro töda' ga zóali' libí'ili' cate' tseja' luyú España. <sup>29</sup> Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxí'a queë' Cristo.

<sup>30</sup> Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxí'do'oru', rá-ta'yua' loli', bócha'ado', ulídzali'-në' Dios tsözxón len neda', inábili'-në' gácalenë' neda'. <sup>31</sup> Guli'nabi-në' Dios gunë' ga ulá' neda' lu nátagaquië' bönni' bití' ta'yéajlë'ë nacu'ë luyú Judea, en gunë' ga ila'yaza ládxí'gaquië' ila'zi'ë lè na' tsöju'a lu nátagaquië' bönni' nátagaquië' queë' Cristo, nacu'ë Jerusalén. <sup>32</sup> Guli'nabi-në' ca', channö naca ca ré'ënë' Dios, gunnë' neda' lataj idxina' queé'li' len yöl-la' rudzeja quia', para uzí' ládxí'léna' libí'ili'. <sup>33</sup> Na'a rinábida'-në' Dios, Nu run ga zoa dxi ládxí'ru', sóalenë' yúgu'tëli'. ¡Ca' gaca!

#### Tu'gapa Dios luzé'eguequi bönachi queë' Cristo

**16** Rigú'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzá-ganu bönachi queë' Cristo nacuá' yödzö Cencrea.

<sup>2</sup> Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzejali' queë'nu bití'tës bi riquínnu. Lè cázanu gúcalennu bönachi zián, en gúcalennu ca' neda'.

<sup>3</sup> Guli'gapa Dios Priscila, en Aquilo, nupa na' gulunlen neda' tsözxón dxin queë' Jesucristo. <sup>4</sup> Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasó neda', pero lësca' yúgu'të böchi' luzá'aru' nabábagakië' gapa nacuá' bönachi queë' Cristo bití' nátagaca judío, të'ë légaquië': "Xclenli'." <sup>5</sup> Guli'gapa Dios bönachi queë' Cristo tu'dubë' lu yu'u lídxigaquië' Priscila,



en Aquilo na'. Gulí'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. <sup>6</sup> Gulí'gapa Dios María, nigula na' bennu dxin zxön queë' Cristo ga ni' rudúbili' libí'ili'.

<sup>7</sup> Gulí'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxón lidxi guíë, en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlë'ë Cristo zí'alö ca neda'.

<sup>8</sup> Gulí'gapa Dios Amplias, bönni' na' nadxí'ida', en néquinë' queë' Xanru'. <sup>9</sup> Gulí'gapa Dios Urbano, bönni' na' bënlenë' netu' tsözxón dxin queë' Jesucristo. Gulí'gapa Dios Estaquis, bönni' na' nadxí'ida'. <sup>10</sup> Gulí'gapa Dios Apeles, bönni' na' naca bë' réajlë'ë Cristo. Gulí'gapa Dios Dios nupa nacué' lidxë' Aristóbulo. <sup>11</sup> Gulí'gapa Dios Herodión, bönni' uládz quia'. Gulí'gapa Dios nupa nacué' lidxë' Narciso, en ta'yéajlë'ë Xanru'. <sup>12</sup> Gulí'gapa Dios Trifena, en Trifosa, nigula na' bennu dxin zxön queë' Xanru', ate' nadxí'iru'-nu. <sup>13</sup> Gulí'gapa Dios Rufo, bönni' rö queë' Xanru'. Gulí'gapa Dios xiné'ë Rufo na', nácanu ca' ca xiná' caza'. <sup>14</sup> Gulí'gapa Dios Asín-crito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacué'lenë' légaquië'. <sup>15</sup> Gulí'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacué'lenë' légaquië'.

<sup>16</sup> Gulí'gapa Dios luzá'alí', unída'li' luzá'alí' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacué' bönachi queë' Cristo luyú ni.

<sup>17</sup> Na'a, ráta'yua' lolí', bócha'ado', gulí'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlóz le nazédali'. Gulí'cuíta ga nacué' bönachi caní <sup>18</sup> tu' cabí tun xichinë' Jesucristo. Tunë' dx-

in para bi gata' quégacasë', en ta'zí' yé'enë' yugu' bönni' nöxaj ladxí', tu'gunë' dxin didza' nöxaj ladxí', en didza' tséajlë'ëru' le cabí nácatë. <sup>19</sup> Rizé didza' ca na' runlí' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ní'a que le runlí' libí'ili'. Na'a, ré'ënda' gácalí' sina' gunlí' le naca dxí'a, en calëga gunlí' le ruá' dö'. <sup>20</sup> Dios, Nu run ga zóaru' dxi ladxí', sí' gunë' ga ucúl-lalí' Satanás, tu' xihuí'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

<sup>21</sup> Bí'i Timoteo, bí'i na' rúnlenbí' neda' tsözxón dxin, rugápabí' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

<sup>22</sup> Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

<sup>23</sup> Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu' lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

<sup>24</sup> Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

#### Yöl-la' ba Dios

<sup>25</sup> Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxí'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ní'te ga bidxintë na'a dza. <sup>26</sup> Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

<sup>27</sup> ¡Ní'a que le benë' Jesucristo, gácatíca'sö yöl-la' ba queë' la's dui Dios, Nu rácatë'rö caz! ¡Ca' gaca!

# 1 Corintios

Pablo rugapë' Dios bönachi queë' Cristo nacu'ë Corinto

**1** Ca ré'eni quézinë' Dios bulidzë' neda', Pablo, para gaca' gubáz queë' Jesucristo. Bóchi'ru' Sóstenes runë' neda' tsözxón. <sup>2</sup> Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxón len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. <sup>3</sup> Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queé'li', en gunë' ga soa dxi icja ládxi'do'olí'.

**Yugu' le ruzí'iru' xibé tu' néquiru' queë' Cristo**

<sup>4</sup> Ré'tica'sa'-në' Dios: "Xclenu'" ca naca queé'li', tu' zoa le buzá' ládxë'ë Dios queé'li' tu' nácali' tuz len Jesucristo. <sup>5</sup> Tu' nácali' tuz len Cristo, Dios chinagú'udë'ë xinózilí' yúgu'të le nequi queë'. Rácalenë' libí'ili' ca naca yúgu'të didza' ru'í'ili', en runë' ga réajni'í'li' yúgu'të. <sup>6</sup> Caní naca, tu' guzí' lu ná'alí' idú ládxi'í'li' le runtu' liná' lo ca naca queë' Cristo. <sup>7</sup> Que lë ni na', bití' bi riyadzaj queé'li' que le runnë' Dios Bö' Lá'ayi queé'ru', tsanni ni ribózali' dza na' ilá' lahuë' Xanru' Jesucristo. <sup>8</sup> Lë cazë' utipë' ládxi'í'li' para gaca guá' ilenli' yúgu'të ga idxintë dza údxi, para cabí gaca nu bi inné queé'li' dza ni' huödë' Xanru' Jesucristo. <sup>9</sup> Dios runë' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

**Narúajgaca choplö bönachi queë' Cristo nacu'ë Corinto**

<sup>10</sup> Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Bití' irúajlí' choplö, pero guli'gaca tuz ca rizá' ládxi'í'li', en ca runi libí'ili'. <sup>11</sup> Caní rea' libí'ili', böchi' luzá'ado', tu' gula'guíxjö'í'në' neda' bönni' nacu'ë lídxinu Cloé ca runlí', ta'nné' ridil-la dídza'li'. <sup>12</sup> Lë ni rnní'a': Nadzá'lö didza' ru'í'ili' tu tuli'. Bál-lali' rnnali' dá'alí' Pablo. Ia'bál-lali' rnnali' dá'alí' Apolos. Ia'bál-lali' rnnali' dá'alí' Cefas, ate' ia'bál-lali' rnnali' dá'alí' Cristo. <sup>13</sup> ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queé'li'? ¿Naru' bidí'falsali' nisa para gácali' tuz len neda'? <sup>14</sup> Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo. <sup>15</sup> Que lë ni na' bití' gaca innali' bidí'falsali' nisa para gácali' tuz len neda'. <sup>16</sup> Lësca' buquila' nisa Estéfanos, en nupa nacua' lidxë'. Bití' röjneda' channö buquila' nisa nu yúbölö. <sup>17</sup> Gusól-lë'ë Cristo neda', calëga para uquila'

bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

**Cristo napa cazë' yöl-la' huáca, en yöl-la' réajni'í' queë' Dios**

<sup>18</sup> Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. <sup>19</sup> Caní naca, tu' nazúaj lu guichi lá'ayi le rnna:

Guna' ga huóaca nítisö yöl-la' rácada'

quégaca nupa taca yenni'.

Tsölá'alö ucá'ana' yöl-la' réajni'í'

quégaca nupa ta'yéajni'í' yenni'.

<sup>20</sup> ¿Bizxi caz uzi'tsë' xibé bönni' réajni'í'në' yenni'?

¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'í' quégaca bönachi yödzülió ni. <sup>21</sup> Dios, lu yöl-la' réajni'í' queë', bití' bé'ë lataj ilúnbe'e bönachi yödzülió ni Lë' ní'a que yöl-la' rácada' quégaquië'. Dios guyaza ládxë'ë busólé' nupa ta'yéajlë' Lë' ní'a que libán na' runru', sal-la' téquiguequi bönachi cá'asö naca.

<sup>22</sup> Té'ënnë' yugu' bönni' judío ila'lé'enë' yöl-la' huáca nácgaca bé', ate' bönni' zítu' ta'guiljé' yöl-la' réajni'í'.

<sup>23</sup> Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. <sup>24</sup> Bönni' na' bulidzë' Dios lé-gaquië', sal-la' nácgacaquië' bönni' judío o bönni' zítu', téquibe'enë' napa cazë' Cristo yöl-la' huáca queë' Dios, en yöl-la' réajni'í' queë' Dios. <sup>25</sup> Téquiguequi bönachi yödzülió ni le benë' Dios naca bé' bití' bi nózinë', pero lë na' benë' náparö yöl-la' réajni'í' ca yöl-la' réajni'í' quégaca bönachi. Téquiguequi le benë' Dios naca bé' nacuíd'i'në', pero lë na' benë' náparö yöl-la' huáca ca yöl-la' huáca quégaca bönachi. <sup>26</sup> Na'a, böchi' luzá'ado', guli'tsöjné' ca gúcali' cate' bulidzë' Dios libí'ili'. Bití' gula'cu'ë ládjalí' zían bönni' ta'yéajni'í'në' lu yöl-la' bönachisö quégaquië', en bití' gula'cu'ë ládjalí' zían bönni' unná bé', en calëga zían bönni' nácgacaquië' lo.

<sup>27</sup> Téquiguequi bönachi yödzülió ni yugu' bönni' na' guróë' Dios bití' bi nózguequinë'. Caní benë' Dios para gunë' ga ulu'tuí' nupa ta'yéajni'í'. Lësca' caní guróë' Dios nupa nacuíd'i'gaca yödzülió ni para gunë' ga ulu'tuí' nupa nál-lagaca. <sup>28</sup> Lësca' caní, téquiguequi bön-

nachi yödzülió ni nupa na' guróë' Dios nácataga cá'asö, en bití' bi nácataga, en nacuídi'gaca. Caní bené' Dios para guné' ga ulu'gá'ana cá'asö lè na' tun zxön bönachi yödzülió ni. <sup>29</sup> Que lè ni na', cuntú nu gaca gun ba zxön cuini lahué' Dios. <sup>30</sup> Dios caz bené' ga nácaru' tuz len Jesucristo, en bené' ga náparu' yöl-la' réajni' queé' Cristo. Tu' náquié' Cristo tuz len rë'u, nuhuóá-caru' tsahuí', en néquiru' quez queé' Dios, en nuláru'. <sup>31</sup> Naca ca na' nazúaj lu guichi lá'ayi, le rnna: "Channó zoa nu bi ré'eni gun zxön, ral-la' gun zxön Xanru'."

### Libán runru' queé' Cristo, ca gudé'è lè'e yaga cruz

**2** Caní guca, böchi' luzá'ado', cate' bidxina' queéli'. Bena' libán loli' que xtídzè'è Dios, calèga len yöl-la' réajni' quia', en bití' bè'a didza' lu yöl-la' rácada' quia'. <sup>2</sup> Cate' ni' guzóalena' libí'ili', bè' ládxa'a cabí gu'a didza' que le yúbölö, pero ca nácatè queé' Jesucristo bè'a didza', ca na' gudé'è lè'e yaga cruz. <sup>3</sup> Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízi-da'a. <sup>4</sup> Bè'léna' libí'ili' didza', en bena' libán que xtídzè'è Dios, calèga ca tu'fí didza' bönachi lu yöl-la' rácada' quéguequisö, pero guzóalene' Dios Bö' Lá'ayi neda', ate' guzóalen yöl-la' huáca queé' Dios neda', le guca bè' naca idútè li didza' bè'a. <sup>5</sup> Caní bena' para gaca tséajlè'èli' Dios, calèga tu' biyónili' yöl-la' rácada' qué-gaca bönachi, pero tu' bilé'elí' yöl-la' huáca queé' cazè' Dios.

### Dios Bö' Lá'ayi runé' ga núnbè'èru'-nè' Dios

<sup>6</sup> Ru'ítu' didza' lu yöl-la' rácada' lógaca nupa chiná-carö idú ca ta'yéajlè' Dios. Yöl-la' rácada' ni bití' naca ca le nápagaca bönachi yödzülió ni, en bití' naca ca le ná-pagaquié' bönni' ta'nná bè'è dza ni zóaru' na'a, nupa na' ta'niti caz. <sup>7</sup> Ru'ítu' didza' que yöl-la' rácada' na-gachi', lè na' runödzejé' Dios, tu' bigachi' yöl-la' rácada' na' buzóé' Dios dza ni'te para uzí'iru' xibé. <sup>8</sup> Yugu' bön-ni' ta'nná bè'è dza ni zóaru' na'a bití' gulúnbè'è yöl-la' rácada' na'. La'tu' gulúnbè'è le, bití' ulu'dé'è Xanru' nayépisètèrè' lè'e yaga cruz. <sup>9</sup> Naca ca na' nazúaj lu guichi lá'ayi le rnna:

Chinupé'è Dios le ulu'zí' xibé nupa nadxí'iguequi Lè', yugu' le cuntú nu ble'e, en bití' biyóni,  
en bití' gula'zá' ládxi'gaca bönachi ca naca que.

<sup>10</sup> Na'a, Dios nuzéajni'iné' rë'u yugu' lè ni lu në'è Dios Bö' Lá'ayi, tu' ruyú cazè' Dios Bö' Lá'ayi yúgu'tè, enca' le yu'u icja ládxi'da'ahué' Dios caz.

<sup>11</sup> ¿Naru' gaca inóziné' nu bönni' le yu'u icja ládxi'-da'ahué' ia'túé' bönni'? Tuz bö' naca cazè' bönni' na' nözi lè na'. Lësca' caní, cuntú nu nözi le yu'u icja ládxi'-da'ahué' Dios. Tuzè' Dios Bö' Lá'ayi nóziné' lè ni. <sup>12</sup> Rë'u ni, bití' nazí' lu ná'aru' tu bö' ridasö yödzülió ni, pero nazí' lu ná'aru' Dios Bö' Lá'ayi, Nu na' ruchizié' Dios rë'u para gaca gúnbè'èru' yugu' le buzá' ládxe'è Dios queéru'. <sup>13</sup> Yugu' lè na' buzá' ládxe'è Dios queéru' ru'íru' didza' que, calèga len didza' tu'sédiné' bönachi rë'u len yöl-la' rácada' quéguequi, pero len yugu' didza' rusédiné' Dios Bö' Lá'ayi rë'u. Caní naca, ruzéajni'iru'

bönachi zóalene' Dios Bö' Lá'ayi légaquié' ca naca le rusédiné' Dios Bö' Lá'ayi rë'u.

<sup>14</sup> Tu bönni' bití' zóalene' Dios Bö' Lá'ayi lè bití' rizí' lu në'è le rusédiné' Dios Bö' Lá'ayi rë'u, tu' réquiné' cá'asö naca. Bití' gaca tséajni'iné' bönni' na' lè ni, tu' gaca guéquibe'ené' tuzè' bönni' zóalene' Dios Bö' Lá'ayi lè le nazaca' lè ni. <sup>15</sup> Tu bönni' zóalene' Dios Bö' Lá'ayi lè gaca guéquibe'ené' le nazaca' yúgu'tè, pero cuntú nu gaca guéquibe'e le nazaca' cazè' bönni' na'. <sup>16</sup> Nazúaj lu guichi lá'ayi le rnna:

¿Nuzxi caz nözi le rizá' ládxe'è Xanru'?

¿Nuzxi caz gaca uzéajni'í Lè'?

Le rizá' ládxe'è Cristo yu'u icja ládxi'do'oru' rë'u.

### Nácaru' huen dxin tsözxón len Dios

**3** Que lè ni na', böchi' luzá'ado', bití' guca güfílena' libí'ili' didza' ca ru'ílena'-nè' didza' tu bönni' nudö-di cuiné' lu në'è Dios Bö' Lá'ayi, pero bé'léna' libí'ili' didza' ca ru'ílena' nu naca bönáchisö didza', bití' zóalene' Dios Bö' Lá'ayi nu na'. Nácali' ca yugu' bi'í hué'eni. Bití' nácali' tsutsu ca réajlè'èli'-nè' Cristo. <sup>2</sup> Busédida' libí'ili' le cabí naca böniga, lè na' guca ca nidxi' güfí'ili'. Bití' busédida' libí'ili' le naca böniga ca bèla' gáguli'. Bití' guca tséajni'ili' le naca ca bèla' gáguli', en bití' rácali' na'a. <sup>3</sup> Caní naca, tu' nácali' ca nu naca bönáchisö ga ridxintè na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzülió ni. <sup>4</sup> Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

<sup>5</sup> ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queé' Dios, ate' ni'a que le bentu' guyéajlè'èli' Cristo. Tu tutu' runtu' dxin na' benné' Xanru' que queé'tu'. <sup>6</sup> Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'è nisa, pero Dios bené' ga gulén, en guzxón xisedo' na' nadúz icja ládxi'do'oli'. <sup>7</sup> Caní naca, láti'do'os nazáquié' bönni' guz, en láti'do'os ca' bönni' rigu'è nisa, pero nazáca'dé'è Dios Nu run ga rilén, en rizxón xisedo' na'. <sup>8</sup> Tuz ca nácatagaquié' bönni' razé', en bönni' rigu'è nisa. Dios ubi'è que queégaquié' tscá naca dxin runé' tu tué'. <sup>9</sup> Nácatu' huen dxin tsözxón len Dios, ate' libí'ili' nácali' ca la' yèla queé' Dios ga runtu' dxin.

Lësca' caní nácali' ca tu yu'u runé' Dios. <sup>10</sup> Ca naca le buzá' ládxe'è Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. <sup>11</sup> Dios chigulu'è tu xilibi zö'ö le naca Lè cazé' Jesucristo, ate' cuntú nu gaca cu'u ia'tú xilibi zö'ö caní. <sup>12</sup> Dxin runru' queé' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guió'j nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. <sup>13</sup> Gaca bè' ca naca dxin núngaca tu tu bönachi. Cate' idxín dza ichúguié' Dios quégaca bönachi, ilá' lahui dx-

in nunru', tu' tōdi dxin na' lu guí', ate' guí' na' sí' bē' dxin nungaca tu tu bōnachi. <sup>14</sup> Channō dxin nunē' tu bōnni' urúaj dxí'a lu guí' na', le naca ca tu zō'ō guchisē', Dios ubi'ē' queē' ca sa'yéaj dxin nunē'. <sup>15</sup> Channō tsegui dxin nunē' tu bōnni' le naca ca tu zō'ō guchisē', unítie' le ré'ēnē' ubi'ē' Dios queē', pero ulá cazē' lē', ate' gaca queē' ca raca que nu rulá tu lu guí'.

<sup>16</sup> ¿Naru' cabí nōzili' naca cázali' yudo' queē' Dios, ate' zoē' Dios Bō' Lá'ayi icja lādxi'do'oli'? <sup>17</sup> Channō nu usuniti yudo' queē' Dios, Dios usunitiē' nu na', tu' naca lá'ayi yudo' queē' Dios, ate' libí'ili' naca cázali' yudo' na'.

<sup>18</sup> Biti' sí' ye'e cuinli'. Channō réqui nu nutsa' lādjali' rácada' ca tácada' bōnachi yōdzōlió ni, ral-la' huóaca nu na' ca tu bōnni' bití' bi nōzinē', para gata' que yōl-la' rácada' le naca idú. <sup>19</sup> Nu bōnni' napzē' yōl-la' rácada' que yōdzōlió ni náquiē' tu bōnni' bití' bi nōzinē' lahuē' Dios. Nazúaj lu guichi lá'ayi le rnna: "Dios runē' ga ila'chixi ila'nigui nupa tácada', rugunē' dxin yōl-la' rácada' quéguequi." <sup>20</sup> Lē'sca' caní rnna: "Xanru' nōzinē' nítisō naca le ta'bequi ícagaca bōnachi tácada'." <sup>21</sup> Que lē' ni na', bití' ral-la' gunlí' zxōn le gaca gunē' tu bōnni'. Nequi queé'li' yúgu'tē. <sup>22</sup> Néquiquequi queé'li':

Pablo, en Apolos, en Cefas,  
en yōdzōlió ni,  
en yōl-la' na'bán, en yōl-la' guti,  
en dza ni zóaru' na'a, en dza sí' za'.  
Yúgu'tē nequi queé'li',  
<sup>23</sup> ate' libí'ili' néquili' queē' Cristo,  
ate' Cristo néquinē' queē' Dios.

#### Dxin tunē' bōnni' gubáz nasól-lē'ē' Cristo

**4** Que lē' ni na', ral-la' guéquili' nácatu' netu' huen dxin queē' Cristo, en nazí' lu na'tu' le nagachi' queē' Dios. <sup>2</sup> Yugu' bōnni', Dios nudōdē' lu ná'agaquiē' ulu'gunē' dxin le nequi queē', run bayudxi ilunē' idú dxí'a le tunē'. <sup>3</sup> Biti' bi ruí' lādxa'a channō uchi'a usōrōli' neda', o channō ulu'chi'a ulu'sōrō bōnachi yōdzōlió ni neda'. Biti' ca' ruchí'a rusōrō cuina'. <sup>4</sup> Biti' ruxós lādxi-da'ahua' neda'. Lē' ni bití' naca bē' bití' nabága'a xíguia'. Xanru' náquiē' Nu ruchí'a rusōrōē' neda'. <sup>5</sup> Que lē' ni na', bití' ral-la' uchi'a usōrōli' nu bōnni' zí'aló ca idxín dza que. Gulí'cóz dza ní huōdē' Xanru', ate' Lē' ubéajē' ga liná' le nagachi' ga chul-la, en ulu'ē' lahui le yu'u icja lādxi'do'gaca yúgu'tē bōnachi. Ní'irō Dios ubi'ē' que queégaca bōnachi le gun bal léguequi ca ral-la' gaca quéguequi.

<sup>6</sup> Na'a, böchi' luzá'ado', ca naca lē' ni, bē'a didza' que le runtu' netu', Apolos, en neda'. Huáca usédali' ca runtu' netu' para gunlí' le nazúajsō lu guichi lá'ayi, en bití' gunlí' zxōn tuē' bōnni', en bití' uzóali' tsólá'aló ia'tué'.

<sup>7</sup> ¿Nuzxi bentsō ga nacu' lí' lo? ¿Bizxi caz bidéli'nu' lí' le cabí bennē' Dios quiu'? Channō Lē' bénnasē' quiu' lē' na' dē' lu no'ō, ¿bizx que run ba zxōn cuinu', réquinu' rácasō quiu' bidéli'nu' lē' na'?

<sup>8</sup> ¿Naru' réquitseli' nadéli'tērōli'? ¿Naru' réquitseli' rilé'eli' yōl-la' tsahui' queé'li'? ¿Naru' réquitseli' rinná bé'eli', sal-la' bití' rinná bé'etu' netu'? Ní'a queē' Xanru' Dios ré'enda' inná bé'eli' para gaca inná bé'lentu' libí'ili'

tsōzōn. <sup>9</sup> Runi neda' naca queé'tu', bōnni' gubáz queē' Dios, ca nuzóē' netu' zéajtu' xibánitē ca na' raca quégaquiē' bōnni' chinarugu quégaquiē' ilátiē' lahui' lóga-ca bōnachi. Nácatu' ca tu le tu'yuda' bōnachi yōdzōlió ni, enca' ca tu le tu'yúdē'ē' gubáz lá'ayi queē' Dios. <sup>10</sup> Tu' ré'ēnitu' guntu' xichinē' Cristo, ruí'itu' bōnachi lataj téquiquequi nácatu' bōnni' bití' bi nōzquequinē', pero libí'ili' réquili' rácada'ali' tu' nácali' queē' Cristo.

Libí'ili' réquili' chinál-lali',  
pero téquiquequi bōnachi nacuí'di'tu' netu'.  
Tu'zóa bōnachi netu' tsólá'aló,  
pero tun libí'ili' bal.

<sup>11</sup> Ga ridxintē na'a dza, riduntu', en ribídxitu' nisa.  
Bití' dē' lari' gácutu'.

Tun bōnachi netu' zí', en bití' zoa lídxitu'.

<sup>12</sup> Rusaca' zí' cuintu', la' nétu'sō runtu' dxin.

Tu'lidza bōnachi netu' zí',  
pero netu' rinábatu' le gácalen léguequi.

Ta'bía lādxi'gaca bōnachi netu',  
pero ruá' rilentu' le.

<sup>13</sup> Ta'nnē' queé'tu',  
pero lu yōl-la' nōxaj lādxi' ruí'ientu' légaquiē' didza'.  
Ga ridxintē na'a dza nácatu' ca bēbu que yōdzōlió ni,  
en ca tu le ta'rú'una yúgu'tē bōnachi.

<sup>14</sup> Ruzúaja' queé'li' caní lu guichi, calēga tu' ré'enda' guna' ga utu'í'ili', pero ré'enda' uzéajni'ida' libí'ili', runa' ca runē' tu bōnni' ruzéajni'inē' yugu' zxí'ini cazē' tu' nadxí'inē' légacabi'. <sup>15</sup> Sal-la' gaca zían gáyu'ē' bōnni' ila'cuá'alen libí'ili', en ulu'sédinē' libí'ili' ca naca queē' Cristo, tuz nu zoa naca ca xúzili', nu na' ben ga néquili' queē' Cristo. Lu yōl-la' na'bán cubi le nápalí' tu' dzágalí' Cristo, neda' caz naca' ca xúzili' tu' busiyōnda' libí'ili' didza' dxí'a. <sup>16</sup> Que lē' ni na', ráta'yua' lolí' gü'fí lādxi'li' gunlí' ca runa' neda'.

<sup>17</sup> Que lē' ni na' ca' risól-la'a-bí' bí'i Timoteo ga zóali'. Tu' rúnlenbí' neda' dxin queē' Xanru' nácabí' ca zxí'ini caza', en nácabí' idú lādxi', ate' nadxí'ida'-bí'. Gunbí' Timoteo ga tsōjnéli' yugu' xibá rusédida' tu' néquida' queē' Cristo, yugu' le rusédida' yúgu'tē lataj lógaca yúgu'tē cō' bōnachi queē' Cristo. <sup>18</sup> Bál-lali' run ba zxōn cuinli' tu' réquili' bí'ti'rō udxina' ga zóali'. <sup>19</sup> Na'a, la' udxíntea' ga zóali' channō Xanru' gunnē' neda' lataj. Ní'irō guéquibe'eda', calégasō didza' tu'ē' bōnni' tun ba zxōn cuíngaquiē', pero guéquibe'eda' channō zóalen yōl-la' huáca queē' Dios légaquiē'. <sup>20</sup> Channō nazí' lu ná'alí' rinná bé'enē' Dios libí'ili', bití' naca bē' naca caní tu' rnnásili' ca'. Naca bē' naca caní channō zóalen libí'ili' yōl-la' huáca queē' Dios. <sup>21</sup> ¿Bízxi'lo ré'ēnili'? ¿Naru' ré'ēnili' udxina' ga zóali' len gubá'ayi, para guna' libí'ili' zí', o len yōl-la' nadxí'i, en lu yōl-la' nōxaj lādxi'?

#### Pablo ruchí'a rusōrōē' tuē' bōnni' runē' le ruá' dō'

**5** Rizé didza' zóalenē' libí'ili' tuē' bōnni' runē' le ruá' dō', tu' zóalenē' nigula queē' xuzē'. Le ruá' dō' caní bití' ca' tun bōnachi bití' núnbē'gaca Dios. <sup>2</sup> Libí'ili' run ba zxōn cuinli', pero ral-la' hu'ínili', en ubéajli' nu na' run dul-la' na' ga zóali'. <sup>3</sup> Sal-la' bití' zóalena' libí'ili' lu idútē le naca', le nácatē zóalena' libí'ili' lu bö' naca

caza'. Ca chizóalen caza' libí'ili' chibuchi'a busöróa' nu na' run dul-la' na'. <sup>4</sup> Cate' udúbili' queë' Xanru' Jesu-cristo guna' libí'ili' tsözxón lu bö' naca caza'. Ní'irö, len yöl-la' huáca queë' Xanru' Jesús <sup>5</sup> buli'dödë' bönni' na' lu na' Satanás tu' xihui' para initi idütë le naca cazë', pero ulá bö' naca cazë' dza ni' huödë' Xanru'.

<sup>6</sup> Biti' naca dxí'a gun ba zxön cuinlí' ca naca le runlí'. ¿Naru' cabí nózili' didza' na' rnna: "Cua zído'os que yöta xtila gun ga chaxxaj idütë cúa nazí'i le"? <sup>7</sup> Na'a, guli'cúa ga zóali' dul-la' na' le naca ca tu cúa zi gulás, para gácali' dxí'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila bití' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo. <sup>8</sup> Que lë ni na' ral-la' gunru' laní na', calëga zóalen rë'u cúa zi gulás na' le rulu'í le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' rulu'í le naca idü dxí'a, en le naca idütë li.

<sup>9</sup> Cate' buzúaja' queëli' lu guichi zí'alö, gudxi caza' libí'ili' bití' gunlí' tsözxón bönni' tunë' le ruá' dö'.

<sup>10</sup> Gudxa' libí'ili' caní, calëga para ucuítali' tsaz ga nacua' bönachi yödzülió ni, nupa tun le ruá' dö', en ga nacua' bönachi ta'zë ládxi'gaca le dë que luzé'eguequi, en ga nacua' yugu' bönni' gubán, en bönachi ta'yéaj ládxi'gaca budó' guió'j budó' yaga. Para gunlí' caní gun bayudxi irúajli' yödzülió ni. <sup>11</sup> Le ré'ëni inná didza' na' buzúaja' queëli' zí'alö naca para cabí gunlí' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizé ládxi'ë le dë que luzé'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Bití' ca' gágulenlí' tsözxón tuë' bönni' caní. <sup>12</sup> Bití' nequi quia' neda' uchi'a usöróa' nupa bití' nabábagaca rë'u. Dios uchi'a usöróë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

### Bití' ral-la' ichë'ëru' böchi' luzá'aru' lógaca bönachi yúlahui'

**6** Cate' ridil-la dídza'li' tulí' len ia'tulí', ¿nacxi caz rurúguili' tséajli' yúlahui' ga ulu'chi'a ulu'sörö nupa bití' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'. <sup>2</sup> ¿Naru' cabí nózili' nupa néquiquequi queë' Cristo ral-la' ulu'chi'a ulu'sörö yúgu'të bönachi yödzülió? Channö libí'i cázali' uchi'a usöröli' bönachi yödzülió, ¿naru' cabí nápalí' yöl-la' réajni' uchi'a usöröli' didza' bizxaj caní? <sup>3</sup> ¿Naru' cabí nózili' ral-la' uchi'a usöröru' yugu' gubáz lá'ayi? Rúntëro bayudxi uchi'a usöröru' le taca yödzülió ga ni zóaru' na'a. <sup>4</sup> Na'a, channö raca tu le run bayudxi nu uchi'a usörö, lë na' raca yödzülió ni, ¿bizx que rucua'ali' nupa ulu'chi'a ulu'sörö le, nupa na' bití' bi dë lu né'eguequi ládjagaca bönachi queë' Cristo? <sup>5</sup> Rnniá' caní para guna' ga utu'íli'. ¿Naru' cabí zóalen libí'ili' nu raca latí' nu gaca uchi'a usörö le raca quégaquië' böchi' luzá'ali'? <sup>6</sup> ¿Nacxi caz gaca tu bönni' réajlë'ë Cristo

ichë'ë böchi' luzé'ë yúlahui' ga ulu'chi'a ulu'sörö bönachi bití' ta'yéajlë' Cristo légaquië'?

<sup>7</sup> Le nácatë richixi riníguili' tu' ridil-la dídza'li'. ¿Bizx que bití' guá' ilenlí' nu ruá' dö' queëli'? ¿Bizx que bití' guá' ilenlí' nu rucáchi'lan le dë queëli'? <sup>8</sup> Libí'ili' ruá'ali' dö', en rucachi' lanlí', ate' runlí' caní quégaquië' böchi' luzá'ali' ta'yéajlë'ë Cristo.

<sup>9</sup> ¿Naru' cabí nózili' bití' ila'yaza bönachi bití' nácagaca tsahui' ga rinná bë'ë Dios? ¿Bití' sí' ye'e cuinlí'!

Bití' ca' tsaz ga rinná bë'ë Dios nu run le ruá' dö': Cuntu nu reaj ladxí' budó' guió'j budó' yaga, en cuntu nu riguitsaj xibá que yöl-la' nutsaga na', en cuntu nu bönni' run cuinë' ca nigula, en cuntu nu bönni' zóalenë' la' luzé'ë bönni'së', en cuntu nu bönni' gubán, en cuntu nu ruhuidí', en cuntu nu rizudxi, en cuntu nu rinnë xihui', en cuntu nu rucáchi'lan.

Bití' ca' tsaz nu run caní ga rinná bë'ë Dios.

<sup>11</sup> Caní gúcali' bál-lali' libí'ili', pero na'a chinuhuóacali' dxí'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

### Idütë le naca cázaru' nequi quez queë' Dios

<sup>12</sup> Ta'nná bönachi: "Yúgu'të dë lataj gunru'." Sal-la' nácatë didza' ni, bití' ral-la' gunru' yúgu'të. Sal-la' dë lataj guna' yúgu'të, bití' gu'a lataj bi inná be'e neda'. <sup>13</sup> Ta'n-ná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunitië' Dios la' huagu, enca' lé'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi' xibé' idütë le naca cázaru'. <sup>14</sup> Dios busubanë' Xanru' Cristo lu yöl-la' guti. Lëscá' caní, len yöl-la' huáca queë' usubanë' rë'u.

<sup>15</sup> ¿Naru' cabí nózili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunlí' ga ta' tu nigula udá dzaga? ¿Bití' ca' ral-la' gunlí' caní! <sup>16</sup> ¿Naru' cabí nózili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ílácagaquië' ca tuz bönachi iropë' na'." <sup>17</sup> Na'a, nu bönni' náquië' tuz len Xanru', náquië' tuz len Lë' lu bö' naca cazë'.

<sup>18</sup> Que lë ni na', bití' ca' gunlí' le ruá' dö'. Bití'tës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dza-ga lë cazë'. <sup>19</sup> ¿Naru' cabí nózili' idütë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' bití' nequi queézili' idütë le naca cázali'. Na'a, nequi queë' Dios. <sup>20</sup> Dios gú'uë' libí'ili' len tu le zxön le gudizxjë'. Guli'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiquequi queë' Dios idütë le naca cázali', enca' bö' naca cázali'.

## Rusédinë' Pablo ca naca que yöl-la' nutsaga na'

7 Na'a, ubi'a didza' yugu' le rinábili' neda', le buzúa-  
jli' quia' lu guichi. Gácarö dxí'a queë' nu bönni'  
channö cabí sóalenë'-nu nigula. <sup>2</sup> Tu' tunda' bönachi le  
ruá' dö' ga ni' zóali', yúgu'të bönni' nabábagaquië'  
libí'ili' ral-la' ila'cuá'lenë'-nu nigula que queégaquië',  
ate' yúgu'të nigula ral-la' ila'cuá'lennu-në' bönni' que  
queégacanu. <sup>3</sup> Bönni' na' zóanu nigula queë' ral-la'  
gunë' queénu nigula queë' ca naca yöl-la' run que yöl-  
la' nutsaga na', en la' lébisö ral-la' gunnu nigula len  
bönni' queénu. <sup>4</sup> Biti' dë lu ná'asönu nigula le naca  
cázanu, pero bönni' queénu dë lu në'ë ca' le. Lësca'  
caní, bití' dë lu ná'asë' bönni' le naca cazë', pero nigula  
queë' dë lu ná'anu ca' le. <sup>5</sup> Biti' ral-la' ila'dá'baguë'ë  
luzá'agaquië' bönni', en nigula na', nutsaga ná'a-  
gaquië'. Huácasö ca' channö ilunë' tuz didza' bití'  
ila'dzáguië' tu chí'sö para gaca ulu'lidzë' Dios idú lád-  
xí'gaquië'. Tödi na', bönni' na' ral-la' sóalenë'-nu nigula  
queë' leyúbölö, para cabí sequi' Satanás tu' xihui' gun  
ga tsázagaquië' nöza dul-la' tu' cabí gaca ila'nná be'e  
cuíngaquië'.

<sup>6</sup> Lë ni rea' libí'ili' naca tu le runnë' Xanru' libí'ili' lataj.  
Biti' naca le gunná bë'ë. <sup>7</sup> Runi neda' gácarö dxí'a  
ulu'gá'anë' tuz yúgu'të bönni', ca na' zoa' tuza' neda'. Tu  
tuë' bönni' rizi'ë tsca le runödzejë' Dios queë' gunë'. Tuë'  
rizi'ë tu le runödzejë', ate' ia'túé' rizi'ë ia'tú le runödzejë'.

<sup>8</sup> Na'a, rea' nupa zóagaca tuz, enca' yugu' nigula  
uzëbi, gácarö dxí'a quéguequi ulu'gá'ana tuz ca na'  
zoa' tuz neda'. <sup>9</sup> Channö cabí gaca ila'nná be'e cuín-  
gaquië', huáca ulu'tsaga ná'agaquië', tu' gácarö dxí'a  
ulu'tsaga ná'agaquië', en cabí ila'zë ládxi'gaquië' le ruá'  
dö'.

<sup>10</sup> Rinná bé'eda' nupa chinutsaga né'eguequi, en calë-  
ga néda'sö runa' xibá ni, pero Lë cazë' Xanru' runë' le,  
rnnë': "Biti' ulá'alennu tu nigula bönni' queénu."

<sup>11</sup> Channö nu nigula ulá'alennu-në' bönni' queénu, ral-  
la' ugá'ananu túzinu, o huóacanu tuz len bönni'  
queénu na'. Lësca' caní tu bönni' bití' ral-la' ucá'anë'-nu  
nigula queë'.

<sup>12</sup> Na'a, néda'sö rea' ia'zica'rö bönachi, en calëga rn-  
në' Xanru' caní, rnní'a': Channö zoë' nu böchi' luzá'aru'  
réajlë'ë Cristo, ate' nigula queë' bití' réajlë'ënu Xanru',  
en channö ré'ëninu ugá'analennu lë', bití' ral-la'  
ulá'alënë'-nu. <sup>13</sup> Lësca' caní rnní'a': Channö zóanu nu  
nigula zanru' réajlë'ënu Cristo, ate' bönni' queénu bití'  
réajlë'ë Xanru', en channö ré'ënnë' ugá'analënë'-nu,  
bití' ral-la' ulá'alennu lë'. <sup>14</sup> ¡Caní ral-la' ilunë'! Bönni'  
cabí réajlë'ë na', Dios rilé'enë' lë' ca tu bönni' néquinë'  
quez queë' tu' náquië' tuz len nigula queë' réajlë'ënu  
Cristo, ate' nigula caní, bití' réajlë'ënu, Dios rilé'enë'-nu  
ca tu nigula néquinu quez queë' tu' nácanu tuz len  
bönni' queénu náquië' böchi' luzá'aru' réajlë'ë Cristo.  
La'tu' cabí naca caní, ilácabi' zxi'inigaquië' ca yugu' bí'i  
lan lahuë' Dios. Na'a, nácacacabi' quez queë' Dios.

<sup>15</sup> Nu bönni' o nigula nu cabí réajlë' Cristo, channö  
ré'ëni ulá'alenu na' nutsaga ná'alenu, huáca ca'. Bití'  
run bayudxi ugá'alenu nu na' böchi' luzá'aru' o zanru'

nu réajlë' Cristo, tu' bulidzë' Dios rë'u para cózaru'  
tsáhui'dö'. <sup>16</sup> ¡Caní ral-la' gaca! Nadxi ca' li', nigula, huá-  
ca gunu' ga ulé' bönni' quiu', ate' nadxi ca' li', bönni',  
huáca gunu' ga ulanu nigula quiu'.

<sup>17</sup> Ral-la' gunru' tu turu' tsca le bennë' queéru' Xanru',  
enca' tsca guca queéru' cate' bulidzë' Dios rë'u para  
guéquiru' queë'. Rusédida' yúgu'të cö' bönachi queë'  
Cristo xibá ni. <sup>18</sup> Channö Dios bulidzë' nu bönni'  
narugu lu xipélë'ë le naca bë' néquinë' queë' Dios, ral-  
la' ugá'anë' caní, zoa lu xipélë'ë lë na' naca bë'. Lësca'  
caní, channö Dios bulidzë' nu bönni' bití' narugu lu  
xipélë'ë lë na' naca bë', bití' ral-la' ichúguië' lë na' lu  
xipélë'ë. <sup>19</sup> Biti' bi nazaca' lë na' narugu lu xipélë'ë tu  
bönni', en channö bití' narugu lu xipélë'ë bönni' lë na'  
naca bë', bití' bi nazaca'. Le nácada' lesaca' naca gunru'  
ca rinná bë' xibá queë' Dios. <sup>20</sup> Ral-la' ugá'anë' tu tuë'  
bönni' ca na' gúquië' cate' ni' bulidzë' Dios lë'. <sup>21</sup> Chan-  
nö bulidzë' li' cate' ni' nacu' bönni' nadó'o, bití' cö'u  
böniga tu' nacu' caní, pero channö gata' quiu' lataj iru-  
ju' lu na' xanu', buzí' xibé lataj na' gata' quiu' iruju'.

<sup>22</sup> Channö bulidzë' Xanru' nu bönni' cate' ni' nado'ë,  
lahuë' Xanru' náquië' ca nu bönni' narúajë' lu në'ë  
xanë' na', para gunë' xichinë' Xanru'. Lësca' caní, chan-  
nö bulidzë' Xanru' nu bönni' cate' ni' narúajë' lu në'ë  
xanë' na', bönni' ni náquië' ca tu bönni' nadó'o queë'  
Cristo. <sup>23</sup> Zxóntërö le gudizxjë' Dios, gú'uë' libí'ili'. Que  
lë ni na' bití' ral-la' gutí' cuinli' lu ná'agaca bönachi.  
<sup>24</sup> Que lë ni na' ca', böchi' luzá'ado', ral-la' sóali' lahuë'  
Dios tsca guca queé'li' tu tuli' cate' ni' bulidzë' Dios  
libí'ili'.

<sup>25</sup> Ca naca quégaca nupa bití' nutsaga ná'agaca, bití'  
bi gunná bé'enë' Xanru' neda'. Caní runi neda', ate'  
huáca uzxöni ládxi'li' neda' tu' ruhuéchi' ládxi'ë Xanru'  
neda'. <sup>26</sup> Tu' taca zían le raca queéru' dza ni zóaru' na'a,  
runi neda' gácarö dxí'a channö ulu'gá'anë' yúgu'të bön-  
ni' ca nácagaquië' na'a. <sup>27</sup> Channö nutsaga ná'lenu'-nu  
nigula, bití' ulá'alenu'-nu. Lësca' caní, channö zu' tuzu',  
bití' quilju' tu nigula para utsaga ná'lenu'-nu. <sup>28</sup> Na'a,  
channö utsaga ná'lenu'-nu nigula, bití' gunu' dul-la', en  
channö tu bí'i nigula utsaga ná'aleni'-në' bönni', bití'  
gunbi' dul-la', pero ila'guí' ila'zaca' nupa nutsaga ná'a-  
gaca yödölió ni, ate' ré'ënda' guna' ga uláli' lu yöl-la'  
rigu'í rizaca' na'.

<sup>29</sup> Na'a, rea' libí'ili' lë ni, böchi' luzá'ado'. ¡Chizóa idxín  
dza údxí! Que lë ni na', yugu' bönni' nutsaga ná'lenu-  
gaquië'-nu nigula ral-la' ilu'í ládxi'gaquië' Dios, ca runë'  
nu bönni' bití' nutsaga ná'alënë' nigula. <sup>30</sup> Lësca' caní,  
nupa ta'bödxi yechi' ral-la' ulu'dzeja lahuë' Dios ca run  
nu bití' ribödxi, ate' nupa tu'dzeja ral-la' ila'cuá' nöxaj  
lahuë' Dios ca run nu bití' rudzeja, ate' nupa to'o ral-la'  
ilaca ca nu bití' bi dë que. <sup>31</sup> Nupa tu'gún dxin le dë  
yödölió ni ral-la' ilaca ca nu bití' ru'í ládxi' le dë  
yödölió ni, tu' udödi quégaca le rilé'ëru' yödölió ni.

<sup>32</sup> Ré'ënda' bití' ubi ugu'í'ili'. Tu bönni' bití' zóanu nigu-  
la queë' ru'í ládxi'ë le nequi queë' Xanru', naca gunë'  
le raza ládxi'ë Xanru'. <sup>33</sup> Tu bönni' nutsaga ná'lenu'-nu  
tu nigula ru'í ládxi'ë le raca yödölió, naca gunë' le  
raza ládxi'nu nigula queë'. <sup>34</sup> Lësca' caní raca queénu tu

nigula nutsaga ná'lennu-në' bönni', en queénu nigula na' zóanu túzinu. Nigula na' zóanu túzinu ru'íi ládxi'nu le nequi queé' Xanru', naca sóanu quez queé' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ru'íi ládxi'nu le raca yödžolió ni, naca gunnu le raza ládxi'ë bönni' queénu.

<sup>35</sup> Yugu' lë ni rea' libí'ili' para uzí'ili' xibé lë ni, en calëga para uzága'a xinóžili'. Ré'ënda' gunlí' le ral-la' gunlí', para gunlí' xichinë' Xanru' idú ládxi'li'.

<sup>36</sup> Channö zoë' tu bönni' réquinë' bití' naca dxi'a ugá'anabí' túzibi' bí'i nigula ra'bando' queé', en chizóa iz queé'bi', en ré'ënde'ebi' utsaga ná'aleni-në' bönni', huáca utsaga ná'aleni-në'. ¡Bití' gunbí' dul-la'! <sup>37</sup> Channö chinún tsutsu xtídzë'ë bönni' na', en bití' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabí' túzibi', gunë' le naca dxi'a bönni' na'. <sup>38</sup> Caní naca, nu ru'íi lataj bí'i que utsaga ná'aleni-në' bönni', run le naca dxi'a, pero nu run ga ugá'anabí' túzibi' run le nácarö dxi'a.

<sup>39</sup> Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabanë' bönni' queénu. Channö gátië' bönni' queénu, gata' lu ná'anu utsaga ná'lennu-në' nu bönni' ré'ëninu, channö réajlë'ë Xanru' bönni' na'. <sup>40</sup> Runi neda' gácarönu bica' ba channö ugá'anu túzinu, en réquida' Bö' Lá'ayi queé' Dios runë' neda' tzaxón.

#### Le ta'gú'u bönachi lógaca budó' guió' budó' yaga

**8** Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guió' budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxon cuinru', pero yöl-la' nadxi'i queéru' luzá'aru' run ga rácalenru' luzá'aru'. <sup>2</sup> Channö zoë' nu bönni' réquinë' chiréajni'inë', bití' bi réajni'ininë' ca ral-la' tséajni'inë', <sup>3</sup> pero nu bönni' nadxi'inë' Dios, Dios caz zóalenë' bönni' na'.

<sup>4</sup> Na'a, ca naca que le ré'aj ráguru', lë na' gula'gú'u bönachi lógaca budó' guió' budó' yaga, nóziru' bití' bi nazáca'gaca budó' guió' budó' yaga na' yödžolió ni, en cúnturö nu zoa naca Dios. <sup>5</sup> Sal-la' nacua' le téquiguequi bönachi nácgaca dios, le nacua' lúxiba, en le nacua' luyú, ate' zían le tu'lidza bönachi, en tu'íi lágaca: dios, enca': xan, <sup>6</sup> pero queéru' ré'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

<sup>7</sup> Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guió' budó' yaga, ga ridxintë na'a dza të'aj tahuë' le gula'gú'u bönachi lógaca budó' guió' budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. <sup>8</sup> Bití' gun le gu'aj gáguru' ga gunë' Dios ré'u bal. Channö gáguru' le, bití' gá-

caröru' dxi'a, en channö cabí gáguru' le, bití' gácaröru' cá'asö. <sup>9</sup> Dë lu ná'alí' gu'aj gáguli' bítí'tës. Gulí'gún chí'i cuinlí' para cabí gunlí' ga ila'chixi ila'nigui nupa bití' naca idú ca ta'yéajlë' Cristo. <sup>10</sup> Nadxi ca' li' réquinu' napa' yöl-la' réajni'i ca naca lë ni, en huáca gagu' bítí'tës. Channö cö'u xilataj budó' guió' budó' yaga, en gu'aj gagu' le gula'gú'u bönachi lo budó' guió' budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guió' budó' yaga na'. <sup>11</sup> Caní gaca, tu' réquinu' napa' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queé' böchi' luzó'o, ni'a que nu na' gútië' Cristo? <sup>12</sup> Channö caní gunu', gunu' dul-la' tu' usub-águ'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölál'alö. <sup>13</sup> Que lë ni na', channö le gu'aj gahua' gun ga ichixi iníguinë' böchi' luzá'a, bítí'rö gahua' bëla' na', para cabí guna' ga gunë' böchi' luzá'a dul-la'.

#### Le dë lu në'ë nu bönni' gubáz nasól-lë'ë Cristo

**9** ¿Naru' cabí naca' gubáz nasól-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácalí' queé' Cristo ni'a que dxin bena' neda' uláz queé' Xanru'? <sup>2</sup> Nadxi ca' téquiguequi ia'zica'rö bönachi bití' naca' gubáz nasól-lë'ë Cristo. Libí'ili' run bayudxi guéquili' naca' gubáz queé' Cristo. Tu' nácalí' queé' Xanru', le naca cázali' naca bë' naca' gubáz nasól-lë'ë Xanru'.

<sup>3</sup> Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le gu'aj gahua' tu' runa' dxin ni. <sup>5</sup> Lësca' caní dë lu na'a utsaga ná'alena'-bí' tubí' bí'i nigula zanru' réajlë'ëbi' Cristo para gunbí' neda' tsözxon ga ridá', ca na' tunë' ia'zica'rë' gubáz nasól-lë'ë Cristo, en yugu' bönni' bóchë'ë Xanru', enca' Pedro.

<sup>6</sup> ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'? <sup>7</sup> ¿Nuzxi caz bönni' rejë' gudil-la, ate' riguixjë' la' cuinsë'? ¿Nuzxi caz bönni' rudë'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en bití' re'jë' nidxi' quégacaba'? <sup>8</sup> Bití' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queé' Moisés. <sup>9</sup> Lu xibá queé' Moisés nazúaj lu guichi le rnna: Bití' cu'u du rúa'aba' bëdxi cate' rulíbiba' zxoá' xtila. Bë'ë Dios didza' ni, calëgasö tu' ru'íi ládxi'ë-ba' bëdxi, <sup>10</sup> pero para uzí'iru' ca' xibé ré'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'libiba' bëdxi zxoá' xtila, iropë' na' ral-la' ilunë' löza ila'zi'ë que le rulá' luyú na'. <sup>11</sup> Na'a, channö bentu' dxin ga zóali', le naca ca dxin guz gú'una, lë na' naca queé' Dios Bö' Lá'ayi, ¿naru' réquitseli' bití' ral-la' uzí'itu' xibé tu le do' dë queéli' ca na' ruzi'ë xibé bönni' guz gú'una le rulapë'? <sup>12</sup> Ia'zica'rö bönachi tu'zéajni'inë' libí'ili' tu'zi'ë xibé le dë queéli'. ¿Naru' cabí rála'tërö uzí'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gu-lentu' yúgu'të para gaca guntu' libán que didza' dxi'a

ca naca queë' Cristo. <sup>13</sup> Nöz quézili' ca raca quégaca nupa tun dxin que yudo', tu'z'í' xibé gun que yudo'. Lësca' caní nupa ta'gú'u rön quégacaba' böa' bédxi lu bucugu lá'ayi queë' Dios, tahuë' bëla' quégacaba' böa' bédxi na'. <sup>14</sup> Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxí'a. Nupa tu'z'í' xibé libán na' tunë' ral-la' ulu'gagu légaquië'.

<sup>15</sup> Neda' catu caz buzi'a xibé lë ni dë lu na'a, ate' lë ni ruzúaja' lu guichi ni bití' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxí'a. Guë'ënitëra' gátia' ca gu'a lataj nu innë runa' libán na' tu' nazxja'.

<sup>16</sup> Bití' dë lu na'a gun ba zxön cuina' tu' runa' libán que didza' dxí'a, tu' run bayudxi guna' libán que. Bica' bayechi' neda' channö cabí guna' libán que didza' dxí'a.

<sup>17</sup> La'tu' runa' libán tu' ré'ëni quézida', huáca inaba' lazxa', pero run bayudxi guna' libán, tu' naca tu le busubáguë'ë Dios neda' guna'. <sup>18</sup> ¿Bizxi lazxa' uzi'tsa' xibé channö? Ruzi'a xibé le raza lãdxa'a tu' cabí nazxja' cate' runa' libán que didza' dxí'a. Bití' ca' ruzi'a xibé lë na' dë lu na'a tu' runa' libán que didza' dxí'a.

<sup>19</sup> Na'a, sal-la' cunttu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca zianró ca' bönachi. <sup>20</sup> Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' bití' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. <sup>21</sup> Cate' runa' libán lógaca bönachi izá'a, nupa bití' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lé'. Bití' rucá'ana' cá'asö xibá queë' Dios. Neda' runa' ca rinná bë' xibá queë' Cristo. <sup>22</sup> Run cuina' ca tu bönni' bití' naca idú ca réajlë'ë Cristo para gaca guna' ga ulu'lágaca nupa na' bití' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'. <sup>23</sup> Lu yúgu'të lë ni runa', runa' ga ta'yöni bönachi didza' dxí'a, para gaca uzi'a xibé tsözxön len libí'ili' didza' dxí'a na'.

<sup>24</sup> Chinóz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queéli'. <sup>25</sup> Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregu' zin le inítitë, pero idéli'ru' rë'u tu le uzítica'siru' xibé. <sup>26</sup> Que lë ni na', naca' neda' ca tu bönni' idú lãdxë'ë rixíti'ë. Naca' ca' ca tu bönni', idú lãdxë'ë ridil-lë'. Bití' rucudxa' lu bö'ös. <sup>27</sup> Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

Bití' ral-la' tseaj lãdxí'ru' budó' guió'j budó' yaga

**10** Ré'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u xzul-la tu böaj yúgu'të'. Lësca' caní, gula'dödë' yúgu'të' gatsaj lãhui'lö nísado'. <sup>2</sup> Lu böaj ní', en lu nísado' ní', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés. <sup>3</sup> Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégaquië'. <sup>4</sup> Gulé'ajë' yúgu'të' nisa na' bunödzjë' Dios Bö' Lá'ayi quégaquië', tu' gulé'ajë' nisa birúaj lë'e guió'j na' bulu'e lahui Dios Bö' Lá'ayi, guió'j na' gula'báni'ë légaquië'. Ca guca guió'j na' naca cazë' Cristo, nabániru' Lë'. <sup>5</sup> Sal-la' guca caní, bití' guyaza lãdxë'ë Dios yúgu'të'. Que lë ni na' gulátië' lu lataj cá'asö.

<sup>6</sup> Yúgu'të lë ni naca tu le ruzéajni'i rë'u, para cabí së lãdxí'ru' le ruá' dö', ca na' gula'zë lãdxí'gaquië' légaquië'. <sup>7</sup> Bití' ral-la' tseaj lãdxí'ru' budó' guió'j budó' yaga, ca na' gulunë' bal-lë' légaquië'. Nazúaj lu guichi lá'ayi le rna: "Gula'bö'ë bönni' ní', en gulé'aj gulahuë', ate' gula'yasë', en gulunë' laní que budó' na'." <sup>8</sup> Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. <sup>9</sup> Bití' ral-la' sí' bë'ëru' Xanru', ca na' gula'z'í' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. <sup>10</sup> Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítie' légaquië'.

<sup>11</sup> Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizó'a údxi que yödzülió ni.

<sup>12</sup> Que lë ni na', nu réqui chinal-la, ral-la' gun chí'i cuini, para cabí ichixi inigui. <sup>13</sup> Ca naca le ta'z'í' bë' libí'ili' raca ca' quéguequi yúgu'të bönachi. Dios runë' ca rnnë', en bití' gu'ë lataj bi sí' bë' libí'ili' le cabí gaca guá' ilenli', pero cate' bi sí' bë' libí'ili', ulu'ínë' libí'ili' naca gaca irúajli' lu na' tu' xihui', para gaca guá' ilenli'.

<sup>14</sup> Que lë ni na', böchi' luzá'ado', bití' tseaj lãdxí'li' budó' guió'j budó' yaga. <sup>15</sup> Ru'ílëna' libí'ili' didza' ca ru'ílëna' didza' nupa ta'yéajni'i. Buli'chí'a buli'sörö didza' ni gu'a. <sup>16</sup> Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' rulu'í' nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzjaru', en ráguru', rulu'í' dzágaru'-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'. <sup>17</sup> Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

<sup>18</sup> Buli'yútsöca' ca tunë' bönni' Israel. Bönni' ní' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'í' dzágagaquië' Dios. <sup>19</sup> ¿Bizxi rna didza' ni ruá'a? Bití' rnniá' napa budó' guió'j budó' yaga yöl-la' huáca, en le ta'gú'u bönachi lógaca budó' guió'j budó' yaga na' bití' napa yöl-la' huáca. <sup>20</sup> Caní rnniá': Lë na' ta'gú'u bönachi bití' núnbë'gaquië' Dios lógaca budó' guió'j budó' yaga, ta'gú'u lógaca bö' xihui', en calëga



lahuë Dios. Ré'ènda' bití' idzágalí' yugu' bö' xihuí'.  
<sup>21</sup> Bití' gaca guí'jalí' le ruluí'í nácaru' tuz len Xanru', enca' lè na' uluí'í nácalí' tuz len yugu' bö' xihuí'. Bití' gaca gágulí' le ruluí'í dzágaru'-nè' Xanru', enca' le uluí'í dzágalí' yugu' bö' xihuí'.<sup>22</sup> ¿Naru' gúntsaru' ga uzxé'enè' Xanru'? ¿Naru' réquitseli' nápatèröli' yöl-la' huáca ca napè' Lè'?

**Le dè lu ná'aru' gunru', en ca ral-la' idxí'igacru'-nè' böchi' luzá'aru'**

<sup>23</sup> Naca idútè li didza' na' rnna: "Yúgu'tè dè lu ná'aru' gunru'." Na'a, neda' rnní'a: Calèga yúgu'tè ral-la' gunru'. Yúgu'tè dè lu ná'aru' gunru', pero calèga yúgu'tè gun ga gácarö idú ca réajlè'èru' Cristo.<sup>24</sup> Ral-la' gúfí'í ládxi'ru' gunru' le gun ga gaca dxí'a quégaquie' böchi' luzá'aru', en calégasö le gun ga gaca dxí'a que la' cuínsiru'.

<sup>25</sup> Bítí'tès bi tutí' bönachi lu yé'eyi, huáca gágulí', en bití' bi ral-la' inábalí' que, para cabí cuéqui böniga ládxi'do'oli'.<sup>26</sup> Nazúaj lu guichi le rnna: "Queè' Xanru' nequi yödzülió ni, enca' yúgu'tè le dè yödzülió ni."

<sup>27</sup> Channö ulidzè' tu bönni' bití' réajlè'è Dios libí'ili' para guídali' lidxè', ate' gué'ènilí' tséajli', guli'gagu yúgu'tè le cu'è loli', en bití' bi inábalí' que, para cabí cuéqui böniga ládxi'do'oli'.<sup>28</sup> Channö nútí'tès nu guíè libí'ili': "Lè ni gula'gu'è lo budó' guiój budó' yaga", bití' gágulí' lè na' para gaca dxí'a que nu na' gudí'xjöi'í caní libí'ili', en para cabí cuéqui böniga ládxi'da'ahuè'.<sup>29</sup> Rn-ní'a: Para cabí cuéqui böniga ládxi'da'ahuè' bönni' na' gudí'xjöi'ine' caní libí'ili', en calèga para cabí cuéqui böniga ládxi'do'oli' libí'í cázalí'.

Nadxi ca' nu inábini neda', inná: "¿Bizx que ral-la' uzó'a tsölál'aló le dè lu na'a guna' tu' ribequi böniga ládxi'da'ahuè' bönni' yúbölió?"<sup>30</sup> Huáca inná ca' nu na': "Channö guía'-nè' Dios: Xclenu', ní'a que lè na' rahua', ¿bizx que nu uzegui neda' didza' ní'a que lè na' rahua'?"<sup>31</sup> Channö bi gágulí' o bi guí'jalí', o bítí'tès bi gunlí', guli'gún yúgu'tè para gaca queè' Dios yöl-la' ba.<sup>32</sup> Bití' bi gunlí' le gun ga ila'chixi ila'nigui bönachi judío, en bití' gunlí' le gun ga ila'chixi ila'nigui bönachi bití' náca-gaca judío, en bití' gunlí' le gun ga ila'chixi ila'nigui bönachi queè' Dios.<sup>33</sup> Guli'gún ca runa' neda'. Ruí'í ládxa'a guna' le ila'yaza ládxi'gaca yúgu'tè bönachi, en bití' ruí'í ládxa'a guna' le uzi'a xibé la' néda'sö, pero le ulu'zí' xibé ia'zica'rö bönachi para ulu'lágaca.

**11** Guli'gún ca runa' neda', ca na' neda' ca' runa' ca benè' Cristo.

**Le tunnu nigula lógaca bönachi queè' Cristo**

<sup>2</sup> Runa' libí'ili' zxön, böchi' luzá'ado', tu' röjnética'silí' neda', en nazí' lu ná'ali' xibá budöda' lu ná'ali'.<sup>3</sup> Na'a, ré'ènda' tséajni'ili' rinná bé'enè' Cristo yúgu'tè bönni', ate' bönni' rinná bé'enè'-nu nigula, ate' Dios rinná bé'enè' Zxí'inè', Bönni' na' náquiè' Cristo.<sup>4</sup> Channö tu bönni' rulidzè' Dios, o ru'è didza' uláz queè' Dios, en dxía icjè' xilu'è, rucá'anè' Cristo cá'asö.<sup>5</sup> Na'a, channö tu nigula rulídzanu Dios, o ruí'ínu didza' uláz queè'

Dios, en bití' bi zxoá ícjanu, rucá'ananu bönni' queénu cá'asö, en naca queénu ca naca queénu tu nigula narugu guitsa' ícjanu.<sup>6</sup> Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'ínu nigula na' channö nu chugu guitsa' ícjanu, ral-la' bi ixóá ícjanu.<sup>7</sup> Tu bönni' bití' bi ral-la' udxía icjè' cate' ridxinè' lahuè' Dios, tu' náquiè' ca naca cazè' Dios, ate' lè na' náquiè' bönni' ruluí'í lahui yöl-la' zxön queè' Dios, pero le nácanu nigula na' ruluí'í lahui yöl-la' zxön queè' bönni' queénu.<sup>8</sup> Cate' benè' Dios bönachi, bití' bubéajè' bönni' na' lu nigula. Nigula na', lu bönni' na' bubéajè'-nu.<sup>9</sup> Lèasca' caní, bití' benè' Dios bönni' para uzí'ínu xibé' nigula, pero benè' nigula para uzi'è xibánu bönni'.<sup>10</sup> Que lè ni na', nigula na' ral-la' ixóá ícjanu le ruluí'í zoa nu rinná be'e lènu tu' tu'yúé' gubáz lá'ayi queè' Dios ré'u.<sup>11</sup> Na'a, lahuè' Xanru', tu bönni' riquin-nè'-nu nigula queè', ate' nigula na' riquíninu-nè' bönni' queénu.<sup>12</sup> Ca na' benè' Dios, bubéajè'-nu nigula lu bönni', lèasca' caní na'a, yúgu'tè bönni' náljlengaquie'-nu nigula, ate' yúgu'tè rirúaj lu néè' Dios.

<sup>13</sup> Bulí'chi'a bulí'söró la' libí'silí'. ¿Naru' ral-la' ulídzanu-nè' Dios tu nigula bití' bi zxoá ícjanu? <sup>14</sup> ¿Naru' cabí rusèdi libí'ili' yöl-la' nácatè quégaca bönachi, ral-la' utuí'ine' bönni' na' ru'è lataj itunna guitsa' icjè'? <sup>15</sup> Na'a, channö natúnna guitsa' ícjanu tu nigula, naca yöl-la' lachi queénu, tu' bèè' Dios queénu guitsa' ícjanu para usubín ícjanu.<sup>16</sup> Channö zoa nu gué'èni tá'baga' didza' ni, canísö nazí' lu na'tu' runtu', en lébisö tun yugu' cö' bönachi queè' Dios.

**Bönachi Corinto tu'cá'ana cá'asö le rë'aj ráguru' para usubanru' ca gútiè' Xanru'**

<sup>17</sup> Bití' runa' libí'ili' bal ca naca le uzéajni'ida' libí'ili' na'a. Le runlí' bití' run ga raca dxí'a queé' cate' rudúbilí' queè' Cristo, pero run ga raca queé' le cabí naca dxí'a.<sup>18</sup> Risí lahua' ruzéajni'ida' libí'ili' lè ni ta'guí'xjöi'í bönachi neda', ta'nná: "Cate' rudúbilí' queè' Cristo, narúajli' choplö", ate' réajlè'a nadxi ca' naca caní.<sup>19</sup> Run bayudxi ila'cuá'alen libí'ili' nupa tu'sedi le cabí nácatè para ilaca bè' nupa náca-gaca idú bönachi queè' Cristo.<sup>20</sup> Que lè ni na', cate' rudúbilí', lè na' rágulí' tsözxón bití' naca le rë'aj ráguru' para usubanru' ca gútiè' Xanru'.<sup>21</sup> Caní naca, tu' runlí' bayudxi tu tulí' rágulí' le nuá'ali' que queé' cate' rágulí' tsözxón, ate' que lè ni na' ridunlí' bál-lalí', ate' ia'bál-lalí' rë'aj rágulí' ga ridxintè rizúdxilí'.<sup>22</sup> ¿Naru' cabí zoa lídxilí' ga huáca guí'aj gágulí'? Ca na' runlí', rucá'anali' bönachi queè' Dios cá'asö, en runlí' ga tu'tuí'í nupa bití' bi dè quéquequi. ¿Bizxi caz guía' libí'ili'? ¿Naru' guntsa' libí'ili' bal? Bití' ca' runa' libí'ili' bal ca naca lè ni runlí'.

**Le rë'aj ráguru' para usubanru' ca gútiè' Xanru'**

<sup>23</sup> Xanru' caz budödè' lu na'a lè na' busédidá' libí'ili', ca na' benè' Xanru' Jesús yèla ní' cate' nu budödi Lè' lu ná'agaquie' bönni' gulútiè' Lè'. Gudélè'è yöta xtila,<sup>24</sup> en cate' budxi gudxè' Dios: "Xclenu'", buzxuzxjè' le, en gunné: "Guli'gagu. Lè ni naca xipéla'a le nayuzxaj uláz

queé'li'. Gulí'gún caní, para usubanli' ca gaca quia' neda'." <sup>25</sup> Lësca' caní, gudödi gulahuë', gudélé'ë tu xzí-ga'do', en gunné': "Le yudzu xzíga'do' ni naca xichöna', le run tsutsu didza' cubi rucá'ana tsahui'. Gulí'gún caní yúgu'të luzuí guí'jali' le, para usubanli' ca gaca quia' neda'." <sup>26</sup> Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu xzíga'do' caní, ulu'íli' lahui ca gútië' Xanru'.

### Ca ral-la' gunru' cate' guí'aj gáguru' para usubanru' ca gútië' Xanru'

<sup>27</sup> Que lë ni na', nútítës nu gagu yöta xtila ni o guí'aj que le yudzu xzíga'do' ni queë' Xanru', en bití' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. <sup>28</sup> Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu xzíga'do' ni. <sup>29</sup> Nútítës nu rë'aj ragu lë ni, en bití' run le bal tu' cabí réquibe'e rulu'í le guca queë' Xanru', rusubaga' cuini dul-la' ní'a que lë na' rë'aj ragu. <sup>30</sup> Que lë ni na' te'e zían nupa dzágagaca libí'ili', en ta'cuídí', ate' zianguequi chinátigaca. <sup>31</sup> La'tu' uchi'a usöröru' la' cuínsiru', bití' uchi'a usöröë' Xanru' rë'u. <sup>32</sup> Channö gun bayudxi uchi'a usöröë' Xanru' rë'u, usaca' zí'ë rë'u, para cabí irugu queëru' cate' ichúguie' quéguequi bönachi yödzülió ilátigaca.

<sup>33</sup> Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', gulí'cöza luzá'alí'. <sup>34</sup> Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runlí', pero ucá'ana' tsahui' yugu' lë na' cate' uduyúa' libí'ili'.

### Yugu' yöl-la' huáca runnë' queëru' Dios Bö' Lá'ayi

**12** Na'a, böchi' luzá'ado', ré'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

<sup>2</sup> Nöz quézilí' ca guca cate' ní' bití' réajlë'ënilí' Cristo, bé'ëli' lataj gula'ché' bönachi libí'ili' ga yúbölä. Guyéaj ládxi'li' budó' guió'j budó' yaga, le cabí ta'nnë'. <sup>3</sup> Que lë ni na', ruzéajni'ida' libí'ili' caní, rnnia': Ladaj yúgu'të nupa tu'í didza' uláz queë' Bö' Lá'ayi queë' Dios, cuntú nu gaca innë xihui' queë' Jesús, en nitúë' gaca innë': "Jesús náquië' Xanru'", channö cabí zóalenë' Dios Bö' Lá'ayi nu na'.

<sup>4</sup> Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. <sup>5</sup> Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. <sup>6</sup> Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. <sup>7</sup> Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'. <sup>8</sup> Dios Bö' Lá'ayi runödzjé' queë' tu bönni' yöl-la' huáca ru'ë didza' len yöl-la' rá-cada', ate' ia'túë' bönni', Lë cazë' Bö' Lá'ayi runödzjé' queë' yöl-la' huáca ru'ë didza' lu yöl-la' réajni'i'. <sup>9</sup> Lësca' caní, Lë cazë' Dios Bö' Lá'ayi na' runödzjé' queë' ia'túë'

bönni' yöl-la' réajlë' Cristo bi gunë', ate' ia'túë' bönni' runödzjé' queë' yöl-la' huáca ruúnë' nupa te'e. <sup>10</sup> Ia'túë' bönni' runödzjé' queë' yöl-la' huáca runë' yugu' yöl-la' huáca que yehua' yubá, ate' ia'túë' bönni' ru'ë lë' lataj ru'ë didza' uláz queë' Dios, ate' ia'túë' bönni' runödzjé' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzjé' queë' ia'túë' bönni' yöl-la' huáca ru'ë didza' yúbölä le cabí nazëdë', ate' queë' ia'túë' bönni' yöl-la' huáca rudödë' didza' yúbölä na' bití' nazëdë'. <sup>11</sup> Yúgu'të lë ni runë' Lë cazë' Dios Bö' Lá'ayi, tu' runödzjé' que tu tu bönachi tsca ré'ëni quézinë'.

### Yúgu'tëru' nácaru' ca tuz bönachi

<sup>12</sup> Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaca tuz idütë le naca cázaru', lësca' caní naca queë' Cristo. <sup>13</sup> Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' ná-caru' ca tuz bönachi, sal-la' nácaru' yugu' bönni' judío, en yugu' bönni' zítu', enca' yugu' bönni' nadó'ogaquië', en yugu' bönni' bití' nadó'ogaquië'. Yúgu'tëru', Dios bë'ë rë'u lataj sí'iru' le runödzja cazë' Bö' Lá'ayi.

<sup>14</sup> Na'a, lu idütë le naca cázaru', zían le nagudi' dzágalenru', en calëga tuz. <sup>15</sup> La'tu' huáca gü'í didza' ní'aru', huanná: "Tu' cabí naca' në'ë bönni', bití' néquida' queë'", didza' ni bití' gun ga bití' nequi queë' bönni' na'. <sup>16</sup> La'tu' huáca gü'í didza' nágaru', huanná: "Tu' cabí naca' guió'j lahuë', bití' néquida' queë' bönni' ni", didza' ni bití' gun ga bití' nequi queë' bönni' na'. <sup>17</sup> La'tu' naca guió'j loru' idütë le naca cázaru', ¿nacxi gaca yóniru'? La'tu' naca nágaru' idütë, ¿nacxi gaca il'é xzína'ru'? <sup>18</sup> Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. <sup>19</sup> La'tu' naca tuz le nagudi' dzágalenru', bití'rö soa idú ca naca cázaru'. <sup>20</sup> Na'a, ca nácaru', zían le nagudi' dzágalenru', pero tuz le nácaru'.

<sup>21</sup> Que lë ni na', guió'j loru' bití' gaca guíë ná'aru', inná: "Bití' riquinda' lí'." Lësca' caní, ícjaru' bití' gaca guíë ní'aru', inná: "Bití' riquinda' libí'ili'." <sup>22</sup> Na'a, yugu' le nagudi' dzágalenru', lë na' réquiru' nácacagarö cuídí'sö, lë ni naquíniröru'. <sup>23</sup> Lësca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxí'a, en yugu' le réquiru' bití' ral-la' ilá' lahui, rugácuröru' ca' dxí'a. <sup>24</sup> Bití' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. <sup>25</sup> Caní benë', ate' bití' narúajgaca choplö le nagudi' dzágalenru', tu' tun chí'í luzé'eguequi tu ia'tú. <sup>26</sup> Channö gaca zí' tu le néquiniru', ilaca zí' tsözxón len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxón le.

<sup>27</sup> Na'a, libí'í cázali' dzágali' idütë le naca cazë' Cristo, ate' tu tulí' nácalí' ca yugu' le nagudi' dzágalenë'. <sup>28</sup> Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'. Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö bití' nazédagaquië'.

<sup>29</sup> Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

<sup>30</sup> Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö bití' nazédagaquië'.

Calëga yúgu'të' tu'dödë' didza' yúbölö bití' nazédagaquië'.

<sup>31</sup> Gulí'gü'í ládxi'ilí' cu'ë Dios lu ná'alí' yugu' yöl-la' huáca na' nácagacarö lesaca'. Na'a, ulu'í'ida' libí'ilí' tu le ná-carö lesaca' ca yúgu'të' lë ni.

### Yöl-la' nadxí'i

**13** Sal-la' gaca gu'a xtídza'gaca bönachi le cabí nazëda', enca' xtídza'gacuië' gubáz lá'ayi queë' Dios, pero channö cabí nadxí'ida' luzá'a, didza' gu'a bití' gácarö lesaca' ca bö le run gui rucódxiru' o guië rutíllaru' luzé'e. <sup>2</sup> Sal-la' nazí' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' guí'a, pero channö cabí nadxí'ida' luzá'a, bití' bi nazáca'a. <sup>3</sup> Sal-la' quísia' idütë le dë quia' para ugahua' yugu' bönachi yechi', en sal-la' udöda' idütë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, bití' ca' uzi'a xibé lë na' runa'.

<sup>4</sup> Nu bönni' nadxí'inë' luzé'ë, ribözë' zxön ladxí'.

Náquië' dxi'í ladxí', en bití' ruzxé'enë' luzé'ë.

Nadxí'inë' luzé'ë idú ladxé'ë.

Bití' run ba zxön cuinë', en bití' run cuinë' lo.

<sup>5</sup> Bití' runë' le ruá' dö'.

Bití' rudúli'në' le dë queë'.

Bití' rilétenë', en bití' rönjenë' dö' gulu'í' bönachi queë'.

<sup>6</sup> Bití' ca' rudzëjanë' cate' nu run le ruá' dö'.

Rudzëjanë' cate' nu run le naca idütë li.

<sup>7</sup> Ruá' rilënë' bití'tës bi gun luzé'ë queë'.

Réajlë'tica'sé' luzé'ë.

Rúntica'sé' löza gun luzé'ë le naca dxi'a.

Ribózatica'sé' zxön ladxí'.

<sup>8</sup> Bití'rö tödi que yöl-la' nadxí'i. Huadödi que le dë lu ná'agaca bönachi ilu'í' didza' uláz queë' Dios. Huadxín dza cate' bití'rö ga' lu ná'agaca bönachi ilu'í' didza' yúbölö le cabí nazédagaca, ate' huadödi que yöl-la' réajni'i quéguequi bönachi. <sup>9</sup> Láti'do'os réajni'iru' na'a, en láti'do'os ca' ru'í'ru' didza' uláz queë' Dios. <sup>10</sup> Cate' idxín le naca idú, ní'irö údxi que lë na' naca láti'do'os.

<sup>11</sup> Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'. <sup>12</sup> Na'a le rilé'eru' naca ca le rilé'eru' cate' ruyú cuinru' tu lu guië dxí'lido'. Bití' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. <sup>13</sup> Na'a, nacuatí-ca'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacua' yonna ni, pero le naca lo naca yöl-la' nadxí'i.

### Yugu' yöl-la' huáca runnë' queëru' Dios Bö' Lá'ayi

**14** Gulí'gún bayudxi idxí'ilí' luzá'alí', en gulí'gü'í ládxi'ilí' sí'ilí' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca gü'í'ilí' didza' uláz queë' Dios. <sup>2</sup> Nu ruí'í didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntu nu zoa réajni'i didza' ruí'í nu na'. Dios Bö' Lá'ayi ru'ë nu na' lataj ruí'í didza' ca nácagaca le nagachi' queë' Dios. <sup>3</sup> Nu na' ruí'í didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhué tsahui' léguequi. <sup>4</sup> Nu na' ruí'í didza' yúbölö le cabí nazëda run tsutsu la' cuinsi, pero nu ruí'í didza' uláz queë' Dios run tsutsu yúgu'të bönachi queë' Cristo.

<sup>5</sup> Raca ládxa'a gü'í'ilí' didza' yúbölö le cabí nazédali' yúgu'tëli', pero le naca lo, ré'ënda' gü'í'ilí' didza' uláz queë' Dios. Ruzí'iröru' xibé nu ruí'í didza' uláz queë' Dios ca ruzí'iru' xibé nu ruí'í didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. <sup>6</sup> Que lë ni na', böchi' luzá'ado', cate' guí'ida' ga zóali', channö gü'í'ilena' libí'ilí' didza' yúbölö le cabí nazëda', bití' bi uzí'ilí' xibé. Uzí'isilí' xibé didza' na' gü'í'ilena' libí'ilí' le nulu'í'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

<sup>7</sup> Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'?

<sup>8</sup> Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? <sup>9</sup> Lësca' caní raca queëli'. Channö len lúdx-i'ilí' gü'í'ilí' didza' le cabí taca bönachi, bití' ca' ila'yéajni'i didza' gü'í'ilí'. Caní gaca, nítisö gü'í'ilí' didza'. <sup>10</sup> Le nácatë nacua' zían didza' yúbölö tuí'í zían cö' bönachi izá'a lu yödzülió ni, ate' nacua' bönachi ta'yéajni'i tu tu didza' na'. <sup>11</sup> Na'a, channö cabí réajni'ida' didza' ru'ë tu bönni', gaca ca tu bönni' zítu' lahué' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'. <sup>12</sup> Lësca' caní naca queëli'. Ruí'ida' ládxi'ilí' sí'ilí' yugu' le runnë' queëru' Dios Bö' Lá'ayi. Que lë ni na', gulí'gü'í ládxi'ilí' sí'ilí' le ilún ga ilácarö tsutsu bönachi queë' Cristo.

<sup>13</sup> Que lë ni na' ca', nu ruí'í didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí'í nu na'.

<sup>14</sup> Cate' rulidza'-në' Dios, channö ruá'a didza' yúbölö le

cabí nazèda', lu bö' naca caza' rulidza'-nè' Dios, pero tu' cabí réajni'ida' didza' ruá'a, lu yöl-la' réajni' quia' bití' ruzi'a xibé didza' na' ruá'a. <sup>15</sup> ¿Nacxi caz ral-la' guna' channö? Ulidza'-nè' Dios lu bö' naca caza', enca' lu yöl-la' réajni' quia' ulidza'-nè' Dios. Gul-la' yöl-la' ba lu bö' naca caza', enca' lu yöl-la' réajni' quia' gul-la' yöl-la' ba. <sup>16</sup> Channö lu bö' naca cazu' rulidza lá'ayu'-nè' Dios, ate' zoa ni' nu riyónisö, channö cabí réajni' didza' ru'u, ¿nacxi caz gaca inná: "Ca' gaca", ni'a que didza' ru'u, rè'u-nè' Dios: "Xclenu"? <sup>17</sup> Nadxi ca' dxí'ado' ru'u didza', rè'u-nè' Dios: "Xclenu'." Channö cabí réajni' didza' ru'u, bití' bi uzí' xibé nu na' riyöni. <sup>18</sup> Rea'-nè' Dios: "Xclenu'", tu' ruí'ira' didza' yúbölö le cabí nazèda' ca yúgu'tèlì'. <sup>19</sup> Lógaca bönachi queè' Dios gué'énitèröda' gu'a gáyu'sö didza' le gaca ila'yéajni' bönachi ca zían gayuá' didza' yúbölö le cabí nazèda', ate' cuntú nu gaca tséajni'. Gaca usédida' ia'zica'rö bönachi tuzi channö ila'yéajni' didza' gu'a.

<sup>20</sup> Böchi' luzá'ado', bití' gácali' ca bí'ido' ca naca le rizá' ládxi'lì'. Gulí'gaca ca bí'ido' para cabí gunlì' le ruá' dö', pero gulí'gaca bönni' chinácagaca ca naca le rizá' ládxi'lì'. <sup>21</sup> Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílena' bönachi ni didza'. Sal-la' guna' caní, bití' ulu'zé nágagaca xtídz'a'a." ¿Caní rnnè' Xanru'? <sup>22</sup> Caní naca, Dios ru'è rè'u lataj ruí'iru' didza' yúbölö le cabí nazédaru' para gaca tu le naca bè' lógaca bönachi bití' ta'yéajlè', en calèga lógaca nupa ta'yéajlè' Cristo. Ru'è rè'u lataj ruí'iru' didza' uláz queè' Lè' le ulu'zì' xibé nupa ta'yéajlè' Cristo, en calèga bönachi na' bití' ta'yéajlè'. <sup>23</sup> Que lè ni na', cate' udúbilì' tsözxón, yúgu'tèlì' na' néquili' queè' Cristo, channö gü'íli' didza' yúbölö le cabí nazédalì' yúgu'tèlì', ate' tsázagaca nupa nazédagaca látì'do'os, o nupa bití' ta'yéajlè' Cristo, ¿naru' cabí ila'nná: "Nachixi ícjalì'?" <sup>24</sup> Na'a, channö yúgu'tèlì' gü'íli' didza' uláz queè' Dios, ate' tsaz nu cabí réajlè' Cristo o nu nazèda látì'do'os, guéquibe'e nu na' nabaga' xíguia', ate' Dios uchi'a usöröè' lè'. Caní guéquibe'e nu na', tu' tseajni' didza' gü'íli' yúgu'tèlì'. <sup>25</sup> Guéquibe'e ca naca le rizá' ládxi' nu na', lè na' bigachi', ate' uzóa zxibi nu na', en tseaj ládxi' Dios, ate' inná: "Le nácatè Dios zóalenè' libí'ili'."

### Ca ral-la' gunru' ga rudúbiru' queè' Cristo

<sup>26</sup> Que lè ni na', böchi' luzá'ado', cate' rudúbilì' queè' Cristo, rul-lè' tuè' bönni' dzáguiè' libí'ili' tu salmo, ate' rusédinè' ia'túè' tu xibá, ate' ia'túè' riguixjö'inè' libí'ili' tu le bulu'ínè' Dios lè', ate' ia'túè' ru'è didza' yúbölö le cabí nazèdè', ate' ia'túè' rudödè' didza' yúbölö na' le cabí nazèdè'. Yúgu'tè le gunlì' ral-la' gaca le ulu'zì' xibé nupa tu'dubi queè' Cristo. <sup>27</sup> Cate' nacua' ni' nupa tuí' didza' yúbölö le cabí nazédagaca, bití' ral-la' gü'íli' didza' caní zíanrö ca chopa tsónnasilì'. Huáca gu'è didza' tuzè' bönni' na', ate' tödi na' huáca gu'è didza' ia'túè', pero run bayudxi soa nu udödi didza' yúbölö na' le bití' nazédalì'. <sup>28</sup> Channö cuntú nu zoa nu gaca udödi didza' yúbölö na' le cabí nazédalì', nu na' ruí' didza' yúbölö le cabí nazèda ral-la' soa dxisö ga na' nudúbilì', ate' huáca gü'ílen Dios didza' na' lu icja ládxi-

i'da'ahui. <sup>29</sup> Lèasca' caní, yugu' bönni' tu'è didza' uláz queè' Dios ral-la' ilu'è didza' chopa tsónnasè', ate' ia'zì-ca'rè' bönni' na' tu'è didza' uláz queè' Dios ral-la' ulu'chi'a ulu'söröè' didza' ru'è bönni' na'. <sup>30</sup> Channö Dios ulu'ínè' tu bönni' röè' ni' le ré'eni inná xtídzè'è, ral-la' soa dxisö nu na' ruí' didza'. <sup>31</sup> Yúgu'tèlì' huáca gü'íli' didza' uláz queè' Dios tu tuli' para izédalì' yúgu'tèlì', en idipa ládxi'lì' ca' yúgu'tèlì'. <sup>32</sup> Yugu' bönni' tu'è didza' uláz queè' Dios huáca ila'nná be'e cuíngaqüè', en ila'cu'è dxisö. <sup>33</sup> Calèga Dios nu run ga rutsátsaru', tu' ré'ènè' Lè' gácaru' ba'a ládxi', ca na' runè' ga nacua' yúgu'tè cö' bönachi queè' Cristo.

<sup>34</sup> Ral-la' ila'cuá'anu dxisö nigula queéli' ga na' rudúbilì'. Bití' dè lu ná'agacanu ilu'ínu didza' ni'. Ral-la' ila'cuá'anu nöxaj ca na' rinná bè' xibá queè' Dios.

<sup>35</sup> Channö té'éninu ila'yéajni'ínu ia'lati', ral-la' ila'nábinu bönni' que queégacanu cate' ni' nacua'è lídxigaqüè'. Bití' ral-la' ilu'ínu didza' yugu' nigula ga na' rudúbiru' queè' Dios.

<sup>36</sup> ¿Naru' réquitseli' bunödzejè' Dios xtídzè'è lu ruá'ali' libí'isilì'? ¿Naru' réquitseli' bidxín xtídzè'è Dios queézilì' libí'ili'? <sup>37</sup> Channö nu bönni' nútsè'è ládjalì' réquinè' ru'è didza' uláz queè' Dios, o réquinè' zóalenè' Dios Bö' Lá'ayi lè', bönni' ni ral-la' si' lu nè'è naca xibá queè' Xanru' le ruzúaja' queéli' lu guichi ni. <sup>38</sup> Na'a, channö cabí ruí' ládxi'è didza' ni, bití' gü'í ládxi'lì'-nè' bönni' na'.

<sup>39</sup> Que lè ni na', böchi' luzá'ado', gulí'gü' ládxi'lì' gü'íli' didza' uláz queè' Dios, en bití' inná bé'eli' nu ruí' didza' yúbölö le cabí nazèda. <sup>40</sup> Ral-la' gunru' yúgu'tè ca sa'yéaj, en lu yöl-la' ba'a ládxi'.

### Bubanè' Cristo lu yöl-la' guti

**15** Na'a, böchi' luzá'ado', riguixjöi'ida' libí'ili' ca naca didza' dxí'a na' bena' libán que ga zóali', lè na' guzxí' lu ná'ali', ate' run ga nácarö idú ca réajlè'èlì' Cristo. <sup>2</sup> Ni'a que didza' ni ulálì', channö gunlì' ca rnna didza' dxí'a na' bena' libán que ga zóali', channö le nácatè guyéajlè'èlì'-nè' Cristo.

<sup>3</sup> Ga gusí lo budöda' lu ná'ali' le budödè' Dios lu na'a neda'. Caní rnna: "Gútiè' Cristo uláz queéru' tu' nabá-ga'ru' dul-la'." Ca naca lè ni nazúaj lu guichi lá'ayi le rnna ben bayudxi benè'. <sup>4</sup> Rnna ca: "Bigachè'è yeru ba, en cate' bizá'a tsonna dza, bubanè' lu yöl-la' guti", ca na' nazúaj ca' lu guichi lá'ayi le rnna ben bayudxi guca queè'. <sup>5</sup> Gudödi ni' bulu'í lahuè' Cristo, ate' bilé'enè' Pedro Lè', en gudödi ni' idxínnutè' gubáz queè' bila'lé'enè' Lè'. <sup>6</sup> Ní'irö bulu'í lahuè' lógacüè' zíanrö ca gayu' gáyu'è böchi' luzá'aru' ta'yéajlè'è Cristo, cate' ni' nudúbigaquie' tsözxón. La'tu'biqui' yúgu'tè' bóchi'ru' ni nacua'è nabángaquie' na'a, sal-la' bal-lè' chinátigaquie'. <sup>7</sup> Ní'irö Jacobo bilé'enè' Lè', en gudödi ni' bulu'í lahuè' lógacüè' yúgu'tè bönni' gubáz queè'.

<sup>8</sup> Ga yöjsetè bulu'í lahuè' ca' lahua' neda'. Ca guca lè ni, naca' ca tu bí'ido' gúljabì' cate' chigudödi dza ral-la' gáljabì'. <sup>9</sup> Caní naca, tu' nácara' neda' cá'asö ca yúgu'tè bönni' gubáz queè', en bití' naca' neda' lesaca' si' la' gubáz queè', tu' gudxía ládxa'a bönachi queè' Dios.

<sup>10</sup> Na'a, tu' buzá' ládxi'è quia' Dios naca' le naca' na'a,

en calëga nítisö buzá' ládxë'ë quia'. Béntëra' neda' xich-inë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxí' queë', bugunë' neda' dxin. <sup>11</sup> Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

### Ubanru' lu yöl-la' guti

<sup>12</sup> Runtu' libán queë' Cristo ca na' bubanë' lu yöl-la' guti. Channö caní naca, çnacxi caz naca, rnnalí' bál-lalí': "Bití' ulu'bán nupa chinátigaca"? <sup>13</sup> La'tu' cabí ulu'bán nupa chinátigaca, bití' bubanë' Cristo, <sup>14</sup> en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queéli' Lë'. <sup>15</sup> Ia'stú, la'tu' cabí bubanë' Cristo, rizí' yé'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo. <sup>16</sup> La'tu' cabí ulu'bán nupa chinátigaca, bití' bubanë' Cristo, <sup>17</sup> en la'tu' cabí bubanë' Cristo, nítisö naca yöl-la' réajlë' queéli' Lë', ate' nagá'anagaca dul-la' nabága'li'. <sup>18</sup> Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. <sup>19</sup> Channö tsánnisö ni zóaru' nabanru' huáca uzí'iru' xibé' Cristo, nácaröru' bayechí' ca yúgu'të bönachí.

<sup>20</sup> Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. <sup>21</sup> Ca na' guyú'u yöl-la' guti ní'a que le benë' tuë' bönni', lësca' caní, ní'a que le benë' ia'tué' bönni' guyú'u yöl-la' rubán quégaca nupa chinátigaca. <sup>22</sup> Ca na' tati yúgu'të bönachí tu' náljlengaca Adán, lësca' caní ulu'bán yúgu'të nupa na' náljlengaca Cristo. <sup>23</sup> Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'. <sup>24</sup> Ní'irö idxín dza údxí cate' ugúë' Cristo idütë le dë lu në'e, en idütë yöl-la' unná bë', en idütë yöl-la' huáca que tu' xihuí', ate' udödë' yöl-la' unná bë' queë' lu në'e Dios Xuz. <sup>25</sup> Run bayudxi inná bë'e Cristo ga idxinrö dza chibenë' Dios ga ulu'zechu zxibigaca lahuë' Lë' yúgu'të nupa ta'dá'baga' Lë'. <sup>26</sup> Le ridá'baga' Lë' le usunítië' ga údxí naca yöl-la' guti. <sup>27</sup> Dios chinudödë' yúgu'të lu në'e Zxí'inë' para inná bé'enë' le. Nazúaj lu guichi lá'ayi, rna: "Budödë' yúgu'të lu në'e para inná bé'enë' le." Na'a, naca bë' bití' budödi cuinë' lu në'e Zxí'inë', tu' naca cazë' Lë' Nu rudödi yúgu'të lu në'e Zxí'inë'. <sup>28</sup> Cate' idxín dza ní' chinudödë' Dios lu në'e Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'e Dios, Nu na' budödi lu në'e Zxí'inë' yúgu'të, ate' ga údxí, Dios inná bé'enë' tsaz yúgu'të.

<sup>29</sup> Bál-lalí' ridílalí' nisa uláz quégaca nupa chinátigaca. Channö réquili' bití' ulu'bán nupa na' chinátigaca, çbizx que ridílalí' nisa uláz quégaca nupa chinátigaca?

<sup>30</sup> Zoa bönadxi queëtu' gátitu' yúgu'të dza. Çbizx que ru'ítu' lataj gaca caní channö cabí ubanru' lu yöl-la' guti? <sup>31</sup> Yúgu'të dza zoa bönadxi gátia'. Rigúixjöi'ida' libí'ili' lë ni, böchí' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo.

<sup>32</sup> Channö tu' gú'unisida' gudíl-lalena' böa' guixí' sínía'

lu yödzo Éfeso, çbizxi caz uzí'a xibé? Channö cabí ulu'bán nupa chinátigaca, ral-la' gunru' ca ta'nná bö-nachi: "Gui'aj gáguru' tu' huátiru' cuxó huidzaj."

<sup>33</sup> Bití' gú'í'ili' lataj nu sí' ye'e libí'ili'. Channö sí' lu ná'ali' láti'do'os le cabí nácatë, idütëli' huóacali' chul-la niti. <sup>34</sup> Bulí'bí'í' ládxí'ili', en bití' gunlí' dul-la' tu' cabí núnbë'ëli'në' Dios bál-lalí' libí'ili'. Rnnía' caní para guna' ga utu'í'li'.

### Ca ilaca nupa ulu'bán lu yöl-la' guti

<sup>35</sup> Nadxi ca' zoa nu inná: "ÇNacxi ulu'bán nupa chinátigaca? ÇNacxi gaca idú ca nácatë cazë' cate' ulu'dxinë'?" <sup>36</sup> Lí', bönni' bití' bi nózinë'. Lë na' rázu' luyú bití' ilén channö cabí initi. <sup>37</sup> Lë na' rázu' luyú naca tu xisédo'os, nadxi ca' que zxoá' xtila o que ia'tú guixí' cuando'. Lë na' rázu' bití' naca guixí' cuando' na' ral-la' ilén. <sup>38</sup> Dios runë' ga gaca guixí' cuando' ca nun cazë' que. Ca naca tu tu xisedo' na' runë' ga gaca guixí' cuando' que. <sup>39</sup> Lësca' caní, bití' naca lébisö bëla' que queégacaba' yúgu'tëba' böa' guixí'. Zoa tu bëla' quégaca bö-nachi, en ia'tú ca naca bëla' quégacaba' böa' guixí'. Ia'tú ca naca bëla' quégacaba' bigúinni, en ia'tú ca naca bëla' quégacaba' böla. <sup>40</sup> Lësca' caní nadzá' idú ca nácatë caz nupa nacué' yehua' yubá ca naca idú ca nácatë caz nupa nacué' luyú ni. Zoa tu yöl-la' lachi quégaca nupa nacué' yehua' yubá, en ia'tú ca naca yöl-la' lachi quégaca nupa nacué' luyú ni. <sup>41</sup> Zoa tu yöl-la' lachi que gubidza, en ia'tú que beo', en ia'tú quéguequi böljá lúzxiba. Yöl-la' lachi que tu böljá lúzxiba nadzá' ca naca yöl-la' lachi que ia'tú böljá lúzxiba. <sup>42</sup> Lësca' caní gaca cate' ulu'bán nupa chinátigaca. Cate' rigachí' lu yeru ba naca tu bëla' initi. Cate' ubán, ní'irö gaca tu le soa tsaz. <sup>43</sup> Cate' rigachí' lu yeru ba naca tu bëla' cá'asö, en le nacuidí'. Cate' ubán, ní'irö gaca tu le lachi, en le nál-la. <sup>44</sup> Cate' rigachí' lu yeru ba naca tu bëla' que yödzo'lió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzo'lió ni, en ia'tú ca gaca le idzaga bö' naca cázaru'.

<sup>45</sup> Nazúaj lu guichi lá'ayi le rna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjé' Adán, Lë' Cristo, Dios benë' ga náquië' Bö' nabániru'. <sup>46</sup> Bití' blë'e zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'e Bönni' na' náquië' Bö'. <sup>47</sup> Bönni' ní' blë'e zí'alö, gúquinë' yu. Bönni' na' blë'e burópilö, Nu na' naca Xanru', birúajé' yehua' yubá. <sup>48</sup> Nupa nacué' luyú ni nácatë ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. <sup>49</sup> Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huóequiru' ca néquinë' Nu na' birúaj yehua' yubá.

<sup>50</sup> Caní ré'ëni inná lë ni rea' libí'ili', böchí' luzá'ado', rnnía': Le néquini bëla', en rön bití' gaca tsaz ga ní' rinná bë'e Dios, en lësca' caní, lë na' initi bití' gaca idelí' lë na' soa tsaz. <sup>51</sup> Bulí'yútsöca', rea' libí'ili' tu le bigachí': Bití' gátiru' yúgu'tëru', pero Dios utsë'e ca nácaru' yúgu'tëru'. <sup>52</sup> Tsárido'os gaca, tsca naca tu le rutásö

guióǵ loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquiní tu le soa tsaz, ate' Dios utsé'ë le néquiníru' yúgu'tëru'.<sup>53</sup> Lë na' nácaru' le riniti ral-la' huöáca le soa tsaz, ate' le néquiníru', lë na' ral-la' gati, huöáca tu le catu caz gati.<sup>54</sup> Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

<sup>55</sup> Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

<sup>56</sup> Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios.<sup>57</sup> ¡Xclenë' Dios! ¡Lë cazë' runë' ga nuláru' lu yöl-la' guti ní'a que le benë' Xanru' Jesucristo!

<sup>58</sup> Que lë ni na', böchí' luzá'ado', gulí'sóa tsutsu. Gulí-gaca idú ládxí'li', gúntica'silí' xichinë' Xanru' tu' nöz quézilí' bití' runlí' nítisö xichinë' Xanru'.

### Yugu' bönachi Corinto tu'nödzej quégaquië' böchí'gaca ta'yádzjanë'

**16** Na'a, ca naca que dumí na' unódzjalí', le gácalen böchí'ru' ta'yéajlë'ë Cristo nacué' Jerusalén, gulí'gún na'a ca na' gunná bé'eda' yugu' cö' bönachi queë' Cristo, nacué' luyú Galacia.<sup>2</sup> Yugu' dza domingo, tu tulí' ral-la' cú'ulí' quez lati' dumí, tsca na' Dios runnë' queé'li'. Gulí'gún chí' le, para cabí gun bayudxi bi utú-bilí' cate' idxina' ga zóalí'.<sup>3</sup> Cate' ní' idxina' ga zóalí', isól-la'a Jerusalén bönní' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unódzjalí'.<sup>4</sup> Channö ral-la' tseja' ca' neda', tsöjácalenë' neda'.

### Le ré'ënë' gunë' Pablo

<sup>5</sup> Guída' ga zóalí' cate' údxi töda' yugu' yödzö luyú Macedonia, tu' run bayudxi töda' yugu' yödzö na'.

<sup>6</sup> Réquida' ugá'analena' libí'ili' tu chí'í, o nadxi ca' ugá'ana' ní' yugu' beo' ziaga. Ní'irö huáca gácalenlí' neda', ugú'ulí' neda' nözä gátí'tës ga ral-la' tseja'.<sup>7</sup> Cate' guída' uduyúa' libí'ili' bití' ré'ënda' tódisa' ní'. Runa' löza sóalena' libí'ili' xidzé, channö gunnë' Xanru' neda' lataj.

<sup>8</sup> Ugá'ana' ni lu yödzö Éfeso ga idxinrö dza Pentecostés  
<sup>9</sup> tu' dë lataj ni guna' tu dxin zxon queë' Xanru', sal-la' zían nupa ta'dá'baga' neda'.

<sup>10</sup> Channö idxinbí' bí'í Timoteo ga na' zóalí', gulí'gü'í ládxí'li'-bí', para cabí ubi ugu'í'ibí' tsanni ní' sóalenbí' libí'ili', tu' runbí' xichinë' Xanru' ca na' runa' neda' xichinë'.<sup>11</sup> Que lë ni na', cuntú nu ral-la' uzóä lëbí' tsölá'alö. Gulí'gácalen-bí', ugú'ulí'-bí' nözä idú tsáhuí'do', para udxinbí' ga ni zoa' neda', tu' riböza'-bí' lëbí', enca' yugu' böchí'ru' túnlenë'-bí' tsözxón dxin.

<sup>12</sup> Ca naca queë' böchí'ru' Apolos, gúta'yua' lahuë' tsejë' tsöjyüë' libí'ili' tsözxón len yugu' böchí'ru', pero bití' ré'ënë' tsejë' na'a. Guí'dë' cate' séqui'në'.

### Didza' ru'ë Pablo ga ruúdx

<sup>13</sup> Bulí'subán ládxí'li', en gulí'gaca tsutsu ca réajlë'ëli'në' Cristo. Gulí'gaca rugu ladxi', en bulí'tipa ládxí'li'.

<sup>14</sup> Len yöl-la' nadxí'í gulí'gún bítí'tës bi gunlí'.

<sup>15</sup> Na'a, böchí' luzá'ado', chinöz quézilí' ca naca queë' Estéfanos, enca' quégaca dí'a dza queë'. Nácagaca nupa gula'sí lógaca ta'yéajlë' Cristo ladaj bönachi nacué' luyú Acaya. Bulu'dödi cuíngaquië' para ilunë' xichíngaca bönachi queë' Dios.<sup>16</sup> Ráta'yua' lolí', böchí' luzá'ado', gunlí' bal nupa nácagaca ca böchí'ru' na', enca' ca nácagaca nupa tunlen légaquië' tsözxón dxin, en tácalen légaquië'.<sup>17</sup> Rudzëjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queé'li'.<sup>18</sup> Bulu'hué tsáhuë'ë neda' ca na' bulu'hué tsáhuë'ë ca' libí'ili'. Gulí'gún bal bönachi caní.

<sup>19</sup> Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'.

<sup>20</sup> Yúgu'të böchí'ru' ni tu'gapë' Dios libí'ili'. Gulí'gapa Dios tulí' ia'tulí', en unída'li' luzá'alí'.

<sup>21</sup> Neda', Pablo, len na' cuin caza' ruzúaja' lu guichi lë ni, rnna': Rugapa' Dios libí'ili'.

<sup>22</sup> Nu bití' nadxí'í Xanru' Jesucristo, chinabía dö' nu na'.

Gudá Xanru'.

<sup>23</sup> Rinábida'-në' Xanru' Jesucristo uzá' ládxë'ë queé'li'.

<sup>24</sup> Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

## 2 Corintios

Pablo rugapë' Dios bönachi queë' Cristo nacu'ë Corinto

**1** Neda', Pablo, naca' gubáz queë' Jesucristo tu' ré'ënë' caní Dios. Bí'í böchi'ru' Timoteo runbí' neda' tsözxón. Rugapa' Dios libí'ili', rudúbili' queë' Dios lu yödzo Corinto, enca' yúgu'téli' néquili' quez queë' Dios luyú Acaya ga na' nababa Corinto. <sup>2</sup> Rinábida'-në' Xúziru' Dios, en Xanru' Jesucristo uzá' ládxë'ë queéli', en gunë' ga soa dxi icja ládxí'do'oli'.

### Yugu' le gudí' guzáquë'ë Pablo

<sup>3</sup> Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhuí'tica'sö rë'u! <sup>4</sup> Dios ruhué tsáhuë'ë rë'u cate' raca bí'títës bi raca queëru', para gaca huë tsáhuí'ru' ca' nupa bi raca queguequi. Ruhué tsáhuí'ru' légaquië' ca na' Dios ruhué tsáhuë'ë rë'u.

<sup>5</sup> Tsca ta'yán le riguí' rizáca'ru', ca na' gudí' guzáquë'ë Cristo, lësca' caní ta'yán le tu'hué tsahuí' rë'u, tu' nácaru' tuz len Cristo. <sup>6</sup> Que lë ni na', channö bi riguí' rizáca'tu', raca caní queëtu' para gaca huë tsáhuí'tu' libí'ili', en guntu' ga uláli'. Channö Dios ruhué tsáhuë'ë netu', raca caní para gaca huë tsáhuí'tu' libí'ili', ate' lu yöl-la' riböza zxön ladxí' queéli', gaca guá' ilenli' yugu' le quí'í sáca'li', ca na' raca ca' queëtu'. <sup>7</sup> Ruzxöni ládxí'tu'-në' Dios gúntica'së' ga gaca dxi'a queéli', tu' chinóztu' ca na' riguí' rizáca'li' tsözxón len netu', lësca' caní ruzí'ili' xibé tsözxón len netu' le ruhué tsáhuë'ë Dios rë'u.

<sup>8</sup> Ré'ënitú' inózili', böchi' luzá'ado', ca naca le zían le gulaca queëtu' luyú Asia. Gudóditë bë' lë na' guca queëtu', ate' guca zítërö ca le guca guá' ilentu'. Ca' guca, bí'tírö bentu' löza sóatu' ibantu'. <sup>9</sup> Gúquitu' guca queëtu' ca raca quegaquië' bönni' chinarugu quegaquië' ilátie'. Guca caní queëtu' para cabí uzxöni ládxí'tu' la' cuínsitu', pero uzxöni ládxí'tu'-në' Dios, Nu rusubán nupa chinátigaca. <sup>10</sup> Dios busölé' netu' lu lë na' ben ga guzóa bönadxi gátitu', ate' rusölé' netu' yúgu'të dza. Runtu' löza usölé' Lë' netu' caní leyúbölö <sup>11</sup> channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

### Rigúxjö'ë Pablo bizx que ridzenë' idxinë' Corinto

<sup>12</sup> Lë ni le run ga rudzéjatu'. Bö' naca caztu' rulu'í netu', len yöl-la' ba'a ladxí' queëtu', en idú ládxí'tu' runtu' bi runtu' yödzölió ni, ate' caní bentu' ca' ga ni' zóali'.

Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni' queëztu' bentu' caní. <sup>13</sup> Ruzúajsötu' queéli' lu guichi le gaca ulábalí', en le gaca tséajni'ili'. Raca ládxá'a tséajni'ili' idú <sup>14</sup> lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

<sup>15</sup> Tu' bena' löza lë ni, guzá' ládxá'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. <sup>17</sup> ¿Naru' réquitseli' guzxi' yë'a tu' butsa'a ca guna? ¿Naru' réquitseli' lu yöl-la' bönáchisö quia' runa' le rizá'asö icja', en bé'ësa' ca' didza' cate' gunniá': "Caní guna"? <sup>18</sup> Ni'a queë' Xanru' Dios, Nu run idütë ca rnna xtídzë'ë, bití' bé'ësa' ca' didza' cate' bé'lëna' libí'ili' xtídzë'ë Dios. <sup>19</sup> Jesucristo, Zxí'inë' Dios, Nu na' bentu' libán que ga zóali', neda' len Silvano, en Timoteo, bití' ruí'isë' ca' didza'. Lë' ru'ë didza' idütë li. <sup>20</sup> Cristo caz runë' ga naca idütë löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. <sup>21</sup> Dios caz runë' ga runtu' löza tsözxón len libí'ili' néquiru' queë' Cristo, en budödë' lu na'tu' dxin queë' runtu'. <sup>22</sup> Bennë' queëru' le naca bë' néquiru' queë', tu' guchíz-ië' icja ládxí'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'. <sup>23</sup> Ni'a queë' Xanru' Dios, Nu nözi le rizá' ládxá'a, ruá'a didza' idütë li. Nözinë' Lë' bití' bida' ga zóali' lu yödzö Corinto, para cabí gun bayudxi guna' ga huí'inili'. <sup>24</sup> Bití' ré'ënitú' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitú' guntu' le gun ga udzeja ládxí'li'.

**2** Que lë ni na' bë' ládxá'a cabí guídatea' queéli' zí'alö, para cabí guna' ga huí'inili'. <sup>2</sup> Channö guna' neda' ga huí'inili', ¿nuzxi caz gun ga udzéjada' neda'? ¿Naru' guntsa' ga huí'ini nu ral-la' gun ga udzéjada' neda'? <sup>3</sup> Que lë ni na' buzúaja' queéli' lu guichi zí'alö. Bití' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'í cázali' le gun ga udzéjada' neda'. Tu' ruzxöni ládxá'a libí'ili', nözda' udzéjali' yúgu'tëli' channö udzéjada' neda'. <sup>4</sup> Cate' ni' buzúaja' queéli' lu guichi lë na', gusé'bide'e ládxá'a, en buí'inide'e ládxá'a ga bidxintë gurödxá'. Buzúaja' caní lu guichi, calëga para guna' ga huí'inili', pero para in-ózi'li' ca nadxí'ide'eda' libí'ili'.

### Ral-la' uniti lorú' nu ruá' dö' cate' rubí'í ladxi'

<sup>5</sup> Channö zoë' tu bönni' ní', bönni' na' busuhu'íininë' rë'u, calëga néda'sö busuhu'íininë', pero huáca innaru' busuhu'íininë' yúgu'tëli' libí'íli'. Rnní'a: "Huaca innaru'", para cabí tödi bë' ichugu bë'a queë' bönni' na'. <sup>6</sup> Tscati' gaz xíguia' chibenli' látu'biqui' yúgu'tëli' queë' bönni' na'. <sup>7</sup> Na'a, ral-la' uniti loli' bönni' na', en utípalí' ládxë'ë, para cabí tödi bë' hu'íininë', en para cabí gaca tsaz chopa ládxë'ë. <sup>8</sup> Que lë ni na' ráta'yua' loli' gunli' le gaca bë' nadxí'íli'-në' idú ládxí'íli'. <sup>9</sup> Que lë ni na' ca' buzúaja' queé'li' lu guichi lë na'. Gú'unida' sí' bë'a libí'íli' para in-özda' channö rúntica'sili' ca rna xtídza'a. <sup>10</sup> Cate' nu runiti loli' libí'íli', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'íli' xibé. <sup>11</sup> Caní runa', para cabí sequi' Satanás tu' xihui' ucúl-la rë'u, tu' chinóziru' yugu' le rë'eni gun queéru'.

### Gurö'ë böniga Pablo lu yödzo Troas

<sup>12</sup> Cate' bidxina' lu yödzo Troas para guna' libán que didza' dxi'a queë' Cristo, bennadë'ë Xanru' neda' lataj guna' libán ní'. <sup>13</sup> Sal-la' guca caní, gurö'a böniga tu' cabí yöjxáca'a-bí' bí'i böchi'ru' Tito ní'. Que lë ni na' buzá'alena' bönachi ní', atë' guyija' luyú Macedonia.

### Idéli'ru' tu' zóalenë' Cristo rë'u

<sup>14</sup> Xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusölá queéru'. Dios rugunë' dxin rë'u para rulu'ë lahui ca gaca ilúnbë'e bönachi Cristo. Le nácaru' naca ca tu le rilá' zxixi, le riguisi gátí'tës. <sup>15</sup> Nácaru' ca tu nöri rilá' zxixi, le ruzégui'ë Cristo lahuë' Dios, en le riguísië' lógaca nupa nulágaca, en nupa nanítigaca. <sup>16</sup> Lógaca nupa na' nanítigaca nácaru' ca tu le rilá' siguti le naca bë' ilátië'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? <sup>17</sup> Biti' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'o. Tu' nasól-lë'ë Dios netu', idú ládxí'tu' ruí'itu' didza' lahuë' Lë' tu' nácatu' tuz len Cristo.

### Ca naca didza' le ruún rë'u tuz len Dios

**3** ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'itu' libí'íli' tu guichi le rulu'íi le nácatu'? ¿Naru' ral-la' inábitu' libí'íli' gúnnali' queétu' tu guichi caní, ca na' tun bal-la bönachi? <sup>2</sup> Libí'í cázali' nácali' ca tu guichi le rulu'íi le nácatu', le nazúaj lu icja ládxí'do'otu', atë' yúgu'të bönachi gaca ulu'laba le, en tséajni'iguequi le. <sup>3</sup> Le nácali' nalá lahui ca tu guichi nuzúajë' Cristo, le gusól-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiójtá'a, pero lu icja ládxí'do'oli' nuzúajë'.

<sup>4</sup> Ruí'itu' caní didza' tu' ruzxöni ládxí'tu'-në' Dios tu' zóalenë' Cristo rë'u. <sup>5</sup> Biti' réquitu' bi gaca guntu' rácasö queétu', pero Dios runnë' queétu' yöl-la' huáca bi

guntu'. <sup>6</sup> Dios caz bennë' queétu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guichisö richugu queéru' gátiru', pero Dios Bö' Lá'ayi nabániru'.

<sup>7</sup> Yugu' xibá queë' nazúajgaca lu guichi, Dios buzúajë' yugu' lu guiójtá'a, atë' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyépitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', atë' xibá na' richugu quégaca bönachi ilátigaca, <sup>8</sup> zxöntëro naca yöl-la' bení' na' dzaga yugu' le runë' Dios Bö' Lá'ayi. <sup>9</sup> Yöjtsaga yöl-la' bení' lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácacaga tsahui' bönachi. <sup>10</sup> Tu' nácatëro lesaca' yöl-la' bení' na' nalá' lahui na'a, cuídí'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi. <sup>11</sup> Channö guzöa yöl-la' bení' que lë na' guzöa tu chí'ido'osö, zxöntëro naca yöl-la' bení' que lë ni sóatica'sö.

<sup>12</sup> Tu' zoa lë ni runru' löza, ruí'itu' didza' lu yöl-la' rugu ladxi'. <sup>13</sup> Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. <sup>14</sup> Gula'chul-la gula'nítië' yugu' bönni' ní'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugúë' tuzë' Cristo. <sup>15</sup> Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiójt lögaquië' le run ga nachul-la nanítigacuië'. <sup>16</sup> Cate' nu ruhuöaca queë' Xanru', rigúa lë na' run ga nachul-la naniti nu na'. <sup>17</sup> Cate' ni rnnatu': "Xanru'", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ní' zoa caz yöl-la' nadzán. <sup>18</sup> Yúgu'tëru' rë'u bití' bi nusayaj lorú'. Nácaru' ca tu guíë dxili ga nalá' yöl-la' bení' que lahuë' Xanru', atë' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queéru' yöl-la' bení' queë'.

**4** Dios buéchi' ládxë'ë netu', en budödë' lu na'tu' dxin ni runtu'. Que lë ni na' bití' raca chopa ládxí'tu'. <sup>2</sup> Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí' yé'tetu', en bití' rutsá'atu' xtídzë'ë Dios. Tu' ruí'itu' didza' que le naca idütë li, ruí'í ládxí'tu' guntu' le iléquibe'e yúgu'të bönachi naca dxi'a lahuë' Dios. <sup>3</sup> Channö zoa nu bití' réajni'ini didza' dxi'a runtu' ba nalí' que, nácacacasö nupa nachul-la nanítigaca bití' ta'yéajni'í le. <sup>4</sup> Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en riná bé'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. <sup>5</sup> Bití' runtu' libán que la' cuínsitu', pero runtu' libán queë' Jesucristo, en riguíxjö'ötu' náquië' Xanru', atë' netu' ni nácatu' huen dxin queé'li' tu' nadxí'itu'-në' Jesús. <sup>6</sup> Dios, Nu ben ga buzení' bení' ga ní' guca chul-la, náquië' Nu rigú'u bení' icja ládxí'



do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

### Tu' réajlë'ëru' Dios runru' ca ré'ënë' Lë'

<sup>7</sup> Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxon na', en calëga que cázaru'.

<sup>8</sup> Tu'saca' zi' bönachi netu', pero bití' rudú ládxi'tu'.

Ró'ötu' böniga, pero bití' raca chopa ládxi'tu'.

<sup>9</sup> Ta'bía ládxi' bönachi netu', pero bití' rubéaj ládxi'ë Dios netu'.

Ta'zé'ede'e netu' yu, pero bití' tu'suniti netu'.

<sup>10</sup> Lu idú le naca caztu' rátitica'stu' tsözxón len Jesús, na' naca bë' lu le naca caztu' nabánitu' Lë'.

<sup>11</sup> Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. <sup>12</sup> Caní naca, zoa bönadxi queëtu' gátitu', pero ní'a que lë ni rata' yöl-la' na'bán queéli'.

<sup>13</sup> Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lëscá' caní raca queëtu', réajlë'ëtu' Dios, en que lë ni na' ruí'itu' didza'. <sup>14</sup> Nöztu' ca gunë' Dios, Nu busubán Xanru' Jesús, usubanë' ca' netu' tsözxón len Jesús, en usudxinë' netu' tsözxón len libí'ili' lahuë' Lë'. <sup>15</sup> Raca caní yúgu'të lë ni para gaca bi uzí'ili' xibé. Channö ila'deli' zianrö ca' bönachi le ruzá' ládxi'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

<sup>16</sup> Que lë ni na', bití' raca chopa ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. <sup>17</sup> Le cuídí'sö riguí' rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatë'rö lesaca' ca gaca gúnbë'ëru'.

<sup>18</sup> Bití' ruí' ládxi'ru' le rilé'ëru' luyú ni, pero le bití' gaca ilé'ëru' ruí' ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

**5** Nóziru' cate' initi idütë le naca cázaru', le naca ca tu yu'u lári'do' yödzölió ni, Dios chinupé'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. <sup>2</sup> Que lë ni na' rinné ládxi'ru' tu' ré'ëni'ru' tsú'uru' le cubi ni', lë na' naca ca tu lídxiru' ni' yehua' yubá. <sup>3</sup> Tsú'uru' le cubi ni' ca na' rácuru' tu lari', para cabí sóaru' ga bití' zoa idütë le naca cázaru'. <sup>4</sup> Tsanni ni zóaru' lu idütë le naca cázaru', le naca ca tu yu'u lári'do', rinné ládxi'ru' lu yöl-la' risëbi ládxi' queëru'. Bití' runru' caní tu' ré'ëni'ru' ucá'anaru' idütë le naca cázaru', pero ré'ëni'ru' tsú'uru' tsaz le cubi ni'. Caní gaca, ucá'anaru' idütë le naca cázaru' le riniti, ate' tsú'uru' lu yöl-la' na'bán idú. <sup>5</sup> Dios chinupé'ë yúgu'të lë ni queëru', ate' guchizië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupé'ë queëru'.

<sup>6</sup> Que lë ni na' nadipa ládxi'ru'. Tsanni ni yú'uru' lu le naca cázaru', nóziru' zóaru' zítu' ga zoa lidxi' Xanru'.

<sup>7</sup> Runru' ca runru' tu' réajlë'ëru'-në' Dios, en calëga tu' zoa bi rilé'ëru'. <sup>8</sup> Tu' runru' löza lë ni, ré'ëni'ru' ucá'anaru' le naca cázaru' ni para tsöjsóalenru'-në' Xanru'.

<sup>9</sup> Que lë ni na' ruí' ládxi'ru' gunru' le raza ládxi'ë Xanru', channö ugá'anaru' lu idütë le naca cázaru' ni, o

channö tsöjsóalenru'-në' Xanru' ni'. <sup>10</sup> Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröë'. Ní'irö ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

### Le ruún rë'u tuz len Dios

<sup>11</sup> Que lë ni na', tu' rádxi'tu'-në' Dios, ruí' ládxi'tu' uzéajni'itu' bönachi. Nózinë' Dios ca naca le yu'u icja ládxi'do'otu', ate' ruzxóni ládxi'a nózili' dxi'a ca' libí'ili' lë na' yu'u icja ládxi'do'otu'. <sup>12</sup> Bití' rubéaj cuintu' dxi'a lolí'. Ré'ëni'tu' gata' lataj queéli' gunlí' netu' bal, para gaca ubí'ili' didza', bi guí'ili' yugu' bönni' tun ba zxon cuíngaquië' ca na' tu'lu'isö lahui cuíngaquië', en calëga ca nácalaquië' lu icja ládxi'do'gaquië'. <sup>13</sup> Channö nachixi ícjavu', naca para gaca yöl-la' ba queë' Dios, en channö cabí nachixi ícjavu', naca para gaca bi uzí'ili' xibé. <sup>14</sup> Run bayudxi bi guntu' tu' nadxi'inë' Cristo rë'u, tu' chinóziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxón. <sup>15</sup> Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. <sup>16</sup> Que lë ni na', bí'ti'rö gúnbë'ëtu' bönachi tsca naca le nalá'gaca láchui'lö, en sal-la' canísö bënbe'ëtu'-në' Cristo, bití' núnbe'ëtu'-në' caní na'a. <sup>17</sup> Channö nuhuóaca nútí'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

<sup>18</sup> Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'. <sup>19</sup> Libán runtu' rnna caní: "Dios guzóalenë' Cristo, en benë' ga gaca ulu'huóaca bönachi yödzölió ni tuz len Lë', en bití' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huóaca bönachi tuz len Dios. <sup>20</sup> Na'a, nácatu' gubáz queë' Cristo, en raca na'a ca Dios caz ráta'yue' lolí' lu rú'atu' netu'. Que lë ni na' ráta'yutu' lolí' uláz queë' Cristo, guli'huóaca tuz len Dios. <sup>21</sup> Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

**6** Tu' runtu' dxin tsözxón len Dios, ráta'yutu' lolí', rn-natu': Bití' udódili' cá'asö le ruzá' ládxi'ë Dios queéli'. <sup>2</sup> Nazúaj lu guichi lá'ayi ca gunné' Dios le rnna: Tu dza buzá' ládxi'a quiu', biyönda' lí', ate' dza bena' ga gaca uló', gúcalena' lí'. ¡Bulí'yútsöca'! ¡Na'a naca dza ruzá' ládxi'ë queëru'! ¡Na'a naca dza gaca uláru'!

<sup>3</sup> Bití' ré'ëni'tu' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. <sup>4</sup> Ní'a que bí'ti'tës bi runtu', ruí' ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxon ládxi' ruá' rilentu' yugu' le riguí' rizáca'tu', en yugu' le riyadzaj queëtu', en yugu' le tun ga ró'ötu' böniga. <sup>5</sup> Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía dí'i netu'. Gudödi bë' bentu' dxin, en bití' gata' lataj queëtu' gási-

tu' o bi gágutu'. <sup>6</sup> Bë' ládxi'tu' gaca bë' nácatu' huen dx-  
in queë' Dios. Guca bë' lë ni:

Tu' nácatu' ba'a ladxí', en tu' nápatu' yöl-la' réajni',  
en tu' riböztu' zxön ladxí', en tu' nácatu' dxi'i ladxí',  
en tu' zóalenë' Dios Bö' Lá'ayi netu',  
en tu' naca idú ca nadxí'tu' luzá'atu'.

<sup>7</sup> Ruí'tu' didza' idútë li, ate' zóalen netu' yöl-la' huáca  
queë' Dios. Le naca tsahui' naca ca tu le rud'initu' lu  
gudil-la, enca' le run chí'i netu' lu gudil-la na'.

<sup>8</sup> Nacuá' nupa tun netu' bal, enca' nupa tu'zóa netu'  
tsölá'alö.

Nacuá' nupa tu'lidza ditaj netu', enca' nupa tu'lidza  
tsahui' netu'.

Sal-la' ta'nná bönachi rizí' yé'ëtu', ruí'tu' didza' idútë li.

<sup>9</sup> Sal-la' nacué' bönachi bití' núnbë'gaquië' netu',  
nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' naban-  
tu'.

Tunë' netu' xíguia', pero bití' tutië' netu'.

<sup>10</sup> Tu'suhuí'ini netu', pero rudzëjaticá'stu'.

Nácatu' bönni' yechí', pero runtu' ga rata' yöl-la'  
tsahui' idú quégaca bönachi zían.

Sal-la' bití' bi dë queëtu', nequi queëtu' yúgu'të le dë.

<sup>11</sup> Idú ládxi'tu' ruí'ilentu' libí'ili' didza', böchí' luzá'ado',  
zóali' Corinto. Buluí'tu' libí'ili' ca ruí' ládxi'da'tu' libí'ili'.

<sup>12</sup> Channö cabí nácaru' tuz bití' naca tu' cabí ruí' ládxi-  
tu' libí'ili', pero libí' cázali' bití' ruí' ládxi'li' netu'. <sup>13</sup> Na'a,  
ruí'lëna' libí'ili' didza' ca runë' tu bönni' ruí'lëne'-bí'  
zxí'inë' didza', rnní'a: Bulí'bí'i queëtu' ca rúnlentu' libí'ili'.  
Gulí'güí' ladxí' netu'.

### Nácaru' ca tu yudo' ga yu'ë Dios ban

<sup>14</sup> Bití' gácali' tuz len bönachi bití' ta'yéajlë'.

¿Nacxi gácatsö ilaca tuz le naca tsahui', en le cabí  
naca tsahui'?

¿Nacxi gácatsö ilaca tuz le naca chul-la, en le naca  
bení'?

<sup>15</sup> ¿Nacxi gácatsö ilácagaquië' tuz Cristo, en Satanás,  
tu' xihui'?

¿Nacxi gácatsö ilácagaquië' tuz tu bönni' réajlë'  
Cristo, en tu bönni' bití' réajlë'ë?

<sup>16</sup> ¿Nacxi gácatsö ilaca tuz yudo' queë' Dios, en budó'  
guió'j budó' yaga?

Libí' cázali' nácali' ca tu yudo' ga yu'ë Dios ban. Ca  
naca lë ni, Dios caz gunné':

Sóalëna' légaquië', en táalëna' légaquië'.

Gaca' Dios quégaquië', ate' légaquië' iláquië' bönachi  
quia'.

<sup>17</sup> Que lë ni na', gunné' ca' caní:

Gulí'ruáj ládjagaquië', en bulí'lá'alëna' légaquië'.

Rnnë' Xanru': "Bití' gútsa'li' le ruá' dö', ate' sí' lu na'a  
libí'ili'.

<sup>18</sup> Neda' gaca' xuz cázali', ate' libí'ili' gácali' zxí'ina',  
bönni', en nigula'."

Caní rnnë' Xanru', Nu napa caz idútë yöl-la' huáca.

**7** Böchí' luzá'ado', néquiquequi queëru' yugu' lë ni  
guzxí' lu në'ë Dios. Que lë ni na' ral-la' un cuinru'  
dxi'a, en ubéajru' yúgu'të le rucá'ana cá'asö idútë le

naca cázaru', en bö' naca cázaru'. Lu yöl-la' radxi  
queëru' Dios ral-la' guéquiru' quez queë' Lë'.

### Ca bulu'bí'i ládxi'gaca nupa ta'yéajlë' Cristo

<sup>2</sup> Gulí'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'ëtu'.

<sup>3</sup> Ruá'a caní didza', calëga para usubága'a libí'ili'  
xíguia', pero naca ca na' chigunní'a' zí'alö, rnní'a: Zoa'  
sina' ibánlëna' libí'ili' o gátillëna' libí'ili' tu' ruí' ládxa'a  
libí'ili'. <sup>4</sup> Ruzxónida' ládxa'a libí'ili', en rúnda'a libí'ili'  
zxön. Sal-la' zían le riguí' rizáca'tu', nadípada' ládxa'a,  
en rudzëjade'e ládxa'a.

<sup>5</sup> Cate' bidxintu' luyú Macedonia, ga ridxintë na'a dza,  
bití' rata' queëtu' lataj uzí' ládxi'tu', pero zían le taca  
queëtu'. Ta'díl-lalëna' bönachi netu', ate' lu icja ládxi-  
do'otu' yú'ugaca le tun ga rádxi'tu'. <sup>6</sup> Ní'irö Dios, Nu ru-  
tipa ladxí' nu chizóa gaca chopa ladxí', butipë' ládxi'tu'  
cate' budxinbí' bí'i Tito ga guzóatu'. <sup>7</sup> Bití' gúcasö tu'  
budxinbí' queëtu', pero tu' gudí'xjöi'ibi' ca' netu' ca na'  
libí'ili' butípali' ládxi'bi'. Gudí'xjöi'ibi' netu' ca na'  
ré'ënide'eli' ulé'eli' neda', en ca na' ruhuí'inili' ní'a que lë  
na' guca ni', enca' ca ruí' ládxi'li' neda'. Yúgu'të lë ni  
ben ga rudzeja ládxa'a.

<sup>8</sup> Sal-la' le buzúaja' queé'li' lu guichi zí'alö ben ga  
buí'inili', bití' ruhuí'inda' na'a. Zí'alö buí'inida' cate'  
gúquibe'eda' ben ga buí'inili' libí'ili' tu chí'ido', <sup>9</sup> pero  
na'a rudzëjada', calëga tu' buí'inili', pero tu' ben yöl-la'  
ruhuí'ini queé'li' na' ga bubí'i ládxi'li'. Dios bugunë' dxin  
yöl-la' ruhuí'ini queé'li', para cabí ichixi inigui' ní'a que  
le bentu' netu'. <sup>10</sup> Yöl-la' ruhuí'ini na' rugunë' dxin Dios  
run ga nu ubí'i ladxí' para ulá nu na', ate' que lë ni na'  
bití' ral-la' huí'iniru' que. Yöl-la' ruhuí'ini le naca que  
yödzölió ni run ga ilátigaca bönachi. <sup>11</sup> Bulí'yútsöca' ca  
bugunë' Dios dxin yöl-la' ruhuí'ini queé'li' na'.

Ben ga ruí' ládxi'li'-në' Dios.

Ben ga gú'unili' urúajli' dxi'a.

Ben ga gulé'li' nu na' ben dul-la'.

Ben ga rádxi'li'-në' Dios.

Ben ga bë' ládxi'li' gunlí' ca rnna xtídzë'ë Dios.

Ben ga nadxí'li'-në' Dios idú ládxi'li'.

Ben ga gú'unili' gunlí' xíguia' nu na' ben dul-la'.

Benlí' le naca bë' bití' bi dul-la' nabága'li' ní'a que lë na'  
guca.

<sup>12</sup> Que lë ni na', sal-la' buzúaja' caní lu guichi na', bití'  
guca ní'a que nu na' ben dul-la', en calëga ní'a que nu  
na' gudí' guzxaca', pero para gaca bë' lahuë' Dios le  
nácatë ruí' ládxi'li' netu'. <sup>13</sup> ¡Lë ni butipa ládxi'tu'! Calë-  
gasö bidipa ládxi'tu', pero rudzëjade'e ládxi'tu' tu'  
rudzëjábí' bí'i Tito ní'a que le benlí' libí'ili', tu' butípali'  
ládxi'bi'.

<sup>14</sup> Bena' libí'ili' zxön lobí' Tito, ate' bití' benlí' ga utuí-  
da'. Bé'lëntica'stu' libí'ili' didza' idútë li, ate' lëscá' caní  
naca idútë li didza' bé'lentu'-bí' Tito cate' bentu' libí'ili'  
bal. <sup>15</sup> Zeaj rácarö idú ca nadxí'ibi' bí'i Tito libí'ili' cate'  
röjnebí' ca na' benlí' ca rnna xtídzä'tu', en ca na' benlí'-  
bí' bal lu yöl-la' radxi Dios queé'li' en lu yöl-la' nöxaj

ladxi' queéli'. <sup>16</sup> Rudzėjade'eda' tu' gaca uzxöni ládxa'a libí'ili' idú ládxa'a.

### Ca ral-la' unódzaj nu réajlë' Cristo le dë que

**8** Na'a, böchi' luzá'ado', ré'ënitú' quíxjöi'itu' libí'ili' ca naca le buzá' ládxe'ë Dios quégaca yugu' cö' bö-nachi queë' Cristo luyú Macedonia. <sup>2</sup> Sal-la' yenni' gula'guí' gula'záquië' lu yugu' le guzxi' bë' légaquië', bulu'dzėjade'enë', en idú ládxi'gaquië' bulu'nódzjadë'ë sal-la' nácaquië' bönachi yechi'. <sup>3</sup> Neda' runa' ba nali quégaquië', idú ládxi'gaquië' bulu'nódzjadë'ë tsca gula'zéquínë', en bulu'nódzjarë' tsca gula'zéquínë'. <sup>4</sup> Gula'nábide'enë' netu', en guláta'yudë'ë lotu' gü'itu' légaquië' lataj tsözxón len netu' ilácalenë' böchi'ru' ta'yéajlë'ë Cristo. <sup>5</sup> Gulunrë' ca guqui ícjatú' ilunë'. Bulu'dödi cuíngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios. <sup>6</sup> Que lë ni na' gunábitu'-bi' bí'í Tito údxi gunbi' xichinbi' ga n'í zóali', en utúbibi' dumí runódzjali' lu yöl-la' dxí'í ladxi' queéli', ca na' gusí lobi' benbi' zí'alö. <sup>7</sup> Nácali' lo ca naca yúgu'të le runli',

ca réajlë'ëli' Cristo,  
en ca réajni'ili',  
en ca ruzéajni'ili' bönachi,  
en ca ruí'í ládxi'li' luzá'ali',  
enca' ca nadxi'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxí'í ladxi' queéli' bi unódzjali' quégaquië'.

<sup>8</sup> Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nódzaj idú ládxi'gaca, para guna' ga gunli' le gaca bë' naca idú ca nadxi'ili' luzá'ali'. <sup>9</sup> Nöz quézili' le buzá' ládxe'ë Xanru' Jesucristo queëru'. Bilé'enë' yöl-la' tsahui' pero para gácalenë' libí'ili' böáquië' yechi' para gata' queéli' yöl-la' tsahui', tu' gúquië' Lë' yechi'.

<sup>10</sup> Caní runi neda': Dxí'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunódzjali', pero lësca' ca gú'unili' unódzjali'. <sup>11</sup> Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunódzjali'. Buli'nódzaj na'a tsca séqui'li'. <sup>12</sup> Channö ré'ënilí' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

<sup>13</sup> Biti' ré'ënda' guna' ga unódzjali' le gácalen ia'zica'rö bönachi ga idxintë yadzaj queéli'. <sup>14</sup> Ré'ënda' gaca tuz ca dë queéli', en quégaquië'. Na'a dëda' queéli' le gaca unódzjali' para bi gata' quégaca nupa n'í riyadzaj quéguequi. Ní'irö cate' bi yadzaj queéli', légaquië' huáca bi ulu'nódzjë' queéli' para caní gaca tuz ca dë queéli', en quégaquië' yúgu'tëli'. <sup>15</sup> Lësca' caní nazúaj lu guichi lá'ayi le rnna: "Nu na' butúbida', bití' bugá'ana que, ate' nu na' butubi láti'do'os, bití' biyadzaj que."

### Ca runbi' bí'í Tito, enca' nupa dzágagaca lëbi'

<sup>16</sup> ¡Xclenë' Dios, tu' benë' Lë' ga ruí'í ládxi'bi' bí'í Tito libí'ili', ca na' ruí'í ládxa'a neda' libí'ili'! <sup>17</sup> Calégasö runbi' ca rnna xtídza'a bi rinábida'-bi', pero tu' ruí'í ladxi' cázabi' libí'ili', rácasö queébi' gú'unibi' tsöyubi' libí'ili'.

<sup>18</sup> Risól-la'tu'-në' tsözxón len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxí'a dxin que didza' dxí'a. <sup>19</sup> Ia'stú, gula'bó yugu' cö' bönachi queë' Cristo bönni' ni, para tséajlenë' tsözxón netu' guá'tu' lë na' runódzjali', para gaca yöl-la' ba queë' Xanru', en gaca bë' ca' ruí'í ládxi'ru' luzá'aru' ta'yéajlë'ë Cristo. <sup>20</sup> Caní gaca, gunë' netu' tsözxón para cuntú' nu bi gaca innë' queëtu', ca rúnlentu' dumí na' runódzjada'ali', le gácalen bönachi yechi'. <sup>21</sup> Ruí'í ládxi'tu' guntu' le naca dxí'a, calégasö lahuë' Xanru', pero lësca' lógaca bönachi.

<sup>22</sup> Risól-la'tu'-në' ca' ia'túë' böchi'ru' tsözxón len légaquië', ate' zían luzuí' guzxi' bé'ëtu' lë', ate' naca bë' ré'ëne' gácalenë' rë'u idú ládxe'ë. Ia'stú, tu' ruzxöni ládxe'ë libí'ili', ré'ënitëronë' ca' gácalenë' rë'u lu dxin ni. <sup>23</sup> Channö nu bi inaba ca nácabi' bí'í Tito, nácabi' luzá'a, rúnlenbi' neda' tsözxón dxin para gácalentu' libí'ili'. Channö nu bi inaba ca nácaquië' ia'zica'rë' böchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo.

<sup>24</sup> Gulí'gún ga gaca bë' nadxi'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idütë li didza' dxí'a ruí'itu' ca naca queéli'.

### Ca naca dumí rutúbiru' le gácalen yugu' böchi'ru'

**9** Ca naca le runódzjali' quégaquië' böchi'ru' ta'yéajlë'ë Cristo, bití' run bayudxi uzúaja' queéli' lu guichi ni. <sup>2</sup> Chinözda' ca ré'ënilí' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxí'a runli'. Riguíxjöi'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'í ládxi'li' gunli' lë ni, bidipa ládxi'gaca lá-tu'biquí' yúgu'të bönachi ni ta'yéajlë' Cristo. <sup>3</sup> Na'a, risól-la'a yugu' böchi'ru' ni queéli' para gaca bë' naca idütë li didza' ruí'itu' ca naca queéli', ate' naca ca na' chigunnia' queéli', chizóa gunli' lë na' gácalen yugu' luzá'aru'. <sup>4</sup> Channö ila'zá'alén bal-la bönachi Macedonia ta'yéajlë' Cristo neda' tsözxón, ate' gaca bë' bití' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'í cázali' ca' ral-la' utuí'ili'. <sup>5</sup> Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí' utúbili' lë na' guzxi' lu ná'ali' unódzjali'. Caní gaca, údxi utúbili' dumí na' zí'alö ca idxina', ate' gaca bë' runódzjali' tu' ré'ëni cázali', en calëga tu' rinná bé'etu' libí'ili' bi unódzjali'.

<sup>6</sup> Gulí'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

<sup>7</sup> Tu tuli' ral-la' unódzjali' tsca na' chinuzóali' icja ládxi'-do'oli', en calëga lu yöl-la' ruhu'ini queéli' o tu' run

bayudxi, tu' naxí'iné Dios nu runödzej idú ladxí'.

<sup>8</sup> Dios gaca gúnnadé' queé'li' ca riquínili' para gata' queé'li' yúgu'té lè na' riquínili', ate' ugá'ana queé'li' para gaca gácalenli' nu bi riyadzaj que. <sup>9</sup> Lësca' caní nazúaj lu guichi lá'ayi le rnna:

Idú ládxé'ë bunödzejé' quégaca bönachi yechi'.

Naca bé'tica'sö yöl-la' dxi'i ladxí' queé'.

<sup>10</sup> Dios, Nu runna queéru' bi gaz uzóaru', enca' bi guí'aj gáguru', gunné' ca' queé'li' bi unödzejali', le naca ca lè na' nu raza ruzóa, en guné' ca' ga ila'yán le ilápalí' le nácgaca yugu' le dxi'a runli'. <sup>11</sup> Dios guné' ga gáta'-da' queé'li' yöl-la' tsahuí' para gaca unödzejada'alí'. Caní gaca, yugu' le unödzejali', lè na' quísitu' uláz queé'li', gun ga ila'nná bönachi zían: "Xclené' Dios." <sup>12</sup> Lè na' runödzejali' le gácalen yugu' böchi'ru', calégasö gü'í' quégacuié' le ta'yádzjané', pero gun ga ila'nné': "Xclené' Dios." <sup>13</sup> Cate' gunli' caní, ila'gu'é Dios yöl-la' ba tu' gaca bé' runli' ca rnna didza' dxi'a queé' Cristo ca na' rnnali' runli'. Ila'gu'é Lè yöl-la' ba ca', tu' nácalí' dxi'i ladxí', runödzejali' quégacuié', enca' quégaca ia'zica'rö bönachi. <sup>14</sup> Ulu'lidzé' Dios, en ila'nábiné' Lè gácalené' libí'ili' tu' naxí'iguié' libí'ili' ni'a que le buzá' ládx-i'dé'ë Dios queé'li'. <sup>15</sup> Xclené' Dios, benné' tu le nácada' lesaca' queé'li'!

#### Yöl-la' unná bé' dè lu në'ë Pablo

**10** Ta'nná bönachi naca' nöxaj ladxí' cate' zóalena' libí'ili', pero cate' zoa' zítu' ga zóalí' naca' rugu ladxí' ca ruzúaja' lu guichi. Tu' náquié' nöxaj ladxí', en dxi'i ladxí' Cristo, neda', Pablo, ráta'yua' lolí' <sup>2</sup> cabí gunli' ga gun bayudxi gaca' rugu ladxí' len libí'ili' cate' idxina' ga zóalí'. Chizóa gaca' rugu ladxí' len nupa ni' ta'nná runtu' dxin ni lu yöl-la' bönáchisö queé'tu'. <sup>3</sup> Le nácaté nácatu' bönachi, pero caléga rácasö queé'tu' runtu' xichiné' Dios. <sup>4</sup> Yugu' le rudí'initu' lu gudil-la, bití' nácgaca ca le tu'dí'ini bönachi yödžolió ni lu gudil-la, pero yugu' le rudí'initu' lu gudil-la nápagaca yöl-la' huáca queé' Dios, le ruguntu' dxin para usunítitu' le nál-laga-ca que tu' xihuí'.

<sup>5</sup> Rusunítitu' yugu' didza' bití' nácaté le tu'zxöni ládx-i-gaca bönachi, en yúgu'té le tun ga tun ba zxön cuínguequi, en le tun ga cabí ilunbé' Dios. Runtu' ga gaca ila'nná bé'ené' yúgu'té le ta'zá' ládx-i'gaquié', lè na' tun ga ta'dá'bagu'é Dios, ate' runtu' ca' ga tuné' ca rn-né' Cristo. <sup>6</sup> Tödi gunli' le gaca bé' naca idú ca runli' ca rnna xtídzé'ë Cristo, sóatu' sina' guntu' xíguia' yúgu'té nupa ni' ta'dá'baga' xtídzé'ë.

<sup>7</sup> Ruyulí' le nalá' láhuisö. Channö réquiné' nu bönni' dzáguié' libí'ili' néquiné' queé' Cristo, ral-la' guéquebe'ené' ca' lè ni: Ca na' lè' néquiné' queé' Cristo, lësca' caní netu' néquitu' queé' Cristo. <sup>8</sup> Bití' ca' rutuí'-da' sal-la' gudödi bé' ben ba zxön cuina' ca naca yöl-la' unná bé' budödé' Xanru' lu na'tu'. Lè na' dè lu na'tu' naca para guntu' ga gácarö idú ca réajlé'ëli' Cristo, en caléga para usunítitu' libí'ili'. <sup>9</sup> Bití' ré'ënda' guéquilí' ré'ënda' gun gádxida' libí'ili' ni'a que le ruzúaja' queé'li' lu guichi ni. <sup>10</sup> Nacuá' ni' nupa ila'nná: "Yugu' le ruzúajé' Pablo queéru' lu guichi, rulidza zí'ë ré'u, en ralé' didza',

pero cate' zóalené' ré'u runé' nöxaj ladxí', en didza' gúlado' ru'é." <sup>11</sup> Nu na' ru'í' caní didza' ral-la' guéquebe'ë lè ni: Ca na' nácatu' cate' bi ruzúajtu' queé'li' lu guichi tsanni ni zóatu' zítu' ga zóalí', gácatu' ca' lu le guntu' cate' ni' sóalentu' libí'ili'.

<sup>12</sup> Le nácaté bití' nácatu' rugu ladxí' para innatu' nácatu' lèbi ca nácgaca nupa ni' tun ba zxön cuínguequi. Nácgaca nupa ni' yugu' bönni' bití' bi nózguequiné'. Lu le ta'za'sö ládx-i'gaquié' tu'zöé' ca ral-la' ilaca bönachi, en tu'chi'a tu'söröé' la' légcasé' tsca naca lè na' ta'za'sö ládx-i'gaquié'. <sup>13</sup> Netu' bití' gunrö ba zxön cuintu' ca ral-la' guntu', pero ca nácaté dxin budödé' Dios lu na'tu', ate' lu dxin ni, ral-la' guntu' le ga ni' zóalí' libí'ili'. <sup>14</sup> Channö budödé' Dios lu na'tu' dxin guntu' ga zóalí', bití' ca' gudödi bé'ëtu' ca bentu' cate' bidxintu' ga zóalí', en bentu' libán que didza' dxi'a ga na' zóalí'.

<sup>15</sup> Bití' run ba zxön cuintu' ca naca dxin núngaca ia'zica'rö bönachi, pero ca nácasö dxin na' budödé' Dios lu na'tu'. Runtu' löza gácarö idú ca réajlé'ëli' Cristo para gaca guntu' dxin ga zóalí' le nácarö lesaca', tsca naca le budödé' Dios lu na'tu' guntu'. <sup>16</sup> Ní'irö gaca guntu' libán que didza' dxi'a ga nacua' yödžö dzö'ö zítu'rö ga zóalí'. Caní gaca, bití' gun bayudxi gun ba zxön cuintu' ni'a que dxin núngaca ia'zica'rö bönachi, lè na' budödé' Dios lu né'eguequi.

<sup>17</sup> Nazúaj lu guichi lá'ayi le rnna:

Nu ré'ëni bi gun zxön,  
le ben cazé' Xanru' ral-la' gun zxön.

<sup>18</sup> Nurúajé' dxi'a tu bönni' cate' rnné' Xanru' nurúajé' dxi'a, en caléga cate' ru'é caní didza' bönni' na' que la' cuinsé'.

#### Ca nácgacuié' Pablo, en bönni' tun cuíngacuié' gubáz queé' Cristo

**11** Ré'ënda' guá' ilenli' neda' tsanni ni gu'a didza' lu yöl-la' bití' bi nözi quia'. Bulí'sá' ládx-i'li' quia'.

<sup>2</sup> Ru'í' ládx-a' libí'ili' ca na' Dios caz ru'í' ládxé'ë libí'ili', tu' nácalí' ca nácabí' tubí' bí'í' nigula ra'bandó', naca idú ládx-i'bi', rusudxina'-bí' lahué' Cristo para utsaga ná'aleni' Lè cazé'. <sup>3</sup> Rádxida' idxín queé'li' nu sí' ye'ë libí'ili', en gun ga usanli' ca naxí'ili'-né' Cristo idú ládx-i'li', ca na' guca queé'nu Eva, nigula queé' Adán, cate' guxzí' ye'ë Satanás tu' xihuí' lènu lu yöl-la' sina' que.

<sup>4</sup> Caní rnnia' tu' idú ládx-i'li' ru'í'ili' nu za' queé'li' lataj, en run libán que xibá queé' Jesús, le nadzá' ca naca xibá na' bentu' netu' libán que, ate' rizí' lu ná'alí' tu bö', en tu didza' dxi'a le nadzá'gaca ca nácgaca Bö' Lá'ayi na', en didza' dxi'a na' guxzí' lu ná'alí' lu na'tu' netu'. <sup>5</sup> Réquida' bití' nácara' cuídísö ca nácgacuié' bönni' ni' nácaté'ögacuié' lo, ate' réquilí' nácgacuié' gubáz queé' Cristo. <sup>6</sup> Nadxi ca' naca' cuídísö ca ruá'a didza', pero bití' naca' cuídísö ca naca yöl-la' réajni'i napa'. Zían luzuí', en zían ca buluí'itu' libí'ili' ca naca yöl-la' réajni'i nápatu'.

<sup>7</sup> Nadxi ca' bití' naca dxi'a tu le bena', bití' bi buquixz-ja' libí'ili' cate' bena' libán ga zóalí' que didza' dxi'a. Ben cuina' cá'asö, ate' bena' ga gúcalí' libí'ili' zxön. <sup>8</sup> Buguna' dxin le nequi quéguequi ia'zica'rö cö' bönachi queé' Cristo, tu' guxzí'a dumí' bulu'nödzejé' légaquié' quia'

para guca bena' dxin ga zóali' libí'ili'. <sup>9</sup> Cate' guzóalena' libí'ili', en biyadzaj quia', bití' busaca' z'á nitulí' libí'ili', pero lè na' biyadzaj quia', gulunné' quia' bóchi'ru' bi-la'rúajé' luyú Macedonia, en bila'dxiné' ga zoa'. Catu caz busaca' z'á libí'ili', ate' la' lèbisö ca guna'. <sup>10</sup> Ni'a que le naca idütè li queé' Cristo le zóalen neda', bití' soa' dxisö, gun ba zxön cuina' ca naca lè ni idú luyú Acaya. <sup>11</sup> ¿Naru' réquitseli' rnnía' caní tu' cabí nadxí'ida' libí'ili'? Nóziné' Dios nadxí'ida' libí'ili'.

<sup>12</sup> Gúntica'sa' ca runa' na'a, para cabí gata' qué-gaquié' lataj ilún ba zxön cuíngaquié' bönni' ni' ta'n-nasé' nácagaquié' gubáz queé' Cristo, en ta'nné' tuné' xichiné' Lè' ca runtu' netu'. <sup>13</sup> Bití' ca' nácagaquié' gubáz nasól-lè'è Cristo. Ta'z'í yè'è ca naca dxin tuné', en tun cuíngacasé' gubáz queé' Cristo. <sup>14</sup> Bití' ral-la' ubániru' ca tuné' bönni' na'. Lèsca' Satanás caz, tu' xihuí', ruluí' cuini ca tu gubáz lá'ayi queé' Dios, ridé' lu bení'. <sup>15</sup> Que lè ni na' bití' ral-la' ubániru' channö yugu' huen dxin que tu' xihuí' na' tu'lú'í cuíngaquié' ca nupa tun xichini Nu na' naca tsahuí'. Udxí quégaquié' ca sa'yéaj le tuné'.

### Yugu' le gudí' guzjáquë'è Pablo

<sup>16</sup> Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'gü' neda' lataj gu'a didza' ca tu bönni' nachixi icjé', para gun ba zxön cuina' tu chí'ido'. <sup>17</sup> Didza' ni ru'áa bití' naca le rinná bē'è Xanru', pero ru'áa didza' ca tu bönni' nachixi icjé', run ba zxön cuina'. <sup>18</sup> Nacu'è zían bönni' tun ba zxön cuíngaquié' ca nácagaca le tuné' lu yöl-la' bönáchisö quégaquié'. Que lè ni na', neda' ca' gun ba zxön cuina'. <sup>19</sup> Tu' réquili' rácada'ali', idú láchí'li' ruí'ili' lataj ilu'è didza' yugu' bönni' nachixi ícjagaquié'. <sup>20</sup> Ruí'ili' ca' lataj nu gun libí'ili' bönni' nadó'ogaca, o nu cúa le dē queé'li', o nu inná be'e libí'ili', o nu ucá'ana libí'ili' cá'asö, o nu capa' rú'ali'. <sup>21</sup> Rutuí'ida' rnnía' lè ni: Bití' bentu' caní queé'li' tu' gudödi bē' gúcatu' nōxaj ladxí'.

Channö zoa nu naca rugu ladxí' para gun ba zxön cuini, neda' ca' gaca' rugu ladxí', en gu'a didza' ca tu bönni' nachixi icjé'.

<sup>22</sup> ¿Naru' nácagaquié' bönni' hebreo?

Lèsca' naca' neda'.

¿Naru' nácagaquié' bönni' Israel?

Lèsca' naca' neda'.

¿Naru' nácagaquié' zxí'ini xi'sóé' Abraham?

Lèsca' naca' neda'.

<sup>23</sup> ¿Naru' nácagaquié' huen dxin queé' Cristo?

Lèsca' nácatèra' neda'.

(Na'a ru'áa didza' ca tu bönni' nachixi icjé' cate' rnnía' caní.)

Béntèra' dxin ca guluné' légaquié'.

Guyu'a lidxi guíé zíanrö luzuí ca gula'yu'è légaquié'.

Gula'zé'eda' neda' yu bönachi zíanrö luzuí ca guca quégaquié'.

Guzóa bönadxi gátia' zíanrö luzuí ca guzóa qué-gaquié'.

<sup>24</sup> Gayu' luzuí yugu' bönni' judío gula'guíné' neda' guí-di.

Tu tu luzuí na' gula'guíné' neda' chènna uru'á' luzuí.

<sup>25</sup> Tsonna luzuí gula'guíné' neda' gubá'ayi.

Tu luzuí bulu'ladxé' neda' guíó'.

Tsonna luzuí guzóa' tu lè'e barco le guca ditaj, en bötaj lu nísado'.

Tu luzuí guzóa' idú tu yèla, en tu dza lu nisa que nísado'.

<sup>26</sup> Zían luzuí cate' ni' yu'a nōza,

gudöda' gapa guzóa bönadxi quia' yugu' lu yegu, en gapa guzóa bönadxi quia' lu ná'agaquié' gubán, en gapa guzóa bönadxi quia' lu ná'agaquié' bönni' uládz quia',

en gapa guzóa bönadxi quia' lu ná'agaquié' bönni' zítu',

en gapa guzóa bönadxi quia' lu yödzo,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquié' bönni'

ta'z'í yè'è, ta'nné' nácagaquié' bóchi'ru' ta'yéajlè'è Cristo.

<sup>27</sup> Bena' dxin z'í'i, en gudú láchxa'a.

Zían luzuí bití' guta' quia' lataj gásia'.

Guduna', en gubidxa' nisa.

Zían luzuí bití' guta' quia' bi gahua', o ga utsè'e cuina', o lari' gá'cua'.

<sup>28</sup> Ia'stú, yúgu'tè dza ru'ubi ruguí'ida' tu' ruí'ida' láchxa'a yúgu'tè cō' bönachi queé' Cristo. <sup>29</sup> Cate' nu ricuidí', neda' ca' ricuidí'da'. Cate' nu run ga ichixi iníguiné' tu bóchi'ru', rileda' nu run caní. <sup>30</sup> Channö run bayudxi gun ba zxön cuina', gun ba zxön cuina' ca naca le náca-gaca bē' ricuidí'da'. <sup>31</sup> ¡Dios, Xuzé' Xanru' Jesucristo, gá-catica'sö queé' yöl-la' ba! ¡Lè' nóziné' ru'áa didza' idütè li! <sup>32</sup> Cate' ni' guzóa' lu yödzo Damasco, bönni' ni' guta' lu nē'è uláz queé' bönni' rinná bē'è, lè' Aretas, bucu'è yugu' bönni' gula'bó' nísie' para ila'zöné' neda', <sup>33</sup> pero yugu' bóchi'ru' ni' bulu'dödè' neda' tu ga ra'a bení' que yu'u, yu'a tu ga'böra zxön, en bulu'zötjé' neda' ní'ilo lu zö'ö run chí'i yödzo na'. Caní guca, bulá' lu ná'agaquié' bönni' ni' gula'bó' nísie' neda'.

### Yugu' le buluí'né' Dios Pablo

**12** Le nácatè bití' ral-la' gun ba zxön cuina'. Sal-la' caní naca, na'a gu'a didza' ca nácagaca le buluí'né' Xanru' neda', en le buzéajni'iné' neda'. <sup>2</sup> Nún-bē'a-né' tu bönni' réajlè'è Cristo, chiguca chidá' iz zoa nu guché' lè' yehua' yubá. Bití' nözda' channö guyijé' ni' lu idütè le naca cazé', o lu bö' naca cazé'. Tuzé' Dios nóziné'. <sup>3</sup> Nözda' guyázié' lataj lachi queé' Dios, nazí'i le paraíso. Bití' nözda' channö guyijé' ni' lu idütè le naca cazé', o cabí. Tuzé' Dios nóziné'. <sup>4</sup> Tsanni ni' zoé' ga na', biyönné' le tun ga nu rubani, yugu' le bití' dē lataj nu gü'í didza' que. <sup>5</sup> Bönni' ni hu'áca guna' lè' zxön, pero bití' gun ba zxön cuina'. Tuz gun ba zxön cuina' tu' ricuidí'da'. <sup>6</sup> La'tu' gu'é'énida' gun ba zxön cuina', bití' gaca' bönni' bití' bi nóziné', channö inní'a' le naca idütè li. Na'a, bití' gun ba zxön cuina' tu' cabí ré'ènda' nu gunrö ne'da' bal tsca le bilé'e bena' neda', o tsca naca didza' biyóni bē'a neda'.

<sup>7</sup> Ní'irö, para cabí tödi bē' gun ba zxön cuina' tu' bilé'eda' lē na' tun ga nu rubani, Dios buzóē' tu huē' lu xipé'la'a le riláda' ca rilá ga riné' tu yötsí'. Huē' na' guca ca tu le bugún dxin tu' xihuí', para busaca' zí' neda'. Caní guca quia' para cabí tödi bē' gun ba zxön cuina'.  
<sup>8</sup> Tsonna luzuí gúta'yua' lahuē' Xanru', en gunábida' Lē' ugúē' xihuē'a na'.  
<sup>9</sup> Xanru' gudxē' neda': "Nácatē quiu' le ruzá' ládxa'a quiu'. Uzítēru' xibé le ruzá' ládxa'a quiu' cate' ricuídí'nu'." Que lē ni na', rudzėjade'eda' tu' ricuídí'da'. Tu' raca caní quia', rácalentērō yöl-la' huáca queē' Cristo neda'.  
<sup>10</sup> Que lē ni na', tu' nadxí'ida-nē' Cristo, rudzėjada' cate' ricuídí'da', en cate' nu rulidza neda' zí', en cate' bi riyadzaj quia', en cate' nu ribía ladxí' neda', en cate' bi raca quia'. Cate' nacuídí'da', nápatērō caza' yöl-la' huáca queē' Lē'.

### Pablo ruí'í ládxe'ē bönachi queē' Cristo nacuí' Corinto

<sup>11</sup> Naca' tu bönni' bití' bi nózinē' tu' bē'a didza' ca naca le dxí'a bena' neda'. Libí'í cázali' benlí' bayudxi bena' caní. Libí'í'í'í' ral-la' gunlí' neda' bal, ate' sal-la' bití' bi naca' neda', bití' ca' nácara' cuidí' ca nácaquaiē' bönni' ní' nácada'gaquie' lo, ta'nnē' nácaquaiē' gubáz queē' Cristo.  
<sup>12</sup> Yugu' le bena' lu yöl-la' riböza zxön ladxí' quia' ga ní' zóali' nácaquaiē' bē' naca' gubáz queē' Cristo. Bilé'eli' yugu' le bena', le nácaquaiē' bē', en le tun ga nu rubani, en yugu' yöl-la' huáca zxön que yehua' yubá.  
<sup>13</sup> Tuz le cabí bena' ga zóali' le bena' ga nacuí' ia'zica'rö cō' bönachi queē' Cristo. Bití' busaca' zí'a libí'í'í' bi gún-nalí' le guí'aj gahua'. Bulí'niti lo neda' tu' cabí bena' caní queé'li'.

<sup>14</sup> Chizóa guída' ga zóali' le bunni luzuí. Bití' bi inaba' gún-nalí' quia'. Ré'ēnda' gunna cuin cázali' quia', en calēga bi dē queé'li'. Yugu' bí'í hué'ēnido', bití' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuē' xz'ínigaquie'.  
<sup>15</sup> Idú ládxa'a utóa' yúgu'tē le dē quia', en udödi cuina' ní'a queé'li' para gaca bi uzí'í'í' xibé, sal-la' réquida' cate' nadxí'iröda' libí'í'í', zeaj ruhuéchi' yöl-la' nadxí'í queé'li' neda'.

<sup>16</sup> Nöz quézili' bití' busaca' zí'a libí'í'í'. Na'a, bál-lalí' in-nalí' guca' sina', ate' len didza' bití' nácatē buzí'a xibalí'.  
<sup>17</sup> ¿Naru' réquitseli' guzxí' yé'eda' libí'í'í' cate' gusól-la'a yugu' gubáz quia' ga zóali'?  
<sup>18</sup> Gúta'yua' lobi' bí'í Tito tséajbí' ga zóali', ate' gusól-la'a-nē' bóchi'ru' na' tsözxón len lēbí'. ¿Naru' réquitseli' buzí'ibi' xibalí' bí'í Tito? ¿Naru' cabí bentu' la' lēbisö ca runtu' bí'í Tito, en neda', enca' la' lēbisö didza' bē'ētu'?

<sup>19</sup> ¿Naru' réquitseli' rubéaj cuintu' dxí'a lolí' libí'í'í'? Lahuē' Dios ruí'ítu' didza' uláz queē' Cristo, böchi' luzá'ado', ate' yúgu'tē le runtu' nácaquaiē' para gácarö idú yöl-la' réajlē' queé'li' Cristo.  
<sup>20</sup> Rádxida' bití' gácalí' ca ré'ēnda' gácalí' cate' guída' ga zóali', ate' neda' bití' gaca' ca ré'ēnilí' libí'í'í' gaca'. Rádxida' ridil-la dídza'li', en ruzxé'eli' luzá'ali', en rilelí' luzá'ali', en rulidza dí'tjalí' luzá'ali', en rnnēlí' que luzá'ali', en run ba zxön cuinlí', en rutsátsalí'.  
<sup>21</sup> Cate' guída' ga zóali', channö caní raca

queé'li', rádxida' gunē' Dios ga utuí'ida' ca naca queé'li', ate' gun bayudxi cōdxa' ní'a quégaca zían nupa ní' gulún dul-la', en bití' bulu'bí'í ládxi'gaca ca nácaquaiē' le cabí naca tsahuí' gulúngaca, en yugu' le gula'zé ládxi'guequi le cabí naca dxí'a.

### Pablo ruzéajni'inē' bönachi Corinto, en rugapē' Dios lé-gaquiē'

**13** Le bunni luzuí ni guída' ga zóali'. Nazúaj lu guichi lá'ayi le rna: "Run bayudxi ila'cuá' chopá tsonna nupa ilún ba nalí channö nu bi uzegui luzé'e didza'." <sup>2</sup> Chibuzéajni'ida' nupa gulún dul-la' cate' ní' guzóalena' libí'í'í' le buropi luzuí, ate' na'a ruzéajni'ida' légaquie' leyúbölö, enca' yúgu'tē nupa tun dul-la', sal-la' ni zoa' zítu', rnní'a: Channö guída' ga zóali' leyúbölö bití' gaca' nöxaj ladxí' para til-la' légaquie'.  
<sup>3</sup> Rinábalí' tu le gaca bē' ruá'a didza' uláz queē' Cristo. Lē na' guna' gaca bē' ruá'a caní didza'. Bití' ca' ricuídí'nē' Cristo cate' bi runē' queé'li', pero lu yöl-la' huáca zxön queē' runē' bi runē' queé'li'.  
<sup>4</sup> Le nácatē gudé'ē lē'e yaga cruz ca nu ricuidí', pero zoē' nabanē' tu' zóalen yöl-la' huáca queē' Dios Lē'. Netu' ca' ricuídí'tu' tsözxón len Lē', pero tu' nácatu' tuz len Lē' nabantu', ate' zóalen netu' yöl-la' huáca queē' Dios bi guntu' ga ní' zóali'.

<sup>5</sup> Bulí'yú cuinlí' channö réajlē'ēli' Cristo o cabí. Gulí'sí' bē' la' cuínsili'. ¿Naru' cabí nózili' zóalenē' Jesucristo libí'í'í' channö le nácatē réajlē'ēli' Lē'?  
<sup>6</sup> Runtu' löza chinóz quézili' le nácatē netu' réajlē'ētu' Cristo.  
<sup>7</sup> Rulídzatu-nē' Dios rinábitu-nē' gácalenē' libí'í'í', para cabí guá'ali' dö, calēga para urúajtu' dxí'a netu', pero para gunlí' libí'í'í' le naca tsahuí' sal-la' guéquili' richixi riníguitu' netu'.  
<sup>8</sup> Bití' ca' gaca tá'baga'tu' le naca idútē li, pero gácasö guntu' ca sa'yéaj le naca idútē li.  
<sup>9</sup> Que lē ni na' rudzėjatu' cate' ricuídí'tu', ate' libí'í'í' ridipa ládxi'li'. Rulídzatica'stu-nē' Dios, rinábitu-nē' gunē' ga gaca idú ca réajlē'ēli' Cristo.  
<sup>10</sup> Que lē ni na' ruzúaja' queé'li' lu guichi lē ni tsanni ni zoa' zítu' ga zóali'. Ní'irö cate' guída' ga zóali' bití' gun bayudxi usaca' zí'a libí'í'í', pero uguna' dxin yöl-la' unná bē' nudödē' Xanru' lu na'a, le naca para utipa' ládxi'li', en calēga para usuní'ti-a' libí'í'í'.

<sup>11</sup> Na'a, böchi' luzá'ado', dipa ládxi'li'. Gulí'gü'í' ládxi'li' gaca idú ca réajlē'ēli' Cristo. Gulí'gü'í' ládxi'li' ca' lē ni rea' libí'í'í'. Gulí'gaca tuz len luzá'ali', en guli'cöza dxí'ado'. Rinábida-nē' Dios sóalenē' libí'í'í'. Lē' nadxí'inē' rē'u, en runē' ga ribózaru' dxí'ado'.  
<sup>12</sup> Gulí'gapa Dios luzá'ali', tulí' ia'tulí', en unída'li' luzá'ali'.  
<sup>13</sup> Yúgu'tē böchi' luzá'aru' ni tu'gapē' Dios libí'í'í'.

<sup>14</sup> Rinábida-nē' Dios gunē' ga gata' queé'li' yúgu'tēli' le ruzá' ládxe'ē Xanru' Jesucristo queé'ru', en idxí'inē' ca' libí'í'í', en gunē' ga gácalí' tuz len Dios Bö' Lá'ayi. ¡Ca' gaca!

# Gálatas

## Ruzúajë' Pablo quégaca bönachi luyú Galacia

**1** Neda', Pablo, naca' gubáz queë' Cristo. Biti' gu-la'söl-la' bönachi neda'. Jesucristo caz gusól-lë'e neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. <sup>2</sup> Ruzúaja' queé'li' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' bóchi'ru' ni tu zxön neda'. <sup>3</sup> Rinábida' Xúziru' Dios, enca' Xanru' Jesucristo uzá' ládxë'e queé'li', en gunë' ga soa dxi icja ládxí'do'oli'. <sup>4</sup> Jesucristo caz budödi cuinë' lu yöl-la' guti tu' nözi dul-la' nabága'ru' para busolé' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. <sup>5</sup> ¡Gá-catica'sö queë' Dios yöl-la' ba! ¡Ca' caz!

## Tuz naca le rinné dxi'a queë' Jesucristo

<sup>6</sup> Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'e Jesucristo queë'ru', ate' na'a ré'ënilí' s'i' ladxí' ná'alí' tu le rinné dxi'a izá'a. <sup>7</sup> Le nácatë bití' ca' zoa ia'tú le rinné dxi'a pero ruá'a caní didza' tu' nacu'e bönni' tu'tsë'e libí'ili', en té'ëne' ulu'tsë'e le rinné dxi'a queë' Cristo. <sup>8</sup> Channö zoa nu gun ba nalí que tu le rinné dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. <sup>9</sup> Chigunná caza' caní zí'alö, ate' na'a rnníá' caní leyúbölö: Channö zoa nu gun ba nalí que tu le rinné dxi'a le cabí naca tuz ca naca lë na' chiguzxí' ladxí' ná'alí', rinábida'-në' Dios udxíë' dö' nu na'.

<sup>10</sup> ¿Réquitseli' ré'ënda' cú'ulí' neda' yöl-la' zxön cate' ru'a caní didza'? ¡Bití' ca! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', bití' gaca' huen dxin queë' Cristo.

## Naca böaquië' Pablo bönni' gubáz queë' Cristo

<sup>11</sup> Ral-la' inózili' lë ni, bóchi' zána'do'. Le rinné dxi'a na' runa' ba nalí que bití' gulén icja lo ládxí'da'ahuiguequi bönachi. <sup>12</sup> Cuntu nu bönni' budödë' lu na'a le rinné dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinné dxi'a queë'. <sup>13</sup> Chibiyón quézili' ca na' ben caza' neda' zí'atëlö cate' ní' nazí' lu na'a ca tequi le bach Dios bönni' judío. Nózili' ca bena', yenni' gudxía nahua' bönachi queë' Dios ta'yija ladxí' Cristo, en gú'unda' usulu usunítia' léguequi. <sup>14</sup> Lu le tequi le bach Dios bönni' judío,

guyépisëtëra' neda' ca lá'tu'biqui' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxí' na'a ca léguequi le bulu'dödë' xuz xtó'oru' loru' ca tun cazë'.

<sup>15</sup> Caní bena' neda', pero tu' náquië' dxi'i ladxí' Dios, guró cazë' neda' zí'atëlö ca gulja', ate' bulidzë' neda' para guna' xichinë'. <sup>16</sup> Ní'irö, cate' gú'uni quézinë' Dios, benë' ga núnbë'a-në' zxi'inë', en gusól-lë'e neda' tsöjé-na' libán que le rinné dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'. <sup>17</sup> Cabí guyija' yödzö Jerusalén para tsöyúa' nupa ní' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ní' böja' yödzö Damasco.

<sup>18</sup> Caní guca, chigudödi tsonna iz cate' ní' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza. <sup>19</sup> Tsanni ní' zoa' ní' bití' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' bóchë'e Xanru' bilé'eda'. <sup>20</sup> Didza' ni ruzúaja' queé'li' lu guichi nácatë. Ní'a queë' Dios bití' ca' rizí' yë'a.

<sup>21</sup> Gudödi ní' guyija', gudöda' yugu' yödz luyú Siria, en luyú Cilicia. <sup>22</sup> Yugu' dza ní' bití' núnbë'gaquië' neda' bóchi'ru' tu'dubë' queë' Cristo gapa naca luyú Judea. <sup>23</sup> Gula'nózisinë' lë na' gula'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxí'ru', lë na' gú'unë' usulu usunítie'." <sup>24</sup> Caní guca, gula'gu'ë yöl-la' ba Dios tu' nöz-da' neda'.

## Bönni' gubáz queë' Cristo guzxi' lu ná'agaquië' Pablo

**2** Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bí' Tito, dzá-gabi' neda'. <sup>2</sup> Guyija' ní', en bë'lëna' didza' tsólá'alö bönni' ní' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinné dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibëna', enca' dxin ni runa' na'a. <sup>3</sup> Sal-la' nácabi' Tito, bí'i luzá'a, bí'i griego, bití' gu-lunë' bönni' ni ga irugu lu xpéla'bí' lë na' naca bë' bönachi queë' Dios ca tun cazë' bönni' judío. <sup>4</sup> Le nácatë gula'cuá' bal-la bönachi ní', nupa ní' ta'z'í' yë', ta'ná nácagaca bóchi'ru', ate' gulé'ëni ilún ga irugu lu xpéla'bí' Tito lë na' naca bë'. Yugu' bönni' ni núngaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ëne' ilunë' ga huóácaru' leyúbölö huen dxin tsaz lu xibá na'. <sup>5</sup> Bití' ca' bë'tu' légaquië' lataj. Caní bentu' para gun chí'tu' le ná-

catè que le rinné dxi'a para gaca uzí'ili' xibé le rinné dxi'a na'.

<sup>6</sup>Yugu' bönni' ni' réquiru' yu'u lu ná'agaquiè' dxin queé' Cristo bití' bi gula'nná be'e neda' le naca cubi, pero bití' ruí'í ládxa'a ca nácagaquiè'. Dios bití' ruchi'a rusöróè' rë'u ca tu'chi'a tu'sörö bönachi rë'u. <sup>7</sup>Bití' bi gula'nná be'e neda' tu' guléquibe'enè' Dios nudödè' lu na'a dxin queé', para tsöjena' libán que le rinné dxi'a lógaca bönachi izá'a, ca na' nudödè' lu në'è Pedro dxin queé', para gunè' libán que le rinné dxi'a lógaca bönachi judío. <sup>8</sup>Len yöl-la' huáca queé', Dios benè' neda' bönni' gubáz queé' para usédida' bönachi izá'a, ca na' benè' Pedro bönni' gubáz queé' para usédinè' bönachi judío.

<sup>9</sup>Jacobo, en Pedro, en Juan, bönni' ni' réquiru' yu'u lu ná'agaquiè' dxin queé' Cristo, guléquibe'enè' Dios nudödè' lu na'a dxin ni. Que lè ni na' guzxí' ladxí' ná'agaquiè' neda', enca' Bernabé, ate' bentu' tuz didza' tsöjentu' xichinè' Dios lógaca bönachi izá'a neda', en Bernabé, ate' légaquiè' ilunè' xichinè' Dios lógaca bönachi judío. <sup>10</sup>Gulá'ta'yusè' lotu' tsönetu' gácalentu' bönachi yechi', ate' lè ni naca tu le ru'ítica'sö ládxa'a runa'.

#### Ca guca cate' Pablo gudíl-lalenè' Pedro lu yödzö Antioquia

<sup>11</sup>Cate' bidxinè' Pedro lu yödzö Antioquia, gudíl-lalena' lè' didza' tu' lè cazè' guchixinè' ca benè'. <sup>12</sup>Caní guca tu' zí'atèlò gudágulenè' tsözxón yugu' bönachi izá'a ni'. Benè' caní ga bila'dxinrè' bal-la bönni' dá'gaquiè' Jacobo. Ní'irö gusí lahuè' rubíguiè', en bítirö gudágulenè' tsözxón bönachi izá'a na' tu' gúdxinè' bi ilunè' bönni' na' nazí' lu ná'agaquiè' ilunè' ga irugu lu xpéla'gaca bönachi izá'a ca rinná bè' xibá queé' Moisés. <sup>13</sup>Ní'irö ia'zica're' bönni' judío ni' ta'yija ládxe'è Cristo gulunè' tu zxón Pedro ca runè' lu yöl-la' radxi queé', ate' caní guca ga bidxintè gulunè' ga gúdxinè' ca' Bernabé, ate' lè' benè' tu zxón légaquiè'. <sup>14</sup>Cate' bilé'eda' bití' tunè' ca naca le nácate le rusedi rë'u le rinné dxi'a, gudxa'-nè' Pedro lógaca yúgu'tè nupa ni' nudúbigaca queé' Cristo, gunnía': "Lí' nacu' bönni' judío, pero runu' lí' ca túngaca bönachi izá'a, en calèga ca tunè' bönni' judío. ¿Bizx queé' ré'ènu' gunu' ga ilúngaca bönachi izá'a ca tunè' bönni' judío?"

#### Nulágaca bönachi judío ca na' nulágaca ca' bönachi izá'a

<sup>15</sup>Gudxa' ca' Pedro: "Rë'u ni nácaru' bönni' judío tu' nácagaquiè' xuz xiná'aru' judío, en calèga bönachi izá'a, nupa cabí núnbè'gaca Dios. <sup>16</sup>Nöz quéziru' cuntunu huóaca tsahui' lahuè' Dios tu' run nu na' tsca rinná bè' xibá queé' Moisés, pero huóaca tsahui' tuzi nu na' reja ladxí' Jesucristo. Lès caní ca' rë'u reja ládxi'ru' Jesucristo para huóacarú' tsahui' lahuè' Dios, en calèga tu' runru' tsca rinná bè' xibá queé' Moisés. Cuntu caz nu huóaca tsahui' lahuè' Dios tu' run tsca rinná bè' xibá queé' Moisés.

<sup>17</sup>Na'a, réquiru' nuhuóacarú' tsahui' tu' reja ládxi'ru' Cristo, pero channö naca bè' nácaru' bönni' dul-la' ca nácagaca bönachi izá'a, ¿innátsaru' runè' Cristo ga runru' dul-la'? ¿Bití' caz! <sup>18</sup>Channö ruí'í ládxa'a uchisa' le chibuquinja', lè ni naca bè' riguitsja' xibá le gunná bè'è Dios. <sup>19</sup>Tu' cabí guca uzó'a didza' xibá na' gunná bè'è Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca ré'èné' Dios. <sup>20</sup>Naca quia' ca chigútilena' tsözxón Cristo lè'e yaga cruz ga na' gútiè' Lè'. Que lè ni na' calèga neda' ni zoa' nabana', pero Cristo zoè' nabanè' lu icja ládxi'-da'ahua'. Tsca naca zoa' nabana' na'a, naca tu' reja ládxa'a Lè' zxi'inè' Dios, Bönni' na' bidxi'inè' neda', en budödi cuinè' lu yöl-la' guti uláz quia' neda'. <sup>21</sup>Bití' ré'ènda' uzó'a tsölálalö le ruzá' ládxe'è queéru' Dios. Channö huáca huóaqiè' tsahui' tu bönni' lahuè' Dios tu' runè' tsca rinná bè' xibá queé' Moisés, ní'irö nítisö gútiè' Cristo."

#### Le rinná bè' xibá queé' Moisés, en le reja ládxi'ru' Cristo

**3** Libí'ili', tu' canóz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácate? Gate ga rë' bulu'itu' libí'ili' le sa'yéaj ca gútiè' Jesucristo lè'e yaga cruz. <sup>2</sup>Gudíxjöi' neda' lè ni. ¿Bidisóalenè' libí'ili' Dios Bö' lá'ayi tu' benlí' ca rinná bè' xibá queé' Moisés o tu' guyija ládxi'li' le rinné dxi'a biyónili'? <sup>3</sup>¿Nacxi guca nácali' tu' canóz caní? Gusí loli' nácali' bönachi queé' Dios tu' zóalenè' libí'ili' Dios Bö' lá'ayi. ¿Réquitseli' huáca udxi gunlí' ga guéquili' queé' Dios rácasö queéli'? <sup>4</sup>¿Guca nítisö guca queéli' yúgu'tè lè na' guxzaca' gudí'ili'? ¿Bití' ca' guca caní! <sup>5</sup>Cate' Dios risóllè'è queéli' Dios Bö' lá'ayi, en ru'è libí'ili' lataj gunlí' yugu' yöl-la' huáca que yehua' yubá, ¿runè' caní tu' runlí' ca rinná bè' xibá queé' Moisés o tu' reja ládxi'li' le rinné dxi'a na' biyónili'?

<sup>6</sup>Lu guichi lá'ayi rna: Abraham guyija ládxe'è Dios, ate' Dios gunné' náquiè' bönni' tsahui' tu' guyija ládxe'è Lè'. <sup>7</sup>Que lè ni na' ral-la' inózili', nupa na' ta'yija ladxí' Dios nácagaca idú zxi'ini xí'sóè' Abraham. <sup>8</sup>Lu guichi lá'ayi ruí'í didza' zí'atèlò ca gunè' Dios, innè' nácagaquiè' tsahui' bönni' izá'a ila'yija ládxe'è Lè'. Que lè ni na' Dios gudíxjöi'inè' Abraham zí'atèlò ca naca le rinné dxi'a, gunné': "Lu në'è Zxi'ini xí'sú' guna' ga gaca dxi'a quégaca bönachi idutè yödzölió." <sup>9</sup>Caní naca, Abraham guyija ládxe'è Dios, ate' Dios benè' ga guca dxi'a queé'. Lès caní ca' na'a, Dios runè' ga raca dxi'a quégaca yúgu'tè nupa ta'yija ladxí' Lè'.

<sup>10</sup>Nupa na' tu'zxöni ladxí' ulu'huóaca tsahui' tu' túngaca ca rinná bè' xibá queé' Moisés, nabága'gaca xíguia'. Caní naca tu' nazúaj lu guichi lá'ayi, le rna: "Yúgu'tè nupa na' cabí túngaca idutè ca rinná bè' xibá na' nabága'gaca xíguia'." <sup>11</sup>Na'a, naca bè' cuntunu huóaca tsahui' lahuè' Dios tu' run nu na' le rinná bè' xibá na', tu' zoa lu guichi lá'ayi le rna: "Nu na' nuhuóaca tsahui' lahuè' Dios soa ibán tu' reja ladxí' Lè'." <sup>12</sup>Ca na' nuhuóaca tsahui' lahuè' Dios nu na' reja ladxí' Cristo nadzá' ca naca que nu na' ruzxöni ladxí' nuhuóaca



ca tsahuí' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní."

<sup>13</sup> Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu qué-gaca yúgu'tē nupa na' dá'gaca lē'e yaga." <sup>14</sup> Caní guca queē' Cristo para gaca gunē' Dios ca na' guzxí' lu nē'ē queē' Abraham, gunē' ga gaca dxí'a quégaca bönachi izá'a lu nē'ē Jesucristo, en para gaca gunē' ga idis-óalenē' Dios Bō' lá'ayi rē'u channō uyija lādxi'ru' Lē', ca na' guzxí' lu nē'ē Dios gunē'.

### Le rinná bē' xibá queē' Moisés, en le guzxí' lu nē'ē Dios gunē' queēru'

<sup>15</sup> Na'a, böchí' zána'do', uzúaja' queé'li' tu le rucudzu' didza', tu le raca queēru'. Cate' chopa bönní' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'. <sup>16</sup> Dios guzxí' lu nē'ē bi gunē' queē' Abraham, en que xzí'ini xí'sóē'. Ga zoa lu guichi lē' ni, bití' rnna: "Quégaca xzí'ini xí'sú'", le ruí'i didza' que zían bönachi, pero rnna: "Que xzí'ini xí'sú'." Lē' ni ruí'i didza' que tuz bönní', Lē' Cristo. <sup>17</sup> Lē' ni na' le ré'ēnda' innía': Dios benē' tuz didza' len Abraham, en guzxí' lu nē'ē gunē' ca na' gunné'. Le nazúaj lu xibá queē' Dios, le benē' Dios tapa gayuá' yu' chi-uruá' iz gudödi ní' cate' gudxē' caní Abraham, bití' gaca ugúa lē' na' guzxí' lu nē'ē Dios gunē', en cabí gaca usulu le. <sup>18</sup> Na'a, channō ral-la' gunru' ca rinná bē' xibá na' para sí'ru' le guzxí' lu nē'ē Dios gunsē', bití'rō naca tu le guzxí' lu ná'sē' gunē'. Dios runsē' caní tu' caní guzxí' lu nē'ē bi gunē' queē' Abraham.

<sup>19</sup> Channō caní naca, ¿bizx queē' gunná bē'ē Dios xibá na' nazúajgaca lu didza' queē'? Dios gunná bē'ē caní para gaca bē' xíguia' nabága'ru', pero gúcasō caní ga bidxintē dza na' bilá' lahuē' xzí'ini xí'sóē' Abraham na', Bönní' na' guzxí' lu nē'ē Dios gunē' queē' lē' na'. Yugu' le gunná bē'ē Dios lu xibá queē', gusól-lē'ē yödzo'li' ni lu ná'agaquiē' gubáz lá'ayi queē', ate' Moisés budödē' didza' ca ná'cagaca xibá na'. <sup>20</sup> Bití' naquín nu udödi didza' cate' naca tuz nu run tuz didza', ate' Dios, tuz náquiē'.

### Bizx queē' gunná bē'ē Dios le zóagaca lu xibá queē'

<sup>21</sup> Le nazúajgaca lu xibá queē' Dios, ¿ta'dá'gaca lē' na' guzxí' lu nē'ē Dios gunē'? ¿Bití' ca! La'tu' gunná bē'ē Dios tu xibá le gaca gun ga sóaru' ibanru' tsaz, ní'rō huáca huóácaru' tsahuí' lahuē' Dios channō gunru' ca na' rinná bē' xibá na'. <sup>22</sup> Tsca naca lē' na' nazúaj lu guichi lá'ayi, yúgu'tēru' nabága'ru' dul-la'. Caní naca para gaca sí'ru' lē' na' guzxí' lu nē'ē Dios gata' queēru' cate' tseja lādxi'ru' Jesucristo.

<sup>23</sup> Zí'atēlō ga bidxín dza gaca tseja lādxi'ru' Cristo, le rnna xibá na' gunná be'e rē'u, ca na' zoa le rinná be'e tu bönní' yu'ē lidxi guíē. Caní guca ga bidxintē dza bilá' lahui gaca huóácaru' tsahuí' channō uyija lādxi'ru' Lē'.

<sup>24</sup> Caní naca, le nazúaj lu xibá queē' Dios gunná be'e rē'u, lē' na' busedi rē'u ca tu bönní' usedi ga bidxintē dza bilá' lahuē' Jesucristo, para gaca huóácaru' tsahuí' lahuē' Dios channō uyija lādxi'ru' Lē'. <sup>25</sup> Na'a, tu' bidxín dza gaca huóácaru' tsahuí' channō uyija lādxi'ru' Cristo, bití'rō inná be'e rē'u lē' na' busedi rē'u.

<sup>26</sup> Yúgu'tēli' nácalí' bí'i queē' cazē' Dios tu reja lādxi'li-nē' Jesucristo, en chinácalí' tuz len Lē'. <sup>27</sup> Yúgu'tē nupa nadílagaca nisa para huóá'cagaca tuz len Jesucristo, nuhuóá'cagaca ca náquiē' Lē' cazē'. <sup>28</sup> Bití'rō narúaj choplō bönní' judío, en bönní' izá'a, en cabí narúaj choplō bönní' náquiē' tsaz huen dxin, en bönní' nazán, en cabí narúaj choplō bönní', en nigula, tu' cate' böa-calí' tuz len Jesucristo, yúgu'tēli' böácalí' ca' tuz len luzá'alí' tulí' ia'tulí'. <sup>29</sup> Na'a, channō néquili' queē' Cristo, nácalí' ca' xzí'ini xí'sóē' Abraham, ate' nazí'li' lē' na' guzxí' lu nē'ē Dios gunné' queē' Abraham.

**4** Lē' ni le ré'ēnda' innía': Tsanni ni ribózabí' tu bí'i' bönní'do' sí'ibi' bi ral-la' gunné' xúzibi' queé'bi', ní' nácabi' bí'ido', en bití' nayépisētē'rōbí' ca raca que tu nu naca tsaz huen dxin, sal-la' le nácatē nequi queé'bi' yúgu'tē. <sup>2</sup> Tsanni ní' nácabi' bí'ido', nacua' nupa tun chí'i lē'bi', en tu'gún dxin le nequi queé'bi' ga idxintē dza chinuzóē' xúzibi' queé'bi'. <sup>3</sup> Lēs caní raca ca' queēru'. Tsanni ní' gúcaru' ca bí'ido', gunná be'e xibá na' rē'u ca raca quégaca bönachi yödzo'li' ni. <sup>4</sup> Cate' bizá'a dza, Dios gusól-lē'ē xzí'ini cazē' ni. Gúquiē' xzí'ininu tu nigu-la ca nácaru' rē'u, en gunná be'e le zoa lu xibá quégaca bönní' judío Lē'. <sup>5</sup> Caní guca queē' para guca busölē' nupa na' rinná be'e le zoa lu xibá léguequi, para gaca huóácaru' bí'i queē' Dios.

<sup>6</sup> Para gaca bē' chinácalí' bí'i queē' cazē', Dios guchizē' Dios Bō' lá'ayi lādxi'do'oli', ate' Lē' cazē' rulidzē' Dios uláz queé'li', rnnē: "Xuza'." <sup>7</sup> Caní naca, chinácalí' bí'i queē' Dios, en bití'rō nácalí' ca yugu' bönní' tsaz náca-gaquiē' huen dxin. Na'a, tu' nácalí' bí'i queē' cazē' Dios, Lē' cazē' nazí' lādxi' nē'ē guequi queé'li' le nequi queē' tu' nácalí' tuz len Cristo.

### Pablo ruí'i lādxe'ē bönní' Galicia ta'yija lādxe'ē Cristo

<sup>8</sup> Cate' ní' bití' núnbē'ēli'-nē' Dios, gúcalí' ca yugu' bön-ní', tsaz náca-gaquiē' huen dxin, en benlí' dxin quégaca budó' néquini. Bití' ca' náca-gaca budó' na' Dios. <sup>9</sup> Na'a, tu' núnbē'ēli'-nē' Dios, o huáca innaru': Tu' núnbē'ē Dios libí'ili', ¿bizx queē' ré'ēnili' ubí'ili' yugu' lu xibá cané na' cabí nu uzí' xibé? ¿Ré'ēnili' huóácalí' huen dxin tsaz, en gunlí' ca rinná bē' xibá na'? <sup>10</sup> Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz.

<sup>11</sup> Rádxida' bi gaca queé'li'. ¿Naru' nuhuóáca nítisō dxin bena' para gún'bē'ēli' le nácatē? <sup>12</sup> Ráta'yua' loli', böchí' zána'do', gácalí' ca naca' neda', nulá' na'a lu na' xibá benē' Moisés. Caní ral-la' gácalí' tu' böáca' neda' ca gú-calí' libí'ili'. Bití' bi le cabí naca dxí'a benlí' quia' neda'.

<sup>13</sup> Chinóz quézili' bizx queē' na' gusí lahua' runa' libán loli' que le rinnē dxí'a. Bena' libán ní' tu' gú'ida'. <sup>14</sup> Bití' bucá'analí' neda' cané, en cabí buzóalí' neda' tsólá'alō sal-la' bigútilí' ca guca yödzo'hué' quia' na'. Benlí' neda' bal, tuz ca gunlí' bal tu gubáz lá'ayi queē' Dios, o ca

runlí' bal Jesucristo caz. <sup>15</sup> Budzéalälé'ëli' dza ní'. ¿Bizxi guca queé'li' tu' cabirö raca caní? Lë ni gaca inní'a ca guca queé'li': La'tu' huáca gunlí', bubéajlí' guió'j lo quezilí', le gúnnalí' quia'. <sup>16</sup> Na'a, ¿r'équili' nuhuó'aca' tu nu riléde'e libí'ili' tu' gudxa' libí'ili' le nácatë?

<sup>17</sup> Bönni' ní' tu'ts'éë libí'ili' tu'í ládxe'ë libí'ili', pero calëga para gaca dxí'a queé'li'. Té'ënë' ilunë' ga ucá'analí' netu' para gü'í ládxi'íli' légaquië'. <sup>18</sup> Na'a, naca dxí'a zoa nu ru'í ladxí' libí'ili', pero tuz channö naca para gaca dxí'a queé'li'. Caní ru'ítica'sö ládxa'a libí'ili', en calégasö cate' ní' zóalena' libí'ili'. <sup>19</sup> Libí'ili', xzí'ina'do'. Ca na' raca queénu nigula chizó'a sóabi' bí'ido' queénu, riguí' rizáca'nu, lës caní riguí' rizáca'a neda' ní'a queé'li' leyúbölö ga idxinrö dza gácalí' idú ca náquië' Cristo. <sup>20</sup> Nácaru' la zóalena' libí'ili' na'a para gaca gü'ílena' libí'ili' didza' nadzá'alö, tu' ruúbi ruguí'lë'ëda' ní'a queé'li'.

### Le rucudzu' didza' ca guca quégacanu Agar en Sara

<sup>21</sup> Na'a, libí'ili', nulí' ré'ënilí' uzó'a cuinlí' lu xibá queë' Moisés, guli'ná'tsöca' didza' ni gu'a. ¿Catu caz buzé nágalí' le rnna xibá na'? <sup>22</sup> Rnna xibá na' caní: gula'cuá'abi' chópabi' bí'i bönni'do' queë' Abraham. Tubí' gúcabi' xzí'ininu tu nigula tsaz nácanu huen dxin, atë' ia'tubi' gúcabi' xzí'ininu nigula nazannu. <sup>23</sup> Xzí'ininu nigula huen dxin na' gúlajbí' lu ní'a lu na' tu bönni' tsca tálajbí' yúgu'të bí'ido', pero xzí'ininu nigula nazannu na' gúlajbí' tu' guxzí' lu në'ë Dios gunë' ga gálajbí'. <sup>24</sup> Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopa didza' Dios bénlenë' bö'nachi. Tu didza' na' naca le buzóë' Dios lu guí'a Sinaí, le sa'yéaj lë na' guca queénu Agar. Nupa na' rinná be'e xibá na' léguequi, nacagaca ca xzí'ininu Agar, en nacagaca ca huen dxin tsaz lu xibá na'. <sup>25</sup> Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzo Jerusalén na'a dza, tu' naca yödzo na' ca tu bönni' tsaz náquië' huen dxin tsözxón len nupa nacué' lu yödzo na'. <sup>26</sup> Jerusalén na' zoa yehua' yubá nazán, atë' rë'u ni nácaru' bö'nachi uládz que yödzo ní'. <sup>27</sup> Nazúaj lu guichi lá'ayi le rnna: Budzeja, nigula huödx, cabí nacué' xzí'inu'.

Lu yöl-la' rudzeja quiu' guródxí'a, sal-la' catu caz guca quiu' le riguí' rizáca'nu nigula chizó'a sóabi' bí'ido' queénu.

Budzeja tu' sal-la' nusán né'eguequi bö'nachi lí', gunë' Dios ga ila'yántërö xzí'inu' ca bí'i queénu nigula zóalennu bönni' queénu.

<sup>28</sup> Libí'ili', böchi' zána'do', rë'u ni nácaru' ca gúcabi' Isaac, xzí'inë' Abraham. Nácaru' ca yugu' xzí'ini xí'söë' Abraham, guxzí' lu në'ë Dios gata' queë'. <sup>29</sup> Dza ní', bí'i na' gúlajbí' ca tálajbí' yúgu'të bí'ido', gudxía ná'abi' bí'i na' gúlajbí' tu' nözi yöl-la' huáca queë' Dios Bö' lá'ayi. Lës caní raca ca' queéru' na'a, ta'bía no bö'nachi yödzülió ni rë'u. <sup>30</sup> ¿Bizxi rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxón len xzí'ininu, tu' bití' gaca xzí'ininu nigula na' sí'ibi' tsözxón xzí'ininu nigula nazannu le guxzí' lu në'ë Dios guequi queébi' xzí'ininu nigula nazannu na'." <sup>31</sup> Caní naca, böchi' zána'do'. Bití' nácaru' ca nacabi'

xzí'ininu nigula na', tsaz gúcanu huen dxin, pero nácaru' ca xzí'ininu nigula nazannu na'.

### Guli'gún chí'i cuinlí', ugá'analí' lu yöl-la' nazán

**5** Chinazanru' tu' busanë' Cristo rë'u. Guli'só'a tsutsu channö, ugá'analí' lu yöl-la' nazán na'. Bití' uzó'a cuinlí' leyúbölö lu xibá queë' Moisés para cabí gácalí' ca tu bönni', tsaz náquië' huen dxin.

<sup>2</sup> Bulí'zé nágalí' neda'. Neda', Pablo, rea' libí'ili', channö ru'íli' lataj nu ichugu lu xpéla'li' ca rinná bë' xibá na', bití' ca' uzí'ili' xibé le benë' Cristo. <sup>3</sup> Leyúbölö ré'ëndá' guí'a nútí'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. <sup>4</sup> Nulí' réquili' huóacalí' tsahui' lahuë' Dios tu' runlí' ca rinná bë' xibá na', chibulá'aleni'-në' Cristo. Chibusán ná'ali' le ruzá' ládxe'ë Dios queéru'. <sup>5</sup> Rë'u ni ruzxöni ládxi'ru' huóacarú' tsahui' lahuë' Dios ní'a que yöl-la' huáca queë' Dios Bö' lá'ayi tu' reja ládxi'ru' Cristo. <sup>6</sup> Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'ru' luzá'aru'.

<sup>7</sup> Dxí'ado' guca ca gusí loli' runlí' dza ní'. ¿Nuzxi ben ga bucá'analí' le nácatë? <sup>8</sup> Bití' benë' Dios, Bönni' rulidzë' libí'ili', ga benlí' caní. <sup>9</sup> Bití' gal-la ládxi'li' lë na' rnna: "Látí'sö cúa zi que yöta xtila ruhuó'axz idutë cúa ga nayú'u cúa zi na'." <sup>10</sup> Tu' nácaru' tuz len Xanru', runa' löza ca naca queé'li', sa' ládxi'li' tuz ca rizá' ládxa'a neda', atë' Dios gun zí'ë bönni' na' rutsé'ë libí'ili', nútí'tës nu naca bönni' na'.

<sup>11</sup> Ca naca quia' neda', böchi' zána'do', nacué' nupa ta'nná rusédida' bö'nachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë' ta'bía nahuë' bönni' judío neda'? La'tu' rusédida' caní, cuntú nu ilé neda' tu' runa' libán ca gútië' Cristo lë'e yaga cruz. <sup>12</sup> Ca naca que nupa ní' tu'tsá' libí'ili', té'ëni irugu lu xpéla'li' lë na', nácoru la' ila'chugu tsaz cuínguequi.

<sup>13</sup> Ca naca queé'li', böchi' zána'do', Dios bulidzë' libí'ili' para gácalí' bö'nachi nazángaca. Bití' ugunlí' dxin yöl-la' nazán na' para gunlí' ca rizësö ládxi'li', pero para gunlí' dxin que luzá'ali', tulí' ia'tulí', tu' nadxí'ili' luzá'ali'.

<sup>14</sup> Yúgu'të le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxí'inu' luzó'o ca nadxí'i cuinu'." <sup>15</sup> Channö rizí' quídza'li' luzá'ali' tulí' ia'tulí', runlí' ca tunba' böa' guí'a sínia', táguya'aba', en táguba' luzá'aba'. Bulí'yú tsate' usulu usunítíli' luzá'ali' tulí' ia'tulí'.

### Le runru' lu yöl-la' bö'náchisö queéru', en le runru' len yöl-la' huáca queë' Dios Bö' lá'ayi

<sup>16</sup> Lë ni na' rea' libí'ili': Guli'gü'í latja inná bé'ënenë' libí'ili' Dios Bö' lá'ayi, atë' ní'rö bití'rö gunlí' ca rizësö ládxi'li' lu yöl-la' bö'náchisö queé'li'. <sup>17</sup> Yugu' le rizé ládxi'ru' gunru' lu yöl-la' bö'náchisö queéru' bití' röjlöz le ré'ënë' Dios Bö' lá'ayi gunru', atë' lë na' ré'ënë' Dios Bö' lá'ayi bití' röjlöz le ré'ëni'ru' gunru' lu yöl-la' bö'náchisö

queéru'. Chopa ni, bití' röjlózgaca, en que lè ni na' bití' gaca gunlí' ca ré'èni quezili'. <sup>18</sup> Channö ruí'ili' lataj inná bé'ené' Dios Bô' lá'ayi libí'ili', bítí'rö inná be'e xibá queé' Moisés libí'ili'.

<sup>19</sup> Naca bë' le tun bönachi lu yöl-la' bönáchisö quéguequi.

Tun dul-la' le riguitsaj xibá que yöl-la' nutsaga na', enca' dul-la' le lè'è.

Tun yugu' le naxihui', en yugu' le catsahui'.

<sup>20</sup> Téquiguequi le bach budó' néquinguequi.

Tun yöl-la' gudzá'.

Tu'dí'i luzé'eguequi, en ta'díl-lalen léguequi.

Tu'zxé'e luzé'eguequi, en ta'lé nupa na', en tu'huídí'.

Ta'ruáj choplö, en tu'béaj tsölá'alö nupa dá'gaca léguequi.

<sup>21</sup> Ta'zé ladxí' le dè que luzé'eguequi, en ta'guilaj xíguia'.

Ta'zudxi, en tagu lè'e.

Tu'dödi bë' ca túnguequi.

Le zián le caní túnguequi. Neda' ruxösa' ladxí'li' na'a para cabí gunlí' caní ca na' buxösa' ladxí'li' z'älö, rnníá': Nupa túngaca caní bití' ca' ila'delí' ila'yú'u ga na' rinná bë'è Dios.

<sup>22</sup> Channö zóalen Dios Bô' lá'ayi rë'u runru' caní:

Nadxí'iru' luzá'aru'.

Rudzeja ladxí'ru'.

Zoa dxi ladxí'do'oru'.

Ribózarú' zxön ladxí'.

Ruí'i ladxí'ru' luzá'aru'.

Nácaru' dxí'i ladxí'.

Rusudxinru' xtídza'ru'.

<sup>23</sup> Nácaru' nöxaj ladxí'.

Rinná be'e cuinru'.

Bití' ca' gunná bë'è Moisés rë'u para cabí gunru' yugu' le caní. <sup>24</sup> Nupa néquiguequi queé' Cristo bítí'rö tun ca té'èni quez, en cabí tun le ta'zësö ladxí' lu yöl-la' bönáchisö quéguequi. <sup>25</sup> Dios Bô' lá'ayi runnë' yöl-la' na'bán queéru'. Lë' cazë' ral-la' inná bé'enë' rë'u ca naca yúgu'tè le runru'.

<sup>26</sup> Bití' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

#### Ral-la' gácalenru' luzá'aru' turu' ia'turu'

**6** Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bô' lá'ayi libí'ili', ral-la' gunlí' ga ubí'i ladxé'è bönni' na', pero run bayudxi gunlí' caní lu yöl-la' nöxaj ladxí' queé'li', en uyú cuinlí' tsaté' cu'u tu' xihui' libí'ili' nöza dul-la'. <sup>2</sup> Guli'gácalen luzá'alí' tulí' ia'tulí' tscá naca yuá' nabága'li'. Channö gunlí' caní uzóalí' didza' le gunná bé'enë' Cristo rë'u.

<sup>3</sup> Channö zoa nu réqui chinadelí' yöl-la' nayépisë, en bití' bi nadelí' nu na', nu ni na' rizí' ye'e la' cuinsi.

<sup>4</sup> Tuhuéaj tuhuéajë' bönni' ral-la' uchi'a usöröë' que le runë'. Ní'irö channö urúajë' dxí'a, huáca gun ba zxön cuinë' ni'a que le chinunë', en bití' gun bayudxi uyúë' ca núngaca ia'zica'rö bönachi channö ba benrë' dxí'a o cabí. <sup>5</sup> Tuhuéaj tuhuéajë' bönni' ral-la' gu'è le nusub-águë'è Dios lë'.

<sup>6</sup> Channö zoa nu rusedi libí'ili' ca naca le rinné dxí'a, ral-la' unódzjalí' nu na' rusedi libí'ili' latí' que yúgu'tè le do' dè queé'li'.

<sup>7</sup> Bití' sí' ye'e cuinlí' tu' cuntú nu gaca sí' ye'e Dios. Ulápalí' tscá naca le rázali'. <sup>8</sup> Channö le rázali' naca yugu' le runlí' ca rizësö ladxí'li' lu yöl-la' bönáchisö queé'li', le ulápalí' gaca yöl-la' guti. Channö le rázali' naca yugu' le runlí' ca raza ladxé'è Dios Bô' Lá'ayi, ulápalí' le gunnë' Dios Bô' lá'ayi queé'li', le naca yöl-la' na'bán idú. <sup>9</sup> Caní naca, bití' ral-la' huöa ladxí'ru' gunru' le naca dxí'a, tu' channö cabí huöa ladxí'ru', idxín dza uláparu'. <sup>10</sup> Que lè ni na', bátatí'tës gata' queéru' lataj, ral-la' gunru' le naca dxí'a quégaca yúgu'tè bönachi, en le naca lo, ral-la' gunru' caní quégaca böchi' zanru' ta'yija ladxí' Cristo.

#### Le buzúajë' Pablo lu guichi ga ruúdx

<sup>11</sup> Bulí'yú cate' bach didza' ni ruzúaja' lu guichi len na' cuina'. <sup>12</sup> Nupa na' té'èni ilún ga irugu lu xpéla'li' ca rinná bë' xibá queé' Moisés, túngaca caní para ulu'ruáj dxí'a lógaca bönachi, en cabí bi ilún quéguequi tu' túngaca libán ca gútië' Cristo lè'e yaga cruz. <sup>13</sup> Yugu' bönni' na' ta'z' lu náagaquië' le narugu lu xpéla'gaquië' ca rinná bë' xibá queé' Moisés, bití' tu'zöé' didza' idutë ca rna xibá na'. Té'èné' ilunë' ga irugu lu xpéla'li' para gaca ilún ba zxön cuíngaquië' tu' ta'nná bé'enë' libí'ili' para irugu lu xpéla'li' caní. <sup>14</sup> Ca naca quia' neda', cú'usa' yöl-la' ba le benë' Xanru' Jesucristo cate' gútië' lè'e yaga cruz. Tu' nözi le benë' Cristo lè'e yaga cruz, yugu' le dè yödzlió ni naca quia' ca tu le chinati, bití' ruí'i ladxá'a le, ate' neda' naca' quégaca bönachi yödzlió ni ca tu bönni' nati, bití' tuí'i ladxí' neda'.

<sup>15</sup> Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lè'e ladxí'do'oru'. <sup>16</sup> Yúgu'tè bönni' na' tunë' ca rinná bë' xibá runa' ni, en yúgu'tè bönni' na' néquiguequinë' queé' Dios, rinábida'-në' Dios gunë' ga soa dxi ladxí'do'gaquië', en huéchi' ladxé'è légaquië'.

<sup>17</sup> Na'a zë lo, cuntú nu bönni' ral-la' utsé'è neda', tu' nácgaca bë' butsóa zógaca lu xpéla'a naca' huen dxin queé' Xanru' Jesús.

<sup>18</sup> Na'a, böchi' zána'do', rinábida'-në' Xanru' Jesucristo uzá' ladxé'è queé'li' yúgu'téli'. Ca' caz.

# Efesios

Pablo rugapë' Dios bönachi queë' Cristo nacua' Éfeso

**1** Neda', Pablo, naca' gubáz nasól-l'è' Jesucristo tu' gú'uni quézine' Dios gaca' caní. Rugapa' Dios libí'ili' i', zóali' Éfeso. Néquili' quez queë' Dios, en réajl'è'li' Jesucristo. <sup>2</sup> Rinábida'-nè' Xúziru' Dios, enca' Xanru' Jesucristo uzá' ládx'è' queé'li', en gunè' ga soa dxi icja ládx-i'do'oli'.

**Le naca queë' Dios Bö' Lá'ayi rata' queéru'**

<sup>3</sup> ¡Ral-la' cú'uru'-nè' yöl-la' ba Dios, Xuzè' Xanru' Jesucristo! Tu' nácaru' tuz len Cristo, Dios chibuzá' ládx'è' queéru' yúgu'tè le naca dxí'a que yehua' yubá, le runè' Dios Bö' Lá'ayi ga rata' queéru'. <sup>4</sup> Zí'atèlò ca benè' Dios yödzülió ni, guró cazè' rë'u para guéquiru' quez queë' tsözxón len Cristo, en gácaru' bönachi lá'ayi queë', en gácaru' idú dxí'a lahuè' Lè'. <sup>5</sup> Dios bucözè' zí'atèlò si' lu në'è rë'u ca xzí'ini cazè' tsözxón len Jesucristo, tu' guyaza ládx'è' gaca caní, en tu' naca le gú'uni quézine' gunè'. <sup>6</sup> ¡Ral-la' cú'utica'siru'-nè' Dios yöl-la' ba ní'a que le buzá' ládx'è' queéru', yugu' le bénnasè' queéru' tu' nácaru' tuz len Xzí'inè', Nu na' nadxí'inè'! <sup>7</sup> ¡Cristo böá'uè' rë'u cate' ní' gú'tiè' uláz queéru' para gaca uniti lahuè' Dios rë'u ca naca dul-la' nabága'ru'! ¡Xzöntèrö naca le buzá' ládx'è' Dios queéru', <sup>8</sup> lè na' rúnnadè'è Lè' queéru'! ¡Lu yöl-la' rácada' queë', en lu yöl-la' réajni'i queë' <sup>9</sup> benè' Dios le bucözè' queéru', ate' bulu'í'inè' rë'u lè na' bigachi', le buzóa cazè' zí'atèlò usudxinè' lu në'è Cristo! <sup>10</sup> Lè na' buzóa cazè' Dios usudxinè' cate' izá'a dza, naca gunè' ga ilaca tuz, en ila'cuá' lu në'è Cristo yúgu'tè le dè, le nacua' yehua' yubá, en le nacua' yödzülió ni.

<sup>11</sup> Tu' nácaru' tuz len Cristo, Dios guró cazè' rë'u zí'atèlò para guequi queéru' le nequi queë' Xúziru' Dios, lè na' bucözè' queéru' ca naca le gú'uni quézine' Dios, Nu run yúgu'tè ca ré'èni quézine' Lè'. <sup>12</sup> Caní benè' Dios para cú'uru'-nè' yöl-la' ba ca naca yöl-la' zxón queë', rë'u ni ruzxóni ládx'i'ru'-nè' Cristo zí'atèlò ca ia'zícá'rö bönachi. <sup>13</sup> Lësca' caní guca queé'li'. Cate' biyónili' didza' idútè li, didza' dxí'a ca gaca uláru', guyéajl'è'li' Cristo, ate' Dios buzóè' queé'li' le naca bè' nácali' queë', tu' guchíziè' icja ládx'i'do'oli' Dios Bö' Lá'ayi, Nu na' guzxí' lu në'è Dios isól-l'è'è queéru'. <sup>14</sup> Tu' zóalenè' Dios Bö' Lá'ayi rë'u, naca löza guequi queéru' le nequi queë' Xúziru' Dios cate' údxi huóá'uè' rë'u, rë'u na' chinéquiru' queë'. Caní naca para gaca yöl-la' ba que yöl-la' zxón queë'.

Pablo rinábinè' Dios gunnè' queéru' yöl-la' réajni'i

<sup>15</sup> Que lè ni na', cate' biyönda' ca réajl'è'li'-nè' Xanru' Jesús, en ca nadxí'ili' yúgu'tè bönachi queë' Dios, ga ridxintè na'a dza <sup>16</sup> bití' ca' rusana' rea'-nè' Dios: "Xclenu'", ca naca queé'li'. Røjneda' libí'ili' cate' rulidza'-nè' Dios. <sup>17</sup> Rinábida'-nè' Dios queë' Xanru' Jesucristo, Dios na' náquiè' Xúziru' nayépisètèrè', rinábida'-nè' isól-l'è'è Dios Bö' Lá'ayi queé'li', Bö' na' runna yöl-la' réajni'i queéru', en rulu'í'i rë'u ca naca cazè' Dios, para gaca idú ca núnbè'èru'-nè'. <sup>18</sup> Rinábida'-nè' Dios uzéajni'inè' libí'ili' lu icja ládx'i'do'oli' para gaca inözili' ca naca le runru' löza, lè na' bulidzè' libí'ili' para uzí'ili' xibé, en para inözili' ca naca yöl-la' tsahui' que yehua' yubá, le guequi quegaca nupa néquiquequi queë' Dios, <sup>19</sup> enca' para inözili' cate' zxón naca yöl-la' huáca queë', le rácalen rë'u ni réajl'è'èru' Lè'. Yöl-la' huáca zxón ni naca la' lébisö na' bulu'e lahui Dios <sup>20</sup> cate' ní' busubanè' Cristo lu yöl-la' guti, en benè' ga gurö'è cuita lè'è Lè' cazè' ga nayépisètèrè' ní' yehua' yubá. <sup>21</sup> Rinná bé'enè' nupa ní' ta'nná bè', en nupa ní' dè lu né'eguequi, en nupa ní' nadé'ligaca yöl-la' huáca, en nupa ní' náccagaca xan. Cristo nayépisètèrè' ca yúgu'tè nupa nadé'ligaca yöl-la' unná bè' yödzülió ni, en lu yödzülió si' za'. <sup>22</sup> Dios budödè' lu në'è Cristo yúgu'tè le dè para inná bé'enè' le, en buzóè' Lè' quegaca bönachi queë' para gáquiè' Xanru' lu yúgu'tè le nequi queéru'. <sup>23</sup> Yugu' bönachi queë' Cristo náccagaca ca idútè le naca cazè', ate' raquiè' Lè' idú lu le naca cazè' na'. Run cazè' Lè' ga raca idú yúgu'tè le dè.

**Nuláru' tu' nadxí'inè' Dios rë'u**

**2** Dios chibennè' yöl-la' na'bán idú queé'li', sal-la' gú'cali' zí'atèlò ca bönni' nátigaca tu' nözi dul-la' nabága'li', en ní'a que dö' biá'alí'. <sup>2</sup> Dza ní' benlí' lébisö ca tun bönachi bití' náccagaca tsahui' nacua' yödzülió ni, en benlí' ca gú'uni tu' xihui', nu rinná bè' lu bö'ös, en rugún dxin nupa bití' túngaca ca rnna xtídzè'è Dios. <sup>3</sup> Lësca' caní gú'caru' yúgu'tèru' rë'u. Benru' ca guzèsö ládx'i'ru', en ca guyaza ládx'i'ru' lu yöl-la' bönáchisö queéru'. Que lè ni na' gubága'ru' dul-la' lahuè' Dios le nun ga gunè' rë'u xíguia' ca gunè' queguequi ia'zícá'rö bönachi. <sup>4</sup> Ní'irö cate' ní' nácaru' ca bönni' nátigaca tu' nözi dul-la' gubága'ru', Dios busubanè' rë'u lu yöl-la' guti tsözxón len Cristo tu' buéchi' ládx'è' rë'u, en bidxí'ide'enè' rë'u. Nuláli' tu' zoa le buzá' ládx'è' Dios queé'li'. <sup>6</sup> Dios busubanè' rë'u tsözxón len Cristo para gunè' ga có'öru' tsözxón len Lè' ga ní' rinná bè'è yehua'

yubá. <sup>7</sup> Caní benë' Dios, en bulu'ínë' bönachi s'í zágaca ca naca yöl-la' tsahui' que le buzá' ládxë'ë queéru', tu' budödë' Jesucristo ni'a queéru', le naca bë' ca nadxí'ide'enë' rë'u. <sup>8</sup> Nuláli' tu' zoa le buzá' ládxë'ë Dios queéli' tu' réajlë'ëli' Cristo. Busólë' libí'ili', calëga tu' nacua' le naca dxí'a benli' libí'ili', pero tu' naca le runsë' Dios. <sup>9</sup> Cuntu nu gaca gun ba zxön cuini tu' nulá, tu' cabí nulá nu na' tu' nacua' le naca dxí'a nun nu na'. <sup>10</sup> Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácgaca dxí'a, le bucözë' zí'atëlö gunru'.

### Rö'ö dxi icja ládxí'do'oru' lahuë' Dios ni'a que le benë' Cristo

<sup>11</sup> Gulí'tsöjné ca gúcalí' zí'atëlö. Gúcalí' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios, en nazí' lágaquië' bönni' narugu lu xipéla'gaquië', ta'n-né' nácalí' libí'ili' bönni' bití' narugu lu xipéla'gaquië'. <sup>12</sup> Dza ni' nubíga'li' ga zoë' Cristo. Gúcalí' bönni' zítu' lógaca bönachi Israel, en bití' buzí'ili' xibé didza' benë' tsutsu Dios, en guzxí' lu në'ë bi gata' quégaca bönachi queë'. Guzóalí' yödzölió ni, bití' zoa le runlí' löza, en bití' núnbë'ënilí'-në' Dios. <sup>13</sup> ¡Na'a, nácalí' tuz len Jesucristo! ¡Zí'atëlö nubíga'li' libí'ili' zítu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queéru'! <sup>14</sup> Lë cazë' Cristo runë' ga rö'ö dxi icja ládxí'do'oru' lahuë' Dios. Lë' benë' ga yugu' bönni' judío, en yugu' bönni' zítu' bulu'huöáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. <sup>15</sup> Lë ni benë' Cristo cate' gútië' uláz queéru', en gudüë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopa cö' bönachi na', bunë' tuz bönachi cubi, nupa nácgaca tuz len Lë cazë'. Caní benë', en gulequi dxíë' yöl-la' rilé na'. <sup>16</sup> Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxí'do'gaquië' lahuë' Dios.

<sup>17</sup> Caní guca, bulu'í lahuë' Cristo, en benë' libán que didza' dxí'a ca ribequi dxíë' yúgu'të bönachi, libí'ili' na' nácalí' bönachi izá'a, en zóalí' zítu' ga zoë' Dios, enca' bönachi judío nacua' gála'sö. <sup>18</sup> Na'a, ni'a que le benë' Cristo, gaca íbígá'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. <sup>19</sup> Que lë ni na', libí'ili', bönachi izá'a, bíti'rö nácalí' ca bönachi zítu' zóalí' tu luyú bití' nequi queéli', pero nabábalenlí' bönachi queë' Dios. ¡Chinácalí' ca bí'i queë' cazë' Dios! <sup>20</sup> Libí'ili' nácalí' ca tu yu'u zoa tsaz. Nácalí' ca yugu' guió'j zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guió'j lo que xilibi zö'ö na'. <sup>21</sup> Idütë yu'u na' le nácalí' libí'í cázalí' riyasa lahui xilibi zö'ö na' naca cazë' Cristo, en nacua' tu'lapa yugu' guió'j que, para gaca tu yudo' lá'ayi le naca tuz len Xanru'. <sup>22</sup> Libí'í cázalí' nácalí' tuz len Cristo Nu buzóa libí'ili' para gácalí' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

### Náquië' Pablo huen libán que didza' dxí'a lógaca bönachi izá'a

<sup>3</sup> Que lë ni na', neda', Pablo, yu'a lidxi guië' tu' runa' libán queë' Jesucristo para uzí'ili' xibé, libí'ili', bönachi izá'a. <sup>2</sup> Réquida' chinóz quézili' ca benë' Dios, budödë' lu na'a dxin runa' para uzí'ili' xibé le ruzá' ládxë'ë queéru'. <sup>3</sup> Dios bulu'e lahui le bigachí' queë', en buzéajni'inë' neda' ca naca. Ca naca lë ni chibuzúaja' láti'do' queéli' lu guichi. <sup>4</sup> Cate' ulábalí' lë ni, gúnbë'ëli' le réajni'ida' ca naca le bigachí' ca naca queë' Cristo. <sup>5</sup> Dza ni'te cuntu nu buzéajni'inë' Dios ca naca le bigachí' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' bulu'ínë' yugu' bönni' gubáz lá'ayi queë', en yugu' bönni' tu'ë didza' uláz queë'. <sup>6</sup> Caní rna lë na' bigachí': "Ni'a que didza' dxí'a ila'deli' bönachi izá'a tsözxön len bönachi judío le nequi queë' Dios, ate' ulu'huöáquië' ca tuz bönachi, en ulu'z'íë xibé tsözxön len légaquië' le guzxí' lu në'ë Dios unödzjé' quégaquië' tu' dá'gaquië' Jesucristo." <sup>7</sup> Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxí'a queë'. <sup>8</sup> Nacra' cá'asö ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxí'a ca naca yöl-la' tsahui' queë' Cristo, le nazáca'da'. <sup>9</sup> Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachí' queë' Dios, Nu ben yúgu'të le rilé'ru'. <sup>10</sup> Caní guca, para iléquibe'e yúgu'të nupa ta'n-ná bë', en nupa dë lu né'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácgaca bönachi queë' Cristo. <sup>11</sup> Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. <sup>12</sup> Tu' nácaru' tuz len Cristo, nazí'iru' lataj íbígá'ru' idú ladxí'ru' lahuë' Dios, tu' réajlë'ëru' Lë'. <sup>13</sup> Que lë ni na' ráta'yua' loli' bití' gaca chopá ladxí'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibé.

### Ca naca yöl-la' nadxí'í queë' Cristo

<sup>14</sup> ¡Que lë ni na', ruzechu zxiba' lahuë' Xuzë' Xanru' Jesucristo! <sup>15</sup> Ca lë, nazí'í ca' lágaca yúgu'të bönachi queë', nupa nacua' yehua' yubá, en nupa nacua' yödzölió ni. <sup>16</sup> Rinábida'-në' Xúziru' Dios, lu yöl-la' zxön queë', le nazáca'da', gunnë' queéli' yöl-la' huáca queë' Dios Bö' Lá'ayi, en gunë' ga gálalí' lu icja ládxí'do'olí'. <sup>17</sup> Rinábida'-në' Cristo soë' icja ládxí'do'olí' tu' réajlë'ëli' Lë'. Rinábida'-në' gunë' ga sóalí' tsaz lu yöl-la' nadxí'í queë', en bití' tséaj bö' icja ládxí'do'olí' ca nadxí'ili'-në', <sup>18</sup> para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'í queë', tsca ga ridxín ní'ilo, en ná'alö, en cadxí'ilo, en xitsá'alö. <sup>19</sup> Rinábida'-në' Dios gunë' ga gúnbë'ëli' yöl-la' nadxí'í na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

<sup>20</sup> ¡Na'a, yöl-la' ba Dios, Nu gaca gúntë'ro ca gaca inábaru' o ca gaca sa' ladxí'ru', ugunë' dxin yöl-la' huáca

queé' lu icja ládxi'do'oru! <sup>21</sup> ¡Gácatíca'sö queé' Dios yöl-la' ba lógaca bönachi queé' Cristo, en lahué' Lè cazé' Je-sucristo, na'a dza, en yúgu'tè dza zá'gaca! ¡Ca' gaca!

#### Dios Bõ' Lá'ayi nuné' rë'u tuz

**4** Na'a, neda' ráta'yua' lolí', yu'a lidxi guíe ni tu' runa' libán queé' Cristo, rinábida' libí'ili' gunlí' idú ca rala' ilún nupa bulidzè' Dios para ilequi queé', ca na' bulidzè' ca' libí'ili'. <sup>2</sup> Gulí'gaca nõxaj ladxí', en dxí'i ladxí'. Gulí'cõz zxon ladxí'. Gulí'gũí' ladxí' luzá'ali' tulí' ia'tulí' lu yöl-la' nadxí'i queé'li'. <sup>3</sup> Gulí'gũí' ladxí' gácatíca'silí' tuz ca na' chinuné' Dios Bõ' Lá'ayi libí'ili', gunlí' caní lu yöl-la' ribõza tsáhui'do' queé'li' le rutsaga libí'ili'.

<sup>4</sup> Tuz naca idútè le naca cazé' Cristo le nadzágaru' rë'u.

Tuzè' náquié' Dios Bõ' Lá'ayi dzá'guié' rë'u.

Tuz naca le runru' löza, lè na' bulidzè' rë'u Dios para uzí'iru' xibé.

<sup>5</sup> Tuzè' náquié' Xanru'.

Tuz le réajlè'ëru'.

Tuz le bidílaru' nisa.

<sup>6</sup> Tuzè' náquié' Dios Nu naca Xúziru' yúgu'tëru'.

Lè' rinná bé'ené' yúgu'tëru'.

Ruguné' dxin yúgu'tëru'.

Ribõza cazé' Lè' lu icja ládxi'do'oru' yúgu'tëru'.

<sup>7</sup> Tu turu' nazí'iru' tu yöl-la' huáca queé' Dios tsca naca le benné' Cristo que queéru'. <sup>8</sup> Naca caní ca na' nazúaj lu guichi lá'ayi le rnna:

Buèpè' yehua' yubá, guché'ë zían bönachi gula'dzún-gaca.

Gudísié' quégaca bönachi le runódzjasé' quégaquié'.

<sup>9</sup> ¿Bizxi ré'ëni inná lè na' rnna: buèpè'? Rusèdi rë'u bõtjè' zí'alò, en bidxiné' yödzólió cadxí'ilò ni. <sup>10</sup> Nu na' bõtaj naca Bõnni' na' buèpè' xitsátèrò ni' yehua' yubá para budzè'ë yúgu'tè len le naca cazé' Lè'. <sup>11</sup> Cristo caz benné' que queéru' yugu' yöl-la' huáca queé':

Bè' lataj bal-lè' bõnni' iláquié' gubáz queé'.

Bené' ga tu'è didza' uláz queé' Dios ia'bal-lè' bõnni'.

Gusól-lè'ë ia'bal-lè' tsójéngaquié' libán que didza' dx-í'a.

Bucu'ë ia'bal-lè' para ilún chí'ë bönachi queé'.

Bucu'ë ia'bal-lè' para ulu'sédiné' bönachi queé'.

<sup>12</sup> Cristo caz bupé'ë bönachi queé' caní para gaca ilún xichiné', para ilún ga ilaca idú nupa nácagaca ca idútè le naca cazé' Lè'. <sup>13</sup> Caní gaca ga idxintè dza huõácaru' tuz yúgu'tëru' ca réajlè'ëru' Cristo, en ca núnbè'ëru'-né' Zxí'iné' Dios. Gácaru' nál-la, en huõácaru' idú ca náquié' Lè' cazé' Cristo. <sup>14</sup> Bítirõ gácaru' ca yugu' bí'ido', ca nácagaca nupa na' tu'tsa'tè ca túngaca, en nácagaca ca tu le naché' lu yegu, o ca tu le røjché' bítitès bõ' recja, tu' ta'zí' lu né'eguequi bítitès didza' nu rusèdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui. <sup>15</sup> Na'a, rë'u ni, tu' nadxí'iru' luzá'aru', ral-la' gũí'iru' didza' le naca idútè li para gaca huõácaru' idú ca náquié' Cristo, en gácaru' tuz len Lè', Nu naca Xani idú le naca cazé', le nácaru' rë'u. <sup>16</sup> Cristo caz runé' ga rutsaga dxí'a idútè le naca cazé', le nácaru' rë'u, ate' idútè le naca cazé' na' naguela' tsõzxón ni'a

que lè na' run tuz idútè le naca cazé'. Cate' tu turu' runru' xichinru', rë'u na' dzágaru' le naca cazé', idútè rizxón, en raca idú, ca na' zeaj rácarò idú ca nadxí'iru' luzá'aru'.

#### Yöl-la' na'bán cubi náparu' tu' nácaru' tuz len Cristo

<sup>17</sup> Uláz queé' Xanru' rea' libí'ili' lè ni, en rigu'a le lu ná'alí', rnna: Bítirõ gunlí' ca tun nupa bití' núnbè'-gaquié' Dios, nupa na' tun ca ta'za'sö ládxi'guequi, <sup>18</sup> en nachul-la nanítigaca icja ládxi'do'guequi. Tu' cabí nõzguequiné' le nácatè, en nazídigaquié', bití' nazí'-gaquié' yöl-la' na'bán na' runné' Dios queéru'. <sup>19</sup> Bití' ca' tu'tu'íné'. Nudödi cúngaquié' lu le ruá' dö'. Idú ládxi'-gaquié' tuné' yúgu'tè le cabí naca tsahui'. <sup>20</sup> Nupa ni' bulu'sedi libí'ili' ca naca queé' Cristo, bití' ca' bulu'sedi libí'ili' gunlí' ca tun bönachi caní. <sup>21</sup> Le naca idútè li biyónilí' ca naca queé' Cristo, en le nácalí' queé' tu'séd-iné' libí'ili' le naca idútè li na' zóalen Jesús. <sup>22</sup> Gulí'nná be'e yöl-la' bönáchisö queé'li' le gúcalí' zí'alò, lè na' riniti ni'a que yöl-la' rizé ladxí' queé'li' le ruá' dö' le guzxí' ye'e libí'ili'. <sup>23</sup> Ral-la' huõácalí' cubi lu icja ládxi'do'olí', en lu bõ' naca cázalí'. <sup>24</sup> Ral-la' sí'ili' yöl-la' bönachi cubi le nuné' Dios ca naca cazé' Lè', le ruluí' cuini ni'a que le naca dxí'a, en le naca tsahui' runlí', en run ga gaca gunlí' caní.

<sup>25</sup> Que lè ni na', bítirõ si' yé'ëli'. Yúgu'tëru' ral-la' gũ'ilenru' luzá'aru' didza' le nácatè, tu' dzágaru' yúgu'tëru' idútè le naca cazé' Cristo.

<sup>26</sup> Channò hualé'li', bití' ral-la' gunlí' dul-la'. Bití' ilelí' xidzé. <sup>27</sup> Bití' bi gunlí' le gũ'í lataj tu' xihui' ucúl-la libí'ili'.

<sup>28</sup> Nu bõnni' ribané' ral-la' usané' yöl-la' gubán queé', en tsázié' huen dxin para gata' queé' bi unödzejé' qué-gaca nupa ta'yadzaj.

<sup>29</sup> Bití' gũ'ili' didza' xihui', pero guli'gũí' didza' dxí'a, yugu' le ilácalen nu yõni, en ilún ga gaca dxí'a que nu na'. <sup>30</sup> Bití' usuhuí'inilí' Dios Bõ' Lá'ayi, tu' naca bè' néquili' queé' Dios tu' zóalené' Dios Bõ' Lá'ayi libí'ili', ate' idxín dza údxi usölé' libí'ili' lu dul-la'.

<sup>31</sup> Gulí'cúa ladaj libí'ili' yöl-la' ruzxé'e, en yöl-la' ridzá'a, en yöl-la' rilé, en yöl-la' ridil-la didza', en yöl-la' rutsaga yudxi, en yúgu'tè yöl-la' bití' rilé'e luzá'ali' dxí'a.

<sup>32</sup> Ral-la' gácalí' dxí'i ladxí', en huéchi' ládxi'li' luzá'ali' tulí' ia'tulí', en uniti lolí' luzá'ali' tulí' ia'tulí', ca na' bené' Dios, buniti lahué' libí'ili' tu' nácalí' tuz len Cristo.

#### Ca ral-la' ilaca nupa nácagaca ca bí'i queé' cazé' Dios

**5** Tu' nácalí' ca bí'i queé' cazé' Dios, ate' nadxí'iné' libí'ili', guli'gũí' ladxí' gácalí' ca náquié' Lè'. <sup>2</sup> Ca naca yúgu'tè le runlí': Ral-la' idxí'ili' luzá'ali' ca na' bené' Cristo. Bidxí'iné' rë'u, en budödi cuiné' lu yöl-la' guti uláz queéru'.

Ben cuinë' ca böa' bédxido' rúrtiru'-ba' lahuë' Dios tu nözi dul-la' nabága'ru'.

Gúquië' ca' ca tu le rilá' zxi le raza ládxë'è Dios le rigú'uru' lu bucugu lá'ayi queë'.

<sup>3</sup> Tu' nácali' queë' Dios,  
biti' ca' gunli' le ruá' dö',  
en biti' gunli' le cabí ral-la' gunli',  
en biti' uhuíd'ili'.

Ní'irö cuntú nu gaca bi inné queé'li'.

<sup>4</sup> Biti' gü'í'ili' didza' xihui',  
o didza' canóz, o didza' cá'asö,  
yugu' le cabí ral-la' gunli',  
pero nácarö dxí'a guié'li'-në' Dios: "Xclenu'."

<sup>5</sup> Chinóz quézili' nitúë' bönni' runë' le ruá' dö' biti' ca' tsázië' ga rinná bë'è Cristo tsözxón len Dios, o nu bönni' runë' le cabí ral-la' gunë', o nu bönni' ruhuíd'ine'. Nu na' ruhuíd'í' naca ca nu reáj ladxí' budó' guió'j budó' ya-ga. <sup>6</sup> Biti' gü'í'ili' lataj nu sí' ye'e libí'ili' len didza' biti' ná-catë. Tu' nözi dul-la' caní Dios gunë' xíguia' nupa biti' túngaca ca rnna xtídzë'è. <sup>7</sup> Biti' ca' gunli' tuz bönachi caní.

<sup>8</sup> Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení', <sup>9</sup> tu' run bení' na' ga gácaru' dxí'í ladxí', en ga gü'í'uru' didza' le naca idútë li, en ga gácaru' tsahui'. <sup>10</sup> Guli'gü'í' ladxí' inózili' le raza ládxë'è Xanru'. <sup>11</sup> Biti' gútsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. <sup>12</sup> Utuí'uru' gü'í'uru' didza' ca naca le tun bönachi na' bagách'isö. <sup>13</sup> Cate' bi ubéajru' ga liná', gaca bë' yúgu'të tsca nácagaca, tu' gun le naca bení' ga gaca bë' yúgu'të. <sup>14</sup> Que lë ni na' nazúaj lu guichi lë na' rnna: Bubán, lí' na' rasiu'.

Guyasa ladaj nupa nátigaca.  
Cristo uzení'ë quiu'.

<sup>15</sup> Buli'yú cuinli' ca runli'. Biti' gácali' nupa biti' ta'yéa-jni'ini, pero guli'gaca bönachi ta'yéajni'i. <sup>16</sup> Guli'sí' xibé lataj dë queé'li' tu' chizóaru' dza biti' raza dxí'a queé'ru'. <sup>17</sup> Biti' gácali' bönni' biti' bi nózguequinë'. Guli'gü'í' ladxí' tséajni'ili' le ré'enë' Xanru' gunli'.

<sup>18</sup> Biti' súdxili', tu' gun yöl-la' rizudxi ga nítili' tsaz.  
Guli'gü'í'ida' lataj inná bé'enë' Dios Bö' Lá'ayi libí'ili'.

<sup>19</sup> Guli'gü'í'ilen luzá'ali' didza' tuli' ia'tuli',  
ugunli' dxin yugu' le rul-la lé'gaca salmo,  
en yugu' le rul-la yöl-la' ba Dios,  
en yugu' le rul-la nagu'ë Dios Bö' Lá'ayi icja ládxí'-do'oru'.

Idú ládxí'ru' ral-la' gúl-laru' queë',  
le cú'uru'-në' Dios yöl-la' ba.

<sup>20</sup> Guli'gún dxin Lë' Xanru' Jesucristo,  
en guli'guí'etica'sé' Xúziru' Dios: "Xclenu'" ca naca yúgu'të.

### Ca ral-la' gunru' quégaca dí'a dza queé'ru'

<sup>21</sup> Guli'gún ca rnna xtídzá' luzá'ali' tuli' ia'tuli' para caní gunli'-në' Dios zxön.

<sup>22</sup> Libí'ili', yugu' nigula, guli'gún ca rnna xtídzá'gaquië' bönni' que queé'li', ca na' ral-la' gunli' ca rnna xtídzë'è

Xanru'. <sup>23</sup> Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusólá bönachi queë', nupa na' dzágagaca le naca cazë' Lë'. <sup>24</sup> Ca na' tun bönachi queë' Cristo ca rnna xtídzë'è, lësca' caní ral-la' ilunnu nigula ca rnna xtídzá'gaquië' bönni' que queégacanu ca naca yúgu'të le raza.

<sup>25</sup> Libí'ili', yugu' bönni', ral-la' idxí'ili'-nu nigula que queé'li' ca na' Cristo nadxí'inë' bönachi queë', en budö-di cuinë', gútië' uláz quégaquië'. <sup>26</sup> Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'è. <sup>27</sup> Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxí'a, cuntú nu gaca bi inné quégaquië'. <sup>28</sup> Ral-la' idxí'ili'-nu nigula que queé'li' ca na' nadxí'í cuinli'. Nu bönni' nadxí'inë'-nu nigula queë', nadxí'í cuinë'. <sup>29</sup> Cuntú nu bönni' runi zí' cuinë', pero ru-gahuë', en run chí'í cuinë', ca runë' ca' Cristo, ca rún-lenë' bönachi queë', <sup>30</sup> nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipélë'è, en dxita queë'!

<sup>31</sup> Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'è para tsöjsóalenë'-nu nigula queë', ate' irópatë' ulu'huóáquië' tuz." <sup>32</sup> Lë na' nazúaj lu guichi ni rulu'í' lahui tu le naca idútë li, ate' neda' réquida' ru'í' didza' ca' ca naca queë' Cristo, en quégaca bönachi queë' na'. <sup>33</sup> Lësca' ru'í' didza' ca naca queé'li'. Yúgu'të'li' libí'ili', bönni', ral-la' idxí'ili'-nu nigula que queé'li' ca na' nadxí'í cuinli', ate' yugu' nigula ral-la' ilunnu bal bönni' que queégacanu.

**6** Libí'ili', yugu' bí'ido', ral-la' gunli' ca rnna xtídzá'-gaquië' xuz xiná'ali' para caní gunli' ca rnna xtídzë'è Xanru'. Ral-la' gunli' le naca tsahui'. <sup>2</sup> Xibá zí'alö na' benë' Dios le nachë' tu le guzxí' lu në'è gunë', naca lë na' rnna: "Ben bal xuz xinó'o, <sup>3</sup> ate' gaca dxí'a quiu', ate' xidzé su' ibanu' yödzölió ni."

<sup>4</sup> Libí'ili', yugu' xuz, biti' gun lelí' xzí'inili', pero buli'xón lé'gacabi', en guli'sína' lé'gacabi', en buli'sëdi lé'gacabi' ca raza ládxë'è Xanru'.

<sup>5</sup> Libí'ili', núlöli' nácali' bönni' nadó'ogaca, guli'gún ca rnna xtídzá'gaquië' xanli' luyú ni idú ládxí'li', gunli' lé-gaquië' bal lu yöl-la' radxi queé'li', en gunli' xichín-gaquië' ca ral-la' gunli' xichinë' Cristo. <sup>6</sup> Guli'gún xichín-gaquië', calé'gasö cate' ní' tu'yúë' libí'ili' para urúajli' dxí'a lógaquië', pero idú ládxí'li' guli'gún xichíngaquië' ca raza ládxë'è Dios, ca na' ral-la' gunli' xichinë' Cristo.

<sup>7</sup> Idú ládxí'li' guli'gún xichíngaquië', ate' caní gaca, gunli' xichinë' Xanru', en calé'gasö xichíngaca bönachi.

<sup>8</sup> Nöz quézili' ca gunë' Xanru'. Ubi'ë que queé'ru' tsca naca le dxí'a runru' sal-la' nadzanru', o sal-la' nácaru' bönni' nadó'ogaquië'.

<sup>9</sup> Libí'ili', nacuá' queé'li' bönni' nadó'ogaca, guli'gún dxí'a caní quégaca huen dxin queé'li' na', en biti' uzéli' ba nadx légaquië'. Guli'tsöjné ca naca queé'li', yú'uli' lu

në'ë Xanru' zoë' yehua' yubá la' ca nácatë quégaquië',  
ate' Lë' bití' rutsé'ë ca runë' que que bönachi.

### Dios runnë' queéru' le tun chí' rë'u

<sup>10</sup> Na'a, böchí' luzá'ado', guli'gaca tsutsu tu' nácali' tuz  
len Xanru', en zóalen libí'ili' yöl-la' huáca zxön queë'.

<sup>11</sup> Guli'gún chí' cuinlí', ugunlí' dxin yugu' le runnë' Dios  
queéru', le tun chí' rë'u, para gaca sóali' tsutsu cate'  
gué'ëni sí' bë' tu' xihui' libí'ili'. <sup>12</sup> Bití' ridíl-lalenru' bö-  
nachi néquiguequini bëla', en dxita, pero ridíl-lalenru'  
yöl-la' unná bë' quégaca bö' xihui' ta'dá lu bö'ös, en  
dzágagaca nupa ta'nná bë', en nupa nadéligaca yöl-la'  
unná bë', en nupa dë lu ná'agaca, nupa nacuá'

yödzülió ni ga naca chul-la que dul-la'. <sup>13</sup> Que lë ni na':

Guli'sí' yúgu'të le runnë' queéru' Dios le tun chí' rë'u,  
para cate' idxín queéru' dza ní' ilaca le nácgaca xi-  
hui',

gaca guá' ilenlí',

en cate' údxi gunlí' caní, ugá'analí' tsutsu.

<sup>14</sup> Guli'sóa tsutsu.

Guli'sí' le naca idütë li,

le gaca queéli' ca tu guídi guga' lé'ëli'.

Guli'gaca tsahui' tu' gun chí' libí'ili' le naca tsahui'

ca run tu lari' yödx run chí' luchu'ë bönní' rejë' gudil-  
la.

<sup>15</sup> Guli'sóa sina' para gunlí' libán que didza' dxí'a

le ribequi dxi icja ládxi'do'oru' lahuë' Dios,

ca na' ruzóa cuinë' sina',

en ridé'ë xiráchuë' tu bönní' rejë' gudil-la.

<sup>16</sup> Le naca lo, yöl-la' réajlë' queéli' Cristo

gaca queéli' ca tu le naca tsutsu uzëli' loli',

para cabí gál-la' yugu' le usán tu' xihui' libí'ili',

le nácgaca ca yaga túchí'do' zoa guí' láhuilöguequi.

<sup>17</sup> Yöl-la' rusölá gaca queéli' ca tu lu'u guíë le gun chí'  
ícjali'.

Xtídzë'ë Dios gaca queéli' ca tu guíë tuchi'

le runnë' Dios Bö' Lá'ayi queéru',

para utíl-lalenru' le naca xihui'.

<sup>18</sup> Guli'gún yúgu'të lë ni,

en bulí'lidzë' Dios inábili'-në' gácalenë' libí'ili'.

Bulí'lidzatica'së' Dios zóalenë' Dios Bö' Lá'ayi libí'ili'.

Para gunlí' caní ral-la' usubán ládxi'li' en cabí huóaj  
ládxi'li',

inábili'-në' Dios gácalenë' nupa néquiguequi queë'.

<sup>19</sup> Bulí'lidzë' Dios, inábili'-në' gácalenë' ca' neda', en

gunnë' quia' didza' cate' ral-la' gu'a didza', en gunë' ga

gaca' rugu ládxi' cate' guna' libán para uzéajni'ida' bö-

nachi ca naca le bigachí' que didza' dxí'a. <sup>20</sup> Dios

budödë' lu na'a didza' dxí'a na' para guna' libán que,

ate' tu' bena' caní yu'a lidxi' guíë ni. Bulí'lidzë' Dios

channö, inábili'-në' gunë' ga gaca' rugu ládxi' para gu-

na' libán que didza' dxí'a ca ral-la' guna'.

### Ruúdx didza' bë'ë Pablo

<sup>21</sup> Tíquico, böchí'ru' na' nadxí'iru'-në', en runë' xichinë'  
Xanru' idú ládxi'ë, quíxjöi'inë' libí'ili' idú ca raca quia',  
en ca runa' neda' ni. <sup>22</sup> Que lë ni na', isól-la'a-në' queéli',  
ate' ulu'i'inë' libí'ili' ca raca queétu', ate' caní utipë' ládxi-  
i'li'.

<sup>23</sup> Rinábida'-në' Xúziru' Dios, enca' Xanru' Jesucristo  
gunë' ga soa dxi icja ládxi'do'oli', en gata' queéli' yöl-la'  
nadxí'i le dzaga yöl-la' réajlë' queéli' Cristo, yúgu'tëli'  
na' néquili' queë'. <sup>24</sup> Le ruzá' ládxi'ë Dios queéru' gaca  
queéli', yúgu'tëli' na' nadxí'ili'-në' Xanru' Jesucristo,  
naca idú yöl-la' nadxí'i queéli' Lë'. ¡Ca' gaca!



# Filipenses

## Pablo rugapë' Dios bönachi queë' Cristo nacua' Filipos

**1** Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. <sup>2</sup> Rinábida-në' Xúziru' Dios, enca' Xanru' Jesucristo gunnë' queé'li' le ruzá' ládxë'ë queëru', en gunë' ga soa dxi icja ládxí-'do'oli'.

## Pablo rinábinë' Dios bi gunë' quégaca bönachi ta'yéajlë' Cristo

<sup>3</sup> Rea'-në' Dios: "Xclenu'", cate' rizá' ládxa'a queé'li'.  
<sup>4</sup> Cate' rulidza'-në' Dios, en rinábida'-në' gácalenë' libí'ili', rudzeja ládxa'a <sup>5</sup> tu' rönjeda' ca bënlenli' neda' tsözxón dxin que didza' dxí'a. Gusí loli' runli' dxin na' dza ni' si' biyónili', en runli' le ga ridxintë na'a dza.  
<sup>6</sup> Dios gusí lahuë' runë' tu le naca dxí'a lu icja ládxí-'do'oli'. Ruzxóni ládxa'a Lë' gúntica'së' caní ga idxintë dza huödë' Jesucristo. <sup>7</sup> Ca na' rizá' ládxa'a queé'li' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxón len neda' le ruzá' ládxë'ë Dios queëru', tsanni ni yu'a lidxi guíë, en lësca' caní benli' cate' ni' bë'a didza', cate' na' bena' libán que didza' dxí'a le bena' ga bidxín queé'li' tsaz. <sup>8</sup> Nózinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. <sup>9</sup> Rinábida'-në' Dios gunë' ga idxí'iróli' luzá'ali', en gáta'da' queé'li' yöl-la' rácada', en yöl-la' réajni'i idú <sup>10</sup> para gaca cöli' le nácatëro dxí'a. Channö gaca caní queé'li', gácali' idú dxí'a, ate' cuntu nu gaca bi innë queé'li' dza ni' huödë' Cristo. <sup>11</sup> Le nácali' naca bë' le naca dxí'a runë' Cristo lu icja ládxí-'do'oli' para ilá' lahui yöl-la' zxon queë' Dios, en gaca queë' yöl-la' ba.

## Zóaru' nabanru' para gácaru' ca náquië' Cristo

<sup>12</sup> Böchi' luzá'ado', ré'ënda' inózili' lë ni: Yúgu'të le gaca quia' gulácalen neda' para guxzéqui'röda' bena' libán que didza' dxí'a. <sup>13</sup> Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nózguequinë' yu'a lidxi guíë ni tu' runa' xichinë' Cristo. <sup>14</sup> Tu' yu'a neda' lidxi guíë ni ben ga látu'biqui' yúgu'të bóchi'ru' nacagacarë' rugu ladxí', ate' tu'zxoní ládxí-'gaquië' Xanru', en bití'rö tádxinë' tunë' libán que xtídzë'ë Dios.

<sup>15</sup> Le nácatë bal-lë' tunë' libán queë' Cristo tu' tu'zxe'enë' neda', en ta'dil-lë', pero ia'bal-lë' tunë' libán queë' idú ládxí'gaquië'. <sup>16</sup> Yugu' bönni' tu'zxe'enë' na'

tunë' libán queë' Cristo lu yöl-la' run ba zxon cuín-gaquië', en calëga idú ládxí'gaquië'. Té'ënnë' ulu'saca' zí'ë neda' tsanni ni yu'a lidxi guíë. <sup>17</sup> Yugu' bönni' idú ládxí'gaquië' na', lu yöl-la' nadxí'i quëgaquië' tunë' libán queë', tu' nózguequinë' Dios caz budödë' lu na'a dxin runa', runa' libán que didza' dxí'a. <sup>18</sup> Biti' run lë na' ga rö'a böniga. Rudzëjada' tu' raca libán queë' Cristo nácatitës, sal-la' tunë' libán idú ládxí'gaquië' o bití' tunë' le caní.

Na'a, rudzëjaröda' <sup>19</sup> tu' chinözida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risól-lë'ë Jesucristo queëru'. <sup>20</sup> Caní ré'ënda', en ruzxoní ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxí', ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. <sup>21</sup> Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. <sup>22</sup> Channö huá-ca guna' dxin le gácalen didza' dxí'a queë' Cristo channö sóasa' ibana', bití' nözda' bízxilö ral-la' cóa'. <sup>23</sup> Naca böniga cóa'. Ré'ënda' gátitea' para tsöjsóalentea'-në' Cristo, tu' gácatëro dxí'a quia', <sup>24</sup> pero runrö bayudxi sóasa' ibana' para séqui'da' gácalena' libí'ili'. <sup>25</sup> Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'. <sup>26</sup> Caní naca, udusóalena' libí'ili' leyúbölö, le gun ga tsaz ládxí'ili'-në' Jesucristo ni'a que le gunë', gácalenë' neda'.

<sup>27</sup> Gulí'gü'sö ladxí' gácali' ca sa'yéaj didza' dxí'a queë' Cristo. Caní gaca, channö uduyúa' libí'ili' o channö soa' zí'tu', huayónida' nácali' tsutsu, en nácali' tuz, runli' tsözxón dxin que le réajlë'ëru' le za' queëru' ni'a que didza' dxí'a. <sup>28</sup> Biti' gü'ili' nupa bití' ta'lé'e libí'ili' dxí'a lataj ilún gadxi libí'ili'. Lë ni uluí' légaquië' ila'nítië', pero uláli' libí'ili', le gaca bë' rácalenë' Dios caz libí'ili'. <sup>29</sup> Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí' rizácali' cate' runli' xichinë'. <sup>30</sup> Na'a, gaca gunli' neda' tsözxón gü'i ládxí'ru' gunru' libán que didza' dxí'a. Bilé'e quézili' ca gudí' guxzáca'a cate' bena' caní zí'alö, ate' riyónili' ca riguí' rizáca'a ca' na'a.

## Gúquië' Cristo nöxaj ladxí', ate' bidéli'në' yöl-la' zxon

**2** Cristo runë' ga rutipa ládxí'li', en lu yöl-la' nadxí'i queë' ruhuéchi' ládxë'ë libí'ili', en runë' ga nácali' tuz len Dios Bö' Lá'ayi, en ga nadxí'ili' luzá'ali',

en ga ruhuéchi' ládxi'li' luzá'ali' tuli' ia'tuli'.  
<sup>2</sup> Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lébisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bô' naca cázali', en ca rizá' ládxi'li'. <sup>3</sup> Ca naca le runli', bití' bi ral-la' gunli' lu yöl-la' rudul-li' queéli', o para gun ba zxon cuinli', pero dxí'ado' ral-la' gunli' yúgu'tè, en cabí guéquili' nadéli'röli' libí'ili' ca luzá'ali'. <sup>4</sup> Guli'gú' ladxí' gaca dxi'a ca' que luzá'ali', en caléga queézili'.  
<sup>5</sup> Ral-la' gácali' nòxaj ladxí' ca na' gúquiè' Jesucristo nòxaj ladxí'. <sup>6</sup> Lè' naca cazè' lébisö ca náquiè' Dios caz, pero bití' gúquinè' ral-la' gunè' bayudxi ugá'anè' lébisö ca na' náquiè' Dios. <sup>7</sup> Bucá'ana cazè' yúgu'tè le napè', en ben cuinè' ca tu bönni' nadó'o. Guljè' ca talaj bönachi, en gúquiè' idú bönachi. <sup>8</sup> Cate' ni' náquiè' bönni', gúquiè' nòxaj ladxí', en benè' ca na' rna xtídzè'è Dios, en gútiè'. Gudè'è lè'e yaga cruz ca na' raca queè' nu bönni' nabáguè'è dul-la'. <sup>9</sup> Que lè ni na' Dios buchisè' Lè', en benè' ga náquiè' lo ni' yehua' yubá, en benè' ga lè' tu le nácatèrö lo ca yúgu'tè lágaca bönachi. <sup>10</sup> Caní benè' Dios para cate' ila'yöni ca na' lè' Jesús, ulu'zechu zxibi-gaca yúgu'tè nupa nacua' yehua' yubá, en lu yödzülió, en lu lataj chul-la. <sup>11</sup> Yúgu'tè' ila'guíxjö'è yálajdo' Jesucristo náquiè' Xanru' para gaca yöl-la' ba queè' Xúziru' Dios.

### Ral-la' gácaru' ca tu le ta'gú'u bení yödzülió ni

<sup>12</sup> Que lè ni na', böchi' luzá'ado', ca na' benli' ca rna xtídzá'a cate' ni' zóalena' libí'ili', runrö bayudxi gunli' ca rna xtídzá'a na'a, tsanni ni zoa' zítu' ga zóali'. Guli'gún xichiné' Xanru' ga idxintè dza údxi usölé' libí'ili'. Guli'gún caní lu yöl-la' radxi queéli' Lè', en lu yöl-la' rizxizi. <sup>13</sup> Lè cazè' Dios runè' dxin lu icja ládxi'dó'oli'. Runè' ga ré'énili' gunli' le raza ládxe'è Lè', en runè' ca' ga séqui'li' gunli' lè na'.  
<sup>14</sup> Guli'gún yúgu'tè le ral-la' gunli', en bití' bi innèli' que, en bití' til-la dídzá'li'. <sup>15</sup> Caní ral-la' gunli', para cabí gaca nu bi innè queéli', pero caní gácali' ca xzí'ini cazè' Dios, nácali' idú dxi'a yödzülió ga ni zóali' ladaj bönachi bití' nácgaca tsahui', en nucá'anagaca Dios. Libí'ili' rigú'uli' bení ládjagaquiè' ca na' ta'gú'u bení böljaj lúx-iba cate' ni naca chul-la, <sup>16</sup> cate' ru'í'ili' lógaquiè' dídzá' ibániguequinè'. Channö caní gunli', huáca udzé-jade'eda' ní'a que le naca cázali' dza huödè' Cristo, tu' inözda' bití' guca nítisö guzóa bönadxi gátia', en caléga nítisö bena' dxin. <sup>17</sup> Yöl-la' réajlè' queéli' Cristo naca tu le raza ládxe'è Dios. Sal-la' gun bayudxi gátia' para gaca idú yöl-la' réajlè' queéli' Lè', udzèjada', en uzí'lena' xibé tsözxón yúgu'tèli'. <sup>18</sup> Lësca' caní ral-la' udzèjalí' libí'ili', en uzí'lenli' tsözxón neda' xibé.

### Ca tunbí' bíi Timoteo, en bíi Epafrodito

<sup>19</sup> Channö caní ré'ènè' Xanru' Jesús, runa' löza isól-la'tea'-bí' bíi Timoteo ga zóali', ate' ní'rö udzèjada' cate' huódabi' ududíxjöi'ibi' neda' cátèze raza queéli'. <sup>20</sup> Túz-ibi' lèbi' rizá' ládxi'bi' ca na' rizá' ládxa'a neda', en ru'í'ida' ládxi'bi' libí'ili'. <sup>21</sup> Yúgu'tè bönni' ia'zícá'rö, le naca que-

gacasè' tu'í' ládxi'gaquiè'. Bití' tu'í' ládxi'gaquiè' xichiné' Cristo. <sup>22</sup> Nöz quézili' ca benbí' bíi Timoteo, ca na' burúajbí' dxi'a. Bénlenbí' neda' tsözxón dxin que dídzá' dxi'a, ate' nácabi' quia' ca tubí' bíi bönni' rúnlenbí'-nè' tsözxón xúzibi' dxin. <sup>23</sup> Isól-la'a-bí' bíi Timoteo ga zóali' cate' inözda' nacxi gaca quia' ni <sup>24</sup> sal-la' ruzxöni ládxa'a-nè' Xanru' gunè' ga uduyútea' libí'ili'.

<sup>25</sup> Lësca' réquida' run bayudxi isól-la'a-bí' bíi böchi'ru' Epafrodito ga zóali'. Bíi ni bénlenbí' neda' tsözxón dxin queè' Cristo, ate' gudíl-lalentu' tu' xihui'. Libí'ili' cázali' gusól-la'li'-bí' ga zoa' para gácalenbí' neda'. <sup>26</sup> Lè cázabi' ré'énibi' uduyúbi' libí'ili', en ru'í'ida' ládxi'bi' libí'ili' tu' biyönili' ben bayá' queébi'. <sup>27</sup> Le nácatè gü'í'ibi', en guqui gátibi', pero buéchi' ládxe'è-bí' Dios, en calégasö lèbi', pero buéchi' ládxe'è ca' neda', para cabí isébirö ládxa'a ca na' risèbi ládxa'a na'a. <sup>28</sup> Que lè ni na', gú'u-niröda' isól-la'a-bí' queéli' para gaca udzèjali' leyúbölö cate' ulé'eli'-bí', en bití'rö isèbi ládxa'a neda'. <sup>29</sup> Guli'sí' lu ná'ali' lèbi' lu yöl-la' rudzeja queéli', tu' nácabi' bíi böchi'ru' réajlè'èbi' Cristo. Guli'gún bal yúgu'tè bönachi nácgaca ca nácabi' lèbi', <sup>30</sup> tu' guzóa bönadxi queébi' gátibi' tu' benbí' xichiné' Cristo, en tu' gúcalenbí' neda' uláz queéli'.

### Le naca idú tsahui'

**3** ¡Na'a, böchi' luzá'ado', buli'dzeja tu' nácali' tuz len Xanru'! Bití' rupixxaj neda' uzúaja' queéli' leyúbölö lè na' buzúaja' queéli' zí'alö, tu' gácalen lè ni libí'ili'.  
<sup>2</sup> Guli'gún chíi cuinli' lógaca nupa ni' tuá' dö'. Nácgaca ca yugu' bö'cu' sínia', nupa na' tun bayudxi irugu lu xipéla'gaquiè' bönni' le naca bè' nazí' lu ná'gaquiè' xtídzè'è Dios. <sup>3</sup> Ré'u nadéli'ru' lè na' naca idütè li, le naca bè' nazí' lu ná'aru' le runnè' queéru' Dios. Tu' réajlè'èru' Dios, zóalenè' Dios Bö' Lá'ayi ré'u, ate' rudzé-jaru' tu' nácaru' tuz len Jesucristo. Bití' ca' ruzxöni ládxi'ru' tu le runru' rácasö queéru'. <sup>4</sup> La'tu' ruzxöni ládxi'ru' lè ni, lësca' neda' chinadéli'da' bi uzxöni ládxa'a. Channö zoè' nu bönni' réquinè' ulé' tu' nacua' le nunè', neda' nadéli'röda' ca bönni' na':  
<sup>5</sup> Gurugu lu xipéla'a lè na' naca bè' cate' ni' gúquida' xunu' dza.  
 Gulja' ladaj dí'a dza quégaca bönachi Israel.  
 Nababa' xzí'ini xí'sóè' Benjamín.  
 Xuz xiná'a nácgagaquiè' idú bönachi hebreo.  
 Guca' bönni' yudo' fariseo ca na' bena' ca rinná bè' xibá queè' Dios.  
<sup>6</sup> Bé'da' ládxa'a xibá na' ga bidxintè gudxia ládxa'a bönachi queè' Cristo.  
 Tsca gaca gáquiè' tsahui' tu bönni' tu' runè' ca rinná bè' xibá na', cuntu nu bi guca innè quia'.  
<sup>7</sup> Na'a, yúgu'tè lè na' bena' zxon zí'alö, nuzóa' tsölá'alö tu' néquida' queè' Cristo. <sup>8</sup> Calégasö yugu' lè na', pero nuzóa' ca' tsölá'alö yúgu'tè le dè, para gaca gún-be'eda'-nè' Xanru' Jesucristo, le nácatèrö lesaca' ca yúgu'tè lè na'. Para gúnbe'eda' Lè' gurú'una' ní'ilö yúgu'tè, en réquida' naca ca bèbu, para uzí'a xibé' Cristo, <sup>9</sup> en para gaca' tuz len Lè'. Nuhuóca' tsahui', caléga tu' runa' ca rinná bè' xibá na', pero Dios caz

bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'. <sup>10</sup> Ré'ënisida' gún-bë'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxón, qui'i saca'a ca na' gud'í guzxáqueë' Lë', en soa' sina' gátia' ca gútië' Lë', <sup>11</sup> tu' runa' löza Dios, usub-anë' ca' neda' lu yöl-la' guti.

#### Le runru' para idxinru' xilátjaru'

<sup>12</sup> Biti' rnnia' chinadéli'da' yúgu'të lë ni gunnë' quia', en bití' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'. <sup>13</sup> Böchi' luzá'ado', bití' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. <sup>14</sup> Runa' ca runë' tu bönni' rixítí'dë'ë para idxinë' xilatjë' para idéli'në' tu le uzí'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

<sup>15</sup> Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'. <sup>16</sup> Na'a, ca naca lë na' bidéli'ru', ral-la' gúntica'siru' caní.

<sup>17</sup> Böchi' luzá'ado', guli'gún ca na' runa' neda'. Chibu-lu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. <sup>18</sup> Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnnia': Le tunë' zían bönni' run ga nácaquie' ca nupa bití' ta'lé'e Cristo dxí'a, tu' tu'zöë' tsölá'alö le ben cazë' Lë' lë'e yaga cruz. <sup>19</sup> Yugu' bönni' tunë' caní, tsöjáquie' lu guí' gabila, tu' naca le ta'zësö ládxi'gaquie' dios qué-gaquie', ate' tun ba zxón cuíngaquie' ní'a que lë na' ral-la' gun ga ulu'tuí'inë'. Tuí'i ládxi'së le dë yödzülió ni, <sup>20</sup> pero rë'u ni ruí'i ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusólá rë'u, urúajë' yehua' yubá na'. <sup>21</sup> Lë' utsë'ë idútë le naca cázaru', le riniti caz, en gunë' ga huóca ca naca idútë le naca cazë' Lë', le sóatica'sö. Caní gunë' len yöl-la' huáca zxón queë' le ugunë' dxin para inná bé'enë' yúgu'të.

#### Ral-la' udzéalentica'siru'-në' Xanru'

**4** Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en ré'ënda' uduyúa' libí'ili'. Runlí' ga rudzëjada', en nácali' ca tu le ruzí'a xibé.

<sup>2</sup> Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiquequi queë' Xanru'. <sup>3</sup> Na'a, bócha'a idú, ré'ënda' gácalenu' irópanu ni, tu' gulún-lennu neda' dxin, cate' bentu' libán que didza' dxí'a. Lësca' bulu'dzáquie' Clemente, en ia'zica'rë' luzá'a na' netu'. Chinazúajgaca lágaquie' yehua' yubá ga na' nazúajgaca lágaca nupa chinadéli'gaca yöl-la' na'bán idú.

<sup>4</sup> ¡Buli'dzéalentica'sö-në' Xanru'!

Leyúbölö, rnnia': ¡Buli'dzeja!

<sup>5</sup> ¡Guli'gaca dxí'i ladxí' len yúgu'të bönachi!

¡Chizóa huödë' Xanru'!

<sup>6</sup> Biti' ubi ugu'ili', pero guli'nabi-në' Dios le riquinili', en guli'guie': "Xclenu'" ca naca yúgu'të lë na' rinábalí'.

<sup>7</sup> Dios gunë' ga gaca queéli' le cuéqui dxi icja ládxi'-do'olí', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'-do'oru' gun chí'i icja ládxi'-do'olí', en le rizá' ládxi'li' tu' nácali' tuz len Jesucristo.

#### Ral-la' sa' ládxi'ru' le nácgaca dxí'a

<sup>8</sup> Ga ruúdxitë, böchi' luzá'ado', guli'sá' ládxi'li': Yúgu'të le naca dxí'a, en le naca bica' ba, en le naca idútë li, en le naca idú, en le naca tsahui', en le naca ba'a, en le naca lachi, en le ral-la' gunru' bal.

<sup>9</sup> Guli'gún ca na' busédida' libí'ili', lë na' guzxí' lu ná'alí' tsca na' bé'lena' libí'ili' didza', en tsca na' bena' ga ni' zóalí'. Dios, Nu runna queëru' le ribequi dxi icja ládxi'-do'oru' sóalenë' libí'ili'.

#### Le tsahui' gulunë' yugu' bönni' Filipos queë' Pablo

<sup>10</sup> Rudzëjalenda'-në' Xanru' tu' ruí'i ládxi'li' neda' leyúbölö. Biti' rnnia' gul-la ládxi'li' neda', pero bití' guta' queéli' lataj gácalenli' neda' zí'alö. <sup>11</sup> Lësca' caní, bití' rnnia' caní tu' zoa bi riyadzaj quia', tu' nazëda' tsaza ládxa'a le dësö quia'. <sup>12</sup> Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'. <sup>13</sup> Yúgu'të huazéqui'da' tu' rutipë' Cristo ládxa'a. <sup>14</sup> Benlí' dxí'a cate' ni' gúcalenli' neda', en butípalí' ládxa'a cate' gud'í guzxáca'a.

<sup>15</sup> Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxí'a. Tsca nacua' bönachi queë' Cristo, cúnturö nu gúcalen neda', pero libí'silí' gúcalenli' neda'. Gusól-la'li' quia' bi bunódzjalí', tu' guzxí' lu ná'alí' libán bena' neda'. <sup>16</sup> Tsanni ni' guzóa' yödzö Tesalónica, tu chopa luzuí gusól-la'li' quia' le bunódzjalí' cate' ni' biyadzaj quia'. <sup>17</sup> Biti' ruí'i ládxa'a bi sí'a, pero ré'ënda' gáta'rö queéli' le uzí'ili' xibé yehua' yubá. <sup>18</sup> Rea' libí'ili': Chiguzxi'a yúgu'të lë na' gusól-la'li' quia', ate' gudóditë bë' tsca le biyádzjada'. Ben ga naca caní lë na' gusól-la'li' lu ná'abi' bí'i Epafrodito. Lë na' bunódzjalí' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxe'ë. <sup>19</sup> Dios gunnë' queéli' yúgu'të le riyadzaj queéli', tsca naca yöl-la' tsahui' rö'ö yehua' yubá, tu' nácali' tuz len Jesucristo. <sup>20</sup> ¡Gácatíca'sö queë' Xúziru' Dios yöl-la' ba! ¡Ca' gaca!

#### Yugu' bönachi queë' Cristo tu'gapa Dios luzé'eguequi

<sup>21</sup> Uláz quia' neda', guli'gapa Dios nupa ni' néquiquequi queë' Dios tu' nácgaca tuz len Jesucristo. Tu'gapë' Dios libí'ili' böchi' luzá'aru' núngaquie' neda' tsözxón ni. <sup>22</sup> Lësca' yúgu'të nupa ni néquiquequi queë' Dios, tu'gapa Dios libí'ili', en lësca' caní, yugu' bönni' huen dxin nacué' lidxë' bönni' rinná bë'ë idú luyú Roma tu'gapë' Dios libí'ili'.

<sup>23</sup> Rinábida'-ně' Xanru' Jesucristo uzá' lădxě'ě queéłi'  
yúgu'těli'. ¡Ca' gaca!

# Colosenses

Pablo rugapë' Dios bönachi queë' Cristo nacu'ë  
Colosas

1 Neda', Pablo, naca' gubáz queë' Jesucristo tu' ré'ënë' Dios caní, ate' dzágabi' bí'i bóchi'ru' Timoteo neda'. <sup>2</sup> Rugapa' Dios libí'ili', zóali' Colosas. Nácali' bóchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queé'li', en gunë' ga soa dxi icja ládxí'do'oli'.

Pablo rulidzë' Dios, en rë' Lë': "Xclenu"

<sup>3</sup> Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queé'li' <sup>4</sup> tu' biyónitu' didza' ca réajlë'ëli' Jesucristo, en ca nadxí'ili' yúgu'të nupa néquiquequi quez queë' Dios.

<sup>5</sup> Caní runlí' tu' runlí' löza le nuzóë' Xanru' queé'li' ni' yehua' yubá, lë na' biyónili' que cate' bé'lentu' libí'ili' didza', le naca löza sí'ili' ni'a que didza' dxí'a. <sup>6</sup> Didza' dxí'a na' bidxín queé'li' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxintë na'a dza, cate' ni' biyónili', en bénbë'ëli' idútë le ruzá' ládxë'ë queé'ru' Dios.

<sup>7</sup> Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözxón dxin, en rácalenë' libí'ili'. Náquië' huen dxin idú queë' Cristo. <sup>8</sup> Bönni' ni gudí'xjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunlí' caní.

<sup>9</sup> Que lë ni na' netu' ca', dza ni'te ga ridxintë na'a dza, tu' réquibe'etu' lë ni, bití' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gún-bë'ëli' idú le ré'ëni quezínë' Lë', en gunnë' queé'li' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u. <sup>10</sup> Caní rinábitu'-në' para gaca gunlí' ca ral-la' ilún nupa néquiquequi queë' Xanru', gunlí' yúgu'të le raza ládxë'ë Lë', en séqui'li' gunlí' yúgu'të le naca dxí'a, en gácarö idú ca núnbë'ëli'-në' Dios.

<sup>11</sup> Rinábitu'-në' utipë' ládxí'li', en gunnë' queé'li' yöl-la' huáca idú queë', para gaca guá' ilenli' yúgu'të, en cóza-li' zxön ladxí', en udzeja ládxí'li'. <sup>12</sup> Lu yöl-la' rudzeja queé'li' gulí'guíë' Dios Xuz: "Xclenu", tu' budödë' lu ná'aru' gata' queé'ru' lataj lu bení' queë', en gunru' tsözxón nupa néquiquequi quez queë'. <sup>13</sup> Dios Xuz na' busolé' rë'u lu na' nu rinná bé' lataj chul-la, en budödë' rë'u ga na' rinná bé'ë Zxí'ini cazë', Nu nadxí'inë'.

<sup>14</sup> Zxí'inë' na' böá'uë' rë'u, tu' gútië' uláz queé'ru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gútië' Cristo uláz queé'ru'

<sup>15</sup> Cristo náquië' tuz ca náquië' Dios caz, Nu bití' gaca ilé'eru'. Zoa cazë' Lë' zí'atëlö ca yúgu'të le benë' Dios.

<sup>16</sup> Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nácagaca lataj lo, en yugu' yöl-la' unná bé', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'. <sup>17</sup> Cristo zoa cazë' zí'alö ca yúgu'të le dë, ate' yúgu'të nacua'ti-ca'sö ni'a queë' Lë'. <sup>18</sup> Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtë'rë' ca yúgu'të le dë. <sup>19</sup> Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. <sup>20</sup> Ni'a que le benë' Cristo, Dios benë' ga gaca ulu'huóáca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

<sup>21</sup> Libí'ili', zí'atëlö nulá'aleni'-në' Dios, en gúcali' ca yugu' bönni' bití' ta'lé'enë' Dios dxí'a lu icja ládxí'do'oli' ni'a que dö' biá'ali', pero na'a chibunë' libí'ili' tuz len Lë'.

<sup>22</sup> Caní guca, tu' budödi cuinë' Cristo, en gútië' uláz queé'li' para gaca usudxinë' libí'ili' lahuë' Dios, nácali' quez queë', en idú dxí'a, ate' cuntú nu bi gaca innë' queé'li'. <sup>23</sup> Caní gaca channö ugá'analí' tsutsu ca réajlë'ëli' Cristo. Gácali' ca tu yu'u zxa ga rë' xilibi zö'ö que, en bití' tseaj bö' ládxí'do'oli' ca runlí' löza didza' dxí'a biyónili', lë na' raca libán que idútë yödzölió le benë' Dios zxa lúzxiba. Dios buzóë' neda', Pablo, para gaca' huen dxin que didza' dxí'a na'.

Dxin budödë' Dios lu në'ë Pablo

<sup>24</sup> Rudzëjada' na'a ca naca le riguí' rizáca'a para gácalena' libí'ili', en ruúdxí' rizá'a lu idútë le naca' le riguí' rizáca'lëna' tsözxón Cristo uláz que idú le naca cazë' Lë', le naca bönachi queë'. <sup>25</sup> Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. <sup>26</sup> Ruzéajni'ida' bönachi le nagachí', lë na' bigachí' dza ni'te, ate' cuntú nu benbé' le, pero na'a Dios chibulú'inë' bönachi néquiquequi quez queë' ca naca que. <sup>27</sup> Dios gú'uni quezínë' gunë' ga ilúnbé'e yugu' yöl-la' tsahui' idú que le nagachí' ni, lë na' ta'yöni bönachi izá'a. Caní rna lë

na' bigachi: "Cristo náquië' tuz len libí'ili', en náquië' le naca löza idé'ili' tsazli' lu bení' queë'."

<sup>28</sup> Runtu' libán queë' Cristo, en rusá'atu' ládxi'gaca yúgu'të bönachi, ate' ruséditu' léguequi idütë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesu-cristo. <sup>29</sup> Para gaca caní runa' dxin, en ruí'í ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

**2** Ré'ënda' inózili' ruí'ida' ládxa'a runa' le gácalen libí'ili', enca' le gácalen bönachi yödzo Laodicea, en le gácalen ca' yúgu'të nupa bití' ila'lé'eni neda'. <sup>2</sup> Runa' caní para ila'dipa ládxi'gaquië', en iláquië' tuz lu yöl-la' nadxi'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. <sup>3</sup> Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. <sup>4</sup> Lë ni rea' libí'ili', para cabí gaca nu si' ye'e libí'ili', nu gü'í didza' tséajlë'ëru' le cabí nácate'. <sup>5</sup> Sal-la' zoa' zítu' ga zóali' lu idütë le naca', lu bö' naca caza' zóalena' libí'ili', en rudzédada' tu' rilé'eda' rö'ö xibá queé'li', en nácali' tsutsu ca réajlë'ëli' Cristo.

<sup>6</sup> Que lë ni na', ca na' guzxí' lu ná'alí' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. <sup>7</sup> Ca na' nun ga ré' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guí'etica'së' Dios: "Xclenu'."

### Le cubi nácaru' tu' dzágaru'-në' Cristo

<sup>8</sup> Guli'gún chi'i cuinli' para cabí gü'í'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácagaca idütë li, ca naca le ta'lébi tun bönachi, en ca naca le tu'sedi bönachi le naca que yödzo'lió ni, en calëga le naca xtídzë'ë Cristo.

<sup>9</sup> Idütë le naca cazë' Dios zóalen Cristo sal-la' böáquië' bönachi, <sup>10</sup> ate' libí'ili' nápalí' idütë le náquië' Dios tu' dzágalí'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. <sup>11</sup> Narugu lu xipéla'gaquië' bönni' judío le rulu'í dá'gaquië' Dios, pero libí'ili', tu' dzágalí' Cristo, zóalen libí'ili' le rulu'í néquili' queë' Dios, le cabí néquini lu ní'a lu ná'agaca bönachi. Yugu' bönni' judío tu'gúë' tu guídido', pero libí'ili', nadúa idütë yöl-la' bönachi queé'li' le bënlenli' dul-la'. Caní naca queé'li' tu' benli' tsözxón Cristo cate' gútië' lë'e yaga cruz. <sup>12</sup> Cate' bidí'lalí' nisa guca ca bigáchi'l'enli'-në' Cristo tsözxón yeru ba, en bubánlenli'-në' tsözxón tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. <sup>13</sup> Zí'atëlö gúcalí' ca nupa chinátigaca tu' nözi dul-la' gubága'li', en bití' guzóalen libí'ili' le rulu'í néquili' queë' Dios, pero na'a Dios nunë' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'. <sup>14</sup> Dios busúluë' yugu' le nabága'ru' le nazúajgaca lu xibá queë', lë na' tuzegui ré'u didza'. Bugúë' lë na' nabága'ru', en budé'ë le lë'e yaga cruz ca tu le nabáguë'ë Cristo. <sup>15</sup> Cate' gútië' Cristo lë'e yaga cruz, bugúë' yöl-la'

huáca unná bë' quégaca bö' xihui' unná bë', en quégaca bö' xihui' dë lu né'eguequi yöl-la' huáca, tu' bulu'e lahui le nácagaca bö' xihui' na', en bugúë' idutë le guta' lu né'eguequi.

### Ral-la' gü'í' ládxi'ru' le naca que yehua' yubá

<sup>16</sup> Que lë ni na', bití' gü'í'ili' lataj nu uzegui libí'ili' didza' ca naca le ré'aj rágulí', o tu' cabí runli' zxón yugu' dza laní, o tu' cabí runli' zxón beo' si' ruzé, o tu' cabí runli' zxón yugu' dza lá'ayi quégaca bönachi. <sup>17</sup> Yúgu'të lë ni naca ca tu bixín que le ral-la' gaca, ate' le rulu'í yúgu'të lë ni náquië' Cristo caz. <sup>18</sup> Bití' gü'í'ili' lataj nu gun ga uní'ili' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxón yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxón cuíngaquië' ca naca le dzó'ösö ícagaquië' lu yöl-la' bönáchisö quégacaquië'. <sup>19</sup> Nu run caní bití' da' Cristo. Náquië' Xanru', en ruzóë' tsutsu idütë le naca cazë', le nácaru' ré'u. Rugahuë' le, en runë' ga naca tuz ní'a que le zeaj lu dxita lu bin, ate' rizxón idütë le naca cazë' ca ré'ënë' Dios uxönë' le.

<sup>20</sup> Libí'ili' chinátlenli'-në' Cristo para cabirö ila'nná be'e xibá que yödzo'lió libí'ili'. ¿Bizx que runli' tsca ni nácalí' que yödzo'lió, en runli' ca ta'nná bë' xibá que?

<sup>21</sup> Caní ta'nná yugu' xibá que yödzo'lió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

<sup>22</sup> Yúgu'të lë ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazí' lu né'eguequi. <sup>23</sup> Le nácate', yugu' xibá ni, téqui bönachi nápagaca yöl-la' réajni'i. Tun ga tu'lu'í cuínguequi ca bönachi yudo', en ga tu'lu'í cuínguequi nöxaj ladxí', en ga tu'saca' zígaca idütë le zeaj naca caz, pero xibá ni bití' ca' tácalen ré'u para gaca inná bé'eru' yugu' le rizé ládxi'ru' lu yöl-la' bönáchisö queëru'.

**3** Na'a, channö nubánlenli'-në' Cristo, guli'gü'í' ladxí' le nácagaca que yehua' yubá ga ní' rö'ë Cristo cui-ta lë'ë ibëla Dios, ga náquië' lo. <sup>2</sup> Guli'sá' ladxí' le taca xitsá'alö, en calëga le taca luyú ni. <sup>3</sup> Naca queé'li' tsca chinátili', ate' yöl-la' na'bán queé'li' rapa chi'ë Cristo ga ní' zoa cazë' Dios. <sup>4</sup> Cristo nabánili' libí'ili'. Cate' ulu'í lahuë' Lë', ní'irö ulu'í loli' ca' libí'ili' tsözxón len Lë' lu bení' queë'.

### Yöl-la' na'bán gula, en yöl-la' na'bán cubi

<sup>5</sup> Que lë ni na', guli'gún ga ila'niti le nacua'len libí'ili' que yödzo'lió ni:

Yugu' le ruá' dö', en le nácagaca xihui',

en yugu' le rizé ládxi'li' le ruá' dö',

en yugu' le rizé ládxi'li' le naca xihui',

en yöl-la' ruhuidí'.

Yöl-la' ruhuidí' naca lëbi ca nu reaj ladxí' budó' guió' budó' yaga, tu' cabí reaj ladxí' Dios nu ruhuidí'. <sup>6</sup> Tun bönachi yugu' le caní, ate' gunë' Dios xíguia' yúgu'të nupa bití' túngaca ca rnna xtídzë'ë. <sup>7</sup> Yugu' dul-la' caní

benlí' ca' libí'ili' cate' ní' nadó'dilí' lu né'eguequi. <sup>8</sup> Na'a, bí'tí'rö gunlí' yugu' lè ni:

Bí'tí'rö idzá'alí', en bí'tí'rö lelí'.

Bí'tí'rö nu gunlí' zí', en bí'tí'rö inné xíhú'li'.

Bí'tí'rö innalí' le ruá' dö'.

<sup>9</sup> Bití' sí' yé'eli' luzá'alí' tulí' ia'tulí' tu' chinucá'analí' le gúcalí' zí'alö, en yugu' le benlí' zí'alö. <sup>10</sup> Chinácalí' bö-nachi cubi, ate' tu tu dza ricúbili', ruhuóácaröli' ca naca Nu na' bun libí'ili', para gún'bé'ëli' Lè' idú ca náquië' Lè'.

<sup>11</sup> Tu' chidzágaru'-né' Cristo:

Bí'tí'rö nácaru' bönni' zítu', en bönni' judío.

Bí'tí'rö nácaru' bönni' narugu lu xipéla'gaquië' le naca bé' nu da' Dios, en bönni' bití' narugu lu xipéla'gaquië' lè na' naca bé'.

Bití'ró nácaru' bönni' ta'yéajni'iné', en bönni' bití' ta'yéajni'iné'.

Bí'tí'rö nácaru' bönni' nadó'ogaquië', en bönni' bití' nadó'ogaquië'.

Na'a, Cristo náquië' yúgu'tè le nácagaca lesaca', en dzáguië' yúgu'tèru'.

<sup>12</sup> Dios nadxí'iné' libí'ili', en guróë' libí'ili' para guéquili' quez queë'. Que lè ni na', ral-la':

Gú'í' ládxi'li' luzá'alí', en gácalí' dxi'í' ladxí',

en nöxaj ladxí', en cuidí' ladxí',

en cózalí' zxon ladxí'.

<sup>13</sup> Channö raca didza' bizxaj tulí' len ia'tulí', guli'guá' ilén luzá'alí' tulí' ia'tulí', en bulí'niti lo luzá'alí' tulí' ia'tulí' ca na' bené' Cristo, buniti lahuë' libí'ili'. <sup>14</sup> Le nazá-ca'tèrö ca yúgu'tè lè ni, ral-la' idxí'ili' yúgu'tè bö-nachi, tu' naca yöl-la' nadxí' le run ga nácaru' tuz, en ga nácaru' idú. <sup>15</sup> Guli'gú'í' lataj le ribequi dxi icja ládxi'do'oru' inná bé' lu icja ládxi'do'oli', lè na' runné' Dios queéru'. Que lè ni na' bulidzë' libí'ili', para gácalí' tuz lu idútè le naca cazë' Cristo. Guli'guié' Dios: "Xclenu'."

<sup>16</sup> Guli'sí' lu ná'alí' xtídzë'è Cristo le gaca queéli' tu yöl-la' tsahui' zxon. Tu' zóalen libí'ili' yöl-la' réajni'í queë' Dios, bulí'sedi, en bulí'zéjni'í luzá'alí' tulí' ia'tulí'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-né' Dios: "Xclenu'." <sup>17</sup> Yúgu'tè le runlí', le naca didza' ruí'ili' o le naca dxin runlí', guli'gún yúgu'tè lu Lè' Xanru' Jesús, en guiéli'-né' Dios Xuz: "Xclenu'", dzáguië' Cristo libí'ili'.

### Le ral-la' gunru' que luzá'aru' tu' néquiru' queë' Cristo

<sup>18</sup> Libí'ili', nigula nutsaga ná'aleni' bönni' queéli', guli'gún ca rna xtídzá'gaquië' bönni' que queéli' ca ral-la' gunlí', tu' néquili' queë' Xanru'.

<sup>19</sup> Libí'ili', bönni' nutsaga ná'aleni' nigula queéli', guli'dxí'í nigula que queéli', en bití' uzéli' bach légacanu.

<sup>20</sup> Libí'ili', bí'i ra'bán, guli'gún ca rna yúgu'tè xtídzá'gaquië' xuz xiná'alí'. Lè ni raza ládxe'è Xanru'.

<sup>21</sup> Libí'ili', núlöli' nácalí' xúzgaca bí'ido',

bití' tódi bé' usína'li' zxí'inilí',

para cabí huóaj ládxi'gacabi'.

<sup>22</sup> Libí'ili', núlöli' nácalí' bönni' nadó'ogaquië', guli'gún ca rna yúgu'tè xtídzá'gaquië' xanlí' luyú ni.

Calégasö gunlí' caní cate' tu'yúé' libí'ili' ca na' tun nupa té'ëni ilún ga ila'yaza ládxi'gaca bö-nachi,

pero idú ládxi'li' guli'gún xichíngaquië'

ca ral-la' ilún nupa tadxi Dios.

<sup>23</sup> Ca naca yúgu'tè le runlí', guli'gún idú ládxi'li',

gaca ca runlí' xichiné' Xanru',

en calégasö ca runlí' xichíngaca bö-nachi.

<sup>24</sup> Chinóz quezilí' ubi'ë Xanru' queéli',

gunné' queéli' le chinupé'ë Dios quegaca nupa náca-gaca zxí'ini cazë'.

Caní gaca, tu' runlí' xichiné' Xanru' Jesucristo.

<sup>25</sup> Nu ruá' dö', ubi'ë Xanru' que nu na' ca naca dö' ruá' nu na', tu' cabí utsé'ë Dios ca ral-la' ubi'ë que queé'gaca bö-nachi.

**4** Libí'ili', núlöli' nácalí' xángaca bö-nachi, guli'gún le naca tsahui', en le naca dxi'a ca rugunlí' dxin yugu' bönni' huen dxin queéli'.

Guli'tsöjné zoa ca' Xanlí' yehua' yubá.

<sup>2</sup> Libí'ili', yúgu'tèli',

bulí'lídzatica'së' Dios.

Bulí'subán ládxi'li' ulídzali'-né' Dios,

en guli'guié': "Xclenu'."

<sup>3</sup> La' ná'asö cate' rulídzali'-né' Dios, guli'nabi-né' ca' gácalenë' netu', en gunné' netu' lataj quíxjö'ötu' xtídzë'è Xanru', para gaca uzéajni'itu' bö-nachi le bi-gachí' ca naca queë' Cristo. Tu' runa' caní nadzuna' lidxi guié ni. <sup>4</sup> Guli'nabi-né' ca' Dios, gunné' neda' lataj usalaj lá'ana' le bigachí' na' ca ral-la' guna'.

<sup>5</sup> Lu yöl-la' réajni'í queéli', guli'gún le runlí' lógaca nupa bití' ta'yéajlë' Cristo. Guli'gunda' dxin yugu' dza uzá' ládxe'è Dios queéli', gunlí' xichiné'. <sup>6</sup> Ral-la' gú'í'li' didza' ca raza ládxe'è Dios, en ca ral-la' gun nupa néquiguequi queë'. Ral-la' inózilí' ca' naca ral-la' ubí'ili' didza', bi guiéli' tu tu bö-nachi.

### Yugu' bö-nachi queë' Cristo tu'gapa Dios luzé'eguequi

<sup>7</sup> Tíquico quíxjö'i'iné' libí'ili' le raca quia' ni. Náquië' bóchí'ru' nadxí'iru'-né'. Náquië' ca' huen dxin idú queë' Xanru', en rúnlenë' neda' tsözxón dxin queë' Xanru'.

<sup>8</sup> Que lè ni na' risól-la'a-né' ga zóalí', para uzéajni'iné' libí'ili' le raca quia', en utipë' ládxi'li'. <sup>9</sup> Onésimo, bóchí'ru' na' nabábalenë' libí'ili' sa'yéajlenë' lè' tsözxón. Náquië' ca' bóchí'ru' nadxí'iru'-né', en réajlë'è Xanru'. Chopë' ni ulu'siyönnë' libí'ili' yúgu'tè le raca ni.

<sup>10</sup> Aristarco, bönni' na' yú'ulenë' neda' tsözxón lidxi guié rugapë' Dios libí'ili'. Bí'i Marcos, bí'i bönni' queénu nigula zanë' Bernabé rugápabi' Dios ca' libí'ili'.

Chigudxa' libí'ili' bi gunlí' queébi' bí'i Marcos na'. Channö huídabi' ga zóalí', guli'gún-bí' bal. <sup>11</sup> Bönni' ni lè' Jesús, en zoa ia'tú lè' Justo lësca' rugapë' Dios libí'ili'.

Nacuá' zían bö-nachi judío ta'yéajlë' Cristo, pero tsón-nasë' ni ladaj bö-nachi judío tunë' dxin que le rinná bé'è Dios tsözxón len neda', en tu'huí' zxöndë'è neda'.

<sup>12</sup> Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxe'è rulídzë' Dios, en ráta'yutica'së' lahuë' gácalenë' libí'ili' para gácalí' idú ladxí', en sóalí' ca' sina' gunlí' yúgu'tè le

ré'ëni quézinë' Dios. <sup>13</sup> Runa' ba nalí queë' Epafras na', ruí'ida' ládxë'ë libí'ili' enca' nupa nacué' yödzö Laodicea, en nupa nacué' yödzö Hierápolis. <sup>14</sup> Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

<sup>15</sup> Gulí'gapa Dios bóchi'ru' nacué' Laodicea, enca' Ninfas, en bönachi queë' Cristo nacué' lídxinu Ninfas na'.

<sup>16</sup> Cate' údxi ulábalí' guichi ni ga ní zóalí', gulí'gún ga

ulu'laba le bönachi queë' Cristo nacué' Laodicea. Buli'laba ca' libí'ili' guichi na' ila'söl-la' bönachi Laodicea na' queé'li'. <sup>17</sup> Gulí'guié' Arquipo: "Bë' ládxu'u gunu' dxin na' budödë' Xanru' lu no'ó."

<sup>18</sup> Neda', Pablo, ruzúaj caza' lu guichi dídzado' ni, rn-  
nía': Rugapa' Dios libí'ili'. Gulí'tsöjné ca raca quia' nadzuna' lidxi gué' ni. Rinábida'-në' Dios uzá' ládxë'ë queé'li' le naca dxi'a. ¡Ca' gaca!



# 1 Tesalonicenses

## Pablo rugapë' Dios bönachi queë' Cristo nacua' Tesalónica

**1** Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queé'li', en gunë' ga soa dxi icja ládxí'do'oli'.

### Yugu' le taca bë' ta'yéajlë' bönachi Tesalónica Dios

<sup>2</sup> Rética'stu'-në' Dios: "Xclenu'" cate' röjnetu' ca naca queé'li' yúgu'tëli'. Röjnética'stu' libí'ili', bi rinábitu'-në' Dios ní'a queé'li' cate' rulidztu'-në'. <sup>3</sup> Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácati-ca'sili' tsutsu tu' runli' löza Xanru' Jesucristo. <sup>4</sup> Böchi' luzá'atu', Dios nadxí'inë' libí'ili', ate' nöztu' guró cazë' Lë' libí'ili'. <sup>5</sup> Caní naca, tu' bidxín queé'li' didza' dxí'a runtu' libán que, calëga len dídza'sö, pero lësca' len yöl-la' huáca bidxín queé'li', ate' Dios Bö' Lá'ayi benë' tsutsu le, ate' idú ládxí'ili' benli' löza le. Nöz quézilil' ca gúcatu' ga zóali' tu' nadxí'itu' libí'ili'.

<sup>6</sup> Libí'ili' butsa' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí' guzxáca'da'ali', budzéjalil' tu' zóalenë' Dios Bö' Lá'ayi libí'ili'. <sup>7</sup> Caní naca, chinácalil' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. <sup>8</sup> Caní naca, tu' guzé xtídzë'ë Xanru' ní'a queé'li'. Calëgasö luyú Macedonia, en luyú Acaya, pero lësca' yúgu'të lataj guzé didza' ca réajlë'ëli' Dios. Caní naca, bitil' bi run bayudxi innatu', <sup>9</sup> tu' ta'guixjö' la' léguquisö bönachi ni' queé'tu' ca benli' netu' bal, en ca na' butsa' cuinli'. Bucá'analil' yugu' budó' guió' budó' yaga, en böácalil' queë' Dios para gunli' xichinë' Dios ban, Nu naca idú Dios. <sup>10</sup> Na'a, ribózalil' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguië' Dios queë'ru' dza sí' za'.

### Xichinë' Dios benë' Pablo yödzo Tesalónica

**2** Böchi' luzá'atu', nöz quézilil' bitil' guca nítisö dxin queë' Dios bentu' cate' ni' bidxintu' ga zóali'. <sup>2</sup> Nózilil' ca guca queé'tu' lu yödzo Filipos, ca na' gudí' guzxáca'tu', ate' guluá' dö' bönachi ni' queé'tu'. Ní'irö cate' bidxintu' ga zóali' gúcatu' rugu ladxil' tu' guzóalenë' Dios queë'ru' netu', ate' bentu' libán lolil' que didza' dxí'a le budödë' Dios lu na'tu'. Caní bentu' sal-la'

gula'dá'baga'da' bönachi ládzalil' netu'. <sup>3</sup> Cate' ni' guchízatu' icja nágalil' xtídzë'ë Dios, bé'ëtu' didza', calëga tu' nazí'i ye'e netu', en calëga tu' bi guzé ládxil'tu' le dë queé'li', en bitil' guzxí' ye'etu' libí'ili'. <sup>4</sup> Tu' nuzxöni ládxë'ë Dios netu', budödë' lu na'tu' guntu' libán que didza' dxí'a queë', ate' canísö ru'itu' didza'. <sup>5</sup> Nöz quézilil' catu caz bé'lentu' libí'ili' didza' le gun zxön libí'ili', en bitil' gulëaj tsahuil' cuntu' ca run nu bi rizé ladxil' le dë queé'li'. Nöz quézinë' Dios naca caní. <sup>6</sup> Bitil' gudíljatu' yöl-la' ba le naca que yödzo'lió ni, lë na' cú'ulil' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasól-lë'ë Cristo <sup>7</sup> guzóalentu' libí'ili' dxí'i ládxí'do', en bentu' ca runnu xiná'agacabil' bi'i hué'enido', run chí'inu léguacabil' dxí'i ládxí'do'. <sup>8</sup> Caní guca, bidxí'ide'etu' libí'ili', ga bidxintë gú'unitu' udóditu' lu ná'ali', calëgasö didza' dxí'a queë' Dios, pero lá'tu'biquil' udódi caztu' yöl-la' na'bán queé'tu', tu' nadxí'ide'etu' libí'ili'. <sup>9</sup> Röjnelil', böchi' luzá'atu', ca na' guca cate' ni' bentu' libán lolil' que didza' dxí'a queë' Dios, ca béntica'stu' dxin zí'i, ate' rëla, en të dza bentu' dxin para cabí usaca' zí'itu' nitulil' libí'ili'.

<sup>10</sup> Libí'ili' na' réajlë'ëli' Cristo, huáca gunli' ba nalil', ate' nózine' Dios ca na' gudá'alentu' libí'ili' idú ca raza ládxë'ë Dios, en idú dxí'ado', en ca na' cuntu nu gaca bi inné que. <sup>11</sup> Lësca' caní nózilil' ca bentu' ca runë' tu bönnil' quéguacabil' zxí'inë', guchízatu' icja nágalil', en butípatu' ládxí'ili' tu tulil'. <sup>12</sup> Busá'atu' ládxí'ili' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'ulil' ga na' rinná bë'ë Lë' lu benil' queë'.

<sup>13</sup> Que lë ni na' ca', rética'stu'-në' Dios: "Xclenu'." Canil' runtu' tu' guzxí' lu ná'ali' xtídzë'ë Dios le biyónilil' bé'ëtu' didza', calëga ca xtídzë'ë bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxí'do'olil' libí'ili', réajlë'ëli' Cristo. <sup>14</sup> Böchi' luzá'atu', raca queé'li' ca raca quégaca bönachi queë' Dios, nupa néquiquequi queë' Jesucristo luyú Judea. Caní naca tu' chigudí' guzxáca'da'ali' lu ná'agaca bönachi uládz queé'li', lébisö ca na' gula'gu'í gula'záquië' légaquië' lu ná'agaca bönachi uládz quégaquië', nupa ni' ná'agaca bönnil' judío. <sup>15</sup> Yugu' bönnil' judío na' gulútië' Xanru' Jesús, en gulútië' ca' yugu' bönnil' gulu'ë didza' uláz queë' Dios. Gula'bía ládxí'gaquië', en bulu'láguë' ca' netu'. Bitil' tunë' le raza ládxë'ë Dios, tu' cabí ta'lé'enë' dxí'a yúgu'të bönachi izá'a. <sup>16</sup> Tu'záguë'ë ca' xinóztu', para cabí guntu' libán lógaca bönachi izá'a na' bitil' nabábagaca légaquië', tu' ru'ilentu' léguéqui didza' para ulu'lágaca. Caní raca, tu'zántica'së' dul-la' nabábagacaquië', en chinabá'agaquië' xíguia' le run ga ichúguië' Dios quégaquië'.

## Pablo ré'ënë' tsöjyüë' böchi'ru' nacu'ë Tesalónica

<sup>17</sup> Na'a, böchi' luzá'atu', ruhu'ínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ru'í ládxi'rötu' ulé'etu' loli', tu' rizëda' ládxi'tu' guntu' caní. <sup>18</sup> Que lë ni na' ca' gú'unitu' guídatu' ga zóalí', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihuí, buzaga' xinöztu'. <sup>19</sup> ¿Bizix caz naca le run ga runtu' löza, o le run ga rudzéjatu', o le ral-la' idéli'tu', le uzí'tu' xibé lahuë' Xanru' Jesucristo cate' huödë'? ¿Naru' cabí libí'i cázalí' na'? <sup>20</sup> Libí'i cázalí' nácalí' le run ga nácatu' bica' ba, en le run ga rudzé-jatu'.

**3** Que lë ni na', cate' bití'rö guca guá' ilentu', ben xtídza'tu' ugá'anatu' chópatu' lu yödzo Atenas, <sup>2</sup> ate' gusól-la'tu'-bí' bí'i böchi'ru', Timoteo ga zóalí'. Ná-cabi' bí'i huen dxin queë' Dios, en rúnlenbí' neda' tsözxón libán que didza' dxí'a queë' Cristo. Gusól-la'tu'-bí' ga zóalí' para cuéquibi' libí'ili' tsutsu, en ichízabí' icja nágalí' ca ral-la' tséajlë'ëli' Cristo, <sup>3</sup> para cabí soa nu gaca chopa ladxi' ní'a que le tu'saca' zí' bönachi ni netu'. Nöz quézilí' zóaru' yödzöliö ni para guá' ilenru' le caní. <sup>4</sup> Lësca' cate' ní' guzóalentu' libí'ili', busiyöntu' libí'ili' ca chizóa gaca le ulu'saca' zí' rë'u, le gaca ca na' chiguca queëtu', ate' nöz quézilí' lë na'. <sup>5</sup> Que lë ni na', cate' bití'rö guca guá' ilena', gusól-la'a-bí' bí'i Timoteo ga zóalí', para ududí'xjöi'ibí' neda' ca naca queéli' ca réajlë'ëli'-në' Cristo, en channö cabí gulú'u tu' xihuí libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóalí'.

<sup>6</sup> Cate' buzá'abi' bí'i Timoteo ga zóalí', en budxinbí' ga zóatu', busiyönbí' netu' le naca dxí'a. Bë'ëbi' didza' ca na' réajlë'ëli' Cristo, en ca na' nadxí'igacalí'-në' yugu' böchi' luzá'aru', en ca na', lu yöl-la' dxí'i ladxi' queéli' röjnética'silí' netu', enca' ca na' raca ládxi'li' ulé'elí' netu', ca na' netu' raca ládxi'tu' ca' ulé'etu' libí'ili'. <sup>7</sup> Que lë ni na', böchi' luzá'atu', cate' ní' gudí'i guzáca'tu' yúgu'të lë ni, en zían le guca queëtu', bidxín didza' queëtu' le buí'i zxön netu' cate' biyónitu' ca réajlë'ëli'-në' Cristo. <sup>8</sup> Na'a, nuhuöáca ládxi'tu' tu' riyónitu' ró'öli' tsutsu ca réajlë'ëli'-në' Xanru'. <sup>9</sup> ¿Nacxi caz gaca guíëtu'-në' Dios: "Xclenu'" ca ral-la' guntu' ní'a que yúgu'të le run ga rudzeja ládxi'tu' lahuë' Dios queëru' ní'a que le nácalí' libí'ili'? <sup>10</sup> Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queéli' ca naca le réajlë'ëli'-në' Cristo.

<sup>11</sup> Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóalí'. <sup>12</sup> Lësca' rinábitu'-në' Xanru' gunë' ga gala, en gaca idú ca nadxí'ili' luzá'alí' tulí' ia'tulí', en ca nadxí'ili' yúgu'të bönachi, ca na' netu' nadxí'itu' ca' libí'ili'. <sup>13</sup> Rinábitu'-në' gunë' ga gaca tsutsu, en idú dxí'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágaga-ca bönachi lá'ayi queë' Lë'.

## Le runru' le raza ládxë'ë Dios

**4** Ia'stú, böchi' luzá'atu', ní'a queë' Xanru' Jesús rá-ta'yutu' loli', en richízatu' icja nágalí' para gunlí' ca naca le chinazédalí' lu na'tu' ca ral-la' gunlí' le raza ládxë'ë Dios. Ca na' chirunlí', ca' ral-la' gúntica'silí'.

<sup>2</sup> Chinöz quézilí' yugu' le gunná bé'etu' libí'ili' uláz queë' Xanru' Jesús. <sup>3</sup> Le ré'ënë' Dios naca gácalí' idú dxí'a, en bití'rö gunlí' le cabí naca tsahuí, <sup>4</sup> en inözilí' tu tulí' nacxi ral-la' sóalenlí'-nu nigula que queéli' idú ca sa'yéaj le naca lá'ayi, en gunlí' légacanu bal. <sup>5</sup> Bití' ral-la' sóalenlí'-nu nigula queéli' lu yöl-la' rizé ladxi' le ruá' dö', ca na' tun bönachi bití' nabábagaca Dios, en bití' nún-bë'gaca Dios. <sup>6</sup> Ca nácgaca lë ni, cuntu nu ral-la' tödi bë', en cabí sí' ye'e böchi' luzé'e bagáchi'sö, tu' ichúguië' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. <sup>7</sup> Dios bulidzë' rë'u, calëga para gunru' le ruá' dö', pero para gácaru' idú dxí'a. <sup>8</sup> Caní naca, nu ruzóa tsólá'alö lë ni, calëga bönáchisö ruzóa tsólá'alö, pero Dios caz ruzóa tsólá'alö, tu' gusól-lë'ë Lë cazë' Dios Bö' Lá'ayi queëru', Nu ru'í caní didza'.

<sup>9</sup> Bití' run bayudxi uzúaja' queéli' lu guichi ca ral-la' idxí'igacalí'-në' böchi' luzá'alí', tu' chinazédalí' la' libí'isilí' lu në'ë Dios idxí'ili' luzá'alí' tulí' ia'tulí'. <sup>10</sup> Le nácatë nadxí'igacalí'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'alí'. <sup>11</sup> Ráta'yutu' loli' ca', gü'í ládxi'li' cózalí' dxí'ado', en gunlí' yugu' le dë lu ná'silí', en gunlí' dxin len na'a cuinlí' ca na' chigunná bé'etu' libí'ili'. <sup>12</sup> Gunná bé'etu' libí'ili' caní para gaca gunlí' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

## Ca gaca cate' huödë' Xanru' Jesucristo

<sup>13</sup> Lësca', böchi' luzá'atu', ré'ënitú inözilí' ca raca qué-gaca nupa chinátigaca, para cabí hu'ínili' ca tun ia'zí-ca'rö bönachi bití' zoa le tun löza. <sup>14</sup> Channö réajlë'ëru' gútië' Jesús, en bubané', lësca' caní ral-la' uzxöni ládxi'ru'-në' Dios gunë' ga huódalengaca tsözxón Jesús nupa ní' chigulati, en gula'yéajlë' Lë'.

<sup>15</sup> Que lë ni na' rigu'í'xjöi'itu' libí'ili' xtídzë'ë Xanru' le rna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." <sup>16</sup> Caní gaca, tu' huötjë' Lë cazë' Xanru', en irúajë' yehua' yubá, ate' yön chí'ë, len yöl-la' unná bë' ulidzë', ate' yön ca' chí'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. <sup>17</sup> Ní'rö rë'u ni zóaru' nabanru', en nagá'anaru' luyú ni, uchisë' rë'u tsözxón len léguequi lu böaj lúxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'. <sup>18</sup> Que lë ni na', guli'huí' zxön luzá'alí' tulí' ia'tulí' ca nácgaca didza' ni.

**5** Na'a, ca naca dza na', o rëla na' cate' ilaca lë ni, bití' run bayudxi uzúaja' queéli' lu guichi, böchi' luzá'atu'. <sup>2</sup> Libí'ili' chinöz quézilí' dxí'a ca gaca dza cate'

huödë' Xanru'. Idxinë' tsárido'os ca ridxinë' gubán chí'i dzó'ölö. <sup>3</sup> Cate' ilá'nná bönachi: "Raca dxí'a queéru', en bití' bi gaca queéru'", ní'irö la' idxintë le usuniti léguequi, lë na' idxín quéguequi ca na' ridxín le rigu'í rizáca'nu nigula na' chizóa sóabi' bí'ido' queénu, ate' cuntunu nutsa' ladaj bönachi yödzülió ni nu ulá cate' gaca lë na' gaca dza na'. <sup>4</sup> Na'a, böchi' luzá'atu', bití' zóali' chulla niti, en que lë ni na' bití' idxín dza ní' queéli' bagáchi'sö ca ridxinë' bönni' gubán. <sup>5</sup> Yúgu'tëli' nácali' bönachi que bení', en que lahui' dza. Bití' nácaru' bönachi que chí'i dzó'ölö, en calëga que le naca chul-la. <sup>6</sup> Que lë ni na', bití' ral-la' tódi yëla loru' ca raca quégaca nupa bití' nabábagaca rë'u, pero ral-la' usubán ládx-i'ru', en cózaru' ba'a ládxí'do'. <sup>7</sup> Nupa tasi, chí'i dzó'ölö tasi, en nupa ta'zudxi, chí'i dzó'ölö ca' ta'zudxi. <sup>8</sup> Na'a, rë'u ni, nácaru' que lahui' dza, en ral-la' cózaru' ba'a ládxí'do', tu' chinácuru' zxaru' le run chí'i rë'u, le naca yöl-la' réajlë' queéru' Dios, en yöl-la' nadxí'i, ate' le runru' löza uláru' naca ca tu lu'u guíë le run chí'i ícjaru'. <sup>9</sup> Caní naca, tu' nuzóë' Dios rë'u ni, calëga para idxinru' ga ichúguie' queéru', pero para uláru' tu' ruzxöni ládx-i'ru'-në' Xanru' Jesucristo, <sup>10</sup> tu' gútië' Jesús uláz queéru' para sóaru' ibanru' tsözxón len Lë' cate' huödë', sal-la' chinátiru' o sóaru' ibanru' dza ní'. <sup>11</sup> Que lë ni na' ral-la' utípalí' ládxí'li' tulí' ia'tulí', en gunlí' tsutsu tulí' ia'tulí' ca na' chirunlí'.

**Pablo richízië' icja nágagaquië' böchi' luzé'ë ta'yéajlë'ë Cristo**

<sup>12</sup> Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxí'li'. <sup>13</sup> Ráta'yutu' loli' ca', gunlí' légaquië' bal lu yöl-la' nadxí'i queéli', tu' tunë' dxin na'. Gulí'cöza dxí'ado' tulí' len ia'tulí'.

<sup>14</sup> Lësca' caní richízatu' icja nágali', böchi' luzá'atu', para usá'ali' ládxí'gaca nupa bití' túngaca dxin, en utí-

pali' ládxí'gaca nupa tu'huóaj ládxí'guequi, en gácalenlí' nupa bití' naca tsutsu ca ta'yéajlë' Cristo, en gácalí' nóxaj ladxí' lógaca yúgu'të bönachi.

<sup>15</sup> Gulí'gún chí'i cuinlí' para cabí uzí' lëbi luzá'ali', en cabí guá'ali' dö' que nu ruá' dö' queéli', pero gulí'güí' ládxí'li' gúntica'sili' le naca dxí'a que luzá'ali' tulí' ia'tulí', en quégaca yúgu'të bönachi.

<sup>16</sup> Bulí'dzëjatica'sö,

<sup>17</sup> en bulí'lídzatica'së' Dios,

<sup>18</sup> en gulí'guíë' Lë': "Xclenu'."

Caní ral-la' gunlí' ní'a que yúgu'të le raca queéli', tu' nácagaca lë ni le ré'ënë' Dios gunlí' tu' nácali' queë' Jesucristo.

<sup>19</sup> Bití' uzóa dxili' le rulídzatica'së' Dios Bö' Lá'ayi libí'ili'.

<sup>20</sup> Bití' uzóali' tsölálalö xtídzë'ë bönni' ru'ë didza' uláz queë' Dios.

<sup>21</sup> Gulí'sí' bë' yúgu'të, en gulí'sí' lu ná'ali' le naca dxí'a.

<sup>22</sup> Bití' bi gútsa'li' le ruá' dö'.

<sup>23</sup> Lë cazë' Dios, Nu run ga zoa dxi icja ládxí'do'oru', gunë' ga gácalí' idú dxí'a, en gun chí'ë bö' naca cázali', en icja ládxí'do'oli', en idütë le nácali', ate' cuntunu gaca bi innë' queéli' dza ní' huödë' Xanru' Jesucristo.

<sup>24</sup> Runë' Dios ca rnnë', Bönni' na' bulídzë' libí'ili'. Lë cazë' gunë' yugu' lë ni.

**Pablo rigu'ë yugu' böchi' luzé'ë lu në'ë Dios**

<sup>25</sup> Böchi' luzá'atu', bulí'lidzë' Dios, en inábili'-në' gácalenë' netu'.

<sup>26</sup> Bulí'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

<sup>27</sup> Ní'a queë' Xanru' Dios ruchí'a libí'ili' ulábali' guichi ni lógaca yúgu'të böchi' luzá'aru' nabábagakië' Cristo.

<sup>28</sup> Rinábida'-në' Xanru' Jesucristo uzá' ládxë'ë queéli' le nácagaca dxí'a queë'. ¡Ca' gaca!

## 2 Tesalonicenses

Pablo rugapë' Dios bönachi queë' Cristo nacua'  
Tesalónica

**1** Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'.  
<sup>2</sup> Rinábitu' Xúziru' Dios, en Xanru' Jesucristo, uzá' ládxë'ë queé'li', en gunë' ga soa dxi icja ládxí'do'oli'.

Dios ichúguië' quégaca bönachi dul-la' ila'nítigaca cate'  
huödë' Cristo

<sup>3</sup> Ral-la' guítica'stu'-në' Dios: "Xclenu'" ca naca queé'li', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tulí' ia'tulí' zeaj rácarö idú. <sup>4</sup> Que lë ni na', len yöl-la' rudzeja riguixjö'ötu' ca naca queé'li' lógaca bönachi queë' Dios ni, tu' ribózali' zxön ladxí', en réajlë'ëli' Dios sal-la' ta'bíada' ládxí'gaca bönachi libí'ili', en riguí' rizáca'da'ali', pero ruá' rilenlí' yúgu'të. <sup>5</sup> Yugu' lë ni taca bë' naca tsahui' ca ruchí'a rusöröë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni rinná bë'ë Lë'.

<sup>6</sup> Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí' ila'zaca' nupa na'.  
<sup>7</sup> Ia'stú, libí'ili' riguí' rizáca'li' na'a, ate' ubi'ë Dios queé'li', gunë' ga uzí' ládxí'li' tsözxón len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxón, en ulu'lu'ë lahui yöl-la' huáca zxön queë'. <sup>8</sup> Ilá' lahuë' Cristo dza ni' ca tu guí' zxön cate' ni' gunë' zi' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo. <sup>9</sup> Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. <sup>10</sup> Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queé'li' tu' guyéajlë'ëli' le bentu' ba nalí que lolí' ca naca queë' Jesús.

<sup>11</sup> Que lë ni na' ca', rulídzatica'stu'-në' Dios queé'ru', en rinábitu'-në' gácalenë' libí'ili', en gunë' ga gácali' lesaca' idé'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ru'í' ládxí'li' gunlí' le naca dxi'a, en yúgu'të dxin runlí' lu yöl-la' réajlë' queé'li' Lë'. Len yöl-la' huáca queë' Dios huáca gunlí' lë ni. <sup>12</sup> Caní gaca, gaca yöl-la' ba que Lë' Xanru' Jesucristo ni'a que le runlí', ate' gácali' libí'ili' bica' ba ni'a

que le gunë' Lë', gaca ca naca le buzá' ládxë'ë queé'li' Dios queé'ru', enca' Xanru' Jesucristo.

Ulu'í' lahuë' Bönni' Xihui'

**2** Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' lolí', böchi' luzá'atu', <sup>2</sup> para cabí gü'í'ili' lataj nu gun chixi libí'ili' ca nácagaca le guzxí' lu ná'ali'. Bití' cuéqui böniga icja ládxí'do'oli' ni'a que bi ta'nnë' bönni' ta'zí' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'í' bönachi, o ni'a que bi nazúaj tu lu guichi ta'nnë' netu' gusól-la'tu', le rnna: "Chigudödi dza huödë' Xanru'." <sup>3</sup> Bití' ca' gü'í'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. <sup>4</sup> Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

<sup>5</sup> ¿Naru' cabí röjnelí' busiyönda' libí'ili' yugu' lë ni cate' ni' zóalena' libí'ili'? <sup>6</sup> Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. <sup>7</sup> Chirún dxin le nagachí' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. <sup>8</sup> Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsëpi yösa bení' que dza huödë'. <sup>9</sup> Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. <sup>10</sup> Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu né'eguequi idú ládxí'guequi le naca idútë li, para ulu'láguequi. <sup>11</sup> Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. <sup>12</sup> Caní gaca para ila'baga' xíguia' yúgu'të nupa bití' gula'yéajlë' le naca idútë li, pero gula'yaza ládxí'gaca le cabí naca tsahui'.

Nupa guró cazë' Dios para ulu'láguca

<sup>13</sup> Böchi' luzá'atu', libí'ili' na' nadxí'inë' Xanru' libí'ili', ral-la' guítica'stu'-në' Dios: "Xclenu'" ni'a que le naca queé'li', tu' chiguró cazë' Dios libí'ili' dza ni'te para ulá'li' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. <sup>14</sup> Para gaca caní queé'li',

Dios caz bulidzë' libí'ili', para idéli'li' gunlí' tsözxón Xanru' Jesucristo lu bení' queé'. Caní gaca ní'a que didza' dxi'a runtu' libán que.

<sup>15</sup> Que lë ni na', böchí' luzá'atu', guli'sóa tsutsu, en guli'gún chí'i didza' na' nazédali', le bé'lentu' libí'ili', en buzúajtu' queé'li' lu guichi. <sup>16</sup> Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahuí' runlí', en yúgu'të didza' dxi'a ruí'ili'. Lë cazë' nadxi'inë' rë'u, en bennë' queéru' le ruhuí' zxóntica'sö rë'u, en le naca dxi'a runru' löza, yugu' lë na' buzá' ládxi'ë Dios queéru'.

### Le ral-la' inábiru'-në' Dios

**3** Ia'stú, böchí' luzá'atu', bulí'lidzë' Dios, en inábili'-në' gácalenë' netu', runtu' libán ni, para së xtídzë' Xanru', ate' ilún le bal bönachi, para gaca ni ca na' guca ga ní' zóali' libí'ili'. <sup>2</sup> Inábili'-në' ca' para ulatu' lu ná'agaquië' bönni' xihuí' tuá' dö', tu' cabí ta'yéajlë' yúgu'të bönachi Dios. <sup>3</sup> Na'a, tu' runë' Xanru' ca rnnë', gunë' ga gácali' tsutsu, en gun chí'ë libí'ili', para cabí idzunlí' lu na' tu' xihuí'. <sup>4</sup> Ruzxöni ládxi'tu'-në' Xanru' ca naca queé'li', gunlí' yugu' lë ni si' gunábitu' libí'ili', ca na' chirunlí'. <sup>5</sup> Rinábitu'-në' Xanru' usé'ë ládxi'li' para idxi'ili'-në' Dios, en cózali' zxön ladxí' ca na' benë' Cristo.

### Ca run bayudxi gunru' dxin

<sup>6</sup> Ní'a que Lë' Xanru' Jesucristo ruchí'atu' libí'ili', böchí' luzá'atu', icuítali' ga nacu'ë böchí' luzá'aru' ta'dasë' ca', en bití' tunë' ca naca xibá buséditu' libí'ili'. <sup>7</sup> Nöz quézilí' ral-la' gunlí' ca runtu' netu'. Bití' gudásitu' ca' netu' ga

ní' zóali'. <sup>8</sup> Bití' gudágusötu' le bénnali' queétu', pero lu yöl-la' ruúbi ruguí'i, en lu yöl-la' ricuidí' bentu' dxin rëla, en te dza para cabí usaca' zí'itu' nitulí' libí'ili'. <sup>9</sup> Caní bentu' para gácatu' loli' ca tu le ruluí'i libí'ili' ca ral-la' gunlí', sal-la' dë lu na'tu' inábatu' bi gunlí' queétu'.

<sup>10</sup> Lësca' cate' ní' guzóalentu' libí'ili', buchí'atu' libí'ili' caní, le rnna: "Channö cabí ré'enë' nu bönni' gunë' dxin, bití' gü'ili' le gahuë'." <sup>11</sup> Canísö rnnatu' tu' riyónitu' nútsa'gaquië' ládjali' yugu' bönni' ta'dasë' ca', bití' bi dxin tunë', pero ta'dasë' ca' bi tun bi ta'nnë'. <sup>12</sup> Ní'a queé' Xanru' Jesucristo ruchí'atu' yugu' bönni' tunë' caní, en richízatu' icja ná'agaquië' ilunë' dxin lu yöl-la' liböza dxí'ado', para gaca ilahuë' le nequi quégacasë'.

<sup>13</sup> Na'a, böchí' luzá'atu', bití' soa dxili', gúntica'silí' le naca dxi'a. <sup>14</sup> Channö núti'tës bönni' bití' gunë' ca rnna xtídzatu', le ruzúajtu' lu guichi ni, guli'gún ga gaca bë'ë bönni' na', en bití' gunlí' tsözxón lë' para utuí'inë'. <sup>15</sup> Bití' ral-la' ilé'eli'-në' ca tu bönni' bití' rilé'enë' libí'ili' dxi'a, pero guli'sá' ládxi'ë ca böchí' cázali'.

### Pablo rigü'ë lu në'ë Dios yugu' böchí'ru' nacu'ë Tesalónica

<sup>16</sup> Rinábitu'-në' Xanru' gúntica'së' ga cuía dxi icja ládxi' do'oli' ca naca yúgu'të le runlí', en sóalenë' yúgu'tëli'. Lë cazë' runë' ga rö'ö dxi icja ládxi' do'oru'.

<sup>17</sup> Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risól-la'a. Canísö ruzúaja' lu guichi. <sup>18</sup> Le ruzá' ládxi'ë Xanru' Jesucristo queéru' gaca queé'li' yúgu'tëli'! ¡Ca' gaca!

# 1 Timoteo

## Pablo rugapë' Dios bí'i Timoteo

**1** Neda', Pablo, naca' gubáz nasól-l'è'è Jesucristo. Caní naca' tu' caní gunná b'è'è Dios, Nu rusólá r'è'u, enca' tu' gunná b'è'è caní Xanru' Jesucristo, Nu na' runru' löza. <sup>2</sup> Rugapa' Dios lí', bócha'ado' Timoteo. Nacu' ca zxi'ini caza' tu' benru' tsözxón xichinè' Dios. Rinábida-nè' Xúziru' Dios, enca' Xanru' Jesucristo uzá' ládxè'è quiu', en huéchi' ládxè'è lí', en gunè' ga soa dxi icja ládxí'do'o.

## Pablo rusé'è ládxí'bi' Timoteo ca naca xibá cabí naca idú

<sup>3</sup> Rátayua' lo' na'a gunu' ca na' gúta'yua' lo' cate' ní' guyija' luyú Macedonia, para ugá'anú' lu yödzö Éfeso, en inná bé'enu' bal-lè' bönni' ní' cabí ulu'sédinè' tu xibá yúbölö, <sup>4</sup> en cabí ilunè' zxon yugu' didza' ridasö, en lá-gaca zióntèrö cö' xuz xtó'ogaca bönachi, yugu' le tun ga tu'í ládxí'gaca bönachi le nácagaca nítisö. Yugu' le caní bití' tun tsutsu bönachi queè' Dios ca naca le ta'yéajlè' Lè'.

<sup>5</sup> Le ré'eni gun læ ni rea' lí', naca para ila'dxi'í bönachi luzé'eguequi, naca idú ládxí'gaca, en gaca dxi'a le ta'zá' ládxí'gaca, en gaca idú le ta'yéajlè' Dios. <sup>6</sup> Ca nácagaca læ ni, bití' bulu'ruajè' bal-lè' bönni' dxi'a, pero gula'guélè'è tu nöza yúbölö, en tunè' bal yugu' le bití' nácatè. <sup>7</sup> Té'ennè' ulu'sédinè' bönachi ca naca le rinná b'è' xibá queè' Dios, sal-la' bití' ta'yéajni'inè' læ na' tu'sédinè', en bití' ta'yéajni'inè' le ta'nné' nácatè.

<sup>8</sup> R'è'u nóziru' naca dxi'a xibá gunná b'è'è Dios, channö nu rugún le dxin ca ral-la' gun. <sup>9</sup> Lè ni nóziru': Dios gudixjè' xibá queè', calèga para inná be'e bönachi tsahui', pero para inná be'e bönachi caní:

Nupa ta'dá'baga' le rinná b'è' xibá na'.

Nupa bití' túngaca ca rinná b'è' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxon.

Nupa tu'cá'ana le nequi queè' Dios cá'asö.

Nupa tuti xuz xiná'aguequi.

Nupa tuti bönachi.

<sup>10</sup> Nupa tun le ruá' dö'.

Yugu' bönni' nacuá'lenè' la' löjödxi bönni'gaquiè'.

Nupa ta'bán yugu' bí'ido'.

Nupa ta'z'í' yé'.

Nupa tun tsutsu xtí'dza'guequi, ta'nná le cabí nácatè.

Nupa ta'dá'baga yugu' xibá tsahui'.

<sup>11</sup> Nóziru' naca caní tu' bidxín queéru' didza' dxi'a buzá' ládxè'è Dios queéru'. Lè' náquiè' lá'ayi, en budödè' lu na'a didza' dxi'a na' runa' libán que.

## Pablo r'è' Cristo: "Xclenu'" tu' buéchi' ládxè'è lè'

<sup>12</sup> Rea'-nè' Xanru' Jesucristo, Nu rutipa ládxa'a, "Xclenu'" tu' buzöni ládxè'è neda', en buzóè' neda' guna' xichinè'. <sup>13</sup> Caní benè' sal-la' z'í'alö neda' gunné z'í'a queè', en gudxía ládxa'a bönachi queè', en zían le bí'a dö' quéguequi, pero Cristo buéchi' ládxè'è neda', tu' bena' caní lu yöl-la' bití' réajni'í quia' cate' ní' bití' réajjlè'énida' Lè'. <sup>14</sup> Na'a, zxóntèrö naca le buzá' ládxè'è quia' Xanru' Jesucristo, læ na' run ga réajlè'èru' Lè', enca' ga nadxí'iru'-nè'.

<sup>15</sup> Didza' idútè li læ ni, en le naca lesaca' ila'z'í' lu ná'agaca yúgu'tè bönachi, le rnna: Lè cazè' Jesucristo bidè' yödzölió ni para busólé' bönachi dul-la', ate' busólé' neda' sal-la' nácara' bönni' dul-la' ca yúgu'tè bönachi.

<sup>16</sup> Que læ ni na' buéchi' ládxè'è neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxí' idú queè', para gaca' tu le rulu'í lógaca nupa ila'yéajlè' Lè', en gata' quéguequi yöl-la' na'bán idú.

<sup>17</sup> Na'a rnni'a: ;Yöl-la' ba Dios, Nu rinná bét'ica'sö, Nu catu caz údxi que, en Nu bití' gaca ilé'èru', la's dui Dios Nu nözi caz yúgu'tè! ;Queè' Lè' gácat'ica'sö yöl-la' run bal, en yöl-la' ba, na'a dza, en yúgu'tè dza zá'gaca! ;Ca' gaca!

<sup>18</sup> Zxi'ina'do' Timoteo, rudöda' lu no'o xibá ni para gunu' xichinè' Dios ca runè' tu bönni' idú ládxè'è rejè' gudil-la, en para uzí'u xibé yugu' le gula'guíxjö' z'í'alö nupa ní' gulu'í didza' uláz queè' Dios ca gaca quiu'.

<sup>19</sup> Len yöl-la' réajlè' quiu' Cristo ral-la' gunu' caní, naca idú dxi'a icja ládxí'do'o. Chigula'chixi gula'nigui bal-la bönachi, nupa bulu'zóa tsöl'alö le réajlè'èru' Cristo.

<sup>20</sup> Caní gulunè' Himeneo, en Alejandro, nupa na' busana' lu na' Satanás tu' xihui' para ila'zèdè' ca ral-la' ilunè', para cabirö ila'nné z'í'è que le nequi queè' Dios.

## Le rusedi r'è'u ulídzaru'-nè' Dios

**2** Que læ ni na' le naca lo le richízia' icja nágagaca bönachi naca ca ral-la' ulídzaru'-nè' Dios, en ca ral-la' gáta'yuru' lahuè', en ca ral-la' inábiru'-nè' gunné' bi riquíniru', en ca ral-la' guiéru'-nè': "Xclenu'." Yugu' læ ni ral-la' gunru' uláz quéguequi yúgu'tè bönachi. <sup>2</sup> Lésca' caní ral-la' gunru' uláz quégaca nupa ta'nná b'è', en quégaca yúgu'tè nupa nácagaca lo. Caní ral-la' gunru' para gaca dxi'a queéru', en gata' queéru' yöl-la' riböza tsáhui'do'. Ral-la' gunru' caní lu yöl-la' réajlè' queéru'

Dios, en lu yöl-la' ba'a ladxí' queéru'. <sup>3</sup> Lë ni naca dxi'a, en le raza lãdxë'ë Dios, Nu rusólã rë'u. <sup>4</sup> Dios caz ré'ënë' ulu'lãgaca yúgu'të bönachi, en ré'ënë' ilúnbë'e le naca idútë li. <sup>5</sup> Tuzë' náquië' Dios, en tuzë' bönní' ruúnë' dzaga Dios, en bönachi. Nu ni naca Jesucristo, Nu gulaj bönachi. <sup>6</sup> Lë cazë' budödi cuinë' lu yöl-la' guti, le benë' tu' nözi dul-la' nabãga'gaca yúgu'të bönachi. Dios benë' ba nalí queë' cate' bidxín dza queë' gútië'. <sup>7</sup> Ca naca lë ni, Dios buzöë' neda' para guna' libán que, en gaca' gubáz nasól-lë'ë Cristo, para usëdi-gacada' bönachi izá'a ca naca le réajlë'ëru' Cristo, en ca naca le naca idútë li. Rilítëda', en bití' ca' rizí' yë'a.

<sup>8</sup> Na'a, ré'ënda' ulu'lidzë' bönní' Dios, en ilãta'yüë' lahuë' gátitës, nácaquië' idú dxi'a, en cabí ilãlenë' luzãagaquië', en cabí ilãdil-la dídza'gaquië'. <sup>9</sup> Lëscã caní, ré'ënda' ilãcunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxí', en le naca idú ladxí', en calëga le tu'pã'asinu icja lógacanu len oro, en yugu' bugã, en lari' nazãca'da'. <sup>10</sup> Yugu' le dxi'a tunnu ulu'lu'ínu lahui le nácazacanu ca na' run le tãcunu le naca ba'a. Caní ral-la' ilunnu nigula núnbë'-gacanu Dios. <sup>11</sup> Ral-la' ilãcuã'anu yugu' nigula dxisö cate' nu rusedi légacanu, en ilãcuã'anu nöxaj. <sup>12</sup> Bití' runna' yugu' nigula lataj ulu'sëdinu, en calëga ilãnnã bé'enu yugu' bönní'. Ral-la' ilãcuã'anu dxisö ga nudúbi-gaca bönachi queë' Cristo. <sup>13</sup> Caní ral-la' gaca, tu' buzöë' Dios zí'alö Adán, ate' gudödi na' buzöë'-nu Eva. <sup>14</sup> Adán na', bití' guzxí' ye'e tu' xihuí' lë', pero nigula queë', guzxí' ye'e lënu. Caní guca, gudítsjanu xibã queë' Dios, <sup>15</sup> pero ulanu nu nigula ruzóanu-bí' bí'ido' channö gúntica'sinu ca röjlöz le réajlë'ëru' Dios, en yöl-la' nadxí'í, en channö gãcanu idú dxi'a, en idú ladxí'.

### Ca ral-la' ilãcagaquië' bönní' tapa chí'ë bönachi queë' Cristo

**3** Didza' idútë li lë ni rnna: Channö ru'í lãdxë'ë nu bönní' gãquië' nu gapa chí'í bönachi queë' Cristo, dxin dxi'a rizé lãdxë'ë. <sup>2</sup> Nu bönní' rapa chí'ë bönachi queë' Cristo run bayudxi gãquië':

Tu bönní' cuntu nu gaca bi inné queë'.

Zoa túzinu nigula queë'.

Ral-la' gãquië' ban ladxí', en idú ladxí', en nöxaj ladxí'.

Ral-la' gu'ë ga ilãcu'ë bóchi'ru' ta'dxinë' lidxë'.

Ral-la' gãquië' bönní' nazëqui'de'enë' usëdinë' bönachi.

<sup>3</sup> Bití' gãquië' bönní' re'jë', en calëga bönní' sínia'.

Bití' gaquië' bönní' rizé lãdxí'së' sí'ë dumí.

Ral-la' gãquië' bönní' dxí'í ladxí', en zxön ladxí'.

Bití' gãquië' bönní' ruhuídí'në'.

<sup>4</sup> Ral-la' gãquië' bönní' rinnã bé'enë' dxi'a bönachi nacuá' lidxë'.

Ral-la' ilunbi' zxí'inë' ca rnna xtídzë'ë lu yöl-la' run bal xúzgacabí'.

<sup>5</sup> ¿Naru' huãcatsö tu bönní' gapa chí'ë bönachi queë' Dios channö cabí raca innã bé'enë' dxi'a bönachi nacuá' lidxë'? <sup>6</sup> Bití' ral-la' gãquië' tu bönní' sí' gusí lahuë' tã'ë Cristo, para cabí tödi bé' gun ba zxön cuinë', en bití' gaca queë' ca na' guca que tu' xihuí', nu ben ba

zxön cuini, ate' Dios guchúguië' que tsöjgã'ana lataj chul-la. <sup>7</sup> Lëscã' ral-la' gãquië' bönní' ta'nnã dxi'a queë' nupa cabí nabãbagaca bönachi queë' Cristo, para cabí soa nu uzóa lë' tsölã'alö, en para cabí idzunë' lu yalaj que tu' xihuí'.

### Ca ral-la' ilãquië' bönní' tácalenë' bönachi queë' Cristo

<sup>8</sup> Lëscã' caní ral-la' ilãquië' bönní' tácalenë' bönachi queë' Cristo:

Ral-la' ilãquië' bönní' idú lãdxí'gaquië'.

Bití' ilãquië' bönní' tu'rixë' didza'.

Bití' ilãquië' bönní' té'ajë'.

Bití' ilãquië' bönní' ta'zë lãdxí'së' dumí.

<sup>9</sup> Ral-la' gaca ilapa chí'ë idútë le réajlë'ëru' Cristo.

Ral-la' ilaca idú dxi'a icja lãdxí'do'gaquië'.

<sup>10</sup> Yugu' bönní' ni ral-la' sí' bé'ëli' légaquië' zí'alö, ate' ní'rö gata' lu náagaquië' ilãcalenë' bönachi queë' Cristo, channö cabí zoa nu gaca bi inné quégaquië'.

<sup>11</sup> Lëscã' caní, nigula que queëgaquië' ral-la' ilãcuã'anu idú lãdxí'gacanu, en cabí ilãcanu unnë que luzë'e. Ral-la' ilãcanu zxön ladxí', en ilãcanu li ladxí' lu yúgu'të le tunnu. <sup>12</sup> Yugu' bönní' ilãcalenë' bönachi queë' Cristo ral-la' soa túzinu nigula que queëgaquië'. Lëscã' ral-la' ilãnnã bé'enë' dxi'a zxí'inigaquië', enca' bönachi ulidxi que queëgaquië'.

<sup>13</sup> Run bayudxi gaca caní, tu' ta'déli'në' lataj ga ilún bal bönachi xtídzã'gaquië', channö tunë' dxi'a dxin tunë' tácalenë' bönachi queë' Cristo, ate' ilãcarë rugu ladxí' para ilu'ë didza' ca naca le réajlë'ëru' Jesucristo.

### Le bigachi' que le reaj lãdxí'ru'-në' Dios

<sup>14</sup> Yugu' didza' ni ruzúaja' quiu' lu guichi, sal-la' runa' löza uduyútea' lí'. <sup>15</sup> Channö huadzëda', ruzúaja' quiu' didza' ni para inózinu' naca ral-la' gunu' lógaca bönachi nacuá' lidxë' Dios, nupa náca gaca bönachi queë' Dios ban, en náca gaca tsutsu, en ta'guíxjö' dxi'a le naca idútë li. Náca gaca ca yugu' ya'zxön, en le nunída'gaca zö'ö, le náca gaca tsutsu, en ta'zön yu'u. <sup>16</sup> Le nácatë, zxöntë'rö naca le bigachi' que le reaj lãdxí'ru'-në' Dios, ca na' nazúaj lu guichi le rnna:

Dios bulu'í lahuë', gúquië' bönachi.

Guca bë' náquië' tsahuí' tu' guzóalenë' Dios Bö' Lá'ayi Lë'.

Gulãcalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yëajlë' bönachi yödzülió Lë'.

Dios buchisë' Lë' xitsá' ga nayëpisëtë'rë'.

### Nupa ulu'huóaj lãdxí'gaca ca naca le réajlë'ëru'-në' Cristo

**4** Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ilãdã'baga' bal-la bönachi Cristo. Ulu'huóaj lãdxí'gaquië' ca naca le réajlë'ëru' Cristo. Ulu'zë' nága gaca xtídzã'gaca bönachi nacuã'len bö' ta'zí' yë' léguequi, ate' ulu'zë' nága gaca yugu' xibã quéguequi bö' xihuí'. <sup>2</sup> Ulu'zë' nága gaca xtídzã'gaca bönachi tu'lu'ísö tsahuí' cuínguequi. Yugu' bönachi na'

tuí'í didza' le cabí nácatë, en chinazidi láchí'do'guequi, para cabí uxösa léguequi. <sup>3</sup> Caní naca, tu'záguë'ë xinó'zguequi nupa té'ëni ulu'tsaga ná'agaca, en ta'nná bé'ëné' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinún'bë'gaca le naca idútë li, en té' Dios: "Xclenu'" cate' tahuë' le. <sup>4</sup> Dxi'a naca yúgu'të le benë' Dios, en bití' bi ral-la' uzóaru' tsólá'alö channö ráguru' le, en rëru'-në' Dios: "Xclenu'." <sup>5</sup> Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

### Ca rurúajë' dxi'a huen dxin queë' Jesucristo

<sup>6</sup> Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chí'u. <sup>7</sup> Gurú'una yugu' didza' ridasö que yöd'zölió ca naca didza' tuí'ínu yugu' nigula gula. Béntica'sö le gun ga gacu' tsutsu para gunu' ca ré'ënë' Dios. <sup>8</sup> Látí'do'os uzí'u xibé gunu' le gun ga gácarö nál-la ní'a no'o, pero idú uzí'u xibé gunu' ca ré'ënë' Dios. Cate' runru' caní, lë ni run ga runru' löza sóaru' ibanru' yöd'zölió ni, enca' sóaru' ibanru' dza zá'gaca, tödi uzá'aru' yöd'zölió ni. <sup>9</sup> Didza' idútë li lë ni, en le naca lesaca' ila'zí' lu ná'agaca yúgu'të bönachi. <sup>10</sup> Que lë ni na', rusáca'da' zí' cuinru' runru' dxin, tu' runru' löza Dios ban. Cristo gútië' para usólé' yúgu'të bönachi. Tu'z'í xibé le benë' nupa na' ta'yéajlë' Lë'.

<sup>11</sup> Gunná be'e, en busedi bönachi ilún yugu' lë ni.

<sup>12</sup> Cuntu nu ral-la' uzóa lí' tsólá'alö tu' nacu' bí'i ra'bán, pero ral-la' gunu' le ulu'í nupa ta'yéajlë' Dios ral-la' ilún ca runu' lí'. Caní ulu'ínu' légaquië':

Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi lí'.

Ca runu' ca rnno', en ca nacu' idú tsahui'.

<sup>13</sup> Tsanni za'a idxina' quiu', bética'sö ladxí' ulabu' guichi lá'ayi lógaca bönachi nacuá' ga ní' zu'. Guchiza icja nágagaquië' lë ni, en busedi légaquië'. <sup>14</sup> Bití' udödu' cá'sö le buzá' láchxë'ë Dios quiu', lë na' bennë' quiu' ca na' gula'nná nupa ní' gulu'í didza' uláz queë' Dios, cate' ní' bönní' gula tapa chí'ë bönachi queë' Cristo gula'xóa ná'agaquië' lí', en bulu'lídzë' Dios.

<sup>15</sup> Béntica'sö yugu' lë ni. Bética'sö láchxë'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. <sup>16</sup> Gudapa chí'í cuinu', en gudapa chí'í xibá rusédiru'. Béntica'sö yugu' lë ni, ate' channö gunu' caní, uló' lí', en ulu'lágaca ca' nupa ila'yöni lí'.

### Ca ral-la' gunbí' Timoteo ní'a quégaca bönachi queë' Cristo

**5** Bití' uzenu' bach yugu' bönní' gula, pero guchiza icja nágagaquië' didza', tsca ná'agagaquië' xuz cazu'.

Guchiza icja ná'agacabi' bí'i bönní' ra'bán didza', tsca ná'agacabi' bí'i böchi' cazu'.

<sup>2</sup> Guchiza icja ná'agacanu nigula gula didza', tsca ná'agacanu xiná' cazu'.

Guchiza icja ná'agacabi' bí'i nigula ra'bán didza', tsca ná'agacabi' bí'i zan cazu', ca na' röjlöz le naca idú dxi'a.

<sup>3</sup> Ben bal yugu' nigula ba guti bönní' que queé'gacanu, ná'agacanu túzinu. <sup>4</sup> Channö zóanu tu nigula caní nacuá'abi' bí'i queënu o xzí'ini xí'sóanu, ral-la' ila'zédabi' ilunbí' ca ré'ënë' Dios, para ilácalenbí' zí'alö bönachi nacuá' láchxigacabi', en ulu'bí'ibi' quégacuië' xuz xiná'agacabi'. Lë ni naca dxi'a, en le raza láchxë'ë Dios. <sup>5</sup> Na'a, nigula na' nagá'ananu túzinu, runnu löza Dios, ate' rëla, en te dza riná'batica'sinu lahuë' Dios, en rulídzanu Lë' ní'a quégaca bönachi queë', <sup>6</sup> pero nigula túzinu na' runnu ca naca le rizé láchxí'nu nácanu ca tu nigula chinátinu cate' ni zóanu nabannu. <sup>7</sup> Lësca' caní, gunná be'e bönachi nacuá' ga ní' zu', para ilún ca sa'yéaj yugu' lë ni, para ilaca bönachi cuntu nu gaca bi inné quéguequi. <sup>8</sup> Channö zoa nu bönní' cabí rugahuë' yugu' dí'a dza queë', en le nácarö lo, channö cabí rugahuë' bönachi nacuá' láchxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

<sup>9</sup> Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenlí', channö cabí bucá'ananu-në' bönní' queënu para sóalennu-në' ia'túë' bönní'. <sup>10</sup> Run bayudxi soa nu gun ba nalí queënu ca ná'agaca le dxi'a runnu.

Gácalenlí'-nu channö buscúlunu-bí' yugu' bí'ido', en channö ru'ínu ga ila'cuá' böchi'ru' zá'gaquië' yöd'zö zítu',

en channö ru'ínu le ilé'aj ilágugaca bönachi queë' Dios,

en channö rácalennu nupa ta'guí'í ta'zaca', en channö rúntica'sinu yúgu'të le naca dxi'a.

<sup>11</sup> Yugu' nigula túzinu bití' yu'ígacanu tsónnalalaj iz, bití' ibábaga'ganu nupa gácalenlí', tu' ilunnu ca ta'zësö láchxí'gacanu, en ila'dá'bagá'nu Cristo, en ilé'ëninu ulu'tsaga ná'agacanu leyúbölö. <sup>12</sup> Caní gaca, ila'bá'ga'nu dul-la' tu' tu'zóanu tsólá'alö le gula'yéajlë'ënu Cristo zí'alö. <sup>13</sup> Lësca' ilácanu nigula xöhuëdi, en nigula ta'dasö ca', en calé'gasö ilácanu xöhuëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. <sup>14</sup> Que lë ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlanu-bí' yugu' bí'ido', en ila'nná bé'ënu bí'i nacuá'abi' yu'u que queé'gacanu, para cabí ilu'ínu nu ridá'bagá' rë'u lataj bi inné queëru', rë'u na' réajlë'ëru' Cristo. <sup>15</sup> Caní ral-la' gaca, tu' chibulu'bí'ga'nu bál-lagacacnu, ate' tunnu ca ré'ëni Satanás tu' xihui'.

<sup>16</sup> Channö nútítës bönní' o nigula nu réajlë' Cristo, nacuá'anu nigula túzinu láchxigaca nupa na', ral-la' ilácalen lé'gacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

<sup>17</sup> Benrö bal yugu' bönní' gula tapa chí'ë bönachi queë' Cristo, yugu' bönní' na' ta'nná bë'ë dxi'a, en bën-



tërö ca' bal yugu' bönni' gula na' tunë dxin, tunë libán, en tu'sédinë' bönachi. <sup>18</sup> Nazúaj lu guichi lá'ayi le rna: "Biti' cu'u du ruá'aba' bédxi na' rulíbiba' zxoá' xtila." Rna ca: "Náquië' lesaca' nu bönni' huen dxin si'ë lazxjé'."

<sup>19</sup> Biti' sí' lu no'o didza' ruí' nu ruzegui didza' tu bönni' gula rapa chi'ë bönachi queë' Cristo, channö cabí nacuá' chopá tsonna nupa tun ba nalí que le benë'.

<sup>20</sup> Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios. <sup>21</sup> Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' lí' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en bití' gunu' bal tuzë' bönni'.

<sup>22</sup> Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

<sup>23</sup> Biti'rö guí'ju' níasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

<sup>24</sup> Yugu' dul-la' quéguequi bal-la bönachi ila'lá' lahui zí'alö cate' sí' ila'dxín ga uchi'a usöröë' Dios léguequi, ate' tödi ni' ila'lá' lahui dul-la' nabága'gaca ia'zica'rö bönachi. <sup>25</sup> Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

**6** Yúgu'të bönni' nadó'ogaca ral-la' ilúndë'ë bal xán-gaquië', para cabí gaca nu innë' zí' que La lá'ayi queë' Dios, en que xibá queë'. <sup>2</sup> Nupa ni' nacu'ë xángaca ta'yéajlë'ë Cristo, bití' ral-la' ulu'cá'ana cá'asö lé-gaquië' tu' nácagaquië' bóchi'guequi. Ral-la' ilunrö dxi'a xichíngaqië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacuá' ni', en guchiza le icja nágagaquië'.

### Le reaj ládxi'ru'-në' Dios le ruzí'ru' xibé

<sup>3</sup> Channö zoa nu bönni' rusédinë' xibá yúbölö, en bití' rusédinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca ré'ënë' Dios, <sup>4</sup> bönni' ni run ba zxön cuinë', en bití' bi nózinë'. Didza' bití' naca dxi'a rizé ládxi'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díl-lalen luzé'eguequi didza'. Lësca' tun didza' caní ga ta'nnë' zí' bönachi que luzé'eguequi, en ta'zá' ládxi'gaca que luzé'eguequi le cabí nácatë. <sup>5</sup> Lësca' caní tun ga ta'díl-latica'së' didza' bönni' bití' ta'yéajni'inë', nupa bití' nazí' lu né'eguequi le naca idútë li. Téquini huáca ila'zí' dumí zían channö ilúngaca tsözxón nupa ta'yéaj ládxi'gaca Dios. Gucuíta ga nacuá' bönachi caní. <sup>6</sup> Zxön naca le ruzí'ru' xibé cate' len yöl-la' riböza zxön ladxí' reaj ládxi'ru'-në' Dios. <sup>7</sup> Bití' bi nuá'aru' cate' ridxinru' yödzölió, en lësca' caní, bití' bi uá'aru' cate' uzá'aru' yödzölió ni. <sup>8</sup> Que lë ni na', channö dësö queëru' le gáguru', en le gácuru', ral-la' udzéjaru'. <sup>9</sup> Yugu' bönni' té'ënnë' gata' quégaquië' yöl-la' tsahui', gaca quégaquië' le sí' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' bití' bi nözi quégaquië' zían le ila'zé ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga

ila'nítië' tsaz. <sup>10</sup> Tu' ta'zé ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zí' lé-gaquië'.

### Nu run dxin queë' Cristo naca ca tu bönni' rejë' gudil-la

<sup>11</sup> Na'a, bönni' queë' Dios, gucuíta ga raca le caní. Bética'sö ládxi'u' gunu' le naca tsahui', en le ré'ënë' Dios.

Guyéajlë'tica'së' Cristo, en bidxí'i yugu' luzó'o.

Bë' ladxí' gacu' zxön ladxí', en nöxaj ladxí'.

<sup>12</sup> Ca runë' tu bönni' idú ládxi'ë rejë' gudil-la, ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios lí'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. <sup>13</sup> Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' lí' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en bití' bi gunu' le gü'í' lataj nu bi innë' quiu', ga idxintë dza ni' uluí' lahuë' Xanru' Jesucristo. <sup>15</sup> Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

<sup>16</sup> ¡Tuzë' Lë' zóatica'së'!

¡Zoë' lu bení' ga bití' gaca nu idxín rácasö que!

¡Catu caz nu bilé'e Lë', en bití' gaca nu ilé'e Lë'!

¡Queë' Lë' gácatca'sö le run Lë' bal, en yöl-la' unná bë'!

¡Ca' gaca!

<sup>17</sup> Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuín-gaquië', en para cabí ulu'zxöni ládxi'gaquië' yöl-la' tsahui' na' bití' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'ru' xibé! <sup>18</sup> Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzejë' quégaca bönachi yechi', en iluí' ládxi'-gaquië' léguequi. <sup>19</sup> Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza sí' za', en ila'déli'në' yöl-la' na'bán idú.

### Le gulu'ë Pablo lu ná'abí' bí'i Timoteo

<sup>20</sup> Bócha'ado' Timoteo, ben chí'i le nadödi lu no'o. Gucuíta ga nacuá' nupa tu'í' didza' cá'asö, en yugu' didza' bití' nazaca', en yugu' didza' bizxaj, yugu' didza' na' tu'í' nupa ta'nnasö tácada', ate' nazí' yé'eguequi ca naca lë na' tun. <sup>21</sup> Bal-la bönachi gula'zí' lu né'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxi'ë quiu' le nácagaca dxi'a queë'.

¡Ca' gaca!

## 2 Timoteo

### Pablo rugapë' Dios bí'i Timoteo

**1** Neda', Pablo, naca' gubáz nasól-lë'ë Cristo. Caní naca' tu' ré'ënë' Dios gaca' caní, para caní gaca le guzxí' lu në'ë, gunnë' queéru' yöl-la' na'bán idú, le ruzá' ládxë'ë Jesucristo queéru'. <sup>2</sup> Rugapa' Dios lí', bócha'ado' Timoteo. Nacu' ca xzí'ini caza' tu' benru' tu xzön xich-inë' Cristo, ate' nadxí'ida' lí'. Rinábida'-në' Xúziru' Dios, enca' Xanru' Jesucristo, uzá' ládxë'ë quiu', en huéchi' ládxë'ë lí', en gunë' ga cö' dxi icja ládxí'do'.

### Timoteo ral-la' gunbí' ba nalí queë' Jesucristo

<sup>3</sup> Rea'-në' Dios: "Xclenu'" ca naca quiu' cate' rulidza'-në' Dios. Bití' rizóa dxí'á rinaba' ní'a quiu' rëla, en te dza lahuë' Dios, Nu na' runa' xichinë' idú ládxá'a ca na' gulunë' xuz xtá'ahua'. <sup>4</sup> Cate' røjneda' ca na' gurödxu', rizé ládxá'a ulé'eda' lí', para gaca udzédada' idú ládxá'a.

<sup>5</sup> Rea'-në' Dios: "Xclenu'" tu' zoa le run ga røjneda' ca réajlë'u Cristo idú ládxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alö ca lí', ate' runa' löza, lësca' caní réajlë'u Lë' na'a.

<sup>6</sup> Tu' naca caní, rusá'a ládxu'u para usubanú' le bennë' Dios quiu', lë na' bidxín quiu' cate' ní' guxóa na'a lí', en bulidza'-në' Dios. <sup>7</sup> Bö' na' bennë' Dios queéru' bití' naca tu bö' le gun ga gádxiru', pero bennë' queéru' Bö' Lá'ayi Nu run ga náparu' yöl-la' huáca, en run ga nadxí'iru' luzá'aru', en run ca' ga rinná be'e cuinru'.

<sup>8</sup> Que lë ni na', bití' utuí'inu' gunu' ba nalí queë' Xanru', en bití' utuí'inu' ca raca quia' neda' ni, nadzuna' lidxi guíë tu' runa' xichinë', pero ben tsözxón nupa ta'guí'i ta'zaca' tu' tun libán que didza' dxí'a. Dios gunnë' yöl-la' huáca quiu' para gunu' caní. <sup>9</sup> Dios caz busólé' rë'u, en bulidzë' rë'u para gácaru' idú dxí'a. Bití' bulidzë' rë'u tu' zoa le dxí'a benru', pero bulidzë' rë'u tu' gú'uni quézinë' Lë', en tu' ruzá' ládxë'ë caní queéru'. Dza ní'te buzóë' caní queéru' zí'atëlö ca guta' yödzülió ni, tu' néquiru' queë' Jesucristo. <sup>10</sup> Na'a, chibulú'i lahui le ruzá' ládxë'ë Dios queéru', tu' buluí'i lahuë' Jesucristo Nu rusölá rë'u. Bugúë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rna didza' dxí'a.

<sup>11</sup> Cristo buzóë' neda' para guna' libán que didza' dxí'a na', en para gaca' gubáz queë' para usédigacada' bönachi izá'a. <sup>12</sup> Que lë ni na' riguí'i rizáca'a ca' yugu' le raca quia' ni, pero bití' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chí'ë le budöda' lu në'ë ga idxintë dza ní' huödë'.

<sup>13</sup> Didza' dxí'a na' biyönnu' bena' libán que ral-la' gaca quiu' tu le rulu'í ca ral-la' usédinu' bönachi ca réa-

jlë'ëru' Jesucristo, en ca nadxí'iru' Lë'. <sup>14</sup> Ben chí'i le naca dxí'a na' nadödi lu no'ó, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

<sup>15</sup> Chinóz quézinu' ca na' gulunë' zian bönni' ta'yéa-jlë'ë Cristo nacué luyú Asia bulu'béaj ládxí'gaquië' neda'. Figelo, en Hermógenes nabábagaquië' bönni' ni. <sup>16</sup> Rinábida'-në' Xanru' Dios huéchi' ládxë'ë bönachi nacué lidxë' Onesíforo, tu' butipë' ládxá'a bönni' ni zían luzuí. Cate' bidxinë' Roma, idú ládxë'ë buguiljë' neda', ate' budzólnë' neda'. Bití' butuí'inë' ní'a quia' neda' tu' nadzuna' lidxi guíë ni, nága'a du guíë. <sup>18</sup> Rinábida'-në' Xanru' huéchi' ládxë'ë lë' dza ní' idxinë' lahuë' Dios. Chinóz quézinu' ca na' gúcalenë' bönni' ni rë'u, cate' ní' guzóaru' yödzü Éfeso.

### Ral-la' gácabi' Timoteo ca tu bönni' idú ládxë'ë rejë' gudil-la

**2** Na'a, xzí'ina'do', butipa ládxu'u ca naca le ruzá' ládxë'ë Jesucristo quiu'. <sup>2</sup> Didza' biyönnu' bé'a ló-gaca zían nupa tun ba nalí que, didza' ni budödi lu náagaquië' bönni' tunë' ca ta'nnë', bönni' gaca ulu'séd-inë' ca' ia'bal-la bönachi.

<sup>3</sup> Ral-la' guá' ilenu' le ulu'saca' lí' zí' ca na' ruá' rilén nu naca bönni' queë' Jesucristo idú ládxë'ë rejë' gudil-la. <sup>4</sup> Nu bönni' rejë' gudil-la, bití' ca' gútsë'ë yugu' le tun bönachi yödzülió ni, para tsaza ládxë'ë bönni' na' nuzóë' lë' gáquië' bönni' queë' rejë' gudil-la. <sup>5</sup> Lësca' caní, nu nutsa' lu huitaj, bití' bi idelí' channö cabí run ca ral-la' gun. <sup>6</sup> Nu bönni' gúz gú'una runë' dxin, zí'alö lë' uzí'ë xibé lë na' razë'. <sup>7</sup> Busá' ládxu'u lë ni rea' lí', ate' Xanru' caz gunë' ga tséajni'inu' yúgu'të.

<sup>8</sup> Yöjné ca guca queë' Jesucristo. Guljë', en gúquië' xzí'ini xí'sóë' David, en gudödi gútië', bubanë' lu yöl-la' guti. Caní rna didza' dxí'a runa' libán que. <sup>9</sup> Tu' runa' libán que didza' dxí'a, riguí'i rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero bití' ca' nága'të xtídzë'ë Dios. <sup>10</sup> Que lë ni na' ruá' riléna' yúgu'të lë ni tu' nadxí'ida' nupa guróë' Dios, para ulu'lé' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'.

<sup>11</sup> Catëz naca lë ni rna:

Channö nátilenru' Lë', sóalenru'-në' ca' ibanru'.

<sup>12</sup> Channö guá' ilenru' le quí'i sáca'ru', inná bé'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

<sup>13</sup> Sal-la' bití' runru' ca rnaru', Lë' rúntica'së' ca rnnë'. Lë' bití' gaca tá'baguë'ë le náquië'.

### Nu bönni' huen dxin queë' Cristo rurúajë' dxí'a

<sup>14</sup> Busá' ládxi'gaca nupa nacuá' ga ní' zu' ca naca lë ni, ate' ní'a queë' Xanru' Dios gunná be'e légaquië' para cabí ila'dil-la dídzë' ca nácagaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi. <sup>15</sup> Bë'tica'sö ládxi'u urúaju' dxí'a lahuë' Dios para gacu' ca tu bönni' huen dxin bití' rutuí'inë' ca naca dxin nunë'. Dxí'ado' ral-la' ugunu' dxin didza' idütë li. <sup>16</sup> Na'a, gucuíta ga nacuá' nupa tu'í didza' bití' nazaca', en didza' cá'asö, tu' tun didza' caní ga ilunrë' le cabí ré'enë' Dios. <sup>17</sup> Ila'zë didza' tu'ë ca rizxón huë' nudzu' le ridúdu' rilá. Himeneo, en Fileto nabábagaquië' nupa tu'í didza' caní. <sup>18</sup> Iropë' ni gula'chixi gula'níguinë' ca naca le naca idütë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baróli bal-la bönachi ga ridxintë bítirö ta'yéajlë' Cristo. <sup>19</sup> Le benë' tsutsu Dios zóatica'sö, en dë tu le naca bë', le rnna: "Núnbë'ë Dios nupa néquiguequi queë'." Rnna ca: "Gulí'cuíta ga raca le ruá' dö, yúgu'tëli' lib'ili' néquili' queë' Cristo."

<sup>20</sup> Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga bití' naca liná'. <sup>21</sup> Para gácaru' ca naca lë na' tu'gún bönachi dxin ga liná', en para gaca gunru' le naca dxí'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxí'a.

<sup>22</sup> Gurú'una le tun ga nu së ladxí' le ruá' dö' ca raca quégaquië' bönni' ra'bando'. Bë' ladxí' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxí'ado'. Ca nácagaca lë ni, ben tsözxön nupa tu'lidza Xanru', naca idú dxí'a icja ládxi'do'guequi. <sup>23</sup> Na'a, gurú'una yugu' didza' cá'asö, en didza' bití' nazaca', tu' chinóz quézinu' tun didza' caní ga ta'dil-la didza' bönachi. <sup>24</sup> Bönni' huen dxin queë' Xanru' bití' ral-la' tíl-lalenë' bönachi didza', pero ral-la' gáquië' nöxaj ladxí' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxí'. <sup>25</sup> Lu yöl-la' nöxaj ladxí' ral-la' uzéajni'inë' nupa ta'dá'bagá' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilún-bë'ë le naca idütë li. <sup>26</sup> Caní ulu'lé' lu yalaj que tu' xihui' ga nadzúngaquië', ate' ulu'huöáquië' tsahui' para ilunë' ca ré'enë' Dios.

### Ca ilaca bönachi dza tsöjsëtëgaca

**3** Lësca' ral-la' inózinu' lë ni: Dza tsöjsëtëgaca ilaca dza ila'gu'í ila'zaca' bönachi. <sup>2</sup> Yugu' dza ní' ila'cu'ë bönni' ilácagaquië' caní: Ila'dxí'í la' cuíngacasë', en ulu'huídí'në'. Ilún ba zxön cuíngaquië', en ulu'lu'í cuíngaquië' zxön. Ila'nnë' zì'ë que le naca lá'ayi. Ila'dá'baguë'ë xuz xiná'agaquië'. Ilácagaquië' bönni' cabí ta'yaza ládxi'gaquië'.

Bití' ilunë' ca ré'enë' Dios.

<sup>3</sup> Bití' ila'dxí'inë' ca ral-la' ilunë'.

Ilácagaquië' zidzaj ladxí'.

Ila'nnë' que luzá'agaquië'.

Bití' ila'nná be'e cuíngaquië'.

Ilácagaquië' bönni' dza'a.

Bití' ila'lé'enë' dxí'a le naca dxí'a.

<sup>4</sup> Ilácagaquië' hueti luzé'e, en bití' ila'dzáguië' dxí'a.

Ulu'lu'í cuíngaquië' ca bönni' nayépisëgaquië'.

Ila'dxí'inë' le ila'yázasö ládxi'gaquië', en caléga Dios.

<sup>5</sup> Ulu'lu'í cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacuá' bönachi caní. <sup>6</sup> Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula bití' bi nözguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en ilu'í ládxi'gacanu yugu' le ila'zësö ládxi'gacanu le cabí nazaca'. <sup>7</sup> Ila'yónitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idütë li. <sup>8</sup> Ca na' gulá'quië' Janes, en Jambres, bönni' ní' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idütë li. Ilácagaquië' chul-la niti, en ila'chíxinë' ca naca le réajlë'ëru' Cristo. <sup>9</sup> Bití' ila'déli'rönë', pero gaca bë' náca-gaquië' bönni' bití' bi nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

### Le rigu'ë Pablo lu ná'abi' bí'i Timoteo

<sup>10</sup> Nöz quézinu' ca naca le rusédida' bönachi, en ca runa'. Nózinu' ca' le ru'í ládxa'a guna', en ca réajlë'a Cristo, en ca naca' nöxaj ladxí', en ca nadxí'ida' luzá'a, en ca riböza' zxön ladxí'. <sup>11</sup> Nózinu' ca' yugu' le gula'bía ládxi'gaca bönachi neda', en yugu' le gudí' guzácá'a, le gulaca quia' lu yödzö Antioquia, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ní' neda' biá' guléna', ate' Xanru' Jesús busölé' neda' lu yúgu'të lë na'. <sup>12</sup> Yúgu'të nupa té'ëni ilaca idú dxí'a tu' néquiguequi queë' Jesucristo, lësca' ila'gu'í ila'záquië' yugu' le ila'bía ládxi'gaca bönachi légaquië'.

<sup>13</sup> Na'a, bönni' tuá' dö', en bönni' ta'zí' yé'ë ilácaré' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

<sup>14</sup> Na'a, ben chí'í yugu' le buzëdu', en le guzxi' lu no'o, tu' nunbë' cazu' nupa bulu'sedi lí'. <sup>15</sup> Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e lí' para uló' tu' réajlë'u Jesucristo.

<sup>16</sup> Yúgu'të le nazúajgaca lu guichi lá'ayi guchizië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi ná-cada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. <sup>17</sup> Caní run, para gaca sina' nu naca queë' Dios, en gá-cada' gun yúgu'të le naca dxí'a.

**4** Ní'a queë' Xanru' Dios, enca' Xanru' Jesucristo, riná bé'eda' lí' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ní' huödë' idinná bë'ë. Bë' ladxí' gunu'

lë ni channö raca dxí'a quiu' o biti' raca dxí'a. Lu yöl-la' zxön ladxí', guléaj ga liná' le tun bönachi. Busá' ladxí'-gaquië', en guchiza icja nágagaquië' ca naca lë na' rusédiru'. <sup>3</sup> Caní ral-la' gunu' tu' idxín dza cate' biti' ulu'zé nágagaquië' xibá tsahui', pero ilé'ëninë' ila'yön-në' le ta'dánisinë'. Ca ta'zësö ladxí'gaquië' ulu'tubë' quégaquië' nupa ulu'sedi légaquië'. <sup>4</sup> Ulu'cá'anë' le naca idútë li, en ila'zí' lu ná'agaquië' yugu' didza' ridasö. <sup>5</sup> Na'a, ral-la' gacu' zxön ladxí' lu yúgu'të le runu'. Bíá' gulén le ulu'saca' lí' zí'. Ben libán que didza' dxí'a. Idú ladxu'u ben dxin le budödë' Cristo lu no'o gunu'.

<sup>6</sup> Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. <sup>7</sup> Ca runë' tu bönni' idú ladxë' rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. <sup>8</sup> Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöróë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ladxí'guequi ta'böza dza huödë'.

#### Le buzúajë' lu guichi Pablo gunbí' Timoteo

<sup>9</sup> Bë' ladxí' guídateo' ga ni zoa' <sup>10</sup> tu' guléaj ladxë'ë Demas neda', tu' nadxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galicia, ate' bí'i Tito guyéajbí' luyú Dalmacia, tu' caní ben bayudxi ilunë'. <sup>11</sup> Tuzë' Lucas zóalenë' neda'. Guché'ë-bí' bí'i Marcos para guí dalenbí' lí' tsözxön, tu' nácabí' gún-

lenbí' neda' tsözxön xichinë' Cristo. <sup>12</sup> Gusól-la'a-bí' bí'i Tíquico lu yödzö Éfeso. <sup>13</sup> Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

<sup>14</sup> Alejandro, bönni' gubëdxi guíë, zían le bí'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. <sup>15</sup> Ben chí'i cuinu' queë' bönni' ni, tu' ridá'baga'dë'ë didza' runru' libán que.

<sup>16</sup> Cate' le zí'alö luzuí bixina' lógaquië' bönni' yúlalui', cuntu nu gúcalen neda', pero bulu'béaj ladxí'-gaca yúgu'të bönachi neda'. Biti' ré'ënda' uzí' lëbë' Dios légaquië'. <sup>17</sup> Guzóalenë' Xanru' neda', en butipë' ladxá'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busólë' Xanru' neda', ate' guca quia' tsa burúaja' lu ruá'aba' bëdxi guixí'. <sup>18</sup> Lë cazë' Xanru' usölë' neda' lu yúgu'të le cabí' raca dxí'a, en gun chí'ë neda' ga idxíntea' ga rinná' bë'ë Lë' ní' yehua' yubá. ¡Gácatíca'sö queë' yöl-la' ba yúgu'të dza zá'gaca! ¡Ca' gaca!

#### Pablo rugapë' Dios bönachi queë' Cristo

<sup>19</sup> Bugapa Dios Priscila, en Aquilo, enca' bönachi nacua' lidxë' Onesíforo. <sup>20</sup> Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. <sup>21</sup> Bë' ladxí' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios lí'.

<sup>22</sup> Rinábida'-në' Xanru' Jesucristo sóalenë' lí'. ¡Gácalen lí' le ruzá' ladxë'ë Dios quiu'! ¡Ca' gaca!

# Tito

## Pablo rugapë' Dios bī'i Tito

**1** Neda', Pablo, naca' huen dxin queë' Dios, en gubáz nasól-lë'ë Jesucristo. Gusól-lë'ë neda' para guna' ga ila'yéajlë' bönachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. <sup>2</sup> Caní naca' tu' runa' löza uzi'a xibé yöl-la' na'bán idú le guzxí' lu në'ë Dios gunnë' queéru' dza nī'te, cate' sī' gusí lo rata' yúgu'të le dë, ate' run cazë' Lë' le nazí' lu në'ë gunë'. <sup>3</sup> Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busólá rë'u, neda'. <sup>4</sup> Rugapa' Dios lí', bócha'ado' Tito. Nacu' idú zxí'ini caza' tu' naca lébisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busólá rë'u, uzá' ládxe'ë quiu', en huéchi' ládxe'ë lí', en gunë' ga soa dxi' icja ládxi'do'o.

## Dxin queë' Cristo runbí' bī'i Tito luyú Creta

<sup>5</sup> Que lë ni na' bucá'ana' lí' luyú Creta, para usó'o le riyadzaj quégaca bönachi queë' Cristo nacua' ní', para ilácagaca idú bönachi queë' Cristo, en para ucú'u bön-ní' gula yúgu'të yödzo para ilún chí'ë bönachi queë' Cristo nacua' tu tu yödzo ní', ca na' chigunná bé'eda' lí' gunu'. <sup>6</sup> Nu bönni' gula rapa chí'ë bönachi queë' Cristo ral-la' gáquië':

Bönni' cuntu nu bi gaca inné queë'.

Zoa túzinu nigula queë'.

Yugu' zxí'inë' ral-la' ila'yéajlë'ëbi' Cristo.

Bití' soa nu gaca inné quégacabi' ta'dá dzágasibi' ca', o ta'dá'baga'bi' xuz xiná'agacabi'.

<sup>7</sup> Nu bönni' rapa chí'ë bönachi queë' Cristo run bayudxi:

Bití' runë' le gü'í' lataj nu bi inné queë' ca runë' xich-inë' Dios.

Bití' gáquië' bönni' zidi o bönni' icja dza'a, o bönni' re'jë', o bönni' ribíxjanë', o bönni' rizé ládxi'së' dumí.

<sup>8</sup> Ral-la' gu'ë ga ila'cu'ë bóchí'ru' ta'dxinë' lidxë'.

Ral-la' së ládxe'ë gunë' le naca dxi'a.

Ral-la' gáquië' bönni' réajni'í, en bönni' tsahui'.

Ral-la' gádxinë' Dios, en inná be'e cuinë'.

<sup>9</sup> Ral-la' gun chí'ë didza' idútë li ca chinazëdë', para gaca ichízië' icja nágagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

<sup>10</sup> Caní ral-la' gáquië' tu' ta'dá'baguë'ë zían bönni', en tu'ë didza' bití' nazaca', en ta'zí' yé'enë' bönachi. Zían bönni' tunë' caní nácagaquië' judío. <sup>11</sup> Yugu' bönni' ni,

run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

<sup>12</sup> Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunné': "Ta'zí' yé'tica'së' bönni' Creta, en nácagaquië' ca böa' gu'á sínia'. Nácagaquië' bönni' huágulë'ë xöhuëdi."

<sup>13</sup> Didza' ni benë' ba nalí quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, <sup>14</sup> en para cabí ulu'zé nágagaquië' yugu' didza' ridasö quégaquië' bönni' judío, en bití' ilunë' ca ta'nná bë' bönachi nucá'anagaca le naca idútë li.

<sup>15</sup> Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en bití' ta'yéajlë', bití' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca. <sup>16</sup> Ta'nnë' núnbë'gaquië' Dios, pero le túngaquië' bití' röjlóz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en bití' ca' gaca ilunë' le naca dxi'a.

## Xibá dxi'a le ral-la' usédiru'

**2** Na'a, ral-la' gu'u didza' le röjlóz xibá dxi'a.

<sup>2</sup> Busedi yugu' bönni' gula:

Bití' ral-la' ilé'ajë'.

Ral-la' iláquië' ba'a ladxí', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxí'inë' luzá'agaquië', en ila'bözë' zxön ladxí'.

<sup>3</sup> Busedi yugu' nigula gula:

Ilunnu le raza ládxe'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

<sup>4</sup> Ral-la' ulu'sédinu' nigula ní' yú'ugacanu iz cuidi' para ila'dxí'inu bönni' que quéégacanu, enca' zxí'ini-gacanu.

<sup>5</sup> Ral-la' ilácanu nigula ta'yéajni'inu, en nigula dxi'a ladxí'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que quéégacanu.

Ral-la' cabí bi ilunnu le gü'í' lataj nu inné zí' que xtídzë'ë Dios.

<sup>6</sup> Busedi yugu' bönni' ní' nacu'ë iz cuidi':

Ral-la' ilácagaquië' bönni' ta'yéajni'inë'.

<sup>7</sup> Ral-la' gúntica'su' le naca dxi'a,

ulu'í'inu' bönachi caní ca ral-la' ilúngaca.

Ca rusédinu' ral-la' ulu'í' nacu' idú ladxí', en ba'a ladxí'.

<sup>8</sup> Ral-la' usédinu' didza' dxí'a le cabí gaca nu bi inné que.

Caní gunu' ga utuí'iné' bönni' ridá'baguëë, en bití' gaca bi inné' queéli' runlí' le ruá' dö'.

<sup>9</sup> Busedi bóchi'ru' ní' ta'yéajlëë Cristo, en nadó'o-gaquië':

Ral-la' ila'cu'ë nòxaj lógaquië' xánagaquië'.

Ral-la' iluné' yúgu'tè le ila'yaza ládxi'gaquië' xánagaquië'.

Bití' ral-la' tá'baga'gaquië' le ta'nná' bëë.

<sup>10</sup> Bití' bi ulu'cáchi'lané'.

Ral-la' ulu'lú'í cuíngaquië' tsahuí' ca naca yúgu'tè le tuné'.

Caní ulu'í lo naca dxí'a xibá queë' Dios, Nu busólá rë'u.

<sup>11</sup> Cristo, bönni' na' buzá' ládxiëë Dios queëru' chibu-lu'í lahuë' lógaca yúgu'tè bönachi para ulu'lágaca.

<sup>12</sup> Lë' rusédiné' rë'u ucá'anaru' le cabí raza ládxiëë Dios, en cabí sè ládxi'ru' le naca que yödzülió ni, pero cózaru' zxön ládxi', en gácaru' tsahuí' dza ni zóaru' na'a, en gunru' ca ré'ëni quéziné' Dios. <sup>13</sup> Ral-la' cózaru' le runru' löza le gun ga gácaru' bica' ba, lë na' gaca dza ní' cate' ulu'í lahuë' Jesucristo lu bení' idú queë'.

Náquië' Dios zxön, Nu rusólá rë'u. <sup>14</sup> Lë cazé' budödi cuiné' uláz queëru', para böá'uë' rë'u lu yúgu'tè le naca xihuí', ate' ruúnë' rë'u tsahuí' para gácaru' bönachi queë', en gü'í ládxi'ru' gunru' le naca dxí'a.

<sup>15</sup> Yugu' lë ni bë' didza', en guchiza icja nágagaca bönachi ní', ate' len yöl-la' unná' bë' gudil-la léguequi. Béntica'sö caní, para cabí sí' lataj nu ucá'ana cá'asö xtídzú'u.

### Le ral-la' ilún bönachi ta'yéajlë' Cristo

**3** Busá' ládxi'gaquië' bóchi'ru' ní' iluné' ca ta'nné' bönni' dë lu ná'agaquië', en bönni' yúlahuí', para iluné' ca rna xtídzá'gaquië'. Ral-la' ila'cu'ë sina' iluné' le naca dxí'a. <sup>2</sup> Bití' bi le ruá' dö' ral-la' ila'nné' que luzá'agaquië', en bití' ila'díl-lalené' légaquië' didza', pero ral-la' ilácagaquië' nòxaj ládxi', en idú ládxi' lógaca yúgu'tè bönachi.

<sup>3</sup> Lësca' rë'u, zí'alö gúcaru' yugu' bönni' bití' ta'yéajlë' iné', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dö', en ia'bal-la le guyaza ládxi'ru'. Benru' ca' le ruá'

dö', en buzé'aru' luzá'aru'. Bití' bila'lé'e bönachi rë'u dxí'a, ate' rë'u bití' bilé'aru' dxí'a luzá'aru' turu' ia'turu'.

<sup>4</sup> Ní'irö bulu'e lahui Dios, Nu rusólá rë'u. Naca bë' náquië' idú dxí'a, en nadxi'iné' yúgu'tè bönachi, <sup>5</sup> tu' busólé' rë'u, calëga tu' zoa bi le naca dxí'a benru' rë'u, pero tu' buéchi' ládxiëë rë'u. Buné' rë'u dxí'a, en bené' ga nácaru' bönachi cubi. Dios Bö' Lá'ayi rucubé' rë'u.

<sup>6</sup> Dios gusól-lëë Dios Bö' Lá'ayi queëru' tu' néquiru' queë' Jesucristo, Nu rusólá rë'u. <sup>7</sup> Buzá' ládxiëë queëru', en buné' rë'u tsahuí' para gata' yöl-la' na'bán idú queëru', le runru' löza gunné' queëru'.

<sup>8</sup> Didza' idütè li lë ni nuzúaja' lu guichi. Ré'ënda' usé-dide'enu' yugu' bönni' ní' yugu' lë ni para ilu'í ládxi'gaquië' ilúntica'së' le naca dxí'a tu' ta'yéajlëë Dios. Lë ni naca dxí'a, en nácada' lesaca' ila'zí' lu ná'agaca yúgu'tè bönachi. <sup>9</sup> Na'a, bití' gu'u lataj nu gü'í didza' le cabí nazaca', o nu gü'í ládxi' ca ná'agaca lágaca zían-tërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazá'agaca le caní, ate' cuntú nu uzí' xibé didza' caní.

<sup>10</sup> Channö zoa nu bönni' ní', rubéajë' choplö bönachi queë' Cristo, tödi usó'o ládxiëë tu ia'tú luzuí, bubéajë' bönni' na'. <sup>11</sup> Nöz quézinu' chiböá'quië' caní nu bönni' bití' náquië' tsahuí', en runé' dul-la'. Chinabáguëë xíguia' ní'a que lë na' runé'.

### Le buzúajë' Pablo lu guichi le gunbí' bí'i Tito

<sup>12</sup> Cate' isól-la'a-në' Artemas o Tíquico ga zu', bë' ládxi' guídu' ga ni zoa' lu yödzü Nicópolis, tu' chinuna' quia' ugá'ana' ni yugu' beo' ziaga. <sup>13</sup> Zenas, bönni' na' rudödë' didza' ca rinná' bë' bönachi yúlahuí', enca' Apolos, ila'dxiné' ga ní' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'. <sup>14</sup> Busedi yugu' bóchi' luzá'aru' ilúntica'së' le naca dxí'a, en bi ulu'nödzejé' quégaca nupa bi riyadzaj quéguequi, para gaca bë' caní le ná'agaquië' queë' Cristo.

### Pablo rugapë' Dios bönachi queë' Cristo

<sup>15</sup> Yúgu'tè nupa nacué'len neda' tu'gapa Dios lí'. Bugapa Dios nupa ní' nadxi'igaca rë'u tu' ta'yéajlë' Dios. Le ruzá' ládxiëë Dios queëru' gácalen yúgu'téli'. ¡Ca' gaca!

# Filemón

## Pablo rugapë' Dios Filemón

**1** Neda', Pablo, dzágabi' neda' bí'i bóchi'ru' Timoteo. Nadzuna' lidxi guíë tu' runa' xichinë' Jesucristo. Rugapa' Dios lí', Filemón. Nacu' bönni' nadxí'itu', en runu' xichinë' Cristo ca runtu' netu'. <sup>2</sup> Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' xzí'inu', Arquipo. Nácabi' queë' Jesucristo ca tu bönni' rejë' gudil-la, tu' runbí' xichinë' Lë' ca runtu' netu'. Lësca' rugapa' Dios bönachi queë' Cristo tu' dubë' lu yu'u lidxu'. <sup>3</sup> Rinábida'-në' Xúziru' Dios, enca' Xanru' Jesucristo, uzá' lãdxë'ë queéli', en gunë' ga soa dxi icja lãdxi'do'olí'.

## Ca runë' Filemón tu' réajlë'ë Cristo

<sup>4</sup> Rética'sa'-në' Dios queëru' "Xclenu'", en röjnética'sida' lí' cate' rulidza'-në'. <sup>5</sup> Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'. <sup>6</sup> Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zí' xibé nupa nacua' nì' yúgu'të le naca dxí'a, le ruzá' lãdxë'ë Jesucristo queëru'. <sup>7</sup> Rudzé-jada', en ruzí' zxóna' tu' nadxí'inu' yugu' bóchi'ru', en benu' lí', bócha'a, ga bulu'huöáca lãdxi'gaca bönachi ta'yéajlë' Cristo.

## Filemón ral-la' uniti lahuë'-bí' Onésimo, bí'i nadó'o queë'

<sup>8</sup> Que lë ni na', sal-la' dë lu na'a tu' naca' gubáz nasól-lë'ë Cristo inná bé'eda' lí' ca ral-la' gunu', <sup>9</sup> ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guíë tu' runa' xichinë' Jesucristo. <sup>10</sup> Ráta'yua' lo' uláz queëbí' Onésimo, bí'i na' bena' ga böácabi' queë' Cristo, en que lë ni na' nácabi' ca xzí'ini caza' ga ni nadzuna' lidxi guíë.

<sup>11</sup> Bí'i ni, zí'alö bití' gúcabi' lesaca' quiu', pero na'a nácabi' lesaca' quiu' lí', enca' quia' neda'. <sup>12</sup> Bí'i ni rusól-la'a-bí' ga zu'. Ben bal lëbí' ca neda' caz runu' bal, tu'

nadxí'ida'-bí'. <sup>13</sup> Gú'unida' ugá'analenbí' neda' ni, para uláz quiu' gunbí' xichina' tsanni ni yu'a lidxi guíë tu' runa' libán que didza' dxí'a, <sup>14</sup> pero bití' bi ré'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ëni quézinu' ca'. <sup>15</sup> Nadxi ca' que lë ni na' buzá'abí' Onésimo ga zu' tu chí'ido' para udxinbí' tsaz ga zu'. <sup>16</sup> Na'a, bití'rö gácabi' quiu' ca tu bí'i nadó'o, pero gácabi' quiu' ca bí'i böchi'cazu', tu' nácabi' bí'i bóchi'ru' réajlë'ëbí' Cristo, en nadxí'iru'-bí'. Nácabi' caní quia' neda', ate' ral-la' gácaröbí' ca' caní quiu', calégasö ca böchi' luzó'o, pero lësca' ca bí'i bóchu'u réajlë'ëbí' Xanru' Jesucristo.

<sup>17</sup> Que lë ni na', channö nunu' neda' tuz, ben lëbí' bal ca neda' caz runu' bal. <sup>18</sup> Channö bi xíguia' benbí' quiu' o channö bi rál-la'bí' quiu', gunnatëz neda' ral-la'a.

<sup>19</sup> Neda', Pablo, len na'a caza' ruzúaja' quiu' lu guichi lë ni: Neda' caz quizzja' bi rál-la'bí', en calëga guía' lí': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. <sup>20</sup> Ca' gaca, bócha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' bóchu'u réajlë'a Cristo, ate' caní gunu' ga huöáca lãdxa'a.

<sup>21</sup> Ruzúaja' quiu' lu guichi ni, tu' ruzxöni lãdxa'a lí', gunu' ca rna xtídza'a, en nözda' gunu' ia'latí' ca lë na' chigúta'yua' lo'. <sup>22</sup> Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guíë ni, ate' guí-da' ga zóalí' tu' rulídzalí'-në' Dios, en rinábalí' lahuë' nía' quia' neda'.

## Pablo ruzúajë' lu guichi le rugapa Dios Filemón

<sup>23</sup> Epafra, bönni' yú'ulenë' neda' tsözxón lidxi guíë ni tu' runë' xichinë' Jesucristo, rugapë' Dios lí'. <sup>24</sup> Lësca' tu'gapë' Dios lí' Marcos, en Aristarco, en Demas, en Lucas, yugu' bönni' ni túnlenë' neda' tsözxón dxin queë' Cristo.

<sup>25</sup> Rinábida'-në' Xanru' Jesucristo uzá' lãdxë'ë queéli'. ¡Ca' gaca!



# Hebreos

## Dios bé'lenë' rë'u didza' lu ru'ë Zxí'ini cazë'

**1** Zián luzuí, en zián ca benë' Dios, bé'lenë' xuz xtó'oru' didza' dza ni'te lu ruá'agaquië' bönni' gu-lu'ë didza' uláz queë'. <sup>2</sup> Na'a, ga ruúdxí xtídzë'ë, dza ni zóaru' na'a, Dios bé'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzülió ni. <sup>3</sup> Zxí'inë' na' náquië' ca tu le rulu'í lahui yöl-la' zön queë' Dios, en ca náquië' Zxí'inë' rulu'í lahui idú le náquië' Dios caz. Run cazë' ga nacuática'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchö'ë cuita lë'ë ibëla Dios, Nu röö rinná bë' xitsátërö.

## Zxí'inë' Dios nayépisëtërë' ca yugu' gubáz lá'ayi

<sup>4</sup> Zxí'inë' Dios nayépisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. <sup>5</sup> Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë':

Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

<sup>6</sup> Lësca' caní, cate' Dios buzóë' Bi'í que cazë' lu yödzülió ni, gunné':

Yúgu'të gubáz lá'ayi queë' Dios ila'yéaj ládxi'gaquië' Lë'.

<sup>7</sup> Ca nácagaquië' gubáz lá'ayi queë', rnna:

Lë' runë' ga nácagaquië' gubáz lá'ayi queë' ca bö' rec-ja,

ate' gubáz lá'ayi huen dxin queë', runë' ga náca-gaquië' ca guí.

<sup>8</sup> Na'a, ca naca cazë' Zxí'inë', rnnë':

Ga rö'u rinná bë'u, inná bé'tica'su', Dios.

Tsahuí naca ca rinná bë'u.

<sup>9</sup> Nadxí'ínu' le naca tsahuí, en calëga le ruá' dö'.

Que lë ni na' Dios budödë' lu no'ö yöl-la' unná bë', en benë' ga ruzí'tëru' Li' xibé yöl-la' unná bë' ca le tu'zí'i xibé luzó'o.

<sup>10</sup> Lësca' caní rnnë':

Li', Xan, cate' gusí lo, benu' yödzülió,

ate' len ná'asu' buzú' lúzhiba.

<sup>11</sup> Huadödi quéguequi, pero Li', tsaz idí'u.

Yúgu'të itëbigaca ca ritëbi lari',

<sup>12</sup> en ca lari' utubu' léguequi, en utsó'o léguequi,

pero Li', catu caz utsá' cuinu' en catu caz igulu'.

<sup>13</sup> Dios catu caz gudxë' tuë' gubáz lá'ayi queë' ca gudxë' Zxí'inë', gunné':

Guró'ö cuita lë'a ibëla

cate' gunra' ga ulu'zechu zxíbigaca lo'

nupa bití' ta'lé'e Li' dxi'a.

<sup>14</sup> Yúgu'të gubáz lá'ayi queë' Dios nácagaquië' bö' huen dxin queë' Dios, ate' nasól-lë'ë légaquië' para ilá-calënë' nupa ni nulágaca.

## Bití' ral-la' ucá'anaru' cá'asö yöl-la' rusölá

**2** Que lë ni na', ral-la' gü'í ládxi'röru' le chibiyóniru', para cabí gaca chopá ládxi'ru'. <sup>2</sup> Guca bë' naca idútë li didza' na', le bidxín dza ni'te lu ná'agaquië' gubáz lá'ayi queë' Dios, ate' yúgu'të nupa gula'dödi bë' ca rnna didza' na', en bití' gulún ca rnna, Dios benë' léguequi xíguia' ca na' röjlöz le gulúngaca. <sup>3</sup> Lësca' caní bití' ca' uláru' rë'u lu xíguia' na' channö ucá'anaru' cá'asö yöl-la' rusölá ni, le benë' Lë' cazë' Xanru' libán que zí'alö, ate' nupa bila'yöni Lë' bulu'lu'í rë'u naca idútë li. <sup>4</sup> Lësca' caní Dios caz benë' tsözxón légaquië' ba nalí, tu' benë' le nácagaca bë', en le tun ga rubániru', en yugu' yöl-la' huáca zön. Gudísië' ca' yugu' le runödzjë' Dios Bö' Lá'ayi quégaquië' tsca gú'u-ni quézinë' Dios.

## Dios benë' ga böáquië' Jesús idú ca nácaru' rë'u

<sup>5</sup> Dios bití' budödë' yödzülió si' za' lu ná'agaquië' gubáz lá'ayi que yehua' yubá queë', lë na' ruí'iru' didza' que. <sup>6</sup> Na'a, ca naca lë ni, nazúaj lu guichi lá'ayi didza' bë' nu run ba nalí le rnna:

Dios, rubánide'eda' tu' ru'í ládxi'u bönachi.

Rubánide'eda' tu' rácalenu' léguequi.

<sup>7</sup> Ia'látisö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zön, en yöl-la' run bal, en budödu' yúgu'të le benu' Li' lu né'eguequi.

<sup>8</sup> Yúgu'të budödu' lu né'eguequi para ila'nná be'e le.

Nazúaj lu guichi lá'ayi lë na' rnna: "Budödu' lu né'eguequi yúgu'të." Bití' bi bucá'anë' le cabí budödë' lu né'eguequi, pero ga ridxintë na'a dza, bití' rilé'ëru' yu'u lu né'eguequi yúgu'të. <sup>9</sup> Réquibe'ëru' le guca queë' Jesús. Tu chí'isö, Dios benë' ga böáquië' ia'látisö cuidí' ca yugu' gubáz lá'ayi que yehua' yubá queë'. Guljë' bönachi para gútië', ate' gudí' guzxaqué'ë Jesús lu yöl-la' guti uláz quégaca yúgu'të bönachi, tu' buzá' ládxi'ë

Dios queëru' caní. Tu' benë' Jesús caní, Dios benë' ga rata' queëru' yöl-la' zxon, en yöl-la' run bal.

<sup>10</sup> Dios benë' yúgu'të le rilé'uru', en runë' ga nacuatí-ca'sö. Dios benë' ca ral-la' gunë' cate' benë' ga naca bë náquië' Cristo idú tsahui' ní'a que le gudí'i guzáquë'ë. Caní benë' Dios queë' Cristo, Nu bideli' yöl-la' rusöla para gaca ichë'ë bönachi zían yehua' yubá queë'.

<sup>11</sup> Cristo ruinë' tsahui' bönachi para ilequi quez queë' Dios. Tuzë' náquië' Xúzguequi nupa na' ruinë' Cristo tsahui', en Xuz cazë'. Que læ ni na', bití' ca' rutuí'inë' Zxí'inë' Dios cate' rnnë' nácagaquië' böchi' luzë'ë. <sup>12</sup> Ca naca læ ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhü'lö bönachi tu'dubi quiu', gul-la' yöl-la' ba quiu'.

<sup>13</sup> Lësca' caní rnnë':

Uzxöni ládxa'a-në' Dios.

Ga yúbölö nazúaj le rnnë':

¡Bulí'yútsöca' neda', en yugu' zxí'inë', nupa na' Dios bennë' quia'!

<sup>14</sup> Que læ ni na', tu' néquiquequinë' bëla' en rön yugu' zxí'inë' na', lësca' caní Cristo ben cuinë' ca nácagaquië'. Guljë' bëla' en rön. Caní guljë' para guca gútië', en caní guca busunítië' yöl-la' huáca unná bë' que tu' xihui', nu na' dë lu në'e guti bönachi. <sup>15</sup> Caní benë' Cristo para guca busanë' yúgu'të nupa gulaca ca bönni' nadó'o-gaquië' tsanni ni nacua' nabángaca, tu' guladxi yöl-la' guti. <sup>16</sup> Naca bë' bití' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxí'ini xí'sóë' Abraham. <sup>17</sup> Que læ ni na', ben bayudxi böáquië' Cristo idú ca nácagaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládxë'ë bönachi, enca' para gunë' le gun ga gata' lu në'ë ugúë' dul-la' nabága'gaca bönachi. <sup>18</sup> Na'a, tu' gudí'i guzáquë'ë Lë cazë' Cristo, ate' guzxí' bë' tu' xihui' Lë', que læ ni na' napë' yöl-la' huáca gácalenë' nupa ni, rizí' bë' tu' xihui' léguequi.

### Jesús nayépisëtë'rë' ca Moisés

**3** Que læ ni na', böchi' luzá'ado', libí'ilí' na' nácalí' quez queë' Dios tu' bulidzë' Dios libí'ilí', bulí'yú dxí'a ca náquië' Jesucristo. Náquië' gubáz nasól-lë'ë Dios, enca' bixúz lo que le nazí' lu ná'aru'. <sup>2</sup> Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. <sup>3</sup> Nayépisëtë'rë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu' yu'u ca naca huen dxin zoë' lu yu'u na'. <sup>4</sup> Yúgu'të yu'u, zoa nu ben le, pero Dios náquië' Nu ben yúgu'të le rilé'uru'. <sup>5</sup> Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, <sup>6</sup> pero Cristo runë' ca rnna xtídzë'ë Dios, en náquië' Zxí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxí'ru', enca' ca rudzëjalenru' læ na' runru' löza.

### Dë lataj ga ulu'zí' ládxí'gaca bönachi queë' Dios

<sup>7</sup> Que læ ni na', nazúaj lu guichi ca rnnë' Dios Bö Lá'ayi le rnna:

Na'a, channö riyónilí' didza' ru'ë Dios,

<sup>8</sup> bití' gácalí' zidi lu icja ládxí'do'olí'

ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asö.

<sup>9</sup> Gula'zí' bë'ë xuz xtó'olí' neda' ni'

sal-la' bila'lé'enë' le bena' idú ca choá' iz.

<sup>10</sup> Que læ ni na' guléda' bönachi dza ni', en gunnía':

"Ta'chíxítica'sinë' ca ta'zá' ládxí'gaquië'.

Bití' té'ënnë' ila'nózinë' le ré'ënda' ilunë'."

<sup>11</sup> Que læ ni na' guléda' légaquië', en bena' tsutsu xtídz'a, gunnía':

"Bití' ila'yázië' ga ulu'zí' ládxí'gaquië' tsözxón len neda'."

<sup>12</sup> Gulí'gún chí'i cuinlí', böchi' luzá'ado', para cabí gácalí' nitulí' libí'ilí' tu bönni' xihui' cabí réajlë'ë, en para cabí usanlí'-në' Dios ban. <sup>13</sup> Na'a, bulí'zéajini' tuli' ia'tulí' yúgu'të dza, tsanni ni naca dza ni zóaru' na'a, para cabí sí' ye'e le naca xihui' libí'ilí', en para cabí gácalí' nitulí' libí'ilí' zidi lu icja ládxí'do'olí'. <sup>14</sup> Yúgu'tëru' gunru' tsözxón Cristo channö gácaru' tsutsu ga idxinrö dza údxi, ca na' gusí lo ridipa ládxí'ru'.

<sup>15</sup> Caní ral-la' gunru' tsanni ni rnna:

Na'a, channö riyónilí' chí'ë Dios,

bití' gácalí' zidi lu icja ládxí'do'olí',

ca na' gulaca nupa ni' gula'dá'baga' Dios.

<sup>16</sup> ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. <sup>17</sup> ¿Nupxi na' gulënë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. <sup>18</sup> ¿Nupxi ni' benë' tsutsu xtídzë'ë Dios, gunné' bití' ila'yaza ga ulu'zí' ládxí'guequi tsözxón len Lë'? Gulaca nupa ni' bití' gulún ca rnna xtídzë'ë Dios. <sup>19</sup> Na'a, réquibe'uru' bití' guca ila'yázië' tu' cabí gula'yéajlë'ë Dios.

**4** Na'a, tsanni ni nagá'ana le guzxí' lu në'ë Dios queëru' para gaca tsú'uru' lataj queë' ga uzí' ládxí'ru', ral-la' gádxiru' para cabí unítiru' lataj tsú'uru' ni'.

<sup>2</sup> Biyönru' rë'u didza' dxí'a ca na' bila'yönnë' légaquië', pero légaquië' bití' bulu'zí'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le. <sup>3</sup> Rë'u ni réajlë'ëru' Dios, en tsú'uru' lataj queë' ga uzí' ládxí'ru'. Raca ca na' gunné' Dios:

Que læ ni na' guléda' légaquië'

en bena' tsutsu xtídz'a, gunnía':

Bití' tsú'ugaquië' ga ulu'zí' ládxí'lenë' neda'.

Dë lataj tsú'uru' rë'u ga uzí' ládxí'lenru'-në' Dios, sal-

la' budxi benë' Dios xichinë' dza ni'te cate' ni' benë'

yödzölió ni, en chiruzí' ládxë'ë. <sup>4</sup> Nazúaj lu guichi lá'ayi

ga ru'í didza' ca naca que dza igadxi, le rnna: "Buzí'

ládxë'ë Dios dza igadxi yugu' lu dxin benë'."

<sup>5</sup> Ga yúbölö rnna: "Bití' tsú'ugaquië' ga ulu'zí' ládxí'lenë'

neda'."

<sup>6</sup> Nupa ni' bila'yöni zí'aló didza' dxí'a, bití' guyú'ugaca ni' tu' cabí gulún ca rnna xtídzë'ë Dios. Que

læ ni na', ral-la' tsú'ugaca bönachi yúbölö ni'. <sup>7</sup> Que læ ni

na' ca', Dios bulu'e tu dza yúbölö, gunné: "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónilí' didza' ru'ë Dios, bití' gácalí' zidi lu icja ládxí'do'olí'.  
<sup>8</sup> La'tu' bené' Josué ga bulu'zí' ládxí'gaquié' cate' gu-la'yu'ë lu xiyúgaquié', bití' bë'ë Dios didza' gudödi ní' que ia'turö dza cate' nu uzí' ládxí'len Lë'.<sup>9</sup> Que lë ni na', nagá'ana quégaca bönachi queë' Dios lataj ila'déli'né' ga ulu'zí' ládxí'gaquié'.<sup>10</sup> Nupa tsú'ugaca ga ulu'zí' ládx-í'lengaca Dios, ulu'zí' ládxí'gaquié' lu dxin tuné', ca na' buzí' ládxë'ë Dios yugu' lu dxin bené' Lë'.<sup>11</sup> Que lë ni na', ral-la' gü'í' ládxí'ru' tsú'uru' ga ní' uzí' ládxí'lenru'-në' Dios. Bití' ral-la' tá'baga'ru' xtídzë'ë ca na' gulún nupa ní' bití' gula'yéajlë' Dios, en bití' gula'yu'ë ní'.

<sup>12</sup> Xtídzë'ë Dios naca ban caz, en napa caz yöl-la' huá-ca. Richúgurö ga rë' ca gué' tuchi' natuchi' iropa ru'í. Richugu ridxín ga tá'dzaga bö' naca cázaru', en le zoa lu icja ládxí'do'oru', enca' röxaj ga ridxintë lu dxita lu bin. Run ga naca bë' le ribequi ícjaru', en le rizá' ládx-í'ru'.<sup>13</sup> Bití' bi gaca ucáchi'ru' ga bití' gaca ilé'ené' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

#### Jesús náquié' bixúz lo, Nu nácatërö zxön

<sup>14</sup> Zoa queéru' tu bixúz lo, nácatërë' zxön, Nu na' gudödi ní' yehua' yubá, Jesús, Zxí'iné' Dios. Que lë ni na' ral-la' ugá'anaru' tsutsu ca naca le nazí' lu ná'aru'.  
<sup>15</sup> Zoa queéru' tu bixúz lo, Nu gaca huéchi' ladxí' rë'u ca nácagaca le raca queéru', tu' guzxí' bë' tu' xihui' Lë' cazë' idútë ca na' rizí' bë' tu' xihui' na' rë'u, pero bití' bi dul-la' bené' Lë'.<sup>16</sup> Que lë ni na', idú ládxí'ru' ral-la' ibí-ga'ru' gala' ga rö'ë rinná bë'ë Dios, Bönni' ruzá' ladxë'ë queéru', en inábaru' lahuë' huéchi' ládxë'ë rë'u, en uzá' ládxë'ë queéru', para gácalenë' rë'u cate' bi raca queéru'.

**5** Dios ribó cazë' nútítës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzaj bönachi, en yugu' böa' bëdxi tútigaquié'-ba' lu bucugu lá'ayi tu' nözi dul-la' nabága'gaquié'.<sup>2</sup> Bixúz lo na', tu' raca queë' lébisö ca raca quégaca bönachi, gaca gáquié' zxön ladxí' len nupa nácagaca yugu' bönni' canóz, en nupa tá'chixi ta'nigui.<sup>3</sup> Que lë ni na', tu' náquié' bixúz lo na' bönáchisö, ral-la' cu'ë lahuë' Dios böa' bëdxi na' tútigaquié'-ba' lu bucugu lá'ayi ní'a que dul-la' nabaga' cazë', ca na' runé' ca' ní'a que dul-la' nabága'gaca bönachi.

<sup>4</sup> Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón.<sup>5</sup> Lësca' caní guca queë' Cristo. Bití' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzóa' Li' na'a.

<sup>6</sup> Lësca' caní gudxë' Lë' le nazúaj ga yúbölö, gunné':  
 Li' nácatíca'su' bixúz,

ca na' gúquié' Melquisedec bixúz.

<sup>7</sup> Cristo, cate' ní' zoa cazë' yödzölió ni, bulidzë' Dios, en gúta'yuë' lahuë'. Guródxí'ë, en guródxë' lahuë' Dios, Bönni' guca usólé' Lë' lu yöl-la' guti, ate' Dios biyönné' Lë' tu' gúdxiné' Lë' idú ládxë'ë.<sup>8</sup> Sal-la' gúquié' Zxí'iné' Dios, bizédë' gunë' ca rnna xtídzë'ë Dios tu' gulaca queë' yugu' le gudí' guzxáquë'ë.<sup>9</sup> Cate' chigúquié' Cristo idú ca ral-la' gáquié' tu bixúz lo, Dios bené' Lë' Bönni' rusólé' tsaz yúgu'të nupa tun ca rnna xtídzë'ë.  
<sup>10</sup> Ní'irö Dios buzóë' Lë' para gáquié' bixúz lo ca na' gúquié' Melquisedec na' bixúz lo.

#### Zoa bönadxi queéru' huóaj ládxí'ru', en tá'baga'ru'-në' Cristo

<sup>11</sup> Ca naca lë ni, zían le ral-la' gü'í'ilentu' libí'ili' didza', le naca böniga quíxjö'í'tu' libí'ili', tu' cabí réajni'inilí'.  
<sup>12</sup> Chigudödi dza ral-la' gaca usédilí' bönachi xtídzë'ë Dios, tu' chibiyónilí' xidzé, pero riquínilí' nu quíxjö'í' libí'ili' leyúbölö yugu' le cabí naca böniga nazí' lu në'e nu sí' réajlë'. Nagá'anali' ca yugu' bí'i hué'enido' ta'quínibí' nidxi', en calëga la' huagu tsutsu.<sup>13</sup> Yúgu'të bönni' naquíniguequiné' nu usedi légaquié' lë na' bití' naca böniga, nácagaquié' ca yugu' bí'ido' té'ajbi' nidxi'. Bití' nazédagaquié' ca sa'yéaj le naca tsahui'.<sup>14</sup> La' huagu tsutsu tu'z'í' xibé nupa chinál-lágaca, nupa na' gaca iléquibe'e le naca dxí'a, en le cabí naca dxí'a, tu' nugúngaquié' dxin yöl-la' réajni' quégaquié'.

**6** Que lë ni na', bití' ral-la' usédaticasíru' yugu' xibá buzédaru' cate' sí' gusí lo riyóniru' ca naca queë' Cristo. Ral-la' tsöjnóröru' para gácaru' idú bönachi queë' Cristo. Bití' naquíni usédaru' leyúbölö yugu' xibá bití' naca böniga:

ca ral-la' ubí'i ládxí'ru',

en ca bítí'rö gunru' le ruá' dö',

en ca ral-la' tséajlë'ëru'-në' Dios,

<sup>2</sup> en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguié' quégaca bönachi tuá' dö'.

<sup>3</sup> Caní gunru' channö gunné' Dios rë'u lataj.

<sup>4</sup> ¿Naru' huácatsö gunru' ga ulu'bí'i ládxí'gaca leyúbölö nupa tu'huóaj ladxí', en ta'dá'baga' Dios? Channö bidxín quéguequi bení' queë' Dios, en bulu'zí' xibé le runödzjë' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxí'a queë' Dios en yöl-la' huáca que dza sí' za', en channö ní'irö tu'huóaj ladxí', en ta'dá'baga' Dios, bití' ca' gaca nu gun ga ulu'bí'i ládxí'gaca leyúbölö, tu' gaca tsca ulu'dá' leyúbölö Zxí'iné' Dios lë'e yaga cruz en ilún tsca ulu'titaj Lë' lahui' lógaca bönachi.<sup>7</sup> Nupa tun caní náca-gaca ca yu na' ruzí' xibé nisa guiój le ribixi láhuilö zían luzuí. Channö yu na' runödzaj le tu'z'í' xibé nupa tá'ana yu na', raza ládxë'ë Dios le,<sup>8</sup> pero channö ruzóasö yu na' lubá yötsi', en bësigá', naca ditaj, en nabía dö', en naca para nu uzegui le.

### Le runru' löza le run ga nácaru' tsutsu

<sup>9</sup> Sal-la' ru'ítu' caní didza', libí'ili' na' nadxí'itu', réquitu' ruzí'ili' xibé le nácacagarö dxí'a, le tu'z'í' xibé nupa nulá-gaca. <sup>10</sup> Dios náquië' tsahui', en bití' gal-la ládxi'è dxin tsahui' benlí', en yugu' le benlí' tu' nadxí'ili' Lè'. Gú-calenlí' nupa néquiguequi quez queë' Dios, en runlí' xi-chínguequi. <sup>11</sup> Na'a, ré'ënitú' gú'í' ládxi'li' luzá'alí' tu ia-tulí', en gunlí' caní ga idxinrö dza údxí, para gata' idú queéli' lè na' runlí' löza. <sup>12</sup> Ré'ënitú' cabí gácalí' xöhuëdi, pero gunlí' ca tun nupa ta'yéajlè' Dios, en ta'böza zxön ladxí', para idéli'li' yugu' le guzxi' lu në'ë Dios gunnè' queéru'.

<sup>13</sup> Caní gaca, tu' benè' tsutsu Dios xtídzè'è cate' guzxi' lu në'ë bi gunnè' queë' Abraham. Tu' cabí zoa nu ná-carö lo ca Dios, que lè ni na' buzetaj cuinë', cate' ní' benè' tsutsu xtídzè'è. <sup>14</sup> Caní gunné' Dios: "Le nácate' guna' ga gaca dxí'a quiu', en guna' ga ila'yánda'abi' xzí'ini xí'sú'." <sup>15</sup> Gulözè' Abraham zxön ladxí', ate' bidéli'nè' le guzxi' lu në'ë Dios gunnè' queë'. <sup>16</sup> Cate' tu bönni' runè' tsutsu xtídzè'è, ruzötjè' nu nácatèrö lo ca lè', ate' lè ni ruzóa dxisö yúgu'tè didza' bizxaj, tu' nunè' tsutsu xtídzè'è. <sup>17</sup> Que lè ni na' Dios benè' tsutsu le guzxi' lu në'ë gunè', en buzötaj cuinë', tu' gú'unné' ulu'ínè' nupa ulu'z'í' xibé le guzxi' lu në'ë unödzej' quéguequi, nácada' löza, en tsaz naca le nuzóa lahuè' gunè'. <sup>18</sup> Le guzxi' lu në'ë Dios, en le benè' tsutsu, chopa ni catu caz idzá'gaca, en ca naca quégaca chopa ni, bití' gaca sí' yè'è Dios. Caní benè' Dios para gácada' löza queéru' tu le huè tsahui' rë'u. Ruzxöni ládxi'ru' Lè' idéli'ru' lè na' runru' löza le gunné' sí'ru'. <sup>19</sup> Lè na' runru' löza ruzóatica'sö tsutsu icja ládxi'do'oru', en naca ca tu du guíë ruzóa dxisö barco. Lè na' runru' löza run chí'è Cristo ní'a queéru' ga ní' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' röö yehua' yubá. <sup>20</sup> Guyázië' Jesús uláz queéru' ca Nu röjnöru loru' ga ní' zoë' Dios, ate' Dios nuzóë' Lè' náquië' tsaz bixúz lo ca na' gúquië' Melquisedec bixúz lo.

### Jesús náquië' bixúz lo ca gúquië' Melquisedec

**7** Melquisedec gúquië' bönni' na' gunná bë'ë lu yödzo Salem, enca' bixúz queë' Dios, nayépisètèrè'. Cate' suzè'è Abraham, söhuó'jè' gudödi guca gudil-la cate' bucul-lè' yugu' bönni' ta'nná bë'ë, birúajè' Melquisedec na', yöjtságuië' Abraham, en gunábinè' Dios gun lá'ayè' Abraham. <sup>2</sup> Abraham bë'ë queë' tu cö' tu' chi cö' que yúgu'tè le bidéli'nè' lu gudil-la na'. Ca lè' Melquisedec na' rnna lu didza' xidza': "Bönni' Unná Bè' Tsahui'", en náquië' ca' Bönni' unná bë' que yödzo Salem, le rnna lu didza' xidza': "Bönni' Unná Bè' Ribequi Dxíë'." <sup>3</sup> Bití' zoa lu guichi le rnna gula'cu'è xuz xiné'è, o xuz xtá'ahuè', en bití' nazúaj dza guljè' o dza gútië', pero náquië' ca náquië' Xzí'inè' Dios tu' náquië' tsaz bixúz lo.

<sup>4</sup> Bulí'yútsöca' na'a, ca na' gúquië' zxön Melquisedec na', tu' lè cazè' xúziru' Abraham bë'ë queë' tu cö' tu' chi

cö' que lè na' guléajè' lu ná'agaquië' bönni' ta'nná bë'ë ní' bucul-lè' lu gudil-la. <sup>5</sup> Lu xibá queë' Moisés, Dios rinná bë'ënè' yugu' xzí'ini xí'sóè' Leví, nupa nácacaga bixúz, ila'zi'è tu cö' tu' chi cö' que le ta'z'í' bönachi Israel, sal-la' nácacaga dí'a dza quégaquië', tu' nácacagaquië' yúgu'tè' xzí'ini xí'sóè' Abraham. <sup>6</sup> Melquisedec na' bití' náquië' dí'a dza quégaquië', pero guzxi'è tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunnè' queë'. Lësca' Melquisedec na' gunábinè' Dios gun lá'ayè' Abraham, <sup>7</sup> ate' cuntú' nu gaca tá'baga' lè na' rnna: Nu nadéli'rö lahuè' Dios rinábini Dios gun lá'ayè' nu nacuídírö. <sup>8</sup> Na'a, dza ni zóaru' na'a, nupa ta'z'í' tu cö' tu' chi cö' lu ná'agaca bönachi nácacaga ca' bönachi tati caz, pero Melquisedec na', zoa le run ba nalí queë' le rnna zoë' nabanè'. <sup>9</sup> Na'a, huáca innaru' queë' Leví, en quégaca xzí'ini xí'sóè', nupa na' ta'z'í' tu cö' tu' chi cö' lu ná'agaca bönachi, lësca' gula'guíxjè' tu cö' tu' chi cö' cate' ní' Melquisedec na' guzxi'è tu cö' tu' chi cö' lu në'ë Abraham, xuz gula gudödi quégaquië'.

<sup>10</sup> Caní naca, tu' huáca innaru' Abraham ní' nu'è lè'è Leví, en yugu' xzí'ini xí'sóè' cate' ní' yöjtságuië' Melquisedec lè', tu' cabí náljaniguequinè'.

<sup>11</sup> Ta'z'í' bönachi Israel xibá gunná bë'ë Moisés lu ná'agaca bixúz, nupa nácacaga xzí'ini xí'sóè' Leví ga nababè' ca' Aarón, bixúz lo. Na'a, la'tu' guca ulu'huóáca bönachi idú tsahui' lahuè' Dios tu' tun ca rinná bë' xibá queë' Moisés, bití' ben bayudxi soa ia'túé' bixúz ca gúquië' Melquisedec, en calèga ca gúquië' Aarón.

<sup>12</sup> Channö rutsé'è Dios ca ral-la' gáquië' bixúz, run bayudxi utsé'è ca' ca naca xibá queë'. <sup>13</sup> Xanru', Nu na' nazúaj lu guichi ca naca queë' yugu' lè ni, nababè' ia-turö cö' xzí'ini xí'sóè' Israel ca le nababè' Leví na', ate' que cö' xzí'ini xí'sóè' ga nababè' Xanru', cuntú' nu guca bixúz lahuè' Dios. <sup>14</sup> Naca caní tu' naca bë' guljè' Xanru' lu cö' dí'a dza queë' Judá, ate' Moisés bití' bë'è didza' queë' Judá na' cate' bë'è didza' quégaca nupa ral-la' ilaca bixúz.

<sup>15</sup> Nácatèrö bë' lè ni ní'a que le raca na'a. Ca na' gúquië' Melquisedec bixúz, chibulu'í' lahuè' ia'turè' bixúz, Jesús. <sup>16</sup> Bönni' ni, bití' gúquië' bixúz tu' rinná bë' xibá ca ral-la' ilaca dí'a dza queë', pero náquië' bixúz tu' napè' yöl-la' huáca que yöl-la' na'bán le catu caz údxí.

<sup>17</sup> Nazúaj lu guichi lá'ayi le run ba nalí queë' le rnna: Tsaz nacú' bixúz

ca na' gúquië' Melquisedec bixúz.

<sup>18</sup> Na'a, nadúa xibá gula ní', tu' cabí gudapa yöl-la' huáca unná bë', en bití' bi guca gun. <sup>19</sup> Xibá queë' Moisés na' bití' guca un bönachi idú tsahui'. Na'a, chiguyú'u tu le runru' löza le nácarö dxí'a, le run ga gaca ibíga'ru' gala' ga zoë' Dios.

<sup>20</sup> Cate' benè' Dios ga náquië' Jesús bixúz, benè' tsutsu xtídzè'è. <sup>21</sup> Dios bití' benè' tsutsu xtídzè'è cate' bucu'è bönachi ní' ca bixúz, pero cate' benè' ga náquië' Jesús bixúz, benè' tsutsu xtídzè'è, gunné':

Bena' tsutsu xtídzá'a neda', Xanu', gunnía':

"Bití' utsá'a ca guna'.

Tsaz nacú' bixúz

ca na' gúquië' Melquisedec bixúz."

<sup>22</sup> Que lè ni na', Cristo náquië' Nu run ga naca löza didza' rucá'ana tsahui' le nácarö dxi'a ca lè na' guca zí'alö. <sup>23</sup> Yugu' bixúz ni' guláquië' bönni' zían, tu' cabí guca ulu'gá'anë' yödzülió ni tu' gulátië', <sup>24</sup> pero tu' zóaticasë' Jesús, tsaz náquië' bixúz, en bití' gaca nu huöáza xilatjé' para gaca bixúz. <sup>25</sup> Que lè ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lè', tu' zóaticasë' nabanë', en rnnë' dxi'a uláz quégaquië' lahuë' Dios.

<sup>26</sup> Ben bayudxi soa tu bixúz lo caní queéru'. Náquië' lá'ayi, en idú tsahui', en bití' náquië' tsözxón bönachi dul-la', pero nayépisëtërë' ca yúgu'të le nacua' ni' yehua' yubá. <sup>27</sup> Jesús ni, bití' náquië' ca yugu' bixúz lo yödzülió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bédxi lahuë' Lè' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljé' xichón cazë' tu' nözi dul-la' nabága'gaca yúgu'të bönachi. <sup>28</sup> Lu xibá queë' Moisés bönachi bití' nácgaca idú dxi'a nácgaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

### Jesús náquië' Bixúz Lo queéru'

**8** Na'a, ca rnna lè na' si' gunnía', naca caní: Zoa queéru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. <sup>2</sup> Lë' runë' dxin ca Bixúz Lo lu lataj nácatërö lá'ayi, le naca yudo' le naca idútë, lè na' buchisë' Xanru', en calëga bönachi. <sup>3</sup> Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichóngacaba' böa' bédxi lahuë' Dios. Que lè ni na' ben bayudxi soa bi gulu'ë Cristo lahuë' Dios. <sup>4</sup> La'tu' zoë' luyú ni, bití' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. <sup>5</sup> Yugu' bixúz ni tunë' dxin que tu le rulu'ísö, en le naca ca tu bixín que lè na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lè na' buluí'ida' lí' lu guí'a ní'." <sup>6</sup> Na'a, Bixúz Lo queéru' ni runë' dxin que le nácatërö lesaca', ate' ní'a que le benë' Lè' zoa tu didza' rucá'ana tsahui' queéru' le nácatërö lesaca', en le ruí'i didza' que le nácatërö lesaca' guzxí' lu në'ë Dios gata' queéru'.

<sup>7</sup> La'tu' gudapa didza' na' rucá'ana tsahui' le guzóa zí'alö idútë yöl-la' huáca, bití' ben bayudxi soa didza' buropi ni rucá'ana tsahui'. <sup>8</sup> Na'a, Dios rulu'ë bití' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

<sup>9</sup> Bití' gaca ca guca didza' rucá'ana tsahui' na', lè na' bénlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

<sup>10</sup> Que lè ni na', caní gaca didza' ucá'ana tsahui' gúnlena' bönachi Israel tödi yugu' dza ni', rnnë' Xanru'.

Uchízia' icja ládxi'do'gaquië' xibá quia' en uzúaja' le lu icja ládxi'do'gaquië'.

Ní'irö gaca' Dios quégaquië'

ate' légaquië' iláquië' bönachi quia'.

<sup>11</sup> Bití' gun bayudxi nu usedi luzé'e, inná:

Bénbë'ë Xanru', tu' ilúnbë'ë yúgu'të' neda', ga isí lo nu naca cá'asö, ga idxintë nu naca lo.

<sup>12</sup> Huéchi' ládxa'a légaquië',

en uniti lahua' le cabí naca tsahui' gulunë', en bití'rö tsöjneda' dul-la' nabága'gaquië'.

<sup>13</sup> Cate' ni' ru'ë Dios didza' que tu didza' cubi rucá'ana tsahui', naca tu' chibigula lè na' guzóa zí'alö, ate' chizóa idúa lè na' nagula, en chinaca gulasi.

### Lataj lá'ayi dë luyú, en lataj lá'ayi dë yehua' yubá

**9** Na'a, didza' rucá'ana tsahui' na' guzóa zí'alö, dzá-gagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. <sup>2</sup> Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios. <sup>3</sup> Cúdzilö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, <sup>4</sup> ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en naca guí'ina na' oro. Lu guí'ina na' gula'cuá' zxíga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, lè na' bubó' ní'a në'e, enca' yugu' guió'j blaga na', nazúaj láhuilö'guequi didza' rucá'ana tsahui'. <sup>5</sup> Lahui guí'ina na' gula'cuá' chopá gubáz lá'ayi néquiquequini oro, lé'gaca querubín que lataj ga buluí'i lahuë' Dios, ate' bulu'zxó'a xiliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lè ni. Bití' dë lataj uzúaja' na'a idútë ca nácgaca lè ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. <sup>7</sup> Tuzë' bixúz lo guyázië' lu lataj buropi ni' tu luzuísö tu iz, en bí'ë rön le gulu'ë lahuë' Dios tu' nözi dul-la' naba-ga' cazë', enca' tu' nözi dul-la' nabága'gaca bönachi, dul-la' gulunë' le cabí gulé'quibe'enë'. <sup>8</sup> Caní ruzéa-jní'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lè na' bidzága didza' rucá'ana tsahui' le guzóa zí'alö. <sup>9</sup> Yugu' lè ni naca tu le rulu'ísö que le raca na'a dza. Yugu' le gula'gu'ë lahuë' Dios, en rön quégacaba' böa' bédxi na' gulútië'-ba' lahuë' Dios bití' guca ulu'ún idú dxi'a icja ládxi'do'-gaquië' bönni' ni' gula'yéaj ládxi'gaquië' Dios caní.

<sup>10</sup> Yugu' lè ni buluí'i lahui quégacasö le gulé'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lè ni buzóë' Dios quégaquië' ga bidxintë dza ral-la' utsé'ë yúgu'të.

<sup>11</sup> Na'a, chibudulu'í lahuë' Cristo, en náquië' Bixúz Lo que le naca idú dxí'a, le bilá' lahui ní'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en bití' néquini lu ní'a lu ná'agaca bönachi, en bití' naca que luyú ni. <sup>12</sup> Na'a, chiguyázië' Cristo lu lataj lá'ayi na', calëga len xichóngacaba' bédxido', en xichóngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. <sup>13</sup> Le nácatë xichóngacaba' bédxi, en chivo, en dö queëba' bédxido' buluzéguië'-ba', yugu' le gula'guë' lu ícjagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxí'a idú ca zeaj naca cazë' ca naca que yöl-la' judo' quégaquië'. <sup>14</sup> Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóaticasö. Na'a, xichönë' Cristo ruún idú dxí'a icja ládxí'do'oru' lu yugu' le gubágaru' le tun ga nu gati, para gaca gunru' xichinë' Dios ban.

<sup>15</sup> Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugüë' dul-la' gula'bagá' bönachi cate' ní' zoa didza' gula rucá'ana tsahui'. Gútië' ca' para gaca ila'zi'ë lë na' guzxí' lu në'ë Dios unödzejë' quégaquië' bönni' bulidzë', le zóaticasö. <sup>16</sup> Cate' ratië' nu bönni', en nucá'anë' tu didza' ca ral-la' ila'guisië' le nequi queë', run bayudxi gaca bë' chinátië' bönni' na' para gaca ilunë' ca rna didza' na' nucá'anë'. <sup>17</sup> Cate' chinátië' bönni' na', gaca ilunë' ca rna didza' na', pero tsanni ni zoë' nabanë', bití' ca' gaca ilunë' ca rna didza' na'. <sup>18</sup> Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti. <sup>19</sup> Cate' ní' gudíxjö'ínë' Moisés bönachi ní' ca nácgaca yúgu'të xibá queë' Dios, gudélë'ë rön quégacaba' bédxido', en quégacaba' chivo, le nutsí' nisa, ate' len tu guíxi'do' nazí' le hisopo, en lítsa'ba' bö'cu' xzila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi. <sup>20</sup> Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rna." <sup>21</sup> Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxí'gaquië' Dios. <sup>22</sup> Ca na' rinná bë' xibá na', látu'biqui' yúgu'të ral-la' un dxí'a rön léguequi, ate' channö cabí tu'laljë' rön, bití' udúa dul-la'.

### Xichönë' Jesucristo rugúa dul-la'

<sup>23</sup> Caní naca, ben bayudxi guzóa le bun dxí'a judo' luyú ni le naca tu le rulu'ísö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxí'a nupa ila'yaza le, le nácarö lesaca' ca xichóngacaba' böa' bédxido' caní. <sup>24</sup> Bití' guyázië' Cristo lataj lá'ayi néquini lu ní'a lu ná'agaca bönachi, lë na' naca tu le rulu'ísö ca naca le naca idú, pero guyázië' yehua' yubá caz para gaca ulu'í lahuë' na'a lahuë' Dios uláz queëru'. <sup>25</sup> Bixúz lo zoë' luyú ni razië' lataj nácatë' rö'ö lá'ayi tu tu iz len rön quégacaba' böa' bédxi, pero bití' run bayudxi tsázië' Cristo zían luzuí para udödi cuinë' lahuë' Dios. <sup>26</sup> La'tu' guca caní, gun bayudxi qui'í

sáquë'ë Cristo, en gátië' zían luzuí dza ní'te cate' guta' yödzülió ga ridxintë na'a dza, pero na'a cate' naca dza údxi, tsaz bulu'í lahuë' tu luzuísö, en budödi cuinë' lahuë' Dios, cate' gútië' para bugüë' dul-la' nabágaru'. <sup>27</sup> Ca na' run bayudxi ilátigaca bönachi tu luzuísö ate' tödi ní' uchí'a usöröë' Dios léguequi, <sup>28</sup> lësca' caní, gútië' Cristo tu luzuísö, cate' budödi cuinë' lahuë' Dios para bugüë' dul-la' nabága'gaca bönachi zían. Na'a, ulu'í lahuë' le buropi luzuí, calëga para ugüë' dul-la', pero para usölë' tsaz nupa ta'böza Lë'.

**10** Xibá na' gunná bë'ë Moisés guca tu le rulu'ísö ca zeaj naca le tsahui' sí' zá'gaca, en bití' guca idú ca nácgaca. Que lë ni na', xibá na' queë' Moisés bití' guca un idú tsahui' nupa ní' bila'dxín lahuë' Dios, en bíá'gaca rön quégacaba' böa' bédxido', lë na' gula'gú'uticasé' lahuë' Dios yugu' iz. <sup>2</sup> La'tu' guca un légaquië' idú tsahui', bití' gula'gú'uticasé' rön ní' lahuë' Dios, tu' cabirö iléquite'enë' bönni' guca caní quégaquië' nabága'gaquië' dul-la' channö chibu-lu'huóáquië' idú tsahui'. <sup>3</sup> Rön ní' gula'guë' lahuë' Dios yugu' iz busá' ládxí'gaquië' nabága'gaquië' dul-la'. <sup>4</sup> Caní guca, tu' cabí guca xichóngacaba' bédxi, en chivo ugúa dul-la'.

<sup>5</sup> Que lë ni na', cate' bidxinë' Cristo yödzülió ni, gudxë' Dios ca na' nazúaj lu guichi lá'ayi le rna: Bití' ré'ënu' nu cu'u rön quégacaba' böa' bédxi lo' pero benu' ga naca' bönachisö.

<sup>6</sup> Bití' raza ládxu'u nu uzegui'-ba' böa' bédxi lo', o nu cu'u xichóngacaba' lo' tu' nözi dul-la'.

<sup>7</sup> Ní'irö gunná: Ni zoa' para guna' ca ré'ënu' Lí', Dios. Naca ca na' nazúaj lu guichi lá'ayi ca gaca quia'.

<sup>8</sup> Lë na' nazúaj zí'alö rna: "Bití' ré'ëne' Dios nu cu'u rön quégacaba' böa' bédxi lahuë'." Didza' ni rulu'í rë'u bítí'rö raza ládxë'ë Dios lë ni sal-la' lu xibá queë' Moisés rinná bé'enë' Dios nu gun caní. <sup>9</sup> Gudödi ní' rna: "Ni zoa' para guna' ca ré'ënu' Lí', Dios." Didza' ni rulu'í rë'u rugüë' Dios lë na' gula'guë' lahuë' zí'alö, en ruzöë' xilataj le gulu'ë Zxí'ini cazë' lahuë'. <sup>10</sup> Na'a, Dios ruúnë' rë'u idú tsahui' tu' benë' Cristo ca ré'ëne' Dios cate' ní' budödi cuinë' lahuë' Dios uláz queëru', en gútië' tu luzuísö.

<sup>11</sup> Le nácatë yúgu'të bixúz luyú ni zúiguequinë' yugu' dza, en tunë' xichíngaquië', en la' tuz ca tunë', ta'guë' lahuë' Dios zían luzuí xichóngacaba' böa' bédxi, yugu' le cabí gaca ulu'gúa dul-la'. <sup>12</sup> Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. <sup>13</sup> Ribözë' ní' dza gunë' Dios ga ulu'zechu zxíbigaca lahuë' nupa bití' ta'l'é'e Lë' dxí'a. <sup>14</sup> Ní'a que tuz le gulu'ë lahuë' Dios, tsaz benë' ga nácgaca idú tsahui' nupa na' bunë' dxí'a, en bubéajë' léguequi quez queë' Dios. <sup>15</sup> Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rna:

<sup>16</sup> Caní gaca didza' ucá'ana tsahui' gúnlena' légaquië' tödi yugu' dza ní', rnnë' Xanru'.

Uchízia' icja ládxí'do'gaquië' xibá quia', en uzúaja' le lu icja ládxí'do'gaquië'.

<sup>17</sup> Gudödi na' gunné':

Bíti'rö tsöjneda' dul-la' nabága'gaquié'  
en dö' biá'gaquié'.

<sup>18</sup> Que læ ni na', channö chinadúa dul-la', bití'rö run bayudxi nu bi cu'u lahuë' Dios tu' nözi dul-la'.

### Huáca ibíga'ru' gala' ga zoë' Dios

<sup>19</sup> Na'a, yugu' böchi' luzá'ado', idú ládxi'ru' gaca idxinru' lahuë' Dios caz, n'ra que xichönë' Jesucristo. <sup>20</sup> Tséajlenru' tu nöza cubi, en idú tsahui' le nuzöé' Cristo, le ridxín cúdzil'ö lari' na' busayaj ga nu riyaza lataj idú lá'ayi na', o huáca innaru', nöza na' gusaljè' Cristo n'ra queéru' tu' budödë' idütë le naca cazë'. <sup>21</sup> Jesús náquië' queéru' tu bixúz nayépisëtëre', en rinná bé'enë' bönachi queë' Dios. <sup>22</sup> Que læ ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queéru', tu' réajlë'ëru' Cristo, tu' chibunë' dxí'a icja ládxi'do'oru', para cabí uxösa ládxi'do'oru' rë'u, ate' gudibë' idütë le naca cázaru' len le naca tu nisa nácatëro idú. <sup>23</sup> Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí' lu ná'aru', le guzxi' lu në'ë Dios gunné' queéru', ate' Lë' runë' ca rnnë'. <sup>24</sup> Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnrröru' ca' le naca tsahui'. <sup>25</sup> Bal-la bönachi bití'rö tu'dubi len rë'u. Bití' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnrröru' caní tu' rilé'ëru' chizóa idxín dza huödë' Xanru'.

<sup>26</sup> Channö zéajlenru' runru' dul-la' tödi núbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. <sup>27</sup> Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, læ na' uzéguica'sö nupa ta'dá'baga' Dios. <sup>28</sup> Cate' nu bönni' buzöé' xibá queë' Moisés tsölá'alö, gulútië' læ' channö chopá tsona bönachi gulún ba nalí que le benë', ate' cuntú nu buéchi' ladxí' bönni' na'. <sup>29</sup> Na'a, nu bönni' uzöé' tsölá'alö Xzí'inë' Dios, en uzöé' tsölá'alö ca' xichönë' le run tsutsu didza' rucá'ana tsahui', le ruún rë'u dxí'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxí' queéru' le riquíniru'. <sup>30</sup> Caní gaca, tu' núbë'ëru'-në' Dios, Nu guná: "Quia' neda' nequi yöl-la' ruzí' læbi. Neda' ubí'a qué-gaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'." <sup>31</sup> Ral-la' gadxi idzöbi nu ral-la' sí' xíguia' lu në'ë Dios ban.

<sup>32</sup> Gulí'tsöjné yugu' dza chigula'dödi cate' ní' sí' bidxín queé'li' bení', ate' biá' gulenlí' zían le bulu'saca' zí'ë libí'ilí'. <sup>33</sup> Bulu'lidza ditaj bönachi libí'ilí', en bulu'dxía libí'ilí' dö' lahui' lógaca bönachi, ate' benlí' tsözxón ca' nupa gula'guí' gula'zaca' caní. <sup>34</sup> Caní guca, tu' buéchi' ládxi'ilí' nupa nadzúngaca lidxi guíë, en lu yöl-la' rudzeja queé'li' biá' gulenlí' nupa gula'béaj lídxilí' yugu' le guta' queé'li'. Caní benlí' tu' nózilí' nequi queé'li' le nácarö dxí'a, en le zóatica'sö ní' yehua' yubá. <sup>35</sup> Na'a, bití' ucá'analí' læ na' runlí' löza, le naché' tu le zxön ubí'ë Dios queé'li'. <sup>36</sup> Run bayudxi cózalı' zxön ladxí', para cate' chibenlí' ca ré'në' Dios, sí'ilí' le guzxi' lu në'ë gun-

në' queé'li', ca na' nazúaj lu guichi lá'ayi, ca gunné' Dios le rnna:

<sup>37</sup> Ia'tú chí'ido'osö idxinë' Bönni' na' ral-la' guídë'.  
Bití' ca' tsenë'.

<sup>38</sup> Ní'irö nu naca tsahui' lahua' neda',  
ulá nu na' tu' réajlë' neda'.  
Channö huóaj ladxí', en tá'baga' neda',  
bití'rö tsaz ládxa'a nu na'.

<sup>39</sup> Na'a, rë'u ni, bití' nácaru' ca nupa tu'huóaj ladxí', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusólá.

### Ca naca yöl-la' réajlë' queéru' Dios

**11** Na'a, tu' réajlë'ëru' Dios, naca löza queéru' sí'iru' le runru' löza, ate' naca bë' zoa le cabí gaca ilé'ëru'. <sup>2</sup> Caní gula'yéajlë'ë xuz xtó'oru' Dios, ate' que læ ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

<sup>3</sup> Tu' réajlë'ëru' Dios, réquibe'ëru' benë' Lë' yödzölió ni len didza' bé'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

<sup>4</sup> Tu' guyéajlë'ë Abel Dios, gulu'ë rön queéba' böa' bédxido' lahuë' Dios, tu le nácatëro lesaca' ca le gulu'ë Caín lahuë' Dios, en que læ ni na' Dios benë' ba nalí queë' Abel na', gunné' náquië' tsahui', en benë' bal læ na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

<sup>5</sup> Tu' guyéajlë'ë Enoc Dios, gudödë' ní' yehua' yubá, en bití' ca' gútië', ate' bití'rö nu budzöli læ', tu' buchë'ë Dios læ', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios læ', benë' Enoc le raza ládxi'ë Dios." <sup>6</sup> Na'a, channö cabí réajlë'ëru' Dios, bití' gaca gunru' le raza ládxi'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubí'ë que nu ruí'í ladxí' Lë'.

<sup>7</sup> Cate' ní' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupé'ë barco zxön na' nazí'í le Arca, ate' læ'e barco na' bulu'lá bönachi dí'a dza queë' Noé. Tu' guyéajlë'ë Noé Dios, benë' ga naca bë' narugu qué-gaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'delí' nupa ta'yéajlë' Lë'.

<sup>8</sup> Cate' ní' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzé'ë ladzë' para tsejé' lataj ní' ral-la' sí'ë ca tu le guequi tsaz queë', ate' birúajë' ladzë' sal-la' bití' nóziné' gazxi na' ral-la' tsejé'. <sup>9</sup> Tu' guyéajlë'ë Abraham Dios, gúquië' ca tu bön-ní' zítu', en guzöé' luyú na' Dios guzxi' lu në'ë unödzejë' queë'. Guzöé' lu yu'u guídido', en læbisö ca gulunë' Isaac, en Jacob, xzí'ini xísöë' Abraham, nupa ní' guzxi' lu në'ë Dios unödzejë' quéguequi læ na' guzxi' lu në'ë unödzejë' queë' Abraham. <sup>10</sup> Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzöé' Dios xilibi zö'ö que, ate' gulu'ë le ga na' zoë' Lë' cazë'.

<sup>11</sup> Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queénu yöl-la' huáca buzóanu-bí' bí'ido'. Buzóanu-bí' bí'í bönni'do' sal-la'

chigudödi izi queénu, tu' guyéajlë'ënu Dios gunë' ca rna xtídzë'ë na' guzxi' lu në'ë queénu. <sup>12</sup> Que lë ni na', sal-la' chibigúlädë'ë Abraham, gula'cuá'abi' ziantëröbì' xí'ini xí'sóë'. Gula'cuá'abi' tsca ró'öba' böljaj lúzhiba, en tsca rö'ö yuzxi tu ra' nisa zxön, cuntú nu gaca ulaba lé-gacabi'.

<sup>13</sup> Yúgu'të bönni' ni gulatië', en bití' gula'zi'ë lë na' guzxi' lu në'ë Dios unödzjë' quégaquië', pero gula'yéajlë'ë Dios, ate' zítu' zítu'sö bila'lé'enë' lë na' ral-la' ila'z-i'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácaquië' ca bönni' zítu', en bönni' ta'dazë' yödžölió ni. <sup>14</sup> Yugu' bönni' tu'ë caní didza', tu'lu'ë ta'guiljë' tu lataj le gaca ládžagaquië'. <sup>15</sup> La'tu' gula'zá' ládxi'gaquië' caní que luyú ga ní' bila'rúajë', le nácatë ulu'džölinë' nacxi huóajgaquië' ní', <sup>16</sup> pero gula'zá' ládxi'gaquië' que luyú na' nácarö dxí'a, le rö'yehua' yubá. Que lë ni na' bití' rutuí'në' Dios cate' ta'n-në' náquië' Dios quégaquië', tu' chinupé'ë tu yödžö quégaquië'.

<sup>17</sup> Tu' guyéajlë'ë Abraham Dios, cate' guzxi' bë'ë Dios lë', budödë'-bì' bí' Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bì' bí' bönni' zí'alö queë' na' lahuë' Dios sal-la' nácabì' bí' na' guzxi' lu në'ë Dios unödzjë' queë'. <sup>18</sup> Caní benë' sal-la' gudxë' Dios lë', gunné': "Lu ná'abi' bí' Isaac quiu' ichísagaca'-bí' xí'ini xí'sú'." <sup>19</sup> Caní benë' Abraham, tu' gúquibe'enë' napë' Dios yöl-la' huáca usubanë'-bí' lu yöl-la' guti, ate' ca tu lugá'a luséqui', huáca innaru' buzi'ë-bì' lu yöl-la' guti sal-la' bití' guti cázabi'.

<sup>20</sup> Tu' guyéajlë'ë Isaac Dios, gunábinë' Dios gun lá'ayë'-bí' bí' Jacob, enca' bí' Esaú ca zeaj naca le ulu'z'í'ibi' xibé dza sí' za'. <sup>21</sup> Tu' guyéajlë'ë Jacob Dios, cate' ní' chizóa gátië' gunábinë' Dios gun lá'ayë'-bí' tu tubi' xí'inë' José, ate' guyéaj ládxi'ë Dios, ní' nayéchuë' lu xiyaga queë'. <sup>22</sup> Tu' guyéajlë'ë José Dios, cate' ní' chizóa gátië', bë'ë didza' que dza na' ila'rúajë' xí'ini xí'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

<sup>23</sup> Tu' gula'yéajlë'ë Dios, cate' gúljabì' bí'ido' Moisés, xuz xiná'abi' bulu'cáché'ë-bì' idú ca tsonna beo', tu' bila'lé'enë' nácabì' bí' bönni'do' na' lachi, en bití' guládx-inë' bönni' rinná bé'enë' bönachi Egipto, bönni' na' gunná bë'ë ilútië'-bí' yugu' bí' bönni'do' na'. <sup>24</sup> Tu' guyéajlë'ëbi' Moisés Dios, cate' guzxonbi', bití'ró bë'ëbi' lataj nu uzóa lëbi' bí' bönni' queénu nigula xí'inë' Faraón, bönni' na' rinná bé'enë' bönachi Egipto. <sup>25</sup> Caní benbì' tu' gúquibì' nácarö dxí'a nu usaca' zí' lëbi' tsöžxön len bönachi queë' Dios ca uzí'ibi' xibé tu chí'isö yugu' le tu'z'í' xibé nupa tun dul-la'. <sup>26</sup> Gúquibì' nácarö lesaca' nu ulidza ditaj lëbi', ca na' gaca ca' queë' Cristo, ca idél'ibi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë Dios queëbi'. <sup>27</sup> Gudö-di ní', tu' guyéajlë'ë Moisés Dios, birúajë' luyú Egipto, en bití' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulénë' ca run nu rilé'e Dios, Nu na' bití' gaca ilé'eru'.

<sup>28</sup> Tu' guyéajlë'ë Moisés Dios, benë' Laní Pascua ca gunná bé'enë' Dios lë', en buchéajë' rön ra' yu'u lídxi-gaquië', para cabí guti xí'inigaquië' nu na' ral-la' usuní-ti yugu' bí' bönni' zí'alö quégaca bönachi Egipto. <sup>29</sup> Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí' le Nisa Xiná. Cate' gulé'ennë' ila'dödë' ca' bönni' Egipto ní', gula'yépinë' nisa, en gulátigaquië' lu Nisa Xiná na'.

<sup>30</sup> Tu' gula'yéajlë'ë bönni' Israel Dios, cate' budxi gula'dödë' idú gásibí'ilö yödžö Jericó yugu' dza idú gadxi dza, bila'guínnaj yugu' zö'ö gulún chí'í yödžö na'. <sup>31</sup> Tu' guyéajlë'ënu Rahab Dios, nigula ru'ínu lataj bönachi, bití' gútinu tsöžxön len bönachi Jericó na' bití' gulún ca rna xtídzë'ë Dios, tu' bennu bal bönni' Israel na' buduyúlanguaquië' le rácalen bönachi Jericó.

<sup>32</sup> ¿Bízirö ral-la' inní'a? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

<sup>33</sup> Tu' gula'yéajlë'ë Dios, bulu'zötjë' zían yödžö zxön.

Gulunë' le naca tsahui', ate' gula'délinë' le guzxi' lu në'ë Dios unödzjë' quégaquië'.

Bulu'sayjë' ruá'agacaba' bëdxi guixí'.

<sup>34</sup> Bulu'lë' yugu' lu guí' zxön.

Bila'rúajë' lu ná'agaca nupa gulé'ëni iluti légaquië' len guíë tuchi'.

Dios bunë' légaquië' tsutsu cate' ní' gula'cuídínë'.

Bulu'huóáquië' ca' tsutsu lu gudil-la.

Bulu'láguíë' bönni' guizxi yu rójáquië' gudil-la quégaquië' bönni' zítu'.

<sup>35</sup> Yugu' nigula dza ní' bulu'z'ínu bí' que queégacanu nubángacabi' lu yöl-la' guti.

Ia'bal-lë' bönni' ní' gulatië' lu ná'agaquië' bönni' ní' bulu'saca' zí'ë légaquië', en tu' cabí gulé'ennë' ulu'cá'anë' Dios, bití' gula'zi'ë lataj nu usán légaquië'. Caní gulunë' para ila'délinë' yöl-la' rubán lu yöl-la' guti, lë na' guléquinë' nazácarö. <sup>36</sup> Ia'bal-lë' biá' gulén-gaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë. <sup>37</sup> Bulu'ládxi' bönachi bal-lë' guíój, en gula'chözë' ia'bal-lë'. Gula'z'í' bë'ë légaquië', en gulútigaca zí'angaquië' len guíë tuchi'. Gula'dödë' ná'alö ní'ilö, nácuagaquië' guídi xzága-caba' bö'cu' zxila', en chivo. Guláquië' yechí', en gula'guí' gula'záquë'ë, ate' bulu'dxía bönachi légaquië' dö'. <sup>38</sup> Caní guláquië' bönni' na', ate' bití' gulaca bönachi yödžölió ni lesaca' ulu'z'í' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' znan bulóaj, en yugu' yeru luyú. <sup>39</sup> Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' bití' gula'z-i'ë luyú ni le guzxi' lu në'ë Dios unödzjë' quégaquië'.

<sup>40</sup> Caní guca, tu' nupé'ë Dios ní'a queéru' tu le nácarö dxí'a para cate' únë' légaquië' idú dxí'a, rë'u ni gunru' légaquië' tsöžxön.

### Ral-la' uyuru'-në' Cristo

**12** Que lë ni na', lësca' rë'u, tu' nacua' idú gásibí'ilö ga ni zóaru' ziantërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca



tu le naca zi'i nuá'aru, enca' yúgu'tè dul-la' nazóngaca rè'u, ate' lu yöl-la' riböza zxon ladxí' queéru', ral-la' gunru' xichiné' Dios, le naca tsca xítiru' lu huitaj le zoa loru'. <sup>2</sup> Ral-la' uyuru-nè' Jesús, Nu na' run ga gaca tséajl'éru' Dios, en Nu run ga raca idú yöl-la' réajl'é queéru' Lè'. Jesús gudí' guzáquë'è lè'e yaga cruz, en biá' gulénè' yöl-la' rutuí' que, tu' gú'unnè' idélí'nè' yöl-la' rudzeja na' uzi'è xibé, ate' yójchö'è cuita lè'è ibèla Dios, ga ni' rō'è rinná bē'è.

<sup>3</sup> Bulí'yüé' Jesús, ca na' gudí' guzáquë'è le bulu'saca' zi'è bōnni' dul-la' Lè', para cabí icuídílí', en para cabí gaca chopa ladxí'li'. <sup>4</sup> Ga ridxintè na'a dza, bití' bi biá' gulenlí' ga idxintè nu gun libí'ili' hué' tu' ridá'baga'li' le naca dul-la'. <sup>5</sup> Nadxi ca' chizá' ral-la ladxí'li' lè na' ruzéajni'è' Dios libí'ili'. Nácali' ca yugu' xzí'ini cazé', ca na' nazúaj lu guichi le rnné':

Xzí'ina', bití' uzú' tsölá'alö le gunè' Xanru', cate' usèdi uzéajni'inè' li', en bití' huóaj ladxu'u cate' uní'inè' li'.

<sup>6</sup> Xanru' runí'inè' nu nadxí'inè', en rusèdi ruzéajni'inè' yúgu'tè nupa ta'z'í lu nē'e ilaca xzí'ini cazé'.

<sup>7</sup> Ral-la' guá' ilenlí' le uní'inè' Dios libí'ili', tu' runè' Dios caní queé'li' tsca nácali' xzí'ini cazé'. Bití' ca' zóabi' tubí' bí'ido' bití' uní'inè'-bi' xúzibi'. <sup>8</sup> Na'a, channö cabí runí'inè' Dios libí'ili' ca na' runè' quégaca yúgu'tè xzí'ini cazé', ní'rö nácali' ca yugu' bí'í lan, en bití' nácali' idú xzí'inè' Dios. <sup>9</sup> Ia'stú, cate' ni' nácaru' bí'ido', gula'cu'è xuz xiná'aru' luyú ni, bulu'ní'inè' rè'u, pero runru' légaquie' bal. Ca' naca, ral-la' gúnrröru' ca rnna xtídzè'è Xúziru' zoé' yehua' yubá para sóaru' ibanru' tsaz.

<sup>10</sup> Yugu' xuz xiná'aru', tu chí'isö bulu'ní'inè' rè'u tsca le guléquisiné' naca dxí'a, pero cate' runí'inè' Dios rè'u, naca para gaca tu le uzí'iru' xibé, para gácaru' idú lá'ayi ca naca cazé' Lè'. <sup>11</sup> Le nácatè bití' nalá' lahui na'a le uzí'iru' xibé que le runí'inè' rè'u, pero run ga ruhu'íniru'. Channö gü'iru' lataj usèdi rè'u le runí'inè' rè'u, gun ga cózaru' dxí'ado', en ga gácaru' tsahui'.

### Soa bōnadxi queéru' channö cabí uzé' nágaru' chí'è Dios

<sup>12</sup> Que lè ni na' bulí'un tsutsu ná'alí' le röjquéqui'guequi, enca' xzí'bili' le ta'xzizi, en idipa ladxí'li' para gunlí' le naca dxí'a. <sup>13</sup> Gulí'sóa nōza tsahui', para cabí gunlí' ga ucá'ana nu ricuidí' ladxí' nōza na', pero gulí'gún ga huóaca ladxí' nu na'.

<sup>14</sup> Gulí'gü' ladxí'li' cózalenlí' dxí'a yúgu'tè bōnachi, en gácali' tsahui' lahué' Dios, tu' channö cabí gunlí' caní, bití' gaca ilé'eli'-nè' Xanru'. <sup>15</sup> Gulí'gún chí'í cuinlí' para cabí soa nu ucá'ana le ruzá' ladxé'è Dios queéru', en para cabí soa nu gaca ca tu guixí' silá', para cabí utsá' libí'ili', en cabí gun ga cabí gácali' tsahui' zianlí' libí'ili'. <sup>16</sup> Gulí'gún chí'í cuinlí' para cabí gun nu dzaga libí'ili' le ruá' dö', o le cabí naca tsahui', ca na' benè' Esaú, xzí'inè' Isáac. Esaú na' bétí'è le ral-la' gata' lu nē'è tu' náquie' bí'í bōnni' huaca queé' xuzè' para guzxi'è tu le do' gudahuè'. <sup>17</sup> Chinöz quézilí' ca na' guca queé' Esaú gudödi ní' cate' gú'unnè' idélí'nè' le inabè' xuzè' lahué' Dios

para gaca le tsahui' queé'. Buéchi' ladxé'è xuzè' lè', pero bití' guta' lataj ubí'í ladxé'è Esaú na' sal-la' gudilaj ladxé'è le len yöl-la' ribödxí queé'.

<sup>18</sup> Ca raca queé'li' bití' naca ca guca quégaquie' bōnni' Israel. Légaquie' gula'biguë'è gala' ga zoa tu guí'a le gaca nu can, ate' guyegui guí'a ní', en bōaca chul-la lahui' dza tu' guró'ö böaj gasaj, en guyécjada' bö'. <sup>19</sup> Bila'yönnè' ta'bödxí lúzuba' böa', enca' chí'è Dios Nu bē' didza'. Cate' bila'yönnè' lè ni, gulá'ta'yüé' lahué' Moisés para cabirö gü'ílenè' Dios légaquie' didza'. <sup>20</sup> Caní gulunè' tu' cabí guca guá' iléngaquie' lè na' gunná bē'enè' Dios légaquie', gunné': "Channö tsöjlibiba' tuba' böa' guixí'do'os guí'a ni, ral-la' ulu'ladxé'è-ba' guiój, o ulu'dödè'-ba' yaga tuchi'." <sup>21</sup> Lè na' bila'lé'enè' ben gádxida' légaquie', ate' Moisés gunné': "Radxi rídzöbida', en rizxízida'a."

<sup>22</sup> Na'a, libí'ili' ral-la' gádxitèröli' tu' ribíga'li' gala' tu lu guí'a nazí' le Sión, en ga zoa yödzö queé' Dios ban, le nazí' le Jerusalén que yehua' yubá, ga na' nacué' gubáz lá'ayi guizxi' yu queé' Dios. <sup>23</sup> Ribíga'li' gala' ga ní nudúbigaca xzí'ini cazé' Dios lahué' Lè', nupa na' nazúajgaca laguequi lu guichi ní' yehua' yubá, enca' ga zoé' Dios Nu ruchí'a rusörö'è yúgu'tè bōnachi, en ga na' nacué' yugu' bö' gulaca cazé' yugu' bōnni' tsahui', tu' bunè' Dios légaquie' tsahui'. <sup>24</sup> Ribíga'li' ca' ga zoé' Jesús, Nu ben tsutsu didza' cubi na' rucá'ana tsahui', enca' ga nagu'è Jesús rōn queé' le run ga runiti lahué' Dios rè'u, rōn na' run le nácarö dxí'a ca le ben xichönè' Abel, lè na' ben ga guchúguiè' Dios queé'bi' bí'í bōché'è.

<sup>25</sup> Que lè ni na', gulí'gún chí'í cuinlí' para cabí tá'bagalí' Nu na' ruí'í didza'. Bití' ca' bulu'lá nupa ní' gula'dá'baga' nu na' bulidza légaquie' luyú ni. Nácatèrö löza bití' ca' uláru' rè'u channö tá'baga'ru' Nu na' rulidza rè'u, zoé' yehua' yubá. <sup>26</sup> Dza ní' guxzizi luyú ni tu' biyón chí'è Dios, pero na'a chiguzxi' lu nē'è, gunné': "Iatú luzuísö, en calégasö luyú uxízia', pero lúzxiba ca' uxízia'." <sup>27</sup> Cate' ní' rnné': "Iatú luzuísö", lè ni rulu'í' rè'u ral-la' udúa yugu' le gaca ila'xzizi, lè na' rō'ö yödzölió ni, ate' ulu'gá'ana le cabí gaca ila'xzizi, lè na' rō' yehua' yubá. <sup>28</sup> Que lè ni na', tu' ral-la' idélí'ru' tu lataj ga inná bē'èru', le cabí izxizi, ral-la' guiéru'-nè' Dios: "Xclenu'", ate' lu yöl-la' ba'a ladxí', en lu yöl-la' radxi Lè' tseaj ladxí'ru' Lè' ca na' raza ladxé'è Lè', <sup>29</sup> tu' náquie' Dios queéru' ca tu guí' le rusuniti le cabí naca idú tsahui'.

### Le ral-la' gunru' le raza ladxé'è Dios

**13** Ral-la' idxí'itica'silí' luzá'ali' tuli' ia'tulí'. <sup>2</sup> Gulí't-söjné ral-la' uzóali' lídxili' nu idxín ga zóali'. Cate' gulún caní bal-la bōnachi, bulu'cuá' lídxiguequi gubáz lá'ayi que yehua' yubá queé' Dios, sal-la' bití' guléquibe'e nácagaquie' gubáz lá'ayi.

<sup>3</sup> Gulí'tsöjné nupa nadzúngaca lidxi guíè tsca nunlí' légaquie' tsözxón, nadzunlí' ca' lidxi guíè. Gulí'gü' ladxí'li' yugu' bōnni' ta'bía ladxí'gaca bōnachi légaquie', tsca libí'ili' riguí' rizáca'lenlí' légaquie' tsözxón.

<sup>4</sup> Ral-la' gunlí' bal yöl-la' nutsaga na', ate' tu tué' bōnni' ral-la' sóalenè'-nu nigula queé' lu yöl-la' ba'a ladxí'

queë', tu' ichúguië' Dios quegaca nupa tun le ruá' dö', en nupa ta'guítsaj xibá que yöl-la' nutsaga na'.

<sup>5</sup> Biti' bi uhuídí'li', pero guli'tsaza ládxí'li' tsca le dö queé'li' na'a, tu' chigunné' Dios: "Catu caz ucá'ana' li', en bití' ca' ubéaj ládxa'a li'." <sup>6</sup> Caní naca, huáca innaru' idú ládxí'ru' lè na' rna:

Xanru' náquië' Nu rácalen neda'.

Biti' ca' gádxida' bi gun bönachi quia'.

<sup>7</sup> Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Bulí'yú ca nadéli'gaquië', en guli'gún ca tunë' lu yöl-la' réajlë' quegaquië' Dios.

<sup>8</sup> Lëbisö ca náquië' Jesucristo, néaje, en na'a, en cáti-ca'sö. <sup>9</sup> Biti' güí'ili' lataj yugu' xibá izá'a, en xibá nadzá' iché'gaca libí'ili' nöza yúbölö. Naca dxí'a gunlí' tsutsu ic-ja ládxí'do'olí' ca naca le ruzá' ládxë'ë Dios queé'li', en calëga ca nácagaca xibá que le rë'aj ráguru', lè na' bití' ulu'zí' xibé nupa tu'í' ládxí'gaca léguequi.

<sup>10</sup> Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö.

<sup>11</sup> Bixúz lo que yu'u lá'ayi na' gulu'ë xichóngacaba' böa' bëdxi lu lataj idú lá'ayi tu' nözi dul-la', pero bulu'zéguië bëla' cá'asö quegacaba' ga naca ní'ilo ra' yödzö. <sup>12</sup> Lësc-a' caní gudí'í guzxáque'ë Jesús ní'ilo ra' yödzö para bunë' bönachi dxí'a len rön queë cazë'. <sup>13</sup> Tsöjtá'aru'-në' Jesús, sal-la' ila'béaj bönachi rë'u lu yödzö, en sí'iru' tsözxón len Lë' lè na' bulu'lidza ditaj bönachi Lë'. <sup>14</sup> Biti' zoa tu yödzö queëru' yödzölió ni le soa tsaz, pero rigú'jaru' lè na' sí' za'. <sup>15</sup> Que lè ni na', ral-la' cú'uti-ca'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu'" ní'a que le náquië' Lë'. <sup>16</sup> Biti' gal-la ládxí'li' gunlí' le naca dxí'a, en gácalenlí' luzá'alí' tulí' ia'tulí', tu' naca lè ni ca tu le rigú'uru' lahuë' Dios le raza ládxë'ë Lë'.

<sup>17</sup> Guli'gún ca rna xtídzá'gaquië' bóchi'ru' tu'yúë' libí'ili', en guli'gü'í lataj ila'nná bé'enë' libí'ili', tu' tapa chí'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quegaquië', en calëga lu yöl-la' risëbi ladxi' quegaquië', tu' cabí uzí'ili' xibé dxin na' ilunë' lu yöl-la' risëbi ladxi' quegaquië'.

<sup>18</sup> Bulí'lidzë' Dios, inábili'-në' gácalenë' netu', tu' runtu' löza soa dxi icja ládxí'do'otu', para cabí uxösa netu', ate' ruí'í ládxí'tu' gúntica'situ' le naca dxí'a. <sup>19</sup> Le nácarö lo, ráta'yua' lolí' inábili'-në' Dios ugu'ë neda' tu nöza para udxina' ga zóali' bayóntë.

### Dios uzá' ládxë'ë queëru' le gácalen rë'u

<sup>20</sup> Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyü Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, <sup>21</sup> rinábitu'-në' gunë' ga gácali' idú tsahui', para gaca gunlí' yúgu'të dxin dxí'a, en gunlí' ca ré'ënë' Lë', ate' gunë' queé'li' le raza ládxë'ë Lë', tu' néquili' queë' Jesucristo. ¡Queë' Cristo gácatíca'sö yöl-la' ba! ¡Ca' gaca!

<sup>22</sup> Ráta'yua' lolí', böchi' luzá'ado', gü'í'í ládxí'li' didza' ni ruzéajni' libí'ili', tu' naca látí'do'os lè ni ruzúaja' queé'li'.

<sup>23</sup> Ral-la' inózilí' chiburúajbi' bí'í Timoteo, bí'í bóchi'ru'-do', lidxi guíë, ate' channö idxíntëbi' ga zoa' ni, gunbi' neda' tsözxón uduyútu' libí'ili'.

<sup>24</sup> Bulí'gapa Dios bóchi'ru' tu'yúë' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlë' Cristo nacua' luyú Italia.

<sup>25</sup> ¡Dios uzá' ládxë'ë queé'li' yúgu'tëli'! ¡Ca' gaca!

# Santiago

## Santiago rugapë' Dios bönni' judío ta'dé'ë Cristo

**1** Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' dí'a dza quégaca bönachi Israel, násilasili' idú yödzölió ni.

### Yöl-la' réajni'i le runnë' Dios queéru'

<sup>2</sup> Böchi' luzá'ado', cate' gaca bi gaca queéli' le sí' bë' libí'ili', ral-la' udzëjali' idú ládxí'li' <sup>3</sup> tu' nöz quézili', cate' bi raca queéli' le rizí' bë' libí'ili' ca réajlë'ëli' Cristo, lë ni rusedi libí'ili' cózali' zxön ladxí'. <sup>4</sup> Gulí'gü'í' ládxí'li' gaca idú yöl-la' zxön ladxí' queéli', para údxí gácali' bönni' ta'yéajni'inë', en bití' bi yadzaj queéli' ca nácgaca lë ni.

<sup>5</sup> Channö zoa ladaj libí'ili' nu bití' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzjë' yödxí yana' quégaca yúgu'të bönachi, en bití' ca' réqui quézinë' gunnë' queéru'. <sup>6</sup> Na'a, nu bi rinabi-në' Dios, run bayudxi tséajlë' Lë', en cabí gaca chopá ladxí'. Nu raca chopá ladxí', raca que ca raca que bidxina' que nísado' cate' rutá bö' le, ruzéaj bö' le nilö ná'alö. <sup>7</sup> Nu naca caní bití' ral-la' gun löza sí' bi unödzjë' Xanru'. <sup>8</sup> Bönni' na' reaj bö' ládxí'da'ahuë' bití' ridzölinë' nácalö gunë'.

<sup>9</sup> Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzëjanë' tu' chinadéli'në' tu lataj lo lahuë' Dios. <sup>10</sup> Bönni' böchi'ru' na' rilé'enë' yöl-la' tsahui' queë' ral-la' udzëjanë' cate' runë' Dios ga bíti'rö ruzxöni ládxë'ë lë na' dë queë'. Nu ruzxöni ladxí' yöl-la' tsahui' que, gaca que nu na' ca raca que xiyija guíxi'do', la' ridóditë que. <sup>11</sup> Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxitë guixi' na', en riguinnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguilljë' yöl-la' tsahui' na'.

### Le ta'z'í' bë' rë'u

<sup>12</sup> Bica' ba bönni' böchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzjë' quégaca nupa nadxí'iguequi Lë'. <sup>13</sup> Cate' bi raca queéru' le run ga gué'eniru' gunru' le ruá' dö', bití' ral-la' innaru': "Dios rizí' bë'ë rë'u len le naca xihui'." Dios bití' rizí' bë'ë nu bönni' len le cabí naca dxí'a. <sup>14</sup> Na'a, channö nu bi raca que le rizí' bë' le len le cabí naca dxí'a, naca tu' rizé

ladxi' le ruá' dö', ate' lë ni ben ga gú'uni gun le ruá' dö'. <sup>15</sup> Lë na' rizé ládxí'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

<sup>16</sup> Böchi' luzá'ado', bití' sí' ye'e la' cuínsili'. <sup>17</sup> Yúgu'të le naca dxí'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' bití' rutsá' cuinë', en bití' rutsé'ë ca runë', rúnnatica'së' queéru' le naca tsahui'. <sup>18</sup> Ca ré'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' guró cazë' Dios.

### Le reaj ládxí'ru'-në' Dios le naca li ladxí'

<sup>19</sup> Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero bití' ral-la' innëtëzili', en bití' ilëtëzili'. <sup>20</sup> Nu na' riletëz bití' run le naca tsahui' lahuë' Dios. <sup>21</sup> Que lë ni na', gulí'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj ladxí' gulí'sí' lu ná'alí' didza' na' chinayaza icja ládxí'do'olí', tu' huáca gun didza' ni ga uláli'.

<sup>22</sup> Na'a, gulí'gún ca rna didza' ni, en cabí yónisili', tu' channö yónisili' didza' ni, sí' yé'eli' la' cuínsili'. <sup>23</sup> Nu riyónisö didza' ni, en bití' run ca rna, nu ni naca ca tu bönni' ruyúë' lahuë' tu lu guíë dxili', <sup>24</sup> tu' ruyú cuinë', en söhuójë', ate' la' ral-latë ládxë'ë ca riné'ë. <sup>25</sup> Na'a, nu bönni' bití' ral-la' ládxë'ë le riyönnë', pero ruí'í ládxë'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

<sup>26</sup> Channö nu bönni' ladaj libí'ili' réquinë' naca dxí'a ca reaj ládxë'ë Dios, pero bití' rapa chi'ë lúdxë'ë para cabí innësë' ca', bönni' ni rizí' yé'enë' la' cuinsë', ate' bití' raza ládxë'ë Dios ca reaj ládxë'ë bönni' na' Lë'. <sup>27</sup> Le reaj ládxí'ru'-në' Dios, le naca idú, en le naca dxí'a, naca gácalenru' yugu' bí'i uzé'bido', enca' yugu' nigula nagá'ananu túzinu, cate' ta'guí'í ta'zaca' nupa na', en cabí gútsa'ru' le cabí naca tsahui' le raca yödzölió ni.

### Tuz ca ral-la' gunru' bönachi bal

**2** Böchi' luzá'ado', channö réajlë'ëli' Xanru' Jesucristo, Nu nácatëro lo, bití' ral-la' utsá'alí' ca gunlí' bal tu tu bönachi. <sup>2</sup> Channö tsázië' tu bönni' ga na' nudúbili', en nagu'ë xibón në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, <sup>3</sup> channö gunlí' bal bönni' na' nácuë'

lari' nazáca'da', en guiéli'-në: "Guró'ölen rë'u ga ni naca dxí'a", pero guiéli' bönni' yéchi'do' na': "Násasö guzuí", o guiéli'-në: "Gurö'i lu yu ni." <sup>4</sup> Channö caní runlí', rutsá'ali' ca runlí' bal tu tu luzá'ali', en run cuinlí' ca nu ruchi'a rusörö luzé'e, bití' naca dxí'a ca rizá' ládxi'li'.

<sup>5</sup> Böchi' luzá'ado', bulí'zé nágalí' lë ni. Dios guró' cazë' yugu' bönni', sal-la' téquiquequi bönachi yödzölió ni nácagaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni rinná bë'ë Lë'. Gata' quégaquië' lë na' guzxí' lu nëë Dios unödzjë' quégaca nupa ta'dxí'i Lë'. <sup>6</sup> Libí'ili' rucá'anali' cá'asö bönachi yechi' ca', en runlí' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zí'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. <sup>7</sup> Yugu' bönni' na' dë yöl-la' tsahui' quégaquië' ta'nnë zí'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

<sup>8</sup> Runlí' dxí'a channö runlí' idú ca rinná bë' xibá lo, le nazúaj lu guichi, en rna caní: "Ral-la' idxí'inu' luzó'o ca nadxí'i cuinu'." <sup>9</sup> Na'a, channö rutsá'ali' ca runlí' bal tu tu bönachi, runlí' dul-la', en nabága'li' xíguia' lu xibá queë' Dios, tu' rigúitsjali' xibá na'. <sup>10</sup> Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'. <sup>11</sup> Lë cazë' Dios gunné': "Bití' gunu' dul-la' le riguitsaj xibá que yöl-la' nutsaga na'", en gunné' ca': "Bití' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idútë xibá queë' Dios. <sup>12</sup> Ca innali', en ca gunlí', ral-la' gunlí' ca ral-la' ilún nupa uchí'a usöröë' Dios légaquië' ca rinná bë' xibá na', le run ga uláru'. <sup>13</sup> Nupa cabí tu'huechi' ládxi'gaca luzé'eguequi, uchí'a usöröë' Dios léguequi, ate' cuntú nu huéchi' ladxí' léguequi, pero nupa na' tu'huechi' ládxi'gaca luzé'eguequi ulu'rúaj dxí'a cate' uchí'a usöröë' Dios léguequi.

### Le ral-la' gunru' tu' réajlë'ëru' Cristo

<sup>14</sup> Böchi' luzá'ado', bití' bi uzi'ë xibé tu bönni' channö innasë': "Réajlë'a Cristo", pero bití' runë' le naca tsahui'. Bití' gaca ulé' bönni' na' channö innasë' réajlë'ë Cristo. <sup>15</sup> Channö nacu'ë böchi' luzá'aru' ta'yéajlë'ë Cristo, en bití' dë le ilácuë', en calëga le ilahuë', <sup>16</sup> ate' channö tu nu dzaga libí'ili' guiésö légaquië': "Böaj lídxili' tsáhuí'-do'. Chibölaj budzé'eli'", pero channö cabí unödzaj quégaquië' lë na' ta'yádzjanë', bití' ca' gúcalen légaquië'. <sup>17</sup> Lësca' caní raca que nu bönni' rnasë' réajlë'ë Cristo. Channö cabí runë' le naca bë' naca idú ca réajlë'ë Lë', bití' naca lesaca' yöl-la' réajlë' queë'.

<sup>18</sup> Nadxi ca' guië' tu bönni' luzé'ë: "Lí' réajlë'ësu' Cristo, ate' neda' runa' le naca tsahui'. Bití' gaca ulu'ín-u' neda' réajlë'u Cristo channö cabí zoa le naca tsahui' runu'. Neda' ulu'í'ida' lí' réajlë'a Cristo ní'a que le naca tsahui' runa'." <sup>19</sup> Lí' réajlë'u tuzë' náquië' Dios. Naca dxí'a ca runu'. Lësca' caní ta'yéajlë' yugu' bö' xihui', en ta'zixi tádxida' Lë'. <sup>20</sup> Lí', bönni' bití' bi nözinë'. Ral-la' inözi quézinu' channö zoa nu rnasö réajlë' Cristo,

pero bití' run le naca tsahui', bití' naca lesaca' yöl-la' réajlë' Lë' que nu na'. <sup>21</sup> Naca bë' burúajë' xúziru' Abraham tsahui' lahuë' Dios ní'a que lë na' benë', cate' ní' gulu'ë-bí' bí'i Isaac queë' lahuë' Dios. Gulu'ë-bí' ca na' tun bönachi ta'gú'u le tu'zeguí' lahuë' Dios, sal-la' bití' buzégui'ë-bí'. <sup>22</sup> Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ní'a que lë na' benë'. <sup>23</sup> Caní guca lë na' nazúaj lu guichi lál'ayi le rna: "Abraham guyéajlë'ë Dios, ate' Dios bil'énenë' lë na' benë' ca tu le ben ga böáquië' Abraham tsahui'." Que lë ni na' guzxí'i lë: "Luzé'ë Dios."

<sup>24</sup> Na'a, rilé'e quézili' naca bë' rurúajë' tu bönni' dxí'a ní'a que le runë', en calëgasö tu' réajlë'ë Dios. <sup>25</sup> Lësca' caní guca queë'nu Rahab, nigula bë'ënu bönachi lataj. Lësca' naca bë' burúajnu dxí'a tu' zoa tu le tsahui' bennu, lë na' bennu cate' ní' bennu bönni' tu'yulan bal, en gúcalennu légaquië' para bulu'guélë'ë yöjhuó'jgaquië' nöza yúbölö. <sup>26</sup> Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

### Yugu' le rna lúdxí'ru'

**3** Böchi' luzá'ado', bití' guntëz zían cuinlí' bönni' tu'sédinë' bönachi, tu' chinóz quézili' zítërö uchí'a usöröë' Dios rë'u, núlöru' rusédiru' bönachi. <sup>2</sup> Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. <sup>3</sup> Cate' rigú'uru' guië ruá'agacaba' böa' para gunru' ga ilunba' ca ré'ëneru', gaca inná bé'ëru' lé-gacaba' lu idútë le tunba'. <sup>4</sup> Bulí'yú ca' ca raca quéguequi barco. Sal-la' zxóntërö naca tu barco, en récjada' bö' ruzéaj le, cuídí'do'os naca në'e xiyágui barco na' le ruzecaj rudxí'i barco para tseaj gátí'tës ga gué'ënnë' bönni' rusé'ë le. <sup>5</sup> Lësca' caní naca lúdxí'ru'. Sal-la' cuídí'do'os naca, zióntërö le rna lúdxí'ru' na'. Bulí'yút-söca' ca run guí. Sal-la' guí'do'os ribíbiru', tu guí'a sibi huayégui. <sup>6</sup> Lësca' lúdxí'ru' na' naca ca tu guí. Yúgu'të le ruá' dö' raca yödzölió ni rna lúdxí'ru', en tu' dzaga lúdxí'ru' na' idútë le naca cázaru', que lë ni na' run ga raca xihui' idútë le nácaru'. Le rna lúdxí'ru' ribequi guí, le ruzeguí' rë'u ca naca yúgu'të le runru', ate' tu' rna caní lúdxí'ru' na', naca que tsca chinaguéla'të guí le nabequi' tu' xihui'. <sup>7</sup> Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lé'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönachi luyú ni légaacaba', <sup>8</sup> pero cuntú nu bönni' gaca inná bé'enë' lúdxë'ë, tu' rna lúdxí'ru' le ruá' dö', en bití' gaca nu uzaga' xinözi. Zióntërö le rna lúdxí'ru' le naca ca tu le naché' yöl-la' guti. <sup>9</sup> Len la' lúdxí'ru' násasö rulidza tsáhuí'ru'-në' Dios Xuz, en rulidza dítjaru' ca' yugu' bönni', ate' benë' Dios légaquië' ca naca cazë' Lë'. <sup>10</sup> Caní naca, len la' ruá'asiru' na' rulidza tsáhuí'ru' bönachi, en rulidza dítjaru' bönachi. Böchi' luzá'ado', bití' ral-la' gaca caní. <sup>11</sup> Bití' ca' ta'lén nisa siziá', en nisa zöna' la' tuzi ga

ta'lén. <sup>12</sup> Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zóna', en nisa siziá'.

#### Yöl-la' réajni'i le naca idú

<sup>13</sup> Channö zoë' tu bönni' ladjali' rácadë'e, en réajni'de'enë', lu yöl-la' nöxaj ladxí' queë' ral-la' ulu'e náquië' caní n'á que le naca tsahui' runë'. <sup>14</sup> Na'a, channö ruzxé'eli' luzá'ali', en runli' dxin para ila'gú'u bö-nachi libí'ili' yöl-la' ba, biti' ral-la' gun ba zxön cuinli' ca naca yöl-la' réajni'i queé'li'. Nu run caní rizí' yë', en ridá'baga' le naca idútë li. <sup>15</sup> Yöl-la' réajni'i caní biti' naca le runödzjë' Dios, pero que yödzölió ni naca, enca' que-gaca bönachi yödzölió ni, en que tu' xihui'. <sup>16</sup> Yugu' bönni' tu'zxé'enë' luzá'agaquië', en té'ennë' ila'gú'u bönachi légaquië' yöl-la' ba, lësca' ta'dil-la dídze'e, en tunë' yúgu'të le ruá' dö'. <sup>17</sup> Yugu' bönni' nápagaquië' yöl-la' réajni'i na' runödzjë' Dios:

Tunë' le naca idú tsahui', en ta'bözë' dxí'ado'.

Nácagaquië' zxön ladxí', en nöxaj ladxí'.

Tu'huechi' ladxí'gaquië' bönachi, en tunë' le naca dxí'a.

Tuz ca tu'chi'a tu'söröë' luzá'agaquië', en biti' ta'béaj bë'e luzá'agaquië'.

<sup>18</sup> Nupa tu'í ladxí'gaca ila'bequi dxi le raca, ta'böza dxí'ado', para gaca ca' dxí'a idútë le zeaj naca caz.

#### Nupa tun zxön le nacua' yödzölió

**4** ¿Bizx que na' ridíl-lali', en raca didza' bizxaj queé'li'? Raca caní queé'li' tu' rizé ladxí'li' zían le rizé ladxí'li' tu' tuli', en que lë ni na' ridíl-lalenli' luzá'ali'. <sup>2</sup> Zían le ruhuí'dili', en tu' cabí rizí'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridé'li' le, que lë ni na' rizóa ribó'öli', en ridíl-lali'. Biti' rata' queé'li' le ré'enili', tu' cabí rinábilí-në' Dios lë na'. <sup>3</sup> Sal-la' zoa bi rinábalí, biti' bi rizí'ili', tu' cabí naca dxí'a ca rinábalí, tu' ré'enili' lë na' rinábalí' para ugunli' le dxin ca raza ladxí'sili'. <sup>4</sup> Libí'ili', bönachi nusanli'-në' Dios, ¿naru' cabí nözilí' channö runli' zxön le nacua' yödzölió ni, chinuhuóacalí' ca nu biti' rilé'e Dios dxí'a? Núti'tës nu ré'eni gun zxön le nacua' yödzölió ni, nuhuóaca ca nu biti' rilé'e Dios dxí'a. <sup>5</sup> Biti' rnasö ca' le nazúaj lu guichi lá'ayi le rnna: "Dios risól-lë'e Dios Bö' Lá'ayi queé'ru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'." <sup>6</sup> Na'a, zxöntëro le ruzá ladxë'e Dios queé'ru', tu' nazúaj lu guichi lá'ayi le rnna: "Dios ruzáguë'e xinózguequi nupa tun ba zxön cuínguequi, pero ruzá ladxë'e quegaca nupa nácagaca nöxaj ladxí'." <sup>7</sup> Que lë ni na', guli'sóa nöxaj ladxí' lahuë' Dios. Guli'nná be'e tu' xihui', ate' uzxunnaj ga zóali'. <sup>8</sup> Guli'güí ladxí'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reaj bö' ladxí'do'oli', en chopa le nadxí'ili', guli'gún dxí'a icja ladxí'do'oli'. <sup>9</sup> Guli'sëbi ladxí'li', en bulí'huí'ini, en guli'cödxí. Na'a ruzxídxili, pero ral-la' códxili'. Rudzéjali', pero ral-la'

huí'ini'. <sup>10</sup> Guli'gaca nöxaj ladxí' lahuë' Xanru', ate' Lë' gunë' ga tsépisëli'.

#### Biti' ral-la' ichugu bé'ëru' le run luzá'aru'

<sup>11</sup> Böchi' luzá'ado', biti' innëli' que luzá'ali' tuli' ia'tuli'. Nu bönni' rinné' que böchi' luzé'e, en rilaga yudxë' le runë', bönni' ni rinné' que xibá queë' Dios, en ruchí'a rusöröë' le rinná bë' xibá na'. Na'a, channö ruchí'a rusöró'u le rinná bë' xibá na', run cuinu' nu ruchí'a rusöröë' le, en biti' runu' ca rinná bë' xibá na'. <sup>12</sup> Na'a, tuzë' náquië' Dios, Nu ben xibá na', en náquië' ca' Nu ruchí'a rusöröë' le runru'. Lë cazë' gaca usölë' bönachi o usunitië' bönachi na'. Na'a, ¿núzxitë run cuinu', rilaga yudxu' luzó'o?

#### Biti' gaca gunru' löza le gaca cuxó huidzaj

<sup>13</sup> Na'a, bulí'zé nágali', núlöli' rnnali': "Cuxó huidzaj tséajtu' yödzö ni', ate' sóatu' ni' tu' iz, en zían le gá'utu', en úti'tu', ate' caní gáta'da' dumí queé'tu'." <sup>14</sup> Biti' nözilí' bizxi gaca cuxó huidzaj. ¿Nacxi caz naca queé'ru', tsca zóaru' yödzölió ni? Nácaru' ca bóchila le nalá' tu' chí'do'osö, en la' rinítitë. <sup>15</sup> Que lë ni na', caní ral-la' innali': "Channö gué'ennë' Xanru', sóaru' ibanru', en tu' ia'tú le gunru'." <sup>16</sup> Na'a, libí'ili', lu yöl-la' run ba zxön queé'li' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'. <sup>17</sup> Channö nöziru' le naca dxí'a le ral-la' gunru', en biti' gunru' lë na', runru' dul-la'.

#### Santiago rusé'e ladxí'gaquië' bönni' dë yöl-la' tsahui' quégaquië'

**5** Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' sí' za' dza ilé'eli' yöl-la' yechi'. <sup>2</sup> Chinnaca ditaj yöl-la' tsahui' queé'li', ate' chinutógacaba' le ráculi' bóljado' que. <sup>3</sup> Chinaca que dumí oro, en dumí plata queé'li' ca naca que guíë nazón yöni que, ate' yöni que na' naca ca tu' le ruzegui libí'ili' didza', ate' gaca queé'li' ca tu' guí' le usuniti libí'ili'. Caní gaca queé'li', tu' busó' butúbili' queézili' yöl-la' tsahui' dza ni zóaru' chiröjsétëgaca. <sup>4</sup> ¿Buli'yútsöca! Yugu' bönni' huen dxin gula'lapë' yöla queé'li' chita'naba yúdxinë' lászjagaquië', tu' cabí riguízjanilí' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bé'enë' n'á në'e guizxi yu. <sup>5</sup> Benli' ga buné'eli', en gü'i gudágutica'sili' le rnasö queé'li' lu yödzölió ni. Buxón cuinli', pero chizóa idxín dza údxi queé'li'. Gaca queé'li' ca raca queé'ba' bëdxi renni', chibú'u dza gútiru'-ba'. <sup>6</sup> Richúguli' quégaquië' bönni' tsahui', en rútili' légaquië', ate' légaquië' biti' ta'dá'baguë'e libí'ili' cate' rútili' légaquië'.

#### Cózaru' zxön ladxí', en ulídzaru'-në' Dios

<sup>7</sup> Na'a, böchi' luzá'ado', guli'cöza zxön ladxí' ga idxinrö dza huödë' Xanru'. Bulí'yú ca runë' tu' bönni' guz gú'una. Lu yöl-la' riböza zxön ladxí' ribözë' guiójsiu', en guió'j cusu lin, ate' tödi ní' ulapë', en utubë' yöz zían. <sup>8</sup> Lësca' caní, libí'ili' na' réajlë'ëli' Cristo, guli'cöza zxön ladxí', en bulí'tipa ladxí'li', tu' chizá' gala' dza huödë'

Xanru'. <sup>9</sup> Böchi' luzá'ado', bití' innéli' que luzá'ali' tuli' ia'tuli', para cabí' ibága'li' xíguia'. ¡Buli'yútsöca! ¡Chirudza-ga lo udxinè' Xanru', ate' uchi'a usöröè' le runli'!

<sup>10</sup> Böchi' luzá'ado', buli'yú ca guca quégaquiè' bönni' gulu'è didza' uláz queè' Xanru'. Nácagaquiè' ca tu le ru-lu'í rë'u ca ral-la' quí'í sáca'ru', en cózaru' zxon ladxí'.

<sup>11</sup> Na'a, nucuá'aru' légaquiè' ca yugu' bönni' guláquiè' bica' ba, nupa ní' gula'guí'í gula'zaca'. Chibiyónili' ca benè' Job. Gulözè' zxon ladxí' sal-la' gudí' guzácá'dè'è, ate' nózili' ca' ca benè' Xanru' queè' ga búdxitè.

Ruhuéchi'da' ladxè'è Xanru' rë'u, en ru'í ladxè'è rë'u.

<sup>12</sup> Böchi' luzá'ado', le nácatèrö lo naca lè ni rea' libí'ili': ¡Bití' uzótjali' Nu zoa yehua' yubá, en bití' uzótjali' le nacua' luyú ni, en bití' uzótjali' bíti'tès bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Bití'" ral-la' innásili' "Bití'." Caní ral-la' gunli', para cabí' ibága'li' xíguia' lahuè' Dios.

<sup>13</sup> Channö riguí' rizáca' nu dzaga libí'ili', ral-la' ulidza Dios nu na'. Channö zoa nu dzageja, ral-la' gul-la' yöl-la' ba nu na'. <sup>14</sup> Channö re'e nu dzaga libí'ili', ral-la' ulidza bönni' gula tapa chí'è bönachi queè' Cristo, para ulu'lidzè' Dios, en ila'nábinè' Lè' únè' bönni' huè' na'.

Ral-la' ila'gu'è lè' le za, en ulu'gunè' dxin Lè' Xanru'.

<sup>15</sup> Cate' ulu'lidzè' Dios, en ta'yéajlè'è gunè' Cristo ga huóáquiè' bönni' huè' na', ní'irö gunè' Xanru' ga huóása uzözè', en channö benè' dul-la' bönni' huè' na', Xanru' uniti lahuè' lè'. <sup>16</sup> Que lè ni na', guli'xóalèpi dul-la' nabá-ga'li' tuli' ia'tuli', en guli'naba que luzá'ali' tuli' ia'tuli' lahuè' Dios para únè' libí'ili', para urúaj yödzöhué' na' ré'eli'. Le rulidzè' tu bönni' tsahuí' Dios, le runè' idú ladxè'è, nácada' lesaca'. <sup>17</sup> Elías, bönni' ní' bè'è didza' uláz queè' Dios, gúquiè' tu bönni' yödzölió ca nácaru' rë'u, pero cate' bulidzè' Dios, en gunábinè' Lè' para cabí' galaj guió'j, idú tsonna iz yu' xopa beo' bití' galaj guió'j luyú ni. <sup>18</sup> Gudödi ní' bulidzè' Dios leyúbölö, ate' böálaj guió'j, ate' bunödzej le gulazè' yugu' bönni' dza ní'.

<sup>19</sup> Böchi' luzá'ado', lè ni ral-la' inózili'. Channö nunbè' nu bönni' dzáguiè' libí'ili' le naca idútè li, en richixi riníguinè', ate' zoa nu gun ga ubí'í ladxè'è bönni' na' richixi riníguinè', <sup>20</sup> nu na' gun ga ubí'í ladxè'è bönni' dul-la' na' gudé' ga yúbölö, usólé' bönni' dul-la' na' lu yöl-la' guti, en gunè' ga uniti lahuè' Dios dul-la' zían nabáguè'è bönni' na'. ¡Ca' gaca!

# 1 Pedro

## Pedro rugapë' Dios nupa ta'dá' Cristo

**1** Neda', Pedro, naca' gubáz nasól-lë'ë Jesucristo. Ruzúaja' queéli' lu guichi ni, libí'ili' násilasili' zítu' gapa dë ládzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. <sup>2</sup> Guró cazë' Xúziru' Dios libí'ili' ca na' bucözë' dza ní'te, para guéquili' quez queë' lu në'ë Dios Bö' Lá'ayi, en gunli' ca rna xtídzë'ë Cristo, en gácali' idú tsahui' ní'a que xichönë' Cristo. Rinábida'-në' Dios uzá láchë'ë queéli', en gunë' ga soa dxi icja láchí'do'oli'.

## Le rúntica'siru' löza

<sup>3</sup> Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' láchí' zön queë' bucubë' yöl-la' na'bán queéru' tu' busubanë' Jesucristo lu yöl-la' guti! ¡Lë ni run ga rúntica'siru' löza, <sup>4</sup> en gun ga idéli'ru' lë na' rapa chí'ë Dios queéru' yehua' yubá! Lë na' rapa chí'ë Dios, le unödzjë' quégaca bönachi queë', bití' initi, en bití' itëbi, en bití' igula. <sup>5</sup> Tu' réajlë'ëli' Lë', lu yöl-la' huáca zön queë', Dios gun chí'ë libí'ili' cate' idxinrö dza ní' uzí'ili' xibé yöl-la' rusölá idú na' chinupé'ë queéru', en ulu'ë lahui dza údxi.

<sup>6</sup> Que lë ni na' rudzëjade'eli', sal-la' na'a ral-la' quí'i sá-ca'li' tu chí'ido' tu' taca zían le ta'z'í' bë' libí'ili'. <sup>7</sup> Tu' ruá' rilenli' yugu' lë na' ta'z'í' bë' libí'ili', naca bë' naca idú ca réajlë'ëli' Cristo. Lësca' caní rizí' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queéli' Cristo, le nácarö lesaca' ca oro, gaca queéli' yöl-la' zön, en yöl-la' run bal dza ní' ulu'í' lahuë' Jesucristo.

<sup>8</sup> Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' bití' rilé'eli'-në' na'a, ate' rudzëjali'. Yöl-la' rudzeja zön queéli' le cabí gaca quí'xjö'öru' tsca naca, naca idútë li. <sup>9</sup> Caní naca, tu' ridéli'li' yöl-la' rusölá que bö' naca cázali', le rata' queéli' tu' réajlë'ëli'-në' Cristo.

<sup>10</sup> Dza ní'te yugu' bönni' gulu'ë didza' uláz queë' Dios bulu'sédë' dxí'ado' ca naca yöl-la' rusölá na' dë queéru' na'a, ate' gulu'ë didza' ca naca le ruzá láchë'ë Dios queéru'. <sup>11</sup> Bö' Lá'ayi dzáguie' Cristo buzëajni'inë' zí'atëlö bönni' na' gulu'ë didza' uláz queë' Dios, en bulu'ínë' légaquie' ca ral-la' quí'i sáquë'ë Cristo, enca' ca gaca queë' yöl-la' zön tödi na'. Que lë ni na' gulu'í' láchí'gaquie' ila'nózinë' bátaxi gaca lë ni, en nuzxi na' gaca que lë na' bulu'ínë' Bö' dzáguie' Cristo légaquie'. <sup>12</sup> Dios bulu'ínë' bönni' na' gulu'ë didza' uláz queë' bití' naca tu le ila'lé'enë' légaquie', pero rë'u ni rilé'eru' lë

na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxí'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquie', Nu na' risól-lë'ë Dios zoë' yehua' yubá queéru', ate' té'ënnë' gubáz lá'ayi queë' Dios ila'nózinë' ca naca lë na' gulu'ë didza' que dza ní'te.

## Dios rulidzë' rë'u para gácaru' lá'ayi

<sup>13</sup> Que lë ni na', guli'sóa ban láchí', en guli'cózatica'sö bá'ado'. Idú láchí'li' bulí'zöni láchí'li' lë na' uzá láchë'ë queéli' Dios dza ní' ulu'í' lahuë' Jesucristo. <sup>14</sup> Guli'gún ca rna xtídzë'ë Dios, en bití' gü'í'ili' lataj yugu' le rizë láchí'li' ila'ché' libí'ili' ga yúbölö, ca na' benli' dza ní' bití' nún-bë'ënilí'-në' Dios. <sup>15</sup> Ral-la' gácali' lá'ayi ca naca yúgu'të le runli', ca na' náquie' lá'ayi Dios, en bulidzë' libí'ili' para guéquili' queë'. <sup>16</sup> Lësca' caní nazúaj lu guichi lá'ayi, ca na' gunné' Dios le rna: "Guli'gaca lá'ayi, tu' naca' neda' lá'ayi."

<sup>17</sup> Rëli'-në': "Xuztu'" cate' rulídzali'-në' Dios, ate' Lë', lébisö ca ruchí'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxilí' Lë' tsanni ni zóali' yödzölió ni, le cabí naca idú ládzali'. <sup>18</sup> Dios busölé' libí'ili' lu lë na' gúcali' dza ní' cate' benli' ca nácgaca le cá'sö bulu'dödë' xuz xtó'oli' lolí'. Nöz quézilí' böá'uë' libí'ili', calëga len tu le initi ca naca oro, en plata, <sup>19</sup> pero len xichönë' Jesucristo le nácatërö lesaca', tu' budödi cuinë', en gúquie' ca tuba' bö'cu' xzi-la' nácabá' idú dxí'a, bö'ado' tutië'-ba' lahuë' Dios para ugúa dul-la'. <sup>20</sup> Dios guró cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulu'í' lahuë' para uzí'ili' xibé'. <sup>21</sup> Ní'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquie' lo. Caní naca, réajlë'ëli'-në' Dios, en ruzxöni láchí'li' Lë'.

<sup>22</sup> Na'a, chinún cuinli' dxí'a tu' runli' ca rna le naca idútë li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú láchí'li' ral-la' idxí'ili' luzá'ali' tuli' ia'tuli'. <sup>23</sup> Chiböáljali' leyübölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljaleni' xtídzë'ë Dios, le naca ban, en le zóatica'sö. <sup>24</sup> Caní naca, tu' nazúaj lu guichi lá'ayi le rna:

Yúgu'të bönachi nácgaca ca naca guixí'.

Yöl-la' lachi quéguequi naca ca xiyija guixí' na'.

Ribidxi guixí' na', en riguinnaj xiyija,

<sup>25</sup> pero xtídzë'ë Dios zóatica'sö.

Didza' ni bidxín queéli' lu didza' dxí'a.

**2** Que lë ni na', guli'cá'ana yúgu'të le ruá' dö. Bítirö sí' yé'ëli', en bití' ubéaj dxí'a cuinlí' lógaca bönachi. Bítirö uzxé'eli', en bití' innëli' que luzá'ali'. <sup>2</sup> Ral-la' së ládxi'ilí' le naca queë' Dios Bö' Lá'ayi para gálali' ca na' tunbí' bí'i hué'énido', ta'zé ládxi'bí' nidxi'. Caní ral-la' gunlí' ga idxinrö dza uláli', <sup>3</sup> channö réquibe'eli' náquië' Xanru' dxí'i ladxí'.

### Cristo náquië' ca tu guiój naca ban

<sup>4</sup> Guli'biga' ga zoë' Xanru'. Náquië' ca tu guiój naca ban. Náquië' ca tu guiój bulu'cá'ana bönachi cá'so pero naca tu le guró cazë' Dios le nazáca'tërö. <sup>5</sup> Lësca' caní, libí'ili' nácalí' ca yugu' guiój nabángaca. Guli'güf' Dios lataj ugunë' libí'ili' dxin, ate' gunë' ga gácalí' ca tu yudo' ga soë' Dios Bö' Lá'ayi. Lu yudo' na' gácalí' ca bixúz néquiquequinë' quez queë' Dios, ate' lu në'ë Jesucristo gaca udódi'li' yugu' le runnë' Dios Bö' Lá'ayi queé'li' lahuë' Dios, lë na' raza ládxi'ë Dios. <sup>6</sup> Que lë ni na' nazúaj ca' lu guichi lá'ayi le rna:

Rigu'a lu zö'ö yödzö Siön tu guiój lo squin zö'ö,  
le guró caza' neda', en naca lesaca'.

Nu réajlë' Lë', bití' ichixi inigui.

<sup>7</sup> Naca guiój ni queé'li' libí'ili' na' réajlë'ëli' Cristo tu le nazáca'da', pero quégaca nupa bití' ta'yéajlë' Cristo, naca ca na' nazúaj lu guichi lá'ayi le rna:

Guiój na' bulu'zóë' bönni' tu'cu'ë zö'ö tsölá'alö,  
tu' guléquinë' naca cá'so,  
guiój ni chinaca guiój lo squin zö'ö.

<sup>8</sup> Lësca' caní nazúaj lu guichi lá'ayi le rna:

Guiój ni gun ga tsöjchéguga' bönachi,  
en gun ga tsöjtsó'ögaca.

Le nácatë yöjchéguga'quië' bönni' bití' ta'yéajlë'ë Cristo, tu' gula'chixiné' cate' bulu'zóë' xtídzë'ë Dios tsölá'alö. Dios bucu'ë légaquië' para ilunë' caní.

### Nupa néquiquequi quez queë' Dios

<sup>9</sup> Libí'ili' nácalí' bönachi guró cazë' Dios. Yúgu'tëli' nácalí' bixúz queë' Bönni' Unná Bë' Lá'ayi. Nácalí' ca tu yödzö nequi quez queë' Dios. Nácalí' bönachi que cazë' Dios. Caní nácalí' para gaca gunlí' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

<sup>10</sup> Zí'atëlö bití' gúcalí' bönachi queë' Dios,  
pero na'a chinácalí' bönachi queë'.

Zí'atëlö cuntu nu buéchi' ladxí' libí'ili',  
pero na'a Dios caz ruhuéchi' ládxi'ë libí'ili'.

### Zóaru' nabanru' para gunru' ca ré'ënë' Dios

<sup>11</sup> Böchi' luzá'ado', nácalí' ca bönachi zítu', en ridásili' yödzölió ni. Que lë ni na', ráta'yua' lolí', bití' gü'ili' lataj ila'nná be'e le rizësö ládxi'ilí' libí'ili', yugu' le ta'díl-lalen bö' naca cázali'. <sup>12</sup> Guli'gún le naca dxí'a lógaca bönachi bití' núnbë'gaquië' Dios. Caní gaca, channö ulu'zegui libí'ili' didza', en ila'nná tútilí' bönachi, gaca ila'lé'e bönachi yugu' le dxí'a runlí', ate' dza huödë' Xanru' ila'gu'ë Dios yöl-la' ba nía que le naca cázali'.

<sup>13</sup> Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucu'ágaca bönachi légaquië', sal-la' náquië' bönni' rinná bé'enë' idútë yödzölió, tu' náquië' bönni' lo unná bë', <sup>14</sup> o channö náquië' bönni' rinná bé'enë' tu yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxí'a. <sup>15</sup> Caní ré'ënë' Dios gunlí' para ila'bó' dxíë' yugu' bönni' bití' bi nözguequinë', en bití' núnbë'gaquië' Lë', cate' ila'lé'enë' le naca dxí'a na' runlí'.

<sup>16</sup> Guli'gaca ca yugu' bönni' nazángaqueië', pero bití' ugunlí' dxin yöl-la' nazán queé'li' para gunlí' le ruá' dö'. Guli'gaca ca yugu' bönni' nadó'ogaquië' queë' Dios.

<sup>17</sup> Guli'gún bal yúgu'të bönachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzölió.

### Le gudíi guzxáquë'ë Cristo ruzéajni'i rë'u ca ral-la' gunru'

<sup>18</sup> Núlöli' nácalí' bönni' nadó'ogaca, guli'gadxi bönni' xanlí', en guli'gún légaquië' bal, calégasö gunlí' bal yugu' bönni' xanlí' na' nácagaquië' tsahui', en tuí'i ládxi'ígaquië' libí'ili', pero guli'gún bal ca' yugu' bönni' xanlí' na' tu'saca' zí'ë libí'ili' lu dxin runlí' quégaquië'. <sup>19</sup> Channö quí'i sáca'li', en bití' bi nabága'li', ate' guá' ilenlí' lë na' tu' réquili' naca ca ré'ënë' Dios, urúajli' tsahui' lahuë' Dios. <sup>20</sup> Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', çnacxi caz uzí'ili' xibé sal-la' len yöl-la' riböza zxön ladxí' queé'li' guá' ilenlí' lë na' gaca queé'li'? Channö ribózali' zxön ladxí', en ruá' rilenlí' le riguí'i rizáca'li', ate' benlí' le naca dxí'a, ní'irö urúajli' dxí'a lahuë' Dios. <sup>21</sup> Dios bulidzë' libí'ili' para quí'i sáca'li' caní, tu' gudíi guzxáquë'ë Lë cazë' Cristo uláz queé'li', en buzóë' queé'li' tu le rulu'íi libí'ili' ca ral-la' gunlí', para quí'i sáca'li' ca na' gudíi guzxáquë'ë Lë'.

<sup>22</sup> Cristo bití' bi dul-la' benë', en catu caz guzxí' yë'ë.

<sup>23</sup> Cate' bulu'dídza' yúdxiné' Lë',  
bití' butsaqui yúdxiné' légaquië'.

Cate' bulu'saca' zí'ë Lë',

bití' buzenë' légaquië' le bach,

pero budödi cuiné' lu në'ë Dios,

Nu na' ruchí'a rusöröë' le runru' ca sa'yéaj.

<sup>24</sup> Lë cazë' Cristo guzxí'ë dul-la' queéru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxí'a. Lë' gúquië' huë' uláz queéru' para huóacaru' rë'u dxí'a. <sup>25</sup> Gúcalí' ca yugu' bö'cu' zxila' nanítigacaba', pero na'a budxinlí' queë' Cristo, Nu ruyú libí'ili', en rapa chí'ë bö' naca cázali'. Náquië' queé'li' ca tu' bönni' uyú bö'cu' zxila'.

### Ca ral-la' ilún nupa nutsaga ná'gaca

**3** Lësca' caní, libí'ili' nigula, ral-la' gunlí' bal bönni' que queé'li', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxí'a runlí', en ca na' nácalí' ba'a ladxí', en runlí' légaquië' bal, sal-la' bití' bi didza' ruí'ilenlí' légaquië' ca naca queë' Cristo.



<sup>3</sup> Yöl-la' lachi queé'li' bití' naca le zoa láhuisö, tsca rupá'alí' ícjalí', en tsca nátagaca le néquini oro nusí' cuinlí', en lari' nazáca'da' náculí'. <sup>4</sup> Yöl-la' lachi queé'li' ral-la' gaca le yu'u icja ládxí'do'olí'. Yöl-la' lachi le ridiá'ti-ca'sö naca yöl-la' nöxaj ladxí', en yöl-la' ba'a ladxí', le nazáca'da'gaca lahué' Dios. <sup>5</sup> Lësca' caní guca yöl-la' lachi quegacanu nigula gula'yéaj ladxí'nu Dios, nigula na' gula'cuá'anu dza ní'te. Bulu'zxöni ladxí'nu Dios, en gulunnu bal bönní' que queégacanu. <sup>6</sup> Caní bennu Sara, tu' bennu ca rnna xtídzé'ë Abraham, bönní' queénu, en bulídzanu lè', gunnánu: "Xan." Libí'ilí' ca' gunlí' ca bennu Sara na' channö gunlí' le naca dxí'a, en bití' bi gádxilí'.

<sup>7</sup> Lësca' caní, libí'ilí', bönní', ral-la' gü'í ladxí'li' nigula que queé'li'. Gulí'gún légacanu bal, calégasö tu' nótá'gacanu ca yöl-la' nál-la queé'li', pero lësca' tu' nadé'li'gacanu yöl-la' na'bán na' runné' Dios queéru', lébisö ca nadé'li'li' libí'ilí'. Gulí'gún caní para cabí uzaga' tu' xihuí' xinózilí' cate' ulídzalí'-né' Dios.

### Huagu'í huazáca'ru' sal-la' gunru' le naca dxí'a

<sup>8</sup> Ga ruúdxitè, gulí'gaca tuz tulí' len ia'tulí' yúgu'téli', en gulí'gü'í ladxí'li' luzá'alí' tulí' ia'tulí'. Gulí'gaca dxí'í ladxí', en zxön ladxí'. <sup>9</sup> Bití' ubí'ilí', cabí guá'alí' dö' que nu ruá' dö' queé'li', en bití' utsaga yúdxilí' nu rutsaga yudxi libí'ilí', pero caní ubí'ilí', inábili'-né' Dios guné' ga gaca bica' ba nu na', tu' bulídzé' Dios libí'ilí' para gácalí' bica' ba. <sup>10</sup> Caní naca le nazúaj lu guichi lá'ayi le rnna:

Nu bönní' ré'ënè' uzi'é xibé yöl-la' na'bán queé', en cözé' dxí'ado',

ral-la' ucá'ané' didza' xihuí', en cabirö sí' yé'ë.

<sup>11</sup> Ral-la' ucá'ané' le ruá' dö', en guné' le naca dxí'a. Ral-la' gü'í ladxé'ë cözé' zxön ladxí', en gúntica'sé' caní,

<sup>12</sup> Xanru' rapa chí'ë yugu' bönní' tsahuí'

en ruzé náguié' le tu'lidzé' Lè',

pero ruzágué'ë xinózguequi nupa tua' dö'.

<sup>13</sup> ¿Nuzxi caz guá' dö' queé'li' channö ruí'í ladxí'li' gúntica'silí' le naca tsahuí'? <sup>14</sup> Sal-la' quí'í sáca'li' cate' runlí' le naca tsahuí', gácalí' bica' ba. Cuntu nu gádxilí', en bití' ubi uguí'ilí' <sup>15</sup> pero bulí'zxöni ladxí'li'-né' Cristo, en gü'í'ilí' Lè' lataj inná bé'ené' lu icja ladxí'do'olí'. Gulí'sóa sina' quí'xjö'í'ilí' yúgu'tè nupa ila'nabi libí'ilí' bizx que runlí' löza Cristo, en gunlí' lè ni lu yöl-la' nöxaj ladxí' queé'li', en lu yöl-la' run bal nupa na'. <sup>16</sup> Gulí'gúntica'sö le naca dxí'a lahué' Dios, en channö nacua' nupa ta'nné' xihuí' que le naca tsahuí' runlí' tu' réajlè'ëli' Cristo, ní'irö ulu'tuí' tu' nözi le ta'nné' queé'li'. <sup>17</sup> Channö quí'í sáca'li', dxí'arö gaca channö naca tu' runlí' le naca dxí'a, en caléga tu' ruá'alí' dö', channö Dios ré'ënè' quí'í sáca'li' caní.

<sup>18</sup> Lè cazé' Cristo gudí'í guzjáquë'ë, en gútié' uláz queéru' para bugüé' dul-la' nabága'ru'. Lè' náquié' dxí'a, pero gútié' ní'a queéru', yugu' bönní' dul-la'. Caní bené' para buné' ré'u tuz len Dios. Lu yöl-la' bönachi queé' gútié' pero lu bö' naca cazé' ni zoé' nabané' lu le cubi le naca cazé'. <sup>19</sup> Lu bö' naca cazé' guyijé' yöjené' libán lógaca bö' nadzúngaca. <sup>20</sup> Bö' ni gulaca cazé'

yugu' bönní', dza ní'te gula'dá'baguë'ë xtídzé'ë Dios, dza ní' zoé' Noé, cate' ní' gulözé' Dios lu yöl-la' riböza zxön ladxí' queé', en bití' busiúdxé' légaquié', tsanni ní' bené' Noé barco zxön na'. Lè'e barco na' bulu'lá nabábasö bönachi lu nisa. Gulaca xunu' bönachi, bönní', en nigula. <sup>21</sup> Nisa ní' naca tu le rulu'í ca naca nisa ga na' ridílaru' nisa, le naca bé' nuláru' lu yöl-la' guti tu' bubané' Jesucristo lu yöl-la' guti. Lè na' ridílaru' nisa bití' naca tu le run dxí'a le nácaru' láhuisö, pero rulu'í ruí'í ladxí'ru' gaca dxí'a icja ladxí'do'oru' lahué' Dios.

<sup>22</sup> Jesucristo bubené' yehua' yubá, ga na' yöjchö'ë cuita lè'ë ibèla Dios, en rinná bé'ené' yugu' gubáz lá'ayi, en nupa ní' ta'nná bé', en nupa nadé'li'gaca yöl-la' zxön.

### Ral-la' ugunru' dxin yöl-la' huáca queé' Dios para gunru' xichiné' Cristo

**4** Que lè ni na', ca na' gudí'í guzjáquë'ë Cristo lu le naca cazé', lësca' libí'ilí' ral-la' soa cózali' quí'í sáca'li'. Nu na' riguí'í rizáca'a tu' da' le naca tsahuí' chibucá'ana dul-la'. <sup>2</sup> Na'a isí lo, ral-la' gúntica'silí' ca ré'ënè' Dios, en caléga ca rizésö ladxí'li' lu yöl-la' bönachi queé'li'. <sup>3</sup> Tsca'tí' gaz le chibenlí' chibenlí'. Bítí'rö gunlí' ca na' tun nupa bití' núnbé'gaca Dios. Dza ní'te benlí' yugu' le cabí ral-la' gunlí'. Guzé ladxí'li' le ruá' dö'. Guzúdxilí'. Gudödi bé' gü'í gudágulí', en guyéaj ladxí'li' budó' guiój budó' yaga, le rigútiné' Dios. <sup>4</sup> Na'a, tu'báninè' bönní' tuné' caní tu' cabirö runlí' tsözxön légaquié' cate' tuné' le ruá' dö' caní, en que lè ni na' tu'tsaga yúdxiné' libí'ilí'. <sup>5</sup> Légaquié' run bayudxi ulu'lu'í'í cuíngaquié' lahué' Dios, ate' Lè' chizóa uchi'a usöröé' nupa nabángaca, en nupa chinátigaca. <sup>6</sup> Que lè ni na' guca libán que didza' dxí'a lógaca nupa chinátigaca, nupa na' Dios buchí'a busöröé' léguequi cate' ní' gula'cuá' yödzölió ni, ca na' ruchí'a rusöröé' yúgu'tè bönachi. Guca libán lóguequi para ila'cuá' lu yöl-la' na'bán lu bö' nátagaca caz, ca na' zoa cazé' Dios lu yöl-la' na'bán.

<sup>7</sup> Chizóa idxín dza údxi que yúgu'tè le dè. Que lè ni na', gulí'gaca ba'a ladxí', en bulí'subán ladxí'li' para gaca ulídzalí'-né' Dios. <sup>8</sup> Tu' runtè bayudxi, gulí'dxí'í luzá'alí' tulí' ia'tulí', ate' channö dzágali' lu yöl-la' nadxí'í, gácalí' sina' uniti loli' yugu' luzá'alí' tua' dö' queé'li'. <sup>9</sup> Gulí'gü'í lataj ila'cuá' böchi' luzá'alí' lídxilí', en bití' inné'li' quégaquié'. <sup>10</sup> Ral-la' ugunlí' dxí'ado' dxin yugu' le buzá' ladxé'ë Dios queé'li', en gácalenlí' luzá'alí' tulí' ia'tulí'. <sup>11</sup> Nu bönní' runé' ba nalí, ral-la' guné' ba nalí que xtídzé'ë Dios, ate' nu bönní' runé' xichiné' Cristo, ral-la' uguné' dxin yöl-la' huáca na' runné' Dios queé', ate' ní'a que yúgu'tè le runlí', gaca yöl-la' ba queé' Dios ní'a que le nuné' Jesucristo. ¡Gácatica'sö queé' Dios yöl-la' ba, en yöl-la' unná bé'! ¡Ca' gaca!

### Le ila'gu'í ila'zaca' bönachi ta'yéajlè' Cristo

<sup>12</sup> Böchi' luzá'ado', bití' ubánili' tu' nözi le ta'zí' bë'da' libí'ilí'. Bití' naca tu le cabí núnbé'gaca bönachi.

<sup>13</sup> Gulí'dzéjade'e tu' dè lataj queé'li' gunlí'-né' tsözxön Cristo lu le riguí'í rizáquë'ë Lè' ní'a que bönachi queé' para gaca udzéjalí' ca' dza na' huödé' Cristo, cate' ilé'elí'

yöl-la' zxon queë'. <sup>14</sup> Channö tu'dzaga yudxi bönachi libí'ili' tu' dá'alí' Cristo, bica' ba libí'ili', tu' naca bé' zóalené' Dios Bó' Lá'ayi libí'ili', Nu na' za' yehua' yubá. Bönachi yödžölió ni tu'dzaga yudxi Lë', pero libí'ili' runli'-në' bal. <sup>15</sup> Channö riguí' rizáque'ë nu bönni' dzáguie' libí'ili', ral-la' gaca caní tu' dé'ë Cristo, en calëga tu' rútië' bönachi, o ribané', o ru'ë dö', o tu' yöjgútsë'ë ga yúbölä. <sup>16</sup> Na'a, channö nálöli' riguí' rizáca'li' tu' dá'alí' Cristo, bití' ral-la' utuí'ili', pero guli'cu'ë Dios yöl-la' ba tu' nazí' lali' bönachi queë' Cristo.

<sup>17</sup> Chibidxín dza isí lahuë' Dios uchi'a usöröë' bönachi rö queë'. Channö zí'aló uchi'a usöröë' ré'u, ¿nácxitëro gaca quégaca nupa bití' túngaca ca rna didza' dxí'a queë' Dios? <sup>18</sup> Channö naca böniga ulu'lágaca nupa tun le naca dxí'a, ¿nácxitëro gaca quégaca nupa ta'dá'baga' Dios, en tun dul-la'? <sup>19</sup> Caní naca, yugu' bönni' ni ta'guí' ta'zaque'ë tu' ré'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquie', en runë' ca rna xtídzë'ë.

#### Pedro ruzéajni'inë' nupa ta'yéajlë' Cristo

**5** Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí' guzáque'ë Cristo, ate' guna' ca' tsözxón libí'ili', uzí'iru' xibé yöl-la' zxon na' ilá' lahui. <sup>2</sup> Guli'gaca ca bönni' tu'yúë' bö'cu' zxila', gun chí'ili' bönachi na' Dios gulu'ë lu ná'alí'. Guli'gún caní idú ladxí'li' ca ré'ënë' Dios, en calëga tu' run bayudxi queé'li', o tu' rizé ladxí'li' dumí. Guli'gún xichinli' tu ré'ënisili', <sup>3</sup> en calëga tu' ré'ënilí' iná bé'esili' nupa na' nagu'ë lu ná'alí'. Guli'güí' ladxí'li' gácalí' tu le rulu'í ca ral-la' ilaca nupa na' run chí'ili'. <sup>4</sup> Caní naca, cate' ulu'í lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

<sup>5</sup> Lë'sca' caní, bí'i cuidí', guli'gún ca ta'nné' yugu' bönni' gula. Yúgu'tëli' ral-la' gunli' bal luzá'alí', tulí' ia'tuli', lu

yöl-la' nöxaj ladxí' queé'li', tu' nazúaj lu guichi lá'ayi le rna:

Dios ruzáque'ë xinózguequi nupa tun ba zxon cuínguequi

pero rácalenë' nupa nácagaca nöxaj ladxí'.

<sup>6</sup> Guli'sóa nöxaj ladxí' lu në'ë Dios, ate' Lë' uchi'së' libí'ili' cate' izá'a dza. <sup>7</sup> Guli'cú'u yúgu'të le run ga ruúbi ruguí'ili' lu në'ë Dios, tu' ru'í ladxë'ë libí'ili'.

<sup>8</sup> Guli'gaca ba'a ladxí', en buli'subán ladxí'li', tu' zoa tu' xihui', nu bití' rilé'e libí'ili' dxí'a, ridá idú gásibí'ilo, en naca ca tuba' bëdxi guixí' ribódxí'aba', riguiljba' nu gáguba'. <sup>9</sup> Guli'gaca tsutsu ca réajlë'ëli' Cristo, en guli'zága' xinóza tu' xihui', tu' nózili' ta'guí' ta'záque'ë böchi' luzá'alí' idútë yödžölió ni ca na' riguí' rizáca'li' libí'ili'. <sup>10</sup> Ní'irö cate' chigudí' guzáca'li' tu chí'sö, Dios gunë' ga gácalí' idú tsahui', en ga gácalí' tsutsu, en ga gálali', en ga sóali' tsaz. Lë cazë' Dios ruzá' ladxë'ë queéru' yúgu'të le ruzí'iru' xibé, en bulidzë' ré'u para uzí'iru' xibé yöl-la' zxon queë' le zóatica'sö tu' nácaru' tuz len Jesucristo. <sup>11</sup> ¡Gácatíca'sö yöl-la' ba, en yöl-la' unná bë' queë' Lë'! ¡Ca' gaca!

#### Pedro ruzenë' didza' nupa ta'dá' Cristo

<sup>12</sup> Dídzado' ni ruzúaja' queé'li' lu guichi lu në'ë Silvano. Réquida' náquie' böchi'ru' idú ladxí'. Ré'ënda' utipa' ladxí'li', en runa' ba nalí loli', le nácatë lë ni naca le ruzá' ladxë'ë queéru' Dios. ¡Guli'gaca tsutsu tu' ruzí'ili' xibé lë ni!

<sup>13</sup> Yugu' bönachi queë' Cristo nacua' Babilonia tu'ga- pa Dios libí'ili'. Dios guró cazë' léguequi ca na' guröë' libí'ili'. Lë'sca' bí'i Marcos rugápabí' Dios libí'ili'. Nácabí' ca zxí'ini caza'. <sup>14</sup> Guli'gapa Dios luzá'alí' tulí' ia'tuli', en lu yöl-la' nadxí' queé'li' luzá'alí' unída'li' luzá'alí' tulí' ia'tuli'.

Rinábida'-në' Dios gunë' ga soa dxi icja ladxí'do'oli', yúgu'tëli' na' néquili' queë' Jesucristo. ¡Ca' gaca!

## 2 Pedro

### Pedro rugapë' Dios nupa ta'dá' Cristo

**1** Neda', Simón Pedro, naca' huen dxin queë' Jesucristo, en gubáz nasól-lë'è Lë'. Rugapa' Dios libí'ili', réajlë'ëli'-në' Jesús. Lébisö ca nazáca'gaca yöl-la' réajlë' queé'li' Lë', en yöl-la' réajlë' queé'tu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusólá rë'u, tsahui'.

<sup>2</sup> Rinábida'-në' Dios gunë' ga gata' queé'li' idútë le ruzá ládxe'ë queé'ru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

### Le nácgaca nupa ta'yéajlë' Cristo

<sup>3</sup> Lu yöl-la' huáca zxön queë', Dios chibennë' queé'ru' yúgu'të le riquíniru' para gata' queé'ru' yöl-la' na'bán idú, en para gácaru' ba'a ladxí', tu' núnbë'ëru' Nu na' bulidza rë'u para gata' queé'ru' yöl-la' zxön queë', en le naca tsahui' queë'. <sup>4</sup> Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queé'ru', ate' tu' naca caní nuláru' lu le ruá' dö' raca yödzölió ni tu' ta'zé ládxi'gaca bönachi le cabí naca tsahui'. Nuláru' para gácaru' ca náquië' Lë cazë' Dios. <sup>5</sup> Que lë ni na':

Channö réajlë'ëli' Cristo,

guli'gü' ládxi'li' gácali' dxi'i ladxí'.

Channö chinácali' dxi'i ladxí',

guli'gü' ládxi'li' gata' ca' queé'li' yöl-la' rácada'.

<sup>6</sup> Channö nápalí' yöl-la' rácada',

guli'gü' ládxi'li' inná be'e cuinli'.

Channö rinná be'e cuinli',

guli'cöza zxön ladxí'.

Channö ribózalí' zxön ladxí',

guli'sóca ba'a ladxí'.

<sup>7</sup> Channö zócali' ba'a ladxí',

guli'dxi'i luzá'alí'.

Channö nadxí'ili' luzá'alí',

guli'dxi'i ca' yúgu'të bönachi.

<sup>8</sup> Channö caní runli', en zeaj rácarö idú ca runli' caní, lë ni gun ga bití' gaca nítisö yöl-la' réajlë' queé'li' Lë', ate' tseaj gácarö idú ca núnbë'ëli'-në' Xanru' Jesucristo.

<sup>9</sup> Nu bönni' bití' ru'í ládxe'ë gunë' caní, náquië' ca tu bönni' nachul-la nanítië', tu' chizá' ral-la ládxe'ë bunë' Cristo lë' tsahui', en bugúë' yugu' dul-la' gubáguë' zí'atëlö. <sup>10</sup> Que lë ni na', böchi' luzá'ado', ral-la' gü'itë' ládxi'li' guéquibe'elí' bulidzë' Dios libí'ili', en guró cazë' libí'ili'. Channö gunli' caní, bití' ca' ichixi iníguili'. <sup>11</sup> Caní gaca, idú ládxe'ë Dios gúnнасë' queé'li' lataj tsázali' ga inná bé'tica'së' Xanru' Jesucristo, Nu rusólá rë'u.

<sup>12</sup> Que lë ni na' gúntica'sa' ga tsöjnéli' yugu' lë ni sal-la' chinóz quézili' le, en rugunli' dxin le naca idútë li na' chiguzxi' lu ná'alí'. <sup>13</sup> Runi neda' ral-la' usubana' ládxi'li' ca nácgaca lë ni tsanni ni zoa' nabana'. <sup>14</sup> Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. <sup>15</sup> Que lë ni na' ru'í'ida' ládxa'a guna' ga tsöjnética'sili' yugu' lë ni tödi gátia'.

### Nupa bila'lé'e yöl-la' zxön queë' Cristo

<sup>16</sup> Bití' bé'entu' libí'ili' tu didza' ridasö lu yöl-la' sina' queé'tu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. <sup>17</sup> Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyón chí'ë Dios, le birúaj lataj bení' queë', cate' gunnë': "Bönni' ni náquië' Zxi'ina'. Nadxí'ida' Lë', en raza ládxa'a Lë'." <sup>18</sup> Netu' biyón quézitu' chí'ë na' le birúaj yehua' yubá cate' ní' guzóalentu'-në' Xanru' lu gu'á lá'ayi na'.

<sup>19</sup> Lë na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' gü'í ládxi'li' didza' na', tu' naca ca tu gu'í ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca böljaj hui sila queé'ru'. <sup>20</sup> Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. <sup>21</sup> Yugu' didza' gulu'ë yugu' bönni' uláz queë' Dios bití' ca' gulu'ë tu gulë'ëni quézinë', pero gulu'ë didza' uláz queë' Dios le guchizië' Dios Bö' Lá'ayi icja ládxi'do'gaquië'.

### Ca nácgaca nupa tu'sédinë' le cabí nácatë

**2** Yugu' bönni' ta'zí' yë'ë gula'cuá'lenë' bönachi Israel, en gula'nnë' nácgacquië' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queé'li' ucá'anali' le naca idútë li. Ila'dá'baguë'ë ca' Xanru', Nu busólá rë'u. Le ilunë' gun ga usunítië' Dios légaquië'. <sup>2</sup> Zianli' libí'ili' gunli' légaquië' tsözxón lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idútë li. <sup>3</sup> Lu yöl-la' ruhuidí' quégaquië' ulu'sédinë' libí'ili' le cabí nácatë, para gata' quégaquië' dumí queé'li'. Chinarugu quégaquië' bönni' ni, ate' naca löza ila'nítië' tsaz.

<sup>4</sup> Dios bití' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na'

ta'bözë' dza usiúdxë' Dios légaquië'. <sup>5</sup> Lësca' caní, bití' buniti lahuë' bönachi gula'cuá' dza ní'te cate' gusól-lë'e nisa guiój le busuniti yödžolió le beti bönachi nácagaca xihuí, pero busölë' Noé lu nisa na', bönni' ni' benë' libán que le naca tsahuí. Dios busölë' ca' ia'gadxi dí'a dza queë' Noé na' lu nisa. <sup>6</sup> Lësca' caní, Dios guchúguië' quégaca bönachi gula'cuá' yödžö Sodoma, en yödžö Gomorra. Busunitië' léguequi lu guí, ate' bulu'huóaca dö. Le guca quéguequi naca tu le rulu'í le run gadxi nupa tua' dö'. <sup>7</sup> Cate' busunitië' yugu' yödžö na', Dios busölë' Lot, tu bönni' tsahuí, lu guí na'. Bu'ínida' ládxë'e Lot cate' bilé'enë' le xihuí gulún bönachi tuá dö' na'. <sup>8</sup> Caní guca, tu' guzóalenë' bönni' tsahuí na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahuí gusëbi ládxë'e yúgu'të dza ní'a que yugu' le cabí naca tsahuí gulúngaca. <sup>9</sup> Caní naca, Xanru' nózinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' nácagaca tsahuí ga idxinrö dza ichúguië' quéguequi ila'niti tsaz.

<sup>10</sup> Ichúguda'arö quégaquië' bönni' ni tunë' yugu' le ta'zë ládxë'e le ruá' dö', en ta'dá'baguië' yöl-la' unná bë' queë' Xanru'. Nácagaquië' rugu ladxí, en zidi ladxí. Bití' tádxinë' tu'lidza ditjë' gubáz lá'ayi ta'dé' lu bení'.

<sup>11</sup> Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

<sup>12</sup> Yugu' bönni' ni nácagaquië' ca böa' guixí, bití' bi ta'yéajní'iba', pero náljagacaba' para nu sön légacaba', en guti légacaba'. Ta'nnë' xihuë'e que le cabí ta'yéajní'inë', ate' ila'nitië' tsaz ca raca quégacaba' böa' guixí na'. <sup>13</sup> Dios ubië' quégaquië' le ila'guí' ila'záquë'e, tu' bulu'saca' zí'ë bönachi. Téquinë' naca xibágaquië' tu'z-í'ë xibë' le raca na'a dza. Nácagaquië' ca tu huë' nudzu', en tu le run ditaj cate' ní' tahuë' tsözxón len libí'ili', ate' tu'dzéjanë' tu' ta'zí' yé'enë' libí'ili'.

<sup>14</sup> Lu yöl-la' rizé ladxí' quégaquië' le ruá' dö' tu'yúë'-nu yugu' nigula. Bití' nacu'ë dxisö túngaquië' dul-la'. Túngaquië' ga ta'chixi ta'nigui nupa bití' nácagaca tsutsu ca ta'yéajlë' Cristo. Ta'guílatica'së' yugu' le tu'huídí'në'. Dios chinuchúguië' quégaquië' ilátigaquië'. <sup>15</sup> Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam, xzí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'. <sup>16</sup> Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tu'í didza' bönachi, ate' buzá-ga'ba' xinözë' Balaam ga na' sa'yéajë' lu yöl-la' ridá'ba-ga' queë'.

<sup>17</sup> Nácagaquië' bönni' ni ca tu buduá' chibuí' nisa que, enca' ca tu böaj le riché' bö' budunu'. Chinabá'a xilátjagaquië' lataj chul-la. <sup>18</sup> Caní nácagaquië' tu' tu'ë didza' yugu' le zxön lu yöl-la' bití' bi nözi quégaquië', en tu'gunë' dxin yugu' le ta'zë ládxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. <sup>19</sup> Té' bönachi ila'delí' yöl-la' rusólá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxí'do'gaquië'. <sup>20</sup> Channö bulu'lë' lu

le cabí naca tsahuí nacuá' yödžolió ni tu' gulúnbë'e Xanru' Jesucristo, Nu rusólá rë'u, ate' ní'irö ta'röli le cabí naca tsahuí na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga röjsetë ca le gula'báguë'e zí'alö. <sup>21</sup> Dxí'arö gaca quégaquië' la'-tu' catu caz ilúnbë'e Nu ruzóa rë'u nöza tsahuí ca le gaca quégaquië' channö gulúnbë'e Lë', ate' ní'irö bulu'cá'anë' xibá lá'ayi bë'e Dios quégaquië'. <sup>22</sup> Chibudxín quégaquië' didza' na' rnna:

Ruhuécjaba' bö'cu', ruhuóaguba' le si' gúbaba'.

Ruyázaba' cuchi na' si' gudíbiru'-ba' lu guna'.

### Naca löza huödë' Xanru'

**3** Didza' ni naca le buropi ruzúaja' queéli' lu guichi, böchi' luzá'ado'. Lu irópatë guichi na' ruí' ládxa'a usubana' ládxí'li' ca nácagaca lë ni. <sup>2</sup> Gulí'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Gulí'tsöjné ca' xibá na' Xanru', Nu rusólá rë'u, gunná bé'enë' rë'u, lë na' bulu'sédinë' bönni' gubáz nasól-lë'e Lë' libí'ili'.

<sup>3</sup> Ral-la' tsöjnéli' lë ni naca lo. Dza tsöjsëtëgaca ulu'lu'í lahuë' bönni' ilunë' le ta'zë ládxë'e le ruá' dö'. <sup>4</sup> Ulu'titjë', ila'nnë': "¿Gazxi caz lë na' guzxi' lu në'e Cristo? Gunnë': Huöda' leyúbölö. Dza ní'te cate' gulatië' xuz xtó'oru', yúgu'të raca tuz ca guca cate' gusí lo rata' yödžolió ga ridxintë na'a dza." <sup>5</sup> Tu'zöë' tsólá'alö le guca dza ní'te. Bë'e didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. <sup>6</sup> Len nisa ca' busunitië' Dios yödžolió dza ní'te cate' ní' gusól-lë'e nisa guiój le beti yugu' bönachi dul-la'. <sup>7</sup> Lúzxiba, en yödžolió ni le nacuá' na'a dza, Dios nucu'ë léguequi ga idxinrö dza usunitië' léguequi lu guí. Caní gaca tu' gunné' caní Dios caz. Uzéguië' léguequi dza ní' ichúguië' quégaca bönachi bití' nácagaca tsahuí gátigaca.

<sup>8</sup> Bití' gal-la ládxí'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. <sup>9</sup> Bití' ridzenë' Xanru' gunë' le guzxi' lu në'e gunë'. Téquiquequi bal-la bönachi ridzenë', pero ribözë' zxön ladxí, en ruá' rilenë' rë'u tu' cabí ré'enë' initi nitú bönachi, pero ré'enë' ulu'bí'í ládxí'-gaca yúgu'të bönachi.

<sup>10</sup> Tsálido'os idxín dza huödë' Xanru' ca ridxinë' tu bönni' gubán chí' dzó'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí zxön. Ila'yegui yödžolió ni, en le nacuá' yödžolió ni.

<sup>11</sup> Channö caní gaca, ila'niti yúgu'të lë ni, ¿bizxi caz ral-la' gunlí? Ral-la' gácali' ba'a ladxí, en udödi cuinlí lu në'e Dios. <sup>12</sup> Ral-la' cózali' dza huödë' Xanru', en gú'í ládxí'li' gunlí' ga idxinrö bayón dza ní' cate' initi lúzxiba, ate' ila'niti yúgu'të le nacuá' ni lu guí. <sup>13</sup> Caní gaca, pero rë'u ribózaru' le guzxi' lu në'e Dios. Gunë' tu lúzxiba cubi, en tu luyú cubi ga ní' soa le naca tsahuí.

<sup>14</sup> Que lë ni na', böchi' luzá'ado', tsanni ni ribózali' yugu' lë ni, gulí'gú'í ládxí'li' gácali' idú tsahuí lahuë' Dios, ate' gunlí' ga cuntú nu bi gaca innë queéli', en cózali' dxí'ado' cate' idxinrö dza ní'. <sup>15</sup> Ral-la' inóžili' ribözë' Dios zxön ladxí' para gata' quégaca bönachi

lataj ulu'lagaca, ca na' gunné' ca' böchi'ru' Pablo. Buzúajë' queé'li' lu guichi, zóalen lë' yöl-la' réajni'i na' bë'e Xanru' queë'. <sup>16</sup>Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' bití' nózguequinë', en bönni' bití' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

<sup>17</sup>Chinóz quézili' lë ni, böchi' luzá'ado'. Que lë ni na' guli'gún chí'i cuinli', para cabí ila'z'i' ye'e bönachi bití' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. <sup>18</sup>Guli'güi' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

# 1 Juan

## Didza' nabániru'

**1** Rusiyöntu' libí'ili' ca naca queë' Bönni' na' zoa cazé' dza ní'te, le biyónitu' bé'ë didza', en le bilé'etu' ca naca queë', en le buyutu' bené' Bönni' na'. Gu-dantu' Lë'. Bönni' ni náquië' Jesús, lë' ca' Didza' Nabáni-gaca Bönachi. <sup>2</sup> Bönni' na' nabánigaca bönachi bulu'í lahuë', ate' bilé'etu' Lë'. Runtu' ba nalí queë', en rulu'í-tu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í lahuë' ga zóaru'. <sup>3</sup> Le bilé'etu', en le biyónitu' rusiyöntu' libí'ili' para gá-calí' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. <sup>4</sup> Ruzúajtu' queé'li' lu guichi lë ni para gaca udzëjaru' idú ládxí'ru'.

## Dios náquië' bení'

<sup>5</sup> Lë ni naca didza' biyónitu' bé'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la que dul-la' bití' zóalen Lë'. <sup>6</sup> Channö innaru': "Nácaru' tuz len Dios", pero channö runru' le naca chul-la que dul-la', lë ni naca bé' rizí' yé'ëru', en bití' runru' le naca idútë li. <sup>7</sup> Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxí'a, en rugúa yúgu'të dul-la' nabága'ru'.

<sup>8</sup> Channö rna: "Bití' bi dul-la' runru'", rizí' yé'ëru' la' cuínsiru', en bití' nazí' lu ná'aru' le naca idútë li. <sup>9</sup> Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. <sup>10</sup> Channö innaru': "Bití' bi dul-la' nabága'ru'", naca ca innaru': "Dios rizí' yé'ë", ate' bití' runru' ca rna xtídzë'ë.

## Cristo náquië' Nu rudödi xtídzaru' lahuë' Dios

**2** Libí'ili', zxí'ina'do', ruzúaja' queé'li' lu guichi lë ni, para cabí' gunlí' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'. <sup>2</sup> Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödzölió.

<sup>3</sup> Channö runru' ca naca le gunná bé'enë' rë'u, nóziru' chinúnbë'ëru' Lë'. <sup>4</sup> Nu rna: "Neda' núnbë'a-në' Dios" pero bití' run ca rinná bé' xibá queë', nu ni rizí' yé', en

bití' run le naca idútë li. <sup>5</sup> Nu run ca rna xtídzë'ë Dios, le nácatë nadxí'í nu ni Dios ca ral-la' gun. Channö runru' caní, nóziru' néquiru' queë' Dios. <sup>6</sup> Lësca' caní, nu rna: "Neda' néquida' queë' Cristo", ral-la' gaca nu na' ca na' gúquië' Cristo cate' gudé' yödzölió ni.

## Tu xibá cubi

<sup>7</sup> Böchi' luzá'ado', ruzúaja' queé'li' lu guichi xibá ni. Bití' naca tu xibá cubi, pero xibá gula na', le zóalen libí'ili' dza ní'te. Xibá gula na' naca didza' biyónili' dza ní'te. <sup>8</sup> Lësca' naca ca ruzúaja' queé'li' lu guichi tu xibá cubi, lë na' le nácatë benë' Jesús ca rna, ate' runlí' ca' libí'ili' ca rna, tu' chiridödi que le naca chul-la que dul-la', ate' bení' idú chiruzení'.

<sup>9</sup> Nu rna: "Zoa' lu bení'", pero bití' rilé'e dxí'a böchi' luzé'e, nu ni ni run le naca chul-la que dul-la'. <sup>10</sup> Nu nadxí'í böchi' luzé'e zoa lu bení', ate' le run ga nu ichixi inigui bití' zóalen nu na'. <sup>11</sup> Le naca chul-la que dul-la' run ga nu bití' rilé'e dxí'a böchi' luzé'e, en ga ridá nu na' ga chul-la. Bití' nözi ga zeaj, tu' run le naca chul-la na' ga nachul-la naniti nu na'.

<sup>12</sup> Ruzúaja' queé'li' lu guichi, zxí'ina'do', tu' chibunít lahuë' Dios dul-la' nabága'li', tu' runë' le guzxí' lu në'ë gunë'. <sup>13</sup> Ruzúaja' queé'li' lu guichi, libí'ili' nácali' xuz, tu' núnbë'ëli' Nu na' zoa caz dza ní'te. Ruzúaja' queé'li' lu guichi, bí'i ra'bán, tu' chibucúl-lalí' tu' xihui'.

<sup>14</sup> Chibuzúaja' queé'li' lu guichi, zxí'ina'do', tu' núnbë'ëli'-në' Dios Xuz. Chibuzúaja' queé'li' lu guichi, libí'ili' nácali' xuz, tu' núnbë'ëli' Nu na' zoa caz dza ní'te. Chibuzúaja' queé'li' lu guichi, bí'i ra'bán, tu' nácali' bí'i nál-la, en nazí' lu ná'alí' xtídzë'ë Dios, en chibucúl-lalí' tu' xihui'.

<sup>15</sup> Bití' idxí'isilí' yödzölió ni, en calëga le dë yödzölió ni. Channö zoa nu nadxí'í yödzölió, bití' nadxí'í Dios Xuz. <sup>16</sup> Caní naca, tu' naca le tun bönachi yödzölió ni le cabí' ré'ënë' Dios Xuz, pero naca le té'ëni bönachi yödzölió ni.

Tunë' le riyaza ladxí' yöl-la' bönáchisö quégaquië'.

Tunë' le ruá' dö' le ridani guió'j lógaquië'.

Tun ba zxon cuíngaquië' ní'a que le dë quégaquië'.

Caní nácgaca le ruá' dö' tunë'. <sup>17</sup> Huadödi que yödzölió ni, enca' que le ta'zé' ládxí'gaca bönachi, pero nu run ca ré'ënë' Dios sóatica'sö.

## Nu ru'í didza' idútë li, en nu rizí' yé'

<sup>18</sup> Zxí'ina'do', chizóaru' dza údxí, en ca na' chibiyónili' huidë' bönni' ridá'baguë'ë Cristo, lësca' na'a chigusí lo nacué' zían bönni' ta'dá'baguë'ë Cristo. Que lë ni na'

nóziru' chizóaru' dza údxi. <sup>19</sup> Bila'ruájé' bönni' caní lád-jaru', pero bití' guláquié' tuz len rë'u. La'tu' guláquié' tuz len rë'u, ila'cuá'lentica'sé' rë'u. Na'a, bila'ruájé' para gaca bé' bití' nácaquie' yúgu'té' tuz len rë'u.

<sup>20</sup> Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'té. <sup>21</sup> Buzúaja' queéli' lu guichi, tu' chinózili' le naca idúté li, en calëga tu' cabí nózili' le. Nózili' ca' bití' ca' rizí' yé' nu nözi le naca idúté li.

<sup>22</sup> ¿Nuzxi caz na' nu rizí' yé'? ¿Naru' cabí naca nu na' ridá'baga' náquié' Jesús Nu gusól-lë'è Dios? Naca nu ni bönni' ridá'bagué'è Cristo, tu' ridá'bagué'è náquié' Dios Xuzé' Jesús, en ridá'bagué'è ca' náquié' Jesús Zxí'iné' Dios. <sup>23</sup> Núti'tës nu ridá'baga' Dios Zxí'ini, bití' ca' zóalené' Dios Xuz nu na'. Núti'tës nu rnna yálajdo' Jesús náquié' Zxí'iné' Dios, lësca' zóalené' Dios Xuz nu na'.

<sup>24</sup> Na'a, guli'gü'i lataj le biyónili' dza ní'te ugá'analenti-ca'sö libí'ili'. Channö le biyónili' dza ní'te ugá'analenti-ca'sö libí'ili', lësca' libí'ili' ugá'analentica'sili'-né' Dios Zxí'ini, enca' len Dios Xuz. <sup>25</sup> Le guzxi' lu në'è Dios naca lë ni: Gunné' gunné' yöl-la' na'bán idú queéru'.

<sup>26</sup> Chibuzúaja' queéli' lu guichi lë ni ca naca quégaca nupa ta'zi' ye'e libí'ili'. <sup>27</sup> Na'a, zóalené' Dios Bö' Lá'ayi libí'ili'. Cristo gusól-lë'è Lë' queéli', ate' Lë' cazé' zóalenti-ca'sé' libí'ili'. Que lë ni na' bití' riquinili' nu usedi libí'ili', tu' chizóalen Nu na' libí'ili', en rusedi libí'ili'. Didza' idúté li ru'è Lë', en bití' rizí' yë'è. Ca na' chinazédali', guli'sóalentica'sé' Cristo.

<sup>28</sup> Na'a, zxi'ina'do', guli'sóalentica'sé' Cristo para cate' uluí' lahué' Lë', gácaru' rugu ladxí', en bití' utuí'iru' sóaru' lahué' Lë' cate' huödë'. <sup>29</sup> Channö nózili' náquié' Dios tsahui', ral-la' inózili' ca' yúgu'té nupa tun le naca tsahui' náca gaca zxi'iné' Dios.

### Nupa náca gaca zxi'iné' Dios

**3** Bulí'yú ca nadxí'ide'ené' Dios Xuz rë'u, bené' ga nazí'i laru' zxi'iné' Dios caz. Que lë ni na' bönachi yödzülió ni bití' ca' núnbë'gaca le nácaru', tu' cabí gulúnbe'e Jesús. <sup>2</sup> Böchi' luzá'ado', na'a chinácaru' zxi'iné' Dios, en bití' naca bé'eni le ral-la' gácaru'. Nóziru' cate' uluí' lahué' Jesús, gácaru' ca náquié' Lë', ate' ilé'eru'-né' catéz náquié' Lë'. <sup>3</sup> Núti'tës nu run löza gaca ca náquié' Jesús, ruí' ladxí' nu na' gaca dxi'a ca na' náquié' Jesús dxi'a.

<sup>4</sup> Núti'tës nu run dul-la' riguitsaj xibá queé' Dios, tu' naca dul-la' le riguitsaj xibá. <sup>5</sup> Nózili' buluí' lahué' Jesús para bugúé' dul-la' nabágaru', en bití' bi dul-la' runé' Lë'. <sup>6</sup> Núti'tës nu dzaga Lë' bití' run dul-la'. Núti'tës nu run dul-la' catu caz bilé'e Jesús, en bití' núnbe'e Lë'. <sup>7</sup> Zxi'ina'do', guli'gún chí'i cuinli' para cabí nu sí' ye'e libí'ili'. Nu run le naca tsahui', naca tsahui' nu na' ca na' náquié' Jesús tsahui'. <sup>8</sup> Nu rúntica'sö dul-la' nequi que tu' xihui', tu' run dul-la' tu' xihui' dza ní'te. Que lë ni na' buduluí' lahué' Zxi'iné' Dios, para usunitié' yugu' le nun tu' xihui'.

<sup>9</sup> Núti'tës nu naca zxi'iné' Dios bití' rúntica'sö dul-la', tu' zóalentica'sö le guzxi' lu në'è Dios Xuz nu na'. <sup>10</sup> Caní

naca bé' nupa náca gaca zxi'iné' Dios, en nupa náca gaca zxi'ini tu' xihui'. Núti'tës nu bití' run le naca tsahui', en bití' nadxí'i böchi' luzé'e bití' nequi queé' Dios.

### Ral-la' idxí'iru' yugu' böchi'ru' ta'yéajlë'è Cristo

<sup>11</sup> Lë ni naca didza' biyónili' dza ní'te, le rnna: Ral-la' idxí'iru' luzá'aru' turu' ia'turu'. <sup>12</sup> Bití' ral-la' gunru' ca na' bené' Caín. Gúquié' Caín que tu' xihui', ate' bétie'-bi' bí' böchë'è. ¿Bizx que bétie'-bi' bí' böchë'è? Bétie'-bi' tu' gulaca le bené' Caín na' le ruá' dö', pero le benbi' bí' böchë'è, gulaca tsahui'.

<sup>13</sup> Bócha'ado', bití' ubánili' channö cabí ta'lé'e bönachi yödzülió ni libí'ili' dxi'a. <sup>14</sup> Nóziru' chigudódiru' lu yöl-la' guti, en chidé yöl-la' na'bán idú queéru' tu' nadxí'iru' yugu' böchi'ru'. Nu bití' nadxí'i böchi' luzé'e, chinati caz nu na'. <sup>15</sup> Núti'tës nu bití' rilé'e dxi'a böchi' luzé'e, naca huéti bönachi nu na', ate' nózili' nu ruti bönachi bití' dë yöl-la' na'bán idú que. <sup>16</sup> Caní núnbë'ëru' yöl-la' nadxí'i le naca idú. Naca ca budödë' Jesús yöl-la' na'bán queé', en gútié' uláz queéru'. Lësca' caní rë'u ral-la' udódiru' yöl-la' na'bán queéru', para gácalenru' yugu' böchi'ru'. <sup>17</sup> Na'a, núti'tës nu dë yöl-la' tsahui' que, lë na' dë yödzülió ni, ate' rilé'e böchi' luzé'e, bi riyadzaj queé', en bití' ruhuéchi' ladxí' lë', bi unödzej queé', ¿naru' nadxí'itsö nu na' Dios? <sup>18</sup> Libí'ili', zxi'ina'do', ral-la' idxí'iru' luzá'aru', calëga len didza'sö o lu yöl-la' rinnësö queéru', pero idú ladxí'ru', enca' len idúté yöl-la' run queéru' ral-la' idxí'iru' luzá'aru'.

### Le runru' löza lahué' Dios

<sup>19</sup> Channö caní nadxí'iru' yugu' böchi' luzá'aru', nóziru' néquiru' que Nu na' naca idúté li, ate' lahué' Dios huá-ca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nözinë' yúgu'té. <sup>21</sup> Böchi' luzá'ado', channö cabí ruxösa ladxí'do'oru' rë'u, dë le runru' löza lahué' Dios <sup>22</sup> tu' nóziru' gunné' queéru' bítitës bi inábaru' lahué'. Caní naca, tu' runru' ca rinná bé' xibá queé', en le raza ladxé'è Lë'. <sup>23</sup> Lë ni naca xibá queé', para tséajlë'ëru'-né' Jesucristo, Zxi'iné' Dios, en idxí'iru' luzá'aru' ca na' chigunná bé'ené' rë'u. <sup>24</sup> Zóalen Dios nu run ca rinná bé' xibá queé', ate' Dios caz zóalené' nu na'. Caní nóziru' dzá-gatica'sé' Lë' rë'u, tu' chigusól-lë'è Dios Bö' Lá'ayi queéru'.

### Le naca bé' zóalené' Dios Bö' Lá'ayi rë'u

**4** Böchi' luzá'ado', bití' tséajlë'èli' núti'tës bönni' rn-né' zóalené' Dios Bö' Lá'ayi lë', pero guli'sí' bé' bön-ni' na', channö zóalené' Dios Bö' Lá'ayi lë', tu' ta'dé' zían bönni' ta'zi' yë'è yödzülió ni. Ta'nné' tu'è didza' uláz queé' Dios. <sup>2</sup> Caní gúnbë'èli'-né' nu bönni' zóalené' Dios Bö' Lá'ayi lë'. Nequi queé' Dios bönni' na' rnné' yálajdo' ca bidë' Jesucristo, Nu gusól-lë'è Dios, rnné' guca cazé' bönachi. <sup>3</sup> Lësca' caní, bití' nequi queé' Dios nu bönni' bití' rnné' yalaj lulu ca bidë' Jesucristo, rnné' bití' guca cazé' bönachi. Bönni' ni néquiné' que nu na' ridá'baga'

Cristo, bönni' na' chibiyónili' ral-la' guídë', ate' na' a chiridë' yödžölió ni.

<sup>4</sup> Zxí'ina'do', néquili' queë' Dios, en chibucúl-lali' nupa na' ta'z' yë', tu' náparö Nu na' zóalen libí'ili' yöl-la' huá-ca unná bë' ca nu na' ridá yödžölió ni. <sup>5</sup> Légaquië' náca-gaquië' bönachi yödžölió. Que lë ni na' tu'ë didza' que le naca que yödžölió, ate' bönachi yödžölió ni tu'zé ná-gagaca légaquië'. <sup>6</sup> Néquiru' rë'u queë' Dios. Nu nunbë' Dios ruzë' nagui rë'u. Nu bití' nequi queë' Dios bití' ruzë' nagui rë'u. Caní núnbë'ëru' nu na' yu'u le Bö' ruí' didza' le naca idütë' li, enca' nu na' yu'u le tu bö' rizí' yë'.

### Náljalén Dios yöl-la' nadxí'i

<sup>7</sup> Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' nútítës nu nadxí'i luzé'e nál-jalén ca' Dios, en núnbe'e Dios. <sup>8</sup> Nu bití' nadxí'i luzé'e, bití' núnbe'e Dios, tu' náljalén Dios yöl-la' nadxí'i. <sup>9</sup> Caní bulu'e lahui Dios ca nadxí'inë' rë'u, gusól-lë'e la's dui Zxí'ini cazë' yödžölió ni, para gata' yöl-la' na'bán idú queëru' n'ia queë' Lë'. <sup>10</sup> Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'e Zxí'ini cazë' para gútië', en caní bugüë' dul-la' nabága'ru'.

<sup>11</sup> Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. <sup>12</sup> Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ládx-í'ru'. <sup>13</sup> Nóziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u. <sup>14</sup> Netu' bilé'etu' le benë' Dios Xuz, en runtu' ba nalí que. Lë' gusól-lë'e Zxí'ini cazë' Nu rusölá bönachi yödžölió. <sup>15</sup> Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

<sup>16</sup> Rë'u ni nóziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzé'e, zóalenë' bönni' na' Dios, ate' Dios zóalenë' lë'. <sup>17</sup> Caní run dxin yöl-la' nadxí'i lu icja ládxí'do'oru', run ga bití'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödžölió ni. <sup>18</sup> Channö nadxí'iru'-në' Dios, bití' bi gádxiru'. Cate' nadxí'iru'-në' Dios idú ládxí'ru', runë' ga bití' rádxiru'. Nu radxi, riguí' rizáca'a. Nu na' radxi, bití' nadxí'i Dios idú ladxí'.

<sup>19</sup> Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. <sup>20</sup> Channö nu inná: "Neda' nadxí'ida'-në' Dios", pero bití' rilé'e dxí'a böchi' luzé'e, nu ni rizí' yë'. Nu bití' nadxí'i böchi' luzé'e nu rilé'e caz, ¿nacxi caz gaca idxí'i Dios, en catu caz bilé'e Lë'? <sup>21</sup> Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzé'e.

### Ca gaca idéli'ru' lu le raca queëru' yödžölió ni

**5** Nútítës bönni' réajlë'e Jesús náquië' Cristo, náquië' zxí'inë' Dios, ate' nútítës bönni' nadxí'inë' Dios Nu buzóa lë', ral-la' idxí'inë' ca' luzé'e nu naca bí'i queë' Dios. <sup>2</sup> Caní réquibe'ëru' nadxí'iru' yugu' bí'i queë' Dios. Naca caní channö nadxí'iru'-në' Dios, en runru' ca

rinná bé'enë' rë'u. <sup>3</sup> Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u bití' naca böniga. <sup>4</sup> Nútítës bönni' náquië' bí'i queë' Dios ridéli'në' lu le raca yödžölió ni. Chibidéli'ru' lu le raca yödžölió tu' réajlë'ëru'-në' Dios. <sup>5</sup> ¿Nuzxi na' rideli' lu le raca yödžölió? Run caní nu réajlë' náquië' Jesús Zxí'inë' Dios.

### Dios Bö' Lá'ayi runë' ba nalí queë' Cristo

<sup>6</sup> Caní blë'e Jesucristo. Bidë' bidilë' nisa, en bulaljë' xi-chönë'. Calégasö bidilë' nisa, pero lësca' bulaljë' xi-chönë'. Dios Bö' Lá'ayi náquië' Nu run ba nalí queë', tu' naca idütë' li didza' ru'ë Dios Bö' Lá'ayi. <sup>7</sup> Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni náca-gaquië' tuz. <sup>8</sup> Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. <sup>9</sup> Channö sí' lu ná'aru' le tun ba nalí bönachi, le runë' ba nalí Dios nácatë'rö lesaca'. Lë' na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'. <sup>10</sup> Nu réajlë' Zxí'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rna nu na': Dios rizí' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. <sup>11</sup> Lë' ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. <sup>12</sup> Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

### Ca nóziru' dë yöl-la' na'bán idú queëru'

<sup>13</sup> Libí'ili' na' réajlë'ëli'-në' Zxí'inë' Dios, ruzúaja' queéli' lu guichi lë ni para inózilil' chidë yöl-la' na'bán idú queéli', en para gaca idú ca réajlë'ëli'-në' Zxí'inë' Dios.

<sup>14</sup> Lë' ni naca le ruzxöni ládxí'ru' Lë'. Channö bi in-ábiru' Lë' ca ré'ënë' Lë', Lë' riyönnë' rë'u. <sup>15</sup> Channö nóziru' riyönnë' rë'u ca naca bi rinábiru' Lë', nóziru' ca' ideli' quéziru' lë na' rinábaru'.

<sup>16</sup> Channö ilé'ëru' böchi' luzá'aru' runë' dul-la' le cabí naché' yöl-la' guti, ral-la' inábaru' queë' lahuë' Dios, ate' Lë' unödžjë' yöl-la' na'bán queë'. Caní rnní'a: Ral-la' in-ábalí' quégaca nupa tun dul-la' le cabí naché' yöl-la' guti. Dë dul-la' le naché' yöl-la' guti. Bití' rnní'a' inábalí' que nu run dul-la' caní. <sup>17</sup> Yúgu'të le cabí naca tsahuí' naca dul-la', pero dë dul-la' le cabí naché' yöl-la' guti. <sup>18</sup> Nóziru' bití' rúntica'sö dul-la' nu naca zxí'inë' Dios, tu' rapa chí'ë Zxí'ini cazë' Dios nu na', ate' tu' xihuí' bití' se-qui' bi gun que.

<sup>19</sup> Nóziru' yú'uru' lu në'e Dios, ate' yúgu'të bönachi tuí'i ládxí'gaca le dë yödžölió ni yú'ugaca lu na' tu' xi-huí'.

<sup>20</sup> Na'a, nóziru' chibidë' Zxí'inë' Dios, en bennë' yöl-la' réajni' queëru', para gúnbë'ëru' Nu na' naca idütë' li. Zóalenru' Nu na' naca idütë' li tu' zóalenru'-në' Jesu-cristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. <sup>21</sup> Zxí'ina'do', guli'gún chí'i



cuinli' para cabí tseaj ládxi'li' yugu' budó' guió'j budó'  
yaga. ¡Ca' gaca!

## 2 Juan

### Núnbě'ëru' le naca idútè li, en yöl-la' nadxí'i

**1** Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxón len yúgu'tè zxí'ínu'. Nadxí'ida' libí'ili' tu' núnbě'ëru' le naca idútè li, en calégasö neda', pero lësca' yúgu'tè nupa chinúnbě'gaca le naca idútè li ta'dxí'i libí'ili'. <sup>2</sup> Nadxí'itu' libí'ili' tu' núnbě'ëru' le naca idútè li, le zóaléntica'sö rë'u. <sup>3</sup> Rinábida'-në' Dios Xuz, en Xanru' Jesucristo, Zxí'i-ni cazë' Dios, uzá' lãdxë'ë queé'li', en huéchi' lãdxë'ë libí'ili', en gunë' ga soa dxi icja lãdxí'do'oli' tu' núnbě'ëli' le naca idútè li, en nadxí'ili' luzá'ali'.

<sup>4</sup> Budzëjade'eda' cate' biyönda' tunbi' zxi'ínu' ca naca le naca idútè li, tu' tunbi' ca na' gunná bé'enë' Dios Xuz rë'u. <sup>5</sup> Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. <sup>6</sup> Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyónili' dza ni'te.

### Nupa té'ëni ila'z'í ye'e rë'u

<sup>7</sup> Lë ni riguixjöi'ida' libí'ili', tu' chita'dá zian nupa ta'z'í yë' yödzölió ni, nupa na' bití' ta'z'í lu né'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo. <sup>8</sup> Gulí'gún chí'i cuinlí' para cabí initi le nadé'li'li' tu' guzxí' lu na'li' Cristo, pero gulí'güí' lãdxí'li' idé'li'li' idútè le ral-la' sí'ili' lu në'ë Dios.

<sup>9</sup> Nútí'tës nu riguela' nöza yúbölö, en rucá'ana xtídzë'ë Cristo, bití' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxí'inë' nu na'.

<sup>10</sup> Channö nútí'tës nu za' ga zóali', en rusedi xibá yúbölö, bití' ulébilí' nu na' lídxili', en bití' guié'li' le: "Guyú'u len netu'." <sup>11</sup> Nu rë le: "Guyú'u len netu'", run tsözxón nu na' ca naca le ruá' dö' run nu na'.

### Runë' Juan löza idxinë' ga nacu'ë böchi' luzé'ë

<sup>12</sup> Sal-la' le zian ral-la' uzúaja' queé'li' lu guichi, bití' ré'ënda' uzúaja' yúgu'tè lu guichi. Runa' löza guída' ga zóali', ate' güí'iru' didza' ruá'a cuinru', para gaca udzë-jaru' idú lãdxí'ru'.

<sup>13</sup> Zxí'ininu nigula zxilu', nigula rö queë' Dios, tu'gá-pabí' Dios lí'. ¡Ca' gaca!

## 3 Juan

### Le naca tsahui' runë' bönni' lë' Gayo

**1** Neda', bönni' gula run chi'a bönachi queë' Cristo, rugapa' Dios li', Gayo dxi'i ladxí'. Nadxí'ida' li' tu' núnbe'ëru' le naca idútë li.

<sup>2</sup> Bócha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. <sup>3</sup> Rudzëjada' tu' ta'dxinë' yugu' bóchi'ru' ga zoa', en tunë' ba nalí quiu', ta'nnë' nacu' li ladxí', en runu' ca naca le naca idútë li. <sup>4</sup> Biti' bi dë le runrö ga rudzëjada' ca lë ni, riyönda' tun nupa nácgaca ca bí'i que caza' ca rna le naca idútë li.

<sup>5</sup> Bócha'ado', runu' le naca tsahui', rácalenu' bóchi'ru', en runu' ca' le nácarö lesaca', rácalenu' bóchi'ru' bití' núnbe'enu' légaquië'. <sup>6</sup> Yugu' bóchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxí'ínu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. <sup>7</sup> Légaquië' bila'rúajë' ni tu' nadxí'ígaquië' Jesús, en bití' bi ta'zi'ë lu ná'agaca bönachi bití' ta'dá' Cristo. <sup>8</sup> Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

### Le cabí naca tsahui' runë' Diótrefes

<sup>9</sup> Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza ladxë'ë gáquië'

lo ladjagaquië', bití' runë' netu' bal. <sup>10</sup> Que lë ni na', channö huida' ga zóali', usá'a ladxí'li' cate' udúbili' ca nácgaca le runë'. Rizí' quídzë'ë netu', en rnnë' queëtu' le cabí nácatë. Bití' rizxón ladxë'ë tsa lë nisö, pero lësca' bití' runë' bal bóchi'ru' ta'dxinë' ni', ate' ruzáguë'ë xinózguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

<sup>11</sup> Bócha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

### Le naca tsahui' runë' Demetrio

<sup>12</sup> Yúgu'të bóchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nózili' nácatë lë ni runtu' ba nalí queë'.

### Le rinabë' Juan lahuë' Dios

<sup>13</sup> Ziánrö ca' le gú'unida' uzúaja' quiu' lu guichi, pero bití' ré'ënda' uzúaja' le lu guíchisö. <sup>14</sup> Na'a, runa' löza ilé'eteda' li', ate' gü'íru' didza' ruá'a cuinru'.

<sup>15</sup> Rinábida'-në' Dios gunë' ga soa dxi icja ladxí'do'o. Nupa ni ta'dxí'i rë'u tu'gapa Dios li'. Lësca' li', bugapa Dios tu tu nupa ni' ta'dxí'i rë'u. ¡Ca' gaca!

# Judas

## Judas rugapë' Dios nupa nulidzë' Dios

**1** Neda', Judas, tsaz naca' huen dxin queë' Jesu-cristo, en naca' ca' bóchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chi'ë libí'ili' tu' nácali' tuz len Jesucristo. <sup>2</sup> Ré'ënda' inózili' ca ruhuéchi'da' ládxë'ë Dios libí'ili', en nadxí'ide'enë' libí'ili', enca' ruzóadë'ë dxi icja ládxí'-do'oli'.

## Nupa tu'sedi le cabí nácatë

<sup>3</sup> Libí'ili', böchi' luzá'ado', gúcada' ládxa'a uzúaja' queéli' lu guichi ca naca yöl-la' rusölá nadéli'ru', pero run bayudxi uchízia' icja nágalí' para idú ládxí'li' tíl-lalenlí' nupa ta'dá'baga' le réajlë'ëru'-në' Dios, lë na' budödë' Dios tsaz lu náagaca nupa néquiguequi quez queë' para ulu'zé didza' que lógaca yúgu'të bönachi. <sup>4</sup> Caní run bayudxi guna' tu' bagáchi'sö chigula'yáza-lenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj ládxí'gaquië' Dios bönni' caní. Tu' zoa le ruzá' ládxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

<sup>5</sup> Chinóz quézili' lë ni, pero ré'ënda' usá'a ládxí'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca ladjaguequi, en bití' gula'yéajlë' Lë'. <sup>6</sup> Lësca' caní, yugu' gubáz lá'ayi queë' Dios, nupa ni' bití' gulún xichíngaquië', pero bulu'cá'anë' xilátjagaquië', Dios busayjë' légaquië' tu lataj chul-la. Nága'gaquië' tsaz ni' ga idxinrö dza usiúdxë' Dios yödzölió ni. <sup>7</sup> Lësca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzö na'. Bulu'dödi cuín-gaquië' para gulunë' le ruá' dö', en le gula'zësö ládxí'-gaquië' le tun ga nu rutuí'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lébisö.

<sup>8</sup> Sal-la' gulaca lë ni, la' canisö tunë' bönni' ni, bönni' röjácalenë' yëla ta'nënë'. Tun dítjanë' idütë le naca cazë'. Ta'dá'baguë'ë le rinná bé'enë' Dios rë'u, en ta'nnë' zi'ë quégaca nupa ta'nná bë' yehua' yubá. <sup>9</sup> Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, bití' burúguinë' udxíë' dö' tu' xihui' na', pero gudxë' le: "Xanru' uzenë' lí' bach."

<sup>10</sup> Yugu' bönni' ni ta'nnë' zi'ë quégaca le runë' Dios, yugu' le bití' ta'yéajni'inë', ate' yugu' le ta'yéajni'inë' rá-casö quégaquië' ca na' tunba' böa' guixi' bití' ta'yéajni'iba', lë ni tu'gunë' dxin, en caní tu'dxía dö' cuín-gaquië'.

<sup>11</sup> Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguë' Moisés. <sup>12</sup> Yugu' bönni' ni tágulenë' tsözxón libí'ili' cate' ráguli' yugu' gúfi' huagu lu yöl-la' nadxí'i queéli'. Tunë' ga ta'chixi ta'nigui nupa dzágagaca libí'ili', tu' t'éaj tagu lizë'. Nácagaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Nácagaquië' ca böaj lúzxiba bití' naché'gaca nisa, ate' ruá' bö' léguequi ná'alö ní'ilö. Nácagaquië' ca' ca yugu' yaga chibidxín dza bi ila'bía, pero bití' bi ta'bía. Nácagaquië' ca' ca yugu' yaga chigula'bidxi idú luí, en chinaládzugaca. <sup>13</sup> Nácagaquië' ca' ca nísado' cate' riyasa ridxía, ate' ribó' bidxina' que, lë na' rulu'í ca naca yöl-la' stu' tunë'. Nácagaquië' ca yugu' böljaj lúzxiba nucá'anagacaba' xinózgacaba'. Dios chinunë' quégaquië' ila'yázië' tsaz lataj chul-la.

<sup>14</sup> Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxi cö' xzí'ini xi'sóë' Adán. Gunnë': "Bulí'yútsöca', zë'ë Xanru', ate' dzágagaca Lë' zían gayuá' bönachi néquiguequi quez queë'. <sup>15</sup> Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'n-në' bönni' dul-la' na' queë' Lë'. <sup>16</sup> Yugu' bönni' caní ta'n-në' queë', en ta'z'í quídzë'ë, en tunë' ca naca le ta'zësö ládxí'gaquië'. Tu'ë didza' lu yöl-la' run ba zxón cuín-gaquië', en para ulu'zi'ë xibéguequi, tu'ë didza' le ta'gú'u bönachi yöl-la' zxón.

## Judas rusë'ë ládxí'gaca nupa ta'yéajlë' Cristo

<sup>17</sup> Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. <sup>18</sup> Yugu' bönni' na' gulé' libí'ili': "Yugu' dza tsöjsëtégaca ulu'lu'í lógaquië' bönni' ulu'titjë' le naca lá'ayi, en ilunë' ca naca le ta'zësö ládxí'gaquië' le ruá' dö'." <sup>19</sup> Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en bití' zóalenë' Dios Bö' Lá'ayi légaquië'.

<sup>20</sup> Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Bulí'lidzë' Dios, ugunli'

dxin yöl-la' huáca queë' Dios Bö' Lá'ayi. <sup>21</sup> Bu-  
lí'gá'analenë' Dios, Nu nadxí'i rë'u, en guli'cöza dza ni'  
ulu'i lahuë' Xanru' Jesucristo, Nu ruhuéchi' ladxë'ë rë'u  
para gata' yöl-la' na'bán idú queéru'.

<sup>22</sup> Guli'gún ga ila'dipa ladxí'gaca nupa raca chopa  
ladxí'gaca. <sup>23</sup> Guli'gún ga ulu'lé', le gaca tsca ubéajli' lé-  
gaquië' lu guí'. Lu yöl-la' radxi queéli' bulí'huéchi' ladx-  
í'li' ia'zica'rö bönachi. Guli'gún chí'i cuinli', para cabí  
gunli' tsözxón légaquië', en cabí gútsa'li' le ruá' dö'  
tunë'.

### Le rigú'uru' Dios yöl-la' zxön

<sup>24</sup> Dios la's dui, Nu nözi caz yúgu'të, en Nu busölá rë'u  
ní'a que le benë' Xanru' Jesucristo, napë' yöl-la' huáca  
gun chí'ë libí'ili', para cabí ichixi iníguili', en usdxinë'  
libí'ili' lahuë' Lë' ga zoë' lu bení' idú. Gunë' ga gácali' idú  
tsahui', en ga udzëjade'eli'. ¡Gaca caz queë' Dios yöl-la'  
ba, en yöl-la' zxön, en yöl-la' naca lo, en yöl-la' unná  
bë', na'a dza, en yúgu'të dza zá'gaca! ¡Ca' gaca!

# Apocalipsis

## Le bulu'e lahui Dios ca naca queë Jesucristo

**1** Lë ni naca le bulu'e lahui Jesucristo, le bë'ë Lë' lataj Dios ulu'ínë' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínë' neda' ca naca lë ni. <sup>2</sup> Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

<sup>3</sup> Bica' ba nu ulaba didza' ni, ate' bica' bágaca nupa ulu'zë' nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

## Juan ruzúajë' le uzéajni'i gadxi cö' bönachi queë' Cristo

<sup>4</sup> Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacuá' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxe'ë queéli', en gunë' ga cö'ö dxi icja ládxi'do'oli', ate' dzágagaca gadxi bö' Lë' nacuá' lahuë' Lë' ga ni' rö'ë rinná bë'ë. <sup>5</sup> Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzülió ni. Lë' naxí'ínë' rë'u, en gudibë' rë'u, tu' bugúë' dul-la' nabága'ru' len xichönë' le bulaljë' lë'e yaga cruz, cate' gútië' uláz queë'ru'. <sup>6</sup> Jesucristo benë' ga rinná bé'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácaté'sö queë' yöl-la' unná bë'! ¡Ca' gaca!

<sup>7</sup> ¡Buli'yútsöca'! ¡Zë'ë Cristo lu böaj lúzxiba! ¡Ila'lé'e Lë' yúgu'të bönachi, enca' nupa ni' gulún Lë' huë', en bétigaca Lë'! ¡Ila'bödxu yechi' yúgu'të bönachi yödzülió ni cate' ila'lé'e Lë'! ¡La'tu' gácatë caní! ¡Ca' gaca!

<sup>8</sup> Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en sí' ulé'ë!

## Rilé'enë' Juan yöl-la' zxön queë' Jesucristo

<sup>9</sup> Neda', Juan, naca' böchi' luzá'ali', en tsözxón riguí' rizáca'lëna' libí'ili', en tsözxón len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxí na' rnnë' Jesucristo queë'ru'. Nadzuna' tu luyú bidxi ni gatsaj láhuil'ö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. <sup>10</sup> Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni'

rulidzë' zidzaj. Biyón chi'ë ca ribödxu lúzuba' böa' bëdxu. <sup>11</sup> Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' bönachi quia' nacuá' luyú Asia, nupa nacuá':

Lu yödzo Éfeso,  
lu yödzo Esmirna,  
lu yödzo Pérgamo,  
lu yödzo Tiatira,  
lu yödzo Sardis,  
lu yödzo Filadelfia,  
lu yödzo Laodicea."

<sup>12</sup> Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuágaca guí' le néquiquequi-ni oro. <sup>13</sup> Ladaj gadxi le nuágaca guí' na' bilé'eda' tu Bönni' riné'ë ca tu bönni'. Nácuë' tu lari' tunna le ridxín xini'ë, en luchu'ë nasië' tu le néquini oro. <sup>14</sup> Chiguíchi-do'os naca guitsa' icjé' ca naca zxila' o ca riná' bögui', ate' rëpi yösa bení' guí'oj lahuë' ca guí'. <sup>15</sup> Rëpi yösa bení' ni'ë ca guíë bronze dxíli'do', le nudzë'eda' lu guí' ca bo' yalaj. Zidzaj biyón chi'ë ca riyón tu yegu zxön. <sup>16</sup> Lu në'ë ibëla xzóagacaba' gadxi böljaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

<sup>17</sup> Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. <sup>18</sup> Naca' Nu nabán caz. Gútiá', ate' na'a zóatí-ca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. <sup>19</sup> Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. <sup>20</sup> Lë ni naca le nagachi' ca naca quégacaba' gadxi böljaj bení' na' bilé'enu' xzóagacaba' lu na'a ibëla, en ca naca gadxi le nuágaca guí' le néquiquequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuágaca guí' na' sa'yéajgaca gadxi cö' bönachi quia' na'."

## Didza' gusól-lë'ë yödzo Éfeso

**2** Gunnë' ca' Bönni' na': "Buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Éfeso. Caní uzúaju' lu guichi: Ru'ë didza' Bönni' na' xzóagacaba' gadxi böljaj bení' lu në'ë ibëla, en ridé' gatsaj láhuil'ö gadxi le nuágaca guí' na' néquiquequini oro. <sup>2</sup> Caní rnniá': Neda' nöz quézida' yugu' le runli', en ca rúnda'ali' dxin. Nözda' ribózalí' zxön ladxí', en bití' gaca guá' ilenli' nupa tua' dö'. Nöz-

da' chiguzxí' bé'èli' nupa ta'nná nácagaca gubáz quia' pero bití' ca' nácagaca, ate' na'a nózili' ta'zí' yé'.

<sup>3</sup> Ribózalí' zxon ladxí', en chigudí' guzácá'li' tu' dá'alí' neda', pero bití' gucuidí' ladxí'li'. <sup>4</sup> Na'a, dè tu le ruzegui libí'ili' didza': Bití'rò nadxí'ili' neda' ca na' bidxí'ili' neda' zí'alò. <sup>5</sup> Que lè ni na', guli'tsöjnè ca na' benlí' zí'alò, lè na' busanlí', ate' na'a, bulí'bí' ladxí'li', en guli'gún ca na' benlí' zí'alò. Channö cabí ubí' ladxí'li', guídatia' queé'li', ate' ugúa' le nuá' guí' queé'li' xilataj. <sup>6</sup> Na'a, zoa tu le rácalen libí'ili'. Bití' rilé'eli' dxí'a le tunè' bönni' nicolaíta, nupa na' ta'yéaj ladxí'gaca budó' guió' budó' yaga, en tun le ruá' dö', lè na' lèscá' bití' rilé'eda' dxí'a. <sup>7</sup> Nu riyöni ral-la' uzé nagui lè ni rnnè' Dios Bö' Lá'ayi, ruí'ilenè' yugu' cö' bönachi quia' neda', Cristo, didza', rnnè': Nupa ila'delí' lu le raca yödzülió, guna' ga ilágu-gaca le ribía yaga da' gatsaj láchui'lö luyú lachi queé' Dios, le gun ga ila'cuática'sö nabán."

### Didza' gusól-lè'è yödzo Esmirna

<sup>8</sup> Gunné' ca': "Lèscá' caní, buzúaj lu guichi didza' ni isól-lu'u queé' gubáz quia' zóalenè' bönachi quia' lu yödzo Esmirna. Caní uzúaju' lu guichi: Ru'è didza' Bön-ní' na' zoé' zí'alò, en náquiè' ca' Nu röjsete, Bönni' na' gútiè', en bubanè' tsaz. <sup>9</sup> Caní rnnía': Neda' nöz quézi-da' le runlí', en ca riguí' rizáca'li'. Nözda' nácalí' yechí', pero le nácatè rilé'eli' yöl-la' tsahuí' le naca idú. Nözda' ca' ta'nné queé'li' nupa ni' ta'nná nácagaca bönachi judío, pero bití' ca' nácagaca caní. Nupa ni ta'dá' Satanás, tu' xihuí'. <sup>10</sup> Bití' ca' gádxili' le ral-la' quí' sáca'li'. Tu' xihuí' na' gun ga idzunlí' bál-lalí' libí'ili' lidxi guíè. Caní si' bè' libí'ili', ate' quí' sáca'li' idú ca chi dza. Guli't-séajlé' neda' ga idxintè dza gátili', ate' neda' gunna' yöl-la' na'bán idú queé'li'. <sup>11</sup> Nu riyöni ral-la' uzé nagui lè ni rnnè' Dios Bö' Lá'ayi, ruí'ilenè' didza' yugu' cö' bönachi quia' neda', Cristo, rnnè': Nupa ila'delí' lu le raca yödzülió, bití' bi gun yöl-la' guti quéguequi, lè na' gaca le buropi luzuí quégaca nupa ila'cuática'sö lu guí' gabi-la."

### Didza' gusól-lè'è yödzo Pérgamo

<sup>12</sup> Gunné' ca': "Lèscá' caní buzúaj lu guichi didza' ni isól-lu'u queé' gubáz quia' zóalenè' bönachi quia' lu yödzo Pérgamo. Caní uzúaju' lu guichi: Ru'è didza' Bön-ní' na' nu'è guíè tuchi' na' natuchi' iropa la'a. <sup>13</sup> Neda' nöz quézida' le runlí'. Nözda' ca' zóali' ga ni rinná bè' Satanás, tu' xihuí', pero ni ruzxöni ladxí'li' neda'. Bití' ca' nusanlí' ca réajlé'èli' neda'. Bití' busanlí' le yugu' dza ni' cate' gulútiè' Antipas, bönni' ni' béntica'sè' ba nalí quia', en gútiè' ga ni' zoa Satanás, tu' xihuí'. <sup>14</sup> Na'a, dè tu chopá le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí' lu né'eguequi xibá queé' Balaam, bönni' ni' busédinè' Balac benè' ga gula'chixi gula'nigui bönachi Israel, ate' gulahuè'-ba' yugu' böa' bédxido' gulútigaquiè'-ba' lógaca budó' guió' budó' yaga, en gulunè' le ruá' dö'. <sup>15</sup> Lèscá' caní nacua'len libí'ili' nupa ni' nazí' lu né'eguequi xibá qué-gaca bönachi nicolaíta, lè na' bití' rilé'eda' neda' dxí'a.

<sup>16</sup> Que lè ni na', bulí'bí' ladxí'li' na'a. Channö cabí ubí' ladxí'li', guídatea' ga zóali', en tíl-lalena' légaquiè' len didza' rirúaj ruá'a, le naca ca tu guíè tuchi'. <sup>17</sup> Nu riyöni ral-la' uzé nagui lè ni rnnè' Dios Bö' Lá'ayi, ruí'ilenè' yugu' cö' bönachi quia' neda', Cristo, didza', rnnè': Nupa ila'delí' lu le raca yödzülió, guna' ga ilágu-gaca yöta maná nagachi'. Unödza' ca' tu guió' chiguíchido' qué-gaquiè', ate' lu guió' na' nazúaj tu la cubi, cuntú nu nunbè' le, pero núpasö na' ila'zí' le, ilúnbè'e la na'."

### Didza' gusól-lè'è yödzo Tiatira

<sup>18</sup> Gunné' ca': "Lèscá' caní, buzúaj lu guichi didza' ni isól-lu'u queé' gubáz quia' zóalenè' bönachi quia' lu yödzo Tiatira. Caní uzúaju' lu guichi: Ru'è didza' Zxí'inè' Dios, Bönni' na' dxía guió' lahuè' nácagaca ca guí', ate' ni'è nácagaca ca guíè bronce dxí'lido'. <sup>19</sup> Caní rnnè': Neda' nöz quézida' le runlí'. Nözda' ca nadxí'ili' neda', en ca réajlé'èli' neda'. Nözda' ca' ca runlí' xichina' lu yöl-la' riböza zxon ladxí' queé'li'. Nözda' nácarö idú ca runlí' yugu' lè ni ca benlí' zí'alò. <sup>20</sup> Nacuá' tu chopá le tu'zegui libí'ili' didza': Ruí'ili'-nu lataj nigula na' lènu Jezabel, rnnanu ruí'inu didza' uláz queé' Dios, ate' ni'a que le rusédinu rizí' yé'enu bönni' tunè' xichina'. Rusédinu lé-gaquiè' le run ga tunè' le ruá' dö', en tahuè'-ba' böa' bédxido' ta'gu'è légacaba' lógaca budó' guió' budó' yaga. <sup>21</sup> Neda' bè'a-nu lataj ubí' ladxí'nu, pero bití' ré'è-nu ucá'ananu le ruá' dö' na' runnu. <sup>22</sup> Que lè ni na' chú'una'-nu tu le gátinu ga na' quí' sáca'nu lu xihu'ènu tsözxón len nupa gulún tsözxón len lènu le ruá' dö'. Caní guna' na'a channö cabí ulu'bí' ladxí'guequi para cabirö ilún dul-la' na'. <sup>23</sup> Guna' ga ilátibi' zxí'inu. Caní gaca, iléquibe'e yúgu'tè cö' bönachi quia' ruyúa' le ta'bequi ícaguequi, en le ta'zá ladxí'gaca bönachi, ate' ubí'a queé'li' tsca naca le runlí'. <sup>24</sup> Ia'zica'li' zóali' yödzo Tiatira, núlöli' bití' nazí' lu ná'alí' lè na' rusédinu, en bití' nazédali' lè na' ta'nná bönachi ni' naca le nayéajni' idú, pero le nácatè naca xtidza' Satanás, tu' xihuí', rea' libí'ili': Bití' usabága'a libí'ili' ia'tú le ral-la' gunlí'. <sup>25</sup> Na'a, lè na' chinazí' lu ná'alí', guli'gún chí' ga idxintè dza huöda'. <sup>26</sup> Bönni' ni' ila'délí'nè' lu le raca yödzülió, en ilunè' ca ré'ènda' neda' ga údxitè, neda' guna' ga ila'nná bé'enè' bönachi idútè yödzülió. <sup>27</sup> Ca na' budödè' Xuzá' Dios yöl-la' unná bè' lu na'a, neda' ca' guna' ga ila'nná bé'enè' yugu' yödzo, ate' gata' lu ná'agaquiè' tu xiyaga guíè, ate' ulu'zuxzjè' bönachi na' ca nu ruzxuzxaj zxiga' yó'ona néquini yu. <sup>28</sup> Gu'a ca' le naca ca bölj hui sila quégaquiè'. <sup>29</sup> Nu riyöni ral-la' uzé nagui lè ni rnnè' Dios Bö' Lá'ayi, ruí'ilenè' yugu' cö' bönachi quia' neda', Cristo, didza'."

### Didza' gusól-lè'è yödzo Sardis

**3** Gunné' ca': "Lèscá' caní buzúaj lu guichi didza' ni isól-lu'u queé' gubáz quia' zóalenè' bönachi quia' lu yödzo Sardis. Caní uzúaju' lu guichi: Ru'è didza' Bön-ní' na' nacua'len Lè' gadxi bö' na', ate' zóagacaba' gadxi bölj bení' lu në'è ibèla, rnnè': Neda' nöz quézida' le ruá' dö' runlí', en nözda' chinati cázali' sal-la'

téquiquequi bönachi zóali' nabanli'. <sup>2</sup> Buli'subán ládxi'ilí'. Guli'gún tsutsu le nacuá'len libí'ilí', le chizóa ilátigaca, tu' réquibe'eda' le runlí' bití' naca idú tsahuí' lahué' Dios. <sup>3</sup> Guli'tsöjné' na'a xibá' na' biyónili' le guzxi' lu ná'alí'. Guli'gún ca rnna xtídzé'è Dios, en buli'bí'i ládxi'ilí'. Channö cabí' usubán ládxi'ilí', guída' ga zóali' tsáli-do'os ca na' ridxiné' tsáli-do'os gubán, en bití' inózili' bizxi dza na' guída' ga zóali'. <sup>4</sup> Nacuá'len bal-la bönachi libí'ilí' lu yödzo Sardis, nupa bití' nácagaca xihuí'. Ila'-dalen nupa ni neda', nácugaca lari' chiguíchido'os le rulu'í nuhuóacagaca idú tsahuí', en nácagaca lesaca' gaca caní queguequi. <sup>5</sup> Nupa ila'delí' lu le raca yödzölió ugácuá' léguequi lari' chiguíchido'os, en bití' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Sí' lu na'a nupa ni lahué' Xuzá' Dios, enca' lógaquié' gubáz lá'ayi queé'. <sup>6</sup> Nu riyöni ral-la' uzé' nagui lè ni rnné' Dios Bö' Lá'ayi, ru'ílené' yugu' cö' bönachi quia' neda', Cristo, didza'."

#### Didza' gusól-lè'è yödzo Filadelfia

<sup>7</sup> Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzo Filadelfia. Caní uzúaju' lu guichi: Ru'è didza' Bön-ní' na' náquié' lá'ayi, en ru'è didza' idútè li, en dè lu në'è zxi'ini guíé' queé' David, bönni' gunná' bë'è. Bönni' na' ru'è didza' risálajé' ga nu riyaza, ate' cuntu nu gaca usayaj le, en rusayjé' ga nu riyaza, ate' cuntu nu gaca isalaj le. <sup>8</sup> Bönni' ni rnné': Neda' nöz quézida' le runlí'. Nözda' nápalí' látí'do'os yöl-la' huáca, pero runlí' ca rnna xtídzá'a, en bití' rutuí'ilí' rnnalí' néquili' quia'. Que lè ni na' nuzóa' lolí' tu ga nu tsaz le nayalaj, ate' cuntu nu gaca usayaj le. <sup>9</sup> Buli'yútsöca', ta'dé' bönni' ni' Satanás, tu' xihuí', en ta'z'í' yé'è, ta'nné' nácagaquié' bönachi judío ta'yéaj ládxi'gaca Dios, pero bití' nácagaquié' caní, guna' ga ila'dxiné' lolí', en ulu'zechu zxi'bagaquié' xiní'alí'. Ní'irö iléquibe'ené' nadxi'ida' libí'ilí'. <sup>10</sup> Tu' benlí' ca rnna xtídzá'a, en gulózalí' zxön ladxí', gun chí'a libí'ilí' dza na' ila'guí'í ila'zaca' yúgu'tè bönachi lu yödzölió ni, lè na' gaca para sí' bë' léguequi. <sup>11</sup> ¡Sí' guída'! Que lè ni na' guli'gún chí' le nápalí', para cabí' gaca nu gun ga cabí' sí'ilí' lè na' ral-la' gunna' queé'li'. <sup>12</sup> Núlöli' ni' idéla'li' lu le raca yödzölió, neda' guna' ga gácalí' tsutsu ca nácagaca ya'zxón, ate' sóali' yudo' ga na' zoé' Dios, en catu caz irúajli' ni'. Udá'a libí'ilí' ca lè' Dios quia', enca' ca lè yödzo queé' Dios le naca Jerusalén cubi, le huötaj irúaj yehua' yubá lu në'è Dios. Lësca' udá'a libí'ilí' La' cubi. <sup>13</sup> Nu riyöni ral-la' uzé' nagui lè ni rnné' Dios Bö' Lá'ayi, ru'ílené' yugu' cö' bönachi quia' neda', Cristo, didza'."

#### Didza' gusól-lè'è yödzo Laodicea

<sup>14</sup> Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzo Laodicea. Caní uzúaju' lu guichi: Ru'è didza' Bön-ní' na' zoé' tsaz, Bönni' runé' ca rnné', en ru'è didza' idútè li ca runé' ba nalí', en náquié' ca' Bönni' na' gulén lu në'è yúgu'tè le bené' Dios. <sup>15</sup> Caní rnné': Neda' nöz

quézida' le runlí'. Ca runlí' naca ca nisa bití' naca ziaga, tu' cabí' rucá'anali' tsaz neda', en bití' naca ca nisa zöguí', tu' cabí' dá'alí' neda' idú ládxi'li'. Dxí'arö gaca la' gácalí' ca nisa ziaga o ca nisa zöguí'. <sup>16</sup> Na'a, tu' nácalí' ca nisa nati yúlasö, en bití' nácalí' ca nisa ziaga, en bití' nácalí' ca nisa zöguí', chú'una' libí'ilí' ca run nu ruhuébi nisa nati yula na'. <sup>17</sup> Libí'ilí' rnnalí' rilé'elí' yöl-la' tsahuí' queé'li', en raca dxí'a queé'li', en bití' bi riyadzaj queé'li', pero bití' réquibe'elí' le nácalí'. ¡Bayechí' nácalí'! ¡Nácalí' xizí'! ¡Nácalí' yechí', en lo chul-la, en ridalí' xiguídisö! <sup>18</sup> Que lè ni na', neda' ruzéajni'ida' libí'ilí' gá'ulí' le naca ca oro lu na'a neda' le nuna' dxí'a lu guí', para gata' yöl-la' tsahuí' idú queé'li'. Ral-la' gá'ulí' ca' lari' chiguichi quia' le gáculí' para igachí' yöl-la' xiguídidö queé'li' le run ga nu rutuí'í. Ral-la' gá'ulí' ca' quia' le gun ga ulu'huóaca guió'j lolí' para gaca ilé'elí' le naca quia'. <sup>19</sup> Neda' ruzeda' bach, en run zí'a yúgu'tè nupa nadxi'ida' channö cabí' tun le naca dxí'a. Que lè ni na', buli'bí'i ládxi'li', en guli'gún xichina' idú ládxi'li'. <sup>20</sup> Buli'yútsöca', neda' caz zuína' ga nu riyaza, en ruldza'. Channö nútí'tès nu yöni chí'a, en isalaj quia', tsázia', en gágule-na' nu na', ate' nu na' gágulen neda'. <sup>21</sup> Núlöli' idéli'li' lu le raca yödzölió, neda' guna' ga có'öli' tsözxón len neda' ga na' rö'a rinná' bë'a, ca na' bené' ca' Xuzá' quia' neda'. Bidéli'ida' neda' lu le guca quia', ate' guró'lena' Xuzá' tsözxón ga na' rö'è rinná' bë'è. <sup>22</sup> Nu riyöni, ral-la' uzé' nagui lè ni rnné' Dios Bö' Lá'ayi, ru'ílené' didza' yugu' cö' bönachi quia' neda', Cristo."

#### Yöl-la' ba ta'gu'è Dios yehua' yubá

**4** Gudödi gulaca yugu' lè ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chí'è bönni' na' biyönda' zí'alö, ate' bulidza zidzaj ca ribödxí' lúzuba' böa' bëdxi. Chí'ni bulidza neda', gunná: "Gudá xitsá'alö ni, ate' neda' uluí'ida' lí' le run bayudxi ilaca tödi ni."

<sup>2</sup> La' ní'sö guzóalené' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná' bë', en bilé'eda' ca' Nu na' rö'ö lataj na'. <sup>3</sup> Rëpi yösa bení' Nu na' rö'ö lataj na', ca na' rëpi yösa bení' guió'j jaspe, en guió'j cornalina, yugu' guió'j nazáca'da'. Idú gásibi'ilö lataj na' zoa biguita' le naca lachi ca naca guió'j esmeralda, le répida' yösa bení'. <sup>4</sup> Idú gásibi'ilö lataj na' nacuá' ca' ia'tapa uruá' lataj gapa ta'bó' nupa ta'nná' bë', ate' yugu' lataj na' ró'ogaquié' tapa uru'è bönni' gula, nácugaquié' lari' chiguíchido'os, en dxíagaca ícja-gaquié' le néquiquequini oro. <sup>5</sup> Ta'ruáj yösa, en guziú' rinné' lu lataj lo ga ni' rö'ö Nu na', ate' bö zxön ru'u. Lahuí' lo lataj na' tu'zení' gadxi le ta'gú'u bení', le náca-gaca gadxi bö' dzágagaca Dios. <sup>6</sup> Ca dódilö lahui lataj ni dè tu ca naca tu nísado' le rëpi yösa bení' ca guió'j jara.

Nacuá' tapa nupa nabángaca cuiti lataj na', tsölá'a huéaj, ate' zían guió'j lógaca dxíagaca zaca' cúdz-i'löguequi, en láhuilöguequi. <sup>7</sup> Tu nu nutsa' ladaj tapa ni nalá' ca nácaba' bëdxi guixí'. Nu na' buropi nalá' ca nácaba' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'.



<sup>8</sup> Idápaté nupa ni, nacuá' xopa xiligaca que queëguequi, ate' idá'alöguequi, en lé'elöguequi xiliguequi dxíada'gaca zían guió'j lóguequi. Rèla, en te ža bití' ta'cuá' dxisó, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

<sup>9</sup> Nupa na' nabángaca ta'gú'u yöl-la' ba Nu na' rō'ō rinná bē', en zóatica'sō nabán. Tun bal Nu na', en tē Nu na': "Xclenu'." Bátati'tēs tun idapa na' caní, <sup>10</sup> tu'tsaga lógaca tapa uru'ē bōnni' gula na' lu yu lahui' lo Nu na', en ta'yéaj lādxi'gaca Nu na' zóatica'sō, en tu'cu'ē le néquiquequini oro dxía íc'jagaquië' lahui' lo lataj ga ni' rō'ō rinná bē' Nu na', ta'nné':

<sup>11</sup> ¡Xantu' Dios, nacu' lesaca'

cú'utu' Lí' yöl-la' ba, en guntu' Lí' bal,

en gata' quiu' yöl-la' unná bē' tu' benu' yúgu'tē le dē!

¡Ca ré'ēni quézinu' nacuá', en gula'sí lo nacuá'!

### Tu guichi, en Bōnni' náquië' Bō'cu' Zxíla'do'

**5** Ní'irō bilé'eda' tu guichi lu na' ibēla Nu na' rō'ō lataj lo. Guichi na' naca tu guichi nudubi, en dá'gaca didza' lé'elō, en láhuilō. Naguela' guichi na' gadxi le nusáyajgaca le. <sup>2</sup> Bilé'eda'-nē' tuë' gubáz lá'ayi lo, ate' bē'ē zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

<sup>3</sup> Cuntu nu guca usalaj guichi na', en bití' guca nu uyú le, calēga nu zoa yehua' yubá, en calēga nu zoa luyú, en calēga nu zoa zxánilō luyú. <sup>4</sup> Ní'irō gurōdxa' tu' cabí bidzōli nu naca lesaca' usalaj guichi na', en bití' bidzōli nu naca lesaca' ulaba le, en cuntu nu naca lesaca' uyú le. <sup>5</sup> Ní'irō tuë' bōnni' gula ni' gudxë' neda', gunné': "Biti' cōdxu'. Bōnni' na' náquië' ca bēdxi guixi', en nabábalenē' zxí'ini xí'sóë' Judá, en náquië' ca' zxí'ini xí'sóë' David, chibidéli'nē' lu yúgu'tē le raca, en séqui'nē' uládzu'ē le naguéla'gaca guichi ni, en usálajē' le."

<sup>6</sup> Ní'irō bilé'eda'-nē' Bōnni' náquië' Bō'cu' Zxíla'do', zuínē' lahui' lo lataj lo na' zoa gatsaj láhuilō nupa na' nabángaca, en gatsaj láhuilē' ca' yugu' bōnni' gula na'. Dxíé' huë' ca naca que tu bō'cu' zxíla' zoa nu bēti lēba' lahuë' Dios, nacuá' gadxi lúzuba', en gadxi guió'j loba', le tu'lu'í ca nácagaca gadxi bō' na' dzágagaca Dios, nasóil-lē'ē léguequi idútē yōdzōlió. <sup>7</sup> Gudōdē' Bōnni' náquië' Bō'cu' Zxíla'do', en gudélē'ē guichi na' lu na' ibēla Nu na' rō'ō lataj lo na'. <sup>8</sup> Cate' chigudélē'ē guichi na', bulu'zóa zxíbiguequi idapa nupa na' nabángaca, en idapa uru'ē bōnni' gula na' lahuë' Bōnni' na' náquië' Bō'cu' Zxíla'do'. Tu tuë' bōnni' gula na' zōngaquië' le rul-la nazí'í le arpa, en nuá'agaquië' ca' yugu' zxíga'do' néquiquequini oro, yugu' le yúdzugaca yalaj, lē na' ru-lu'í yöl-la' rulidza Dios quégaca bōnachi queë'. <sup>9</sup> Tul-lē' tu le rul-la yöl-la' ba, le naca cubi, le rna caní:

Nacu' lesaca' quélú'u guichi na',

en uládzu'u le naguéla'gaca le,

tu' bē'u lataj yugu' bōnni' gulútië' Lí',

ate' len xichōnu' bōá'uu' bōnachi para ilequi queë' Dios,

nupa nácagaca bōnachi izá'a nacuá' idútē yōdzōlió, bōnachi tu'í yúgu'tē didza' yúbölō, en nabábagaca yúgu'tē yōdzō, en yúgu'tē luyú nacuá' idútē yōdzōlió.

<sup>10</sup> Benu' ga nácagaquië' bōnni' ta'nná bē'ē en ga nácagaquië' bixúz queë' Dios queëru'.

Benu' ga ta'nná bē'ē lu yu yōdzōlió.

<sup>11</sup> Ní'irō buyúa', en biyōnda' chí'igaquië' gubáz lá'ayi zían. Zían gáyu'ē, en gáyu'ē nacu'ē. Nacu'ē idú gási-bí'ilō lataj lo na' tsōzxōn len nupa na' nabángaca, enca' yugu' bōnni' gula na'. <sup>12</sup> Tu'ē zidzaj didza' yúgu'tē, ta'nné':

¡Bōnni' na' náquië' Bō'cu' Zxíla'do' gulútië', náquië' lesaca' gata' yöl-la' unná bē' lu nē'ē, en yöl-la' tsahui', en yöl-la' réajni'í, en yöl-la' huáca! ¡Náquië' lesaca' gunru'-nē' bal, en tseaj lādxi'ru' Lë', en cú'uru'-nē' yöl-la' ba!

<sup>13</sup> Ní'irō biyōnda' tul-la yúgu'tē le benē' Dios yehua' yubá, en lu yu yōdzōlió, en zxánilō luyú, en lu nísado'. Tul-la yúgu'tē le nacuá' yugu' lataj na', ta'nná:

¡Yöl-la' ba Nu na' rō'ō lataj lo,

enca' Bōnni' na' náquië' Bō'cu' Zxíla'do'!

¡Gúntica'siru'-nē' bal

en cú'utica'siru'-nē' yöl-la' ba,

ate' inná bē'tica'sē' Lë'!

<sup>14</sup> Idápaté nupa na' nabángaca ta'nná: "¡Ca' gaca!"

Ní'irō idapa uru'ē bōnni' gula na' bulu'tsaga lógaquië' lu yu, en gula'yéaj lādxi'gaquië' Nu na' zóatica'sō.

### Yugu' le naguéla'gaca guichi

**6** Ní'irō bilé'eda'-nē' Bōnni' náquië' Bō'cu' Zxíla'do', ate' buládzu'ē tu le naguela' guichi na', ate' biyōnda' tu nu nutsa' ladaj idapa na' nabángaca, ate' biyōn chí'í ca guziú' rinné, gunná: "¡Gudá uyú!"

<sup>2</sup> Buyúa', en bilé'eda'-ba' tuba' bōa' chiguichi, ate' nu na' dxía lēba' zōn tu uxiti' yaga. Gulu'ē lē' tu le néquini oro udxíé' icjé', ate' birúajé' ca tu nu nácaterō lo para idéli'nē' lu gudil-la.

<sup>3</sup> Cate' buládzu'ē le buropi le naguela' guichi na', biyōnda' nu buropi na' nabán, ate' gunná: "¡Gudá uyú!"

<sup>4</sup> Ní'irō birúajba' ia'tuba' bōa', nácaba' xiná. Bulu'dōdē' lu nē'e nu na' dxía lēba' yöl-la' huáca unná bē' tsōjtúa yöl-la' ribōza dxí'a tsáhui'do' quégaca bōnachi, en gun ga iluti luzé'eguequi. Bulu'nōdzjé' queë' tu guíë tuchi' zōn.

<sup>5</sup> Cate' buládzu'ē le bunní le naguela' guichi na', biyōnda' nu bunní na' nabán, ate' gunná: "¡Gudá uyú!"

Buyúa', en bilé'eda'-ba' tuba' bōa' gasaj, ate' nu na' dxía lēba' zōn tu zxi'góns. <sup>6</sup> Biyōnda' ru'í didza' tu chí'í gatsaj láhuilō tapa na' nabángaca, ate' gunná: "Chopa guíë zxoá' xtila len lazaj que tu dza huen dxin tu' gaca gubín, en xopa guíë zxoá' cebada len lazaj que tu dza huen dxin, pero bití' gunu' ga yadzaj le naca za, en bití' bi gunu' que xisi uva nal-la."

<sup>7</sup> Cate' buládzu'ē le budapi le naguela' guichi na', biyōnda' ru'í didza' nu budapi na' nabán, ate' gunná: "¡Gudá uyú!"

<sup>8</sup> Buyúa', en bilé'eda'-ba' tuba' böa' gulaj, ate' nu na' dxía læba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödžölió para guti léguequi len guíë tuchi', en len yöl-la' ridún, en len yugu' yödžöhué', en len yugu' böa' guixi' sínia' dzó'öba' luyú.

<sup>9</sup> Cate' buládzu'ë le guyu' le naguela' guichi na', bilé'eda' znan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. <sup>10</sup> Gulu'í zidzaj didza' yugu' bö' ni, gula'nna': "¡Xantu' Lá'ayi, runu' ca rnno'! ¿Bátaxi caz uchi'a usöröu' queëtu', en uzí'i læbu' yugu' bönni' nacu'ë yödžölió tu' gulútië' netu'?"

<sup>11</sup> Bulu'nödžjë' quéguequi yugu' lari' chiguíchido'os ilácuë', en gulé' léguequi: "Ral-la' uzí' ládxi'li' ia'tú chí'i-do'osö, ga idxinrö dza ila'dxín yúgu'të luzá'ali' huen dx-in queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'li'."

<sup>12</sup> Cate' buládzu'ë le buzxopi le naguela' guichi na', buyúa', en bilé'eda' gudódida' budó' xzu' luyú. Böaca gasaj gubidza, en guca ca tu lari' guitsa' gasaj, ate' böaca beo' xiná ca naca rön. <sup>13</sup> Gula'guínnaj böljá lúzxi-ba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. <sup>14</sup> Gudödi que lúzxi-ba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të gu'ado', enca' yúgu'të gapa zoa luyú bidxi lu nísado'. <sup>15</sup> Ní'irö yugu' bönni' ta'nna' bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nna' bé'enë' bönni' röjáquië' gudil-la, en yugu' bönni' dë lu ná'a-gaquië', en yúgu'të nupa nadó'ogaca, en yúgu'të nupa bití' nadó'ogaca bulu'cachí' lógaquië' gapa naca znan bulóaj, en gapa naca læ'e guíój lu gu'ado'. <sup>16</sup> Gulé' yugu' gu'ado' na', en yugu' læ'e guíój na': "Gulí'dubága' netu', en bulí'cachí' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. <sup>17</sup> Chibidxín dza uluí'i lahui yöl-la' rilé quégaquië', ate' ¿nuzxi caz sequi' guá' ilén le?"

### Tu gayuá' yu' tapa-un milë' bönni'

**7** Gudödi gulaca yugu' læ ni bilé'eda' tapa gubáz lá'ayi zuíguequinë' idapa la'a yödžölió. Tu'záguë'ë xinóžgaca idapa bö' recja tsölá'a huéaj luyú, para cabí tsecja bö' luyú yödžölió, en para cabí tsecja lu nísado', en para cabí utá yaga. <sup>2</sup> Bilé'eda' ca' ia'túë' gubáz lá'ayi zë'ë rirúajë' ga rilén gubidza. Nu'ë tu le udé'ë nupa náacagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'. <sup>3</sup> Gudxë' légaquië': "Bití' gun dítjalí' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

<sup>4</sup> Biyönda' tscá náacagaquië' bönni' da' légaquië' læ na' naca bë'. Náacagaquië' idú tu gayuá' yu' tapa-un milë' ladaj yúgu'të cö' xzí'ini xí'sóë' Israel. <sup>5</sup> Yugu' bönni' na' da' légaquië' læ na' naca bë' náacagaquië':

Chinnu milë' di'a dza queë' Judá.  
Chinnu milë' di'a dza queë' Rubén.  
Chinnu milë' di'a dza queë' Gad.

<sup>6</sup> Chinnu milë' di'a dza queë' Aser.  
Chinnu milë' di'a dza queë' Neftalí.  
Chinnu milë' di'a dza queë' Manasés.

<sup>7</sup> Chinnu milë' di'a dza queë' Leví.  
Chinnu milë' di'a dza queë' Isacar.

<sup>8</sup> Chinnu milë' di'a dza queë' Zabulón.  
Chinnu milë' di'a dza queë' José.  
Chinnu milë' di'a dza queë' Benjamín.

### Bönachi guizxi yu náacagaca lari' chiguíchido'os

<sup>9</sup> Gudödi guca læ ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'të yödžö tu'í didza' yúbölö idütë yödžölió. Zuíguequinë' ca dódilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en náacagaquië' lari' chiguíchido'os, en zóngaqueië' zin. <sup>10</sup> Tu'ë zidzaj didza' yúgu'të, ta'nne':

¡Yöl-la' rusölá za' lu në'ë Dios queëru', rö'ë lataj lo ni, en za' ca' lu në'ë Bönni' na' náquië' Bö'cu' Zxíla'do'!

<sup>11</sup> Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacua' idapa na' nabángaca, ate' tu't-saga lógaquië' lu yu ca dódilö lahui lataj lo na', en ta'yéaj ládxi'gaquië' Dios, <sup>12</sup> ta'nne':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxon, en yöl-la' réajni'!

¡Rëtu' Li': "Xclenu", en runtu' Li' bal!

¡Napu' yöl-la' unná bë', en yöl-la' huáca!

¡Gácatíca'sö caní quiu', Dios queëtu'!

¡Ca' gaca!

<sup>13</sup> Ní'irö gunábinë' neda' tuë' bönni' gula na', gunné': "¿Nupxi na' náacagaca lari' chiguíchido'os, en gapxi bönni' légaquië'?"

<sup>14</sup> Neda' gudxa' læ: "Xan, li' nöz quézinu'."

Lë' gudxë' neda': "Nupa ni gula'guí'i gula'záca'da'. Gula'guí'bë' lari' náacagaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'. <sup>15</sup> Que læ ni na' nacu'ë ca dódilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu judo' queë'. Nu na' rö'ö lataj lo ni gun chí'i légaquië' tu' zóaléntica'sö légaquië'. <sup>16</sup> Bítí'rö ila'dunë', en bítí'rö ila'bidxë' nisa, en bítí'rö ila'yéguinë' gubidza, en bítí'rö iléquinë' xilá <sup>17</sup> tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ru'í yöl-la' na'bán, ate' Dios uzxië' lógaquië' nisa ta'bödxë'."

### Le igadxi le naguela' guichi

**8** Cate' buládzu'ë le igadxi le naguela' guichi na', guró'ö dxi yehua' yubá idú gatsaj hora. <sup>2</sup> Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. <sup>3</sup> Ní'irö bidë' ia'túë' gubáz lá'ayi, nu'ë tu xzí-

ga'do' néquini oro, en guzuínë' ra' bucugu yehua' yubá ni'. Gulú'udë' yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. <sup>4</sup> Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rë'ë Dios. <sup>5</sup> Ní'irö gubáz lá'ayi na' bulië' zxíga'do' na' len bo' yalaj dxía lu bucugu na', ate' gurú'unë' le luyú. Gunné guziú', ate' bö zidzaj biyón. Guyëpi yösa, en gudödi budó' xzu'.

### Tu'cödxë' lúzuba' böa' bëdxi

<sup>6</sup> Ní'irö igádxitë' gubáz lá'ayi na' zóngaquie' gadxi lúzuba' böa' bëdxi na' gula'cu'ë sina' ulu'cödxë' léguequi.

<sup>7</sup> Bucödxë' gubáz lá'ayi zí'alö lúzuba' böa' bëdxi, ate' guró'ö guiój bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

<sup>8</sup> Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'látí'do'os ca gatsaj tu gatsaj nísado' na' böáca rön. <sup>9</sup> Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

<sup>10</sup> Bucödxë' gubáz lá'ayi bunny lúzuba' böa' bëdxi, ate' böxaj tu bölj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'látí'do'os ca gatsaj tu gatsaj nisa na' rë'ö luyú.

<sup>11</sup> Bölj ni lëba' Ajenjo, le naca tu le silá', ate' böáca silá' ia'látí'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ní'a que nisa na' böáca silá'.

<sup>12</sup> Bucödxë' gubáz lá'ayi budapi lúzuba' böa' bëdxi, ate' böáca chul-la ia'látí'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bölj. Caní guca, bití' buzení' gubidza ia'látí'do'os ca gatsaj tu gatsaj dza, en bití' bulú'zení' bölj, en beo' ia'látí'do'os ca gatsaj tu gatsaj rëla.

<sup>13</sup> Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë': "¡Bica' bayechí' libí'ili'! ¡Bica' bayechí' libí'ili'! ¡Bica' bayechí' libí'ili' zóalí' luyú ni cate' ulu'cödxë' ia'tsonné' gubáz lá'ayi na' lúzuba' böa' bëdxi!"

<sup>9</sup> Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bölj lúzxiba böxaj luyú, ate' bulu'nödzjë' nu na' zxí'ini guí'ë que lataj chul-la. <sup>2</sup> Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ní'a que dzön na'. <sup>3</sup> Lu dzön na' bila'rúajba' böchi'zu, yugu' le gula'zxóasi-ba' luyú, ate' Dios bë'ë léga-caba' lataj iládu'ba' bönachi ca tunba' xöjnó' dzó'öba' luyú. <sup>4</sup> Gunná bé'enë' léga-caba' bití' ilún dí'jaba' guixi' rë'ö luyú, en bití' ilún dí'jaba' yugu' le naca ya'a, en calëga yugu' yaga, pero gá-

casö iládu'ba' bönachi na' bití' da' lë na' naca bë' nu nequi queë' Dios ra' xigágaquië'. <sup>5</sup> Bití' bë'ë léga-caba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnó'. <sup>6</sup> Yugu' dza na' ilé'enë' yugu' bönni' iluti cuíngaquië', pero bití' ila'zégui'në'. Ilé'ëninë' ilátie', pero ucuíta cuini yöl-la' guti.

<sup>7</sup> Nalá'gacaba' böchi'zu na' ca nácagacaba' böa' nácagacaba' le néquiquequini guí'ë, para tsójacaba' gudil-la. Dxiagaca ícjagacaba' le nácagaca ca tu le néquini oro. Naca lógacaba' ca naca lógaca bönachi. <sup>8</sup> Naca guitsa' ícjagacaba' ca naca guitsa' ícjanu nigula. Nácagaca láy-í'gacaba' ca nácagaca láyí'ba' bëdxi guixi'. <sup>9</sup> Nácugaca luchú'ugacaba' le néquini guí'ë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xítí'ba' lu gudil-la. <sup>10</sup> Nácagaca xibángacaba' ca naca xibángacaba' xöjnó', zoa lí'igacaba'. Lu xibángacaba' na' zoa le tu'dí'iniba', para ilunba' zí' bönachi idú ca gayu' beo'.

<sup>11</sup> Zoa nu rinná be'ë léga-caba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

<sup>12</sup> Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

<sup>13</sup> Bucödxë' gubáz lá'ayi buzxopi lúzuba' böa' bëdxi, ate' biyönda' tu chí' ruí'i didza' gatsaj láhui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rë' lahuë' Dios. <sup>14</sup> Chí'i ni ruí'ilen didza' gubáz lá'ayi buzxopi na' sí' bucödxë' lúzuba' böa' bëdxi, en rnna: "Busedxi idápatë' gubáz xihui' na' ná-ga'gaca ra' yegu Eufates."

<sup>15</sup> Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió. <sup>16</sup> Biyönda' tsca nácagaquië' bönni' röjáquië' gudil-la dxíagaquië'-ba' böa', en dzága-gaquië' tapa gubáz xihui' na'. Nácagaquië' idú chopa gayuá' mil milë'.

<sup>17</sup> Bilé'egacada'-ba' böa' na' ca tu lu bixín, ate' nupa ta'bía léga-caba' nacu luchú'uguequi le naca guí'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre.

<sup>18</sup> Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacua' luyú, lë na' nácagaca guí', en dzön, en lë na' ruzégui'da'. <sup>19</sup> Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

<sup>20</sup> Ia'zica'rö bönachi, nupa bití' gulati lu chopa ni tu'suniti, bití' bulu'bí'i ládxi'guequi para cabirö ilúngaca ca na' túngaca, en bití' bulu'sán ta'yéaj ládxi'guequi yugu' bö' xihui', en yugu' budó' guiój budó' yaga, yugu' budó' na' bití' ta'lé'ë, en bití' ta'yöni, en bití' gaca sá'gaca.

<sup>21</sup> Bití' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

### Gubáz lá'ayi, nuá' lu nëë tu guíchido'

**10** Ní'irö bilé'eda'-në' ia'túë' gubáz lá'ayi nál-la, bötjè' birúajè' yehua' yubá, nácuë' böaj lúzxiba, en zoa ca tu biguita' ícjale'. Rëpi yösa bení' lahuë' ca run gubidza, ate' nácgaca ní'ë ca ya'zxon ta'yegui. <sup>2</sup> Zoa lu nëë tu guíchido' nayalaj, ate' tu ní'ë ibëla nulibè' lu nísado', en ia'tú ní'ë yögöla nulibè' luyú bidxi. <sup>3</sup> Ní'irö bëë zidzaj didza', ate' biyön chí'ë ca riyön cate' ribódxí'aba' bëdxi guixí', en cate' budxi bëë zidzaj didza' na', bila'yöni chí'igaca gadxi guziú'. <sup>4</sup> Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí' didza' yehua' yubá, rë neda': "Bucáchi'sö didza' ni gulu'í gadxi guziú' na'. Bití' uzúaju' didza' na' lu guichi."

<sup>5</sup> Ní'irö gubáz lá'ayi na' bilé'eda'-në' zuínè' lu nísado', en luyú bidxi, guchisa nëë ibëla zaca' lúxibalö, <sup>6</sup> ate' ben tsutsu xtídzè'ë ní'a que Nu na' zoa caz, Nu na' ben yehua' yubá, en le nacua' ní', enca' yödzölió, en le nacua' ní', enca' nísado', en le nacua' ní', ate' gunné': "¡Bítirö tse! <sup>7</sup> Cate' ucódxè' gubáz lá'ayi igadxi lúzuba' böa' bëdxi, usudxinè' Dios le nagachí' queë', lè na' bulu'ínè' yugu' huen dxin queë', bönni' ní' gulu'ë didza' uláz queë'."

<sup>8</sup> Ní'irö chí'í na' biyönda' rirúaj yehua' yubá bé'len neda' didza' leyúbölö. Gunná: "Guyéaj, yöjxí' guíchido' nayalaj na' zönè' gubáz lá'ayi na' nulibè' lu nísado', en luyú bidxi."

<sup>9</sup> Guyija' ga na' zoè' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxè' neda', gunné': "¡Guzxí', gudagu! Lu ru'u gaca zxixi ca naca bidxína'do' queéba' buz, pero lé'u huóaca silá'."

<sup>10</sup> Guzxí'a guíchido' na' zönè', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böaca silá' lé'a. <sup>11</sup> Ní'irö gudxè' neda': "Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacua' yúgu'tè yödzö, en gapa tuí' zían didza' yúbölö, en lógaca zían bönni' unná bë'."

### Chopè' bönni' tunè' ba nalí

**11** Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bula-ba nupa nacua' ní' ta'yéaj ládxi'gaca Dios. <sup>2</sup> Bucá'ana ca' lö'a que yudo' na' dè ní'ilö, en bití' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chop-a-un beo'."

<sup>3</sup> Gudxè' ca' neda': "Isól-la'a chopè' bönni' ilunè' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácuagaquie' lari' le naca bödzádzado'." <sup>4</sup> Chopè' bönni' ni tunè' ba nalí, nácuagaquie' chop-a yaga olivo na' nazúaj lu guichi lá'ayi ca naca quégaquie', en nácuagaquie' ca' chop-a le nuá'gaca guí' na' nacua' lahuë' Dios, Xani yödzölió. <sup>5</sup> Channö gué'eni nu guá' dö' quégaquie', irúaj guí' ruá'agaquie' le usuniti nu na' ré'eni guá' dö' quégaquie', en guti nu na', enca' nupa ta'dá'baga' légaquie'. <sup>6</sup> Chopè' ni dè lu

na'agaquie' ulu'záguë'ë xinöza nisa guió'j lúzxiba, para cabí galaj guió'j tsca dza na' ral-la' ilu'ë didza' uláz queë' Dios, ate' dè lu ná'agaquie' ca' ilunè' ga huóaca nisa rön, en ilunè' ga gatsaj yödzöhué' yödzölió. Ilunè' caní bálati'tès luzuí ilé'ennè'. <sup>7</sup> Cate' údxi ilunè' ba nalí, irúa-jba' böa' sínía' lataj chul-la, en tíl-lalenba' légaquie', en ucúl-laba' légaquie', en gútiba' légaquie'. <sup>8</sup> Le gulaca cazè' ila'tulusö ca' la' nöza lu yödzö zxon, ga ní' gudé'ë ca' Xanru' lè'e yaga cruz, en ca rucúdzuru' didza', nazí' le ca' Sodoma, enca' Egipto. <sup>9</sup> Idú ca tsonna dza yu' gatsaj bönachi yúgu'tè yödzö, en yúgu'tè bönachi izá'a, en bönachi tuí' zían didza' yúbölö, en bönachi yúgu'tè luyú, ila'lé'eni le gulaca cazè', en bití' ilu'í lataj nu ucache' légaquie' yeru ba. <sup>10</sup> Ulu'dzéjade'e nupa nacua' yödzölió tu' gulatiè', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zí'ë chopè' ni gulu'ë didza' uláz queë' Dios bönachi nacua' yödzölió.

<sup>11</sup> Ní'irö cate' chibizá'a tsonna dza yu' gatsaj na', Dios busubanè' légaquie', ate' gula'yasè' gulazuínè', ate' guladxi gula'dzöbi yúgu'tè nupa bila'lé'e légaquie'.

<sup>12</sup> Ní'irö bë' zidzaj didza' tu chí'í yehua' yubá, en gudxi légaquie': "Gulí'cuén ni."

Gula'benè' lu böaj lúzxiba zaca' yehua' yubálö, ate' nupa na' gula'dá'baga' légaquie' bila'lé'e légaquie'.

<sup>13</sup> La' ní'sö gudódida' budó' zxu', ate' biguinna' tu cö' tsa tu chi cö' yugu' yu'u dzö'ö lu yödzö na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ní' nagá'anagaca, ate' gula'gú'u yöl-la' ba Dios zoè' yehua' yubá.

<sup>14</sup> Chigudödi le buropi le rusuniti bönachi, ate' chizóa idxín le bunní le usuniti léguequi.

### Rucödxè' gubáz lá'ayi igadxi lúzuba' böa' bëdxi

<sup>15</sup> Bucödxè' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chí'í yehua' yubá, ta'nná: Gapa ta'nná bë' bönachi yödzölió nadódigaca lu nëë Xanru' Dios, en lu nëë Cristo. Lè' inná bë'tica'sè'.

<sup>16</sup> Ní'irö idapa uru'ë bönni' gula na' ró'ögaquie' gapa na' ta'nná bëë lahuë' Dios, bulu'tsaga lógaquie' lu yu, en ta'yéaj ládxi'gaquie' Dios. <sup>17</sup> Ta'nné':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxon quiu', en risí lo' rinná bë'u!

<sup>18</sup> ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöróu' nupa chinátigaca!

¡Ubi'u quégaquie' huen dxin quiu',

yugu' bönni' gulu'ë didza' uláz quiu',

nupa néquiquequi quez quiu', en gulún bal Lo',

nupa nácgaca cá'asö, en nupa nácgaca lo!

¡Chibidxín dza usunitiu' nupa bulu'suniti yödzölió!

<sup>19</sup> Ní'irö gualaj yudo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahuí' le nunè' Dios. Guyèpi yösa, en gulú'u bö zidzaj,

en gunné guziú' luyú. Gudödi budó' xzu', en guró'ö guiöj bögui' yöla sunna.

**Tunu nigula, en tuba' bëla zxön xitsiní'**

**12** Ní'irö bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa xzan ní'anu beo'. Dxía ícjanu tu le néquini oro ga dxíagacaba' chinu bölej bení'. <sup>2</sup> Nigula ni chizóa soa bí'ido' queénu, en ribódxinu tu' rúdia' lé'enu. Riguí'i rizáca'nu ruzóanu bí'ido' queénu. <sup>3</sup> Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. <sup>4</sup> Len xibanba' gú'yöjba' tu cö' tsa tu tsonna cö' bölej lúzuba, en gurú'unaba' légaçaba' luyú. Guzuí'ba' bëla zxön xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bí' bí'ido' queénu na' ca gáljabi' na'. <sup>5</sup> Buzóanu-bí' tubí' bí'i bónni'do' ral-la' inná bé'ebi' yúgu'të yödzö len tu xiyaga guië. La' bucuí-tatë'-bí' Dios bí'ido' queénu na', en buchisë'-bí' ga ni' zoa cazë' Lë', rö'ë lataj lo ga na' rinná bë'ë. <sup>6</sup> Buzúnna-jnu nigula na', zéajnu lu lataj cáasö, ga ni' chinupéë Dios lataj queénu. Ulu'gahuë'-nu ni' idú ca chinu gayuá' yu' tsónnalalaj dza.

<sup>7</sup> Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá-gaquië' lë' gula'díl-lalenë'-ba' bëla zxön xitsiní' na'. Gula'díl-la bëla zxön na', en yugu' gubáz xihui' dá'gaca lëba' <sup>8</sup> pero bití' bila'deli' lu gudil-la na'. Que lë ni na' bití'rö bidzöli xilátjagaca yehua' yubá. <sup>9</sup> Caní guca, gula'rú'unë'-ba' bëla zxön xitsiní' na' ní'ilö. Nácaba' bëla na' zóaba' dza ní'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

<sup>10</sup> Ní'irö biyönda' tu chí' ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'ilö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queéru'. <sup>11</sup> Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bónni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalí queë'. Bití' guluí'i ládxi'gaquië' yöl-la' na'bán quegaquië', pero gulátië'. <sup>12</sup> Que lë ni na' gaca yöl-la' rudzeja yehua' yubá. ¡Bulí'dzeja libí'ilí, zóalí' ní'! ¡Bica' bayechí' libí'ilí zóalí' yödzölió, en lu nísado', tu' chibötaj tu' xihui', en bidxín ga zóalí'! Riléde'e tu' xihui' na' tu' chiréquibe'e ia'tú chí'sö dë lataj que."

<sup>13</sup> Cate' gúquibe'eba' bëla zxön xitsiní' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bí'i bónni'do' na' queénu. <sup>14</sup> Ní'irö Dios bë'ë-nu nigula na' chopá xiliba' bisía' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cáasö. Ní' ulu'gahuë'-nu idú tsonna iz yu' gatsaj. <sup>15</sup> Bëla zxön xitsiní' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'të nigula na'. <sup>16</sup> Ní'irö luyú gúcalen nigula na'. Guyalaj luyú na', en gú'í' nisa yegu na' gúbaba'

bëla zxön xitsiní' na'. <sup>17</sup> Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queénu dí'a dza queénu, nupa na' tun ca rnna le gunná bë'ë Dios, en nazí' lu né'eguequi le nunë' Jesucristo ba nalí.

**Chópaba' böa' sínia'**

**13** Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxí'a. <sup>2</sup> Böa' sínia' na' bilé'eda'-ba' riná'aba' ca nácaba' tu bédxito', nacué' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixí'. Bëla zxön xitsiní' na' budódiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. <sup>3</sup> Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'. <sup>4</sup> Gula'yéaj ládxi'gaquië'-ba' bëla zxön xitsiní' na', tu' budódiba' yöl-la' unná bë' queéba' lu ná'aba' böa' sínia' na'. Gula'yéaj ládxi'-gaquië'-ba' böa' sínia' na', en gula'nnë': "¿Nuzxi caz naca zxön ca naca zxön böa' sínia' na', en nuzxi caz sequí' tíl-lalen lëba'?"

<sup>5</sup> Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopá-un beo' guta' lu ná'aba' yöl-la' unná bë'. <sup>6</sup> Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacué' yehua' yubá. <sup>7</sup> Guta' lu ná'aba' gudíl-lalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bé'eba' yúgu'të bönachi izá'a, bönachi yúgu'të yödzö, en bönachi tu'í' yúgu'të didza' yúbölö, en bönachi idütë yödzölió. <sup>8</sup> Yúgu'të bönachi nacué' yödzölió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajë' Bónni' na' náquië' Bö'cu' Zxíla'do' queë' Dios cate' sí' guta' yödzölió. Buzóca cazë' Dios gútië' Bónni' na' ní'a quégaca bönachi queë'.

<sup>9</sup> Channö nu riyöni, ral-la' uzë nagui. <sup>10</sup> Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guië tuchi', len guië tuchi' ilátigaca. Que lë ni na', ral-la' ila'böza zxön ládxi' nupa néquiguequi queë' Dios, en ta'yéajlë' Lë'.

<sup>11</sup> Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopá lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxön xitsiní' na'. <sup>12</sup> Dë lu ná'aba' böa' sínia' ni yúgu'të yöl-la' unná bë' queéba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacué' yödzölió böa' sínia' zí'alö na', böa' na' buniti huë' le guti lëba'. <sup>13</sup> Böa' buropi na' runba' ca' le nácagaca bë' ga ridxintë runba' ga ruhuóxaj guí' le za' lúzuba, en ruhuóxaj luyú lógaca yúgu'të bönachi. <sup>14</sup> Rizí' yé'eba' bönachi nacué' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bé'eba' bönachi nacué' yödzölió ilunë'

tu budó' ca nácaba' böa' sínia' na' gúcaba' hué' que guié tuchi', ate' nabanba'. <sup>15</sup> Dë lu ná'aba' runba' ga soa ibán budó' na' naca ca nácaba' böa' sínia' zí'aló na', en gü'í didza' budó' ni, en gun ga nu guti yúgu'të nupa bití' ila'yéaj ládxi'gaca le. <sup>16</sup> Benba' ga gudá' yúgu'të bö-nachi tu le naca bē' dá'gaca lēba', nupa nácagaca cá'asó, en nupa nácagaca lo, nupa ta'l'é'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibēla o ra' xigágaca bönachi na'. <sup>17</sup> Cuntu nu gaca bi ga'u o bi guti' channö cabí da' nu na' lē na' naca bē', o channö cabí da' nu na' laba' böa' sínia' na', o le nabábaba' nuá'aba'. <sup>18</sup> Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababē' tu bönni', ate' le nabábaba' na' naca xopa gayuá' yu' tsónnalalaj yu' xopa.

### Le tul-lē' tu gayuá' yu' tapa-un milē' bönni'

**14** Gudödi ni' buyúa', en bilé'eda'-nē' Bönni' na' náquiē' Bö'cu' Zxíla'do' zuínē' lu guí'ado' nazí'i le Sión. Nacuá'lenē' Lē' tu gayuá' yu' tapa-un milē' bönni', da' ra' xigágaquiē' Lē' Bönni' na' náquiē' Bö'cu' Zxíla'do', enca' Lē' Xuzē'. <sup>2</sup> Ní'irö biyönda' tu le rigú'u bö yehua' yubá, le rinné zidzaj ca rinné tu yegu xzön, en ca rinné guziú'. Biyönda' le riyón cate' ta'guínniē' lē'e tu le rul-la zē zían du que. <sup>3</sup> Tul-lē' tu le rul-la cubi, nacu'ē ca dódilö lahui lataj lo ni', enca' ca dódilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légcasē' tu gayuá' yu' tapa-un milē' bönni' ni, bönni' na' böá'uē' Cristo légaquiē' ladaj bönachi yödzölió. <sup>4</sup> Nácagaquiē' bönni' ni idú ladxí'. Bití' gula'cuá'lenē' nigula, tu' náca-gaquiē' idú bönni' ra'bán. Söjácalenē' Bönni' na' náquiē' Bö'cu' Zxíla'do' gátitēs ga sa'yéajē'. Cristo caz böá'uē' légaquiē' ladjagaca bönachi, ate' nácagaca nupa bul'dödi cuíngaquiē' zí'aló queē' Dios, enca' queē' Bönni' na' náquiē' Bö'cu' Zxíla'do'. <sup>5</sup> Catu caz gula'z'í yē'e, ate' cuntu nu gaca bi inné quégaquiē' ga na' nacu'ē ca dódilö lahui lataj lo ga rō'e Dios.

### Didza' röjuá'gaquiē' tsonna gubáz lá'ayi

<sup>6</sup> Ní'irö bilé'eda' ia'túē' gubáz lá'ayi, ridödē' lu bö'ös lúzxiba, en röju'ē didza' dxí'a zóatica'sö para gunē' libán que lógaca nupa nacuá' yödzölió, bönachi iduté luyú, yúgu'të bönachi izá'a, en bönachi tu'í yúgu'të didza' izá'a, en bönachi yúgu'të yödzö. <sup>7</sup> Ru'ē zidzaj didza', rnnē: "¡Gul'gádxí Dios, en gulí'cu'ē yöl-la' ba tu' chizóa uchi'a usöröē' bönachi! ¡Gulí'tséaj ládxi'ē Dios, nunē' lúzxiba, en luyú, en nísado', en gapa ralaj nisa!"

<sup>8</sup> Ia'túē' gubáz lá'ayi söjnáhuē' gubáz lá'ayi ni, en rnnē: "¡Chibudxi que yödzö Babilonia! ¡Chibudxi que yödzö xzön na'! Caní guca que, tu' gulún nupa nacuá' ni' ga gula'z'í lu ná'agaquiē' bönni' yúgu'të yödzö ilunē' ca nácagaca le ta'zē ládxi'gaquiē' le ruá' dö."

<sup>9</sup> Ia'túē' gubáz lá'ayi söjnáhuē' gubáz lá'ayi buropi ni, en ru'ē zidzaj didza', rnnē: "¡Channö nu tseaj ladxí'-ba'

böa' sínia' na', enca' budó' queéba', en gü'í lataj ta' ra' xigué o lu nē'e le naca bē' da' lēba', <sup>10</sup> gunē' Dios nu ni xiguia' lu yöl-la' rilé queē! ¡Qui'í saca' nu na' lu guí', en lu lē na' ruzéguí'da', lógaca gubáz lá'ayi, en lahuē' Bön-ni' na' náquiē' Bö'cu' Zxíla'do'! <sup>11</sup> Cuéntica'sö dzön que guí' ga ni' quí'í saca' nu na'. Rēla, en te dza quí'í saca', ate' catu caz gata' lataj ulu'z'í ládxi'gaca nupa ila'yéaj ládxi'gaca-ba' böa' sínia' na', en budó' queéba'. Bití' ulu'z'í ládxi'gaca nupa ilu'í'í lataj ta' laba' léguequi. <sup>12</sup> Que lē ni na' nupa na' néquiquequi queē' Dios, en tun ca rnna le gunná bē'ē, en ta'yéajlē' Jesús, ral-la' ila'böza xzön ladxí'."

<sup>13</sup> Ní'irö biyönda' chí'i nu ru'í'í didza' yehua' yubá, en rē neda': "Buzúaj lu guichi lē ni: ¡Bica' bágaca nupa iláti-gaca na'a si lo, nupa na' ta'yéajlē' Xanru!"

Dios Bö' Lá'ayi rnnē: "¡Ca' gaca! ¡Ulu'z'í ládxi'gaquiē' lu dxin gulunē', en ulu'z'í'ē xibé ca sa'yéaj le gulunē!"

### Tu'z'í'ē le rulá' luyú

<sup>14</sup> Ní'irö buyúa', en bilé'eda' tu böaj lúzxiba chiguí'chi-dö'os, ate' lu böaj na' rō'e tu bönni' náquiē' ca náquiē' Bönni' Guljē' Bönachi, ate' dxía icjē' tu le néquini oro, ate' zönē' tu guié tuchi' lu nē'e. <sup>15</sup> Birúajē' tuē' gubáz lá'ayi lu yudo' rō'ö yehua' yubá, ate' bē'ē zidzaj didza', en gudxē' Nu na' rō'ö lu böaj na', gunné: "¡Bugún dxin guié tuchi' quiu', en guchugu xzoa' xtila, tu' chibidxín dza nu uzí' le! ¡Chinabídx do que le dē yödzölió!"

<sup>16</sup> Ní'irö Nu na' rō'ö lu böaj na' bugún dxin guié tuchi' iduté yödzölió, ate' buzi'ē le rulá' luyú.

<sup>17</sup> Ní'irö birúajē' tu gubáz lá'ayi lu yudo' zoa yehua' yubá. Nu'ē ca' tu guié tuchi'. <sup>18</sup> Birúajē' ia'túē' gubáz lá'ayi ra' bucugu ni', dē lu nē'e inná bé'enē' guí', ate' bē'ē zidzaj didza', en bulidzē' gubáz lá'ayi zí'aló na' nu'ē guié tuchi', gunné: "¡Bugún dxin guié tuchi' quiu', en butubi tu'xóa huéaj le ta'bía lubá uva rógaca yödzölió, tu' chiná le ta'bía lubá uva!"

<sup>19</sup> Ní'irö gubáz lá'ayi ni bugunē' dxin guié tuchi' iduté yödzölió, en butubē' le ta'bía lubá uva rógaca luyú, ate' yöjchú'unē' le ta'bía lubá uva na' lu yeru xzön ga izí xisi. Yugu' lē ni rulu'í' ca gunē' Dios, gunē' xiguia' bönachi nacuá' yödzölió. <sup>20</sup> Bulu'libē' le ta'bía lubá uva na' lu lerui zoa ní'lö ra' yödzö, ate' lu lerui na' birúaj rön, en gurén ga bidxintē ruá'agacaba' böa', en gudödi rön na' idú tsca gaca sá'aru' idú chinnu dza.

### Yugu' gubáz lá'ayi nuá'gaquiē' gadxi yödzöhué'

**15** Bilé'eda' ia'tú le nácada' bē' yehua' yubá, le run ga nu rubani. Bila'rúajē' gadxi gubáz lá'ayi, nuá'agaquiē' gadxi yödzöhué' röjsétegaca, le ugunē' dxin Dios, údxí gunē' xiguia' bönachi yödzölió.

<sup>2</sup> Bilé'eda' ca' tu le naca ca tu nísado' le rēpi yösa bení' ca guiój jara le nuts'í'í guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lē na' naca ca tu nísado', en nuá'agaquiē' le tul-la, yugu' le bē'ē Dios quégaquiē'. <sup>3</sup> Tul-lē' le rul-la na' bil-lē' Moisés, bönni' huen dxin queē' Dios. Naca tu le rul-la queē' Bönni' na' náquiē' Bö'cu' Zxíla'do'. Ta'nné:

¡Li', Xantu' Dios, zxóntèrö nacu' Li'!  
 ¡Zxóntèrö naca yúgu'tè le benu',  
 le tun ga rubánitu'!  
 ¡Li' rinná bé'enu' yugu' yödzo!  
 ¡Idú dxí'ado', en idú tsahui' naca ca bi runu'!  
 4 ¿Nuzxi caz cabí gadxi Li', Xantu'?  
 ¿Nuzxi caz cabí cu'u Li' yöl-la' ba?  
 ¡Tuzu' Li' nacu' lá'ayi!  
 ¡Ila'dxín bönachi yúgu'tè yödzo,  
 en ila'yéaj láchix'guequi Li'  
 tu' ta'lé'e naca tsahui' yúgu'tè le runu'!  
 5 Gudödi guca lè ni, buyúa', en bilé'eda' gualaj yudo'  
 yehua' yubá ga ni' dè lataj lá'ayi que le naca bé'  
 zóalené' Dios bönachi queé'. 6 Bila'rúajé' gadxi gubáz  
 lá'ayi lu lataj lá'ayi na', nuá'agaquié' gadxi yödzo'hué'  
 na'. Nácugaquié' lari' nazáca'da' le répi yösa bení', en  
 núga'gaca luchú'ugaquié' le néquiquequini oro. 7 Ní'irö  
 tu nu nutsa' ladaj idapa nupa na' nabángaca, bé' que  
 queé'gaquié' gadxi gubáz lá'ayi na' gadxi zxíga'do'  
 néquiquequini oro, en yúdzugaca le rulu'íi yöl-la' rilé  
 queé' Dios, Bönni' zoa cazé'. 8 Lu lataj lá'ayi na' bidzá'a  
 dzön, tu' zoa ni' yöl-la' bení', en yöl-la' huáca zxön queé'  
 Dios. Cuntu nu sequí' tsaza lu lataj lá'ayi na' cate' gáts-  
 jarö gadxi yödzo'hué' na' nuá'agaquié' gadxi gubáz  
 lá'ayi na'.

#### Yugu' zxíga'do' yúdzugaca le rulu'íi yöl-la' rilé queé' Dios

**16** Ní'irö biyönda' chí'i nu ru'íi zidzaj didza' lataj  
 lá'ayi na', en rë gadxi gubáz lá'ayi na', rna:  
 "¡Guli'tséaj! ¡Guli'tsöjlálaj gadxi zxíga'do' na' lu yödzo'lió,  
 le yúdzugaca lè na' rulu'íi yöl-la' rilé queé' Dios!"  
 2 Guyijé' gubáz lá'ayi zí'aló, en yöjlaljé' le yudzu zxíga'-  
 do' na' zöné' lu yödzo'lió. Lè na' yudzu zxíga'do' na' ben  
 ga gutsaj yudzu' ya'a le riláda' idüté le naca caz nupa  
 na' da' léguequi le naca bé' dá'gaca böa' sínia' na', en-  
 ca' nupa na' ta'yéaj láchix'gaca budó' queé'ba'.  
 3 Ní'irö guyijé' gubáz lá'ayi buropi, en yöjlaljé' le  
 yudzu zxíga'do' na' zöné' lu nísado', ate' nisa na' böaca  
 rön ca naca rön queé' tu bönni' nati, ate' gulati yúgu'tè  
 nupa nabángaca nacua' lu nísado' na'.  
 4 Guyijé' gubáz lá'ayi bunny, en yöjlaljé' le yudzu zxi-  
 ga'do' na' zöné' gapa dè yegu, en gapa ralaj nisa, ate'  
 gapa dè nisa na' bulu'huóaca rön. 5 Ní'irö biyönda' ru'é  
 didza' gubáz lá'ayi na' dè lu nè'è rinná bé'ené' nisa na',  
 rnné': "¡Xantu' Dios Lá'ayi! ¡Zoa cazu', en guzóa cazu'!  
 ¡Tsahui' nacu' tu' richugu' caní quégaca bönachi 6 tu'  
 bulu'laljé' rön quégaca nupa néquiquequi quez quiu',  
 en quégaca nupa gulu'íi didza' uláz quiu'! ¡Na'a, Li'  
 runu' ga ilé'ajé' rön, tu' caní ral-la' gaca quégaquié'!"  
 7 Ní'irö biyönda' ru'íi didza' tu nu zoa ra' bucugu  
 yehua' yubá ni', rna: "¡Ca' gaca, Xantu' Dios, napa  
 cazu' yöl-la' unná bé'! ¡Idüté li, en tsahui' naca ca  
 richugu' quégaca bönachi!"  
 8 Guyijé' gubáz lá'ayi budapi na', en yöjlaljé' le yudzu  
 zxíga'do' na' zöné' lu gubidza, ate' gubidza na', bé'è  
 Dios le lataj uzéguí'da' bönachi len guí' que. 9 Gu-  
 la'yéguí'da' yúgu'tè bönachi tu ruzéguí'da' gubidza,

pero bití' bulu'bí'i láchix'gaca, en bití' gula'gú'u Dios yöl-  
 la' ba. Gula'nné' zí'i queé' Dios, Bönni' dè lu nè'è inná  
 bé'ené' yugu' lè ni tu'saca' zí' bönachi.

10 Guyijé' gubáz lá'ayi guyu' na', en yöjlaljé' le yudzu  
 zxíga'do' zöné' lu xilataj böa' sínia' ga na' rinná bé'èba',  
 ate' guró'o chul-la gapa rinná bé'èba'. Ní'irö, tu' gu-  
 la'gu'íi gula'zaca' bönachi, guláguya'a lúdxix'guequi,  
 11 pero bití' bulu'bí'i láchix'gaca para cabirö ilúngaca le  
 ruá' dö' tuné'. Gula'nné' zí'i queé' Dios zoé' yehua' yubá  
 tu' ta'gu'íi ta'zaca', en tu' dxíagaca yudzu' ya'a na'.

12 Guyijé' gubáz lá'ayi buzxopi na', en yöjlaljé' le  
 yudzu zxíga'do' na' zöné' lu yegu zxön nazí'i le Eufrates,  
 ate' gubidxi nisa yegu na' para ibá'a nöza ga ila'dödi  
 nupa ta'nná bé', nupa ila'rúaj zaca' ga rilén gubidza.

13 Ní'irö bilé'eda' bëla zxön xitsiní' na', en böa' sínia'  
 na', en bönni' ru'é didza' uláz quégacaba'. Bila'rúaj  
 tsonna bö' xihui' tun ditaj bönachi lu ruá'agaca nupa  
 na'. Nalá'gaca ca nalá'gacaba' buludzu. 14 Nácagaca  
 yonna bö' ni bö' que tu' xihui', bö' na' tun le nácagaca  
 bé' le ilún ga ulu'bani bönachi. Yöjaca bö' xihui' na' idú  
 yödzo'lió, en yöjtúbigaca nupa ta'nná bé', para  
 tsöjajúquié' lu gudil-la na' gaca lu dza zxön queé' Dios,  
 Bönni' napa cazé' yöl-la' unná bé'. 15 Caní rnné' Dios:  
 "¡Buli'yútsöca! Guída' tsárido'os ca ridxiné' tu bönni'  
 gubán. Bica' ba nu zoa ban ladxí', en run chí'i le nacu  
 nu na', en rúntica'sö dxí'a, para cabí gun bayudxi ta  
 xíguídisö, en para cabí utuí' nu na' lahui' lógaca bö-  
 nachi." 16 Yugu' bö' xihui' na' bulu'tubi yugu' bönni' ta'n-  
 ná bé'è, ate' bulu'dubé' tu lataj nazí'i le lu didza' he-  
 breo: Armagedón.

17 Guyijé' gubáz lá'ayi igadxi na', en yöjlaljé' le yudzu  
 zxíga'do' na' zöné' lu bö'ös, ate' bé' zidzaj didza' tu nu  
 zoa lu lataj lá'ayi zoa yehua' yubá ga dè lataj lo na', rn-  
 na: "Chinaca."

18 Ní'irö guyépi yösa, en guró'öda' bö, en gunné' guz-  
 iú'. Gudódida' budó' zxu', le gudódida'rö ca gudödi  
 tsanni ni nacua' bönachi yödzo'lió. 19 Birúaj tsonna  
 có'ölö yödzo zxön na', ate' gula'guínnaj yödzo nacua'  
 yödzo'lió. Yöjnené' Dios le naca xihui' gulún bönachi  
 yödzo zxön na' nazí'i le Babilonia, ate' lu yöl-la' rilé  
 queé' bené' xíguia' nupa nacua' ni'. 20 Bila'gachí' yugu'  
 luyú bidxi dzö'ö lu nísado', ate' bíti'rö gula'lá' yugu'  
 guí'ado'. 21 Böxaj ca' guió'j bögui' yöla sunna, le za' lúzx-  
 iba, en yöjsóa ícjagaca bönachi, ate' nál-li' tu tu guió'j  
 bögui' na' ca tu gayuá' guié, ate' yúgu'tè bönachi gu-  
 la'nné' xihui' queé' Dios tu' nözi guió'j bögui' na' tu' bu-  
 lu'sáca'da' zí'i léguequi.

#### Dios richúguié' queénu nigula udá dzaga

**17** Ní'irö bidxiné' tué' gubáz lá'ayi ga zoa', nababé'  
 gadxi gubáz lá'ayi na' gula'zöné' gadxi zxíga'do'  
 na' néquiquequini oro. Bé'lené' neda' didza', gunné':  
 "Gudá ni, ate' uluí'ida' lí' ca guné' Dios, guné'-nu xíguia'  
 nigula udá dzaga na', ró'önu lu nísado' zían. 2 Gu-  
 la'cua'len lènu nupa ta'nná bé' luyú yödzo'lió, en gulún  
 le ruá' dö', ate' gula'zudxi nupa nacua' yödzo'lió ni, tu'  
 gulunlen lènu le bití' naca dxí'a."

<sup>3</sup> Dios Bö' Lá'ayi guzóalené' neda', ate' gubáz lá'ayi na' guché'e neda' tu lu lataj cá'asö, ate' bilé'eda'-nu tu nigula ni' dxianu cúdzu'ba' tuba' böa' sínia', nácaba' xina' guí'ido'os. Dxiagaca gadxi ícjaba', en chi lúzuba', en dá'gaca ca' lèba' le ta'nné' xihui' queé' Dios. <sup>4</sup> Nigula na' dxianu lèba' nácunu lari' xina' chul-la, en lari' xina' guí'ido'os. Nazí'i biquitaj queénu le néquiquequini oro, en yugu' guió'j nazaca', en yugu' bugá. Lu ná'anu rō'ō tu xíga'do' néquini oro, en yudzu le nácagaca xihui', en le ruá' dö' runnu. <sup>5</sup> Ra' xigánu dá'gaca ca lènu, le tu'luí'i tu le nagachí', en ta'nná caní: "Yödzo Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzō'ō Yödzo'lió." <sup>6</sup> Gúquibe'eda' nazúdxinu nigula na' tu' bennu ga gulaj rōn quégaca nupa néquiquequi queé' Dios, en quégaca nupa na' zoa nu bēti léguequi tu' gulún ba nalí queé' Jesús. Cate' bilé'eda'-nu, bubánide'eda'. <sup>7</sup> Gudxé' gubáz lá'ayi na' neda', gunné': "¿Bizx que rubáninu? Uzéajni'ida' lí' lè na' nagachí', le rulu'í ca naca nigula ni, enca' le rulu'í ca naca böa' sínia' na' dxianu-ba', böa' na' dxiagaca gadxi ícjaba', en chi lúzuba'. <sup>8</sup> Böa' sínia' na' bilé'enu' guzóaba' zí'alö, pero bití' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacué' luyú cabí nazúajgaca laguequi lu guichi que yöl-la' na'bán, le buzúajé' Dios dza ní'te quez cate' sí' gata' yödzo'lió. Cate' ila'lé'eni böa' sínia' na' guzóaba' zí'atélö, pero bití' zóaba' na'a, ulu'bani tu' nubanba'.

<sup>9</sup> Lè ni naca tu le uzéajni' nu gaca tséajni': Gadxi ícjaba' na' tu'luí'i gadxi guí'ado' gapa rō'ōnu nigula na'. <sup>10</sup> Lēscá caní gadxi ícjaba' na' tu'luí'i gadxé' bönni' ta'ná bē'ē. Gáyu'ē bönni' ni chigudödi quégaquié'. Tu'ē bönni' ni rinná bē'ē na'a, ate' ia'tué' bití' ridxíninē', pero cate' guidé', inná bē'ē tu chí'ido'osö. <sup>11</sup> Böa' sínia' na' guzóaba', pero bití' zóaba' na'a, rulu'í tu bönni' izxunu', inná bē'ē. Nuné' tsözxón bönni' gadxi na', ate' tödi ni ní'tiē' tsaz.

<sup>12</sup> Chi lúzuba' na' bilé'enu' tu'luí'i chié' bönni' ila'nná bē'ē. Bití' ta'z'í'ininē' yöl-la' unná bē', pero ila'z'í'ē yöl-la' unná bē' tu chí'ido'osö, en ila'nná bē'ē tsözxón len böa' sínia' na'. <sup>13</sup> Chié' bönni' ni, lēbisö nácagaquié', ate' ulu'dödē' yöl-la' unná bē' quégaquié', en le nazí' lu ná'agaquié' lu ná'aba' böa' sínia' na'. <sup>14</sup> Ila'díl-lalené' Bönni' na' náquié' Bö'cu' Zxíla'do', pero Lē' ucul-lē' légaquié', tu' náquié' Xángaca yúgu'tē nupa nácagaca xan, en náquié' Bönni' rinná bé'ené' yúgu'tē nupa ta'ná bē'. Nupa nacué'len Lē', bulidzé' Dios léguequi, en gurōé' léguequi, ate' tsaz dá'gaca Lē'."

<sup>15</sup> Gubáz lá'ayi na' gudxé' ca' neda', gunné': "Yugu' nísado' na' bilé'enu' gapa ni' rō'ōnu nigula udá dzaga na', tu'luí'i bönachi yugu' yödzo, en yugu' bönachi izá'a, en bönachi tuí'i yugu' didza' yúbölö, en bönachi yugu' luyú. <sup>16</sup> Chi lúzuba' böa' sínia' na' bilé'enu', en tu'luí'i chié' bönni', bití' ila'lé'ené'-nu nigula udá dzaga na' dxí'a, ate' ulu'cá'ané'-nu cá'asö, en xiguídisö. Ilahuē' xipéla'nu, en ulu'zéguié'-nu len guí'. <sup>17</sup> Dios uchízié' icja lādxi'do'gaquié' chié' bönni' na' le gun ga iluné' ca ré'eni quéziné' Lē', ate' ilácagaquié' tuz, en ulu'dödē'

yöl-la' unná bē' quégaquié' lu ná'aba' böa' sínia' na' para gaca ca rna xtidzé'ē. <sup>18</sup> Nigula na' bilé'enu'-nu rulu'í yödzo zxón na' rinná be'e nupa ta'nná bē' yödzo'lió ni."

### Riguinnaj yödzo Babilonia

**18** Gudödi na' bilé'eda'-nē' ia'tué' gubáz lá'ayi ruhuötjé' rirúajé' yehua' yubá, en dē lu nē'ē yöl-la' unná bē' zxón, ate' guyēpi yōsa bení' luyú ní'a que yöl-la' bení' queé' gubáz lá'ayi na'. <sup>2</sup> Bē'ē zidzaj didza' gubáz lá'ayi na', gunné':

¡Chibiguinnaj! ¡Chibiguinnaj Babilonia, yödzo zxón na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguinni xitsiní', en yugu' biguinni xihui' tu'zóaba' xilátjagacaba' ni'!

<sup>3</sup> Caní guca que yödzo na' ní'a que le gulún bönachi nacué' ni'.

Guluné' ga gulún bönachi yúgu'tē yödzo ca nácagaca le ta'zēsö ladxi' le ruá' dö'.

Nupa ta'nná bē' luyú yödzo'lió gulunlen légaquié' le ruá' dö',

ate' guta' yöl-la' tsahui' quégaquié' bönni' to'o tuti' nacué' yödzo'lió

tu' guyánda' yugu' le nazaca' gula'zē' ladxi' bönachi ni'.

<sup>4</sup> Ní'irö biyönda' ruí' didza' ia'tú nu zoa yehua' yubá, rna:

Gulí'ruaj lu yödzo na', libí'ili' néquili' quia' para cabí gunlí' dul-la' tsözxón len légaquié', en para cabí quí'i sáca'li' le gaca quégaquié'.

<sup>5</sup> Nayánda' dul-la' nabága'gaquié', en chinayasa nadxín caz lúzxi'ba, pero Dios rōjnené' le ruá' dö' núngaquié'.

<sup>6</sup> Bulí'bí'i quégaquié' ca na' guluné' queé'li'.

Bulí'bí'i quégaquié' chopa cō' tsca le guluné'.

Bulí'bí'i quégaquié' chopa cō' tsca le naca xihui' guluné' queé'li'.

<sup>7</sup> Gulí'gún ga ila'guí'i ila'záquié', en ila'bödxi yéché'ē tsca guca yöl-la' ba, en yöl-la' zxón gulu'í cuíngaquié'. Ta'zá' lādxi'gaquié', ta'nné':

Ró'ōtu' ni, rinná bē'ētū'.

Bití' nácatu' uzēbi, en catu caz cōdxi yéchi'tu'.

<sup>8</sup> Que lè ni na', tu dzasö ila'dxín quégaquié' le ila'guí'i ila'záquié',

yöl-la' guti, en yöl-la' ribödxi yechí', en yöl-la' ridún.

Iléguié' lu guí', tu' napa cazē' yöl-la' huáca zxón Xanru' Dios.

Lē' cazē' usiúdxé' quégaquié'.

<sup>9</sup> Ní'irö gunné': "Ila'bödxi nupa ta'nná bē' luyú yödzo'lió, en gulún le ruá' dö' tsözxón len légaquié', en bulu'z'í' xibé le nequi quégaquié'. Ila'bödxi', en ila'bödxi yéché'ē cate' ila'lé'ené' dzön que yödzo zxón na' régui.

<sup>10</sup> Zí'tu' zí'tu'sö ila'cu'ē' tu' iládxinē' ca gaca xíguia' le gaca que yödzo na', ate' ila'nné': ¡Bica' bayechí' Babilonia, yödzo zxón ni, le gúcada' lo! ¡Tu dzasö guca xíguia' que!"



<sup>11</sup> Ní'irö gunné: "Ila'bödxé' ca' bönni' to'o tuti' nacu'é yödzülió, en ila'bödxé yéché'è ní'a que yödzö na' tu' cabirö soa nu ga'u bi ilúti'è ní'." <sup>12</sup> Cúnturö nu ga'u ní':

Le néquiquequini oro, en plata,  
en yugu' guió' zaca', en yugu' bugá,  
en yugu' lari' nazáca'da', en lari' xiná chul-la,  
en lari' dxí'ado', en lari' xiná gu'ido'os,  
en yugu' yaga rilá' zxixi,  
en le néquiquequini dxita nazáca'da',  
en le néquiquequini yaga nazáca'da',  
en le néquiquequini guí'è cobre,  
en le néquiquequini guí'è,  
en le néquiquequini guió' jara.

<sup>13</sup> Cúnturö nu ga'u ní':  
Canel, en yugu' le rilá' zxixi, en yalaj,  
en le rilá' zxixi que mirra, en que yöj olíbano,  
en xisi uva nál-la, en le naca za,  
en yiózja dxí'ado', en xoa' xtila,  
en yugu' búrrodo', en yugu' bö'cu' zxila',  
en yugu' böa', en yugu' carreta,  
en yugu' bönni' huen dxin, en ia'bal-la bönachi.

<sup>14</sup> Nupa na' to'o tuti' ilé légaquié', ila'nná:  
Nadúagaca le guz'è ládxi'li'.  
Chigudödi quégaca yöl-la' tsahui',  
en le nácagaca lachi queé'li',  
ate' bítirö idzólilí' léguequi.

<sup>15</sup> Ní'irö gunné: "Ila'bödxé' bönni' to'o tuti' na' tu' guta' quégaquié' yöl-la' tsahui' tu' gulúti'è lu yödzö na', ate' ila'cu'è zítu' zítu'sö tu' iládxinè' ca gaca xíguia' le gaca que yödzö na', en ila'bödxé yéché'è." <sup>16</sup> Ila'nné:

¡Bica' bayechi' yödzö ni guca zxön!  
Guca ca tu nigula nácunu lari' nazáca'da',  
en lari' xiná chul-la, en lari' xiná gu'ido'os,  
en nazí' biquitaj queénu le néquiquequini oro  
en le néquiquequini guió' zaca', en yugu' bugá.

<sup>17</sup> Tu dzasö guniti yöl-la' tsahui' que yödzö ni.

Ní'irö gunné: "Yúgu'tè bönni' xan barco, en nupa nacuá' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'è zítu' zítu'sö."

<sup>18</sup> Cate' ila'lé'ené' dzön que yödzö na' régui, ila'bödxé', en ila'nné: "¿Bíxilo yödzö guca zxön ca naca yödzö ni?"

<sup>19</sup> Ní'irö gunné:

Ulu'dxié' bëchtö ícjagaquié'.  
Ila'bödxé', en ila'bödxé yeché'è, ila'nné'.  
¡Bica' bayechi' yödzö ni guca zxön!  
Yöl-la' tsahui' que yödzö ni ben ga guta' yöl-la' tsahui'  
quégaca yúgu'tè nupa nácagaca xan barco lu nísado'.  
Tu dzasö guniti yödzö ni.

<sup>20</sup> Buli'dzeja ca gaca que yödzö ni, libí'ili' zóali' yehua' yubá,

enca' libí'ili' néquili' queé' Dios,  
libí'ili', bönni' gubáz queé',  
en libí'ili', bönni' ruí'ili' didza' uláz queé'.  
Buli'dzeja, tu' chiguchúguié' Dios que yödzö ni  
ní'a que bi gulún queé'li' nupa nacuá' lu yödzö ni.

<sup>21</sup> Ní'irö tué' gubáz lá'ayi nál-la buchisé' tu guió'j zxön le naca ca tu guichi riyétu, ate' gurú'uné' le lu nísado', gunné:

La' canisö gaca que yödzö Babilonia,  
tu' iguinnaj yödzö na' guca lo,  
ate' bítirö nu udzöli le.

<sup>22</sup> Bítirö nu yöni lu yödzö na' nupa ta'guinni lé'e le rul-la,

en caléga nupa tu'cödxí gui  
en caléga nupa tu'cödxí lúzuba' böa' bédxi.  
Bítirö udzöli bönni' huen dxin ní',  
en bítirö yöni bö rigú'u le rutu ní'.

<sup>23</sup> Bítirö uzení' nitú gu' lu yödzö na',  
en bití' yöni chí'è bönni' rutsaga në'è ní',  
en caléga chí'ibi' bí'i nigula rutsaga ná'abi'.  
Caní gaca sal-la' nácalí' lo, libí'ili' rá'uli', en rúti'li' lu yödzö ni,

en guz'í' yé'eli' bönachi idütè yödzölió len yöl-la' gudzá' queé'li'.

<sup>24</sup> Lu yödzö ni gulaj xichóngaqueié' bönni' gulu'è didza' uláz queé' Dios,  
en xichóngaca nupa néquiquequi queé' Dios,  
enca' xichóngaca yúgu'tè bönachi yödzölió,  
tu' bétigaca nupa nacuá' yödzö ni léguequi.

**19** Gudödi lé ni biyönda' tu'í zidzaj didza' bönachi zían nacuá' yehua' yubá, ta'nná:  
¡Yöl-la' ba Dios! ¡Yöl-la' rusölá runé',  
ate' yöl-la' zxön, en yöl-la' unná bë' napé' Dios queé'ru'!

<sup>2</sup> ¡Naca idütè li, en tsahui' ca rusiúdxé'!

¡Guchúguié' que yödzö na' naca ca tu nigula udá dza-ga,  
en quégaca bönachi lu yödzö na' ila'niti tsaz!  
¡Gulún ditaj bönachi yödzölió tu' nözi le ruá' dö' gu-luné'!

¡Dios buz' lëbë' légaquié'  
tu' gulútié' yugu' huen dxin queé'!

<sup>3</sup> Leyübölö gula'nné: "¡Yöl-la' ba Dios! ¡Cuéntica'sö dzön ga régui yödzö na'!"

<sup>4</sup> Idapa uru'è bönni' gula ní' bulu'tsaga lógaquié' lu yu tsözxön len idapa nupa ní' nabángaca, en ta'yéaj ládxi'-gaquié' Dios, Bönni' rö'è lataj lo queé'. Gula'nné: "¡Ca' gaca! ¡Yöl-la' ba Dios!"

<sup>5</sup> Ní'irö biyönda' ruí' didza' tu nu zoa lataj lo na', rna:  
¡Guli'cu'è Dios queé'ru' yöl-la' ba  
yúgu'téli' runlí' xichinè', libí'ili' na' rádxilí' Lë',  
nácalí' bönachi cá'asö, en bönachi lo!

**Laní que yöl-la' rutsaga na' queé' Bönni' náquié' Bö'cu' Zxila'do'**

<sup>6</sup> Biyönda' ca' nu ruí' zidzaj didza', le biyón ca riyón cate' tu'í didza' bönachi zían, en biyón ca' ca riyón ga ridödi tu yegu zxön, o ca riyón cate' rinné guziú', ate' rna:

¡Yöl-la' ba Dios tu' risí lahué' rinná bë'è!

¡Napa cazé' yöl-la' huáca!

<sup>7</sup> ¡Ral-la' udzeja ládxi'ru', en uzí'iru' xibé',  
en cú'uru'-né' yöl-la' ba

tu' chibidxín dza laní que yöl-la' rutsaga na' queë' Bönni' na' náquië' Bõ'cu' Zxíla'do!  
 ¡Sí' lu në'ë Cristo nupa néquiguequi queë!  
 ¡Chinabá'a queébi' bi'í utsaga ná'alenbi' Lë!  
 ¡Nácabi' le rulu'í nupa na' néquiguequi queë!  
 8 ¡Dios ru'ë-bi' lataj gácubi' lari' nazáca'da' le naca idú, en rëpi yõsa bení!

Lari' nazáca'da' na' rulu'í le naca tsahui' núngaca nupa néquiguequi queë' Dios.

9 Ní'irõ gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bõ'cu' Zxíla'do!"

Gudxë' ca' neda': "¡Yugu' didza' idútë li ni ru'ë didza' Dios caz!"

10 Buzó'a zxiba' xini'ë gubáz lá'ayi na' para tseaj ládx-a'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca' nacu' li', en ca náca-gaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxë'ë Dios!"

Nupa tu'í didza' uláz queë' Dios, tu'í didza' le naca idútë li ca naca queë' Jesús.

### Bönni' dxíë'-ba' böa' chiguichi

11 Ní'irõ bilé'eda' nyalaj lúzxiba, ate' bulu'í loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ru'í Didza' Le Nácatë. Caní lë' tu' ruchi'a rusöröë' ca naca le naca idútë li, enca' caní tsejë' gudil-la. 12 Rëpi yõsa bení' guió'j lahuë', le náca-gaca ca guí, en dxíagaca icjë' zían le néquiguequini oro. Nazúaj lahuë' tu le lë', le cuntu nu nõzi, pero tuzë' Lë' nõzinë'. 13 Nácue' tu lari' në'aj rön, en lë' ca' "Nu Naca Xtídzë'ë Dios." 14 Rõjnõgaquië' Lë' ní'a në'ë guizxi yu nacu'ë yehua' yubá, dxíagaquië'-ba' böa' chiguichi, en náca-gaquië' lari' nazáca'da', le naca chiguichido'os, en bití' naca bösa. 15 Rirúaj ru'ë le naca ca tu guié' tuchi' le gúninë' zí' bönachi yugu' yödzö. Inná bé'enë' légaquië' len tu xiyaga guié, en gunë' légaquië' xíguia', le gaca quégaquië' ca raza que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. 16 Nazúaj lu lari' nácue', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Náca-gaca Xan."

17 Ní'irõ bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Gulí'dá, bulí'dubi ga ni gágulí' laní zxön queë' Dios! 18 Gágulí' xipéla'gaca nupa ta'nná bë', en xipéla'gaca nupa ta'nná be'e bönni' rójáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía léga-caba', en xipéla'gaca yúgu'të bönachi, nupa bití' nadó'ogaca, en nupa nadó'ogaca, nupa náca-gaca cá'asö, en nupa náca-gaca lo."

19 Ní'irõ bilé'eda'-ba' böa' sínía' na', enca' yugu' bönni' ta'nná bë'ë yödzölió, en bönni' rójáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ní'a në'ë guizxi yu. 20 Bidzunba' böa' sínía' na', enca' bönni' na'

bë'ë didza' uláz queéba', bönni' na' benë' yugu' le ná-cada' bë' loba', en guzxi' yé'enë' nupa ni' gulu'í lataj nu uzúaj láhuiguequi lë na' naca bë' dá'gaca lëba', en gula'yéaj ládxí'gaca budó' queéba'. Böa' sínía' na', enca' bönni' na' bë'ë didza' uláz queéba', gula'ru'unë' léguequi nabángacasö ca' ga rö'ö guí zxön le réguilen lë na' ruzégui'da'. 21 Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guié' tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' gulá-guba' xipéla'guequi.

### Chi gayuá' iz

20 Gudödi lë ni bilé'eda' ruhuójtjë' tu gubáz lá'ayi, zë'ë yehua' yubá, en zönë' zxi'ini guié' que lataj chul-la, ate' nu'ë tu du guié' yödx. 2 Guzxönë'-ba' bëla zxön xitsiní' na', náca-ba' bëla guzóaba' dza ní'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chi gayuá' iz. 3 Yöjchú'unë'-ba' lataj chul-la, en busayjë' lataj na', ate' budë'ë tu le riguela' le rusayaj lataj na' para cabirö sí' yé'eba' bönachi yugu' yödzö ga izá'arö chi gayuá' iz na', ate' tödi ní' ral-la' yédxiba' tu chí'ido'.

4 Ní'irõ bilé'eda' yugu' lataj gapa ta'bó' nupa ta'nná bë', ate' nupa bila'deli' ulu'chi'a ulu'söró le raza ta'bó' yugu' lataj na'. Bilé'eda' ca' yugu' bö' gulaca caz bönachi bulu'rixë' yénguequi yugu' bönni' bití' náca-gaquië' tsahui' tu' gulún ba nalí queë' Jesús, en tu' gulún libán que xtídzë'ë Dios. Yugu' bönachi ni bití' gula'yéaj ládxí'gaca böa' sínía' na', en budó' queéba', en bití' gulu'í lataj nu uzúaj ra' xigá-guequi, o lu né'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bé'len Cristo chi gayuá' iz, 5 pero ia'zica'rö bönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti gaca ni naca le raza zí'alö. 6 ¡Bica' ba, en bica' lá'ayi nupa ta'deli' yöl-la' rubán na' raza zí'alö! ¡Yöl-la' guti le raza burópilö bití' bi gaca gun qué-guequi, pero ilácagaca bixúz queë' Dios, enca' queë' Cristo, ate' ila'nná bé'len Lë' chi gayuá' iz na'!

7 Cate' izá'a chi gayuá' iz na', ulu'sanë' Satanás ga na' nadzún. 8 Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Sí' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca náca-gaca nupa ni, náca-gaca ca naca yuzxi rö'ö tu ra' yegu zxön. 9 Guizxi yusö gula'dödë' idútë luyú, ate' gula'cu'ë lé'ajlö lataj ga na' nacuá' bönachi néquiguequi queë' Cristo, le naca yödzö na' nadxi'inë' Dios. Ní'irõ benë' Dios ga böxaj guí' le birúaj yehua' yubá, le buzegui' légaquië'. 10 Tu' xihui' na' nazí' ye'e légaquië', yöjchú'unagaquië' le ga rö'ö guí zxön que lë na' ruzégui'da', ga na' chizóaba' böa' sínía' na', enca' bönni' na' bë'ë didza' uláz queéba'. Ila'gu'í ila'zaca' ní' rëla, en te dza yúgu'të iz zá'gaca.

### Ta'dxín bönachi lahuë' Dios ga rö'ë ruchi'a rusöröë'

11 Ní'irõ bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gu-

la'nítitë yödzülió, en lúzxiba, ate' bíti'rö budzüli xilát-jaguequi. <sup>12</sup> Bilé'eda' ca' nupa chinátigaca, nupa náca-gaca lo, en nupa náca-gaca cá'asö, zuíguequiné' lahué' Dios. Gula'yálaj guichi, en gualaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröé' Dios nupa na' chinátigaca tsa naca le nazúaj yugu' lu guichi na', lè na' gulúngaca. <sup>13</sup> Lu nísado' bulu'rúaj nupa chinátigaca, nacua' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröé' Dios tu tu tsa naca le gulúngaca. <sup>14</sup> Ní'irö yöjtsázagaca yöl-la' guti, en lataj chul-la ga ni' rö'ö guí' zxon le naca lataj que yöl-la' guti le raca burópilö. <sup>15</sup> Nupa bití' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

### Tu lúzxiba cubi, en tu luyú cubi

**21** Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' z'íalö. Bíti'rö dè nísado'. <sup>2</sup> Neda', Juan, bilé'eda' yödzo lá'ayi na', le naca Jerusalén cubi, ruhuötaj, rirúaj yehua' yubá ga zoé' Dios, en chinabá'a que ca nabá'a queébi' bí'i nigula chizóa utsaga ná'alénbi' tu bönni'. <sup>3</sup> Biyönda' ruí'i didza' nu rnna yehua' yubá: "¡Buyútsöca! ¡Ga zoé' Dios zóalen bönachi! ¡Sóalené' léguequi, ate' léguequi ilácagaca bönachi queé! ¡Dios caz sóalené' léguequi, en gáquié' Dios quéguequi! <sup>4</sup> Dios uzxié' nisa ribödxí zoa guió'j lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lè na' gulaca z'íalö."

<sup>5</sup> Ní'irö Nu na' rö'ö lataj lo ni' gunná: "¡Buyútsöca! ¡Yúgu'tè ruúna' cubi!"

Gudxi ca' neda': "¡Buzúaj lu guichi lè ni, tu' naca iduté li didza' ni, en naca löza!"

<sup>6</sup> Ní'irö gudxi neda': "¡Chinaca caz! ¡Neda' naca' Nu zoa z'íatëlö, enca' Nu röjsete ca naca le risí lo, en le ruúdxitè! ¡Nu ribidxi nisa, neda' guna' ga guí'aj nisa na' runna yöl-la' na'bán! <sup>7</sup> Nupa ila'deli' lu le raca yödzülió, gaca quéguequi yúgu'tè lè ni. Neda' gaca' Dios quéguequi, ate' léguequi ilácagaca xzí'ini caza', <sup>8</sup> pero nupa tadxi, en nupa bití' ta'yéajlè' neda', en nupa náca-gaca xihuí', en nupa tuti bönachi, en nupa tun le bití' naca tsahuí', en nupa náca-gaca udzá', en nupa ta'yéaj ládxi'gaca budó' guió'j budó' yaga, en yúgu'tè nupa ta'z'í yè', chizóa riböza xilátjaguequi lu guí', ga ni' rö'ö guí' zxon que lè na' ruzégui'da', lè na' naca yöl-la' guti le raca burópilö."

### Yödzo Jerusalén le naca cubi

<sup>9</sup> Ní'irö tué' gubáz lá'ayi nababè' gadxé' gubáz lá'ayi ni' gula'zönè' gadxi xzí'iga'do' yúdxugaca gadxi yödzhué' yöjsétegaca, bidé' ga zoa'. Gudxé' neda': "¡Gudá ni! ¡Ulú'ida' lí' bí'i nigula na' sí' utsaga ná'alénbi' Bönni' na' náquié' Bö'cu' Xzí'la'do'!"

<sup>10</sup> Guzóalené' Dios Bö' Lá'ayi neda', ate' guché'è gubáz lá'ayi na' neda' tu lu guí'a sibi, en buluí'iné' neda'

yödzo lá'ayi Jerusalén, ruhuötaj, rirúaj yehua' yubá ga zoé' Dios. <sup>11</sup> Yödzo ni rèpi yösa bení' tu' zóalen le yöl-la' bení' queé' Dios. Rèpi yösa bení' ca rèpi yösa bení' tu guió'j nazáca'da' ca naca guió'j guí'do'os nazí'i le jaspe. Naca yödzo na' yení'ido' ca naca guió'j jara. <sup>12</sup> Zoa tu zö'ö zxon, en sibi idú gásibi'ilö yödzo na'. Lè'e zö'ö na' nacua' chinnu gapa nu riyaza. Ra' gapa nu riyaza na' nacué' chinnué' gubáz lá'ayi tapa chí'è. Tu tu ga nu riyaza na' nazúaj tu tu lágaca idxinnu cö' dí'a dza xzí'ini xí'sóé' Israel. <sup>13</sup> Lè'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsólá'a ga ridödi gubidza beo' ziaga nacua' tsonna gapa nu riyaza, en saca' ga ribía gubidza nacua' ca' tsonna gapa nu riyaza. <sup>14</sup> Zxan zö'ö que yödzo na' nacua' chinnu xilibi zö'ö, ate' lé'egaca xilibi zö'ö na' nazúajgaca lágaquié' idxinnutè' bönni' gubáz queé' Bönni' na' náquié' Bö'cu' Xzí'la'do'.

<sup>15</sup> Gubáz lá'ayi na' ruí'ilené' neda' didza' zönè' tu yaga urixi le néquini oro para urixé' tsa naca yödzo na', en tsa náca-gaca gapa nu riyaza, en tsa naca zö'ö que.

<sup>16</sup> Yödzo na', lédi'i náca-gaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixé' tsa naca yödzo na', naca idú tsa gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. <sup>17</sup> Burixé' ca' yöl-la' yödx que zö'ö na', naca tu gayuá' yu' tapa-un dxita, tsa naca dxita que na' bönachi, lè na' rurixiné' gubáz lá'ayi na'.

<sup>18</sup> Zö'ö na' néquini guió'j jaspe, ate' yödzo na' néquini órotèz, le naca yení'ido' ca naca guió'j jara. <sup>19</sup> Yugu' xilibi zö'ö que yödzo na' nazí'gaca biquitaj guió'j nazáca'da'gaca.

Xilibi zö'ö z'íalö néquini guió'j jaspe.

Le buropi néquini guió'j zafiro.

Le bunni néquini guió'j ágata.

Le budapi néquini guió'j esmeralda.

<sup>20</sup> Le guyu' néquini guió'j ónice.

Le buzxopi néquini guió'j cornalina.

Le igadxi néquini guió'j crisólito.

Le izxunu' néquini guió'j berilo.

Le igá néquini guió'j topacio.

Le idxí néquini guió'j crisoprasa.

Le idxinéaj néquini guió'j jacinto.

Le idxinnu néquini guió'j amatista.

<sup>21</sup> Chinnu gapa nu riyaza na' ta'yájani chinnu bugá. Tu tu ga nu riyaza na' riyájani tuz bugá. Luyú la' nöza lo que yödzo na' néquini órotèz, le naca yení'ido' ca naca guió'j jara.

<sup>22</sup> Bití' bilé'eda' tu yudo' lu yödzo na', tu' náquié' Xanru' Dios yudo' que, napa cazé' iduté yöl-la' unná bè', en lèscá' caní náquié' Bönni' náquié' Bö'cu' Xzí'la'do', náquié' yudo' que yödzo na'. <sup>23</sup> Bití' run bayudxi tsení'gaca gubidza, en beo' lu yödzo na', tu' uzéní' yöl-la' bení' queé' Dios lu yödzo na', ate' lèscá' Bönni' náquié' Bö'cu' Xzí'la'do' náquié' le uzéní' ni'. <sup>24</sup> Bönachi yugu' yödzo, nupa nulágaca, ila'dá lu bení' que yödzo na', ate' yugu' bönni' ta'nná bè'è yödzülió idiguá'agaquié'

yöl-la' tsahui' quégaquië' lu yödzo na'. <sup>25</sup> Catu caz tsáyajgaca gapa nu riyaza lu yödzo na' lahui' dza, ate' lataj na' catu caz gaca rêla. <sup>26</sup> Bönachi yugu' yödzo idiguá'agaquië' ni' le nácagaca lesaca', en yöl-la' tsahui' quéguequi. <sup>27</sup> Tu le ruá' dö' bití' ca' tsaza ni', en calëga tu le naca xihui', en calëga nu rizí' yë', pero tsázagacaso ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéligaca yöl-la' na'bán.

**22** Ní'irö gubáz lá'ayi na' buluí'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guió'j jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. <sup>2</sup> Rizá' yegu ni gatsaj láhui'lö nöza lo que yödzo na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xiláguigaca yaga na' nácagaca le tu'ún bönachi yugu' yödzo. <sup>3</sup> Bití' soa ni' nitú le dxía dö'. Soa lu yödzo na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'. <sup>4</sup> Ila'lé'enë' lahuë' Lë', ate' le nazí'i Lë' nazúaj ra' xigá-gaquië'. <sup>5</sup> Bití' gaca rêla ni', ate' nupa nacua' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacua' ni' ila'nná bé'tica'sö.

#### Chizóa huödë' Cristo

<sup>6</sup> Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusól-lë'ë gubáz lá'ayi queë' para uluí'inë' yugu' huen dxin queë' le ral-la' gátatë. <sup>7</sup> Caní rnnë' Jesucristo: ¡Chizóa huöda! ¡Bica' ba nu run ca rna didza' ruá'a uláz queë' Dios, le nazúaj lu guichi ni!" <sup>8</sup> Neda', Juan, biyönda', en bilé'eda' yugu' lë ni. Gudö-di biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön. <sup>9</sup> Ní'irö lë' gudxë' neda': "Bití' gunu' caní, tu' naca' neda' huen dxin queë' Dios ca nacu' lí', en ca nácagaquië' böchí' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

<sup>10</sup> Gudxë' ca' neda': "Bití' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. <sup>11</sup> Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxí'a, gúntica'sö dxí'a, ate' nu nequi quez queë' Dios, guéquitica'sö quez queë'." <sup>12</sup> Rnnë' Jesús: "¡Chizóa huöda! Nu'a lu na'a le nadéligaca bönachi, ate' ubí'a que queë'guequi tscá naca le gulúngaca. <sup>13</sup> Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

<sup>14</sup> Ní'irö gunné': "¡Bica' ba nupa nayari le nácugaca, en tun le naca dxí'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzo na'! <sup>15</sup> Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guió'j budó' yaga, en nupa ta'yaza ládxi'gaca ta'z'í yë' ila'cuá' ní'ilö ra' yödzo na'. <sup>16</sup> Neda', Jesús, gusól-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' dí'a dza queë' David, enca' zxí'ini xí'sóë'. Naca' ca' bölj hui sila."

<sup>17</sup> Tu'ë didza' Dios Bö' Lá'ayi, enca' bí'i nigula utsaga ná'alenbí'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizé ladxí' le, ral-la' guídi, en gu'aj nisa le runna yöl-la' na'bán!

<sup>18</sup> Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnní'a: Channö nu udá' lë'ë didza' ni, Dios ubí'ë que nu na'. Gunë' lë' xíguia' ca naca le nazúajgaca lu guichi ni.

<sup>19</sup> Lësca' caní, channö nu cúa bítí'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéligaca yöl-la' na'bán idú, enca' lu yödzo lá'ayi, ca na' nazúaj quéguequi lu guichi ni.

<sup>20</sup> Xanru', Nu run ba nalí quéguequi lë ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

<sup>21</sup> Rinábida'-në' Xanru' Jesucristo uzá ládxi'ë queé'li' yúgu'tëli'. ¡Ca' gaca!